


Eta Táurinaquene máechajiruvahi ema Viya eta
viyehe, ticajare puito Eta Nuevo Testamento



New Testament in Ignaciano (BL:ign:Ignaciano)

Eta Táurinaquene máechajiruvahi ema Viya eta viyehe, ticajare puito Eta Nuevo Testamento New Testament in Ignaciano (BL:ign:Ignaciano)

copyright © 2012 Wycliffe Bible Translators, Inc.

Language: Ignaciano

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ignaciano

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022
332465cd-916c-5bfc-8721-b0114be92360

Contents

San Mateo 1
San Marcos 85
San Lucas 139
San Juan 230
Hechos 293
Romanos 372
1 Corintios 405
2 Corintios 439
Gálatas 460
Efesios 473
Filipenses 485
Colosenses 493
1 Tesalonicenses 501
2 Tesalonicenses 508
1 Timoteo 512
2 Timoteo 522
Tito 529
Filemón 533
Hebreos 535
Santiago 561
1 Pedro 570
2 Pedro 579
1 Juan 585
2 Juan 593
3 Juan 595
Judas 597
Apocalipsis 600

Emá Apóstole Mateo májuequenehahi eta máichararacavahi emá Jesucristo, ticaijare puiti eta EANGELIO SEGÚN SAN MATEO

*Ena achaneana máchucáequeneanaini emá Jesús eta acane
(Lc 3.23-38)*

¹ Nuvaraha numetacaheya mayehe emá Jesucristo. Éma, vijaneanahi israelítahi, taicha eta mámariequenerahi emá viáchucaini Abraham. Énerichuware, emá Jesús rey-yarehi taicha eta mámariequenerahi emá víyarahaini rey David. Eta juca eta nalista emá máchucáequeneanaini emá Jesús.

² Emá víyarahaini Abraham, macachichapa emá Isaac. Emá Isaac macachichapa emá Jacob. Emá Jacob macachichapa emá Judá énapa emá apamuriana maparapeneana.

³ Emá Judá macachichapa emá Fares émapa emá Zara. (Esu naena ticaijaru Tamar.) Emá Fares macachichapa emá Esrom. Emá Esrom macachichapa emá Aram.

⁴ Emá Aram macachichapa emá Aminadab. Emá Aminadab macachichapa emá Naasón. Emá Naasón macachichapa emá Salmón.

⁵ Emá Salmón macachichapa emá Booz. (Esu maena ticaijaru Rahab.) Emá Booz macachichapa emá Obed. (Esu maena ticaijaru Rut.) Emá Obed macachichapa emá Isái.

⁶ Emá Isái macachichapa emá rey David. Emá rey David macachichapa emá Salomón. (Esu máenaini ticaijaru Betseba, esu mayenainihi emá Urías.)

⁷ Emá Salomón macachichapa emá Roboam. Emá Roboam macachichapa emá Abías. Emá Abías macachichapa emá Asa.

⁸ Emá Asa macachichapa emá Josafat. Emá Josafat macachichapa emá Joram. Emá Joram macachichapa emá Uzías.

⁹ Emá Uzías macachichapa emá Jotam. Emá Jotam macachichapa emá Acáz. Emá Acáz macachichapa emá Ezequías.

¹⁰ Emá Ezequías macachichapa emá Manasés. Emá Manasés macachichapa emá Amón. Emá Amón macachichapa emá Josías.

¹¹ Emá Josías macachichapa emá Jeconías énapa emá maparapeneana, emá nacataruanahi námaqueneanahi emá apavasana ticavasanahi te Babilonia.

¹² Te táequenepa eta juca, emá Jeconías macachichapa emá Salatiel. Emá Salatiel macachichapa emá Zorobabel.

¹³ Emá Zorobabel macachichapa emá Abiud. Emá Abiud macachichapa emá Eliaquim. Emá Eliaquim macachichapa emá Azor.

¹⁴ Emá Azor macachichapa emá Sadoc. Emá Sadoc macachichapa emá Aquim. Emá Aquim macachichapa emá Eliud.

¹⁵ Emá Eliud macachichapa emá Eleazar. Emá Eleazar macachichapa emá Matán. Emá Matán macachichapa emá Jacob.

¹⁶ Emá Jacob macachichapa emá José, emá suímahi esu María, máenahi emá Jesús, emá ticaijare Cristo, emá vicuchapaquenehi.

¹⁷ Tacahe, catorcemuriana emá mámariequeneanainihi emá Abraham. Emá rey David, émapa náichecuinehi eta natupa. Tacahe, emá rey David, catorcemurianavare emá mámariequeneanainihi. Ena nacataruanahi

námaqueneanahi ena apavasanana te Babilonia, énapa náichecuinehi eta natupa. Ema Jeconías, catorcemuriana ena mámariéqueneanainihi. Ema Jesucristo, émapa náichecuinehi eta natupa.

Eta máuchusira ema Jesús

(Lc 2.1-7)

¹⁸ Ani tacahehi eta máuchusirahi ema Jesucristo. Esu maena María, tráuripahi eta suitauchirayarehi ema José. Vuíchahasera nacachanecacahini. Ticajaripahisera ésu, mávajúechirahi ema Espíritu Santo.

¹⁹ Ema José, tétavicavahi eta máuriva. Eta tacahe, vahi tisemaimahi. Váhivare mavarahahini máimicatsiriachahini esu María. Mavarahahisera macaepaha eta matratune suyehe ésu. Váhiserá mávarahahini náechahini ena achaneana eta tacayemaquenehi.

²⁰ Ema Viya máimaracahi eta mapanereruhi. Eta tacahe, tiúcupaicapa ema ángele mametapanahi te mavapure ema José. Ánipa máicha*:

—Tata José, tímitecanuhi numetapanavi eta juca: Vahi picueñamava eta pítauchirayare esu María. Tájina píchavaimahi. Taicha ticajaripahi ésu, mávajúechirahi ema Espíritu Santo.

²¹ Tacahe, te máuchucapa ema suchichayare, enacayare eta máijareyare JESÚS. Éma ticatiuchayare ena achaneana tayehe eta naviurevanayarehini taicha eta napecaturana —máichapa ema ángele.

²² (Títauchavapahi tamutu eta juca máechajiriruvanahi ema Viya mayehe ema víyahaini profeta Isaías.

²³ Ani tacahehi: “Sutiarihiyare esu amaperu esena témunahiricavaya ticajari. Ema suchichayare, yátupiqueneyare eta émaira Viya, tiúcupauchahiviyare ticatiuchahavipanayare” tacahepa.)

²⁴ Tacahe, te téjamiuchavapa ema José eta macavapureirahi, ichaperinehi eta masuapirahi eta máechajiriruvanahi ema ángele mavaneruhi ema Viya, eta máitauchirayarehi esu María.

²⁵ Váhiserá nánecacahini te jena cájeanahi eta sucajarirahi. Tacahe, suínacapa ema suárachichahi. Nanacapa eta máijarehi JESÚS.

2

Náejirapana ema amuya ena reye mágoana

¹ Eta máuchusinehi ema Jesús te avasare ticaijare Belén tayehe eta departamento Judea. Te jena año, ema Aluresi ema tayehehi rey eta Judea. Tásiha, títecapanapa te Jerusalén ena reye mágoana tíasihanahi te tayerehiquene avasare tinapaica te táuchusine eta sache.

² Nacayasesererupaipahi, ánipa nacahe:

—Víti, tímitecahavi eta vitanusirahi ema amuya máuchurehi rey-yarehi eyehe eti israelítana. Taicha vímahahi eta arairu jarairiqui, vémetearuhi máicutiarahi ema Viya eta máuchusinehi ema amuya rey-yare. Titupihapa eta te juca eyehe. Puiti vivarahahi véjirapanayare éma. ¿Távihapuca mávihahi ema amuya? —nacahepa.

³ Te masamairicapa ema Aluresi, ichaperinehi eta mapaneréqueneháirahi. Vaipa máurisamurehíni. Ena achaneana te tajuhe eta avasare, énerichuvare napaneréquenehahi éna apanavare eta juca téchacarehi.

* **1:20** Ema ángele, eta máechajisirahi ema José, manacahi eta nayherepi náechajisira ena israelítana. Ani macahehi: “Piti José, machicha ema David”.

⁴ Tacahe, ema Aluresi máimichuhavacapa namutu ena tuparairucana énapa ena títuruequenehana eta Sagrada Escritura. Mayaserecavacapa:

—¿Távihapuca máuchusihayarehi ema vicuchapaquenehi ticaijareyare Cristo? —macahepa.

⁵ Éna najicapapa:

—Te Belén te tachacaya eta juca viávasa Jerusalén. Taicha tacahehi eta májurehi ema víyarahaini profetaini Isaías. Máechajicahi éma eta avasare tímícutijiricavahi eta achanénahini. Ánipa macahe:

⁶ “Piti avasare Belén, tachichavihi eta Judea, picunachacarepánayare píti. Taicha eta máuchusihayarehi piyehe ema ichapequeneharehi eta máháquenucávayare. Éma, téchapajirimurihayare namutu ena vijaneanana israelítana”.

⁷ Tacahe, te masamapa ema Aluresi, máichuhavacapa ena mágoana. Mañajichamuripa, taicha mavaraha máechaya tájamuhupuca te tépanavainapa náimahapa eta jarairiqui.

⁸ Te máechapa, mavanecavacapa éna te Belén. Máichapa:

—Eyana etanuca ema amuya te Belén. Te étupiacapuca, echava emetacanyuare, apaesa nuyana núti apanavare néjirapanayare —máichavacapa.

⁹ Tacahe, ena mágoana, eta nasamirahi, tiyananavarepa. Tásiha, náimaha-varepa eta jarairiqui náehirupahi. Tiyanapa te namirahu. Étape te Belén eta tatupihaiyahi, te táinahu eta mávihahi ema amuya.

¹⁰ Tétavicava eta náurisamurevahi ena mágoana eta náimairahi eta tatupihairaripa.

¹¹ Titecapánavanepa eta te peti mávihahi ema amuya. Náimahapa éma, ésupa esu maena María. Tásiha, tépuyucanapa natsiucapa ema amuya. Nave-cuhapa eta námavahuanapahi. Nájaracasichapa eta oro, eta incienso étapa eta táijiyequene perfume.

¹² Te táequenepa eta náejirairahi ema amuya, tichavanayarepa te návasa. Apanapasera eta achene eta nayanihapahi, taicha ticametacasianapa te navapure vaipa nacuetavajica te mávihahi ema Aluresi.

Éma José ésupa esu María náimijunapa ema amuya te Egipto

¹³ Tacahe, te táequenepa eta nayanirahi ena mágoana, tiúcupacapa ema émana ángele mavaneruhi ema Viya, mametapanayarehi ema José te mavapure. Ánipa máicha:

—Pécheputa, José. Piyana piáma ema amuya ésupa esu María tayehe eta Egipto. Pinasiyare ánaqui. Tiámainucava te numetacavivare eta pichavirainapa, taicha ema Aluresi titecayare matanucayare ema amuya, mavarairahi macapacayare —máichapa ema ángele.

¹⁴ Tacahesera ema José técheputa. Tétupirícavanavanepa te jena yati. Tiyananapa námapa ema amuya tayehe eta Egipto.

¹⁵ Nanasipa ánaqui. Tiámainucava te tépenapa ema Aluresi, ticavanahiana-varepa mayehe ema ángele eta nachavirayare. Tamutu eta juca títauchavahi eta juca mametarapi ema Viya eta te Sagrada Escritura, ani macahehi: “Te Egipto nímijunaiyahi ema nuchicha. Te táequenepa, níchuhayarepa éma”.

Éma Aluresi máimicapapajicapa ena amuyanaini te avasare Belén

¹⁶ Tacahe, ema Aluresi te masamairiricapa eta nánucuiraripa ena mágoana, tiseमारिनेhi eta navayuasirahi. Máimivanerecapa nacapapajicapana namutu ena amuyana ajairana tiávihanahi te Belén énapa ena tiávihanahi te tachacayahana, ena ticayehearipa apina año énapa ena náuchusirávana. Máepanaequenehapa eta táuchusihahi eta jarairiqui náimahaquenehi ena mágoana.

¹⁷ Tacahe, te Belén eta táitauchiravahi eta májuchaquenehi ema víyarahaini profetaini Jeremías. Ani tacahehi:

¹⁸ “Tétavicavahi eta najapanuiravahi ena esenana. Ichape eta náiyairahi taicha ena suntaruana nacapapajisirahi ena nachichanaveana. Nájina naratahahini nacamatinaahini taicha eta najapanuiravahi ichape” tacahepa.

¹⁹ Tacahe, te jácani año te táequenepa eta máepenirahi ema Aluresi, tiápechavavarepa ema ángele máechajicahi ema José te mavapure ánaqui te Egipto. Ánipa maicha:

²⁰ —Pécheputa, José. Piveha ema amuya ésupa esu maena. Piyana pichava te piávasa Israel taicha vaipa táefnamavacare. Tépenaipahi ema tipanereuchainihi ticapacayarehini ema amuya —máichapa ema ángele.

²¹ Jéhesare, ema José téchepucapa. Tétupiricavapa, ésupa esu maena ema amuya. Tiyananapa tichavanahi tayehe eta návasa.

²² Tacahe, eta napaisirapahi eta nachavirapa tayehe eta návasa, masamairiricapa ema José eta maviravaipahi aquenuca ema Arquelao, machicha ema Aluresini. Tipicapa ema José machavahini tayehe eta Belén. Tásiha, ema ángele mápechavarepa máechajicahi te mavapure eta matupiruirayarepa te Nazaret te tinapaica Galilea.

²³ Te títetapanapa, ánaqui étapa náejasihahi. Tacahehi eta táitauchiravahi eta táechajiriruvanahi eta Sagrada Escritura nájureanahi ena profetanaini eta macaijarerayarehi Nazareno ema Jesús.

3

*Éma Juan Tícachasiricarahi tépanavapa ticametarairu eta máechajiriruva ema Viya nayehe ena vámahicuruhana
(Mr 1.1-8; Lc 3.1-9, 15-17; Jn 1.19-28)*

¹ Tacahe, te jácani treinta áño, matiarihivare ema achane ticaijare Juan. Éma, máichuhaquenehi ema Viya eta macametarairuirayare, máetupiricavacayare ena achaneana. Tacahe, masupahi eta matuparahahi. Tiyanapa vámahicuruhapa. Váipa avasarecuruhainahini. Ticametarairupaipa nayehe ena macutiqueneanahi vámahicuruhana, ticavasanahi te tachaui eta Jordán te tinapaicahi eta Judea.

² Ánipa macahehi eta máimituresirahi:

—Ítsivacha eta epanereruana. Éneuchava mayehe ema Viya, taicha márjapainapa ema aquenucayare mavaneruhi ema Viya —máichavacapa.

³ Ánaquiaparipahi eta áñoana acane, ema Viya mametacapa ema víyarahaini profeta Isaías eta mapanereruhi, eta mavanesarayare ema Machicha te juca apaquehe, ticatiurahiyarehi eta tímitecayarehi. Énerichuvare matiarihiyareva ema apana achane máichuhaqueneharehi ema Viya. Macametarairuyarehi, máetupiricavacayare ena achaneana, náinajisirayarehi eta napanereruana tamauriqueneana, apaesa táuri eta najacapirayare ema

Machicha ema Viya. Émaripa ema Juan, ema máechajisihaquenehi ema Viya, máetupiricavacayare ena achaneana.

⁴ Ema Juan, vanairucahi me Viya, profetahi éma. Eta mamuirihahi eta náitsameru tajiyaha eta náitátiquene ticajare camello. Eta máitijuhe, vácapi jayumepi. Eta maniriji manicasare eta tsacara. Eta matítivera eta mápama.

⁵ Tiyananavare nacapayaca ena achaneana ticavasana te Jerusalén, navarairahi nasamararaca eta máechajisihaquene; énapa ena ticavasana te Judea, énapa ena tiávihanahi tayehe eta cajacure Jordán.

⁶ Tacahe, eta nametauresiravaipa, navarairahivare náinajica eta napeca-turana, ema Juan máicachasicavacapaipa te cajacure Jordán.

⁷ Énaripa ena fariséoana énapa ena saducéoana nayanauchahivare ema Juan. Vahi náeneuchavahini, navarahahisera ticaicachasiana. Tacahe, ema Juan máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairiricahipuca eta járajapairayarepa eta táinehiquenyare ecuñaraqui. Evarahhipuca iúchucuha.

⁸ Tiuri puiti, te evarahapuca eta iúchucuha, yátupina tátupiruva eta epanereruana. Ímrecava eta ínajisiraya eta epecaturana.

⁹ Váhivare ecucajamurava eta mámariéqueneháirahehi ema viáchucaini Abraham. Taicha tayanapane mámarihepuca éma, váhisera iúchucuhaímahi te vahi ecuitsivacha eta epanereruana. Ema Viya, tájina máemaitucaímahi éma. Te mávarahapuca, vahi máejecarachaimahi máepiyaca achaneanaina eta juca mari, mavarairainahi yátupina ena mámariéqueneanaina ema Abraham.

¹⁰ Ecauneuchava, taicha tiánehipa eta táitecapauchirahaviyare eta ecuñaraqui nayehe ena achaneana máitucarahanahi téneuchavana, váhivare náitsivachahini eta napanereruana. Tímicutijirícavaipa te máechucayarepa ema achane eta yucuqui máhireana. Ticaechuyarehi tamutu eta tapareana. Tíjuyarehi.

¹¹ Yátupi núti nícachasicahahi te une, te éneuchava mayehe ema Viya. Ávanepaipahisera mácani ema yátupiquene Cristo. Te yátupina ecasiñava mayehe, tícachasicahayareva; tíjaracaheyareva ema Espíritu Santo. Téhesera vahi ecucasiñavapuca mayehe, tícuñacaheyare tayehe eta táijurequene yucu. Éma, ichapequenehi nuyehe núti. Váiparinehi nácutinasímahi eta máitupajijiasiravahi. Váiparinehivare nácaemuñavaimahi macamusuranuhini núti páuresami.

¹² Puiti éma márjapainapa tinerejiricainapa nácani yátupiqueneana téhicana. Máunacainapa éna. Ticutinapa mácani achane te tiácatayajirica eta arusu. Máunacainapa. Tásiha, máquijicapa eta tapiraquíji. Máijuchayarepa te yucu. Eta nacaheyare ena máurirahanahi, tíjuanáinapa te yucu, máitavacayarehi eta namuruira —máichavacapa ema Juan.

*Eta macaicachasirahi ema Jesús
(Mr 1.9-11; Lc 3.21-22)*

¹³ Tacahe, títecapavarepa ema Jesús te cajacure Jordán te mávihahi ema Juan. Éma, másihapahi te tinapaica eta Galilea. Mavarahahi ticaicachasiyare mayehe ema Juan.

¹⁴ Émasera ema Juan, vahi mávarahahini máicachasicahini. Ánipa macahe:

—Tata Jesús, nútira táuricahi nútivaina pícachasicanu. Nusapihapa nútí picaijuhenuhi eta nícachasicaviya —máichapa.

¹⁵ Émasera ema Jesús majicapapa:

—Tájinachucha táichava. Ticamunucarehi nítauchayare eta mavarahaquenehi ema Nucaiyaquene —máichapa.

Tásiha, ema Juan tísapavapa.

¹⁶ Te tamutupa eta macaicachasirahi ema Jesús, tiúcupaicapa tayehe eta une. Tásiha, tñahúchavapa téjiaca eta anuma. Máimahapa ema Espíritu Santo tiúcupaicapaipahi, mavasimahipaipa eta paloma. Tavenesicapa ema Jesús.

¹⁷ Tacahe, tiáramicarepa eta mahu ema Viya tásihaquenehi te anuma, ánipa macahe:

—Ema maca ema yátupiquenehi nuchicha némunaruquenehi. Tétavicavahi eta núrismurevahi máicha —macahepa.

4

Emá Váinaraji Satanás mavaraha macaitsamaraji ema Jesús

(Mr 1.12-13; Lc 4.1-13)

¹ Tacahe, ema Espíritu Santo enurujipa máimitucaipahi ema Jesús eta mayaniraya te mávapahi apaquehe. Ánaqui macuchapayarehi eta máitsamarajiyare ema Váinaraji.

² Tájina manicahini ema Jesús te jena cuarentaquenehi sache, cuarentavare yati eta mayerevahi. Ichapepa eta máecuavahi.

³ Tásiha, ema Váinaraji témeñhavapa mayehe. Mavarahapa macaetemayarehi. Ánipa máicha:

—¿Péculhapa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masi? —máichapa.

⁴ Ema Jesús majicapapa:

—Váhipuca pecha eta táechajiriruvahi eta Sagrada Escritura, ani tacahe: “Vahi tacarichuimahi eta tinicacare ticaitarecayare ena achaneana. Tacachaneyarehi eta máechajiriruvana ema Viya. Jéhevere, éta ticaitarecarahiare” macahepa.

⁵ Tásiha, ema Váinaraji má mavarepa tayehe eta tacapicahuquene avasare Jerusalén. Máimiapanapa te táinahu eta Templo.

⁶ Tásiha, máichapa:

—Te yátupina machichavina ema Viya, písapavayare pémirica te apaquehe. Tájina pichavaimahi eta pémirisirayare. Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajiricaviana. Tiámavianayare te navahuana, apaesa vahi picucayutetu eta máriana eta te pipaisirayare” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

⁷ Tacahe, ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamarajimahi ema Viya, taicha Piáquenuhi éma” —máichapa.

⁸ Tacahe, ema Váinaraji má mavarepa te táinahu eta anuquehe mari cerro. Máimechapa tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha

ema Váinaraji. Máimechavarepa eta ichapequeneana náimahaqueneana ena achaneana.

⁹Tacahe, máichapa:

—Núti níjaracaviyare tamutu eta juca avasareana. Pítina náquenuvina ena távacuanahi eta avasareana. Pépuyucanumasera te numirahu. Pitsiucanu apaesa níjaracavisarepa tamutu —máichapa ema Váinaraji.

¹⁰Émasera ema Jesús majicapapa:

—Pévuishatataji piti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumirauchayare. Macarichuvare vicaemataneacayare” tacahepa. Váhiquene táurica nucaemataneacavihini —máichapa ema Jesús.

¹¹Tacahe, ema Váinaraji térajicavapa. Majunijicapa ema Jesús. Tásiha, tiúcupaicanapa ena ángeleana, náechapajiricapa ema Jesús.

Emá Jesús tépanavapa ticametarairu

(Mr 1.14-15; Lc 4.14-15)

¹²Tacahe, te jena sácheana, nacaratacapa ema Juan. Námapa te jácani tayerehiquene. Tacahe, ema Jesús, eta masamairirisirapa eta macaeratairahi te cárcel ema macheji Juan, tiyanapa tichava te mávasa Nazaret te Galilea.

¹³⁻¹⁷Váipasera mánasihini te majurusinehi. Tiyanapa tayehe eta avasare Caperaum. Étape máejasihahi. Eta juca avasare táviahahi te tachausi eta cáquiure Galilea. Eta macametarairuirahi, tamutuhi mapaica eta tinapaica eta provincia Galilea*

—Éneuchava mayehe ema Viya. Ítsivacha eta epanereruana, taicha tiánehi eta sácheyare tímerecavaya eyehe ema ticatiuchaeyare. Aquenucayare mavaneruhi ema Viya, téchaeyare éma —máichavacapa.

Eta juca títauchavahi eta májureanahi ema víyarahaini profeta Isaías, ani tacahehi: “Tiúricacareanainapa ena achaneana cávasanahi te tachausi eta cáquiure Galilea tayehe eta provincia Zabalón étape eta Neftalí, namutu támairiaca ena ticavasana te apachara eta Jordán. Éna, tiyerehi eta nacatajivairanahi, tacuti eta tavayureva eta tamapicuva. Puítisera máitecapauchavacarihiri ema tímícauchamurihi. Ticatiuchavacayarehi tayehe eta nacatajivairahi. Éma, tétumechavacahivare eta mamícauchiravacahi” tacahepa.

Emá Jesús máichuha ena cuátroqueneana ténicarahiana, máimitureanayare

(Mr 1.16-20; Lc 5.1-11)

¹⁸Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema ticajarehi Simón Pedro émapa ema maparape Andrés. Eta náematanerepi ena nani, ténicarahanahi. Náquijiercahi eta nayehe tarrafa.

¹⁹Tacahe, ema Jesús máichuhavacapa:

—Yare, éhicanu. Núti níjaracaheyare eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranayare ema Viya —máichavacapa.

* **4:13-17** Ema profeta Isaías, ánvare macahehi eta máechajisihairahi: “...étaripa eta provincia táviha náitecapihahi ena apavasanana”. (Acane eta juca apaquehe, apina eta apana tájijareanaini: eta Zabalón étape Neftalí.) Eta máimitusiravacahi ena achaneana, ánipa maicha ema Jesús:

²⁰ Enevanepa náinajicapa éna eta náenisirahi. Tiyananapa náehicapa ema Jesús.

²¹ Ánaquipanavarepa máimahavarepa ema Jesús ena apinana ticaparape-cácanavare: ema Jacobo émapa ema Juan. Téjacanahi te napacure. Matiari-hihivare ema naiya Zebedeo. Náititijiricahi eta nayehe tarrafa. Ema Jesús máichuhavarepa.

²² Enurujipa náehicavare. Nanaquicavarepa eta napacure, émapa ema naiya. Najunijicavarepa.

Ema Jesús máimitucavacapa ena camuriqueneana achaneana

(Lc 6.17-19)

²³ Eta mapaisirahi ema Jesús tayehe eta avasareana te Galilea, máimitucavacapahi ena achaneana te sávarumuhuana tayehe eta náurujisirarevana. Mavanecapa eta náeneuchiravaina taicha tiánehipa eta sácheyare tímerecavayare ema ticatiuchayare, ema aquenucayare mavaneruhi ema Viya. Énerichuvare ema Jesús macanaracaphivare tamutu eta apanapanequeneanahi jumareana eta najumanapahi ena achaneana.

²⁴ Tacahe, nasamairiricapa ena achaneana ticavasanahi eta tasimutuqueneana avasareana te tinapaica eta Siria. Tásiha, námavacapaipa ena nacajumaqueneana, apanapanenejiquenehi eta najumana, nacatiruhavanahi. Énaripa ena návaháruanahi ena éreanana, ena tirapapasiana, énapa ena muracaquihana. Namutu ena nani, macanaracavacapahi ema Jesús.

²⁵ Tacahe, camuriana ena achaneana téhicanahi éma. Éna, tiásihana te Galilea, te Judea, te Jerusalén, te avasareana tinapaica eta Decápolis, étapa te apachara eta Jordán.

5

Ema Jesús máimitucahi nayehe ena ticunachacareanahi me Viya

(Lc 6.20-23)

¹ Tacahe, eta máimairavacahi ema Jesús ena camuriqueneana achaneana, tiápanapa tayehe eta anuquehepahi apaquehe taicha tiúripanahi eta nasamararasirayarehi ena achaneana. Téjacaripa éma, énapa ena máimitureana nachayacapahi.

² Ani tacahehi eta máimiturapianahi:

³ —Ena náimatihí eta tacamunuqueneanahi eta náchanevana, tétavicavahi eta náuricacarevaya taicha máejerare eta najacapirayare eta máechajiriruva ema Viya, machaneranayarehi.

⁴ Ena nani tijapanujiricavanahi, tétavicavahi eta náuricacareva taicha émaripa ema Viya macurisamurechavacayare.

⁵ Ena nani tisuapajirahianahi me Viya, mánsuanahi mayehe, tétavicavahi eta náuricacareva taicha májjararuanayare eta arairu apaquehe náicuchihi me Viya.

⁶ Ena nani, ichape eta najamurachirahi eta náitaresirahi eta matapiravacare te mamirahu ema Viya, tétavicavahi eta náuricacarevaya taicha májjaracayare éma eta navarahaquenehi.

⁷ Ena nani tijapanurahianahi nayehe ena apamuriana achaneana, tétavicava eta náuricacarevaya; taicha ema Viya, éma apanava majapanuvacayare éna.

⁸Ena nani vahi náisapajirícavahíni tahapapicahini eta náehisirahi ema Viya, tétavicavahi eta náuricacarevaya; taicha éna, títécapanainapa te mamirahu ema Viya, náimarracainapa éma.

⁹Ena nani ticonsejarahianahi nayeheana ena achaneana, nacaepahairahi eta semanereana, tétavicava eta náuricacarevaya éna; taicha máimereu-chainapa ema Viya eta machichairavacahi éma.

¹⁰Ena nani ticatajivanahi eta nacatianacasivahi nayehe ena achaneana te juca apaquehe táichavenehi eta táurivahi eta náitaresirahi, tétavicavahi eta náuricacarevaya; taicha éna aquenucarahanaya majupahanayare ema Viya.

¹¹⁻¹²Eti nuchaneranahi, járajapainapa eta sache eta nacatianasiraheya ena achaneana táichavenehi eta éhisiranuhi. Tipanararachaheanainapa, tépiyaequenehaheanainavarepa. Váhisera ecuarami eta juca. Ene nacahehi eta nacatajivairahi ena profetanaini, ena náinapureanahi machaneranahi ema Viya. Eta tacahe, te nacatianacahepuca, ¡ecurisamurechavachucha, evapinavachucha! ¡Tétavicavahi eta iúricacareva taicha ejacapayare eta ícuchiyare te anuma, taicha ichape eta macunachirahehi ema Viya!

Ena Jesús tímitucavahi eta vicamunucareravayarehi tacutihi eta tacamunucarevahi eta icheve, étapa eta tijarahi

(Mr 9.50; Lc 14.34-35)

¹³Eti ímiyanavayare eta ecamunucareravahi nayehe ena achaneana, tacutihi eta tacamunucarevahi eta icheve. Vahi tacuepaha eta ecamunucareva. Vahi ecucuti eta tajachira eta icheve, taicha tájina eta táichevvhainahini. Tásiha, nájinapa ticamunuimahi. Náepuruinapa namutu.

¹⁴Tacutiquene éti ecutihi eta tijarahi. Éti, namicahuyarehi namutu ena achaneana eta ímitusiravacaya, apaesa náinajica eta náehisirahi eta tamauri-queneana. Ímereuchayarehivare eta iúriya, ecutiya eta avasare tiávihahi te tajirumane eta anuquehe mari.

¹⁵Tacutiquene, vahi ecucuti nácani súnsuana tiyustacanahi jácani lámpara, tásiha nanacapapucaini te tajuhe eta cajune, nayumurusihahini. Nanacayaréhiserá te anuquehe apaesa náimairicásarepa namutu ena tiávihanahi te peti, tamicaureanayarehi.

¹⁶Ene ecaheyare éti, ímerecayare eta ejaravayare nayehe ena achaneana apaesa eta náimairainahi eta táuriqueneana íchaqueneanayare; tásiha nacuna-chainapa ema Tata Vicaiyaquene tiávihahi te anuma.

Ena Jesús tímitucavahi tayehe eta tasuapacarevahi eta Sagrada Escritura

¹⁷Vahi étaina tímitecanuhi nútí nucaepahahini eta mavanairipiana ema víyarahaini Moisés, étaripa eta náimiturapianaini ena profetanaini. Eta tímitecanuhi nútí, níminicapaequenehaheyare eta nájureanahi.

¹⁸Nutupiruvá numetacáque: Titauchavaya tamutu eta máechajiriruvana ema Tata. Tímiyanava eta tasuapacareirahi nayehe ena achaneana tamutu eta Sagrada Escritura. Tájina ticaepahaimahi, tayanapane táitavapuca eta anuma étapuca eta apaquehe.

¹⁹Eta tacahe, nácani tépuruanayare eta tavanairipianahi eta Sagrada Escritura, jácani ánichichaquenehi, vahi tisiapanaimahi te anuma. Tavetijipa te náimitucapuca ena apamuriana eta náepuruiraya. Nácanisera tisuapanayarehi, tímiturecanahivare eta juca nayehe ena apamuriana achaneana eta náehisiraina; éna, ichapeyare eta nacunachacarevayare eta nasiapiraipa te anuma.

²⁰ Táicha te evaraha ítujicava esiapa te anuma, tacamunuhi tiápajucavaya eta táurivahi eta eyeherepiana éti, ecachuricayare eta nayeherepianahi ena escribánoana, énapa ena fariséoana.

*Éma Jesús tímitucahavi vahi tacunasi te visamure eta visemaneva
(Lc 12.57-59)*

²¹ Eti écharichucha eta nayeherepiana ena iáchucanaveanaini ani tacahe: “Vahi ecucapaca mácani piparaepiya; taicha mácani ticaparecahi, ticaicuñarehi”.

²² Nútisera numetacahe eta apana: Mácani tisemahi mayehe ema maparape, énerichuvare ticaicuñayare. Mácani tiúmehahi ema maparape, ticaya-serehiyare te namirahu nácani tuparairucanahi tayehe eta avasare. Tacutiqúene mácani ticaecahihi ema maparape, mávacuhaipahi eta ecuñaraqú tayehe eta infierno.

²³ Eta tacahe, te piámaphi eta piámavahu te mamirahu ema Viya, tásiha, péchapanainapapuca eta pitapiravahi mayehe ema piparape.

²⁴ Vuíchaha picuiyaracuha eta piámavahu. Tativanumayare piyaseapanaya eta perdón ema piparape. Pétupiricanumayare tativa eta píchavaquenevahi mayehe éma. Táuricasarepa pichava píyaracuhapanainapa eta piámavahu te mamirahu ema Viya.

²⁵ Tacutiqúene te matiarhiyarepuca mavaraha mametauchavi te namirahu ena tuparairucana, vahi picucuchapa mametauchavi. Tativayare pétupirica eta píchavaquenevahi mayehe, mapurare vuíchaha picaeratahini mayehe ema juez tayehe eta cárcel.

²⁶ Taicha te náimisipavipa tayehe eta cárcel, ticajeraequenénapa eta piúchusiraya.

Éma Jesús tímitucahavi vicuneuchavaya eta jácani táimiaquipaichavi tayehe eta pecatu

²⁷ Énerichuvare écharichuhi éti eta náimiturapihi ena iáchucanaveanaini: “Vahi ecuveha esu apana esena”.

²⁸ Puítisera núti numetacahe eta apana: Mácani majamurachahi esu apana esena, ticapecaturaipahi te masamure taicha eta majamurachirahi.

²⁹ Eta tacahe, eta iúquiha váure, te tavarahapuca tímiaquipaicahe tayehe eta pecatu, tavarairahi táimahayare eta tamauriqueneana tájiparacana, tiúripana evecuhaulquichava iáquiicaya. Taicha tiúripanahi táejiacava ánichichaina te iáquehe, váhisera tacuimicuñacahe eta te yucu infierno, tamutupahi eta iáquehe.

³⁰ Étaripa eta evahu váure, te tavarahapuca tímiaquipaicaheyare tayehe eta pecatu, tapamisirahénapapuca íchayare eta tamauriqueneana, tiúripana eyuchatica iáquiijica. Taicha tiúripanahi táejiacava eta evahu, váhisera tacuimicasiapahe támutu eta iáquehe tayehe eta yucu infierno.

*Éma Jesús manacahi eta máimiturapi nayehe ena tñajicacana
(Mt 19.9; Mr 10.11-12; Lc 16.18)*

³¹ Énerichuvare ena viáchucanaveanaini náisaphi eta máejerare eta máinajisira mácani achane esu mayena. Ani nacahehi: “Mácani tñajicahi esu mayena, mámepeiyarecahi eta ajumeruca táechajisihayarehi eta máinajisiraya esu mayena”.

³² Nútisera numetacahe eta apana: Mácani achane, te máinajicapuca esu mayena, ticapecaturaipahi me Viya. (Váhinénipuca sucaecahihini mayehe

ema apana achane.) Énerichuvare te tiápechavahipuca ticaíma ésu, tamuriacahi ésu eta maviurevahi ema suíma. Tásiha, mácani arairuhi suíma, émapa tamuriacahi eta májecapiravahi taicha eta mavirahi esu esena sucaíma-quenehi.

Éma Jesús tímitucahavi eta vahi vijurachaimahi

³³ Énerichuvare esamairiricavare eta náimitucasivahi ena iáchucanaveanaini: “Machu vahi ecuitaucha jácani ejurachirahipuca. Yátupinasera eta ítauchiraina tamutu eta íjarasiravahi me Viáquenu” nacahepa.

³⁴ Nútisera numetacahe éti: Vahi táuricahini íchahini eta juramento. Vaipa échajisihahini eta anuma taicha éta, mávacurehi ema Viya.

³⁵ Váipavare échajisihahini eta apaquehe taicha éta, macaematanéyahi éma. Váipavare échajisihahini eta Jerusalén, taicha éta, mávacureyarehi ema yátupiquenehi Rey, mavaneruyare ema Viya.

³⁶ Váipavare échajisihahini eta ejurachirahi te echuti, taicha vahi áratahaimahi ehapamaichahini, ísivachirahini eta táimahi, tijapupuca, tiquisapuca.

³⁷ Numetacahe: Te tatiarihipuca eta íjarasiravayare, átipiruva ácahe: “Tiuri”. Te váhipuca evarahahi, átipiruva: “Vahi” ácahe. Te émunahacavapuca ejuracha, ema Váinaraji títurucaheripa.

Éma Jesús tímitucahavi eta vahi vicusema ne nácani ticaetemajiricahaviana (Lc 6.29-30)

³⁸ Énerichuvare esamairiricahi eta acane: “Mácani achane téhararecahi mapuchuquichahi ema apana achane, énerichuvare éma napuchuquichayareva ena tuparairucana. Te macavetuquiahechahipuca, énerichuvare nacavetuquiahechayareva ena tuparairucana”.

³⁹ Nútisera numetacahe: Vahi ecujicapa te masema mácani achane váinarajihí. Tiúripa, te náehahepuca nácani te emira, íjaracayare eta apachacaya eta emira.

⁴⁰ Tacutiquene, te natiarihipuca ena timetauchaheana, navaraha naverejicahe eta ecamisa, vahi ecusema. Váhivare ecujicapairihí. Íjaracavare eta apana eta epacua.

⁴¹ Ísapayare te nácani navanecahepuca eta enaracureca eta tijitacare. Te navaraha iámina étanaina kilómetro, evapinava eta eservichiravacaina. Vahi ecobrachavacaimahi.

⁴² Mácaniripa tájahapuca mayaseacahe, íjaracayare. Vahi ecueñamiha mácani ticapucahe eta ecayehequeneana.

Éma Jesús tímitucahavi eta vémunasirayare nácani ticatianacahaviana (Lc 6.27-28, 32-36)

⁴³ Énerichuvare esamairiricahi eta acane eta náimitucasivahi ena iáchuca naveanaini: “Émunasirahí nácani témunacaheanahí. Tásiha, ecatichayarepa nácani ticatianacaheanahí”.

⁴⁴ Nútisera numetacahe: Émunacayareva nácani ticatianacaheanahí. Eyaseaca ema Viya eta nayujarahuina nácani téchajicanahí eyehe. Ímereca eta iúriya nayehe nácani ticaticahaheanahí. Eyujaraucha nácani tiúmehaheanahí ticaetemajiricaheanahí.

⁴⁵ Te itaucha eta juca, éta tímereuchaheyare eta machichahéirahi ema Vicaiyaquene te anuma. Taicha éma nájina manerejiruina, namutu máemuncavaca: ena achaneana váinarajiana, énapa ena tiúriana. Éma, tjaracahavi vimutu eta sache vimícahuhi, étapa eta tiquiva.

⁴⁶ Éti, tájina ecunachacarevaina eta me Viya, te nacarichuhi émunaca nácani témunacaheanahi éti. Apanasica ena tisipecaturarahiana náichahi eta juca.

⁴⁷ Tacutiquene, tájinavare ecunachacarevaina eta me Viya, te iúriyare nacarichuhi ena eparapenaveanahi. Apanasica ena máimatirahanahi ema Viya tiúrianahi eta nayehe ena naparapenaveana. Étiserá tatuparacahe ecachuricayare eta iúriya.

⁴⁸ Tétavicavasareya eta iúriya nayehe namutu. Vahi enerejicaimahi ena achaneana. Váhivare eyavanaimahi eta iúriya. Ecutiyaare ema Vicaiyaquene te anuma eta máurivahi.

6

Éma Jesús tímítucahavi eta vahi vicusiñavavaicapa eta víchira eta táuriqueneana

¹ Eta ecajirayare ena páureana, échapavayare. Éma Tata Vicaiyaquene, tájina ticunachahemahi te evarahapuca náimaha ena achaneana eta ecajirahi, evarairahi ticunachaheanayare. Tájinavare máitsirijicavahini éma eta eyehe.

² Eta tacahe, te ímicatacayarepuca nácani ticamunuvanahi, vahi ecumetajirica. Vahi ecucuti ena apimirana timetajiricanapa te viúrujisirarevana, téhepa te anecapahiana. Eta juca náichahi, navarairahi ticunachacareanayarehi nayehe ena achaneana. Nútiserá numetacahe: Éna nani ticaheanahi, tájina nacunachacarevaimahi me Viya.

³ Te jácani píjaraca nácani ticamunuvanahi piyehé, vahi picumetajirica. Váhivare picumetaca nácani pémunacasareana.

⁴ Piñajichayare eta píjarasirayare nácani píjaracasiruyare. Tacahe, éma Tata Vicaiyaquene te anuma máimamaracahi tamutu. Jácani píchaqueneana tayumururevana, éma títsirijiequenehayare, tjaracaviyare eta pícuçhihi.

Éma Jesús tímítucahavi eta viyujarasirayare (Lc 11.2-4)

⁵ Te eyujaracahi, vahi ecucuti ena apimirana tiyujaracana te viúrujisirarevana, téhepuca te anecapahiana. Titupihanahi éna eta nayujarasirahi, navarairahi náimamaracarehehi ena achaneana. Nútiserá numetacáhe: Tájinachucha nacunachacarevaimahi me Viya.

⁶ Étiserá ani tacaheyare te eyujaraca. Esiapayare te eyehe cuarto, ératácayare eta tapaja. Eñajichavayare eta échajisirayare éma Tata Vicaiyaquene. Éma, tumararacahavihi; masamayarehi eta piyujaracasa.

⁷ Tacutiquene, váhivare ecuapepirica eta ecayemaqueneanayare. Vaipa tácomesahini eápepiricahini eta eyujarasirahi. Vahi ecucuti ena máimatirahanahi éma Viya. Tiúpiemanapa eta nayujarasirahi, náimijachaipa tisamacareanahi mayehé éma Viya.

⁸ Vahi ecucuti éna, taicha éma Viya máimatiripahi éma jácani vivarahaquenehi viyaseaca.

⁹ Éti, ani tacaheya eta eyujarauchiravaina: Tata Vicaiyaquene, piti piáviha te anuma, vipicauchahi yátupi eta píjare.

¹⁰ Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapiravihi ena ángeleana te anuma.

¹¹ Pájapanuhavi píjaracahavi puiti jena sache eta vicamunuirava eta vinicaqueana.

¹² Pájapanuhavi piperdonachahavi eta viviurevana piyehe, tacuti eta viperdonachira víti ena ticaviurevana viyehe.

¹³ Vahi picuisapahavi eta vicha eta tamauriquene. Picatiuchahavivare mayehe ema Váinaraji. Taicha píti yátupiquenevihi Viáquenuvihi. Nájina pácuti eta pítipujijiasiravahi. Máichecuaraquire eta pijaraivahi. Amén.

¹⁴ Taicha te yátupihí eta eperdonachirahi nácani ticaviurevanahi eyehe, ema Tata Vicaiyaquene te anuma tiperdonachaheyare éti apanava.

¹⁵ Téhesera te vahi eperdonachahi ena ticaviurevanahi eyehe, ema Tata Vicaiyaquene váhivare tiperdonachahémahi eta éjecipiravanahi éti.

Ena Jesús tímitucahavi tayehe eta ayuna

¹⁶ Tacutiquene, te ayunahepuca, vahi ecajapanuramiraimahi te namirahu ena achaneana. Vahi ecucuti ena apimirana ena tímicaecherachavanahi eta ayunairanahi. Núti numetacahe: Tájinachucha nacunachacarevaimahi me Viya. Éma, váhivare títsirijicavaimahi eta nayehe.

¹⁷ Étiserá, te ayunahepuca, ímiyanava eta esipauquichiravaya, etatasicavavare, apaesa nacuija nacuimatiacahe eta ayunairahehi.

¹⁸ Ena Tata Vicaiyaquene tímararacahehi tamutu eta esamureana. Tisamacareyarehi eta eyasearuhi.

Ena Jesús tímitucahavi eta vahi vicuisapava vicasamure eta vímahaqueneanahi (Lc 12.33-34; 11.34-36)

¹⁹ Váhivare tacuavasamurerecahe eta ímahaqueneana te juca apaquehe. Eta juca ticamitiequenehacareana taicha eta tajararesira eta cachusirí, étapa eta táichasivayare. Natarihivare ena tíameyechaheanayare.

²⁰ Epanerechasera eta ecaimahaqueneraya te anuma. Ánaqui jararihi eta táitsivayare eta íchirahi eta táuriqueneana te juca apaquehe. Ánaqui, tájina cachusirina, nájinaavare tíamerahina tayehe. Tájina témitiacaimahi.

²¹ Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchiana te anuma, ánaqui evarahayare eyanavaneyare.

²²⁻²³ Tacutiquene, ecuneuchava, machu tacuetaviuchava eta ejamurachira eta ímahaqueneana. Ecaratacava, vahi ecuisapa tahapasamurechahe eta ecaimahaquenerahi. Taicha te tahapasamureruhepupuca eta ímahaquene, tétavicavahi eta tamapicuvahi eta te íachanevana. Téhesera esuapa eta nímiturapiana, tétavicavahi eta tamicauchiraya eta íachanevana, tímijunijicayare eta emaurivahi, étapa eta ejamurachiravahi eta ímahaqueneana. Eta tacahe, machu ísapava tayanariana eta timapicu eta te íachanevanasami. ¡Páureshami éti te ísapavapuca tanasipa!

²⁴ Tacutiquene éti, eta ítaresirahi, vahi táuricahini apinanainahini ena íaquenuana. Taicha émunacapanayarehi ema émana, tisuapacarepanayarehivare; tásiha ema apana, apaesarineya eta émunasíraya, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurechahe eta plata, machu tahapapirica eta émunasirahi ema Viya, étapa eta ecaemataneasirahi éma.

Ena Jesús tímitucahavi eta majaneasirahavihi ema Viya viti machichanaveana
(Lc 12.22-31)

²⁵⁻²⁶ Étasera nuvaraha yátupina eta ecasiñavairaina mayehe ema Tata Vicaiaquene. Vahi ecuaeñamaracavaicha tayehe eta enicaquenerepi étapa eta emuiriharapi puiti juca ítaresiraichaha. Eta enicaquenerepi, étapa eta emuiriharapi, tájina táeñamavacarevahini. Ímararacarichuhi eta cáyureana. Vahi táevacahini, váhivare táechatijiricahini, táunacahipucaini eta tanicaqueneare. Émasera ema Tata Vicaiaquene máechapajiricahi, máijarasirahi tamutu eta tanicaquenerepiana. Evetijipa éti, íapajupanavahi eta éñamacarévhahi me Viya tayehe eta cáyureana.

²⁷ Tájina táuricahíni eta éñamiravahi eta júcana. Éti, nájina tiratahaimahi étijivainahini ecajurucavahini, tayanapane tahapasamurechahehipuca.

²⁸ Tacahe, ¿tájaha tacayema tihapasamurerecahehi eta emuiriharapi? Ímararacarichuhi eta tajurusirahi eta flúreana, vahi tacañamaracavahini tacaematanehini, tájijururecahipucaini.

²⁹ Táitsivahisera, te tépunehapa, tétavicavahi táurinavahi eta taflurene. Nájina tácuti eta nacamuirihaira eta táurinava, émaripa ema víyarahaini rey Salomón eta tajanunusira eta macamuirihairahi.

³⁰ Apanasicahi, ema Viya máijaracahi eta táurinavahi, ánipirichuhinéni eta táitaresirahi. Evetijipa éti eta máechapajirisirahehi, máijarasiraheyarehi eta emuiriharapi eti achaneana. ¿Tájaha tacayema vahi ácasíñavahíni eta mayehe?

³¹ Eta tacahe, vahi ecuaeñamaracavaicha tayehe eta enicaquenerepiana étaripa te echuririacapuca eta une érayare, váhivare eta emuiriharapi.

³² Ena achaneana vahi náimatihini ema Viya, ichapemurihi eta tacañamarasiravacahi eta júcana. Vahi nácasíñavahini mayehe ema Viya, nacuchapahipuchahini eta máijararuyarehi éma. Étiserá, écharine eta mararirahahi ema Ecaiaquene te anuma. Máimatihí éma tamutu eta ecamunuqueneanahi.

³³ Tásihasera éti, tativayare íjaracava ecaemataneacaya ema Viya, ecasamureirahi eta ítauchirayare tamutu eta mavarahaqueneanahi. Tihapasamurechaheyarehivare eta tátupiruvairaya eta ítaresira, ecurisamurechirayare éma. Máimaharinepa éma. Tíjaracaheyare tamutu eta juca ecamunuqueneana.

³⁴ Eta tacahe, ácasíñava mayehe éma. Vahi tacuimipanerechahe eta ícharacavayare achichu. Puiti ecuchapaipa eta máimicatasiraheyare. Ímijanava eta ecuchapirayare eta máimicatasiraheya.

7

Ena Jesús tímitucahavi eta vahi vicunemahi eta nájecapiravana ena apamuriana achaneana; vicuneuchavasera víti
(Lc 6.37-38, 41-42)

¹ Vahi ecunemahi eta nájecapiravana ena apamuriana achaneana, váhivare ecucaecahivaca, machu étaina táimicuñacahe me Viya.

² Te ecunerahipuca nayehe ena apamuriana achaneana, ecaheyare éti eta macunerahénapa ema Viya tayehe tamutu eta éjecapirávanahi éti.

³ Piti ajaira, pítipa piti esena, vahi táurica eta picunerahi eta ánichichaqueneana nájecapiravanahi éna. Tituparacavi pítijivaina picuneuchava eta táichapeva eta péjecapirava.

⁴⁻⁵ Vahi tatuparacavimahi pétupirica eta jácani nájecapiravahi ichipichuana ena piparaepiyana. Tájina piviyahini eta piconsejachihamahi. Ichapesera eta tatuparasiravihi pétupirica eta péjecapiravanahi píti. Tapaenumava pétupirica eta píchavaquenévanahi, táuricapaini piconsejacha ema piparaepiya tayehe eta máichavaquenévahi.

Ena ticaecahirahiana, vahi vicuijaraca jácani téñamacareana

⁶ Vahi ecuimituca eta máechajiriruvana ema Viya nácani achaneana ticaecahirahiana, taicha váiparinehi náuricaimahi. Machu étaina táemehahe. Váhivare ecuijaraca jácani téñamacareana, machu nácatayayajica.

*Vahi vicuyacuji eta viyaseasiraina ema Tata Vicaiyaquene
(Lc 11.9-13; 6.31)*

⁷⁻⁸ Ánivare tacahe eta máechajiriruva ema Jesús:

—Numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi. Tisamaheyare, tíjaracaheyareva. Vahi ecuyacuji eta eyaseasiraina. Énerichuvare, te tatiarihinapupuca eta jácani íchiraya íchapehi eta tacajeravayarehi, eyaseacayare máijaracahehine eta ítupajijiasiravaya. Éma, tíjaracaheyare. Te jararhipuca eta táichejimiráuchahe, éma macaevuisinaheyarehi.

⁹ Eta juca tímicutijiricavahi te natiarhipuca ena echichanaveanahi éti, te tiyaseacaheanapuca eta pan nanicayare, váiparinehi táuricaimahi íjaracahini éti eta márjahi. Tímicutijiricava evjaruinahini ena echichanaveana.

¹⁰ Étaripa te tiyaseacaheanapuca eta jima, váhivare táuricaimahi íjaracaimahi eta quichare.

¹¹ Etiarihi éti vahi ecajirahihini nayehe ena achaneana. Iúrihisera nayehe ena echichanaveana. Mavetijicha ema Tata Ecaiyaquene tíávihi te anuma. Éma, vahi ticavijaruhemahi eta eyaseserepi. Tíjaracaheyarehi tamutu eta táuriqueneana eyasearuanayarehi.

¹² Evaraha eta náurivaina ena achaneana eta eyehe, ¿masi? Tásiha, táuricahi eta íchiraya eta iúriya nayehe. Taicha eta tacahehi eta táimiturapi eta Sagrada Escritura eta eyehe.

*Jararihi eta apina achene
(Lc 13.24)*

¹³⁻¹⁴ Esamanuchaha. Jararihi eta apina achene. Eta ichape achene, vahi tácajéra eta náhisira ena achaneana. Camurianapana ena téhicana eta ticaijuhe tayehe eta ecuñaraqui. Étasera eta achene ánicuchicharichu, ticaijuhe tayehe eta vítaresirayare, tájina ecuñaraqaina. Váhisera camurianaina ena téhicana éta. Éti epamicava esiapa tayehe eta achene ánicuchicharichu.

Ena Jesús máimicutichahi ena achaneana tépiyahirahiana, nacuti eta yucuqui máurinisiráha eta tahi
(Lc 6.43-44)

¹⁵ Échapavayare tayehe eta náimiturapiana ena tépiyahirahiana tímijachavana machanerana ema Viya. Tépiyacavánapahi tiúriana tacutihi eta tamansuva eta uvesa. Téhesera te nasamureana, tétavicavahi eta navainarajiva, nacutihi eta ichini.

¹⁶ Ímatiacavacahisera éna táichavene eta náichaqueneana. Nacutihi eta yucuqui. Tímaticarehi eta táhi. Étaripa eta sitavere, váiparinehi tiúchucaimahi eta tacahihini narasahinahipucaini. Tásiha, eta ijicaqui váiparinehivare tacahimahi eta táhi cachicheruhinahipucaini.

¹⁷ Tacutiquene, tímaticarehi eta táhi eta yucuqui tiúrinisi. Tímaticarevare eta táhi eta máurinisiráhana.

¹⁸ Eta yucuqui tiúrinisihí eta táhi, vahi témunahiricavaimahi vahi tacurinisihini eta táhi. Étaripa eta máurinisiráhana, váhivare témunahiricavaimahi táurinisihini eta táhi.

¹⁹ Tamutu eta yucuqui ena máurinisiráhana ticaechuyarehi, tíjuyarepa te yucu.

²⁰ Eta tacahe, ímativacayare ena tépiyahirahiana táichavene eta náichaqueneana tamauriqueneana.

Vahi námutuimahi títujicavana tisiapanaimahi te anuma
(Lc 13.25-27)

²¹ Nararihinapa ena achaneana tépiyacavana nuchanerana. Váhisera títujicavanaimahi tisiapana tayehe eta mávasa ema Viya. Tayanapane náichanuinapapuca “Tata Viáquenu”, vahi tisiapanaimahi. Taicha vahi yátupinahini eta nácaemataneasirahi ema Tata Nucaiyaquene te anuma.

²² Te táitecapapa eta juicio, camurianayare ena tíchanuanayare: “Tata Viáquenu, víti véchajisihaparacahi eta píjare. Vípiaracavihi te píjare eta viáquijisirahi ena váinarajiana, téhevare te píjare vímerecahi eta tíamicareana” náichanuinapapuca.

²³ Nútisera nujicapainapa: “Éti vahi nuchanerahéna. Nímatysera núti eta íchaqueneanahi tamauriqueneana. Évuisiha te numirahu” níchainapa éna.

Ena Jesús máimicuticha ena tisuapajirahiana énapa ena masuapajirairahana
(Lc 6.47-49; Mr 1.22)

²⁴ Nácani tisuapanuanahi náitauchahivare eta juca nuvanairipianahi, téchemarahanahi táicha. Nacutiyahehi mácani títucahi tépiyareca peti, manacayaherehi eta túmeana yucuqui emuruquiána.

²⁵ Jéhesare, te járajapapa eta muraca técatícava, tíamaquiha tíquiva, tisiapapa eta une, váipasera tacayacahini eta peti, taicha tíúsiapiravacahi.

²⁶ Nararihivare ena tépiyacavanahi tisuapanuana, váhisera náitauchahini eta juca nuvanairipiana. Éna nacutihi ema máitucaraha tépiyareca peti. Vahi manacaimahi eta túmeana yucuqui, váhivare táusiapiravacahini máicha.

²⁷ Te járajapapa eta muraca técatícava, tíamaquiha tíquiva, tisiapapa eta une, tacajimuyapacapa eta apaquehe. Tíáquipaicavapa eta peti, tamutusamipa témitiequeneha —máichavacapa ema Jesús.

²⁸ Te títapiricapa ema Jesús eta máimitusiravacahi ena achaneana, ichape-rinehi eta náramirahi eta máimiturapiana.

²⁹ Vahi nasamasarénahini. Tétavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

8

Emá Jesús macanaraca emá émana achane leproso

(Mr 1.40-45; Lc 5.12-16)

¹ Te tiúcupaicapa emá Jesús tayehe eta cerro te mávinehi, camuriana éna achaneana téhicanapahi.

² Tacahe, macahepaipa emá émana achane leproso. Témeñahavapa mayehe emá Jesús. Tépuycapa te mamirahu. Tásiha, máichapa:

—Tata, nucasíñavahi eta piyehe, picanaracanupaini.

³ Tacahe, emá Jesús majicapapa:

—Nuvaraha nuncanaracavi. Tájina pa píchiravaina puíti —máichapa.

Máemamahacapa. Tásiha, evenepa tinaracahi emá macajumaquenénihí eta máechajisirahi emá Jesús.

⁴ Tásiha, emá Jesús máichapa:

—Pímaha, nacuija picumetaca eta nútirahi nuncanaracavihi. Piyanavanesera pímerecava nayehe ena tuparairucana, apaesa náimamacavi. Énainapa timetajiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta píhasulupayachirayare taicha eta macanarasiravihi —máichapa emá Jesús.

Emá Jesús macanaraca emá mamusura emá capitán romano

(Lc 7.1-10)

⁵ Tacahe, emá Jesús títecapapa tayehe eta Capernaúm. Matiarihíhi emá achane apavasana. Comandantehi éma nayehe ena suntaruana romanoana. Capitán eta mávacure. Tiyanapa mapauchapa emá Jesús.

⁶ Mayaserecapa, ánipa máicha:

—Tata, mararihi puíti te nupena emá amaperu numusura ticajumahi eta áire. Tétavicavahi tacativa masama. Pájapanupaini, picanarasinanupanaini éma —máichapa.

⁷ Emá Jesús, majicapapa:

—Tiuri, nuyanayare nuncanarapanayare —máichapa.

⁸ Tásiha, emá capitán majicapapa:

—Tata, vahi picucaañamacava eta pítesiraina eta nuyehe, taicha vahi táuricahini pisiapahini te nupenasami. Németeaca taratarichu picavanairipi eta picanarasiraya emá numusura.

⁹ Taicha nútí nusuapahi te tivanecanuana ena anuquehepananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevere níchuhavacapuca, tisuapanuanahi. Te nuvanecapuca emá nuvaneru, enurujipa tisuapanuvane —máichapa.

¹⁰ Te masamapa emá Jesús eta juca, ichaperinehi márami eta yátupirahi macasíñavairahi eta mayehe. Máichavacapa ena téhicanapahi:

—Nutupiruva numetacahe: Nájina nímaha émanaina vijaneana israelíta mácutihini emá maca achane apavasana eta macasíñavairahi eta nuyehe.

¹¹ Numetacahe puíti: Járjapainapa eta sache, náitecapiraya ena camuriqueneana achaneana apavasanaa tísihanayare te tamutu avasareana te juca apaquehe. Tisiapanayare eta mávasa emá Tata, te mávihahi emá viáchucaini Abraham, emá Isaac, émapa emá Jacob. Tétavicavainapa eta náurisamurevaya.

¹² Tacahe, tamapuruji eta náimatiequenehairahi ena vijaneanana israelítana eta máechajiriruva ema Tata, váhisera nácasíñavahini eta nuyehe. Eta tivíuchavacayarehí tayehe eta nacaicuñaiyaya eta te tamapicuquene te távihahi eta tájirequenehí yucu. Ticapitiquiahechavanainapa eta tacati-vayare nasama. Tiyahanainapa —máichapa.

¹³ Tásiha, eta Jesús máichapa ema capitán:

—Piyana pichava te pipena. Tinaracaripa ema pimusura, taicha eta picasiñavairahi eta nuyehe —máichapa.

Tacahe, ema amaperu ticajumahi tinaracaripahi te jena hora eta náechajirisiravahi éna.

*Éma Jesús macanaraca esu máimase ema Pedro
(Mr 1.29-31; Lc 4.38-39)*

¹⁴ Éma Jesús tiyanavarepa te mapena ema Pedro. Máimahapa esu máimase ema Pedro, ticajumahi eta muraca fiebre. Mapauchapa tayehe eta suívesihahi.

¹⁵ Máemamahacapa, enevanepa táetaviacahi eta fiebre. Tinaracapa. Enuruji-pa téchepuca. Tásiha, tépanavapa ésu eta suítátirahi ema Jesús.

*Camuriana ena macanararuanapahi ema Jesús
(Mr 1.32-34; Lc 4.40-41)*

¹⁶ Te yátipa, títeparácanapaichucha ena achaneana. Námavacapaipa ena nacajumaqueneana, énapa ena návaháruana ena éreanana. Tacarichu te máechajiriruvachucha ema Jesús, macuchuchujicavacapaipa ena éreanana távahácanahi ena nacajumaqueneanahi. Macanaracavacapa ena apamuriana tisamanahi eta apana jumareana.

¹⁷ Éta juca títauchavapahi eta táechajisihairahi eta májurehi ema víyarahaini profeta Isaías, ani tacahehi: “Masaminahavíhivare eta vijumana eta macanarasirahavíhi”.

*Tituparahavi vahi véñamavaimahi eta víjarasiravahi véhica ema Jesús
(Lc 9.57-62)*

¹⁸ Te máimahapa ema Jesús ena camuriqueneana achaneana nachayacahi, macavanairipipa ena máimitureana natsecava eta nánuesirayarehi te apachara cáquiure.

¹⁹ Tacahe, ema émana escribáno témeñahavapa mayehe ema Jesús. Máichapa:

—Tata máestro, núti apana nuvaraha néhicavi te jácani pivarahaquenyare piámianu —máichapa.

²⁰ Éma Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútisera nuti Manerejirunuhi ema Viya, tájina nuviya nusiapihahini —máichapa.

²¹ Te apanavarepa sache, ema émana máimiture máichavarepa:

—Tata, nuyaseacavi písapanuhini nuchava te nupena. Nucuchapanumayarehini eta máepeniraya ema ticachichanu, nécaranumaya. Tásiha, nucapavacavipa néhicaviya —macahepa.

²² Éma Jesús majicapapa:

—Péhicanuchucha. Pésamirica náecaracacaichaha ena máecharaireana. Tájina tájaracavimahi eta juca tihapasamurerecavíhi —máichapa.

*Ena Jesús macaesamirica eta táepacusirahi eta une étapa eta técatícava
(Mr 4.35-41; Lc 8.22-25)*

²³ Te títapiricapa ema Jesús, tiávacuhapa te pacure. Énapa ena máimitureana, náehicapaipa éma.

²⁴ Te itupierecanapa, járajapapa eta muraca técatícava. Ichapevaca eta táepacuruhana. Tisiapapaipahi eta une tayehe eta pacure. Ema Jesús, tímacapaichucha éma.

²⁵ Tacahe, ena máimitureana típiararecanapa eta napsirahi. Nacajamicapa éma. Ánipa náicha:

—Tata maestro, picatiuchahavi. Véricainapa —náichapa.

²⁶ Ema majicapavacapa:

—¿Tájaha tacayema epica? ¿Vahi ácasiñavapahini eta nutiarahirapahi eta eyehe? —macahepa.

Tásiha, téchepucapa. Macamatínacapa eta técatícava étapa eta une. Enevanepa tésamiricavahi eta táepacusirahi. Tájínapa táichiravainahini.

²⁷ Ena máimitureana ichaperinehi nárami. Ánipa nacahe:

—¿Tétavícavahi eta máitupajijiasiravahi! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatínacahi eta técatícava étapa eta une eta táepacusirahi! —nacahepa.

*Ena apinana ajairana návaháruana ena ichapemuriqueneana éreanana
(Mr 5.1-20; Lc 8.26-39)*

²⁸ Te títecapapa ema Jesús te apachara eta cáquiure te apaquehe Gadara, tiúchujicanapa te ecarí ena apinana ajairana, návaháruanahi ena éreanana. Tétavícava eta náifehivavacahi. Náehayarehi nácani tiánucuhanapahi. Tacahe, napachapa ema Jesús.

²⁹ Tipiararecanapa, ánipa nacahe:

—¿Tájaha picha píteca pipauchahavi piti Jesús, Machichaquenevahi ema Viya? ¿Pivarahapa picaetemajiricahaviyare víti? ¡Pájapanuhavi, vuíchaha picuvanecahavi tayehe eta vicaicuñaiyare! —nacahepa.

³⁰ Tásiha, tatiaríhivare nacachacayahi eta camuriqueneana cúchiana tinihicanahi.

³¹ Ena éreanana nayaseacapa ema Jesús. Ánipa náicha:

—Te piáquijicahaviyarepuca, picatajicahavi. Písapahavi visiapahacavaca eta jena cúchiana —náichapa.

³² Tacahe, ema Jesús másapapa:

—Tiuri, eyana esiapahacavaca —máichapa.

Tacahe, tiúchucanapa ena éreanana nayehe ena návaháruanainihi. Tiárame-murihanainehi eta cúchiana. Tijunaparacanapa témiririjicanapa te tachaui eta cáquiure. Téririjicanapa.

³³ Ena tijanearecanainihi eta cúchiana tiyananapa tijunana tayehe eta avasare. Timetajiricanapa eta náimairahi, étapa eta nanarasirahi ena návaháruanahi ena éreanana.

³⁴ Tacahe, tiyananapa ena achaneana te mávihahi ema Jesús, náimahanapanahi. Te náimahapa éma, nayaseacapa vahi macuíticapahini te návasa, machavahini te másinehi.

9

Ena Jesús macanaraca ema émana achane macajumaquene eta mura-caquiha

(Mr 2.1-12; Lc 5.17-26)

¹ Tacahe, ema Jesús tichavapa tiávacuhavarepa te pacure. Tichavapa tayehe te mávasahi Capernaum.

² Ánaqui náimipauchavarepa ema achane macajumaquene eta mura-caquiha. Ema tivecahi te mayehe camilla. Te máimahapa ema Jesús eta nacasiñavairahi eta mayehe, máechajicapa ema macajumaquene. Ánipa máicha:

—¡Pétumechava, nuchicha! Nucaepahainavipa eta pipecaturanaini — máichapa.

³ Natiarihi ena escribánoana. Eta nasamirahi ema Jesús, ánipa nacahe te nasamure: “Ena maca tépiyacava tímijachavahi Viya eta macaepahairahiji eta pecatuana. ¡Tétavicava eta matapirava!”

⁴ Émasera ema Jesús máimatihi eta napanereruanahi. Máichavacapa:

—¿Tájaha tacayema eta éjecapirava nuyehe te epanereruanahi? Núti tájina nutapiravaina eta níchirahi eta juca.

⁵ Núti, eta nucaepahirahi eta mapecaturana ema maca, tacutihi eta máejererahi eta nuncanasirahi eta máquehe.

⁶ Tiúrisera puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatuana te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi técheputa. Piveha eta jara piyereruva. Piyana te pipena —máichapa.

⁷ Enevanerinehi técheputa ema macajumaquenéni. Tiyanapa te mapena.

⁸ Ichaperinehi eta náramirahi namutu ena achaneana natiarihique-
neanahi. Tétavicavarinehi eta nacunachirahi ema Viya taicha eta máitupa-
jjiasirava ema Jesús eta máijarasirahi ema Maiya.

Ena Jesús máichuha ema achane ticaijare Mateo, mayehyare apóstole

(Mr 2.13-17; Lc 5.27-32)

⁹ Te apanapa sache, nuti Mateo néjacahi eta te nucobrarésirare eta impuesto. Tacahe, tiánucuhapaipa ema Jesús. Te tímahanupa, tíchuanupa.

—Yare, péhicanu —máichanupa.

Enevanepa, nécheputahi. Néhicapa éma.

¹⁰ Tacahe, námapa éma te nupena, énapa ena máimitureana. Níchuhavacapa ena nuchamuriana ticobrarerarahianahi eta impuesto énapa ena apamuriana tisipecaturana. Nénicavacayarehi éna. Macachanemurihivare ema Jesús eta vinisirahi.

¹¹ Títecapanavarepa ena fariséoana. Eta náimairahi namutu ena némunar-
queneana, eta vicachanerahi ema Jesús, ticaeahirecanapa. Ánipa nacahe
nayehe ena máimitureana ema Jesús:

—¿Tájaha tacayema tísapava ema eyehe maestro macachanevaca eta man-
sirahi ena nánitatajiana ticobrarerarahiana eta impuesto? ¡Ticapecatura-
hariana éna! —nacahepa.

¹² Te masamairiricapa ema Jesús eta náechajiriruvana, máichavacapa:

—Ena majumareanahi vahi nácamunuimahi ema médico. Nacarichu ena ticajumanahi nacamunuyarehi ema médico.

¹³ Nútiripa vahi étaina tímitecanuhi nutanucayarehi nácani matapira-
vareanahi. Nutanucapahi núti ena tisipecaturana, apaesa náeneuchava,

náinajica eta napeaturana. Tásiha éti, eyana ecaravahu eta máechajiriruvanahi ema Viya. Ánipa macahe: “Núti nuvaraha yátupinaini eta eJapanuravainahini. Taicha te vahi, tamapurujiyare eta ecamavahuirahi eta nuyehe” macahepa ema Viya.

Nayaserecapa ema Jesús tayehe eta ayuna

(Mr 2.18-22; Lc 5.33-39)

¹⁴ Títecapanapa ena máimitureana ema Juan Tícachasiricarahi, nayaserecapa ema Jesús tayehe eta ayuna. Ánipa naicha:

—¿Tájaha tacayema vahi nahayunacha ena pímitureana, vahi nácutihavihini viti máimitureana ema Juan, énapa ena fariséoana?

¹⁵ Ema Jesús majicapavacapa:

—Nímicutichinahe puiti. Vahi táuricaímahi ticatisamurevana nácani ticaichuhacasianahi tinicanahi nayehe ena araimana. Tiúrisamureanayarehi taicha matiaríhihi ema arayena. Téhesera te tépenapuca éma, jéhesare ticatisamurevanayarehi. Tacutiquene, vuíchaha táuricaímahi eta ayunanainahini ena nímitureana. Járापainapasera eta sácheyare, ticaverejicasianayare taicha ticaratacanuanainapa ena ticapacanuanaya núti.

¹⁶⁻¹⁷ Esamanuchaha. Eta juca eta nímiturapiana, amairiha arairu. Mavaraha ema Viya arairuyare eta eyeherepianayare eti achaneana. Vahi ticuticacaimahi eta nayeherepiana ena achaneana. Eta ítusira éti eta nímiturapiana, tavaraha ínajica eta ichasi eyeherepiana tamauriqueneanahi — máichavacapa ema Jesús.

Ema Jesús macanaraca esu machicha ema Jairo, ésupa esu apana esena sucajumaquenehivare

(Mr 5.21-43; Lc 8.40-56)

¹⁸ Téchajiricavaichahahi ema Jesús nayehe ena achaneana, títecapanechavare ema émana achane ticaijare Jairo. Tuparairucahi éma. Matupírupa tépuyucapa te mamirahu ema Jesús. Ánipa macahe:

—Tátachicha, suraríhi esu nuchicha. Puítirichaha tépenahi. Téhesera te piyana, pinacaini eta pivahu, suchavahini suítarecaini — máichapa.

¹⁹ Tásiha masuapapa ema Jesús. Tiyana te mapena ema Jairo, vimutupaichu viti máimitureana.

²⁰ Tásiha, sutiarihíhivare esu ésuna esena sucajumaquene. Doce áñoripahi eta sucatajivairahi, táichirahi eta suítine. Témeñahavapa te maquecu ema Jesús. Suémamacapa eta tacheyarapi tamatsianahi eta mamuiríha.

²¹ Taicha te supanereru ésu, sucahehi: “Taratarichu jácani te némamaca eta ñimuiríha, éta ticanaracanuyare” sucahepa.

²² Émasera ema Jesús masamarichucha eta suémamajiasirahi, macaicu-tiarahi eta macanararesirahi. Téquerucavapa. Máimahapa eta supisirahi esu esena. Tásiha, máichapa:

—Vaipa picupica, nuchicha. Pinaracapa puiti táichavenehi eta picasiñairanuhi — máichapa.

Tacahe, tinaracapa esu esena. Vaipa tápechahini eta sujumainíhi.

²³ Tiyana varepa ema Jesús. Títecapapa tayehe eta mapena ema Jairo. Máimahainehi ena músicoana. Tiúrianaipahi eta námirayarehi te ecari esu suépenaquene. Énapa ena achaneana, tijajamurianaripahi eta náiyairahi.

²⁴ Tásiha, ema Jesús máichavacapa:

—Íuchucachaha te aneca. Váhinéni suépenahini esu suca amaperu. Tímacarichucha ésu —máichavacapa.

Énaserá nacaecahirichucha éma, técavanapa.

²⁵ Te tiúchucanapa ena achaneana, tisiapapa ema Jesús te suávihahi esu suépenaquene. Macaratavauchapa ésu. Macaechepucapa. Tichavapa titarecáhi ésu.

²⁶ Te nasamairicapa ena ticavasanahi eta te Capernaum, náraminehi namutu. Nacatsatsaicaça timetajiricanapa.

Éma Jesús macanaraca ena apinana púchuquiana

²⁷ Tiuri, tichavayarepa ema Jesús te mapena. Eta mapaisirahi te calle, náhecapaipa ena apinana púchuquiana. Tipiaracanapaipahi te máequene.

—¡Tátachicha Jesús, pájapanuhavi picanaracahavi. Vicasiñavi piti yátupique-névihi Cristo! —náichapa.

²⁸ Váhisera masuapavanehini éma. Te tisiapapa ema Jesús te mapena, ena púchuquiana tisiapanavarepa. Témeñahavanapa eta mayehe. Tásiha, éma mayaserecavacapa. Ánipa máichavaca:

—¿Yátupipuca ecasiñanuhi eta nucanarasiraheyare? —macahepa.

Ena najicapapa:

—Yátupi, tata.

²⁹ Tacahe, ema Jesús máemamacapa eta náuquihana. Tásiha, máichavacapa:

—Tiúri, eta ecasiñairanuhi, enaracayare —máichavacapa.

³⁰ Jéhesare, enevanepa tinaracanahi. Tímairiricanapa. Tásiha, muracapa eta matuparasira vahí nacumetajirica eta macanarasiravacahi éma.

³¹ Váhisera nácahehini éna. Étarichuhi te tiúchucanapa, timetajiricanapa eta macanarasiravacahi. Tásiha, náechapa namutu te tachacayarahanahi eta avasare eta juca máichaquenehi ema Jesús.

Éma Jesús macanaraca ema achane upa, macaechajicahi

³² Te viúchucavarepa, nacahepaipavare ena achaneana. Námapahi ema achane. Úpahi éma, taicha mávaháruhi ema éreana.

³³ Tacahe, ema Jesús máquijicapa ema éreana, ema tiávahácainihi. Tásiha, ema achane tinaracapa. Téchajicapa. Ichaperinehivare eta náramirahi ena achaneana eta náimairahi. Ánipa nacahe:

—¡Tétavicava eta máitupajijiasirava ema Jesús! Te viávasa Israel, nájina tiratahaina tíchaina tácutihini eta juca vímahaquenehi —nacahepa.

³⁴ Nararihivare ena fariséoana. Ánipa nacahehi:

—Ema maca Jesús, vémeteaca majupahahi ema Satanás, ema náquenu-murihi ena éreanana. Máijararuhi jácani eta máitupajijiasiravahi eta macuchusiravacahi éna —nacahepa.

Éma Jesús majapanuvaca ena achaneana

³⁵ Ema Jesús tamutuhi mapaica eta avasareana étaça eta ánichichaqueneana avasarechichana. Tímiturecapahi tayehe te jácani máitecapihapahi te náurujisirarevana. Ticametarairupahi eta máechajiriruva ema Viya eta náuchucuirayare ena ticasiñanahi éma, machaneranyarehi éna. Ticanararecapahivare ena ticatajivanahi ticatiruhanahi.

³⁶ Camuriana ena achaneana títanajirícavanahi. Taicha ticatajivanahi éna, nájina nácasíñahini. Nacutihi eta uvesa te nájina tijaneacaina. Eta máimairavacahi ema Jesús, ichape eta majapanuiravacahi.

³⁷ Tacahe, ema Jesús máichahavipa viti máimitureana:

—Tétavicavapa eta vicamunuirava ena tímicatadahavianaya tayehe eta juca vématanerepihi.

³⁸ Eyaseacayaresera ema Tata Vicaiyaquene, máijarahavi ena tímicatadahavianayare. Eta juca tímicutijiricavahi mácani achane eta macamunuiravahi ena tímicatacacanaya te máechatijicaya eta maharusura —máichahavipa.

10

Ena dócequeneana apóstoleana manerejiruanahi ema Jesús

(Mr 3.13-19; Lc 6.12-16)

¹ Tacahe, ema Jesús tíchuhavipa viti dócequeneana, mayeaneanayare apóstole. Tijarahavipa eta vítipajijiasiravayare viratahairayarehi vicuchucavaca ena éreanana, vicanarasirayareva ena nacajumaqueneana étapa eta nacatiruhavana.

²⁻⁴ Eta juca víjareana viti apóstoleana*: Ema tínapuca ema Simón Pedro, émapa ema maparapeichu Andrés, ema Jacobo ema maparapeichu Juan, ema Felipe, ema Bartolomé, ema Tomás, nútupa Mateo, ema apana Jacobo, ema Lebeo, ema apana Simón, émapa ema Júlasí Iscariote (ema tijararecáhi ema Jesús).

Ena Jesús mavanecavacapa ena dócequeneana apóstoleana napaicayare tamutu avasareana, ticametarairuanayarepahi

(Mr 6.7-13; Lc 9.1-6)

⁵ Tacahe, ema Jesús tévatacáhavipa viti dócequeneana apóstoleana vicametarairuyarehi. Ánípa máichahavi:

—Vahi ecuyana tayehe eta návasana ena apavasajuecuana. Váhivare ecuyana nayehe ena samaritanoana.

⁶ Eyanayaresera tayehe eta avasareana návasanahi ena vijaneanana israelítana. Taicha éna nacutihi eta uvesana máquenureana.

⁷ Eyana ecametarairuyare nayehe. Emetacayare eta nútijapairainapa nuti Náquenuyare, nuti nucuchuhavacayare éna, taicha mavanerunuhi nútí ema Viya.

⁸ Ecanaracavacayarepahi ena leprósoana énapa nácani ticatajivanahi taicha eta apana jumare. Ecaechepucayareva ena nápenaqueneana. Ecuchucayareva ena éreanana. Éti, vahi evachareruinahi eta juca ítupajijiasiravahi, váhivare ecobrachaimahi nácani ecanararuanayare.

⁹ Váhivare íamaimahi eta oro, eta plata, eta reale. Tacuija iama eta enirurucuha te alforja.

¹⁰ Étanarichuvare emuiríha, éta íamayare. Étapa eta éparupeva, étaripa eta eyupairiquiana. Ema ticaematanerahi, tatuparacáhi náenicayarepahi te jácani macaemataneiyapahi. Ene ecaheya éti, títátíheanayare ena tijacapanaya eta ecametarairuyarepahi.

* **10:2-4** Ena nani apinana ajairana ema Jacobo émapa ema Juan, napapecacáhi, machichanaveanahi ema Zebedeo. Ema Mateo, eta máematanerepihi, ticobrareca eta impuesto. Ema apana Jacobo, machicháhi ema Alfeo. Ema Lebeo, mapapihi eta máijare. Ticajarehivare Tadeo étapa eta Judas. (Te pivaraha pecha, pitanuca te Marcos 3.16-19 étapa te Lucas 6.14-16.) Ema apana Simón, tímaticarehi éma, nachamurinihi ena revolucionárióana ticajireanahi “cananistana”. Navaraha náquijica ena extranjeríoana romanoana.

¹¹ Te ítecapaucha jácani avasare, etanucayare ema achane tiuri, témunarahi. Enasiyare mayehe. Tiámainucava te táitecapa eta iúchusirayareva tayehe eta avasare, epaenumavaya ejunijica eta ítecapihahi.

¹² Te esiapayarepa tayehe eta peti, eyaseacayare ema Viya eta náuricacarevaina ena achaneana ticapenana eta peti.

¹³ Te tiúrianahi ena achaneana ticapenanahi eta peti, ímijanava eyaseuchayare eta náuricacarevaina. Téhesera te vahi nacuri, váhi eyaseuchaimahi.

¹⁴ Étaripa te váhipuca nacujacapahe te jácani avasare, étapa te jácani peti ítecapihayare, váhivare nacubaraha nacusamahe, iúchucavaneyareva. Étatapevachavanúmayareséra eta máteji te ívapeana. Táicutiarayare eta máicuñasiyare ema Viya taicha eta namavarairahi najacapahehíni.

¹⁵ Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinara-jiqueneana ticavasaini te Sodoma étapa eta Gomorra.

*Nacatianacainapa ena téhicanapahi ema Jesús
(Lc 12.2-7)*

¹⁶ Esamanuchaha. Núti nuvanecahehi éti eyana epaica. Nararihisera ena achaneana váinarajiqueneanahi étupiaruanayare. Éna nacutihi eta sárare táínehiqueneánahi. Étiserá ecutiyaare eta uvesa eta tamansuvahi. Ítucayare eta ecaíchepaisirayare eta navainarajivana. Váhisera ecujicapachava te návarahapuca náehahe.

¹⁷ Échapava, taicha nararihiyare ena achaneana ticatianacaheanayare táichavenehi eta éhisiranuhi. Tícaratacaheanainapa, écayaserehinapa nayehe ena juéseana. Téstaacaheanainavarepa eta te náurujisirarevana.

¹⁸ Tásiha, etiarihiyare éti tiámaheanaya te namirahu ena aquenucana, téhevare te namirahu ena Presidenteana gobiernonahi, ecaviurevayare táichavenehi eta éhisiranuhi. Esapihasera éti, ecamapuravainapa échajisianyare te namirahu éna, apaesa náimatiyare namutu ena achaneana te avasareana eta nímiturapiána.

¹⁹ Tacahe, te jácani námahepapuca te namirahu ena aquenucana, vahi ecueñamava tayehe eta jácani échajiuchiravayare, ecatiuchiravayare. Échajicayare eta échajiriruvana máijararuheyare ema Espíritu Santo te jena sache.

²⁰ Taicha máimahaheinepa, timitucaheyare eta échajisiraya. Vahi étijivaimahi eta échajisiraya.

²¹ Natiarihiyareva nácani achaneana tíjararecanaya ena naparapequeneana, navarairahi náimicapaca táichavenénahi eta náehisiranuhi núti. Natiarihiyareva ena nácani náiyana, navarahayareva máijarareca ena nachichanaveana táichavenehi eta náehisiranuhi núti. Natiarihiyareva nácani nachichanaveana nacanarainapa ena náiyana, náimicapacainapa táichavenehi eta náehisiranuhi núti.

²² Namutuyaréni ena achaneana ticatianacaheanayare táichavenénahi eta éhisiranuhi núti. Téhesera ecamichahi tamutu, ímijanavahi eta éhisiranuhi te táitavapa tamutu, nucuchucaheyare núti.

²³ Te napanajicahapuca te jácani avasare íváhihahi, táichavenehi eta ecametarairuirahi, ejunayare tayehe eta apana avasare. Jéhesare, nuti Manerejirunuhi ema Viya, nútijapavanénapa. Vuíchaha ecuitahi epaica eta avasareana ne vijaneanana israelítana.

²⁴ Éti nímitureana, ticitianacaheanaya ena achaneana. Vahi epicauchacaréimahi nayehe, táichavenehi éhisiranuhi núti. Ticitianacaheyaresera tacuti eta nacatianasiranuhi núti.

²⁵ Tíjarechaheanayare váinarajihe, máurishihepuca, tacuti eta náumehairanuhi núti. Étiserá, evapinavaya eta ecutiranuyare eta nacatianasiranuhi núti íáquenu, núti eyehenuhi maestro.

²⁶ Váhisera ecupicavaca ena ticitianacaheana. Ema Viya tímararacaheya. Ticunachaheya eta ecamichirahi, evehainapa eta ícuchihi.

²⁷ Tásiha, étumechava eta ecametarairuiraya tamutu eta nímiturapiana te tamutu avasareana. Jácani néchajiriruvanahi te timapícu, éti ecuchujicayarehi te tijarahi, emicauchiravacaya ena achaneana. Étaripa eta nujajiruhehi te vicárichuhi, epiaracainapa te calle.

²⁸ Vahi cupica nácani nacapacupuca eta íáquehe, tacarichuchucha náituruequenehayare. Váhisera naratahaimahi nacamítiequeneha eta íáchaneva. Macarichu ema Viya epicayare, taicha éma máituruequenehahi tamutu. Maratahahi macamítiequeneha eta íáchanevana tayehe eta táíñehiquene inferno, te ecainajiruva táichavenehi eta episirapuca eta nacapasiraheyare.

²⁹ Nímicutichinahe eta cáyurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta táitaresirahi, étpa eta táepenirahi.

³⁰ Evetijipa éti, éñamacarepanahi me Viya. Éma, tímatipa eta tatupa eta echutimacana. Téchahehivare éma tamutu eta ítaesirana.

³¹ Eta tacahe, vahi ecueñamavahi éti tayehe eta ítaesirana, taicha tétavicavahi eta emunavahi mayehe.

Vímereuchavayare eta véhisira ema Jesús

(Lc 12.8-9)

³² Tímijanava ema Jesús tímitucahavi. Ánivare macahe:

—Namutu ena tímereuchavanahi eta náhisiranuhi te namirahu ena achaneana, núti apanavare nímereuchavaya eta nuchanerairavacahi éna mayehe ema Tata Nucaiyaquene, ema tiávihahi te anuma.

³³ Nácanisera vahi návarahahini tímereuchavanahi eta náhisiranuhi, núti apanava nímereuchaya eta vahi nuchanerainahini éna, te mamirahu ema Tata Nucaiyaquene.

Ena achaneana náepuruvacainapa nácani téhicanayare ema Jesús

(Lc 12.51-53; 14.26-27)

³⁴ Éti ímijachaipapuca eta nítesirahi te juca apaquehe, tájina tácyemacaréimahi, tíuricacareyarehi nícha. Váhisera ene tacahe. Níchaveneya núti, ena achaneana tépuruheanaya térajicavanaya eyehe. Eta tacahe, nuvaraha échapirica yátupina eta juca éhisiranuhi.

³⁵ Taicha puiti juca vicaijuheyare, mácani achane, te natiarahi ena machichanaveana, nacatichayarehi ema naiya táichaveneyarehi eta máhisiranuhi éma. Ésuripa esu naena, nacatianacayareva. Ésupa esu chinena, sucatianacayareva esu suímase taicha eta suéhisiranuhivare esu apana.

³⁶ Ene nacaheya, nararihiyare ena tachichanaveana eta peti ticitianacana ena náiyana te peti níchavenehi núti.

³⁷ Nácanisera tínjicavana eta náhisiranuhi táichavenehi eta nacatianasira ena nachichanaveana, váipa tatuparacahini nuchanerainahini. Énaripa

nácani tñajicavana eta náehisiranuhi táichavenehi eta nacatianasira ena náiyana, énerichuvare vaipa tatuparacahini nuchaneranainahini.

³⁸ Énerichuvare nácani apaesarichu eta navarairahi téhicanuanahi, váhivare nájaracavahini táimicapacahini eta náehisiranuhi, vaipa tátuparacahini nuchaneranainahini.

³⁹ Taicha nácani téñamavanahi eta náitaresira, tiávamirahuana eta náehisiranuhi, énajivayare ticamitiequenehavanaya. Énaserá nácani yátupi tñjararecavanahi téhicanuana, táimicaparuanayarepuca eta náehisiranuhi, éna tiúchucuhanayare eta náitaresirayare.

Jararihi eta vícuchihi te anuma
(Mr 9.41)

⁴⁰ Ema Viya máitsivachayare nácani tiúriana ena najacapiraheyare nasamahe éti. Taicha eta najacapirahehi, ticaecheranahi eta najacapiranuhivare núti; énerichuvare najacapahivare ema Tata Nuaiyaquene.

⁴¹ Énerichuvare nácani tijacapanahi ema profeta nuvaneruhi, énapa ena achaneana tiuri eta náehisiranuhi, máitsivachayare ema Tata, máijarasiravacayare eta náicuchi.

⁴² Énaripa ena témunarahanahi nayehe ena nani ánichichaqueneana téhicanuanahi, nacumpiracha eta une táichavene eta náehisiranuhi; énerichuvare jararihi eta náicuchiquene —máichahavipa ema Jesús.

11

Ema Juan Tíchasiricarahi mavanecavacapa ena máimitureana
(Lc 7.18-35)

¹ Te tamutupa eta máimitusirahavihi ema Jesús viti dócequeneana mayeheana apóstole, tiyanavarepa eta te avasareana tayehe eta Galilea. Taicha mavarahahi máimitucayare ena achaneana eta máechajiriruvana ema Viya.

² Tiuri puiti, ema Juan Tíchasiricarahi, mávinehi te cárcel. Ánaqui masamairiricapa eta máichaqueneanahi ema Jesús. Tacahe, máevatacapa ena apinana máimitureana, nayaserepanayarehi ema Jesús.

³ Te náitecapauchapa, náichapa:
—Ema viáquenu Juan tivanecahavihi viyaserepanaviyare te yátupihipuca pítiripahipuca Cristo ema vicuchapaquenehi, ¿téhese rapuca vímianavayarepuca vicuchapa? —náichapa.

⁴⁻⁵ Ema Jesús majicapavacapa:
—Nuvaraha ímararacaya eta níchaqueneana puiti. Nucaimairiricavacaipa ena púchuquiana. Nímipaisiraipa ena masariana. Nucanaracavacaipa ena leprósoana, énapa ena túhuquiñana. Nucaechepusiravacaipavare ena náepenaqueneanaini. Énerichuvare níchuhahi ena páureana náeneuchavaya apaesa náuchucuha. Tásiha, eyana emetaca ema Juan tamutu.

⁶ Vaipa macueñamava ema Juan eta nuyehe. Tévacavahi eta máuricacarevahi éma, te ticasíñavahi eta nuyehe —máichavacapa.

⁷ Tacahe, tichavanapa ena vanairucanahi me Juan. Tásiha, tépanavavarepa téhajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratacaghini éma, te eyanapa te mávapahi apaquehe te mávihahi, ¿tájaha eta epanereruana tayehe eta macametarairuirahi? Éti ímijachaipapuca mamapachichijiririvaichucha eta máechajisirahi tacutihí te vímararaca ta taflurena eta acutena te tacayamuririjica eta técatícava.

8 Ímijachaipavarepuca tavayuaruhi éma tiúrinanácavayarehi eta macamuirihairahi. Écharichuhi éti mácani tiúrinanacavahi, píncanillahi eta máitaresira, váiparinehi tiúchucaimahi te sache, váhivare tiyanaimahi te mávapahiana apaquehe. Manasiqueneyarehi te jácani tiúrina peti.

9 Nuyaserecahe: ¿Tájaha eta ímijachirahi eta mayehe? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana.

10 Ema maca Juan émara máechajisihaguenehi ema Viya eta te Sagrada Escritura, ánipa macahehi: “Nuvanecayare ema títapumirauchaviyarepahi ema ticametarairuyarepahi, apaesa natsecavapaipa ena achaneana eta najacapuraviyare” tacahepa eta Sagrada Escritura.

11 Núti nutupiruva numetacahe: Ema maca Juan, nájina mácuti nayehe ena achaneana. Tétavicavahi eta macunachacarevahi. Tiápajupanavahisera eta nacunachacarevahi nácani nuchanerana, apaesachichapucaini eta nacacutiaraírahi eta mapaneruana ema Tata.

12 Ema Juan tépanavapa eta máimitusirahi ena achaneana tacamunuirahi eta náeneuchirava me Viya. Nararihisera ena vahi náuricaghini nasamararacaghini. Éta pa tímicitichahi témecatájívachahi éma. Puíticha tanasihi ticatichanuana núti apanava, témecatájívachanuanyare.

13 Ema víyarahaini Moisés téchajisihanuhi eta te májurehi. Énaripa ena víyarahaini profetana náechajisihahi eta nítésirayarehi nuti Manerejirunuhi ema Viya.

14 Puiti numetacahe: Ema Juan émaripahi ema profeta máiteruyarehi mavasiyarehi ema víyarahaini Elías, eta máinápumirauchiranuyare.

15 Te evarahapuca ecaicutiara, tavaraha eta epanerechinavaya.

16-17 Etiarihihisera eti achaneana puiti jucá sácheana, eta emasuapajiraivahi, nímicutichahesa ena amaperuana tiútseruanahi. Apapipijichucha eta nacayemaqueneanapahi. Ema apana macahepapuca: “Vépiyacaya eta piéstachicha”. Énasera ena apamuriana vahi náisapavahini. Tásiha, ema apana macahepuca: “Vépiyacaya eta ecari”. Váhivaresera náisapavahini.

18 Ema Juan, te tímerecavapa, muraca eta máimiturapianahi. Eta manicasareana, vahi tácutihini eta nanicasareana ena achaneana. Nararihisera te emuri ena tépiyaequenehanahi éma. Náimijachahi mávaháruhi ema éreana.

19 Nuti Manerejirunuhi ema Viya, eta nítécapauchirahepa, nucachanehepaipa eti achaneana eta enisirahi. Etiarihihivare eti épiyaequenehanuhi: “Ímaha ema maca, cánisiuquitataji, cávahárasí. Macachanevacapaipa ena achaneana tisipecaturarahianahi” ecahehi. Eti épiyacavapa épururahi, ticutihinehi yátupinahini échemarahihini. Tétavicavahisera eta éjecapuravahi taicha eta emasuapajiraivahi. Te yátupihihini échemarahi, ímatinuhini eta nucavanahirahi eta me Tata —máichapa ema Jesús.

Eta táicuñayare eta návasana ena achaneana masuapajirairahana (Lc 10.13-15)

20 Ema Jesús tépanavapa máechajisiha eta táicuñayarehi eta avasareana máichinehi eta tiáramicareana. Ticaicuñanayarehi ena tachichanaveanahi táichavenehi eta namasuapajiravahi. Váhivare náeneuchavahini, náinajicahipucaini eta napecaturana. Máechajicapa ena achaneana tímicitijiricavahi natiarihinahini te mairahu. Ánipa macahe:

21 —;Páurehesami eti nujaneanana ecavasanahi te avasare Corazín! ;Páurehesamihivare eti apamuriana nujaneanana ecavasanahivare te avasare Betsaida! Ichape eta ícuñayare taicha éti ímaharipa tamutu eta tiáramicareana níchaqueneanahi te emirahu, váhisera ávarahahini éneuchavahini. Ena nani achaneana ticavasanahi te Siria, apavasananahinéni, tétavicavahinéni eta namaurivahi, németeacaserá núti nasapihahipucaini téneuchavana te náimahahini eta níchaqueneanapahi. Enévanaháni náimerecavahini yátupi eta náeneuchiravainahini.

22 Numetacahevanesera: Te jena sáchezare, muracapanayare eta ícuñayare éti, taicha eta emavarairahi éneuchavahini. Tacachuricayare eta nacaicuñairaya ena achaneana apavasanana ticavasanahi te Siria.

23 Étiripa eti ecavasanahi te avasare Capernaum, tamapurujihí eta nímitu-sirahehi éta pa eta ímairahi eta tiáramicareana níchaqueneana. Eti ecasiñava-vaicahi, ímijachaipapuca eta ticayapaheyare te anuma. Ichapesera eta etsirihacaremayare, taicha épujuquichavayare eta te yucu taicha vahi éneuchavaimahi éti. Taicha te nímerecáhini eta tiáramicareana tayehe eta avasaréni váinarajiquenehi Sodoma, tácutihini eta ímairahi éti, ichapehipucaini eta náeneuchiravainahini, váipapuca macuicuñacahini ema Viya.

24 Numetacahevanesera: Ichape eta ícuñayare te táitecapapa eta júciyare. Tacachuricayare eta náicuñayare ena ticavasanaini te avasare Sodoma — macahepa ema Jesús.

*Ema Jesús tíurisamuréinehi mayehe ema Maiya
(Lc 10.21-22)*

25 Étarichuhi te jena hórahi, ema Jesús ánipa macahe:

—Tata Nucaiyaquene, tétavicava eta nucunachiravi. Jéhevare píti táquenuvihu eta anuma éta pa te juca apaquehe. Títauchavaipa eta pípanereruhi. Vahi písapahini náitucáhini eta júcana ena tímijachavanahi téchemarahiana. Énapasera píjaracahi ena nani téhicanuanahi, tájinahinéni náechemaraivainahini. Puiti nasapiharipahi nacachuricahi ena títipajjiacavanahi.

26 Tétavicavahi eta táurivahi eta pípanereruhi píti, Tata Nucaiyaquene.

Ema Jesús máichuhavaca ena navitajiruana, mavaraha macanaracavaca

27 Tacahe, ema Jesús máichavacapa ena achaneana:

—Ema Tata Nucaiyaquene, ema tújaracanuhi eta núritya néchaya tamutu. Nájina énajivainahini náimatihini ema Tata. Nucarichu núti néchinavahi ena nímitatiruanayare éma. Taicha núti yátupihí eta nímatirahi ema Tata Nucaiyaquene; tacutiquenehi eta yátupirahivare eta máimatiranuhi éma.

28 Yare, ecasiñanu emutu eti evitajiruanahi te iáchanavana eti éyarecahiana eta éjecapiravana. Núti nuncanaracaheyare.

29 Ísapava nunacasahe eta nuyehe yugo. Nucachanehe apaesa ecaravahu nuyehe, taicha núti mánsunu, tétavicava eta núriva eta nusamure. Éti tétavicavaya eta iúricacarevaya te iáchanavana te ejacapa eta nímiturapiana.

30 Taicha eta nuyehe yugo vahi tácajera. Tipevejyare esama —máichavacapa ema Jesús.

12

Ena fariséoana náimipicauchahi eta nayaherepiana tayehe eta sávarumuhuana. Émasera ema Jesús máimereuchahi émarichu téchahi eta nayaherepiana ena achaneana eta sache nanarasirayare.

(Mr 2.23-28; Lc 6.1-5)

¹ Eta jena sávaru, ema Jesús tiyanapa tipaica. Tiámahavipa viti máimitureana. Témehicavanapa ena fariséoana. Vétavivijicapaipahi eta isanitiaana. Tacahe, eta vipaisirapahi, vécuhaipa viti máimitureana. Tásiha, vivechuquiha-paipahi étajavapahi eta trigo. Vivepiraquihapaipa, vépurajacachavapaipahi. Vinicapaipa, taicha tísapacareichucha.

² Énaserá ena fariséoana eta náimarasirapahi, tistemamajuheanapa. Ánipa naicha ema Jesús:

—Pímaha ena pímitureana. Ticaemataneanapaichucha eta navepiraquihapahi eta trigo puiti juca sache tétavicavahi eta tacapicahuirahi. Vahi tísapacaremahi eta juca nacaematanérahí puiti —náichapa.

³ Tásiha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyarahaini David eta mapaisirapahi técuhaipa, énerichuva ena téhicanapahi.

⁴ Écharichuhi éti te masiapapa eta mapena ema Viya, tiyaseserecapa eta manicayarehi. Náijaracapa eta pan tacapicahuquenehi nanacasarehi te mamirahu ema Viya. Nanicasarehi ena tiyujaracarahiana, émasera ema David vahi tátuparacahini manicahini. Étaserá eta máecuavahi, manicapa eta pan, énapa ena macachanequeneanapahi.

⁵ Váhipuca échajicuha éti eta te Sagrada Escritura eta mavanairipi ema víyarahaini Moisés eta nayehe ena tiyujaracarahiana téchapajiricanahi eta Templo. Éna, tájina natapiravainahini eta nacaematanerahi te sávarumuhuana.

⁶ Tavetijichapuca puiti nutiarhipahi núti. Ichápequenénupánahi tayehe eta Templo.

⁷ Éti váhivare ecaicutiara eta juca máechajiriruvana ema Viya: “Núti nuvaraha yátupinaini eta eJapanuraivainaini. Taicha te vahi, tamapurujiyare eta ecamavahuirahi eta nuyehe” macahepa. Te ecaicutiarahini, váhiyarehini ecaechivaca ena nímitureana, taicha éna tájina natapiravainapahi.

⁸ Tiuri puiti, numetacaheyare: Núti Manerejirunuhi ema Viya, nútirichu néchahi eta sache nanarasiraya ena achaneana —máichapa.

Ena Jesús macanaraca ema achane tépenavahu

(Mr 3.1-6; Lc 6.6-11)

⁹ Te apanavarepa sávaru, tiyanavare ema Jesús tisiapahi tayehe eta náuruji-sirareva.

¹⁰ Ánaquí matiaríhi ema achane vaipa tayamuricahini eta mavahu, tépenavahuipa. Natiaríhivare ena fariséoana, natanujiricahi eta ticaviurevayarehi ema Jesús. Nayaserecapa éma:

—¿Táuricapuca vicanaracavaca ena nacajumaqueneana te sávarumuhuana tacapicahuquenehi? —náichapa.

¹¹ Ema Jesús majicapavacapa:

—Nímicutichinahe puiti. Németeaca májina émanaina achane vahi macujapanuhini eta máitatiquene uvesa, te téchipaicavapuca te pusu te jena sache

tacapicahuquenehi. Eta máeñamirahi, tipatsicava mavecuha eta paure sárare.

¹² Núti numetacahe: Ema maca achane tiápajucavahi eta téñamacare tayehe eta uvesa. Tacahe, tísapacaréchucha víchayare eta táuriqueneana te sávaru-muhuaana —máichavacapa.

¹³ Tásiha, ema Jesús máichuhapa ema achane ticajumavahuhi:

—Nímaha. Picajaruvauchava, pímera eta pivahu —máichapa.

Tacahe, ema achane eta macajaruvauchiravahi, enevanerinehi tinaraca eta mavahu. Tiúrivarepa tíchava, tacutípa eta mavahu sapa.

¹⁴ Tisemanarinehi ena fariséoana eta náimairahi eta máichaquenehi ema Jesús. Tíyananapa. Tinacuchavanapa eta napanerechirahi eta nacapasiravarehi ema Jesús.

Ema Jesús tíyanavarepa típaicahi

¹⁵ Tacahe, ema Jesús, te máechapa eta napanereruhi ena fariséoana, navarairahi nacapaca, tíyanavarepa típaicahi. Náehicapa ena camuri-queneana achaneana. Énerichuvare, náitecapauchapaipa ena nacajuma-queneana. Macanaracavacapaipa namutu.

¹⁶ Mavanecapaipasera ena macanararuanapahi vahi nacumetajirica eta émairahi ticanaraca.

¹⁷ Eta juca títauchavapahi eta máechajiriruvahi ema Viya tayehe eta májurehi ema víyahaini profetaíni Isaiás.

¹⁸ Ánipa tacahehi: “Núvaraha ímatiya ema vanairucahi nuyehe, nunere-jiruhi núti. Tétavíjavahi eta némunasirahi, núrísamurehivare máicha. Ímatiyare éma taicha mávaháruhi ema Espírítu Santo máíjararuhi éma. Ema nu-vanara, tímítucavacayare ena achaneana te tamutu avasareana eta nuvanai-ripiánahi.

¹⁹ Éma, tájina máítucaimahi téhacaca. Váhivare típiararecaimahi, macunachi-ravahi te cálleana tayehe eta máichaqueneanahi.

²⁰ Mánsuhi éma taicha ticayehi paciencia. Macamíchavacahi namutu. Váhivare macajachaimahi nácani vahi túmeanaina. Tiámainucava te máejacapa tayehe eta mávacureyare, muracainapa eta mávacureyare.

²¹ Tásihasera, namutu ena achaneana te avasareana ticunevanayare eta mayehe, navarairayare máurichayare éma” macahepa ema Viya.

Ema fariséoana téjecapavanahi eta náimíjachirahi ema Jesús mávaháruhi ema Váinaraji Satanás

(Mr 3.19-30; Lc 11.14-23; 12.10)

²² Tacahe, ena achaneana námapaipa ema achane púchuqui, úpavare, taicha mávaháruhi ema éreana. Navarahahi macanaraca ema Jesús. Jéhesarehisera ema Jesús macanaracahi. Tiúripa téchejica, tímairiricavarepa.

²³ Ichaperinehi nárami ena achaneana. Tásiha, ánipa nacahe:

—Ema maca Jesús, émapachupuca ema Cristo, ema vicuchapaquenehi mámariequene ema víyahaini David —nacahepa.

²⁴ Énasepa ena fariséoana napanerechahi náepiyaequenehayarehi. Ánipa nacahe:

—Ema maca Jesús, eta macuchusiravacahi ena éreanana, vémeteaca máíjararuhi eta máítupajijiasiravahi mayehe ema Satanás, ema náquenumurihi ena éreanana —nacahepa.

²⁵ Ema Jesús máimatíhi eta napanereruhi éna. Tacahe, máichavacapa:

—Nímicutichinahe puiti ena machanerana ema gobierno. Éna vahi típutsimuriahacacanaimahi apinainahipucaini partido. Te típutsimuriahacacanapa, énjacacaiapapucaini tiáquipaicacana. Énaripa ena achaneana te avasare, vahi táurica náiputsimuriahahini. Émaripa mácani achane, te camurianahi ena machichanaveana, váiparinehivare típutsimuriahavanaimahi náehajiricacahini, énjajiricacahini náquipairicacahini.

²⁶ Ene macahehi ema Váinaraji Satanás, váiparinehi máisapahini típutsicacana ena machamuriana, taicha mavarahahi tisimutuanayarehi éna, tímiyanavanayarehi eta nacaetemajirisirahaviyarehi.

²⁷ Éti ímijachaipe nútirichu machamuri ema Satanás, táichavenehi eta nuratahairahi nucuchucavaca ena éreanana. Tájina vahi étupicavahini éti eta juca epanereruana. Te émahipuca tímicitacanuhi ema Satanás, énerichuhivare éti máimicataruanahivare jácani éma, eta ecuchusiravaca ena éreanana. Epanerechinávanuma.

²⁸ Émaquenehisera ema Espíritu Santo, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiiranuhi ema Viya eta nútirayare nécha tamutu. Nútiripara nuti ecuchapaquenehi.

²⁹ Nájina tisiapaimahi eta námerecahini te jácani peti matiarihahi ema túmequenehi. Tacamunuhi nacaratacanutayare, náitiacanutayarehi éma. Jéhesare, náituruyechasareyarepa eta máimahaqueneana. Ene nucahehi núti, túmepananihi maye ema maca Satanás.

³⁰ Te vahi éhicanu, ecaemataneasiranuya, machamurihehi éti ema ticatianacanuhi. Masapiha ímicatatachi éma eta macaetemajirisiranuhi.

³¹⁻³² Nutupiruva numetacahe: Eperdonachacareana eti achaneana eta epecaturana, tamutu jácani échajisihaira eta táíñemahiqueneana. Jácani te ecaecahinuhipuca nuti Manerejirunuhi ema Viya. Jararihiserana eta epecatura vahi típerdonachacaremahi. Éti ímijachahi ema Satanás ema tiávahácanuhi. Ichape eta éjcapiravahi, taicha ema tiávahácanuhi núti, émaquenehi ema Espíritu Santo. Éti epanararacaripa éma. Tásiha, tájina eperdonachacareimahi puiti juca ítaresiraichaha, evetijipa te apana ítaresira—máichavacapa.

*Éma Jesús máimicuticha eta táhi eta yucuqui
(Lc 6.43-45)*

³³ Tímaticare eta yucuqui te tíurinisihahi eta tacahira. Tímaticarehivare eta apana yucuqui, máuriraha eta tacahira. ¡Epanerecha! Núti níchahi eta táuriqueneana nayehe ena achaneana ticatajivanahi. Éta tímereuchanuhi eta mávahásiranuhi ema Espíritu Santo. Téhesera nucaetemarecahini, níchahini eta máematanerepiana ema Váinaraji, jéhevareserapucaini eta tímereuchanuhini eta mávahásiranuinahini éma.

³⁴ ¡Étisera machichanaveanatataji ema Váinaraji! Váiparinehi ítucaimahi échajisihahi eta táurinaqueneana, taicha éti tamaverasiavahi eta evainarajivana. Eta échajiririvanahi ticaecherahi eta evainarajiva te esamureana.

³⁵ Nácani tíuriana achaneana, tatupiruvahi eta náechajirisirava taicha tíurihahi eta nasamure. Nácanisera achaneana váinarajiana, vahi tíurimahi eta náechajirisirava. Tíñemahipivacahi taicha tavayuchahi eta tavainarajiva eta nasamure.

36 Nutupiruva numetacahe: Te táitecapapa eta sache táitecapirayare eta juíció, emutu ecayaserehiyare eta échajisihairana eta tamaeperajiqueneana.

37 Étaripa eta tiviuchaheyare. Téhesera tiúrihipuca eta échajisihairahi, vahi ecaicuñaimahi. Tájina tiviuchahémahi —máichavacapa.

Ena Jesús macajachavaca ena fariséoana taicha eta namasuapajiravahi (Mr 8.12; Lc 11.29-32)

38 Tacahe, nayaseacapa ema Jesús ena fariséoana énapa ena escribánoana. Ánipa náicha:

—Tata maestro, vivaraha picuchucaini eta tiáramicare, te yátupipuca mavaneruvihí ema Viya —náichapa.

39 Ema Jesús majicapavacapa:

—¡Eti achaneana váinarajiqueneana! Núti nímatihe. Vahi esuapanuimahi, te nímercapucaini eta tiáramicare. Tásiha, váhinéni étina tatuparaca ímahahini eta tiáramicareana. Ímahayesera eta tiáramicare tacutiyare eta máichavacuenevahi ema víyarahaini profetaíni Jonás.

40 Taicha ema Jonás masiapajuechahi eta ichapequene jima, mapana sache eta mayerevahi, mapanavare yati. Ene nucaheyare, núti Manerejirunuhi ema Viya, mapanayare sache, mapanavare yati, eta nucaheyare eta nucaecarasirayare.

41 Eta jena sáchezare téchepucanayare namutu, tiúchucuhanayare ena achaneana ticavasanáinihi acane te Nínive. Tisipecaturarahianahinéni éna. Natupiruvahisera nasuapa eta mametarairu ema Jonás. Téneuchavanavanehi. Tásiha, te jena sáchezare, nacahenapa eyehe éti: “Táuricapa nacaicuñaini ena nani maparajuruana ema Cristo, táichavenehi eta namasupirahi éma. Taicha éma, máuriquenepanahi mayehe ema Jonás” nacahénapa.

42 Tacutiquene esu reina Seba eta acane, te susamairiricapa eta máitupajijiasiravahi yátupi ema Salomón. Ésu, tayérehiquenehinéni eta suávasa, tiyanahisera sucapayaca ema Salomón taicha suvarahahi susamayarehi éma. Tacahe te téchepucanapa namutu, ésu suyaseacainapa eta ecaicuña éti máetupicushmanahi puiti. Suchenapapuca: “Táuricapa nacaicuñahini ena nani máetupicushmana, tájina náetseraruina nasamaripa ema Cristo, ema titupajijíapanavahi mayehe ema Salomón, tásiha vuíchahacaruva nasuapa” suchénapapuca jácani.

Ena Jesús máimicutichinahi ena masuapajirairahana mayehe (Lc 11.24-26)

43 Tímiyanava eta máechajisiravahi ema Jesús, ánipa macahe: —Énerichuvare éti ecuti mácani achane máinajiruhi ema émana éreana. Ema éreana tiyana matanucainapa eta jácani masiapihayarehi. Eta mamaichimavira eta mavarahaquene, mapanerechayarehi tichava.

44 Macahénapapuca: “Nuyanayare nuchava, nusiapayareva mayehe ema návaháruinihi”. Te títecapapa ema éreana mayehe ema achane mávaháruinihi, máimahapa ema achane máinajicaripa eta mapecaturana, vuíchahasera máehicahini ema Viya.

45 Tásiha, tiúrisamurepa ema éreana. Tásiha, tíchuarecapa ena siétequeneana machamuriana. Váinarajipanana éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane. Ene ecaheyare éti, taicha eta emasuapiranuhi —máichavacapa ema Jesús.

*Suítcapauchapa esu maena ema Jesús énapa ena maparapenaveana
(Mr 3.31-35; Lc 8.19-21)*

⁴⁶ Timiturecarichaha ema Jesús nayehe ena achaneana, títecapanecha esu maena énapa ena maparapenaveana. Nanasihisera te aneca. Navarahahi náechajicayarehi éma.

⁴⁷ Natirihihi ena timetapananahi ema Jesús. Ánipa nacahe:

—Esu pémunaruquenahi pena énapa ena piparapenaveana, nararihi ani te aneca. Navarahahi téchajicaviana —náichapa.

⁴⁸ Émasera majicapapa:

—Yátupi némunacavacahi esu meme, énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi.

⁴⁹ Tásiha, tisuvechahavipa viti mayeheana apóstoleana. Tásiha, macahepa:

—Numetacahe, ena nani ena némunaruanahivare.

⁵⁰ Taicha namutu nácani ticaemataneacanahi me Tata tiávihahi te anuma, énahi ena némunaruanahivare —máichavacapa.

13

*Ema Jesús máimicutichinavaca ena achaneana eta evaraqui tacaevaquenehi
te apanapanenejiquene máteji*

(Mr 4.1-9; Lc 8.4-8)

¹ Te jena sache, tiyanavarepa ema Jesús, macaijuhe te tachaui eta cáquiure. Téjacavarepa eta ánaqui eta máimituresirayarehi.

² Tásiha, camurianapahivare ena achaneana títecapauchanahi éma. Eta navayuchiraripa ena achaneana, tiyanapa ema Jesús tiávacuhapa tayehe eta pacure. Ena achaneana nanasipa te tachaui tiájipahi.

³ Tásiha, camurihi eta máimicutichaqueneanahi eta máimitusiravacahi. Ánipa macahe:

—Matirihi ema émana achane. Tévpapanahi te máesane.

⁴ Eta mapaisirapahi, témiricapaipa eta evaraqui te achene. Táimahapa eta cáyure, tanicapa.

⁵ Eta mayeherepi éma eta máevasira, máevajajapaica eta apaquehe. Tásiha, eta apamuri evaraqui témiricapa te váhirichu tamitutihini eta máteji taicha máripahi eta apaquehe. Tímarucavanepaneni táicha.

⁶ Téhesera te tíjurepa eta sache, tacapajicapa; taicha váhirichu táuparevacahíni.

⁷ Tacahe, eta apana evaraqui témiricapaipa te tataracu eta itapepaire. Tiúrinahinéni eta táimarusirahi, étasera eta itape tacachuricapa eta tajurusirahi. Táemuriachapa eta sucureca.

⁸ Tacahe, viti mayeheana apostóleana vémeñahavapa eta mayehe ema Jesús. Viyaseresapa tájahapuca tacayemahi eta máimicutiarachiravacaichucha eta máimitusiravacahi ena achaneana.

⁹ Esamararacanu emutu éti. Te evarahapuca ecaicutiara, tavaraha eta epanerechinavayare.

*Ema Jesús máitametacaquenevacapa ena apóstoleana eta juca máimiturapihi
(Mr 4.10-20; Lc 8.9-15)*

¹⁰ Tacahe, viti mayeheana apostóleana vémeñahavapa eta mayehe ema Jesús. Viyaseresapa tájahapuca tacayemahi eta máimicutiarachiravacaichucha eta máimitusiravacahi ena achaneana.

¹¹ Tásiha, ema Jesús tijicapahavipa:

—Ema Tata tituparacanuhi nítametacaheyare éti eta juca táequenereruana mapanereruana. Mavaraha ímatiequenehaya éti. Énasera ena apamuriana achaneana vahi nítametacavacaimahi, náimainavainepa éna.

¹²Éti, te esuapa yátupihí eta nímíturapiana, ema Espíritu Santo títutucaheya tamutu eta tacayemaqueneanahi. Énasera nácani vahi návararahini nasuapa, énajivayare tíchavana ticaverejicasianaya eta nasamaqueneanahi.

¹³Eta tacahehi eta nímítusiravacahi, nímicutiarachinavacaichucha. Te apaesarichu eta navarairahi náituca, vahi nacaicutiarahini eta juca nímechaqueneanahi. Nasamahi eta néchajiriruvana, váhisera nacaicutiarahini eta nímítusirahi.

¹⁴Puiti ena nani achaneana nacuti ena achaneana acane, vahi nasuapahini ema víyarahaini profeta Isaías. Ánipa macahe: “Nímatihe éti. Esamaya-renénipuca, váhisera ecaicutiaraimahi. Ímahayarehinénipuca, váhivaresera ímatiequenehaimahi.

¹⁵Taicha eta esamureana eti achaneana, tétavicavahi eta tamuracava. Vahi evaraha esama. Épiyacavahivare púchuquihe, emavarairahi esuapahini te esamureana. Tájinapa táichahíni vicuchapahini eta éneuchiravainahíni, evarairapucaini ecasiñavahini me Viya, apaesa macanaracahehíni” macahepa ema víyarahaini Isaías.

¹⁶Étisera eti nímítureana, tétavicavahi eta iúricacarevahi, taicha esuapahi eta juca ímahaqueneanahi étapa eta esamaqueneanahi.

¹⁷Nutupiruva numetacahe: Acane ichapemuriana ena achaneana tiúriana énapa ena víyarahaini profetana, tétavicavahi eta navarairahi tímatinuana, náimahavare eta juca níchaqueneanahi ímahaqueneanahi. Navarahavarepa nasama eta nímíturesirahi. Váipasera nacapayacahini.

¹⁸Ácaicutiaraicha eta juca nímicutiarachaquenehi mayehe ema tévacarahi.

¹⁹Núti níchuhavaca ena achaneana, machaneranayare ema Viya ena téhicanuanayare. Tásiha, natiaríhi ena achaneana nasamaripahinéni eta nímíturapianahi, émasera ema Váinaraji vahi máisapahini tánasihini te nasamureana. Enevanehi macamitisicavaca eta náimitucasivanainihi. Éna nacutihi eta máteji muracapahiquenehi te achene.

²⁰Natiaríhivare ena apamuriana achaneana, nacutihi eta máteji máripahi. Te nasamararaca eta nímíturapiana, natupiruvanehi nasuapa, tiúrisamureanainehi.

²¹Váhisera náratahahini nacaravahuhini yátupinahíni. Vahi nácutihíni eta evaraqi tiúparehi. Ánipirichu eta náehisirahi, taicha vahi nacamichahini jácani nacatajivairanahi. Váhivare túmesamureanainahíni te tatiaríhipa eta jácani nacatichaira ena achaneana táichavenehi eta náehisiranuhi.

²²Natiaríhivare ena apamuriana achaneana nacuti eta máteji te távilhahi eta itapequijiana. Énerichuvare nasamararacahinéni eta nímíturapiana. Napaneréquenehahinéni, tahapapiricavacahisera eta jácani táichararacavayarehi eta náitaresira. Tavayuacavacavare eta tájiparacana, étapa eta navarairahi tirricochavana. Tamutu eta juca táemetavícahi eta navarairahi téhicanuana. Tamapurujiyarehi eta najacapirahi eta nímíturapiana.

²³Natiaríhivare ena apamuriana achaneana nacutihi eta tiúrina máteji. Éna, tisamanuanahi. Náunacahi yátupi eta nímíturapiana, náimatiequenehairahi. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi.

Nararihivare ena apamuriana, nativarerehapanapa eta nacaematanea-sirahi. Tásiha, ena apamuriana, ichapemuripanapa eta nacaemataneasirahi ema Viya —macahepa ema Jesús.

Éma Jesús máimicutiarachina eta sucureca trigo étapa eta ejare

²⁴ Éma Jesús máimicutiarachavare ena achaneana eta máimitusiravacahi:

—Puiti nuvaraha nímitucahe tatiarihiyare eta sáchezare te táitecapapa eta nacayeserehiraya me Viya ena achaneana. Tacutihi eta máichavaqueneva mácani achane tévacarahi eta tiúrina evaraqui tayehe eta tiúrina máteji.

²⁵ Étasera te tímacapa ema ticayehe eta sucureca, macahepaipa ema macatianaru. Máimisiriqichinapa eta táifemahiqueneana ejare. Tásiha, tianapa.

²⁶ Tacahe, te tímarucainipa eta evaraqui trigo, tiúchucavarepa eta ejare, tacachanepaipa eta evaraqui.

²⁷ Náraminehi ena machaneranahe ema achane tévacarahi. Tiyananapa nametapana ema náejaháruhi. Ánipa náicha: “Tata, eta jena pévaraquihi, tájina tacasiriqihini eta táifemahiqueneana ejare. Puítisera tiúchucapa tacachanepaipahi eta pévaraquihi” náichapa.

²⁸ Éma náejaháruhi majicapapa: “Matiarahi mácani ticatianacanuhi. Éma tíchahi eta juca, tímisiriquichinanuhi”. Tásiha, ema machanerana náichapa: “¿Pivarahapuca, tata, viyana víti vivepuraha eta jena ejareana?”

²⁹ Éma majicapapa: “Vahi tiúririne, taicha machu táimivepurica eta névaraqui trigo.

³⁰ Tácuticacarichaha eta tajurusirayare. Tiámainucava te tacaechatijipa, nuvanecahénapa éti nuchanerana tativayare evepurica eta ejarejiana, ítijicainapa eta tacaijuirayare. Tásiha, evehainasarepa eta trigo, ticaunainapa te tacaunairare”.

*Éma Jesús máimicuticha eta taqui eta mostaza
(Mr 4.30-32; Lc 13.18-19)*

³¹⁻³² Éma Jesús máimicutiarachavare eta taqui eta mostaza eta máimituresirahi. Ánipa macahe:

—Puiti nuvaraha nímitucaheya eta apana tayehe eta evaraqui ánichichaquene, étasera te tijurucapa, tíñejyarehi. Tacaheyare eta tajurusirayare eta nímiturapiana nayehe nácani tijacapanayare. Ímatichuhi éti eta taqui eta mostaza, eta ánichichapanahi tayehe eta apamuriana evaraquiiana. Tásihasera te tímarucapa, tiúnayarehi eta táenaqui, tacutiyahehi eta yucuqui eta táichapeva. Tacachuricayarehi eta apamuriana evaraquiiana. Járjapainapa eta cáyureana. Táepiyacainapa eta tamacajiana te tataavajiana. Ene tacaheyare eta tajurusirayare eta nímiturapiana núti Manerejirunuhi ema Viya.

*Éma Jesús máimicuticha eta levadura
(Lc 13.20-21)*

³³ Énerichuvare máimicutichina eta juca apana máimituresirahi. Ánipa macahe:

—Tacutiquene, eta juca nímiturapiana tímicitijiricavahi eta levadura. Esu súcani esena tiúrihi eta tasisijisira eta suyehe levadura te tamutu eta suépiyaruhi masa, tayanapane apinapucaini arroba eta suyehe jarina, tasiha-jichásera. Jéhesare, tiápucayarehi tiuri.

*Camuri eta máimicutichaqueneana**(Mr 4.33-34)*

³⁴ Ema Jesús tamutu máimicutiarachinapahi eta máimituresirahi. Tájina étaheña te timitureca, vahi macunacahini eta máimicutichinaqueneana.

³⁵ Títauchavahi eta juca máechajiriruvanahi ema émana profeta. Ani macahehi: “Tamutu eta nímiturapiyanayare nímicutichinayarepahi. Nímicaecherachainapa eta táeñaurevaquenehi te tépanavainapa máépiyacainapa ema Viya eta apaquehe” macahepa.

Emá Jesús máimicaecherachapa eta máimicutichaqueneanahi tayehe eta trigo étapa eta ejare

³⁶ Tacahe, ema Jesús mavanecavacapa ena achaneana nayanapa te napenana. Éma apanava tiyanavarepa tichava te mapena, vítipa viti mayeaneanahi apóstoleana. Tacahe, te véjacapa vimutu, víyaserecapa máimicaecherachahini eta máimiturapihi máimicutichaquenehi eta ejare tacachanequenehi eta trigo.

³⁷ Tacahe, ema Jesús máichahavipa:

—Nuti Manerejirunuhi ema Viya nucutihi ema achane tévacahi eta tíurina evaraqui.

³⁸ Eta apaquehe tacaevaiyahi eta trigo, énahi ena achaneana te juca apaquehe. Eta tíurina evaraqui, étihi eti nuchaneranahi núti. Tásiha, eta ejare énahi ena machaneranahi ema Váinaraji.

³⁹ Taicha ema ticitianacanuhi, manacahi eta ejare, mavarairahi máepacuchayarehi eta névaruhi núti. Eta tacaechatijirapa eta trigo, étahi eta táitaviyare eta apaquehe. Nárajapayarepa ena ángeleana, ticurujiricanayarehi.

⁴⁰⁻⁴² Tásiha, te jena sácheyare, nuti Manerejirunuhi ema Viya nuvanecainapa ena nuyeheana ángeleana nacavehasi ena tichanahi eta máeperajiqueneana énapa ena tímiaqui paicana ena apamuriana achaneana. Tásiha, náquijicavacainapa eta te táijurequenehi yucu. Ticapitiquiahechavanainapa eta tacativayare nasama. Tíyahanainapa.

⁴³ Tásiha, nácani títauchanahi eta mavanairipianahi ema Viya, tétaficavayare eta najaravayare tacutiyaere eta tajaraiva eta sache. Téjacanainapa tayehe eta macatuparahaiyahi ema Vicaiyaquene. Te evarahapuca ecaicutiara, tavaraha eta epanerechinavaya.

Emá Jesús máimicuticha eta entierro

⁴⁴ Eta nímiturapiana nuti násihaquenehi te anuma tacuti eta tayumuruvevaquenehi entierro. Te máichimavahi mácani achane eta entierro, tíurisamureyarehi. Tásiha, máimichavayarehi mayumuruca tayehe eta apaquehe távihahi. Mavacharecayarepa eta apaquehe, mavarairayarehi eta entierro. Tayanapane táimijararecayarepa tamutu eta macayehequeneanainihi.

Máimicutichavare eta perla tasivachaquenehi

⁴⁵ Énerichuvare eta najacapirahi ena achaneana eta nímiturapiana nuti násihaquenehi te anuma tacuti eta macaematanerahi mácani achane comerciantepahi. Matanucapahi eta tasivachaqueneanahi perla.

⁴⁶ Te máichimavapa eta perla matanurepahi, tétaficavahi eta tasivachavahi. Mavarahasera mavachareca eta perla, tayanapane táimijararecayarehi tamutu eta macayehequeneanainihi.

Máimicutichavare eta ichape nayutahe

⁴⁷ Énerichuvare nuvaraha nímitucahe tayehe eta sáchezare eta táitecapirayarehi eta ecuñaraqui. Tacutihi eta ichape nayutahe. Te náechipaecapa te cáquiure, tamutu tavehayarehi eta tasimutuqueneana jímana.

⁴⁸ Te náimahapa tínica eta nayutahe, navehayarepa nachurupaicapa te tiájipahi tachausí. Nanerejicayarepa eta jímana tiúrinana. Nanacacuhayarepa te ichape maha. Tásiha, náquijicayarepa eta apamuri máurirahanahi.

⁴⁹ Ene tacaheyare eta táitavirayare eta apaquehe. Nárajapayare ena ángeleana, nanerejicainapa ena achaneana tíchanahi eta tamauriqueneanahi.

⁵⁰ Náijuchainapa te yucu, táetaviuchahi eta táijureva. Ticapitiquiahechavanainapa eta tacativayare nasama. Tiyahanainapa —macahepa ema Jesús.

Éma Jesús mayaserecavaca te nacaicutiarahipuca eta máimiturapianahi

⁵¹ Tacahe, ema Jesús tiyaserecavapa. Ánipa macahe:

—¿Ecaicutiarapuca éti tamutu eta juca nímiturapianahi? —máichahavipa.

Tásiha, víti vijicapapa:

—Vicaicutiara, tata —vicahepa.

⁵² Tácahe, máichahavipa:

—Eta yátupirapa eta ímatiequenehairapa eta nímiturapiana, éti apanavare máestrohénapa. Puiti nutuparacahe ímitucavacaya ena achaneana. Tétavicavaya eta ítamuturusirayare eta ímituresirayare eta mapanereruana ema Viya —máichapa.

Tichavapa ema Jesús te mávasa Nazaret

(Mr 6.1-6; Lc 4.16-30)

⁵³ Te tamutupa eta máimicutichirahi ema Jesús eta juca máimiturapiana, viyanapa.

⁵⁴⁻⁵⁷ Vichavapa tayehe eta mávasa. Te sávarumuhuquenepa, viyanavarepa tayehe eta náurujisirareva eta nayujarauchirahi ena achaneana. Tímiturecapa ema Jesús. Ichape eta tahapasamurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—Témunahiricava eta máitupajjiasiravapahi ema maca. ¿Távihásica macaravahuinehi eta máichirayare eta tiáramicareana? Vivaraha vímaha víti apanava eta jácani máichaqueneanahiji visamairiruanahi. Taicha vímatihí ema maca. Carpintérohi éma. Vímativare ema máiyaini, ésupa esu maena María, énapa ena maparapenaveana ema Jacobo*, ema José, ema Simón, émapa ema Judas. Vímativare ena esenana maparapenaveanahivare, ticavasanahi eta aní. ¿Távihásica máitusiavahi eta juca máitucaqueneanahicacha? —nacahepa.

Émasera máichavacapa:

—Tatuparaca epicauchahaviya vimutu víti mavaneruana ema Viya. Étisera éti nujaneananahi ecavasanahi eta te juca viávasa, étipa eti nuparapenaveana, vahi epicauchanumahi —máichavacapa.

⁵⁸ Tásiha, tájina máimerecachichaini eta tiáramicareana táichavenehi eta namasuapajiraivanahi, váhivare nacasiñavahini eta mayehe.

* **13:54-57** Éma maca achane, ticajirehi Jacobo te náechajiriruva ena israelítana. Te véchajiriruva, ticajirehi Santiago. Mapaenumavahi máehica ema Jesús te táequenepa eta máechepusirahi te máecari ema Viáquenu.

14

*Éma Herodes masamairicapa eta máichaqueneanahi éma Jesús
(Mr 6.14-29; Lc 9.7-9)*

¹ Tacahe, éma Herodes éma aquenucahi tayehe eta Galilea masamairiri-cavarepa eta máichaqueneanahi éma Jesús.

² Tacahe, éma Herodes máimijachahi éma tichavahi técheputa éma Juan. Tásiha, máichavacapa éna máévanachanahi:

—Éma mácara, émaripa éma Juan Ticachasiricarahi, éma nímicaparuhi. Tichavaripa técheputa te máecari. Táitusiava máiturucahi macuchuca eta tiáramicareana —macahepa.

³⁻⁴ Taicha éma Herodes mavehahi esu Herodías, esu machinenahi, mayenahi éma maparape Felipe. Máiminajicapa éma suima. Tacahe, éma Juan macajachavacari éna eta naviracacairahi. Éta pa tímicitichahi éma Juan, sucaticapa esu Herodías. Tásiha, éma Herodes máeratacapa te cárcel éma Juan, macavanaripipa náitiaca te cadena.

⁵ Taicha supamicahi ésu eta máimicapasirayarehi. Tipicahisera éma nasemahini éna achaneana. Taicha éma Juan, tétavicavahi eta náemunasirahi éna achaneana. Náimatihí éma, eta vanairucairahi me Viya.

⁶ Tásihasera, títecapa eta sache máijaremuhu éma Herodes, sutiarihíhi esu amaperu, suchicha esu Herodías. Tiúchucapa tírimaica te mamirahu éma Herodes, éna pa éna machimaranahi. Éma Herodes máuricainehi ichape.

⁷ Tacahe, máichapa ésu:

—Nujuracha te pimirahu, eta níjarasiraviya jácani piyasearunuyare — máichapa.

⁸ Tásiha, esu amaperu suyaserecapa esu suena tájahahipuca eta suyasearuyarehi. Esu suena suímitucapa: Piyaseacayare aní píchaya: “Píjaracanu eta ñichuti éñi Juan te curuja” píchayare.

⁹ Tásiha, eta masamirahi eta juca suyasearuhi, éma rey Herodes ichaperinehi eta mapanereresirahi. Tájinapasera máicharacavahini taicha máechajiriruvaipahi majurachaipahi te namirahu éna machimaranahi eta máijarasirayare eta suyasearuyarehi ésu.

¹⁰ Tacahe, macavanaripipa nayuchatipiquenuhapana éma Juan.

¹¹ Tacahe, námapaipa te curuja eta machutini, náijaracapa esu amaperu. Tásiha, ésu sujacapapa, suíjaracapa esu suena.

¹² Títecapananecha éna máimitureanahi éma Juan. Navehapa eta máquehe, náecarapanapa. Tásiha, tiyananapa nametapanahi éma Jesús.

*Éma Jesús máitaparavaca máenicavaca éna camuriqueneana achaneana
(Mr 6.30-44; Lc 9.10-17; Jn 6.1-14)*

¹³ Te masamairicapa éma Jesús eta nacapasirahi éma Juan, viyanapa viávacuhapa tayehe eta pacure. Vicaijuhepa tayehe eta apaquehe mávapahi. Énasera éna achaneana náecharichucha eta viyanirahi. Tiyananapa náehicahi tipaicapanahi.

¹⁴ Te tiúcupaicapa éma Jesús tayehe eta pacure, máimahapa éna camuri-queneana achaneana. Majapanuvarinehi eta máimairavacahi. Macanaracavacapa éna nacajumaqueneanahi námaqueneanapahi.

¹⁵ Tacahe, viti mayeheana apóstoleana vímahapa eta cáperehíchicharínehi. Vimetacapa éma máévatamuríhahini éna achaneana natiarihiqueneanahi. Víchapa éma:

—Cáperehipa jena sache. Tiyerehivacahi eta pétiana. Táuricapa pivane-cavaca ena achaneana nayanapa, navachareca eta nanica; taicha ani tájina naviyavaimahi eta te juca —víchapa.

¹⁶ Ema Jesús tijicapahavipa:

—Vahi nuvaraha nuvaneca nayana. Tájina naviyava eta nácaijuehini. Íjaraca étina eta nanica.

¹⁷ Tásiha, viti víchapa:

—Tájina vácayehe eta tinicacare. Jucarihisera cíncochichahi eta pan, apina eta jima.

¹⁸ Ema Jesús máichahavipa:

—Íama ani.

¹⁹ Tacahe, macavanairipipa náejahahapaica ena achaneana te táinahu eta muíjipahi. Mavehapa eta cíncoquene pan étapa eta apina jima. Máesenicapa eta anuma. Mahasulupayachapa ema Viya. Mayuvetucavacapa eta pan, tásiha, tújaracahavipa viti. Viti víjaracavacapa ena achaneana.

²⁰ Vinicapa vimutu, visatuhevacapa. Tásiha, vicaemacharichahavare doce saye ichapehiana táinicachaichahava eta vémacharajiana.

²¹ Ena tinicanahi eta juca, cinco mil ena ajairana eta náichapemurívahi, énerichuvare ena esenana énapa ena amaperuana.

Ema Jesús mapaicaeca eta une

(Mr 6.45-52; Jn 6.16-21)

²² Tiuri, ema Jesús tivanecahavipa viti mayeheana apóstoleana viávacu-hayare eta te pacure. Vínapucayarehi viánueca te apachara eta cáquiure. Émasera manasiyarehi máevatamuríhanumayarehi ena achaneana nachava te napenana.

²³ Te tamutupa eta macametavairahi ema Jesús nayehe ena achaneana, tiyanapa tiápanahi tayehe eta cerro. Tiyujaracayarehi tayehe. Étapa tavinehi eta yati, manasipa macarichuhi eta te cerro.

²⁴ Tacahe, viti te túpierecachaviripahi, tichimaracahavipa eta muraca técatícava, viácapaquiuhapaipahi.

²⁵ Te tijarahichichapa, vímahapa ema Jesús mapaicaecapahi eta une eta macapayasirahaviya.

²⁶ Eta vímairahi éma, vipicarinehi. Vímijachapa cunare. Vipiararecapa eta vipisirahi.

²⁷ Émasera ema Jesús téchajicahavipa:

—Vahi ecupica. Nútichucha. Étumechava —máichahavipa.

²⁸ Tásiha, ema Pedro majicapapa:

—Te yátupipuca pítiquenehi, piti Tata, pivanecanu núti apanavare nu-paicaeca eta une. Nuvaraha nupauchavi —máichapa.

²⁹ Ema Jesús majicapapa:

—Yare, pipauchanu.

Enevanepa túcupaícahi te pacure ema Pedro. Tiyanapa mapaicaecapa eta une, macapayacayarehi ema Jesús.

³⁰ Étasera eta máramesirahi taicha eta muraca técatícava, timutseraha-vapaípa téricapaípa. Tásiha, típiararecapa:

—¡Picatajicanu, Tata! ¡Néricainapa!

³¹ Enevanepasera macaratavauchapa ema Jesús eta macuchucuirayarehi. Tásiha, máichapa:

—¿Ticamitisicavipapuca eta pipisirahi eta picasiñanuirahi?

³² Te tiávacuhapa ema Jesús émapa ema Pedro tayehe eta pacure, enevanepa tésamiricavahi eta técaticava. Tíhecapa eta táepacucairahi.

³³ Tacahe, viti apamuriana vicunachainehi ema Jesús eta vímairahi. Vépyumurihapa te mamirahu. Tásiha, víchapa:

—¡Éhevare piti Tata, Machichaquenévihí ema Viya! —víchapa.

Ena Jesús macanaraca ena nacajumaqueneana te avasare Genesaret

(Mr 6.53-56)

³⁴ Tacahe, te apanapa sache, viápechavavarepa viánueca eta cáquiure. Vítecapapa eta te apaquehe ticaijare Genesaret.

³⁵ Tásiha, ena achaneana ticavasanahi tayehe náimativanehi eta émairahi ema Jesús. Timetajiricacanapa náechapa namutu ena achaneana ticavasanahi te avasareana. Tiyananapa mayehe ema Jesús, námavacapaipahi namutu ena nacajumaqueneana.

³⁶ Nayaseacapa éma eta máisapirainahíni náemamajiaca eta tacheyarapi eta mamuiríha. Tacahe, nácani témamajiacanapahi, enevanepaipa tinaracapanahi.

15

Ena Jesús mametaca ena achaneana eta timaeperajicarahi

(Mr 7.1-23)

¹ Tacahe, títeccapanapa ena apamuriana fariséoana tiásihanahi tayehe eta Jerusalén, énapa ena escribánoana. Témeñahavanapa eta mayehe ema Jesús. Ánipa naicha:

² —Pímaha, ena pímitureana vahi náítauchahini eta viyeherepiana. Namaepe-rajicapa eta náchanavana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? —náichapa.

³ Tásiha, ema Jesús majicapavacapa:

—¿Tájaha tacayema éti apanavare, vahi ítauchahini eta mavanairipiana ema Viya, tasapihapa epicauchahi eta eyeherepiana nanaquiruhi ena íáchucanaveanaini?

⁴ Ema Viya ani macahehi eta macavanairipirahi eta viyehe: “Pipicauchaya pémunacayareva ema piya ésupa esu pena”. Jucarihi eta apana vanairipi: “Ecapacayarehi mácani tíñemahi eta nacayemaquene mayehe ema máiya, ésupa esu maena”.

⁵⁻⁶ Étiserá vahi epicauchahini eta júcana mavanairipiana ema Viya. Taicha te mararihi mácani achane ticamavahupuca me Viya eta máimahaqueneanahi, eta ímitucasivahi éti: “Vaipa tatuparaca ema achane eta máimicatasiraya ema maiya ésupa esu maena”. Tasapihapa, ichape ticapicahuhi eyehe eta eyeherepiana. Étaserá eta mavanairipi ema Viya, vaipa epicauchahini.

⁷ ¡Éti ecajarehi apimirana! Tatupiruvahi eta máechajiriruvahi ema Viya, téchajísiahehi éti eta te Sagrada Escritura*.

⁸⁻⁹ Ánipa macahe: “Ena nani achaneana, tétserajicanuanahi te najaca; váhisera táetupicavahíni te nasamureana. Téneuchavanahi eta nuyehe,

* 15:7 Májurehi ema víyarahaini profeta Isaías eta juca máechajiriruvana ema Viya.

tamapurujihisera eta náeneuchiravahi. Nacaerajicahivare eta nuvanairipiana; tasapihapa náimicapicauchahi eta nayeherrepiana táuchurechucha te napanereruana ena náchucanaveánaini” macahepa ema Viya.

¹⁰ Tásiha, máichuhavacapa ema Jesús ena achaneana. Ánipa máicha:

—Nuvaraha esamanu yátupina, apaesa ácaicutiara.

¹¹ Tájina máeperajina eta viáchanevana te vinicapuca eta vimacasipavahuiranumahini. Jácani tasiapaquenehi te vijaca, tájina tamaeperajicahavihini. Vahi étaparacaina. Étasera eta evainarajivana táuchureanapuca te ejaca, etapa eta evainarajipanereruanahi, jéhevare éta timaeperajicahehi —máichapa.

¹² Tacahe, viti mayeheana apóstoleana vémeñahavapa eta mayehe. Vimetacapa:

—Ena nani fariséoana tisemanahi taicha eta juca píchiravacahi —víchapa.

¹³ Émasera máichahavipa:

—Ena nani nacutíhi eta ejare, vaipa émaimahi máechahini ema Tata Nucaiyaquene. Ticavepuriciasianayaresera éna.

¹⁴ Ésamiricachucha. Vahi ecuimisiapava nayehe, taicha éna, púchuquianahi tayehe eta juca nímiturapiana. Ena púchuquiana, te tichurucacanapuca, tiáquipaicacanayarehi táicha vahi náimahahini eta nayanihayarehi —máichapa.

¹⁵ Tásiha, ema Pedro mayaserecapa:

—Picatajicahavi pímitucahavi apaesa vímatiequeneha eta juca pímicutiara-chirahi eta táuchureanahi te vijaca —máichapa.

¹⁶ Ema Jesús máichahavivarepa:

—¿Énerichuvare éti mapanererurehehi?

¹⁷ ¿Váhipuca ácaicutiarahíni eta juca? Tamutu eta juca tasiapaqueneanahi te vijaca vinicasareanahi, tatupiru te viami. Tásiha, te tiúchucapa, apanapa eta táuchusihahi. Vahi timaeperajicahavimahi.

¹⁸ Étasera jácani táuchurehi te vijaca tásihaquenehi te amahe eta visamure. Eta tamaurivahi eta náechajisirana ena achaneana, étara timaeperajicavacahi éna.

¹⁹ Táicha jácani táíñemahiqueneanahi panerercana, eta tásihaqueneanahi te nasamureana. Ema achane mapanerechahi maveha esu apana esena mayena ema apana achane. Esu esena supanerechahi suveha ema apana achane suima esu apana esena. Ena amaperuana napanerechahi eta natuhusivaya. Nácanivare, tipanerechanahi eta ticaparecana, tiámerecana, tivayuarecana, téchajihiana.

²⁰ Tamutu eta juca panerercana tamauriqueneana, te náichahi ena achaneana, éta timaeperajicahi éna. Étasera jácani nanicaqueneana, tayana-panepuca vahi náichahi eta nayeherrepí eta nasipavauchirava, vahi tamaeperajicaímahi —máichahavipa.

Esu ésuna esena apavasana sucasiña ema Jesús

(Mr 7.24-30)

²¹ Tacahe, tiámahavivarepa ema Jesús te apana avasareana táunavahi eta departamento Siria, návasa ena apaechajiriruvana.

²² Ánaqui, ticapayacahavipa esu esena. Supiaracapaipa eta supauchirahi ema Jesús. Ánipa sucahe:

—Pájapanunu, tata. Píti yátupiquenevihi Cristo, ñivaneruvihi eñi Viya, vicuchapaquenevihi. Esu nuchicha ñávahácahi eñi éreana, tétávicavahi eta

sucatajivairahi. Picatajicanu, tata, eta picanarasinanuini ésu nuchicha —suíchapa.

²³ Émasera ema Jesús vahi majicapahini. Tipaicapaichucha. Vipauchapa viti mayeheana apóstoleana, vimetacapa éma:

—Tata, pévataca suyana esu suna esena apavasana tipiararecapahi te véquene —vicahepa.

²⁴ Tásiha, ema Jesús máichahavipa:

—Jéhevare eta epanereruhi. Ema Tata tivanecanuhi nacarichu néchapajiricayare ena vijaneanana israelítana. Nacutihi éna eta uvesana máquenureana, taicha ticamununuanahi eta nujaneasiraya —máichahavipa.

²⁵ Ésusera esu esena tépuyucapa te mamirahu. Suíchapa:

—¡Tátachicha, picatajicanupaini, pímicatacanu! ¡Picanarasinanuini esu nuchichasami! —suíchapa.

²⁶ Ema Jesús majicapapa:

—Nativa néchapajiricavacaya ena nujaneanana. Taicha vahi táuricahini ásapihahíni néchapajiricahehíni éti apavasana émetavichíni ena nujaneanana —máichapa.

²⁷ Esu esena sujicapapa:

—Énehinehi tacahehi, tátachicha. Yátupihí vahi pijaneananuinahini. Pájapanunusera, picatajicanuchuchaini. Vítí apanava vácasiñavahi eta piyehe eta vítítijivairaina —suíchapa.

²⁸ Ema Jesús majicapavarepa:

—Páureví piti nuchicha, ichape eta picasiñavairahi eta nuyehé. Puiti títauchavayare eta piyasearapihí nuyehé. Nucanarasinaviyare esu pichicha —máichapa.

Jéhesare enevanepa tinaracahi esu amaperu.

Camurianahi ena nacajumaqueneana macanararuanahi ema Jesús

²⁹ Tacahe, tiyanavarepa ema Jesús. Véhicavarepa vítí apanava. Vichavavarepa te Galilea. Tásiha, vijuchehausichapaipahí eta cáquiure, vicaijuheya eta te mávapahí apaquehe anuquerehi, te távihahi eta céroona. Vinasipanapa eta jena sácheana eta ánaqui.

³⁰ Tacahe, nacahepaipavare ena camuriqueneana achaneana te viávihahi vítí. Námaquenepanepahí ena nacajumaqueneana: ena masariana, énapa ena púchuquiana, énapa ena úpana, énapa ena túpupáiqueana.

³¹ Namutu ena nani nacajumaqueneana macanaracavacapaipahí éma. Ichaperinehi eta náramirahi ena achaneana eta náechajisiraipa ena úpana, énapa ena túpupáiqueana tinaracanapaipa, tíuripaipa eta napaisira ena masariana. Tímairicanapaipa ena púchuquiana. Eta náurisamurevapahí, nacuna-chapaipa ema Viya.

Ema Jesús máenica ena cuatro mîlqueneana achaneana (Mr 8.1-10)

³² Tásiha, ema Jesús tíchuhavipa viti mayeheana apóstoleana. Máichahavipa: —Nujapanuvaca ena nani achaneana natiarihiqueneanahi ani, taicha mapanaripahi sache puiti eta nacahehi eta viyehé. Tájinahivare naviyahini nanica. Nujapanuvacaicha névatacavacahini, machu náquiipaicava te achene taicha eta náecuavana. Vájapanu eta náecuava, vénicavaca —máichahavipa.

³³ Tásiha, vítí vijicapapa:

—¿Távihapucaini vítusiavahini eta tinicacare eta te juca mávapahi vámahí? ¡Váhivare vítaparahaimahi vénicavaca ena nani camuriqueneana achaneana!
—Víchapa.

³⁴ Tacahe, ema Jesús tiyaserecavipa:

—¿Áyanachaha eta pan eta íamaqueneanapahi?

Víti vijicapapa:

—Jucarihi siéterine. Ánimurichicharinehivare eta jímachicha —vicahepa.

³⁵ Tásiha, macavanairipipa eta náejahapaimuriahíni namutu te apaquehe.

³⁶ Mavehapa eta siétequene pan, étapa eta jímána. Mahasulupayachapa ema Viya. Tásiha, mayuvetucavacapa, tjaracahavipa víti. Tásiha, víti víjaracavacapa ena camuriqueneana achaneana.

³⁷ Tacahe, vimutu vinicahi, visatuhevacapa. Vicaemacharichavare. Siétehi eta sáyeana tánicaruihi eta vémacharajiana.

³⁸ Eta nasimutuvahi ena achaneana, cuatro mílqueneana ena ajairana. Natiarihihivare ena esenana énapa ena amaperuana.

³⁹ Te tamutupa eta juca, mavanecavacapa ema Jesús ena achaneana nayanapa nachava te napenana. Tásiha, éma tiávachavarepa te pacure. Viyanavarepa. Vicaijuhe eta te avasare Magdalena.

16

Ena Jesús mápechavare mayunacavaca eta namasuapajiraivahi ena fariséoana

(Mr 8.11-13; Lc 12.54-56)

¹ Tacahe, ena apamuriana fariséoana énapa ena saducéoana napauchapa ema Jesús. Eta navarairahi náemejecapavacha éma, nayaseacapa máimerecáhini eta tiáramicareana, máimerecavahini te yátupihipuca vanairucahi me Viya.

² Émasera majicapapa:

—Te cáperehichicha, te ímahahi eta táitsirahi eta úcaji, éti ímijacha tímiyanavare eta tiúriyare eta sácheana.

³ Te yáticarahi, te ímaha eta timapicurume, títitsimehi, ímijachahi tiquivayare. Éti, ímijachavahi ímatiequeneha eta tapaisira eta anuma. ¡Tétavicavahisera eta emasuapajiraivahi! Taicha éti ímijachavahi religiósöhe, ímijachavavare ímatiequeneha eta mavarahaqueneanahi ema Viya, váhisera ávarahahini ímatiequeneha eta máimeruhehi ema Viya, te juca sácheana nucachanerahehi.

⁴ ¡Eti achaneana váinarajiqueneana! Núti nímatihe. Vahi esuapanuimahi, te nímercapucaini eta tiáramicare. Tásiha, váhira étina tatuparaca ímahahini eta tiáramicareana. Ímahayaresera eta tiáramicare tacutiyaere eta máichavanevahi ema víyarahaini profetaíni Jonás —máichavacapa.

Tásiha, majunijicavacapa, tiyanapa.

Ena Jesús máimicuticha eta levadura eta náimiturapiana ena fariséoana

(Mr 8.14-21)

⁵ Tacahe, eta viánuesiravarepa eta cáquiure, vipanerechapaipahi eta vémitisirapa eta pan.

⁶ Ena Jesús máichahavipa:

—Tímaticarehi eyehe eta levadura eta tapareasirahi eta masa. Tacutirichu eta tapareasirahi eta apimirairavacahi ena fariséoana énapa ena saducéoana. Échapavaicha tayehe, vahi ecuehica éna —macahepa.

⁷ Vítiserá viti apóstoleana, eta véñamavairahi, víchacacapa:

—Tímicajachahavihi eta vémitisírahí eta pan. Eta tacahe, macahehi tayehe eta levadura —víchapa.

⁸ Éma tímatiacahavihi. Tásiha, máichahavipa:

—¿Tájaha tacayema ecahechajiruvahi eta vahi íamapahini eta pan? ¿Váhipuca ácasíñavahi eta nuyehe?

⁹ ¿Vuíchahacaru ácaicutiaraini? ¿Vuíchahahipuca ímatinu? ¿Váhivare échaini eta nucaejasirahi eta cincoquene pan nanicaquenehi ena cinco mílqueneana achaneana étapa eta náemacharajiana?

¹⁰ ¿Váhivarepuca écha eta siétequene pan naniruhi ena cuatro mílqueneana achaneana étapa eta náemacharajiana?

¹¹ Nímijachapa ecaicutiarayarehi eta níchirahéhi eta échapiravainahini eta nayehe levadura ena fariséoana énapa ena saducéoana. Váhira étainahini néchajisihahíni eta levadura tayehe eta pan —máichahavipa.

¹² Vipaenumavahi véchahi eta máichirahavihi éma eta véchapiravainahini vahi vícututi ena fariséoana énapa ena saducéoana eta apimirairanahi.

Éma Pedro máimereucha éma Jesús eta émairahi éma Cristo

(Mr 8.27-30; Lc 9.18-21)

¹³ Tacahe, te apanapa sache, viyanavarepa vipaica. Vicaijuhe eta te Cesea máepiyarúhi éma rey Felipe. Te viánehipa, éma Jesús tíyaserechavipa:

—¿Tájaha nacayema ena achaneana eta nuyehe nuti Manerejirunuhi éma Vía? ¿Nájahapuca náimijachanuhi éna? —máichahavipa.

¹⁴ Víjicapapa víti:

—Éna apamuriana náimijachavihi éma Juan, tichavahi téchepucahi. Éna apamuriana tímijachavianahi éma víyarahaini profeta Elías, téchepucahi éma. Éna apamuriana tímijachavianahivare éma víyarahaini profeta Jeremías; émapuca éma apana profetaini antívuini, téchepucahi —vícahepa.

¹⁵ Éma Jesús tíápechahavivare tíyaserechavi:

—Étiyapa ¿nájaha ímijachanuhi nútí?

¹⁶ Éma Pedro majicapapa:

—Pítira yátupiquenevihi Cristo, machichaquenevihi éma yátupiquenehi Vía.

¹⁷ Éma Jesús majicapapa:

—Píti Pedro*, tétavicavahi eta pétupisiravahi taicha manacasamureruvihi éma Tata Nucaiyaquene tíávihahi te anuma. Vahi étainahini eta máimiturapi-nahíni piyehe mácani achane.

¹⁸ Nútí apanavare nutupiruva numetacavi. Píti picaijarehi Pedro. Píti picutiya-re eta mari, tétavicavayare eta pitumevaya. Namutu ena picuti-queneana eta pisuapiranuhi nútirahi yátupiquenehi Cristo, éna nuchane-ranayare. Éna apanavare nacutiya-reva eta mari eta natumevayare eta náehisiranuhi. Tájana vahi máratahaimahi macaetemavaca éma Váinaraji.

¹⁹ Píti picatuparahayare eta llave tayehe eta anuma, apaesa nasiapa nácani pijacapaqueneanayare píti —máichapa.

* **16:17** Éma Jesús téchjicahi te máechajiriruva hebreo, máimijarechahi éma Pedro: “Simón, machicha éma Jonás”.

²⁰ Tacahe, tituparacahavipa muraca ema Jesús nacuija vicumetaca eta émairahi ema Cristo.

*Éma Jesús máimereucha eta máepenirayarehi
(Mr 8.31-9.1; Lc 9.22-27)*

²¹ Tacahe, ema Jesús tépanavapa timetacahavihi eta táicharacavayare eta máepenirayare. Máíchahavipa:

—Nuti nucatuparahahi eta nuyanirayarehi te Jerusalén. Ánaqui nucatajivayarehi ichape naicha ena tuparairucana, énapa ena aquenucarahana, énapa ena escribánoana. Éna, tímicapacuanayareva. Mapanayareichuhisera sache nucaheyare eta népenirayare. Tásiha, nuchavayarehi néchepuca —máíchahavipa.

²² Tásiha, máiputsicapa mámahí ema Pedro ema Jesús. Ánaqui macajachapa, májjarasiravahi eta mapanereruhi:

—Núti vahi návarahahini táitauchavahini nacapacavihini.

²³ Tacahe, ema Jesús máichapa ema Pedro:

—Píti téjécapavahi eta pipanereruhi. Pínajica eta juca tamauriqueneanahi. Pivarahapuca pihapapicayare eta mapanereruhi ema Viya. Eta juca pipanereruhi tacuti eta mapanereruanahi ema Satanás, énapa ena machanerana —máichapa.

²⁴ Tásiha, máíchahavivarepa víti:

—Nácani navaraha náehicanu, tacamunu náinajicava tamutu eta tihapapiricavaca eta náehisiranuhi. Nacaravahuyareva eta nímiturapiana. Nájjaracavavare eta táimicapasiraina eta náehisiranuhi.

²⁵ Nácanisera téñamanahi eta náitairesira, tiávamirahuanaya eta náehisiranu, énajivayare ticamitiequenehavanaya eta náitairesira. Énaserá nácani yátupiquenehi tíjaracavana téhicanuana, tayanapane táimicapacainepuca eta náehisiranuhi, éna títujicavanayare tíuchucuhanayare eta náitairesiranaya.

²⁶ Énerichuvare nácani tacañamararuanahi eta nacaimahaquenéiraya te juca apaquehe, tájina náimaequenehaimahi, taicha eta tacañamarasiravacahi tahapapiricavacahi tayehe eta náuchucuirayarehini. Taicha vahi máratahaimahi mácani achane mavachachahini eta máuricacarevaya te apana vítaresira.

²⁷ Taicha nuti Manerejirunuhi ema Viya nuchavayarehi. Námainapaipa eta majaraiva ema Tata, nucachanénapaipavare ena ángeleana. Te jena sácheyare, níjaracavacainapa eta náicuchianahi ena nuchanerana te tíurihi eta nacaemataneasiranuhi, te jácani náemataneanapachuhi.

²⁸ Nutupiruva numetacahe: Puítiripa éti, etiarihi enerejicavayare vahi épenavanémahi, ímahanumaya eta nucatuparahairaya aquenucanuirayare nuti Manerejirunuhi ema Viya —macahepa.

17

*Éma Jesús tihápamaichava eta máimahi
(Mr 9.2-13; Lc 9.28-36)*

¹ Tiuri, sáisipa sache eta vinasirahi ánaqui. Tacahe, tinaquicahavipa ema Jesús. Nacarinehi máma ema Pedro, ema Jacobo émapa ema Juan. Tiyananapa eta te étana cerro anuquehepana.

² Eta ánaqui, náimahapa tihapamaichavahi eta máimahi ema Jesús te nami-
rahu éna. Eta mamira, tétavicava eta tajararasira tacuti eta sache. Eta
mamuiriha, tétavicava eta tajanunumesirahi, étapa eta tajapuvahi.

³ Tásiha, tiáramicareanavarepa tímerecavana ena apinana ajairana: ema
víyahaini Moisés émapa ema víyahaini profetaini Elías. Téchajiricavana-
ripahi mayehe ema Jesús.

⁴ Tásiha, ema Pedro tímisiapavapa téchajicapa. Ánipa macahe:

—Tata Náquenu, tétavicavapa eta viúricacareva eta viávihairahi eta áni.
Tiúrihipucaini vépiyarecahini eta epenahuinapachuhini. Pipenahuinari-
chuhini píti, mapenainarichuhivaréni ema Moisés, émapaini ema Elías —
macahepa.

⁵ Tacahe, téchejicaichaha ema Pedro, tiáramicarepa eta úcaji táepacumu-
rihahi éna. Tétavicavahisera eta tajanunusirahi eta úcaji. Nasamavarepa eta
mahu ema Viya tayehe eta úcaji. Ánipa macahe:

—Ema maca, éma yátupiquenehi nuchicha némunaruquenehi. Tétavicavahi
eta núrismurevahi máicha. Éma esuapayti, mapenainarichuhivarare —
macahepa.

⁶ Eta nasamirahi ena vichamuriana, tipicanarinehi. Tépuycanapa
titsiucapairicanapa.

⁷ Tásiha, ema Jesús témeñahavapa eta nayehe. Máemamasicavacapa.
Máichavacapa:

—Échepuca, nuchichanaveana. Vahi ecupica —máichapa.

⁸ Tacahe, te téchepucanapa éna, nájinaripahi éna apinana náimahaque-
neanahi. Macarinehi ema Jesús.

⁹ Te tichavanapa tayehe eta cerro, ema Jesús mametacavacapa vahi
nacumetajiricahini eta juca náimahaquenehi. Tiámainucava te máechepu-
capaini te máecari éma.

¹⁰ Tacahe, nayaserecapa ema Jesús:

—Ena escribánoana eta náimiturapihi, náechajisihahi eta machavirayare
títareca ema víyahaini Elías, títapucayarehi eta máimeresiravayare piyehe
piti Cristo. ¿Énapuca téjecapavanahi ena escribánoana? —náichapa.

¹¹ Ema Jesús majicapavacapa:

—Yátupi ema víyahaini Elías títicapayarehi, máetupiripanayarehi tamutu.

¹² Nútisera nutupiruva numetacahe: Titecaripahi ema Elías, váhisera
náimatihini ena escribánoana. Váhivare najacpahini éma ena tuparairu-
cana. Nacatianacahi nacapacahi éma. Ene nucaheyare nuti Manerejirunuhi
ema Viya, ticatianacuanayarehiva, éneyaréchuvare ticapacuanayare
—máichapa.

¹³ Tásiha, ena vichamuriana náechapa eta máechajisihairahi ema Jesús ema
Juan Ticachasiricarahihi.

Ema Jesús macanaraca ema amaperu mávaháruhi ema éreana
(Mr 9.14-29; Lc 9.37-43)

¹⁴ Tacahe, te tichavanapa éna tayehe eta viávihahi víti énapa ena achaneana,
témeñahavapa ema émana achane mayehe ema Jesús. Tépuycapa te mami-
rahu. Máichapa:

¹⁵ —Picatajicanu, tata, pímicatacanu. Picanarasinanuini ema maca
nuchicha. Tétavicavahi eta macatajivairahi. Tacaeharipairica te tanahaca
eta majuma. Tatiarihi te táquipaica te une, téhepuca yucu.

¹⁶ Námari pahinéni nayehe ena pímitureana, váhisera náratahahini nacanarahini éna — máichapa.

¹⁷ Ema Jesús máichahavipa:

— ¡Tétavicava emasuapajiraivavaca eti achaneana! ¡Cúverarecachasicáini eta nucamichirahenahini! Iáma ani ema amaperu — máichapa.

¹⁸ Tacahe, ema Jesús, muraca eta máevatasirahi ema éreana, máinajiacapa ema amaperu. Enevanepa tinaracavanehi éma.

¹⁹ Tásiha, te táequenepa, víti víputsiacavapa ema Jesús, viyaserecapa:

— ¿Tájahapuca tacayemahi eta vahi váratahahini vicuchuca ema éreana mayehe ema amaperu? — víchapa.

²⁰ Ema Jesús tijicapahavipa:

— Eta tíchahi éti vuíchaha yátupinahini ácasiñavahini me Viya. Nutupiruva numetacahe: Te yátupi quenelahini ácasiñavahini mayehe éma, eratahayarehini. Váhinéni tácomesahini ichapenahini eta ecasiñavairahi. Tayanapanepuca ánichichainaichu eta ecasiñairavahi, tacutihpucaini eta táquichicha eta mostaza, tamuturihini erataha. Étaripa eta jácani cerro ávarahahini ecayejea, eratahayarehi. Te íchapuca: “Piyejecava eta te juca. Piyana ánaquipana”. Tásiha, tiyejecavahini éta. Jéhesare, tájina tacucajerarajihini eyehe.

²¹ Étasera eta juca, muracapanahi ema éreana ema tiávahácahi ema maca amaperu. Eta vicuchusira, tavaraha víchanumayare eta ayuna éta pa eta viyujaraca — máichahavipa.

*Tiápechavavare ema Jesús máimereucha eta máepenirayarehi
(Mr 9.30-32; Lc 9.43-45)*

²² Tacahe, eta vipaisirapahi tayehe eta avasareana eta te táunavahi eta Galilea, tiápechahavivarepa timetacahavi ema Jesús eta máepenirayarehi. Ánipa macahe:

— Nuti Manerejirunuhi ema Viya, járajapainapa eta sácheyare tíjararecanuyare mácani achane nayehe ena ticatianacanuani. Ticaratacanuanayare éna.

²³ Ticapacuanayareva. Néchepucayaresera te mapanaquenepa sache — máichahavipa.

Tacahe, eta visamirahi, ichaperinehi eta véñamiravahi víti.

Ticavacha eta impuesto tayehe eta Templo

²⁴ Tacahe, te vítecapapa tayehe eta viávasa Capernaúm, natiaríhihi ena ticobrarerahiana eta impuesto tayehe eta Templo. Nárjapapa náechajipanahi ema Pedro. Nayaserecapa:

— ¿Mavachachapuca ema eyehe máestro éti eta impuesto tayehe eta Templo? — náichapa.

²⁵ Ema Pedro majicapapa:

— Mavachacha — macahepa.

Te visiapayarepa te peti, ema Jesús máechajicanumapa ema Pedro. Ánipa macahe:

— ¿Tájaha picayema, piti Pedro, nájahasica tatuparacahi navachachayare eta impuesto mavarahaquene ema mácani rey? ¿Énapuca ena machichaqueneana, énapuca ena machanerana? — máichapa.

²⁶ Ema Pedro majicapapa:

— Ena machanerana.

Tásiha, ema Jesús macahepa:

—Tiuri, viti machichahavihi ema Viya. Vahi tatuparacahini vivachahini viti eta juca impuesto.

²⁷ Vinaquicasera eta impuesto apaesa tacuija tacucayemacare nayehe ena achaneana. Piyanayare pénica eta jima te cáquiure. Te piáquiiecapa eta pénirave, eta tínapura jima tacaratacaya eta pénirave, tatiarihiyare eta plata te tajaca. Pivehainapa eta reale, tásiha taratahayare tavachacha eta nuyehe parte núti, étapa eta piyehe píti —máichapa.

18

¿Nájahapuca ema apóstole ticapichupana?

(Mr 9.33-37; Lc 9.46-48)

¹ Tacahe, te jena sácheanahi, viyaserecapa ema Jesús:

—¿Nájahapuca ema ticapichupanaya viyehe viti te táitecapapa eta sache aqenucavíraya? —vicanaquicasera eta impuesto apaehepa.

² Tacahe, máichuhapa ema Jesús ema émana amaperuchicha, macatupihapa te vimirahu.

³ Máichahavipa:

—Nutupiruva numetacahe: Ínajicayare eta ecasiñavavaisira. Echávayare ecutiyaere ema maca amaperu, apaesa ítujicava esiapa ecachanenu tayehe eta néjasihayare.

⁴ Nácani navarahahi ticapichupananayare te jena néjasihayare núti, tacamunu mánsuanayare. Vahi máitucaimahi tiácapauchava.

⁵ Tacutiquene nácani tijacapanayare ena amaperuana níchavenénahi núti, ena nani yátupihí náimereca eta náemunasiranuhi núti, taicha tímicitijiricavahi nútinahini najacapa.

Ichape eta máicuñayare mácani tímiaquipaica te pecatu ena amaperuana

(Mr 9.42-48; Lc 17.1-2)

⁶ Tacutiquene mácani tiáquipaicaya ema émana amaperu téhicanuhi, tiúripannahipucaini máepenahini mativainahini éma. Váhirichupucaini macucaicunahini, taicha vahi macuaquipacahini ema amaperu tayehe eta pecatu.

⁷ Taicha muracayare eta náicuñayare nácani tímiaquipacanayare ena achaneana. Yátupi vahi téjiacavaimahi eta tímiaquipaicaya ena achaneana tayehe eta pecatu. Ichapesera eta náicuñayare nácani ticatapiravanahi eta náimiaquipaisirahi ena achaneana tayehe eta pecatu.

⁸ Eta tacahe, te táimipecurachahepuca eta evahu, étapuca eta ívapeana, tiúripa eyuchatica, iáquijica; apaesa vahi tacuimiaquipaicahe tayehe eta pecatu. Tiúripa táejiacava eta iáquehe eta esiapirayare te anuma, váhisera tacumutuhi tasiapa te yucu eta iáquehe.

⁹ Étaripavare eta iúquiha, te táimiaquipaicahepuca tayehe eta pecatu, tavarairahi táimahayare eta tamauriqueneana tájiparacana, tiúripa evectu hauquichava iáquijicaya. Taicha tiúripa eta ejacapacarehi éti eta esiapiraya te anuma tayanapane táejiacavapuca eta iúquiha. Páuresamisera éti, te náepujuquichahepuca te yucu infierno, tamutuyare eta iáquehe.

Ema Jesús máimicutiarachinahi te témitiaca étana uvesa

(Lc 15.3-7)

10 Vahi ecuepuru ena amaperuana. Numetacahevane: Nararihi ena ángeleana tijaneacavacahi éna. Títupajijiacavanahi eta nacatiuchiravacahi ena amaperuana, máicha ema Viya.

11 Nuti Manerejirunuhi ema Viya, eta títitecanuhi nucuchucuhayare nácani tiávacuhanahi táñehiquene eta náitairesira.

12 Esamanuchaha. Nímicutichinahayare puiti. Matiarahi ema émana achane. Ticayehe eta cien uvesana. Te témitiyechapuca eta étana, ema achane tiyanayarehi matanuca eta táemitiaruhi. Eta máeñamiravahi, manaquicayarepa eta apamuriana noventa y nueve te majanearesihahi.

13 Te máichimavapa, tichavapa. Tétavicava eta máurisamurevapaipahi eta mámirapaipahi eta táejaruvahi.

14 Ene macahe ema Tata Ecaiyaquene éti, ema tiávihi te anuma. Vahi mávarahahini náemitiacahini ena nani amaperuana.

*Tatuparaca viperdonacha ena téjcapavana eta viyehe
(Lc 17.3)*

15 Te tatiarhipuca eta máejecapiravahi ema piparape eta piyehe, tituparacavi piperdonachayare. Tásiha, piconsejachayare éma, píputsiacayare éma eta pimetasira eta máejecapiravahi. Te tisuapavihi éma, tájinapa íchiravaimahi. Tiúrinapa eta itairesirana.

16 Téhesera te vahi macusuapavi, pitanucayare apinanaina ena piyeheanayare testigo apaesa tasuapacarepa eta piconsejarapiyare.

17 Te vuíchaha macusuapavi, pimetacapa namutu ena pichamurianahi picatupihapa te namirahu. Téhesera te váhiquenechapuca macusuapahe, tímaticaréinapa éma eta mamasuapajiraivahi me Viya. Vaipa ecuimisiapava mayehe, taicha eta mamasuapajiraivahi.

18 Nutupiruva numetacahe: Te ecurujicacahi, te ímahahi eta mamasuapajiraivahi, emetacayare éma vahi táepahahini eta mapecatura. Tanasirichuhi. Émaripa ema Viya, máímaracacahi eta evarairahi etupirica éma. Téhesera te máeneuchavapuca, emetacayare éma eta táepahairaripa eta mapecatura. Ema Viya, tiúriripa eta máimaira.

19-20 Énerichuvare te etiarhipuca éti te juca apaquehe apinahehi, mapanahehipuca ecurujicacahi te nǎjare núti, nutiarihiyarechuhivare núti te emuri. Tásiha, te étanaichuhi eta epanereruhi, ticuticacahi eta eyaseserepi te mayehe ema Tata, éma tíjaracahayare —máichahavipa.

21 Tásiha, ema Pedro mapauchapa, mayaserecayarehi ema Jesús. Ánipa macahe:

—Tata, ¿áyahepuca tatuparaca nuperdonachaya ema nuparape, te máejecapava eta nuyehe? ¿Táuricapuca siéteheyare eta nuperdonachirayare? —macahepa.

22 Ema Jesús majicapapa:

—Vahi távarichuimahi siétehéinarichuyare eta piperdonachirayare. Tímiyanavayarechucha eta piperdonachiranayare. Vahi pitupachaimahi —máichapa.

Ema Jesús máimicutiarachina ema achane máuriraha vahi máitucaimahi maperdonacha ema maparape

23 Nuti Manerejirunuhi ema Viya nucuti mácani rey rícoquenehi te mavarahahi máechayare eta nanteveana ena mamusurana.

24 Tásiha, námapaipahi ema tétavicavahi eta manteve. Tisintevapanahi éma.

²⁵ Tásiha, ema achane musu, tájina maviyahini mavachachihahini ema máquenuhi. Tacahe, ema rey macavanairipipa macaijararecasi, namutu esu mayena énapa ena machichanaveana, étapa eta macayehequeneanaini te mapena, apaesa mavachachahini apaesachichainarinehini eta mantevehi.

²⁶ Tásiha, ema achane musu tépuyucapa te mamirahu ema máquenu. Ánipa máicha: “Tátachicha, picatajicanuhini. Picuchapanuini. Te nítucavapaini, nuvachachapaini tamutu eta nunteve piyehe” macahepa.

²⁷ Jéhesare, ema máquenu majapanupa. Maperdonachapa tamutu eta mantevenihi. Macaiticapa.

²⁸ Vuíchahasera táyerehini eta máuchusirahi, mácapajicapa ema apana achane ticantevehi eta mayehe. Macompañeroinihivare. Váhinéni camurinahini eta mantevehi. Macaratachisera, macobrachapa. Masemaracapa macapitinnucapa. “Pivachachanu puítirichu” máichapa.

²⁹ Ema achane ticantevehi tépuyucapa te mamirahu. Mayaseacapa: “Picatajicanu, picuchapanuchaha. Te nítucavapa, nuvachachavipa”.

³⁰ Váhiquesera maperdonachahini. Máimicasiapapa te cárcel, mavarairahi mavachachavaneyarehini eta mantevehi.

³¹ Tacahe, te náimahapa ena apamuriana machamurianahi, ticatirinehi te nasamure eta náimairahi ema nachamuri présuiraipahi. Tiyananapa nametacahi ema náquenu tamutu eta máichavaquenévahi ema nachamuri.

³²⁻³⁴ Tacahe, ema máquenuhi máimichuhapa ema tipresurecainihi. Ichape eta masemanevahi. Ánipa maicha: “¡Piti máeperajitataji musu! Váiparinehi péchavahini eta nuperdonachiravihi eta pinteve ichapequenehi. Taicha eta piyaseasiranuhi, nuperdonachavihi. Piúriháinehi pájapanuhini píti apanavare ema pichamusuvahi, tácutihini eta nuperdonachiravihi núti” máichapa ema rey. Tásiha, macavanairipipa náicuñaca, étapa mavachachayarehi tamutu eta mantevehi.

³⁵ Tacahe, ema Jesús te títapiricapa eta juca máimiturapiana, ánipa macahe: —Ene máichaheyare ema Tata Nucaiyaquene éti apanavare, te vahi ecutuca eperdonacha nácani eparapenaveana náejecaparuvanahi eta eyehe —máichahavipa.

19

Ema Jesús tímiturecahi máechajisihahi mácani achane tñajicahi esu mayena (Mr 10.1-12; Lc 16.18)

¹ Te tamutupa eta juca máimiturapianahi ema Jesús, viúchucapa te Galilea. Viyanapa tayehe eta Judea. Viánuecapa eta cajacure Jordán te tinapaicahi te táuchusine eta sache.

² Camuriana ena achaneana tiúrujicavanahi. Ánaqui macanaracapai-pavare ema Jesús ena nacajumaqueneana.

³ Tásiha, títecapanapa ena apamuriana fariséoana. Napauchapa ema Jesús. Natanucahi eta tiviuchayarehi éma. Ánipa naicha:

—Vivaraha pimetacahavi ¿te táuricapuca máinajica ema achane esu mayena taicha jácani tájiparacana? —náichapa.

⁴ Ema Jesús májicapavacapa:

—Németeaca vahi ácaicutiarahi eta échajicuirá eta Sagrada Escritura. Te tépanavainapa acane, ema Viya májaracahi ema achane ésunayareichuhi esu mayenayare. Esu esena émanayareichuvare ema suímayare.

⁵ Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napanana ena ticachichana. Énajivainapa títatícacanayare. Eta navehaca-caírahi, tímicutijiricavaipa étanarinehi eta náqueheana” macahepa ema Viya.

⁶ Tacahe, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini náinajicacahini. Eta tacahe, mácani máinajicahi esu mayena, éma máepuruhi eta juca mavanairipi ema Viya — máichavacapa.

⁷ Tásiha, ánivare nacahe:

—¿Tájahasica tacayema eta mavanairipihini ema víyarahaini Moisés ticaepi-yayarehi eta ajureca suyehe esu esena eta máinajisirayarehi ema suima? — náichapa.

⁸ Ema Jesús majicapavarepa:

—Ena iáchucanaveanaini, te jácani eta nasemirahi, náinajicapa ena nayenana. Ema víyarahaini Moisés máisapahi tínajicacana táichavenehi eta tájinairahi eta náimitucacarevaihini, táetaviuchirahi eta namuracasamureva. Váhisera máuricahini ema Viya eta náinajicacahini.

⁹ Puiti nuvaraha numetacahe: Te máinajicapuca esu mayena mácani achane, te tájinapuca suíchiravainahini; tásiha, mavehapa esu apana esena, ticapecaturaipahi me Viya. Tacutiquene, mácani mavehahipuca súcani esena máinajiruhi ema suima, ticapecaturaipavare éma, taicha ésu, matiarihichahahi ema suimaquenehi — máichavacapa.

¹⁰ Tacahe, te víputsiacavavarepa, viti mayeheana apóstole viyaserecapa ema Jesús:

—Te énehipuca tacahehi eta juca, eta vivira viti ajairana esu esena, tíuripanaichuhipuca vahi vicitanuca esu esena —víchapa.

¹¹ Ema Jesús máichahavivarepa:

—Vahi ámutu árataha ímatiequeneha eta juca. Nararihisera tinerejicavanayarehi náimatiequenehayare máicha ema Viya.

¹² Nararihi ena ajairana vahi natanucaimahi esu esena nayenainahini, taicha eta náquehe vahi táichuhahini esu esena. Nararihivare ena ticave-cuhianahi, navetijipa éna vaipa náesenicaimahi esu esena. Nararihivare ena apamuriana tinerejicavanahi vahi natanucahini esu nayenainahini, navarairahi tacuija jácani tahapicahini eta nacaemataneasiraya ema Viya. Ticunachacarepanayare ena tiratahanayare eta juca náijarasirava yátupiquene nacaemataneacaya ema Viya — máichahavipa.

*Ema Jesús mayujaraucha ena amuyana
(Mr 10.13-16; Lc 18.15-17)*

¹³ Tacahe, ena achaneana námavacapaipa ena amuyana eta mayehe ema Jesús. Navarahahi máemamahacavacayarehi éna, mayujarauchahivaréni. Vítisera viti mayeheana apóstoleana vahi vísapahini. Vicaichepaicapa ena tíámanapahi ena amuyana.

¹⁴ Ema Jesús máichahavipa:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyahehi ena nani amuyana eta nasuapajiraiva éna — máichahavipa.

¹⁵ Tásiha, máemamahacavacapa ena amuyana, mayujarauchavacapa. Te tamutupa, viyanavarepa te apana avasare.

*Emachane rico téchajiricava mayehe emachane Jesús
(Mr 10.17-31; Lc 18.18-30)*

¹⁶ Matiarahi emachane amaperu rico. Mapauchapa emachane Jesús. Mayaserecapa:

—Tata maestro, piti piúriquene. ¿Tájahapucaini eta nícharacavahíni eta nítujsiravaina me Viya máichecuarquirénahini eta nítaresira? —máichapa.

¹⁷ Emachane Jesús majicapapa:

—¿Tájaha tacayema pímijsarechanu “Piti piúriquene”? Mararihi emachane Viya. Jéhevare éma, tétavicavahi eta máurivahi. Téhesera te pivarahapuca pécha te apana vítaresira, pisuapayare eta vanairipiana —máichapa.

¹⁸ Mayaserecavarepa emachane:

—¿Tájahasica eta vanairipianahi eta nusuapaqueneya?

Majicapavare emachane Jesús:

—Eta juca emachane vanairipiana emachane Viya: Vahi picucapareca. Vahi picuveha esu esena apayena. Vahi picuamereca. Nacuija pépiyéqueneruina.

¹⁹ Pipicauchayare emachane ticachichaviana. Pémunacayareva emachane piparaepiyahi, tácuti eta pémunasiravahi píti —máichapa.

²⁰ Tacahe, emachane majicapapa:

—Tamutu eta juca nusuapahi nítauchahi. ¿Tájahasera puca eta jácani néjequeruichahahi? —macahepa.

²¹ Emachane Jesús majicapavare:

—Te pivaraha pítaucha tamutu, piyana píjararecaya tamutu eta pímahaqueneana. Tásiha, píjaracavacapa emachane páureana. Jéhevare éta, píjacapayare eta pímahaqueneayare te anuma táitsivayare. Te tamutupa eta juca, pítecavanepa péhicanu —máichapa.

²² Te masamapa emachane eta juca macayemaquenehi emachane Jesús, ichaperinehi eta mapanereresirahi, taicha mavayuchahi eta macaimahaquenerahi. Macatiequeneharinehi tamutu. Tiyanapa tipanererecapaipa.

²³ Tacahe, emachane Jesús máichahavipa viti mayeheana apóstole:

—Nutupiruva numetacahe: Yátupiquenehi máitujihí eta nájjarasiravainahini eta náehisiranuinahi emachane rícoana eta nasiapirainahini te anuma.

²⁴ Esamanuchaha. Eta juca tímicutijiricavahi eta vípera camello, máitujihí tánucuhahini te támicuejehe eta parirapa. Ene nacahehi emachane rícoana —macahepa.

²⁵ Eta visamirahi viti, víaraminehi. Víchacapa:

—¡Tétavicavahi eta tamáitujicacarevahi! ¡Nájina títujicavaimahi náuchucuhahini!

²⁶ Emachane Jesús tímararahavipa. Tásiha, máichahavipa:

—Nájina émanaina emachane émajivainahini ticuchucuhava. Émasera emachane Viya, macarichu marataha ticuchucureca. Taicha tájina máemejerachaquenenahini emachane Viya. Tamutu marataha —máichapa.

²⁷ Emachane Pedro máichavarepa:

—Vítisera, Tata, vinaquicahi tamutu eta vicayehequeneanahi, vivarairahi véhicavi. ¿Tájahasica eta vímahaquenéya? —máichapa.

²⁸ Emachane Jesús majicapavarepa:

—Nutupiruva numetacahe: Járapiyare eta sáchevayare, tacaitsivairayare tamutu arairuya. Tásiha, nuti Manerejirunuhi emachane Tata néjacainapa te tajarahiquenehi trono. Tásiha, eti éhicanuanahi éjacainavarepa tayehe eta

dócequene trono. Ecavanairipinapa nayehe ena dócemuriqueneana vijaneanana israelítana.

²⁹ Tásiha, emutu eti enaquicanahi eta epenana, ejunijicahivare ena ticachichaheana*, ena eparapenaveana, ena echichanaveana, eta eyehe apaquehe, táichavenehi eta éhisiranuhi puiti, tiápajucavainapa camuripanayare ena ejaneananayare étapa eta ímahaqueneanaya. Énerichuvare táurivayare eta ítaresira máichecuaraquirenapa.

³⁰ Maverahesera eti etiarihiqueneanahi puiti, váhirichuhi ecapicahuhini. Te jena sáchezare, ichapepanainapa eta ecapicahuiraya. Ena puiti ticapichuanahi, te táitauchavapa te jena sáchezare, énapavainapa téquenehanayare.

20

Ena Jesús máimicutichahi ema achane rico tiuri eta mavachachira ena ticaematanezechana

¹ Te jena sáchezare te níjaracahénapa eta ícuchiyare eti nuchanerana, tacuti eta mavachachirahi ema émana achane ticayehe eta ichape quinta úvaquiji nayehe ena ticaematanearahiana. Ema maca mayatiruhi tipaica matanuca ena achaneana ticaemataneanayarehi mayehe. Tírerecanayarehi eta uva.

² Te títucavapa ena ajairana, mametacavacapa eta mavachachirayarehi étana reale te sache. Tiúrihi eta mavachachiravacahi. Mavanecavacapa tiyanana tayehe eta náireresihayarehi.

³ Tásiha, macamunuichahava ena apamuriana achane. Te las nuévepa sache, tiyanavarepa te plaza. Máimahainevare ena apamuriana ajairana máematanereanahi.

⁴ Máechajiacavarepa eta náireresirayarehi. Mametacavacavarepa eta táurivayarehi eta mavachachirayarehi. Tiyananavarepa éna, tírerecanahi.

⁵ Te las dócepa sache, tiyanavarepa matanuca ena apamuriana. Títucavavare, máevatomurihavare tírerecanayare. Te las trespa sache, tiápechavavare tiyana títucavavare ena apamuriana, énerichuvare tírerecanayarehi.

⁶ Te las cincopa sache, tiyanavare tiúchucahi tayehe eta plaza. Títucavavare ena apamuriana ajairana máematanereanahi. Tásiha, máichavacapa: “¿Tájaha tacayema tájina ématanenahini puiti jena sache?”

⁷ Éna najicapapa: “Nájina náechejiacahavihini”. Tásiha, ema máichavacapa: “Eyana éti apanava írereca ánaqui te nuyehe quinta úvaquiji”. Mametacavarepa eta táurivayarehi eta mavachachiraya.

⁸ Tacahe, te yátipa, mametacapa ema mayehe empleado máichuhavacapa namutu, mavachachavacayarepa. Mavarahahi náinapuca nacavacha ena náequenereruanahi ticaemataneana. Nasapihapa téquenehanahi ticavachana ena náinapureanahi.

⁹ Tásiha, ena nasiapaqueneanahi te las cincopa sache, mavachachavacapa ema achane eta étapevacahi eta reale, tacutirichuhi eta navachahi ena ticaemataneanahi tamutu sache. Énapa ena nasiapaqueneanahi te las trespa sache, énerichuvare eta étapevaca reale eta navachahi.

¹⁰ Tacahe, te ticavachanapa ena náinapureanahi tisiapana, náimahapa éna tacutirichuhi eta navachanahi ena náequenereruqueneanahi.

* **19:29** Te jácani apanana versiónéana, tatiarihi te juca lista eta táechajiriruva “ena nayenana”. Tájinasera nalistanahini te libro antivupanahi. Eta tacahehi, vímatiequeneha vahi manacahini ema Mateo. Mácani apana achane mavejuchahipuca te Lucas 18.29.

11 Tásiha, tise manapa mayehe ema náquenuhi.

12 Ánipa nacahe: “Ena nani náequenereruanahi títecapana, vicutivachava-caichuhi eta navachahi, étanainehinéni hora eta nacaematanerahi. Tacutirichuhísera eta vivachahi viti vínapureanahi. Váhiquene táuricaímahi eta juca, taicha ichapemurihi eta vicamichirahi viti eta táijureva muracaquene eta sache. Táurica vicachuricavacayahini éna eta navachahi” nacahepa.

13 Émasera ema náquenu majicapavacapa: “Váhira nucaetemahémahi éti. Énaripa ena náequenereruanahi, váhivare nucaetemavacaimahi. Tínunahi eta nuvachachirahehi étapevacahi eta reale nájarahe. Vahi ecusema.

14 Ésamiricavachucha. Evehachucha eta juca evachahi.

15 Núti néchinava taicha nuyehericuhi eta plata. Nuvaraha ácuticacahini eta evachana emutu. ¿Éti ecapinarunupapuca eta núrivahi nayehe ena nani?” máichavacapa.

16 Ema Jesús macahevarepa:

—Ene nacaheyare te jena sáchezare, nácani náequenereruanahi téhicanuana, éna nasapihayare tínapucana. Tásiha, nácani náinapureanahi, nasapihayare téquenehanayare* —macahepa.

*Ema Jesús tíápechavare máechajisiha eta máepenirayare
(Mr 10.32-34; Lc 18.31-34)*

17 Tacahe, eta vipaisirapahi te achene te vicaijuhepa eta Jerusalén, típutsia-cahavipa ema Jesús viti dócequeneana apóstoleana. Máichahavipa:

18 —Ímaha puiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi ema Viya. Ticaratacuanainapa ena tuparairucana.

19 Tímicapacuanayare taicha tíjararecanuanainapa nayehe ena suntarua-ana romanoana. Éna, nájina najapanuquenéna. Ticaecahinuanainapa. Téttacuanayareva. Tétatacuanayareva te crusu. Tásihasera, te mapana-quenena sache, néchepucainapa te nécari —máichahavipa.

*Esu naena ema Jacobo émapa ema Juan suyaseaca ema Jesús eta macajupa-havahini ena suchichanaveana
(Mr 10.35-45)*

20 Tásiha, témeñahavapa esu naena ena vichamuriana ema Jacobo émapa ema Juan, suámavacapaipahi éna. Tépuycapa ésu te mamirahu ema Jesús, suyaseacayahini énaínahini majupahanainahini ena suchichanaveanahi.

21 Éma mayaserecapa:

—¿Tájahasica ecamunu, nuchicha?

Ésu suíchapa:

—Nuvaraha pácchanéni ena nuchichanaveana tayehe eta péjasihayare picavacureraya. Náejacahini te pichacaya, eñi éñina te pivaure, eñi apana te sapa —suíchapa.

22 Ema Jesús majicapavacapa éna:

* 20:16 Te jácani apanana versiónéana, tatiarihi eta juca táechajiriruvana “porque muchos son llamados, pero pocos son escogidos”. Tájinasera eta juca táechajiriruvanahi te libro antivupanahi. Eta tacahe, vimatiequeneha vahi manacahini ema Mateo. Mácani apana achane mavejuchahi eta juca te Mateo 22.14.

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenévayare ecatajivairayare, ecutinuyarepuca eta nucamichirayare nútí? —máichapa.

Éna najicapapa:

—Virataha vicamicha —nacahepa.

²³ Tásiha, máichapa:

—Yátupi íchape eta ecatajivairaya, vicuticacaya eta nacapasirahaviyare. Étapasera eta éjasirayare eta te nuchacaya, vaipa nútina necha nucaejacahhini. Ema Tata Nucaiyaquene, émahí tinerejicayarehi ena nujupahanayare —máichapa.

²⁴ Tacahe, eta visamirahi viti diésqueneana mayeheana apóstole, visemapa nayehe ena apinana.

²⁵ Émasera ema Jesús máichahavipa. Ánipa macahe:

—Écharichuhi éti ena aquenucana tayehe eta avasare, muraca eta nacavairipira. Énaripa ena tuparairucana, tétavicavahi tisuapacareanahi eta nacavacurerahi.

²⁶ Váhisera ecucahehi éti nayehe ena echamuriana. Mácani tímerecavahi ticapícahupana, tacamunuhi máitativacayare ena apamuriana.

²⁷ Te etiarihivarepuca eti evarahahi ínapuca, tacamunuhi ímerecavaya navanarahayarehi ena echamuriana.

²⁸ Ecutinuyare nuti Manerejirunuhi ema Viya. Vahi étaina tímitecanu nucaitaticasihini. Nútíyarehi nitatihe. Énerichuvare níjaracavayarehi nímicapacava íchavenequeneanainahi éti camuriqueneanaya nucuchucureanaya —máichahavipa.

Ema Jesús macaimairiricavaca ena apinana púchuquiána

(Mr 10.46-52; Lc 18.35-43)

²⁹ Tacahe, te vijunijicavarepa eta avasare Jericó, camurianahivare ena achaneana ticavasanahi tayehe, téhichavianahi.

³⁰ Natiarihi ena apinana ajairana púchuquiána. Téjacanahi te achenechacaya. Te nasamapa ema Jesús eta mánuoirapahi, tipiararecanapa. Ánipa nacahe:

—¡Tátachicha! ¡Pítiqueneripa yátupiquenévihi Cristo! ¡Picatajicahavipaini pájapanuhavi!

³¹ Natiarihisera ena achaneana vahi náuricahini eta napiarasirahi ena púchuquiána. Navarahapa nacamatinaca. Énasera napiaracaichucha:

—¡Tátachicha! ¡Pítiqueneripa yátupiquenévi Cristo! ¡Picatajicahavipaini pájapanuhavi! —nacahepa.

³² Tacahe, ema Jesús eta masamiravacahi, titupihapa. Máichuhavacapa ena púchuquiána. Mayaserecapa tájahhipuca navarahahi.

³³ Éna najicapapa:

—Tátachicha, vivaraha pípuhauquichahavini apaesa vímairicapaini —nacahepa.

³⁴ Tacahe, ema Jesús majapanuvacainehi. Máemamahauquichavacapa. Enevanerinehi tímairiricana. Tásiha, téhichavianapa.

21

Títecapapa ema Jesús eta te Jerusalén

(Mr 11.1-11; Lc 19.28-40; Jn 12.12-19)

¹ Tacahe, te apanapa semana, viyanapa vicaijuhe te Jerusalén. Vétavajicapa tayehe eta avasarechicha Betfagé te tachacaya eta cerro ticaijarehi Olivoquiji. Ánaqui ema Jesús mavanecapa ena apinana vichamuriana.

² Ánipa maicha:

—Eyanayare tayehe eta te jena avasarechicha Betfagé. Ánaqui ímahayare ticaitihahi eta esena burrico, étapa eta tachicha te tachacaya. Evejapua-cayare iáminanuyare eta áni.

³ Te natiarihinapuca náeñama, emetacayare eta nucamunuirahi núti. Vahi táyeréimahi vímichavavaneyare —máichavacapa.

⁴ Eta juca tamutuhi títauchavapahi eta májuchaquenehi ema mácani víyarahaini profeta.

⁵ Ani tacahehi: “Emétaca ena achaneana ticavasanahi te Jerusalén, apaesa natsecava eta najacapirayare ema nayeheyare Rey. Emétacayare vahi nacupica, taicha tétavicavapahi eta mamansuvapahi, étapa eta máurivahi. Mámapahi eta iúritaresirayare. Tímaticareyarepahi ema, taicha ticaperayare eta burricuchicha” tacahehi eta Sagrada Escritura.

⁶ Tacahe, ena vanairucanahi náitauchahi eta navanahi mayehe ema Jesús.

⁷ Námapaipahi eta burricochicha étapa eta tachicha. Nanacamaequechapa eta náepacuhana. Tásiha, ticaperapa ema Jesús.

⁸ Camuriana ena achaneana tíacapanahi náepacapaicapaipa eta namuirihana. Ena apamuriana navehapa eta tapacaji eta cáchipaca. Nanacavare te mayanihayarehi éma.

⁹ Ena apamuriana tínapumirauchanapahi énapa ena téquenehanapahi tipiaracanapaipa:

—Yare, Tata. Píti yátupiquenevihi Cristo réyvihi viyehe viti israelítana. Ichape eta vicunachiravihi píti. ¡Vanairucaquenevihi me Viya! ¡Asulupaya me Viya te anuma! ¡Viva ema Viáquenu! ¡Viva! —nacahepa.

¹⁰ Tiúchuchujicanapa ena achaneana te Jerusalén. Ichape eta náramirahi ema Jesús eta máitecapirahi. Tiyaserejiricanapaipa:

—¿Nájaha ema maca achane?

¹¹ Ena apamuriana najicapapa:

—Émara ema profeta ticaijare Jesús, ticavasa te Nazaret te tinapaica te Galilea —nacahepa.

Ena Jesús macuchuchujicavaca ena tíjararecanahi eta sárareana, cáyureana te tajuhe eta Templo

(Mr 11.15-19; Lc 19.45-48; Jn 2.13-22)

¹²⁻¹³ Tacahe, te apanapa sache, tiyanapa tisiapa ema Jesús tayehe eta te Templo. Máimaharinehi ena achaneana tíjararecanahi eta sárareana, cáyureana. Ena apamuriana ena tivacharecanahi. Natiarihivare ena útsiriperecarahiana eta naplataneana ena apavasanana. Máichavacapa:

—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étiserá eti tíámerahiana, ecasiapavapa eta te juca. Emaeperajicapa eta tacapichairahi. ¡Eyana iúchucatataji! —máichavacapa.

Tásiha, macuchuchujicavacapa namutu. Máequehepuichinavacapa eta namesarana étapa eta nasiyana.

¹⁴ Eta mávihairahi te Templo ema Jesús, napauchapa ena púchuquiana énapa ena masariana. Tásiha, éma macanaracavacapaipahi.

¹⁵ Tacahe, ena amaperuana tipiararecanahi eta nacunachirahi éma, ánipa nacahe: “Pítiquenehi yátupiquenevihi Cristo manerejiruvihi ema Viya” nacahepa. Énasea ena tuparairucana énapa ena escribánoana vaipa náurichahini eta náimairahi tamutu eta juca. Tisemanapa.

¹⁶ Náurujiacapa. Navarahapa nacaichepaica eta máichaqueneanahi. Tásiha, náichapa éma:

—¿Tájaha tacayema písapa tipiararecana ena nani amaperuana? ¿Váhiyapa picamatinacavacaini? —náichapa.

Éma Jesús majicapavacapa:

—¿Tájahasica táichavahi eta juca najirairahi? ¿Váhipuca échajicuha eta Sagrada Escritura eta táechajisihairahi eta juca najirasahi ena nani amaperuana? Ani tacahehi: “Piti, Tata, pinacasamurechavacahi ena amaperuana eta máejerarayarehi naicha eta najirarayare eta táurinaquene alabanza” —máichavacapa.

¹⁷ Te títapiricapa eta majicapiravacahi, majunijicavacapa. Tiyana eta te avasarechicha Betania, étapa máimasinehi. Véhicapaichuhisera víti.

Éma Jesús májiquiha eta higo taicha máhiriquirehi

(Mr 11.12-14, 20-26)

¹⁸ Te apanapa sache, te yáticarahichicha, tiyanavarepa ema Jesús tayehe eta Jerusalén. Véhicapaichuhivare víti apanava. Eta vipaisirapahi, técuhasamurepa éma.

¹⁹ Máimahapa eta yucuqui ticaijare higo te achenechacaya. Tiyana mapauchahi. Tájinasera táhinahini. Tapacajianachucha. Tásiha, máichapa ema Jesús eta higo:

—¡Pépiyainapa píti eta máhiriquereviyare! —máichapa.

Éta macaherahi, enevanepa tijiyujipa eta tapacajiana.

²⁰ Éta vímairahi víti, viáraminehi íchape. Viyaserecapa ema Jesús:

—¿Tájaha táichararacavahi eta tájiháchiravahi tiájiqui eta higo? —vicahepa.

²¹ Éma Jesús tijicapahavipa:

—Jéhesare nusamacarehi me Tata. Éti apana esamacareyareva, te yátupina eta ecasiñavairahi me Viya. Tájina émaitucaimahi. Eratahayare ícha, ecutinuya eta níchaquenehi. Eratahayareva ecayejecca eta cerro te apachacaya.

²² Tamutu jácani eyaseserepiyare eta mayehe ema Viya te eyujarasirana, ecaijaracasiyare te yátupina eta ecasiñavairahi me Viya —máichavapá.

Nayaserecapa ema Jesús nájahahipuca tituparacahi éma

(Mr 11.27-33; Lc 20.1-8)

²³ Tacahe, visiapavarepa tayehe eta te Templo. Éma Jesús, tímiturecavarepa nayehe ena achaneana. Tacahe, napauchapa ena tuparairucanahi. Natiarihihivare ena tinerejicavanahi ena aquenucarahana. Ánipa nacahe:

—Píti, vahi vitupararuvinahini víti eta píchira eta júcana. ¿Nájahasica tímítucavihi? ¿Nájaha tituparacavihi eta juca píchaqueneana? —náichapa.

²⁴ Éma Jesús majicapavacapa:

—Núti apanavare nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana.

²⁵ ¿Nájahapuca tivanecahi ema Juan eta máitesirahi máicachasirisirahi? ¿Émapuca ema Viya tivanecahi, émajivapuca eta máitesirahi? —máichavacapa.

²⁶ Váhisera náituruequenehahini eta najicapirayarehi. Tiácapaemajiricanapa. Ánipa nacahe:

—¿Tájahasica vicayemayare eta vijicapirayare ema maca? Te vémunahacava vícha: “Mavaneruhi ema Viya”, éma macahénapapuca: “Tásiha, ¿váhiyapa esuapahini éma?” Téhesera vácahepuca: “Émajivaichucha eta máitesirahi”, ticauyayacareripa titupisicahaviana eta te máríjahiana ena achaneana, taicha namutuhi náimijachahi ema Juan profetaquenehi yátupiquene, mavaneruhi ema Viya —téchajiricanapa.

²⁷ Tásiha, náichapa ema Jesús:

—Vahi vecha víti —nacahepa.

Tacahe, máichavacapa éma:

—Énerichuvare núti, vahi numetacahémahi nájahapuca ema tituparacanuhi.

²⁸ Nuvarahasera nímicutiarachinaheyare. Nararihi ena apinana ticaparapecacana. Ticavanahipa ema émana mayehe ema naiya. Ánipa máicha: “Nuchicha, piyana picaematane puiti jena sache. Pírerecaya eta uva” máichapa.

²⁹ Ema machicha majicapapa: “Vahi nuvaraha nucaematane puiti juca sache”. Te tiyerepa, tiyanapanéni ticaematanehi.

³⁰ Tásiha, ema naiya mavanecavarepa ema émana machicha, mayanahini macaematanehini éma apanavare. Tásiha, ema amaperu majicapapa: “Tiuri, nuyanayare” macahepa. Váhinéni mayanahini.

³¹ Puiti nuyaserecaheyare: ¿Nájaha ema tisuapajirahihi mayehe ema maiya? —máichavacapa ema Jesús.

Éna najicapapa:

—Ema tínapuca, éma tisuapajirahihi.

Tásiha, ema Jesús máichavacapa:

—Nutupiruva numetacahe puiti. Nasapihayare ticachuricaheanayare tisiapana te anuma ena túhusianainihi énapa ena tisipecaturarahianainihi. Éti vahi esiapaimahi.

³² Taicha vahi esuapahini eta máimiturapiana ema Juan Tícachasiricarahini, váhivare ávarahahini étupiricavahini eta ítaresirana. Nararihisera ena tisipecaturarahiana, ichape eta nasuapirahi. Étisera, tétavicava eta emasuapajiraiva, tayanapane ímahahi masuapacarevahi éma —máichavacapa.

Éma Jesús máimicutichina ena pártirárioana máurirahana
(Mr 12.1-12; Lc 20.9-19)

³³ Ema Jesús máichavarepa:

—Esamanu eta juca apana nímiturapiya. Nímicutichinaheyare. Matiarahi ema achane. Ticaevaruhi camurí eta uva te máesane. Manaruchapa eta masucure. Máepiyacavarepa eta nacaticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásiha, máijaracapa ena achaneana, pártirárioanayarehi. Tásiha, tiyanapa ema achane te apana avasare.

³⁴ Tacahe, te títecacapa eta caje tayairahi eta uva, máimivanerecapa ena mamusurana nayaseapanavacayarehi ena pártirárioanahi eta tatucachayeneharehi éma.

³⁵ Énasera ena pártirárioanahi tismauchavanarichucha. Nacaratacavacapa, náehapa ena vanairucana. Nacapacapa ema émana. Ema apana nayucaracapa te máríjahiana.

³⁶ Tásiha, ema achane máimivanerecavarepa ena apamuriana. Camuripananapa. Váhiquesera náijarachini, náehavacavarepa. Nacapacavacapa ena apamuriana.

³⁷ Tacahe, émajacaruvapa máevataca ema machicha. Máimijachaipahi émapapucaini napicauchahini.

³⁸ Te náimahapa ema machicha ema ticayehe eta úvaquiji, ánipa nacahe: “Émainapapuca ticayeheyare ema maca. Yare, vicapaca apaesa tánasipa viyehe tamutu. Tájina máicharachavimahi ema achanénavaji”.

³⁹ Tacahe, nacaratacapa ema machicha, nacuchucapa eta tayehe eta isaniti, nacapacapa.

⁴⁰ Puiti, nuyaserecaheyare: ¿Tájahapuca máicharachavayare ema ticayehe eta úvaquiji ena pártirárioanahi máurirahana? —macahepa ema Jesús.

⁴¹ Éna najicapapa:

—Éma tisemainapa. Vaipa májapanuvacaimahi. Macapapanavacayarepa ena pártirárioanainihi. Máijaracainapa ena apamuriana pártirárioanayareva, nácani tipicaurahianahi, náijarachini eta mayehe parte —náichapa.

⁴² Tásiha, ema Jesús máichavacapa:

—Jehe tíurihi eta ejicapiranuhi. Nuvarahasera epanerechinavapaini eta tacayemahi eta Sagrada Escritura, apaesa ácaicutiara éti. Ani tacahehi: “Éna tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitecapahi eta te táicuchihi eta tatuparahahi. Tacapichuquenehi puiti. Táitusiava, tétavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya.

⁴³ Puiti numetacahe: Táichavenehi eta emasuapajiraivahi, vaipa étiparacaimahi tayehe eta mavanairipi ema Viya. Ena tisuapajirahianahi, éna ticavacureanayare te jena sácheyare. Énainapa téchanayare eta vanairipiana.

⁴⁴ Puiti, núti nucutihi eta ichape mari náepuruquenehi. Eti épurunuanahi, iáquipaicavayare évetutujicayare. Tichimarachenapa eta muraca ecuñaraqui taicha eta emavarahairahi éhicanu —máichavacapa.

⁴⁵ Étasera eta nasamirahi ena tuparairucana énapa ena fariséoana, tisemarinehi taicha tímatiacavanapa eta énairahi tayunacavaca eta máimicutichiravacahi ema Jesús.

⁴⁶ Navarahapa nacaratacayarehíni. Tipicacavanachuchasera nayehe ena achaneana taicha namutu nacunachahi ema Jesús eta émairahi vanairuca me Viya.

22

Éma Jesús tímicutichava mácani rey te máichuhavacapa ena machimaranaya, máichayarehi eta ichape piesta

¹ Éma Jesús máimitucavare ena achaneana eta apana máimicutichaquene. Ánipa macahe:

² —Éma Viya, macutihi mácani rey te máimiyenachayare ema machicha, máichayarehi eta ichape piesta.

³ Mavanecapa ena mavanarana náichuhapanavaca ena machimaranaya. Váhisera návarahahini nayanahini éna.

⁴ Tásiha, ema rey máevatacavare ena apamuriana mavanarana. Ánipa máichavaca: “Eyanavare étipava ímitatajiricavaca ena níchuhaqueneanahi,

náitecavanepa. Nucaparecaripahi eta vaca nirureyare nésinaruanahi. Tiúrinapa tamutu eta juca tinicacare. Énanecha nucuchapahi náitecavanepa” macahepa.

⁵ Énasea ena máichuhaqueneanahi vahi nasupahini. Nájina nayanahini. Ema émana tiyanapa te máesane. Ema apana máimahapana eta mayehe tienda.

⁶ Ena apamuriana nacaratapaca ena vanairucanainihi, náehavacapa, nacapacavacapa.

⁷ Tacahe, te máechapa ema rey, tise mapa. Mavanecapa ena masuntaruana nacapapanavaca ena ticapahianahi. Náijuchavare eta tamutu eta napenanaini.

⁸ Tásiha, máichavacavarepa ena apamuriana mavanaranahi: “Tiúripa tamutu eta juca tinicacareana. Váipasera nuvaraha náiteca ena náinapuremanahi níchuhaqueneanainihi.

⁹ Eyana te tamutu cálleana. Íchuhavacayare namutu nácani ecainunaqueneanayare” máichavacapa.

¹⁰ Tacahe, ena mavanaranahi tiyananapa, náchehupanevacapa. Nacurujicavacapa namutu nácani nacainunaqueneanapahi: nácani achaneana tiúriana énapa ena súnusurujiana. Camurianahi. Tínicanarinehi eta te távihayarehi eta piesta.

¹¹ Tacahe, ema rey tisiapapa, máimahayarehi ena machimaranahi. Máimahapa ema émana achane ema matiarihiquenehi vahi manacahini eta namuirihasa te ticaichuasiana.

¹² Tacahe, máichapa: “Ajaira, ¿tájaha tacayema vahi pinacahini eta múiriare níjararuheanahi tayeheyarehi puiti juca piéstayarehi?” Émasera ema achane vahi majicapahini.

¹³ Tacahe, ema rey mavanecavacapa ena mavanarana: “Eveha ema maca. Ítijivaucha, ítiápechavare. Íyaracuhapana te timapicu tayehe eta máiyauchia-vayare macapitiquiahechiavayare” macahepa ema rey.

¹⁴ Ema Jesús máichavarepa:

—Numetacahe puiti: Camurianahi ena níchuhaqueneanapaipahi. Ánimurarianarichusera ena títaurahianayare —macahepa ema Jesús.

Navaraha náemejecapavacha ema Jesús tayehe eta impuesto
(Mr 12.13-17; Lc 20.20-26)

¹⁵ Tacahe, eta nasamirahi ena fariséoana, tise manarinehi. Tiyananapa ticurujicacanapa, navarahaipa náemejecapavachayarehi apaesa étainhipucaini taviuchahini ema Jesús.

¹⁶ Tacahe, navanecapa ena nachamuriana énapa ena políticoana. Nayase-repanahi ema Jesús. Te náitecapauchapa, ánipa nacahe:

—Tata maestro, vímatihi eta tatupiruvairahi táurivahi eta juca pímiturapianahi. Yátupihi eta pímitusiravacahi eta táurinaquene achene ticaijuhe me Viya. Váhivare pipicacaracavahini eta péchajisihairahi eta náichavaquenevanahi nácani achaneana, tayanapanehi aquenucahi.

¹⁷ Vivarahahisera viyaserecaviyare eta pipanereruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahavihi ema Viya, ¿masi? —náichapa.

¹⁸ Émasera ema Jesús máimatiacavacapa eta tamaurivapahi eta napaneruana. Tacahe, máichavacapa:

—¡Apimirahetataji! ¿Tájaha tacayema evaraha ímiaquipaicanu?

¹⁹ Námahaseji, iáminanu étapena eta reale —máichavacapa.

²⁰ Eta náijarasirapa, éma máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

²¹ Éna najicapapa:

—Mayehe ema Presidente Emperador —náichapa.

Tacahe, éma máichavacapa:

—Tiuri, táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma —máichavacapa.

²² Te nasamapa ema Jesús eta majicapiravacahi, ichaperinehi titsirihacavanahi. Náramipa eta máitupajijiasiravahi. Tiyananapa tichavanahi.

Nayasereca ema Jesús náicharacavayarepuca ena náepenaqueneana eta náechepusirayare

(Mr 12.18-27; Lc 20.27-40)

²³ Étarichu te jena sache, nacahepaipahi ena saducéoana. Ena nani saducéoana, apanahivare eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Natanucahi eta táetseraruvayarehi náicha. Ánipa nacahe:

²⁴ —Tata maestro, ema víyahaini Moisés, manaquicahi eta máechajiriruvahi eta veyehe: “Te máepenaequenehahipuca ema achane esu mayena, tásiha nájinahipuca manaquiequeneruvainahini machichainahini; te matiarihihipuca mácani maparapehi, mavehayare esu machinenaequenéni, apaesa émainapuca macachicha eta suyehe, máitsivainahi ema maparapéni”.

²⁵ Tacutiquene te juca vítaracu, natiarihinahi ena siétequeneana ticaparapejiriacana. Tacahe, ema náechavimuri títauchavapa. Máepenaequenehapasera esu mayena. Nájinahi machichainahini.

²⁶ Tacahe, ema maparape máitauchavare esu machinenaini. Énerichuvarera máepenaquenehavare, nájinavare máchichainahini. Ema émana maparape máitauchavare ésu. Énerichuvare máepenaquenehavare. Namutupa ena siétequeneana navehahi ésu, tásihasera náepenaquenehapaipa, nájina émanainahini macachichahini eta suyehe.

²⁷ Te táequenepa, tépenapa esu esenaini.

²⁸ Tacahe puiti, te apanapapuca eta náitaresirayare ena nani, ¿nájahapuca ena siétequeneana ema yátupiquenehi suímaquenehi esu esena, taicha ena siétequeneana namutuhi suímanarihi? —náichapa.

²⁹ Tásiha, ema Jesús majicapavacapa:

—Éjecapava éti. ¿Tájaha tacayema vahi ácaicutiarahini eta táimiturapi eta Sagrada Escritura? ¡Váhivare evarahahini esuapahini eta tamutuirahi marataha ema Viya!

³⁰ Ánaqui te apana náitaresiraya, vaipa nácamunuimahi esu esena. Énaripa ena esenana, váipavare nácamunuimahi ema ajaira. Nacutinapa ena ángeleana tiávihanahi te anuma eta namaepenacacairahi.

³¹ Éti váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiriruva ema Viya. Ani macahehi éma:

³² “Nútira yátupiquenenuhi Viya, macasiñaquenehi ema Abraham, ema Isaac émapa ema Jacobo” macahepa ema Viya. Nutupiruvahi numetacahe: Ema Viya, éma téchahi eta náitaresirana ena téhicanahi, tayanapane tépenaripa. Eta náchanevana, túmianavarichucha títareca te mamirahu. Éti, ichape eta éjecapiravahi —máichavacapa ema Jesús.

³³ Tacahe, eta nasamirahi ema Jesús, ichaperinehi eta náramirahi ena achaneana eta máimiturapihi.

Eta tisuapacarepanahi te mavanairipiana ema Viya

(Mr 12.28-34)

³⁴ Tacahe, ena fariséoana eta náimairahi macamatinasiravacahi ema Jesús ena saducéoana, ticurujicanapa éna.

³⁵ Tásiha, tiyananapa náemejecapavachayarehi ema Jesús. Ema émana ticainapucavapa, máestrohi éma tayehe eta nayeherepiana. Mayaserecapa éma:

³⁶ —Tata maestro, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

³⁷⁻³⁸ Ema Jesús majicapapa:

—Eta máechajiriruva ema Viya te Sagrada Escritura, ani tacahehi: “Yátupina eta émunasiranuina nuti Iáquenu. Iúnaca te esamureana. Yátupina eta ecachanevairanuina nútí. Epanerecha eta nímiturapiana tamutu sácheana, yátiana”. Étara eta juca eta vanairipi tisuapacarepanahi. Éta tativayare ítauchayare, títapuca tayehe eta apamuri vanairipiana.

³⁹ Eta apana táehiruhi eta juca, ánivare tacahe: “Pémunacayare ema piparaepiyahi, tácuti eta pémunasiravahi píti”.

⁴⁰ Eta juca apinaquene vanairipi, éta máehicahi ema víyahaini Moisés tayehe eta apamuriana mavanairipianahi éma. Énaripa ena apamuriana profetana, étarichuvare náehicahivare éna tayehe eta náimiturapianahi.

Yátupi ema Cristo mámaríequenénihí ema rey David, Víyahivare éma

(Mr 12.35-37; Lc 20.41-44)

⁴¹ Tacahe, eta náurujiasiraichaha ena fariséoana te machacaya ema Jesús,

⁴² máichavacapa:

—Puiti, nuvaraha nuyaserecahe eti: ¿Tájaha tacayema eta epanereruana éti mayehe ema Cristo ema ecuchapaquenehi? ¿Tájaha eta ícutiarayare eta ímatirayarehi éma te máimerecavapa? —máichavacapa.

Éna najicapapa:

—Vímatinapa éma taicha tiúchucayare mámariequenyare ema víyaháini rey David —nacahepa.

⁴³ Majicapavarepa:

—Yátupihí ema Cristo achanequenehi eta máimahi taicha mámariequenyarehi ema víyaháini David. Nuvarahasera epanerechaya eta juca máechajiriruvahi ema David te májurehi Salmo, ani macahehi:

⁴⁴ “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacianahi” macahepa.

⁴⁵ Ema David, eta máimijarechirahi ema Cristo “Tata Náquenu”, ¿tájahapuca eta macayemaquenehi? Nútí németeaca Víyahivare ema Cristo. ¿Tájaha íchahi éti? —máichavacapa.

⁴⁶ Eta nasamirahi eta juca, nájina nájaracavahini najicapahini. Eta tacahe, nájinapa napatsicavahini nápechahini nayaserecahini.

23

Ena Jesús máimereuchavaca eta nájecapiravana ena fariséoana énapa ena escribánoana

(Mr 12.38-40; Lc 11.37-54; 20.45, 46)

¹ Tacahe, ema Jesús máichavacapa ena achaneana vítipa viti máimitureana. Ánipa máichahavi:

²—Ena escribánoana énapa ena fariséoana tímijachavana catuparahana eta navepaisirayarehi eta mavanairipiana ema Moisés.

³ Tacahe, éna esuapayare. Ítauchayare eta navanairipiana. Váhiserá ecuehica eta nayeherepiana taicha ena apapipijichucha eta napanereruana.

⁴ Tacutiquene tipamicaheana ítauchaya eta camuriqueneana nayeherepiana. Éti, tájina eta eجانucarehíni nayehe. Nájinapa tiratahaimahi títaucha. Apanasíca éna, vahi náratahahíni náitauchahíni tamutu.

⁵ Tímijachavanahi tamutu náítaucha, navarairahi ticunachacareanayarehi nayehe ena achaneana. Tisiñavavaicanahi eta nápajusiravahi religiósóana. Nanacahi te nanahuana eta ajureca navejurehi eta te Sagrada Escritura. Tacutiquene eta nacamuirihaira tísaapeacavanahi píncanillanahi. Ticamatsivacahi eta nacamuirihaira.

⁶ Ena nani, te ticaichuhasiana eta nanisiraya, éna tinerejisinavanahi eta tíurinapanána eta náejasihaya. Navarahahivare ichape eta napicauchiraya ena achaneana te náurujisirarevanahi.

⁷ Tétavicavahi eta navarairahi ticapichuana. Navarahahivare ticacajamicasianayarehi te jácani nácapajisiha ena náimitureana téhepahi calle.

⁸ Étisera vahi ecujamuracha eta nacajamisirahenahini ena achaneana, étainapapucaini nacunachirahenahini. Taicha éti eparapejricacahi, ecuticacahi te mamirahu ema Viya. Nucarichu núti yátupiquenénuhi eyehenuhi Maestro, nuti Cristo.

⁹ Váhivare “Tata Nucaiyaquene” ecuquicha nácani achaneana te juca apaquhe. Taicha mararihi ema yátupiquene Ecaiyaquene, ema tíávihahi te anuma.

¹⁰ Váhivare tísapacarémahíni eta náimijarechahe, “Tata nuyehé jefe”, taicha nucarichuhi núti yátupiquenénuhi jéfenuhi eyehe.

¹¹ Nuvarahasera ítátijiricacayare. Nácani tíátírahiana, éna ticunachacarepananayarehi eta eyehe.

¹² Énerichuvare nácani mánsuanahi, éna ticunachacarepananayare me Viya. Nácanisera ticasíñavavaicanahi ticunachavanapuca, tímitsiriávanayare me Viya —macahepa.

Ena Jesús mayunacavaca eta nájecapiravanahi ena escribánoana énapa ena fariséoana

¹³ Tacahe, títecapanapa ena escribánoana énapa ena fariséoana. Tásiha, ema Jesús máechajicavacapa éna, mayunacavacahi. Ánipa macahe:

—¡Éti escribánoana étipa eti fariséoana! ¡Muracayare eta ícuñayare taicha eta apimirairahehi! ¿Tájaha tacayema ímijachavahi éti echa eta tapaja eta anuma? Vahi ísapa nasiapahini ena achaneana, nácani tivarahana tisiapana. ¡Étiripa vahi ítujicavaimahi esiapa!

14 Jucarihi eta apana tiviuchahehi. Tatuparacahi ejapanuyare ena tépenaimana te váhipuca narataha navachachahini eta nantéve. Étiserá everejicavacahi tamutu eta nacayehequeneana. ¡Apimirahehi! Épiyacavahi religiósóhehi, íchahi íúpiemahi eta eyujarasira te namirahu ena achaneana, evarairahi vahi tacuimicaecherachava eta emaurivanahi. Ichapeyare eta ícuñayare táicha.

15 ¡Jucarihivare eta apana tiviuchahehi, éti escribánoana étipa eti fariséoana! ¡Muracayare eta ícuñayare taicha eta apimirairahehi! Éti, tétavicavahi eta éñamavairahi eta íturuca ena téhicana eta ímiturapiana, eyanirahi te avasareana tiyerehiana. Tasapihahi ímitucavacahi eta nacutiheraya eta evainarajivahi. Tiápajucava eta namaurivahi ícha. Eta tacahe, ecachanevacayare éna te yucu infierno.

16 Jéhevare éti ecaijare páurehe. Ichape eta ícuñayare taicha eta ímiaquipaisiravacahi ena ecutiqueneana púchuquiána. Éjecapavahi tayehe eta juca ímiturapihi. Ímituca eta tájinahi eta taviuchaimahi nácani najurachahi eta Templo. Étasera te najuracha tayehe eta oro eta tiávihahi eta te Templo, ticaviurevanainapa ícha éti.

17 ¡Tétavicavahi eta emaecharaireva eti púchuquiána! Eta Templo, étara tipicauchacarepanahi tayehe eta oro tiávihahi tayehe.

18 Jápechavavare eta éjecapiravahi tayehe eta apana ímiturapi. Éti íchavare: “Te náichapuca nácani eta promesa, najurachapuca tayehe eta náijuchirare eta sárareana, tájinaipavare ticaviurémahi. Téhesera najurachahi tayehe eta nanaquiruvahi te táinahu eta náijuchirarehi, étasera ticaviurevanaripa” íchahi éti.

19 ¡Tétavicavahi eta emaecharaireva eti púchuquiána! Eta náijuchirarehi eta sárareana, étara tipicauchacarepanahi tayehe eta enaquiruvanahi. Éta tímipicuchahi eta enaquiruvanahi.

20 Taicha nácani tijurachanahi tayehe eta náijuchirarehi, vahi tácarichuhini napicauchayare éta, napicauchayarehiva tamutu eta námavahuana tiávihanahi te náijuchirarehi.

21 Tacutiquene nácani tijurachanahi tayehe eta Templo, vahi tácarichuhini náichahini eta juramento tayehe eta Templo. Najurachahivare mayehe ema Viya tiávihahi tayehe.

22 Énaripa ena tijurachanahi tayehe eta anuma, najurachahivare mayehe ema Viya, taicha eta anuma étahi eta mávasa, étaipa eta máejasihahi ema téchahi tamutu.

23-24 ¡Jucarihivare eta apana tiviuchahehi eta tamuracavaya eta ícuñayare, éti apimirana! Éti ímijachavahi íminecapaequeneha ena ecutiqueneana púchuquiána tayehe eta títucacareana. Ímijachavahi yátupiquenehi eta religiósóhéirahi eta epamisiravahi eta ítauchira eta vanairipi eta ecamavahuira me Viya eta diésmuri tayehe eta sucurecana. Ecnachacarehi taicha éta. Váhisera epamicavahini eta táuriqueneana ticunachacarepanahi me Viya. Tatuparacáhe emutu ájapanurahí; ecatiuchavacarehi ena macatiuchavarahanahi; yátupina eta ítauchiraya tamutu eta íjarasiravahi; yátupina eta ecasiñavairaina me Viya. Tatuparacáhehivare ecamavahu eta me Viya eta

diésmuri. Éti éñamavahi eta ítauchirahi eta ánichichana, étasera eta tisuapacarepanaqueneanahi táuriqueneana, tasapihahi vahi esuapahini*.

²⁵ ¡Tétavicavahi eta apimirairahehi! Éti ímijachavahi yátupiquenehi religiósöhehi, ecañamaracavahi eta ímiyaniravaya ítaucha eta eyeherepiana. Étasera eta esamureana, tétavicavahi eta tachipejivavacahi taicha eta ecaetemaraivana étapa eta íjarasiravahi ícha tamutu eta ejamuraraivana.

²⁶ ¡Tétavicavahi eta epuchuquiva eti fariséoana! Tamapurujihí eta religiósóhírahí. Tacamunuhí tativá esipaca eta esamureana, apaesa yátupináserepa eta iúrivayare, tipachinainapa eta ítaresiraya.

²⁷ ¡Tétavicavahi eta ecatajivairaya, táichavenehi eta apimirairahehi, eti escribánoana étipa eti fariséoana! Éti ecuti eta covacha. Tiúrinahi te táinahu, téhesera te amahe távihahi eta máeperejiqueneana.

²⁸ Tacahehí eta ítaresirahí éti. Ticutimahinehi iúrihi te namirahu ena achaneana. Étasera te esamureana táurujisiavahi eta evainarajivana, tacutiquene eta apimirairahehi.

²⁹ ¡Páurehesamichapucaini eti escribánoana étipa eti fariséoana! ¡Ichape-muriquene eta eviurevanahi! Eti, ímijachavaipahi puiti ecunachacarehi eta evarairahi échapajirica eyeheheacahi eta náecariana ena profetanaini matapiravarequeneanahi, nacaparuanahi ena íáchucanaveanaini éti. Épiyacavahi yátupiquenénahini eta iúrivahi.

³⁰ Tásiha, ánivare ecahe: “Te vitiarihinari pahini víti eta acane te ticaparecanapa ena viáchucanaveanaini, vahi vicuimicasiapavahini tayehe éta” ecahepa.

³¹⁻³² Étijivapa ímereuchavahi eta apimirairahehi, taicha puiti éti epane-rechahi ecapacanuya, tacutihi eta napanereruanahi ena íáchucanaveanaini. Tásiha, ecuticacayare eta naviurevahí ena íáchucanaveanaini.

³³ ¡Éti tachichanaveanatataji eta quichare, tétavicavahi eta evainarajivahi! ¡Váhiquene ticaiticahémahi eta ícuñaya te infierno!

³⁴ Nímicaecherachayare eta evainarajivahi. Nuvanecayare napauchahe ena nuchanerana. Éna, timetacaheanayare eta mapanereruana ema Tata. Tímitucaheanayareva tamutu eta nímiturapiana. Nasapihayare vahi esuapaimahi éna. Éna, yátupihí náituca. Émepururecayaresera éti eta náitupajijiasiravahi éna. Esapihainapa, éti ecapacavacainapa éna; ena apamuriana émetatacayare te crusu. Tásiha, ena apamuriana éstacavacainapa te iúrujisi-rarevana. Éhicarairicavacainapa te jácani avasareana najunaiyayarepahi.

³⁵ Tásiha, eta ecapasiravacainapa ena nuvaneruanihi, étinapa tamuriacayare eta naviurevanahi namutu ena ticapacanahi ena achaneana matapiravarequeneanahi. Ema Abel máinapuiruhi nacaparuhi, máetaviuchainihí eta máuriva. Émapa ema máequenereruhi Zacarías (machichainihí ema Berequías), ema nacaparuhi te tamirahu eta Templo. Camurianahisera ena apamuriana náumurivanainihí.

³⁶ Nutupiruva numetacahe puiti: Étinapa tamuriacayare tamutu eta náepeniranahi. Títecapainapa eta ícuñayare eti achaneana ítareruanahi puiti —macahepa ema Jesús.

* **23:23-24** Ani tacahe eta mayeherepi ema Jesús te máechajiriruva: “Eti ecatijica eta chupi; ejiricasera eta camello”.

Ena Jesús ticatisamurevahi táichavenehi eta namasuapajiravahi ena achaneana ticavasanahi te Jerusalén
(Lc 13.34-35)

³⁷ Tacahe, ena Jesús tiápechavava máechajicavaca ena achaneana. Ánipa macahe, taicha eta macatisamureravahi:

—¡Tétavicavahi nucatisamureravahi ícha étisami eti tachichanaveanahi te juca viávasa Jerusalén! Ena iáchucanaveanaini, éna ticapapajicanahi ena profetana mavaneruanahi ena Tata. Puiti étipavapa evaraha ecutiya ena iáchucanaveanaini. Ichapemurihinéhi eta níchuirahéhi éti, iúrujiacanuhini, tácutihini eta varayu te tacurujimuriha eta tachichanaveana eta te tapava. Váhisera ávarahahíni.

³⁸ Ímahainapasera puiti eta íchararacavayare. Ticaquipaicasiyare tamutu eta epenana, étiripa ticuchucaheanainapa.

³⁹ Numetacahevane puiti vaipa iápechavaimahi ímananu, tiámainucavainapa te itsivachapa eta epanereruana, evarairayare ejacapanu. Ecachénapa: “Ichape eta vicunachiravíhi píti vanairucaquenévíhi me Viya” ecachénapa.

24

Ena Jesús máimereucharipa eta táquipaisiravaya eta Templo
(Mr 13.1-2; Lc 21.5-6)

¹ Tacahe, ena Jesús tiúchucapa tayehe eta Templo, tiyanayarepaini. Vítisera víti máimitureana vémeñahavapa eta mayehe. Eta viáramirahi, vímechapa eta táurinaqueneana mari tayehe eta anuquehe peti te Témplosami.

² Émasera ena Jesús tijicapahavipa:

—Tamapurujiyare eta juca táurinava eta pétisami ímahaquenehi puiti. Nutupiruva numetacahe: Járápayare eta sáchezare ticaquipaicasiyare tamutu eta juca Templo. Téjanerepaicainapa tamutu eta juca táurinaqueneanahi ímahaqueneanahi puiti —máichahavipa.

Tatiarihiyare eta ecutiarareanaya te tánehipaicha eta táichecuraya
(Mr 13.3-23; Lc 21.7-24; 17.22-24)

³ Tásiha, viyanapa tayehe eta cerro Olivoqui, víputsicavapa. Te vítecapapa, téjacapa ena Jesús. Tásiha, víti máimitureana viyaserecapa:

—Vívaraha pimetacahavi. ¿Tájamuhupuca eta náimiauquipaisirayare eta Témplosami? ¿Jararihiyarepuca eta ecutiarareyare eta piápechiravayare píteca, étapa eta táitauchirayare eta táequenereruhi mapanereru ena Viya? —víchapa.

⁴ Tásiha, ena Jesús máichahavipa:

—Ecunechavaicha yátupina, machu navayuacahe, taicha nárápayare ena tépiyacavanayarepahi tímivasichavanayare nuyehe.

⁵ Nacaheyarepahi éna: “Nútiripa Cristo”. Nasapiha navayuacayare ena camuriana achaneana.

⁶⁻⁷ Énerichuvare esamairicayare eta táehacairayare eta ichapequeneana avasareana. Ticanarajiricanainapa eta te avasareana tayerehiqueneana, énerichuvare ticauyacarenapa guerraina eyehe éti. Váhisera ecuarameca eta esamairisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecurayare. Énerichuvare tatiarihiyareva eta ichape ecuhamuhuyareva

te avasareana. Tatiarihiyareva eta ichape tayamurisiranyaya eta apaquehe te jácani távihanapahi táetupiaruyare.

⁸ Tamutu eta juca ecutiarareanayare eta táepaniravayare eta nátajivanayare ena achaneana.

⁹ Tásiha, eti nuchaneranahi, ticatianacaheanainapa ena achaneana, táichaveneyare eta éhisiranuhi. Tipanajiricaheanainapa te tamutu avasareana. Ticaratacaheanayareva. Ticapacaheanayareva.

¹⁰ Tásiha, nararihinapa camurianaya ena túnajicavanayare eta náehisiranuhi. Tásiha, ticatianacaheanainapa éti yátupiquene eta éhisiranuya. Tíjararecaheanainapa éti.

¹¹ Natiarihinavarepa nácani tépiyacavanayare mavaneruana ema Tata. Tamutusera eta náimiturapiana náepiyahiraivayarechucha, camurianayare ena navayuaruanayare.

¹² Énaripa ena arajuruana, tétavicavainapa eta namasuapajiraivaya, vaipa napicauchaimahi ema Viya. Camurianayare éna vaipa témunarahianáimahi.

¹³ Étiserá nuchaneranahi, te ecamichahi tamutu, ímivanavahivare eta éhisiranuhi te táitavapa tamutu, nucuchuchaheyare núti.

¹⁴ Énerichuvare, eti nuchanerana ecametarairuyare te tamutu avasareana, taicha nuvaraha náecha namutu ena achaneana. Ímitucavacayarehi eta najacapacarevahi me Tata namutu ena téneuchavanahi, étapa eta apamuriana nimiturapiana. Te ítecapapa te tamutu eta avasareana, nápechavayare nuchava.

¹⁵ Numetacahevaneyare eta apana. Járajapayare eta sache táíñehiqueneyare. Tímerecavaya ema achane váinarajiquene, máechajisihaquenehi ema víyarahaini profeta Daniel. Mavanecayare ena machanerana náechipejisirayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamunuhi ticaravahuanayare eta májurehi ema víyarahaini Daniel.)

¹⁶ Tásiha, te ímahapa eta juca, esamairicapapuca, táuricapa etatajipa eju-navane, éti etiarihiqueneanahi te Judea. Ecaijuheyare eta te cérrona, étaina eyumurusiavaina.

¹⁷ Nácani távihanahi te nayehe canchón te nasamairiricapa eta juca téchacarehi, táuricapa najunavanepa. Vaipa táuricahini nasiapanumahini te napenana, navehahini jácani náeñamaqueneanainihi.

¹⁸ Nácani tachimararuanayare te vamáhi eta téchacarehi, táuricapa vaipa nacuchava tayehe eta avasare, tayanapane náeñamahi eta nayereruvana.

¹⁹ ¡Páureanasami nácani esenana tachimararuanayare, nácani ticajariana-hipuca, nácani esenana ticachichanahi eta amuya tiájicachaha!

²⁰ Eta tacahe, eyaseacayare ema Viya tacuija táichejicahe*; váhivare tacuchimaracahe eta ichape tiquiva te achene te eyanapapuca ejuna.

²¹ Te jena sácheanayare, tétavicavayare eta nacatajivairayarehi ena achaneana. Tájina tácutimahi eta táíñehivayare eta nacatajivairayare, te táepaniravahi eta náitaresirahi ena achaneana te juca apaquehe. Te táequenénapa eta tíñehi, tájinainapa tácutimahi.

²² Nájina tacaitiruimahi eta nacatajivairayarehi ichape. Macaichecavane-yaresera ema Viya eta masemavahi ema maca achane váinarajiquene,

* **24:20** Ema Jesús máechajisihahi eta ticasarahimuhu, tiquivamuhuhivare te jena mávasa Judea. Máechajisihahivare eta nayeherepi ena israelítana eta váhiquene náisapavahini tiyanana típacana te jácani sávarumuhua.

mavarairahi ema Viya macuchucuhavaca ena machanerana manerejiruana, majapanuqueneanahivare. Taicha te vahi macucaicheca ema Viya, máitamurihahipucaini macapapajicavaca namutu ena achaneana ema maca achane.

²³⁻²⁴ Énerichuvare te tánehipaicha eta juca, natiarihinapa ena tivayuarahiana tépiyacavanayare Cristo tímivasichavanainapa núti. Natiarihivare ena tímicutijiricavanayare profetana mavaneruinahini ema Viya. Áninapa nacaheyare: “Yare, éhicayare ema Cristo. Matiarihipahi te juca vitaracu”. Ena apamuriana ánvare nacaheya: “Náepiyahiraivahi éna. Ema Cristo máviahahi te viávasa víti”. Étisera vahi ecusuapavaca. Eta navarairahi tivayucaheanaya eti machanerana ema Tata, náituruequenehayare naicha eta ichapequeneana tíaramicareana ecutiarareanayare. Camurianasamiyare ena navayuaruanayare.

²⁵ Étisera vahi tivayucaheanaimahi taicha numetacahevanehi puiti.

²⁶ Te náichahepuca: “Ímaha máenahi ema Cristo ánaqui te mávapaihapaquehe”, vahi ecuyana. Étaripa te náichahepuca: “Mararhipa jácani tayumurevaquenehi cuarto. Vicarichu viti vímatihi eta máviahahi”, váhiquevare ecusuapavaca.

²⁷ Taicha te yátupinapa eta nítesirayare núti, nucutiyare eta táijahúchirava títecapa eta térameca. Namutuyare ena achaneana te juca apaquehe tinecapanuanayare. Tacaheyare eta nuchavirayare nuti Manerejirunuhi ema Viya.

²⁸ Vahi ecueñamava távihapuca nítecapihaya. Núti nítecapauchaheya te jácani iávihahi éti†.

*Eta machavirayare ema Manerejiruhi ema Viya
(Mr 13.24-27; Lc 21.25-33; 17.26-30, 34-36)*

²⁹ Tacahe, te táitavapa eta juca nacatajivairaya ena achaneana, enévanénapa témahainapa eta sache. Étaripa eta caje, témahainavarepa. Témiricanainapa eta jarairiquiana. Étaripa eta táivihanahi te anuma vímaimahaqueneanahi énerichuvare tiyamuricanainapa, tiyejejecavanainapa.

³⁰ Tásiha, náimahainapa te anuma eta núctiara núti Manerejirunuhi ema Viya. Tíyahanainapa eta napisira namutu ena achaneana távacuanahi eta avasareana te apaquehe. Tásiha, tímahanuanainapa núti. Tiámanuinapaipa eta úcaji eta núcupaisirayare. Tétavicavayare eta nujaravayarepahi, níñehinapaipa.

³¹ Nuvanecaya ema Arcángele, muracayare eta macachujairayapahi, apaesa ena ángeleana nacurujicainapa namutu ena nuchanerana nunerejiruanahi, tiásihanayare te tamutu eta juca apaquehe.

³² Tiuri puiti, nuvaraha nímicutichinahe eta jácani yucuqui. Eta táitsivachiravavacapa eta tapacajiana, te ímahapa eta tajimuyairapa eta tatavaqui, tiúchucayarepa eta tapacajianaya arairu, tímaticarehi tiánehiripa eta únemuhuirayarépa.

³³ Ene tacahehi, te ímahayarepa tacacherapa eta júcana ecutiarareana, ímatiacainapa eta tánehirainapa eta nuchavira.

³⁴ Numetacahevanecha: Vuíchaha títavanimahi ena achaneana náitare-ruanaichaha te táitecapa eta júcana ecutiarareanayare.

† 24:28 Te máechajiruvahi ema Jesús, áni macahehi: “Te jácani máviahahi ema máepenaquene, eta távihayare eta sipuquiana”. Eta juca mayehihi proverbio, tatiaríhi eta tacayemaquenehi tayumurevahi.

³⁵ Títavainapa eta anuma étapa eta apaquehe. Tativayaresera títauchava tamutu eta numetaruheanahi.

³⁶ Eta juca tiáramicareyarechucha. Nájina téchaimahi tájamuhuyarepuca eta tátauchiravayare, énaripa ena ángeleana vahi náechahini. Nútivanerécahi-pucáini néchahini. Macarichu ema Tata, ema téchahi.

³⁷⁻³⁸ Tacutiyaere eta acane eta nájahúchiravahi tépenana ena achaneana machamurianaini ema Noé. Ena nani tinicairihianarinecha, námata-nerinecha térana, tímarerecanahi ena nachichanaveana. Vahi téñamava-náimahi eta náimairahi ema Noé eta masiapirahi tayehe eta ichapequene pacure.

³⁹ Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tíquiva, tacapapajicavacahi namutu éna. Ene nacaheyare ena achaneana te jena sácheyare. Vahi natsecavahini tayehe eta nuchaviraya.

⁴⁰ Te jena sácheanayare, natiarihiyare ena apinana ajairana ticaemata-aneanahi te isaniti, ema émana tiáramicareyare tiára. Ema apana manasinapa.

⁴¹ Tacutiquene, apinanahipuca ena esenana cáemataneanahi tiyuvareca-nahipuca. Énerichuvare esu ésuna tiáramicareya tiára. Esu apana sunasi-napa.

⁴² Eta tacahe, etsecavahi ecauneuchava éti machu vahi ecunecapauchava eta nítésirayarehi nuti Iáquenu.

⁴³ Nuvaraha ácaicutiaraquenéna. Machu ácutiriana mácani achane námeyeruhi ena tíamerahiana. Tájina máechapiavahini tájahapuca hóravayarehi eta náitecapauchiraya te mapena. Te máechapucaini, ticauneuchavaipahini éma, váipasare nacuameyechahini.

⁴⁴ Eta tacahe, éti ecuneuchavayare tamutu sácheana, taicha vahi échahini tájamuhuyarepuca eta nuchavirayare nuti Manerejirunuhi ema Viya, machu iáramecariana.

*Nararihi ena músuana tíuriana. Nararihivare ena músuana máurirahana.
(Lc 12.41-48)*

⁴⁵ Tiuri, nuvaraha nímicutichinaheyare eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apana avasare. Táitusiava ema máquenu matuparacahi ema empleado eta máijarasiraya eta tinicacareana ena aparuriana machamusuvanahi.

⁴⁶ Tétavicava eta máuricacarevaya ema maca ticatuparahahi, te tamutuhi máitauchahi jácani machimampirana ema máquenu.

⁴⁷ Németeaca, eta tamutuirahi tiuri eta machimampirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tíurihi eta máitauravahi.

⁴⁸ Téhesera váhipuca tiuri eta mapanereruana ema mácani empleado, máimijachaichucha tiyereyarehi eta máitecapirayarehi ema máquenu.

⁴⁹ Tásiha, macaetmajiricavacapapuca ena machamusuvanahi. Máichapapuca eta piesta, tinahacavapa téra macachanevacahi ena macutiqueneana téarahiana, téniricapa.

⁵⁰ Tásiha, vaipa manecapauchavahini te títecapapa ema máquenu. Machimaracapa ema empleado eta mamapachichijisiraipa eta máimahaqueneana.

⁵¹ Eta tacahe, ema máquenu macavanairipinapa náestacayare muraca. Tájina najapanuhini, tayanapane máiyahainepuca, macapitiquiahechavainepuca éma. Tásiha, machu ácutihini ema maca empleado máurirahahi, machu ecaquipaicasisami eta te yucu infierno.

25

Emá Jesús máimicutichina ena diésqueneana amaperuana esenachichana

¹ Puiti nuvaraha nímicutichinaheyare nayehe ena tíuchuchanaya ticachanuanayare eta néjasihaya eta návacureya, énapa ena vahi ticachanuanaimahi. Ena nani nacutihi ena diésqueneana esenachichana amaperuana. Ticuchapanahi ena araimanayare, nácapirayare te nasamapa eta náitecapiraya. Tiámauchavavacapaipa eta namichahuana lámparinana.

²⁻⁴ Ena cincoqueneana, téchemarahianahi. Tiámauchavavacapahi eta nabotellana eta aceite natseruvapahi. Ena apamuriana cincoqueneanahivare máchemarairahana mapanererureana. Vahi námauchavapahina eta nahaceiteyarehi. Tásiha, tájinapa naviyahini.

⁵ Tacahe, vahi náitecapavanehini ena araimana. Navarahaipahi tímacana éna. Tavehapa eta ichapu, tímacanapa.

⁶ Tacahe, te enumuhupa yati nasamapa ema tipiaracahi. Ánipa macahe: “¡Nárájapa ena araimanayare! ¡Yare iácapa!” nacahepa.

⁷ Téchepucanapa namutu ena esenachichana. Náetupiricapa eta namichahuana.

⁸ Tásiha, ena cíncoanavare tiájicuvacaipahi eta namichahuana. Tiyaseserecanapa eta aceite. Ánipa nacahe: “Ecatajicahavi ecajihavi eta eyehe aceite, taicha tiájicuvacaipahi eta juca vimícahuana, vémahaequenehaipa” nacahepa.

⁹ Énaserá ena cincoqueneana najicapapa: “Vahi víjaracahémahi machu véchuricaa víti apanava. Vahi várataimahi. Tiúripána eyana evachareca eta ehaceitena” nacahepa.

¹⁰ Tásiha, tiyananapa tivacharepananayarehi eta aceite. Eta nayerevapahi, títecapananecha ena araimanayare. Tisiapanapa te tajuhe te táviahayarehi eta piesta. Náehicapa ena cíncoana natseruvanahi te táviahayarehi eta piesta. Tacahe, ticaeratapa eta tapaja.

¹¹ Te tiyerepa, títecapanapa ena apamuriana esenachichana. Náehahamecapa eta tapaja. Ánipa nacahe: “Tata, tata, pivejjequenehahavi. Vivaraha visiapa” nacahepa.

¹² Émasera ema arayenayare majicapapa: “Eti, ¿nájahahehipuca? Vahi nímatihe. Németeaca vahi étina tavanaranaina eta peti” máichavacapa ema arayenayarehi.

¹³ Tacahe, ema Jesús máichahavipa:

—Éti, vahi ecucuti ena máchemarairahana. Ecutiyaresera ena téchemarahiana. Ecuneuchavaicha éti, machu vahi ecunecapachava eta jácani sácheyare eta nuchavirayare núti Manerejirunuhi ema Víaa.

Emá Jesús máimicutichinavaca ena achaneana ticájaracasianahi eta maplatane ema achane rico

¹⁴ Puiti nuvaraha nímicutichinahe tayehe eta níjarasiraheya eti nuchanerana eta evacurecana taicha eta táurirahi eta ecaemataneasiranuhi. Matiaríhi ema achane rico. Tiyanayarehi te apana avasare. Máichuhavacapa ena mapanana mamusurana. Májaracapa eta maplatane.

¹⁵ Ema achane máimativacahi eta náechemaraivahi ena mamusurana. Ema émana máijaracapa cinco millone. Ema apana máijaracapa apina millone. Ema apana máijaracapa étana millone. Nacaejapacayare eta plata. Tásiha, ema rico tianapa te macaijuheyarehi te apana avasare.

¹⁶ Tacahe, ema tijacapahi eta cinco millone, macaemataneacapa eta plata. Macaejapacapa eta plata. Diez millonepa maicha eta maplatane eta macaejapasirahi.

¹⁷ Ema apana, ema tijacapahi eta apina millone, énerichuvarepa macaejapacapa eta plata. Títucavavare éma eta cuatro millone eta plata.

¹⁸ Émasera ema tijacapahi eta étanaichu millone, vaipa macaejapacahini eta plata. Máecarapa eta plata, mapisirahi eta macaetehahini.

¹⁹ Tiyere eta mapairirisirahi ema náejaharu. Téhesera te tichavapa, mayase-recavacapa eta plata máijararuanahi éma.

²⁰ Tacahe, títapucapa ema tijacapahi eta cinco millone. Máijaracapa ema máquenu eta máiturevahi. Ánipa macahe: “Tata, píti píjaracanuhi cinco millone eta plata. Júcahisera cinco millonevare eta táejapasirahi”.

²¹ Ema máejaharu majicapapa: “Tiuri, nuchicha. Tájina táichava. Tétavicava eta piúriava. Pítauchahi eta picaemataneasirahi eta nuplatane. Puiti vahi támapurujimahi eta piúrivahi tayehe eta juca ánimurichichahi níjararuvihí. Nutuparacavinapa eta camuriquene. Puiti pisiapainapa eta nuyehe. Piúrisamureacaváinapa”.

²² Tásiha, títicapavarepa ema apana ema tijacapahi eta apina millone eta plata. Máichavarepa: “Tata, júcahi eta apina millone eta plata píjararunuhi. Júcahivare eta apinavare millone eta táejapasirahi”.

²³ Ema máejaharu majicapavarepa: “Tiuri, nuchicha. Tétavicava eta piúriava píti apana. Puiti, váhivare támapurujimahi eta piúrivahi tayehe eta juca ánimurichichahi níjararuvihí. Nutuparacavinapa eta camuripanaquene. Puiti pisiapainapa eta nuyehe. Piúrisamureacaváinapa”.

²⁴ Tásiha, títicapavarepa ema tijacapahi eta étana millone. Máichapa ema máejaharu: “Tata, núti nímativihí eta pimajapanuraivahí. Piverejicanuyarehi eta táejapasirayarehi eta piplatane. Pítahacanuyarehiva eta nématanevachahi.

²⁵ Eta nupisirahi nácaetehahini eta piplatane, nécarapa. Puiti, júcahi nímiclava tamutu eta piplatane”.

²⁶ Ema máejaharu majicapapa: “Tétavicava eta pisunsuva, píti plújutataji. Te pímatinuhípuca eta numajapanuraivahí, nítharahí eta apaematanevacha, téhevere pímiyajahí nuverejicaviyare eta táejapasirayarehi eta níjararuvihí nuplatane;

²⁷ váhiyapa pinacapai te banco eta nuplatane. Puiti váequeneipahini puiti eta táejahacarípahini eta nuchaviraipahí”.

²⁸ Tásiha, máichavacapa ena apamuriana mamusurana natiarihique-aneanahi: “Everejica ema mácatataji eta plata. Íjaraca ema ticayehéhi eta diez millone.

²⁹ Taicha, mácani máiturrequenehahi eta macaemataneasirava, tatuparacahi eta nímicatasiraya. Ticayehéyare camuripana. Énasera nácani vahi náiturrequenehahini eta nacaemataneasirava, ticaverejicasianayarehi eta nájaracasianahi.

³⁰ Émechareca muraca ema maca musu máurirahataataji. Vahi ecujapanu,

tayanapane máiyahainepuca, macapitiquiahechavainepuca. Tásiha, íáquijica eta te cuarto tamapicujuhequenepanahi” macahepa ema achane rico.

Ena achaneana, te jena sáchezare ticayaserehianainapa, étapa tiámavacaya eta náitátirahi ena apamuriana, ticaevatanainapa tayehe eta návihayare

31-33 Te nuchava nuti Manerejirunuhi ema Viya, néjacainapa eta te nuyehe trono tacapicahuquene, Réynuina. Tásiha, névatacaya ena nuyeheana ángeleana nacurujicavacaya te numirahu namutu ena achaneana te avasareana. Tásiha, núti nunerejicavacainapa ena yátupiqueneanahi nuchanerana. Nunacainapa te nuvaure. Tásiha, ena vahi nuchanerainahini nunacainapa te sapa.

34 Tásiha, nuti Rey ánipa níchayare ena nuchanerana tiávihanayarehi te nuvaure: “Yare, eti iúricacareanahi manerejiruanahi ema Tata. Nijaracahénapa eta etuparahayare, ícuchihi mayehe ema Tata acane te tépanavainapa eta apaquehe.

35 Taicha te ímahanuhi eta nécuavahi, éti énicanuhi. Numaunepahi, éti íjaracanuhi néra eta une. Tájina nítecapihahini te nupaisihapahi, éti íjaracanuhi eta nítecapihayare.

36 Tájina numuirihainapahini, éti emuriachanuhi. Nucajumahi, éti ípuchapananuhi. Nucaeratahi te cárcel, éti ejirapananuhivare”.

37 Tásiha, ena níchuhaqueneanahi tíjicapanuanainapa: “Tata, ¿tájamuhu vímahavihi pécuahapahi, tásiha vénicavipa? ¿Tájamuhuvare vímahavihi pímaunepahi, tásiha víti véshavipa eta une?”

38 ¿Tájamuhuvare vímahavihi te pipaisirana tájina pítecapihahini, tásiha, víti víjaracavipa eta pítecapihahi? Váhivare vímahavihini mamuriarevinahini, tásiha víti vimuriachavipa.

39 ¿Tájamuhuvarehipuca picajumahi, tásiha víti vípuchapanavipa? ¿Tájamuhuvarehipuca picaeratahi, tásiha víti véjirapanavipa?” náichanupa.

40 Tásiha, nuti Rey nujicapainavarepa: “Nutupiruva numetacahe: Nútira íjaracanuhi tamutu eta ejapanuraivahi, ímicatasiravacahi ena echamuriana nuchaneranhivare, ena nani namaesachaqueneanahi najacpahini ena apamuriana ena achaneana” níchavacapa.

41 Tásiha, ena tiávihanahi te sapa, níchavacainapa: “Étiserá évuishi te numirahu, eti masuapajirairahana ecaviurevanahi. Eyana tayehe eta yucu, acanevacahéna eta ecaicuñaira eta emuruiraya, máicuchihi ema íáquenuhi ema Váinaraji énapa ena majupahana ángeleanainihi.

42 Taicha te nécuahapahi, éti vahi íjaracanuhini eta nunica. Numaunepahi, váhivare éshichanuhini une.

43 Étaripa te nupaisiranapahi, váhivare íjaracanuhini eta nítecapihahini. Néchurihavare eta numuiriha, váhivare íjaracanuhini numuirihainahini. Nucajumahivare, nucaeratavare, váhivare éjirapananuhini” níchavacainapa éna.

44 Tacahe, éna náichanupa: “Tátachicha, ¿tájamuhu vímahavihi pécuahapahi, pímaunepahi, pipairiricahapahi, mamuriarevivihi, picajumapahi, picaeratahi, eta jácani vimáimicatasirávihipuca?”

45 Nuti Rey nujicapainavarepa: “Nutupiruva numetacahe: Éti, vahi ejapanunuhini, taicha vahi ájapanuvacahini apaesainahini ena nani nuchanerana emaesachaqueneanahi”.

46 Emutu éti eyanayare tayehe eta ecaicuñaiyayare máitavacayare. Énaserá ena nunerejiruana, matapiravareanahi. Ná mavacainapa tayehe eta táurivayare eta náitaresira, máitavacayareva.

26

*Napanerechaipahi ena tuparairucana eta nacaratásirayare ema Jesús
(Mr 14.1-2; Lc 22.1-2; Jn 11.45-53)*

1 Te títapiricapa eta juca máimiturapianahi, máichahavipa viti máimitureana:

2 —Écharichuhi éti eta apinarine sache eta Pascuáiraya. Tásiha, núti Manerejirunuhi ema Viya, ticaratacanuanainapa témetatarecanuanainapa —máichahavipa.

3 Tiuri, ena tuparairucana énapa ena aquenucarahana, énapa ena escribánoana ticurujicacanaripahi te tajuhe eta mayehe palacio ema Caifás, ema corregidor.

4 Tacahe, náechajisihaiipahi eta nacaratásirayare ema Jesús. Navaraha éna navayuacayarehi eta nacaratásirayare, nacapasirayarehi.

5 Tipicacavanarichuchasera. Ánipa nacahehi eta náechajiriruvahi:

—Vuíchaha vicucarataca éma achichu juca piéstairaya. Taicha camuriana-yarehi ena achaneana, machu tájahapuca náicharacahavi taicha navaraha-yarehi nacatiucha éma. Vicuchapasera nayana —nacahepa.

*Esu esena tíamasichahi ema Jesús te táijiyequene perfume
(Mr 14.3-9; Jn 12.1-8)*

6 Tacahe, ema Jesús, tiyanapa tichava eta te avasarechicha Betania. Náichuhasivahi eta manisiráya te mapena ema achane ticaijare Simón ema leprosoinihi.

7 Tacahe, eta manisiráhi, sucahepaipahi esu ésuna esena. Suámapahi eta perfume te bótechicha. Táetaviuchahi eta tasivachavahi. Supauchapa éma. Sujucusicapa te machuti eta táetaviurehi eta táijiyeva.

8 Eta náimairahi ena nuchamuriana máimitureana ema Jesús, váiparinehi náuricahini eta suémepuresirahi eta tasivachaquene perfume sujucusi-sirahi ema Jesús. Ánipa nacahehi:

—¿Tájaha tacayema suémepureca eta juca tasivachaquenehi perfume?

9 Tiúripanahipucani víjararecahini eta juca táijiyeamaquenehi. Vivehahini eta camuriquene plata; tásiha, vímicatásihahini ena páureana —nacahepa.

10 Émasera ema Jesús máimatihí eta napanereruana. Tacahe, máichahavipa: Ésamirica esu suca esena. Tétavicavahi eta táuriva eta suíchiranuhi.

11 Ena páureanasami, tamutuchucha sácheana eta ecachaneravacayare éna. Ímicatacayarehi te jácani eaimahaquenérana. Nútisera vahi nánasiquenémahi eta eyehe.

12 Eta juca sujucuisiranuhi eta perfume, sucainapucahi ésu eta suíjiye-chirahi eta náquehe tayeheyarehi eta nucaecarasirayare.

13 Nutupiruva numetacahe: Nácani ticametarairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

*Eta máijararesirahi ema Júlasí ema Jesús
(Mr 14.10-11; Lc 22.3-6)*

¹⁴ Ema Júlasí, émarichu vichamurinihi éma vidocenénihí apóstole mayehe emá Jesús. Tiyanapa téchajiripanavahi nayehe ena tuparairucana.

¹⁵ Ánipa máichavacahí:

—Te yátupihipuca evarahahi ecarataca emá Jesús, núti nímechaheyare. Nucamunuhisera néchayare ¿áyanayarepuca eta evachachanuyare eta nímechiraheyare eta mávirare? —máichavacapa.

Tacahe, éna nájaracapa eta treinta reale.

¹⁶ Jéhevarepasera emá Júlasí matanucaipa eta máicharacayarehi eta májjararesirayarehi emá Jesús.

*Emá Jesús máenimurihapa ena máimitureana
(Mr 14.12-25; Lc 22.7-23; Jn 13.21-30)*

¹⁷ Tacahe, títécápapa eta piesta Pascua, étaripa eta títapuca sache eta semana vinicahí eta pan mayehere levadura. Vítí máimitureana viyaserecapa emá Jesús:

—¿Távihipuca pivarahahi vácaijuhe eta vétupirisivahini eta vinisirayare eta uvesachicha eta viyeherepi? —nacahepa.

¹⁸ Éma tivanecahavípa:

—Eyana tayehe eta Jerusalén, te mapena emá nímaticasare. Aní íchayare: “Emá maestro tivanecahavíhi eta piyehe. Aní macahehi: Tíánehípa eta nítavirayare eta nématanehi. Te pípena eta nunisíhayare eta uvesachicha eta viyeherepi, nénisíhayare ena nímitureana” íchayare.

¹⁹ Tacahe, tiyananapa ena máimitureana. Étaipaichuhi náichahí eta máimiturapianahí. Tinahacavanapa náetupiricahí eta naniruyare tayehe eta Pascua.

²⁰ Tacahe, te jena yátiquenehi emá Jesús, ténicahavípa víti dócequeneana máimitureana.

²¹ Te vinicaripahí, máichahavípa éma:

—Jéhesareinehi, te etaracu éti, mararihi emá émana tíjararecanuyare —máichahavípa.

²² Tacahe, víti ichaperinehi eta máimipaneresirahavíhi eta juca máichirahavíhi. Vimutu viyaserecapa éma:

—Nútichupuca, Tata, jácaní? —víchavacapahí víti éma.

²³ Tásiha, éma máichahavípa:

—Mácaní néniruyare eta pan néchipaejiruhi te juca nuplatura, émara emá tíjararecanuyare.

²⁴ Tacahe, núti Manerejirunuhi emá Viya, étaipaichuhi eta nacapasiranuyarehi, táitauchiravayarehi eta nuyehe eta táechajiriruvahí eta Sagrada Escritura. ¡Páuresamisera emá tíjararecanuyare! Tíuripanaichuhipucaní vahí macuchuahini te sujuhe esu maena —máichahavípa.

²⁵ Tacahe, téchajicapa emá Júlasí:

—Maestro, ¿nútipuca jácaní níjararecaviyare?

Tásiha, emá Jesús majicapapa:

—Pítisamí —máichapa.

Emá Jesús tímechahaví eta macaejasiraya eta matratune arairu mayehe emá Maíya

(1 Co 11.23-26)

²⁶ Tásiha, eta vinisirahí, mavehapa eta pan emá Jesús. Mahasulupayachapa emá Viya. Mayuvetucapa, tíjaracahavivacapa víti máimitureana. Tásiha, máichahavípa:

—Eta juca neche. Enica —macahepa.

²⁷ Tacahe, mavehavarepa eta vasu vérirare, mahasulupayachavarepa ema Viya. Tásiha, tíjaracahavivare. Máichahavipa:

—Era eta juca ámutu éti.

²⁸ Taicha eta juca eta nítine, táepusiruvayare eta nucaepahairayare eta epecaturana emutu eti achaneana, esimutuqueneyarehi. Étarichuvare táicutiarayare eta nufirmachirayare eta arairu matratune ema Vicaiyaquene, nucaejasirayava eta matratune apaesa ámutu ejacapacare mayehe.

²⁹ Nutupiruva numetacahe: Vaipa nápechavaimahi nérahivaréni eta juca tachi eta uva. Tiámainucava te táitauchavapa eta nusiapiraya eta nucavacuréraya, nucajupahairaya ema Tata Nucaiyaquene. Te jena sache, níjara-caheya vérainapa eta aramaruama. Vicajupahainapa ema Tata.

*Ena Jesús máimereucha ema Pedro tépiyacavayare vahi máimati ema Jesús
(Mr 14.26-31; Lc 22.31-34; Jn 13.36-38)*

³⁰ Tásiha, eta vítanesisrapa, vijirapa eta jirasare eta vihasulupayachirahi ema Viya. Te vítapiricapa, viyanapa vicaijuhe eta te huerta Getsemaní távihahi eta táemiripaisinehi eta cerro ticaijare Olivoquiji.

³¹ Eta vipaisirapahi, ema Jesús máichahavipa:

—Puiti juca yati ejunijicanuyare emutu éti. Ejunaracayare. Tásiha, títauchavayarehi eta máechajiriruvahi ema Tata eta te Sagrada Escritura: “Nísapayare nacarataca ema Pastor, nacapasirasamiyare. Tásiha, tijunarcanaanapa eta uvésana macurujiruanainihi” macahepa.

³² Téhesera te néchepucapa te nécari, nínapucainapa te Galilea. Ánaqui nucuchapiaheyare éti —máichahavipa ema Jesús.

³³ Tásiha, ema Pedro majicapapa:

—Tayanapanepuca, Tata, najunaracapuca ena apamuriana, nútisera vahi nujunaimahi —máichapa.

³⁴ Ema Jesús máichavarepa:

—Nutupiruva numetacavi piti Pedrosami: Puiti juca yati, te tamirahuina-paichaha eta táechajisirayare eta varayu, mapahe eta pépiyasiravayare vahi pímatinu —máichapa.

³⁵ Ema Pedro macahevarepa:

—Tayanapanepuca pímicapacanu, váhiquenesera népiyacavaimahi vahi nucuimativihini, váhivare nínajiacavimahi —máichapa.

Viti apamuriana étarichuvare tacahehi eta véchajiriruvahi.

*Ena Jesús tiyujaraca te Getsemaní
(Mr 14.32-42; Lc 22.39-46)*

³⁶ Te vítecapapa víti tayehe eta huerta Getsemaní, máichahavipa ema Jesús:

—Éjacachaha eta ani te juca. Ecu Chapmanuchaha. Núti nuyanayare ánaquiipana, nuyujaracayare —macahepa.

³⁷ Mapananaichu ena mámaqueneanahi: ema Pedro, ema Juan émapa ema Jacobo. Ema Jesús, ichape eta máeñamiravahi te masamure, ticatisamurevapa.

³⁸ Tásiha, máichavacapa:

—Tétavacava eta táeñamirava muraca eta nusamure. Tavaraha ticapacanu. Áchéhachaha ani te juca. Váhisera ecuimaca. Ecauneuchanuhi —máichavacapa.

39 Tásiha, tipaipanapa ánaquipanachíhahi. Tiáquipaicavapa máetipaisinapa, macaitcapa eta mamira te apaquehe. Eta mayujarasirahi, ánipa macahe:

—Tátachicha Nucaiyaquene, picatajicanupaini. Váhini tacuitauchavaini eta níchavaquenevayare. Váhini picuisapaini eta nucatajivairaya. Níjaracavatera núti eta nítauchiraya eta pívarahaquenehi píti —macahepa.

40 Tásiha, téchepucapa. Tichavapa eta te návihahi ena mapanaqueneana máimitureana. Máimaharinehi éna, tímacanaripa. Macajamicapa ema Pedro. Tásiha, máichapa:

—Váiparinehi ímicatcanuhini ejaneacavahini étanainahipucaini hora ácahehíni.

41 Ejamiuchava. Eyujarauchava apaesaina. Eyaseaca ema Viya eta étumevaina apaesa vahi macuiturucahe ema Satanás. Yátupihinéni eta iáchanevana taratahahi ticaratacava. Étatera eta éche máteji, vahi taratahaimahi ticaratacava —máichapa.

42 Tásiha, tiápechavavarepa tiyanavarepa ema Jesús. Apihepa eta mayujarasirahi. Ánipa macahe:

—Tátachicha Nucaiyaquene, váhini tacuitauchavaini eta níchavaquenevayare. Tásihasera, níjaracava núti eta nítauchiraya eta pívarahaquenehi puiti. Nísapava nacapacanu —macahepa.

43 Tásiha, tichavavare eta viyehe víti máimitureana. Tímahahavipa víti vímamurihaipa taicha taveharipa eta ichapu eta víuquihana.

44 Tacahe, mapahequenepa tichavapa tiyujarapana. Étarichuhi eta máechajiriruvanahi.

45 Te tichavapa, téchajicahavipa:

—¿Iápechavapa ímaca? ¿Vuíchahapuca enaracahini? Jéhesare, puiti títecapapa eta nutuparahahi nacaratasiranuyare ena ticatianacanuana.

46 Ávane ema tíjararecanuyare. Échepuca. Viyana víacavaca —máichahavipa.

Nacaratacapa ema Jesús

(Mr 14.43-50; Lc 22.47-53; Jn 18.2-11)

47 Téchajiricavaichaha ema Jesús, macahepainecha ema Júlasí, ema vichamurinihi. Mámamurihapaipahi ena camuriqueneana achaneana suntaruana. Ticaepuchiriquianapaipahi, étapa eta nayeheana espada. Éna, vanairucanahi nayehe ena aquenucarohana.

48 Ema Júlasí, tatiarihíhi eta máicutiarayarehi eta náimatirayarehi ena suntaruana ema Jesús. Ani macahehi eta máechajiriruvahi ema Júlasí: —Ecnunuyare. Ema nétserareruyare, éma ecaratácaya —macahepa.

49 Tacahe, ema Júlasí témeñahavapa mayehe ema Jesús. Máichapa:

—Yátiheipa, tata Maestro —máichapa.

50 Tásiha, máetserarecapa. Ema Jesús majicapapa:

—Píti nímiturevíhi, ¿tájaha tímitecavi? —máichapa.

Tásiha, ena suntaruana enevanepa nacaratacahi, napresuchapa.

51 Ema émana vichamuri mavehapa eta mayehe espada. Mayuchatipaisinapa eta machaca ema mamusura ema aquenuca Caifás.

52 Tásihasera ema Jesús macatiuchaichucha. Ánipa macahe:

—Pínaca te tatumaramuhi eta piyehe espada. Taicha namutu nácani ticaparecanahi tayehe eta espada, énerichuvare nacaheyare, espada eta ticapacayare.

⁵³ Váhipuca pecha te návarahahini núti nuyaseacahini ema Tata, puítinai-chuhini macucupaicahini ena 80,000queneana ángeleana.

⁵⁴ Váhiserá nuvaraha nuyaseaca. Tatuparacahi títachavayarehi eta táechajiriruvanahi eta Sagrada Escritura eta níchavaquenevayarehi —tásiha, máichavacapa ena suntaruana—.

⁵⁵ ¿Tájaha tacayema ecasiña eta espada, ecaepuchiriquipaipahivare eta ecaratasiranuyare, tímicutijiricavapa námerahihini? Étayapasica cape juca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacanuhini.

⁵⁶ Títachavahiserá tamutu eta juca taicha tacahehi eta náechajiriruvahi ena profetanaini, tayehe eta Escritura táechajisihairanuhi —macahepa.

Tacahe, viti máimitureana vimutu vijunaracapa, vinaquicapa ema Jesús.

*Nacatupihapa ema Jesús te namirahu ena tuparairucana
(Mr 14.53-65; Lc 22.54-55, 63-71; Jn 18.12-14, 19-24)*

⁵⁷ Ena ticaratacanahi ema Jesús námapa te mamirahu ema Caifás, ema corregidorhi te jena áño. Natiarihivare ena escribánoana énapa ena aquenucarahana.

⁵⁸ Ema Pedro, máehiequenehapahi, mayerehipahiserá. Te náimisiapapa, tisiapavarepa éma te tajuhe eta canchón mayehe ema Caifás. Téjacaipahi macachanevacaipahi ena suntaruana, mavarairahi máimahayarehi tájahapuca eta náicharacayarehi ema Jesús.

⁵⁹ Tacahe, ena tuparairucana énapa ena aquenucarahana natanucaipahi ena tépiyaequenehanayarehi ema Jesús, navarairahi tatiarihiyarehi eta tiviuchayarehi eta máepenirayare.

⁶⁰ Váhiserá náichimavahini, camurianahinéni ena tépiyaequenehanahi. Tisiapananechasera ena apinana tépiyaequenehanayarehi.

⁶¹ Ánipa nacahe:

—Ema maca achane visamáhi viti eta mavarairahi máquipaica eta Templo mayehe ema Viya tacapicahuquenehi. Tásiha, máimichavayarehiji macahepuca te mapanaquenenaji sache —nacahepa.

⁶² Tacahe, ema corregidor téchepurucainehi. Mayaserecapa ema Jesús. Ánipa maicha:

—¿Tájaha tacayema vahi pijicapavaca ena nani eta pépiyaequenehi? ¿Yátupipuca eta nacayemaquenehi? Taicha vímahavi vahi picatiuchavahini —máichapa.

⁶³ Émasera ema Jesús vahi majicapavacahini. Tásiha, mápechavare mayasereca ema corregidor:

—Pímaha puiti, nuyaserecaviyare. Vahi nuvaraha pépiyahirahi. Némechavi máimahavihi ema Viya. Pátupiruva pimetacahavi te yátupihipuca pítiquenehi Cristo, Machichaquenevahi ema Viya —máichapa.

⁶⁴ Tacahe ema Jesús majicapapa:

—Yátupi núti Cristonuhi. Nuti Manerejirunuhi ema Viya. Tásiha, numeta-caheyare eta apana. Járápaya eta sácheyare ímahanuyare eta néjasirayare te mavaure ema Viya máitupajijiáruvaquenehi. Ímahanuyareva núti eta núcupaisirayareva násihairayare te anuma, támiranuyarepahi eta úcaji —macahepa.

⁶⁵ Tacahe, ema corregidor eta masamirahi, tise-marinehi ichape. Tivetsa-yujiacavapa eta mamuiraha eta masemanevahi. Tásiha, macahepa:

—¡Téjavicavaipa eta maviurevahi ema maca taicha macaecahihi ema Viya!
¡Puiti émaquenepa visama éma tépiyacavahi Machicha ema Viya! ¡Váipa
tácamesa vitanucahini ena testígoanainahini! ¡Puiti esamaripa éti eta juca
macayemaquenehi!

⁶⁶ ¿Tájaha vícharacayare puiti ema maca? —macahepa.

Tásiha, najicapapa éna:

—¡Ticaviurevapa! ¡Étaina táimicapaca! —nacahepa.

⁶⁷ Tacahe, náehavacapa ema Jesús. Nátutuquichapa. Náehamirahavare.

⁶⁸ Tásiha, náichapa:

—Vímahasejicacha, te yátupihipuca pítihi Cristo. Te pijarauquipuca, pímati-
haviyare nájahahipuca ema téhamirahavíhi —nacahepa.

Éma Pedro tépiyacavapa vahi máimati ema Jesús

(Mr 14.66-72; Lc 22.56-62; Jn 18.15-18, 25-27)

⁶⁹ Tiuri, ema Pedro, matiaríhichahahi eta te canchón. Téjacaipahi
tíasacavahi. Tacahe, sucahepaipahi esu mavanara ema corregidor. Suímahapa
éna. Tásiha, suíchapa:

—Németeaca pítirichu ñímiture eñi Jesús eñi ticavasahi te Galilea —suíchapa.

⁷⁰ Émasera majicapapa:

—Vahi nímati ema péchajisihaquenehi. ¿Távihapuca pímatinenuhi píti? —
máichapa.

⁷¹ Tásiha, mavarahapa tiúchucavaneyarehini. Suímahavare esu apana va-
naraca. Suíchavacapa éna natiaríhiqueneanahi:

—Eñi ñica achane éñirichu ñichamuri eñi Jesús Nazareno. Nímahahi ñicacha-
nepahi —suíchavacapa.

⁷² Tiápechavavarepa ema Pedro téchajica, ánipa macahe:

—Nujuracha te emirahu. Váhiquene nímati ema píchaquenehi —macahepa.

⁷³ Te tiyererehachichavarepa, náimahavarepa ena apamuriana.
Náichavarepa:

—Yátupiquene pítirichu machamuri ema maena Jesús, taicha eta péchajisira
éta tímereuchavíhi —náichapa.

⁷⁴ Tásiha, macahevarepa:

—Máicuñacanuine ema Viya te vahi nucucahe yátupina. Váhiquenesera
nímati ema achane échajisihaquenehi —macahepa.

Tásiha, enurujipa téchajicanecha eta varayu.

⁷⁵ Te masamapa eta varayu, enevanepa máechahi ema Pedro eta máichirahi
ema Jesús: “Te tamirahuinapaichaha eta táechajisirayare eta varayu, píti
mapaheyare eta pépiyacavayare vahi pímatinu”. Tásiha, tiúchucavanepa ema
Pedro. Tíyahavanepa taicha máimativanepa eta táichapevahi eta májecapi-
ravahi.

27

Námapa ema Jesús te mamirahu ema Pilato

(Mr 15.1; Lc 23.1-2; Jn 18.28-32)

¹ Te tijarahipa, tiúrújavananapa namutuyaréni ena tuparairucana énapa
ena aquenucarahana. Ticaechacasipa eta náimicapasirayarehi ema Jesús.

² Nacuchucapa ticaitihapaipa eta námirapahi te mamirahu ema Poncio
Pilato, ema aquenucahi prefectohiquene.

Éta macapasiravahi ema Júlasi

³Tacahe, ema Júlasí eta máimairahi eta táichapevahi eta macatajivairahi ema Jesús étapa eta nacapasirayarehi, ichaperinehi ticatisamurevahi taicha eta májecapiravarihi. Tiyanapa máimichavapanahi eta treinta reale eta plata mavachahi nayehe éna.

⁴Tásiha, máichavacapa:

—Néjecapavahi ichape eta níjararesirahi ema maca achane matapirava-requene. Nuvaraha númichavaya eta nuvachainihi —máichavacapa éna.

Énasea najicapapa:

—Jéhepuca, vahi vecha víti. Péchaquenevaichuhi píti —náichapa.

⁵Émasera ema Júlasí máquijimirauchavacapa eta te tajuhe eta Templo návihahi éna. Tásiha, tiúchucapa. Tiyanapa. Táichavenehi eta macatisamurevairahi, tichumucavapa.

⁶Ena tuparairucana navehapa eta plata. Tásiha, nacahepa:

—Vahi táuricahini víyaracuhahini eta juca plata tayehe eta caja vinaquisi-rareva taicha mavachaequeneya eta máepenirayarehi ema maca achane —nacahepa.

⁷Tásiha, eta plata máimichavaquenehi ema Júlasí, napanerechaipa eta navacharesirayarehi eta apaquehe nacaecarasirareyare ena apavasanana. Eta juca apaquehe naseresirarehi ena típuarecarahiana eta yupí.

⁸Puiti éta ticajarehi “Apaquehe máitinevacha ema Jesús”.

⁹⁻¹⁰Tacahehi eta táitauchiravahi eta májurehi ema víyara profetaini Jeremías. Ani tacahehi: “Navehapa eta treinta reale eta plata. Ena tuparairucana navacharecapa eta apaquehe nayehe ena típuarecarahiana. Tacahe eta juca mametasiranuhi ema Víya eta náichirayarehi eta juca” macahepa ema víyarahaini Jeremías.

*Ena Pilato mayaserecapa ema Jesús
(Mr 15.2-5; Lc 23.3-5; Jn 18.33-38)*

¹¹Ena Jesús ticayaserehipa te mamirahu ema aquenucahi Pilato. Ánipa macahe eta mayaseresirahi:

—¿Jéhesareji réyvihí píti nayehe ena pijaneanana israelítana? —máichapa.

Ena Jesús majicapapa:

—Pitupiruvahi eta juca piyaseresiranuhi. Yátupihí eta nurreyvahi —máichapa.

¹²Tásihasera, te nametauchaipa ena tuparairucana, vahi majicapavacahini ema Jesús.

¹³Tacahe, ema Pilato máichapa:

—¿Vahí péchajuchava eta juca nametauchiravihí? Camurihi eta piviuerevana eta nayehe —máichapa.

¹⁴Émasera ema Jesús váhiquene majicapahini. Tásiha, ema Pilato maramipa eta mamajicapirahi. Váipa máitucarehini.

*Ena Pilato macavanairipipa eta náetatasiraya ema Jesús
(Mr 15.6-15; Lc 23.13-25; Jn 18.38-19.16)*

¹⁵Tiuri puiti, tatiarihi eta mayeherepi ema Pilato, te Páscuamuhua, macaiticayarehi ema émana preso, mácani nayasearuyarehi ena achaneana.

¹⁶Tiuri, matiarihi ema achane ticajare Barrabás, ichape eta maviurevahi.

¹⁷Eta náurujisiravahi ena achaneana, mayaserecavacapa ema Pilato:

—¿Nájahapuca ema eyasesereruyare ema nucaitiruya? ¿Émapuca ema Barrabás, téhesera émapuca evaraha nucaítica ema Jesús, ema ticaijare Cristo —máichavacapa.

18 (Taicha máimaticaripahi eta nametauchahi ema Jesús ena tuparairucana taicha nacapinaruhi éma.)

19 Eta máejasirahi ema Pilato tayehe eta mávacure, suímimeta-recapa esu mayena: “Vahi picuimisiapava ñiyehe eñi ñira achane matapiravare taicha yañi tametasiranuhi eta nuvapure eta ñíchararacavayare éñi” sucahepa.

20 Énasera ena tuparairucana énapa ena aquenucarahana náimitumurihapa ena achaneana nayaseserecahi ema Barrabás, émainahini máuchucuha. Tásiha, nayaseserecapa máepenahini ema Jesús.

21 Máechajimurihavarepa ema Pilato, mayaserecavacapa:

—¿Nájahasica ema evarahaquenehi nucaítica? —nacahepa.

Éna najicapapa:

—¡Émaina máuchucuha ema Barrabás! —nacahepa.

22 Ema Pilato mayaserecavarepa:

—¿Tájahasica nícharacaini ema Jesús ticaijare Cristo?

Éna najicapapa:

—¡Pémetatareca te crusu! —nacahepa.

23 Ema Pilato máichavacavarepa:

—¿Tájaha tacayemahi eyaseacahi eta németatasiraya ema maca? ¿Tájahasica eta maviurevahi? —máichavacapa.

Énasera tipiararemurihanavare muracapana:

—¡Pémetatareca te crusu! —nacahepa.

24 Tacahe, máimahapa ema Pilato eta vahi máiturucachini macatiuchahini, taicha ena achaneana tivayuchavapaichucha eta nasemanevanahi. Tacahe, máemepanapa eta une, ticasipavahupa te namirahu ena achaneana. Tásiha, máichavacapa:

—Nuvaraha nímerecava te emirahu vahi nútiparacaina eta máepeniraya ema maca achane matapiravarehi. Éti échinavayarehi —máichavacapa.

25 Tásiha, najicapapa namutu ena achaneana:

—Vítinarine vicitapirava, énapa ena vichichanaveana. Vítinarine taehe eta máepeniraya ema maca achane —nacahepa.

26 Tacahe, ema Pilato macavanairipipa nacaitica ema Barrabás. Tásiha, macavanairipipa náestaca ema Jesús; tásiha náetatacayarevare te crusu.

Nacavayumarajipa ena suntaruana ema Jesús

(Mr 15.16-20; Jn 19.1-3)

27 Tásiha, ena suntaruana námapa ema Jesús tayehe eta náestasihayarehi te távirarehi eta guardia. Nachayacapa ena camuriqueneana suntaruana námurivana.

28 Navejamuhiacapa eta mamuiriha. Namuriachapa eta muíriare títsime.

29 Náítsamemacapa eta itapepi eta majarapiyarehi náicha. Nanacavarepa te machuti. Náimicaratacavarepa eta curina te mavahu vaure, matsucurúpayarehiji. Eta nacavayumarajirahi, náepuyumirauchapajicacha. Ánipa nacahe:

—Tata, ¡pítitataji nayehevihíji Rey ena israelítana! —náichapa.

30 Tásiha, nátutuquichapa. Náetetuvauchapa eta matsucurupahi, náepuchisicapa tayehe.

³¹ Te tamutupa eta nacaecahijirisirahi, navejamuhiacavarepa eta mamuiriha títisme. Namuiriachapa eta mamuirihaichu. Tásiha, námapa tayehe eta macaetataiyarehi.

*Náetatacapa ema Jesús te crusu
(Mr 15.21-32; Lc 23.26-43; Jn 19.17-27)*

³² Eta napaisirapahi te calle, nácapajicapa ema achane ticaijare Simón ticavasahi te Cirene. Napamicapa éma manaracuha eta macurusura ema Jesús.

³³ Tacahe, nacaitecapapa tayehe eta masihi nacaetatairare ticaijare Gólgota.

³⁴ Ánaquipa náesichinehi ema Jesús eta vino tisucareama ticasiriqúama eta ipuruji. Te masamaecapa ema Jesús, vaipa mávarahahini máerahini.

³⁵ Te náitauchapa eta náetatasirahi ema Jesús, ena suntaruana nasuerte-hachapa eta mamuiriha eta náijarajirisiracacahi. Tacahehi eta táitauchi-ravahi eta májurehi ema víyarahaini profetaini David. Ánipa tacahe: “Tíjarajiricanapana eta numuirihaini. Nasuertehachapa eta náijarasiricacairahi”.

³⁶ Tásiha, najaneacapa ema Jesús ena suntaruana.

³⁷ Te tápusi eta macurusura, tatiarihíhi eta ajureca táechajisihahi eta tivíuchahi. Ani tacahehi eta ajureca: “Ema Jesús, Rey nayehe ena israelítana”.

³⁸ Natarihíhivare ena apinana tíámerahiana. Ticaetatanahivare te machacaya, ema émana te mavaure, ema apana te masapa.

³⁹ Tásiha, ena tíánucumirauchanapahi, tépiupiusicavanapaipa eta nacaecahirapaipahi éma.

⁴⁰ Ánipa nacahe:

—¡Pítitataji! Pícahechajiriruvahi eta piáquipaisirayarehíji eta Templo, píratahahivaréji pímicahava picatupíha eta arairu Templo te mapanayarerichuhíji sache. Puiti vivaraha vímaha eta pítipajijiasiravahi, te yátupípuca Machichavi ema Viya. Piúcupaica te jara crusu. ¡Picatiuchava pítipivaina! — náichapa.

⁴¹ Énerichuvare ena tuparairucana nacaecahijiricavare, énapa ena escribánoana énapa ena fariséoana, énapa ena apamuriana aquenucarahana. Náichajiricapa:

⁴² —Ema mácacacha, macahehi eta máechajiriruvahi eta marátahairahíji macatiuchavaca ena apamuriana achaneana. Tásiha, puiti váhivare marátahahini émajivainahíni macatiuchavahini eta te jara mávihahi. Te yátupinahíni Réyinaíni víyehe viti israelítana, macatiuchavaipahini, ¿masi? Mácupaicari-pahini te jara crusu, ¿masi? Visuapasarepaini eta vímairainahini.

⁴³ Téhevare te yátupíhipuca ticasíñavahi me Viya, vivaraha vímaha macuchucua éma puítinaríchu, te yátupíhipuca máemunacahi éma. Taicha macahehi eta máechajiriruvahi eta machichairahi ema Viya —nacahepa.

⁴⁴ Ena tíámerahiana ticaetatanahivare te machacaya, énerichuvare nacaecahivare éna apanavare.

*Eta máepenirahi ema Jesús
(Mr 15.33-41; Lc 23.44-49; Jn 19.28-30)*

⁴⁵ Tacahe, te las dócequenepa, témahapa eta sache. Timapícupa tamutu eta apaquehe. Mapana hora eta tamapicuirahi.

⁴⁶ Tásiha, te las trespa sache, típiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijicanu!”

⁴⁷ Tacahe, ena natiarihiqueneanahi ena tisamanahi, ánivarepa nacahe:

—Esama ema maca achane mapiaracahi ema víyahaini profeta Elías —nacahepa.

⁴⁸ Ema apana tíanapa tijnapahi máepanapa eta machuchujiruyarehi eta tisisica vino. Máitiacapa te tiúqui curinaquí. Máimicapayacapa eta majaca ema Jesús, machuchujicarehi.

⁴⁹ Énasepa ena apamuriana, ánivarepa nacahe:

—Ésamiricachucha. Vímahayare te títecapayarepuca macatiuchapana ema Elías —nacahepa.

⁵⁰ Tásiha, tiápechavavarepa tipiaraca muraca ema Jesús. Tásiha, tépenapa.

⁵¹ Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchechuha te apaquehe. Tiyayacarepa eta apaquehe. Étaripa eta ichapepuhiqueneana mari téjepuichavacavare.

⁵² Étaripa eta ecariana téjiacavacapa. Técheputanavarepa ena náepenequeneana ena tisuapajirahianahi mayehe ema Viya.

⁵³ Tásiha, te mapanaquenepa sache, téhevere te táequenepa eta mácheputsirahi ema Jesús te máecari, éna apanavare tíuchucanapa tayehe eta náecariana. Tásiha, tisiapanapa tayehe eta avasare Jerusalén. Tichavanapa te napenana. Ichapemurianahi ena achaneana tímahanahi éna.

⁵⁴ Tacahe, ena tijanearecanahi, émapa ema nacapitara, te náimahapa eta tayayacarevahi eta apaquehe, émapa eta apamuriana tíaramicareanahi, ichaperinehi eta napisirahi. Tásiha, nacahepa:

—Yátupiquenerichuyapa Machicha ema Viya ema maca —nacahepa.

⁵⁵ Natiarihivare ena camuriana esenana. Tímaracananahi te tiyerehi. Ena nani esenana, éna téhicanahi ema Jesús. Téchapajiricanapahi ema Jesús eta mapaisirapahi te másihapa te Galilea.

⁵⁶ Nacarichusera ticajuanahi eta náijaruana esu María Magdalena, ésupa esu apana María, maena ema José émapa ema Jacobo. Sutiarihivare esu mayena ema Zebedeo, náena ena nuchamurianahi ema Juan émapa ema Jacobo, apóstoleanahi.

*Nacucupaicapa te crusu ema Jesús, náecarayarepa
(Mr 15.42-47; Lc 23.50-56; Jn 19.38-42)*

⁵⁷ Matiarhivare ema achane rico ticaijare José. Ticavasahi te avasare Arimatea. Émarichuhi téhicahi ema Jesús.

⁵⁸ Te capererehipa, eta máimairahi máepeniraipahi ema Jesús, tíanapa mayehe ema Pilato. Mayaseapanahi eta máquehe ema Jesús, mavarairahi máecarayare. Tacahe, ema Pilato macavanairipipa náisapahini eta náecarairaya.

⁵⁹ Nacucupaicasarepa eta máquehe ema Jesús tayehe eta crusu. Náyuruacapa tayehe eta tijapuquene sávana.

⁶⁰ Nanacapa tayehe ema máecari máemepiyareruhi máecariyahini ema José. Eta juca ecari, nasecajueruhi eta mari. Najihachapa tayehe eta tajitacarequene márima. Te náitauchapa, tíananapa.

⁶¹ Esu María Magdalena, ésupa esu apana María, téjacanahi éna, náimarararacapaihi eta ecari.

Ticavanahianapa ena suntaruana najaneaca eta ecari

⁶² Tásiha, te apanapa sache tiyananavarepa ena tuparairucana mayehe ema Pilato.

⁶³ Náechajicapa ema Pilato. Ánipa nacahe:

—Tímitcachavihi, tata, vimetapanavi eta máechajiriruvahi ema Jesús te achanerichaha eta máechepusirayarehiji te máecari te mapanaquenénapaji sache.

⁶⁴ Puiti, vivarahahi picavanairipihini náeratahini muraca eta tapaja eta máecari, mapanainavare sache eta najaneasirayare ena suntaruana. Machu nayana te yati námechapana eta máquehe ena máimitureana. Machu nácaheriana “Téchepecaripa te máecari”. Tásiha, ena achaneana nasuapainapupuca, náimijachainapa yátupi. Tisuapacarepanainapupuca tayehe eta máichaqueneanahi te achanerichaha —náichapa.

⁶⁵ Ema Pilato máichavacapa:

—Tiuri, njaracahe ena nusuntarurana. Eyana iama. Evaneca najaneacaquenéna. Nachujichaquenéna muraca eta máecari —máichavacapa.

⁶⁶ Tacahe, tiyananapa nachujichapa muraca eta ecari. Nanacapa eta táicutiaranayarehi. Tásiha, najaneacahi ena suntaruana.

28

Eta máechepusira ema Jesús te máecari
(Mr 16.1-8; Lc 24.1-12; Jn 20.1-10)

¹ Te apanapa sache te tijarahichichapa eta lumíncuquenehi, tiyanapa esu María Magdalena, sucachanehi esu apana María, náimahapanayarehi eta ecari.

² Tíjahúchavapa tiyayacarehi eta apaquehe. Émahi ema ángele eta máucaupaisirahi te anuma. Te máitecapauchapa eta ecari, máequehepuichapa eta mari tajiainihi eta máecari. Máejahamecapa eta mari.

³ Tétavicava eta majaraivahi, tivayuhauquirahi. Eta mamuiraha, tétavicavavare eta tajapuva.

⁴ Eta náimairahi ena suntaruana, tiáquipapaicavanapa, tiyayacarenapa eta napisirahi. Tiánehini tépenaracana.

⁵ Tásiha, ema ángele máechajicavacapa ena esenana. Ánipa macahe:

—Vahi ecupicanu. Núti néchahi eta etanusirapahi ema Jesús ema macaetaquenénihini.

⁶ Májinaipahi eta te tajuhe eta máecari. Téchepecaripahi taicha tacahehi eta máechajiriruvahi. Yare, ímaha eta juca mávinénihini.

⁷ Eyana púitinarichu, emetapanavaca ena echamurianahi máimitureana eta máechepusiraipahi tayehe eta máecari. Énerichuvare emetacavaca tiyanayare ema Jesús eta te Galilea. Ánaqui macuchapiaheyare emutu éti. Eta tímitcanuhi núti numetapanahayarehi —máichavacapa.

⁸ Tacahe, ena esenana tiyananapa tichavanahi tijunaparacanapaipa eta nametasirayarehi ena nachamuriana. Tipicanapaipa, tásihasera tacachanepahi eta náurisamurevapahi ichape.

⁹ Eta najunapirapahi, tíjahúchavapa tímerecava ema Jesús eta nayehe. Máechajicavacapa. Témeñahavanapa éna eta mayehe. Tépuycanapa natsiucapavachapa.

¹⁰ Éma máichavacapa:

—Vahi ecupicanu. Eyana emetapanavaca ena apamuriana echamuriana nímitureanahi. Eyanayare emutu te Galilea. Ánaqui nucuchapiaheyare — máichavacapa.

Eta nametarapianahi ena suntaruana

¹¹ Eta najunapirapahi ena esenana, ena suntaruana tijanearecanainihi tiyananapa éna, nametapanavacayarehi ena tuparairucana tamutu eta námahaqueneanahi.

¹² Tacahe, ema corregidor ticurujiricapa namutu ena apamuriana aquenucarahana, mavarairahi téchajiricavana napanerechayare eta náicharacavayarehi. Jéhesare, navachachavacapa eta camuriquene plata ena suntaruana.

¹³ Tásiha, náimitucavacapa, ániipa náicha:

—Te natiarihinapuca nayaserecahe, ecaheyare: “Tiyananahi ena máimitureana ema Jesús te yátimuhu; námechapanahi eta máquehe. Ticamapuravanahi eta vímasirahi víti” ecaheyare.

¹⁴ Émaripa ema aquenuca te máechapuca, vímaharinepa víti. Vitanucayare eta vivyuarasirayare, apaesa tacuija eviurevaina éti —náichapa.

¹⁵ Tacahe, ena suntaruana najacapapa eta plata navachahi. Tiyananapa. Jéhesare, étapaichuhi náechajisihapahi eta náimitucasivahi. Puíticha, ena israelítana, tanasirichuhi tacahehi eta nametarapi, te natiarihi ena tiyase-recana.

Ema Jesús mavanemurihapa ena máimitureana eta náimituresihaya te tamutu avasareana

(Mr 16.14-18; Lc 24.36-49; Jn 20.19-23)

¹⁶ Ene tacahehi eta viyanirahi viti óncequeneana apóstoleana tayehe eta Galilea te cerro taicha tacahehi eta mametarapihi éma Jesús.

¹⁷ Tacahe, te vímahapa ema Jesús, vépuyumurihavanepa. Vimutu vitsiucapa. Natiarihisera ena vuíchaha nasuapapajicahini.

¹⁸ Tásiha, ema Jesús témeñahavapa eta víyehe. Máichahavipa:

—Ema Tata te anuma tituparacanuhi núti néchayare tamutu te anuma étapa te juca apaquehe.

¹⁹ Eta tacahe, eyanayare puiti epaicayare tamutu eta avasareana. Ímitucayare ena achaneana, nuchaneranaina éna apanavare. Ícachasicavacayarepahi te máijare ema Tata, nútipa nuti Machicha émapa ema Espíritu Santo.

²⁰ Ímitucayareva eta nasuapiraina éna apanavare tamutu eta nímiturapianahi eta eyehe. Núti, tayanapane nuyerehehi, nímicatacaheyaresera. Níjaracahénapaipa eta nútupajijiasirava. Tamutu sácheana nucachanehevacayarehi. Váhiquene nujunijiacahémahi —máichahavipa.

Tamutupa eta juca nájucaquenehi eta námahaquenehi nuti Mateo.

Emá San Marcos májuequeneháhi eta máicháraracaváhi ema Jesucristo, ticáijare puiti eta EVANGELIO SEGÚN SAN MARCOS

¹⁻³ Nupárapenaveána, puiti nuvaráha numetacahe eta máitaresiráhi ema Jesucristo, Machicha ema Viya, te títecapauchahavipa te vitaracu. Ichápe-rinehi eta viúricacareváhi puiti taicha eta mametasiráhavihi eta táurina-quenehi máechájjiruvána ema Viya.

Ánaquiáparipáhi eta áñoána acane, ema Viya mametacapa ema víyaháini profeta Isaiás eta mapanereruhi, eta mavanésirayare ema Machicha te juca apaquehe. Éma, tímitecahi ticatiurahiyarehi. Énerichuvare matarihi-yareva ema apana achane máichuhaquene-yarehi ema Viya. Macametarairu-yarehi, máetupiricavacayare ena achaneána, náinajisirayarehi eta tamauri-queneána napanereruána apaesa táuri eta najacapirayare ema Machicha ema Viya.

*Emá Juan Tícachasiricaráhi tépanavapa ticametarairu eta máechájjiruva ema Viya nayehe ena vámahicuruhána
(Mt 3.1-12; Lc 3.1-9, 15-17; Jn 1.19-28)*

⁴ Tiuri, te táequenepa eta juca, camuriquenehi áñoána, tiúchucapa ema achane ticáijare Juan. Éma, máichuhaquenehi ema Viya eta macametarairu-yarehi, máetupiricavacayare ena achaneána. Tacahe, masuapáhi eta matuparáháhi. Tiyanapa vámahicuruhápa. Vaipa avasarecuruháinái. Ticametarairupaipa nayehe ena macuti-queneána vámahicuruhána. Ánipa macáhehi eta máimituresiráhi:

—Ítsivacha eta epanereruána. Éneuchava mayehe ema Viya, apaesa maperdonachahe eta epecaturána. Te éneuchavapa, núti nícachasichénapa, apaesa etsecávaipa eta éjacapirayare ema Cristo —máichavacapa ema Juan.

⁵ Tacahe, nárajapápa napaucha ena achaneána ticavasána eta te ichápe avasare Jerusalén étapa eta apamuriana avasareána te táunaváhi eta provincia Judea. Eta nametauresirávaipa ena achaneána, navarairáipa náinájica eta napeaturána, ema Juan máicachasicavacapaipa tayehe eta cajacure Jordán.

⁶ Ema Juan, vanairucahi me Viya, profetáhi éma. Eta macamuiriháirahi eta náitsameru tájjiyáha eta náitatiquene ticáijare camello. Eta máitijuhe, vácapi jayumepi. Eta manicasareanáhi eta tsacara. Eta máitiveráhi eta mápama.

⁷ Ánivare macáhe eta macametarairuiráhi:

—Ávanepaipáhisera mácani yátupiquene Cristo. Éma, tiápájjupanaváhi nuyehe núti eta mapicauchacaréváhi. Váiparinehi nácutisámimáhi eta máitupájjiasiraváhi. Váiparinehivare nácaemuñaváimáhi macamusuránuhíni núti páuresami.

⁸ Yátupi núti nícachasicahehi te une, te éneuchavapa mayehe ema Viya. Émainapa, tícachasichénavarepa eti ecasiñavanáhi mayehe éma, tíjaracáhénasarepa ema Espíritu Santo —macáhepa ema Juan.

*Emá macáicachasiráhi ema Jesús
(Mt 3.13-17; Lc 3.21-22)*

⁹ Te jena sácheana eta mávihairarichaha ema Juan te cajacure Jordán, títicapapa ema Jesús. Másihapahi te avasare Nazaret te tinapaica eta Galilea. Tásiha, ema Juan máicachasicapa ema Jesús.

¹⁰ Te tamutupa, te tíucupaicapa eta te une ema Jesús, tǵahúchavapa máimaha téjiacahi eta anuma. Máimahavarepa ema Espiritu Santo ticutipahi eta paluma. Máucupauchapa ema Jesús, mávahácapa éma.

¹¹ Tacahe, nasamapa eta mahu ema Viya tásihaquenehi te anuma. Ani macahehi eta nasamirahi:

—Pítira nuchicha némunarquene. Núrismurecha piyehe —macahepa.

*Emá Váinaraji Satanás mavarahapa macaitsamaraji ema Jesús
(Mt 4.1-11; Lc 4.1-13)*

¹² Tacahe, ema Espiritu Santo eta mávahásamurechirahi, enurujipa máimitucaipahi ema Jesús eta mayaniraya te mávapahi apaquehe.

¹³ Eta mayerevahi ema Jesús cuarenta sácheana. Tásiha, ema Satanás macaitsamarajipa, mavaraha macaetema ema Jesús. Váhiserá mǵarahahini. Tatiarihivare eta sǵareana eta te mávihahi ema Jesús. Te tamutupa, ena ángeleana náechapajiricahi éma.

*Emá Jesús tépanavapa ticametarairu
(Mt 4.12-17; Lc 4.14-15)*

¹⁴ Tacahe, te jena sácheana, nacaratacapa ema Juan. Námapa te tiyerehi. Tacahe, tiyanapa tichavahi ema Jesús eta te provincia Galilea. Tépanavapa ticametarairu. Máichuhavacapa ena achaneana náehicayarhi ema Viya.

¹⁵ Ánipa tacahehi eta mametarapi:

—Éneuchava mayehe ema Viya. Ítsivacha eta epanereruana. Taicha puiti tǵchuhénapa ema Viya. Tiánehipa eta sáchezare títicapaucahénapa eyehe ema ticatiuchaheyare. Aquenucayare mavaneruhi ema Viya, éma téchaheyare. Ichape eta iúricarevaya te esupa eta nímiturapiána —macahepa.

*Emá Jesús máichuhavaca ena cuátroqueneana ténicarahiana, máimitureanayarehi
(Mt 4.18-22; Lc 5.1-11)*

¹⁶ Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema émana ticaijarehi Simón Pedro émapa ema maparape Andrés. Eta náematanerepi ena nani, ténicarahianahi. Náquijierecahi eta nayutahe.

¹⁷ Tacahe, ema Jesús máichavacapa éna:

—Yare, éhicanu. Núti níjaracaheya eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranyare ema Viya —máichavacapa.

¹⁸ Enevanepa náinajicahi éna eta náenisirahi. Tiyananapa náehicapa ema Jesús.

¹⁹ Ánaquipanavarepa máimahavarepa ena apinana ticaparapeacanavare ema Jacobo émapa ema Juan. Téjacanahi te napacure. Matiarihivare ema naiya Zebedeo. Náititijiricahi eta nayutaheana.

²⁰ Emá Jesús máichuhavarepa ena apinana. Tásiha, náehicavarepa. Najunijicapa ema naiya Zebedeo. Manasipa éma te pacure, macachanehi ena mamusurana.

*Éma Jesús máimijunapa éma éreana tiávahácainihi éma achane
(Lc 4.31-37)*

²¹ Tacahe, títécapanapa tayehe eta avasare ticaijare Capernaum. Eta juca sache sávarumuhuhi, tíanapa éma Jesús eta te náurujisirareva ticaijarehi sinagoga. Máimitucavacapa éna tiúrujicavanahi.

²² Ichape náramihi éna achaneana eta máimiturapianahi táicha vahi nasamasarénahini. Tétavicavahi eta máitusirahi mayunapaicahi tamutu. Tétavicavahi eta tasuapacarevahi eta máimiturapiana.

²³ Te nataracu éna náurujiruvanahi, matiarihíhi éma émana achane mávaháruhi éma éreana. Tipiararecapa, ánipa macahe:

²⁴ —Núti nímativi. Pítira Sántoquenevahi. Machichaquenevahi éma Viya. Pésamiricahavipaini, piti Jesús Nazareno. Váhini picuesirujicahavini. Pivarahinapapuca pijararechaviyare —macahepa éma achane.

²⁵ Tacahe, éma Jesús macajachapa éma éreana. Ánipa maicha:

—¡Pámatinal! Piyana pijunijica éma maca achane —máichapa.

²⁶ Tacahe, éma achane tíjahúchavapa tiáquipaicava, tiyayacarepa. Tipiara-recapa muraca maicha éma éreana eta majunijisirayarehi éma achane.

²⁷ Tásiha, náraminehi ichape éna natiarihiqueneanahi. Tiyaserejirica-canapa, ánipa nacahe:

—¿Tájahasica tacayema eta juca? Éma maca Jesús, tétavicava eta máitupajijiasiravahi, maratahahi máquijica éna éreanana. Tásiha, ichape eta napsirahi éma. Vahi nácapaemachahini. Tamutupa arairu eta máimiturapianahi éma maca —nacahepa.

²⁸ Tacahe, nasamairicapa namutu éna achaneana eta juca máichaque-neanahi éma Jesús. Énaripa éna ticavasanahi te avasareana eta te táunavahi eta Galilea.

*Éma Jesús macanaraca esu máimase éma Pedro
(Mt 8.14-15; Lc 4.38-39)*

²⁹ Tacahe, te tiúchucanapa tayehe eta náurujisirareva, tíanapa éma Jesús te napena éma Pedro éma Andrés. Náehicavarepa éna apinana éma Jacobo émapa éma Juan.

³⁰ Sutiarihihi esu máimase éma Pedro. Sunasiqueneipahi tívecahi, ticajumahi ésu eta muraca fiebre. Nametacapa éma Jesús eta sucajumairahi esu esena.

³¹ Tásiha, mapauchapa. Macaratavauchapa, macaechepucapa ésu. Táetaviacavaneinehi eta fiebre. Tacahe, suéchapajiricapa éma Jesús, énapa éna máimitureana.

*Camuriana éna macanararuanapahi éma Jesús
(Mt 8.16-17; Lc 4.40-41)*

³² Te jena cáperehiquénehi, te téricapa eta sache, éna achaneana námavacapaipa eta mayehe éma Jesús namutu éna nacajumaqueneana énapa éna návaháruanahi éna éreanana.

³³ Jéhesaréinehi, namutu éna achaneana ticavasanahi tayehe eta avasare tiúrujicavanapa te tapaja eta peti.

³⁴ Camuriana éna macanararuana tayehe eta apanapane jumareana. Maveranavare éna váinarajiana máquijiruanapahi te náqueheana éna achaneana. Váhisera máisapahini náechajicahini éna éreanana, taicha náimatíhi éna eta émairahi éma Cristo.

Tamutu avasareana te Galilea mapaica ema Jesús

(Lc 4.42-44)

³⁵ Tacahe, te tijarahipa, téchepucavanepa ena Jesús. Tiyanapa eta te mayujarasirare.

³⁶ Te téjamicapa ema Pedro, májinaripa ema Jesús. Tásiha, tiyananapa nacapayacapa éma eta te mayujarasirare eta te mávapahi apaquehe.

³⁷ Te náitecapauchapa, náichapa:

—Namutu ena achaneana titanucavianahi —náichapa.

³⁸ Tásiha, máichavacapa ema Jesús:

—¡Páureanasami! Nuvarahapasera viyanayare tayehe eta apana avasareana apaesa nucametarairu taicha nutuparacasivaichuhi níchuhavacaya namutu ena achaneana náehica ema Viya —máichapa.

³⁹ Tacahe, ema Jesús tiyanapa tipaica tayehe eta avasareana te Galilea. Ticametarairupaipa eta te náurujisirarevana. Énerichuvare nayanau-chapaipa ena achaneana návaháruanahi ena éreanana, máquijicavacapaipa ena éreanana.

Ema Jesús macanaraca ema émana achane leproso

(Mt 8.1-4; Lc 5.12-16)

⁴⁰ Tacahe, te apanapa sache, títecapapa ema émana achane macajumaquene eta lepra. Mapauchapa te mamirahu ema Jesús, máepuyumirauchapa. Tásiha, máichapa:

—Tata, nucasiflavahi eta piyehe, picanaracanupaini —máichapa.

⁴¹ Tacahe, ema Jesús tijimuyainehi majapanuinehi. Manacapa eta mavahu. Máichapa:

—Nuvaraha nucanaracavi. Tájinapa píchiravaina puiti —máichapa.

⁴² Enevaneapa tinaraca. Vaipa leprósoinahini.

⁴³ Tacahe, ema Jesús máevatacapa ema achane. Matuparacapa ichape vahi macumetajirica. Ániapa máicha:

⁴⁴ —Pímaha, piyanayaresera pímercava nayehe ena tuparairucana, apaesa náimamacavi. Énainapa timetajiricanayare eta yátupirahi pinaraca, pipachihapa. Nacuijaserá picumetacavaca eta nútirahi nucanaracavi. Tásiha, piyanayareva me Viya. Picamavahuyarepahi eta pihasalupayachirayare taicha eta macanarasiravihi —máichapa ema Jesús.

⁴⁵ Tacahe, tiyanapa ema achane. Timetajiricapaipasera, mametacapa namutu ena achaneana eta máichavaquenevahi. Eta tacahe, ema Jesús vaipa máimercavahini te avasareana taicha enevaneyarehi náurujiaca ena achaneana tímarahijiana. Tacarine tiyanahi tayehe eta nájinaricha achane-nahichaini. Énaserá ena achaneana tiyananaichucha napauchahi. Tiásihana tayehe tamutu avasareana.

2

Ema Jesús macanaraca ema émana achane macajumaquene eta mura-caquiha

(Mt 9.1-8; Lc 5.17-26)

¹ Tacahe, te apanavarepa sache, tichavapa ema Jesús eta te Capernaum. Eta nasamairisirahi eta matiarahiraripa éma, títecapanapaipa ena achaneana, camuriqueneana.

² Tiyututucavanapa eta te peti mávihahi éma. Tájinapa táviravainahini eta te tapajachacaya. Ema Jesús máimitucavacaipa eta nacaijuheraya me Viya.

³ Tacahe, títecapanavarepa ena apamuriana, námapahi te áchuji ema achane muracaha. Cuátroana ena tíamanapahi.

⁴ Váhisera náitecapauchahini eta te mávihahi ema Jesús, taicha eta nayututuravahi ena achaneana. Tacahe, navetatamaequechapa eta peti eta te máinahu te manapaicahi ema Jesús. Te náitauchapa navetataca, nacajuchuchucapa ema macajumaquene eta te áchuji te mamirahu ema Jesús.

⁵ Te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi nucaepahainavipa —máichapa.

⁶ Tacahe, énerichuvare natiarihihivare téjacanahi ena escribánoana. Napanerequenehapa eta macayemaquenehi ema Jesús. Tásiha, tisémanarinehi.

⁷ Ánipa nacahe te nasamureana: “Ema maca tímijachavaipapuca Viya eta macaepahairayaréji eta pecatuana. ¡Tétavicava eta matapirava! Taicha macarichu ema Viya marataha macaepaha eta pecatuana. Nájina apanaina tiratahaina ticaepahaina eta pecatuana” tacahehi eta napanereruana.

⁸ Enurujipa ema Jesús máimmaracavacahi eta nasamureana étapa eta napaneruranahi éna. Tacahe, máichavacapa:

—¿Tájaha tacayema téjecapava eta epanereruana?

⁹ Tájina táejeravaina eta níchirahi ema maca: “Nucaepahainavipa eta pipecaturanahi”. Máejerarepánapuca níchahini: “Nucanaracavipa. Péchepuca, piveha eta pímacaraji, piyana pipaica”.

¹⁰⁻¹¹ Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena —máichapa ema Jesús.

¹² Enevanerinehi téchepuca ema macájumaquenéni. Mavehapa eta mayereruva. Tipaicapa te namirahu ena achaneana. Tiyanapa tiúchucapa. Eta náimairahi, ichape eta námirahi namutu ena natiarihiqueneanahi. Tétavica-vainehe eta nacunachirahi ema Viya. Ánipa nacahe:

—¡Tétavicava táramicareva eta máichaqueneana ema Viya! ¡Asulupaya, Tata! ¡Vahi vímahasarénahini! —nacahepa.

*Ema Jesús máichuha ema achane ticaijare Mateo, mayeheyare apóstole
(Mt 9.9-13; Lc 5.27-32)*

¹³ Tiuri, te apanapa sache, tiyanavarepa ema Jesús te tachausi eta cáquiure. Náitecapauchavarepa namutu ena achaneana eta mayehe. Tásiha, máimitucavacapa.

¹⁴ Tacahe, te tíapechavapa tipaica ema Jesús, máimahapa ema Mateo, machicha ema Alfeo. (Ema Mateo ticaijarehivare Leví.) Téjacahi eta te macatuparahaiyahi eta macobradesirahi eta impuesto.

—Yare, péhicanu —máichapa ema Jesús.

Tacahe, ema Mateo enevanepa tiyana máehica ema Jesús.

¹⁵ Te jena sácheana, ema Mateo téniricapa eta te mapena. Mámapa ema Jesús énapa ena máimitureana. Camuriqueneana ena téhicanahi ema Jesús. Natiarihivare maverana ena macutiqueneana ema Mateo ticobrarerahiana tayehe eta impuesto. Maveranahivare ena apamuriana máemunacasareana ema Mateo. Tiúrisamureanahi eta nanisirahi.

¹⁶ Títecapanavarepa ena apanamuri achaneana: ena escribánoana énapa ena fariséoana. Eta náimairahi eta macachanérahi ema Jesús ena máichuhaqueneana ema Mateo, nacaecahipa. Ánipa nacahe nayehe ena máimitureana:

—¿Tájaha tacayema tísapava ema eyehe maestro macachanevaca eta manisirahi ena nánitátajiana ticobrarerahiana eta impuesto? ¡Tétávicavahi eta nacepaturaravahi! —nacahepa.

¹⁷ Te masamapa ema Jesús eta náechajiriruvana, máichavacapa:

—Ena ticajumanahi, tétavivacavahi eta nacamunuirahi ema médico. Énasera ena majumareanahi vahi nácamunuimahi ema médico. Puítisera, eta tímitecanuhi núti nutanucayare namutu ena tisipecaturana apaesa náeneuchavahini, náinajica eta napeaturana. Nácani matapiravareanahi vahi nasamavahini nácamununuhini —máichavacapa.

Nayaserecapa ema Jesús tayehe eta ayuna

(Mt 9.14-17; Lc 5.33-39)

¹⁸ Tacahe, te apahevarepa, ayunanahi ena máimitureana ema Juan. Ayunahivare ena fariséoana. Náitecapauchapa ema Jesús ena apamuriana achaneana témejecapavarahiana. Nayaserecapa:

—¿Tájaha tacayema vahi naháyunachahini ena pímitureana? ¿Tájaha tacayema vahi nácutihini ena máimitureana ema Juan énapa ena fariséoana? —náichapa.

¹⁹ Majicapapa ema Jesús:

—Nímicutichinahe puiti. Vahi táuricaímahi ayúnanáinahini nácani ticaichuhacasionahi tinicanaya nayehe ena araimana. Tiúrisamureanayarehi taicha matiarihini ema arayena. Vahi táuricahini ayúnanáinahini. Téhesera te tépenapuca éma, jéhesare ticatisamurevanayare. Tacutiquene, vuíchaha táuricaímahi ayunanainahini ena nímitureana.

²⁰ Járjapainapasera eta sáchezare, ticaverejicasianayare, taicha ticaratacanuanainapa ena ticapacananayare núti. Jéhevarepa ayunanainapa.

²¹⁻²² Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácuticacaimahi eta nayeherepiana ena apamuriana achaneana. Eta ítusirahi éti eta nímiturapiana, tavaraha ínajica eta ichasi eyeherepiana tauriqueneanahi —máichavacapa ema Jesús.

Ena fariséona náimipicauhahi eta nayeherepiana tayehe eta sávarumuhua.

Énasera ema Jesús máimereuchahi émarichu téchahi eta nayeherepiana ena achaneana eta sache nanarasirayare

(Mt 12.1-8; Lc 6.1-5)

²³ Eta jena sávarumuhu, tiyanapa tipaica ema Jesús. Mámamurihapa ena máimitureana. Témehicavanapa ena fariséoana. Náetavivijicapaipahi eta isanítiana. Tacahe, eta napaisirapahi, ena máimitureana navechuquiha-paipahi étajavapahi eta trigo. Navepiraquihapaipa, tépurajacachavana-paipahi. Tinicanapaipa. Tísapacareichucha éta, taicha técuhanapahi.

²⁴ Énasera ena fariséoana eta náimarasirapahi, tiseananapaipa. Ánipa naicha ema Jesús:

—Pimaha ena pímitureana. Ticaemataneanapaichucha eta navepiraquirapahi eta trigo puiti juca sache tétavivacavahi eta tacapicahuquenehi. Vahi tísapacarémahí eta juca nacaemataneerahi puiti —náichapa.

²⁵ Tacahe, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyahaini David eta mapaisirapahi técuhaipa énerichuva ena téhicanapahi.

²⁶ Te émarichaha ema Abiatar náquenumurihi ena tiyujaracarahiana, ema David tisiapapa eta te mapena ema Viya. Tiyaseserecapa eta manicayarehi. Nájaracapa eta pan tacapicahuquenehi nanacasarehi te mamirahu ema Viya. Nanicasarehi ena tiyujaracarahiana, émasera ema David vahi tátuparachini manicahini. Étasera eta máecuavahi, manicapa eta pan, énapa ena macachanequeneanapahi.

²⁷ Tímiyanava eta mametasirahi éna:

—Ema Viya máepiyacahi nativa ena achaneana. Te táequenepa, máimijarechinapa eta sache nanarasiraya ena achaneana, tiúrichayarehi éna. Vahi étainahini témepiyaca eta tihapapiricavacayare éna.

²⁸ Tiuri puiti, numetacaheyare: Núti Manerejirunuhi ema Viya, nútirichu néchahi eta sache nanarasiraya ena achaneana —máichavacapa.

3

Ema Jesús macanaraca ema achane tépenavahu (Mt 12.9-14; Lc 6.6-11)

¹ Tacahe, te apanavarepa sávarumuhu, tiyanavare ema Jesús, tisiapahi eta te náurujisirareva. Matiarihihivare ema émana achane vaípa tayamuricahini eta mavahu, tépenavahuipa.

² Natiarihihivare ena fariséoana, ena ticanarajiricanahi ema Jesús. Náimarracapa éma te macanaracayarepuca ema achane eta te jena sache tacapicahuquenehi. Natanunuiricahi eta tivichayarehi ema Jesús.

³ Tacahe, máichapa ema Jesús ema achane:

—Yare, pitupihayare ani te namirahu ena achaneana —máichapa.

⁴ Tacahe, máichapa ena achaneana:

—Núti nuvaraha epanerechaya. Puiti juca sache sávarumuhuhi, ¿tájahapuca táurica eta víchayare? ¿Tísapacarepuca vicha eta táuriqueneana? ¿Étapuca víchayare eta tamauriqueneana? ¿Táuricapuca vípuchavaca ena achaneana? ¿Vicaparecapuca? —máichavacapa.

Énasera tímatinamurianarinehi.

⁵ Tacahe, ticatisamurevarine ema Jesús eta muracairahi eta nasamureana. Tacahe, tisemamajuhepa eta máesenimurihairahi éna. Máichapa ema achane macajumaquene:

—Nímaha. Picajaruvauchava, pímechanu eta pivahu —máichapa.

Eta máimeresirahi eta mavahu ema achane, enevanepa tinaravauchavanepa.

⁶ Énasera ena fariséoana, tisemanarinehi eta náimairahi eta juca máichaquenehi ema Jesús. Tiyananapa tisamacacana nayehe ena políticoana, machanerana ema Herodes, taicha navaraha nacapacaya ema Jesús.

Títecapanapa ena camuriqueneana achaneana

⁷ Émasera ema Jesús tiyanapa térajicavapa eta te mávapai apaquehe eta te tachausi eta cáquiure. Mámapa ena máimitureana. Náehicavare ena ichapemuriqueneana achaneana ticavasanahi eta te provincia Galilea.

⁸ Jéhésare, te nasamairiricapa eta máichaqueneanahi ema Jesús, títecapanapa ena ichapemuriqueneana achaneana. Tiásihanahi eta te avasare

Jerusalén, eta te provincia Judea, eta provincia Idumea, eta provincia Siria, étapa eta avasareana te apachara eta cajacure Jordán.

⁹ Tásiha, ema Jesús mavanecapa ena máimitureana natsesinahini étasina pacure pauesa vahi nacutupiaraca ena ichapemuriqueneana achaneana.

¹⁰ Taicha camuriana ena macanararusunapahi. Namutu ena nacajumaqueneana témeñahavanapahi tiyumusujicavanapahi eta náemeñahairavaya, taicha navarahahi náemamacayare.

¹¹ Jéhésare, ena éreanana tiávahacánahi ena achaneana, te náimahapa ema Jesús, tíaquipaícavanapa te mamirahu éma. Tipiararecanapa:

—¡Pítira Machicha ema Viya! —náichapa.

¹² Mavanecapasera máecatihavacapa nacuija nacumetaruiña taicha vuíchaha mávarahahini náimatihíni ena achaneana eta émaquenériahi Machicha ema Viya.

Ema Jesús manerejica ena dócequeneana apóstoleana

(Mt 10.1-4; Lc 6.12-16)

¹³ Tacahe, tiyanapa ema Jesús eta te mávapai apaquehe máripahi. Mámamurihapa ena ánimuriana máimitureana.

¹⁴ Tacahe, ánaqui manerejicavacapa te nataracu ena dócequeneana mayeheanayarehi apóstoleana. Vaipa najunijiacaimahi éma, macachaneyarehi tamutu sácheana. Matuparacavacapa eta nacametairuirayare.

¹⁵ Máíjaracavacapa ena dóceana eta naratahairayarehi ticanararecana ena nacajumaqueneana, náimijunairayareva ena éreanana tiávahacánahi ena achaneana.

¹⁶⁻¹⁹ Eta juca náíjareana ena manerejiruanahi*: Ema Pedro (éma ticaijarevare Simón), ema Jacobo, ema maparape Juan, ema Andrés, ema Felipe, ema Bartolomé, ema Mateo, ema Tomás, ema apana Jacobo, ema Tadeo, ema apana Simón, émapa ema Júlasí Iscariote (ema tíjararecáhi ema Jesús).

Ema escribánoana téjcapavanahi eta náimijachirahi ema Jesús mávaháruhi ema Váinaraji Satanás

(Mt 12.22-32; Lc 11.14-23; 12.10)

²⁰ Tacahe, tichavapa ema Jesús, énapa ena mayeheana apóstoleana te napena. Tíápechavanavarepa tíurujicavana ena achaneana. Tásiha, vaipa náitujicavahini tinicana taicha tétavicavahi eta nasimutuvahi ena achaneana.

²¹ Énasea ena maparapenaveana ema Jesús, te nasamairiricapa, tiyananapa náepanayarehini éma, taicha náimijacháipahi máurishi éma.

²² Énerichuvare natiarihipa ena escribánoana, tíásihanahi te Jerusalén. Náepiyaequenehapa ema Jesús, ánipa nacahepa:

—Ema maca Jesús, vémeteaca majupaha ema náquenumurihi ena éreanana, émaripa ema Satanás. Táitusiava máíjaracáhi eta máitupajíjiasiravahi eta macuchusirahi ena éreanana —nacahepa.

* **3:16-19** Ena nani apinana ajairana ema Jacobo émapa ema Juan, naparapecáhi, machichanaveanahi ema Zebedeo. Émasera ema Viáquenu Jesucristo máímararacáhi eta náchanavana, máimativacáhi éna. Manacapa eta náchucarapianahi “Boanerges”. (Eta táechajiriruvahi eta juca, Tijuricati eta náechajisira, téyayarasianavare.) Matarihivare ema apana achane ticaijarehivare Jacobo. Ema maiya ticaijarehi Alfeo. Matarihivare ema apana ticaijarehivare Tadeo. Eta tápipine eta máíjare Lebeo, étapa Judas. Tacahe, mapana eta máíjare. (Pitanuca te Lucas 6.16 étapa te Mateo 10.2.) Ema apana Simón, tímaticarehi ema, náumurvainíhi ena revolucionárioana ticaijareanahi “cananistana”. Navaraha náquijica ena extranjerioana romanoana.

²³ Tacahe, ema Jesús máichuhavacapa ena ticaecahirahianahi. Eta máimitu-siravacahi, máimicutichinapa. Ánipa máichavaca:

—Éti, téjcapavahi eta epanereruana ímijachanuhi majupahanuhi ema Satanás. Ímijachapuca ticitianacacanahi ena éreanana. Váhisera éna tacahe.

²⁴ Tacutihi ena machanerana ema gobierno. Éna, vahi típutsimuriavanimahi apinainahipucaini partido. Te típutsimuriavanapa, énajicacaini tiáquipaicacana.

²⁵ Émaripa mácani achane te camurianahi ena machichanaveana, váipari-nehivare típutsimuriavanimahi, náehajiricacahini, énajicacahini náquipaicacahini.

²⁶ Ene macahehi ema Váinaraji Satanás, váiparine máisapahini típutsicacana ena machanerana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi.

²⁷ Macutihi ema mácani achane tume. Te macaratacahi eta mataquiriqui eta majaneasirahi jácani macayehequeneana, nájina tiámeyechaimahi. Tacamunuhi nacaratacanumayare, náiticanumayarehi ema túmequenehi achane. Jéhesare, náituruyechasareyarepa eta máimahaqueneana. Ene nucahehi núti, túmepananuhi mayehe ema maca Satanás.

²⁸ Puiti nutupiruva numetacahe: Tiperdonachacareanayare ena achaneana eta napecaturana, tamutu jácani náechajisihaira eta táíñemahiqueneana.

²⁹ Jararihisera eta epecatura vahi tiperdonachacaremahi. Eti ímijachahi ema Satanás ema tiávahácanuhi. Ichape eta éjcapiravahi, taicha ema tiávahácanuhi nuti, émaquenehi ema Espíritu Santo. Éti epanararacaripa éma. Tásiha, máitavacaca eta etapiravanaya —máichavacapa ema Jesús.

³⁰ Tacahehi eta máechajiriruvahi taicha eta nacahechajiriruvairahi: “Ema maca Jesús, majupaha ema Satanás”.

*Suítecapauchapa esu maena ema Jesús énapa ena maparapenaveana
(Mt 12.46-50; Lc 8.19-21)*

³¹⁻³² Tacahe, te apanapa sache, tiúrujicavanavarepa ena camuriqueneana achaneana te tajuhe eta peti. Téjcanapa te machacaya ema Jesús. Títecapanecha esu maena énapa ena maparapenaveana. Nanasipasera te aneca taicha tiyututucavanahi ena achaneana. Navarahahi náechajicayarehi éma. Tásiha, nametacapa ena apamuriana ema Jesús, ánipa naicha:

—Esu pémunaruquenehi pena, énapa ena piparapenaveana nararihi ani te aneca. Navarahahi téchajicaviana —náichapa.

³³ Majicapapa éma:

—Yátupi némunacavacahi esu meme, énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi.

³⁴ Tacahe, máesenimuríhapa ena máimitureana ena téjcanahi te machacaya. Tásiha, macahepa:

—Ena nani ena némunaruanahivare.

³⁵ Taicha namutu nácani ticaemataneacacanahi ema Tata, énahi ena némunarqueneanahi —máichavacapa.

4

Eta máimicutichinaquenehi evaraqui tacaevaquenehi te apanapanenéji máteji te apaquehe

(Mt 13.1-9; Lc 8.4-8)

¹ Tacahe, te apanapa sache, tiápechavavare túmitureca ema Jesús te tachaui eta cáquiure. Tásiha, camurianapahivare ena achaneana titecapauchanahi éma. Eta navayuchiravaripa ena achaneana, ema Jesús tiavacuhapa tayehe eta pacure, tiápajuecavapa apaesahi. Téjacapa eta máimituresirahi. Ena achaneana nanasipa tayehe eta te tachaui.

² Camuri eta máimicutichaqueneanahi eta máimitusiravacahi. Ánipa macahe:

³ —Esamararacanuhaha. Matiarihihhi ema émana achane. Tévacahi te máesane.

⁴ Eta mapaisirapahi, témiricapaipa eta evaraqui te achene. Táimahapa eta cáyure, tanicapa.

⁵ Eta mayeherepi éma eta máevasira, máevajajapaicapaica eta apaquehe. Tásiha, eta apamuri evaraqui témiricapa te váhirichu tamitutuhini eta máteji taicha máripahi eta apaquehe. Tímarucavanepanéni táicha.

⁶ Téhesera te tíjurepa eta sache, tacapajicapa; taicha vaipa táuparevacahíni.

⁷ Tacahe, eta apana evaraqui témiricapaipa te tapare eta itapequiji. Túirinahinéni eta táímarusira, étasera eta itape tacachuricapa eta tajurusirahi. Táemuriachapa eta sucureca. Tanasipa, vaipa tacahihini.

⁸ Tacahe, eta apamuri evaraqui témiricapaipa te túrina máteji. Tijuruca-rahíhi eta táímarusira. Ichapemurihi eta tahi. Eta étana, ticahipa apaesa-sajiruichucha. Eta apana, ticahipa tativarerehapanapa. Eta apanavare, ticahivare tétupicavapanapa.

⁹ Esamararacanu emutu éti. Te evarahapuca ecaicutiara, tavaraha eta epanerechinavaya —macahepa ema Jesús.

Ema Jesús máitametacavaca ena máimitureana eta juca máimiturapi

(Mt 13.10-23; Lc 8.9-15)

¹⁰ Tacahe, te najunijicapa ena apamuriana achaneana, témeñahavanapa eta mayehe ema Jesús ena dócequeneana apóstoleana énapa ena apamuriana máimitureana. Nayaserecapa tájahapuca tacayemahi eta máimicutiarachiravacaichucha eta máimitusiravacahi ena achaneana.

¹¹ Tacahe, majicapapa éma:

—Ema Tata tituparacanuhi nítametacaheyare éti eta juca mapanereruana táequenereruana tayehe eta macuchucuirahayare eti achaneana. Mavara-hahi ímatiequenehaya éti.

¹² Énasera ena apamuriana achaneana nímicutiarachinavacaichucha, apaesa vahi máejerarémahi eta nacaicutiarairaya eta nasamaquenehi. Tavaraha napanerechinavaya. Eta nacaicutiarairaya, náitsivachahini eta náitaresira, apaesa naperdonachacarepaini —máichavacapa ema Jesús.

¹³ Énerichuvare máichavarepa:

—Éti, ¿vuíchaha íturuequeneha eta juca nímicutichaquenehi? Tavaraha eta epanerechinavaya éti apanava apaesa íturuequeneha eta apamuriana nímicutichaqueneanahi. Tiuri, numetacahe:

¹⁴ Eta evaraqui eta máevaruhi ema achane tacutihhi eta nímiturapiana.

15 Natiarihi ena achaneana nacuti eta apaquehe muracapahi te achene, te táemirishahi eta evaraqui. Ena nani nasamararacahi eta nímiturapiana. Émasera ema Satanás macamitiscavanepa eta nasamaquenehi.

16 Natiarihivare ena apamuriana achaneana, nacutihí eta máteji máripahi. Te nasamararaca eta nímiturapiana, natupiruvanehinéni nasuapa, tíurisamureanainehi.

17 Váhiserá náratahahini nacaravahuhini yátupinahíni. Vahi nácutihíni eta evaraqui tiúparehi. Ánipirichu eta náehisirahi, taicha vahi nacamichahini jácani nacatajivairanahi. Váhivare túmesamureanainahini te tatiarihipa eta jácani nacatichaira ena achaneana táichavenehi eta náehisiranuhi.

18 Natiarihivare ena apamuriana achaneana nacuti eta máteji te távihahi eta itapequiji. Énerichuvare nasamararacahinéni eta nímiturapiana.

19 Napaneréquenehahinéni, tahapapiricavacahisera eta jácani táicharacavayare eta náitaresira. Tavayuacavacavare eta tájiparacana, najamurachahi tamutu. Tahapapiricavare eta navarairahi tirricuchavana. Tamutu eta juca táemetavicahi eta navarairahi téhicanuana. Tamapurujihí eta najacapirahi eta nímiturapiana.

20 Natiarihisera ena apamuriana achaneana nacuti eta tíurina máteji. Éna, nasamararacahi náunacahi yátupi eta nímiturapiana. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi. Nararihivare ena apamuriana, nativarehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya —máichapa ema Jesús.

*Éma Jesús tímitureca eta apamuriana yátupiqueneana
(Lc 8.16-18)*

21 Tímiyanava eta máimituresirahi, ánipa macahe:

—Te viyustaca eta vimícahu, váiparinehi táuricaímahi vijihapaicahini, vinacahivarepucaini te tápecu eta vétsatsame vímasirarehi. Tacamunuhi vinacayarehi te anuquehe.

22 Jéhesare, tayanapanepuca nacayumuruqui, tamutuyarehisera ticaechera jácani tayumurevanahi. Tájina tépacuchaimahi jácani najajairuvanahi. Tamutuyarehi téchacareya.

23 Te evarahapuca ecaicutiara, tavaraha eta epanerechinavaya.

24-25 Máichavarepa:

—Tacamunuvare epanerecha yátupina eta esamaqueneana. Te apaesarichuhi eta epanerechirahi, apaesarichuvare eta ecaicutiarairaya. Te esuapa yátupina eta nímiturapiana, ema Espíritu Santo tímitucaheya tamutu eta tacayemaquenehi. Jéhevare, tímitucaheyare éma eta apamuriana yátupiqueneanahi. Énaserá nácani vahi návarahahini napanerecha, váhivare nasuapa, énajivayare tíchavana ticaverejicasianaya eta nasamaqueneanahi.

Éma Jesús máimicutiarachava eta táimarusira eta evaraquiana

26 Máichavacavarepa:

—Nuvaraha nímicutichinahe eta nímiturapiana nuti Manerejirunuhi ema Viya. Te yátupihí eta nasuapirahí eta nímiturapiana ena achaneana, náitsivachainapa arairuinapa eta napanereruana étapa eta nayeherepianaya eta náitaresira. Tacutihí eta máevaraqui mácani achane. Tévacahi te máesane. Tásiha, tinaracapa, macuchapayarepa eta tacahirayare eta máevaraqui.

²⁷ Tímarucapa eta evaraquiána. Tijurucavare. Ema achane, tájina macaicu-tiarahini eta táimarusirahi. Váhivare macaicu-tiarahini eta tajurusirahi.

²⁸ Taicha eta apaquehe, éta ticaimarucahi. Tacuchucahi tativa eta tapacaji, táehicapa eta tanaqui. Te ticahipa, tiúchucapa eta tapiraqui.

²⁹ Te tiyahapa eta tahi, ticaechatijipa te tumare, taicha étainapa eta tacavehasiraya —macahepa ema Jesús.

*Éma Jesús máimicuticha eta taqui eta mostaza
(Mt 13.31-32; Lc 13.18-19)*

³⁰ Ánivare macahe:

—Puiti nuti Manerejirunuhi ema Viya, nímicutichinahe eta ichapemurivaya eti íjaracavanahi éhicanu.

³¹ Ecutiya eta ánichichaquene taqui eta sucureca ticaijare mostaza. Éta juca, ániquititavacapaná eta taqui te tamutu eta evaraquiána tatiarihique-neanahi tayehe eta juca apaquehe.

³² Téhesera te ticaevapa, tijurucapa eta tiápajucavahi ichapepana tayehe eta apamuriana sucurecana. Tatiaríhi eta ichapetavavaca. Tásiha, tacape-najicapa eta cáyureana —macahepa ema Jesús.

*Camuri eta máimicutichaqueneana
(Mt 13.34-35)*

³³ Ani tacahe tamutu eta máimitusiravacahi ena achaneana. Camuriana eta máimicutichaqueneanahi. Tamutuhi ticaicutiaracarevaca nayehe ena tivarahanahi náituruequeneha.

³⁴ Tájina étahena te tímitureca, vahi macunacahini eta máimicutichira. Téhesera te macarichupa ema Jesús énapa ena máimitureana, máimicaeche-rachapa tamutu eta máimicutichinaqueneanahi.

*Éma Jesús macaesamirica eta une eta táepacusirahi étapa eta técatícava
(Mt 8.23-27; Lc 8.22-25)*

³⁵⁻³⁶ Tacahe, te jena sache, eta máejasirahi ema Jesús te pacure, tímiturecahi. Te cápereichichapa, máichapa ema Jesús ena máimitureana:

—Viyanaya viánueca te apachara —máichavacapa.

Tacahe, ticametavanapa nayehe ena achaneana. Tásiha, námapa ema Jesús eta te pacure. Náehicapa ena apamuriana te pacure eta napaisirapahi.

³⁷ Te ítipierecanapa, tachimaracapa eta muraca técatícava. Tépacucapa ichape eta cáquiure. Tisiapapaipahi eta une tayehe eta pacure. Tiánehi-paipahi tacaericavaca.

³⁸ Émasera ema Jesús, tímacapaichucha te tahivu eta pacure te machunusi. Tásiha, nacajamicapa éma. Ánipa náicha:

—¡Tata maestro! ¡Picatiuchahavi, véricainapa! ¿Váhipuca péñamava eta viyehe? —náichapa.

³⁹ Tásiha, enurujipa téchepuca éma. Titupihapa. Mavanecapa eta técatícava étapa eta une. Ánipa macahe:

—¡Pámatina, pésamiricava! —máichapa.

Tacahe, tíchecapa eta técatícava. Tésamiricavapa eta une. Tésamiriecavapa tamutu.

⁴⁰ Tacahe, máichavacapa ena máimitureana:

—¿Tájaha tacayema epica? ¿Váhipuca ecasiñavahini eta nutiaríhirapahi eta eyehe? —máichavacapa.

41 Ena máimitureana, tétavicavainehi eta náramirahi. Tiyaserecapanapa, ánipa nacahe:

—¡Tétavicavapa eta máitupajjiasiravahi ema maca vimaestro! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatnacahi eta técatícava étapa eta une eta táepacusirahi! —nacahepa.

5

Ena achane návaháruhi ena ichapemuriqueneana éreanana
(Mt 8.28-34; Lc 8.26-39)

1 Títécapanapa te apachara eta cáquiure eta te apaquehe ticaijare Gadara.

2 Ánaqui tatiarihi eta ecariana. Tacahe, te tiúcupaicapa ema Jesús eta te pacure, tiúchujicavanepa ema émana achane návaháruhi ena éreanana.

3 Éma másihapahi eta te ecari, taicha macapenajuechavacahi eta covachana. Nájina náratahahini náitiacahini éma. Étaripa eta ichapepi cadena, vahi táratahahini.

4 Taicha máejeharipa nacaratata. Náitijivauchahi te cadena. Nanacavare eta grillo te mapiqui. Émasera mavenarurujica eta cadena, mavenarucavare eta mayehe grillo. Jéhesare, nájina naratahahini namansuchahini ema maca achane.

5 Eta máitaresirahi, eta mávirarehi tayehe eta ecari étapa eta mávapahi te anuqueheana mari. Tamutu sácheana, yátiana, tiptiararerecahi éma. Tíjarachava te márijahiana.

6 Tacahe, tiyerehipaichaha máimahapa ema Jesús, tijunapapa mapauchapa. Máepuyumirauchapa.

7-8 Ena Jesús, eta máimairahi ema achane, máichapa:

—¡Pijunijica ema maca achane, piti éreana! —máichapa.

Tiptiararecapa muraca eta majicapirahi ema achane. Ánipa macahe:

—¿Tájaha picha píteca pipauchanu, piti Jesús, Machichaquenevihi ema Viya? ¡Pájapanunu, vuíchaha picuvanecanu ánaqui te nucaicuñaiyayare! —macahepa.

9 Tacahe, ema Jesús mayaserecapa ema éreana. Ánipa maicha:

—¿Tájaha píjare píti?

Majicapapa éma:

—Núti nucaijare “Nacapenaharu ena ichapemuriqueneana éreanana”. Jéhesarehi, ichapemuriahavihi víti.

10 ¡Pájapanuhavisera! Te piáquijicahaviyarepuca, ¡vahi picuevatacavahi viyanaya te tiyerehi! —nacahepa ena éreanana tiávahácanahi ema achane.

11 Tiuri puiti, tatiarihivare eta camuriqueneanahi cúchiana. Tinihicanahi ánaqui te táemiripaisine eta masihi.

12 Tacahe, ena éreanana tiyaseuchavanapa mayehe ema Jesús. Ánipa nacahe:

—¡Picatajicahavi! Pévatacavahi eta te távihahi eta jena cúchiana. Písapahavi visiapahacavaca eta jénana —náichapa.

13 Tacahe, ema Jesús macuchuchujicavacapa eta te máquehe ema achane, másapapa nasiapahacavaca eta cúchiana. Tatiarihi cútimahi apina mil eta cúchiana. Tacahe, te tasamapa eta cúchiana eta nasiapahasiravacahi ena éreanana, tijunaparacanapa témiririjicanapa te tachausi eta cáquiure. Téririjicanapa tamutu.

¹⁴ Natiarihihisera ena tijaneacanainihi eta cúchiana. Te náimahapa, tiáramecanarinehi. Tiyananapa tijunapanapaipa, timetajiricanapaipa nácani nácapajiruvanapahi, étapa te avasare namutuvare nametaca. Tiáramicareínehi nayehe ena achaneana. Tiyananapa náimahapana tájahapuca eta táichavaquenevahi eta cúchiana.

¹⁵ Te títecapanapa, náimahapa ema achane návaháruinihi ena éreanana. Tétajaripahi te máivapechacaya ema Jesús. Tájinaripahi máichiravainahini. Ticamuirihaipahivare. Tásihasera, tipicanarinehi ena achaneana.

¹⁶ Tavetijipa te náitametacapa ena tímahanahi eta táichavaquenevahi eta cúchiana te macuchuchujicavacapa ena éreanana ema Jesús.

¹⁷ Tacahe, nayaseacapa ema Jesús váhini macuitecapauchavacaini tayehe eta návasahi éna, machavavanehini te másinehi.

¹⁸ Tacahe, te tiávacuhayarepa ema Jesús, ema achane manararuihi tiyaseserecapa eta mavarairapa máehica ema Jesús.

¹⁹ Émasera, vahi máisapahini. Ánipa maicha:

—Piyanchucha pichava nayehe ena pijaneanana te piávasa. Pimetacaya eta macanarasiravihi ema Viya taicha eta majapanuiravihi —máichapa ema Jesús.

²⁰ Tacahe, tiyanapa tichava ema achane. Timetajiricapaipasera mametacavacapaipa eta máichaquenehi ema Jesús mayehe. Náraminehi namutu ena ticavasanahi eta te provincia ticaijare Decápolis.

Ena Jesús macanaraca esu machicha ema Jairo, ésupa esu apana esena sucajumaquenehivare

(Mt 9.18-26; Lc 8.40-56)

²¹ Tiuri, tichavavarepa tiánueca ema Jesús te apachara. Te títecapapa, náurujiacavanepa ena ichapemuriqueneana achaneana te mávinehi te tachaui eta cáquiere.

²² Tacahe, títecapapa ema émana achane ticaijare Jairo. Ema maca achane, tétavicavahi eta mapicauchacarevahi. Tuparairucahi tayehe eta náurujiisireva. Te máitecapauchapa, tépuyucapa te mamirahu ema Jesús.

²³ Mayaseacapa, ánipa máichapa:

—Tátachicha, surarihi esu nuchichasami, ticajumahi. Puiti téñamajiricavaipa ésu. Picatajicanupaini, tata. Pinasinanu eta pivahuana suyehe apaesa sunaraca —máichapa.

²⁴ Tacahe, masuapapa ema Jesús. Tiyanapa máehicahi ema achane. Náehicavarepa ena camuriqueneana achaneana. Náevatajiricanecha éma.

²⁵ Tásiha, te nataracu sutiarhipahivare esu esena sucajumaquenehi. Doce áñoripahi eta sucajumairahi táichirahi eta suítine.

²⁶ Ichaperipa eta sucatajivairahi taicha camurianaripa ena típuchanahi médicoana. Títaharipa eta suímahaqueneanainihi. Tájinasera vahi suátivarehini. Suáviraparasiavaichuhi suvayuhapaichucha eta sujuma.

²⁷ Ésu, sutanucapaipahi ema Jesús, susamairiricahi eta tiáramicareana máichaqueneanahi. Supauchapa suéhiquécuchapaipahi te maquecu.

²⁸ Taicha tacahehi eta supanereruhi: “Taratachuchaini némamajiacahini eta ñimuiraha, németeaca nunaracapapucaini”, sucahesamurepa.

²⁹ Tacahe, suémamajiacapa eta tacheyarapi eta mamuiraha. Jéhesaréinehi, enurujipa tíchecha eta suítine. Tisamavapa ésu eta sunarasiraipahi tayehe eta sujumainihi.

³⁰ Émasera ema Jesús macaicutiaravanepa eta sutiarahirahi esu tacanararuhi eta máitupajijiasiravahi. Enurujiapa téviurucavahi te namuri ena ichapemurigueneana achaneana. Ánipa macahe:

—¿Nájaha témamajiacanuanahi?

³¹ Tacahe, ena máimitureana náichapa:

—Tata, téñatuhejiricacanañi namutu eta achaneana taicha ichape eta nasimutuvahi. Piyaserecahavirichahava nájahapuca ena témamajiacavianahi —náichapa.

³² Émasera ema Jesús máesenimurihapa, matanucapa nájahapuca ena témamajiacanahi.

³³ Tásiha, supauchapa esu esena. Tiyayacarepaipa taicha tipicaripahi. Taichasuéchahi eta suíchaqueneñi ésu. Suépyumirauchavanepa te mamirahu. Sumetacapa tamutu.

³⁴ Tásiha, máichapa ema Jesús:

—Tiuri, nuchicha. Pinaracapa puiti táichavenehi eta picasiñairanuhi. Vaipa picueñamava eta pichaviraya te pipena. Vaipa tichavañimahi eta pijumainñi —máichapa.

³⁵ Téchajiricavaichahahi ema Jesús eta suyehe esu esena, títecapananecha ena tiásihanahi te mapena ema Jairo. Nametacavanepa:

—Esu pichicha tépenasamipahi. Vaipa picucamesa ema Maestro —náichapa.

³⁶ Émasera ema Jesús vahi masuapahini eta nametasirahi. Mavara-haichucha tiyana. Tacahe, máichapa:

—Vahi picueñamava, piti Jairo. Pácasiñavachucha eta nuyehe —máichapa.

³⁷ Tacahe, ema Jesús vaipa máisapahini náehica ena apamuriana achaneana. Nacarinepa ema Pedro, ema Jacobo, émapa ema Juan.

³⁸ Te títecapanapa te mapena ema Jairo, máimahapa ema Jesús ena achaneana vaipa náitucarahahíni, tijajamurianaripahi eta náiyairahi. Tipiararecanaripahi muraca.

³⁹ Émasera ema Jesús eta masiapirahi, máichavacapa:

—¿Tájaha tacayema eta iúrujiricavahi eta ani, iyaharacavapa? Vahi ecuiyaha. Esu suca amaperu, váhinéni suépenahini. Tímacarichucha ésu —máichavacapa.

⁴⁰ Énasera ena achaneana nacaecahirichucha éma, técavanapa. Tacahe, ema Jesús macuchucavacapa te aneca namutu. Tacahe, tisiapapa te suávihahi esu amaperu, émapa ema suiya, ésupa esu suena, énapa ena mapanana máimitureana.

⁴¹ Tacahe, macaratavauchapa ésu. Máichapa:

—Nuchicha, néchajicavi. Péjamica, pécheputa —máichapa.

⁴²⁻⁴³ Enurujiapa esu amaperu téjamicapa, técheputa. Tipaicapa te namirahu. Ichaperineñi eta náramirahi ena tímahanahi. Tásiha, ema Jesús mavane-cavacapa náijaraca eta sunica esu amaperu. Matuparacavarepa muraca eta vahi nacuechajisiha eta náimahaqueneñi. Esu amaperu, dóceripahi eta suñañora.

Tacahe, tianapa ema Jesús. Tichavapa te mapena.

6

*Tichavapa ema Jesús te mávasa Nazaret
(Mt 13.53-58; Lc 4.16-30)*

1 Tacahe, te apanapa sache, tiyanavarepa tipaica. Tichavapa tayehe eta mávasa Nazaret, mámamurihapaipa ena máimitureana.

2-3 Tacahe, te jena sache sávarumuhuquene, tiyanapa tayehe eta náuruji-sirareva nayujarasirare ena achaneana. Timiturecapa. Camuriana ena tísamararacana. Ichape eta tahapasamurechiravacahi ena achaneana. Váhiserá návarahahini nasuapahini. Náepururichucha éma. Ánipa nacahe:

—¿Távihapuca mavínehi eta júcana máimiturapianahicacha emá máca? ¿Témunahiricavapa títupajijiacavaipahíjicacha! ¿Távihasica macaravahuinehi eta máichirayare eta tiáramicareana? Vivaraha vímaha víti apanava eta máichaqueneanahíji visamaiririruanahi. Taicha vímatihi emá maca. Carpintérochucha éma. Vímatihivare esu maena María. Vímatihivare emá maparape Jacobo*, émapa emá José, émapa emá Judas, émapa emá Simón. Vímatihivare ena esenana maparapenaveanahi, ticavasanahi ani —náichacacapa.

4 Ema Jesús máimatihí eta napanereruanahi. Tásiha, máichavacapa:

—Tatuparaca epicauchahaviya vimutu víti mavaneruana emá Viya. Étísera eti nujaneananahi ecavasanahi eta te juca víávasa, étipa eti nuparapenaveana, vahi epicauchanuhini —máichavacapa.

5-6 Éma, ichape eta máramirahi eta namasuapajiraivahi éna. Eta tacahe, tájina máimerecachichaini eta tiárami careana. Tacarichu eta macanarasirahi ena nacajumaqueneana eta máemamamahásiravacahi te mavahuana. Vahi camurianainahíni ena macanararuanahi.

Ema Jesús mavanecavacapa ena dócequeneana apóstoleana napaicayare tamutu avasareana, ticametairuanayare (Mt 10.5-15; Lc 9.1-6)

Tacahe, emá Jesús tiyanapa mapaicahi eta avasareana máimitucavacapaipa ena achaneana.

7 Étana sache, macurujimurihapa ena dócequeneana mayeheana apóstoleana. Tacahe, májaracavacapa eta náitupajijasiravayare naratahairayare náquijica ena éreanana. Tacahe, mavanecapa tiyanana eta te apanapaneana avasareana, apinanayarepahi eta napaisirayarepahi.

8 Matuparacapa, ánipa máichavaca:

—Tájina íámaimahi eta eyereruvana eta epaisiraya. Váhivare ecuama eta enirurucuha te alforja, étapa eta plata.

9 Étanarichuvare íámayare eta emuiríha. Tacarichu íámaya eta eyupairiqui. Ecaeparuvevayaresera.

10 Te ítecapapa tayehe eta jácani peti ítecapihaya te jácani avasare, ánasi tayehe. Te íuchucayarepa eta te jena avasare, epaenumava ejunijica eta ítecapihahi.

11 Te váhipuca nacujacapahe te jácani avasare, váhivare nacubaraha nacusamahe, íuchucavaneyare. Étatapevachavanumayaresera eta máteji te ívapeana. Táicutiarayare eta máicuñasiravacayare emá Viya taicha eta namavarairahi najacapahehíni. Nutupiruva numetacahe, te táitecapa eta

* 6:2-3 Ema maca achane, ticajarehí Jacobo te náechajiríruva ena israelítana. Te véchajiríruva, ticajarehí Santiago. Mapaenumavahi máehica emá Jesús te táequenepa eta máechepusirahí te máecari emá Víaquenu.

juicio, tiápajucavainapa eta náicuñayare. Tacachuricayare eta nacaicuñarayare ena achaneana váinarajiqueneana ticavasanaini te Sodoma étapa eta Gomorra —máichavacapa ema Jesús.

¹² Tacahe, tiyananapa ena dóceana. Ticametarairuana eta tacamunuirayarehi eta náeneuchiravaya ena achaneana, náinajica eta napecaturana.

¹³ Náimijunavacapaipa ena éreanana tiávahácanahi ena achaneana. Camurianahivare ena nacanararuana tayehe eta najumanaini, nacapajasisirapahi te nachuti eta aceite.

*Éma Herodes masamairiricapa eta máichaqueneanahi ema Jesús
(Mt 14.1-2; Lc 9.7-9)*

¹⁴ Tacahe, ema Herodes ema aquenucahi tayehe eta Galilea masamairiricavarepa eta máichaqueneanahi ema Jesús, taicha náechajisihahi namutu ena achaneana. Nararihi ena téjcapavanahi eta napanereruana, ánipa nacahe:

—Éma maca Jesús, ζváhipuca émaina ema Juan Ticahasiricarahíni macaparuhi ema Herodes? Tichavahichupuca titareca. Étapuca tacahehi puiti maratahahi maicha eta tiáramicareana —nacahepa.

¹⁵ Nararihisera ena apamuriana nacahepa:

—Émapuca ema víyarahaini profeta Elías, téchepucahi.

Éna apamuriana nacahepa:

—Émarichuhi profeta, macutiquenehi ena náinapureanáini antivuanaini. Váhisera téchepucaimahi éma —nacahepa.

¹⁶ Émasera ema Herodes, eta masamairirisirahi, macahepa:

—Németeacahi ema maca émaripa ema Juan, ema náimiyuchatiqipiquenurehi, téchepucahipuca te máecari —macahepa.

*Éta táichararacavahi eta máepenirahi ema Juan
(Mt 14.3-12)*

¹⁷⁻¹⁸ Éta macapasirahi ema Herodes ema Juan, ani tacahe eta táichararacavahi: Te jena año, ema Herodes mavehahi esu Herodías, esu machinenahi, mayenahi ema maparape Felipe. Máiminajicapa ema suima. Tacahe, ema Juan macajachavacapa éna eta naviracacairahi. Étapa tímicitichahi ema Juan, sucatichapa esu Herodías. Tásiha, ema Herodes máeratacapa te cárcel ema Juan, macavanairipipa náitiaca te carenapi.

¹⁹ Esu Herodías, tétavicava eta sucaticirahí ema Juan. Suvarahahi sucapaca éma.

²⁰ Váhisera suratahaini, taicha matsirihacahi mapicauchahi ema Herodes ema Juan, taicha máechahi tétavicava eta máurivahi ema Juan. Máimatihivare eta mavaneruhi ema Viya. Éta tacahehi, macatiuchahi éma apaesa tacuija suícharaca ésu. Táitusiava, ema Herodes máuricapa masamararacahi eta máimiturapiana ema Juan; váhisera máituruequenehahini tájahapuca máichararacavayarehi.

²¹ Tacahe, eta te jena yati ticaijaremuhupa ema Herodes, sucamapurapa esu Herodías eta máepiyasirahi eta ichape piesta ema Herodes. Máichuhapa ena máevanachana énapa ena oficiáleana, énapa ena ticaimahaqueneana ticavasanahi tayehe eta Galilea.

²² Te tinicanapa téranapa, esu suchicha esu Herodías tisiapapa eta te návihahi ena achaneana. Esenachicharipa ésu. Tírimaicapa te namirahu. Éma Herodes máuricainehi ichape, énapa ena machimarana.

²³ Tacahe, ema Herodes máichapa ésu:

—Nujuracha te pimirahu. Piyaseacanu tájahapuca eta pivarahaquenéna. Núti níjaracaviyare jácani piyasearunuyare, tayanapane vácuticaca eta nímahaqueneana —máichapa ésu.

²⁴ Tacahe, tiyanapa tiúchucapa esu amaperu. Suyaserepanapa esu suena, ánipa suícha:

—¿Tájahapuca eta nuyaseacaini eñi ñina Herodes? —sucahepa.

Tásiha, suíchapa esu suena:

—Píyaseacaya eta ñichuti eñi Juan, puítinarichu ñíjaracavi —suíchapa.

²⁵ Enurujipa tichava tisiapa esu amaperu eta te mávihahi ema aquenuca Herodes. Suyaseacapa éma, ánipa suícha:

—Nuvaraha píjaracanu puítinarichu eta ñichuti eñi Juan eñi tícachasiricarahi. Píjaracanu te curuja —suíchapa.

²⁶ Tásiha, eta masamirahi eta juca suyasearuhi ema rey Herodes, ichapereñehi eta mapanereresirahi. Váhisera mávarahahini mavayuacahini ésu táicha nasamaripahi ena machimarana eta máíjarasirayarehi eta suyasearu-yarehi ésu.

²⁷⁻²⁸ Tacahe, enurujipa mavaneca ema suntaru eta te cárcel. Mayuchati-piquenuhapana ema Juan. Tacahe, mámapaipahi eta machutini te curuja. Máíjaracapa esu esena amaperu. Tásiha, suíjarapanapa esu suena.

²⁹ Te nasamairiricapa ena máimitureana ema Juan, tiyananapa náepanapa eta máquehéni, náecarapanapa.

Éma Jesús máitaparahavacahi máenicavaca ena camuriqueneana achaneana (Mt 14.13-21; Lc 9.10-17; Jn 6.1-14)

³⁰ Tacahe, tichavanapa tiúrujicavana ena apóstoleana mayehe ema Jesús. Nametacapa tamutu eta náichaqueneanapahi étapa eta najacapirahi ena achaneana eta náimiturapianahi.

³¹ Tacahe, máichavacapa ema Jesús:

—Tiuri. Tájina táichava. Puiti viyana vácarichu eta te mávapahi apaesa vinaraca ánipina —máichavacapa.

Taicha vahi téjiacavana ena achaneana. Tévacahajiricacanahi tiyanana. Vahi náitujicavahini nanicanumahini ena apóstoleana émapa ema Jesús.

³² Tacahe, tiyananapa te pacure, tiávacuhanapa. Nacaijuhepa te mávapahi apaquehe.

³³ Énasera ena achaneana nanecapaichucha eta nayanirahi. Camurianahi ena tímatianahi. Tacahe, tiyananapa tijunapanapaipa, nametapanayarehi ena apamuriana achaneana. Tásiha, tiúrujicavanapa ena tiásihana te tamutu avasareana.

³⁴ Te tiúcupaicapa ema Jesús, máimahapa ena camuriqueneana achaneana natiaririhiripahi. Tétavacavainehi eta majapanuiravacahi, taicha nacutihi eta uvesana nájina tijaneacaina. Tacahe, máimitumuriharipa. Camuri eta máimiturapiana. Tiuna eta máimitusiravacahi.

³⁵ Te cáperehipa, ena máimitureana napauchapa éma. Náichapa:

—Cáperehipa juca sache. Tiyerehivacahi eta pétiana.

³⁶ Tacahe, táuricapa pimetacavaca ena achaneana nayanapa, navchareca eta nanica te jácani isanitiana, avasarechichanapuca te vichacayarahanahi. Taicha ani, tájina naviyaimahi eta nanicahini —náichapa.

³⁷ Majicapapasera éma:

—Íjaraca étina eta nanica.

Éna náichavare:

—¿Pivarahapuca viyana vivachareca eta pan? Tacamunuhi vácayehhini eta camuri plata apaesa námútupaini vitaparahahini vénicahini apaesainahini návaminahini. ¡Vahi taratahahini eta dies mil páneana! —nacahepa.

³⁸ Tacahe, mayaserecapa ema Jesús:

—¿Áyana eta pan ecayehe puiti? Eyana ímaha.

Te náechapa, nametacapa:

—Cíncochichaichu eta pan, apiquipa eta jima jitaruca —nacahepa.

³⁹ Tacahe, macavanairipipa náejahahacapaicahini namutu te muíjipahi, náijamuripaichuhi.

⁴⁰ Tacahe, téjahapacanapa ena achaneana. Náijamuripaichuhi eta náejasirahi. Cincuantanapahi, ciéntoanapahi.

⁴¹ Tacahe, ema Jesús mavehapa eta cincoquene pan étapa eta apiqui jima. Máesenicapa eta te anuma. Mahasulupayachapa ema Viya. Mayuvetu-tujicapa eta pan, tásiha máijaracapa ena apóstoleana. Éna, náijaracapa ena achaneana. Énerichuvare mayuvetutuhesinavare eta apiqui jima. Tisimurivacapaipa eta náijaraca.

⁴² Tacahe, námutu tinicana, tisatueanapa.

⁴³ Tásiha, nacaemacharichahavare eta doce saye ichapehiana táinicachavacaichahava eta náemacharajiana eta pan étapa eta jima.

⁴⁴ Camuriana ena máeniruanahi. Te nataracu, natiarihahi ena cinco mílqueneana ajairana.

*Éma Jesús mapaicaeca eta une
(Mt 14.22-27; Jn 6.16-21)*

⁴⁵ Te tamutupa, enevanepa mavanecahi ema Jesús tiávacuhana eta te pacure ena máimitureana. Tínapucanayarehi tiánuecana te apachara eta te avasare Betsaida. Émasera ema Jesús manasiyarehi máevatamurihanumayarehi ena achaneana.

Tásiha, tiyananapa ena máimitureana.

⁴⁶ Tacahe, te tamutupa eta macametavairahi ema Jesús nayehe ena achaneana, tiyanapa tiápanahi tayehe eta anuquehe mari. Tiyujaracayarehi tayehe.

⁴⁷ Tacahe, te tiúyatipa jena yati, ema Jesús manasirichaha macarichuhi eta te anuquehe mari. Ena máimitureana itupierecanaipa tayehe eta cáquiure.

⁴⁸ Tásiha, tachimaracavacapa eta muraca técatícava, nácapaquihipa. Te tijarahipa, ema Jesús máimahapa eta nanausirapahi muraca. Tacahe, tiyanapa macapayamuriha. Mapaicaecapaipa eta une. Máetavicavacapai-pasera.

⁴⁹ Éna máimitureana tipicanarinehi eta náimairahi eta mapaicaesirapahi eta une, náimijachaipahi cunare.

⁵⁰ Tipiararecanapa namutu eta náimairahi. Máechajicavanepasera éma. Ánipa maicha:

—Vahi ecupica. Nútichucha. Étumechava —máichavacapa.

⁵¹ Tacahe, mapauchapa éna. Tiávacuhapa nayehe. Tacahe, tíjahúchavapa tíchecapa eta técatícava. Náramirinehi ichape ena máimitureana.

⁵² Taicha vuíchaha nacaicitiarahini eta tacayemaquenehi eta macaejapa-sirahi eta pan, eta táimereuchirahi éma eta vanairucairahi me Viya. Muracasamuremurianarichaha.

*Ena Jesús macanaraca ena nacajumaqueneana ticavasana te Genesaret
(Mt 14.34-36)*

⁵³ Tacahe, te apanapa sache, tiápechavanavarepa tiánuecana eta cáquiure. Títécapanapa eta te avasare ticajare Genesaret.

⁵⁴ Te tiúcupaicanapa, náitiacapa eta napacure. Ena natiarihiqueneanahi náimativanepa ena Jesús.

⁵⁵ Tásiha, tiyananapa tijunapana timetajiricanayarehi tayehe tamutu eta avasarechichana tachacayarahanahi. Tacahe, tiúrujicavanapahi ena achaneana te jácani máitecapihapahi ena Jesús. Námavacapaipahi eta te áchuji ena nacajumaqueneana.

⁵⁶ Énerichuvare, te jácani mayanihapahi te acheneana téhepuca cálleana, nanaquipaicapahi ena nacajumaqueneana. Tacahe, nayaseacapahi éma máisapirainahini náemamajiaca eta tacheyarapi eta mamuiriha. Tacahe, nácani témamajiacanapahi, enevanepaipa tinaracanapahi.

7

*Ena Jesús mametaca ena achaneana eta timaeperajicarahi
(Mt 15.1-20)*

¹ Tiuri, te apanapa sache, náitecapauchapa ena apamuriana fariséoana énapa ena escribánoana, tiásihanahi tayehe eta Jerusalén. Témeñahavanapa eta mayehe ena Jesús.

² Te nataracu ena máimitureana ena Jesús, nararihi éna vahi nacasipavahunumahini eta nanisirahi. Tacahe, ena fariséoana, eta náimairahi eta namaitauchirahi eta nayeherepihi, ichaperinehi eta nasemanevahi, taicha náimijarechahi “máeperaji” eta juca.

³ Taicha namutu ena israelítana, napicauchahi eta nayeherepiana ena náchucanaveanaini, navetijipa ena fariséoana. Te vahi ticasipavahunumanahi, váhivare náisapaimahi tinicana. Taicha éna vahi návaraha tánasihini eta tachipejihini ánichichainahini, taicha tipicanahi tamaeperajicahini eta náchanevana.

⁴ Étaripa násihapahipuca te mercado, te plázapuca, te títécapanapa te napena, ticasipavahuanayarehi. Maverá eta apamuri nayeherepianahi tipicauchacareanahi nayehe, étaripa eta nasipasiraparaca eta náereresiana, éta eta jarra, éta eta návacuruhiana éta eta catre náimasirare.

⁵ Tacahe, nacajachapa ena Jesús ena fariséoana énapa ena escribánoana. Ánipa náicha:

—Pímaha. Ena pímitureana vahi náitauchahini eta viyeherepi. Namaeperajicapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? — náichapa.

⁶ Tacahe, majicapapa ena Jesús, ánipa maicha:

—¡Éti ecajarehi apimirahe! Tatupiruvahi eta máechajiriruvahi ena Viya, téchajisiahehi éti eta te Sagrada Escritura. Ánipa macahe: “Ena nani achaneana, tétsarajicanuanahi te najaca; váhisera táetupicavahini te nasamureana.

⁷ Téneuchavanahi eta nuyehe, tamapurujihisera eta náeneuchiravahi. Nacaerajicahivare eta nuvanairipiana; tasapihapa náimicapicauchahi eta

nayeherepiana táuchurechucha te napanereruana ena náchucanaveánaini” macahepa ema Viya.

⁸⁻⁹ Ichape eta éjecipiravahi éti, taicha tasapihapa epicauchahi eta eyehe-repiana. Étasera eta mavanairipi ema Viya, vaipa epicauchahini. Tasapihapa épuruhi eta mavanairipiana taicha tivayuacahehi ichape eta ítauchirahi eta eyeherepiana.

¹⁰ Émarichuhi ema víyahaini Moisés tiájuchahi eta mavanairipi ema Viya eta viyehe: “Pipicauchaya pémunacayareva ema piya ésupa esu pena”. Jucar-ihí eta apana vanairipi: “Mácani tiúmehahi ema maiya ésupa esu maena, vahi tijapanucarémahi nacapacayarehi”.

¹¹⁻¹² Étisera vahi epicaucha eta júcana vanairipiana mayehe ema Viya. Taicha te mararhipuca mácani achane ticamavahupuca me Viya eta máimahaqueneanahi, eta ímiturapi éti “Vaipa tatuparacaimahi ema achane eta máimicatasiraya ema maiya ésupa esu maena”.

¹³ Ani tacahehi eta ecaepahaira eta tasuapacarevahi eta mavanairipiana ema Viya. Tasapihapa, ímicapicáuchahi eta eyeherepianachucha. Jararihivare eta apamuriana eta éjecipiravanahi tavasiqueneanahi — máichavacapa ema Jesús.

¹⁴ Tacahe, máichuhapa ena achaneana, náurujicava eta máimitusiravacayare. Tásiha, máichavacapa:

—Nuvaraha esamanu yátupina, apaesa ácaicutiara.

¹⁵⁻¹⁶ Tájjina timaeperajicaina eta víachanevana te vahi vicasipavahunumahi te vinicayare. Vahi étaparacaina eta vinicaqueneana. Étasera eta jácani evainarajivana táuchureanapuca te ejaca, étapa eta evainarajipanereruana; jéhevare éta timaeperajicahehi —máichavacapa.

¹⁷ Tacahe, te tiyanaracanapa ena achaneana, macarinépa ema Jesús énapa ena máimitureana, nayaserecapa máitametacavacahini eta máimiturapi.

¹⁸ Tacahe, máichavacapa:

—¿Énerichuvare éti mapanererurehe? ¿Váhipuca ácaicutiarahini eta juca? Tamutu eta juca tasiapaqueneanahi te vijaca vinicasareanahi, vahi timaep-erajicahavimahi, taicha vahi tasiapa te visamure.

¹⁹ Tatupiruhi te vijuhe. Tásiha, te tiúchucapa eta, apanapa eta táuchusihahi —máichavacapa ema Jesús. (Eta máichiravacahi eta juca, máimicaecherachapa eta táurivahi tamutu eta tinicacareana.)

²⁰ Macahevarepa:

—Étasera jácani panererucana tamauriqueneana, te náisapavapuca ena achaneana, étara timaeperajicavacahi éna.

²¹⁻²² Taicha te amahe eta nasamureana napanerechahi eta tamauriqueneanahi. Ema achane mapanerechahi máveha esu apana esena mayena ema apana achane. Esu esena supanerechahivare suveha ema apana achane suima esu apana esena. Éna amaperuana napane-rechahi eta natuhusivaya. Nácani tipanerechanahi eta ticaparecana, tiámerecana, tivayuarecana, téchajihihana. Te nasamureana, najamu-racha eta apayeheana, ticapinarurahiana, tétserajicavana eta nasiñavairahi. Mapicaurairahana, camuriqueneana eta napanerucana máchecharaireana.

²³ Tamutu eta juca panererucana tamauriqueneana tiásihahi te nasamure-ana. Jéhesare, eta júcana eta timaeperajicahi eta náchanevana ena achaneana —máichavacapa ema Jesús.

*Esu ésuna esena apavasana sucasiña ema Jesús
(Mt 15.21-28)*

²⁴ Tacahe, tiyanavarepa tipaica ema Jesús, énapa ena máimitureana. Nacajuheyarehi eta avasareana táunavanahi eta provincia Siria. Tásiha, títecapanapa te jácani peti. Váhisera mávarahahini náechahini ena apamuriana achaneana eta matiarihirahi. Tásihasera náecharichucha éna.

²⁵ Tacahe, susamairiricapa esu ésuna esena. Ésu, apavasana, sirofeníciana. Eta suéchejiriruva eta griego. Esu suchicha mávaháruhi ema émana éreana.

²⁶ Títecavanepa esu, suépyumirauchapa te mamirahu ema Jesús. Tiyaseuchavapa mayehe ema Jesús eta máimijunijicahini ema éreana suyehe esu suchicha.

²⁷ Tacahe, máichapa esu:

—Nativaya néchapajiricavaca ena nujaneanana. Taicha vahi táuricahini ásapihahini néchapajiricahehine éti apavasana, émétavichahini ena nujaneanana —máichapa.

²⁸ Esu esena sujicapapa:

—Énehineni tacahehi, tátachicha. Yátupihahi vahi pijaneananuinahini. Pájapanunusera, picatajicanuchachini. Víti apanava vácasiñavahini eta piyehe eta vítátijivairaina —suíchapa.

²⁹ Tacahe, máichapa ésu:

—Tiuri eta péchajiriruva. Piyanapa pichava te pipena. Táichavene eta picasiñairanuhi, nímijunijicaripa ema éreana suyehe esu pichicha —máichapa.

³⁰ Tacahe, tichavapa ésu te supena. Suchimapapa tívecahi esu suchicha te sucamane. Jéhesaréinehi, májinaripa ema éreana, majunijiacaripa ésu.

Ema Jesús macanaraca ema túhuquiña upa

³¹ Tacahe, tiyanavarepa tipacana najunijicapa eta provincia Siria. Nánucuhapa eta provincia ticajare Decápolis. Tacahe, títecapanapa eta te tachaui eta cáquiure Galilea, te tinapaica te táuchusine sache.

³² Tacahe, ena achaneana námapa ema émana achane mayehe ema Jesús. Túhuquiña, úpavare ema achane. Náechajiuchapa eta manaca eta mavahu mayehe ema achane, macanarasirayarehi.

³³ Tacahe, ema Jesús mañajichapa ema achane nayehe ena achaneana. Manacapa eta masuveraqui te maquiñana. Tacahe, tiátutuquivauchavapa. Tásiha, máemamacapa eta manene ema achane.

³⁴ Tacahe, máesenicapa te anuma. Tiúmitipa. Tacahe, máichapa:

—¡Téchujihapa eta piquiñana!

³⁵ Enurujipa tisamarahipa ema achane. Tijimuyapa eta manene, tiúripa téhejica.

³⁶ Tacahe, máimichavapa ema achane nayehe ena majaneanana. Matuparacapa éna eta nacuija nametaca. Énasera timetajiricanaichucha.

³⁷ Tétavacava eta náramirahi ena nametaruanahi. Ánipa nacahe:

—Tétavacava táuricacareva tamutu eta máichaqueneanahi ema Jesús. Téchajicanapahi ena úpana, tisamarahianavarepa máicha ena túhuquiñana —nacahepa.

8

*Ena Jesús tiápechava máenica ena achaneana
(Mt 15.32-39)*

1 Tacahe, eta juca sácheanahi tiúrujicavanapa ena ichapemuriqueneana achaneana te mávihahi ena Jesús. Mapanaripa sache nacahehi ena achaneana, tájinaipa nanicahini. Tacahe, máichuhavacapa ena Jesús ena máimitureana. Máichapa:

2 —Nujapanuvaca ena nani achaneana, taicha mapanaripahi sache puiti eta nacahehi eta viyehe. Tájinaipavare naviyahini nanica. Téchurihanaripa eta nanicaquene.

3 Te névatacavaca nayana te napenana, machu náquipaicava te achene taicha vaipa túmevacaimahi eta náecuavahi. Taicha natiarihi ena tiásihanahi te tiyerehiana. Vénicavacayare —máichapa.

4 Tacahe, najicapapa ena máimitureanahi. Ánipa naicha:

—¿Távihapucaini viviyahini eta vénisihayarehi ena nani camuriqueneana achaneana? Eta te juca mávapahi vámahí, tájina vítusiáváimahi eta tinicacareana —nacahepa.

5 Tacahe, mayaserecapa éna. Ánipa máicha:

—¿Áyanachaha eta pan eta íamaqueneanapahi?

—Jucarihi siéterine —náichapa.

6 Tacahe, macavanairipipa eta náejahapaimuriahini namutu ena achaneana. Tacahe, mavehapa eta siétequene pan, mahasulupayachapa ena Viya te anuma. Tásiha, mayuvetucavacapa, máijaracapa ena máimitureana. Éna, náijaracavacapa ena achaneana.

7 Tatiarihivare eta ánimurichicha eta jímachichana. Mahasulupaya-chavare ena Viya tayehe eta jima. Tacahe, mavanecavarepa eta náijarasiravacayare ena achaneana.

8 Tacahe, tinicanapa namutu, tísatuheanapa. Tacahe, nacurujiapa eta náemacharájiana. Siete sáyerichahivare eta náemachana.

9 Eta nasimutuvahi ena tinicanahi táetavica eta cuatro mil achaneana. Tacahe, te tamutupa eta juca, máevatumuríhasarepa ena Jesús ena achaneana nayanaya nachava te napenana.

10 Enurujipa tiávacuhanapa te pacure ena Jesús énapa ena máimitureana. Tiyanavarepa. Tiánuecana nacaijuhepa eta te avasare ticaijare Dalmanuta.

*Ena Jesús macajachavaca eta namasuapajiraivahi ena fariséoana
(Mt 16.1-4; Lc 12.54-56)*

11 Tacahe, tútecanapapa ena apamuriana fariséoana. Tépanavanapa nacanarajirica ena Jesús. Eta navarairahi náimiaquipaicayarehi, nayaseacapa máimerecaini eta tiáramicareana, máimerecavahini te yátupihipuca vanairucahi me Viya.

12 Tásiha éma, tichuruamichavarine muraca. Tacahe, máichavacapa:

—¿Tájaha tacayema eti achaneana eyaseacanu nímereca eta tiáramicareana? Núti nímatihe. Vahi esuapanuimahi te nímerecapucaini eta tiáramicare. Tásiha, váiparine étina tatuparaca ímahahini eta tiáramicareana —máichavacapa.

13 Tacahe, majunijicavacapa éna. Tiyanavarepa tiávacuha te pacure. Tiyananapa tiánuecana te apachara eta cáquiure.

Éma Jesús máimiticaha eta levadura eta apimirairanahi ena fariséoana
(Mt 16.5-12)

¹⁴ Tiuri puiti, náemitiscahi ena máimitureana eta nanirurucuha. Tatiarihi-hisera eta étanahi pan eta te pacure.

¹⁵ Eta nayanirahi, máimitumurihapa ema Jesús éna. Máichavacapa:

—Tímaticarehi eyehe eta levadura eta tasisijisira tamutu eta masa. Tacu-tirichu eta tapareasirahi eta apimirairavacahi ena fariséoana étapa eta tacañamarasira eta ecaimahaquenerayare. Vahi ecucuti ena políticoana. Échapaváicha tayehe, machu éhica éna —máichavacapa.

¹⁶ Tacahe, náichacacapa ena máimitureana. Ánipa nacahe:

—Tímicajachahavihi eta vémitisisirahi eta pan. Eta tacahe, macahehi tayehe eta levadura.

¹⁷ Éma máimatiacavacapa. Tásiha, máichavacapa:

—¿Tájaha tacayema ecahechajiriruvahi eta émitisisirahi eta pan? ¿Vuíchahacaru ácaicutairahini? ¿Tájinacaruichaha epanereruina éti? ¿Muracachutiherichaha?

¹⁸ Tamapurujichuchapuca eta ímairahi eta níchaqueneana. ¿Vuíchahacaru ácaicutiarahini? Tamapurujipuca eta esamirahi eta nímiturapiana.

¹⁹ ¿Váhivare échahini eta nucaejapasirahi eta cincoquene pan, naniruhi ena cinco mílqueneana achaneana? ¿Áyanahi sáyeana eta náemacharajiana evehaqueneanahi? —máichavacapa.

Tacahe, najicapapa:

—Doce sáyeana.

²⁰ —Étapa eta siétequene pan naniruhi ena cuatro mílqueneana achaneana, ¿áyanahivare sáye eta náemacharajianahi evehaqueneanahi? —máichavacapa.

Najicapavare:

—Siete sáye —náichapa.

²¹ Tacahe, máichavacapa:

—¿Vuíchahacaruva ácaicutiara? —máichapa.

Éma Jesús macanaraca ema émana achane púchuqui eta te avasare Betsaida

²² Tiuri, títecapanapa eta te avasare Betsaida. Ánaqui, námapa ema achane púchuqui. Náechajiuchapa éma eta macanarasiraya ema Jesús.

²³ Tacahe, ema Jesús macaratavauchapa ema púchuqui, mámapa te tachachacu eta avasare. Tacahe, mayajihauquichapa eta máture eta te máuquihana. Tásiha, manacapa eta mavahuana eta te machuti. Tásiha, mayaserecapa:

—¿Pímairiricapa? —máichapa.

²⁴ Tacahe, téseninicapa ema púchuqui. Macahepa:

—Nímairiricapa apaesa. Eta nímairahi ena achaneana, ticutimahichuchasera yucuquiana, tiyamuricanahisera —máichapa ema púchuqui.

²⁵ Tacahe, ema Jesús mápechavare manaca eta mavahuana eta te máuquihana ema púchuqui. Te mavehapa eta mavahuana, yátupipa tijarahipa eta máimairirisirahi. Tamutupa máimaha.

²⁶ Tacahe, ema Jesús máevatacapa ema púchuquinihi, mayanapa te mapena. Máichapa:

—Píyanapa pitupiru te pipena. Váhisera picusiapa eta te jena avasare eta píyanihaya —máichapa.

Ena Pedro máimereucha ena Jesús émairahi ena Cristo

(Mt 16.13-20; Lc 9.18-21)

²⁷ Te táequenepa eta juca, tiyanavarepa tipaica ena Jesús, énapa ena máimitureana. Nacaijuhepa eta te avasarechichana tachacaya eta ichape avasare ticaijare Cesarea, máepiyaruihí ena rey Felipe. Eta napaisirapahi, mayaserecapa ena máimitureana. Ánipa maicha:

—¿Tájaha nacayema ena achaneana eta nuyehe? ¿Nájahanuhipuca náimijachanuhi nútí? —máichavacapa.

²⁸ Tacahe, najicapapa:

—Ena apamuriana náimijachavihi téchepuca ena Juan Tícachasiricarrahini. Ena apamuriana tímijachavianahi ena víyarahaini profeta Elías, téchepucahi éma. Ena apamuriana tímijachavianahivare ena mácani apana profetaini antívuini, téchepucahi —náichapa ena máimitureana.

²⁹ Tacahe, tiápechavavare mayaserecavaca:

—Étiyapa, ¿nájaha ímijachanuhi nútí?

Majicapavanepa ena Pedro:

—Pítira yátupiquenévihi Cristo —macahepa.

³⁰ Tacahe, matuparacapa muraca éna, nacuija nacumetaca eta émairahi ena Cristo.

Ena Jesús tímereuchava eta máepenirayare

(Mt 16.21-28; Lc 9.22-27)

³¹ Tacahe, tépanavapa máimitucavacahi eta táichararacavayare eta máepeni-rayare. Ánipa maicha:

—Nuti Manerejirunuhi ena Viya, nutuparahaichuhi ichapemuri eta nucatajivairayare. Tépurunuanayare ena tuparairucana énapa ena aquenu-carahana. Éna, tímicapacuanayareva. Mapanayareichuhisera sache eta nucaheyare eta népenirayare. Tásiha, nuchavayarehi néchepuca —macahepa.

³² Máimicaecherachapa eta macayemaquenehi. Tacahe, ena Pedro máiputsiacapa ena Jesús. Ánaqui macajachapa, máijarasiravahi eta mapaner-ruhi.

³³ Tacahe, téviurucavapa ena Jesús. Máesenicapa ena apamuriana máimitureana. Tásiha, macajachavarepa émapava ena Pedro. Máichapa:

—Píti, téjecapavahi eta pipanereruhi. ¡Pínajica eta juca tamauriquenehi! Pivarahapa pihapapica eta mapanereruhi ena Viya. Eta juca pipanereruhi tacutíhi eta mapanereruanahi ena Satanás, énapa ena machanerana —máichapa.

³⁴ Tacahe, máichuhavacapa ena máimitureana énapa ena apamuriana achaneana. Máichavacapa éna:

—Nácani navaraha náehicanu, tacamunu náinajica tamutu eta tihapapirica eta náehisiranuhi. Nacaravahuyareva eta nímiturapiana.

³⁵ Nácanisera téñamanahi eta náitaresira, tiávamirahuanaya eta náehisiranu, énajivayare ticamitiequenehavanaya eta náitaresira. Énasera nácani yátupi tjaracavana téhicana eta náehisiranuhi, étapa eta námirahi eta tíurina échajirirucava, tayanapane táimicapacavacapuca, éna tíujicavanayare tíuchuc-hayare eta náitaresiranaya.

³⁶ Énerichuvare nácani tacaëñamararuanahi eta nacaimahaquenéiraya te juca apaquehe, tiñehiyare eta náitaresira taicha eta tacaëñamarasiravacahi

tahapapiricavacahi tayehe eta náuchucuirayarehini. Tiyananainapa eta te yucu nacaicuñaiyayare.

³⁷ Taicha vahi máratahaimahi mácani achane mavachachahini eta máurivaya te apana vítaresira.

³⁸ Énaripa nácani titsirihanapuca téhicanuana, náimitsirihapuca eta nímiturapiána te namirahuana ena achaneana mapicauruirahana pecatumareana, núti apanava nutsirihayareva nayehe ena nani. Nucaerajicainapa ena nani, nuti Manerejirunuhi ema Viya, te táitecapapa eta sáchezare nuchavirayare aquenucanuinapaipa. Te jena sáchezare, námainapaipa núti eta majaraíva ema Tata, nucachanépaipa ena sántoqueneana ángeleana.

9

¹ Énerichuvare máichavacapa:

—Nutupiruva numetacahe: Puítiripa te etaracu éti etiaríhi éti vahi épenavánemahi, ímahanunumaya eta táepaniraya eta nítipajijiasiravahi eta nucatuparahairahi aquenucanuya me Viya —máichavacapa.

Éma Jesús tihapamaichava eta máimahi

(Mt 17.1-13; Lc 9.28-36)

² Tiuri, sáísipa sache eta nanasirahi ánaqui. Tacahe, ema Jesús manaquicavacapa ena máimitureana. Nacarinehi máma ema Pedro, ema Jacobo, émapa ema Juan. Tiyananapa eta te étana mari anuquehepana. Nacarichu éna. Eta ánaqui, náimahapa tihapamaichavahi eta máimahi ema Jesús te namirahu éna. Tétavicavapa eta tajapuvahi tajararasirahi tamutu eta máquehe.

³ Eta mamuiríha, táetaviucha eta tajanunumesirahi. Nájina tiratahaina tépachinacha tajanunumecahini náicha eta muíriare.

⁴ Tacahe, tiáramicarenavarepa tímerecavana ena apina ajairana: ema víyarahaini profeta Elías émapa ema víyarahaini Moisés. Téchajiricavanaripahi mayehe ema Jesús.

⁵ Tásiha, ema Pedro tímisiapavapa, téchajicapa ema Jesús. Ánipa macahe:

—Tata Náquenu, tétavicavapa táuricacareva eta viávihairahi eta ani. Tiúripa nahipucaini vépiyacahini eta epenahuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías —máichapa.

⁶ Váhinéni máimatiequenehaini ema Pedro tájahahipuca eta mavarahaquenehi macayema. Namutu tíñacavana íchape ena mapanana máimitureana.

⁷ Tacahe, tiáramicarenavarepa eta úcaji táepacúmurihahi éna. Nasamavarepa eta mahu ema Viya tayehe eta úcaji. Ánipa macahe:

—Éma máca, ema yátupiquenehi nuchicha némunaruquenehi. Éma esuapayare —macahepa.

⁸ Tíjahúchavavarepa, te náesenicavarepa, macarinehi ema Jesús. Nájinaripa ena apinana náimahaqueneanahi.

⁹ Tacahe, te tichavanapa tíucupaicanavarepa, ema Jesús matuparacavacapa éna. Ánipa maicha:

—Vuíchaha ecumetajirica eta juca ímahaquenehi puiti. Tiámainucava te nécheputa te nécarí núti —macahepa.

¹⁰ Tásiha, nasuapa eta matupararuhi. Napanerequenehahisera eta macayemaquenehi. Tiyaserejiricanapa:

—¿Tájahapuca tacayemarihi eta máechepusirayare te máecari? —nacahepa.

11 Te tichavanapa tayehe eta anuquehe mari, nayaserecapa éma, ánipa naicha:

—Ena escribánoana títucanahi eta machavirayare tiápechavaya títareca ema víyarahaini Elías, títupucayarehi eta pímeresiravayarehi píti Cristo. ¿Énapuca téjcapavanahi ena escribánoana? —náichapa.

12-13 Majicapapa ema Jesús:

—Yátupi, ema víyarahaini Elías títecapayarehi, máetupiripanayarehi tamutu. Nútisera numetacahe: Títecaripahi ema Elías, váhisera náimatihini ena escribánoana. Váhivare najacapahini ena tuparairucana éma. Nacatianacahisera nacapacahi éma, tacuti eta táechajisihaqueneanahi eta Sagrada Escritura eta máichavaquenevayarehi éma. Ene nucaheyare nútí Manerejirunuhi ema Viya. Ticianacanuanayarehivare, tépurunuanayarehi. Ichape eta náemecatajichiranuyare eta náimicapasiranuya, tacutihi eta táechajisihaquenehi eta Sagrada Escritura eta nuyehe —máichapa ema Jesús.

*Ena Jesús macanaraca ema amaperu mávaháruhi ema éreana
(Mt 17.14-21; Lc 9.37-43)*

14 Tacahe, te tichavanapa éna te návihahi ena apamuriana máimitureana, natiarihihi ena camuriqueneana achaneana te nachacaya. Natiarihihivare ena apamuriana escribánoana, nacanarajiricavacahi ena máimitureana.

15 Eta náimairahi ema Jesús, náraminehi ena achaneana. Tijunaparacanapa namutu náechajipanaya.

16 Te títecapanapa te návihahi ena máimitureana, ema Jesús mayaseremurihapa éna. Ánipa maicha:

—¿Tájaha eta ecanarajiricavacahi ena nani escribánoana? —máichapa.

17 Tacahe, tiúchujicávanepa ema émana achane. Majicapapa, ánipa maicha:

—Tata maestro, picatajicanu. Námapahi piyehe ema maca nuchichasami.

Éma, vahi téchajica maicha ema éreana.

18 Mavarahapa jácani ema éreana, máijahúchava máquipaicahi ema nuchicha. Tásiha, ema amaperu ticarisasajacapa, tinirataquiahechavapa muraca. Tivirajipa máicha ema éreana, muracaquihavarepa. Nuyaseacahi ena pímitureana eta náimijunairayarehini ema éreana. Váhiserá náratahahini —máichapa ema achane.

19 Tacahe, máichapa ema Jesús:

—¡Tétavicava emasuapajiraivavaca eti achaneana! ¡Cúverarecachasicaini eta nucamichirahénahini! Íáma ani ema amaperu —máichapa.

20 Tacahe, náepanapa ema amaperu. Te máimahapa ema éreana ema Jesús, enurujipa macaefamaca ema amaperu. Tacahe, tiáquipaicavapa te apaquehe. Téchariripáicavapa ticarisasajacapa.

21 Tacahe, mayaserecapa ema Jesús ema maiya ema amaperu. Macahepa:

—¿Tiyereripahipuca eta juca máichavaquenevahi? —macahepa.

Majicapapa ema achane:

22 —Te amuyarichaha. Máejeharipa máquipaica ema mara éreana te yucu téhevere une, taicha mavaraha macapaca éma nuchicha. Pítisera, te piratahapucaini, pájapanuhavini picatajicahavisamíni —macahepa ema achane.

23 Majicapapa ema Jesús:

—¿Tájaha picayemaquene eta píchanuhi eta te nuratahahipucaini nútí? ¡Pítinapucaini, te pirataha! ¡Pácasiñanu! ¡Tamutu títujicacare te ecasiña eti achaneana! —máichapa ema Jesús.

24 Enurujipa majicapa ema achane. Tijaranu eta majicapirahi, ánipa macahe:

—¡Nucasiñavi, tata! ¡Pímicatcanu eta néchuriasirahi eta nucasiñairavaina piyehe! —macahepa.

25 Tacahe, máimahapa ema Jesús ena achaneana tiúrujicavanaripa mayehe. Tásiha, macajachapa ema éreana, ánipa maicha:

—¡Píti váinaraji, píti pétuhuquiñarahi, úpahi pícha éma! Núti nuvanecavi: ¡Pijunijicayare ema maca amaperu! ¡Vaipa picuchavaucha ema maca! — máichapa ema Jesús.

26 Tacahe, tipiararecapa ema éreana. Mavayuyujicapa tiyayacare ema amaperu máicha. Tacahe, majunijicapa ema amaperu. Ema amaperu ticutipa máepenaquene. Tacahe, nacahepa ena achaneana:

—Tépenasamipa —nacahepa.

27 Tacahe, ema Jesús macaratavauchapa, macaechepucapa ema amaperu. Tacahe, titupihapa ema amaperu, tiúripa. Tájina máichava.

28 Tacahe, te táequenepa, náiputsiacapa ema Jesús ena máimitureana. Nayaserecapa:

—¿Tájaha tacayemahi eta vahi váratahahini vicuchuahini ema éreana mayehe ema amaperu? —náichapa.

29 Tacahe, majicapapa éma:

—Ema maca éreana, muracapanahi éma. Eta ecuchusiraina ena nani macutiqueneanahi tavaraha íchanumayare eta eyujarasiraina étapa eta íchiraya eta ayuna —máichapa.

*Tíápechavavare ema Jesús tímereuchava eta máepenirayarehi
(Mt 17.22-23; Lc 9.43-45)*

30 Tacahe, tiyananavarepa tipaicana. Nánucuhapa eta provincia Galilea. Vahi mávarahahini ema Jesús eta nasamairiricahini ena achaneana eta nánucuirahi éna, machu nahapapiricapucaini eta máimitusiravacahi ena máimitureana.

31 Eta máimitusiravacahi, ánipa macahe:

—Nuti Manerejirunuhi ema Viya, járajapainapa eta sácheyare eta máijarasiránuya mácani achane nayehe eta ticatianacananahi. Ticaratacanuanayare, ticapacananayareva. Téhesera te mapanaquenénapa sache eta népeniraya, néchepucayare —macahepa.

32 Énase ena máimitureana váhiquene nacaicutiarahini eta macayemaquenehi. Natsirihacapasera nayaserecahini.

*¿Nájahapuca ema apóstole ticapichupana?
(Mt 18.1-5; Lc 9.46-48)*

33 Tacahe, títecanapapa eta te avasare Capernaúm. Te peti náitecapihahi, mayaserecavacapa ena máimitureana. Ánipa macahe:

—¿Tájahapuca eta ejicapaemaracacahi eta epaisirapahi te achene? — macahepa.

34 Tásiha, vahi najicapahini, taicha vahi návarahahini náimereuchavahini eta najicapaemajiricacairapahi eta nájahairayarepuca mácani ticapichupani.

35 Tásiha, téjacapa ema Jesús. Máichuhmuripa ena dócequeneana eta napauchirayare náejaca eta te machacaya. Tacahe, máichavacapa:

—Nácani navarahahi ticapicahupananayare te etaracu, tavaraha náechapajiricavaca namutu ena nachamuriana. Nacachuricayare eta náemunaraivahi nayehe ena apamuriana —máichavacapa.

³⁶ Tacahe, máichuhapa ema émana amaperuchicha. Majupacapa te namirahu éna. Tacahe, máichavacapa:

³⁷ —Nácani tijacapanayare ena amaperuana níhavenénahi núti, ena nani yátupi náimerecaya eta náemunasiranuhi núti taicha tímicutijiricavahi nútinahini najacapa. Taicha nácani tijacapanuanahi núti, énerichuyareva tacahehi eta najacapirahi ema Ticachichanu, ema tivanecanuhi —máichapa.

Tímicatacavahianahi nácani vahi ticatianacavahiana
(Lc 9.49-50; Mt 10.42)

³⁸ Tacahe, ema Juan mametacapa, ánipa máicha:

—Tata maestro, vímahahi ema émana achane máquijicavacahi ena éreanana te píjare ticutirinehi pítinahini píjaraca eta máitupajijiasiravahi. Tásihasera vicavacahi éma, taicha vahi víumurvainahini —máichapa ema Juan.

³⁹ Émasera ema Jesús máichapa:

—Vahi ecucavaca éma. Taicha te máichahipuca ema mácani eta tíamicare, mámapicahi eta níjare, vahi macaechinuhini.

⁴⁰ Tímicatacavahianahi nácani vahi ticatianacavahianahi.

⁴¹ Jéhesare, nácani ticumpirachaheana eta une éti étaripa táichavenera eta étirahi nuchaneranairahéhi nuti Cristo, vahi námapurujimahi. Yátupihitavachaequeneanayarehi éna —macahepa.

Ichape eta máicuñayare mácani tímiaquipaica te pecatu ena amaperuana

⁴² Tímianava eta máimituresirahi ema Jesús, ánipa macahe:

—Tacutiquene mácani tímiaquipaicaya nácani ena téhicanuanahi mánsuque-
neanahi. Tiúripanahipucaini tájahúchavahini máepenahini mativainahini éma. Váhirichupucaini macucaicuñahini, taicha vahi macuimiaquipaichini ena téhicanuanahi —macahepa.

Ecunevaicha ichape, machu náepujuquichahe eta te yucu máemahacacaquene
(Mt 18.6-9; Lc 17.1-2)

⁴³⁻⁴⁸ Énerichuvare máichavacapa:

—Jéhevere, te tavarahapuca táimipecurachaheyare eta evahu, tapamisi-
rahénapapuca íchayare eta tamauriqueneana, tiúripana eyuchatica, apaesa
vahi tacuímiaquipaicahe tayehe eta pecatu. Étaripa eta ívape, te tavarahapuca
támahe íchayare eta tamauriqueneana, tiúripana eyuchaticavare, apaesa
vahi tacuímiaquipaicahe tayehe eta pecatu. Étaripavare eta iúquiha, te
támiaquipaicahepuca tayehe eta pecatu, tavarairahi táimahayare eta tamauri-
queneana tájiparacana, tiúripana evectuquichava. Taicha tiúripana eta
ejacapacarehi éti eta esiapiraina eta te mávasa ema Viya, tayanapane táejia-
vapuca eta íaquehe. Páuresamisera éti, te náepujuquichahepuca eta te
yucu infierno, tayanapanéni tamutuchahahini eta íaquehe. Taicha ánaqui
máemahacacaquenehi eta yucu. Máitavacaca eta ecatajivairanayare.

⁴⁹ Tacuti eta vépurarajica eta icheve eta viniru, ene nacaheyare ena tiyana
te yucu, ticaepuraracasianayare tayehe eta yucu.

Vahi ecuisapa táepaha eta ecamunucarevahi
(Mt 5.13; Lc 14.34-35)

⁵⁰ Eta icheve, tétavivavahi eta táurivahi, taicha ticamunucarehi. Ene ecahe-yare éti eta ecamunucarevahi eta nayehe ena achaneana. Váhi tacuepaha eta ecamunucareva. Vahi ecucuti eta tajachira eta icheve, taicha tájina eta táichevevaihini. Tacuijavare tahapapicahé eta iúrivahi —máichapa ema Jesús.

10

Emá Jesús tímítuerecáhi, máechajisháhi mácani achane tínajicáhi esu mayena (Mt 19.1-12; Lc 16.18)

¹ Tacahe, tiyananavarepa tipaicana te tinapaica te vana. Nánucuhapa eta provincia Judea. Tásiha tiánuecanapa eta te apachara eta cajacure Jordán. Ánaqui tiápechavanavare tíurujimuriavana ena ichapemuriana achaneana te jácani máitecapihapahi ema Jesús. Tásiha, tímítuerecavare éma, taicha tacahehi eta mayeherepihi.

² Tacahe, náitecapauchapa ena apamuriana fariséoana. Natanucahi eta ticaviureyarehi ema Jesús. Ánipa náicha:

—Vivaraha pimetacahavi ¿te táuricapuca máinajica ema achane esu mayena?

³ Tásiha, ema Jesús mayaserecavarepa ema apana:

—¿Tájahasica eta tacayema eta mavanairipi ema víyarahaini Moisés? — máichapa.

⁴ Najicapapa éna:

—Ema víyarahaini Moisés máisapahi ema suima máejerare eta máinajisira esu mayena. Macavanairipiser májucha eta ajureca tayehe eta náinajicacaira. Tásiha, eta máíjarasirahi ésu eta juca ajureca, máinajica ésu. Tásiha, vaipa mayenainahini —nacahepa ena fariséoana.

⁵ Tacahe, ema Jesús máichavacapa éna:

—Ena iáchucanaveanaini, te jácani eta nasemairahi, náinajica ena nayenana. Ema víyarahaini Moisés máisapahi tínajicacana táichavenehi eta namuracasamurevanahi éna, vahi náimitucacarehini táicha.

⁶ Váhisera máuricahini ema Viya eta náinajicacahini. Taicha te tépanavainapa acane, ema Viya máíjaracahi ema achane ésunayareichuhi esu mayenayare. Esu esena émanayareichuvare ema suímayarehi.

⁷⁻⁸ Aní tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacáhi típutsicavanayarehi eta napenana ena ticachichana. Énajivainapa títaticacanayare. Eta navehacacairahi, tímicutijiricavaipa étanarinehi eta náqueheana” tacahepa. Éna, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini eta náinajicacairahini.

⁹ Eta tacahe, mácani máinajicáhi esu mayena, éma máepuruhi eta juca mavanairipi ema Viya —máichavacapa.

¹⁰ Te táequenepa, nacarichuipahivare ena tayehe eta peti náitecapihahi, ena máimitureana nayaserecapa ema Jesús tayehe eta juca máechajiririvanahi.

¹¹ Tacahe, máichavacapa éna:

—Te máinajicapuca esu mayena mácani achane, eta maviraya esu apana esena, ticapecaturaípa éma mé Viya. Ichapevare eta máejecepiravahi suyehe.

¹² Tacutiquene súcani esena, te suínajicapuca ema suíma, eta suviraya ema apana achane, ticapecaturaípavare ichape ésu —máichavacapa.

Ena Jesús mayujaraucha ena amuyana

(Mt 19.13-15; Lc 18.15-17)

¹³ Tacahe, ena achaneana námavacapaipahi ena amuyana eta mayehe ena Jesús. Navarahahi máemamahacavacayarehi éna, mayujarauchavachahivaréni. Énaserá ena máimitureana vahi náisapahini. Nacaichepaicapa ena tíamanapahi ena amuyana.

¹⁴ Te máimahapa ena Jesús eta nacaichepaisirahi, tise mapa. Tásiha, máichavacapa ena máimitureana:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna.

¹⁵ Nutupiruva numetacahe: Nácani vahi nácutihini ena amuyana eta nasuapajiraiva, vahi nuchaneranaímahi —macahepa.

¹⁶ Tacahe, majupacavacapa ena amuyana. Máemamasicavarepa, mayujarauchavacapa.

Ena achane rico téchajiricava mayehe ena Jesús

(Mt 19.16-30; Lc 18.18-30)

¹⁷ Tiuri, te apanapa sache, tiyananavarepa. Eta napaisirapahi, macahepaipa ena émana achane. Tijunapaipahi. Matupiru máepuyumiraucha te mamirahu ena Jesús. Mayaserecapa, ánipa maicha:

—Tata maestro, piti piúrique ne ¿Tájahapucaini eta nícharacavahini eta nítuji-siravaina me Viya máichecuaraquirénahini eta nítaresira? —máichapa.

¹⁸ Ena Jesús majicapapa:

—¿Tájaha tacayema pímirarechanu “Piti piúrique ne”? Mararihi ena Viya. Jéhevare éma, tétavicavahi eta máurivahi.

¹⁹ Téhesera te pivarahapuca pecha eta apana vítaresira, pisuapayarehi eta mavanairipiana ena Viya. Píti pímatipa eta júcana: “Vahi picucapareca. Váhivare picuveha esu esena apayena. Váhivare picuamereca. Nacuija pépiyéqueneruina. Váhivare picuvayuareca. Pipicauchayareva ena ticachichaviana” —máichapa.

²⁰ Tacahe, majicapapa ena achane:

—Tata, tamutu eta juca vanairipiana nusupahi nítauchahi eta námape-ruvahi, puíticha juca ajairairanuipa —macahepa.

²¹ Tacahe, ena Jesús máimarracapa ena achane, máemunacainehi. Tásiha, máichapa:

—Jucarihichaha eta pítauchaquenyare. Piyana, píjararecaya tamutu eta pímahaqueneana. Tásiha, píjaracavacapa ena páureana. Jéhevare eta, pijacapayare eta pímahaquenyare te anuma, táitsivayare. Te tamutupa eta juca, pítecavanepa péhicanu —máichapa ena Jesús.

²² Tásiha, témahasamurerinehi ena achane taicha eta macayemaquenehi ena Jesús. Ichaperinehi eta mapanereresirahi, taicha mavayuchahi eta macáimahaquenerahi. Macatiequeneharinehi tamutu. Tiyanachucha.

²³ Tacahe, máesenicapa ena Jesús ena máimitureana natiarihiqueneanahi te machacaya. Tacahe, máichavacapa:

—Yátupiquenehi máitujiana eta nájarasiravainahini eta náehisiranuinahini ena rícoana eta nasiapirainahini te anuma —máichapa.

²⁴ Ena máimitureana náramine eta nasamirahi eta máechajiriruvana. Tásiha, mápechavacapa máicha:

—Nuchichanaveana, esamanu. ¡Máitujiquenehi eta nájjarasiravainahíni téhicanuana ena ticasíñanahi eta nacaimahaquenerahi!

²⁵ Eta juca tímicitujiricavahi eta vipera camello, máitujíhi tánucuhahini te támicuejehe eta parirapa. Ene nacahehi ena rícoana —macahepa.

²⁶ Tásiha, náramine ena máimitureana, eta nasamirahi eta juca. Náichapa: —¡Tétavicavahi eta tamaitujicacarevahi! ¡Nájina títujicavaimahi náuchucuhahini!

²⁷ Tacahe, máimararacavacapa ena máimitureana. Tásiha, máichavacapa:

—Nájina émanaina achane émajivainahíni ticuchucuhava. Émasera ema Viya, macarichu marataha ticuchucureca. Taicha tájina máemejerachaquenénahini ema Viya, tamutu marataha —máichapa.

²⁸ Tacahe, máichapa ema Pedro:

—Vítisera, Tata, vinaquicahi tamutu eta vicayehequeneana, vivarairahi véhicavi —máichapa.

²⁹ Ema Jesús majicapavarepa:

—Nutupiruva numetacahe: Namutu nácani nanaquicahi eta napena, najunijicahivare ena ticachichana*, ena naparapenaveana, ena nachichanaveana; étapa eta nayehe apaquehe, te nanaquicahi táichavenehi eta náehisiranuhi, étapa eta námiryare eta tíurina echajirirucava;

³⁰ tíapajucavainapa camuripanayare ena naparapenaveanayare ajairana, esenana, énapa ena náenanaveanayare, énapa ena nachichanaveanayare. Camuripanayareva eta náitsirijisravayare. Ticaticacareanayaresera nayehe ena apamuriana achaneana. Énerichuvare níjaracavacaya eta nápechiravayare títarecana. Máichecuaraquirenapa eta náuricacarevanayare.

³¹ Maverahesera eti etiarihiqueneanahi puiti, váhirichuhi ecapicahuhini. Te jena sáchezare, ichapepanainapa eta ecapicahiraya. Éna puiti ticapichuanahi, te táitauchavapa te jena sáchezare, énapavainapa téquenehanayare —máichavacapa ema Jesús.

Ema Jesús tíapechavavare máechajisiha eta máepenirayarehi
(Mt 20.17-19; Lc 18.31-34)

³² Te apanavarepa sache, tiyananavarepa tipaicana. Nacaijuhepa eta te Jerusalén. Tínapucapaipa ema Jesús te namirahu ena máimitureana. Náramipaipahi éna. Natirihivare ena tipicanapaipahi. Tacahe, ema Jesús mañajichamuripa macaetavajimurihavarepa ena dóceana apóstoleana. Mametacavacapa eta jácani máichararacavayarehi éma.

³³ Máichapa:

—Ímaha puiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi ema Viya. Ticaratanuanayare ena tuparairucana. Tímicapacuanayarehi, taicha tíjararecanuanayare nayehe ena suntaruana romanoana. Éna, nájina najapanuquenéna.

³⁴ Ticaecahinuanayare. Tiátutuquichanuanayareva. Téstacuanuanayareva. Tásiha, ticapacuanainapa. Tásihasera, te mapanaquenénapa sache néchepucainapa te nécari —máichavacapa.

* **10:29** Te jácani apanana versiónéana, tatiarihi te juca lista eta táechajiriruva: “ena nayenana”. Tájinasera nalistanahini te libro antivupanahi. Eta tacahehi, vímatiequeneha vahi manacahini ema Marcos. Mácani apana achane mavejuchahipuca te Lucas 18.29.

Ena Jacobo émapa ema Juan nayaseacapa ema Jesús eta macájupahávacahini éna

(Mt 20.20-28)

³⁵ Tacahe, te apanapa sache, témeñahavanapa ema Jesús ena apinana ticaparapacana ema Jacobo émapa ema Juan. Náichapa:

—Tata maestro, vivaraha picatajicahavihini eta viyasearuviyare — nacahepa.

³⁶ —¿Tájaha ecamunu? —máichapa ema Jesús.

³⁷ Najicapapa éna:

—Te jena sáchezare te péjacapa te piávacurezare aquenucavirayare, vivaraha picaejacahavivareni te pichacaya, pijupahahavinahini, véjacaini te pivaure, ema émana te sapa —náichapa.

³⁸ Tacahe, majicapapa ema Jesús:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenevayare ecatajivairayare, te ecutinuyarepuca eta nucamichirayare nútí? ¿Váhivarepuca epicayare ticapacaheana tacuti eta nacapasiránuyare nútí? —máichapa.

³⁹ Ena najicapapa:

—Viratahayare vicamicha. Váhivare vipicaimahi.

Tásiha, máichavacapa:

—Yátupi ichape eta ecatajivairaya, vicuticacaya eta nacapasirahaviyare.

⁴⁰ Étapasera eta nucaejasiraya ena nujupahanayare, vaipa nútímahí necha. Ena Tata Nucaiyaquene, émahí tinerejicayarehí éna nujupahanayare — máichapa.

⁴¹ Tacahe, te náechapa ena apamuriana apóstoleana, tistemamajuheanapa nayehe ena apinana.

⁴² Tásiha, máichuhamuripa namutu. Máichavacapa:

—Écharichuhi éti ena aquenucana tayehe eta avasare, muraca eta nacavairipira. Énaripa ena tuparairucana, tétavicavahi tisuapacareanahi eta nacavacurerahi.

⁴³ Váhisera ecucahe éti nayehe ena echamuriana. Mácani tímerecavahi ticapicahupana, tacamunuhi máitativacayare ena apamuriana.

⁴⁴ Te etiarivarepuca éti evarahahi ínapuca, tacamunuhi ímerekavayare navanarahayare ena echamuriana.

⁴⁵ Ecutinuyare nuti Manerejirunuhi ema Viya. Vahi étaina tímitecanu nucaitaticasihini. Nútíyarehí nítátíhe éti. Énerichuvare níjaracavayarehí nímicapacava íchaveneyarehí éti camuriqueneanaya nucuchucureanayare — máichavacapa.

Ena Jesús macaimairirica ema púchuqui ticaijare Bartimeo

(Mt 20.29-34; Lc 18.35-43)

⁴⁶ Tiuri, títetapanapa eta te avasare Jericó. Te apanapa sache tiyananayarepa. Náehicapaipa ena camuriqueneana achaneana. Te achenechacaya, matiaríhihi ema achane púchuqui. Ticaijare Bartimeo, machicha ema Timoteo. Téjacahi tiyaseserecahi limosna.

⁴⁷ Te masamapa eta mánucuirapahi ema Jesús Nazareno, tipiaracapa. Ánipa macahe:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuíni!

⁴⁸ Tacahe, nacavacapa camuriana ena natiarihiqueneanahi. Náichapa:

—Pámatina. Vaipa picupiaraca —náichapa.

Émasera tipiaracaichucha:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuini! —macahepa.

⁴⁹ Tacahe, tícheapaicapa titupihapa ema Jesús. Máichapa:

—Íchuha ema mara.

Tacahe, náichuhapa ema púchuqui. Náichapa:

—¡Pétumechava! Pécheputa, taicha tíchuhavipa ema Jesús —náichapa.

⁵⁰ Eta mananesirahi ema púchuqui, macamiricapa eta máepacuha. Téhepucapa, tiyanapa mapauchahi ema Jesús.

⁵¹ Tacahe, mayaserecapa ema Jesús ema púchuqui. Ánipa máicha:

—¿Tájaha picamunu nuyehe?

Majicapapa éma:

—Tátachicha, nuvaraha picaimairicanupaini —macahepa ema púchuqui.

⁵² Tacahe, máichapa ema Jesús:

—Tiuri, nuchicha. Táichavenehi eta picasiñairanuhi, pinaracapa puiti. Tiúrinapa eta piyaniraya pipaisiraya —máichapa.

Enurujirinehi tímairirica. Tacahe, máehicapa macachanepaipa ema Jesús eta mapaisirapahi te achene.

11

Títecapapa ema Jesús eta te Jerusalén (Mt 21.1-11; Lc 19.28-40; Jn 12.12-19)

¹ Tacahe, te apanapa semana tiyananavarepa. Tétavajicanaya tayehe eta avasarechichana ticaijare Betfagé etapa eta Betania, te tachacaya eta cerro ticaijarehi Olivoquiji. Tiánehianapa eta te Jerusalén. Ánaqui, ema Jesús mavanecapa ena apinana máimitureana.

² Ánipa máicha:

—Eyanayare eta te jena avasarechicha Betfagé. Te ítecapapa ánaqui, ímahayare ticaitihahi eta burrico. Eta jena sárare mávaequehéchaha. Nájinaichaha ticaperainahi. Evejapuacayare, íaminanuyare eta aní.

³ Te natiarihinapuca náeñama, emetacayare eta nucamunuirahi núti. Vahi táyerémahi vímichavavaneyare —máichavacapa.

⁴ Tacahe, tiyananapa ena vanairucanahi. Jéhesare, nachimapapa eta burrico. Ticaitihahi eta te calle te tapajachacaya eta peti. Tacahe, navejapuacapa.

⁵ Náichapasera ena ticayeheana:

—¿Tájaha tacayema íamayare eta viyehe burrico?

⁶ Tacahe, najicapapa éna, nametacapa eta máimiturapihi ema Jesús. Tásiha, náisapapa eta námirahi eta burrico.

⁷ Tacahe, te títecananapa te mávihahi ema Jesús, náepacamaequechapa eta náepacuhana. Tásiha, ticaperapa ema Jesús.

⁸ Tacahe, tiúrujicavanapaipa ena achaneana. Camuriana éna tiácapanahi, náepacapaipaipa eta namuirihana eta te mayanihayarepahi éma. Ena apamuriana navehapa eta cáchipaca. Nanacavare te achene.

⁹ Ena tínapumirauchanapaipahi énapa ena téquenehanapahi, namutu tipiaracanapaipa. Ánipa nacahe:

¹⁰ —¡Yare, Tata! ¡Píti yátupiquenévihi Cristo, réyvihi viyehe! ¡Asulupaya! ¡Vanairucaquenévihi píti me Viya! ¡Ichape eta vicunachiravi píti! ¡Asulupaya me Viya te anuma! ¡Viva ema Viáquenu! ¡Viva! —nacahepa.

¹¹ Tacahehi eta máitecapirahi ema Jesús eta te Jerusalén. Matupirupa tiyanahi te Templo. Te tamutupa máimahahi, tiyanapa tichava te Betania, namutupaichu ena dóceana apóstoleana, taicha cáperehichicharipa.

Ena Jesús májiquiha eta yucuqui ticajare higo taicha máhiquirehi
(Mt 21.18-19)

¹² Te apanavarepa sache, te yáticarahi, tichavanavare te Jerusalén. Eta najunijisirahi eta Betania, técuhaipahi ema Jesús.

¹³ Eta máimairahi tiyerehi eta étana yucuqui ticajare higo. Ticainapucavahi ticápácaji. Tacahe, ema Jesús tiyanapa máimahapana te ticahhipuca. Téhesera te máitecapauchapa, máimahainehi tájina táhinahini. Tacarichuhi eta tapacajiana, taicha vúichaha tacahirainahini.

¹⁴ Tacahe, máichapa ema Jesús eta higo:

—¡Píti pépiainapa eta máhiquireviyare! —macahepa.

Nasamararacahi ena máimitureana.

Ena Jesús macuchuchucavaca ena tjararecanahi eta sárareana, cáyureana te tajuhe eta Templo

(Mt 21.12-17; Lc 19.45-48; Jn 2.13-22)

¹⁵ Tacahe, te títetapanapa te Jerusalén, tiyananavarepa eta te Templo. Máimahirinehi ema Jesús ena achaneana tjararecanahi eta sárareana, cáyureana. Ena apamuriana tivacharecanahi. Natiarihivare ena títsiriperecarahiana eta taplataneana eta apanapane avasareana. Tásiha, macuchuchucapapa namutu. Máequehepuichinavacapaipa eta namesarana étapa eta nasiyana.

¹⁶ Nájinavare máisapaquenénahini eta nánucuhahini eta canchón tayehe eta Templo, námaphini jácani eta nájararervuanahi.

¹⁷ Tásiha, máimitucavacapa ena natiarihiqueneanahi. Ánipa máicha:

—Ena Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana tiásihana te tamutu avasareana” macahepa. Étisera eti tiámerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichapa.

¹⁸ Ena ticatianacanahi ema Jesús, te nasamairicapa eta juca máechajiriruvanahi, tisevanapa. Tásiha, natanucapa eta jácani náicharasirayare eta náimicapasirayarehi éma. Taicha napicarinehi éma, taicha náimahahi tétavica-vahi eta masuapacarevahi eta nayehe ena achaneana.

¹⁹ Tacahe, te cáperehichicharinehi, tiyanavarepa ema Jesús, tiúchuca eta te Jerusalén.

Tiájiriquipa eta yucuqui higo

(Mt 21.20-22)

²⁰ Tacahe, te yáticarahipa, eta nachaviravarepa eta te Jerusalén, náetavica-paipahivare eta yucuqui higo. Náimahainehi tiájiriquipahi éta.

²¹ Tacahe, téchavapa ema Pedro eta máechajiriruvanahi ema Jesús cape sache. Tásiha, máichapa:

—¡Pímaha, tata! ¡Tiájiriquipa eta higo eta pévajariaruhi!

²² Majicapapa ema Jesús:

—Ácasiñava yátupina eta me Viya.

²³ Jéhesare, éti apana esamacareyareva, te yátupina eta écasiñavairaina eta me Viya. Tájina émaitucaimahi. Eratahayareva ecayejecca eta cerro te apachacaya, tájina iávamirahuimahi te esamureana.

²⁴ Tacahe, numetacahe eta juca: Te eyaseacapuca ema Viya eta jácani, ecasiñava mayehe. Vahi ecueñamava eta ejacapirayare. Tásiha, tíjaracahéna éma tamutu eta eyasearuanaya.

²⁵ Énerichuvare, eta eyujarasiraina, eperdonacha éti nácani náejecapavaquenehi eta eyehe. Eperdonachavaca apaesa maperdonachahevare eta éjcapiravana ema Tata Ecaiyaquene te anuma.

²⁶ Téhesera vahi eperdonachahi, váhivare tiperdonachahemahi eta éjcapiravana ema Tata Ecaiyaquene te anuma —macahepa ema Jesús.

Nayasereca ema Jesús nájahahipuca tituparacahi éma

(Mt 21.23-27; Lc 20.1-8)

²⁷ Tiuri, títecapanavarepa eta te Jerusalén. Natupiruvarepa tiyanana te Templo. Te mapairirijuecharipa ema Jesús eta Templo, napauchapa ena titatianacanahi éma.

²⁸ Nayaserecapa éma, ánipa naicha:

—Píti, vahi vitupararuvinahini víti eta píchirahi eta júcana. ¿Nájahasica tímitucavíhi? ¿Nájaha tituparacavianahi eta juca píchaqueneanahi? — náichapa.

²⁹ Tacahe, majicapapa éma:

—Núti apanava nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana.

³⁰ ¿Nájahapuca tivanecahi ema Juan eta máitesirahi máicachasirisirayare? ¿Émapuca ema Viya tivanecahi, émajivahipuca eta máitesirahi? Ejicapanu — máichavacapa.

³¹ Váhisera náituruequenehahini eta najicapirayarehi. Tiácapaemajiricanapa, ánipa nacahe:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhi ema Viya”, ema macahénapapuca: “Tásiha, ¿váhiyapa esuapahini éma?”

³² Váhivare táurica víchahini: “Émajivaichucha eta máitesirahi”. ¿Tájahapuca vicayemayare eta vijicapirayare? —náechajiricacapa.

Nacahehi éna, taicha napicaracahi eta jácani náicharasirahipuca ena apamuriana achaneana, taicha namutuhi náimijachahi ema Juan profetaquenehi yátupiquene mavaneruhi ema Viya.

³³ Tacahe, najicapapa ema Jesús:

—Vahi vecha víti —nacahepa.

Ema Jesús máichavarepa:

—Énerichuvare núti, vahi numetacahemahi nájahapuca ema tituparacanuhi —máichavacapa.

12

Ema Jesús máimicutichina ena pártirárioana máurirahana

(Mt 21.33-46; Lc 20.9-19)

¹ Tacahe, tépanavavarepa tímitureca eta juca máimicutichaquenehi. Ánipa macahe:

—Matiarahi ema achane. Camuri eta máevaru uva te máesane, manaruacahivare eta masucure. Máepiyacavarepa eta nacaticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásiha, máijaracapa ena achaneana, pártirárioanayarehi. Taicha tiyanayarehi ema achane te apana avasare.

² Tacahe, te tiyahapa eta uva, máimivanerecapa ema mamusura mayaseapanavacayarehi ena pártirárioanahi eta tatucachaqueneyarehi éma.

³ Énaserá ena pártirárioana tisemauchavanarichucha. Nacaratacapa náehapa ema vanairucahi. Tichavapa éma, tájina náijaracahini.

⁴ Tacahe, tiápechavavare mavaneca ema apana mamusura. Váhivare nasuapahini éma. Natupisicapa eta te márijahiana, najarasicapa. Náumehavarepa éma vanairucahi.

⁵ Tacahe, ema achane mavanecavarepa ema apana mamusura. Tásiha, ena pártirárioana nacapacapa éma. Vuichasera masemahini ema achane. Ticayehehi paciencia. Máimivanerecapa ena apamuriana, camurianapa. Énerichuvare, tiápechavanapa náehavacavarepa. Nacapacavacapa ena apamuriana.

⁶ Tacahe, matiarhichahasera ema apana mavaneruyare. Émajacaruvapa máevataca ema machicha máemunaruquenehi. Máimijachaipahi émainhipucaini napicauchahini.

⁷ Énaserá ena pártirárioana, te náimahapa ema machicha ema achane, ánipa nacahe: “Émainapapuca ticayeheyare ema maca. Yare, vicapaca éma apanavare, apaesa tánasipa viyehe tamutu. Tájina máícharacahavimahi ema achanenavaji” nacahepa.

⁸ Tacahe, nacaratacapa ema machicha. Nacapacapa éma, náquijicapavarepa eta máquehe te aneca tayehe eta úvaquiji.

⁹ Puiti, nuyaserecaheyare: ¿Tájahapuca máícharacavacayare ema achane ticayehe eta úvaquiji? Jéhesare, vaipa macayehehinehi paciencia. Títecavanénapa macapanavacayarepa ena pártirárioanahi máurirahanahi. Tásiha, máijaracainavarepa eta úvaquiji ena apamuriana pártirárioanayareva.

¹⁰⁻¹¹ Nuvaraha epanerechapaini eta tacayemahi eta Sagrada Escritura, apaesa ácaicutiara éti. Aní tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitecapa eta te táicuchihi eta tatuparahahi. Tacapichahuquenehi puiti. Táitusiava tétavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya — máíhavacapa ema Jesús.

¹² Tacahe, ena ticatianacanahi ema Jesús, eta nasamirahi, tisemanarinehi taicha tímaticavanapa eta énaираhi tayunacavaca eta máimicutichiravacahi. Eta nasamirahi, tisemanarinehi. Navarahapa nacaratacayarehíni. Tipicavanachuchasera nayehe ena achaneana, nacatiuchahini ema Jesús. Tacahe, najunijiacapa éma, tiyananapa natanuca eta táícharacavaya eta nacaratasi-rayare éma.

Navaraha náemejecapavacha ema Jesús tayehe eta impuesto

(Mt 22.15-22; Lc 20.20-26)

¹³ Tacahe, ena ticatianacanahi ema Jesús navanecapa ena témejecapacachanayare apaesa étainahipucaini taviuchahini ema Jesús. Natiarahi ena tinerejicavanahi ena fariséoana. Natiarhivare ena políticoana.

14 Te náitecapauchapa, ánipa nacahe:

—Tata maestro, vímatihi eta tatupiruvairahi tiuri eta juca pímiturapianahi. Vahi pipicacaracavahini eta péchajisihairahi eta náichavaquenevahi nácani achaneana, tayanapanepuca aquenucahi. Taicha pivaraha náehicahini namutu eta táurinaquene achene ticaijuhe me Viya. Vivarahahisera viyaserecaviyare eta pipanereruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machane-rahávihi ema Viya, ¿masi? —nacahepa.

15 Máimativanehisera ema Jesús eta apimirairavacahi éna, navarairahi ticaviureyarehi éma. Tásiha, ema máichavacapa:

—¿Tájaha tacayema evaraha ímiaquipaicanu? Nímahaseji, iáminanu étapena eta reale —macahepa.

16 Éna nájaracapa eta reale. Tásiha, máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador —nacahepa.

17 Tacahe, máichavarepa:

—Tiuri. Táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma —máichavacapa.

Te nasamapa ema Jesús eta majicapiravacahi, náramipa eta máitupajijiasiravahi.

Nayasereca ema Jesús náichararacavayarepuca ena náepenaqueneana eta náechepusirayare

(Mt 22.23-33; Lc 20.27-40)

18 Nacahepaipavare ena apamuriana achaneana. Saducéoanahi. Ena nani saducéoana, apanahi eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Ánipa nacahe:

19 —Tata maestro, ema víyarahaini Moisés manaquicahi eta ajureca máechajiriruvahi eta viyehé: “Te máepenaequenehahipuca ema achane esu mayena, tásiha, nájinahipuca manaquiequeneruvainahini machichainahini, te matiarihihipuca mácani maparapehi, mavehayare esu machine-naequenéni, apaesa émainapuca macachicha eta suyehe, máitsivainahini ema maparapeni”.

20 Tacutiquene te natiarhipuca ena siétequeneana ticaparapejiricacana, te títauchavapa ema náechavimuri. Máepenaequenehapasera esu mayena. Nájinahi machichainahini.

21 Tacahe, ema maparape máítauchavare esu machinena. Énerichuvarasera máepenaequenehavare, nájinavare machichainahini. Ema émana maparape máítauchavare ésu. Énerichuvaré máepenaequenehavare.

22 Namutu ena siétequeneana navehahi ésu, tásihasera náepenaequenehapaichucha, nájinaquene émanainahini mácachichahini eta suyehe. Te táequenepe, tépena esu esenaini.

23 Tacahe puiti, te apanapapuca eta náitaresirayare ena nani, ¿nájahapuca ena siétequeneana éma yátupiquenehi suímaquenehi esu esena, taicha ena siétequeneana namutuhi suímanarihi? —náichapa.

²⁴ Tásiha, ema Jesús majicapavacapa:

—Éjecapava éti. ¿Tájaha tacayema vahi evaraha ácaicutiarahini eta táimiturapi eta Sagrada Escritura? Váhivare evarahahini esuapahini eta tamutuirahi marataha ema Viya.

²⁵ Ánaqui te apana náitaresiraya, vaipa nácamunuimahi esu esena. Énaripa ena esenana váipavare nácamunuimahi ema ajaira. Nacutinapa ena ángeleana tiávihanahi te anuma eta vahi náitauchacacahini.

²⁶ Éti, váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiriruvana ema Viya májuchaqueneanahi ema víyarahaini Moisés. Te juca Sagrada Escritura, eta te libro ticaijare Éxodo, téchajicapa ema Viya. Ánipa macahe: “Nútira yátupiquenenuhi Viya, macasiñaquenehi ema Abraham, ema Isaác émapa ema Jacobo” macahepa ema Viya.

²⁷ Nutupiruvahi numetacahe: Ema Viya, éma téchahi eta náitaresirana ena téhicanahi, tayanapane tépenanaripapuca. Eta náchanevana, tímiyana-vanarichucha títareca te mamirahu éma. Éti, ichape eta éjecapiravahi — máichavacapa ema Jesús.

Eta tisuapacarepanahi te mavanairipiana ema Viya
(Mt 22.34-40)

²⁸ Tacahe, matiarihivare ema émana escribáno. Masamararacahi eta nacanarajirisiracacahi. Máimativanepa eta táurivahi eta majicapirahi ema Jesús. Tásihaseca, tíjaracavahi mayasereca ema Jesús, ánipa maicha:

—Tata, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

²⁹ Majicapapa ema Jesús:

—Eta máechajiriruva ema Viya te Sagrada Escritura, ani macahehi: “Esama, emutu eti achaneana israelítana. Nuti Viya, nucarichuhi nuti Iáquenu. Nacuija apanaina iáquenuina esiñarajina.

³⁰ Tásiha, yátupina eta émunasiranuina nuti Iáquenu, táunasiraina te esamureana. Yátupina eta ecachanevairanuina nútí. Epanerecha eta nímiturapiana tamutu sácheana, yátiana. Yátupina eta ecaemataneasiranu te tamutu eta ítupajijiasiravana”.

³¹ Jararihivare eta apana táehiruhi eta juca, ánvare tacahe: “Pémunacayare ema piparaepiyahi, tacuti eta pémunasiravahi píti”. Eta juca apinaquene vanairipi, tacachurica eta tasuapacareva tamutu eta apamuriana vanairipiana —macahepa ema Jesús.

³² Tacahe, máichapa ema escribáno:

—Yátupiquene, tata maestro, tétupicavahi eta péchajiriruva. Yátupihí eta macarichuirahi ema Viáquenu, eta nájinairahi apanainahini Viáquenuinahini.

³³ Yátupihivare tavaraha eta vémunasiraina ema Viáquenu, étapa eta viúnasirayare te visamure, étapa eta vipanerechiraina eta máimiturapiana tamutu sácheana, étapa eta vicaemataneasiraina éma te tamutu eta vítupajijiasiravana, étapa eta vémunasiraina ema viparaepiyahi. Jéhesare, eta táuriva eta vémunasirahi táetavichi eta táuriva eta víjaracasichira eta sárareana eta víjuchaqueneana eta me Viya. Táetavichivare tayehe eta táuriva tamutu eta apamuriana víámavahuana eta me Viya —máichapa ema escribáno.

³⁴ Ema Jesús máimatiequenehapa eta táuriva eta majicapira ema achane. Tásiha, máichapa:

—Píti piánehi eta píjarasiravaina eta péhisirayare ema Viya —máichapa.

Tacahe, nájinapa nájaracavahini nayaserecahini ema Jesús eta námejecapavachirayarehi éma.

*Ena Cristo, yátupihí mámariequenénihí ema rey David, Víyahivare éma
(Mt 22.41-46; Lc 20.41-44)*

³⁵ Tacahe, ema Jesús tímiyanava túmiturecahi, eta máejasirahi eta te Templo. Ánipa macahe:

—Ena escribánoana, ani tacahehi eta náimiturapiana: “Tiúchucayare ema Cristo, mámariequeneyare ema víyahaini rey David” nacahehi.

³⁶ Yátupihí ema Cristo achanequenehi eta máimahi taicha mámariequenénihí ema víyahaini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: “Ena Viya máichapa ema Tata Náquenu Cristo: Yare péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa.

³⁷ Ema David, eta máimijarechirahi ema Cristo, “Tata Náquenu”, ¿tájahapuca eta macayemaquenehi? Núti németeaca Víyahivare ema Cristo. ¿Tájaha íchahi éti? —máichavacapa.

Ena camuriqueneana achaneana náuricahi eta nasamararaca eta máimiturapiana ema Jesús.

*Ena Jesús máimereuchavaca eta nájecapiravana ena escribánoana
(Mt 23.1-36; Lc 11.37-54; 20.45-47)*

³⁸ Tímiyanavahi eta máimituresirahi ema Jesús, ánipa macahe:

—Échapavayare éti, machu éhica eta nayeherepiana ena escribánoana taicha tétavicavahi eta apimiranairahi éna. Tétavicavahi eta náurisirahi éna tíumajihána, navarairahi ticunachacareanayarehi nayehe ena achaneana eta nareligiósovanahi. Navarahavare ticapicahuanayarehi eta náechajisiraya ena achaneana te jácani nácapajisihapahi éna.

³⁹ Tacutiquene tinerejiurucavana eta táurinaqueneana téjasihacareana, te tiyanana te víurujisirarevana. Étaripa te nanisirana, ticaejacavanavare te jácani távihanahi eta tíurinisipana tinicacare.

⁴⁰ Tacutiquene naverejicavare eta nacayehequeneana ena tépenaimana, nájina najapanuquenéna. Tásiha, tépiyacavanapa religiósoanahi, tíupiemána eta nayujarasira, namavarairahi tácaecherahini eta náichiraqueneanahi eta tauriqueneana. Énaserá tíapajucavanahi eta náicuñayayare muraca —macahepa ema Jesús.

*Eta sunaquiruva esu máimaru tacachuricahi eta nanaquiruvana ena apamuriana achaneana
(Lc 21.1-4)*

⁴¹ Eta máejasihahi ema Jesús, mávihahi te tamirahu eta chapamana eta nanacacuirarehi eta plata námavahuana ena achaneana. Máimamaraca ena camuriqueneana eta nanacacuirá eta námavahuana. Natiarihihi ena rícoana, tinaquicavanapahi eta ichapemuripanavaca.

⁴² Tacahe, títecapapa esu esena suépenaimaquene, páurehi ésu. Sunaquicahi eta apipechichahi eta suplatane, váhirichu tasivachahini.

⁴³ Tásiha, ema Jesús, eta máimairahi eta juca, máichuhamuripa ena máimitureana. Ánipa maicha:

—Ímaha esu suca esena páurechicha. Ácuneucha eta suémunasirahi ema Viya. Jéhesare ésu, tímepanávahi eta sunaquiruva, sucachuricavacahi namutu ena apamuriana achaneana. Ichaperinehi eta sucunachacarevahi me Viya.

⁴⁴ Taicha namutu éna, tacarichu nanaquicahi eta náemacharajiana naplata-neana. Ésusera esu suca páurehinéni, sunaquicahisera tamutu eta sucaye-hequenehi. Suítahi eta sunícavachayahéini —máichapa.

13

Éma Jesús máimereucharipa eta táquipaisiravaya eta Templo
(Mt 24.1-2; Lc 21.5-6)

¹ Tacahe, tiyanayahéini ema Jesús, énapa ena máimitureana. Eta náuchusiraya tayehe eta Templo, máichapa ema émana máimiturea:

—¡Tata maestro! ¡Ímaha eta juca máriana! ¡Tétavicava eta táichapeval!
¡Tétavicava táurinava eta juca peti! —macahepa.

² Éma Jesús majicapapa:

—Tamapurujiyare eta juca táurinava eta pétisami ímahaquenehi puiti. Nutupiruva numetacahe: Járajapayare eta sáchezare ticaquipaicasiyare tamutu eta juca Témplosami. Téjanerepaicainapa tamutu eta juca táurinaqueneanahi ímahaqueneanahi puiti —máichapa.

Tatiarihiyare eta ecutiarareanaya te tánehipaicha eta táichecuiraya
(Mt 24.3-28; Lc 21.7-24; 17.22-24)

³ Tacahe, tiyananapa eta te cerro ticajare Olivoquiji, távihahi te apacharahi eta te tatavarapihi te tamirahuhi eta Templo. Te téjacanapa nacarichuhi eta te jena quinta, nayaserecapa eta macayemaquenehi. Matiarihi ema Pedro, émapa ema Jacobo, émapa ema Juan, émapa ema Andrés. Ánipa náicha:

⁴ —Vivaraha pimetacahavi. ¿Tájamuhupuca eta náimiauquipsirayare eta Témplosami? ¿Jararihiyarepuca eta ecutiarareyare te tánehipaicha eta táitauchiravayare eta apana péchajisiqueneana? —náichapa.

⁵ Tacahe, majicapapa ema Jesús:

—Ecuneuchavaicha yátupina, machu navayuacahe, taicha nárajapayare ena tépiyacavanayahéni tímivasichavanayare nuyehe.

⁶ Nacaheyahéni éna: “Nútiripa Cristo”. Nasapiha, navayuacayare ena camuriana achaneana.

⁷⁻⁸ Énerichuvare esamairiricayare eta táehacacairayare eta ichapequeneana avasareana. Ticanarajiricacanainapa eta te avasareana tayerehiqueneana, énerichuvare ticauyayacarenapa guerraina eyehe éti. Váhisera ecuarameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecuirayare. Énerichuvare tatiarihiyareva eta ichape tayamurisirana eta apaquehe te jácani távihanaya táitupiaruanayare. Tatiarihiyareva eta ichape ecuhamuhuyareva te jácani avasareana. Ichape eta nacatajivairayare ena achaneana. Tamutu eta juca ecutiarareanayare eta táepaniravayare eta nátajivanayare ena achaneana.

⁹ Tásihaserá eti nuchaneranahi, ecuneuchavayare, étumechavayare. Taicha natiarihiyare ena ticatianacaheanayare táichavenéni eta éhisiranuhi. Ticaratacaheanainapa, ecayaserehinapa nayehe ena juéseana. Téstaheanainapava eta te náurujisirarevana. Tásiha, etiarihiyare éti tíamaheanaya te

namirahu ena aquenucana, téhevare te namirahu ena Presidenteana gobiernonahi, ecaviurevayare táichavenehi eta éhisiranuhi. Esapihaserá éti, ecamapuravainapa échajisianuyare.

¹⁰ Énerichuware, éti nuchanerana ecametarairuyareva eta tíurina echajirucava nayehe ena achaneana tayehe tamutu avasareana te juca apaquehe. Te ítecapa te tamutu, tépanavayarehi eta táichecurayare.

¹¹ Tacahe, te jácani nacaratacahepauca, námahe te namirahu ena aquenucana, vahi ecueñamava tayehe eta jácani échajiuchiravayare, ecatiuchiravaya. Échajisihaya eta échajirucavana májjaruheyare ema Espíritu Santo te jena sache. Taicha máimahahainepa. Tíjaracaheyare eta ítusirayare échajica. Vahi étijivaimahi eta échajisiraya.

¹² Natiarihiyareva nácani achaneana tíjararecanaya ena naparapequeneana, navarairahi námicapaca táichavenénahi eta náehisiranuhi nútí. Natiarihiyareva ena nácani náiyana, navarahayareva nájarareca ena nachichanaveana táichevenehi eta náehisiranuhi nútí. Natiarihiyareva nácani nachichanaveana nacanarainapa ena náiyana, námicapacainapa táichavenehi eta náehisiranuhi nútí.

¹³ Namutuyaréni ena achaneana ticitianacaheanayare táichavenénahi eta éhisiranuhi. Téhesera ecamichahi tamutu, ímianavahi eta éhisiranuhi te táitavapa tamutu, nútí nucuchuhaheyare.

¹⁴ Numetacahevanevare eta apana. Járajapayare eta sache táíñehique-neyare. Tímerecavayare ema achane váinarajiquene. Mavanecayare ena machanerana náechipejisirayare eta tacapicahuquenehi Templo, nacuchucavacayare eta téhicanahi ema Viya. (Nácani navaraha nacaicutiara eta juca, tacamunhi ticaravahuyare eta májurehi ema víyarahaini profetaini Daniel.) Tásiha te ímahapa eta juca, esamairicapuca, táuricapa etátájipa ejunavane, eti etiarihiqueneanahi te Judea. Ecaijuheyare eta te cérrona, étaina eyumuru-siavaina.

¹⁵ Nácani tiávihanahi te nayehe canchón te nasamairiricapa eta juca téchacarehi, táuricapa najunavane. Vaipa táuricahini nasiapanumahi te napenana, navehahini jácani náeñamaqueneanainihi.

¹⁶ Nácani tachimararuanayare te vamáhi eta téchacarehi, táuricapa vaipa nacuchava tayehe eta avasare, tayanapane náeñamahi eta nayereruvana.

¹⁷ ¡Páureanasami nácani esenana tachimararuanayare nácani ticajarianahipuca, nácani esenana ticachichanahi eta amuya tiájicachaha!

¹⁸ Eta tacahe, eyaseacayare ema Viya tacuija táichejicahe; váhivare tacuchimaracahe eta ichape tiquiva te achene te eyanapapuca ejuna*.

¹⁹ Te jena sácheanayare, tétavicavayare eta nacatajivairayarehi ena achaneana. Tájina tácutimahi eta táíñehivayare eta nacatajivairayare, te táepaniravahi eta máepiyasirahi ema Viya eta juca apaquehe. Te táequenenapa eta tíñehiyare, tájinainapa tácutimahi.

²⁰ Nájina tacatitruimahi eta nacatajivairayarehi ichape. Macaichecavaneyare ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerajirua, majapanuqueneanahivare. Taicha te vahi macucaicheca ema Viya, máitamurihahipucaini macapapajicavaca namutu ena achaneana ema maca achane.

* **13:18** Ema Jesús máechajisihahi eta ticasarahimuhu, tiquivamuhuvare te jena mávasa Judea taicha ticajeraequenehi eta napaisirahi.

11-22 Énerichuvare te tánehipaicha eta juca, natiarihinapa ena tivayua-rahiana tépiyacavanayare Cristo tímivasichavanainapa núti. Natiarihivare ena tímicutijiricavanayare profetana mavaneruinahini ema Viya. Áninapa nacaheyare: “Yare, éhicayare ema Cristo. Matiarhipahi te juca vitaracu”. Ena apamuriana ánivare nacaheya: “Náepiyahiravahi éna. Ema Cristo mávihahi te viávasa víti”. Étiserá vahi ecusuapavaca. Eta navarairahi tivayua-caheanaya eti machanerana ema Tata, náituruequenehayare naicha eta ichapequeneana tiáramicareana ecutiarareanayare. Camurianasamiyare ena navayuaruanayare.

23 Tásiha, ecuneuchavaya nayehe. Numetacahevanehi puiti apaesa écharipa —máichapa.

*Eta machavirayare ema Manerejiruhi ema Viya
(Mt 24.29-35, 42-44; Lc 21.25-36)*

24 Máichavarepa ema Jesús:

—Te jena sácheanayare te táequenénapa eta jena nacatajivairayare ichape ena achaneana, eta sache témahainapa, étaripa eta caje váipavare tjarahimahi.

25 Témiricanainavarepa eta jarairiquiana. Étaripa eta tiávihanahi te anuma vimaimahaqueneanahi, énerichuvare tiyamuricanainapa, tiyejejecavanainapa.

26 Nupaenumavainapa níteca nuchava núti Manerejirunuhi ema Viya. Namutu tímahanuanayare eta núcupaisirayare. Tiámanuinapaipa eta úcaji. Tétavicavayare eta nujaravayarepahi, nínehinapaipa.

27 Tacahe, nuvanecainapa ena ángeleana nacurujicayare namutu ena nuchanerana nunerejiruanahi, tiásihanayare te tamutu eta juca apaquehe te jácani návihahi.

28 Tiuri puiti, nuvaraha nímicutichinahe eta jácani yucuqui. Eta táitsivachiravavacapa eta tapacajiana, te ímahapa eta tajimuyairapa eta tatavaqui, tiúchucayarepa eta tapacajianaya arairu, tímaticarehí tiánehiripa eta únemuhirayarepa.

29 Ene tacahehi, te ímahayarepa tacaecherapa eta júcana ecutiarareana, ímahayarepa eta tánehirainapa eta nuchavira.

30 Numetacahevanecha: Vuíchaha títavanaimahi ena achaneana náitare-ruanaichaha te táitecapapa eta júcana ecutiarareanayare.

31 Títavainapa eta anuma éta pa eta apaquehe. Tativayaresera títauchava tamutu eta numetaruheanahi.

32 Eta juca tiáramicareyarechucha. Nájina téchaimahi tájamuhuyarepuca eta táitachiravayare, énaripa ena ángeleana vahi náechahini. Nútivanerécah-pucaini néchahini. Macarichu ema Tata, éma téchahi.

33 Eta tacahe, etsecavahi ecaunehivare éti, eyujarauchavayareva. Taicha vahi echa eta tájamuhuyarepuca eta nítesirayarepa.

34-36 Tamutu eta juca nímicutichinahe eta máichaquenehi ema mácani achane eta te tiyanayare tipairirica. Te tiyanayarépa, máijaracavaca namutu ena mamusurana eta náemataneana, matuparacavacapa eta najanea-sirayarehi tamutu. Tacahe, matuparacavarepa ema tijanearecarahi eta tapaja, macuneyarehi eta jácani hora machavira ema máquenu, téhepuca tímipacucuhipa, téhepuca enumuhu yati, téhepuca tjarahihyarepa, téhepuca yáticarahi. Ene ecaheyare éti. Ecauneya machu nájahúchava nítecapauchahe, machu nuchimaracahe ímacacaruhi. Taicha vahi échaimahi tájamuhupuca nítecapayare nuti Iáquenu.

³⁷ Eta juca numetaruheanahi puiti, nuvaraha emetacayarevare ena echamuriana, apaesa ecauneyare emutu —máichapa ema Jesús.

14

*Napanerechaipahi ena tuparairucana eta nacaratasirayare ema Jesús
(Mt 26.1-5; Lc 22.1-2; Jn 11.45-53)*

¹ Tacahe, apinarinecha sache eta piesta ticaijare Pascua, eta náepanavaira eta semana eta nanisirahi étachucha pan mayehere levadura. Tacahe, ena tuparairucana énapa ena escribánoana navarahaipaicha náimicapaca ema Jesús. Tásiha natanucahi eta táicharacavaya eta nacaratasirayare. Váhisera navaraha eta nanecapahini ena achaneana.

² Ánipa nacahe:

—Vuíchaha vicucarataca éma achichu juca piéstairaya. Taicha camuriana-yarehi ena achaneana, machu tájahapuca náicharacahavi taicha navaraha-yarehi nacatiucha éma. Vicuchapa nayananuma —nacahepa.

*Esu esena tiámasichahi ema Jesús te táijiyeamaquene perfume
(Mt 26.6-13; Jn 12.1-8)*

³ Tacahe, ema Jesús tianapa tichava eta te avasarechicha Betania. Máichuhaquenehi eta mananisiraya mayehe ema achane ticaijare Simón ema leprosoinihi. Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Ticaijare nardo eta juca tijiyeama amairiama. Táetaviuchahi eta tasivachavahi. Supauchapa ema Jesús. Suvechujihapa eta bótechicha, tásiha, suépusasicapa eta táijiyeamaquene perfume.

⁴ Natiarihiera ena váhiquene náuricahini eta suémepururesirahi eta tasiva-chaquene perfume, suámasichirahi ema Jesús. Ánipa nacahe:

⁵ —¿Tájaha tacayema suémepurureca eta juca tasivachaquenehi perfume? Tiúripanahini víjararecahini eta juca táijiyeamaquenehi. Vivehahini eta camuriquene plata, tásiha, vímicatasihahini ena páureana. ¡Máechemarairahahi esu suca esena! —nacahepa.

⁶ Émasera ema Jesús máuricapa eta suíchaquenehi. Ánipa máicha:

—Ésamirica esu suca esena. ¿Tájaha tacayema ecaecahihí éti esu suca? Tétavicava eta táuriva eta suíchiranuhi.

⁷ Ena páureanasami, támutuchucha sácheana eta ecachaneravacayare éna. Te jácani ávarahapapuca ímicatacayare, nararihi ena ticamunuana. Nútisera vahi nánasiquenémahi eta eyehe.

⁸ Esu suca suíchahi eta suímíratáharuvahi. Eta juca suépusahasiranuhi eta juca perfume. Sucainapucahi ésu eta suíjiyechirahi eta náquehe tayeheyarehi eta nucaecarasirayare.

⁹ Nutupiruva numetacahe: Nácani ticametarairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

*Eta máijararesirahi ema Júlasí ema Jesús
(Mt 26.14-16; Lc 22.3-6)*

¹⁰ Tacahe, tianapa ema Júlasí, émarichuhi nachamuri ena dócequeneana -apóstoleana. Mapauchapa ena tuparairucana, téchajiripanava eta máijarare-sirayare ema Jesús eta nayehe.

11 Tacahe, tiúrisamureanarine ichape eta nasamirahi eta mavarairahi máijjararecayare ema Jesús. Tásiha, nametacapa eta náijjarasirayarehi eta plata. Tásiha, jéhevarepa ema Júlasí matanucaipa eta máicharacayarehi eta máimicaratásirayarehi ema Jesús.

*Ena Jesús máenimurihapa ena máimitureana
(Mt 26.17-29; Lc 22.7-13; Jn 13.21-30)*

12 Tacahe, títecapapa eta piesta Pascua, te tépanavahi eta semanahi nancahi eta pan mayehere levadura. Étarichuhi eta sáche nacapasihahi eta uvesachicha naniruyarehi te yátipa. Ena máimitureana nayaserecapa ema Jesús:

—¿Táviha pivarahahi vácajuhe eta vétupirisiava eta vinisirayare eta uvesachicha eta viyeherepi? —nacahepa.

13 Tacahe, mavanecapa ena apinana máimitureana. Máichavacapa:

—Eyana tayehe eta Jerusalén. Te ítecapayarepa tayehe, iácapajicayare ema émana achane tíamapahi eta une te yupi. Éhicayare éma.

14 Eta te peti masiapihayare, éti apana esiapayareva. Tásiha, emetacayare ema ticayehe eta peti, aní íchayare: “Ena viyehe Maestro Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare.

15 Tásiha, éma tímechahénapa eta ichape cuarto te anuquehe piso. Táurique-néipahi eta jácara téjasihareana, tacaetupirihiqueneripa. Tásiha, étupiricapa eta viniruyare eta ánaqui —máichapa ema Jesús.

16 Tacahe, tiyananapa nacajuhe te Jerusalén ena apinana vanairucana. Jéhesareinehi náimahapa étapaichuhi eta macayemaqueneanahi ema Jesús. Tacahe, náetupiricapa eta naniruyare tayehe eta Pascua.

17 Tacahe, te yátipa títecapapa ema Jesús macachanepaipa ena apamuriana apóstoleana.

18 Eta náejasiraripahi tinicanaripa, máichamuripa éna ema Jesús:

—Jéhesareinehi, te etaracu éti, mararihi ema émana tíjararecanuyare, émarichu tinicahi nucachanehi —máichapa.

19 Tacahe, ichaperinehi eta máimipaneresiravacahi éna eta juca máichiravacahi. Nayaserecapa ena émanapachu, ánipa náicha:

—¿Nútichupuca jácani? —macahepa ema émana.

—¿Nútichupuca? —macahevarepa ema apana.

20 Tacahe, majicapapa ema Jesús:

—Ena émana te etaracu eti dócequeneana. Mácani néniruyare eta pan néchipeajiruhi te juca nucuruja, émara ema tíjararecanuyare.

21 Nuti Manerejirunuhi ema Viya, étapaichuhi eta nacapasiranuyarehi, títauchavayarehi eta nuyehe eta táechajiriruvahi eta Sagrada Escritura. ¡Páuresamisera ema tíjararecanuyare! ¡Muracayare eta máicuñayare! ¡Tiúripa-naichuhini te vahi macuchuahini te sujuhe esu máena! —macahepa.

Ena Jesús máimereuchahi eta macaejasiraya eta arairu matratune ema Maiya

(Mt 26.26-29; Lc 22.14-20; 1 Co 11.23-26)

22 Tacahe, eta nanisirahi, mavehapa eta pan ema Jesús. Mahasulupayachapa ema Viya. Mayuvetucapa máijjaracavacapa ena máimitureana. Tacahe, máichavacapa:

—Eta juca néche. Enica —macahepa.

²³ Tacahe, mavehavarepa eta vasu náerirare, mahasulupayachavarepa ema Viya. Tásiha, májaracavarepa ena máimitureana.

²⁴ Te náerapaipahi, máichavacapa:

–Eta juca eta nítine. Éta táepusairuvayare étarichuvare táicutiarayare eta nufirmachiraheyare eta arairu matratune ema Vicaiyaquene, nucaejasirayareva eta matratune apaesa ejacapacare mayehe, ichapemurivayarepahi éti.

²⁵ Jéhesaréinehisera, numetacahe: Vaipa nápechaváimahi nérahivaréni eta juca tachi eta uva, tiámainucava te táitauchavapa eta nusiapiraya eta nucavacureiraya, nucajupahairaya ema Tata Nucaiyaquene. Te jena sache, níjara-caheya vérainapa eta aramaruama —máichapa.

Ema Jesús máimereucha ema Pedro tépiyacavayare vahi máimati ema Jesús (Mt 26.30-35; Lc 22.31-34; Jn 13.36-38)

²⁶ Eta náitanesirapa, tijiranapa eta jirasare eta nahasulupayachirahi ema Viya. Te títapiricanapa, tiúchucanapa, nacaijuhepa eta te huerta Getsemaní tiávihihi eta táemiripaisinehi eta cerro ticaijare Olivoquiji.

²⁷ Eta napaisirapahi, máichavacapa ema Jesús:

–Puiti juca yati ejunijicanuyare emutu éti, taicha epicayare eta náicharasiranuyarehi. Tásiha, títauchavayarehi eta máechajiriruvahi ema Tata eta te Sagrada Escritura: “Nísapayare nacarataca ema Pastor, nacapasirayaresamí. Tásiha, tijunaracanainapa eta uvesana macurujiruanainihi” macahepa.

²⁸ Téhesera te néchepucapa te nécari, nínapucainapa nuyanainapa te Galilea. Ánaqui nucuchapiaheyare éti —máichapa ema Jesús.

²⁹ Émasera ema Pedro máichapa:

–Tayanapane, Tata, najunijicavipuca ena apamuriana, nútisera vahi nujunijicavímahi —máichapa.

³⁰ Ema Jesús máichavarepa:

–Nutupiruva numetacavi pítisami Pedro: Puiti juca yati, te apihénapa eta táechajisirayare eta varayu, mapahe eta pépiyasiravayare vahi pimatínu —máichapa.

³¹ Ema Pedro tijaranurusi eta majicapirahi. Ánipa macahe:

–Tayanapanepuca pímicapacanu, váhiquenesera népiyacavaimahi vahi nímativi, váhivare nínjacavímahi —máichapa.

Étarichuhivare tacahehi eta náechajiriruvahi ena apamuriana máimitureana.

Ema Jesús tiyujaraca te Getsemaní (Mt 26.36-46; Lc 22.39-46)

³² Tacahe, títecapanapa eta te quinta Getsemaní. Tacahe, máichamuripa ena máimitureana:

–Éjacaichaha eta ani te juca. Ecuchapanuchaha. Núti nuyujarapanayare —máichapa.

³³ Tacahe, mámapa ánaquipana ema Pedro, émapa ema Jacobo, émapa ema Juan. Tépanavapa téñamava eta masamure, taicha muraca eta máichavaque-névyarehi.

³⁴ Tacahe, máichavacapa éna:

–Tétavicava eta táéñamirava muraca eta nusamure. Tavaraha ticapacanu. Ánasichaha ani te juca. Váhisera ecuimaca. Ecuneuchanuhi —máichavacapa.

³⁵⁻³⁶ Tacahe, tipaipanapa ánaquipanachichahi éma. Tiáquipaicavapa eta te apaquehe. Eta mayujarasirahi, ánipa macahe:

—Tátachicha Nucaiyaquene, píti pírataha tamutu. Picatajicanupaini. Váhini tacuitauchavaini eta nichavaquenevayare. Váhini picuisapaini eta nucatajivairaya. Níjaracavasera núti eta nítauchiraya eta pivarahaquenehi píti — macahepa.

³⁷ Tásiha, téchepucapa. Tichavapa eta te návihahi ena máimitureana. Máimaharinehi éna, tímacanarichucha. Máichapa ema Pedro:

—Piti Simón, ¿pímacarichucha? ¿Tájaha tacayema pímacahi? Váiparinehi pímicatacanuhini pijaneacanhini étanainahipucaini hora pácahehini.

³⁸ Éjamiuchava. Eyujarauchava apaesaina. Eyaseaca ema Viya eta etumevaina apaesa vahí macuiturucahe ema Satanás. Yátupihinéni eta iáchanevana taratahahi ticaratacava. Étaseca eta éche máteji, vahí taratahaimahi ticaratacava —máichapa.

³⁹ Tacahe, tiápechavavarepa tiyana tiyujaraca. Eta mayujarasirahi, étarichuva eta máechajiriruvanahi.

⁴⁰ Tásiha, tichavavanepa eta te návihahi ena máimitureana. Máimahavarepa tímacanaripavare, taicha muracaripa eta náechapune. Tájinaavare nacayemahini táichavenehi eta natsirirahi. Tacahe, tiyanavarepa tiyujarapana.

⁴¹ Te mapahequenepa eta mayujarasirahi, tichavapa. Máichavacapa:

—¿Iápechavaipava ímaca? ¿Vuíchahapuca enarahaçaquenénahini? ¡Taratapa! Jéhesare, puiti títecapapa eta nutuparahahi nacaratasiranuyare ena ticatianacanhini.

⁴² Ávane ema tíjararecanuyare. Échepuca. Viyana viácavapaca — máichavacapa.

Nacaratacava ema Jesús (Mt 26.47-56; Lc 22.47-53; Jn 18.2-11)

⁴³ Téchajiricavaichaha ema Jesús, macahepainecha ema Júlsi. Mámamurihapaipahi ena camuriqueneana suntaruana. Ticaepuchiriquianapaipahi, étapa eta nayeheana espada. Éna, vanairucanahi nayehe ena ticatianacanhini ema Jesús.

⁴⁴ Ema Júlsi, tatiarihihi eta máicutiarayarehi eta náimatirayarehi ena suntaruana ema Jesús. Ani tacahehi eta máechajiriruvahi ema Júlsi:

—Ecnenuyare. Ema nétsereeruyare, éma ecaratácaya. Machu ecaítica, muraca eta ecaratásiraina —máichavacapa.

⁴⁵ Te títecapanapa, mapauchapa ema Júlsi ema Jesús. Máichapa:

—Yátiheipa, tata Maestro —máichapa.

⁴⁶ Tásiha, máetserecapa. Tacahe, ena suntaruana enevanepa nacaratáchi.

⁴⁷ Tacahe, ema émana apóstole, eta máimaira nacaratasirahi ema Jesús, mavehapa eta mayehe espada. Máquijica eta machaca ema mamusura ema aquenuca Caifás.

⁴⁸ Émasera ema Jesús máichavacapa ena suntaruana:

—¿Tájaha tacayema ecasiña eta espada, ecaepuchiriquipaipahivare eta ecaratásiranuyare, tímicutijiricavapa námerahihini núti?

⁴⁹ Étayapásica cape juca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacanhini. Tacahehisera

éta, títauchavayarehi tamutu eta téchajiriruvana eta Sagrada Escritura — máichavacapa.

⁵⁰ Tacahe, tijunaracanapa namutu ena apóstoleana nanaquicapa ema Jesús.

⁵¹ Matiarhivare ema émana amaperu achane. Téhicapahi. Ticaepacuhapahi eta te sávana. Tacahe, nacaratacavarepa éma apana.

⁵² Tijunahisera manaquicapa eta máepacuhainihi sávana. Tiyanaapa mamuriarepaipa.

*Nacatupihapa ema Jesús te namirahu ena aquenucarahana
(Mt 26.57-68; Lc 22.54-55, 63-71; Jn 18.12-14, 19-24)*

⁵³⁻⁵⁵ Tacahe, nacaitecapapa ema Jesús te mapena ema corregidor. Ema Pedro, máehiequenehapahi éna, mayererehipahisera. Títujicavapa tisiapa eta te canchón tayehe eta mapena ema corregidor. Tásiha, téjacapa macachanemuripa ena suntaruana, tiásacavahi eta te yucu. Váhisera náimatihini éma. Tacahe, tiúrujicavanapa namutuyaréni ena apamuriana tuparairucana énapa ena aquenucarahana énapa ena escribánoana. Napanerechaipa, natanu nicaripa eta ticaviureyarehi ema Jesús. Náichuhapa ena tépiyaequenehanayarehi eta matapiravayarehi náicha, navarairahi náimicapayarehi éma. Váhisera náichimavahini eta maviurevainahini.

⁵⁶ Camurianahinéni ena tépiyaequenehanahi éma, váhisera tácuticacahini eta nacayemaqueneanahi.

⁵⁷ Titupihanavarepa ena apamuriana tépiyahirahianayarehi. Ánipa macahe ema émana eta máepiyahiraivahi:

⁵⁸ —Núti nusamahi ani macahehi ema maca: “Núti nuvetataicayare eta juca Templo náepiyaruhi ena achaneana. Tásiha, te mapánaquenénapa sache, nímichavayare nucatupiha eta apana Templo. Váipasera tácutimahi eta náepiyaruhi ena achaneana”. Eta juca nusamaquenehi eta máechajiriruvanahi ema Jesús —macahepa ema tépiyahirahi.

⁵⁹ Váhiquenesera tácuticacahini eta máechajiriruvanahi nayehe ena apamuriana.

⁶⁰ Tacahe, ema corregidor téchepecapa eta mayaseresirayarehi ema Jesús. Ánipa maicha:

—¿Tájaha tacayema vahi pijicapavaca ena nani eta pimetauchacasivahi? ¿Yátupipuca eta nacayemaquenehi? Taicha vímahavi eta vahi picatiuchiravainahini —máichapa.

⁶¹ Émasera ema Jesús vahi majicapavacahini. Timatinaichucha. Tásiha, mápechavare mayasereca ema corregidor:

—Nuvaraha pimetacanu. ¿Píti pímiyachavahíjicacha pítihi Cristo ema vicuchapaquenehi, Machicha ema Viya? —máichapa.

⁶² Tacahe, ema Jesús majicapapa:

—Yátupi nuti Cristonu. Nuti Manerjirunuhi ema Viya. Tásiha, numetacahereyare eta apana. Járájapaya eta sáchezare ímahanuyare eta néjasirayare te mavaure ema Viya máitupajijihaquenehi. Ímahanuyareva núti eta núcupaisirayareva, násihayare te anuma, támiranuyarepahi eta úcaji —máichapa.

⁶³⁻⁶⁴ Tacahe, ema corregidor eta masamirahi, tisesarinehi ichape. Tivetsayujicavapa eta mamuiraha eta masemanevahi. Tásiha, macahepa:

—¡Émaquenepa visama ema maca tépiyacavahi Machicha ema Viya! Tétavicaipa eta maviureva taicha macaecañihi ema Viya. Vaipa tácomesa vitanucahíni ena testigoanayare. Puiti esamaripa éti eta juca macayemaquenehi. ¿Tájaha vícharacayare puiti ema maca? —macahepa.

Tacahe, namutupa najicapa:

—¡Ticaviurevaipa! ¡Étaina táimicapaca! —nacahepa.

⁶⁵ Tacahe, nátutuáca éma. Náepacauquichavarepa, tásiha, náhamirahavarepa te mamira. Tásiha, náichapa:

—Te yátupihpuca pítihi Cristo, pímatinuyare nájahanupuca nuti néhavihi.

¡Pimetacahavi! —náichapa.

Énapa ena suntaruana, te námapaipahi, náehavarepa. Ichape eta náichirahi.

Éma Pedro tépiyacavapa vahi máimati ema Jesús

(Mt 26.69-75; Lc 22.56-62; Jn 18.15-18, 25-29)

⁶⁶ Tiuri, ema Pedro, matirihichahahi eta te canchón. Tacahe, sucahepaipahi esu mavanara ema corregidor.

⁶⁷ Suímahapa ema Pedro, tiásacavahi. Suímaracapa eta mamira. Tásiha, suíchapa:

—Németeaca pítrichu ñichamuri eñi ñica Jesús, eñi nazareno —suíchapa.

⁶⁸ Émasera majicapapa:

—Vahi nímati ema péchajisihaquenehi. ¿Távihapuca pímatinenuhi píti? —máichapa.

Tacahe, tiyanapa éma eta te portón. Téchajicavanepa eta varayu.

⁶⁹ Suímahavarepa tiápechava esu esena. Sumetacavacapa ena natiarihiqueneanahi, suíchapa:

—Éñi ñica eñi nachamuri ena téhicanahi eñi Jesús —suíchapa.

⁷⁰ Tiápechavavarepa ema Pedro tépiyacava vahi máimatihini ema Jesús. Tacahe, te tiyererehachichavare, ena natiarihiquenehi náichapa ema Pedro:

—Yátupiquene pítrichu machamuri ema maena Jesús, taicha eta péchajisira, tímaticarehi eta piásihairahi te Galilea —náichapa.

⁷¹ Tacahe, majicapapa:

—Máicunacuine ema Viya, te vahi nucucahe yátupina. Váhiquenesera nímati ema achane échajisihaquenehi —macahepa.

⁷² Enurujipa tiápechava téchajica eta varayu. Tíjuhúchavapa téchava ema Pedro eta macayemaquenehi ema Jesús: “Te tamirahuinapaichaha eta apíhequenéna téchajica eta varayu, píti mapahenaripa eta pépiyacavayare vahi pímatinu”. Eta máechavairahi ema Pedro, tépanavapa tíyaha.

15

Námapa ema Jesús te mamirahu ema Pilato

(Mt 27.1-2, 11-14; Lc 23.1-5; Jn 18.28-38)

¹ Te tijarahipa, tiápechavanavarepa tiúrujicavana namutuyaréni ena aquenucarahana, taicha náichuhaqueneanahi ena tuparairucana, éna escribánoana. Tiyaserejiricanapá tájahapuca eta náicharacayarehi ema Jesús. Tacahe, nacuchucapa ticaítihapaipa eta námirapahi te mamirahu ema Prefecto Poncio Pilato. Eta máimairahi ema Pilato ema Jesús, mavarahapa máimatiyarehi éma.

² Tacahe, mayaserecapa:

—¿Yátupisareji réyivihi píti nayehe ena pijaneanana israelítana? —máichapa.

Emá Jesús majicapapa:

—Pétupicavahi eta juca piyaseresiranuhi. Yátupihi eta nurreyvahi — máichapa.

³ Tásiha, ena tuparairucana nametauchaipa emá Jesús, camuri eta maviurevahi náicha.

⁴ Tacahe, mápechavare mayasereca emá Pilato. Máichapa:

—¿Vahi péchajuchava eta juca nametauchiravihi? Camuri eta piviuerevahi náicha —máichapa.

⁵ Émasera emá Jesús váhiquene majicapahini. Tásiha, máramipa emá Pilato.

Emá Pilato macavanairipipa eta náetatasiraya emá Jesús

(Mt 27.15-26; Lc 23.13-25; Jn 18.38-19.16)

⁶ Tiuri puiti, tatiarihi eta mayeherepihi emá Pilato te Páscuamuhuana. Macaiticayarehi emá émana preso mácani nayasearayarehi ena achaneana.

⁷ Tacahe, natiarihihi eta te cárcel ena ajairana ticaeratanahi. Ichape eta naviurevahi ena téhajiricacarahiana te revolución, nacapasirapahi ena achaneana. Te namuri, matiarhihi emá achane ticajare Barrabás.

⁸ Tásiha, ena achaneana nayaseacapa emá Pilato máichahini eta mayeherepi. Ánipa náicha:

—Vivaraha picha eta piyeherepi te Páscuamuhuana —náichapa.

⁹ Tacahe, mayaseremurihapa emá Pilato:

—¿Evarahapuca nucaítica emá eyehe Rey, iáquenumuri eti israelítana? — macahepa emá Pilato.

¹⁰ (Taicha emá Pilato máimatiacaripahi eta nametauchirahi emá Jesús ena tuparairucana taicha nacapinaruhi éma.)

¹¹ Énasera ena tuparairucana náimitumuriharipa ena achaneana, eta nayaseasirayarehi émaina máuchucuha emá Barrabás.

¹² Tacahe, emá Pilato mayaseremurihavare. Máichapa:

—¿Tájahasica nícharacayare emá Jesús emá fjárechaquenehi Rey iáquenumuri eti israelítana? —máichamuripa.

¹³ Éna, tipiaracanapa eta najicapirahi:

—¡Pémetatareca te crusu! —nacahepa.

¹⁴ Tásiha, mápechavarepa mayaseremuriha, ánipa máicha:

—¿Tájaha tacayemahi eyaseacahi eta németataresiraya emá maca? ¿Tájahasica eta maviurevahi? —máichapa.

Énasera tipiaracanavare muracapanapa:

—¡Pémetatareca te crusu! —nacahepa.

¹⁵ Emá Pilato mavarahahi tíuriyarehi nayehe ena achaneana. Tacahe, mavanecapa ena suntaruana, ánipa maicha:

—Ecaiticaya emá Barrabás. Émasera emá maca Jesús, iámayare, éstacayare. Étatacayareva te crusu —máichavacapa.

Nacaecahijiricava emá Jesús ena suntaruana

(Mt 27.27-31; Jn 19.1-3)

¹⁶ Tacahe, ena suntaruana námapa emá Jesús tayehe eta náestasihayarehi te távirarehi eta guardia. Náimichuhavarepa namutu ena apamuriana suntaruana náumurivana.

17 Te náitauchapa eta náestahirahi éma, namuriachapa eta muíriare mularume. Náitsamemacapa eta itapepi eta majarapiyarehi. Nanacapa te machuti.

18-19 Nacavayumarajipa. Náepuyumirauchavarepa, ánipa náicha:

—Tata, ¡pítitataji nayehevihíji Rey ena israelítana! —nacahepa.

Náepuchisicapa eta te machuti tayehe eta curinaqui. Náutuácavarepa.

20 Tacahe, te títavanapa eta nacaetemajirisirahi, navejamuhiacapa eta mularume. Nanacavarepa eta mamuirhaichu. Tásiha, námapa tayehe eta macaetataiyayarehi te crusu. Náetatacapa emá Jesús te crusu

(Mt 27.32-44; Lc 23.26-43; Jn 19.17-27)

21 Eta napaisirapahi te calle, nácapajicapa emá achane ticaijare Simón. Éma, másihahahi te máesane. Napamicapa éma manaracuha eta macurusura emá Jesús. (Emá maca Simón, máchusinehi te jena avasare Cirene. Éma, máiyahi emá Alejandro émapa emá Rufo.)

22 Tacahe, nacaitecapapa tayehe eta masihi nacaetatairare ticaijare Gólgota.

23 Ánaquipa náesichinehi emá Jesús eta vino ticasiriquiama eta ipuruji tisucareama ticaijare mirra. Váhisera máerahini.

24 Tacahe, náetatacapa éma te crusu. Ena suntaruana, nasuertehachapa eta mamuirihaini eta náijarajirisiracacayare.

25 Te náetatacapa éma, las nuéveripa eta yáticarahi.

26 Te tápusi eta macurusura, tatiaríhivare eta ajureca táechajisihahi eta tiviuchahi eta máepenirayarehi. Ani tacahehi eta ajureca: “Emá Rey nayehe ena israelítana”.

27 Natiaríhivare ena apinana tiámerahiana. Ticaetatanahivare te machacaya, emá émana te mavaure, emá apana te sapa.

28 Tacahe, tamutu títauchavahi eta táechajiriruvana eta Sagrada Escritura, ani tacahe: “Náimijachahi emá nachamuríhi emá namauriqueneana”.

29 Tacahe, emá tiánucumirauchanapahi, tépiupiusicavanapaipa eta nacaecahirapaipahi emá Jesús. Ánipa nacahe:

—¡Pítitataji! Pícahechajiriruvahi eta piáquipaisirayarehíji eta Templo, piratahahivaréji pímicava picatupíha eta arairu Templo te mapanayarerichuhíji sache. Puiti vivaraha vímaha eta pítipujijiasiravahi.

30 Piúcupaica te jara crusu. ¡Picatiuchava pítijivaina! —náichapa.

31 Énerichuvare emá tuparairucana nacaecahijiricavare, énapa emá escribínoana. Náichajiricácapa:

—Emá mácacacha, macahehi eta máechajiriruvahi eta maratahairahíji macatiuchavaca emá apamuriana achaneana. Tásiha, puiti váhivare máratahahini émajivainahini macatiuchavahini eta te jara mávihahi.

32 Te yátupinahini Cristo, Reyinahini víyehe viti israelítana, macatiuchavai-pahini, ¿masi? Máucupaicaripahini te jara crusu, ¿masi? Visuapasarepaini eta vímairainahini —nacahepa.

Ena tiámerahiana ticaetatanahivare te machacaya, énerichuvare nacaecahivare éna apanavare.

Emá máepenirahi emá Jesús

(Mt 27.45-56; Lc 23.44-49; Jn 19.28-30)

33 Tacahe, te las dócequenepa, témahapa eta sache. Timapícupa tamutu eta apaquehe. Mapana hora eta tamapicuirahi.

³⁴ Tásiha, te las trespa sache, tipiaracapa muraca ema Jesús, áni^a macahe: —Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijicanu!”

³⁵ Tacahe, ena natiarihiqueneanahi ena tisamanahi, áni^a virepa nacahe: —Esama. Ema maca achane mapiaracahi ema víyahahini profeta Elías —nacahepa.

³⁶ Ema apana tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaqui. Máimicapayacapa eta majaca, machuchujicayarehi. Tacahe, máichapa:

—Ésamiricachucha. Vímahayare te títecapayarepuca macatiuchapana ema Elías —máichapa.

³⁷ Tacahe, tíapechavavarepa tipiaraca muraca ema Jesús. Tépenapa.

³⁸ Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchechu^a te apaquehe.

³⁹ Tásiha, ema nacapítara ena suntaruana romanoana, eta matupihairahi máimarasirahi te mamirahu ema Jesús, masamirahi eta mapiarasirahi, áni^a macahehi:

—Yátupiquenerichuyapa Machicha ema Viya ema maca —macahepa.

⁴⁰ Tacahe, natiarihihivare ena esenana. Náimarasacahi, nayererehihisera. Te nataracu, sutarihihi esu María Magdalena, esu Salomé, ésupa esu apana María. (Esu suca María, máenahi ema Jacobochicha émapa ema José.)

⁴¹ Ena nani esenana ena náumurivana ena téhicarairicanapahi téchapajiricanapahi ema Jesús eta mapaisirapahi te másihapa te Galilea. Natiarihivare ena camuriana apamuriana esenana náitecapaquenehi te Jerusalén, téhicanapahi éma.

Nacucupaicapa te crusu ema Jesús, náecarayarepa
(Mt 27.57-61; Lc 23.50-56; Jn 19.38-42)

⁴²⁻⁴³ Matiarihivare ema achane ticaijare José*. Ticavasahi te Arimatea te Judea. Éma, tétavicavahi eta mapicauchacarevahi. Masuapahi ema Jesús eta émaⁱrahi ema Cristo mavaneruhi ema Viya, étaripa eta émaⁱrahi ema téchayarehi namutu ena achaneana. Ema maca José, náumurivahi ena aquenucarahana. Tacahe, te cáperehipa eta jena sáchequenehi, tétumechavapa ema José tiyanapa eta me Pilato, mayaseapanahi eta máquehe ema Jesús, mavairahi máecarayare. Tacahe, tiyayauchavapa taicha téricayarepahi eta sache. Vahi táisapacarehíni náecararecchini te yátimuhu, váhivare táisapacarehíni máejamiacchini te jena sávarumuhu.

⁴⁴ Máraminehi ema Pilato eta máijahúchiravahi tépenavane ema Jesús. Tásiha, máimichuhapa ema nacapítara. Te títecapapa ema nacapítara, mayasecapa te yátupihipuca tépenaripa ema Jesús.

⁴⁵ Tásiha, eta mametasirahi ema nacapítara eta máepeniraipahi ema Jesús, máisapapa ema Pilato eta máquehe ema Jesús.

⁴⁶ Tacahe, tiyanapa ema José. Mámapa eta tíurina sávana mavachareruhi. Tásiha, macucupaicapa eta máquehe ema Jesús. Náyuruácapa tayehe eta

* **15:42-43** Ema maca José, vahi émaina ema maparape ema Jacobo ema táechajisihaquenehi te versículo 40. Váhivare émaina ema José ema suima esu María, máenahi ema Viáquenu Jesucristo. Ema maca José, tatiarihi eta mávacure tayehe eta Cabil^o de Jerusalén. Émasera vahi máimicasiapavahini nayehe ena ticatianacanahi ema Jesús. (Pitanuca te libro Lucas 23.51.)

sávana. Náiyaracuhapa tayehe eta máecari eta te mari nasecajueruhi. Tásiha, najihachapa te tapaja eta máecari eta ticheyarame mari tajitacarequene.

⁴⁷ Sutiarihivare esu María Magdalena ésupa esu apana María[†]. Náimara-racahi, náimatipa eta nanasihahi eta máquehe ema Jesús.

16

Eta máechepusira ema Jesús eta te máecari
(Mt 28.1-10; Lc 24.1-12; Jn 20.1-10)

¹ Tacahe, te jena sache sávaruquenehi, téricaipa eta sache, tiyanapa esu María Magdalena, ésupa esu Salomé, ésupa esu apana María. Tivacharecanapa eta tíjyequene perfume nayariasihayare eta máquehe ema Jesús.

² Tásiha, te apanapa sache, lumíncuquenehi, nayatirupa tiyanana eta te máecari. Te tiúchucapa eta sache, títecapanapaipa éna eta te máecari.

³ Eta napaisirapahi, tiyaserejiricacanapaipa. Ánipa nacahe:

—¿Nájahapapucaini náequehepuichinahavini eta tajiha eta ñécari eñi Viáquenu eta mari tajitacarequene? —nacahepa.

⁴ Te títecapanapa, náimahapa eta márime tájinaripahi te tapajacura eta máecari.

⁵ Tásiha, tisiapanapa. Ánaqui náimahapa ema émana amaperu achane, mávihahi te vaure. Eta mamuiriha, tétavicava eta tajapuva. Tiáramecanarinehi ena esenana.

⁶ Ema amaperu achane máechajicavacapa:

—Vahi ecupica. Éti etanucapahi ema Jesús Nazareno, ema macaetataquenehi. Májinaripahi, taicha ticaechepucasiripa. Yare, ímaha. Júcahi eta mávinehi.

⁷ Tiuri puiti, eyana emetaca ema Pedro, tásiha, namutu ena apamuriana echamuriana. Emetacavaca tiyanayare ema Jesús eta te Galilea. Ánaqui macuchapiaheyare emutu éti. Échavarichuhipuca eta macayemaque-
neanahi te achanerichaha —máichavacapa ema ángele.

⁸ Tacahe, tiúchucanapa eta te máecari. Tiyananapa tijunapanapaipa. Tiyayacareanapaipa taicha eta náramirahi. Eta nayanirahi, nájina nametarui-nahini taicha eta napisirahi.

Tímerecavapa ema Jesús suyehe esu María Magdalena
(Jn 20.11-18)

⁹ Tiuri, eta máechepusirahi ema Jesús te máecari te jena lumíncuquenehi te yáticarahichicha, sutivapa máimeresiavahi suyehe esu María Magdalena. (Esu suca María, esu máepachiaruhi ena siétequeneana éreanana te suáquehe.)

¹⁰ Tacahe, tiyanapa ésu, sumetapana ena suchamurianahi. Éna, tétavica-vahi eta napanereresirahi, tíyahanahi eta nacatisamurevairahi.

¹¹ Váhisera nasupahini eta sumetarapihi esu María eta máechepusiraipa, machaviraipahi titareca, étapa eta máimeresiravahi eta suyehe.

Tímerecavapa ema Jesús nayehe ena apinana máimitureana
(Lc 24.13-35)

[†] 15:47 Esu suca María, esu táechajisihaquenehi te versículo 40. (Te pivaraha pecha pitanuca Juan 19.25.)

¹² Te táequenepa eta juca, tímerecavavarepa ema Jesús nayehe ena apinana máimitureana eta napaisirapahi, nacaijuheirahi eta avasarechicha te tacha-caya eta Jerusalén. Tiápamaichavahisera eta mamira. Vahi náimatívanehini éma.

¹³ Téhesera náimatipa éma, majunijiacavacapa. Tacahe, tichavavaneanapa nametapana ena apamuriana nachamuriana. Váhiquenevaresera nasua-pahini ena apinana, eta nametasirahi.

*Tímerecava ema Jesús nayehe ena mayeheana apóstoleana
(Lc 24.36; Jn 20.19-21)*

¹⁴ Tiuri, te táequenepa, tiúrujicavanahi eta nanisirahi ena óncequeneana apóstoleana. Tacahe, tíjahúchavapa tímerecava ema Jesús eta nayehe. Macaja-chamurivarepa eta namasuapirahi eta nametarapianahi ena tímahanahi éma eta máechepusiraipahi.

*Matuparaca ema Jesús ena apóstoleana
(Mt 28.16-20; Lc 24.37-49; Jn 20.22-23)*

¹⁵ Tacahe, máichavarepa:
—Eyana epaica te tamutu eta avasareana eta te juca apaquehe. Ecameta-rairuyare eta tiúrina echajirirucava nayehe namutu ena achaneana.

¹⁶ Nucuchucuhavacayare namutu ena tisuapajirahianaya, ena ticaicachasianaya. Énaserá éna vahi tisuapanaya, ticaicuñanayare taicha tanasirichuhi eta napecaturana.

¹⁷ Ena tisuapajirahiana náimerecayare eta juca tiáramicareana: Náimijuni-jicayare ena éreanana nayehe ena achaneana, taicha námapiçayare eta níjare. Náitucayare téchajicana tayehe eta apanana échajirirucavana namaitucaque-neanainihi.

¹⁸ Te nacaratacahipuca eta quichareana, tájina táícharacaimahi. Te téranahipuca eta venéno, tájinavare náichavaimahi. Nanacayare eta navahuana nayehe ena nácani nacajumaqueneana, tásiha, tinaracanayare éna — macahepa.

*Eta mayapirahi ema Jesús te anuma
(Lc 24.50-53)*

¹⁹ Tacahe, te títavapa tamutu eta mametarapianahi ema Viáquenu Jesús, tiyanapa tiyapa te anuma. Ema Viya macaejacapa ema Machicha te mavaure.

²⁰ Tacahe, tiyananapa eta te tamutu avasareana ena máimitureana. Ticame-tarairuanapaipa eta tiúrina echajirirucavana. Ichape eta máimicatasirava-capahi ema Viáquenu. Tétávicavahi tajacapacarevahi máicha, eta náimitura-pianapahi. Taicha máíjaracavacapahi eta náimeresirapahi eta tiáramicareana ticunachacareanahi.

Tamu tupa.

Ema San Lucas májuequenehahi eta máichararacavahi ema Jesucristo, ticaijare puiti eta EVANGELIO SEGÚN SAN LUCAS

¹⁻³ Némunaruquene nuparape Teófilo, nucajurevi puiti apaesa pecha píti apanavare eta juca néchaqueneanahi núti. Ichapemurianahi ena vichamuriana tiájuequenehanahi tayehe eta máicharacavahi ema Viáquenu Jesucristo. Tásiha puiti, núti apanavare nájuequenehavare. Nucaejarusinahi tamutu eta nájuequenehairahi, taicha tamutuhi nucayasesereru nayehe ena tinecapaequenehanahi, tímahanahi eta apaicape eta táepaniravahi eta máitaresirahi ema Viáquenu.

⁴ Núti nuvaraha nímimatichavi apaesa yátupina pecha tamutu eta juca piáravahuanahi.

Ema ángele macametarapi eta máuchusirayare ema Juan Tícachasiricarahiare

⁵ Cape juca viásinequenehi te émarichaha ema Aluresi aquenucahi, réyhi tayehe eta jena provincia Judea, matiarihihivare ema émana achane, ticaijare Zacarías. Éma, náumurivanahi ena ticaijareana Abías. Eta náematanerepi éna, náechapajirica eta námavahuasana ena achaneana tayehe eta Templo. Esu mayena ema Zacarías ticaijaruhi Elisabet, mámariequenenihí ésu ema víyarahaini Aarón.

⁶ Ema maca Zacarías ésupa esu mayena, tájina náichiravainahini te mami- rahu ema Viya. Tamutuhi náitaucha eta mavanairipiana ema Viáquenu. Tacahe, tájina náechajisiequenehahini nayehe ena achaneana.

⁷ Nájinasera nachichainahini, macheruhi esu Elisabet eta suítaresira. Váipavare ticachichanaimahi taicha ichavicanaripahi.

⁸⁻¹⁰ Te jena sache, náichuhapa ema Zacarías eta masiapirayare tayehe eta Templo te Jerusalén, taicha áñopahi eta masiapirayare. Tacahe, ticátupará- casipa éma. Émapa táetupiacahi eta máematanerepiyarehi máijuchayarehi eta incienso te táinahu eta mesa náijuchirarehi, taicha tacahehi eta nayeherepini ena israelítana. Tacahe, ema Zacarías tisiapapa te tajuhe eta cuarto tacapica- huquenehi, máijuchapa eta incienso. Macarichusera tísapacarehi tisiapa. Ena apamuriana achaneana nanasipa te aneca, tiyujaracananripa éna.

¹¹ Tiáramicarepa timerecava ema émana ángele te mamirahu ema Zacarías. Mavaneruhi ema Viáquenu. Titupiharipa ema ángele te vaure tayehe eta mesa náijuchirarehi eta incienso.

¹² Tiáramecarine ema Zacarías eta máimairahi ema ángele.

¹³ Émasera ema ángele máéchajicapa:

—Vahi picupica, Zacarías —máichapa—. Ema Viya masamahi eta piyasese- repihi píti eta mayehe. Puiti esu piyena Elisabet ticachichayare. Juan eta máijareyare ema echichayare.

¹⁴ Ichapeyare eta piúrisamurevayare te máuchucapa ema echichayare. Énaripa ena achaneana, ichapeyareva eta náurisamurévaya taicha eta máuchusirayare.

¹⁵ Numetacavi: Ema pichichayare, ichapeyare eta macunachacarevayare mayehe ema Viya. Píti, vahi písapaimahi tera eta vino, étaripa eta apamuriana

téracareana muracaqueneana. Taicha éma, eta máuchusirayare, mávaháruya-repahi ema Espíritu Santo.

¹⁶ Éma pichichayare, éma tétupiricayare eta táurivayare eta napanereruana ena pijaneanana israelítana, tachavirayare eta nasuapirayare ema Viya.

¹⁷ Ema maca pichichayare, éma títapumirauchayarepahi ema Viáquenu. Macutiyare eta máitupajijiasiravaini ema víyarahaini profeta Elías. Ichapeyare eta máitusirayare eta macajimuyasirayare eta nasamureana ena achaneana apaesa tachava eta nasuapiraina ema Viya, tácuti eta nasuapajiravainihi ena náchucanaveanainihi. Énaripa ena váinarajipanereruana, tisuapajirahianayareva máicha. Mametacavacayare ena achaneana natsecavaipa eta najacapirayare ema Viáquenu —máichapa ema ángele.

¹⁸ Tásiha, ema Zacarías majicapapa. Ánipa macahehi:

—Páurenusami, vaipa numaitacavaimahi nucachichahini, ésuripa esu nuyena. Ichavícahavipa víti. Váhicha nusuapapajica eta juca vicachichairayarepuca —máichapa.

¹⁹ Émasera ema ángele máichavarepa:

—Núti nucaijare Gabriel. Núti mavanerunuhi ema Viya. Nutuparacasivaichuhi eta numetasiraviyare eta juca ecachichairayare. Piúriháine ichapenahini eta piúrisamurevainahini.

²⁰ Puítisera úpaviyare. Eta ecutiarareyare piyeh taicha eta pimasuapiranuhi. Tiámáinucava te táitauchavapa eta juca numetaruvihí, péchajicainavarepa —máichapa ema ángele.

²¹ Tacahe, ena achaneana nanasiqueneanahi te aneca nacuchaparairicaipaicha ema Zacarías, náramipa eta mayerevaipahicha te tajuhe.

²² Jéhesareinehi, te tiúchucapa ema Zacarías, vaipa máechajicahini. Náimatia-capasera éna, eta máechajisirahi ema Viya te tajuhe. Tisuveverecapapahi éma eta mavarairahi máimicutiarachavaca ena achaneana eta yátupirahi masamaquenehi. Úpapaipahi éma.

²³ Tacahe, te títauchavapa tamutu eta jena sácheanahi eta matuparacasivahi, tíanapa ema Zacarías tayehe eta mapena. Nueve caje eta mayerevayarehi eta mamaechajisirayarehi.

²⁴ Tásiha, esu mayena Elisabet, ticajaripa ésu. Váipasera súchuchurecahini te supena. Váhivare sumetajiricahini. Tiámainucavapa te títauchavayarepa eta cincoquenehi caje eta sucajarirahi.

²⁵ Tétavicavahi eta súrisamurevahi eta susamiravahi ésu. Ánipa sucahe:

—Ichape eta ñijapanuiranuhi eñi Viya, tíjaracanuhi eñi nuchichayare. Váipasare nayunacaimahi ena achaneana eta numacheruvahi —sucahepa.

Éma ángele macametarapi eta máuchusirayare ema Jesús

²⁶ Tacahe, te sáisiqunepa caje, ema Viya mápechavare mavaneca ema ángele Gabriel tiúcupaica tayehe eta avasare Nazaret, tayehehi provincia eta Galilea.

²⁷ Máucupauchapa esu amaperu esena ticajaru María. Ésu, tájina suímatiyahini ema ajaira. Matiarhipasera ema suímayarehi, ema ticajare José. Téjaripahi eta natratune. Ésu, mámariéqueneinihi ema víyarahaini rey David.

²⁸ Tacahe, ema ángele máucupauchapa ésu tayehe eta suávihahi. Máichapa ésu:

—Pícharacava, María. Piti manerejiruvihí ema Viya. Tétavicavahí eta piúricacarevayare taicha ichape eta majapanuiravihí éma Viya. Picachuricahi namutu ena apamuriana esenana —máichapa.

²⁹ Éusera tiáramecainehi eta máechajisirahí ema ángele. Supanerequenehainehi tájahahipuca tacayemahi eta máechajisirahí ema ángele.

³⁰ Émasera ema ángele máichavarepa:

—Vahi picupica, María. Piti manerejiruvihí ema Viya.

³¹ Numetapanavihí puiti eta picajarirayare. Ajairayare ema pichichayare. Jesús eta máijareyare.

³² Tétavicavaya eta napicauchirayare ena achaneana taicha Machichayarehi ema Viya. Ichapequeneyare eta aquenucairayare éma taicha ema Viya manacayareva eta mávacureyare aquenucayare. Macutiyarehi eta aquenucairahí ema máchucaini David.

³³ Éma téchayarehi namutu ena pijaneana israelítana. Máepenacacayare eta aquenucairayare —máichapa ema ángele.

³⁴ Tásiha, esu María, sujicapapa:

—¿Tájahasica táicharacavayare eta juca? Taicha núti nájinaichaha nímainahini —suíchapa.

³⁵ Émasera ema ángele máichavarepa:

—Picachichayare taicha eta máitupajijiasiravahí ema Viya. Timicauchaviyare eta majaraiva, tásiha, tisiapahacavinapa ema Espíritu Santo. Eta tacahe, ema amuya pínaruyare, sántoyare éma, taicha machichayarehi ema Viya. Náimatiyare namutu eta machichairahí ema Viya.

³⁶ Picutiyare esu pijaneana Elisabet, énerichuvare ticajaripahí ésu. Tayanapanehi ichavicachicharipahinéni ésu, macheruinihinéni. Sáisiripasera caje eta sucajarirahí puiti.

³⁷ Tásiha ema Viya, tájinaquene máemáituca éma —máichapa ema ángele.

³⁸ Tacahe, esu María sujicapapa:

—Núti ñivanaranuichuhi éñi Viya. Nutiaríhi puiti. Ñímahanuinepa éñi, eta ñícharacanuyare te ñivanairipiana —suíchapa ema ángele.

Tacahe, eta masamirahí ema ángele, tianapa tichavahí.

Esu María suéjirapanapa esu sujaneana Elisabet

³⁹ Tacahe, te jena sácheana titátájipa esu María tiyana tayehe eta avasarechicha te tataracucujanahi eta márijuecu tayehe eta provincia Judea, suávasahí esu sujaneana Elisabet émapa ema Zacarías.

⁴⁰ Te títecapapa esu María tayehe eta napenahí, suéchajicapa esu Elisabet.

⁴¹ Te susamapa esu Elisabet eta suahu esu María suéchajisirahí, tiyamicainehi eta amuya te sujuhe esu Elisabet, enevanepa mávahácahi ésu ema Espíritu Santo.

⁴² Tacahe, téchajicapa muraca esu Elisabet, suíchapa:

—Píti, tétavicavahí eta piúricacarevahí ñícha éñi Viya. Picachuricahavihí vimutu viti esenana. Éñirípa éñi pichichayare, tétavicavahivare eta ñícunachacarevaya.

⁴³ Nusapíhasamípa núti péjirapananuhi piti ñénaviyarehi éñi Náquenu.

⁴⁴ Te nusamapa eta piahú eta péchajisiranuhi, tiyamuricainehi te nujuhe éñi nuchicha, taicha eta tiúrisamuréinehi éñi.

⁴⁵ Tétavicava eta piúricacarevaya píti taicha eta pisuapajiraivahi ñe Viya. Títauchavainapa tamutu eta ñimetarapihi eñi Viáquenu eta piyehe –sucahepa esu Elisabet.

⁴⁶ Tacahe, esu María sujicapapa:

–Ichapemurihi te náchaneva eta nucunachirahi eñi Viáquenu.

⁴⁷ Taicha tétavicavapa eta táurisamureva eta nusamure ñicha eñi Viya Ticatiurahiquene eta nuyehe.

⁴⁸ Taicha eñi, vahi ñépurunuhini páurenuhinéni nútisami. Tétavicavahisera eta ñijapanuiranuhi nuti ñivanarahi. Nútupa ñinerejicanuhi, tásiha, ichapenapupuca eta nacapinarunuiraya namutu ena achaneana natiarihiquenehi puiti, énapa ena arajuruanayare. “Tétavicavapa eta súricacarevahi esu María” nacáhénapupuca.

⁴⁹ Tétavicavapa eta ñítupajijiasiravahi eñi Viya, tíjaracanuhi eta núriva-yarehi ñicha. Jéhevare eñi, Sántoquenehi eta ñijare.

⁵⁰ Eta tacaheyare eta ñijapanuirahaviyare puiti, énapa namutu ena araju-ruanayare, nácani típicauchanayare éñi.

⁵¹ Eñi Viya, ñíjaracayare eñi nuchichaya eta ñítupajijiasiravaya ichape. Tásiha, ñicaerajicavacaya ena ticasiñavavairicana, énapa ena váinarajipanere-ruanahivare.

⁵² Nácani aquenucana nacatianacainapupuca, ñicapaquechavacayare-hisera eñi. Nasapihapa ena páureanasamihi, ñinerejiruanaya éna, ñijupaha-nayare.

⁵³ Yátupiya eta ñíjarasiravacayare eta táetaviuchiraya eta náuricacarevaya namutu ena ticasíñavanayare ñiyehe. Énaserá ena tímijachavanahi tájinahini nácamunuhini, ñicaerajicavacaya namutu.

⁵⁴⁻⁵⁵ Eñi Viya acane tíjaracavahi ñiyehe eñi viáchucaini Abraham énapa ena ñiámariéqueneana, eta ñíjarasiravacainapa eta táetaviuchiraya eta náuricaca-revanaya. Vahi ñémitisicaimahi eñi Viya eta ñéchajiriruvahi ñíjararuvahi. Puiti, eñi nuchichaya tiámayarepahi tamutu eta viúricacarevanaya viti is-raelítana. Máitavacacayarehi éta –sucahepa esu María.

⁵⁶ Tásiha, sunasipanapa esu María te supena esu Elisabet. Mapana caje eta suyerevahi. Te táequenepa, tichavavarepa te supena.

Eta máuchusira ema Juan

⁵⁷ Tacahe, títauchavapa eta sucajera esu Elisabet. Suínacapa ema suchicha.

⁵⁸ Tiyananapa ena sujaneanana énapa ena suchacayapenanahi, náejirapana ésu. Táicha eta nasamairirisirahi eta súrivahi maicha ema Viya eta majapanuirahi ésu. Tiúrisamureanarínehi namutu.

⁵⁹ Tacahe, te óchoquenepa sache eta máuchusirahi ema amuya, nayanauchapa ena najaneanana, namarcachapanayarehi ema amuya; taicha tacahehi eta nayeherepihi. Tásiha, navarahapa nanacayarehi eta máijareyarehi Zacarías, mámapicayarehi eta máijare ema máiya.

⁶⁰ Ésusera esu maena ema amuya vahi suvarahahini. Suíchavacapa:

–Juan eta ñíjareyare.

⁶¹ Tásiha, éna nacahepa:

–¿Tájaha tacayema? Namutu ena pijaneanana, nájina ticaijarena eta Juan –nacahepa.

⁶² Tásiha, éna náimicutiarachinapa eta nayaseresirahi ema Zacarías tájahapuca eta máijareyarehi maicha éma.

⁶³ Tacahe, ema Zacarías tiyaseserecapa eta táblamechicha, májuchihayarehi eta májareyarehi ema machicha. Eta ajureca, ani tacahehi: “Juan eta májareyare”. Tésenijiricacanárinehi éna taicha eta májareyarehi ema amuya.

⁶⁴ Tásiha, tjàhúchavapa tichavapa eta máechajisira ema Zacarías. Macunachapa ema Viya eta máurisamurevahi.

⁶⁵ Ichape eta tiáramicarehi nayehe ena natarihiqueneanahi. Nasamairiricavanepa namutu ena távacuanahi eta avasarechichana tayehe eta provincia Judea. Náechajisihapa eta juca nasamaiririruanahi.

⁶⁶ Namutupa napanerequenehahi. Nácani tisamairiricanapahi, tiyasejiricacanáripa. Ánipa nacahe:

—¿Cañarihi tacayemaquenehi eta juca máuchusirahi ema amuya? — nacahepa.

Tásiha, ema amuya, tétavicavahi eta majaneasirahi ema Viya eta majurusirapaipahi.

Eta majirarapi ema Zacarías

⁶⁷ Tacahe, eta jena sáchequenehi eta macamarcairahi ema amuya, étaripa eta nanasirahi eta májareyarehi, téchajicapa ema Zacarías. Macunachaipa ema Viya, taicha mávahácaripa ema Espíritu Santo. Ánipa macahehi:

⁶⁸ —Tétavicavapa eta macunachacareva ema Tata Vicaiyaquene, ema véhiruhi vimutu viti israelítana. Taicha tijapanuhavihi vimutu viti machaneranihi, ticuchucuhahaviyarehi.

⁶⁹ Tijarachaviyarehi puiti ema yátupiqueneyare eta macatiuraivaya, ema manerejiruhi te namuri ena mámariequeneanainihi ema David, ema mavanarainihivare ema Viya.

⁷⁰ Títauchavaipahi eta náechajiriruvanahi ena santo profetanaini acane, eta nametacasivanahi me Viya.

⁷¹⁻⁷³ Taicha tacahehi eta matratunehi ema Viya mayehe ema viáchucaini Abraham. Ema Viya tjaracahavi eta majapanuiravacayarehi ena viáchucanaveanaini, énapa ena ticachichahaviana, vítipa puiti. Énerichuvare tjaracavahi eta mamaemitisiraya eta macatiuchirahaviyare nayehe ena ticatianaahavianahi.

⁷⁴ Ema Cristo manerejiruhi ema Viya, ticatiuchahaviyarehi taicha mamavarairahi vipicahini, nacuijahivaréni ena nahapapicahavihini eta vicaemataneasirayarehi éma.

⁷⁵ Eta mavarahaquenehi tíuriyare eta vítaresirayarehi tamutu sácheana, tájna víchiravaimahi te mamirahu éma.

⁷⁶ Pítiripa, piti nuchicha, píchuarecasivaichuhi mayeheviyare profeta ema Tata Vicaiyaquene taicha piti pínapumirauchayarepahi ema Viáquenu Cristo.

⁷⁷ Pétupiricayarehi eta nasamureana ena achaneana, yátupinapa machaneranyarehi éna. Pímitucayareva nácaicutiaraya eta mavarairahi ema Viya macatiuchavacayare, macaepahairayarehivare eta napecaturana.

⁷⁸⁻⁷⁹ Puítiripa, eta máemunasirahavihi ema Viya, macucupaisinahavihi te anuma ema Machicha. Éma, tímimaticahavinapa eta majaraiva ema Tata Vicaiyaquene étapa eta táuriquene achene ticaijuhe mayehe. Máetucarácavacayare eta nasamureana ena ticatisamureanahi, nácani tépenanyarehíni — macahepa ema Zacarías.

⁸⁰ Tacahe, ema amuya eta majurusirahi, tiámavapahi eta masuapajiravahi mayehe ema Viya. Váhivare étainahini te tajuhe eta avasare eta majurusinehi.

Vámahicuruhahi eta majurusirahi. Tiámainucava te ajairapa, tímerecavapa nayehe ena majaneanana israelítana, tépanavapasera ticametarairu.

2

Eta máuchusira ema Jesús

(Mt 1.18-25)

¹⁻³ Tacahe, te jena áñoanahi cape juca viásinequenehi te émarichaha aquenucahi ema Emperador Augusto, matiarihivare ema apana achane ticaijare Cirenio, majupahahi ema Augusto. Prefectohi éma, tayehe eta avasareana. Ticaijare Siria eta mávihahi*. Tacahe, te jena sácheana, ema Augusto macavanairipipa nacuchuca eta vantu eta nacatupairayare namutu ena achaneana te avasareana. Tacahe, tiyananapa ena achaneana te návasanapachu te náuchusineana eta nacatupairayarehi. Nasuapayarehi eta vanairipi. Táinapuiruhi censo maicha ema Emperador Augusto.

⁴⁻⁵ Tacahe, tiyanapa ema José. Mámapa esu mayena María. Ticajaripaipa ésu. Tacahe, tiúchucanapa éna tayehe eta avasare ticaijare Nazaret te Galilea. Nacajuhepa eta avasare ticaijare Belén te Judea, eta mávasainihi ema aque-nucaini rey David. Étarichuvare mávasahi ema José, taicha ema José mámarie-quenehi ema David. Tiyananapa ticatupanayarehi.

⁶⁻⁷ Tacahe, títecapanapa te Belén. Tájinaipasera táviravainahini eta te pétiana eta náitecapihahini taicha camuriqueneanahi ena achaneana náitecapaqueneanahi. Tacahe, tisiapanapa eta te peti tapena eta sárareana. Tacahe, esu María tiyuriticavaipa eta sucajera eta suínasirayarehi. Tacahe, tínacapa jena yatí. Suínacapa ema amuya ema suárachichahi. Tacahe, suáyurucapapa eta te mámaratataji pañal. Sucaivecapa ema amuya alauchu.

Eta pástulérüana ticametacasianapa nayehe ena ángeleana

⁸ Te vamáhi te tachacaya eta avasare Belén, natiarihihí ena pástulérüana. Éna, najaneacahi eta nayeheana uvesana te jena yátiquenehi.

⁹ Tiáramicarepa tímerecava ema ángele mavaneruhi ema Viya. Jéhesare, tamicauchamurinehi ena pástulérüana eta majaraivahi éma. Tiáramecarnarine éna.

¹⁰ Tásihasea, ema ángele máichavacapa:

—Vahi ecupica. Yare, jucarihi eta tímitecanuhi núti numetapanaheyare. Tétávicava táurisamurécarevaya nayehe namutu ena achaneana.

¹¹ Puiti te jena avasare Belén, mávasaini ema rey David, tiúchucaipa ema Ticatiurahiyare eyehe emutu éti. Éma, ticaijare Cristo Viáquenu.

¹² Eta tacahe, nímicucutiarachinaheyare eta ímairaya: Echimapayare ema amuya ticayuruhahi te mámaratataji pañal. Tívecahi eta te tajuhe eta peti tapena eta sárareana —máichavacapa ema ángele.

¹³ Tásiha, títahúchavapa tímerecavana ena camuriqueneana ángeleana eta te mávihahi ema émana ángele. Najirahi eta alabanza eta nacunachirahi ema Viya te anuma. Ánipa nacahe:

¹⁴ ¡Tétávicavapa eta vicunachirahi ema Viya vimutu viti viávihanahi te anuma! ¡Jéhevare puiti, tiúricavanainapa ena achaneana te juca apaquehe, ena manerejiruanahi macatajiruanahi ema Viya! ¡Tájinainapa náichiravaimahi! —nacahepa.

* **2:1-3** Te jena año, matiarihivare ema ichapequenehi aquenuca ticaijarehi Aluresi. Éma, reyhi tayehe eta departamento Judea.

15 Tacahe, tiyananapa ena ángeleana, tichavana te anuma. Tásiha, náichacacapa ena pástuléruana:

—Yare, viyana te Belén. Viyana vímahapana eta juca mametaruhavihi ema ángele mavaneruhi ema Viya Viáquenu —náichacacapa.

16 Tacahe, titátájianapaipahi tiyanana. Jéhesareinahi, te títecapanapa, nachimapainehi esu María émapa ema José. Matiarihisaréipahi ema amuya. Tívechahi éma eta te tajuhe eta peti tapena eta sárareana.

17 Te náimahapa tamutu, tépanavanapa náemechapa. Amairipahipa naecha eta mametarapianahi ema ángele eta máuchusiraipahi ema amuya.

18 Tacahe, náraminehi namutu ena achaneana eta nametarapianahi ena pástuléruana.

19 Tásihasera, esu María supanerequenehainehi te susamure tamutu eta juca susamaqueneanahi.

20 Tacahe, ena pástuléruana tichavanapa tayehe eta te najanearesihahi eta uvesana. Nacunachainehi ema Viya te anuma táichavene eta máechajiriruvahi ema ángele, táichavenevare eta náimairahivare ema amuya alauchu. Éta paichuhi tacahehi eta macayemaquenehi ema ángele.

Námapa ema amuya Jesús te Jerusalén, náimerepana tayehe eta Templo

21 Te óchoquenepa sache eta máuchusirahi ema amuya, namarcachapa éma taicha tacahehi eta nayeherepi ena israelítana. Tacahe, nanacapa eta máijareyare Jesús. Eta máijare máimijarchaquenehi ema ángele te sucajariyarepa esu maena María.

22-24 Tacahe, te cuarentaquenepa sache eta suínasirahi esu María, tiyananapa te Jerusalén. Eta tímiyanavacahi éna, náimerepanayarehi ema amuya mayehe ema Viya Viáquenu. Taicha ema Viya macavanairipihi eta te Sagrada Escritura eta májurehi ema víyarahaini Moiséini, ánipa tacahehi: “Te ajairapuca ema mácani suárachicha esu esena, ímrecayare nuyehe; íjaracanuyare taicha nícuchichuhi ema”. Énerichuvare náitauchayarehi eta juca apana vanairipi tayehe eta napachíhairaina ena esenana eta te táequenerapa eta náinasira. Ánipa macahe: “Esu súcani esena arainacahi, suíjaracasichanupana eta apihina paluma símarrune; te váhipuca, apina paluma suítatiqueneana, amairuhichichanasera”.

25 Tiuri, matiarihihi te Jerusalén ema émana achane ticaijare Simeón. Tétávicavahi eta máuriva. Tipicaurahi éma. Émarichu mávaháruhi ema Espiritu Santo. Ticuchapavaipahicha ticaimairuvaipaicha éma eta máimatiraya ema Cristo, éma ticaurisamurerahi nayehe ena achaneana majaneanana israelítana.

26 Taicha ema Espiritu Santo mametacaripahi ema Simeón eta vuíchaha tépenavanemahi éma, táicha máimatinumayarehi ema Cristo mavaneruyarehi ema Viya.

27 Tiuri, te jena sache, ema Espiritu mavanecapa ema achane Simeón mayana eta te Templo. Tacahe, títecapanapa ena ticachichana ema Jesús. Námapaipa ema amuya. Náitauchayarehi eta vanairipiana taicha eta máuchusirahi ema suárachichahi.

28 Tacahe, te máimahapa ema Simeón ema amuya, mavehapa, majupacapa. Tásiha, macunacharinehi ema Viya te anuma. Macahepa ema Simeón:

29-30 —Tiuri puiti, Tata Náquenu te anuma, nuvarahapa nunaraca te juca apaquehe, nuti pivanarahi. Taicha núrisamurepa eta nímairaipa ema Cristo.

Éta paichuhi eta pimetarunuhi. Nímatipa ema Ticatiurahiqueneyarehi, ema pivaneruhi pitupararuhi.

³¹ Éma, tímaticareya picha nayehe ena achaneana ticavasanahi eta te tamutu avasareana.

³² Ticunachavanarinehi ena pinerejiruana israelítana. Tíjarahinevare te nasamure eta nacunachirahi. Éma, tímicauchavacaya ena apamuriana achaneana apavasanana apaesa náimatiyare ema Viya —macahepa ema Simeón.

³³ Náraminehi ena ticachichana eta máechajiriruvanahi ema Simeón mayehe ema amuya.

³⁴ Tacahe, ema Simeón mayaseacapa ema Viya eta náurivaina éna. Tacahe, máichapa esu María esu maena ema amuya Jesús:

—Pímaha. Ema maca amuya, matuparacasivaichuhi me Viya eta máimitu-resirayare eta máechajiriruvana ema Viya. Natiarihiyaresera camuriana ena vijaneanana israelítana énajivayare tíchavanayare, taicha náepuruyare ema pichicha, nacatianacayareva. Tásiha, natiarihiyarevaresera ena apamuriana vijaneanana tinaracanayare tíricavanayare taicha eta nacasiñairaya éma.

³⁵ Étainapa tacaecheraiyaya eta napanereruanapachu te nasamureana. Énerichuvare, numetacavi piti María: Ichape eta picatisamurevayare, taicha pímahayare eta táíñehiqueneyare máichararacavayare ema pichicha. Tímicitijiricavayare tayuvaracahini eta pisamure eta tumare —máichapa ema Simeón.

³⁶ Tiuri, sutiarihivare esu ésuna esena ichavicachicha. Ticametarairurahi ésu. Ticaijaruhi Ana. Ema suíyaini ticaijaréni Fanuel. Ésu, mámariequenehi ema víarahaini Aser. Eta suámaperuvahi ésu, siete año eta sucachanerahi ema suímaini.

³⁷ Tásiha, ochenta y cuatro añoripahi eta suépenaimavahi. Sunasiquenehi sucapenahi ésu eta te Templo. Tamutuhi sácheana, yátiana, tiyujaracahi ésu. Suhayunachahivare.

³⁸ Tacahe, ema Simeón téchajiricavainirichaha, títecapanecha esu Ana. Eta suímairahi ema amuya Jesús, sucunacharinehivare ésu apanahivare, suhasulupayachapa ema Viya máichavene ema amuya. Tásiha, sucametarairupa mayehe ema amuya. Suéchajisihahi éma nayehe ena tisuapajirairahana ticuchapanahi eta máitecapirayare te Jerusalén ema Cristo.

Tichavanapa eta te návasa Nazaret

³⁹ Tiuri, náitauchapa tamutu eta mavanairipiana ema Viya eta te Sagrada Escritura. Tacahe, tíchavanapa eta te Nazaret te Galilea, te návasaichuhi éna.

⁴⁰ Tacahe, ema amuya Jesús tíurijuruhi. Túmehi. Téchemarahihi, tamutu maecha, taicha mamunavahi me Viya.

Ema Jesús téchajiricava nayehe ena máestroana

⁴¹ Tiuri, tamutu añoana te Páscuamuhuana, eta nayeherépi ena ticachichana ema amaperu Jesús, tiyananayarehi tayehe eta avasare Jerusalén.

⁴² Tacahe, ema Jesús, te macayehepa doce año, tatuparacaripahi ena ticachichana náimerepanayarehi éma, námayarehi tayehe eta Jerusalén, náimimatichayarehi eta piesta ticaijare Pascua.

⁴³ Tiuri, te jena táequenerapa eta piesta, tichavanapa te napena. Tíminasichavapasera ema amaperu Jesús eta te Jerusalén. Eta napaisirapahi te achene, vahi náejiacavanehini ena ticachichana,

⁴⁴ taicha náimijachahi matiarhipahi éma te namuri ena achaneana nacachanequeneanapahi. Étanaripahi sache eta napaisirahi, napaenu-mavapa náejiacahi éma. Te jena cáperehiquenepa, natanucapa te namuri ena najaneana nacachanequeneanapahi.

⁴⁵ Májinasera náichimavahini. Tacahe, tichavanavarepa te Jerusalén, natanupanayarehi éma.

⁴⁶ Tacahe, te jena mapanaquenepa sache eta natanusirahi, napaenu-mavapa náetupiacahi ema Jesús tayehe eta Templo. Macachanemurihi, téjacahi te namuri ena máestroana. Masamararacavacahi, mayaseremurihacavahivare éma apanavare.

⁴⁷ Ichaperinehi eta náraminehi namutu eta náimairahi eta máechemaraivahi, taicha táurivapahi eta majicapiravacapahi éna, taicha eta máechemaraivahi.

⁴⁸ Tacahe, tiáramivanarinehi ichape ena ticachichana te náetupiacapa. Tásiha, suíchapa esu maena:

—Nuchicha, ¿tájaha tacayema píchahavihi? Ichapemuri eta vicañamarasiravahi pícha. Vitanuñiriricavihi, núti éñipa éñi piya —suíchapa esu maena.

⁴⁹ Tacahe, ema Jesús majicapapa:

—¿Tájaha tacayema, meme, eta etanuñiricanuhi? ¿Váhipuca échahini éti eta návihairahi eta ani? Níchayare eta máemataneana ema Tata —macahepa ema Jesús.

⁵⁰ Énasera vahi nacaicutiarahini eta macayemaqueneanahi ema nachicha Jesús.

⁵¹ Tacahe, tiyananapasera tichavana te návasahi Nazaret. Ema Jesús, tisuapajirahihí nayehe ena ticachichana. Esu maena María tamutuhi supanerequenehahi te susamure eta juca susamaqueneanahi.

⁵² Tacahe, ema Jesús tijurucapaipa, tijuruhacapaipavare eta máquehe, tacachanepahisera eta máitupajijiasiravahi. Máimicatacahi ema Viya. Tétavacavahivare eta námunasirahi éma, ena achaneana.

3

*Ema Juan Tícachasiricarahi tépanavapa ticametairu eta máechajiriruva ema Viya nayehe ena vámahicuruhana
(Mt 3.1-12; Mr 1.1-8; Jn 1.19-28)*

¹ Tacahe, eta máepeniraipahi ema aquenucaini Augusto, tisiapapa ema Tiberio máitsivaquenehi. Émapa Emperadorhi. Quince añoripahi eta macatuparahairahi. Ema Poncio Pilato, émaripa prefectohi tayehe eta departamento Judea. Tásiha, ema Herodes Antipas, machicha ema Aluresini, prefectohivare tayehe eta departamento Galilea. Ema maparape Felipe, prefectohivare éma, tayehe eta departamento Iturea étapa eta Traconite. Ema Lisaniás, prefectohivare tayehe eta departamento Abilina.

² Te Jerusalén, ema Caifás, corregidorhi. Énerichuvare tipicauchacarehi ema Anás, pasado corregidor, máimachuca ema Caifás.

Tacahe, te jena sácheanahi, ema Juan machicha ema víyarahaini Zacarías, ajairaripa. Manasirichahahisera tayehe eta mávapahi majurusinehi. Tásiha,

ticametacasipa ema Juan eta mayehe ema Viya eta macametarairuireyarepa eta máechajiriruvana.

³ Tacahe, tiyanapa tipaícahi ema Juan tayehe eta avasarechichana tíávihanahi te tachausi eta cajacure Jordán. Mametacavapaipa ena achaneana. Ánípa maicha:

—Ítsivacha eta epanereruana. Éneuchava mayehe ema Viya apaesa maperdonachahe eta epecaturana. Te éneuchavapuca, núti nícachasica—háichapa.

⁴⁻⁶ Ema maca Juan, émaripa ema máechajisíhaquenehi ema Viya eta te Sagrada Escritura, taicha ánaquiaparipahi eta áñoana acane, ema Viya mametacapa ema víyahaini profeta Isaías eta mapanereruhi, eta mavanesirayare ema Machicha te juca apaquehe. Eta tímitecahi ticatiurahiyarehi. Énerichuvare matiaríhiyareva ema apana achane máichuhaquenehyarehi ema Viya. Macametarairuyarehi, máetupiricavacayare ena achaneana, náinajisirayarehi eta napanereruana tauriqueneana, apaesa táuri eta najacapirayare ema Machicha ema Viya. Tacamunuhivare yátupina eta nacasiñairavayarehi mayehe, náinajicayarehivare eta nacasiñavavaisirahi, étapa eta navayuaravahi. Nasapíhahi tijapanurahianainapa éna. Tásiha, te máitecapapa ema ticatiurahiyarehi, éma máimimatichainapa namutu eta najacapacarevaya me Viya namutu ena ticasíñavana mayehe.

⁷ Tacahe, ena achaneana tiyananapaipa napauchapaipa ema Juan, navarahapa ticaicachasianayare eta mayehe. Tásiha, éma máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairiricahipuca eta járajapairayarepa eta táíñehiqueneyare ecuñaraqui. Evarahahipuca iúchucuhayare.

⁸ Tiuri puiti, te evarahapuca eta iúchucuha, yátupina tátupiruva eta epanereruana. Ímrecava eta ínajisiraya eta epecaturana. Váhivare ecucajamurava eta mámaríequenérahehi ema víachucaini Abraham. Taicha tayanapane mámaríhepuca éma, váhisera iúchucuhaimahi te vahi ecuitsivacha eta epanereruana. Ema Viya, tájina máemaitucaimahi éma. Te mavarahapuca, vahi máejecharachaimahi máepiyaca achaneanaina eta juca mari, mavarairainahi yátupina ena mámaríequeneanaina ema Abraham.

⁹ Ecauneuchava, taicha tíánehípa títecapauchaheyare eta ecuñaraqui nayehe ena achaneana máitucarahanahi téneuchavana, váhivare náitsivachahini eta napanereruana. Tímicutijiricavaipa te máechucayarepa ema achane eta yucuqui máhireana; tásiha, máijuchainapa tamutu. Ene nacaheyare ena máeneuchavarahana —máichavacapa ema Juan.

¹⁰ Tásiha, ena achaneana nayaserecapa:

—¿Tájahasica eta vícharacavayare eta víurivaina?

¹¹ Ema Juan majicapapa:

—Ecajarahiyare. Mácani tatiaríhi apina eta macamisa, májaracasichayarehi eta étana mácani tájina macamisaina. Énaripa nácani ticaniruanahi, nacajiyareva nácani tájina naviyahini eta nanicaquene —máichavacapa.

¹² Te jena sácheana, náitecapauchavare ema Juan ena ticobrarecarahiana eta impuesto. Navarahapa ticaicachasianayarehi. Nayaserecapa ema Juan, náichapa:

—Maestro, ¿tájahapuca vícharacavaini eta víurivainaini víti apanavare? —náichapa.

13 Majicapapa ema Juan:

—Vaipa ecuapechava ecuvayuyujica eta ecobraresira, tátupiruva jácani tavanairipihí eta ley —máichapa.

14 Énerichuvare náitecapaucha ena suntaruana. Nayaserecavare ema Juan, náichapa:

—Víti apanavare, ¿tájahapucaini vícharacavayare eta viúrivaya? — nacahepa.

Máichavacapa éma:

—Vaipa ecuverejica eta náimahaqueneana ena achaneana. Váipavare eucipicarareca. Nacuijapa ecuepiyequeneha. Tarataripa tacurisamurechahe eta evachasana —máichavacapa.

15 Ena achaneana ticunevanaripaicha eta mayehe ema Juan, náimijachaipehi émaripa ema Cristo nacuchapaquenehi, cátiurahiyarehi. Váhisera námutuimahi.

16 Tásihasera ema Juan máichavacapa:

—Yátupi núti níchasicachehi te une. Ávanepaipahisera mácani yátupiquene Cristo. Éma, tiápajupanavahi nuyehe núti, eta mapicauchacarevahi. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhini nuti páuresami. Te yátupina ecasiñava mayehe, tícachasicahayareva; tjaracahayareva ema Espíritu Santo. Téhesera vahi ecucasiñavapuca mayehe, tícuñacahayare tayehe eta táijurequene yucu.

17 Puiti éma márajapainapa tinerejiricainapaipa nácani yátupiqueneanahi téhicanayare. Máunacainapa éna. Ticutinapa mácani achane te tiátatayajiricahi eta arusu. Máunacainapa. Tásiha, máquijicapa eta tapiraquíji, máijuchayarepa te yucu. Eta nacaheyare ena máurirahanahi, tíjuanáinapa te yucu, máitavacacayarehi eta tamuruira —máichavacapa ema Juan.

18 Tacahehi eta juca máechajisiravacahi ema Juan. Ichape eta maconsejachiravacahi ena achaneana, máimitusiravacahi eta máechajiriruva ema Viya.

19 Émaripa ema Herodes Antipas ema aquenucahi, maconsejachahivare vahi macuimiyana macuveha esu Herodías, mayenahi ema maparape Felipe. Váhivare macuimiyana macuquicha eta apamuriana táinmahiqueneana máichaqueneana.

20 Émasera ema Herodes vahi masuapahini. Masapiharichucha tisemahi, máimicaratacapa ema Juan, macasiapayarehi te cárcel.

*Eta macaicachasirahi ema Jesús
(Mt 3.13-17; Mr 1.9-11)*

21 Tiuri, te tamirahupaichaha eta macaeratairaya ema Juan, tímiyanavai-chahahi máicachasicavacahi ena achaneana. Étana sache, máitecapauchapa ema Jesús, mavarairahi ticaicachasi éma apanavare. Tacahe, te tamutupa eta macaicachasirahi, mayujarasirahi. Tíjahúchavapa téjiaca eta anuma.

22 Tiúcupaicapa ema Espíritu Santo, mavasimahipaipa eta paluma eta máimahi. Matupiruruchapa te mápusi ema Jesús. Tásiha, nasamapa eta mahu ema Viya te anuquehe. Ánipa macahehi:

—Pítira nuchicha némunaruquene. Núrisamurecha piyehe —macahepa.

*Ena achaneana máchucaqueanaini ema Jesús eta acane
(Mt 1.1-17)*

23 Tiuri, ema Jesús, macayeheripahi treinta año te tinacuchavapa timitu-recahi nayehe ena achaneana. Éma, náimijachaquenehi machicha ema José. Ema máiyainihi ema José, ema Elí.

24 Ema máiyainihivare ema Elí, ema Matat.

Ema máiyainihivare ema Matat, ema Leví.

Ema máiyainihivare ema Leví, ema Melqui.

Ema máiyainihivare ema Melqui, ema Jana.

Ema máiyainihivare ema Jana, ema José.

25 Ema máiyainihivare ema José, ema Matatías.

Ema máiyainihivare ema Matatías, ema Amós.

Ema máiyainihivare ema Amós, ema Nahum.

Ema máiyainihivare ema Nahum, ema Esli.

Ema máiyainihivare ema Esli, ema Nagai.

26 Ema máiyainihivare ema Nagai, ema Maat.

Ema máiyainihivare ema Maat, ema Matatías.

Ema máiyainihivare ema Matatías, ema Semei.

Ema máiyainihivare ema Semei, ema José.

Ema máiyainihivare ema José, ema Judá.

27 Ema máiyainihivare ema Judá, ema Joana.

Ema máiyainihivare ema Joana, ema Resa.

Ema máiyainihivare ema Resa, ema Zorobabel.

Ema máiyainihivare ema Zorobabel, ema Salatiel.

Ema máiyainihivare ema Salatiel, ema Neri.

28 Ema máiyainihivare ema Neri, ema Melqui.

Ema máiyainihivare ema Melqui, ema Adi.

Ema máiyainihivare ema Adi, ema Cosam.

Ema máiyainihivare ema Cosam, ema Elmodam.

Ema máiyainihivare ema Elmodam, ema Er.

29 Ema máiyainihivare ema Er, ema Josué.

Ema máiyainihivare ema Josué, ema Eliezer.

Ema máiyainihivare ema Eliezer, ema Jorim.

Ema máiyainihivare ema Jorim, ema Matat.

30 Ema máiyainihivare ema Matat, ema Leví.

Ema máiyainihivare ema Leví, ema Simeón.

Ema máiyainihivare ema Simeón, ema Judá.

Ema máiyainihivare ema Judá, ema José.

Ema máiyainihivare ema José, ema Jonán.

Ema máiyainihivare ema Jonán, ema Eliaquim.

31 Ema máiyainihivare ema Eliaquim, ema Melea.

Ema máiyainihivare ema Melea, ema Mainán.

Ema máiyainihivare ema Mainán, ema Matata.

Ema máiyainihivare ema Matata, ema Natán.

32 Ema máiyainihivare ema Natán, ema David.

Ema máiyainihivare ema David, ema Isaí.

Ema máiyainihivare ema Isaí, ema Obed.

Ema máiyainihivare ema Obed, ema Booz.

Ema máiyainihivare ema Booz, ema Salmón.

Ema máiyainihivare ema Salmón, ema Naasón.

³³ Ema máiyainihivare ema Naasón, ema Aminadab.

Ema máiyainihivare ema Aminadab, ema Aram.

Ema máiyainihivare ema Aram, ema Esrom.

Ema máiyainihivare ema Esrom, ema Fares.

Ema máiyainihivare ema Fares, ema Judá.

³⁴ Ema máiyainihivare ema Judá, ema Jacob.

Ema máiyainihivare ema Jacob, ema Isaac.

Ema máiyainihivare ema Isaac, ema Abraham.

Ema máiyainihivare ema Abraham, ema Taré.

Ema máiyainihivare ema Taré, ema Nacor.

³⁵ Ema máiyainihivare ema Nacor, ema Serug.

Ema máiyainihivare ema Serug, ema Ragau.

Ema máiyainihivare ema Ragau, ema Peleg.

Ema máiyainihivare ema Peleg, ema Heber.

Ema máiyainihivare ema Heber, ema Sala.

³⁶ Ema máiyainihivare ema Sala, ema Cainán.

Ema máiyainihivare ema Cainán, ema Arfaxad.

Ema máiyainihivare ema Arfaxad, ema Sem.

Ema máiyainihivare ema Sem, ema Noé.

Ema máiyainihivare ema Noé, ema Lamec.

³⁷ Ema máiyainihivare ema Lamec, ema Matusalén.

Ema máiyainihivare ema Matusalén, ema Enoc.

Ema máiyainihivare ema Enoc, ema Jared.

Ema máiyainihivare ema Jared, ema Mahalaleel.

Ema máiyainihivare ema Mahalaleel, ema Cainán.

³⁸ Ema máiyainihivare ema Cainán, ema Enós.

Ema máiyainihivare ema Enós, ema Set.

Ema máiyainihivare ema Set, ema Adán.

Ema Adán macaepiyaquenepa me Viya.

4

Ema Váinaraji Satanás mavaraha macaitsamaraji ema Jesús

(Mt 4.1-11; Mr 1.12-13)

¹ Tacahe, ema Jesús, mávahácaripa ema Espíritu Santo. Tásiha, ema Espíritu Santo eta mávasamurechirahi, máimitucaipahi eta mayanirayarehi te mávapahi apaquehe. Majunijicayarehi eta cajacure Jordán.

² Cuarenta sache macahehi tayehe. Tájinavare manicahini eta jena sácheanahi. Técuhasamurepa.

³ Tacahe, ema Váinaraji témeñahavapa mayehe. Mavarahapa macaetema-yarehi. Ánipa maicha:

—¿Péculhapa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masi? —máichapa.

⁴ Ema Jesús majicapapa:

—Váhipuca pecha eta táechajiriruvahi eta Sagrada Escritura, ani taca-hehi: “Vahi tácarichuimahi eta tinicacare ticaitarecayare ena achaneana. Tacachaneyarehi eta máechajiriruva ema Viya. Jéhevare, éta ticaitarecarihiyare” —macahepa.

5 Tacahe, ema Váinaraji mámvarepa te táinahu eta anuquehe mari. Tíjahúchavapa máimecha tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha ema Váinaraji.

6 Tásiha, máichavarepa ema Váinaraji:

—Núti níjaracaviyare tamutu eta juca avasareana. Ichape eta napicau-chiraviyare, nacunachiraviyareva ena achaneana. Pítina náquenuvina ena távacuanahi eta avasareana. Taicha núti néchavacahi éna. Nútivare nécha mácani nuvarahaqueneyare níjaraca.

7 Pépuyucanumasera te numirahu pitsiucanu apaesa níjaracavisarepa tamutu —máichapa.

8 Émasera ema Jesús majicapapa:

—Pévuishatataji piti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumirauchaya. Macarichuvare viceamataneacayare” tacahepa. Váhiquene táurica nucaemataneacavihini —máichapa ema Jesús.

9 Tacahe, vahi máevuiahahini ema Váinaraji. Mámvare te avasare Jerusalén. Mámiapanapa te táinahu eta Templo. Tásiha, máichavarepa:

—Te yátupina machichavina ema Viya, písapavayare pémirica te anuquehe. Tájina píchavaimahi eta pémirisirayare.

10 Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajiricavianayare, énevane-yarehi tijaneacaviana.

11 Tiámavianayare te navahuana, apaesa vahi picucayutetu eta máriana eta te pipaisirana” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

12 Tacahe ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamara-jimahi ema Viya taicha éma Piáquenu” —máichapa.

13 Tacahe, tiyanapa ema Váinaraji. Majunijicapa ema Jesús taicha tímaha-vaipahi vahi máiturucahini macaetema. Mavarahahisera tichavayarehi tíapechavayarehi macaetemapana.

Ema Jesús tépanavapa ticametarairu

(Mt 4.12-17; Mr 1.14-15)

14-15 Tacahe, tépanavapa ema Jesús mapaica eta avasareana tayehe eta provincia Galilea. Ichape eta máitupajijiasiravahi taicha mávahácapahi ema Espíritu Santo. Timiturecapaipa tayehe eta náurujisirarevana te avasareana. Ichapemuri eta nacunachirahi namutu ena tisamararacanapahi. Nasamairiricavarepa ena apamuriana achaneana ticavasanahi te tachacaya eta avasareana.

Tichavapa ema Jesús te mávasa Nazaret

(Mt 13.53-58; Mr 6.1-6)

16 Tásiha, tiyanavarepa te avasare Nazaret te majurusinehi. Te jena sache sávaru, tiyanapa tayehe eta náurujisirareva nayujarauchirare ena achaneana, taicha tacahehi eta mayeherepihi. Titupihapa ema Jesús, táicutiarahi eta mavarairahi téchajicureca eta Sagrada Escritura.

17 Náichuhasarepa eta máechajicuresiraya. Náijaracapa eta libro májurehi ema profetaini Isaías. Te mavejiacapa eta libro, matanucapa eta máechajicureyarehi. Ani tacahehi eta táechajirivanahi:

18 “Tiávahácanuhi ema Espíritu Santo. Taicha manerejirunuichuhi núti ema Viya Viáquenu eta numetasiravacayare ena páureana eta juca máemunasiravacahi éma, máimicatasirayareva. Eta tímitecanuhi nuncanaracayare ena ticatisamurevanahi. Nucaititijicayareva ena máerataruanahi ema tivayuarahi Satanás. Nucaimairiricayareva ena púchuquiána. Nucuchucuhaveva ena ticatajivanahi, níjaracaya eta náuricacarevaya.

19 Numetacayareva járajapainapa eta sáchezare tamutuiraya máetupirica ema Viya, tamutuina pa tiúrisamurécarepa máicha” tacahehi eta Sagrada Escritura eta máechajicurehi.

20 Te tamutupa eta máechajicuresirahi ema Jesús, máeratacapa eta libro. Máimichavapa mayehe ema tijanearecarahi eta libroana. Téjacavarepa ema Jesús. Náimararacaripa ena achaneana natiarihiqueneanahi.

21 Tacahe, tépanavapa téchajica ema Jesús:

—Nútiripa ema táechajisihaquenehi eta juca libro. Tímitecanuhi numetacahé eta máemunasirahehi ema Viya —macahepa.

22 Tacahe, náramipa namutu ena achaneana. Ánipa náichacaca:

—¡Tétavacavahi tapachinava eta máechajirivanahi ema maca! Émachuchasera ema machicha ema Joséini ema carpintéroini. ¿Tájahasica eta juca? —nacahepa.

23 Émasera ema Jesús máichavacapa:

—Németeaca éti váhirichuhi esuapapajicanuhini. Tásiha, evaraharinepuca íchanuyare: “Te yátupina píturequeneha, pípuhavaca ena ticajumanahi te juca. Vímahaséji piápechavavare picuchuca te juca piávasaichu tacuti eta pímereruhi te avasare Capernaum” íchanuyare.

24 Nutupirivasera numetacahé: Tatuparaca eta epicauchirahaviya vimutu viti mavaneruana ema Viya. Étiserá eti nujaneananahi ecavasanahi eta te juca viávasa, vahi epicauchanuhini, váhivare ejacapanuini. Ecuti ena achaneana acane eta náepuruirahi ena apamuriana profetana mavaneruanahi ema Viya.

25 Eta tacahe, eta máimairahi ema Viya eta náepuruiravacahi, tivanecavaca ena profetana nayana napauchayare ena apavasanana. Acane, te matiarihichaha ema profetaini Elías, mapana año y medio vahi taquivahini, tásiha, ichapevare eta ecuha. Németeaca núti camurianahi nácani ena tépenaimana israelítana.

26 Váhiserá étainahini macavanahiyahini me Viya ema Elías eta nayehe ena majaneananahi. Ánaqui te avasare Sarepta tachacayahi eta avasare Sidón, étapa macavanahiyahi máitecapihayare suyehe esu ésunahi esena apavasanana tépenaimahi. Ésupa máimicataruhi táichavenehi eta susuapajiraivahi me Viya.

27 Énaripa ena israelítana nacajumaqueneana eta lepra te jena sácheanahi te matiarihichaha ema profetaini Eliseo. Váhivare énaínahini macanaracahini ena majaneanana. Masapihapa macanaracahi ema apavasanaquenehi ticaijare Naamán, ticavasahi te Siria. Ema Naamán, tinaracaripa eta majuma, táichavenehi eta masuapajiraivahi —máichavacapa ema Jesús.

28 Tacahe, eta juca máichiravacahi ema Jesús, tisemanapa ena natiarihiqueneanahi.

29 Tásiha téchepumurihanapa éna. Nacuchucapa ema Jesús te tachachacu eta avasare, te tachaui eta táupenaquene, navarahapa nacamiricayarehi éma.

30 Émasera tichavapa mánumurihapaipa éna. Tíyanapa, majunijicavacapa.

*Emá Jesús máimijuna ema éreana tiávahácainihi ema achane
(Mr 1.21-28)*

31 Tacahe, títecapapa ema Jesús tayehe eta avasare Capernaúm te Galilea. Tamutu sávaruana tíyanapa tayehe eta náurujisirareva ena achaneana, tímiturepanaya.

32 Ichape náramihi ena achaneana eta máimiturapianahi taicha tétavicavahi eta máítusirahi mayunapaicahi tamutu. Tétavicavahivare eta tasuapacarevahi eta máimiturapiana.

33 Étana sávaru, mañiarihahi te namuri ema émana achane mávaháruhi ema éreana. Típiararecahi, ániapa macahe:

34 —Núti nímativi. Pítira Sántoquenevivi. Machichaquenevivi ema Viya. Pésamiricahavipaini, piti Jesús Nazareno. Váhini picuesirujicahavini. Pivarahainapapuca picajanerepaicahaviyare —macahepa ema achane.

35 Tacahe ema Jesús macajachapa ema éreana. Ániapa maicha:

—¡Pámatina! ¡Piyana pijunijica ema maca achane! —máichapa.

Tásiha, tíjahúchava tiáquipaicavapa te apaquehe ema achane. Tásiha majunijicapa ema éreana. Tájinasera máichavahini ema achane.

36 Náraminehi ichape namutu ena achaneana eta náimairahi. Tiyaserejiricacanapa:

—¿Tájahasica tacayema eta juca? Ema maca Jesús, tétavicava eta máitupajijiásiravahi, maratahahi máquijica nácani éreanana. Tásiha, ichape eta napisirahi éma. Vahi najicapaemachahini. Tamutupa arairu eta máimiturapianahi ema maca —nacahepa.

37 Enevanevarepa naecha namutu ena achaneana eta juca máichaqueneanahi ema Jesús. Énaripa ena ticavasanahi te avasareana eta te provincia Galilea.

*Emá Jesús macanaraca esu máimase ema Pedro
(Mt 8.14-15; Mr 1.29-31)*

38 Te tíuchucapa ema Jesús tayehe eta náurujisirareva, tíyanapa te mapena ema Simón Pedro. Te tisiapapa, náechajiacapa ema Jesús máimaharine esu máimase ema Pedro. Ticajumahi ésu eta muraca fiebre.

39 Tásiha, mapauchapa ema Jesús. Máquijisinapa eta muraca fiebre. Tinaracavanepa ésu, téchepucavanepa. Suéchapajiricapa éma, énapa ena máimitureana.

*Camuriana ena macanararuanapahi ema Jesús
(Mt 8.16-17; Mr 1.32-34)*

40 Te jena cáperehiquenehi, te téricapa eta sache, ena achaneana námavacapaipa namutu ena nacajumaqueneana eta mayehe ema Jesús. Apanapanenehi eta najumanapahi éna. Manacapaipa eta mavahu te náinahuana, macanaracapaipahi.

41 Maveranavare ena éreanana máquijiruanapahi te náqueheana ena nacajumaqueneana. Típiararecanapaipa eta náuchusirapahi. Ániapa nacahe:

—Pítira Machichaquenevi ema Viya.

Émasera ema Jesús vaipa máisapahini náimiyannahini napiaraca éma, taicha náimatihí éna eta émairahi ema Cristo.

*Tamutu avasareana te Galilea mapaica ema Jesús
(Mr 1.35-39)*

⁴² Te apanapa sache, te tijararahipa, tiyanapa ema Jesús te mávapai. Natanucapasera ena achaneana. Náetupiasirapa éma tayehe eta mávihahi. Navarahapa náiminasichayaherini. Vaipa náisapahini mayannahini.

⁴³ Émasera ema Jesús máichavacapa:

—Nutuparacasivaichuhi eta nuyanirayare tayehe eta apana avasareana taicha nuvanahirichuhi eta níchuiravacaya ena achaneana náehisiraina ema Viya apaesa macuchucuhavaca —máichavacapa.

⁴⁴ Tacahe, tiyanapa tipaica ticametarairupaipa te náurujsirarevana tayehe eta avasareana te Galilea.

5

*Tiáramicarepa eta náitusiravahi eta jima
(Mt 4.18-22; Mr 1.16-20)*

¹ Te jena sácheanahi, ema Jesús mávinehi te tachaui eta cáquiure ticaijare Galilea. Títecanapana ena camuriqueneana achaneana. Váipanecha náratavahini, tipamihejiracananapa eta navairahi nasama eta macametarairuirahi ema Jesús eta máechajiruvana ema Viya.

² Máimahapa ema Jesús eta apisi pacure te tachaui. Ena ticayeheana eta pacureana, tisipajiricanahi eta ichapequeneana nayutaheana.

³ Tacahe, ema Jesús tiávacuhapa tayehe eta mapacurehi ema Simón Pedro. Mavanecapa máevataeca apaesachicha eta pacure. Téjacapa ema Jesús eta te pacure, tépanapana máimitucavacapa ena achaneana.

⁴ Te títapiricapa eta máimitusiravacahi, máichapa ema Pedro:

—Tata, iama eta juca epacure tayehe eta táupenamaiya. Iáquijieca eta jara eyutahe —máichapa.

⁵ Ema Pedro majicapapa:

—Maestro, tamutu yati vinajuiricahi, tájinasera vítucavahini. Tavetijipa puiti eta tajarahiraripa. Nusupavisera eta juca pivanesiranuhi, náquijiecaya eta nuyutahe —máichapa.

⁶ Jéhesaréinehi, te nachurucapa eta yutahe, tiyututucavaipahi eta jímana. Vaipa táratavahini ténarujicapa eta ichape yutahe taicha eta tajitacareva eta jima.

⁷⁻¹⁰ Natiarihíhisera te apana pacure ena nachamuriana: ema Jacobo émapa ema Juan. Tacahe, náevéhauquichapa tímicatacanayarehi. Te títecanapana, náinicachapa eta apisiquene pacure. Tiánehirichahavare vahi táratavayaherini taicha eta tajitacarevahi, téricayarepaini eta pacure. Ichape eta náramesirahi namutu taicha eta náimairahi eta camuriquene jímana. Tásiha, ema Pedro máepuyumirauchapa ema Jesús. Máichapa:

—Tata, pítiyara yátupiquenévihi Viáquenuvi. Váhicha nímiuricava nutupihamirauchavi núti. Nucapeaturarahiquenehi —máichapa.

Matiarihíhi ema Jacobo émapa ema Juan, machichanaveana ema Zebedeo. Machamurianahi ema Pedro. Énerichuvare tiáramecanarinehi éna, énapa ena apamuriana natiarihiqueneanahi. Émasera ema Jesús máichapa:

—Vahi picupica, Simón. Pínajicainapa puiti eta juca pématanerepini. Núti nívaracaviya eta apana pématanerepiyare. Pitanucainapa ena achaneana nuchaneranaya —máichapa.

¹¹ Tacahe, te nachurupaicapa eta napacureana te tiájipahi, étapa nanaquisinehi. Tiyananapa náehicapa ema Jesús.

Emas Jesús macanaraca ema émana achane leproso
(Mt 8.1-4; Mr 1.40-45)

¹² Tacahe, eta mánuoirapaipahi ema Jesús eta avasarechicha, mácapajicapa ema émana achane macajumaquenehi eta lepra, tamutu eta máquehe. Eta máimairahi ema Jesús, máitecapauchapa. Tépuycapa te mamirahu. Máichapa:

—Tata, nucasiñavahi eta piyehe, picanaracupaini.

¹³ Majicapapa ema Jesús:

—Nuvaraha nucanaracavi. Tájinapa píchiravaina puiti —máichapa.

Manacapa eta mavahu. Énevanerinehi témitiacahi eta majumainihi.

¹⁴ Matuparacapasera ema Jesús. Ániapa máicha:

—Pímaha, nacuija picumetaca eta nútirahi nucanaracavihi. Piyanavasesera pímercava nayehe ena tuparairucana, apaesa náimamacavi. Énainapa tímatajiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihasalupayachirayare taicha eta macanarasiravivihi —máichapa ema Jesús.

¹⁵ Tásihasera, náechapa namutu ena achaneana te avasareana eta máitupajijasiravahi ema Jesús. Nayanauchapaipa ena camuriqueneana achaneana, navarairahi nasamararacayarehi, macanarasiravacayarehiva tayehe eta najumana.

¹⁶ Émasera ema Jesús, majunijimuriahachucha. Tiyanapa tayehe eta mávaphianahi apaquehe. Ánaqui mayujarasihayarehi.

Emas Jesús macanaraca ema émana achane macajumaquene eta mura-caquiha
(Mt 9.1-8; Mr 2.1-12)

¹⁷ Étana sache ema Jesús tímiturecahi te tajuhe eta peti, camuriana ena achaneana. Natiarihihivare ena fariséoana tépiyacavana religiósoana, énapa ena escribánoana, tímataiana eta nayeherepiana ena israelítana. Éna, tiásihanahi te Jerusalén, ena apamuriana tiásihanahivare te avasarechichana tayehe eta Galilea, étapa te Judea. Emas Viya máimicatacahi ema Jesús eta macanarasiravacayarepahi ena nacajumaqueneana.

¹⁸ Títecapanavarepa ena apamuriana, námaphi te áchuji ema achane muracaha. Navarahainipa nacasiapa te tajuhe te mávihahi ema Jesús.

¹⁹ Étasera eta nayututusiasiravahi ena achaneana, vahi náitujicavahini nasiapahini. Tímipanerechavanapasera náimiapanapa te tamaquehe eta peti. Navetatamaequechapa eta peti te manapaicahi ema Jesús, nacajuchucupa ema macajumaquene.

²⁰ Tacahe, te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi, nucaepahainavipa.

21 Ena escribánoana énapa ena fariséoana, eta napanerequenehairahi eta macayemaquenehi ema Jesús, tiseanmarinehi. Ánipa nacahe te nasamureana: “Ema maca tímijachavaipapuca Viya eta macaepahairayaréji eta pecatuana. ¡Tétavicava eta matapirava! ¡Taicha macarichu ema Viya marataha macaepaha eta pecatuana!” tacahehi eta napanereruana.

22 Émasera ema Jesús máimatihí eta napanereruana. Máichavacapa:

—¿Tájaha tacayema téjecapavahi eta epanereruana?

23 Tájina táejeravaina eta níchirahi ema maca: “Nucaepahainavipa eta pipecaturanaini”. Máejerarepánapuca eta níchahini: “Pécheputa, piyana pipaica”.

24 Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca apaquehe. Ímararacanu —tacahe, máichapa ema macajumaquene—. Puiti nuchicha, nuvanecavi pécheputa. Piveha eta jara piyereruva. Piyana te pipena —máichapa ema Jesús.

25 Enevanerinehi téchepuruca ema macajumaquenéni. Mavehapa eta mayereruva. Tipaicapa te namirahu ena achaneana. Tiyanapa te mapena. Ichaperinehí eta macunachirapahi ema Viya.

26 Ichaperinehivare eta námirahi namutu ena natiarihiqueneana. Tétavicavarinehi eta nacunachirahi ema Viya, napicaucharinehivare. Ánipa nacahe:

—Tétavicavapa táramicareva eta juca vímahaquenehi puiti —nacahepa.

*Ena Jesús máichuha ema Mateo, mayehyare apóstole
(Mt 9.9-13; Mr 2.13-17)*

27 Te táequenepa eta júcana, ema Jesús tiúchucapa. Eta mapaisirapahi, máimahapa ema achane ticaijare Mateo. (Ticaijarehivare Leví.) Téjacahi éma eta te macatuparahaiyahi eta macobraresirahi eta impuesto.

—Yare, péhicanu —máichapa ema Jesús.

28 Enurujipa téchepucahi ema Mateo. Manaquicapa tamutu eta matuparahainihi. Tiyanapa máehicahi ema Jesús.

29 Tacahe, te jena sácheana, tépiyarecapa eta piesta ema Mateo te mapena. Máichuhapa ema Jesús eta máenirisirayarehi, énapa ena camuriqueneana macutiqueneanahi ticobrarerahiana impuesto, énapa ena apamuriana máemunacasareana ema Mateo.

30 Natiarihihivare ena máimitureana ema Jesús. Tásiha títetapanavarepa ena fariséoana énapa ena escribánoana. Eta tímijanavacahi, ticaecahirecana-yarehi. Ánipa náichavaca ena máimitureana:

—¿Tájaha tacayema ecachanemuri eta enisirahi ena nánitajiana ticobrarerahiana eta impuesto? ¡Tétavicavahi eta nacapecaturaravahi! —nacahepa.

31 Émasera ema Jesús, te masamairicapá eta náechajiriruvanahi, máichavacapa:

—Ena majumareana vahi nácamunuimahi ema médico.

32 Núi, vahi étaina tímitecanu nutanupanavacayare nácani matapiravareana. Eta tímitecanuhi núi nutanupanavacayare ena tisipecaturanapanahi apaesa náitsivacha eta napanereruana, náeneuchavapa me Viya —máichapa ema Jesús.

*Nayaserecapa ema Jesús tayehe eta ayuna
(Mt 9.14-17; Mr 2.18-22)*

³³ Tiuri, nayaserecavare ena achaneana ema Jesús:

—¿Tájahapuca tacayema vahi ayúnanainahíni ena pímitureana? Énayapasica ena máimitureana ema Juan náichahi eta muraca ayuna eta nayujarasirana. Énaripa ena fariséoana, énerichuvare. Tásiha, ena pímitureana píti tinicanahi, téranahivare —náichapa.

³⁴ Majicapapa ema Jesús:

—Nímicutichinahe puiti. Vahi táuricaimahi ayúnanainahíni icha ena íchuhaqueneanahi tinicanayare nayehe ena araimana. Tiúrisamureanayarehi taicha matiarihíni ema arayena. Tájina táuricahini ayúnanainahíni. Téhesera te tépenapuca éma, jéhesare ticatisamurevanayare. Tacutiquene, vuíchaha táuricaimahi ayúnanainahíni ena nímitureana.

³⁵ Járjapainapasera eta sáchehare, ticaverejicasianayare, taicha ticaratacuanainapa ena ticapacuanayare núti. Jéhevarepa ayunanainapa.

³⁶⁻³⁸ Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácuticacaimahi eta nayeherepiana ena apamuriana achaneana. Eta ítusirahi éti eta nímiturapiana, tavaraha ínajica eta ichasi eyeherepiana tauriqueneanahi.

³⁹ Ticajerasera eta náinajisirahi ena achaneana eta nayeherepiana tauriqueneana. Apaesachicharichu eta navarairahi naicha eta juca arairu nayeherepianayare. Namutuyaréni navaraha náimiyana ena nayeherepiana tásihaqueneanahi eta napanereruana ena náchucanaveanaini —máichavacapa ema Jesús.

6

*Ena fariséoana náimipicauchahi eta nayeherepiana tayehe eta sávarumuhua.
Émasera ema Jesús máimereuchahi émarichu téchahi eta nayeherepiana ena
achaneana eta sache nanarasirayare
(Mt 12.1-8; Mr 2.23-28)*

¹ Eta jena sache sávaruquenehi, tiyanapa tipaica ema Jesús. Mámamurihapa ena máimitureana. Témechicanapa ena fariséoana. Náetavivijicapapahi eta isanítiana. Tacahe, eta napaisirapahi, ena máimitureana navechuquihapapahi étajavapahi eta trigo. Navepiraquihapapahi, tépura-jacachavanapapahi. Tinicanapapahi. Tísapacareichucha eta nanisira, taicha técuhana.

² Tacahe, eta náimarasirapahi ena fariséoana, tise-manapapahi. Ánipa naicha:

—¿Tájaha tacayema vahi epicaucha éti eta juca sache tacapichuquenehi? Écharichuhi éti vahi tísapacarémahíni eta vicaematanehi puiti. Eta juca evepiraquihapahi eta trigo, ticajare ecaematanehi —náichapa.

³ Tásiha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ena víyahaini David eta mapaisirapahi técuhapapahi, énerichuvare ena téhicanapahi.

⁴ Écharichuhi éti te masiapapa eta mapena ema Viya, tiyaseserecapa eta manicayarehi. Náijaracapa eta pan tacapichuquenehi nanacasarehi te namirahu ema Viya. Nanicasarehi ena tiyujaracarahiana émasera ema

David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

⁵ Tiuri puiti, numetacaheyare: Nuti Manerejirunuhi ema Viya, nútirichu néchahi eta sache nanarasirayare ena achaneana —máichapa.

Ena Jesús macanaraca ema achane tépenavahu

(Mt 12.9-14; Mr 3.1-6)

⁶ Tiuri, te apanapa sávaru, tiyanavarepa ema Jesús tayehe eta náurujisireveva. Tímiturecavarepa. Tásiha, matiarihíhi ema émana achane, ticajumahi eta mavahu váure. Vaipa tayamuricahini, tépenavahuhi.

⁷ Natiaríhivare ena escribánoana, énapa ena fariséoana. Náimaharipahi ema Jesús te macanaracayahipuca ema macajumaquene eta jena sache tacapicahuquenehi. Natanunuiricahi eta tivíuchayarehi éma.

⁸ Émasera ema Jesús máimatíhi eta napanereruana éna. Tacahe, máechajicapa ema achane ticajumavahuhi. Máichapa:

—Yare, pitupihayare ani te namirahu ena achaneana —máichapa.

Tásiha, titupihapa ema achane te namirahu.

⁹ Tásiha, máichavacapa ema Jesús:

—Nuvaraha epanerechaya. Puiti juca sache sávarumuhuhi, táuricahi víchaya eta táuriqueneana, ¿masi? Táuricahi vípuchayare ena nacajumaqueneanahi, ¿masi? ¿Ímijachapuca tíuriyare eta víchirayare eta tamauriqueneana, vicaparecapuca ena achaneana? ¿Tájahasica eta epanerechahi? —máichavacapa.

¹⁰ Tacahe, ema Jesús máesenimuríhapa ena achaneana. Tásiha, máichapa ema achane macajumaquene:

—Nímaha, picajaruvauchava pímereca eta pivahu —máichapa.

Eta máimeresirahi eta mavahu ema achane, enevanepa tinaravauchavanepa.

¹¹ Tacahe, tisemanarinehi ena fariséoana eta náimairahi. Tásiha, tiyáserejiricanapapa:

—¿Tájahapuca vícharacaini ema mácatataji eta táimicavíúchaini? —nacahepa.

Ena Jesús manerejica ena dócequeneana apóstoleanayarehi

(Mt 10.1-4; Mr 3.13-19)

¹² Te jena sácheanahi, tiyanapa ema Jesús tayehe eta tápusi eta márijuecu. Tamutu eta jena yati tiyujaracahi me Viya.

¹³ Te tijarahípa, máichuhavacapa namutu ena máimitureana. Manerejicapa ena dócequeneana mayeaneanayarehi apóstole.

¹⁴⁻¹⁶ Ena nani ena manerejiruanahi: ema Pedro (éma ticaijarevare Simón), émapa ema maparapeichuhi ticaijare Andrés; émapa ema Jacobo* émapa ema maparape Juan; émapa ema Felipe; émapa ema Bartolomé; émapa ema Mateo; émapa ema Tomás; émapa ema apana Jacobo; émapa ema apanavare Simón; émapa ema Judas; émapa ema Júlasí Iscariote (ema tíjararechahi ema Jesús).

* **6:14-16** Ena apana Jacobo machichahi ema Alfeo. Ena apana Simón, tímaticarehi éma, náumurvainíhi ena revolucionárióana ticaijareanahi “cananístana”. Navaraha náquijica ena extranjeroana romanoana, énarípa nacapaquerecavacahi ena israelítana. Eta májuchirahi ema Lucas, ani macahehi: “...ema Judas mayehe ema Jacobo...”. Váipasera vecha te machichahipuca ema Jacobo, téhevare maparapehipuca. Véchahisera eta mapapirahi eta májare ema Judas. Ticaijarehi Lebeo émapa eta Tadeo. (Te pivaraha pécha, pitanuca te Mateo 10.3 émapa te Marcos 3.16-19.)

Ena Jesús máimitucavaca ena camuriqueneana achaneana
(Mt 4.23-25)

¹⁷ Tacahe, tichavapa emá Jesús, énapa ena máimitureana. Te tachachacu eta mari táinunapahinepa, étapa nacainunainei ena camuriqueneana achaneana. Ena nani tiásihanahi eta te avasare Jerusalén, eta te provincia Judea, étapa eta provincia Siria. Eta tímitcanahi éna, navarahahi nasama emá Jesús eta máimiturapiana, navarahavare macanaracavacahini tayehe eta najumana.

¹⁸ Ena ticatajivanahi návaháruanahi ena éreanana, macanaracavacapasera emá Jesús.

¹⁹ Namutu ena achaneana navarahahi náemamahaca emá Jesús taicha náechahi tinaracanayarehi eta najumana eta náemamahasirayare taicha títupajjiacavahi éma.

Ena Jesús máimitucahi nayehe ena ticunachacareanahi me Viya
(Mt 5.1-12)

²⁰ Tacahe, máesenimurihapa emá Jesús ena máimitureana. Máichavacapa:

—Éti ímatihí eta tacamunuqueneanahi eta íachanevana, tétavicavahi eta iúricacarevayarehi taicha máejerare eta ejacapirayare eta máechajiriruva emá Viya, machanerahérayarehi.

²¹ Eti ejamurachahi puiti eta ítaresirahi eta matapiravarecare te mami- rahu emá Viya, tétavicavahi eta iúricacarevayarehi taicha tíjaracaheyare éma eta evarahaquenehi.

Eti íyauchavanahi puiti taicha eta epecaturana, tétavicavahi eta iúricacarevayarehi. Títecapainapa eta evapinavairaya, écavainapa, taicha eperdonachacareya me Viya.

²²⁻²³ Eti nuchaneranahi, járajapainapa eta sache ticatianacaheanainapa ena achaneana, navarahainapa tiáquijicaheana. Tipanarachaheanainapa. Nacatianapicainapa eta íjareana. Eta juca náichiraheyarehi, táichavenehi eta éhisiranuhi nuti Manerejirunuhi emá Viya. Váhisera ecuarami eta juca. Ene nacahehi eta nacatajivairahi ena profetanaini. Te ticatianacaheanahi, jecurisamurechavachucha, evapinavavare! ¡Tétavicava eta iúricacarevaya taicha ejacapainapa eta ícuchirichuhi te anuma!

Ena Jesús máimitucahi nayehe ena tavayuaruanahi eta tájiparacana

²⁴ Tacahe, emá Jesús máechajicapa ena apamuriana achaneana, tímicitijiri- cavahi natiarihíhi te mami rahu, tiyerehianahisera éna. Ánipa máicha:

—Eti evapinavapa eta ecaimahaquenerahi, páurehesamiyare éti. Tíche- cuhainapa eta evapinairavainihi.

²⁵ Páurehesami eti esatuhehercanahi, taicha ichapenapa eta écuhairaya.

Páurehesami eti ecasamureana eta piesta, écarairicavahi, taicha ichapeyare íyairaya, ecatisamurevainapa.

²⁶ Páurehesami eti namunaneanahi ena achaneana. Eta tacahehi eta nacunachiravacahi ena profetana tépiyacavanahi tímijachavana mavana- ranahi emá Viya, tivayuarahianahisera.

Vémunacayare ena ticatianacahaviana
(Mt 5.38-48; 7.12)

²⁷ Puítiripa eti esamanuanahi, numetacahe: Émunacayare ena ticatiana- caheana. Ímereca eta iúri va nayehe ena ticatichaheanahi.

²⁸ Eyaseaca ema Viya eta nayujarahuina nácani téchajicanahi eyehe. Eyu-jaraucha ena tiúmehaheanahi.

²⁹ Te máehahepuca mácani achane te emira, vahi ecujicapa. Íjaracaserá eta étachacaya eta emira. Te naverejicahpuca eta esacu, ísapayare. Te naverejicahpuca eta ecámisa, énerichuvare ísapayare.

³⁰ Énaripa nácani tiyaseacaheanahi eta ecájarayare, íjaracaya. Te naverejicahpuca eta ímahaqueneana, vahi ecucamesa eta náimichaviraina.

³¹ Numetacahe eta apana: Te evaraha eta náuriraya ena achaneana eta eyehe, tituparacahe iúriyare éti eta nayehe.

³² Éti, tájina ecunachacarevaimahi eta me Viya, te nacarichuhi émunaca nácani témunacaheanahi éti. Apanasica témunarahiana ena máimatirahanahi ema Viya.

³³ Tacutiquene, tájinavare ecunachacarevaimahi me Viya, te tacarichuhi icha eta táuriqueneana nayehe ena tiúrianahi eyehe. Apanasica títsirijicavanahi ena máimatirahanahi ema Viya. Tituparacahe ecachuricavacayare eta iúriya.

³⁴ Téhevare nacarichupuca íjaraca nácani títsirijicavanahi te ticapucaheana, tájinavare tacunachacarevaina eta me Viya. Apanasica ena máimatirahanahi ema Viya tíjaracana ena títsirijicavanahi te ticapurecana.

³⁵ Étisera émunacayare ena ticatianacaheana. Íchayareva eta táuriqueneana nayehe namutu. Íjaracavare nácani ticapucaheana. Vahi ecucuchapa eta náitsirijirápiyare. Máimaharine ema Viya. Éma tíjaracaheyare eta táitsivayarehí eta iúriyanahi. Eta tacahehí eta ímereuchirava eta machichaheira ena Tata Vicaiyaquene. Taicha éma, tétavicavahi eta máuriva nayehe namutu ena váinarajiqueneana énaripa ena máechavarahanahi eta máemunasiravacahi éna.

³⁶ Ejanurahiyaeva, ecutiyaeva eta majapanuirahavihi ema Tata Vicaiyaquene.

Éma Jesús tímitucavahi eta vahi vicucune eta nájecapiravana ena apamuriana achaneana; vítinasera vicuneuchava

(Mt 7.1-5)

³⁷ Vahi ecunemahi eta nájecapiravana ena apamuriana achaneana, váhivare ecucaecahivaca, machu étina táimicuñacahe me Viya. Te májecapavapuca mácani achane, vahi ecubaraha macaicuñavane, apaesa vahi macuicuñacahe éti ema Viya. Eperdonacha ena téjecapavana eyehe apaesa maperdonachahe ema Viya.

³⁸ Ecájarahiya nayehe ena achaneana. Éma Viya títsirijicavayare eyehe. Tímepeánávainapa eta májararuhayare éma. Te iúrihí éti nayehe ena achaneana, ema Viya, tétavicavayarehí eta máurivaya eta eyehe éti.

³⁹ Tacahe ema Jesús, ánipa tacahe eta máimiturapi, máimicutichirahi:

—Váiparinehi tichurucanaimahi ena apinana púchuquiana, taicha tíáquipaicavanayarehí te pusú.

⁴⁰ Émaripa mácani amaperu te escuelahipuca, váiparinehi macachuricaímahi mácani mayehe maestro. Tapaenumava te máitucapa, macutisarepa ema mayehe maestro.

⁴¹ Vahi táurica eta ecunerahi eta ánichichaqueneana nájecapiravana ena apamuriana achaneana. Tituparacahe ecuneuchava eta táichapeva eta éjecapirava étijiva.

⁴² Vahi tituparacahemahi étupirica eta jácani ánichichaquenehi májecapiravahi ema eparaepiya. Tájina eviyahini eta econsejarapinahini. Ichape-sera eta tatuparasirahehi étupirica eta éjecapiravanahi éti. Tapaenu-mava eta étupirisirapa eta íchavaquenévana, táuricapaini econsejacha ema eparaepiya tayehe eta máichavaquenévahi.

Ena Jesús máimicuticha nayehe ena achaneana eta tacahirahi eta yucuquiana

(Mt 7.17-20; 12.34-35)

⁴³ Tacutiquene tímaticarehivare eta táhiana eta yucuquiana. Jararihi eta tinicacareana. Jararihivare eta vahi tánicacare.

⁴⁴ Énerichuvare eta yucuqui tímaticarehi eta táurinisiva eta táhi. Étaripa eta sitavere, váiparinehi tíuchucaimahi eta táhihini narasahinahipucaini. Tásiha, eta ijicaquí váiparinehivare tacahimahi eta tahi cachicheruhinahini.

⁴⁵ Ene nacahe nácani tíuriana achaneana tatupiruvahi eta náechajirisirava taicha tíurahi eta nasamure. Nácanisera achaneana váinarajipanereruana, vahi tíurimahi eta náechajirisirava. Tíñemahipivacahi taicha eta tavayuchahi eta tavainarajiva eta nasamure.

Ena Jesús máimicuticha ena tisuapajirahiana énapa ena masuapajirairahana

(Mt 7.24-27)

⁴⁶ ¿Tájaha tacayema eta échajicanu éti, “Tata náquenu” ecahepa; tásiha vahi esuapahini eta nuvanairipiana?

⁴⁷ Nácani tisuapanuanahi náitauchahivare eta nuvanairipianahi, téchemarahianahi táicha. Nuvaraha nímicutichinahe éna.

⁴⁸ Nacutiyarehi mácani títuca ticatupiareca peti, manacayarehi eta túmeana yucuqui emuruquiana. Tíúpenavacahi máicha eta masucuqueruana. Jéhesare te járajapapa eta muraca técatícava, tiámaquiha eta tiquiva, tisiama-pa eta une, váipasera tacaeyayacahini eta peti, taicha máetupiricahi eta máepiyasirahi.

⁴⁹ Nararihivare ena tépiyacavana tisuapanuana, váhisera náitauchahini eta nuvanairipiana. Éna nacutíhi ema máitucaraha tépiyareca peti. Vahi manacaimahi eta túmeana yucuqui, váhivare táusiapirahini máicha. Te járajapapa eta muraca técatícava, tisiama-varepa eta une, tacajimuyapaicapa eta apaquehe. Tijahúchavapa tiáquipaicava eta peti, témitiequenepa tamutu –máichavacapa ema Jesús.

7

Ena Jesús macanaraca ema mamusura ema capitán romano

(Mt 8.5-13)

¹ Tiuri, te títapiricapa ema Jesús eta máimitusiravacahi ena achaneana, tichavapa eta te avasare Capernaúm.

² Matiarihíhi ema achane apavasana. Comandante éma nayehe ena suntaruana romanoana. Capitán eta mávacure. Ticajumahi ema mamusura. Tiánehiripahi tépena. Ichaperinehi eta máéñamiravahi taicha máemunaruquenehi ema mamusurahi.

³ Tacahe, te masamairiricapa ema capitán eta matiarahirahi ema Jesús, máevatacavacapa ena náiyamurianahi ena israelítana náichuhapanayarehi ema Jesús, macanarasinapanahini ema mamusura.

4⁵ Tacahe, te náitecapauchapa ema Jesús ena vanairucanahi, nayaseacapa, ánipa naicha:

—Mararihi ema capitán te viávasahi. Ichapemuri eta máimicatasirahavihi. Máemepiyarecahivare eta ichape peti eta viúrujisirareva eta viyujarasi-rarehi. Tásiha puiti, tivanecahavihi víchuhapanávi picatajicahini picanarasinapanahini ema mamusura. Tatuparacahi pímicatacaini ema maena — náichapa.

6 Tacahe, ema Jesús tísapavapa tiyana, máehicavacapa éna. Étasera te tiánehianapa eta mapena, mavanecavacapa ema capitán ena máimaticasareana, nametapana ema Jesús. Ánipa naicha:

—Tata Jesús, eta juca máechajiriruvahi ema capitán: “Tata, vahi picucaña-macava eta pítesiraina eta nuyehe, taicha vahi táuricahini pisiapauchanusa-mihini te nupena.

7⁸ Eta tacahe, vahi nupatsicavahini nútijacarúvainahini níchuhapanávi. Németeaca tarataharichu picavanairipi eta picanarasiraya ema numusura. Taicha nútí nusuapahi te tivanecanuana ena anuquehepananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevere níchuhavacapuca, tisuapanuanahi. Te nuvanecapuca ema nuvaneru, enurujipta tisuapanuvane” macahepa.

9 Te masamapa ema Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Numetacahe: Nájina nímaha émanaina vijaneana israelíta mácutini ema maca achane apavasana eta macasiñavairahi eta nuyehe —máichavacapa.

10 Tacahe, nacarinepa tichavanahi ena vanairucana. Te títecapanapa, náimarinehi ema macajumaquenehini, tinaracaripa.

Ena Jesús macaechepuca ema amaperu máepenaquenehi, suchicha esu esena suépenaimaquene

11 Te táequenepa eta juca, tiyanavarepa ema Jesús tayehe eta avasare ticaijare Naín. Náehicapahivare ena máimitureana, énapa ena camuriqueneana achaneana.

12 Te títecapanayarepa te avasare nácapajicavacapa ena achaneana tiámanapahi ema máepenaquene, náecarayarehi. Camurianapahivare ena achaneana téhicanapahi. Éma máepenaquenehi, macarichuhi suchichahi esu esena suépenaimaquenehi.

13 Eta máimairahi ema Viáquenu, majapanurinehi esu esena. Tásiha, máichapa:

—Vahi picuiyaha —macahepa.

14 Tásiha, mapauchapa ena tiámanapahi ema máepenaquene. Titupihanapa éna. Máemamahicapa eta macajone. Tásiha, macahepa:

—Nuchicha, nútí nuvanecavi, péchepuca —macahepa.

15 Enevanerinehi téchepucapa ema amaperu máepenaquenénihi. Téchajicapa ema amaperu. Tásiha, ema Jesús máíjaracapa esu maena.

16 Tacahe, ichaperinehi tiáramicarehi eta juca nayehe ena camuriqueneana achaneana. Ánipa nacahe:

—Tétávicava eta macunachacareva ema Viya. Jéhevere ema maca achane yátupiquene profeta, mavaneruhi ema Viya. Tétávicavapa táurisamurecareva eta máuchusirahi te vimuri —nacahepa.

Ena apamuriana ánivare nacahe:

—Ema Viya tiúcupauchahavihi tímicitapanahávihi viti machaneranahi —nacahepa.

¹⁷ Eta juca máichaquenehi ema Jesús, téhacarevanepa tamutu avasareana te návasanahi ena israelítana. Títecavarepa te táyerehiqueneana avasareana.

Ema Juan Tícachasiricarahi mavanecavacapa ena máimitureana (Mt 11.2-19)

¹⁸ Énerichuvare ema Juan, te mávihahi te cárcel, masamairiricapa eta juca taicha nametacapa ena máimitureana.

¹⁹ Tacahe, máevatacapa ena apinana, nayaserepanayarehi ema Jesús te yátupihipuca émaripahi ema Cristo ema macuchapaquenehi.

²⁰ Tacahe, ena vanairucanahi me Juan náitecapauchapa ema Jesús. Nayaserecapa, ánipa náichahi:

—Ema viáquenu Juan tivanecahavihi viyaserepanaviyare te yátupihipuca pítiripahipuca Cristo ema vicuchapaquenehi. ¿Téheserapuca vímianavaya-repuca vicuchapa? —náichapa.

²¹ Eta náitecapauchirahi ema Jesús, éma ticanararerecaichahahi ena nacajumaqueneana, énapa ena nacajaraqueneana. Máquijicavare ena éreanana tiávahácanahi nácani achaneana. Macaimairicavare ena maveraqueneana púchuquiána.

²² Tacahe, ema Jesús majicapavacapa ena vanairucanahi me Juan. Máichavacapa:

—Nuvaraha ímararacaya eta níchaqueneana puiti. Nucaimairicavacaipa ena púchuquiána. Nímipaisiraipa ena masariana. Nucanaracavacaipa ena leprosoana, énapa ena túhuquiñana. Nucaechepusiravacaipavare ena náepenaqueneanaini. Énerichuvare níchuhahi ena páureana náeneuchava apaesa náuchucuha. Tásiha, eyana emetaca ema Juan tamutu eta níchaqueneanahi.

²³ Vaipa macueñamava ema Juan eta nuyehe. Tétavicavapa eta máuricacarevahi éma, te ticasiñavahi eta nuyehe —máichavacapa ema Jesús.

²⁴ Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratacahina éma, te eyanapa te mávapahi apaquehe te mávihahi, ¿tájaha eta epanereruana tayehe eta macametarairuirahi? Éti ímijachavaipapuca mamapachichijiriruvaichucha eta máechajisirahi tacutíhi te vímararaca eta taflurena eta acutena te tacayamuririjicahi eta técatícava.

²⁵ Ímijachaipavarepuca tavayuaruhi ema tiúrinanácavayarehi eta macamairihairahi. Écharichuhi éti mácani tiúrinanacavahi, píncanillahi eta máitaresira, váiparinehi tiúchucaimahi te sache, váhivare tiyanaimahi te mávapahiana apaquehe. Manasiqueneyarehi te jácani tiúrina peti.

²⁶ Nuyaserecahe: ¿Nájahapuca ímijachahi éma? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana.

²⁷ Éma maca Juan émara máechajisihaquenehi ema Viya eta te Sagrada Escritura, ánipa macahehi: “Nuvanecayare ema títapumirauchaviyarepahi ema ticametarairuyarepahi, apaesa natsecavapaipa ena achaneana eta najacapiraviyare” tacahepa eta Sagrada Escritura.

28 Núti nutupiruva numetacahe: Ema maca Juan, nájina mácuti nayehe ena achaneana. Tétavicava eta macunachacarevahi. Iápajupanavahisera eta ecunachacarevahi eti nuchanerana, apaesachicharipa eta ecaicutiarairahi eta mapanereruanahi ema Tata.

29 Ema achaneana, énaripa ena tisipecaturarahianaini, náimatiacahi ema Juan eta mavanecasiavahi me Viya. Nasuapahivare eta mametarairuana ema Juan. Eta tacahe, ticaicachasianapa mayehe.

30 Énaserá ena fariséoana énapa ena máestroana, éna máisapavaranahi nacaicachasihini mayehe ema Juan. Témepururecavanaripa eta náurivaya-rehini maicha ema Viya.

31-32 Etiarihihini eti achaneana puiti juca sácheana, eta emasuapajiraivahi, nímicutichinahesa ena amaperuana tiútseruanahi. Apapipijichucha eta nacayemaqueneanapahi. Ema apana macahepapuca: “Vépiyacapa eta piéstachicha”. Énaserá ena apamuriana vahi náisapavahini. Tásiha, ema apana macahepuca: “Vépiyacapa eta ecari”. Váhivaresera náisapavahini.

33 Ema Juan Ticachasiricarahi, te tímerecavapa, muraca eta máimiturapianahi. Eta manicasareana, vahi tácutihini eta nancasareana ena achaneana. Nararihisera te emuri ena tépiyaequenehanahi éma. Náimijachahi mávaháruhi ema éreana.

34 Núti Manerejirunuhi ema Viya, eta nítecapauchirahepa, nucachaneheripa eti achaneana eta enisirahi. Etiarihivaresera eti épiyaequenehanuhi: “Ímaha ema maca, cánisiuquitataji, cávahárasí. Macachanevacapaipa ena cóbrarecarahianatataji énapa ena apamuriana nasipecurarahique-neanahi”.

35 Éti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahi taicha eta emasuapajiraivahi. Te yátupihupucaini échemarahihini, ímatinuhini eta nucavanahirahi eta me Tata*.

Ema Jesús ticaichuhacasihi te mapena ema fariseo ticaijarehivare Simón

36 Matiarihihini ema achane ticaijarehi Simón, fariséohi éma. Macumpirachapa ema Jesús, manipana te mapena. Masuapahisera ema Jesús. Tiyanapa. Te tiúripa eta tinicacare, téjacapa te mesa.

37 Susamairiricapa esu ésuna esena tisipecaturarahinihi eta matiarihirahi ema Jesús te mapena ema fariseo. Tásiha, tiyanapa supauchahi ema Jesús. Suámapaipa eta bótechicha. Tínicapahi eta tájiyiequene perfume tasivachaquenehi.

38 Tépuycapa te máivapeana ema Jesús. Tíyahacavapa, táetsipapapevachapa eta sutsera. Suájahapa te suchutimaca. Tásiha, suépusapevachavare eta suámaquenevahi perfume, sutsiucapavachavare.

39 Tacahe, eta máimairahi ema fariseo eta juca, mapanerequenehapa. Téchajicapa te masamure: “Te yátupinahini profetaínahini ema maca, máimatiacaripahini esu suca esena eta susipecuraravatatajihí. Vahi táuricahini suémamacahini” macahesamurepa.

40 Émasera ema Jesús masamahi eta mapanereruhi ema fariseo. Máichapa:

—Simón, jucaríhi nuvaraha numetacaviya.

Ema fariseo majicapapa:

* 7:35 Eta juca mayeherepi proverbio ema Jesús te máechajiriruva, ani tacahe: “Eta téchemarahicare, éta nacunachihayare namutu ena tachichanaveana”. Tatiaríhi eta tacayemaquenehi tayumurevahi.

—Nímahaseji, pimetacanu, maestro —máichapa.

⁴¹ Tacahe, ema Jesús máimicutiarachinapa, máichapa:

—Natiarihi ena apinana ajairana ticanteveanahi mayehe ema rico. Ema émana ticantevehi quiniento; ema apana ticantevehi cincuenta.

⁴² Tacahe, vahi náratahahini navachachahini eta nanteveana. Tásiha, maperdonachavacapa ema rico ena apinana. Tiuri puiti, nuyaserecaviyare. Ena nani apinana, ¿nájahapuca ema témunacapanahi ema rico? —máichapa.

⁴³ Majicapapa ema Simón:

—Ticutimahí ema tisintevapanahi.

Tacahe, máichapa ema Jesús:

—Pímahaipajira.

⁴⁴ Tacahe, ema Jesús máimararacaripahi esu esena. Tásiha, máichapa:

—Pipanereaca esu suca esena. Puítihí, te nusiapapa te pipena, vahi pímisipacahini eta nívape. Ésusera esu suca esena tisipapevachanuhi te sutsera, tiájapevachanupa te suchutimaca.

⁴⁵ Píti vahi pitsiucanuhini eta pijacapiranuhi. Ésusera, ichapemurihi eta sutsiucapevachiranuhi.

⁴⁶ Váhivare piámasicanuhini eta aceite eta pijacapiranuhi. Ésusera esu suca esena tisipapevachanuhi eta te táijiyequene perfume.

⁴⁷ Yátupi tisipecaturainihí esu suca. Numetacaviyaresera, nuperdonacharipahi ésu tamutu eta supecaturaini. Eta tacahe, ichape eta suímeresirahi eta yátupirahi eta suémunasiranuhi. Nácanisera apaesarichuhi eta napecaturaini, apaesarichuhivare eta náemunaraiva, taicha apaesarichuhivare eta najacapirahi eta nayehe perdón.

⁴⁸ Tacahe, ema Jesús máichapa esu esena:

—Vahi picueñamava, nuperdonacharipa tamutu eta pipecaturainihí.

⁴⁹ Tacahe, ena natiarihiqueneanahi chimaracanahi náejaruanahi te mesa nacahepa te nasamureana: “¿Nájahapuca ema maca ticaemuñavahi marataha maperdonacha eta pecatuana?” —nacahepa.

⁵⁰ Émasera ema Jesús máichapa esu esena:

—Táuricapa piyana. Yátupi eta piúchuchairaya táichavenehi eta picasiñairanuhi.

8

Natiarihihivare ena esenana títtianapahi ema Jesús te mapaisihapahi tayehe eta avasareana

¹ Te táequenepa eta juca, tianavarepa ema Jesús, tipaichí tayehe eta tasimutuqueneana avasarechichana. Ticametarairupahi eta máechajiriruva ema Viya eta náuchucuirayare ena ticasíñavanahi mayehe, machaneranyarehi. Náehicapahivare ena dócequeneana apóstoleana.

² Énerichuvare náehicapahi ena esenana máepachiaruanahi nayehe ena éreanana tiávahácanainihí. Sutiarihipahi esu María Magdalena, máepachiaruhi nayehe ena siétequeneana éreanana tiávahácanainihí ésu. Natiarihihivare ena apamuriana esenana macanararuanahi tayehe eta apapanenepiqueneanahi najumanainihí.

³ Sutiarihipahi esu Susana, ésupa esu Juana, mayena ema Chuza. (Ema Chuza, mayehi empleado ema Herodes, téchahi tamutu eta máimahuqueneana ema Herodes.) Maveranahivare ena apamuriana esenana, tíamauchavanapahi eta nirure, náitátirapahi ema Jesús, énapa ena apóstoleana.

Eta máimicutichaquenehi evaraqui tacaevaquenehi te apanapaneneji máteji te apaquehe

(Mt 13.1-9; Mr 4.1-3)

⁴ Te jena sácheanahi, camuriana ena achaneana tiyananapaipa napaucha ema Jesús. Tiásihanapahi te avasareana. Te máimahapa éma ena camuriqueneana, máechajicavacapa; máimicutiarachinapa eta máimitusiravacahi. Ánipa máicha:

⁵ —Matiaríhi ema émana achane. Tévpapanahi te máesane. Tásihasera, eta mapaisirapahi témiricapapapuca eta evaraqui te achene. Eta nanucuiraparacahi ena achaneana, nácatayacapaipa eta evaraqui táemiriruanapahi. Táimahapa eta cáyure, tanicapa.

⁶ Tásiha, eta apana evaraqui témiricapa te máripahi apaquehe. Tímarucainípa, tásihasera tájjicapa eta sache taicha muracpahíhi eta apaquehe.

⁷ Eta apana evaraqui témiricapa te taparereji eta itapequiji. Tiúrinainíhi eta táimarusira, étasera eta itape tacachuricapa eta tajurusirahi, táemuriachapa.

⁸ Eta apana evaraqui témiricapa te tiúrina máteji. Tijurucarahi eta táimarusira. Tiúrinahívere eta tahi. Tájaracahi ichapemuri eta tahi — macahepa.

Te titapiricapa ema Jesús eta máechajirisiravacahi, máichavacapa:

—Te evarahapuca ecaicutiara, tavaraha eta epanerechinavaya — macahepa.

Ema Jesús máitametacavaca ena máimitureana eta juca máimiturapihi

(Mt 13.10-23; Mr 4.10-20)

⁹ Tacahe, ena máimitureana nayaserecapa ema Jesús tájahapuca tacayemahi eta máimicutichaquenehi mayehe ema tévacarahi.

¹⁰ Émasera máichavacapa:

—Ema Tata tituparacanu nítametacaheyare éti eta juca mapanereruana táequenereruana. Mavarahahi ímatiequenehaya éti. Énasera ena apamuriana achaneana nímicutiarachinavacahi, apaesa vahi máejerarémahi eta nacaicutiarairaya eta nasamaquenehi. Tavaraha napanerechinavaya. Te vahi yátupina eta navairaya nasupa, váhivare nacaicutiaraimahi eta nímiturapiana.

¹¹ Étara eta juca tacayemaquenehi: Eta evaraqui tímicutijiricavahi eta máechajiriruva ema Viya eta nímiturapianahi.

¹² Natiaríhi ena achaneana nasamaripahinéni eta nímiturapianahi, émasera ema Váinaraji vahi máisapahini tánasihini te nasamureana. Enevanehi macamitisicavaca eta nasamaquenehi, mamavarairahi nacasiñanuhini apaesa nuchucuhavacayahíni. Éna, nacutihí eta máteji muracapahi te achene.

¹³ Natiaríhivare ena apamuriana achaneana, nacutihí eta máteji máripahi. Te nasamararaca eta nímiturapiana, nasupa, tiúrisamureanarínehi. Váhisera naratahahíni nacaravahuhíni yátupinahíni. Vahi nácutihíni eta evaraqui tiúparehi. Ánipirichu eta náehisirahi. Tínajicavanávane taicha eta náimairavahi eta nacatajivairahi.

¹⁴ Natiaríhivare ena apamuriana achaneana nacuti eta máteji te távihahi eta itapequiji. Énerichuvare nasamararacahinéni eta nímiturapiana. Napaneréquenehahinéni, tahapapiricavacahisera eta jácani tácharacavayare eta náitaresira. Váhivare náinajicahíni eta

tacañamarasiravaca eta tájiparacana, étapa eta navarairahi tirricochavana. Váhivare náinajicahini eta náichirahi eta tamauriqueneana. Tamutu eta juca táemetavicahi eta navarairahi téhicanuana. Tamapurujihí eta najacapirahi eta nímiturapiana. Tájina vahi nacaemataneacahini ema Viya.

¹⁵ Natiarihisera ena apamuriana achaneana nacutihi eta tiúrina máteji. Éna, nasamaracahi eta nímiturapiana, náunacahi yátupi te nasamureana. Tájina vare náichiravainahini eta náehisiranuhi. Ichape eta nacaemataneasirahi ema Viya. Vahi nayacujimahi.

*Éma Jesús máimicutiarachava eta lámpara eta máimituresira
(Mr 4.21-25)*

¹⁶ Ánivare macahe:

—Súnsuanahi nácani tiyustacanahi eta lámpara namicahuyarehi, tásihasera, najihapaicapapucaini, nanacavarepucaini te tápecu eta náetsatsame náimasirare. Vahi tamicauchaimahi. Tacamunuhi nanacayarehi te anuquehe. Jéhesare ticaecherasareyarepa tamutu apaesa nácani tisiapanapahi, tímairicanayarepahi.

¹⁷ Tayanapanepuca ticayumuruquianahi, tamutuyarehisera ticaechera jácani tayumurevanahi. Tájina tépacuchaimahi jácani najajairairuvanahi. Tamutuyarehi téchacareya.

¹⁸ Eta tacahe, ecaquiñaiicha yátupina eta juca. Taicha mácani máitururuequenehahi yátupi, tiápajucavayarehi eta máitupajijiasiravayarehi. Mácanisera apaesarichuhi eta máitucaquene, te váipa mapanerequenehahini, máemitisi-cayarehi eta máitucaquenénihi.

*Suítecapachapa esu maena ema Jesús énapa ena maparapenaveana
(Mt 12.46-50; Mr 3.31-35)*

¹⁹ Tacahe, esu maena ema Jesús énapa ena maparapenaveana títecapanapa te peti te máimituresihahi ema Jesús. Váhiserá náitujicavahini nasiapahini taicha tiyututucavanahi ena achaneana.

²⁰ Nametacapasera ena apamuriana achaneana ema Jesús:

—Esu pémunaruquenehi pena énapa ena piparapenaveana nararihi ani te aneca, navarahahi téchajicaviana —náichapa.

²¹ Émasera majicapavacapa:

—Yátupi némunacavacahi esu meme énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi. Taicha tisuapajirahianahi éna tayehe eta máechajiriruvana ema Viya, ticaemataneacanhivare éma —máichavacapa.

*Éma Jesús macaesamirica eta táepacusirahi eta une étapa eta técticavá
(Mt 8.23-27; Mr 4.35-41)*

²² Étana sache, ema Jesús tiávacuhapa eta te pacure. Tásiha, máichavacapa ena mayeheana apóstoleana:

—Viyana, viánueca te apachara —máichavacapa.

Tacahe, tiyananapa tiánuecanayarehi.

²³ Eta napaisirapahi, ema Jesús tívecapa tímacapaipahi. Tacahe, járajapainapa eta muraca técticava. Tépacucapa muraca eta cáquiure. Tasiapau-chapaipa eta une te pacure. Tipicanapa ena máimitureana, taicha tímatiacavanapa eta náecharisiravayarehi.

²⁴ Tacahe nacajamicapa ema Jesús, náichapa:

—¡Maestro! ¡Maestro! ¡Péjamica! ¡Pímaha vécharicavainapa taicha eta tépacuca!
Enevanepa téchepucapa ema Jesús. Macamatinacapa eta técatícava étapa eta táepacusráhi eta une. Tésamiriecavapa tamutu.

²⁵ Tacahe, máichavacapa ena máimitureana:

—¿Tájaha tacayema vahi ácasíñvahini eta nutiaríhirapahi eta eyehe? — máichavacapa.

Énase ra tiáramecanapa. Tésenijiricananapa, tásiha nacahepa:

—¡Tétavicavapa eta máitupajijiasirava! ¡Jéhesare, yátupiquene eta émaírahi machichahi ema Vía! Taicha eta mavanairipi, tamutu tasuapahi eta técatícava étapa eta une —nacahepa.

Ena achane návaháruanahi ena ichapemuriqueneana éreanana (Mt 8.28-34; Mr 5.1-20)

²⁶ Tacahe, títecapanapa te apachara tayehehi apaquehe eta provincia Gadara. Te apachara tacanaraipahi eta provincia Galilea.

²⁷⁻²⁹ Te tíucupaicapa ema Jesús, énapa ena máimitureanahi, máuchujiuchavacapa ema émana achane. Ema maca achane mávasaichuhi tayehe eta juca avasare Gadara. Tájínapasera máimatíyahini mayanahini te peti taicha namaurishichaipahi ena camuriqueneana éreanana tiávahácanahi. Ánaquiaparipa eta návahásirahi. Nametapanéni ena achaneana nacaratata. Náitiaca te ichapepi carena étapa te enure, te náimahavarepa tacananesica naicha ena tiávahácanahi. Émasera, tétavicavaipahi eta matumevahi. Mavechuquimurivare eta carena máitihanahi. Tijunavare, tiyanavarehi te mávapahiana naicha ena éreanana. Macapenajuechavacahi eta ecariana. Mamuriarehi eta máitaresirahi.

Tacahe, te máimahapa eta matiaríhirahi ema Jesús, mapauchapa. Tépuycapa te mamirahu. Ema Jesús mavanecavacapa ena éreanana náinajíaca ema achane. Ema achane tipiararecapa. Ánipa macahe:

—¿Tájaha picha píteca pípauchanu, piti Jesús, Machichaquenevivi ema Vía? ¡Pájapanunu vuíchaha picuvanecanu ánaqui te nucaicuñaiyayare! — máichapa.

³⁰ Tacahe, ema Jesús mayaserecapa:

—¿Tájaha píjare píti?

Ena achane majicapapa:

—Núti nucaijare “Nacapenaharu ena ichapemuriqueneana éreanana”.

Éma, tacahehi eta majicapirahi ema Jesús taicha camurianahi ena tiávahácanahi.

³¹ Tacahe, ena éreanana nayaseacapa ema Jesús vahi macuaquijicavaca te táupenaquene pusu náicuchihí návihayare éna.

³² Tatiaríhivare eta camuriqueneana cúchiana. Tinihicanahi te táemiripaisine eta masihi. Ena éreanana nayaseacapa ema Jesús máisapahini nasiapahacavaca eta cúchiana.

³³ Tacahe, ema Jesús macuchuchujicavacapa te máquehe ema achane, máisapahivare nasiapahacavaca eta cúchiana. Te tasamapa eta cúchiana eta nasiapahasiravacahi ena éreanana, tijunaparacanapa témiririjicanapa te tachausi eta cáquiure. Téririjicanapa tamutu.

³⁴ Natiaríhivare ena tijaneacanainihi eta cúchiana. Te náimahapa, tiáramecanarinehi. Tiyananapa tijunapanapaipa timetajiricanapaipa nácani nácapajiruvanapahi, étapa te avasare namutuvare nametaca.

³⁵ Tiáramicaréinehi nayehe ena achaneana. Tiyananapa náimahapana tájahapuca eta táichavaquenevahi eta cúchiana. Te títecapanapa, náimahapa ema achane návaháruinihi ena éreanana. Téjacaripahi te máivapechacaya ema Jesús. Tájinaripahi máichiravainahini. Ticamuirihaipahivare. Tásihasera, tipicanarínehi ena achaneana.

³⁶ Tavetijípa te náitametacapa ena tímahanahi eta macuchuchujisirahi ena éreanana te máquehe ema achane.

³⁷ Tacahe, te nasamairiricapa, namutu ena achaneana ticavasanahi te Gadara, vaipa napatsicavahini máitecapauchavacahini ema Jesús taicha náefñamaipahi tácahémahivaréni eta apamuriana náitátiqueneana. Nayaseacapa ema Jesús machavahini te másinehi. Tacahe, tiávacuhavarepa éma, tichavavarepa.

³⁸ Tacahe, ema achane mayaseacainipa ema Jesús máisapahini máehica. Émasera máevatacaichucha machava te mapena. Ánipa maicha:

³⁹ —Piyanchucha pichava te pipena. Pimetajiricaya eta majapanuiravihi ema Viya eta macanarasiravihi —máichapa.

Tacahe, tiyanapa tichavahi ema achane. Mametacavacapaipa namutu eta macanarasirahi ema Jesús.

Éma Jesús macanaraca esu machicha ema Jairo, ésupa esu apana esena sucajumaquenehivare

(Mt 9.18-26; Mr 5.21-43)

⁴⁰ Te títecapavarepa ema Jesús te apachara, enevanepa nácapahi ena ichapemuriqueneana achaneana taicha nacuchaparairicaipahicha. Tiúrisa-mureanarínehi eta náimairahi éma.

⁴¹ Títecapavarepa ema émana achane ticaijare Jairo. Éma maca achane, tuparairucahi tayehe eta náurujisirareva tayehe eta jena avasare. Tacahe, ema maca achane tépuyucapa te mamirahu ema Jesús. Mayaseacapa macatajichahini mayanahini te mapena, macanarasinapanahini esu machicha.

⁴² Taicha ésunaracavahi esu machichahi. Doce áñoripahi eta suhañorahi. Téñamajiricavaipahi ésu, taicha eta sujuma. Tacahe, tiyanapa ema Jesús, máehicapa te mapena. Náehicavarepa ena camuriqueneana achaneana. Váipanecha náratavapahini eta napaisirapahi.

⁴³ Sutiarihipavare esu apana esena, sucajumaquenehivare. Doce áñoripahi tayerevahi eta suhitiarevahi. Ichapemuripa eta sutanusirahi ena médicoana, váhisera sucanaracahini ésu.

⁴⁴ Tépiyayacavapa témeñahava te maquecu ema Jesús. Suémamajiacapa te tacheyarapi eta mamuiriha. Enevanerinehi tinaraca ésu. Tícheacapa eta suítine.

⁴⁵ Émasera ema Jesús masamarichucha eta suémamajiasirahi. Macahepa:

—¿Nájaha témamajiacanuanahi? —macahepa.

Nájina tísapavaina.

Émasera ema Pedro énapa ena machamuriana náichapa:

—Maestro, pímaharichuhi eta nasimutuvahi ena achaneana. Tiyututuca-vanahi te pichacaya. Váiparinehi tímaticarémahi nájahapuca nácani témamajia-cavianahi —náichapa.

⁴⁶ Émasera ema Jesús macahevarepa:

—Nacañárihi témamajiacanuanahi taicha nusamavahi núti eta nucanara-sirahi eta jumare táichavenehi eta nítupajijiasiravahi —macahepa.

⁴⁷ Ésusera esu esena, tímaticavapa eta máimatirahi ema Jesús eta suémamajiasirahi, tiyanapa supauchahi. Tépuycapa te máivapechacaya. Tiyayacareripa eta supisirahi. Sutupiruvapasera timetaurecavahi eta ésurahi témamajiacahi. Ánipa sucahehi:

—Tata, nútira némamajiacavihi, nuvarairahi nunaraca tayehe eta numajahi. Nusamavaipasera eta nunarasirahi —suíchapa.

⁴⁸ Tacahe, ema Jesús, máichapa esu esena:

—Tiuri, nuchicha, pinaracapa puiti táichavenehi eta picasiñairanuhi. Vaipa picueñamava eta pichaviraya te pípena —máichapa.

⁴⁹ Téchajiricavaichahahi ema Jesús eta suyehe esu esena, títecapanecha ema émana achane tiásihahi te mapena ema Jairo. Mametacapa:

—Esu pichicha tépenasamipahi. Vaipa picucamesa ema Maestro —máichapa.

⁵⁰ Émasera ema Jesús, te masamapa, máichapa:

—Vahi picuarameca, váhivare picueñamava. Pácasiñava eta nuyehe. Tinarayareichu esu pichicha —máichapa.

⁵¹ Tacahe, tiyanavanepa ema Jesús. Te títecapanapa, vaipa máisapahini ema Jesús nasiapahini ena achaneana. Nacarichu tisiapanahi ema Pedro, ema Jacobo, ema Juan, émapa ema suiya esu amaperu, ésupa esu suena.

⁵² Natarihihisera ena achaneana te tajuhe. Tíyahanaripa éna. Te máimahavacapa ema Jesús, máichavacapa:

—Vahi ecuiyaha. Váhira suépenahini esu suca amaperu. Tímacarichucha —máichavacapa.

⁵³ Téccavanarichuchasera eta mayehe éma, taicha náimahahi eta suépeniraipahi.

⁵⁴ Tacahe, ema Jesús macaratacapa eta suvahuana. Tásiha, máichapa:

—Nuchicha, nuvanecavi: Péjamica, péchepuca —máichapa.

⁵⁵ Tacahe, esu amaperu tichavapa títareca. Tásiha, téchepucavanepa. Ema Jesús mavanecavacapa ena ticachichana nájaraca eta súnica.

⁵⁶ Ichaperinehi eta náramirahi ena ticachichana. Émasera ema Jesús matuparacavacapa vahi nacuechajisiha eta náimahaquenehi.

9

Ema Jesús mavanecavacapa ena dócequeneana apóstoleana, napaicayare tamutu avasareana

(Mt 10.5-15; Mr 6.7-13)

¹ Ema Jesús macurujimurihapa ena dócequeneana mayeheana apóstoleana. Tacahe, májaracavacapa eta náitupajjiasiravanayare naratahairayare náquijica ena éreanana, naratahairayareva nacanaraca nácani nacajumaqueneanahi.

² Tásiha, ticavanahianapa ticametarairuanayare eta tacamunucarevayarehi náeneuchiravayarehi ena achaneana, náinajisiraina eta napecaturana, náehica ema Cristo. Ticanararecanayarepahivare nácani nacajumaqueneanahi.

³ Eta mavanesarayacahi, máichavacapa:

—Tájina iámamahi eta eyereruva. Váhivare ecucayupairiquipahi. Tacuivare ecanirurucuhaina te alforja. Étaripa eta plata, tacuivare iama. Étanainarichu eta emuiriha iámayare.

⁴ Enasinumayarepahisera te jácani peti nayehe ena tiúrihi eta najacapi-raheya. Tiámainucava te táitecapa eta eyanirayareva.

⁵ Téhesera nacuijapuca nacubaraha najacapahe tayehe te jácani avasare, váhivarepuca nacubaraha nasama eta emetarairuya, iúchucavanepa. Étatapevachavanumayaresera eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehíni — máichavacapa.

⁶ Tacahe, tiyanapa ena apóstoleana. Tamutu napaica eta avasarechichana. Ticametarairuanapaipahi eta máechajiriruva ema Viya, eta viúchucuiraya majacapirahaviyare éma. Ticanararecanapaipavare ena nacajumaqueneana nácani náetupiaruanapahi.

Ena Herodes masamairiricavare tamutu eta juca máichaqueneanapahi ema Jesús

(Mt 14.1-12; Mr 6.14-29)

⁷ Tacahe, ema aquenucahi Herodes masamairiricavare tamutu eta tiáramicareana máichaqueneanahi ema Jesús. Váipasera máitucarehíni. Taicha masamairiricahi náimijachahiji émahi ema Juan téchepucahi te máecari.

⁸ Ena apamuriana náimijachahivare téchepuca ema antiviini profeta. Ena apamuriana náimijachahivare ema Elías.

⁹ Émasera ema Herodes macahepa:

—Nútijacaru vahisera nucavanairipi náechatinuca ema Juan, eta máepenirahi. Púiti, ¿nájahapuca ema maca nusamaiririruasaparacahi eta máichira eta tiáramicareana? Nuvarahasa nímatini ema mácara —macahepa.

Ena Jesús máitaparaha máenicavaca ena camuriqueneana achaneana

(Mt 14.13-21; Mr 6.30-44; Jn 6.1-14)

¹⁰ Tacahe, tichavanapa ena apóstoleana eta napaisirahi. Nametacapa ema Jesús tamutu eta náichaqueneanapahi. Tásiha, éma mámamurihavacapa te mávapahi, tinapaicahi eta avasare Betsaida.

¹¹ Téhesera náechavarepa ena achaneana eta macaijuhehi ema Jesús, tiyananavarepa nacapayacahi. Émasera majacapavacaichucha, máimitumuriharipavare tayehe eta náitaresira ena machaneranahi ema Viya. Macanaracavare ena nacajumaqueneanahi.

¹² Te náimahapa ena apóstoleana cáperehiyareipahi, témeñahavanapa eta mayehe ema Jesús. Tásiha, náichapa:

—Táuricapa pivanecavaca ena achaneana nayanapa natanuca eta nanisiha étapa eta náimasihaya te avasarechichana tachacayarahanahi eta juca viáviyahahi, taicha ani, tajina náviyavaimahi eta te juca —náichapa.

¹³ Tásiha, ema Jesús majicapapa:

—Étina, íjaraca eta nanica.

Énasera náichavarepa:

—Tájina viviyaimahi eta nanicahini ena nani achaneana. Jucárinéni cinco eta pan, apiquipa jima jitaruca. Váiparinehisera nárataimahi. Tayanapane tatiarihinapucaíni eta vivacharesihahini eta tinicacare, váiparinehivaresera nárataimahi ena nani camuriqueneana achaneana —náichapa.

¹⁴ Ena achaneana, cinco mil eta náichapemurivahi ena ajairana, énarichahavare ena esenana, énapa ena amaperuana.

Tásiha, ema Jesús máichavacapa:

—Evaneca náejahapaicavaca ena achaneana. Cincuentavacainapahi eta náiputsitsisiravaina —máichavacapa.

15 Énepasera tacahehi naicha ena apóstoleana. Tásiha, ticaejarecanapa namutu.

16 Tacahe, ema Jesús mavehapa eta cincoquene pan étape eta apiqui jima. Máesenicapa te anuma. Mahasulupayachaipa ema Maiya eta máenisi-ravacayarehi ena camuriqueneana achaneana. Mayuvetutuhecavacapa, máijaracapa ena apóstoleana. Náijaracapasera namutu ena achaneana.

17 Namutupa tinicana, tísatuhevacapa. Váhicaruvare náitahini eta tinicacare. Dóchehi saye ichapehiana tinicahi eta náemacharájiana.

*Ena Pedro máimereucha ema Jesús eta émairahi Cristo
(Mt 16.13-19; Mr 8.27-29)*

18 Étana sache, ema Jesús énapa ena máimitureana tiápechavare típutsiacavana, tiyananapa tayehe eta nayujarasihayarehi. Te títavanapa eta nayujarasirahi, éma mayaserecavacapa:

—¿Tájaha nacayema ena achaneana eta nuyehe? ¿Nájahapuca náimijachanuhi éna? —macahepa.

19 Éna najicapapa, ánipa naicha:

—Ena apamuriana náimijachavíhiji téchepuca ema Juan Tícachasiricarahini. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema mácani apana profetaini antiviuni, téchepucahi —náichapa.

20 Ema Jesús mápechavare mayaserecavaca éna:

—Étiyapa, ¿nájaha ímijachanuhi núti?

Ena Pedro majicapapa:

—Pítira yátupiqueneví Cristo, piásihaquenehi me Viya —macahepa.

*Ena Jesús tímereuchava eta máepenirayarehi
(Mt 16.20-28; Mr 8.30-9.1)*

21 Tásiha, matuparacavacapasera ema Jesús nacuija nacumetaca eta émairahi ema Cristo.

22 Tásiha, máichavarepa:

—Tacamunuichaha eta ichapemuriyare eta nucatajivairaya, nuti Manerejirunuhi ema Viya. Tépurunuanayare ena tuparairucana énapa ena aquenucarahana énapa ena escribánoana. Éna, tímicapacuanayareva. Mapanaya-reichuhisera sache eta nucaheyare eta népenirayare. Tásiha, nuchavayarehi téchepuca —máichavacapa.

23 Tásiha, máimitucavacahi namutu ena achaneana, ánipa máichavaca:

—Nácani navaraha náehicanu, tacamunu náinajica tamutu eta tihapapiricana eta náehisiránuhi. Nacaravahuyareva eta nimiturapiana. Náijaracavavare eta táimicapasiraina eta náehisiránuhi.

24 Nácanisera téñamanahi eta náitaresira, tiávamirahuanaya eta náehisiránuya, énajivayare ticamítiequenehavanaya eta náitaresira. Énasera nácani yátupihi tjaracavana téhicanuana, tayanapane táimicapacavacapuca eta náehisiránuhi, éna tíujicavanayare tíuchuchuanayare eta náitaresiranaya.

25 Énerichuvare nácani tacáeñamararuanahi eta nacaimahaquenéirayare te juca apaquehe, tájina náimaequenehaimahi, taicha eta tacáeñamarasiravacahi tahapapiricavacahi tayehe eta náuchucuirayare.

26 Énaripa nácani titsirihanapuca téhicanuana, náimitsirihapuca eta nímiturapiana, núti apanava nutsirihayarevare nayehe ena nani. Nucaerajicainapa ena nani, núti Manerejirunuhi ema Viya, te táitecapapa eta sáchevare

nuchavirayare aquenucanuinapaipa. Te jena sáchezare, námainapaipa núti eta nujaraíva, étaripa eta majaraíva ema Tata. Nucachanénapaipa ena sántoqueneara ángeleana.

²⁷ Nutupiruva numetacahe: Puítiripa te etaracu éti, etiaríhi éti vahi épenavanéimahi, ímahanumayare eta nucatuparahairahi aquenucanuya nuti Manerejirunuhi ema Viya —tacahepa eta máimituresirahi ema Jesús.

Emá Jesús, tihapamaichava eta máimahi

(Mt 17.1-8; Mr 9.2-8)

²⁸ Tiuri, te táequenepa eta óchoquenehi sache, tiyanapa ema Jesús, tiápanahi te anuquehe mari. Tiyujaracayarehi. Mapananarichusera ena mámaqueneanahi: ema Pedro, ema Jacobo, émapa ema Juan.

²⁹ Tacahe, eta mayujarasirahi ema Jesús énapa ena mámaqueneanahi, t́jahúchavapa t́tsivachavahi eta máimahi ema Jesús. Apaimahipa eta mamira étape eta mamuriha. Tétavícavapa eta tajapuvahi tajarasirahi tamutu eta máquehe.

³⁰ Tásiha, tiáramicareanavarepa tímerecavana ena apinana ajairana. Téchajiricavanaripa mayehe ema Jesús. Ema émana, émahi ema víyahaini Moisés. Ema apana, ema víyahaini profeta Elías.

³¹ Tétavícavapahivare tajarasirahi eta te natupihaiyahi. Náechajisihaipahi eta macatajivairayarehi máepenirayarehi ema Jesús tayehe eta avasare Jerusalén.

³² Tavarahaipaichanéni tímaca ema Pedro énapa ena apinana machamurianahi. Téhesera te náimahapa eta t́jararacahi te nachacaya, témitiacarinehi eta náechapuneana. Náimarracaripahi eta majaravahi ema Jesús, énapa ena apinana ajairana tiúcupauchanahi.

³³ Tacahe, te máimahapa ema Pedro eta nachavirayarepa ena nani apinana, témeñahavapa. Tásiha, macahepa:

—Tata Maestro, tétavícavapa táuricacareva eta víavíhairahi eta aní. Tiúripa nahipucaini vépiyacahini eta epenahuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías —máichapa.

Váhinéni máimatiequenehahini ema Pedro t́jahahipuca eta mavarahaquenehi macayema.

³⁴ Tacahe, eta máechajirisiravaichahahi, t́jahúchavapa tiúcupaicahi eta úcaji, tamuichavacapa ema Jesús énapa ena apinana ajairana.

³⁵ Tásiha, nasamarinehi eta mahu ema Viya, tayehe eta úcaji. Ánipa macahe: —Ema maca ema yátupiquenehi nuchicha némunarquenehi. Éma esuapayare —macahepa.

³⁶ Te tímatinapa eta mahu ema Viya nasamaquenehi, náimahapa ema Jesús, macarineipahi. Nájinaripa ena tiúcupauchanahi.

Tacahe, ena mapanana apóstoleana, tiyerehi eta namametasirahi ena apamuriana nachamuriana eta náimahaquenehi.

Emá Jesús macanaraca ema amaperu mávaháruhi ema éreana

(Mt 17.14-21; Mr 9.14-29)

³⁷ Te apanaquenepa sache, tiúcupaicanavarepa tayehe eta anuquehe mari návinehi. Natarihipavare ena camuriqueneana achaneana. Te náimahapa ema Jesús, tiyananapa nácapahi.

³⁸ Matiaríhihi ema émana achane te namuri ena camuriqueneana achaneana. Tipiaracapa muraca éma, ánipa macahe:

—Tata maestro, picatajicanupaini pípuchinanuini ema maca nuchicha. Émanaracavahi te numirahu.

³⁹ Mávaháruhi ema éreana. Macapiararerecahi técharipaicavavare ticarisa-sajacavare. Ichapemuri eta macatajivaira máicha. Vahi mávaraha máinjaiaca.

⁴⁰ Néchajiacaripahinéni ena pímitureana. Váhisera náratamahini nacuchuca ema éreana tiávahácahi ema nuchichasami —máichapa ema achane.

⁴¹ Tásiha ema Jesús majicapapa:

—¡Tétavicava emasuapajiraivavaca eti achaneana! ¡Cúverarecaichapucaini eta nucamichirahenahini! Piama ani ema pichicha.

⁴² Témeñahavainipa ema amaperu, tápechavarepa tacañamacahi tiáquipai-cavapa, técharipaicavaipavare. Émasera ema Jesús, máquijicapa ema éreana, muracapavare eta macajachirahi. Tásiha, máijaracapa ema maiya, tinara-caipahi.

⁴³ Náramirinehi ena achaneana taicha eta tamutuirahi marataha ema Viya, máitupajijiasiravahi.

Tiápechavavare ema Jesús tímereuchava máepenirayarehi
(Mt 17.22-23; Mr 9.30-32)

Nanasirichahahi napanerequenehahi ena achaneana eta juca náimaha-quenehi. Ema Jesús mápechavare mametacavaca ena máimitureana. Ánipa macahehi:

⁴⁴ —Ecaquiña yátupina eta juca numetaruheya. Váhivare ecuemitisica. Núti Manerejirunuhi ema Viya, járajapainapa eta sáchezare tjararecanuyare mácani achane nayehe ena ticatianacuanahini. Ticaratacuanayareva — máichavacapa.

⁴⁵ Énasera ena máimitureana váhiquene nácaicutiarahini eta macayemaque-
neanahi. Taicha émarichuhi ema Viya tjaracahi eta vuíchaha nácaicutia-
raimahi. Váhivare napatsicavahini nayaserecahini tájahapuca tacayemahi eta máichiravacahi.

¿Nájahapuca ema apóstole ticapicahupana?
(Mt 18.1-5; Mr 9.33-37)

⁴⁶ Te táequenepa eta juca, ena apóstoleana ticapinarujiricacanapa nájaha-
hipuca ema ticapicahupana.

⁴⁷ Émasera ema Jesús máimatiacavacapa eta náechajiriruvanahi. Máichuhapa
ema émana amaperuchicha, macatupihapa te namirahu.

⁴⁸ Tásiha, máichavacapa ena apóstoleana:

—Nácani tijacapanayare ena amaperuana níchavenéinahi núti, ena nani
yátupi náimerecayare eta náemunasiranuhi núti taicha tímicitijiricavahi
nútinahini najacapa. Taicha nácani tijacapanuanahi núti, énerichuvare
tacahehi eta najacapirahi ema Ticachichanu, ema tivanecanuhi. Nácani
náechapajiricayare namutu ena nachamuriana, náemunasiravacahivare,
énahi ena ticapicahupananayare te etaracu —macahepa.

Nácani vahi ticatianacahaviana, éna tímicitacahaviana
(Mr 9.38-40)

⁴⁹ Tacahe ema Juan mametacapa, máichapa:

—Tata Maestro, vímahahi ema émana achane máquijicavacahi ena éreanana
te píjare ticutirinehi pítinahini píjaracahini eta máitupajijiasiravahi. Tásihasera,
vicavacahi éma, taicha vahi viúmuvainahini —máichapa.

⁵⁰ Émasera ema Jesús máichapa:

—Vahi ecucavaca éma. Taicha nácani vahi ticitianacahavianahi, éna tímica-tacahaviana —macahepa.

Éma Jesús macajachavaca éma Jacobo émapa éma Juan

⁵¹ Te jena sácheanahi tiánenehipaipa títecapa eta mayanirayarehi éma Jesús te anuma. Tásiha, tjaracavaichaha eta mayaniranumayare te Jerusalén.

⁵² Macavanairipipa tiyanana éna títapumirauchanayarepahi. Titanuca-nayarehi eta máitecapihayare tayehe eta jácani avasare.

⁵³ Énasea éna samaritanoana vahi návarahahini najacapa taicha náimahahi éna eta matupiruirapahi te Jerusalén.

⁵⁴ Tacahe, éna apinana apóstoleana, éma Jacobo émapa éma Juan, tisema-majuheanapa eta namajacapirahi éma Jesús. Tacahe, náichapa éma:

—Tata Viáquenu, ¿pivarahapuca viyasesereca táemirica eta yucu tísiha te anuma? Étaina táitapaimuriha éna náenatajiana, tácuti eta máichaquenehi éma profetai Eliás —náichapa.

⁵⁵ Tacahe, éma Jesús máimarracapa éna. Tásiha, macajachavacapa, máichapa:

—¿Tájaha tacayema vahi tétupicava eta epanereruana? Ticutipa vahi mávaháruhénahi éma Espíritu Santo.

⁵⁶ Vahi étaina tímitecanu nícuñacavacayare éna achaneana, nuti Manereji-runuhi éma Viya. Tímitecanuhi nucuchucuhavacayare éna —máichavacapa.

Tásiha, tiánucuhanapa te apachacaya te apanahivare avasare.

Vínajicayare tamutu, te vivaraha véhica éma Jesús (Mt 8.19-22)

⁵⁷ Éta napaisirapahi te achene éma Jesús énapa éna máimitureana, nacain-unapa éma émana achane, mavarahapa máehica. Ánipa macahehi:

—Tata, núti apanavare nuvaraha néhicavi te jácani pivarahaqueneyare piámianu.

⁵⁸ Éma Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútisera núti Manerejirunuhi éma Viya, tájina nuviya nusiapi-hahini —máichapa.

⁵⁹ Te apanavarepa sache, máichuhapa éma Jesús éma apana máimiture apóstoleyare. Tásiha, éma majicapapa:

—Tata, nuyaseacavi písapanuhipucaiini nuchava te nupena. Nucuchapanumayarehini eta máepeniraya éma ticachichanu, nécaranumaya. Tásiha, nucapayacavipa néhicaviya —macahepa.

⁶⁰ Éma Jesús majicapapa:

—Pésamirica náecaracacaichaha éna máecharaireana. Tájina tájjaracavimahi eta juca tihapasamurercavihi. Yare, péhicanu. Níjaracaviyare eta pémataneyare. Picametarairuyare eta máechajiriruvana éma Viya —máichapa.

⁶¹ Matiarhivare éma apana énerichuvare macahehi:

—Tata náquenu, núti nuvaraha néhicavi. Písapanusera nucametavapananumaya te nupena —macahepa.

⁶² Éma Jesús majicapavare:

—Mácani achane tipaicapahi téyarecapahi vahi tichavaequenehavaimahi mámarairichahini eta mámaquene. Ene picahehare piti, vahi pichavaequenehavaimahi tayehe eta tájiparacana. Taicha vahi nuvaraha mácani títajicavahi eta macametarairuira eta máechajiriruvana éma Viya —máichapa.

10

Ena Jesús mavanecavaca ena setentaqueneana, tímítirecanayare

¹ Te táequenepa eta júcana, emá Viáquenu Jesucristo manerejicavarepa ena setentaqueneana apamuriana máimitureanahivare. Tiyananapa ticametarairuanayarehi te avasareana mapaisineanapahi éma. Apinavacavahi eta napaisirayare éna.

² Máichapa eta matuparasiravacahi:

—Tétavacavapa eta vicamunuirava ena tímicitacahavianaya tayehe eta juca vématanerepihi. Eyaseacayaresera emá Tata Vicaiyaquene máijaracahavi ena námicatacahavi. Eta juca tímicitijiricavahi mácani achane eta macamunuiravahi ena tímicitacana eta máechatijisiraya eta maharusura.

³ Puiti, névatacaheyare eyana epaica. Nararihisera ena achaneana váinarajiqueneanahi étupiaruanayare. Éna nacutihi eta sárare táíñehiqueneanahi. Étisera ecutiyaehi eta uvesachicha eta tamansuvahi.

⁴ Eta epaisirayare, tájina íamaimahi eta tarera, váhivare íamaimahi eta billetera. Váhivare íamaimahi eta eparupeva. Eyaiyachavayarepahisera eta epaisirayarepahi te achene.

⁵ Te jácani peti ítecapihayarepahi, ani tacaheyare eta échajisirayare ena achaneana: “Éma Viya, tíurichaheyare éti te juca peti”.

⁶ Nararihiyare ena achaneana navarahaya eta náurivaya mayehe emá Viya. Eta échajisiravacayare, tatupiruvaya me Viya máijaraca eta náurivaya. Téhesera vahi nacubaraha najacapahe, vahi ecucañaamacava nayehe, taicha énapa téchinavana.

⁷⁻⁸ Te jácani avasare, jácani peti eta najacapiahepuca, enasipanayare tayehe eta peti ítecapihahi. Vahi ecuepuru jácani tinicacareana náeniruheanayare. Étaripa jácani náesiruheanayare. Éti, táitsivayare eta ecaemataneasiranuyarepahi. Váhivare ecupamirahapahi ímacacuhapahi eta pétiana.

⁹ Ecanaracayarepahi ena nacajumaqueneana natiarihiqueneanahi. Tásiha, emetacavacapaipa námutu ena achaneana eta núcupaisiraripa nuti Cristo, nútirichuhi emá nacuchapaquenehi. Nucuchuhavacayare namutu ena téneuchavana, ticasíñavanavare eta nuyehe nuti Mavanerunuhi emá Viya.

¹⁰ Téhesera nacuija nacujachapahe te jácani avasare ítecapihayarepahi, íuchucavanepa te calle.

¹¹ Ánipa ácahe: “Vétatapevachavahi eta juca tavaparu támaquenehi eta vívape. Eta juca táicutiarahi eta máicuñasiraheyare emá Viya taicha eta emavarairahi ejacapahavihini. Vivarahasera vimetacahe eta máucupaisiraripa emá Cristo, émarichuhi emá vicuchapaquenehi, emá Mavaneruhi emá Viya. Macuchucahehini éti, te éneuchavahini, ácasíñavahini mayehe” íchavacayare éna.

¹² Jéhesare, te táitecapapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanaini te avasaréni Sodoma —máichavacapa emá Jesús.

Ena táicuñayare eta návasana ena achaneana masuapajirairahana (Mt 11.20-24)

¹³ Tacahe, emá Jesús máechajicahi ena apamuriana achaneana, tímicutijiricavahi natiarihinahini te mamirahu. Ánipa macahe:

—¡Páurehesami eti nujaneanana ecavasanahi te avasare Corazín étipa eti ecavasanahi te avasare Betsaida! Ichape eta ícuñayare taicha eti ímaharipa tamutu eta tíáramicareana níchaqueneanahi te emirahu, váhisera ávarahahini éneuchavahini. Ena nani achaneana ticavasanahi te Siria, apavasanána-hinéni, tétavicavahinéni eta namaurivahi, németecasera núti téneuchavananavanehini eta náimairahi eta níchaqueneanapahi. Enévanénahini náimerecavahíni yátupi eta náneuchiravainahíni.

¹⁴ Tásiha puiti, muracapanayare eta ícuñayare éti, taicha eta emavarairahi éneuchava. Tacachuricayare eta nacaicuñairaya ena achaneana apavasanana ticavasanahi te Siria.

¹⁵ Étiripa eti ecavasanahi te avasare Capernaúm, tamapuruji eta nímitu-sirahehi étapa eta ímairahi eta tíáramicareana níchaqueneanapahi. Eti ecasiñavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épujuquichavayare eta te yucu taicha vahi éneuchavaimahi éti —macahepa.

¹⁶ Tacahe, tíápechavavare máimitucavaca ema Jesús ena máimitureana, ánipa macahe:

—Nácani tisuapaheanayare, ticaecheranahi eta nasuapiranuyareva núti. Énasera nácani tépuruheanayarepahi, ticaecheranayareva eta náepuruiranuhi núti. Ene tacahehi eta náepuruiravare ema Tata tivanecanuhi —máichavacapa ena máimitureanahi eta napaisirayare.

Tichavanapa ena setentaqueneana vanairucanahi

¹⁷ Tacahe, tichavanapa ena setentaqueneana. Tiúrisamurereacavanapaipa eta náitecapirahi. Ánipa nacahe:

—Tata Viáquenu. Vítauchaipa eta pivanairipi. Viratahahivare viáquijicavaca ena éreanana taicha eta vipiarasirahi eta píjare —nacahepa.

¹⁸ Ema Jesús majicapavacapa:

—Tájinarinehi matumevaimahini ema Satanás eta viáquijisirapahi ena majupahana. Taicha ema Espíritu Santo tímechanuhi eta nunecapirahi eta máquipaisiravahi ema Satanás, tacutihi eta térameca eta tájahúchiravahi eta macaquiirahi te anuma.

¹⁹ Táitaurevaquene núti, ichape eta nujaneasirahehi. Tayanapanepuca íacatayaca eta quichare, alacránpuca, tájinasera táicharachémahi. Eta juca ítupajijiasiravaya níjararuhehi, tacachuriaca eta máitupajijiasiravahi ema Váinaraji Satanás, énapa ena majupahanahi.

²⁰ Váhisera ecucasínavavaica eta eratahairahi íáquijica ena éreanana. Iúrisamurereacavasera eta táejasiraipa te anuma eta elistana.

Ema Jesús tiúrisamuréinehi mayehe ema Maiya (Mt 11.25-27; 13.16-17)

²¹ Tacahe, enévanehinehi táitecapauchahi ema Jesús eta máurisamurevahi maicha ema Espíritu Santo. Tásiha, macahepa:

—Tata Nucaiyaquene, tétavicava eta nucunachiravi. Jéhevare píti táquenuvivi eta anuma étapa te juca apaquehe. Títauchavaipa eta pipanereruhi. Vahi písapahini náitucahíni eta júcana ena achaneana tímijachavanahi téchemarahiana. Énapasera píjaracahi ena nani téhicanuanahi, tájinhinéni náechemaraivainahíni. Puiti nasapiharipahi nacachuricahi ena títupajijiacavanahi. Tétávicavahi eta táurivahi eta pipanereruhi, piti Tata Nucaiyaquene.

²² Tacahe, ema Jesús máichavacapa ena achaneana:

—Ema Tata Nucaiyaquene, ema tjaracanuhi eta nítiraya néchaya tamutu. Nájina náratahaimahi énajivainahini náimatihini ema Tata. Nucarichu nuti néchinavahi ena níminatiruanayare éma. Taicha nútí yátupihí eta nímatirahí ema Tata Nucaiyaquene; tacutiquenehi eta yátupirahivare eta máimati-ranuhi éma —macahepa.

²³ Tacahe, mañajichamuripa ena máimitureana, máichavacapa:

—Tétavicavahi eta iúricareva éti taicha tjaracahehi ema Viya eta juca ímairahí puiti eta níchaqueneanahí.

²⁴ Jéhesare, numetacahe: Acane ichapemuriana ena víyarahánaini profeta ena ena réyeánaini, tétavicavahi eta navarairahí tímatinuana, navarairahivare náimaha eta juca níchaqueneanahí ímahaqueneanahí. Navarairahivare nasama eta nímituresirahí. Váipasera nacapayacahini —máichavacapa.

Ema Jesús máimicuticha, máechajisihahi ema achane máuriquenehi, samarítánohi. Tijapanurahí mayehe ema émana achane macajaraquenehi, tayanapanave vahi émainahini majaneanainahini.

²⁵ Matiaríhíhi ema achane, maestro tayehe eta mavanairipiana ema víyarahánaini Moisés. Tiyanapa matanucahi ema Jesús, téchajiricavayarehi eta mayehe. Mavarahahí macaicutiarayare. Máichapa:

—Tata maestro, ¿tájahapucaini nícharacavaini eta níurusirayare eta núchucuirayare te apana vítaesira? —macahepa.

²⁶ Ema Jesús majicapapa:

—¿Tájahasica tacayemahi eta táechajiriruvahi eta Sagrada Escritura? ¿Tájaha tacayemahi eta pisamirahí eta péchajicuirahí? —macahepa.

²⁷ Tásiha, ema maestro majicapapa:

—Ani tacahehi eta néchejicuirahí: “Macarichu ema Viya pémunacayare te pisamure. Macarichuvare éma piáchanevaqueneya. Píjaracayare tamutu eta pitumeva eta picaemataneasirayare. Éma pipanerechayare tamutu sácheana. Pémunacayareva ema piparaepiyahí tácuti eta pémunasiravahí píti”.

²⁸ Ema Jesús majicapapa:

—Tétupicava eta juca píjicapiranuhi. Te pítaucha eta juca, piúchuchuyare.

²⁹ Émasera ema maestro vahi mavarahahini apaquehereruinahini. Máichapa:

—¿Nájahasica ema nuparaepiyahí? —macahepa.

³⁰ Ema Jesús máichavarepa:

—Nímicutichinaviyare eta juca. Matiaríhí ema émana achane. Tipacahi te achene, másiha te Jerusalén. Tiyanayarehi te Jericó. Eta mapaisirapahi te achene, náuchujiuchapa ena tíámerahiana. Náepuchiricanumapa. Tiánehi nacapacayaréni. Námeychapa eta mámaqueneanapahi étape eta mamuiríha.

³¹ Tásiha, macahepaipa ema émana tiyujaracarahí. Máimahapa ema achane te apaquehe te achenechacaya. Váhisera májapanuhini máichejiuchahini. Máetávicaichucha.

³² Tásiha, macahepaipavare ema apana achane. Éma, téchapajiricahi eta Templo. Énerichuvare te máimahapa, máetávicaichuchavare.

³³ Tacahe, macahepaipavare ema apana achane. Éma, indigenahi samaritano. Éma, te máimahapa ema macajaraquenehi, majapanurinehi.

³⁴ Tíchecanumapa éma, témeñahavapa. Máipuchapa te aceite étape eta alcohol eta majarana. Máepacuchavacapa te amaratataji. Tásiha, manaracuhapa

manacaquechapa eta te maperapahi cavayu. Mámapa eta te máitecapiharehi. Máipupuaracaipahi.

³⁵ Te apanapa sache, tiyanayarepa ema samaritano. Tivecuacavapa a pipe eta maplatane. Mavachachapa ema ticapenahi eta peti. Tásiha, máichapa: “Picatajicanu. Péchapajirisinánu ema maca achane. Te tatiarihinapuca eta macamunuirava, píjarasinánuya. Nímahavirine nuvachachavi te nuchava” máichapa.

³⁶ Tiuri puiti, nuyaserecaviyare píti. ¿Nájahapuca ena nani mapanaqueneana ema témunacahi ema maparaepiya najararuquenehi ena tiámerahiana? —máichapa ema Jesús.

³⁷ Ema maestro majicapapa:

—Ema témunacahi ema maparaepiya, ema tijapanuhi —macahepa.

Ema Jesús máichapa:

—Pímahaipajira, ene picaheyare piti apanava. Pijapanurahiyare —máichapa.

Ema Jesús máejirapanavaca te napena esu Marta ésupa esu María

³⁸⁻³⁹ Tímiyanavavarepa eta mapaisirahi ema Jesús. Máitecapachapa eta avasarechicha suávava esu ésuna esena ticaijaruhi Marta, ésupa esu suparape ticaijaruhi María. Mayanauchapa te supena esu Marta. Tétávicavahisera eta táurivahi eta najacapirahi éna. Tacahe, esu María téjácapa te máivapechacaya ema Jesús. Susamararacaripa eta máimiturapiána éma.

⁴⁰ Ésusera esu Marta tahapapiricaichucha eta sucaparujirahi, taicha eta suénisirayare ema Jesús. Tacahe, esu Marta tisemamajucheripa eta suímairahi esu suparape suéjarasirahi. Tacahe, suíchapa ema Jesús:

—Tata Náquenu, picatajicanupa. Pivanesianu esu suca nuparape súimicatanuichu apaesaina tayehe eta ematanecana —suíchapa.

⁴¹ Tásiha, ema Jesús majicapapa:

—Páurevisami piti Marta, tétavicavapa tahapapirisiravi eta pématanepiana.

⁴² Tituparacavi pínajica eta tihapapiricavihi. Picaravahu eta máechajiriruva ema Viya. Esu suca piparape María tétupicavahi eta supanereru. Suvarahahi suítucayare. Eta tacahe, tisamararacanuhi. Nájina tiverejicaimahi eta suvarahaquenehi suítuca —máichapa.

11

Ema Jesús tímitucavahi eta viyujarasiraya

(Mt 6.9-15; 7.7-11)

¹ Tacahe, te jácani apanapa sache, ema Jesús mávihahi eta te mayujarasirarehi. Te titayujarápa, témeñahavapa ema émana máimiture, máichapa:

—Tata Viáquenu, pímitucavahi eta viyujarasirayare víti apanavare, tácuti eta máimitusiravacahi ema Juan ena máimitureanahi —macahepa.

² Tásiha, ema Jesús máimitucavacapa:

—Ani tacaheyare eta eyujarauchiravaina: Tata Vicaiyaquene, piti piávihahi te anuma, vipicauchahi yátupi eta píjare. Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapiravihi ena ángeleana te anuma.

³ Pájapanuhavi píjaracahavi puiti juca sache eta vicamunuqueneana vinicaqueneripiana.

⁴ Pájapanuhavivare piperdonachahavi eta viviurevana piyehe. Víti apanava viperdonachavacaripa namutu ena ticaviurevanahi viyehe. Vahi picuisapahavi vicha eta tamauriquene. Picatiuchahavi mayehe ema Váinaraji. Tacaheya eta eyujarauchiravaina.

⁵ Máichavare ema Jesús:

—Tiuri, nímicutichinaheya puiti. Matiaríhi ema émana achane. Tacahe, máitecapauchahi ema apana achane máitunacasarehi te enumuhu yati. Vi-ajéropahi éma. Émasera ema avasarecuruhahi, tájina maviya eta máenicahini. Tásiha, mayana mayehe ema apana máitunacasarehivare. Máichainapapuca: “Picatajicanu, nucapucavi mapanaina pan.

⁶ Taicha titecapauchanuhi ema nífunacasare viajéropahi. Tájinasera nuviya nucumpirachahini”.

⁷ Tacahe, ema macaijuhequenehi váhipuca macujapanuhi, macahénapapuca: “Vahi picujarareca eta néchapune. Pésamirisinanuvare eta tapaja tacaerataquenehi. Tímacanahivare ena nuchichanaveana. Vahi nítujicava néchepuca níjaracavihini eta pivarahaquenehi” macahenapapuca.

⁸ Máitunacasarequenénihipuca éma, váhisera máipurajihini máechepuchahini máijarachahini eta mayasesereruhi. Téhesera te tímijanavapuca mapiararaca ema ticamunuvahi, németeaca tipamicavayarehi téchepuca, máijaracayarehi eta macamunuquenepahi.

⁹⁻¹⁰ Eta tacahe, numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tíjapanurahi. Tisamaheyare, tíjaracahyareva. Vahi ecuyacuji eta eyaseasiraina. Téhevere tatiaríhinapapuca eta jácani íchiraya ichapehi eta tacajeravaya, eyaseacayare máijaracahehini eta ítupaijijasiravaya. Éma, tíjaracahyare. Te jararihipuca eta táichejimiráuchahe, éma macaevuisihainahyare.

¹¹ Eta juca tímicutijiricavahi te natiaríhipuca ena echichanaveanahi éti, te tiyaseacaheanapuca eta pan nanicayare, váiparinehi táuricaímahi íjaracahini éti eta márijahi, tímicutijiricavaipa ecavijaruhini ena echichanaveana. Étaripa te tiyaseacaheanapuca eta jima, váhivare táuricaímahi íjaracahini eta quíchare.

¹² Étaripa te tiyaseacaheanapuca eta varayuha, váhivare táuricaímahi íjaracahini eta sáse.

¹³ Étiaríhi éti vahi ecajirahihini nayehe ena achaneana. Íuríhisera nayehe ena echichanaveana. Ítucahi íjaracavaca jácani nayasearuheanahi táuriqueneana. Mavetiji ema Tata Ecaiyaquene tiávíhahi te anuma. Éma, vahi ticavijaruheimahi eta te eyaseserepiana. Tíjaracahyarehi tamutu eta eyasearuana, émaripa ema Espíritu Santo tiávahácahyarehi —macahepa ema Jesús.

Ena achaneana téjcapavanahi eta náimijachirahi ema Jesús mávaháruhi ema Váinaraji Satanás

(Mt 12.22-30; Mr 3.19-27)

¹⁴ Te apanaquenepa sache, ema Jesús macanaracahi ema achane, úpainíhi eta máitaresira taicha eta mávahásirahi ema éreana. Tacahe, eta máuchusirapa ema éreana te máquehe ema úpainíhi, tiúripa téchajica. Ichaperínehi nárami ena achaneana.

¹⁵ Natiaríhíhisera ena apamuriana achaneana, ánipa nacahehi:

—Ema maca Jesús, vémeteaca majupahahi ema Satanás, ema náquenu-murihi ena éreanana. Máijararuihí jácani eta máitupajijiasiravahi eta macuchusiravacahi éna —nacahepa.

¹⁶ Nararihihivare ena apamuriana achaneana váhivare nasuapapajicahini ema Jesús. Eta tacahe, navarahapa nacaicutiarayarehi, nayaseacapa macuchucachini eta tíamicare, máimereuchayare eta émairahi Cristo mavaneruhi ema Viya. Váhisera nasuapayarehini.

¹⁷ Émasera máimatihí eta napanereruana eta namasuapirahi. Máichavacapa: —Nímicutichinahe puiti ena machanerana ema gobierno. Éna, vahi típutsimurihacacanaímahi apinainahipucaini partido. Te típutsimuriacacana, énajicacaipapucaini tíáquipaicacana. Émaripa mácani achane te camurianahi ena machichanaveana, váiparinehivare típutsimuriavanaimahi náehajiricacahini, énajicacahini náquipaicacahini.

¹⁸ Ene macahehi ema Váinarají Satanás, váiparinehi máisapahini típutsicacana ena machamuriana, taícha mavarahahi tisimutuanayarehi éna, tímiyanavayarehi eta nacaetemajirisirahaviyarehi. Éti ímijachaipa nútirichuhi machamuri ema Satanás, táichavenehi eta nuratahairahi nucuchucavaca ena éreanana.

¹⁹ Tájina vahi étupicavahini éti eta juca epanereruana. Te émahipuca tímicitacanuhi ema Satanás, énerichuhivare éti máimicataruanahivare jácani éma, eta ecuchusiravaca ena éreanana. Epanerechinávanuma.

²⁰ Émaquenehisera ema Viya, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare necha tamutu. Nútiripara nuti ecuchapaquenehi.

²¹ Tacutiquene mácani achane tume. Te macaratacahi eta mataquiriqui eta majaneasirahi jácani macayehequeneana, nájina tíámeyechaimahi.

²² Téhesera macahepaipa mácani achane túmepanahi mayehe, mavereji-cayare eta mataquiriquini macasiñaquenehi. Máitiacavane. Tásiha, émapa técha tamutu eta majanearuinihi ema achane. Ene nucahehi nútí, túmepan-anuhi mayehe ema maca Satanás.

²³ Te vahi ecuehicanu, ecucaemataneacanu, éta tímereuchaheya machamurihehi éti ema ticatianacanuhi. Masapiha ímicatacahi éma eta macaetemajirisiranuhi.

Éma Jesús máimicutichinahi ena masuapajirairahanahi mayehe (Mt 12.43-45)

²⁴ Tímiyanava eta máechajirisiravahi ema Jesús, ánipa macahe:

—Énerichuvare éti ecuti mácani achane máinajiruhi ema émana éreana. Éma éreana tiyanainapa matanucainapa eta jácani masiapihayarehi. Eta mamaichimavira eta mavarahaquene, mapanerechayarehi tíchava. Macahénapapuca: “Nuyanayare nuchava, nusiapahacayareva ema návaháruinihi”.

²⁵ Te títecapapa ema éreana mayehe ema achane mávaháruinihi, máimahapa ema achane máinajicaripa tamutu eta mapecaturana, vuíchahasera máehicahini ema Viya.

²⁶ Tásiha, tíúrisamurepa ema éreana. Tásiha, tíchuarecapa ena sítequeneana machamuriana. Váinarajipanána éna. Nasiapahacainavarepa namutu éna. Jéhesare, tíápajucavapa eta mavainarajiva ema paure achane —máichavacapa ema Jesús.

Viúriyare te visuapa eta máechajiriruva ema Viya

²⁷ Mapaenumavahi títapirica ema Jesús eta juca máechajiriruvanahi, tipiaracapa esu ésuna esena te namuri ena achaneana. Ánipa sucahehi:

—¡Tétavicavapa eta sucunachacarevahi esu pena, táichavenehi eta suínasiravihi, suájisiravihi eta sucajurusiravihi! —sucahepa.

²⁸ Ema Jesús majicapapa:

—¡Tiápajucavayaresera eta nacunachacarevayarehi namutu ena tisamayare eta máechajiriruvanahi ema Viya, yátupiyarehi eta nasuapirayareva! —máichapa.

Ema Jesús macajachavaca eta namasuapajiraivahi ena achaneana
(Mt 12.38-42; Mr 8.12)

²⁹ Tacahe, títecaparacanapaichucha te machacaya ema Jesús ena camuriqueneana achaneana. Tásiha, eta máimitusiravacahi, máichavacapa:

—Nararihi ena achaneana puiti juca náetaviuchahi eta navainarajivana taicha vahi návarahahini nasuapa eta yátupirahi mavanerunuhi ema Viya. Tiyaseacananahi nímechayarehi eta tíáramicare táicutiarahi eta mavanesisiranuhi ema Viya. Váhisera nímechaimahi. Tacarichu náimahayare eta níchararacavaya tacuti eta máichararacavahi ema profetaini Jonás.

³⁰ Ema profetaini Jonás yátupihí ecutiararehi éma eta mavanesisirahi ema Viya nayehe ena achaneana ticvasanahi te avasare Nínive. Ene nucahehi nuti Manerejirunuhi ema Viya, ecutiararenuhi puiti eyehe eti achaneana.

³¹ Tacutiquene, esu reina Seba eta acane, te susamairiricapa eta máitupajijiasiravahi yátupi ema Salomón. Ésu, tayerehiquenehineni eta suávaca, tiyanahisera sucapayaca ema Salomón taicha suvarahahi susamayarehi éma. Tacahe, te táitecapapa eta sáchezare téchepucanaya namutu, suyaseacainapa ésu eta nacaicuñahini ena nani máetupicushmanahi puiti. Sucáhénapapuca: “Táuricapa nacaicuñahini ena nani máetupicushmana, tájinapa náetseraruina nasamaripa ema Cristo, ema títipajijiápanavahi mayehe ema Salomón, tásiha vuúchahacaruva nasuapa” sucahénapa jácani.

³² Tacutiquene ena achaneana ticvasanahi acane te Nínive. Tisipecaturarahiana éna. Natupiruvahisera nasuapa eta mametarairu ema Jonás. Téneuchavavaneanahi. Tásiha, nacahénapapuca te jena sáchezare: “Táuricapa nacaicuñahini ena nani maparajuruana ema Cristo, taviuchahi eta namasupirahi éma. Taicha éma máuriquenepanahi mayehe ema Jonás” nacahénapa. Eta máimiturapiana ema Jesús, tamicaahu eta vítaresira

(Mt 5.15; 6.22-23)

³³ Tímiyanava eta máechajirisirava ema Jesús, ánipa macahe:

—Súnसानahi nácani tiyustacanahi eta lámpara namicahuyarehi, tásihasera nanacapapucaini te jácani tayumurevahi cuarto, najihapaicapucaini te cajune. Tacamunuhi nanacayarehi te anuquehe. Jéhesare, tamicauchasarepa tamutu apaesa tímairiricanapaipa nácani tisiapanapahi.

³⁴ Ene ecahehi éti, eta esuapirahi eta nímiturapiana, tétavicavahi eta tamicauchiraya eta iáchanevana. Tímijunijicayare eta emaurivahi. Téhesera vahi esuapahini, tétavicavahi eta tamapicuvahi eta iáchanevana. Tanasipa tamutu eta tamaurivahi.

³⁵ Eta tacahe, machu ecainajiruva tayehe eta juca esamaqueneanahi ímahaqueneanahivare, machu tayanariana te timapicu eta iáchanevana.

³⁶ Téhesera yátupina esuapa eta nímiturapiana, tétavicavaya eta tamicauchi-raheya tayehe eta ítaresiranahi. Tásiha, vahi eyaseacanuimahi nímechahe eta tíaramicareana —macahepa.

Ena Jesús máimereuchavaca eta nájecapiravana ena fariséoana énapa ena es-cribánoana

(Mt 23.1-36; Mr 12.38-40; Lc 20.45-47)

³⁷ Tacahe, te útápiricapa ema Jesús eta máechajisirahi, témeñhavapa ema émana fariseo. Macumpirachapa tinipanayarehi te mapena. Masuapahisera ema Jesús. Tiyanapa te mapena ema fariseo. Te tíúripa eta tinicacare, téjacapa ema Jesús te mesa.

³⁸ (Tiuri, ena fariséoana, jucarihi eta nayeherepi te tinicanayare, tayanapanehipuca tipachivahunani, ticasipavahunumanayarehisera. Eta juca nasipavaurusiravahi, namavarairahi náechipejicahini eta náchanevana.) Émasera Jesús, vahi masipavaurucavanumahini. Tacahe, máraminehi ichape ema maca fariseo eta mamaitauchirahi eta nayeherepianahi éna.

³⁹ Émasera ema Viáquenu Jesús máichapa:

—Eti fariséoana, eta eyeherepiana, ecaeñamaracavahi esipacanuma eta enisirareana étapa eta érirareana, emavarairahi táetseraruinahini tasiapahini eta pecatu te íáquehe. Étisera íápajupanavahi eta tachipejivahi eta íáchanevana táichavene eta evainarajivana, étapa eta tavayuasirahehi eta ejamurachirahi tamutu.

⁴⁰ ¡Tétavicavasamihi eta tamuracavahi eta esamureana! Ema Viya vahi tácarichu máimaha eta te íáquehe eta tíávihahi te ínahu. Énerichuvare máimahahi eta tíávihanahi te amahe esamureana. Éma yátupihí eta máimatirahehi.

⁴¹ Tatuparacahi eJapanurahiya nayehe ena ticamunuvanahi. Tátupiruva te esamureana te échajiricava apaesa tacuijasarepa tachipejivaina eta íáchanevana.

⁴² ¡Páurehesami eti fariséoana! ¡Tétavicavahi eta tamuracavaya eta ícuñayare! Éti ímijachavahi yátupiquenehi eta religiósohérahí eta epamisirava eta ecamavahuirahi me Viya eta diésmuri tayehe tamutu eta évaraqui. Ecunachacarehi taicha éta. Váhiserá ecatiuchavacahini ena achaneana páureana macatiuchavarahana. Váhivare émunacahini ema Viya. Yátupi tituparacahehi eta ecamavahu eta diésmuri íámavahuana. Énerichuvare tituparacahehi eta eJapanuraivaya, yátupinavare eta émunasiraina ema Viya.

⁴³ ¡Jucarihivare eta apana tiviuchahehi eti fariséoana! ¡Tétavicava eta esínavavaisirahi! Emetapa evaraha tipicauchaheana, ticaejacaheana te táurinaquene siya eta te íúrujisirarevana. Evarahavare tipicauchaheana-yarehi eta náechajisiraheana te cálleana.

⁴⁴ ¡Jucarihivare eta apana tiviuchahehi eti escribánoana, étipa eti fariséoana, táichavenehi eta apimirairahehi! Ímijachavahi epicauchacarehiji. Étisera eta eyeherepiana, émejecapavacha ena achaneana eta náehisirahi ema Viya. Páureanasami éna. Váhi náimatiequenehahini eta nájecapiravahi táichavene eta evayuasirahi eta ecaetemairavacahi —máichavacapa ema Jesús.

⁴⁵ Matiarhivare ema émana maestro eta mavanairipiana ema Moisés. Máichavarepa:

—Tata maestro Jesús, eta piyunasiravaca ena fariséoana, tétavicavapa tayunasirahavihi víti apanavare viti máestroana. ¿Pivarahapuca vicaviurevahivareni víti? —máichapa.

⁴⁶ Tacahe, ema Jesús majicapapa:

—¡Eti apanavare eti máestroana, tétavicavahivare eta eviurevahi! ¿Tájaha tacayema epamicavacahi ena apamuriana achaneana eta júcana eyehe-repiana tacajeraqueneana? Nájinapa tiratahaimahi títaucha. Apanasica éti váhivare ítauchahini.

⁴⁷⁻⁴⁸ ¡Jucarihivare eta apana tiviucahehi eta tamuracavaya eta ícuñayare! Éti ecaijare apimirana, taicha ímijachavahi machanerahe ema Viya eta eyehehearasirahi eta náecariana ena profetanaini nacaparuanahi ena íáchucanaveanaini. Puiti étarichuhi tacahehi eta epanereruanahi eta evarairahi ecapacahavi viti mavanaranahi ema Viya taicha eta épuruirahi eta vímiturapianahi táuriqueneanahi.

⁴⁹ Ema Viya, acane tímatihēhi eta ecutirayarehi eta napanereru ena íáchucanaveanaini ticapacanahi ena profetanaini. Eta tacahehi eta máechajiriruvanahi: “Nuvanecayare ena profetana; tásiha, nuvanecayareva ena apóstoleana. Váhiquenesera nasuapaimahi ena tisamanayarehi eta náimiturapianaya ena nuvanarana. Napanajiricavacayarechucha ena nuvanaranahi. Natarihiyareva ena nacapacayarepahi” macahehi ema Viya.

⁵⁰⁻⁵¹ Eta tacahe, numetacahe núti: Eti nujaneanana israelítana etiari-hiqueneanahi puiti, ecaicuñayare, taicha timuriacahehi eta naviurevahi ena íáchucanaveanaini taicha eta nacapapajisiravacahi ena profetanaini. Acane te tépanavainapa eta apaquehe, ema Abel máinapuiruhi nacaparuihi. Máequeneruhi nacaparuihi ema maca Zacarías, ema nacaparuihi te tamirahu eta Templo. Camurianahisera ena náumurivanaini. Puiti étipa tamuriacahi eta ícuñayare naicha ena íáchucanaveanaini.

⁵² ¡Páurehesamichapucaini eti máestroana! ¡Camuriquenehi eta eviurevanahi! Tamapurujipa eta ímatiequenehairainihi eta yátupiqueneana títuca-cáreana, taicha vahi esuapaimahi, váhivare éhicaimahi. Éti tásihahi íchejimiráurucavacahi ena tivarahanahi tisuapanaya, náehicaya ema Viya — máichavacapa ema Jesús.

⁵³⁻⁵⁴ Tacahe, eta nasamirahi ema Jesús ena fariséoana énapa ena máestroana, tiseanmarinehi eta mayehe. Tépanavanavarepa náitsamarareca eta nayaseresirapahi, navarairahi nasama te máejecapavahipucaini eta macayemaqueneanapahi, navarairahi eta tiviuachayarehi éma.

12

*Ema Jesús vahi mávaraha apimirahávina
(Mt 10.26-31)*

¹ Tacahe, te jena sácheanahi, títeparacanaapaichucha ena camuriqueneana achaneana. Tiyututucavanapa. Énasera ena máimitureana ema Jesús návihahi te machacaya. Tásiha, máichavacapa namutu:

—Tímaticarehi eyehe eta levadura eta tasisijisirahi eta masa. Tacutirichu eta tapareasirahi eta apimirairanahi ena fariséoana. Échapavaicha éti, machu napareacahe éna.

²⁻³ Ema Viya tímaracahehi tamutu eta íchaqueneanahi, tayanapanenépica eyumurucavaqueneánapuca te timapicu. Tisamahehivare tamutu eta échajiriruvanahi. Tímatihēhivare tamutu eta epanereruana. Te jácani sácheyare ticaecherayare tamutu, tétavicavaya eta etsirihairaya taicha eta emaurivanahi —macahepa.

⁴ Étiripa eti némunacasareana, numetacahe: Vahi ecupica nácani nacapapuca eta iáquehe, tacarichusera náituruequenehayare.

⁵ Numetacaheva, macarichu ema Viya epicayare, taicha macarichu éma téchahi eta ítaresirana. Jéhevare, éma maratahahi macamitiequeneha eta íchanevana tayehe eta táíñehiquene yucu infierno, te ecainajiruva táichavenehi eta episirapuca eta nacapasiráhena. Jéhevare, éma epicayare.

⁶ Nímicutichinahe eta cáyurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta táitaresiranahi.

⁷ Evetijipa éti, éñamacarepanahi me Viya. Éma téchahehivare tamutu eta ítaresirana. Váiparinehi témitisicahémahi. Eta tacahe, vahi ecueñamava éti tayehe eta ítaresirana, taicha tétavicavahi eta emunavahi éti mayehe. Éma, máimatihí eta tatupa eta echutimacana. Vímereuchavayarehi eta véhisira ema Jesús

(Mt 10.32-33; 12.32; 10.19-20)

⁸ Numetacahe puití, nuti Manerejirunuhi ema Viya: Namutu ena tímereuchavanahi eta náehisiranuhi te namirahu ena achaneana, nútí apanavare nímereuchaya eta nuchanerairavacahí éna te namirahu ena ángeleana mayeaneanahi ema Tata.

⁹ Nácánisera vahi návarahahini náimereuchavahini eta náehisiranuhi, nútí apanava nímereuchaya eta vahi nuchanerainainahini éna te namirahu ena ángeleana mayeaneanahi ema Viya.

¹⁰ Namutu nácani ticaecahinuanahipuca nuti Manerejirunuhi ema Viya, tiperdonachacareana. Nácánisera nacaecahipuca ema Espíritu Santo, vahi tiperdonachacareanaimahi éna.

¹¹ Jararihiyare eta sácheanayare tiámaheanaya te namirahu ena nacapitarana eta te náurujisirarevana, énapapuca ena tuparairucana, énapapuca ena juéseana te jácani avasareana eta nayaseseresiraya. Váhisera ecueñamava tayehe eta jácani ecatiuchiravayare.

¹² Ema Espíritu Santo tímitucaheyare eta táurivayare eta ecayemayare te jena sache ecayaseserehinapa –macahepa.

Vahi táurica tahapasamurechahavi eta vímahaqueneanayare

¹³ Matiaríhi ema achane te namuri ena camuriqueneana achaneana. Máechajicapa ema Jesús. Máichapa:

–Tata maestro, pímicatacanu, pímetaca ema nuparape máijaracanu eta nuyehe parte eta nímaequeneruyare eta máimahaquenéni ema ticachichanuini –macahepa.

¹⁴ Ema Jesús majicapapa:

–Nuchicha, ¿tájaha tacayema pivaraha pinacanu juésnuyare eta eyehe? Vahi nútina néchaheyare tayehe eta máimahaqueneanaini ema ticachichahéni –máichapa.

¹⁵ Énerichu máichavacavare ena apamuriana achaneana:

–Échapavavare éti apanavare, machu émunahiricava, ejamurarahi tayehe eta tímahacareana. Taicha eta tímahacareana te juca apaquehe, vahi étaina ticaitarecaheyare. Vahi táéñamacarehini.

¹⁶ Tacahe, máimicutiarachinavare:

–Matiaríhi ema achane ricu. Ichape eta máesane. Tiúrina eta máevaru.

¹⁷ Tacahe, ema ricu mapanerechapa, ánipa tacahe eta mapanereru: “Ániquehepa eta juca névaru, tájinapa núnasiha. ¿Tájahapuca nícharacaya?

18 Tiúripanapuca nuvetataha eta núnavarahi nujanejuecha. Ichapepauainapa nicha eta táitsivaya. Tiúripanainapa, apaesa táirijica tamutu eta néchatijiru étapa eta apamuriana nucayehequeneana.

19 Tásiha, nucahénapa: Jéhevare puiti tétávicavapa eta núrivayare. Tájina níchiravaimahi. Ichapemurihi eta núnavar. Taratahaquene juca áñoanayare. Nucanaracavaya núti. Tamutu sache tiúriya eta nunisira, néraya. Ichape eta núrisamurevaya” macahepa ema ricu.

20 Tásihasera ema Viya máichapa ema achane: “Tétávicava eta pisunsuva, piti achane. Puiti jena yati pépenaya. Tájina vahi pítapanaimahi eta juca piúnaruhi”.

21 Ene nacahe ena achaneana ticurujiricana eta náimahaqueneana nayehéchiravarichu. Vahi nápanerechahini naicha eta táuriqueneana tacunachacarehini me Viya taicha tétávicavahi tahapasamurechirahi eta nacaimahaqueneraya.

*Ena Jesús títitucavahi eta majaneasirahavihi ema Viya
(Mt 6.25-34)*

22-24 Te apahequenepa, ema Jesús máichavacapa ena máimitureana:

—Étiserá, nuvaraha ácasíñava yátupina mayehe ema Viya. Vahi eucuañamaracavavaicha tayehe eta enicaquenerepi étapa eta emuiriharapi puiti juca itaresiraichaha. Eta enicaquenerepi étapa eta emuiriharapi, tájina táeñamavacarevaina. Ímararacarichuhi eta cáyureana. Vahi tacañamaracavahini tayehe eta tanicaquenerepi. Vahi táevacahini, váhivare táechatijirichahini, táunacahipucaini eta tanicaqueneyare. Émasera ema Viya máechapajirichahi májjarasirahi tamutu eta tanicaquenerepiana. Evetijipa éti, íápajupavahi eta éñamacarévahi me Viya tayehe eta cáyureana.

25 Vahi táuricahini eta ecañamaracavahini eta júcana. Eyehe éti, nájina naratahahini étijivainahini ecajurucavahini, tayanapane te tihapasamurechahehipuca.

26 Vahi étijivaimahi íturucava ecajurucavahini, váhivare táuricahini ecañamaracavahini tayehe eta júcana.

27 Ímararacarichuhi eta tajurusirahi eta flúreana, vahi tacañamaracavahini tacaematanehini, táijururecahipucaini. Táitsivahisera, te tépunehapa, tétávicavahi táurinavahi eta taflurene. Nájina nácuti eta nacamuirihaira eta táurinava, émaripa ema víyarahaini rey Salomón eta tajananusira eta macamuiriharahinihi.

28 Apanasica ema Viya májjaracahi eta táurinavahi, ánipirichuhinéni eta táitaresirahi. Evetijipa éti eta máechapajirisirahehi, májjarasiraheyarehi eta emuiriharapi eti achaneana. ¿Tájaha tacayema vahi ácasíñavahíni eta mayehe?

29 Eta tacahe, vahi eucuañamaracavaicha tayehe eta enicaquenerepiana étaripa te échuririapuca eta une érayare.

30 Ena apamuriana achaneana te juca apaquehe, ichapemurihi eta tacañamarasiravacahi eta júcana. Vahi nácasíñavahini mayehe ema Viya, nacuchapahipucaini eta májjararuyarehi éma. Étiserá, ecasíñavayarehi eta matiarahirahi ema Ecayaquene. Máimatihí éma tamutu eta ecamunuiravanahi.

31 Eta tacahe, tativayare íjaracava ecaemataneacaya ema Viya, ecasamureraya eta itauchirayare tamutu eta mavarahaqueneanahi. Máimaharinepa éma. Tíjaracaheyare tamutu eta ecamunuqueneana.

Te vicajirica eta vímahaqueneana, vijacapayare eta táitsivayare ánaqui te anuma (Mt 6.19-21)

32 Vahi ecupica, eti nuchichanaveana. Tayanapane vahi camurihénahini, eti máichuhaqueneanahi ema Ecaiyaquenehi. Éma téchahehi. Eta tacahe, tétavicavahi eta mavapinairavahi eta majacapirahehi, machaneraheya.

33 Tacahe, te ecaimahaquenepeca, íjararecayare eta ímahaqueneana. Íjaracayare nácani ticamunuvanahi. Tásiha, ema Viya máimahainepa, éma tíjaracaheyare eta táitsivayare ánaqui te anuma. Máitavacacainapa eta ecaimahaqueneraya. Tájinavarepa tévajaicavaimahi. Váhivare táeñamavacare ánaqui taicha nájinapa tiámeyechahemahi, váipavare cachusirimahi eta ímahaqueneanayare.

34 Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchiana te anuma, ánaqui evarahayare eyanavaneyare.

Yátupina eta vicuneuchiravaina

35 Éti, yátupina eta ecuchapiranuya eta nuchaviraya. Etsecavaya tamutu sácheana.

36 Ácutihi nácani achaneana músuana titsecavanahi te tapaja navejiejue-néraya ema náquenu eta machaviraipahi másihairahi mayehe ema arayenahi. Te máehahamecapa eta tapaja, enevaneyarepa éna navejiejuehahayare.

37-38 Tayanapane enumuhupuca yati, tíjararahipuca eta machavirayarehi ema náquenu. Tétavicavasera eta náuricacarevahi ena músuana eta machimahirahi ema náquenu eta nacuchahirahi, te vahi náimacaequenehahini. Nutupiruva numetacahe: Yátupinasarepa eta máurisamurevayare ema náquenu, macaejacavacainapa te mamesara, máenicavacainapa. Émajaruvainapa máechapajiricavacayare.

39 Nuvaraha ácaicutiaraqúenéna. Machu ácutiriana mácani achane námeyeruhi ena tiámerahiana. Tájina máechapiavahini tájahapuca hórayarehi eta náitecapauchiraya te mapena. Te máechahipucaini, ticuneuchavaipahini éma, váipasare nacuameyechahini.

40 Eta tacahe, éti écaunechavayare tamutu sácheana, taicha vahi échaimahi tájamuhuyarepuca eta nuchavirayare nuti Manerejirunuhi ema Viya, machu íarameca —macahepa.

Nararihi ena músuana tiúriana. Nararihivare ena músuana máurirahana (Mt 24.45-51)

41 Tacahe, ema Pedro mayaserecapa. Ánipa maicha:

—Tata Náquenu, eta juca pímicutiarahaquenehavihi, ¿viyeheyarechuchapuca viti dócequeneana, téhesera vimutupuca viti véhicavianahi? —macahepa.

42 Tacahe, ema Viáquenu majicapapa:

—Nímicutichinahepa eta apana. Macañarihpuca ema empleado máetaviuchahi eta máitupajijasiravahi. Tisuapajirahivare éma. Ema máquenu

tiyanayarehi te apana avasare. Táitusiava matuparacahi ema empleado eta máijarasiraya eta tinicacare ena apamuriana machamusuvanahi.

⁴³ Tétavicava eta máuricacarevaya ema maca ticatuparahahi, te tamutuhi máítaucha jácani machimampirana ema máquenu.

⁴⁴ Németeaca, eta tamutuiraahi tiuri eta machimampirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tíúrihi eta máítauraiva.

⁴⁵ Téhesera, váhipuca tiuri eta mapanereruana ema mácani empleado, máimijachaichucha tiyereyarehi eta máítecapirayarehi ema máquenu. Tásiha, macaetemajiricavacapupuca ena machamusuvanahi, énapa ena vanaracanaahi. Máichapapuca eta piesta, téniricapa térapa, ticavahapa.

⁴⁶ Tásiha, vaipa manecapauchavahini te títecapapa ema máquenu. Tásiha, machimaracapa ema empleado eta mamapachichijisiraipa eta máimahaqueneana. Eta tacahe, ema máquenu macavanairipinapa náestacayare muraca, taicha eta mamasuapajiraivahi.

⁴⁷ Tacutiquene mácani musu, te máechahi eta mavarahaqueneanahi ema máquenu, tásiha vahi máítauchahi eta mavanahianahi éma, muracayarehi eta macaicuñairayare. Ticaestayarehi éma.

⁴⁸ Mácanisera musu, te vahi máechahi eta tacayemaqueneana, tásiha téjcapavapa, éma apaesayaréchu eta máicuñayare. Étipa eti ecaimitucasionahi eta yátupiqueneanahi, tatuparacahi ímitucavacayare ena apamuriana achaneana. Núti, ánaquiaparipa eta nímitusiráhehi; tásiha puiti, étipa táehanacahi eta juca ímituresirayare.

*Ena achaneana nacatianacainapa ena téhicanaya ema Jesús
(Mt 10.34-36)*

⁴⁹⁻⁵⁰ Núti, eta nítesirahi te juca apaquehe, túmitecanuhi eta népeniraya. Yátupiyare eta nucatajivairayare, naicha ena ticatianacanuana. Éti apanava, ticatianacaheanayare táichaveneyarehi eta éhisiranuhi núti. Tímicutijiricavayarehi te tipaica eta yucu, eta tamuruira eta muiji. Eta juca, nuvarahaquenehi táítauchavavanehini.

⁵¹ Éti ímijachaipapuca eta nítesirahi te juca apaquehe, tájina tácyemacarémani, ímijachaipavarepuca tíúricavacareyarehi nícha. Váhisera ene tacahe. Táichaveneya eta éhisiranuhi, ena achaneana tépuruheanaya térajicavanaya eyehe.

⁵² Taicha puiti juca vicaijuheyare, te natiirihinapapuca te étanahi peti mácani achane, esu mayena, esu machicha, ema machicha, ésupa esu chínenaca. Te mapananahipuca ena téhicanuanahi, tásiha apinanahipuca ena ticatianacanuanihi. Téhesera apinanahipuca ena téhicanuanahi, mapananahivarepuca ena ticatianacanuanihi.

⁵³ Mácani achane, súcani esena, te natiirihí ena nachichanaveana, nacatichayarehi ena ticachichanahi táichaveneyarehi eta náehisiranuhi éna. Mácani apana achane masuapajirairahahi, súcani esena, nacatichayarehi ena nachichanaveana táichavenehi eta náehisiranuhi, énapa ena nachinenaveana.

*Ena achaneana timasuapanahi eta máimeruana ema Viya
(Mt 16.1-4; Mr 8.11-13; Mt 5.25-26)*

⁵⁴ Tacahe, ema Jesús máechajicapa ena achaneana:

—Te ímaha timapicurume, émetecaripa tiquivayare. Ene tacahehi.

⁵⁵ Técativavapuca te vana, émetecaripa váipavare tiquivaimahi*. Énevare tacahehi.

⁵⁶ ¡Eti masuapajirairahana! ¡Yátupihinéni ímatiequenehahi te tiquivayare, váhisera ávarahahini ímatiequeneha eta máimeruhehi ema Viya, te juca sácheana nucachanerahehi!

⁵⁷ ¿Tájaha tacayema vahi ávarahahini éhica eta juca yátupiqueneana?

⁵⁸⁻⁵⁹ Járájapainapa eta sache ticaicuñanainapa namutu ena achaneana. Tacamunurichu etanucayare puiti ema Viya, ecasiñayare ecuchucuiyavaina. Eta juca tímicutijiricavahi mácani achane te ticametauchacasiya. Tatuparacahi tativaya máetupiricanumaya eta mayaseasirayare perdón ema timetauchahi, mapurare vuíchaha masiapahini te cárcel. Taicha te masiapapa, ticajeraequenénapa eta máuchucuiraina. Numetacahehi puiti: Te jácani esiapapa eta yucu infierno, váhiquene iúchucaimahi éti —máichavacapa ema Jesús.

13

Tavaraha náeneuchava ena achaneana

¹ Étarichu te jena sache, títecapanavarepa ena apamuriana achaneana. Nametacaipa ema Jesús eta táíñehiquene máichaquenehi ema Pilato, étaripa eta máimicapasiravacahi ena tiyujaracanahi te jena Templo te Jerusalén. Ánivare nacahe:

—Ena nani, galiléoanahi éna. Tépenanapa te tachacayanahi eta sárareana nacaparuanahi námavahuásanahi. ¿Étapuca eta nasipeaturaivahipuca tímicapacavacahi? —nacahepa.

² Tacahe, ema Jesús máichavacapa:

—Éti ímijachaipa táimicaparuhi eta nasipeaturaivanahi ena nani nayehe ena apamuriana najaneananahi te Galilea.

³ Nútisera numetacahe: Váhira étainahi táimicapacahini eta nasipeaturaivanahi. Vahi étaparacaina. Tacamunusera éneuchavavane éti, machu táijahúchava eta épenira, machu ácuti éna.

⁴ Némechahe ena nani diéciochoqueneana tacaparuanahi eta táevajaisiravahi eta torre tayuchamarainihi te calle Siloé. Ímijachapapuca táimicapacavacahi eta táichapevahi eta naviureva, navetijipapuca nayehe ena apamuriana ticavasanahi te Jerusalén.

⁵ Nútisera numetacahe: Váhira ichapena eta naviureva ena apamuriana. Étiripa, te vahi ecueneuchava, énerichuvare tíjahúchavaya eta épenira —macahepa.

Ema Jesús máimicuticha eta yucuqui máhiriquire

⁶ Eta máechajirisirahi ema Jesús, máimicutijirichinapa. Ánipa macahehi: —Matarihihi ema achane. Tatiarihihi eta masucure higo. Máhiriquirehisera.

⁷ Tacahe, máichapa ema mamusura: “Mapanapa año vahi ticahi eta juca nusucure. Péchupaicayare puiti taicha tíápítaváiricaipa eta te juca isaniti” macahepa.

* **12:55** Te jena avasare Judea, te táerisine eta sache eta tásirareasa eta tiquiva. Étasera eta táuchusiha eta técativava te vana, tájjicahi tamutu, taicha tíjuruhimuhivare.

8 Émasera ema musu majicapapa: “Tiúripanapucaini, tata, vicuchapai-chahaini étanainavaréni año. Nuvaraha némurinahechayare eta máteji apaesa tacahipapucaini.

9 Téhesera váhiquenénaichapuca tacucahi, néchupaicasarepa” macahepa ema musu.

EMA JESÚS MACANARACA ESU ESENA TÉPIÑUMAIQUEHE

10 Te apanapa sávaru, ema Jesús túmiturecavarepa tayehe eta náurujisireva.

11 Sutiarihihi esu esena mávaháruhi ema éreana, tépiñumaiquehehi eta suítaresira. Vahi táurihini sutupinahahini. Díeciocho áñoripa eta sucaju-mairahi.

12 Te máimahapa ema Jesús, máichuhapa. Tacahe, supauchapa. Máichapa ésu: —Páurevi piti esena, picajumahi. Puítisera pinaracainapa —máichapa.

13 Tacahe, ema Jesús manacapa eta mavahuana te suápusi. Enevanepea titupinahahi ésu, tinaracapa eta sujumainihi. Ichaperinehi eta sucunachirahi ema Viya.

14 Matiarihivare ema táquenuruhahi eta náurujisireva. Eta máimarahi eta juca, tiseMARINEHI taicha eta macanarasirahi ema Jesús esu sucajumaquene te jena sache sávaru tacapicahuquenehi. Tásiha, máichavacapa ena achaneana:

—Saisi sache tatuparaha eta vicaemataneraya, énerichuvare eta nacaipuirayareva ena nacajumaqueneana. Puítisera juca sache, vahi táuricahini nacaipuhini taicha tacapicahuquenehi —macahepa.

15 Tásiha, ema Viáquenu Jesús, majicapapa:

—¡Tétavicavahi eta tamuracava eta esamureana! Te ticaitiquihi eta epera te jácani sache sávaru, evejapuacayarehi eta éschirayare eta une, tayanapane tacapicahuquenehinéni eta sache.

16 Suvetijicha esu suca esena vicutiquenehi achane, mámariequenehi ema viáchucaini Abraham, ticatájacarehi eta nucanarasirayarehi tayehe eta máitiarapi ema Satanás. Taicha dieciocho áñoripahi eta máecájumachirahi ésu. ¡Táuricahi nucanaracayarehi puiti juca sache tacapicahuquenehi! —máichapa ema Jesús.

17 Eta nasamirahi ema Jesús, namutu ena ticatianacanahi titsirihanarinehi. Énasera ena apamuriana achaneana tiúrisamureanarinehi, taicha eta náimairahi eta táuricacarequeneana máichaqueneanahi ema Jesús.

*EMA JESÚS MÁIMICUTICHA ETA TAQUI ETA MOSTAZA
(Mt 13.31-32; Mr 4.30-32)*

18 Ánivare macahe ema Jesús:

—Puiti nuvaraha nímicutichinahe eta nímiturapiana nuti Manerejirunuhi ema Viya.

19 Tacutihí eta ánichichaquene taqui eta mostaza. Te máevacapa ema achane te máesane, tiúnarahiyahehi eta tajurusira. Tásiha, járajapainapa eta cáyureana, ticamacajiyarehi te tatavana eta sucureca.

*EMA JESÚS MÁIMICUTICHAVARE ETA LÉVADURA
(Mt 13.33)*

20 Ánivare macahe ema Jesús:

—Nímicutichinaheyareva eta apana.

21 Eta nímiturapiana tacutihivare eta lévadura. Esu súcani esena tiúrihi eta tasisijisira eta suyehe lévadura te tamutu eta suépiyaruhi masa, tayanapane

apinapucaini arroba eta suyehe jarina, tasihajicahisera. Jéhesare, tiápuca-yarehi tiuri —macahepa.

Vicamesavayare visiapa te tapaja ánicurichu
(Mt 7.13-14, 21-23)

²² Ema Jesús tiyanavare tipaica. Máimitucavacahi ena achaneana te jácani avasare máitecapihapahi. Macaijuhehi eta Jerusalén, váhisera máitecapavanehini.

²³ Matiarihahi ema tiyaseserechahi éma, ániapa maicha:

—Tata Viáquenu, ¿váhipuca camurihavianainaya viti viúchucuhana? — máichapa.

Tásiha, éma majicapapa:

²⁴ —Vahi táechacare te ánimuriheanayareichupuca eti esiapana eta mávasa ema Viya. Étiserá tacamunu epamicava esiapaya puiti. Vahi ecuyacuji. Taicha camurianayare ena apaesachicharichu eta navarairahi tisiapanaya, váhisera títujicavanaimahi.

²⁵ Taicha járajapainapa eta sáchezare, nératacinapa eta tapaja. Tásiha, ítecapapapuca éti, éhahamecapa eta tapaja, epiaracanupa: “Tátachicha, pivejiquenehahavi”. Tásiha, nujicapahénapa núti: “¿Nájajahesica éti? Vahi nímatihe. Váhiyare nuchanerahénahi éti”.

²⁶ Tásiha, ejicapanuínapapuca: “Vítirichu picachanequeneanahi te mesa eta vinisirahi. Pímitucahavihivare te plaza te jena viávasa”.

²⁷ Tásiha, nujicapahénavarepa: “Esamanuripa, vahi nuchanerahéna éti. Évuisiha eta te juca, emutu eti ícharahianahi eta tauriqueneana” níchahénapa.

²⁸ Járajapainapa eta sache ímahainapa te tajuhe eta mávasa ema Viya te návihahi ena viáchucanaveanainihi: émaripa ema Abraham, ema Isaac, ema Jacobo, énapa namutu ena profetana. Étiserá enasinapa te aneca. Tétavicavaya eta íyauchiravaya, ecapitiquiahechiravaya taicha eta ecatisamuré-ravaya étapa eta etsiriraya eta emasiapirahi.

²⁹ Nasapiha tisiapanaya ena camuriqueneana achaneana tiásihanayare te tamutu avasareana te juca apaquehe. Tétavicavainapa eta náurismurevaya.

³⁰ Tásiha, te jena sáchezare, nácani téquenehanahi puiti, nasapihainapa tisiapanayare. Étiserá eti ínapureanahi puiti, étinavarepa vahi ítujicavaimahi esiapá —máichapa ema Jesús.

Ema Jesús ticatisamureva náichavene ena achaneana ticavasanahi te Jerusalén

(Mt 23.37-39)

³¹ Tacahe, te jena sáche, títecapanapa ena fariséoana te mávihahi ema Jesús. Náichapa:

—Piyana. Pitátájiva piúchuca eta te juca. Taicha ema Herodes mavaraha ticapacaviyare —nacahepa.

³²⁻³³ Émasera ema Jesús majicapapa:

—Eyana emetaca ema mácara ticaetemarahiquene. Vahi típcararecanuimahi núti eta juca mametarapihi. Nunasiyarechaha puiti, nuncanararecanumayare ena nacajumaqueneana énapa ena návaháruanahi ena éreanana. Núti jucarihi eta nématanerepipahi eta tímipaicanupahi puiti juca sácheana, nítauchanumayare tamutu. Vahi émainayare técha eta népeniraya. Yátupisera eta Jerusalén návasahi ena ticapahianahi ena profetanahi.

³⁴ Tétavicavahi eta táimicatisamurechiranu eta viávasa Jerusalén. Nama-puruji ena tachichanaveanasami. Éna, ticapapajicanahi ena profetanaini mavanaranahi ema Tata. Puiti navarahainapa nútípavaya ticapacanuana. Ichapemurinehi eta níchuiravacahi éna, náurujiacanuhini tacutihini eta varayu te tacurujimuriha eta tachichanaveana te tapava. Váhiqenesera návarahahíni.

³⁵ Náimahainapasera eta náichararacavayare. Ticaquipacasiyare tamutu eta napenana. Táimijunavacainapa éna eta napsiraya. Numetacahevane puiti: Eta nínajiasiravacainapa, vaipa tímahanuanaimahi. Tiámainucavainapa te náitsivacha eta napanereruana, navarahainapa tijacapanuana. Nacahénapa: “Ichape eta vicunachiravi píti vanairucaquenévihí me Viya” nacahénapa.

14

Éma Jesús macanaraca ema achane tiámaquiape

¹ Tacahe, te jena sache sávaruhi, ema Jesús ticaichuhacasihi tinipanaya te mapena ema émana náiyamuri ena fariséoana. Ticaichuhacasianahivare ena apamuriana fariséoana, énapa ena máestroana tayehe máimiturapiana ema Moiséni. Navarahahi nacacutiarayarehi ema Jesús.

² Tíjuhúchavapa tímerecava te nataracu ema émana achane macajumaquene. Tiámaquiapevacahi éma.

³ Éma Jesús, eta máimairahi ema macajumaquene, mayaserecavacapa ena natiarihiquneeanahi:

—¿Táuricapuca vicanaracavaca ena nacajumaqueneana puiti juca sávaru-muhuirahi tacapicahuquenehi? —máichapa.

⁴ Énasea vahi najicapahini, timatinanarichucha. Tásiha, ema Jesús macaratavauchapa ema macajumaquene. Eta macaratavauchiráhi, enévaneapa tinaraca. Tacahe, máevatacapa mayana te mapena.

⁵ Tásiha, máichavacapa ema Jesús:

—Nímicutichinahe puiti. Éti, németeaca májina émanaina achane vahi macujapanuhini eta mapera burro, mavuiyerapuca, te tiáquipaicavahi te pusu te jena sache tacapicahuquenehi. Eta máéñamirahi, tipatsicavayarehi macaechepupana eta paure sárare, tayanapanehinéni eta sache tacapicahuquenehi —máichavacapa.

⁶ Énasea vahi napatsicavahini najicapahini. Timatinanarichucha.

Éta maconsejarapianahi ema Jesús

⁷ Éta máimarasiravacahi ema Jesús ena macumpirachaqueneanahi ema fariseo, énajivahi tinerejiuchavana eta náejasihayarehi tiúrinapanana. Tacahe, ema Jesús maconsejachavacapa, ánípa máichavacahi:

⁸ —Te natiarihinapuca nacumpirachahe, vahi ecainapupuicavaimahi ecaejacava tayehe eta téjasihacareana taicha tijuricati eta máejasihayarehi mácani ticapicahupanahi eyehé éti.

⁹ Taicha ema téniricahi, éma ticaejarecayarehi, tijuricati macaechepucavi te péjasihahi macaejasihayarehi mácani apana. Titsirihacarepahi eta macaejavahihini te náequenemuri.

¹⁰ Te ecaichuhacasiyuca, ecaejacavaya te náequenemuri, apaesa ema téchahi tíchuhahénapa ticaejacaheyare te návihahi ena típicauchacareanapanahi. Tásiha, ecunachacarénasarepa nayehe ena natiarihiquneeana.

11 Taicha nácani ticasifñavaicanahi tímijachavanahi ticapichuana, ema Viya máimicatsiriavacayarehi. Nácanisera mánsuanahi eta náitaresira, ichapeyare eta nacunachacarevayare me Viya.

12 Ema Jesús maconsejachavare ema fariseo, ema ticumpirarecahi:

—Píti apanavare, te péniricayare, vahi nacucarichu píchuhavaca ena pémunacasareanahicha, ena piparapenaveanapuca énaripa ena rícoana, táichavenénahi eta pivairainahi títsirijicavanaya eta piyehe.

13 Píchuhavacayareva ena páureana, nácani nacahemahianahi: túpupa-vaquiana, masariana, píchuquiana.

14 Taicha ena nani, vahi títsirijicavanaimahi eta piyehe. Táitsivasera tétávicavayare eta piúricarevayare píti eta pijacapirayare eta pícuhihi te jena sácheyare picachanevacayare ena náuriqueneanahi macaechepureana ema Viya —macahepa.

Ema Jesús máimicutichinavare ema achane tíchuhavacahi ena achaneana, máeniruanayare

15 Tacahe, eta nasamirahi ema Jesús ena natirihiqueneanahi te mesa, téchajicapa ema émana. Ánipa macahehi eta mayehe ema Jesús:

—Tétávicavayare eta viúricarevaya te visiapapuca eta mávasa ema Viya, vinicayare te mamesara —macahepa.

16 Tásiha, ema Jesús majicapapa, máichapa:

—¡Jéhesare, te esiapapapucaya! Nímicutichinahe puiti. Matirihihhi ema émana achane téniricahi eta ichapemuriquene tinicacare. Camuriana ena máichuhaqueneanahi.

17 Te máimahapa tiúripa eta tinicacare, mavanecapa ema mamusura mametacavaca náitecapa ena nacaichuhacasiqueneanahi taicha tiúriripahi eta tinicacare.

18 Namutusera natanucapa eta náetseraruyarehi. Ema apana ánipa macahehi: “Vuíchaha nítujicavaimahi níteca. Nuyanenumayare nímahapanayare eta nuvachareruhi apaquehe”.

19 Ema apana énerichuvare, ánivare macahe: “Picatajicanuchaha. Vuíchaha nítujicavaimahi níteca, taicha nuyanenumayare nímahapanayare eta cinco yúntaquene vuiye nuvachareruanahi”.

20 Ema apana ánivare macahe: “Nupaenumava nítauchavahi eta nuvehacacairahi. Eta tacahe, vahi nítujicavaimahi níteca”.

21 Te tichavapa ema musu vanairucahi, mametacapa ema máquenu eta namaitujisiravavacahi títecana ena máichuhaqueneanahi. Tásiha, tísemapa ema máquenu. Máichavarepa ema musu: “Tiuri, piyana puítirichu te plaza étapa te cálleana. Píchuhavaca ena páureana, ena masariana, ena píchuquiana, nácani pétipiaruanayare nacahemahiqueneanahi”.

22 Tacahe, te tichavavarepa ema musu, mametacapa ema máquenu, máichapa: “Tata, nítaucharipa eta juca pivanairipihhi. Jucarihichahasera eta juca téjasihacareana”.

23 Tacahe, ema máquenu máichavarepa: “Píyanavare puítirichu te isanítiana. Píchuhavaca ena achaneana, nácanipa piácapijiruanayarepahi te achene. Picamesavaca náiteca, apaesa nayuriticava eta juca téjasihacareana mávacuanaichahahi.

24 Nusamacarupa puiti. Nájinava néniruimahi ena náinapureanahi níchuhaqueneanahi” macahepa ema téniricahi —máichapa ema Jesús.

Vahi máejeraréna eta véhisiraya ema Cristo

²⁵ Te jena sácheana, camuriana ena achaneana téhicanahi ema Jesús. Tásihasera, éma máesenimurihapa. Máichavacapa:

²⁶ –Te etiarhipuca éti evarahanayare éhicanu, tacamunu epamicavaya yátupina eta éhisiranuya. Nútinapa émunacapanayare, németavicainapa eta émunasiravacaini ena ticachichaheana. Mácani achane németavicayareva eta máemunasiraini esu mayena, machichanaveanapuca, maparapenaveanapuca. Váipavare éñamaimahi eta ítasesira. Téhesera apaesarichupuca eta émunasiranuyare, vahi táuricaimahi éhicanuhini.

²⁷ Ecatajivayare taicha eta éhisiranuyare. Te epicahipuca íjaracava muraca, táimicapacahepuca eta éhisiranuhi, tiúripanaichu vahi ecuehicanu.

²⁸ Tacutiquene te epanerechahipuca éti épiyarecayare eta anuquehe peti apinapuca piso, vahi táuricahini émunanasicavahini enahahajisiravainarichuini ecaematane, epanerechanumayarehi áyanayarehipuca egastaruya ítachirainahi eta evarahaquenehi épiyaca.

²⁹ Vahi ácaemuñavaimahi épiyareca eta tiúrina peti, te vahi áratahaimahi ítacha.

³⁰ Tásiha, nacahénapapuca ena ticaecahiheanayare: “Ímahapa, váhira máratahahini máitachahini eta jena peti, táurinaqueneyarehíji. Tíjaracavasamipa. Ichape eta mamelaya” nacahenapapuca.

³¹ Émaripa mácani rey, te tisemahipuca, mavarairahi máichayare eta guerra, macanayarehi mácani apana rey camuripananahi ena machanerana, mapanerechanumayarehi te maratayaharepuca macanara taicha éma vahi camurianainahini ena machanerana.

³² Eta máimairahi vahi máratahayarehi, váhivare tíjaracavaimahi máehacacahini. Tásiha, máimivanerecainapa mayehe ema mánarayarehini táitavapa eta semanerehi, vaipa nacupanerechahini.

³³ Ene ecahehi éti. Eta evarairahi éhicanu, epanerechanumayarehi eta ínajisirayare tamutu, eratahairayarepa yátupi eta éhisiranuyare. Taicha te vahi eratahayare, vahi ecucaemuñava éhicanuhini.

³⁴ Eta icheve, tétavicavahi eta táurivahi taicha eta tacamunucarevahi. Étasera eta tajachira eta icheve, tépurucarepahi.

³⁵ Tájinapa tacamunucarevainahini. Ticaquijiyarepa. Ene nacahehi ena tínajicavana eta náehisiranuhi. Nacutihi eta tajachira eta icheve. Te evarahapuca ecacutiara, tavaraha eta epanerechinavaya —macahepa.

15

*Ema Jesús máimicutichinahi te témitiaca étana uvesa
(Mt 18.10-14)*

¹ Tiuri, te jácani sácheana, títecaparacavanarepa ena achaneana te mávihahi ema Jesús. Camurianapahi éna. Natiarhipahi ena cóbrarécarahiana eta impuestoa. Namutu éna, ichape eta náepurucarevahi nayehe ena fariséoana. Émasera ema Jesús, vahi máepuruvacahini. Tásiha, témeñahavanapa éna te machacaya, taicha navarahapa nasamararacayarehi éma.

² Natiarhipahivare ena fariséoana énapa ena máestroana. Ena nani, vahi náuricahini eta macachaneiravacahi ema Jesús ena nani achaneana. Ánipa nacahe:

—¡Vahi tiuri eta máichaquenehi ema maca! ¡Namatuchucha majacapavaca ena nacahequetátájiana ticajachahacareanahi! ¡Nasapihapa macachanevacahi eta nanisirahi ena nánitatajiana! —nacahepa.

³ Tacahe, te masamapa ema Jesús eta juca, máimicutichinavacapa eta máimitusiravacahi. Ánípa máichavaca:

⁴—Esamanuchaha. Nímicutichinaheya puiti. Matiaruhi ema émana achane. Ticayehehi eta cien uvesa. Te témitiyechapuca eta étana, ema achane tiyanayarehi matanuca eta táemitiaruhi. Eta máeñamiravahi, majunijicayarehi eta apamuri noventa y nueve uvesa te majaneasihahi.

⁵ Jéhesare, te máichimavapa eta táemitiaruhi, tichavapa tiúrisamurepaipa. Mámapaipa te machepa.

⁶ Te títecapapa te mapena, máichuhapa ena machacayapenana májiriareana. Tacahe, máichapa éna: “Yare, éti apana iúrisamurevare nuyehe núti. Taicha níchimavaipahi eta uvesa táemitiaruhi” máichapa ena májiriareana.

⁷ Tiuri, núti numetacahe eta juca: Énerichu ema Viya te anuma tiúrisamurevare nayehe ena achaneana tiúritaresiranahi, taicha tájina nájecapiravainahini. Tétavicavainehisera eta máurisamurevahi ema Viya nayehe nácani achaneana tímatianahi eta nacapecaturairahi, tásiha téneuchavanapa, náinajicapa eta napecaturanaini —macahepa ema Jesús.

Éma Jesús máimicutichinahi eta táemitiaru étana reale

⁸ Tímiyanava eta máechajirisirava ema Jesús, ánípa macahe:

—Nímicutichinaheya eta apana. Sutiarihi esu ésuna esena. Ticayehehi eta dies reale eta tijapu plata. Te témitiyechapuca eta étape, tinanesiyarehi sutanucayarehi eta táemitiaruhi. Eta sutanusirayare, suyustacainapa eta sumicahu. Supihicainapa tamutu eta te tajuhe eta supena.

⁹ Te suíchimavapa, tiúrisamurénapa. Suíchuhavacainapa ena suchacayapenana suájiriareana. Tacahe, suíchavacainapa éna: “Yare, éti apana iúrisamurevare nuyehe núti, taicha níchimavaipa eta reale nucamitiaruhi” suíchavacainapa esu esena ena suájiriareana.

¹⁰ Tiuri puiti, núti numetacahe eta juca: Ene macahehi ema Viya. Tétavicavainehi eta máurisamurevaya te namuri ena ángeleana eta máeneuchiravapa mácani achane cápecaturarahini, máinajisiraipahi eta mapecaturanaini —macahepa ema Jesús.

Éma Jesús máimicutichinahi ema émana achane amaperu tacamitiriaru eta matuhusiva

¹¹ Tímiyanava eta máechajirisirava ema Jesús, ánípa macahe:

—Matiarihihí ema émana achane. Apinanahi ena machichanaveana. Ajairana.

¹² Étana sache, máichapa ema maiya ema émana machicha amuyapana: “Tata, picatajicanupa, píjaracanu puiti eta nuyeheyare tatucachaquene-nuyare eta picayehequeneana” máichapa. Tacahe, tísapavapa ema naiya. Máijaracavacapa eta máimahaqueneana ena apinana machichanaveana.

¹³ Tacahe, étarichuhi te jena sácheanahi, tétupiricavapa ema amaperu, tiyanavanepa. Mámapa tamutu eta mayehechiravaripahi máijararuhi ema maiya. Tiyanaapa te apana avasare tayerehiquene. Eta ánaqui, máitaiyahi tamutu eta máimahaqueneanaini. Tamutupa mamapachichijica.

¹⁴ Tacahe, eta jena sácheana, táitecapauchapa eta ecuha eta avasare mávihahi ema amaperu. Tacahe, namutu ena achaneana tayehe eta te

avasare téchurihanapa eta tinicacare. Tivayuchavapa eta ecuha. Ema amaperu títarahaipahi eta máimahaqueneanaini. Tásiha, tájinapa maviyahini eta manica.

¹⁵ Tásiha, ticaquenurecapa mayehe ema émana achane. Tacahe, ema máquenuhi mavanecapa ema amaperu eta majaneasinaya eta cúchiana eta te máesane.

¹⁶ Ichapesera eta máecuavahi. Majamurachainehi manichahini eta taniru eta cúchiana, taicha nájina náitátihini éma.

¹⁷ Tacahe, téquecavapa eta mapanereruanahi. Tipanerequenehavapa émajiva. Ánipa tacahehi eta mapanereruhi: “Namutu ena mavanarana ema tata, tíurihi eta nanisira. Nútisera ani ticapacanuapa eta nécuava.

¹⁸ Níjaracava, nuyana nuchava eta me tata ticachichanu. Tásiha, níchayare éma: Tátachicha, nucapeaturaipa mayehe ema Viya étapa eta piyehe piti tata.

¹⁹ Tayanarinepuca táimicutijiricavainepuca vahi pichichanuina. Picatajicanusera. Pijacapanu, nímiáquenuchavarine piyehe piti tata. Nácutirine ena pivanarana. Níchayare ema tata”. Tacahepa eta mapanereruhi ema amaperu achane.

²⁰ Tásiha, tiyanapa tichava eta me maiya. Te tiánehipa títecapa ema amaperu, máimahapa ema maiya. Enurujipa máimativane. Ichaperinehi eta majapanuirahi. Enurujipa tiyana tijunapa mácapa. Majupahacapa ema machicha. Máetserarecapa eta máurisamurevahi.

²¹ Émasera ema amaperu, téchajicapa. Ánipa maicha: “Tátachicha, nucapeaturapa mayehe ema Viya étapa eta piyehe piti tata. Tásihasera, tayanarinepuca táimicutijiricavainepuca vahi pichichanuina” máichapa.

²² Émasera ema maiya, mavaraha máimerecaya eta yátupirahi eta majacpirahi ema machicha. Vahi máicuñacahini. Tásiha, mavanecapa ena mavanarana. Máichapa: “Etátájirica, iama eta muíriare tíurinapana. Emuiriacha ema maca nuchicha. Iama eta tíurinapana surtija; masurutijaina. Iámavare eta tíurinapana eparupeva, máeparupevaina.

²³ Énerichuvare épana eta jena mamona tíujepana. Ecapaca, vinica. ¡Víchayare eta piesta! Viúrisamurevaina eta máitecapirahi ema maca nuchicha.

²⁴ Taicha éma, tímicutijiricavahi eta máepenaquenénahini ema maca, puítisera tíuchujicapa tichavapa ani nuyehé. Máemitiaruhi te numirahu, puítisera nímahapa éma” macahepa ema maiya. Tacahe, ichape eta náurisamurevahi namutu.

²⁵ Tiuri, ema émana machicha máechavihi tiyanahi te isaniti. Te tichavapa, te tiánehipa eta napena, masamapa eta piesta te tajuhe.

²⁶ Tásiha, máichuhapa ema émana nacajurure. Mayaserecapa: “¿Tájaha tacayema eta juca piesta?” macahepa.

²⁷ Tacahe, máichapa ema macajurure: “Ema piparape títecapahi. Tásiha, ema piya máimicapacapa eta étana mamona tíujepana. Ichape eta piesta, taicha eta máurisamurevahi ema piya eta máitecapirahi ema piparape” máichapa ema macajurure.

²⁸ Tacahe, tiseamarinéhi ema maparape. Vaipa mávarahahini masiapahini. Tacahe, te máechapa ema naiya, tíuchucapa. Macamesapa macasiapa.

²⁹ Majicapapasera ema machicha, ánipa maicha: “Pímaha, tata. Ánaquiapapa eta nítatírvihí níti. Tájina nímatiyahini nácapaemachavihini te pivanaripiana. Tásihasera, tájina píjaracanuini eta étanainahini chívachichai-

napucaini eta nunicahini nucapiestarahipucaini núti, nácachanehini ena nájiriareana némunacasareana.

³⁰ Tásiha, puiti pímicapacainehi eta mamona tiújepana, taicha eta máitecapirahi ema émana pichichatataji. Ema mácatataji títahacavahi eta píjararuinihi picayehequeneanainihi náichavenehi ena esenana túhusiana” máichapa ema machicha.

³¹ Tacahe, ema maiya máichapa: “Pímaha, nuchichachicha, píti ánaquia-paripa eta péjahasiranuhi. Tásiha, tamutu eta nucayehequeneanahi, piyeheanahivare píti.

³² Puítisera, táuricaichucha vicha eta piesta eta viúrisamurevainahi, taicha tímicutijiricavahi eta máepenaquenénahini ema maca piparape, puítisera tíuchujicaipa, tichavapa éma. Ema máemitiaruhi te vimírahu, puítisera víápechavavarepa vímaha éma” máichapa.

Tacahehi eta máechajiriruvanahi ema Jesús nayehe ena achaneana.

16

Eta máimituresirahi ema Jesús, máimicutichina ema capataz timapachichijic-ahi eta máimahaquene ema máquenu

¹ Ema Jesús ánivare macahehi eta máimitusiravacahi ena máimitureana:

—Nímicutichinahe eta apana. Ema achane rico, matiaríhihi ema mayehe capataz, téchahi tamutu eta máimahaqueneana ema máquenu. Tásiha, masamairiricapa ema máquenu eta mamapachichijisiraipahi eta máimahaqueneana.

² Tacahe, ema máquenu máichuhapa. Mayaserecapa: “¿Tájaha tacayema eta juca? Nusamauchavihi eta pimapachichijisirahi eta nímahaqueneana”. Émasera ema capataz tájina maviyavahini macatiuchiavahini taicha yátupíhi eta máejecapiravahi. Tacahe, ema máquenu máichapa: “Tiuri, vitupaequenehayare tamutu taicha vaipa nuvaraha pímiyanava eta nuyehé”.

³ Tacahe, ema capataz ichaperinehi eta mapanereresirahi taicha eta máuchusiraya. Tásiha, macahepa te mapanereruana: “¿Tájahainapapuca nícharacavayare puiti? Ema náquenu ticuchucanuina tayehe eta juca nématanerepihi. Ichape eta nutsirihacarevayare taicha vahi núriahani nucaematanehini eta isaniti, váhivare nuratahaimahi eta tamuracava eta emataneca. Títsirihacarehivare nuyaseserecachini eta nunicaquene.

⁴ Tiuri, áni nucaheyare. Némeñahavayare nayehe ena ticanteveanahi mayehe ema náquenu, tiámainucava te nítucavapapucaini eta nítatijiyavayare” macahepa te mapanereruana.

⁵ Tacahe, máichuhavacapa namutu émanapahi ena ticanteveanahi mayehe ema máquenu. Tacahe, mayaserecapa ema máinapuiruhi: “¿Péchapuca áyana eta pintevehi mayehe ema náquenu?”

⁶ Tacahe, ema ticantevehi majicapapa: “200 lata eta aceite comer eta nuntevehi mayehe”. Tacahe, ema capataz máichapa: “Júchahi eta piyehe vale pífirmaruhi. Puítinarichu vítsivachaya eta apana vale. Vaipa pivachachaimahi tamutu. Cien latainarine eta pinteveyare” macahepa.

⁷ Tacahe, mayaserecavare ema apana: “¿Pítiyapa péchapuca áyana eta pintevehi?” Ema ticantevehi majicapapa: “Séiscientohi tarera eta trigo eta nuntevehi mayehe”. Tacahe, ema capataz máichavarepa: “Júchahi eta piyehe vale pífirmaruhi. Vítsivachaya eta piyehe vale. Vaipa pivachachaimahi tamutu. Quinientorine tarera eta pinteveyare”. Ene tacahehi eta

máichirahi nayehe ena apamuriana ticanteveanahi, máitsivachirapaipahi eta nayeheana váleana.

⁸ Tacahe, te máechapa ema máquenuini eta máchaqueneanahi ema mayeheni capataz eta macatiuchiravahi, ánipa macahe: “Tétavicavapa eta máitusirahi masámápuha ema maena nuyeheni capataz” macahepa ema máquenuini. Ene nacahehi ena achaneana máimtirahanahi ema Viya. Éna tiápajupanavanahivare eta náitusirahi eta tayanirava. Nacachuricahi ena téhicanahi ema Viya, taicha tavayucavacahi eta tájiparacana.

⁹ Puiti numetacaheyare eti nímitureanahi: Eta ítaresirahi te juca apaquehe tauriquenehi, te ecaimahaquenehipuca, ecajiyare te napauchahepuca ena ticamunuvanahi. Tacahe, te ítecapapa te mávasa ema Viya, túriyare eta ítecapiraya, ánaqui ejaicapainapa eta táitsivayare.

¹⁰ Taicha nácani tíurihi eta náechapajirisirahi jácani ánichichaquenehi, ene tacaheyarehi eta táurivayare eta náechapajirisirayare eta camuriquenehi. Nácanisera vahi tíurihi eta náechapajirisirahi jácani ánichichaquenehi, éneyareichuhivare vahi tíurimahi eta náechapajirisirayare eta camuriquenehi.

¹¹ Taicha te vahi tíurihi eta ítauchirahi eta ecatuparahairahi échapajiricaya eta tímahacareanahi eta te juca apaquehe, ema Viya vahi tituparacahémahi eta tímahacareana yátupiqueneana te anuma.

¹² Eta tacahe, ítaurahiyare tayehe jácani apayeheana apaesa máijaracahe ema Viya eta ícuchihi, taicha eta máimairahi éma eta ítauravahi éti.

¹³ Éti, eta ítaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapacarepanayarehivare. Tásiha, ema apana, apaesarineya eta émunasiraina, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurerecahehini eta plata, machu tahapapiricaheriana eta émunasirahi ema Viya, étapa eta ecaemataneasirahi éma —máichavacapa ema Jesús ena máimitureana.

*Éma Jesús maconsejachapa ena fariséoana
(Mt 19.1-12; Mr 10.1-12)*

¹⁴ Natiarihivaresera ena fariséoana. Nasamararacahi eta juca máimiturapianahi ema Jesús. Tásiha, nacaecahirichuchasera eta nasamirahi éma. Taicha tétavicavahi eta tavayuasiravacahi éna eta tímahacareana.

¹⁵ Tacahe, ema Jesús máichavacapa:

—Éti épiyacavahi iuri eta ímairavahi nayehe ena achaneana. Émasera ema Viya máimatihí eta esamureana. Macatianacahi ichape éma eta apimiráhérahí.

¹⁶ Numetacahevare eta apana: Ema víyarahaini Moisés, énapa ena víyarahaini profetana tínapucanahi eta náechajisihahi tayehe eta nítesirayarehi nutí Cristo ecuchapaquenehi. Puiti ichape eta navapinairavahi ena camuriqueneana téhicanuanapaipa. Éti apana, tituparacahe éhicanuyareva.

¹⁷ Numetacahe puiti: Váhiquene títavaimahi eta tasuapacarevahi eta máechajiriruvana ema Tata. Máíhecuaracuire éta, tayanapanehipuca táitava eta anuma étapa eta juca apaquehe.

¹⁸ Éti, eta ímiturapi, ísapahi mácani achane máquijica esu mayena, tásiha, ísapahivare maveha esu apana esena. Nútisera numetacahe: Mácani achane, te máinajicapuca esu mayena, tásiha maveha esu apana esena, éma ticapecaturaipahi me Viya. Tacutiquene mácani apanavare achane mavehapa

esu esena máinjiruhi ema suima, énerichuvare ticapecaturahivare me Viya taicha ésu, matiarihichahi ema suímaquenehi —máichavacapa.

Eta macatajivairahi ema rico étapa eta máuricacarevahi ema paure ticajare Lázaro

¹⁹ Tacahe, ema Jesús máimitucavacavare ena achaneana. Ánipa macahe: —Nímicutichinahe eta apana. Matiarihihi ema émana achane. Mavayuchahi eta marricuva. Tétavicavahi táurinavahi eta macamuirihaira. Tijanunuhacanecha. Tamutuhi sácheana máicha eta táurinaquene piesta.

²⁰ Tásiha, matiarihihivare ema apana achane paure ticajare Lázaro. Tica-jumahi. Amairihahi carachachaha eta majuma. Téchapairicahi éma tamutu sácheana te mapajacura ema rico.

²¹ Ema maca paure tiyaseserecahi manicayare eta máemacharajiana ema rico. Tájinasera náijaracaimahi. Tavetijipa, vahi túmenahini ema paure. Vaipa maratahahini macatiuchavahini eta táeverasirahi eta tamucuana eta macarachana.

²² Étana sache tútecapapa eta máepenirahi ema paure. Nárajapapa ena ángleana; náepanapa eta máchaneva ema Lázaro, námapa tayehe eta paraíso mávihahi ema viáchucaini Abraham. Tacahe, te táequenepe, tépenavarepa ema rico. Tiúrinavare eta náecarirahi.

²³ Eta máepenirahi éma, tiyanapa tayehe eta macatajivaiyarehi. Tásiha, te téjamiháuquichapa, máimahapa eta mávihahi ema Abraham, émapa ema Lázaro te machacaya. Mayerehivacahisera eta máimairahi.

²⁴ Tacahe, tipiaracapa ema rícoini: “Tata Abraham, pájapanunu. Picata-jicanu, pivanesanuini ema Lázaro máechipaicaini apaesachichaini eta mavauqui te une. Máecasarechapanaini eta nunene. Taicha tétavicavahi eta numanevahi eta te juca nucatajivaiyahi tayehe eta juca návihahi tájirequene yucu” máichapa.

²⁵ Émasera ema Abraham majicapapa: “Vahi nuvanecaimahi. Péchavachucha, nuchicha, te achanevichaha, tétavicavahi eta piúricacarevahi. Tájina pácamunuhini eta pítaresirahi. Ánipasera picatajivaiyahi. Émasera ema maca Lázaro, ichapemurihi eta macatajivairahi te achanerichaha. Puítisera vaipa macatajivahini. Puiti éma, majacaparipahi ema máuricacarevahi.

²⁶ Tacutiquene máitujihí eta mánuuirainahini eta ára piyehe. Pítiripa váhivare pítujicavaimahi pítecapauchahavi ani te juca viávihahi víti, taicha jucarihi eta tíchejimirauchahavihi eta viánuuirainahini tacutihi eta tiúchausi cajacure. Máitujihí eta mayanahini” macahepa ema Abraham.

²⁷ Tacahe, ema rícoini máichavarepa: “Tiuri, te váhipuca tútujicacarehi, picatajicanusera. Pivanesanuini mayana ema Lázaro te nupena.

²⁸ Mametapaninanuini ena cincoqueneana nuparapeneana. Maconse-jachapanavacaini eta náeneuchiravainaini éna, apaesa váhini nacuitecaini tayehe eta juca návihahi núti nucatajivaiyahi”.

²⁹ Émasera ema Abraham máichavarepa: “Éna, narataha téchajicurecana, ticaravahuanayare eta Sagrada Escritura. Te nasuapahivarepuca eta tavanairipianahi, vahi tisiapanaimahi eta te jara ecuñaraqú piávihahi píti”.

³⁰ Ema rícoini majicapavarepa: “Táitaurevaquene ene tacahehi, tata Abraham. Tiúripanahiserahípucaini mayanahini ema émana máepenaquenehi eta nayehe ena nuparapeneana, mametapanavacahini. Németeaca téneuchavavaneapani”.

³¹ Ema Abraham máichavarepa: “Te váhípuca nacusuapahini eta Sagrada Escritura, tacaheyarehi eta namasuapirayare mácani máechepurehi máepenaquenehi” macahepa ema Abraham.

17

Ichape eta máicuñayare mácani tímiaquipaica te pecatu ena amaperuana (Mt 18.6-7; Mr 9.42)

¹ Te táequenepa, ema Jesús mametamurihavarepa ena máimitureana. Ánipa macahe:

—Yátupi eta vahi téjiacavaimahi eta tímiaquipaipayare tayehe eta pecatu ena achaneana. Ichapesera eta náicuñayare nácani táemesiavanayare náimiaquipaisiraya nácani apamuriana tayehe eta pecatuana.

² Mácani tímiaquipaica ena émana amaperu, tiúripanahipucaini máepenhini mativainahini éma. Váhirichupucaini macucaicuñahini; taicha vahi macuimiaquipaica ena amaperu tayehe eta pecatu.

³ Eta tacahe, échapavaya éti machu ímiaquipaica ena amaperuana.

Tatuparaca viperdonacha ena téjecapavana viyehe (Mt 18.21-22)

Numetacahe eta apana: Te máejecapavapuca eta piparape eta piyehe, piconsejachaya. Téhesera máeneuchava eta piyehe, piperdonachaya éma.

⁴ Tayanapane siétehénapuca máejecapava te étana sache, máeneuchavasera eta piyehe, tituparacavi piperdonachayare —macahepa ema Jesús.

Tamutuyare virataha te yátupihí visuapa ena Viya

⁵ Tiuri, ena apóstoleana nayaserecapa ema Jesús:

—Tata Viáquenu, picatajicahavi. Pímitucahavi apaesa tajurucapaipaini eta vicasíñairavahi mayehe ema Viya. Vivaraha ichapenaini eta vicasíñairavaya eta mayehe —nacahepa.

⁶ Tacahe, ema Jesús majicapavacapa:

—Vahi tácomesa ichapenahini eta ecasíñairavahi mayehe ema Viya. Tayanapanepuca ánichichainarichu eta ecasíñairavahí, tácutipuca eta táquichicha eta mostaza, tamutuyare erataha. Étaripa eta jácani yucuqui, te evarahapuca ecayejecca, eratahayarehi. Te íchapuca: “Piyejecava eta te juca, piyana pisucuchava te cáquiure”; tásiha, eta yucuqui tisuapaheyarehi. Tíyejecavainapa tayehe eta cáquiure.

Tatuparaca vítauchayare eta vicaemataneasirayare ena Viya

⁷ Étaripa ema mácani achane te ticamusurahi, te másihapaipapuca ema musu te vámahí eta májaneasirahi eta vaca, te tísahahipuca, te títecapapa te peti, ema máquenu vájparinehi matátáuchaimahi máepiyaca eta tinicayare eta máenisiraya ema musu.

⁸ Matátáuchayarechucha mavaneca ema musu émaina máepiyaca eta tinicacare, máenicayare ema máquenu. Tásiha, máichainapuca: “Tiuri, nítanesipa. Pítipavapa pinica”.

⁹ Váiparinehivare mahasulupayachaimahi ema mamusura eta máitachirahi eta mavanahianahi.

¹⁰ Ene ecahehi éti, ecuti ema musu. Te ítauchapa tamutu eta evanahiana me Viya, ecahenapa: “Viti músuanahi vahi vicunachacarémahí. Tacarichuhi vicha eta vivanahianahi” ecahenapa —máichavacapa ema Jesús.

Emá Jesús macanaracahi ena diésqueneana leprosoana

¹¹ Tímiyanavavare tipaica emá Jesús, macaijuhepa eta Jerusalén. Máetavica vacapaipa eta avasareana te provincia Galilea étapa eta Samaria.

¹² Te máitecapauchapa eta apana avasarechicha, tiúchujicanapa ena diésqueneana ajairana ticajumana eta lepra. Nacapayacapa éma. Váhisera náemeñahavahini éna, nayerehichucha.

¹³ Tacahe, napiaracapa emá Jesús:

—Tata Jesús Nazareno, pájapanuhavi. Picatajicahavi, picanaracahavi eta vijuma —náichapa.

¹⁴ Tacahe, emá Jesús máesenicavacapa. Tásiha, máichavacapa:

—Eyana, ímerecava te namirahu ena tuparairucana apaesa náimamaracahe. Énainapa nametajirica eta iúri vaipa, enarasiraipahi eta ejumlahainihi —máichavacapa.

Nasuapavanehi éna. Tásiha, eta nayanirahi, tinaracanapaipa.

¹⁵ Tacahe, emá émana, eta máimairavahi eta manarasiraipahi, tichavapa te mávihahi emá Jesús. Tipiaracapaipahi muraca eta macunachirahi emá Vía.

¹⁶ Matupirupa tépuyucahi te mamirahu emá Jesús. Tétipaicapa macaitécapa eta mamira te apaquehe, mamaverarasiravahi eta mahasulupayachirahi emá Jesús. Emá maca achane, indigenahi samaritano.

¹⁷ Tacahe, emá Jesús máichapa:

—Ticutimahi diésnahi ena nuncanaruanahi. ¿Tájahapuca tacayemahi vahi nachavahini ena apamuriana nuévequeneana?

¹⁸ Macarichuhi tichava emá maca apavasaquenesamihi, macunachapaipa emá Vía.

¹⁹ Tacahe, emá Jesús máichapa emá achane:

—Péchepuca, piyana pichava. Pinaracaipasera táichavenehi eta picasiñairanuhi —macahepa.

Eta ecutiarareanaya eta máitesiraya emá Cristo

(Mt 24.23-28, 36-41)

²⁰ Tiuri, ena fariséoana nayaserecavare emá Jesús tájamuhuyarepuca eta máitecapiraya emá Cristo nacuchapaquenehi. Éma, majicapavacapa:

—Eta máitecapiraya emá ecuchapaquenehi, tájina metárapimahi eta máimeresiravaya éma. Vahi tácajerahini eta ímairaya.

²¹ Nájinavare timetajiricaímahi eta máitecapiraya taicha matiarihiripahi éma puiti ani. Nútiripa —máichavacapa.

²² Tacahe, máichavacapa ena máimitureana:

—Tatiarihiyare eta sáchevayare ichapeyare eta ecaimairunuiraya. Tétavica vaya eta evarairaya íjahúchavayare ímahanu nuti Manerejirunuhi emá Vía eta nuchaviraya.

²³ Te navayuaracahepuca nacahenapuca: “Émaripa emá vímahaquenehi ánaqui”. Ena apamuriana nacahénavarepuca: “Émaripa emá maca vímahaquenehi puiti eta ani”. Váhisera ecusuapavaca éna. Váhivare ecuehicavaca.

²⁴ Taicha te táitachavapa eta nítecapiraya núti, nucutiyare eta tájahúchirava títecapa eta térameca. Namutuyare ena achaneana te juca apaquehe tinecapanuanayare. Tacaheyare eta nuchavirayare nuti Manerejirunuhi emá Vía. Ticaecherayasesera, tájina vahi máchasimahi.

²⁵ Tativayasesera nucatajivanumayare ichape. Tépurunuanayare ena achaneana natiarihiqueneanahi puiti.

26-27 Tacutiyare eta acane ena achaneana machamurianaini ema Noé. Ena nani tinicairihianarinecha, náematanerinecha, térana, túmarerecanahi ena nachichanaveana. Vahi téñamavanaimahi eta náimairahi ema Noé eta masiapirahi tayehe eta ichape pacure. Tájina vahi natsecavahini eta táitecapachirayarehi eta ichape une. Tacahe, eta táemirisirapa eta ichapequene tiquiva, tacapapajicavacahi namutu éna. Ene nacaheyare ena achaneana te jena sácheyare. Vahi titsecavanaimahi tayehe eta nuchaviraya.

28 Tacutiquene ene nacahehivare acane ena achaneana ena machamuriana ema Lot. Tinicairihianahivare éna, téraracavanahivare. Étanecha napanerechahi nájarareca eta náevavareruana. Ene apamuriana natanujiricarinecha eta nacamunuqueneanahi. Tépiyarerecanarichucha pétiana. Vahi naéñamavahini tayehe jácani ecuñaraquiya.

29 Téhesera te majunijicapa ema víyarahaini Lot eta avasare Sodoma, tójahúchavapa tiquivapa eta yucu ticasiriqui azufre tíasihahi te anuma. Tacapapajicavacapa.

30 Ene tacaheyare eta nusacherayare nuti Manerejirunuhi ema Viya eta nuchaviraya.

31 Te jena sácheyare, nácani tachimararuanayare te aneca, vahi táuricaimahi nasiapahini te napena navehanumahini jácani náeñamaqueneanahi náimahaqueneana. Énaripa ena napaiririruanahi te vámahi, váhivare tichavaequenehavanaimahi náepanahini eta náeñamaqueneanahi.

32 Écharichuhi eta acane eta suchararacavahi esu mayenaini ema Lot. Ésu, tétavicavahi eta suéñamaquenehairahi eta suímahaqueneana sujuni-ruanahi. Táichavenehi eta suvarairahi tichava, ésujivapa ticamítiequenehava*.

33 Nácani téñamanahi eta náítaresira, tahapapiricarinecha eta tájiparacana te juca apaquehe, éna témítiequenehanaya eta náítaresira. Énasera nácani tahapapiriruanahi eta náehisiranuhi, tayanapanepuca táimicapacavaca, éna tíujicavanayare tíuchucuhanayare eta náítaresiranaya.

34 Numetacahevanecha: Te jena yátiyare, te apinanahipuca nácani natiaríhiqueneanahi te tajuhe peti, émanayare ema níchuhaqueneyare, ema apana manasiyare.

35 Tacutiquene, apinanahipuca ena esenana tiyuvarecanahipuca. Énerichuvare ésuma esu níchuhaqueneyare. Esu apana sunasiyare.

36 Te apinanahipuca ena ajairana te vámahi, éneyareichuvare émana ema níchuhaqueneyare. Ema apana manasiyareva —máichapa ema Jesús.

37 Eta nasamirahi ena máimitureana, nayaserecapa:

—Tata Viáquenu, ¿távihapuca táitauchiavayare eta juca pimetarapianahi? —nacahepa.

Majicapapa éma:

—Vahi ecuéñamava eta távihapuca nítecapihayare. Núti nítecapachaheya te jácani iávihahi éti† —máichavacapa.

* **17:32** Ema Viya mavanecahi ena apinana ángeleana, nametapana ema Lot eta máicuñasirayarehi eta avasare Sodoma. † **17:37** Te máechajiriruvahi ema Jesús, ani macahehi: “Te jácani mávihahi ema máepaquene, éta távihayare eta sipuquiana”. Eta juca mayehehi proverbio, tatiaríhi eta tacayemaquenehi tayumurevahi.

18

Emá Jesús máimicutichinavare emá juez ésupa esu tépenaima

¹ Emá Jesús máimitucavacavare ena máimitureana vahi nacucainajiruva eta nayujarasirana. Tímiyanavanaya, tayanapane vuíchaha najacapavanehini eta nayasearuanahi.

² Eta máimicutichinahi, ánipa máichavacahi:

—Matarihi emá achane. Juézhi tayehe eta avasare. Éma, tájina vahi mapicauchahini emá Viya. Nájnavare mapicauréna ena achaneana.

³ Sutiarihivare tayehe eta avasare esu ésuna esena suépenaimaquenehi. Suchavauruiricahi emá juez taicha eta sumetauchirahi emá suctianaruhi.

⁴ Émasera emá juez vahi masuapahini eta sumetauresirahi ésu. Váhisera sucainajiruvahini. Tásiha, mapanerequenehapa macahepa: “Núti néchinava. Nájina nárataha napamicanuhini. Váhivare tipamicanuimahi emá Viya.

⁵ Ésusera esu suca esena, nuyacujipa eta suchavauruirisiranuhi. Níchari-nepuca eta suvarahaquenehi, apaesa vaipa sucuápechava suíteca” macahepa emá juez.

⁶ Puiti, nuvaraha ecaicutiaraquenehaicha eta juca nímiturapihi mayehe emá juez mapicauruiraha eta macatiuchirahi esu suca esena táichavenehi eta suchavauruirisirahi éma.

⁷⁻⁸ Ene macahehi emá Viya. Vahi máyererejimahi eta macatiuchi-rahevaneya eti manerejiruanahi, esamacareyarehi taicha eta emacainajiruvairahi eta eyujarasirainahi tamutu sácheana, yátiana. Étaripa te táitecapa eta nuchavirayare nuti Manerejirunuhi emá Viya, németeacahi natarihiyareichaha nuchimapaqueneanaya ena vahi ticainajiruvanahi eta nayujarasira, nacutihi esu suépenaimaquene eta sumacainajiruvairahi — máichavacapa emá Jesús.

Emá Jesús tímitucavahi vahi vicasiñavavaicaimahi, váhivare vépururahimahi

⁹ Emá Jesús apanavare eta máimicutichinahi eta máimituresirahi, nayehe ena tímijachavanahi tíuriana, tájina náichiravainahi; náepuruvacahisera ena apamuriana achaneana. Tacahe, máichavacapa:

¹⁰ —Nímicutichinahe eta apana: Natarihi ena apinana ajairana te Templo. Téneuchavanahi. Emá émana achane, fariséohi éma. Emá apana, tisipecaturarahi éma.

¹¹ Emá fariseo, eta macasiñavavaisirahi, témeñahavapa tayehe eta cuarto tacapichuquenehi te Templo. Ánipa macahehi eta mayujarasirahi: “Nuhasulupayachavi, Tata Dios, eta núrivahi te pimirahu. Vahi nácutihini ena apamuriana achaneana tíamerahianahi, tisipecaturanahi, esenamareanahivare. Váhivare nácutihini emá mácatataji te juca nuchacaya.

¹² Píti pímatinuhi eta apiheirahi áyunanu te semanana. Níjaracavivare eta plata nuganarerusa. Te nuganachahipuca eta dies peso, étanahi peso eta níjaracaviparaca. Téhesera cien pésohipuca eta nuganareruhi, dies pésohivare eta níjaracavi. Vahi nuyavanahini eta námavahuásana eta piyehe” macahepa.

¹³ Émasera emá apana achane vahi máemeñahavahini. Tiyerehichucha eta máeneuchiravahi. Váhivare mapatsicavahini máesenicahini te anuma. Téhatupachavahisera eta máeneuchiravahi. Ánipa macahehi: “Tata Dios, nucatisamureva ichape eta nucapecaturairahi piyehe. Pájapanunusera piperdonachanu eta nupecaturana” macahepa ena achane.

¹⁴ Tiuri, nutupiru numetacahe: Ema maca achane, eta machaviraipahi te mapena, tijacapacaréinehi me Viya taicha yátupihi eta máneuchiravahi. Émasera ema fariseo vahi majacapacarehini. Taicha nácani ticasañavai-canahi, tímijachavanahi ticunachacarehi, éna tépurucareanayarehi me Viya. Nácanisera ena tiyaseacanahi ema Viya eta májapanuiravacaina, yátupihi tijacapacareanayarehi mayehe —macahepa ema Jesús.

Ema Jesús mayujaraucha ena amuyana
(Mt 19.13-15; Mr 10.13-16)

¹⁵ Tacahe, ena achaneana námavacapaipahi ena amuyana eta mayehe ema Jesús, navarairahi máemamahacavacayarehi éma. Énasera ena máimitureana vahi náisapahini, nacaichepaipa ena tiámanapahi ena amuyana.

¹⁶ Émasera ema Jesús máichuhavacaichucha ena amuyana. Tásiha, ena máimitureana máichavacapa:

—Ésamiricachucha ena amuyana, náitecaichaha eta nuyehe. Vahi ecucai-chepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna.

¹⁷ Nutupiruva numetacahe: Nácani vahi nácutihi ena amuyana eta nasuapajiraiva, vahi nuchaneranaímahi éna —macahepa ema Jesús.

Ema achane rico téchajiricava mayehe ema Jesús
(Mt 19.16-30; Mr 10.17-31)

¹⁸ Matiarahi ema achane. Náiyacararipahi ena achaneana. Témeñahavapa mayehe ema Jesús, mayaserecapa:

—Tata maestro, píti piúrique. ¿Tájahapucaini eta nícharacavaini eta nítuji-siravaina me Viya máichecuaraquirénahini eta nítaresira? —máichapa.

¹⁹ Ema Jesús majicapapa:

—¿Tájaha tacayema pímiarichanu “Píti piúrique”? Mararíhi ema Viya. Jéhevare éma, tétavivacahi eta máurivahi.

²⁰ Téhesera te pivarahapuca pecha eta apana vítaresira, pisuapayarehi eta mavanairipiana ema Viya. Píti pímatipa eta júcana: “Vahi picuveha esu esena apayena. Vahi picucapareca. Vahi picuamereca. Nacuija pépiyaeque-neruina. Pémunacaya ena ticachichavianahi” —máichapa.

²¹ Tacahe, ema achane majicapapa:

—Tamatu nusuapahi eta juca vanairipiana eta námaperuvahi, puíticha juca ajairanuirapa —macahepa.

²² Tásiha, ema Jesús máichavarepa:

—Jucaríhichahasera eta pítauchaqueneyare. Píjararecaya tamutu eta pímahaqueneana. Tásiha, píjaracavacaya ena páureana. Jéhevare éta, píjacapayare eta pímahaqueneyare te anuma, táitsivayare. Te tamutupa eta juca, pítecavanepa péhicanu —máichapa ema Jesús.

²³ Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta marricovahi. Macatíequenearinehi tamutu. Tiyanapa tipanererecapaipa.

²⁴ Eta máimairahi ema Jesús eta mapanereresirahi, máichavarepa:

—Yátupiquenehi máitujíhi eta nájjarasiravainahini eta náehisiranuinahini ena rícoana eta nasiapirainahini te anuma.

²⁵ Esamanuchaha. Eta juca tímicutíjiricavahi eta vipera camello, máitujíhi tánucuhahini te támicuejehe eta parirapa. Ene nacahehi ena rícoana —macahepa.

²⁶ Tacahe, ena tisamararacanaahi, ánipa tacahehi eta nayaseresirahi:

—¡Tétavicavahi eta tamáitujicacarevahi! ¡Nájina títujuicavaimahi náuchucuhahini!

²⁷ Ema Jesús majicapavacapa:

—Nájina émanaina achane émajivaimahi ticuchucuhava. Macarichu ema Viya marataha ticuchucuhahe —macahepa.

²⁸ Émaripa ema Pedro máichavarepa:

—Vítisera, Tata, vinaquicahi tamutu eta vicayhequeneana, vivarairahi véhicavihi.

²⁹ Ema Jesús majicapavarepa:

—Nutupiru numetacahe: Namutu nácani nanaquicahi eta napena, najunijicahivare ena ticachichana, ena naparapenaveana, nayenanapuca, nachichanaveanapuca, táichaveneyarehi eta náehisiranuyare;

³⁰ jararihiyare eta táitsivayare te juca apaquehe eta náimahaqueneyare. Nararihiyarevare ena achaneana téchapajiricanayareva. Tásiha, tavetijinapa te náitecapapa te apana náitaresiraya, máichecuaraquirenapa eta náuricacarevaya —macahepa ema Jesús.

*Ema Jesús tiápechavavare máechajisiha eta máepenirayare
(Mt 20.17-19; Mr 10.32-34)*

³¹ Ema Jesús máiputsiamurihapa mámamurihapa ena dócequeneana máimitureana. Tásiha, máichavacapa:

—Ímaha puiti, viyanainapa vicaijuhénapaipa te Jerusalén. Ánaqui táitauchia-vayare tamutu eta nájucunachaqueneanahi ena profetanaini eta níchararacavayarehi núti Manerjirunúhi ema Viya.

³² Ánaqui nucaijararecasiyare núti nayehe ena apavasaqueneana romanoana. Énainapa ticaecahijiricanuanayare, ticaetemajiricanuanaya, tiátutuquichanuanayareva.

³³ Téstacuanayareva. Tásiha, ticapacuanainapa. Tásihasera te mapanapunénapa sache, néchepucainapa te nécari —máichavacapa.

³⁴ Énasera ena máimitureana vahi nacaicutiarahini eta juca mametasiravacahi. Váhivare náimatiequenehahini tájahapuca eta máechajisihahi taicha vahi náemeteacahini énemahinahíni náichahini ema Jesús.

*Ema Jesús macaimairica ema achane púchuqui ticavasa te Jericó
(Mt 20.29-34; Mr 10.46-52)*

³⁵ Tacahe, te tiánehipa títecapa ema Jesús tayehe eta avasare Jericó. Matiaríhi ema achane púchuqui, téjacahi te achenechacaya tasiaparacuhi eta avasare. Tiyaseserecahi eta limosna.

³⁶ Te masamavacapa ena camuriqueneana achaneana tiánucuhanapaipa, macayasesererupa ema púchuqui tájahahipuca eta téchacarehi.

³⁷ Nametacapasera eta émarahi tiánucuhayarehi ema Jesús Nazareno.

³⁸ Tacahe, tipiaracapa ema achane púchuqui:

—¡Tátachicha Jesús! ¡Pítiqueneripa yátupiquenévihi Cristo! ¡Picatajicanupaini! ¡Pájapanunu! —macahepa.

³⁹ Ena achaneana tínapumiráuchanapahi ema Jesús navarahapa nacamatincayarehini. Émasera tipiararecaichucha:

—¡Tátachicha Jesús! ¡Pítiqueneripa yátupiquenévihi Cristo! ¡Picatajicanupaini! ¡Pájapanunuini! —macahepa.

⁴⁰ Tacahe, ema Jesús te macanarapa, tíchecanumapa. Macavanairipipa náepana ema púchuqui. Te nacaitecapa, mayaserecapa:

⁴¹ —¿Tájaha picamunu nuyehe?

Ema púchuqui majicapavarepa:

—Tátachicha, nuvaraha picaimairicanupaini —macahepa.

⁴² Ema Jesús máichapa:

—Tiuri, nuchicha. Táichavenehi eta picasiñairanuhi, pinaracapa puiti — máichapa.

⁴³ Jéhesareinehi, tǎjahúchavapa timairirica ema púchuqui. Tásiha, tiyanapa máehica ema Jesús tiúrisamurepaipa. Macunachapaipavare ema Viya. Énapa ena achaneana tímararacanañhi eta manarasirahi, ichaperinehi eta nacuna-chirahi ema Viya.

19

Ema Zaqueo mavarahahi máimati ema Jesús

¹⁻² Tacahe, eta máitecapiraipa ema Jesús te tajuhe eta avasare Jericó, matiarahi ema achane rico, ticaijare Zaqueo. Nacapitarahi ena cóbrareca-rahiana eta impuesto.

³ Te masamairirica eta émairahi ema Jesús títecapapahi, mavara-hapa máimatiyarehi. Étasera eta máichipichuvahi éma, vahi máratahahini máimahahini ema Jesús te namuri ena camuriqueneana achaneana.

⁴ Tásiha, tǎjunapapa eta te mayanihayarepahi ema Jesús. Tiápanapa te yucuqui, máimararacasaréipahi ema mavarahaquenehi máimati.

⁵ Tacahe, te macapecupa ema Jesús eta yucuqui mávihahi ema Zaqueo, máesenicapa ema Jesús te anuquehe. Tásiha, máichapa:

—Zaqueo. Yare, piúcupaica, taicha puiti nuvarahahi nunasinumayare te pipena —máichapa.

⁶ Tacahe, ema Zaqueo titátájipa tiúcupaicapa. Tiúrisamuréinehi eta majaca-pirahi ema Jesús.

⁷ Eta náimairahi ena achaneana eta juca, téchajicanapa mayehe ema Jesús. Náichapa:

—Émamesapa máitecapauchayarehi ema maca ticapecaturahitátáji — nacahepa.

⁸ Te téjacanapa te tajuhe, témeñahavapa ema Zaqueo te mamirahu ema Jesús. Tásiha, macahepa:

—Pímaha, Tata Náquenu. Núti néneuchavapa me Viya. Puiti níjaracayare ena páureana ticitimuriacaca eta nímahaqueneana. Nímichavayareva te natiarihipuca ena nucaetemaqueneanañhi, cuátrohénapasera eta táitsivayare eta nímuchavaqueneña —máichapa.

⁹⁻¹⁰ Tásiha, ema Jesús majicapa:

—Nímahapa puiti eta yátupirahi eta péneuchiravahi eta pipecaturana, taicha pivarahahi pímichavayare eta plata picatemarermanahi. Tásiha puiti, pijacapacarepa me Viya. Vaipa pémitiequenéimahi. Taicha píti picutipa ema viáchucaini Abraham eta macasiñavairahi mayehe ema Viya. Píti nuchane-ravipa, picutipa ena apamuriana nucurujiruanahi. Taicha éta tímitcanuhi nuti Manerejirunuhi ema Viya —macahepa ema Jesús.

Ema Jesús máimicutichinava ema príncipe eta májjarasirahi ena machanerana eta maplatane, apaesa nacajurucayarehi

11 Tacahe, ena achaneana, eta náimairahi eta mánehiraripa eta Jerusalén, náimijachaipahi étapa tímiyanayare éma, eta máimeresiravayare eta marreyvayarehi. Tacahe, ema Jesús máimatiacaripa eta napanereruanahi. Tásiha, máimitucavacapa eta apamuri máimicutichinapa apaesa nácaicutiara eta tayerevaichaha eta marreyvayarehi.

12 Máichavacapa:

—Matarihihi ema achane. Ichape eta mapicacarevahi. Tiyanayarehi te apana avasare tayerehiquene. Eta tímiyanayarehi ánaqui máepanihayarehi eta mávacureyarehi eta marreyvayarehi tayehe eta mávasa. Eta machavirayarepa, téjacayarepa éma.

13 Te tiyanayarépa éma, máichuhanumapa ena diésqueneana machanerana. Máijaracavacapa étapevaca eta maplatane tasivachaquenehi. Tásiha, máichavacapa: “Ecajurucayare eta juca nuplatane. Te nuchava, táimecavaipa eta tachichanayare”.

14 Tacahe, tiyanapa ema rey-yarehi tayehe eta macaijuheyarehi. Te máequenepasera, tisemamurianapa ena majaneanana. Ánipa nacahe: “Vahi vávaraha émaina viyehéna rey ema maca” nacahepa. Náimivanerecapa eta comisión, nayaseserecayare vahi nacuijaraca eta mávacuréna.

15 Ticamesavauchuchasera majacapaichucha eta mávacurehi. Te tichavapa te mávasa, téjacapa émapa reysi. Tásiha, máichuhavacapa ena machanerana máijararuanahi eta maplatane. Mayaserecapa te tímecavaipahipuca eta tachichanahi.

16 Tiyanapa ema émana tímerecavapa. Máichapa: “Tata náquenu, eta piplatane píjararunuhi tímecavaipa eta tachichanahi. Diésripa eta tajurusirahi”.

17 Ema rey majicapapa: “Tiuri, nuchicha. Tájina táichava. Tétavicava eta piúriava. Puiti vahi támapurujimahi eta piúrivahi tayehe eta juca ánichichaquenehi níjararuvihí. Puiti níjaracaviyare pituparahaya nujupahaviya. Píti táquenuya eta diésquene avasareana”.

18 Tímerecavavarepa ema apana mamusura. Máichapa: “Tata náquenu, eta píjararunuhi piplatane, tímecavaipahi cinco eta tajurusirahi”.

19 Majicapavarepa: “Tiuri, nuchicha. Tájina táichava. Tétavicava eta piúriava. Puiti nunacaviyare aquenucaviya tayehe eta cincoqueneana avasareana”.

20 Tímerecavavare ema apana mamusura. Máichapa: “Tata náquenu, júcahi eta piplatane. Vahi nucajurucahini. Núnacaichucha, nítipuichahi te pañuelo.

21 Taicha nupicahi nácaetehahini, machu pícuñacanu. Pétáviuchahi píti eta pivainarajiva, taicha píti pivehahi eta nématanevachayaréni”.

22 Tacahe, ema rey máichapa ema machanera: “Eta juca péchajiriruvahi, éta tímicaecherachavihi eta pépiyahiraivahi. Piplujuvahi eta tíchavihi.

23 Te pímatinuhipuca eta nuvainarajivahi, eta nuvehairaya eta pématanevacha, étapa eta nícuñasiraviyare te picamitiacapuca, váhiyapa pinacaini te banco eta nuplatane. Étainahini tajurusihahini apaesainahini nímaequenéahini puiti”.

24 Tásiha, máichavacapa ena apamuriana: “Everejica ema maca eta nuplatane. Íjaraca ema ticajurucahi eta diéspequene”.

25 Éna nacahevarepa: “Tata viáquenu, tímecavaipahinéni diéspepahi eta tajurusirahi”.

26 Ema rey majicapavarepa: “Tiuri numetacaheya: Nácani ticajurucanahi

camuri, nujanechinayare eta apana. Nácánisera tájinaquenehi nacajururé-nahini, nuverejicayare eta nájaracasinihi.

²⁷ Énaserá ena ticatianacananuanihi éna vahi najacapanuhini eta nurrey-vahi, íáminanuyare ani te numirahu. Ecapapajicavaca éna”.

²⁸ Tacahe, te tamutupa eta juca máimituresirahi, ema Jesús tímiyanava-varepa tipaica. Macaijuhepa eta te Jerusalén. Tínapucapa ena máimitureana.

Títecapapa ema Jesús eta te Jerusalén

(Mt 21.1-11; Mr 11.1-11; Jn 12.12-19)

²⁹ Te apanapa semana, tiyananavarepa. Te tiánehipa eta avasarechichana Betfagé étapa eta Betania, tacanaraipahivare eta masihi ticaijare Olivoquiji, títecanumanapa. Mavanecapa ema Jesús ena apinana máimitureana.

³⁰ Máichavacapa:

—Eyanayare eta te jena avasarechicha Betfagé. Te ítecapayarepa, ímahayare eta burrico ticaitihahi. Eta jena sárare mávuéquehéchaha, nájinaichaha ticape-rainahi. Evejapuacayare, íáminanuyare eta ani.

³¹ Te natiarihinapuca náéñama, emetacayare eta nucamunuirahi núti — máichapa.

³² Tacahe, tiyananapa ena vanairucanahi. Jéhesaréinehi étapaichuhi eta mametarapihi éma.

³³ Te navejapuacaripa eta burrico, ena ticayeheana nayaserecapa:

—¿Táviha íámihayare eta viyehe burrico?

³⁴ Éna najicapapa:

—Ema maena Viáquenu macamunuhi —nacahepa.

³⁵ Tacahe, náisapapa eta námiraya eta burrico. Te náitecapauchapa ema Jesús, náepacamaequechapa eta náepacuhana. Tásiha, ticaperapa ema Jesús.

³⁶ Te náimahapa ena achaneana tiúchujicapaipahi ema Jesús, náimati-vanepa. Tiyananapa nácapahi éma. Tépacapairicanapaipa te mamirahu eta náepacuhana te mayanihayarepahi.

³⁷ Eta napaisirahi, témiricanapaipa te tachausi eta cerro ticaijare Olivo-quiji. Namutu ena máimitureana téhicanahi ema Jesús tipiaracanapaipa eta náurisamurevahi taicha eta náimahaqueneanahi tiáramicareana máichaqueneanahi éma. Ichape eta nacunachirahi ema Viya.

³⁸ Ánipa nacahehi eta napiarasirapahi:

—Yare, Tata, ¡Piti réyquene, vanairucaquenévihí me Viya! ¡Asulupaya! ¡Puiti, te anuma vicutitacachi eta viúrisamurevahi víti te eta juca apaquehe! Tétávicava eta vicunachira ema Viya eta macatajisirahavihi —nacahepa.

³⁹ Tacahe, eta nasamirapahi ena fariséoana natiarihiqueneanahi eta napiarasirapahi ena achaneana, náechajicapa ema Jesús:

—Tata maestro, picamatínacavacaichu ena nani pímitureana —náichapa.

⁴⁰ Ema Jesús majicapavacapa:

—Tiuri, numetacahe puiti. Te namatinapuca ena nani, táitsivasera étainapa tipiaracaya eta máriana —macahepa.

⁴¹ Tacahe, títecananapa te tápusi eta cerro Olivoquiji. Ticaecherapa eta Jerusalén. Eta máimairahi ema Jesús eta avasare, tíyahapa táicha.

⁴² Macahepa eta máiyairahi:

—Páurevisami piti návasasami Jerusalén. Te nácaicutiaraini apaesachi-chainaini ena píchichanaveanahi eta nuvarairahi nucuchucuhavaca núti.

Puiti juca sache nutiarahiraripa ani piyehe, náurihainehi nácampuravahini eta náuricacarevahini.

⁴³ Taicha járajapayare eta sáchezare táetaviuchavaya eta nacatajivairaya ena pichichanaveana náicha ena piánaranaya tichayacavianayare. Téhavianainapa, tájinapa piviyavaimahi pícatiuchiavaimahi.

⁴⁴ Témostapaicavianainapa te apaquehe. Nacapapajicavacainapa ena pichichanaveana. Tájina nacaemachaquenémahi eta peti. Tamutuyare náquipapaica. Eta piviuerevaya, eta juca pimajacapiranuhi eta néjirairavihi nuti mavanerunuhi ema Viya —macahepa.

Emá Jesús macuchuchujicavaca ena tjararecanahi eta sárareana, cáyureana te tajuhe eta Templo

(Mt 21.12-17; Mr 11.15-19; Jn 2.13-22)

⁴⁵⁻⁴⁶ Tacahe, te apanapa sache, tíanapa ema Jesús. Tisiapahi te Templo. Máimaharinehi ena achaneana tjararecanahi eta sárareana, cáyureana. Tásiha, tise mapa. Eta macuchuchujisiravacahi, máichavacapa:

—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étisera eti tiámerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichavacapa.

⁴⁷ Eta manasiquenerahi ema Jesús, tamutuhi sácheana tímitureca tayehe eta Templo. Énase ra ena tuparairucana énapa ena escribánoana, napanerechaipahi eta navarairahi nacapaca ema Jesús.

⁴⁸ Váhisera napatsicavahini taicha natiarahi ena camuriqueneana achaneana tisamararacanahi eta máimiturapiana éma. Váhivare náisapaimahi náichahini ena ticatianacanahi.

20

Nayasereca ema Jesús te vanairucahipuca me Viya

(Mt 21.23-27; Mr 11.27-33)

¹ Étana sache tímiturecaichaha ema Jesús tayehe eta Templo eta máechajiriruva ema Viya. Títecaparacanapa ena tuparairucana, énapa ena aquenucarahana, énapa ena escribánoana.

² Nayaserecapa ema Jesús:

—Píti, vahi vitupararuvinahini víti eta píchirahi eta júcana. ¿Nájahasica tivanecavihi? ¿Nájaha tituparacavihi picha eta juca píchaqueneana? —náichapa.

³ Ema Jesús majicapavacapa:

—Núti apanavare nuvaraha nuyaserecahe. Ejicapanuyaresera.

⁴ ¿Nájahapuca tivanecahi ema Juan eta máitesirahi eta máicachasirisirahi? ¿Émapuca ema Viya tivanecahi, émajivahipuca eta máitesirahi? —máichavacapa.

⁵ Váhisera náituruequenehahini eta najicapirayarehi. Tiácapaemajiricanapa. Ánipa nacahe eta náechajiriruvanahi:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhi ema Viya”, éma macahénapapuca: “Tásiha, ¿váhiyapa esuapahini éma?”

⁶ Téhesera vácahepuca: “Émajivaichucha eta máitesirahi”, ticauyayacareipa nacapacahavi ena achaneana te márijahiana, taicha náechahi éna émairahi ema Viya tivanecahi ema Juan —náechajiricacapa.

⁷ Tacahe, ánipa nacahehi eta najicapirahi ema Jesús:

—Vahi vecha víti —nacahepa.

⁸ Ema Jesús máichavarepa:

—Énerichuvare núti, vahi numetacahémahi nájahapuca ema tituparacanuhi —máichapa.

*Ema Jesús máimicutichina ena pártirárioana máurirahana
(Mt 21.33-44; Mr 12.1-11)*

⁹ Tacahe, ema Jesús tépanavavarepa máimitucavaca ena achaneana. Ánipa tacahehi eta máimiturapiana:

—Nuvaraha nímicutichinaheya, tatiarihi eta isaniti amairiha úvaquiji, ma-sucurehi ema émana achane. Tiyanayarehisera ema ticayehe, tipairirica-yarehi te apana avasare. Tacahe, matuparacavacapa ena tírehanayarehi te áñoana eta mayehe uva. Partidoyarepa eta majunijisirayarehi.

¹⁰ Tacahe, te títecapapa eta caje tayairahi eta uva, máimivanerecapa ema mamusura mayaseapanavacayarehi ena pártirárioanahi eta tatucacheque-neyarehi éma. Énaserá ena pártirárioanahi, tájina náijaracahini. Tisemaucha-vanarichucha, náehapa ema vanairucainihi.

¹¹ Tásiha, ema ticayehe máevatacavarepa ema apanavare mamusura, mayaseapanavacayarehi éna. Énerichuvaresera náumehavarepa ema vanairucainihi, náehavarepa. Tájina náijaracahini.

¹² Tásiha, ema ticayehe vahi macainajiruvahini. Máevatacavarepa ema apanavare mamusura. Énerichuvare náehavarepa ema vanairucainihi. Na-jarachapa, náquijicapa.

¹³ Tacahe, ema ticayehe tipanererecaripa: “¿Tájahasica nícharacavayare?” macahepa. “Nuvanecapuca mayana émajacaruvaína ema nuchicha némuna-ruquenehi. Tatiarihi te émainapapuca napicaucha te náimahapa”.

¹⁴ Tacahe, te náimahapa ema machicha, navetijichucha eta nasemirahi. Tímitujiricacanaripa. Ánipa nacahe: “Émainapapuca ticayeheyare ema maca. Yare, vicapaca, apaesa tánasipa tamutu vítinapa vicayehe”.

¹⁵ Tacahe, nacaratapaca éma, nacuchucapa eta tayehe eta isaniti, nacapaca.

Puiti nuyaserecaheyare: ¿Tájahapuca máicharacavayare ema achane ticayehe eta úvaquiji? Jéhesare, vaipa macayehehini paciencia.

¹⁶ Títecavanénapa macapapanavacayarepa ena pártirárioanahi máurirahana. Tásiha, máijaracainavarepa eta úvaquiji ena apamuriana pártirárioa-nayareva —macahepa ema Jesús.

Tacahe, ena tisamararacana, ánipa nacahehi:

—Viti vicatajicacare, vahi vácutihini ena nani máurirahana —nacahepa.

¹⁷ Ema Jesús méesenimuriahavacapa. Tásiha, máichavacapa:

—Jéhepuca, németecasera vuíchaha ácaicutiarahini eta tacayemaquenehi eta Sagrada Escritura. Éta, áni tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitcapapa eta táicuchihi eta tatuparahahi. Tacapichuquenehi puiti” tacahehi eta Sagrada Escritura.

18 Puiti, núti nucutihi eta ichape mari náepuruquenehi. Eti epurunuanahi, íaíquipaicavayare évetutujicayare. Tichimaraçheyare eta muraca ecuñaraqí taicha eta emavarahairahi éhicanu —máichavacapa.

19 Ena tuparairucana navarahapa náijahúçhayarehini nacarataca ema Jesús, taicha tímatiacavanapa éna eta énairahi tayunacavaca eta máechajiriruvana ema Jesús. Váhísera napatsicavahini taicha návamirahuhi ena camuriqueneana achaneana.

Navarahahi náemejecapavacha ema Jesús tayehe eta impuesto

(Mt 21.45-46; 22.15-22; Mr 12.12-17)

20 Tacahe, náimivanerecapa ena apamuriana ajairana tépiyacavanayarepahi tíuriana te mamirahu, navarairahi natanucayare eta tímíçaviuçhayarehi. Énayarepa tímétauçhanavarehi mayehe ema aquenucahi prefecto Poncio Pilato.

21 Tacahe, nayaserecapa éma, ánípa nacahe:

—Tata maestro, vímatíhi eta tatupiruvairahi tíuri eta juca pímiturapianahi. Nájinavare pinerejiruinahini ena achaneana, taicha pívarahahi náéhíçahini namutu eta táurinaquene achene ticaijuhe me Viya.

22 Vivarahahísera víyasereçaviyare: ¿Táuríçahípuca vivachacha eta víyasehana impuesto mayehe ema Presidente Emperador romano? Taicha víti, machanerahívíhi ema Viya, ¿masí? —náíçapa.

23 Ema Jesús máimatiacavacapa eta tamaurivapahi eta napanereruana. Tacahe, máíçhavacapa:

—¿Tájaha tacayema evaraha ímiaquípaicanu?

24 Nímahaseji, íáminanu étapena eta reale.

Éna náíjaracapa. Tásiha, ema máíçhavacapa:

—¿Nájaha ticaijare eta juca? ¿Nájahavare ticavasímahi eta juca mirare eta te juca reale? —máíçhavacapa.

Éna najicapapa:

—Mayehe ema Presidente Emperador.

25 Tacahe, éma máíçhavacapa:

—Tíuri. Táuríçahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma —máíçhavacapa.

26 Váhíquenesera náratahahini náimíaquípaicahini eta nayaseresirahi te namirahu ena achaneana. Táítsivahi ichape eta náramirahi eta táurivahi eta majicapiravacahi. Timatínanapa tésamiríçavanapa.

Nayasereca ema Jesús náíçharacavayarepuca ena náépenaqueneana eta náeçhepusirayare

(Mt 22.23-33; Mr 12.18-27)

27 Nacahepaipavare ena apamuriana achaneana. Saducéoana. Ena nani saducéoana, apana eta náimíurapiana; váhi nasuapa eta náeçhepusirayare ena náépenaqueneana. Éna natanucahi eta táetseraruvayahi. Tacahe, nayaserecapa ema Jesús:

28 —Tata maestro, ema víyarahaini Moisés manaquicahi eta ajureca máechajiriruvahi eta víyehe: “Te máépenaquenehahípuca ema achane

esu mayena, tásiha, nájinahipuca manaquiequeneruvainahini machichainahini; te matiarihhipuca mácani maparapehi, mavehayare esu machine-naequene, apaesa émainapuca macachicha eta suyehe, máitsivainahi ema maparapeni”.

²⁹ Tacutiquene te natiarihhipuca ena siétequeneana ticaparapejiricacana, te títauchavapa ema náechavimuri, máepenaequenehapasera esu mayena. Nájinahi machichainahini.

³⁰ Tacahe, ema maparape máítauchavare esu machinena. Énerichuvaresera máepenaequenehavare, nájinavare machichainahini.

³¹ Ema émana maparape máítauchavare ésu. Énerichuvare máepenaequenehavare. Namutu ena siétequeneana navehahi ésu, tásihasera náepenaequenehapahi, nájina émanainahini mácachichahini eta suyehe.

³² Te táequenepa, tépenapa esu esenaini.

³³ Tacahe puiti, te jéhesarepuca tichavanayare títarecana te táequenénapa eta náepenirahi ena nani, ¿nájahapuca ena siétequeneana éma yátupiquenehi suímaquenehi esu esena? Taicha ena siétequeneana namutuhi suímanarihi — náichapa.

³⁴ Tacahe, ema Jesús majicapavacapa:

—Ena ajairana te juca apaquehe natuparacasivaichuhi títauchavanayare suyehe esu esena.

³⁵ Ánaquisera te apana náitaresira, nácani ticatuparahanayare eta nasiapi-rayare te anuma te náechepucapa, vaipa nácamunuimahi esu esena. Énaripa ena esenana, vaipa nácamunuimahi ema ajaira.

³⁶ Taicha vaipa tíapechavaimahi tépenana. Nacutinapa ena ángeleana eta namaepenacacairahi. Yátupinapa machichanaveanainapa ema Viya, taicha éma ticaechepucavacahi.

³⁷ Émaripa ema víyarahaini Moisés timetacahavi eta májurehi eta yátupirahi eta vahi tánasi tépena eta náchanevana ena náepenaqueneana. Te máimahapa ema Moisés eta yucuqui timurujihí, eta macametacasiyahi mayehe ema Viya eta émarichuhi ema macasiñaquenehi ema Abraham, ema Isaac, émapa ema Jacobo.

³⁸ Taicha ema Viya, ema téchahi eta náitaresirana ena téhicanahi, tayanapane tépenanaripa. Namutu ena, tímiyanavarichucha títareca eta náchanevana te mamirahu éma —macahepa ema Jesús.

³⁹ Tacahe, ena escribánoana, ena natiarihiqueneanahi náichapa ema Jesús:

—Tétupicava eta juca péchajiriruva, tata maestro —nacahepa.

⁴⁰ Váipasera nacaemuñavahini nápechavahini nayasereca.

Ema Cristo, yátupiquenehi Viya. Mámariéquenenihisera ema rey David (Mt 22.41-46; Mr 12.35-37)

⁴¹ Ema Jesús máichavacavarepa:

—Éti ecahehi eta échajiriruvahi: “Tiúchucayare ema Cristo, mámarieque-neyare ema víyarahaini rey David” ecahehi.

⁴² Yátupihí ema Cristo achanequenehi eta máimahi taicha mámariequene-nihí ema víyarahaini David. Nuvarahasera epanerechaya eta juca máechajiriruvahi ema David te májurehi Salmo, ani macahehi:

⁴³ “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa.

⁴⁴ Ema David, eta máimijarechirahi ema Cristo: “Tata Náquenu”, ¿tájahapuca eta macayemaquenehi? Nutupiruva numetacahe: ema Cristo yátupi-quenehi Viya éma. ¿Tájaha íchahi éti? —máichavacapa.

*Ema Jesús máimereuchavaca eta nájecapiravana ena escribánoana
(Mt 23.1-36; Mr 12.38-40; Lc 11.37-54)*

⁴⁵ Namutu ena achaneana nasamararacahi ema Jesús eta máechajisira-vacahi ena máimitureana.

⁴⁶ Ánipa macahehi eta nayehe:

—Échapavayare éti, machu éhica eta nayeherepiana ena escribánoana. Navarahavare ticapicahuanayarehi eta náechajisiraya ena achaneana te jácani nácapajisihapahi éna. Tacutiquene tinerejiurucavana eta táurina-queneana téjasihacareana te tiyanana te viúrujisirarevana. Étaripa te nanisir-ana, ticaejacavanavare te jácani távihahi eta tiúrinisipana tinicacare.

⁴⁷ Tacutiquene naverejicavare eta nacayehequeneana ena tépenaimana, nájina najapanuquenéna. Tásiha, tépiyacavanapa religiósoanahi, tiúpiemana eta nayujarasira, namavarairahi tácaecherahini eta náichira eta tamauri-queneana. Énasea tiápajucavanahi eta nacaicuñairaya muraca.

21

*Eta sunaquiruva esu máimaru tacachuricahi eta nanaquiruvana ena rícoana
(Mr 12.41-44)*

¹ Ema Jesús máimamaracahi ena rícoana eta nanaquisirava eta plata tayehe eta chapama nanaquisirareva eta námavahuana mayehe ema Viya.

² Énerichuvare máimahavare tinaquicava esu ésuna esena suépenai-maquene. Páurequenehi ésu. Sunaquicahisera eta apipechichahi eta suplatane.

³ Tacahe, ema Jesús macahepa:

—Ímaha esu suca esena páurechicha. Ácuneucha eta suémunasirahi ema Viya. Jéhesare ésu, tímepanávhahi eta sunaquiruva, sucachuricavacahi namutu ena apamuriana achaneana.

⁴ Taicha namutu éna tacarichu nanaquicahi eta náemacharajiana napla-taneana. Ésusera esu suca páurehinéni, sunaquicahisera tamutu eta sucaye-hequenehi. Suítahi eta sunicavachayahini —macahepa.

*Ema Jesús máimereucharipa eta táquipaisiravaya eta Templo
(Mt 24.1-2; Mr 13.1-2)*

⁵ Natiarihihi ena téchajisihanahi eta Templo. Náechajisihahivare eta táurinaqueneana tayereruvana nanaquiruanahi ena achaneana, étapa eta táurinavavacahi eta máriana tayeheanahi. Ichapemurihi eta táajeravahi te nacaematanénapa. Tacahe, ema Jesús máichavacapa:

⁶ —Járajapayare eta sáchevayare ticaquipaicasinapa tamutu eta juca Témplosami. Téjanerepaicainapa tamutu eta juca táurinaqueneanahi ímaqueneana puiti —macahepa.

*Tatiarihiyare eta ecutiarareanaya te tánehipaicha eta táichecurraya
(Mt 24.3-8; Mr 13.3-8)*

⁷ Tacahe, nayaserecapa ema Jesús. Náichapa:

—Tata Maestro, ¿tájamuhuyarehipuca eta náimiauquipaisirayare eta Témplosami? ¿Jararihiyarepuca eta ecutiarareyare eta apana péchajisahaqueneana? —náichapa.

⁸ Ema Jesús máichavacapa:

—Ecuneuchavaicha yátupina, machu navayuacahe, taicha nárabajayare ena tépiyacavanayarepahi tímivasichavanayarepahi nuyehe. “Nútiripa Cristo” nacadénapa. Ena apamuriana nacadénapa: “Táitecapaqueneapa puíti eta sache”. Váhiserá ecusuapavaca, váhivare ecuehicavaca.

⁹ Étaripa te esamairicapuca eta guerra, revoluciónpuca, váhivare ecuarameca. Taicha eta táinapuraquianayarehi eta júcana ecutiarareanayare, vuíchahasera étaimahi eta táichecurayá.

¹⁰ Ánivare macahe:

—Téhacacayareva eta ichapequeneana avasareana. Ticanarajiricacainapa eta apamuriana.

¹¹ Tatiarihiyareva eta ichapeyare tayamurisirana eta apaquehe. Te avasareana tatiarihiyare eta ecuhamuhuyareva, jumaremuhyareva. Te anuma tímerecavainavarepa eta ichape ecutiarareya, tiámayare eta ecuñarayare.

Ena achaneana napanajiricainapa ena téhicanahi ema Viáquenu (Mt 24.9-28; Mr 13.9-23)

¹² Tativanumayaresera tipanajiricaheanayare éti, táichavenénahi eta éhisiranuhi níti. Ticaratacaheanayare, tiámaheanayare te náurujisirarevana, ecayaserehinapa nayeche ena juéseana. Ecaevatainapa te cárcel. Tásiha, etiarihiyare eti tiámaheanaya te namirahu ena aquenucana, téhevere te namirahu ena Presidenteana gobiernonahi, ecaviurevayare táichavenehi eta éhisiranuhi.

¹³⁻¹⁴ Étumechavasera. Te námahepa te ecayaserehiyaya, ecamapuravainapa échajisianuyare. Váhi ecueñamava eta ecayemayare ecatiuchiravaya.

¹⁵ Nímahahéinepa níti, níjaracaheyare eta ítusirayare ecatiuchava. Nájina ácutimahi eta ítupajjiasiravaya. Ichape ecachuricayare ena iánaranaya.

¹⁶ Etiarihiyare éti énajacaruvainapa ena ticachichaheana tíjararecaheanaya énaripa nácani eparapeanapuca, énajacaruvayareva tíjararecaheana, ényarepaichupuca ena ejaneana, ítunacasareana. Enerejicavainapa eti nacapuruanaya.

¹⁷ Namutu ena acha neana ticatianacaheanayare táichavenénahi eta éhisiranuhi.

¹⁸ Tayanapanesera nacapacahepuca, nímahahéinepasera níti. Vahi émitiequenémahi. Étaripa eta echutimacana, tájinavare témitiequenémahi.

¹⁹ Téhesera ecamichahi tamutu, ímiyanavahi eta éhisiranuhi, níti níjaracaheyare eta ítaresiraya.

²⁰ Te ímahapa ena suntaruana nachayacapa eta Jerusalén, étanaqueneayarehi ejército eta náichapemurivaya, étainapa ícutiaraya eta táitavirayare eta avasare.

²¹ Tásiha, te ímahapa eta juca, táuricapa etátájinapa ejuna, eti etiarihiqueneanahi te Judea. Ecajúheyare eta te céroana, étaina eyumurusivaya. Nácani tiávihanahi te tajuhe eta avasare Jerusalén, tavarahaipahi náuchucavane tayehe. Nácani tiávihanahi te vámahiana, vaipa távarahahini nachavahini tayehe eta avasare.

²² Taicha táitecapauchainapa eta tasacherayarehi eta tacaicuñairaya, títauchavainapa eta tametarapi eta Sagrada Escritura.

²³ ¡Páureanasami nácani esenana tachimararuanayare, nácani ticajariana-hipuca, nácani esenana ticachichanahi eta amuya tiájicachaha! Támairi-jicainapa eta nacatajivairayare namutu ena achaneana tiávihanahi te Jerusalén taicha eta náicuñayare.

²⁴ Natiarihi ena tépenanaya te guerra, ena apamuriana nacaratatajicainapa prisionéroanainapa. Námavacainapa te apanaqueneana avasareana. Ema Viya máisapainapa tisiapana te Jerusalén ena apavasaqueneana. Énapa téchanayare eta Jerusalén. Tiámainucava te máicutichapa ema Viya, macuchucavacainavarepa.

Eta máitesiraya ema Manerejiruhi ema Viya

(Mt 24.29-35, 42-44; Mr 13.24-37)

²⁵ Tacahe, tímerecavanainapa eta ecutiarareyare te sache, te caje, étapa te jarairiquiana. Tipicanainapa ena achaneana te juca apaquehe. Tiáramecanainavarepa taicha eta nasamirayare eta muracaquene táepacuruha eta ichapequene une.

²⁶ Ena achaneana tiáquipaicavanainapa eta napsiraya, taicha eta náimairayare eta ecutiarareanayare, váhisera náimatiequenehaimahi tájahapuca eta náichararacavayarehi. Énerichuvare tiyjecavavacainapa eta tiávihanahi te anuquehe anuma.

²⁷ Nupaenumava nítecanapa nuchava núti Manerejirunuhi ema Viya. Namutu tímahanuanayare eta núcupaisirayare. Tiámanuinapaipa eta úcaji. Níñehinapaipa eta táetaviuchirayare eta nujaraivayarepahi.

²⁸ Te ímahapa tanacuchavapa eta juca ecutiarareanayare, evapinavainapa éti taicha tiánehiripa eta nítecapiraya nucatiuchiráheyare.

²⁹ Máimicutirachinavare eta máimituresirahi. Ánipa macahe:

—Ecauneyare eta jácani yucuqui.

³⁰ Te ímahapa títsivachavavacapa eta tapacajiana, tiánehiripa eta únemuhuyareipa.

³¹ Ene tacahehi, te ímahayarepa, ímatiacainapa eta tánehiriripa eta nítesirayare.

³² Numetacahevanecha: Vuíchaha títavanaimahi ena achaneana náitare-ruanaichaha te táitecapapa eta juca ecutiarareanaya.

³³ Títavayarepa eta anuma étapa eta apaquehe. Tativayaresera títauchava tamutu eta numetaruhehi.

³⁴ Échapavaicha, machu tachimaracahe eta jena sache, vahi ecucuti ena tavayuaruana eta tércare, machu muracachutihéna táicha. Vahi ecueñamava eta itaresira, machu tahapapicahe eta éhisiranuhi.

³⁵ Eta táitecapauchirayare eta sache nuchavirayare tímicutitjiricavahi eta tájahúchirava eta táeratasirava eta trampa. Ene nacahayare ena achaneana te tamutu avasareana eta namanecapachiravaya.

³⁶ Eta tacahe, etsecavaicha yátupina. Eyujarauchavahi támutu sácheana, apaesa túmehénapa eta ecamichiraina tamutu eta juca táichararacavayare, apaesa tacuija ecuichiravaina eta ítecapauchiranuya te numirahu nuti Manerejirunuhi ema Viya —macahepa ema Jesús.

³⁷ Tiuri, tamutu sácheana tiyana eta te Templo ema Jesús. Tímiturecahi. Te yátivare tiyanavare te avasarechicha Betania te táequenehi eta cerro Olivoqui.

³⁸ Ena achaneana, tamutu yáticarahiana, tiyanana te Templo, titsecavannaripa eta nasamararasirayare éma.

22

*Napanerechapa eta nacaratasiraya ema Jesús
(Mt 26.1-5, 14-16; Mr 14.1-2, 10-11; Jn 11.45-53)*

¹ Tamirahupaipaicha eta piesta ticaijare Pascua, eta náepanavaira eta semana eta nanisirahi étachucha pan mayehere levadura.

² Tacahe, ena tuparairucana énapa ena escribánoana, navarahaichaha náimicapaca ema Jesús. Tásiha, natanucahi eta náicharacayare eta nacaratasirayare. Návamirahuhisera ena achaneana.

³ Tacahe, ema Satanás mávahácapa ema émana máimiture ticaijare Júlasí. Émarichuhi nachamurihi ena dócequeneana apóstoleana.

⁴ Tacahe, ema maca Júlasí tiyanapa matanupanavacahi ena tuparairucana, énapa ena nacápítárana ena suntaruana tayehe eta Templo. Téchajiripanavayarehi nayehe, mametacavacaipa eta táicharacavayarehi eta máijararesirayarehi ema Jesús eta nayehe.

⁵ Tiúrisamureanarinehi eta mametasiravacahi éma. Nametacapa eta náijarasarayarehi eta plata.

⁶ Tacahe, éma majacapavacapa eta naplatane. Tásiha, máichavacapa:

—Tiuri, núti népanahayare te nímahapa nacuijapa ena achaneana te machacaya. Námahénapa tayehe eta mávihahi éma —máichavacapa.

*Ema Jesús mavanecahi ena apinana máimitureana, natsecayare eta naniruyare tayehe eta Pascua
(Mt 26.17-25; Mr 14.12-21; Jn 13.21-30)*

⁷ Títecapapa eta sache táepaniravahi eta semana tapiestara eta nanisiraya eta pan mayehere levadura. Étarichuvare eta jena sache ticaijare Pascua, nacapasiraya eta uvesa ticaijare cordero pascual, nanisirayare te jena yati.

⁸ Ema Jesús mavanecavacapa ena apinana máimitureana, ema Pedro émapa ema Juan. Máichavacapa:

—Eyanayare étupiripanaya eta viniruyare tayehe eta Pascua.

⁹ Éna nayaserecapa:

—¿Táviha pivaraha vétupirisihaya?

¹⁰ Ema Jesús majicapavarepa:

—Eyanayare tayehe eta avasare. Te ítecapayarepa tayehe, iácapajicayare ema émana achane tiámapahi eta une te yupi. Éhicayare éma te peti masiapihayare. Éti apana esiapayareva.

¹¹ Emetacayare ema ticayehe eta peti. Ani íchayare: “Ema viyehe Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare.

¹² Éma, tímechahénapa eta ichape cuarto te anuquehe piso. Táuriquenéipahi eta jácara téjasihacareana. Tásiha, étupiricapa eta viniruyare —máichavacapa ema Jesús.

¹³ Tiyananapa ena vanairucanahi. Jéhesaréinehi, náimahapa étaipachuhi eta macayemaqueneanahi ema Jesús. Tacahe, náetupiricapa eta naniruyare tayeheyarehi eta Pascua.

*Ena Jesús máenimurihapa ena máimitureana
(Mt 26.26-29; Mr 14.22-25; 1 Co 11.23-26)*

¹⁴ Tacahe, te hórapa eta nanisirayarehi, téjacanapa te mesa ema Jesús énapa ena apóstoleana.

¹⁵ Eta máenisiravacapa, máichavacahi éna:

—Ichapemuri eta nuvarairahi nucachanehe eta nunisirayarehi eta juca téqueneha nénisirahehi puiti eta juca yati páscuairahi, mapurare vuíchaha táitecapahini eta népenirayare.

¹⁶ Tásiha, numetacahevaneya puiti, vaipa nápechavaimahi nunica eta Pascua, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

¹⁷ Tacahe, mavehapa eta vasu náerirare, mahasulupayachapa ema Viya. Tásiha, macahepa:

—Era eta juca. Ecajjiricaca.

¹⁸ Puiti numetacahevane: Vaipa nápechavaimahi nera eta juca tachi eta uva, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

¹⁹ Tacahe, mavehavarepa eta pan, mahasulupayachavarepa ema Viya. Mayuvetuecapa, májjaracavacapa ena máimitureana. Tásiha, máichavacapa:

—Eta juca neche. Enica. Étivenehi níjararecavahi eta népenirayare. Eta juca aparahiyare te apaquehe, te étipava énicaca, éta témechaheyare nuyehe — máichavacapa.

²⁰ Énerichuware, te títalesianapa, mavehavarepa eta náerirare vasu. Máichavacapa:

—Eta juca vino, táicutiarahi eta nítine táepusairuvaya íchavene éti, nufirmachirayare eta arairu matratune ema Vicaiyaquene, nucaejasirayareva eta matratune apaesa ejacapacareya mayehe.

²¹ Puítisera, ani te etaracu, mararihi ema tíjararecanuyare.

²² Yátupiquenehi eta nacapasiranuyarehi, taicha tacahehi eta mapaneruhi ema Tata eta nuyehe nuti Manerejirunuhi éma. Páuresamisera ema tíjararecanuya —macahepa.

²³ Tacahe, ena máimitureana tiyaserejiricacanapa:

—¿Nájahapuca mácani te vitaracu ema tíjararecaya ema Viáquenu? — nacahepa.

Ena Jesús máimitucavaca eta nacapicahuirayare eta téchapajiricanahi ena nachamuriana

²⁴ Te táequeneha, tiácapaemajiricanapa ena máimitureana tayehe eta nájahayarepuca ema ichapequenepanaya aquenuca te nataracu te náejasiraya te návacureanayare.

²⁵ Te máechapa ema Jesús, ánipa máichavaca:

—Ena réyeana énapa ena aquenucana te ichapequeneana avasareana nacaetemajiricavacahi ena achaneana, navarairahi ticapicahuanayarehi.

²⁶ Étisera vahi táuricaimahi ene ácahehini. Téhesera evarahahipuca ecapicahu, vahi ecasiñavaimahi. Ecutiyare ema amaperu eta mamansuvahi. Tacutiqene nácani tivanecanahi, tatuparacavacahi téñamavanayare eta náechapajirisiravacayare ena nachamuriana.

²⁷ Eta nayeherepi ena achaneana, ichape eta napicauchirahi ema ténicahi eta tinicacare. Énasera ena vanairucana téchapajiricanahi eta mesa, vahi

nacapicahuhini. Puítisera, nímitucaheyare eta juca arairu nuvanairipi. Puiti ímahanuipa eta nítátirahehi. Nuvaraha ecutinuya. Ítáticacayare éti.

²⁸ Éti, ímararacanuhi eta náichiranuhi ena ticatianacanuanihi. Váhisera ejunijicanuhini.

²⁹ Eta tacahe, níjaracaheyare núti eta etuparahanayare ecutinuyare núti eta nucatuparahairaya mayehe ema Tata.

³⁰ Éjacainapa tayehe eta ecaturarahairaya. Étinapa evanerecaya nayehe ena dócemuriqueneana ena vijaneanana israelítana. Ecachanenuinavarepa te mesa eta enisiraya ánaqui te nucatuparahairayare —máichapa.

Ena Jesús máimereucha ema Pedro eta máepiyasiraya vahi máimati ema Jesús (Mt 26.31-35; Mr 14.27-31; Jn 13.36-38)

³¹ Ena Viáquenu máichapa ema Pedro:

—Nuchicha Simón, péchapavayare. Ema Satanás, ichape eta mavarairahi ticaicutiraheyare tiáquiapaicahayare emutu éti.

³² Nútisera nuyaseuchahehi me Tata, pítipa, apaesa vahi tacuemitiaca eta péhisiranuhi. Piáquiapaicavasamiyaresera. Tichavayaresera eta picasiñairanuya, tásiha péturechavacainavarepa ena apamuriana pichamuriana —máichapa.

³³ Ena Pedro majicapapa, máichapa:

—Tata Náquenu, tájina vahi nujunijicavímahi. Níjaracava néhicavi tayehe eta cárcel. Te nacapacavipuca, núti apanavare níjaracavavare nacapacanu apaesa nácachanevi —macahepa.

³⁴ Ena Jesús majicapapa:

—Numetacavivaneya, Pedro. Puiti jena yati, te tamirahuinarichaha eta táechajisiraya eta varayu, piti mapaheyare pépiyacavayare vahi pímatinu, eta picatiuchiravayare pítipa —máichapa.

Puiti etserereacavainapa

³⁵ Tacahe, ema Jesús mayaserecavacavarepa ena máimatureana. Máichavacapa:

—Te nuvanecahénapa epaica, nutuparacahehi vahi ecuama eta tarera, eta billetera, eta eparupevana, ζύαtipihí, masi, vahi ecamunuvapahini?

Ena najicapapa:

—Tájina vácamunuipahini.

³⁶ Tásiha, máichavacavarepa:

—Puítisera mácani ticatarerahi, tiúripanahi mámayare eta matarera, étapa eta mayehe billetera. Émaripa mácani tájinahi mayehénahi espada, tiúripanahi máijarareca eta masacu, mavacharesihaya eta mayeheyare espada.

³⁷ Tacahe numetacahévanécha. Ena achaneana nacatianacahaviya muraca. Titauchavainapa eta táechajiriruvanahi eta Sagrada Escritura eta nícharacavayarehi: “Timicutijiricavahi námerahihini náicha”. Tamutu títauchavayarehi eta tacayemaqueneanahi eta Sagrada Escritura eta nuyehe —macahepa.

³⁸ Tacahe, ena máimatureana náichapa:

—Tata Viáquenu, jucarihi apinahi eta espada.

Éma majicapavacapa:

—Tiuri, tarataquene.

Ena Jesús tiyujaraca te Getsemani

(Mt 26.36-46; Mr 14.32-42)

³⁹ Tacahe, tiúchucapa ena Jesús, énapa ena máimitureana, tiyananapa tayehe eta huerta Getsemani tiávihihi te táemiripaisinehi eta cerro ticaijarehi Olivoqui, eta mayujarasirarehi éma.

⁴⁰ Te titecapanapa tayehe eta Getsemani, máichavacapa:

—Eyujauchava. Eyaseaca ena Viya eta étumevaina apaesa vahi macuiturucahe ena Satanás —máichapa.

⁴¹ Térajipanavapa apaesa ena Jesús eta nayehe. Cincuenta metro eta mayerehinévacahi. Tépuycapa.

⁴² Eta mayujarauchiravahi, ánipa macahe:

—Tátachicha Nucaiyaquene, picatajicanupaini. Nuyaseacavi vahi tacuitauchavaini eta níchavaquenevayare. Váhini picuisapaini eta nucatajivairaya. Níjaracavatera núti eta nítauchiraya eta pivarahaquenehi piti eta nuyehe —macahepa.

⁴³ Tacahe, tiáramicarepa máucupaucha ena émana ánglele tiásihahi te anuma. Máetumechapanayarehi.

⁴⁴ Ichape eta máeñamiravahi eta mayujarasirahi. Témiricapa eta máepatsure tacasiriquiamapahi eta máitine. Cuájjuamapaipa eta táemirisirahi te apaquehe.

⁴⁵ Te titapiricapa eta mayujarasirahi, téchepucapa. Tiyanapa te návihihi ena máimitureana. Máimahainehi éna, tímacanaripahi táichavenehi eta nacatisamurevairahi.

⁴⁶ Tásiha, máichavacapa:

—¿Tájaha tacayema ímacaichucha éti? Échepuca. Eyujauchava apaesaina. Eyaseaca ena Viya eta étumevaina apaesa vahi macuiturucahe ena Satanás —máichavacapa.

Nacaratacapa ena Jesús

(Mt 26.47-56; Mr 14.43-50; Jn 18.2-11)

⁴⁷ Tacahe, téchejiricavainirichaha ena Jesús, titecapananecha ena camuriqueneana suntaruana. Máinapumirauchavacapaipahi ena Júlasi. Témeñahavapa eta mayehe ena Jesús. Máetserarecapa.

⁴⁸ Tásiha, ena Jesús máichapa:

—Júlasi, ¿tájaha tacayema pétserarecanu eta píjararesiranuhi nuti Manerejirunuhi ena Viya? —máichapa.

⁴⁹ Tacahe, ena máimitureana natiariqueneanahi, eta náimairahi ena camuriqueneana suntaruana, nayaserecapa ena Jesús. Ánipa nacahe:

—Tata Viáquenu, ¿vicatiuchava te espada?

⁵⁰ Tásiha, ena émana mavehapa eta mayehe espada. Mayuchatipaisinapa eta machaca tinapa te vaure ena mamusura ena aquenuca Caifás.

⁵¹ Ena Jesús máicha nuti Manerejirunuhi ena vacapa:

—Ésamiricavachucha —macahepa.

Tásiha, ena Jesús mavehapa eta machacaini ena achane, máimichavapa máipistaca, tinaracavanepa.

⁵² Tásiha, máichavacapa ena Jesús ena tuparairucana natiariqueneanapahi eta nacaratasirahi éma, énapa ena aquenucarahana, énapa ena oficiáleana tayehe eta Templo. Macajachavacapa:

—¿Tájaha tacayema ecasiña eta espada, ecaepuchiriquipahivare eta etanu-siranupahi, tímicitijiricavapa námerahihini núti?

⁵³ Étayapasca cape juca tamutuhi sácheana nucachanehehi tayehe eta Templo. Váhivare epatsicavahini ecaratacanhini. Étiserá iúricapuca eta tamapicuvahi eta yátimuhuhi eta íchirahi eta tauriqueneanahi taicha mávaháruhehi ema Satanás. Máisapaquenéhevarepa ema Tata eta ecarata-siranuyarehi —máichavacapa.

Ena Pedro tépiyacavapa vahi máimati ema Jesús

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Tacahe, nacaratacapa ema Jesús. Námapa te mapena ema corregidor Caifás. Émasera ema Pedro máehiequenehavacapaipa.

⁵⁵ Ánaqui te tajuhe te canchón, ticamururecanapa eta yucu násasiavayarehi. Téjamurihanapa te tachacaya eta yucu. Téjacavarepa ema Pedro te namuri.

⁵⁶ Sucahepaipahi esu sirvienta, suímahapa ema Pedro eta máejasirahi te tachacaya eta yucu. Suímararacaripahi. Tásiha, suíchapa:

—Eñi ñica achane éñirichu ñichamuri eñi Jesús.

⁵⁷ Émasera ema Pedro tépiyacavapa vahi máimati. Máichapa:

—Pímaha, esena, vahi nímati núti ema píchaquenehi.

⁵⁸ Te tiyererehachhavare, máimarácaripavare ema apana. Máichapa:

—Píti pítirichu machamurivi ema maca.

Ena Pedro majicapavarepa:

—Vahi, tata. Vahi machamurinuina —máichapa.

⁵⁹ Te hórapapuca eta táetavisiravahi, máimahavarepa ema apana, máimatipa eta máechajirisirava ema Pedro. Máichapa:

—Yátupiquene pítirichu machamuri ema maena Jesús, taicha eti ecavasana te Galilea, tímaticarehi eta échajisira —máichapa.

⁶⁰ Ena Pedro majicapapa:

—Vahi nímati, tata, nájahapuca ema maena píchaquenehi —macahepa.

Tacahe, téchajiricavainirichaha ema Pedro, énevanepa téchajicanecha eta varayu.

⁶¹ Ena Viáquenu máesenicapa ema Pedro. Enévanerinehi téchava ema Pedro eta mametarapianahi ema Viáquenu eta máichirahi: “Te tamirahui-narichaha eta táechajisirayare eta varayu, píti mapaheyare pépiyacavayare vahi pímatinu”.

⁶² Tásiha, tiúchucavanepa ema Pedro. Tíyahapa taicha máimativanepa eta táichapevahi eta májecapiravahi.

Nacaecahijiricapa ema Jesús

(Mt 26.67-68; Mr 14.65)

⁶³ Ena suntaruana tijaneacanahi ema Jesús, nacaecahijiricapa éma. Náehararacapa.

⁶⁴ Náitiquichavare. Náehamirahavare. Tásiha, náichapa:

—Vímahasejicacha, te pijarauquipuca, pímatihaviyare nájahapuca ema téhamirahavíhi —nacahepa.

⁶⁵ Ichapemurivare eta napanararachirahi éma.

Nacatupihapa ema Jesús te namirahu ena aquenucana

(Mt 26.59-66; Mr 14.55-64; Jn 18.19-24)

⁶⁶ Te tijarahipa, ticurujicacanapa ena tuparairucana, énapa ena aquenucarahana, énapa ena escribánoana. Námapa ema Jesús, nacatupihapa te namirahu. Nayaserecapa:

⁶⁷ —Viyaserecaviyare. ¿Pítisaréji Cristo, ema vicuchapaquenehi? — náichapa.

Majicapapa ema Jesús:

—Tiuri, te numetacahe eta nútirahi, éti vahi esuapanuimahi.

⁶⁸ Téhevare nímechahepuca eta ícutiaraina eta nútirahi, éti váhivare esuapanuimahi. Énerichuvare váhivare ecaiticanuimahi.

⁶⁹ Étainapasera nucaijuheyare te anuma nuti Manerejirunuhi ema Viya eta néjasirainapa te mavaure ema Tata, máitupajjihaquenehi éma —máichapa éma Jesús.

⁷⁰ Nayaserecavare namutu, náichapa:

—Tacahe piti, ¿pímijachavapuca machichavi ema Viya?

Ema majicapavacapa:

—Yátupi machichanu —máichapa.

⁷¹ Tacahe, éna nacahepa:

—Vaipa tácomesa vicayasasereruhini ena testígoana. Émaquenepa visamahi puiti eta juca máechajiriruvahi, étapa ticaviureya —nacahepa.

23

Námapa ema Jesús te mamirahu ema Pilato

(Mt 27.1-2, 11-14; Mr 15.1-5; Jn 18.28-38)

¹ Tacahe, téchepumurihanapa namutu. Námapa ema Jesús te mamirahu ema Pilato.

² Te nacaitecapa, náepiyaequenehapa éma. Ánipa nacahe:

—Viámaphahi ema maca achane ani te pimirahu. Mavarahahi mahapapishahaviyare ena vichaneranahi. Énerichuvare macahehi váhiji táurica vivachahahini eta impuesto mayehe ema viyeha Presidente Emperador. Énerichuvare, macahehivare eta émairahíji Cristo, ema réy-yarehíji —náichapa.

³ Tásiha, ema Pilato mayaserecapa ema Jesús:

—¿Yátupisareji réyvihí píti nayehe ena pijaneanana israelítana? —máichapa.

Ema Jesús majicapapa:

—Pitupiruvahi eta juca piyaseresiranuhi. Yátupihí eta nurreyvahi —máichapa ema Jesús.

⁴ Tacahe, ema Pilato máichavacapa ena tuparairucana énapa ena achaneana natiarihiqueneanahi:

—Tájina maviurevaina eta nímairahi ema maca achane —máichavacapa.

⁵ Énasera nayurucapa muraca ema Pilato. Ánipa naicha:

—Ema maca, ichape eta mahapapisirahi eta napanereruana namutu ena achaneana vijaneanana israelítana, énaripa ena ticavasanahi te Galilea étapa ani te juca Jerusalén —náichapa.

Ema Jesús námavare te mamirahu ema Herodes

⁶ Eta masamiravacahi ema Pilato, macayasasererupa te étahipuca te Galilea macavasahi ema Jesús.

⁷ Te nametacapa eta étairahi macavasa ema Jesús, macavanairipipa ema Pilato nama mayehe ema Herodes, aquenucahi tayehe eta Galilea, taicha ema Herodes matiarihíhi tayehe eta Jerusalén eta jena sácheana páscuairahi.

⁸ Tacahe, tiúrisamuréinehi ema Herodes eta máimairahi ema Jesús. Ichapemurihi eta mavarairahi máimati taicha masamairiricahi tamutu eta tiáramicareana máichaqueneanapahi ema Jesús. Mavarahainehi tñjahúchava máimahahini eta jácani tiáramicare.

⁹ Ichapemurihi eta mayaseseresirahi. Émasera ema Jesús, tájina vahi majicapahini.

¹⁰ Natiarhipahivare ena tuparairucana. Tétavicavahi eta nasemanevahi eta náepiyaequenehairapahi.

¹¹ Tásiha, ema Herodes énapa ena masuntarurana, ichaperinehi eta náepuruirahi. Tacahe, ema Herodes mavehapa eta mamuirihaini manaquiriaruvaipahi, táepahamequeneripahi eta tajananumesirainihi. Mamuripachapa ema Jesús. Táicutiarahi eta nacaecahirahi éma. Tásiha, macavanairipavarepa ema Herodes náimichava te mamirahu ema Pilato.

¹² Ema Herodes énapa ema Pilato ticatianacananinihi eta náitaresirahi. Étasera te jena sáchequenehi tichavapa eta náemunasiracacahi.

Éma Pilato macavanairipipa eta náetatasiraya ema Jesús

(Mt 27.15-26; Mr 15.6-15; Jn 18.39-19.16)

¹³ Tacahe, ema Pilato eta máimairahi náimichavirahi eta mayehe, macurujimurihapa ena tuparairucanahi énapa ena achaneana.

¹⁴ Tacahe, máichavacapa:

—Eta iámirapahi ema maca achane te numirahu, ímjachahi mahapapicavaca ena achaneana. Nútisera nímahahi tájina maviurevainahi eta nuyaseserirahi te emirahu eta ímjachaquenehi eta májecapiravanahi.

¹⁵ Émaripa ema Herodes máimichavavare eta ani nuyeh taicha tájinavare máimahahini eta májecapiravainahini. Étainahipucaini taviuchahini táimicapahini.

¹⁶ Tiúriserapuca nímivanereca macaemecharahi, tásiha, nucaiticapa — máichavacapa.

¹⁷ Eta mayeherepi ema Pilato te Páscuamuhuana te añoana macaiticayarehi ema émana preso te jena sáchequenehi.

¹⁸ Tacahe, ena achaneana vahi návarahahini máuchucuhahini ema Jesús. Tipiaracanapa muraca. Ánipa nacahe:

—Vahi vávaraha máuchucuha ema maca. Émaina máuchucuha ema Barrabás —nacahepa.

¹⁹ Éma Barrabás te cárcel mávihahi. Táimicuñaruhi eta máichirahi eta revolución étape eta macapahivahi.

²⁰ Émasera ema Pilato mavarahaichucha macaiticayarehi ema Jesús. Mayaseremurihavarepa.

²¹ Énasera muracapanapaichucha eta napiarasirahi:

—¡Pémetatareca te crusu! ¡Pémetatareca te crusu! —nacahepa.

²² Mapahequenepa eta mayaseseriravacahi éma:

—¿Tájasica eta maviurevahi ema maca? Núti tájina nímaha maviurevainahi táimicapahini. Tiúriserapuca nímivanereca macaemecharahi, tásiha, nucaiticapa —máichavacapa.

²³ Énasera timitujiricacanapa eta napiarasiraina nayaseasiraina eta macaetatairaya te crusu.

²⁴ Jéhesaréinehi, ema Pilato masuapavacapa eta nayasearapihi ena tuparairucana.

²⁵ Émapa tiúchucuhahi ema Barrabás ema nayasesereruhi, táimicuñaruhi eta máichirahi eta revolución étapa eta macapahivahi. Macavanairipipa táitauçhava eta navarahaquenahi éna, eta nacapasiraya ema Jesús te crusu.

Nátatacapa ema Jesús te crusu

(Mt 27.32-44; Mr 15.21-32; Jn 19.17-27)

²⁶ Tacahe, námapa ema Jesús tayehe eta macaetataiyayarehi. Eta napaisirapahi te calle, nácapajicapa ema achane ticajare Simón ticavasahi te Cirene. Éma, másihapahi te máesane. Napamicapa máevachacaya manaracuhayarehi eta macurusura ema Jesús, máehicapapahi te máequene ema Jesús.

²⁷ Ichapemuriana ena achaneana téhicanapahi. Énaripa ena esenana, tipiararecanapaipa eta náiyairapahi taicha eta nacatisamurevahi, náimararasirahi eta máejapanuravapahi éma.

²⁸ Máesenimurihapa éma. Máichavacapa:

—Vahi ecuiyauchanu, eti esenana tachichanaveanahi eta Jerusalén. Étina íyauchava, náichavenénahi ena echichanaveana.

²⁹ Taicha tatiarihiyare eta sáchevayare nacapacayarevare ena. Ichape eta nacajapanuravairaya eta nacapasiraya. Tásiha ecahénapa: “Tétavicavapa náuriva ena esenana macherua. Nájina náimipanererecahini”.

³⁰ Tásiha, ena achaneana, eta napisirayare, tijunanainapa te céroana, tásiha, nacahénapa: “Tiúripanapucaini viyumurucavahini eta te juca cerro.” Ena apamuriana nacahenavarepauca: “Étapucaini te juca simena viyumurusiavahini”.

³¹ Apanasica núti ichapemuri eta nucatajivairahi, tájinahinéni taviuchanuhini. Navetijiyarecha éta nátajivayare ena echichanaveana* —máichavacapa.

³² Énerichuvare natiarihipahivare ena apinana tíámerahiana macutique-neanayarehi ema Jesús eta macaetataiyare.

³³ Tacahe, nacaitecapapa tayehe eta masihi nacaetatairare ticajarehi Calavera. Náetatacapa te crusu ema Jesús, énapa ena apinana tíámerahiana. Ema émana nanacapa te mavaure, ema apana te sapa.

³⁴ Te náetatacapa ema Jesús, macahepa eta máechajiriruvahi:

—Tata, piperdonachavaca ena naní, taicha vahí náacutiarahini eta juca náichiranuhi —macahepa.

Tacahe, ena suntaruana nasuertehachapa eta mamuirihaini eta náijarajirisiracacahi.

³⁵ Natiarihihi ena achaneana tímararacanahi tamutu. Énaripa ena tuparairucana natiarihihivare. Nacaecahijiricaripa éma. Ánipa nacahe:

—Ema mácacacha, macahehi eta máechajiriruvahi eta maratatairahíji macuchucuhavaca ena apamuriana achaneana. Tásiha puiti, vivaraha vímaha máimereuchava eta máitupajijiasiravahíji, te yátupihipuca Cristo éma, Manerejiruhíji ema Viya —nacahepa.

³⁶ Énerichuvare ena suntaruana nacaecahijiricahivare éma. Navarahapa náesichayarehi eta tasisiru vino.

³⁷ Náichapa éma:

* **23:31** Eta juca mayherepi proverbio ema Jesús te máechajiriruva, aní tacahe: “Te náichahi eta juca eta náimairahi eta yucuquí vérepacavacaichahahi, tétavicavahi eta navarairahi náquipaica te tájiquipa”. Tatiarihi eta tacayemaquenahi tayumurevahi.

—Te yátupinapuca piti reyvihi nayehe ena israelíta, pítijivaina picuchucuhava —náichapa.

³⁸ Tatiarihivare eta ajureca nanacaquenehi te tachutisi eta macurusura. Eta juca ajureca tacajuquenehi te náechajiriruva te griego, te latín, téhapa hebreo. Ani tacahehi eta táechajiriruvahi: “Ema maca ema Rey nayehe ena israelítana”.

³⁹ Ema émana tiámerahi macaetataquenehi te machacaya, énerichuvare éma macaecahehi. Ani macahehi:

—Te yátupinapuca pítiquenehi Cristo, picuchucuhava pítijivaina. Tásiha, picuchucuhavivare víti apana —máichapa.

⁴⁰ Émasera ema apana macaetataquenehi macahepa:

—Váhipuca pipicahini píti ema Viya. Váhipuca péchahi étarichuhi viávacuha víti eta juca vícuñahi.

⁴¹ Víti, vivachachahi eta juca vitapiravahi taicha ichapequenehi eta véjeca-piravanahi. Émasera ema maca Jesús, ticatajivahi tájinahinéni taviuchahini.

⁴² Tacahe, máichapa:

—Tata Jesús, péchanupaini te péjacapa tayehe eta piávacureya —máichapa.

⁴³ Ema Jesús majicapapa:

—Numetacavivane, puiti píti nucachaneviyare te paraíso —máichapa.

Eta máepenirahi ema Jesús

(Mt 27.45-56; Mr 15.33-41; Jn 19.28-30)

⁴⁴⁻⁴⁵ Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. Étarichuhi eta jena máepenirahi éma, tñahúchavapa tétsayumeca eta tayehe cortina eta Templo. Ticutimecaca eta taetsayumesirahi.

⁴⁶ Ema Jesús tipiaracapa:

—Tata, pijacapananu eta náchaneva —macahepa.

Te títapiricapa, tépenapa.

⁴⁷ Tacahe, ema nacapitara ena suntaruana romanoana, tipicarinehi eta máimairahi eta júca. Étapa macaicutiarapa, macunachapa ema Jesús, ánipa macahe:

—Yátupiquenéichuyapa ema maca achane matapiravarehi —macahepa.

⁴⁸ Namutu ena achaneana natiarriqueneanahi, eta náimairahi eta júcana, ichaperinehi eta napisirahi. Téhatupachávanapáipa eta nacatisamurévairahi.

⁴⁹ Enasera ena téhicanapahi ema Jesús te másihainapa te Galilea, énapa ena esenana, namutuhi nanecapararecahi eta juca táichavaquenevanahi. Nayererehiserahi eta náimarasirahi.

Nacucupaicapa te crusu ema Jesús, náecarapa

(Mt 27.57-61; Mr 15.42-47; Jn 19.38-42)

⁵⁰⁻⁵¹ Matiarihivare ema achane ticaijare José. Ticavasahi te Arimatea te Judea. Tipicaurahihi éma. Tétavicavahivare eta máuriva. Masuapahi ema Jesús, eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aquenucarahana, váhisera mapauchavacahini ena machamurianahi tayehe eta juca náichaqueneanahi tauriqueneanahi.

⁵² Te cáperehichichapa, eta máimairahi máepeniraipahi ema Jesús, tiyanapa mayehe ema Pilato, mayaseapanahi eta máquehe ema Jesús, mavarairahi máecarayare.

⁵³ Te tichavapa, macucupaicapa eta máquehe tayehe eta crusu. Máyuruacapa eta te sávana tijapu. Náiyaracuhapa tayehe eta máecari eta te mari nasecajueruhi. Nájinaichaha nacaecarasihini tayehe.

⁵⁴ Titatajianapa taicha cáperehichichaipahi. Taicha vahi táisapacarehini náecararecahini te yati, váhivare te tijarahiacaimahi taicha sávarumuhuyarepa.

⁵⁵ Ena esenana téhicanapahi ema Jesús te másihainapa te Galilea, tiyananapa tayehe eta máecari, náimatiyarehi eta mávihahi.

⁵⁶ Te náimatipa, tichavanapa te napena. Natsecapa eta perfume mayajihayarehi. Tinaracanapasera te jena sáchequenehi, napicauchahi eta tapicauchacarevahi.

24

*Eta máechepusirahi ema Jesús te máecari
(Mt 28.1-10; Mr 16.1-8; Jn 20.1-10)*

¹ Te apanapa sache, te tijarahichichapa eta lumíncuquenehi, tiyananapa ena esenana tayehe eta máecari. Námapaipa eta perfumeana náicurevanahi, nacachanevacapaipa ena apamuriana esenana.

² Te títecapanapa tayehe eta ecari, náimarinehi eta ticheyarama mari tajihainihi eta ecari, téquehepuichavaipa.

³ Tisiapanapa éna, náejiacinehi eta máquehe ema Viáquenu Jesús. Májinaripahi.

⁴ Tiáramecanarinehi eta náejasirahi. Váipa náimatiequenehahini tájaha-hipuca eta máicharacavahi. Tásiha, tiáramicarepa náimahahi ena apinana ajairana titupihanahi te nachacaya. Tijanunucavacahi eta namuirihana.

⁵ Eta náamesirahi éna, tétipaimurihanapa. Énasera ena ajairana náimahaqueneanahi náichapa:

⁶⁻⁷ —Éti ímijachaipapuca manasihi tépenahi ema Jesucristo, Manerejiruhi ema Viya. Májinaripa, tichavaripahi títareca. Échavarichuhipuca eta macayemaqueneanahi te achanerichaha te manasiquenerichaha te Galilea. Macahehi eta máechajiriruvahi eta nacaratásirayarehi ena ticatianacanahi éma, náetatasirayarehiva te crusu. Téchequayarehisera te mapanaquénanapa sache —nacahepa ena ajairana.

⁸ Tacahe éna, enurujirinehi náechavane eta máechajiriruvanahi ema Jesús.

⁹⁻¹⁰ Te tichavanapa te napena, nametacapa ena óncequeneana apóstoleana, énapa ena apamuriana nachamurianahi. Te nataracu ena esenana tímahanahi ena ángeleana, sutiarhipahi esu María Magdalena, esu Juana, ésupa esu apanavare María, máenahi ema Jacobo.

¹¹ Énasera ena apóstoleana vahi nasuapahini, náimijachaichucha náepiyahiravahi namaurishivahi ena esenana.

¹² Tiyanavanepasera ema Pedro tayehe eta ecari. Tijunapapaipahi. Te títecapapa, máimahapa tacarinehi eta sávana. Mapanerequenehainehi eta juca táichararacavahi. Tacahe, tichavavarepa.

*Tímerecavapa ema Jesús nayehe ena apinana máimitureana te táchehu ticaijuhe
eta avasarechicha Emaís
(Mr 16.12-13)*

13 Étarichu te jena sáchequenehi, tipaicanapahi te achene ena apinana máimitureana ema Jesús. Násihahi éna te Jerusalén nacaijuheyarehi eta avasarechicha Emaús. Once kilometro eta tayerehivahi.

14 Eta napaisirapahi nacasamurepaipahi eta nasamairiruhi. Téchajiricananapaipa.

15 Eta náechajisihairapahi eta juca táicharacavanahi, tíaramicarepa macapayamurihapa ema Jesús, macachanevacapaipa.

16 Énasera vahi náimatihini, taicha éma vahi máisapahini náimati.

17 Tacahe, ema Jesús mayaserecavacapa:

—¿Tájahasica eta juca échajisihapahi eta epaisirapahi? ¿Tájaha eta tímipanererecahepahi? —máichavacapa.

18 Ema émana ticaijarehi Cleofas majicapapa:

—Namutu ena achaneana náechahi eta juca táicharacavahi te Jerusalén púiti juca sácheanahi. ¿Picarichuhipuca píti vahi péchahini eta juca, eta piávihairahi te Jerusalén?

19 Éma máichavarepa:

—¿Tájahasica eta téchacarehi?

Éna náichapa:

—Émara véchajisihapahi eta máichavaquenévahi ema Jesús Nazareno, ema profeta máuriquenehini nayehe ena achaneana. Tamutuinihi tiuri eta máimiturapiana, tétávicavahivare eta máitupajijiasiravahi taicha ema Viya, éma tíjaracahi tamutu.

20 Énasera ena tuparairucana te viávasa, éna tíjararecanahi nayehe ena apavasanana taicha navarahahi náimicapaca. Tásiha, náetatacapa te crusu.

21 Víti ichapemuri eta vicasiñavairainihi eta mayehe. Vicuchapavainihi eta macatiuchirahaviyarehi vimutu viti israelítana. Tamapurujipasera púiti, taicha tépenapa éma. Púiti mapanaripa sache eta táetávisiravahi eta juca.

22 Icháquenesera te yáticarahichichapa, ticamecavahanapa ena esenana vichamurianahi eta nayatiruirahi tiyanana tayehe eta máecari.

23 Vaipa nachimarahini eta máquehe. Májinaipahi. Te tichavanapa, timetacahavianapa eta náimairahi ena apinana ángeleana. Nametacavacapaji eta machaviraipahi títareca ema Jesús.

24 Tásiha, tiyanavaneanapa ena apamuriana vichamuriana tayehe eta ecari. Jéhesaréinehi májinaipa ema Jesús, étarichuhi eta nacayemaqueneanapahi ena esenana —náichapa.

25-26 Ema Jesús máichavacapa:

—Tétávicavapa tájinaira ácaicutiaraquenéna eti páureana. Váhivarepuca ácaicutiarahini eta náechajiriruvanahi ena profetanaini tayehe eta tacaheyarehi eta macatajivairayarehi ema Cristo eta máepeniranumaya, tásiha tichavayarehi títareca. Váhivarepuca ácaicutiarahini eta tacaheyarehi eta mápanirayarehi tichava éma te mávasa anuma —máichavacapa.

27 Tásiha, mametacavacapasera tamutu eta táechajiriruvanahi eta Sagrada Escritura, eta táechajisihairahi éma. Tépanavapa tayehe eta májureanahi ema víarahaini Moisés; étaapa eta apamuriana nájureanahi ena profetanaini.

28 Títécapananecha tayehe eta avasarechicha nacaijuhequenepahi. Mavarahapa ema Jesús majunijicavacayarehini.

29 Énasera nacumpirachapa máehicavacahini te napena. Náichapa:

—Pácaherine eta ani víyehe, taicha yátinapa eta jena —náichapa.

Tásiha, ema Jesús manasipa tisiapapa eta nayehe.

³⁰ Te tiúripa eta tinicacare, mavehapa eta pan, mahasulupayachapa ema Viya, mayuvetucapa, máijaracavacapa éna.

³¹ Enévanerinehi náimativanepa éma. Émasera tǵahúchavapa témitiacahi te namirahu.

³² Tésenjiricacanapa éna. Tásiha, nacahepa:

—ǵTájaha tacayema eta vahi vímativanehini ichaquene te achene te ticapayacahavipa éma? Éta pa eta vicachanerapahi, váhivare vímatiacavanehini, véjapusamurechapaipahinéni eta visamiravahi eta máimitusirahavipahi tayehe eta Sagrada Escritura —nacahepa.

³³ Tacahe, enévanepa téquequecavanahi tichavana te Jerusalén. Te títecanapa, tisiapanapa tayehe eta návihahi ena óncequeneana apóstoleana énapa ena apamuriana nachamuriana.

³⁴ Ánaqui ticametacasianaripavare éna. Nacahevarepa ena apóstoleana:

—Yátupi eta máchepusiraipa ema Viáquenu. Máimahari pa ema Pedro —nacahepa.

³⁵ Ena apinana najicapavarepa:

—Énerichuvare víti vímahaipavare éma, te achene eta vipaisirapahi. Váhisera vímativanehini. Tapaenumava te mayuvetucapa eta pan, vímatipa éma —náichapa.

Tíápechavavare tímrecava ema Jesús nayehe ena máimitureana

(Mt 28.16-20; Mr 16.14-18; Jn 20.19-23)

³⁶ Tacahe, téchajiricavanarichaha éna, tǵahúchavavarepa tímrecava ema Jesús te namuri. Máéchajicavacapa, áni pa macahe:

—Íchararacava, nuchichanaveana.

³⁷ Énasera tipicanarichucha, náimijachaichucha cunarehi éma.

³⁸ Émasera ema Jesús máichavacapa:

—Vahi ecupicanu. Étumecha eta esamureana.

³⁹ Ímaha eta juca nuvahuana éta pa eta ní vapeana. Émamahacanu apaesa écha eta nútiquenérahi. Eta cunare, tájina táechena, tájinavare táperaina. Vahi tácutihini eta nucaqueherahi nútí —máichavacapa.

⁴⁰ Tacahe, eta máichiravacahí, ticajaruvauchavaipa eta mavahuana, éta pa eta máivapeana.

⁴¹ Vuíchahasera nasuapahini éna, tiúrisamureanaripahinéni eta náimairahi, tacachanehisera eta napisirahi. Eta tacahe, máichavarepa:

—ǵJararihi nunica?

⁴² Éna náijaracapa eta nájimarú jima, étasipa vasu eta mápama.

⁴³ Majacavacapa éma, tinicapa te namirahu éna.

⁴⁴ Tásiha, máéchajiricavacapa:

—Eta juca ní chavaquenevahi, étara eta numetaruhehi cape juca nucachanejiricahéichahahi. Eta tacaheyarehi eta táitachiravayarehi eta májuchaqueaneanahi ema víyahaini Moisés nútí táéchajisihaguenehi. Éta pa eta nájuchaqueaneanahivare ena profetanaini, éta pa eta Salmo.

⁴⁵ Máemechavacaipahi eta táéchajiriruvana eta Sagrada Escritura.

⁴⁶ Tásiha, máichavarepa:

—Étara eta juca tacajuqueneanahi eta népenirayarehi nuti Cristo. Néchepucayarehisera tayehe eta né cari te mapanaquenepa sache.

⁴⁷ Étaréichuhivare iámapicayare eta níjare eta ímituresiraya ena achaneana ticavasanahi te tamutu avasareana. Étaripa te juca Jerusalén, emetacavacayare ena achaneana eta náeneuchiravaina apaesa macaepaha ema Viya eta napecaturana.

⁴⁸ Éti, nutupararuheya eta ímituresiraya eta júcana.

⁴⁹ Enasiyarechahasera ani te juca Jerusalén. Tiámainucava te máitecapauchahevaca ema Espíritu Santo nuvaneryare, máíjararunuyarehi ema Tata. Éma, tíjaracaheyare eta ítupajjiasiravanayare –máichapa.

Eta mayapirahi ema Jesús te anuma

(Mr 16.19-20)

⁵⁰ Te títapiricapa eta máimitusiravacahi, mámamurihapa te tachachacu eta avasare Jerusalén, te tachacayahi eta avasarechicha Betania. Macanuquechapa eta mavahuana, mayujarauchavaca éna.

⁵¹ Te títapiricapa eta mayujarauchiravacahi, timutserahavapaipa ticanuquechavapaipa eta mayapirahi te anuma.

⁵² Eta náimairahi éna eta macanuquechiravapaipahi, tépuyumurihanapa eta nanecapararesirahi eta mayanirahi. Tásiha, tichavanapa tayehe eta Jerusalén. Tiúrisamureanapaipa.

⁵³ Tájina vahi náejicavahini tayehe eta Templo. Tiyujarauchavanaparacahi eta nacunachirahi ema Viya.

Tamutupa eta juca numetasiravihi puiti.

Ema Apóstole Juan májuequenehahi eta máichararacavahi ema Jesucristo, ticaijare puiti eta EVANGELIO SEGÚN SAN JUAN

¹ Eta acane, te táepaniravahi tamutu, matiarhiqueneípahi ema Jesucristo, ema Tímimatirahi me Viya*. Éma, macachanehi ema Maiya eta máitaresirahi, Víyahivare éma apanavare.

² Ena apinana, nacuticacahi eta napanereruana.

³ Eta táepaniravahi eta acane, émaríhi ema Cristo ticaemataneacahi tamutu eta tatiarihiqueneanahi puiti, máitachirahi eta mapanereruanahi ema Maiya. Tájina májequeruinahini, nájinavare apanainahini náepiyacahini eta tatiarihiqueneana.

⁴ Émarichuvare ticaitarecavahi viti achaneana. Émarichuvare tinacapa te viáchanevana eta tamichahu eta vítaresirahi.

⁵ Éma tímiyanava tímicauchahavi taicha mavaraha máimijunijisinahiviyare eta tamapícu te viáchanevana. Nararíhsera ena vahi náuricahini eta mamicauchinavaca. Navaraha nacaemaha eta mamicauchiravacahi.

⁶ Tacahe, te máimahapa tiuri, ema Jesucristo tiúcupaicapa te juca apaquehe. Tiáchanechavapa. Yátupiquenehi achane, macaechehi eta veche viti achaneana. Ticasiriquihavihi te jena áñoanahi majurusirahi. Matiarhivare ema apana achane ticaijarehi Juan Tícachasiricarahi. Tacahe, ema Viya, te máimahapa tiuri, ticavanahipa ema Juan.

⁷ Máinapumirauchayarehi eta macametarairuyare eta máimeresiravaya ema Cristo, ema namicahuyare nácani ticasíñavanayare mayehe. Ehanechavapa. Yátupiquenehi achane, macaechehi eta veche viti achaneana. Ticama Juan mametacayarehi ena achaneana natsecava eta najacapiraya ema Cristo.

⁸ Ema Juan, vahi émainahini tímícauchamurimahi ena achaneana. Émahisera ticametarairurahiyarehi eta máucupaisirapa ema tiámahavihi eta yátupiqueneana mapanereruanahi ema Viya.

⁹ Ema maca máechajisihaquene ema Juan, éma yátupiquenehi eta mamicauchirahiviyarehi vimutu viti achaneana, taicha tímieche viti achaneana. Ticatucahavi eta mapanereruana ema Viya.

¹⁰⁻¹¹ Ema Jesucristo, émahí acane tépiyacahi tamutu eta apaquehe, énapa ena viáchucanaveanaini. Puíticha éma téchahavi vimutu. Téhesera te tiúcupaicapa éma, namaimatiquenehi ena achaneana Viáquenuirahi éma, váhivare navarahahini najacapahini éma.

¹² Natiaríhsera ena tinerejicavanahi tijacapanahi, téhicanahi éma. Ena nani, ichaperinehi eta macunachiravacahi táichavene eta nacasiñairavahi mayehe. Éna, yátupiqueneripa machichanaveanahi ema Viya.

¹³ Eta macachichairahavihi ema Viya víti, émahí ema Viya tinerejicahavi táichavene eta vicasiñairavahi mayehe. Vahi étaparacainahipucaini

* **1:1** Ema Apóstole Juan, te májuchapa eta juca libro, manacahi amairiha te letra griega λογος (eta táechajicuirava: "logos"). Eta tacayemaquene te véchajirirupa: "Tímimatirahi me Viya". Étarichueche viti achaneana. Ticavare tacahe eta táechajisihaquene eta apamuriana libroana te castellanorupi, ani tacahehi: "la Palabra" étapa "el Verbo".

eta náehisirainahipucaini ena ticachichahaviana. Váhivare étaparacainahipucaini vivarahahipucaini ichape víti. Váhivare étaparacainahipucaini ichapenahipucaini eta mavarairahini mácani apana achane.

¹⁴⁻¹⁷ Viti véhicanahi ema Jesús eta matiarahirahi te juca apaquehe, yátupi eta vímatirahi éma. Vímahahi te viúquihana. Vímativarepa eta másihairahi te anuma, eta émairahi ema macarichuquenehi Machicha ema Viya. Yátupihivare eta víyairahi éma, macutihi ema Maiya. Éma, tímimatirahi me Viya, taicha éma máimerecahi eta máetaviuchirahi eta máemunasirahavihi, máimechirahavivare eta yátupiqueneana mapanereruana ema Maiya. Ema víyarahaini Moisés ticatuparahahi me Viya eta máimitusirahavihi viti achaneana eta vanairipiana. Émasera ema Jesucristo ticatuparahahi me Maiya eta máimitusirahavihi eta máemunasirahavihi, étapa eta máechajirivuvana yátupiqueneana ema Viya. Ema Cristo, tétavicavahi eta máuriva eta tayehe vimutu. Eta majaneasirahavipahi, tíjaracahavihi eta vitumevahi te tamutu sácheana. Émaripa ema Juan, ani macahehi eta máechajisihairahi ema Jesús: “Émara ema maca ema néchajisiquenehi eta eyehe cape juca. Yátupi núti nínapucahi eta núchusirahi, émasera matiarihiqueneipahi eta acane, májimanuichahahi núti. Eta tacahe, típicauchacarepanahi eta nuyehe” macahepa.

¹⁸ Yátupiquene nájina náimatihini eta máimahi ema Viya. Émasera ema macarichuquene Machicha, tímimatichahavihi eta máuriva ema Maiya taicha étaquenehi másiha te masamure ema Maiya.

Ena Juan Tícachasiricarahi timetacavacahi ena achaneana tayehe eta máimeresiravayarehi ema Jesucristo

(Mt 3.11-12; Mr 1.7-8; Lc 3.15-17)

¹⁹ Tacahe, te jena sácheana, ena tuparairucanahi ticavasanahi te Jerusalén navanecapa ena náevanachana[†], nayanaucha ema Juan Tícachasiricarahi. Éna, nayaserecapa, ánipa nacahe:

—Tamutu arairuhi eta pímiturapiana. ¿Pítinaripa ema Cristo vicuchapaquenehi? —nacahepa.

²⁰ Matupiruvapa eta majicapiravacahi. Ánipa macahe:

—Núti mavanerunuhi ema Viya. Váhisera nútina ema ecuchapaquenehi ema ticaijare Cristo —macahepa.

²¹ Tacahe, nápechavarepa nayasereca:

—¿Nájahavisica píti? ¿Pítipuca picaijare Profeta Elías? ¿Pichavahi eta te juca apaquehe? —náichapa.

Émasera majicapavarepa:

—Vahi nútina.

Tásiha, nápechavarepa nayasereca:

—¿Nájahavisica píti? ¿Pítipapuca ema apana profeta vicuchapaquenehi? —náichapa.

Émasera majicapavarepa:

—Vahi nútina.

²² Tacahe, náichavarepa:

—¿Nájahaviquenesica píti? Pimetacahavichucha te nájahavipuca píti. Vi-varaha véchayare, apaesa vimetacavaca ena tivanecahavianahi —náichapa.

[†] 1:19 Ena nani vanairucana, nararihini ena tiyujarahiana te Templo, énapa ena téchapajirahiana eta tayereruvana eta Templo te Jerusalén.

²³ Tacahe, ema Juan majicapavarepa:

—Nútichucha máechajisihaquenehi te ajureca ema víyarahaini profeta Isaías. Núti nucametarairuhi nayehe ena achaneana vámahicurúhana. Níchuha-
vacahi éna apaesa natsecava eta jácani máitecapiraya ema Viáquenu —
macahepa.

²⁴ Natiarihihivare ena navaneruanahi ena fariséoana.

²⁵ Nayaserecavarepa éna apanava:

—¿Tájahasica tacayemahi eta pícachasirisirahi ena vijaneanana, te váhipuca
pítinahíni ema Cristo, váhivare pítinahíni ema profeta Elías, váhivare pítinahíni
ema apana profeta vicuchapaquenehi? Ena vijaneanana vahi tácamunuhini
nacaicachasihini. Énaserá ena apavasanana, jéhesare tacamunu eta nácaica-
chavisava —nacahepa.

²⁶ Tacahe, éma majicapavacapa:

—Tiuri, núti yátupi nícachasicavacahi te une ena achaneana, apaesa natse-
cava eta jácani máitecapiraya ema vicuchapaquenehi. Matiarhiipasera puiti
te vitaracu. Étiserá vahi ímatihini éma.

²⁷ Tímerecavavanénapa. Ticunachacarepanayaresera eta nuyehe.
Váiparinehi nácutisamimahi eta máitupajijiasiravahi. Váiparinehivare
nácaemuñavaimahi macamusuranuhini núti páuresami —máichavacapa éna
ema Juan.

²⁸ Eta mávihahi ema Juan máicachasirisinehi ticaijare Betábara, te apachara
eta cajacure ticaijare Jordán, tinapaicahi te táuchusine eta sache. Eta nayase-
resinepanahi ena vanairucanahi.

*Éma Juan máimicaecheracha ema Jesús eta émairahi ema Cordero, vanairucahi
me Viya*

²⁹ Te apanapa sache, máimahapa ema Juan eta mapauchirapaipahi ema
Jesús. Tacahe, máichavacapa ena achaneana:

—Ímaha, márajapa ema Cordero, matapiravarequene éma, vanairucahi me
Viya. Éma, táimicaparuyare eta macaepahairayare eta vipecaturana viti
achaneana te juca apaquehe.

³⁰ Émara ema maca ema néchajisihaquenehi eta eyehe cape juca. Núti
nínapucahi mayehe éma, émasera matiarhihiquenéipahi eta acane, májinanui-
chahahi núti. Eta tacahe, tipicauchacarepanahi eta nuyehe.

³¹ Nútiripa néchajisihahi éma, vuíchahasera nímatihini. Numetacaherisera eti
nujaneeana israelítana eta ecaicachasiraina apaesa etsecavahi eta ejaca-
piraina éma te jácani máimerecavapa.

³² Tacahe, cape sache, títicipauchanupa ema Jesús, mavarairahi nícacha-
sicayare éma. Tásiha, te viúcupaicapa te une, nímahapa ema Espíritu Santo
eta máucupaisirahi te anuma, ticutiparine eta paloma. Masiapahacapa ema
Jesús.

³³ Tacahe, te nímahapa, nupaenumavapa nímati éma eta émairahi ema
vicuchapaquenehi Cristo, taicha ema Viya túmitucanupa eta máicutiarayare.
Ani macahehi: “Te píamaha ema Espíritu Santo máucupaucha te mápusi mácani
achane, pímatiya eta émairahi ema Nuchicha nuvaneruhi. Éma, tíjaraca-
hevacyare ema Espíritu Santo, tisiapahacahevacyainapa éti achaneana.
Nuchaneraheinapa éti” máichanupa ema Viya.

³⁴ Tásiha puiti, nímatipa éma. Táitusiava numetacache puiti eta émairahi ema
Cristo, Machicha ema Viya —máichavacapa ema Juan.

Ena náinapuiruana máichuhaqueneana ema Jesús ena máimitureanaya

³⁵ Tacahe, te apanavarepa sache, ema Juan matiarihahi tayehe eta mávira-reasahi, vítipa viti apinahavi máimitureanahi.

³⁶ Tásiha, máimahapa ema Jesús tiánucuhapaipahi. Tacahe, ema Juan máichahavipa:

—Ímaha. Ema maena Jesús, émahí ema Cordero matapiravarequene, vanairucahi me Viya —macahepa.

³⁷ Tacahe, eta vímairahi viti apinahavi máimitureana ema Juan, viyanapa véhicahi ema Jesús.

³⁸ Tásiha, ema Jesús téseniequenehavapa. Máimahapa eta véhisirapahi. Tiyaserecavipa:

—¿Tájaha ecamunu nuyehe? —máichahavipa.

Víti vijicapapa:

—Tata maestro, ¿távihapuca eta pítecapirare?

³⁹ Ema Jesús tijicapahavipa:

—Yare, ímaha apaesa ímativa.

Tacahe, viyaninapa vímatipa eta mávirarehi. Vítaipahi eta jena sache eta víviahairahi eta mayehe, taicha las cuátroripahi sache te vítecapapa ánaqui.

⁴⁰⁻⁴¹ Andrés máijare éma nuchamuri téhicapahi ema Jesús. Tacahe, eta máurisamurevahi ema Andrés, tiyanavanepa matanucahi ema maparape Simón Pedro. Te máichimavapa, máichapa:

—Vímaharipa ema vicuchapaquene Mesías ema Cristo —macahepa.

⁴² Tacahe, ema Andrés tichavapa mámapa ema maparape Simón eta te mávihahi ema Jesús. Te náitecapauchapa, ema Jesús máesenicapa ema Simón. Tásiha, máichapa:

—Píti Simón, machichavihi ema Jonás. Nútisera nítivachaya eta píjare. Núti níjarechaviya Pedro, táichavenehi eta pétaviuchirayare eta pitumeva — máichapa ema Jesús.

Ema Jesús máichuhapa ema Felipe émapa ema Natanael

⁴³ Te apanapa sache, ema Jesús mavarahapa tiyanayarehi te tinapaica eta Galilea. Tásiha, macainunapa ema Felipe. Tásiha, máichapa:

—Yare, péhicanu.

⁴⁴ Eta mávasahi ema Felipe eta te avasare ticaijare Betsaida, étarichuvare mávasahi ema Andrés émapa ema Pedro.

⁴⁵ Tacahe, ema Felipe tiyanavarepa, matanucahi ema Natanael. Te máetupiacapa, máichapa:

—Vímaharipa ema achane máechajisiquenehi te libro májuchaquenehi ema víyarahaini Moisés, émarichuvare éma táechajisiquenehi eta libro nájureanahi ena profetanaini. Ema ticaijarehi Jesús, machicha ema José. Ticavasahi te Nazaret —macahepa.

⁴⁶ Tásiha, ema Natanael majicapapa:

—Váiparinehi étainahini máuchusinehíni ema achane tiuri tayehe eta avasare Nazaret —macahepa.

Tásiha, ema Felipe máichavarepa:

—Viyana, apaesa pímati —máichapa.

⁴⁷ Tacahe, te náitecapauchapa, ema Jesús máímararacaripa ema Natanael. Tásiha, macahepa:

—Nímativi eta pipanereru. Píti yátupiquenevi israelíta. Tétavicavahi táurivahi eta pítaresirahi. Vahi pítuca pivayureca —máichapa.

48 Tásiha, ema Natanael majicapapa:

—¿Táviha pímatinenuhi?

Ema Jesús máichapa:

—Núti nímativipahi te vuíchaha máetupiacavihini ema Felipe eta máichuiraviyarehi, te piáviharipa te tápecu eta yucuqui higo.

49 Tacahe, ema Natanael masuapavanepa ema Jesús. Máichapa:

—Tata Maestro, pítiripa piti yátupiquene Machicha ema Viya. Píti yátupi-
quenévivare Reyvihi viyehe viti israelítana. Núti níjaracavapa néhicaviya —
máichapa.

50 Ema Jesús majicapapa:

—Étachucha eta juca níchiravihi eta nímairavihi te tápecu eta yucuqui, pipatsi-
cavapa píjaracava péhicanuya. Vahi tácarichu eta juca. Pímahayareva eta apana
tiáramicareanapana tayehe eta juca.

51 Tásiha, ema Jesús máichahavipa vimutu:

—Éti ímahayare eta anuma téjiacayare, énapa ena ángeleana tiúcupauchanua-
nayare núti Manerejirunuhi ema Viya —máichahavipa.

2

Natiarihi ena araimanayarehi eta te avasare Caná

1 Te mapanaquenepa sache eta táetavisiravahi, natiarihi ena araimanahi eta te avasare Caná te tinapaica eta Galilea.

2 Tásiha, esu maena ema Jesús, ánaqui suávinehi taicha sucaichuha-
siquenehi ésu. Énerichuvare ticaichuhasihivare ema Jesús, vítipa viti máimitureana.

3 Tacahe, ema arayanahi tacaimamarapa téchuriacapa eta máeresahi vino. Esu maena ema Jesús suíchapa ema suchicha:

—Téchuriacanapa eta náeresahi.

4 Tásiha, ema Jesús majicapapa:

—Picatajicanu, mémechicha. Vuíchaha picucamesanu. Nímahaine núti te táuripa. Nútipa néchinava —máichapa.

5 Tásiha, suíchavacapa ena tésiricanahi:

—Tiuri, ñímaháinepa éñi. Esuapayare éti eta ñivanairipiana —suíchapa.

6 Tacahe, tatiarihihi eta sáisihi ichapehiana tinajana, márihiana. Nayupi-
sareana ena israelítana tayehe eta nayeherepiana. Eta táichapehivavacahi eta tinajana, cíncohi lata eta tacavacu.

7 Tacahe, ema Jesús mavanecavacapa ena tésiricanahi:

—Eyana eyereca eta une. Ínicachayare eta juca tinajana —máichapa.

Tacahe, nánicajicavacapa éna eta tinajana.

8 Tásiha, ema Jesús mavanecavacapa:

—Tiuri puiti, eveha ániamaina, eyana íjaraca ema téchapajirica eta juca piesta —máichavacapa.

Tacahe, tiyananapa éna, náijarapanahi.

9 Mavehapa masamaecapa eta une, vínoripahi éta. Váhisera máechahini éma távihahipuca tásihahi éta. Nacarichu ena tésiricanahi náechahi eta únerahi.

10 Tacahe, ema téchapajiricahi eta piesta máichuhapa ema arayanahi. Máichapa:

—Namutu ena achaneana te térana, tativa naera eta tiúriamapana vino. Tapaenumava te ticavahahasianapa, náerapa eta vino váhipanaichu

táuriamahini. Pítisera, apana eta pipanereruhi. Tiúrihi eta vino píjararuhavihi tativa. Puítisera eta juca vino, tétavicavahi eta táuriamavahi. Tacachuricarinehi tamutu —máichapa.

¹¹ Eta juca táinapuiruhi tiáramicare máimerecahi ema Jesús, tayehe eta avasare Caná. Ichaperinehi eta viáramirahi viti vinecapanahi eta juca máimeresirahi eta máitupajjiasiravahi. Tacahe, ichaperinehi eta visuapirahi viti máimitureanahi.

¹² Te táequenepa eta juca, viyanavarepa te apana avasare ticaijare Capernaum. Vimutupaipa, esu maena, ena maparapenaveana, vítipa viti máimitureana. Vinasipa jácani sácheana eta ánaqui. Vipaenumava viyanaya te Jerusalén.

Ena Jesús macuchuchujicavacapa ena tjararecanahi eta sárareana, cáyureana te tajuhe eta Templo

(Mt 21.12-13; Mr 11.15-18; Lc 19.45-46)

¹³ Tacahe, eta jena sácheanahi, tiánehiripa eta Pascua, vippiestarahi viti israelítana. Ema Jesús tiyanapa tayehe eta avasare Jerusalén, vítipa viti máimitureana.

¹⁴ Te vítecapapa, viyanapa visiapahi tayehe eta Templo. Máimahainehi ema Jesús ena títsiriperecarahiana eta plata, énapa ena tjararecanahi eta vuíyena, eta uvesana, étapa eta palómana.

¹⁵ Eta máimairahi éna, máepiyacapa eta machicute. Máquijimuríhapa eta naplataneana te apaquehe. Máequehepuichavacapa eta namesarana. Macuchuchujicavacapa namutu, étapa eta sárareana náijararermanahi.

¹⁶ Tásiha, máichavacapa ena tjararecanahi eta paloma:

—¡Cuchuca eta júcana eta te juca mapenahi ema Tata! ¡Vahi étaina ícuchina éti íjararecana eta tájiparacana! —máichavacapa.

¹⁷ Tacahe, viti máimitureana, eta vímairahi eta juca, enevanerine véchava eta táechajiriruva eta Salmo tayehe eta tamuracavahi eta máichararacavahi ema víyarahaini David táichavenehi eta máetaviuchirahi eta máimipicauchirahi eta, mapena ema Viya.

¹⁸ Jéhesare, enurujipa títecapanapa ena tuparairucana. Nayaserecapa éma:

—¿Tájaha tacayema eta picuchusiravaca ena vichamuriana? Pímijachavahipuca vanairucavi me Viya. ¡Pímechahavi eta tiáramicare te yátupihipuca pivanahi eta juca! —náichapa.

¹⁹ Ema Jesús majicapavacapa:

—Te iáqui paicayarepuca éti eta juca templo, nútisera nucaechepuca te mapanaquenéna sache —máichapa.

²⁰ Ena tuparairucana najicapavarepa:

—Cuarenta y seis año eta tayerevahi eta náepiyaresirahi eta Templo. ¡Tétavicavahi eta pisiñavavaisirahi picaemuñavayarehi picaechepecayare te mapanaquenéna sache! —nacahepa.

²¹ Eta máichiravacahi ema Jesús, máechajisihahi éma eta táechepusirayare eta máquehe.

²² Eta tacahe, te tiyerehi, te táequenepa eta máechepusirapa ema Jesús te máecari, véchavahi viti máimitureana eta juca mametarapihi tayehe eta máechepusirayarehi. Eta tacahe, visuaparinehi eta táechajisihairahi eta Sagrada Escritura eta mayehe.

Ena Jesús máimati eta napanereruana ena achaneana

²³ Eta manasiraichahahi ema Jesús te Jerusalén, te Páscuamuhu, camurihi eta tiáramicareana máichaqueneanahi. Camurianahivare ena achaneana tímahanahi. Tásiha, nasuapahi eta émairahi ema Cristo nacuchapaquenehi.

²⁴ Émasera vahi macasiñavahini eta nayehe taicha máimativacahi éna, vuíchaha yátupinahini eta náehisirahi éna.

²⁵ Taicha éma, tétavicavahi eta máitupajjiasiravahi, máimatirahi tamutu eta napanereruana ena achaneana te amahe eta nasamureana.

3

Emá Nicodemo máejirapana ema Jesús

¹ Matiarahi ema achane téhicarairicahi ena fariséoana. Ticaijare Nicodemo. Ema maca achane, tétavicavahi eta macunachacarevahi taicha máestrohi éma.

² Tacahe, eta jena yátiquenehi, ema Nicodemo tiyanapa mapaipiuchapanapahi ema Jesús. Tacahe, eta náechajirisiravahi, macahepa ema Nicodemo:

—Tata maestro, véchahi eta vanairucavihi me Viya eta juca pítesirahi pímitusirahavipanahi. Taicha nájina apanaina achane títuruequenehaimahi eta juca tiáramicareana píchaqueneanahi píti —macahepa.

³ Ema Jesús majicapapa:

—Puiti numetacavi eta juca yátupiqueneana: Nácani navarahaya títuji-cavana tisiapana tayehe eta mávasa ema Viya, tacamunuhi náitsivachayare eta náitaresira. Te vahi yátupina eta náijarasiravaina eta máitsivachiravaca ema Espíritu Santo, vahi títuji-cavanaimahi tisiapana eta te mávasa ema Viya. Tímicutijiricavayarehi tíápechavanayarehi tíúchucana —máichapa.

⁴ Tacahe, ema Nicodemo vahi mácaicutiarahini eta máichirahi ema Jesús. Váhiserá macuchapaimahi eta máitametasirahi ema Jesús. Ánipa macahe:

—Váiparinehi vichavaimahi eta amúyahavinahíni viti ichasiana, vichavahivarepucaini visiapahini te sujuhe esu ticachichahavi —macahepa.

⁵⁻⁶ Majicapavare ema Jesús:

—Pisamanuchaha. Te tíuchuca eta amuya te sujuhe esu taena, tímaticarehi eta machichairahi ema suima. Tacutiquenehi, nácani mávaháruana ema Espíritu Santo, tíápechavanayare tépanava eta náitaresiranayare, taicha machicharipahi. Nutupiruva numetacavi: Nacarichu ena machichanaveana ema Espíritu Santo tisiapana eta mávasa ema Viya. Te tacuija eta machichairahéna éti, tájina vahi ítuji-cavaimahi esiapa.

⁷ Vahi picuarami eta juca níchiravihi: Táitaurevaquene ticachichaheyarehi ema Espíritu Santo.

⁸ Eta juca tímicutijiricavahi eta tétaticava, tacarichu visama eta tacaemaira. Váhiserá tácaecherahini. Ene nacahehi ena mávaháruanaipa ema Espíritu Santo. Nanasirichu eta náimahi. Ticaitsivaipasera eta náitaresira —máichapa ema Jesús.

⁹ Tásiha, ema Nicodemo mápechavarepa mayasereca:

—¿Tájahasica tacayema eta juca?

¹⁰ Ema Jesús máichavarepa:

—Tétavicavahi eta picunachacareva píti, taicha tíurihi eta pímitusiravacahi ena vijaneanana. Tasapihasera vahi pímatiequenehahini eta júcana.

¹¹ Pisamanuchaha. Yátupiquene eta numétasirávihi. Tatupiruvahi eta néchajisihahi eta táicharacavanahi te anuma taicha nímahaipa. Étiserá vahi esuapanuimahi eta numetasirahehi eta nímahaqueneanahi.

12 Te cape juca sácheana, nímicutichinahehi eta táichararacavanahi te juca apaquehe tayehe eta táichararacavanahi te anuma. Étiserá vahi esuapanuhini. Tavetijipa eta emasuapiranuya te nutupiruvahi numetacahe eta táichararacavanahi te anuma.

13 Nuti Manerejirunuhi ema Viya, nucavasahi núti te anuma. Tásiha, núcupaícahi eta numetasiraheya. Nájina apanainahini mácani mameta-cahehini eta táichararacavanahi te anuquehe, taicha nájina nayanahini nápanahini te anuma, eta jácani náimatihini.

14 Acane, eta napaisira ena viáchucanaveanaini eta te mávapahi apaquehe, táechucapahi eta quichareana ena masuapajirairahanapahi mayehe ema Viya. Tacahe, ema víyahaini Moisés máepiyacahi eta metal eta táimahi eta quichare. Manacahi te anuquehe eta te yucuqui. Tásiha, ena achaneana táechureana eta quichare, te náesenica eta quichare máepiyaru ema Moisés, tinaracanapahi, vahi náepenapahíni.

15 Ene nucaheyare núti apana, tinacuanayareva te anuquehe. Eta níchararacavayare apaesa nucuchucuhapahi namutu ena nácani ticasíñanuanayarepahi. Tásiha, máichecuaraquirenapa eta náítaresirayare. Tájina ticamítiequenehavacaimahi.

Emá Viya, tétavicavahi eta máemunasirahavihi

16 Taicha ema Viya, tétavicavahi eta máemunasirahavi viti achaneana te juca apaquehe. Eta máemunasirahavi, májaracahi ema macarichuquenehi Machicha eta mácupaisirahi eta ani viyehe. Mavarahapa tjaracahaviya máichecuaraquirénapa eta vítaresiraya vimutu viti vicasíñanahi éma. Tájina ticamítiequenehavimahi.

17 Taicha ema Viya, vahi tácahehíni eta mapanereruhi eta mácupaisirahi ema Machicha máicuñacahavihini viti achaneana. Étasera eta tímitecahi éma, ticuchucuhaviyare vimutu.

18-19 Taicha nácani ticasíñanayare ema Machicha ema Viya, vahi ticaicunáimahi. Nácanisera vahi nácasíñahini éma táimicuñacavacayarehi eta naviurevanahi éna. Taicha vahi náuricahini eta tamjcauchiravacahi eta majaraíva ema Cristo táucupairuhi te juca apaquehe. Étachucha náurica eta timapícu taicha vahi návarahahini tácaecherahíni eta náichirahi eta tamauriqueneana.

20 Taicha nácani tíchanahi eta tamauriqueneana, nacaticha eta majaraíva ema Viya. Váiparinehi napauchaimahi, namavarairahi tacaecherahini eta náichirahi eta tamauriqueneana.

21 Énasera ena tisuapanahi yátupi eta máechajiriruva ema Viya, náuricayarehi napaucha eta majaraíva. Jéhesare ticaecheranasarepa eta machanaranaripahi ema Viya.

Emá Juan Tícachasiricarahi tíapechavavare máechajisihahi ema Jesús

22 Te táequenepa eta juca, tiyanavarepa ema Jesús, tayehe eta avasarechichana te táunava eta provincia Judea. Véhicahi viti máimitureana. Vinasipa jácani sácheana eta ánaqui. Viti máimitureana vícachasiricaripa ena achaneana tivarahanahi náehicaya ema Jesús.

23 Tásiha, ema Juan tícachasiricahivare te jena Enón tachacayahi eta Salim, taicha ánaqui tatiarihíhi eta une. Ena achaneana napauchahi éma. Jéhesare máicachasicavacapaipahi ena tivarahanahi náinajicayare eta napecaturana.

24 (Eta juca máichahi ema Juan tamirahupaichaha eta jena sache eta náeratasirayarehi éma.)

25 Tacahe, te jena sácheana, ena religiósóana tiyananapa náimiyusemacavacapa ena máimitureana ema Juan, nametacahi eta vícachurisiravacahi viti máimitureana ema Jesús taicha tiápajumuriavanapanahi ena vícachasiruanahi.

26 Tacahe, eta nasemirahi ena máimitureana ema Juan, tiyananapa nametapanahi éma. Náichapa éma:

—Tata maestro, pímahaini ema maena péchajiriruhi cape te tachausi eta juca cajacure Jordán. Ema Jesús pímiijarecha Cristo, tícachasiricahi puiti éma. Jéhesare, namutuyarehini náehica éma —náichapa.

27 Tásiha, ema Juan majicapavacapa:

—Vahi ecueñamava. Ema Viya, éma téchahi eta máijarasirahi eta máitucaquenehi nácani manerejiruana. Németeaca tíjaracahi ema Viya eta máitupajijiasirava ema maca Jesús.

28 Éti échavahi eta numetasirahehi eta vahi nútinahini ema Cristo. Yátupisera nucavanahini eta nínapumirauchirayarepahi éma, numetacavaca ena achaneana natsecavahi.

29 Núti nímicutijirisinahe: Te natiarihi ena araimanahi, namutu ena nacaichuhasiqueneana tíurismureanahi eta náimairahi ena araimana. Nacunachahi ema arayena. Ene nucaherihi núti eta núrismurevahi eta nímairahi puiti eta nacunachirahi ema Jesús.

30 Éma, te jácani mapaisihayarepahi, tiápajucavayarepaipa eta macunachacarevaya. Éma, mapaenumavapa tépanava eta macaemataneasira ema Viya. Núti núrismurehi tayehe éta. Núti, tiánehipa eta nítauchirainapa eta nématane. Tásiha, váhirichu nuncunachacare núti —macahepa ema Juan.

Ema Jesús másihaquenehi te anuma

31 Ema Jesús, máimatirinehi tamutu eta táichararacavanahi te anuma taicha másihaquenehi éma te anuma. Viti achaneana viáviyahahi vicavasanahi te juca apaquehe, vímatihí étachucha eta táichararacavanahi te juca apaquehe. Émasera ema Jesús, eta másihairahi te anuma, tímatihí tamutu, tiápajupanavahi eta máitupajijiasiravahi. Ticachuricahavihi.

32 Éma, tímitecahi eta mametasirahavi tamutu eta máimahaqueneanahi étapa eta masamaqueneana te anuma. Nájinayarénisera nasuapahini eta macayemaqueneanahi.

33 Vítisera viti visuapanahi eta mametarapiana, vímatihí eta yátupihí eta máechajiriruvana ema Viya mámaqueneanahi ema maca Jesús.

34 Taicha éma, vanairucahi me Viya, máechajisihayarehi eta máechajiriruvana ema Viya. Énerichuvare tétavicavahi eta máimicatasirahi ema Espíritu Santo taicha mávahácahi éma.

35 Ema Vicaiyaquene máemunacahi ema Machicha. Eta tacahe, matuparacahi eta émairayarehi téchayare tamutu.

36 Eta tacahe, nácani ticasíñanayare ema Machicha, máichecuaraquireyare eta náitaresiraya. Namutusera ena macasiñarahanahi ema Machicha ema Viya, vahi títarecanaimahi, taicha tanasihi eta naviurevana táichavenehi eta napecaturanahi. Ticaicuñanayarehi máitavacac ayare.

4

Ena Jesús tiánuhu eta provincia Samaria. Ánaqui máechajicahi esu ésuna esena.

¹⁻³ Tacahe, camurianahi ena tivarahanahi tjaracavanaya náehicaya ema Viáquenu. Tásiha, viti máimitureana vícachasicavacahi éna. Émasera ema Jesús vahi máicachasiricahini. Camuripanana ena vícachasiruana nayehe ena máicachasiruana ema Juan. Tacahe, ena fariséoana nasamairicapá. Náramipa. Navanecapa ena tiyaserecanaya. Tacahe, te tisamauchavapa ema Jesús eta napanereuchirahi, majunijicapa eta Judea. Tiyanapa tichavahi tayehe eta Galilea, vítipa víti.

⁴ Eta vipaisirapahi te achene, viánucuhapaipa eta te provincia Samaria.

⁵⁻⁶ Te la dócepa te sache eta vítecapirahi te távihahi eta nória máepiyaruhi ema víyarahaini Jacob. Májaracasicharipahi ema machicha José eta juca mayeheni apaquehe. Eta nória, tachacayahi eta avasarechicha ticaijare Sicar. Tacahe, eta mavitairapaipahi ema Jesús, tícheCANUMAPA te tachausi eta nória.

⁷⁻⁸ Eta víchesirahi, viyanapa viti máimitureana vivacharepanayarehi eta tinicacare te avasare. Macarichuipahi ema Jesús. Sucahepainecha esu ésuna esena indigenahi samaritana tícapanayarehi. Tacahe, máechajicapa ema Jesús:

—Nuchicha, picatajicanu picajinu une —máichapa.

⁹ Tásiha, esu esena sujicapapa:

—Píti israelítavíhi. ¿Tájaha tacayema piyaseacanu eta une, nuti samaritánuhu, vahi pijaneananuinahini? —suíchapa. (Ani tacahehi eta suéchajirisirahi, taicha ena israelítana énapa ena samaritánoana vahi náurianacacahini.)

¹⁰ Tásiha, ema Jesús majicapapa:

—Te pímatihini eta mavarahaqueneanahi tjaracavi ema Viya, téhevare pímatinuhivaréni nútí nuyaseacavíhi eta une, németeaca piyaseacanuipahíni eta une ticaitarecarahi. Tásiha, nútí níjaracavíhíni —máichapa.

¹¹ Tásiha, esu esena suíchapa:

—Tata, tíúpenahi eta juca nória. Píti, tájina enurena piviyahini eta une. ¿Távihasica tásihayare eta une ticaitarecarahi eta pivarahaquenehi píjaracanu?

¹² Eñi viáchucaquenéni Jacob, vímaequenéhahi eta juca nória ñépiyaruhi. Nérirarénihi eñi énapa ena ñichichanaveana. Énerichuhi táerihahi eta ñiyeheana sárareana. ¿Píti pímiachavapuca picuchucahini eta tíúriamapana une? —suíchapa.

¹³ Ena Jesús majicapavarepa:

—Nanutu nácani térana eta juca une tíápechavanayarehi timauneanaya.

¹⁴ Nácanisera téranayare eta une níjararuyarehi nútí, vaipa tíápechavanaimahi timauneana. Taicha tacajurucayarehi eta náuricacareva. Tíúrinainavarepa eta náitaresira. Ticaitarecavacayare máepenacacayare —máichapa.

¹⁵ Tacahe, esu esena, eta susamirahi eta máechajiriruvanahi, suíchapa:

—Tata, píjaracanupaini eta une ticaitarecarahi, apaesa vaipa nucapechavaini numau. Váipavare nuquitecaini eta te juca nória népanahini une —suíchapa.

¹⁶ Ena Jesús majicapavarepa:

—Piyana, píchuhapana ema píma. Píama eta ani.

¹⁷ Ésusera sujicapapa:

—Nájina nímaina.

Tásiha, ema Jesús máichapa:

—Pitupiruva eta juca pimetasiranuhi eta nájinairahi pímainahini.

¹⁸ Cíncoanapaipahi ena pímanaveanainihi. Tásiha puiti, ema picachanequenehi váhivare pímainahini. Pitupiruvahi eta péchajiriruvahi —máichapa.

¹⁹ Tacahe, tiáramecarinehi esu esena eta susamirahi éma eta máichirahi. Tásiha, suíchapa:

—Tátachicha, németeacavihi eta pítiquenéravihi profeta. Nuvaraha pimeta-canuya puiti, ¿távihapuca eta yátupiquene viyujarasirareyarehi?

²⁰ Taicha ena viáchucanaveanaini samaritánoanaini eta nayujarasiraréni eta te juca táinahu eta cerro. Puiticha tanasirichuhi eta viyujarasirarehi. Étiserá eti israelítana, eta emetarapi eta viyujarasirareyare ñe Viya téhenapa te Jerusalén —suíchapa.

²¹ Ema Jesús mametacapa:

—Nutupiruva numetacavi, nuchicha, ánipa táenasihayare puiti váipa tácomesaimahi iteca eyujaraca me Tata te juca táinahu eta cerro étaripa eyana-hipucaini te Jerusalén. Tamutuinapa eta táurivayare eta eyujarasihayare.

²² Eti samaritánoana, apaesachicharichu eta ímatirahi ema Tata eyujaraurehi. Vítiserá vímatihí ema viyujaraurehi, taicha viti israelítana viti vícatu-parahahi víámayare eta máechajiriruvana ema Tata eta macuchucuirayare namutu ena achaneana ticasíñavanahi mayehe.

²³⁻²⁴ Numetacaviya eta apana: Ema Tata, táviahahi te anuma, jéhevare éma, yátupiquenehi Viya. Vahi mátejinahíni eta maeche macutihini viti achaneana. Eta tacahe, nácani tiyujaracana mayehe, tatupiruvayarehi eta nasamure, tisuapajirahianahivare tayehe eta máechajiriruana. Vahi tácomesaimahi ticasíñarajiana. Eta juca tacaheyarehi eta mavarahaqueneanahi ema Tata eta eyujarasirayarehi —máichapa.

²⁵ Tásiha, esu esena suíchapa ema Jesús:

—Téchacarehi eta ñítecapirayare te juca apaquehe eñi Cristo, ñivaneruya eñi Viya. Téhcacarehivare eta ñimetasirahaviyare tamutu eta yátupiqueneanahi. ¿Píti, péchapuca tájamuhuyarepuca eta ñítecapihayare?

²⁶ Ema Jesús majicapapa:

—Nútira nuti mavanerunuhi ema Viya. Nútira ecuchapaquenenuhi —máichapa.

²⁷ Tásiha, vítecapanecha viti máimitureana. Tacahe, víáraminehi eta máechajiririravahi eta suyehe esu esena indigenahi. Vivarahahi viyasereca esu esena tájahapuca suvaraha eta mayehe. Vivarahavivare viyasereca ema Jesús tájaha tacayema eta máechajisirahi esu esena. Váhiserá vipatsicava viyaserecahíni.

²⁸ Tásiha, esu esena sunaquicapa eta suyupi. Tijunapapa tiyana te avasare, sumetapanavacapa ena achaneana. Te títicapapa, suíchavacapa:

²⁹ —Yare, ímahaya eñi achane profeta. Ñímatihí tamutu eta níchaqueneanahi néjecapiravanahi. Tamutuhi ñícuchuchujisinánuhi. Núti németeaca éñirípa eñi Ñivaneruhi eñi Viya, éñirípavare eñi vicuchapaquenehi ticaijare Cristo —suíchapa.

³⁰ Ena achaneana sumetaruanahi tiyananapa náehica esu eta te mávihahi ema Jesús, náimahapanayarehi.

³¹ Eta nayerevapaichaha ena achaneana suíchuhaqueneanahi esu esena, viti máimitureana víchuhapa ema Jesús tinicanumayarehi. Víchapa:

—Tata maestro, yare pinicanuma, apaesaina piávamina.

³² Tásiha, éma tijicapahavipa:

—Núti, jucarihi eta tinicacare tanicasarehi eta náchaneva emáimatiéque-
néruhi éti —máichahavipa.

³³ Tásiha, véjcapavasamurepa víti. Víchacacapa:

—¿Náenicaipapuca jácani?

³⁴ Ema Jesús máimatihí eta vipanereruanahi. Máichahavipa:

—Eta ticaitarecanuhi núti, eta nítauchirahi eta mavanairipiana ema Nu-
caiyaquene, taicha nuvaraha nítauchaya tamutu eta nucaemataneasira éma.

³⁵ Eta viyeherepi te véchajiriruva: “Puiti vítapa eta vévasirapa eta trigo,
cuátroyare caje eta vicuchapira eta vicurujisiraya” vicahehi. Puítisera nu-
metacale núti: Vaipa táyeremahi eta vicurujisirainapa. ¡Ésenica puiti te
atchene! Nárjapa ena achaneana ena névaraquianahi.

³⁶ Ema Tata tíjaracaheya eta ícuchiyare te ímicatacanuyare eta vicurujisira
ena nani achaneana apaesa náuchucuhayare, máichecuaraquireyare eta
náitaresira. Tásiha, tétavicavaya eta víúrisamureva vimutu: éti, nútipa.

³⁷ Ena achaneana, ticatisamurevanahi eta náechajirisira: “Vítira vévacahi
eta vé sane; apanapasera ema ticurujica” nacahehi.

³⁸ Vítisera te juca vivapinavayare. Núti níchuhachehi eta ecurujisiraya eta
névaruhi. Énerichuvare nararihihi ena tínapucanahi viyehe eta nacaemata-
nerahi eta juca. Puiti vivapinavaya eta vícuchiyare taicha vicuticacahi eta
vicaemataneasirahi ema Viya —máichahavipa ema Jesús.

³⁹ Ena ticavasanahi te jena avasare, camuriqueneanahi ena tisuapanahi
eta émairahi Mavaneruhi ema Viya táichavenehi eta suíchirahi eta macuchu-
chujisinaquenehi tamutu eta suíchaqueneanahi.

⁴⁰ Tásiha, tiyananapa tíacpahaviana. Te títeapanapa, émaquenepa
nasamahi. Tásiha, náechajicapa mánasipanahini nayehe. Masuapahisera
ema Jesús. Apina sache eta mayerevahi, vítapa.

⁴¹ Tacahe, eta manasipanairahi tayehe eta avasare, namutupa nasamahi
eta máimiturapiana. Tacahe, camurianainehi ena tisuapanahi, téhicana-
hivare éma.

⁴² Tásiha, náichavarepa esu esena:

—Puiti émaquenepa visamahi. Vaipa tácarichuhini visuapahini eta pimeta-
rapihi. Véchapa víti apanava eta émaquenérahí ema Cristo, ema vicuchapa-
quenehi, ema ticuchucuhahaviyare vimutu víti achaneana —náichapa.

Ema Jesús macanaraca ema machicha ema aquenuca majupahahi ema rey

⁴³ Te táequenepa eta apinaquenehi sache, tiyanavarepa ema Jesús; macai-
juhe eta te provincia Galilea. Véhicapaichuhivare víti apanava.

⁴⁴ Eta mayanirayarehi eta Galilea, vahi mácasañvahichaini eta masuapa-
carevainahini nayehe ena achaneana. Émarichuhi, ani macahehi eta
máechajiriruvahi: “Mácani profeta, vahi tivapinavanahi eta najacapirahi ena
achaneana te mávasa”.

⁴⁵ Téhesera te máitecapauchapaipa ema Jesús eta avasarechichana tinapai-
canahi te Galilea, namutu najacpahí. Taicha náimatipa éma taicha náimahapa
eta tíamicareana máichaqueneana te mávihaipa te Jerusalén te jena piéstairahi
eta Pascua.

46 Tásiha, tiápechavavarepa mayanaucha ema Jesús eta avasare Caná, te máepiyasinehi vino eta une. Te apanahivare avasare ticaijare Capernaúm, matiarihíhi ema majupaha ema rey. Macajumaquenehi ema machicha.

47 Te masamairiricapa ema achane eta máitecapiraipahi ema Jesús te Caná, tiyanapa matanupanahi. Eta máichimavapa, mayaseacapa eta macatajicahini máehicavanehini te mapena, macanarapanahini ema machicha taicha ema macajumaquene tiánehiripa tépenayarehini.

48 Émasera ema Jesús máimatipa eta masamure ema achane, tásiha, máichapa:

—Éti vahi esuapanuimahi, te vahi nímechahehi eta tiáramicareana — máichapa.

49 Émasera ema achane máichapa:

—Picatajicanuchucha, tátachicha. Péhicanu, machu máepenacaru ema nuchichasami — máichapa.

50 Ema Jesús majicapapa:

—Tiuri, piyana. Vahi picueñamava, ema pichicha vahi tépenaimahi. Máenahi tinaracaipahi nícha — macahepa.

Tacahe, ema achane masuapapa eta máichirahi ema Jesús. Tiyanapa tichavahi te mapena.

51 Te tiánehipaipahi títecapa te mapena, nácapapa ena macajurureana. Náichapa:

—Tata, ema pichicha tinaracaipahi.

52 Tacahe, ema mayaserecavacapa:

—¿Tájaha hora te tinaracapa ema nuchicha?

Éna náichapa:

—Cape te la una te cáperehi, táetaviacapa eta fiebre —nacahepa.

53 Tásiha, ema achane máechapa étairaichuhi eta hora eta mametasirahi ema Jesús eta manarasiraipa ema machicha. Tacahe, ichaperinehi eta masuapirahi éma, énapa éna machichanaveanahi te peti, eta émairahi ema Cristo, Mavaneruhi ema Víya.

54 Eta juca eta tápinanehi eta tiáramicarehi máichaquenehi te Galilea, te táequenepa eta machavirahi eta te Judea.

5

Ema Jesús macanaraca ema achane macajumaquene eta muracaquiha, ema tiávihahi te tachacaya eta noque ticaijare Betesda

¹ Te táequenepa eta juca, tatiarihíhi eta apana piesta eta viúrujisirávana te Jerusalén. Tiyanavarepa ema Jesús.

² Te jena viávasa, tatiarihíhi eta ichape tapaja náimisapiirare eta uvesana nacaparuasana. Tatiarihíhivare eta ichape noque vímijarechahi Betesda. Ticayehéhi cinco eta cúlerureana.

³⁻⁴ Eta návihahi ena nacajumaqueneana púchuquiana, masariana, énapa ena muracaquiha. Namutu éna, ticuchapanahi eta macayamurisira eta une ema ángele. Tásiha, namutu tiyanana téchipapaicavana te une, taicha tímijachavana mácani tnapuca téchipaicava, tacanaracayarehi eta jácani majuma.

⁵ Tacahe, matiaríhi ema achane macajumaquene. Tréintayocho añoripahi eta macatajivairahi.

⁶ Tacahe, te tisiapapaipahi ema Jesús, máimahapa ema achane macajumaquene tívecahi. Máimativare eta tayerevaipahi eta macajumairahi. Mayaserecapa:

—¿Pivaraha pinaraca, nuchicha? —máichapa.

⁷ Tásiha, ema achane majicapapa:

—Nuvaraha, tata. Nájinasera ticasiapanuimahi tayehe eta noque, te tiyamurieca eta une. Ticachuricanuanaparaca ena apamuriana nucuti-queneana nacajumaqueneana —máichapa.

⁸ Tacahe, ema Jesús máichapa:

—Pécheputa, piveha eta pímacaraji. Piyana pipaica —máichapa.

⁹ Tásiha, eta máichirahi ema Jesús, enevanerinehi tinaraca ema achane. Mavehapa eta máimacaraji. Tiyanapa tipaica.

¹⁰ Eta sache manarasirahi ema achane, sávarumuhuhi. Ticapicahuhi eta jena sache nayehe ena israelítana. Tacahepa, te náimahapa ena tuparairucana, nacajachapa éma. Ánipa ná icha:

—¿Tájaha tacayema vahi pipicaucha puiti juca sache tacapicahuquenehi? Vahi vísapa piámahini eta pímacaraji puiti juca —náichapa.

¹¹ Ema achane majicapavacapa:

—Vahi nútina tásiha. Ema maca achane ticanaracanuhi, tivanecanuhi. Máichanuhi: “Piveha eta pímacaraji. Piyana pipaica” —máichavacapa.

¹² Tásiha, éna nayaserecapa:

—¿Nájahasica ema tivanecavihi pipaica eta piámirapahi eta pímacaraji? —náichapa.

¹³ Émasera ema achane vaipa máimatihini eta máijare ema ticanaracahi. Váipavare náetupiacacarehini ema Jesús te namuri ena camuriqueneana achaneana taicha tiyanaripahi.

¹⁴ Téhesera te táequenepa, tiyanapa ema achane eta te Templo. Ánaqui títecapavarepa ema Jesús. Te máimahapa ema Jesús ema achane macanararuhi, máichapa:

—Pímaha, vaipa picuapechava picucapecatura, machu tachavauchavi eta pijuma, máchuvare pávetiji —máichapa ema Jesús.

¹⁵ Tacahe, eta máimatirapa, ema achane tiyanapa mametapanavaca ena tuparairucana eta émairahi ema Jesús ema ticanaracahi.

¹⁶⁻¹⁸ Eta tacahe, ena tuparairucana tiseமானapa. Ichaperinehi eta nacatiasirahi ema Jesús táichavenehi eta manarasirahi te jena sache sávarumuhuhi tacapicahuquenehi. Tásiha, títecapanapa, éna ticaratacanayarehini ema Jesús. Émasera máimatihini eta napanereruana. Tacahe, máichavacapa:

—Ema Tata tamutuchucha sache ticaematane. Ene nucaheyarehi nuti apana. Nitauchayare eta mavanairipiana —macahepa.

Eta nasamirahi ena tuparairucana eta máichiravacahi, navetijipaicha eta nasamirahi. Navarahapa nacapacavaneyarehi éma. Eta tiviuachahi eta macanarasesirahi te sávarumuhuana, náimijachirahi máepuruhi eta nayeherepi. Tavetijipaicha eta máimicaeherachiravahi Machichairahi ema Viya, Víyairahi ema apana.

Ema Jesús macatuparahaquenehi me Maiya

¹⁹ Énerichuvare ema Jesús máichavacapa:

—Nutupiruva numetacahe: Nuti Machicha ema Viya, eta nutuparahanahi mayehe, váiparinehi nútijiricavaimahi nícha jácani nuvarahaqueneanahi.

Núti nímatiequenehahi tamutu eta máematanerepihi ema Ticachichanu. Étayareichuhi níchayarehi núti.

²⁰ Taicha yátupihí eta máemunasiranuhi ema Ticachichanu. Eta tacahe, tímechanuhi tamutu eta máematanerepiana. Énerichuvare tíjaracanuyareva eta nímechiraheya eta apamuri tíáramicareana. Tíápajucavayare eta táramicarevayare, apaesa íáramirineyare, epicayareva.

²¹ Ema Tata marataha macaechepuca ena náepenaqueneana, máimichavayarehi macaitarecavacaya. Énerichuva nuti Machicha, nuratahavare nucaitareca nácani nuvarahaqueneanaya, níjaraca eta náítaresiraya.

²² Nucatuparahahivare mayehe ema Tata eta nímaíraya eta nacaicuñairayare namutu ena náejecapavaqueneanahi. Vaipa émainahi tícuñareca éma.

²³ Taicha mavarahahi epicauchanu nuti Machicha, tácutirichu eta epicauchirahi ema Tata. Nácanisera vahi típicauchanuanahi núti, váhivare napicauchaimahi ema Tata.

²⁴ Yátupiquenevare numetacahe eta juca apana. Nácani ticaquiñanayare tisuapanayare eta néchajiriruvana, nasuapavare eta nucavanahirahi mayehe ema Tata, éna títarecanayare, vaipa ticaicuñanaimahi. Taicha éna, tíúchucuharípa tayehe eta náicuñayaréni te yucu. Náicuchihí eta náítaresiraya.

²⁵ Tacutiquene nutupiruva numetacahe nuti Machicha ema Viya. Táitecapaquenepa puiti juca sácheana, tisamanuanayare ena achaneana, tayanapané tépenahi eta náchanevana. Te nasuapajirahípuca, nucaitarecavacayare eta náchanevana.

²⁶ Taicha ema Tata namutuhi marataha macaitareca. Ene tacahe eta máíjarasiranuhi núti Machicha eta namutuyareva nurataha nucaitarecavaca.

²⁷ Énerichuvare tituparacaruhi eta nícuñasiravacayahivare taicha yátupiquenenuhi manerejirunuhi.

²⁸ Vahi ecuarami eta juca numetasirahehi. Járájapa eta sácheyare eta nasamírayare namutu ena náepenaqueneana eta nahu núti.

²⁹ Téchepucanainapa namutu te náecariana. Nácani tíchanahi eta táuriqueneana, títarecanainapa. Énasera ena tíchanahi eta tamauriqueneana, ticaicuñanainapa.

Éma Jesús máimereca eta macavanahirahi me Viya

³⁰ Núti vahi nútijiricaváimahi nícuñareca. Nucuchapayarehi eta manairípi ema Tata, ema tivanecaruhi. Tacahe, te nícuñareca, vahi numapachichijicaimahi, tatupiruvayarehi nícha. Taicha tacahehi eta mavarahaquenehi ema Tata.

³¹ Te nácarichu núti nútijiruvainachuchaini eta nímereruanahi, vahi tácomesahíni esuapanuhini.

³² Váhísera nucarichuimahi, taicha matiaríhíhi ema apana títametasi-naruhi, émarípa ema Juan Tícachasíricarahi. Nímatíhi núti eta matupiruvahi eta máichaqueneanahi eta tímereuchanuhi.

³³ Éti ecavanairípipa nayasereca ema Juan te nájahanuhípuca núti. Matupiruvahísera éma eta majicapíravacahi eta nútiqueneípahi éma ecuchaquenehi.

³⁴ Váhísera étaparacaimahi eta juca eta matiaríhirahi ema tímereuchanuhi. Eta ticamunucarepanahi eta esuapíranuína apaesa íúchucuhaiya éti nícha núti.

³⁵ Ema Juan tímicitijiricavahi timícauchahehi tayehe eta mametarapihi eta eyehe, te jena sácheanahi esamararasirahi éma. Iúrisamureinehi ichape, taicha eta tamicauchirahehi eta máechajiriruva.

³⁶ Váhiserá mácarichu eta máimicaecherachiranuhi ema Juan. Jararihi eta apana táimicaecherachiranuhi, tiápajupanavahi eta táramicareva. Taicha nútí nícha eta nématanerepiana májjararunuhi ema Tata.

³⁷ Émaripa ema Tata tivanecanuhi. Éma, vahi macutihémahi éti achaneana. Vahi esamahini eta mahu, váhivare ímahaimahi eta máquehe. Téhesera te jena Sagrada Escritura, timetacahehi eta nítecapiraya.

³⁸ Éti vahi evarahahini esuapanuhini nuti mavaneruhi éma. Éta tímereuchahehi eta váhivare iúnacahini eta máechajiriruvana te esamureana.

³⁹ Éti, tamapuruji eta ecaravahirahi eta Sagrada Escritura. Ímijachari-papuca eta ticaitarecaheyarehi. Váhiserá ímatiequenehahini, váhivare ácaicutiarahini eta nútirahi táechajisihahi nútí nucaitarecayarehi.

⁴⁰ Tacutiquene vahi ávarahahini epauchanuhini éti, njaracahehinehi eta ítaresiraya máitavacacainahini.

⁴¹ Nútí vahi nácomesa nacunachanuhini ena achaneana.

⁴² Títecapa, nímatievacahi emutu éti eta emaemunasirahi ema Viya.

⁴³ Nútí nuvanecasivarichuhi me Tata eta nítesirahi. Étiserá vahi esuapanuhini, váhivare ejacapanuhini. Téhesera te máitecahinehi mácani apana achane, tímijachavapuca Cristo ema ecuchapaquenehi, masapihapucaini ema tisuapacarehinehi eta eyehe.

⁴⁴ Éti, vahi esuapanuhini taicha eta evarairahi ecunachacareva ena achaneana. Esapihachucha éti vahi ávarahahinehi ecunachacare me Viya.

⁴⁵ Váhiserá nútínayare numetauchahe eta me Tata. Máimahaherinepa ema Moisés. Éma timetauchaheyare. Éti ímijachavahi ticuchucuchaheyare eta evarairahi ítaucha eta mavanairipiana éma. Tamapurujihisamisera.

⁴⁶ Te yátupinahini esuapahini eta mametarapiana ema Moiséini, esuapanuhivarepucaini nútí táechajisiquenehi eta májureanahi ema Moiséini.

⁴⁷ Váhiserá esuapahini eta májuchaqueneanahi éma. Tavetijipa eta emasuapiranuhi eta juca numetarapiana eyehe —macahepa ema Jesús.

6

Ema Jesús máitaparajahi máenicavaca ena camuriqueneana achaneana (Mt 14.13-21; Mr 6.30-44; Lc 9.10-17)

¹⁻⁴ Te táequenepa, te jena sácheana tiánehipa eta Pascua, vapiestarasahi viti israelítana. Émasera ema Jesús, tiyanavarepa tiámahavivare eta viánuecahi eta cáquiure Galilea (ticaijarehivare Tiberias). Camurianasera ena achaneana típaicanapahi téhicanapahi éma, taicha eta náimairahi eta tiáramicareana máichaqueneanahi eta macanarasiravacahi ena nacajumaqueneana. Te vítecapapa te apachara, vianapapa te jácani anuquerehi mávapahi. Tacahe, véjacapa vinaracayarehi.

⁵ Téhesera te máimahapa ema Jesús ena camuriana achaneana eta náitecapauchirahi, máichapa ema vichamuri Felipe:

—¿Távihapucaini vivacharesihaini eta tinicacare vénisihahini namutu ena nani achaneana? —máichapa.

⁶ Eta juca mayaseresirahi étachuchanéni eta mavarairahi éma macaicu-tiarayarehi te tájahapuca macayemayarehi ema Felipe. Taicha ema Jesús máechahi eta máichaqueneyarehi.

⁷ Tásiha ema Felipe majicapapa:

—Tacamunuhi vácayehéhini eta camuri plata apaesa namutupaini vítaparahini vénicahini apaesainahini návaminahini. ¡Vahi taratahahini eta dies mil páneana! —macahepa.

⁸ Tásiha, téchajicapa ema nuchamuri Andrés, maparapehi ema Pedro. Máichapa:

⁹ —Mararihi ani ema émana amaperu tiámaphi eta cíncochichapahi eta pan, apinapa eta jima. ¡Váiparinehisera nárataimahi ena nani camuriqueneana achaneana! —macahepa.

¹⁰ Émasera ema Jesús máichahavipa:

—Evaneca náejahapaica námutu ena achaneana —macahepa.

Taicha tiúrinapahichíhahi eta apaquehe, mujipahihivare. Cinco mil eta náichapemurivahi ena ajairana. Vahi náimitupachahini ena esenana énapa ena amaperuana.

¹¹ Tacahe, ema Jesús mavehapa eta páneana. Te tamutupa eta mahasulupa-yachirahi ema Viya, tíjarachavipa. Vénicapa víti, víjaracavacapaipa eta pan éta pa eta jima. Tisimurivacapaipahi eta víjaraca.

¹² Tinicanapa námutu. Tisatuheanapa, nacaemacharichahavare. Tásiha, ema Jesús máichahavivarepa:

—Ecurujica eta náemacharajianahi, machu támapuruji —macahepa.

¹³ Tásiha, víti vicurujicapa eta pan náemacharajianahi. Táinicachaicha-havare eta dócehiquene ichapehiana saye.

¹⁴ Tacahe, eta náimairahi ena achaneana eta juca máichaqueneanahi ema Jesús, ichaperinehi nárami. Tásiha, nacahepa:

—Émaripa ema maca profeta ema vicuchapaquenehi máiteruyarehi te juca apaquehe —nacahepa.

¹⁵ Eta tacahe, navarahapa námayahéini nayeheyarepa rey. Émasera máimatipa eta napanereruhi. Tacahe, térajicavavarepa eta nayehe. Tiyanapa macarichuhi te tápusi eta cerro.

Éma Jesús mapaicaeca eta une
(Mt 14.22-27; Mr 6.45-52)

¹⁶ Tacahe, te jena cáperehichichapa, viyanapa víti máimitureana tayehe eta cáquiure.

¹⁷ Te vítecapapa, viávacuhapa te pacure. Viánuecayarehi te apachara. Vicaijuheyarehi eta avasare Capernaum. Tivehahavipa eta yati eta viánuesirahi. Éma Jesús májinahi macachanehavipahini.

¹⁸ Eta vipaisirapahi, tachimaracapa eta muraca técaticava. Tépacucapa muraca eta cáquiure.

¹⁹ Cinco kilómetroipahi eta viyerehivahi, vétupiecapaipahi, te vímahapa ema Jesús. Mapaicaecapaipahi eta une, tipauchahavipaipa. Víti vipicapa eta vímajrahi.

²⁰ Émasera máichahavipa:

—Vahi ecupicanu. Nútichucha.

²¹ Tacahe, vímatipa éma. Viúrisamuréinehi eta vijacapirahi eta mávacuirapa eta te vipacure. Tásiha, vítecapanecha eta te vicaijuheyarehi.

Ena achaneana natanujiricaipahi ema Jesús

²² Te apanapa sache, ena achaneana manaquiruanahi ema Jesús, natanujiricaipahi éma. Námatiacapa eta vicarichuirahi viánueca viti máimitureana. Tájinahivare apanainahini pacure.

²³ Tásiha, tacahepainecha eta apana pacureana, nayehehi ena tiásihanahi te avasare Tiberias. Títécapanapa te tachacaya eta nanisinehi eta pan ena camurigueneana achaneana.

²⁴ Tacahe, ena achaneana eta namaimairahi ema Jesús vítipa viti máimitureana, tiávacuhanapa te pacureana. Tiyananapa ticapayacahavianayarehi te Capernaum, natanusirapahi ema Jesús.

Ema Jesús ticaitarecarahi

²⁵ Te títécapanapa ena achaneana te apachara, náetupiacapa ema Jesús. Tásiha, nayaserecapa:

—Tata maestro, ¿tájamuhu pítecapahi eta ani? —náichapa.

²⁶ Ema Jesús majicapavacapa:

—Nutupiruva numetacahe: Eti etanucanupahi táichavenehi eta nénisirahehi nésatuhechirahehi. Váhisera ácaucitiarahini eta nímechirahehi eta tiáramicareana.

²⁷ Eti tamapurujipa eta ecañamarasiravahi etanuca eta enicaquenerepi taicha títavayarehi. Tatuparacahisera etanucayare eta tinicacare ticaitarecaheyarehi, máitavacacahi éta. Étara eta juca níjararuheyarehi nuti Manerjirunuhi ema Viya. Éta tímereuchanuhi eta yátupirahi nuvanecasivahi eta mayehe ema Tata —máichavacapa.

²⁸ Tacahe, éna nayaserecapa:

—¿Tájahapucaini eta mavarahaqueneanahi ema Viya eta vicaematanea-sirahi éma? —nacahepa.

²⁹ Ema Jesús majicapavacapa:

—Eta mavarahaqueneanahi ema Viya íchaqueneyare, esuapanuyare nuti mavanerunuhi —macahepa.

³⁰ Tásiha, ena nayaserecavarepa:

—¿Tájahasica eta tiáramicare pímechahaviyare apaesa visuapavipa? Vi-varaha vímaha.

³¹ Eta acane ema víyarahaini Moisés tíjaracavacahi ena viáchucaeque-neanaini tinicanahi eta ticaijare maná, ánaqui te apaquehe mávpahi. Taicha tacahehi eta táechajiriruvahi eta Sagrada Escritura ani tacahehi: “Máenicavacahi eta tinicacare tiásiha te anuma”. Piti, ¿pímijachavapa pirataha picachurica ema víyarahaini Moisés? —nacahepa.

³² Ema Jesús majicapavacapa:

—Nutupiruvavare numetacahe. Éti, ichape eta éjecapirava. Ema víyarahaini Moisés, vahi émainahini macucupaicahini eta maná. Ema Tata, émahí ticucupaicahi eta maná.

³³ Jararihi eta apana numetarapi eyehe: Puiti ema Tata mavaraha máijaracaheya eta yátupiquenehi tinicacarehi. Étaripa tinicacarehi tiásihahi te anuma ticaitarecavacayarehi namutu nácani tijacapanaya. Étara eta tímitecanuhi —macahepa.

³⁴ Tásiha, najicapapa éna:

—Tata maestro, piyaseasinahavi ema Viya máijaracahavipaini máejehainahini eta tinicacare péchajisiquenehi —náichapa.

35 Tásiha, éma máichavarepa:

—Nútira eta yátupiquene tinicacare nucaitarecaheyarehi. Eta tacahe, nácani tisuapanuanayare, vaipa tiápechavanaimahi téchana. Váipavare timaunea-naimahi.

36 Étasera eta níchaquene, ímahanuipaneni éti, váhisera esuapanuhini.

37 Nuvaraha ácaicutiaraquenéna yátupina. Namutu nácani tipauchanua-nayare, núti vahi névatajicavacáimahi taicha tásihaquenéichuhi me Tata eta máijarasiranuhi éna.

38 Taicha núti, eta núcupaisirahi te anuma, tímitecanuhi nítauchayarehi eta mavanairipiana ema Tata. Vahi nútijiriruvainahini eta nítésirahi níchayarehi eta nuvarahaquenelahini núti.

39-40 Eta mavarahaquenehi ema Tata eta mavanésiranuhi, nucaitareca-yarehi nácani máijararunuanayarehi éma. Nácani tésenicanuanayare nuti Machicha, tisuapanuanayarevare, máichecuaraquireyare eta náitaresiraya te nucaechepecapa éna te náecariana te jena sache táitecapapa eta népaníra-vacayare. Váhiquene nucamitiacaimahi ema émanaimahi —máichavacapa.

41 Tásiha, nararihi ena ticaecahirahiana eta máichiravacahi ema Jesús eta émairahi eta yátupiquene tinicacare, máucupairuhi te anuma, ticaitarecara-hiyare.

42 Ánipa náichacacahi:

—Tépiyahirahipa ema maca. Víti, vímatihí ema maiya, ticaijare José. Éneri-chuvare vímatihivare esu máena. ¿Tájaha tacayema eta macahechajiriruvahi eta másihairahi te anuma? —nacahepa.

43 Ema Jesús máichavacapa:

—Ámatina. ¿Tájaha tacayema épururahi?

44 Nacarichu témunahiricavanaya tipauchanuana nácani máichuhaque-neanahi ema Tata. Eta tacahe, ena máichuhaqueneanayarehi éma, nucaeche-pucavacayare núti te táitecapapa eta sache népaníravacayare núti.

45 Taicha tacahehi eta májurehi ema profeta víyahahaini Isaías, ani tacahehi: “Náimitucasivayareichuhi me Viya namutu ena achaneana”. Tacahe, namutu ena máimitureana ema Tata, énara tipauchanuanayare puiti.

46 Tayanapane váhihinéni náimahaimahi eta mamira ema Tata. Nucarichu núti nímahapa éma taicha étaquenehi eta násinehi eta mayehe.

47 Nutupiruvahi numetacahe: Nácani tisuapanuanayare, níjaracayare eta náitaresirayare máitavacacayare.

48 Núti, yátupiquenehi eta nucaitaresiravacahi ena ticasínavanahi eta nuyehe tacuti eta tinicacare tacaitarecachi eta viáqueheana.

49 Éti, ena iáchucanaveanaini tinicanahi eta maná te mávapahi apaquehe. Váhisera náitarecahini. Namutuhi tépenaracánahi.

50-51 Nácánisera tinicanahi eta néche, vahi tépenanaimahi. Taicha núti núcupaicaripa te anuma. Eta neche, yátupiquenehi tinicacarehi ticaitare-carahi. Nácani tinicanayare eta neche, máichecuaraquireyare eta náitaresiraya. Núti níjaracayare eta neche taicha nuvaraha tacaitarecavacahini namutu ena achaneana —máichavacapa.

52 Tásiha, ena natiarihiqueneana tiácapaemajiricácanapa. Ena apamuri-ana, ánipa nacahe:

—¿Tájahapuca macayemahi eta máijarasirahavi eta maeche viniruyarehi? Ena apamuriana, ánipa nacahe:

—Vaipa tétupicava eta juca mapanereruhi. Mavaraha vinicayarecacha eta máechenaváji —nacahepa.

⁵³ Émasera ema Jesús máichavarepa:

—Nutupiruva numetacahe: Te épuruhipuca enica eta neche, nuti Manerejirunuhi ema Viya, te épuruhivarepuca éra eta nítine, vahi itarecaimahi.

⁵⁴ Taicha nácani tinicanayare eta neche, téranayareva eta nítine, éna máichecuaraquireyare eta náitaresira. Tásiha, núti nucaecheputavacayare te náecariana te jena sache népaníravacayare.

⁵⁵ Taicha eta neche yátupiquenehi tinicacare tacaitarecarahi. Énerichuhi eta nítine, yátupiquenehivare téracare ticaitarecarahi.

⁵⁶ Esamanuchaha. Nácani tinicanayare eta neche, téranayareva eta nítine, éna tiávahácanuanayarehi núti. Tásiha, núti návahácavacayareva éna.

⁵⁷ Taicha ene nucahehi núti, tiávahácanuhi ema Tata. Tásiha, núti návahácavacayare éna. Máitavacacahi eta máitaresira. Éma ticaitarecanuhi. Tivanecanuhivare nucaitarecaheyarehi. Tásiha, nácani tinicanayare eta neche, máitavacacayare eta náitaresira nícha.

⁵⁸ Núti núcupaicahi te anuma eta níjarasiraheyarehi eta juca yátupiquenehi tinicacare. Vahi tácutihi eta maná nanicaquenahi ena iáchucanaveanaini éti. Tépenaracanárichuchaséra. Énasera ena tinicanayare eta neche, máichecuaraquireyare eta náitaresiraya —máichavacapa.

⁵⁹ Tamutu eta juca máimiturapiana ema Jesús te mávihalpahi te náurujisireva ticaijare sínagoga tayehe eta jena avasare Capernaum.

Tacarichu eta máimiturapiana ema Jesús ticaitarerahi te visuapa

⁶⁰ Tacahe, ena téhicanahi ema Jesús, eta nasamirahi eta juca máimiturapianahi, camuriana ena vaipa návarahahini náehica. Ánipa nacahe:

—Ticajerapicha eta vicaicutiarirainahini eta juca máimiturapiana. Nájinavare tisuapanaimahi —nacahepa.

⁶¹ Émasera ema Jesús máimatihí eta napanereruanahi eta namavarairaripa náimiyannahini náehicahini. Tacahe, máichavacapa:

—Páurehehi éti eta evaraha ínajica eta éhisiranu taicha eta emacaicutiarairahi eta nímiturapianahi.

⁶² Németeaca ímijanavaichucha eta emasupajiraivahi, tayanapanepuca ímahanupuca eta nárairaya nuchavirayarehi te anuma, te návinehi acane, taicha núti Manerejirunuhi ema Viya.

⁶³ Ácaicutiara eta nucayemaquenehi. Vahi étaparacaini eta néchaquene. Eta juca nímiturapiana, te esuapapa, éta ra ticaitarecaheya taicha yátupiqueneríhi.

⁶⁴ ¡Páurehehi eti váhiquenehi evarahahini esuapanu! —máichavacapa.

Eta juca macayemaqueneanahi ema Jesús, matupiruvahi eta máichiravacahi taicha máimatipahi eta napanereruana ena tijunijicayanayarehi, émapa ema tjararecayarehi.

⁶⁵ Tacahe, máichavacapa:

—Puiti, evaraha ínajicanu. Eta tacahehi eta níchirahehi: “Nacarichu témunahiricavanaya tipauchanuana nácani máichuhaqueneanahi ema Tata” —máichavacapa.

⁶⁶ Eta nasamirahi eta nacayemaqueneanahi, tínajicavanapa ena camuriqueneanainihi. Vaipa náimiyannahini náehicahini ema Jesús.

67 Tacahe, tiyaserecavipava viti dócequeneana máimitureanahi. Máichahavipa:

—¿Evarahainapapuca ejunijicanuyare éti apanavare?

68 Tacahe, ema Simón Pedro majicapapa:

—Tata maestro, vahi vijunijicavimahi, taicha nájina pácuti eta péchajiriruvana. Tétavicavahi eta tacaitarecaravahi.

69 Viti vitupiruvahi eta visupiravíhi. Véchahivare eta yátupiquenéravíhi Cristo, Machíchaquenévihi ema yátupiquenehi Viya —máichapa.

70 Ema Jesús majicapapa:

—Dócehehinéni eti nunerejiruanahi. Mararihiserá ema émana te etaracu, ema mávaháruhi ema Váinaraji —máichahavipa.

71 Ema Jesús, máechajisihahi ema Júlasí. Taicha ema Jesús máimatíhi eta émaírayarehi tíjarareca, tayanapane éma vídocenénihi viti apóstoleana.

7

Ena maparapenaveana ema Jesús váhivare nasuapa

1 Tacahe, ema Jesús tímiyanapaipahi típaicapaipahi eta avasareana te tinapaica eta Galílea. Vahi mavarahahini machavahini tayehe eta avasareana tinapaica eta Judea, taicha ena tuparairucanahi te Jerusalén napanerechaipahi nacapacayarehi éma.

2 Tacahe, te jena sácheanahi, tiánehipa eta vípiestara viti israelítana eta vicapenahuiyupacahi eta viyusujiana. Étahi eta vítecapihavacahi te Jerusalén, vihasulupayacha me Viya eta macajurusinahavíhi eta visucureana te véसानeana.

3 Tiuri puiti, natiarihíhi ena maparapenaveana ema Jesús. Tacahe, náichapa éma:

—Te pímiyachava píтира máestrovi, vahi pánasi eta te ani. Piyana te Judea, apaesa ena pímitureana tíávihanahi ánaqui náimaha eta píchaqueneanayare.

4 Taicha te pivarahahipuca náimatívi ena achaneana, tacamunúhi pímerécava yátupina te namirahu namutu. Vahi picuyumuruca eta pítucaqueneana —náichapa.

5 Taicha ena maparapenaveana váhiquenevare nasuapahini éma.

6 Tacahe, ema Jesús máichavacapa:

—Vuíchaha táitecapauchanuhini eta nuyanirayare te Jerusalén. Étísera tamutuchucha tiuri eta eyaniraina.

7 Nútísera ticatichanuanahi ena achaneana táichavenehi eta nímereuchi-ravacahi eta náíchaqueneana támaraíqueneana. Étísera vahi ticatichaheanaimahi taicha tájina taviuchahehíni.

8 Te evarahapuca, eyana éti te píesta. Nútísera vuíchaha nuyanaimahi taicha vuíchaha táitecapauchanuhini eta nuyanirayare —máichavacapa.

9 Máevatacáhi ema Jesús ena maparapenaveana, émasera tícaequenehavapa. Manasipanaíchaha te Galílea.

Ena Jesús tíyanarichuchanéni tayehe eta píesta

10 Te tíyananapa te píesta ena maparapenaveana ema Jesús, énerichuvaréni éma tíyanavarepa. Váhísera máímerecavahichaini.

11 Énasera ena tuparairucana natanucaipa éma, te jena píestaquenehi. Tásiha, nacahepa:

—¿Macáñárihipucacacha ema mácani achane? —nacahepa.

12 Énerichuvare ena achaneana natiarihiqueneanahi te piesta, náechajisihahi éma. Ánipa nacahehi: “Vahi tiuri ema maena achane. Macaetemavaca ena achaneana”. Ena apamuriana ánivare nacahe: “Tiúrihi ema maca. Vémeteaca tétavivaca eta máurivahi”.

13 Váhisera nacuchujipicahini eta nacayemaqueneanahi taicha tipicacacavanarichucha nayehe eta tuparairucana.

14 Te enumuhuquenepa eta piesta, mapaenumavapa tímerecava ema Jesús. Tiyanapa tisiapahi tayehe eta Templo. Tinahacavapa túmiturecahi.

15 Ichape eta náramirahi ena tuparairucana, eta náimairahi eta máitusirahi yátupi. Tásiha, ánipa nacahehi:

—Éma maca vahi vímiturenahini. ¿Táviha maviyahi eta máitucaquenehi ema maca? Vahi mávamirahuini eta máimitusiravacahi ena achaneana — nacahepa.

16 Émasera ema Jesús máimatihini eta napanereruanahi. Tacahe, máichavacapa:

—Vahi nútijiriruvaina nuvehahini te nuchuti eta juca nímiturapianahi. Ema Tata tivanecanuhi, émahini tituparacanuhi eta nímitusiraya eta máimiturapiana.

17 Te etiarihinapuca eti evarahahi ítaucha eta mavanairipiana ema Viya, ímatiacavaneyare eta juca nímiturapianahi étairahi tiásihahi eta me Viya. Vahi nútijiricávainahini eta nímitusirahi.

18 Mácani achane émajiricavahi téchajisihava, mavarairahi ticunachacareyarehi. Nútisera, eta nuvarairahi ecunachayare ema Tata tivanecanuhi, vahi népiyahirahimahi. Nutupiruvahi néchajisihá eta yátupiqueneana tisuapacareana.

19 Échavarichu éti eta máijarasirahehi ema víyahahaini Moisés eta mavanairipiana éhiruyarehi. Váhisera ítauchahini éti émanainahini. ¿Tájahasica eta nuviureva eta evarairahi ecapacanuva? —máichavacapa ena tuparairucana.

20 Ena achaneana najicapapa:

—¡Péjcapava píti eta pipanereru! ¡Máurishivipapuca píti! ¿Nájaha ticahehi eta vivarairahi vicapacavi? —náichapa.

21 Ema Jesús tímiyanava téchajiricava nayehe ena tuparairucana, ánipa máicha:

—Táichavenehi eta nípuresirahi te jena sache tacapicahuquenehi sávarumuhuquenehi, éta tiviuchanuhi ichape eta eyehe.

22 Étiyapa epamicavahi eta emarcachiraya mácani amuya ajaira te óchopa eta masacherahi, tayanapane sávarumuhuhupuca. Taicha ichape evaraha ítauchayare eta mayeherepini ema víyahahaini Moisés. (Váhisera émainahini máinapucahini manacuchahini eta juca eyeherepi. Ema víáchucaini Abraham énapa ena machichanaveana tinapucanahi nanacucha eta viyeherepiyarehi.)

23 Te tiúrihi ímaha eta emarcachirahi mácani amuya alauchu te sávarumuhuana, ítauchirapaipahi eta mavanairipi ema Moisés, tatuparacaha vahi eusemahini eta nuyehe táichavenehi eta nuncanarasirahi ema maca achane te sávarumuhu.

24 Vahi ecuémunanásicava eta epanereruana. Epanerechinava tayehe eta táuriqueneana. Ácaicutiara eta táurivahi eta vicanarasirahi ena achaneana, tayanapane eta sávarumuhuhupuca —máichavacapa.

Ema Jesús máechajisihapa eta másinehi

25 Tacahe, natiarihi ena tinerejicavana ena ticavasanahi te Jerusalén, nacahepa éna:

—Ema maca, émara ema natanujiriruaasa ena tuparairucana, ema navarahaquenehi nacapaca táichavenehi eta máimijachirava ema Cristo mavaneruhi ema Viya.

26 Ímahasera éma, vahi mapicacaracavahini eta macametarairuirahi te juca Templo. Nájinavare ena tuparairucana nájaracavahini nacaratacahini. Nájinavare nacamatinaahini. ¿Nasuaparipapuca puiti éna, eta émairahi ema Cristo?

27 Vémeteacasa vuíchaha émaina ema Cristo, taicha vímatihí ema maca, étapa eta máuchusinehi. Te máitecapa ema yátupiquene Cristo, nájina téchaimahi távihapuca eta máuchusihayare —nacahepa.

28 Émasera ema Jesús máimatihí eta napanereruana. Tásiha, muracapanapa eta máechajisirahi eta te Templo máimituresirahi. Ánipa macahe:

—¡Éti ímijachava ímatinuhi, étapa eta núchusinehi! ¡Váhisera ímati eta tímitecanuhi! ¡Váhivare ímati ema Eternoquenehi, ema tivanecanuhi! Núti, vahi nútijiriruvainahini eta nítesirahi.

29 Nútisera nímatihí éma taicha étaquenehi násinehi eta mayehe eta nítecapauchirahehi —máichavacapa.

30 Eta nasamirahí éna tuparairucana, tiápajupanavahi eta nasemanevahi. Navarahapa nacaratacayarehini, náeratacayarepaini, vuíchahasera máisapahini ema Viya eta nacaratasira éma.

31 Natiarihisera camuriana ena tisuapanahi. Tásiha, nacahepa:

—¡Víti vémeteaca émaripa ema Cristo ema maca! ¡Taicha nájina mácuti eta máichirahi eta tiáamicareana máichaqueneanahi ema maca! —nacahepa.

Ena tuparairucana náevatacapa ena suntaruana nacaratapanayarehi ema Jesús

32 Ena fariséoana nasamaemachapa ena achaneana eta nacunachirahi ema Jesús. Tásiha, napanereuchavanepa ticurujicacanapa ena tuparairucana. Náevatacapa ena suntaruana nacaratapanayarehi ema Jesús te Templo te mávihahi.

33 Tacahe, ema Jesús máichavacapa ena suntaruana:

—Vuíchaha tituparacahe eta ecaratacanuhini. Yátupisera ánipirine eta nucaheyare eta eyehe. Tásiha, nuchavainapa mayehe ema tivanecanuhi.

34 Éti, etanucanuinapa, váhisera íchimavanuimahi. Taicha vahi ítujicavaimahi ecapayacanu te návihayare núti —máichavacapa.

35 Tacahe, ena ticatianacanahi tiyaserejiricacanapa. Ánipa nacahe:

—¿Távihapapuca macaijuhénapa eta vaipa viratahaimahi vicapayacaimahi víti? ¿Mavarahapuca tiyanayare te tayerehiquene avasare, macapayacaya ena vijaneanana israelítana tiávihanahi te tayerehiquene? ¿Mavarahapuca máimitucayare ena apavasanana?

36 ¿Tájahapucáji tacayemahi eta juca máechajiriruvahi eta vaipa viratahaimahi vicapayaca te jácani macaijuheyare? —nacahepa.

Tétavicavayare eta viúricarevana maicha ema Jesús, tacutiya eta ichape cacjure táuchurehi eta máriana. Ticaitarecaviya éma.

³⁷ Te jena téqueneha sache eta piéstairahi, tímahacarepana eta jena sache. Tiyanavarepa ema Jesús te namuri ena achaneana. Titupihapa, téchajicapa muraca. Ánipa macahe:

—Te natiarihnapuca nácani timauneanahi, náitecapauchanu. Núti níjaracayare eta náerayare nácani tisuapanuanayare —macahepa.

³⁸ Taicha ani tacahehi eta Sagrada Escritura: “Ema Mavaneruhi ema Viya, tétavícavaya eta viúricarevana máicha, tacutiya eta ichape cajacure táchurehi eta te máriana. Ticaitarecahaviya éma” tacahepa.

³⁹ Eta juca macayemaqueneanahi ema Jesús, máimicaecherachahi eta masiapahasiravacayarehi ema Espíritu Santo te nasamureana nácani tisuapanayarehi éma. Vuíchahasera táitachavahini, taicha vuíchaha machavahini mápanahini te mávasa te anuma ema Jesús.

Apanapanepa eta napanereruanahi ena achaneana mayehe ema Jesús

⁴⁰⁻⁴³ Tacahe, ena achaneana apanapanepa eta napanereruana mayehe ema Jesús. Ena apamuriana achaneana, nacunachapa éma. Ánipa nacahe:

—Yátupiquene ema maca achane, émaripa ema profeta ema vicuchapaquenehi máiteruyarehi.

Ena apamuriana, ánivare nacahe:

—Émaripa ema maca ema Cristo.

Énasera ena apamuriana, téjecapavanarichucha. Ánipa nacahe:

—Galileo ema maca Jesús. Váiparinehiséra étainahi máuchusiha ema Cristo tayehe eta avasare Galilea. Taicha eta Sagrada Escritura táechajisihahi ema Cristo émayarehi mámariequeneyarehi ema víyarahaini Rey David. Téhesera te avasare Belén eta máuchusihayare, étaichuhi te mávasahi ema víyarahaini Rey David —nacahepa.

⁴⁴ Natiarihivare ena apamuriana navarahaichucha náemeratacyarehi, váhisera napatsicavahini nacaratacahini.

Ena tuparairucana vahi náurica eta nasuapirahi ema Jesús ena achaneana

⁴⁵ Tacahe, ena suntaruana vanairucanahi tichavanapa nayehe ena tivane-canahi tuparairucanahi. Vahi náijaracavahini nacaratacahini éma. Tacahe, náichapa ena tuparairucana:

—¿Tájaha tacayema vahi íamapahini éma?

⁴⁶ Ena suntaruana najicapapa:

—Víti vahi vipatsicavahini vicaratacahini éma, taicha tétavícava eta máitupajjiasirava ema maca. Émahipuca ema Cristo vicuchapaquenehi. Nájjina mácuti eta máechajisira ema maca achane —nacahepa.

⁴⁷ Tacahe, ena fariséoana náichapa:

—¡Éti apanavare ísapavaipahi tivayuaracahe ema mácara!

⁴⁸ Nájjina émanaina ema tuparairuca veyehe viti nasuapahini ema máenatajaji. Váhivare émanaripa vichamuri fariséo, vahi masuapahini.

⁴⁹ Énasera ena nani achanetatajiana máimatirahanahi eta veyehe ley, náehicávanetatajipa. Táurica nacaicuñahini táicha —nacahepa.

⁵⁰ Matiarihivare ema Nicodemo, ema tipaipuchahi ema Jesús te jena yátiquenehi. Fariséohivare éma. Máichavacapa:

⁵¹ —Váiparinehi vétavicaímahi eta veyehe ley vítijiricavahini vicapacahini ema achane. Tacamunuhi véchanumayarehi eta maviurevahi —macahepa.

⁵² Éna najicapapa:

—Vémeteaca píti apanavare pijaneanahipuca éma, pítirichupuca galiléovihi. Vivanecavi péchajicuha eta Sagrada Escritura apaesa pecha vahi étaimahi te Galilea máuchusi hayare ema profeta Cristo vicuchapaquene —nacahepa.

⁵³Tacahe, te títapiricanapa eta náechajisihairahi ema Jesús, téjanerecanapa. Tiyanaracanapa te napenana.

8

Esu esena ticayepahi

¹Ema Jesús májinaripahi. Tiyanaripa te tachachacu eta avasare, te cerro ticajarehi Olivoquiji. Tatiarihíhi eta avasarechicha ticajarehi Betania, eta máitecapihahi éma.

²Te apanavarepa sache, te tijarahichichapa, tiyanavarepa éma tayehe eta Templo. Téjacapa éma, tímiturecapa. Namutu ena achaneana tiyananahi napaucha, nasamararacayarehi éma.

³Tacahe, sutarihíhi esu esena ticayephipuca, esu suvehahi ema apana achane. Ena escribánoana énapa ena fariséona, eta náimereuchirahi ésu, námapa te mamirahu ema Jesús te namurihi ena achaneana.

⁴Tacahe, náichapa ema Jesús:

—Tata maestro, esu suca esena nachimaracahi ticayepahi, suvehahi ema apana achane.

⁵Eta viyeh ley májjararuhavi ema víyahaini Moisés, tímítucavahi vicapacayarehi eta vitupisisirayare te márijahiana nácani ticapacaturanahi. ¿Tájahapuca picayema píti? —nacahepa.

⁶Éna nayaseserecahi ema Jesús, taicha natanucahi eta tiviuchayarehi éma. Émasera ema Jesús tétipaicapa tiájupairicapa te apaquehe te mavauqui.

⁷Énasera tímiyanavanarichucha nayaseserecahi. Tacahe, máesenimurihapa. Máichavacapa:

—Te etiarhipuca éti mapecaturareanahi, enerejicava ínapuca eyuca esu suca esena —máichavacapa.

⁸Tacahe, tétipaicavarepa tiájupairicavarepa éma.

⁹Eta nasamirahi eta juca, téchavanarichuhinéni eta napecaturana. Titsirihacavanapa. Tásiha, tímutserahavanapa tiúchuchujicana. Nativapa tiúchucanahi ena ichavicapanana.

¹⁰Te máesenicavarepa ema Jesús, nájinaripahi éna. Sucarineipahi esu esena. Tásiha, máichapa esu esena:

—Nuchicha, tiyananapa namutu ena timetauchavianahi. ¿Nájinaapa apanainahini ena navaraha ticapacaviana?

¹¹Tásiha, ésu suíchapa:

—Nájina, tata.

Éma máichavarepa:

—Núti apanavare, váhivare nímicapacavimahi. Piyana pichava. Váipasera picuapechava picuquicha eta pecatu —máichapa.

Ema Jesús, ema namicahu ena achaneana

¹²Te táequenepa eta juca, tépanavavarepa tímíturica ema Jesús. Máichavacapa ena achaneana:

—Nútira numicauchahehi eti achaneana te juca apaquehe. Eta tacahe, nácani téhicanuanayare, vahi téjecapavanaimahi. Taicha eta nímiturapiana,

étapa timícauchavacahi. Tásiha, nacatichainapa eta timapicu, vaipa napauchaimahi —máichavacapa.

¹³ Tásiha, ena fariséoana natiarihipahivare. Tacahe, náichapa:

—Pítijiváichucha péchajisiavahi. Tájina pisuapacarevaina.

¹⁴ Ema Jesús majicapavarepa:

—Tisuapacare eta juca néchajiriruvana, tayanapane nútijivahi néchajisiava. Taicha nímatihi nutuparahaichuhi eta nímeresiravayare. Nímatihivare eta nucaijuheyare. Étiserá vahi ímatihini távihapuca eta násinehi, váhivare ímati eta nucaijuheyare.

¹⁵ Éti étachucha éhichahi eta nayeherepiana nanacaqueneana ena iáchucanaveanaini. Étaserá tíchahehi eta épuruiranuhi. Nútiserá vahi népuruhéimahi éti.

¹⁶ Jéhevareséra, te jácani sáchehare, népuruhepapuca táichavenehi eta emasuapirahi, tatupiruvayarehi eta népuruirahéya taicha vahi nácarichuimahi népuruhe nútí. Matiaríhi ema Tata tivanecanuhi. Ema apana máimahahi eta emasuapajiraivahi. Tépuruheharehivare éma.

¹⁷ Te eyeherepi éti, te natiarihipuca apinana ena títametacarahiana, te ticuticacanahi eta náechajiriruva, tisuapacareanayarehi éna.

¹⁸ Ene nucahehi nútí. Yátupíhi eta numetarapiana. Émapa ema Ticachichanuhi, éma títametacahehi eta yátupirahi eta numetarapiana —máichavacapa.

¹⁹ Énaserá nayaserecavarepa:

—¿Távihasica mávihahi ema ticachichavihi?

Ema Jesús majicapavarepa:

—Éti vahi ímatinu. Váhivare ímatimahi ema Ticachichanu. Te ímatinuhini, ímatipahivareini ema Ticachichanu —máichavacapa.

²⁰ Eta juca eta máechajiriruvanahi ema Jesús eta máimituresirahi tayehe eta Templo. Eta máejasinehi te tachacaya eta nanasirareana eta námavahuana. Nájinasera napatsicavahini nacaratacahíni taicha vuíchaha máisapavacaimahí ema Vía eta nacaratasirainahini éma.

Ema Jesús tímereuchavapa eta émaírahi Cristo

²¹ Ema Jesús tíapechavavare mametacavaca:

—Puiti tíánehipa eta nuyanirayare. Éti etanucanuinapa. Váhisera íchimanuimahi. Émepenainapa eta epecaturana. Tímicuñacaheyare te infierno taicha vahi ecamapuravahíni eta nutiarihirahi, esupanuhíni. Taicha vahi ítujicavaimahi ítecapa te návihaya nútí —macahepa.

²² Tásiha, ena ticatianacanáhi náichacacapa:

—Mavarahainapuca ticapacavayare. Táitusiava macahehi eta máechajiriruvahi eta váhiji viratahaimahi véhica éma. ¿Távihapuca eta macaijuheya? —nacahepa.

²³ Ema Jesús máichavarepa:

—Éti tayehehi eta apaquehe. Nútiserá tayehenuhi te anuquehe. Eta iávasahi éti te apaquehe iávihahi. Nútí návasaichuhi te anuquehe.

²⁴ Eta tacahe, numetacahenumahi eta tanasinapa eta epecaturana te épenapa. Taicha te vahi esupanuhíni eta nútiquenéráhi ema ecuchapaquenehi, tanasiyare eta epecaturana te épena —máichavacapa.

²⁵ Tacahe, nayaserecapa éna:

—Piti pímiyachava mavaneruhi ema Vía. ¿Nájahavisica pítinavaji?

Ena máichavarepa:

—¿Áyahapapuca numetacahe?

²⁶ ¡Tétavicavahi eta tamuracavahi eta esamureana! Tavaraha muraca eta nucajachiraheya. Vuíchahasera nicha. Émasera ema tivanecanuhi, tatupiruvahi eta máechajiriruvana. Eta tacahe, eta néchajiriruvana núti eyehe eti achaneana, étarichuhi eta nusamaqueneanahi mayehe —macahepa.

²⁷ Énaserá váhiquene nácaucitiarahini eta mametasiravacahi eta mayehe ema Maiya.

²⁸ Tásiha, máichavarepa:

—Jéhevaresera te ecaturipihanupa te anuquehe, tapanumavainapa ímatinuyare eta nútiquenerahi ema Cristo ecuchapaquenehi. Ecaucitiarayareva yátupihini nímitucahe eta máimiturapiana ema Tata. Vahi étaina nuviyahini te nuchuti nútijiriruvainahini.

²⁹ Puíticha, ema Tata ticachanenuhi, vahi majunijiacanuhini, váhivare nácarichuhini taicha nítauchaipahisera núti eta mavarahaqueneanahi éma —máichavacapa éna.

³⁰ Eta nasamirahi ena achaneana eta mametarapianahi, ichaperinehi eta nasuapirahi ema Jesús ena camuriqueneana achaneana.

Tímaticareana ena mavanarana ema Viya énapa ena tavanarana eta pecatu

³¹ Tacahe, ema Jesús máichavacapa ena tisuapanaripahi. Máichavacapa:

—Te ímiyanava ecaratacava eta esuapirahi eta nímiturapiana, éti yátupiquenehe nímiturehehi.

³² Tásiha, ímatinapa eta yátupiqueneana táuriqueneana. Vaipa vanaracahémahi éti —máichavacapa.

³³ Nararihihiserá ena ticanarajiricanahi éma. Náichapa:

—Viti mámariequeneháviní ema viáchucaini Abraham. Tájina vímatiyahini eta vítaresirahi nacavanarahavihiní. ¿Tájaha tacayema eta picahehi vaipa vanaracahavimahi? —nacahepa.

³⁴ Ena Jesús máichavarepa:

—Nutupiruva numetacahe: Namutu nácani tíchanahi eta pecatu, tavayuaruanahi éna. Nacutihí ena vanaracana taicha tétavicava eta tavayuasiravacahi.

³⁵⁻³⁶ Ímijachavaipahi machichahehi ema Viya. Váhisera tacahehiní, taicha tavayuaruhehi eta pecatu. Nútisera nuti Machicha ema Viya nuratahahi nucuchucuhahe. Vaipa vanaracahémahi. Vaipa tivayuacahémahi eta pecatu. Jéhsere, yátupina eta machichaeraya, máichecuaraquireyare éta.

³⁷ Néchahivare núti eta mámariequenehérahí ema viáchucaini Abraham. Epanerechaichuchasera ecapacanu, taicha ecaticahí eta nímiturapianahi.

³⁸ Núti néchajisihahí eta máimechaquenénuanahí ema Tata. Étisera étachucha íchahí eta mavanairipianarichuhi ema ticachichahe —macahepa.

³⁹ Éna najicapapa:

—Viti machichaequeneánaichaha ema viáchucaini Abraham —nacahepa.

Ena Jesús máichavarepa:

—Te yátupinahini machichaequenehénahini ema Abraham, ecutihini éma eta yátupirahi eta macaemataneasirahi ema Viya.

⁴⁰ Esapihahí éti, epanerechaichucha ecapacanu. Ena Abraham, vahí tácahehiní eta mapanereruhi éma. Núti numetacahehi eta yátupiqueneana mapanereruana ema Viya. Váhisera esuapanuimahisami.

41 Éti ícharichucha eta máichaqueneasahi ema ticachichahe — máichavacapa. Ena najicapavarepa:

—Víti vahi apáchichahávina. Émanaichu ema ticachichahavi, ema Viya — nacahepa.

42 Ema Jesús majicapavarepa:

—Te yátupinahini machichahenahini ema Viya, etupiruvaipahini émunacanu. Taicha núti étaquenehi násiha me Viya. Vahi nútijiruvainahini eta nítésirahi puiti. Nuvanecasivahi mayehe.

43 ¿Tájaha tacayema vahi árataha eacutiara eta nímiturapiana? Étase- rapuca eta emavarairahi esama.

44 Nútisera nímicaecherachinaheyare ema ticachichahe. Émara ema Váinaraji. Ema téchahehi, taicha evarahahi íchayare eta máichaqueneana éma. Taicha éma, ticapahi eta máitaresirahi te tépanavainapa. Váhiquene mávarahahini máehicahini eta yátupiqueneana. Étachucha máurica tivayuarereca. Tépiyahirahipaipa. Máurihayapara eta máimahi. Éma, náiyahi ena tépiyahirahiana.

45 Eta echichairahi ema maca tépiyahirahi, váhiquenehíni esupa eta juca nímiturapiana yátupiqueneana.

46 Éti, ímijachanupuca jararihi eta néjecapiravahi. Nutupiruvahinenisera eta numetasirahéhi eta yátupiqueneana. ¿Tájaha tacayema vahi esupanu?

47 Taicha nácani mayeheanahi ema Viya, náuricayarehi nasamararaca eta máechajiriruvana ema Viya. Étisera vahi machichahénahini ema Viya. Eta tacahe, vahi iúricahini esamararacahini eta máechajiriruvana numetaruhéanahi — máichavacapa.

Te májinaichahahi ema Abraham, manasiqueneripahi ema Cristo

48 Tacahe, ena ticatianacanahi náichavarepa:

—Piti achane picahequenetatajichucha. Yátupiquenehi mávaháruvivi ema Váinaraji. Táitusiava, máurishivivi máicha — nacahepa.

49 Ema Jesús majicapavarepa:

—Vahi máurishinuinahini. Eta juca nucaemataneasirahi ema Tata, nuvarairahi ecunachayare éma. Étisera épurunuichucha.

50 Núti vahi nucunachavaimahi. Matiarihisera ema ticunachanuhi. Éma téchahavivi, te nútípica nétupicavahi eyehe, téhesera étihipuca.

51 Nutupiruva numetacahe: Nácani tisuapanayare eta numetarapiana, máepenacacanayare éna — máichavacapa.

52 Najicapavarepa ena ticatianacanahi:

—Jéhevare puiti, vímatiacavipa eta pimáurishivaquenehi. Apanasicáji ena profetana tépenanahi, émapa ema Abraham. Tásiha puiti, picahechajiriruvare eta nácani tisuapanayare eta pimetarapiana máepenacacanayarehi.

53 Pivarahapapuca picachuricayare ema viáchucaini Abraham, apanasica ema tépenahi, énapa ena profetanaini. ¿Nájahavisica piti pivayuyucavapa? — nacahepa.

54 Ema Jesús majicapavarepa:

—Tájina nucunacharémahí, te nútijiricavaríchuchapuca nucunachavahi. Mararihisera ema Tata ticunachanuhi, ema ímijachaquenehi ema ecasiña éti.

55 Éti ímijachavahi ímati éma. Váhinéni ímatihini. Jéhevare núti nímatihi éma. Téhesera numetacahehíni eta numaimatirahi, népiyahirahirapucaini

nácutiherípháhi éti. Étasera yátupiquenehi eta nímatirahi éma, nusuapahivare eta mavanairipiana.

⁵⁶ Ema víyarahaini Abraham ema iáchucaini, tétavicavahi eta máurisamu-revahi eta máimatiranuhi núti —máichavacapa.

⁵⁷ Tacahe, ena ticatianacanaahi náichapa:
—¡Vuíchaha pácyaye cincuenta áñoina! ¡Picaemuñavapa pímati ema víyarahaini Abraham!

⁵⁸ Ema Jesús majicapavare:
—Nutupiruva numetacahe: Májinaichahahi ema Abraham, nunasiquene-ripahi núti —máichavacapa.

⁵⁹ Tacahe, tiápajucavapa eta nasemanevahi. Navehapa eta márijahiana, nayucayarepaini éma. Tiúchucapasera éma eta te Templo. Tiyanapa tiyumurucavapa.

9

Ema Jesús macanaraca ema achane máimiuchurehi eta mapuchuquiva

¹ Tacahe, eta mapaisirahi ema Jesús te tajuhe eta avasare, máetupiacapa ema achane máimiuchurehi eta mapuchuquivahi.

² Eta véhisirapahi ema Jesús viti máimitureana, viyaserecapa éma:
—Tata maestro, ¿tájahapuca tiviuchahi ema maca eta mapuchuquivahi te tiúchucainapa? ¿Énapuca tiviuchanahi ena ticachichana, téhesera mapecaturachuhipuca éma? —vicahepa.

³ Tacahe, tijicapahavipa:
—Váhinéni étaina taviuchahini eta mapecatura éma. Énaripa ena ticachichana, váhivare énaparacaina. Matuparahaichuhi me Viya, mavarairahi nímerecayarehi puiti eta máitupajjiasiravahi ema Tata.

⁴ Núti apanava nucamapurayare eta sache níchirayare eta máematane-repiana ema Tata eta mavesiranuhi taicha járajapavare eta yatí nájina ticaematanena.

⁵ Ticamapuravacarerichaha eta nutiarahirahi te juca apaquehe nuti namichuhahi ena achaneana —macahepa.

⁶ Tásiha, tiátutuicapa te apaquehe ema Jesús. Máepiyacapa eta tiúrajichicha te matuture. Mayajihauquichapa ema púchuqui.

⁷ Tásiha, máichapa:
—Piyana picasipauquipana tayehe eta noque ticajare Siloé —máichapa. (Te véchajiriruva, eta Siloé ticajare Vanairuca.)

Tacahe, ema púchuqui tiyanapa ticasipauquipanahi. Tíjajúchava tímairirica. Tichavapa te mapena.

⁸ Náraminehi ichape ena machacayapenanahi énapa ena tímatianahi eta mapuchuquivainihi. Tásiha, nacahepa:

—Vímatihí ema émana limosnerohi púchuquihí. Émasera ema maca achane tímairiricahí. ¿Apanapuca éma? —nacahepa.

⁹ Najicapapa ena tímatianahi yátupi:
—Émara ema maca.
Ema apana, macahevare:
—Vahí émaina. Mavasichucha.
Émasera ema achane púchuquiníhi máichavacapa:

—Nútira núti púchuquinuinihi —macahepa.

¹⁰ Tásiha, nayaserecapa ema achane:

—¿Tájaha pícharacavahi eta pímaírisirahi? —náichapa.

¹¹ Éma majicapapa:

—Ema maena achane ticajare Jesús máepiyacahi eta tiúrajichicha. Tásiha, tiyajihauquichanupa. Tivanecanupa nucasipauquipana te noque Siloé. Te nuyanapa nucasipauquipanahi, nímaíricarinehi —máichavacapa.

¹² Éna náichapa:

—¿Táviha ema mácara achane?

Éma majicapapa:

—Jéhepuca, vahi nécha.

Ena tuparairucana navaraha náecha eta manarasirahi ema púchuquinihi

¹³⁻¹⁴ Tacahe, nasamairicapapa ena fariséoana eta manarasirahi ema púchuquinihi. Tásiha, nacavanairipipa náepana ema púchuquinihi, taicha natanucahi éna eta tiviuchayarehi ema Jesús. Ichaperinehi eta nacatiansirahi éma táichavenehi eta máipuresirahi te jena sache sávarumuhuquenehi.

¹⁵ Te títecapapa ema púchuquinihi, nacatupihapa éma te namirahu. Nayaserecapa tájahahipuca táicharacavahi eta máimairirisirahi. Éma, máichavacapa:

—Ema achane típuchanuhi tiyajihauquichanuhi eta máture. Tásiha, nucasipauquipa. Nímaíricapapa —macahepa.

¹⁶ Nararihi ena nacahepa:

—¡Ema mácara achane vahi machaneraina ema Viya, taicha vahi mapicauhahini eta sávarumhuana tacapicahuquene!

Ena apamuriana, ánivare nacahe:

—Váiparinehisera máituruequenehaimahi maicha eta tiáramicareana te yátupinahini macapecurarahihini —nacahepa.

Tacahe, apanapanenejiana eta napanereruana.

¹⁷ Tásiha, nápechavare nayasereca ema achane:

—¿Tájaha picayema píti mayehe ema achane ticaimairiricavihi?

Éma, máichavacapa:

—Núti németeaca émahi ema profeta.

¹⁸ Énasera ena tuparairucana váhiquene nasuapahini eta émaírahi ema púchuquini. Tásiha, náimichuhapa ena ticachichanahi.

¹⁹ Nayaserecapa:

—Vivaraha viyaserecahe: ¿Yátupihini eta máimiuchurehi eta mapuchuquiva ema pichicha? ¿Tájaha táichararacavahi eta máimairirisirahi puiti?

²⁰ Ena ticachichanahi najicapapa:

—Yátupi ema maca ema vichicha. Máimiuchurehivare eta mapuchuquivainihi.

²¹ Váhisera véchahini tájahapuca táicharacavahi eta máimairirisirahi. Váhivare vecha nájahapuca ticaimairiricahi. Émaina eyasereca. Ajairaripa éma. Émapa téchinavahi eta mametasiraheyare —náichapa.

²² Tacahehi eta najicapirahi taicha típicanahi éna nacaicuñahini, nacaquijihivaréni te náurujisirarevana taicha ena ticatianacanahi ema Jesús nacuchucapa eta vantu, nacavanaripirapa nacuija nasuapa ema Jesús émaírahi ema Cristo.

²³ Eta tacahehi eta náichirahi: “Émaina eyasereca. Émapa téchinavahi”.

²⁴ Tacahe, ena tuparairucana nápechavare náicha ema achane púchuquini. Ánipa nacahepa:

—Pátupiruva pimetacahavi te máijarepuca ema Viya eta pinarasirahi. Vítisera vímatihí ema maena achane tisipecaturarahi —nacahepa.

²⁵ Éma majicapavarepa:

—Jéhepuca, vahi necha nútí te tisipecaturarahihípuca éma. Tacarichu néchahi eta nupuchuquívainihí nutí, puítisera nímairiricarípa máicha —macahepa.

²⁶ Nápechavare nayasereca éna:

—¿Tájaha máicharacavíhi eta macaimairirisiravíhi?

²⁷ Majicapavarepa éma:

—Cápachí numetacaherípa. Vuíchahacaru esuapanu. ¿Evarahahípuca sera éhicayare éma éti apanavare? —máichavacapa.

²⁸ Tacahe, nacajachapa éma:

—¡Pítisera péhicaipahí éma! Vítisera véhicahí ema víyahainí Moisés.

²⁹ Taicha véchahi eta máechajisihahí ema Viya ema Moisés. Émasera ema máenataatáji, vahi vecha távihapuca másiha —nacahepa.

³⁰ Ema achane majicapavarepa:

—¡Tájina échaquenéna éti páureanasami! Vahi ímatiequeneha távihapuca másihahí ema ticaimairiricanuhí.

³¹ Váhipuca echa váiparinehi tismacaremahi mayehe ema Viya mácani achane tícapeaturarahi. Nacarichu tisuapacareanahí nácani títauchanahí eta mavanairipianahí ema Viya.

³² Váhivare visamairirica nácani nacaimairiricahini ema mácani máimiuchurehi eta napuchuquíva.

³³ Nútí németeaca te tacuíjahini eta vanairucairahí me Viya ema maena achane, váhiva macuratahahini maicha eta tíáramicareana máichaqueneanahí —máichavacapa.

³⁴ Tacahe, tiseமானapa éna eta máichiravacahí. Nacahepa:

—¡Pítí pétaviurequenehi eta picapeaturaivahí! ¡Éta tivíuchavíhi! ¡Puití pisapíhapa pívarahaya pímitucaháví vítí! —náichapa.

Tásiha, nacuchucapa éma.

Ena tépiyacavanahí púchuquíana taicha eta namasuapajiravíhi

³⁵ Ema Jesús masamairiricapa eta náquijisirahí ema máipuchaquenehi. Tásiha, te macainunavarepa, máichapa:

—¿Pisuapapuca píti ema Machicha ema Viya?

³⁶ Ema achane majicapapa:

—Pimetacanupainí, tata. ¿Nájahapuca ema Machicha ema Viya, apaesa nusuapahini? —macahepa.

³⁷ Ema Jesús majicapapa:

—Nútiripara nutí pímahaquenehi, nutí péchajirunuhí.

³⁸ Tacahe, ema achane tépuyucapa te mamirahu ema Jesús. Tásiha, máichapa:

—Nusuapavi, Tata —macahepa.

³⁹ Ema Jesús máichavarepa:

—Nútí túmitecanuhí te juca apaquehe, nímimatichayare ena máimatirahanahí eta yátupíqueneana máechajirivanahí ema Viya, apaesa náimatiequeneha. Eta juca tímicitujiricavahí nucaimairiricayarehi nácani púchuquíanahí tayehe eta máechajirivanahí ema Viya. Nácanisera tímijachavanahí téchemarahiana, nímahaya te najacapapuca eta nímiturapí,

tísapavanayarepuca eta nucaimairirisiravacayare. Têhesera vahi nacuisapava, tiápajupanavainapa eta napuchuquivayare. Éta naviurevayarehi —macahepa.

⁴⁰ Tacahe, ena fariséoana natiarihiqueneanahi te machacaya, eta nasami-rahi, nayaserecapa:

—Píti pímijachahaviripapuca púchuquihavihi. ¡Váhira púchuquihavinahini! —nacahepa.

⁴¹ Ema Jesús majicapavacapa:

—¡Éti épiyacavahi púchuquihe! Taicha vahi evaraha esuapanuhini. Tásiha, tanasipa eta eviurevahi táichavenehi eta epecaturana. Te yátupinahipucaini esuapanuhini, tacuijahini taviuchahehini —máichavacapa.

10

Ema Jesús tímicaecherachava eta majaneasirayare ena téhicanahi éma

¹⁻² Tacahe, ema Jesús máechajisihahi eta tajaneacasiva eta uvesa, máimicutichirahi eta macatiuchirahi ena téhicanahi éma. Ánipa macahe:

—Nutupiruva numetacahe: Mácani tijanearecahi eta uvesa, tétavicavahi eta máechapajirisirayarehi. Te yátiana, máimisiapayarehi te tapena, tásiha, máeratacapa eta tapajacura eta majaneasirahi, apaesa tájina tacuquichiravaina. Taicha nararihi ena tiámerahiana, ticaetemarahanavare. Navarahahi ticayumuruquianayarehi eta nasiapirayarehi te tapena eta uvesa, námechayarehi.

³ Émasera ema pástulero, te yáticarahi mavejiéquenehahi eta tapaja, máichuhahi eta tájareana eta uvesana. Eta máichuirahi, tiúchuchujanapaipa táehicapaipa, taicha táimatiahuchahi ema pástulero.

⁴ Éma, máinapumirauchapaipa eta mayeheana uvesa. Táehimurihapaipa tamutu eta uvesana, taicha táimatihahi eta mahu.

⁵ Váiparinehiséra táehicaimahi mácani apanaquene achane. Tavarahayarehi tijunaracana taicha vahi táimatiahuchahini ema apanaquene —máichapa ema Jesús.

⁶ Ema Jesús máimicutichinahi eta juca. Váhisera nácaicutiarahini éna eta máimitusiravacahi.

Ema Jesús ema yátupiquenehi tijaneacahavihi taicha máuriquenehi éma

⁷ Ema Jesús mápechavaca máimitucavaca. Ánipa macahe:

—Nutupiruva numetacahe: Núti nímicutijiricavahi tapajacurahi eta tapena eta uvesa te tanarasirarehi éta.

⁸ Tínapumirauchanuanahi ena tépiyacavana máestroana, váhisera máimitureanainahini ema Viya. Tiámerahianachucha éna, ticaetemarahaniana. Váhisera táehicaimahi eta uvesana taicha vahi táimatiahuchahini éna.

⁹ Núti nujaneacavacahi ena nuchanerana, nucutihahi eta tapena eta uvesa. Nácani ticasíñavana eta nuyehe, nucatiuchayarehi núti. Tájina náichavaimahi, tájinavare náechuricaaimahi. Néchavacahi núti.

¹⁰ Ema tiámerahi, tímitecahi éma tiámerecayare, ticaparecayare. Macaejane-repaicayareva. Nútiserá tímitecanuhi níjaracayare eta náitaresiraya. Máitavacayare eta náuricacarevayare nícha.

¹¹ Énerichuvare núti yátupiquenehi eta nujaneasiravacahi ena nuchanerana, tacutihahi eta majaneasiravacahi mácani achane eta mayeheana uvesa. Núti níjarareca eta nítaresira eta nucatiuchiravacahi.

¹² Mácánisera tuparairucachucha, vahi macatiuchaimahi eta uvesa. Te máimahapa eta tinicarahi sárare, tijunayarehi. Vahi tipatsicavaimahi macatiucha eta uvesa, taicha vahi mayehenahini. Tacahe, eta tinicarahi ticamapuravainapa tacapacayare eta uvesa. Eta tacaitiruana, téjanerepai-canapa.

¹³ Éma maca achane tijunaya taicha vahi téñamavaimahi tayehe eta uvesa. Éma tímijachavahi majaneacavaca, étachuchasera macunehi eta mavacha.

¹⁴⁻¹⁵ Núti yátupiquenénu pastulérunu taicha tiúrihi eta nujaneasiravaca ena nuchanerana. Tímatinuhivare ema Tata, tacutihi eta nímatirahi núti éma. Énerichuvare tacahehi eta nímatiravacahi ena nuchanerana. Éna tímatinuanahivare. Eta néñamairavacahi, núti nímiararecavahi eta nítaresira náichavenehi éna.

¹⁶ Nararihivare ena apamuriana nuchanerana. Váhisera ánina nacavasa. Nucurujicavacayaresera, népanayareva. Tisuapanuanayareva namutu. Étanayaréichupa eta náumuriva. Nucarinenapa núti néchavaca.

¹⁷ Éma Tata, yátupihhi eta máemunasiranu taicha nímiararecahi eta nítaresira náichavenehi ena nuchanerana. Nuchavayaresera nítareca.

¹⁸ Nájinanéni napamicanuhini eta nísapiravaya ticapacanuana. Níjararuvahi núti eta nacapasiranuya. Taicha nutuparahaichuhi me Tata núti néchinavayarehi. Níjararuvayare. Tásiha, nuchavayareva nítareca — máichavacapa.

¹⁹ Eta nasamirahi ena achaneana eta juca máechajiriruvanahi ema Jesús, típtusimuriavavacavarepa.

²⁰ Natarihihi ena ticatianacanahi. Nacahepa:

—¿Tájaha tacayema esuapa ema mara? Máurishi éma, mávahárupuca ema Váinaraji —nacahepa.

²¹ Énaserá ena apamuriana, ánivare nacahe:

—Te yátupinahini mávaháruinahini ema Váinaraji, vahi macuratahahini macaimairirica ema púchuqui. Nájinavare mácuti eta máechajisira —nacahepa.

Ena tuparairucana vahi návarahahini najacapa ema Jesús

²² Te jena sácheanahi diciembrequenehi eta ticasarahimuhuana te Jerusalén, ena achaneana napiestachahi eta año táepaniravahi náetupirica eta Templo.

²³ Éma Jesús matiarihhi te tajuhe eta te Templo te tayehe eta alar máepiyaruihhi ema Reyni Salomón.

²⁴ Te náimahapa ena ticatianacana, nachayacapa ema Jesús. Tásiha, náichapa:

—¿Tájaha tacayema pímpanererechahavihi? Pátupiruvapa pimetacahavi te yátupivihipuca pítiquenehi Cristo —náichapa.

²⁵ Éma Jesús majicapavacapa:

—Cápachi numetacaheripahi. Vuíchahacaru esuapanu. Eta juca níchaque-neanahi ímahaqueneanahi tásihaqueneanahi me Tata, étaripara tímereuchanuhi.

²⁶ Étisera váhiquene esuapanu. Taicha vahi étinahini nuyehenenahini uvesa.

²⁷ Éta nuyehena uvesa tímatiahuchanuanahi éta. Núti apanavare nímativachivare. Éta tacahe, téhicanuanahi.

²⁸ Níjaracavacayaresera núti eta náitaresirayare máíchequaireyare. Váhiquene náimahahini eta náicuñayaréni. Nájinavare tiverejicanuanaimahi ena nujanearuanahi.

²⁹ Taicha máijjararunuanahi ema Tata. Éma, nájina ticachuriacainahini. Nájinavare tiratahaimahi tiverejicaimahi ena majanearuanahi.

³⁰ Taicha núti émapa ema Tata vicuticacahi eta vítupajijiasiravavacahi — máichavacapa.

³¹ Tacahe, ena ticatianacana natanucapa eta márijahiana. Navarahapa natupisicayarehini ema Jesús.

³² Máichavacapasera éna:

—Ichapemurihi eta níchirahi eta táuriqueneana ímahaqueneanahi, máijjararuanahi ema Tata. ¿Étaserapuca tiviuhanuhi eta evarairahi etupisicanu te márijahi?

³³ Tacahe, najicapavarepa:

—Vahi étaparacaina eta píchirapuca jácani táuriqueneanahi. Eta tiviuhavíhi pímiachiravahi machichavi ema Viya. Pítirichuhi vicutiquenehi achane. ¡Pítisera pímiachavaipahi Víyavi! —nacahepa.

³⁴ Ema Jesús majicapavarepa:

—Eta ajureca te Salmó, vahi ímatiequenehaníni eta táechajisiaherahi eta macayemaquenehi ema Viya: “Víahehi nícha eti nunerejiruheanahi”.

³⁵ Véchahi eta tacayemaquenehi eta ajureca, vahi tépiyahirahimahi. Taicha tamutu eta táechajiriruvana eta Sagrada Escritura táechajisihairahi eta juca máechajiriruvanahi ema Viya. Nácani nacatuparahahi me Viya, éma tímijarchavacahi “Víanahi”.

³⁶ Nútiripa puiti, nuvetijipa nímiarechacare “Viya” taicha émarichu ema Viya tinerejicanuhi, tivanecanuhi eta núcupaisiraya te juca apaquehe.

³⁷⁻³⁸ Núti nítaucharahi eta mavanairipiana ema Tata tivanecanuhi. Tásiha, tatuparacahe esuapanuvaneyarehi. Tayanapane vahi tisuapacarehi eta nímiturapiana eta eyehe, étapaseraíni esuapahini eta tíaramicareana níchaqueneanahi. Étara tímereuchanuhi eta mávahásiranuhi ema Tata, návahásirahivare núti apanava éma —máichavacapa.

³⁹ Tacahe, tíapéchavanavarepa navaraha nacaratacayarehini ema Jesús, napresuchayarehini. Émasera tíuchucavanepa.

⁴⁰ Tásiha, tiyanavarepa ema Jesús te tinapaíca te apachara eta cajacure Jordán. Manasipanapa eta te avasarechicha Betábara te máicachasirisinehini ema Juan.

⁴¹ Camuriana ena achaneana tiyanaracanaíni eta mayehe. Tásiha, nacahepa éna:

—Ema víyarahaini Juan, tayanapanehi tájina máimerecaini eta tíaramicareana, yátupihisera eta profetaíraíni éma, taicha tamutupa eta mametarapiana mayehe ema maca Jesús, vímaharipa puiti eta yátupiqueneanahi —nacahepa.

⁴² Tacahe, ánaquí camurianahi ena achaneana tisuapanahi ema Jesús, téhicanahivare.

11

Eta máepenira ema Lázaro

¹ Matiaríhi ema achane ticaijare Lázaro. Éma, máemunacasarehi ema Jesús. Ticavasahi tayehe eta avasarechicha ticaijare Betania, návahivare ena maparapenaveana, esu María ésupa esu Marta. Te jena sácheana, ticajumahi muraca ema achane.

² (Esu suca María, ésuhi esu tisipapevachahi ema Jesús tayehe eta táijiyequenehi perfumeama. Suájapevachahivare te suchutumaca.)

³ Tacahe, ena náni apinana esenana ticaparapecacana náimivanerecapa, nametapanayarehi ema Jesús eta macajumairahi muraca ema Lázaro.

⁴ Te máechapa ema Jesús, macahepa:

—Eta juca jumare, vahi títaimahi ema Lázaro. Matuparahaichusera me Viya, mavarairahi nímereca eta máitupajijiasirava éma, nímeresirayareva eta nítupajijiasiravahi nuti Machicha, apaesa nacunachahavi ena achaneana — macahepa.

⁵ Jéhesare, ema Jesús yátupihi eta máemunasirahi ema Lázaro, énapa ena esenana maparapeneana.

⁶ Váhisera mayanavanehini máimahapanahíni ema máemunacasare. Manasirichaha apinahi sache.

⁷ Tásiha, te apanapa sache, ema Jesús máichahavipa víti máimitureana:

—Viyana víchava te Judea.

⁸ Víti vijicapapa:

—Tata maestro, cáperichaha ena ticatianacavianahi navarahahi ticapacaviana. Tásiha, puiti pivarahaichaha piyanayare ánaqui nayehe —víchapa.

⁹ Ema Jesús máechajisihahi eta mavanecasivahi. Máichahavipa:

—Vahi táéñamavácarehini. Yátupi eta sache ticayehe doce hora. Te vipaica te sáchemuhu, vahi vicáyutetuímahi taicha vímairiricahi tayehe eta tijarahi.

¹⁰ Nácanisera tipaicanahi te yátimuhu, ticayuteterejianayarehi taicha vahi náimairiricahini. Ema Tata tijaneacanuhi núti taicha nítauchahi tamutu eta mavarahaqueneana. Vahi máisapahini jácani náichanuhini; tapaenumava máimaha tiuri —macahepa.

¹¹ Tacahe, te táequenepa, macahevarepa:

—Ema vémunacasare Lázaro máenahi tímacahi. Nuyanayaresera nucajampayanare.

¹² Víti víchapa:

—Tata, te tímacahipuca éma, étapa táicutiarahi eta mativareraya —víchapa ema.

¹³⁻¹⁴ Víti vímijachaichucha yátupihi tímaca. Tásiha, ema Jesús matupirupa timetacahavihi:

—Tépenaipa ema Lázaro.

¹⁵ Núrisamuresera eta májinanuirahi eta ánaqui. Tiúripanaya eta eyehe taicha ímahaya eta níchaqueneyare apaesa esuapanu. Puiti viyanaya vímahapanayare —macahepa.

¹⁶ Tacahe, ema vichamuri Tomás máichahavipa víti machamuriana:

—Viyana víti apanavare. Te nacapacapuca éma, nacapacahavirineva víti apanava —máichahavipa ema Tomás. (Tatiarihivare eta máchucarapi Chame.)

Ema Jesús, ema téchahi eta macaechepusirayare ena náepenaqueneana, máimichavayare macaitareca

¹⁷⁻¹⁸ Tiuri, viyanapa vicaijuhe eta avasarechicha Betania. (Eta Betania tachacayahi eta Jerusalén, apina kilómetro y medio eta tayerehivahi.) Tásiha, te víánehipaipa, timetacahavianapa cuátroripa sache eta náecarairahi ema Lázaroini.

¹⁹ Camurianahichahasera ena achaneana te napena ena maparapeneana, esu Marta ésupa esu María. Nacamitisiripanahi apaesa vahi nacuiyaharacavaicha ena apinana.

²⁰ Tacahe, te suéchapa esu Marta eta máitecapirayarehi ema Jesús, tiyanapa suácapahi. Ésusera esu María sunasirichuhi te tajuhe eta peti.

²¹ Te suéchajicapa esu Marta ema Jesús, sumetacapa eta máepenirahi ema suparapeini. Tásiha, suíchapa:

—Tátachicha, te pitirihinahini eta ani, vahi ñicuepenahini eñi nuparapeini.

²² Váhisera néñamava. Nucasiñavihi eta piyehe. Pímahainepa píti eta pícharacaya eta piyaseasirayare eñi Viya —suíchapa.

²³ Ema Jesús majicapapa:

—Tiuri eta péñamirahi ema piparape. Váhisera picupica. Tichavayare títareca te pimirahu —máichapa.

²⁴ Esu Marta suíchavarepa:

—Yátupi, Tata, néchahi eta ñichavirayare títareca te táitecapapa eta sáchezare náechepusiraya ena náepenaqueneana —suahepa.

²⁵ Ema Jesús máichavarepa:

—Jéhevare núti, nucaitarerahi nácani nucaehepureanaya. Táitusiava nu-metacavi: Nácani tisuapanuanayare, tayanapanepuca náepena, nucaitareca-yaresera núti.

²⁶ Ene ecaheyare éti éhicanuanahi, tayanapanepuca épenayare, nútisera nucaitarecaheyare. Tásiha, tájinapa tímiapechaimahi épenahini. ¿Pisuapanupuca eta níchiravihi? —máichapa.

²⁷ Ésu sujicapapa:

—Nusuapavi, Tata. Pítira yátupiquenévihi Cristo, Ñichichavi eñi Viya. Pítiripa píti vicuchapaquenévihi píteruyarehi te juca apaquehe —suíchapa.

Ema Jesús tíyaha te tachacaya eta máecari ema Lázaro

²⁸ Te títapiricapa eta suéchajisirahi esu Marta mayehe ema Jesús, tiyanapa suíchuhapanahi esu suparape María. Sujajaicapa, ani tacahehi eta suíchirahi:

—Eñi Maestro ñirarihi eta ani. Ñicavanairipi piyanayaréji —suíchapa.

²⁹ Te susamapa esu María eta matiarahirahi ema Jesús, téchepurucavanepa. Tiyanavarepa suácapahi.

³⁰ Taicha ema Jesús vuíchaha máitecapahini te napena. Manasirichuhi eta te suácapinehi esu Marta.

³¹ Eta náimairahi eta suchimarana eta suéchepusirahi súchusirahi esu María, tiyananapa náehiequenehahi. Náimijachahi éna tiyanayarehi ésu te máecari ema suparapeini, tíyahapanayarehi.

³² Tacahe, te suítecapauchapa ema Jesús, esu María sutupirupa tépuyucahi te máivapechacaya. Tásiha, suíchapa:

—Tátachicha, te pitirihinahini eta ani vahi ñicuepenahini eñi nuparapeini —suíchapa.

³³⁻³⁵ Tásiha, tíyahapa esu María, énapa ena téhicanapahi ésu. Eta máimairahi ema Jesús eta náiyairahi, ticatisamurevavarepa éma apanavare. Tíyahavarepa. Tásiha, mayaserecapa:

—¿Táviha écarihahi? —máichapa.

Ena najicapapa:

—Yare, Tata, pímaha.

³⁶ Tacahe, ena natiarihiqueneana eta náimairahi eta máiyairahi ema Jesús, téchajicacanapa:

—Piáha. Tíyahavaréra éma apanava. Tétavicavahipucáji eta máemunasirahi —nacahepa.

³⁷ Ena apamuriana, ánivare nacahe:

—Ema maca ticaimairiricahi ema púchuqui. ¿Tájahapuca vahi macanarahini ema Lázaroínisami, apaesa vahi macuepenahini? —nacahepa.

Eta máechepusira ema Lázaro te máecari

³⁸ Tacahe, ichape eta macatisamurevairahi ema Jesús. Mapauchapa eta ecari nasecajureruhi te mari. Tatiarihivare eta márime tajihajacahi eta tapajacura eta ecari.

³⁹ Tacahe, ema Jesús mavanecavacapa:

—Ecaerajica eta jara tachujihí eta máecari.

Ésusera esu Marta suíchapa:

—Tata, németeaca tijeheripa jácani taicha cuátrorípahi sache eta ñépenirahi —suahepa.

⁴⁰ Ema Jesús máichavarepa:

—Cápachi numetacavipa, te pisuapanu yátupina, pímahayare eta macunachacarevahi ema Viya taicha nímerecaya eta tamutuirahi marataha — máichapa.

⁴¹ Tacahe, nacaerajicapa eta márime. Tásiha, ema Jesús máesenicapa te anuma, tiyujaracanumapa:

—Tata, nuhasulupayachavi eta pisamiranuhi.

⁴² Váhiquene péñauchanu eta jácani nuyasearuviana. Puiti nuyaseacavi eta pítipajijíásirava, apaesa náimaha ena nani achaneana natiarihiqueneanahi, apaesa nacunachavi. Náechavare eta pítirahi pivanecanu —macahepa éma.

⁴³ Te títipiricapa eta mayujarasirahi, máimararacapa eta ecari. Tipiaracapa muraca, ánipa macahe:

—Lázaro, péchepuca eta te jara piávihahi. Yare, piúchuca —máichapa.

⁴⁴ Tacahe, ema máepenaquenénihí tiúchucapa. Mámapaichuhi eta máyuruhanahi étapa eta máepacamirahi. Tásiha, ema Jesús mavanecavacapa naveru-ruaca eta máyuruhanahi, apaesa tiyanayarepa te peti.

Eta tuparairucana napanerechapa nacaratacayarehi ema Jesús
(Mt 26.1-5; Mr 14.1-2; Lc 22.1-2)

⁴⁵ Tacahe, ena suchimaranahi esu María, eta náimairahi eta juca máichaquenehi ema Jesús, camurianarinehi ena tisuapanahi éma.

⁴⁶ Natiarihiserá ena apamuriana tiyananapa nayehe ena fariséoana ticatianacahahi ema Jesús. Eta namaurisirahi eta juca, tiyanana nametapanavaca ena tuparairucana.

⁴⁷ Tacahe, ena tuparairucana náimichuhapa namutu ena juéseana, ticuruji-cacanapa. Tásiha, nacahepa:

—¿Tájaha vícharacavayare, tátanaveana? Ema maena achane Jesús, tétavica-vahi eta máitupajijíásiravahi máichahi eta tiáramicareana.

⁴⁸ Vahi táuricahini vísapahini máimiyannahini máitarecahíni, machu námaturiana náehica ena achaneana, masapihainapapuca nasuapayare éma. Machu ena aquenucana romanoana náimijachinapapuca tatiarihíyare eta tíñepiyare. Tisemanainapapuca. Nárajapainapapuca eta ani. Náquipaisinahavinapapuca eta víávasa. Nasapihainapapuca tiverejichavianayare eta víávacureanahi —nacahepa.

⁴⁹ Matiaríhíhi ema achane ticajjarehi Caifás. Émahí ema ichapequenehi tiyujaracarahi te jena áñohi. Tacahe, máichavacapa éna:

—Éti vahi ímatiequeneha eta vícharacavayare.

⁵⁰ Németeaca núti tiúripana máepena ema émanaina achane mavachareca eta náitaresiraina namutu ena apamuriana achaneana — máichavacapa.

⁵¹ Eta juca máechajiriruvahi ema Caifás, váhinéni étainahini táichahini eta máechemaraivahini éma. Étahi eta émairahi ema ichapequenehi tiyujaracarahi te jena áñohi. Manacasamureruichuhi ema Viya eta máechajisihahi eta máepenirayare ema Jesús náichavene ena israelítana.

⁵² Étasera juca máepenirayarehi ema Jesús, mavacharecainapa eta naviorevahi namutu nácani machaneranayarehi ema Viya te apanapanenequeneana avasareana. Vahi tácarichuhini eta naviorevana ena israelítana. Taicha te táequenénapa, mavarahahi macurujimurihayarehi, étamuriana-yarehi namutu éna.

⁵³ Tacahe, tacutipa eta napanereruhi ena tuparairucana eta nacapasi-rayare ema Jesús.

⁵⁴ Eta tacahe, ema Jesús vaipa máimerecavahini eta te Jerusalén. Majunijicapa eta Judea. Tiyanapa eta te mávapahi apaquehe tachacaya eta avasare ticaijare Efraín. Manasipanapa ánaqui, vítipa viti máimitureana.

⁵⁵ Tacahe, semanayare eta Pascua, vipiéstara viti israelítana. Namutu ena achaneana tiávihana te apanana avasareana tiyanaracanapa tayehe eta Jerusalén. Tisipahacavanayarehi taicha náimijachahi ani tacahehi tacuija nacuquichiravaina eta náimeresiravayare me Viya.

⁵⁶ Tacahe, ena achaneana nacunepaipahi te Jerusalén ema Jesús. Eta návihairahi te Templo, téchajiricacanaripa. Ánipa nacahe:

—¿Tájaha ecayema? ¿Títecayarepucáji ema Jesús puiti juca piéstaya? — nacahepa.

⁵⁷ Énaripa ena tuparairucana tivanerecanapa ena ticuneanayare ema Jesús. Te matiarihinapuca, nametapanayarepa ena tuparairucana. Tásiha, éna náimicaratacayarepa.

12

Esu María susipapevacha ema Jesús te perfumeama (Mt 26.6-13; Mr 14.3-9)

¹ Séisirinehi sache eta piéstayarehi eta Pascua. Tichavavarepa ema Jesús tayehe eta avasarechicha Betania, mávasahi ema Lázaro, ema macaeche-purehi te máecari. Tacahe, ena máemunacasareana tiúrisamureanarinehi eta náimairahi eta máitecapirahi ema Jesús eta nayehé.

² Ticacherujanapa náenicayarehi. Ema Lázaro macachanehi te mesa eta nanisirahi. Esu Marta téchapajiricavacahi.

³ Tacahe, esu María suámapaipa eta táijiyequene perfumeama te bótechicha. (Te navírare eta juca perfumeama te nasucure ticaijare nardo.) Tétavicavahi eta tasivachavahi. Ticutiamacacahi te botella eta tasiavamahi. Tacahe, suépusapevachapa ema Jesús, suájapevachapa te suchutimaca. Enevanerine táinicajuecha eta peti eta táijiyevahi.

⁴ Matiarihini ema vichamuri Júasi. Ema maca émarichu tíjarrecayarehi ema Jesús. Témechajicavapa éma:

⁵ —¿Tájaha tacayema váhivaréyapa tacaijararecasihini eta juca tasivachaque-nehi perfumeama? Vivehahini eta camuriquene plata, tásiha, vímicata-sihahini ena páureana — macahepa.

⁶ Ema maca Júlasí, vahi étainahini eta majapanuirainahini ena páureana. Étachuchanéni mavarairahi mayumuruca eta plata, taicha ema tiámerahihi. Títecapa émarichuhivare tiúnarecarahi eta plata.

⁷ Tacahe, ema Jesús máichapa:

—Pésamirica esu suca esena. Suíchachaha ésu eta suvarahaquene taicha nícumunuichuhi eta juca tayeheyarehi eta nécari.

⁸ Ena páureana, tamutuchucha sácheana eta ecachaneravacayare éna. Te jácani ávarahapapuca ímicatacayare, nararihi ena ticamunuana. Nútisera vahi nánasiquenémahi eta eyehe —macahepa.

Ema Lázaro, navarahavare nacapaca

⁹ Tacahe, camuriana ena tisamairicanahi eta matiarahirahi ema Jesús te Betania. Tiyananapa náimahapanayarehi. Énerichuvare náimahapanayarehiva ema Lázaro, ema máechepurehi te máecari.

¹⁰ Tacahe, ena tuparairucana napanerechavarepa nacapacayarehi ema Lázaro.

¹¹ Taicha émavenehi tíchahi eta nasuapirapahi ema Jesús ena camuriqueneana achaneana. Vaipa nasuapahini eta navanairipiana ena tuparairucana.

Títecapapa ema Jesús te Jerusalén

(Mt 21.1-11; Mr 11.1-11; Lc 19.28-40)

¹² Te apanapa sache, ena nani achaneana táimiyaqueneanahi eta piéstayarehi eta Pascua, nasamairiricapa eta máitecapirayarehi ema Jesús tayehe eta avasare.

¹³ Tiúrisamureanarinehi. Eta náurisamurevahi, navehapa eta tajuru eta cáchipaca. Tiyananapa nácapahi éma. Eta napiarasirapahi, ániapa nacahe:

—¡Yare, Tata! ¡Piti yátupiquenévihi rey viyehe viti israelítana! ¡Asulupaya! ¡Piti vanáirucaquenévihi me Viya! ¡Ichape eta vicunachiravi piti! ¡Viva ema Viáquenu! ¡Viva! —nacahepa.

¹⁴ Ema Jesús ticaperapahi eta burricu eta masiapirahi, taicha ene tacahehi eta táechajiruvahi eta Sagrada Escritura:

¹⁵ “Eti ecavasanahi te Jerusalén, vaipa ecupica, taicha márajapa ema eyeheyare Rey. Tímaticareyarehi éma, ticaperayare eta burricuchicha. Mámaphi eta iúritaresirayare” tacahehi eta Sagrada Escritura.

¹⁶ Eta juca ajureca eta vimacaicutiaraquenehi viti máimitureana. Tapaenu-mava te máechepucapa ema Jesús, vicaicutiarahi eta tacayemahi eta Sagrada Escritura, táechajisihairahi éma, étapa eta tamutu eta apamuriana máicharacavanahi.

¹⁷ Tiuri puiti, ena apamuriana achaneana tímararacanaripa ema Jesús eta macaechepusirahi ema Lázaro te máecari, náechajisihairahi éna eta náimahaquenehi.

¹⁸ Eta tacahe, camuriqueneanahi ena achaneana tiyananahi nácapahi éma, taicha navarahahi náimati ema tíchahi eta tiáramicare.

¹⁹ Tásiha, eta náimairahi ena fariséoana eta camurianairahi ena tiácapanahi, náichacacapa:

—¡Váhichara víturucaimahi taicha tétavicavahi eta nasimutuvahi ena téhicanahi éma!

Ena apavasaqueneana navarahavare náimati ema Jesús

²⁰ Natiarihivare ena apamuriana achaneana apajuecuruhana tayehe eta Jerusalén. Énerichuhi éna tímitecanahi tiyujarapananahi te jena piéstairahi.

²¹ Tiyananapa napauchahi ema vichamuri Felipe. Ánipa tacahe eta nayaseasirahi:

—Tata, víti apanava vivaraha vímati ema Jesús —nacahepa.

²² Tacahe, ema Felipe tiyanapa mametacahi ema Andrés. Tásiha, ena apinana tiyananapa nametapanahi ema Jesús.

²³ Tásiha, ema Jesús máichavacapa:

—Jéhevare puiti, tiánehipa eta népeniraya nuti Manerejirunuhi ema Viya. Nápechavayaresera nítareca, apaesa nucunachacareyare eyehe.

²⁴ Nutupiruva numetacahe: Te vahi vicuevaca eta evaraqui te apaquehe, vahi téjapacaimahi. Tanasiyareichuhi eta tasimutuva eta evaraqui. Téhesera vévacahi, tétavicavaya eta táejapasiraya.

²⁵ Nácani téñamavanahi eta náitaresira, tiávamirahuana eta náehisiranu, énjaviyare ticamítiequenehavanayare eta náitaresira. Nácani tíjaracavanayare eta náehisiranuyare, tájinavare vahi náeñamavahini eta náitaresira te juca apaquehe, tíuchucuhanyare éna. Máichecuaraquireyare eta náitaresirayare.

²⁶ Énerichuvare nácani tivarahanayare ticaemataneacanuana, tacamunu tímercavanayare yátupi eta náehisiranuhi. Tásiha, nútí nucaejacavacayare éna te néjasihayare nútí. Ena nani, tétavicavayare eta macunachirayare ema Tata.

Ena Jesús tímereuchava eta máepeniraya

²⁷ Ena Jesús táimipanererecachi eta máepenirayare. Ánipa macahehi eta máechajiriruvahi:

—Tiánehinapa eta népeniraya. ¡Ichape eta nupisirahi! ¿Tiúripuca nuyaseaca ema Tata macatiuchanuini apaesa vahi nucucatajivaini? ¡Váhiquene nuyaseacaimahi, taicha nútí tímitecanuhi te juca apaquehe eta népeninavacaya ena achaneana!

²⁸ Tacahe, macahevarepa:

—Tata, pímereca eta pítupajijiásirava apaesa nacunachavi ena achaneana —macahepa.

Tásiha, tíjahúchavapa nasamahi eta mahu ema Viya te anuma. Ánipa macahe:

—Nímerecaripa eta nítupajijiásiravahi. Jéhesare, nápechavayareva nímerecayare —macahepa.

²⁹ Tacahe, ena achaneana natiarihiqueneanahi nasamahi eta máechajisirahi ema Viya. Váhisera nácaicutiarahini, náimijachaichucha tirureca. Tásiha, ena apamuriana, ángelepuca éma téchajicahi nacahevare.

³⁰ Ena Jesús máichavacapa:

—Vahi nútivenéna eta juca esamaquenehi. Ena Tata tímisamahehi, mavairahi esuapayare.

³¹ Achichu juca sácheanayare, ticapacananainapa ena achaneana téhicanahi ema Váinaraji. Eta nacapasiranuya, tacaviureyare namutu ena achaneana te juca apaquehe eta náicuñayare. Eta népenirayare nuvachachainapa eta nuratahairaya nucuchucuhavaca nácani ticasiñavanahi nuyehe. Téquecavanainapa eta nuyehe ena machanerainihi ema Váinaraji.

32 Eta tacahe, te nacatupihanupa te anuquehe te crusu, te nacaicutiarapa ena achaneana apanapanenejiana eta nasamairirisiraya, énjai-vainapa tipauchanuanaya téhicanuanainapa — máichavacapa.

33 Eta juca máichiravacahi ema Jesús, mavarahahi nacaicutiarayarehi eta táchararacavayarehi eta máepenira.

34 Tacahe, ena achaneana tisamararacanahi najicapapa éma:

—¿Tájahasica tacayema eta péchajisihahi eta pépeniraya te crusu? Viti vímija-chaipahi pítiripa ema Cristo, piti Manerejiruvíhi ema Viya. Víti visamahi eta Sagrada Escritura te náechajicuha máichecuaraquireyarehi eta máítaresiraya ema Cristo. Vahi vicaicutiarahini —náichapa.

35 Ema Jesús máichavacapa:

—Ecamapurava esamararacanu mapurare nutiarihichaha eta eyehe. Numicauchahechaha taicha ánipirine eta juca ímairanuyare apaesa vahi ecucayutete tayehe eta timapicu. Taicha nácani tájinahi náechaquenénahi, ticayutetuanayare.

36 Esuapanu eta juca numicauchaherichaha apaesa ímiturecaya éti apanava, íamayare eta juca tajarahiquene —máichapa.

Te títapiricapa ema Jesús eta máichiravacahi, tiyanapa majunijimurihapa. Vaipa máimeracavahini eta nayehe.

Tétavicava eta namuracasamurevanahi ena ticavasanahi te Jerusalén

37 Ichapemurihi eta náimairahi ena ticavasanahi te Jerusalén eta tíarami-careana máichaqueneanahi ema Jesús, váhiquenesera nasuapahini éna.

38-39 Étahisera tacahehi títauchavayarehi eta májuchaqueneanahi te ajureca ema profetaíni Isaías tayehe eta tamuracavahi eta namasuapirayare. Ani tacahehi eta táechajiriruvahi: “Tata Viáquenu, nájina ticaicutiaranaina eta péchajiriruvanahi vímiturapianahi víti. Píti pímercaripahi eta pítupajijiasiravahi, váhiquenesera nasuapavíhíni”.

Énerichuvare ani tacahehi eta májuchaqueneanahi ema Isaías:

40 “Ema Viya, eta máimairahi eta namuracasamurevanahi, máisapahi tíapajucava eta namasuapajirairavahi, tímicutijiricavahi púchuquiana éna. Váhiquene tétupirisamurechavanaimahi. Váhivare navarahaimahi nacasiñavahini me Viya, apaesa macanaracavacahini” tacahehi eta májuchaquenehi ema víyarahaini Isaías.

41 (Ema profetaíni Isaías, tíramecahi eta máimairahi te mavapure eta táetavisiraya eta majaraiva ema Cristo, étapa eta masantuvahi eta te máejasihahi.)

42 Nararihihisera ena aguenucarahana tinerejicavanaripahi ena tisupanahi. Váhisera návarahahini náimeracavahini eta náehisirahi, napisirahi nacaquijihini eta te návacureana.

43 Taicha étachucha náuricahi eta nacunachacarevahi nayehe ena nachamuriana, ena fariséona. Tasapihaichucha náepuruhi eta nacunachacarevayarehini me Viya.

Tímicuñarahi te vahi visuapa eta máechajiriruvana ema Jesús

44 Ema Jesús tijaranupa eta máechajisiravacahi ena achaneana. Máichavacapa:

—Nácani navarahahi tisupanuana, tímaticareanaripa eta nasuapirahivare ema Tata, ema tivanecanuhi.

45 Tacutiquene nácani tímatinuanahi eta nímiturapiana, náimatipahivare eta mapanereruana ema Tata.

⁴⁶ Taicha núti yátupiquenénuhi eta numicauchiravacahi ena téhicanuanahi te juca apaquehe. Váipasera tavehaimahi eta timapicu.

⁴⁷⁻⁴⁸ Tacutiquene núti, vahi étaina táimitecanuhini te juca apaquehe eta nícuñacahehíni eti achaneana. Eta tímitecanuhi, nucuchucuhahe-yarehi. Nácanisera nasamairicaripahínénipuca eta néchajiriruvana, váhisera nasuapanuhini, nasapiha tépurunuanahi, muracayarehi eta náicuñayare. Eta náepuruirahi eta néchajiriruvana, étaripa tivíuchavacainapa te jena sácheyare nacayaseserehipa te mamirahu ema Vía.

⁴⁹ Taicha vahi nútijiriruvainahini eta nímituresirahi. Ema Tata tivane-canuhi, éma tíjaracanuhi eta nímiturapianayarehi.

⁵⁰ Eta tacahe, numetacahehi puiti tamutu eta numetacasivanahi. Vahi nuhapapicaimahi, taicha nímatihi tacaitarecayarehi nácani tisuapanahi eta máimiturapiana ema Tata —macahepa.

13

Emá Jesús, masipapevachavacapa ena máimitureana

¹ Tiuri, te jena sácheanahi tamirahupaipahi eta Pascua, ema Jesús máecharipa táitecapauchayarepa eta majunijísirayarehi eta juca apaquehe. Tiyanayarepa mayehe ema Maiya. Tétavicavahi eta máemunasirahavihi viti máimitureana.

²⁻⁴ Jéhesare ema Júlasí, máimipanerecharipa ema Váinarají eta máíjararesi-rayarehi ema Jesús. Émasera ema Jesús, máecharipa eta machavirayarepa mayehe ema Maiya taicha eta másihehi. Émarichuhi ema Maiya tíjaracahi eta tamutuirayarehi máituruequeneha. Tacahe, te jena yati, eta máenisirahavihi viti máimitureana, téchepucapa ema Jesús. Tivejamuhiacavapa eta mamuiríha. Tiáyuruñequechavapa te mayehe paño.

⁵ Tásiha, majucuhapa eta une te bañadora. Tépanavapa tisipapevachahavihi eta vívapeana viti máimitureana. Mavehavarepa eta paño, tiájapevachahavípa.

⁶ Tásiha, te macapayacapa ema Pedro, éma vahi máisapavahini eta masipapevachira eta máivape. Máichapa:

—Tata maestro, vahi táurica eta pisipapevachiranuhini núti —macahepa.

⁷ Tásiha, ema Jesús majicapapa:

—Páuresamivíhi píti. Vuíchaha picaicutiarahini eta tacayemaqueneanahi eta juca. Achichuinapasera picaicutiarainapa.

⁸ Ema Pedro máichavarepa:

—Nútisera, vahi pisipapevachanuimahi.

Ema Jesús máichavarepa:

—Te vahi nucusipapevachavi, vaipa pítiparacaimahi eta nuyehe.

⁹ Tacahe, ema Pedro máichapa:

—Tata, vahi tácarichuimahi pisipaca eta nívapeana. Énerichuvare eta nu-vahuana étapa juca nuchuti.

¹⁰ Tásiha, máichavarepa ema Jesús:

—Nácani nacaviravahi vahi tácomesaimahi tíapechavana ticasipana. Tacarichu ticasipayarehi eta náivapeana. Éti, epachihavacaripa; váhisera ámutuhini epachihahini —máichapa.

¹¹ Ema Jesús máichahavihi eta juca vahi vámutuhini vipachihahini taicha máimatihi ema tíjararecayarehi.

12 Te títavapa eta masipapevachirahavihi, ticamuirihavarepa eta mamuir-
iha. Tásiha, téjacapa te mesa. Máichahavipa:

—¿Ímatiequenehapuca éti eta juca níchirahehi?

13 Eti ímijarechanu “Tata Maestro”. Étipicahisera, taicha yátupiquenénuhi
eta numaestruvahi.

14 Eta níchirahehi núti emastro nusipapevachirahehi, ene ecaheyare éti
eta itaresiraya. Esipapevachacayare eta ívapeana.

15 Éhicayare eta juca níchaquenehi. Étayareichu eta nímitusirahehi.

16 Nutupiruva numetacahe: Ema musu vahi macachuricaimahi ema
máquenu. Émaripa ema vanairucahi váhivare macachuricaimahi ema tivanec-
ahi.

17 Te yátupina ecaravahuinapa eta juca nímiturapiana, tájina íchiravaimahi.
Ecunachacareyareva eta ítauchiraya tamutu.

18 Néchahinéni núti vahi ámutuhini esuapanu. Nímatihehivare eti yátupi-
queneana nunerejiruanahi. Títauchavayarehisera eta táechajiriruvahi eta
Sagrada Escritura, ani tacahehi: “Ema nénirusahi, masapihahi ticatianaca-
nuhi”.

19 Puiti nucainapucava numetacahe apaesa te táitauchavapa eta juca nu-
metarapi, ímatinuinapa nuti yátupiquenénuhi Cristo.

20 Nutupiruva numetacahe: Nácani tijacapaheanayare éti nuvaneruana,
ticaecheranahi eta najacapiranuhi núti apana. Énerichuvare, najacapa-
hivare ema Tata Nucaiya quene.

Ema Jesús máechajisiha eta májjararesirayare ema Júlasí
(Mt 26.20-25; Mr 14.17-21; Lc 22.21-23)

21 Te títapiricapa eta máichirahavihi ema Jesús, téñamavaipa te masamure
eta májjararesirayarehi ema émana vichamurihi. Tacahe, matupiruvapa
máichahavihi:

—Nutupiruva numetacahe: Mararihi ani te etaracu ema títjararecanuyare
—macahepa.

22 Tacahe, víaramecarinehi eta máichirahavihi. Véseniuquijiricacapa. Vahi
vímatihini nájahahipuca ema máichaquenehi.

23 Nutiarihisera nuti nachamuri máemunarupananuhi ema Jesús.
Nucachacayahi éma eta véjasirahi te mesa.

24 Tacahe, ema Pedro tíumatsiuquichanupa nuyaserecaini nájahahipuca
ema máichaquenehi ema Jesús.

25 Tásiha, núti nujajaicapa ema Jesús:

—Tata, ¿nájahasica ema píchahi?

26 Tásiha, tíjicapanupa:

—Nuyuvetumecaya eta pan, néchipaejicaya. Ema níjararuyare, émara ema
títjararecanuyare —macahepa.

Tacahe, máechipaejicapa eta pan, májjaracapa ema Júlasí.

27 Jéhesaréinehi, ema Váinaraji enevanepa mávahácahi éma. Tásiha, ema Jesús
máichavanepa:

—Júlasí, eta juca pipanereruhi, táitauchavavanepa puítinaichu —máichapa.

28 Váhisera vácaicutiarahini eta juca máichirahi ema Jesús ema Júlasí.

29 Víimijachahichucha eta mavacharesirayarehivare eta tinicacare tayehe-
yare eta piesta, mácajihivarepucaini ena páureana, taicha émahí técha eta
tarera máunasirarehi eta plata eta matesorerovahi.

³⁰ Te títanesipa ema Júlasí eta manisirahi eta pan, tiyanapa tiúchucahi. Tijunijicahavipa te jena yátiquenehi.

EMA JESÚS MACAVANAIRIPIPA ETA VÉMUNASIRACACAYARE

³¹ Eta máchusiraipa ema Júlasí eta viyehe, ema Jesús máichahavipa:

—Títecapapa puiti eta táitauchiravayare ímahainapa éti eta máitupajijiasirava ema Viya étapa eta nítupajijiasiravayare núti Manerejirunuhi éma. Éti ecunachahavinapa.

³² Nímerecainapa eta máitupajijiasiravahi ema Tata, ema apana máimerecayareva eta nítupajijiasiravahi nuti Machicha. Puiti juca sácheanayare títauchavainapa.

³³ Nuchichanaveana, ánipirine eta juca ecachaneranyare. Tásiha, nuyanainapa. Éti, etanucanuinapa; vuíchahasera ítujicavaimahi ecapayacanu. Étarichuhi eta numetarapihi nayehe ena ticatianacanuana eta níchiravacahi vahi ítujicavaimahi ticapayacanuana.

³⁴ Puiti nunaquicayare eta juca arairu nuvanairipi eta eyehe. Émunacayarehi ena echamuriana. Ecutinuyarehi eta némunasiráhehi núti. Ene ecaheyare éti apanavare.

³⁵ Te yátupina émunacaca, eta tímaticacheanayare ena achaneana étirahi eti nímitureanahi —máichahavipa.

EMA JESÚS MÁIMEREUCHA EMA PEDRO ETA MÁEPIYASIRAVAYA VAHI MÁIMATI EMA JESÚS

(Mt 26.31-35; Mr 14.27-31; Lc 22.31-34)

³⁶ Tásiha, ema Pedro mayaserecapa:

—Tata Maestro, ¿távihainapa picaijuheya?

EMA JESÚS MAJICAPAVAREPA:

—Eta nucaijuheya puiti, éti vuíchaha ítujicavaimahi éhicanu. Ecapayacanyaresera. Váhivare ánasimahi éti. Vuíchahasera tñjahúchavaimahi —máichapa.

³⁷ EMA PEDRO MAJICAPAVAREPA:

—¿Tájaha tacuichavaini vahi nucuratahahini néhicavi, Tata? Núti níjjaracava népena píchavenénahi píti —máichapa.

³⁸ Tacahe, ema Jesús máichapa:

—Píti, pímijachavapuca píjaracava pépena eta picatiuchiranuya. Numetacavisera: Puiti juca yati, te tamirahuinarichaha eta táechajisiraya eta varayu te tijararahi, píti mapaheyare pépiyacavayare vahi pímatinu, eta picatiuchiravayarehi píti —máichapa.

14

EMA JESÚS, JÉHEVARE ÉMA TÉHICACARE ETA VÍTECAPIRAYA ME VIYA

¹ Vahi ecueñamava éti. Ácasiñava eta me Viya; ácasiñavavare eta nuyehe.

² Taicha ánaqui te mávasa ema Tata, camuri eta tiáviravacare íáviyahare éti, taicha ícuchihi éti. Tacahe, tatuparacahi nuyanayare nétupiricayare eta íáviyahare.

³ Te táuripa eta íáviyahare, nútijapainavarepa nuchavainapa népanahénapa apaesa ácchanenu éti tayehe eta návihayare núti.

⁴ Eti ímatiripa eta nucaijuheya. Ímatipahivare eta achene nuyanihayare.

⁵ Tásiha, ema Tomás majicapapa:

—Tata, váhira vímati távihapuca eta picaijuheyare; váhivare vímati eta achene piyanihayare —macahepa.

⁶ Ema Jesús majicapavarepa:

—Nútira néhicacare. Nútirichuva nuti yátupiquenénuhi. Nútivare nucaitarerahi, nájina apanaina ácasíñaimahi eta ítecapirayare me Tata.

⁷ Eta ímatiranuipa nútí, ímatiripahivare ema Tata, taicha ímahanuripa puiti eta juca nucachanérahehi —macahepa.

⁸ Ema Felipe máichapa:

—Tata, pímechahavipaini ema Viya apaesa viúrisamurepaini eta vímatirainahini.

⁹ Ema Jesús majicapavarepa:

—Ánaquiapari pa eta picachaneranuhi, piti Felipe, vuíchacaruvare pímatinu. Eti ímahanuripahi, ímatinui pavare yátupíhi. Tímicitijiricavaipahi émainahini ímararachini ema Tata. ¿Tájaha tacayema pivarahaichahavare nímechavi ema Tata?

¹⁰ ¿Váhipuca pisuapanuhi eta mávahásiranuhi ema Tata, tásiha, étapa eta návahásirahivare nútí apanava? Eta juca nucayemaqueneanahi, vahi nuvehaqueneanaina te nuchuti. Étara eta mávahásiranuhi ema Tata, títauchavahi eta mavarahaqueneanahi.

¹¹ Esuapanu eta návahásirahi nútí ema Tata, étapa eta mávahásiranuhivare éma. Te vuíchahapuca esuapanuhini eta numetarapi, étavanerecainaséra esuapa eta tíaramicareanahi níchaqueneanahi.

¹² Nutupiruva numetacahe: Nuyanainapa eta me Tata. Eta tacahe, éti yátupi eta esuapiranuhi, nítivahe éti. Níjaracahe eta eratahairaya ecuchuca eta tíaramicareana, ecutinuyare. Níjaracahe eta eratahairaya ímitupirucha eta náchanevana ena achaneana. Jéhesare, eta juca tíapajupanavayare eta tacunachacareva tayehe eta tíaramicareana íchaqueneanayare.

¹³⁻¹⁴ Nútí níjaracaheyareva tamutu jácani eyasearunuanayare te níjare, taicha nuvaraha ichape eta ecunachirayare ema Tata.

Ema Jesús macametarapi eta mácupaisiraya ema Espíritu Santo

¹⁵ Eta esuapiranuhi tímereuchaheya eta yátupirahi eta émunasiranuhi.

¹⁶ Tásiha, nútí nuyaseacainapa ema Tata máevataca ema Espíritu Santo. Éma, tímícatacaheyare, ticurisamurechaheyareva. Yátupiquenevare eta mávahásiraheyare eta ítaresirayare. Vahi túnajiacahémahi.

¹⁷ Éma, tímítucaheyare, máitametacayare tamutu eta yátupiqueneanahi tásihaqueneana eta me Tata. Énasera ena achaneana, vahi ticaijaracasianaimahi, taicha vahi návarahahini najacaphini éma. Eta namaratahairahi náimaha éma, náimijachahi vahi máimaticarehíni éma. Étiserá ímatiyare éma, taicha máitavacacayare eta mávahásiraheyare.

¹⁸ Nútí, váhivare nujunijiacahémahi. Nuchavayare eyehe, ecachanenuyareva.

¹⁹ Puiti juca sácheanayare, ena achaneana vaipa tímahanuanaimahi. Étiserá ímahanuparacaya, taicha nuchavayarehi nítareca. Éti apanavare ítarecayareva nícha nútí.

²⁰ Te nuchavapa nítareca, échavainapa éti eta mávahásiranuhi ema Tata, échavainavarepa eta návahásiraheyare nútí, éti apana ívahácanuhivare.

²¹ Nácani náimatiyare eta nuvanairipiana, náitachayareva, éta tímícacherachayare eta yátupíhi eta náemunasiranuhi. Tásiha, ichapeyare eta

namunavayare me Tata táichavenénahi eta náemunasiranuhi. Núti apanavare ichapeyareva eta némunasiravacayare. Tásiha, nímercavayareva nayehe – macahepa.

²² Ema Tadeo máichapa:

—¿Táicharacavayare, Tata, eta vicarichuirayare pímercava eta viyehe; tásiha, ena apamuriana achaneana, vaipa tímahavianaimahi? —macahepa.

²³ Tacahe, ema Jesús majicapapa:

—Nácani témunacanuanayare, nasuapayare eta nuvanairipianahi. Tásiha, ema Tata, tétavicavayarehi eta máemunasiravacaya. Tásiha, vítijapainapa viávahácavacayare éna.

²⁴ Nácansera vahi témunacanuanaimahi, váhivare nasuapaimahi eta nuvanairipiana. Eta juca esamaqueneanahi puiti, vahi tásihaquenenahini te nuchuti. Tásihaquenehi me Tata, ema tivanecanuhi.

²⁵ Nucamapurava numetacahe puiti taicha ánipirine eta juca nucaheyare eta eyehe.

²⁶ Émasera ema Espíritu Santo mavaneruyare ema Tata níchavenénahi núti, ema tímicitacaheyare, ticurisamurechaheyareva. Énerichu tímítucaheyare, témechaheyare tamutu eta juca numetarapiana eyehe.

²⁷ Puiti nucametavaya eta eyehe. Nuvarahasera tacuijahini íchiravainahini, ecanarasiraina eta epanereruana. Núti vahi nácutinuhini ena apamuriana achaneana eta nujunijisiraheya. Vahi ecuvayuchava eta éñamavairaina. Váhivare ecupica.

²⁸ Puiti numetacaheripa eta nuyanirayare; tásiha, étapa eta nuchavirayare eta eyehe. Eta tacahe, te yátupina émunacanu, evapinavayarehi nuyehe núti eta nuchavirainapa mayehe ema Tata, nápechavaya nucachane éma tayehe eta máetaviuchirahi eta majaraivahi étapa eta máitupajijiasirava.

²⁹ Nucametarapivane eta juca, apaesa te ímaha táitachavapa, esuapainapa yátupi.

³⁰ Ánipirine puiti eta juca néchajirisiravahi eta eyehe taicha ávanepaipa títecapa ema Váinaraji eta mavarairahi tiáquipaicanuyare. Éma, yátupihí táquenuhi eta juca apaquehe. Váhiquenesera títahacanuimahi núti.

³¹ Nuvarahasera náimatiya ena achaneana eta némunasirahi yátupi ema Tata; tásiha, nítauchaparacahi tamutu eta mavanairipiana. Échepuca. Viyana viyejecava eta te juca —máichahavipa.

15

Eta táenaqui eta uva étapa eta tasimutuquene eta tatavavajiana

¹ Núti nucutihí eta sucureca uva. Étiripa éti ecuti eta tatavana. Ema ticachichanu tímicutijiricavahi ema tijaneacahi eta sucureca.

² Éma máechuca eta máhriquerehi tatava. Máepachiacavare eta apana tatava eta ticahirisi apaesa tacahipana.

³ Eti epachihavacaipahi taicha eta nímiturapiana emetacasivanahi.

⁴ Eta tacahe, ímianavayare eta iúrujiasiranuyare taicha eta návahásirahehi núti, apaesa ácuti eta tatava ticahiriquí. Taicha te viyvetuca eta tatava eta uva, vaipa ticahimahi. Ene ecahehi éti, te vahi ecuimiyana iúrujiacanu, tájina vaipa ecaemataneacanuimahi.

5 Nápechava nímicutichinahe puiti. Núti nucutihi eta táenaquihí. Éti tímicutijiricavahi nutavahehi. Te ímijanava iúrujiacanú, ichapemuriyarehi eta ecaemataneasiranuya. Téhesera ácarichu éti, tájina eratahaquenémahi ícha.

6 Nácani tijnijiacanuanayare, ticutianayare te ticaechu eta tatava. Tíajiquiyarehi. Tásiha, nacurujicainapa, náijuchainapa te yucu.

7 Ímijanava yátupina eta iúrujasiranu. Yátupinavare eta ítauchiraina eta nímiturapiana. Tásiha, te eyaseacanupuca jácani evarahaqueneanahi, núti níjaracaheya.

8 Nuvaraha ímirecavaya eta táurivayare eta ecaemataneasiranu, apaesa tétavicavainapa eta macunachacarevaya ema Tata. Tásiha, ecaecheraipahi eta yátupirahi nímiturehe.

9 Ímijanava eta iávahásiranu taicha tétavicavahi eta némunasirahehi tacuti eta máemunasiranuhi ema Tata.

10 Eta ímijanirava ítauchapaipa eta nuvanairipiana, tijurucapaipa eta ímatirahi eta némunasirahehi. Tacuti eta nítauchirahi núti eta mavanairipiana ema Tata, nímatipaipa eta máemunasiranuhi éma.

11 Eta juca nímicutiarachirahi, nuvarahahi iápajuca eta iúrisamurevahi tásihaquenehi eta iávahásiranuhi núti. Ecutinuya eta núrísamurevahi.

12 Nápechahe numetacahe eta juca nuvanairipi eta eyehe: Yátupina eta émunasiracacaina. Ácutinu eta némunasirahehi núti.

13 Ena achaneana, te navarahahi náimerecaya eta náemunasirahi nácani náemunaruanahi, natanucayarehi náijaracasicha. Nácani tíjarrecavanapuca eta náepenirahi énavenehi ena náemunacasareana, éna yátupihí náimereca eta náemunasirahi. Ene nucahehi núti, níjarrecavayare eta népeniraya íchavene eti némunacasareanahi.

14 Jéhevare, éti yátupiquenehi némunacasareanahi, eta ítauchirahi eta nuvanairipianahi.

15 Vahí vánaracahéna nuyehe, taicha ena vanaracanahi vahí náimatimahi eta mapanereruanahi ema náquenu. Étísera némunacasareanahi. Eta tacahe, numetacahe tamutu eta mapanereruana ema Tata.

16 Vahí étinahini enerejicanuhini eta éhisiranuhi. Núti nunerejicahehi. Puiti nutuparacahe, nuvaraha táuri eta ecaemataneasiranu eta epaisiraya eta ecámetarairuirayare. Nuvaraha ecajimuyacahini ena achaneana náehicanuhini. Yátupina eta ímitusiraina apaesa náimijanava eta náehisiranuhi. Tásiha, ema Tata tíjaracaheyare tamutu eta eyasearuanayare te níjare.

17 Nuvaraha ítaucha eta juca nuvanairipiana. Yátupina émunacaca.

Ena achaneana ticatianacaheanayare tacutiyare eta nacatianasiranuhi núti

18 Puiti numetacahevare, te nacatianacahe ena achaneana, échavayare éti vahí étinahini nacatianaca. Núti nacatianacahi.

19 Taicha, te étainaichahini iávacuhahini eta tayeherepiana eta apaquehe, ena achaneana témunacaheanaripahini, tacutihini eta náemunajírísiracacahi éna. Étasera eta nunerejisirahehi te nataracu ena achaneana, étapa tivíuchahehi eta nacatianasirahehi taicha ínajicaipa eta máeperajiquene tayehe eta apaquehe.

²⁰ Échavavare eta juca numetaruhehi: “Vahi másapihaimahi ticaemunacasi ema musu mayehe ema máquenuhi”. Núti ticatianacanuani; ene ecaheyarehi éti, eta nacatianasiraheyareva. Vahi nasuapahini eta nímiturapiana. Váhivare nasuapaimahi eta ímiturapiana éti apanava.

²¹ Eta éhisiranuhi núti, étaripa tiviuchaheyare tamutu eta juca nacatianasiraheinapa táichavenihi vahi náimatihini ema Tata tivanecanuhi.

²² Tacuijarichuhipucaini naviurevainahini éna, te vahi nucuitechahini eta nímitusiravacahíni. Tépurunuanahiséra, náepuruhivare eta nímiturapiana; tásiha, tétavicavahi eta naviurevanahi.

²³ Taicha nácani ticatichanuani núti, nacatianacahivare ema Tata.

²⁴ Énerichuvare tacuijahini taviuchavacahini te vahi nucuimerecachini eta tíamicareana níchaqueneanahi. Mamaratahaquenehi máichahini mácani apana achane tacutihini eta níchaqueneanahi núti. Étasera náimaharipahi, váhiquenesera nasuapahini. Nasapiha ticatianacanuaniarichucha, nacatianacahivare ema Tata.

²⁵ Étasera tacaheyarehi eta táitauchiravayarehi eta táechajiriruvana eta Sagrada Escritura te Salmo, ani tacahehi: “Tájina taviuchanuhini eta nacatianasiranuhi”.

²⁶ Étiserá, mararihiyare ema tímicatacaheyare, ticurisamurechaheyareva. Te nítecapauchayarepa ema Tata, nuyaseacaya mavaneca ema Espíritu Santo. Éma, te máitecapapa, tímereuchaheyare eta yátupiqueneana. Tímereuchanuyareva núti eta eyehe.

²⁷ Éti apanavare ímereuchanuyareva taicha tiyereripahi eta ecachanuranuhi, tépanavapa te nunérejicahénapa.

16

¹ Núti numetacahe eta juca apaesa vahi ecuarami eta nacatianasirahe, váhivare ecuinajicava eta éhisiranuhi.

² Taicha tiáquijicaheanayare tayehe eta viúrujisirarevana. Énerichuvare navarahayare ticapacaheana. Éna, náimijachayarehi tiúriyarehi eta náichirayare te mamirahu ema Viya.

³ Éna, náichayare eta juca táichavene eta namáimatirahi ema Tata, váhivare náimatínuhini núti.

⁴ Numetacahe eta juca apaesa te táitecapapa eta íchavaquenevaya, vaipa ecuarameca. Échainapa eta numetasirahehi.

Éma Espíritu Santo tímicatacachavíhi

⁵ Puiti tiánehinapa eta nuyaniraya nuchava eta me Tata. Eta nucachaneirahehi, ticatianacanuani núti ena achaneana. Puítiserá eta májinairanuyare, ticatianacaheanainapa éti. Eta juca tacahehi, nupaenumava numetacahehi puiti. Étiserá németeaca vuíchaha ecaicutiara eta numetarapi, taicha váhivare eyaserecanuhini eta nítametasirayare, étahinéni eta nucaijuhayare.

⁶ Esapiha éti ecatisamurevahi taicha eta juca numetasirahehi eta nuyaniraya.

⁷ Tayanapane vahi eyaserecanuhini, nutupiruvaseva numetacahe: Tatuparacahi eta nuyaniraya nuchava mayehe ema Tata, taicha te vahi nucuyana, vahi títecaimahi ema nuvaneruya. Éma tiúrichaheyare, tímicatacaheyare, ticurisamurechaheyareva.

8 Énerichuvare ena achaneana te juca apaquehe, manacasamurechaya eta nacatuparahairahi náichayarehi eta táuriqueneana, náehicanuvare núti. Manacasamurechavacayareva éna eta náimatiraina eta nasipeaturaravahi. Taicha te vahi nacuvaraha náinajica eta tauriqueneana, téhevare vahi nacuvaraha náehicanu núti, ticaicuñanainapa te yucu.

9-10 Ema Espíritu Santo manacasamurechavacayare ena achaneana eta najacapacarevaya me Tata nácani ticasiañavanapuca eta nuyehé, taicha nuyanaya eta me Tata, néchajiu chavacayare éna. (Vaipa ímahanuimahi éti.) Nácanisera vahi nasuapanuhini núti, tanasiquenehi eta napecaturanahi.

11 Manacasamurechavacayareva ema Espíritu Santo eta yátupina táiturevayare éna eta máicuñayare ema Váinaraji náehiruhi te juca apaquehe. Éna apanova náepujuquichainapa tayehe eta yucu infierno.

12 Maverachahaneni eta juca nuvarahaqueneanahi numetacahe. Váhisera eratahaimahi ecaicutiara puiti.

13 Téhesera máitecapapa ema Espíritu Santo, éma tiámayarepahi eta yátupi-queneana numaimitureheanarichaha, émainapa túmitucaheyare. Taicha mametacavahi eta máechajisiraheyare, énerichuvare timetacaheyareva eta íchavaquénévanayare.

14 Ichapenapa eta nucunachacarevayare máicha. Émainapa timetacaheyare eta nuanairipianayarehi eyehe.

15 Taicha ema Tata tituparacanuhi eta nútirayarehi nécha tamutu. Eta tacahe, eta juca mametarapianayare ema Espíritu Santo tásihaqueneanayare nuyehé.

Vahi tánasimahi ecatisamureva. Tichavayare eta iúrisamurevaya

16 Ánipiyareichusera eta emaimairanuyare. Téhesera táequenénapa, iápechavainavarepa ímahanuyare. Taicha nuyanayarepa te mávihahi ema Tata.

17-18 Tacahe ena apamuriana nuchamuriana tiyaserecanuana:

—¿Tájahapuca tacayema eta juca mametarapihi, eta macahehi ánipirine eta vimaimairayare, tásiha, te táequenénapa viápechavainavarepa vímaha? ¿Tichavavanepuca eta mayanirayare eta me Maiya? ¿Váhipuca mánasimahi eta machaviraya? Váipavare vácaicutiara eta ánipirine eta macaheyare eta viyehé —nacahepa.

19 Ema Jesús macaicutiaravacahi eta navarairahi nayasereca. Máichavacapa:

—Núti numetacahehi eta ánipirine eta emaimairanuyare. Tásiha, te táequenénapa eta emaimairanuyare, iápechavainavarepa ímahanuya. Eta juca emacacutiaraqenehi.

20 Tásiha puiti, nutupiruva numetacahe eta íyahairainasamipa éti, ejapanuvairayareva. Énasera ena apamuriana achaneana, tiúrisamureanainapa éna. Tásihasera te táequenénapa, vaipa íyahaimahi. Tétavicavasera eta iúrisamurevainapa eta táitsivaya.

21 Eta juca túmicutijiricavahi te tñacayare esu esena. Ánipichuhi eta sucaturhavahi taicha eta suínasirayarehi. Téhesera te tamutupa eta suínasirahi, suémitisicanapa eta sucaturhavainihi. Tiúrisamuréinapa eta suímairahi eta suchicha, tajurusirayarehi te juca apaquehe.

22 Ene ecaheya éti, ecatisamurehi puiti, ánipirichusera. Téhesera te viápechava vímahacacaya, tétavicava eta iúrisamurevaya. Nájinainavarepa tihapapicahémahi eta iúrisamureva.

²³ Te jena sáchezare, vahi nútímahi eyaserecanu. Émasera ema Tata eyaserecayarehi. Éma, tíjaracaheyarehi tamutu jácani eyasearuanayare te níjare.

²⁴ Puíticha tájinaichaha eyasearapinahini me Tata te níjare. Ticamunucarehi eyaseacayare. Éma tíjaracahénapa. Étainapa ticurisamurerecaheyare ichape.

Numetacahe eta nucapaquechiravacayare ena nánaranayare

²⁵ Núti nímicutichinahehi eta juca numetasirahehi. Téhesera te táequenénapa, nutupiruvainapa numetacaheyare eta yátupiqueneana mapanereruanahi ema Tata.

²⁶ Te jena sache, eyaseacainapa ema Tata te níjare. Váipayare tacamunimahi nuyaseuchahe eta mayehe.

²⁷ Taicha émaripa ema Tata témunacahehi éti, táichavénehi eta émunasiranuhivare nútí. Éti esuaparipa eta yátupirahi eta mavanesianuhi ema Tata. Tíjaracahénavanepa eta eyasearuanayare.

²⁸ Núti, eta násihahi mayehe eta nítésirahi te juca apaquehe. Puítisera nujunijicainavarepa eta apaquehe, nuchavainavarepa mayehe ema Tata – máichahavipa.

²⁹ Tacahe, viti máimitureana víchapa:

–Jéhevare puiti pitupiruvapa eta péchajisihahi. Vaipa pímicutiarachinahávihi.

³⁰ Vímativarepa eta yátupirahi pímatiequeneha tamutu. Jéhesare, pímatiequeneha tamutu eta vipanereruana, étaripa eta juca vivarairahi víyaserecaviyare. Visuaparipa puiti eta yátupiquenévavihi Machichavi ema Viya – víchapa.

³¹ Tacahe, ema Jesús máichahavipa:

–Jéhepuca eta esuapiranu puiti.

³² Puítisera juca yatí, títecapainapa eta éjanerepáisirayare éti. Ejunijicainuina, nucarichuinapa nútí. Matiarihiyaresera ema Tata. Éma, ticachanenuyare.

³³ Numetacahavare tamutu eta juca apaesa vahi ecuarameca. Ácasiñava yátupina nuyehe apaesa tacuija ecuichiravaina, tayanapane ecatajivayare muraca te juca apaquehe. Ácasiñavahisera eta nuyehe, taicha nútí máijararunuhi ema Tata eta nucapaquemurihairayare namutu ena nánaranahi – máichahavipa.

17

Eta mayujarasirahi ema Jesús, mayaseuchavacahi me Maiya eta náurivaina ena máimitureana

¹ Te títapiricapa ema Jesús eta máechajisirahavihi viti máimitureana, tépanavapa tiyujaracahi. Máesenicapa te anuma. Ánipa macahe:

–Tata Nucaiyaquene, títecapauchanupa puiti eta táitauchiravayare eta pipanereruana. Nuvarahasera nucunachacaréni eta piyehe, tácutini eta nucunachiravihi píti.

² Yátupíhi eta píjarasiranuhi eta aquenucairanuyare, te namirahu namutu ena achaneana. Nucaitaesirayarehivare namutu ena píchuhaqueneanahi píjararunuanahi.

³ Níjaracayare eta náitaesirayare máichecuaraquireyare ena píjararunuanayare apaesa náimatívi, píti Tata yátupiquenévavihi Viya, nútípa nútí Jesucristo, nútí pivanerunuhi te juca apaquehe.

4 Núti nímercahi ne achaneana eta picunachacarevahi. Nítauchaipahi tamutu eta pivanairipianahi pivarahaquenehi níchayarehi.

5 Puitisera nuchavainavarepa eta piyehe. Píjaracanuyare eta nuchavirayare te pijaraivahi. Néjacainavarepa te pivaure tayehe eta návinehi acane te tépanavainapa eta apaquehe.

6 Nítamuturucaripahi eta nímitusiravacahi ena píchuhaqueneanahi píjararunuanahi píti. Nímimatchavacahivare eta piúrivahi píti. Yátupihisera eta pichichanaveanahi éna, taicha nasuapahi eta nímiturapiana píjararunuanahi núti.

7 Náecharipahi tamutu eta juca nímiturapiana tásihaqueneanahi piyehe.

8 Náecharipahivare eta yátupiquenérahí eta pivanesiranuhi. Eta tacahe, natupiruvahi najacapa eta nímitusiravacahi eta péchajiriruvana.

9 Eta tacahe, puiti nuyaseacavi, Tata, eta pijaneasiravacaina ena píjararunuanahi téhicanuanahi, taicha pichaneranahi éna. Vahi énaína nuyaseu-novacachucha éna, apaesa náimiyavahi eta náurujiasiracacaina, návahásiracacayare nácutihini eta víavahásiracacahi víti.

10 Núti néchahi eta piyeheravacahi éna. Eta tacahe, néñamavahi eta nayehe, nuyehenaipahi éna. Yátupihí eta náimatiranuhi eta pivanerunuhi, tásiha ticunachanuanahi ichape.

11 Puiti núti nujunijicavacainapa ena píjararunuana. Énaserá nanasiya-rechaha te juca apaquehe. Nútisera nútijapainapa eta piyehe. Tata Nucaiyaquene, píti yátupiquenévihi eta pisantuvahi. Nuyaseacavi pijaneasina-novacachucha éna, apaesa náimiyavahi eta náurujiasiracacaina, návahásiracacayare nácutihini eta víavahásiracacahi víti.

12 Núti nímitatchavihi píti eta nayehe, étapa eta píjare, apaesa yátupina eta náehisiravina. Ichapemurihi eta nujaneasiravacahi éna eta nucachanerava-caichaha. Eta tacahehi, vahi náimajicavahini eta náehisirahavihi. Émanarichu ema téjecapavahi, ema tijararecanuyare. Étasera tacaheyarehi eta táitauchi-ravayarehi eta Sagrada Escritura.

13 Puiti nútijapainapa, Tata, tayehe eta jara piávihahi. Eta nucachanerava-caichaha éna, numetacavacahi eta pipanereruana, taicha nuvaraha vácuti-cacahini eta viúrisamurevaina.

14 Taicha ena achaneana te juca apaquehe, ichapemurihi eta nacatianasi-ravacahi táichavenehi eta najacapirahi eta péchajiriruvana nímitusiravacahi. Éna, vaipa náehicahini eta tayeheana eta juca apaquehe, ticitunuanaripahi núti eta numaehisirahi eta tayeheana eta te juca apaquehe.

15 Vahi nuyaseacavi eta piviravacainahini te juca apaquehe. Nuyaseacavi núti eta picatiuchiravacainahini mayehe ema Váinaraji.

16 Taicha yátupihí éna vaipa tayeheanainahini eta juca apaquehe, ticitunuanaripa núti vahi tayehenuinahini eta juca apaquehe.

17 Píjaracavacahini eta náurivainahini eta piyehe, náitusirainahini cápachi eta péchajiriruvana yátupiqueneana.

18 Píti pivanevanuhi nímiturecayarehi eta péchajiriruvana nayehe ena achaneana te juca apaquehe. Tásiha, núti nuvanecavacayareva ena nímitureana, náimituca ena apamuriana achaneana.

19 Puiti, eta némunasiravacahi éna, níjararecava núti, nítauchayare eta pivarahaquenehi. Nuvaraha ene nácahehíni éna, yátupinahini náijaracavahini eta nacaemataneasiravivarehi. Yátupinahivaréni nasuapa eta péchajiriruvana yátupiqueneana.

²⁰ Váhivaresera nacarichuhi éna nuyaseuchavacahi eta piyehe. Énerichu nuyaseuchavaca ena tisuapanayare eta táunavayare eta áñoana, ena tijacapanayare eta péchajiriruvana.

²¹ Nuyaseacavivare váhini tacuitavahini eta náurujasiracacayare éna. Píjaracahivaréni, Tata, te nasamureana eta návahásirahavinahini tácutihini eta viávahásiracacahi víti. Náurujasirahavinavare víti, apaesa ena achaneana te juca apaquehe náimatihini yátupina eta pivanesiranuhi.

²² Núti níjaracavacaipahi éna eta náitupajijiasiravacayarehi tamutuirayarehi narataha. Vicutihini víti eta tamutuíra virataha. Návahácacahini éna, vácutihini víti eta viávahásiracacahi.

²³ Píti piávahácanuhi núti. Tásiha, núti návahácavacahi éna apaesa yátupinahini éna étanainarichuyare eta napanereruana, apaesa ena apamuriana achaneana te juca apaquehe étainahini náimatiarainahini eta pivanesiranuhi, étapa eta pémunasiravacahi ena nímitureana tacutihini eta pémunasiranuhi núti.

²⁴ Tata Nucaiyaquene, píti píjaracaruhi ena nani píchuhaqueneanahi. Nuyaseacavi puiti eta nucachaneravacainahini tayehe eta návihayare núti. Náimahahini eta nujaraíva píjararunuhi taicha eta pémunasiranuhi te tépanavainapa eta tacaepiyairahi eta apaquehe.

²⁵ Tata Nucaiyaquene, píti yátupiquenévihi eta pisantuvahi. Ena achaneana te juca apaquehe vahi náimativihini. Nútisera nímativihini.

²⁶ Ena nani píjararunuanahi nímitachaviripahi. Tétavicavahi eta pémunasiranuhi. Tásiha, nuvaraha yátupina nasamava eta táetaviuchirahi eta pémunasiravacahi taicha éna tiávahácanuanahi núti.

18

Títecapanapa ena ticaratacanaya ema Jesús

(Mt 26.47-56; Mr 14.43-50; Lc 22.47-53)

¹ Te títapiricapa ema Jesús eta mayujarasirahi, tiyanapa tiámamurihahavipa te apachara eta tatavarapi ticaijare Cedrón. Ánaqui tatiarihi eta huerta ticaijare Getsemaní. Visiapapa tayehe.

² Tacahe, ema Júlasí máimatihini eta juca viávirarehi taicha ichapemurihi eta vicachanerahi ema Jesús tayehe eta huerta.

³ Tacahe, te jena yátiquenehi, títecapapa ema Júlasí. Mámamurihapaipahi ena oficialeana énapa ena camuriqueneanahi suntaruana romanoana, vanairucanahi éna nayehe ena tuparairucana, taicha napamicavacahi ena fariséoana. Ticamicahuanapaipahi. Ticaepuchiriquianapaipa, étapa eta nayehe espada.

⁴ Émasera ema Jesús máecharipa eta nacaratasirayarehi. Tacahe, mácapavacapa éna. Máichavacapa:

—¿Nájaha etánuca?

⁵ Ena najicapapa:

—Ema Jesús Nazareno vitanucapahi.

Éma máichavarepa:

—Nútira etánurepahi.

Ema Júlasí mapauchapa, máetserarecapa. Tásiha, titupihachaha te machacaya.

⁶ Eta majicapirahi ema Jesús, máichirahi: “Nútira etánurepahi”, tiáquipaimuriavanapa ena suntaruana te apaquehe.

⁷ Tásiha, mayaserecavarepa ema Jesús:

—¿Nájaha ema etánucapahi?

—Ema Jesús Nazareno —najicapavarepa.

⁸ Éma, máichavarepa:

—Cápachi numetacaheripahi nútihira etánurepahi. Te nútichucha etánucapahi, ísapayare nayana ena nani —máichavacapa.

⁹ Étapaichuhi eta máechajiriruvahi ema Jesús te tiyujaracaipa nájina émanainahini náemitiacahini te namuri ena máijjaruanahi ema Maiya.

¹⁰ Tacahe, ema Pedro, tatiarihíhi eta mayehe espada te mañahe. Mavehapa, máechuchacachapa eta machaca te vaure ema achane ticaijare Malco, mavanarahi ema aquenuca Caifás.

¹¹ Émasera ema Jesús macahepa:

—Pinaca te tatumaramuhi eta piyehe espada. Vahi pihapapicaimahi eta táitachiravaya eta mavarahaquenehi ema Tata, taicha nutuparahaichuhi mayehe eta juca nucatajivairaya —macahepa.

Nacaratacapa ema Jesús, námapa te mamirahu ema corregidor

(Mt 26.57-58; Mr 14.53-54; Lc 22.54)

¹² Tacahe, ena suntaruana émapa ema comandante nacaratacapa ema Jesús, náitijivauchapa.

¹³ Tiyananapa námapa te mapena ema Anás. Étarichu mapena ema Caifás, taicha ema maca Anás máimachuchahi ema Caifás, émapasera tuparairuchahi te jena áñohe máitsivaequenehi ema máimachuca.

¹⁴ Ema maca Caifás, émarichuvare ticaechajiriruvahi eta máepenirainahini ema émana achane tivachachayarehi eta náitaresirana namutu ena achaneana.

Ema Pedro tépiyacavapa vahi máimati ema Jesús

(Mt 26.69-70; Mr 14.66-68; Lc 22.55-57)

¹⁵ Ema Pedro, nútipa nuti Juan viyanapa véhiequenehapaipa ema Jesús. Nusiapapa nútí te tajuhe eta canchón mapenahi ema aquenuca Anás, taicha náimaticasarenuhi ena mavanarana.

¹⁶ Émasera ema Pedro manasipa te aneca te tapajachacaya. Tásiha, néchajiacapa esu vanaracahi téchahi eta tapaja, sucasiapahini ema Pedro.

¹⁷ Tásiha, esu suyaserecapa ema Pedro, ánipa suicha:

—¿Pítirichu jácani apanava nñimiture eñi ñica Jesús?

Ema Pedro majicapapa:

—Vahi nútina.

¹⁸ Tásiha, eta jena yátiquenehi táetaviuchahi eta tacasaraivahi. Ena mavanaranahi ema Anás, énapa ena suntaruana ticamururecanapa eta yucu, násasiavayarehi. Eta náurujiasiraipahi eta yucu, titupihapavare ema Pedro te nachacaya, másasiavahivare.

Ticayaserehipa ema Jesús te mamirahu ema Anás

(Mt 26.59-66; Mr 14.55-64; Lc 22.66-71)

¹⁹ Tacahe, ema Anás mayaserecapa ema Jesús áyananapuca ena téhicanahi éma, tájahahivarepuca eta máimiturapihi eta nayehe.

²⁰ Ema Jesús majicapapa, ánipa macahe:

—Núti vahi nuyumurucavahini eta nímituresirahi. Nímerecavahi te namuri namutu ena achaneana te viúrujisirarevana, etapa te Templo. Éta nímituresirareanahi.

21 ¿Tájaha tacayema piyaserecanu núti? Piyaserecapaini ena tisamararacananahi. Énaina nametacavi eta nímiturapianahi núti —macahepa.

22 Matiarihihí ema émana suntaru te machacaya. Eta masamirahi eta máechajiriruvahi ema Jesús, máehamirahapa éma. Tásiha, máichapa:

—¿Tájaha tacayema tíñemahi eta pijicapirahi ema aquenuca macapicahuquenehi? —máichapa.

23 Tacahe, ema Jesús majicapapa:

—Váhira táíñemahihini eta nujicapirahi ema aquenuca eta taviuchanuhini. ¿Tájaha tacayema péhanu? —macahepa.

24 Tacahe, ema Anás máevatacapa mayehe ema Caifás, émarichuhi corrigidor. Ticaitihapaipahi eta námirapahi éma.

*Éma Pedro tíápechavare tépiyacava vahi máimati ema Jesús
(Mt 26.71-75; Mr 14.69-72; Lc 22.58-62)*

25 Tacahe, ema Pedro manasirichuhi titupihahi te tachacaya eta yucu, tíasacavahi éma. Nayaserecavarepa nápechahi:

—¿Pítirichu jácani máimature ema maca achane? —náichapa.

Éma Pedro majicapapa:

—Vahi nútina —macahepa.

26 Tásiha, matiarihihivare titupihahi ema mavanarahi ema aquenuca, macheji ema máechatichacaruhi ema Pedro. Tacahe, éma téchajicapa, máichapa:

—Núti németeaca nímahavihí picachanehi éma tayehe eta huerta te vicarata-sinehi ema maca —máichapa.

27 Émasera ema Pedro macahevarepa:

—Váhiquene nímati éma —macahepa.

Tásiha, enurujipa téchajicanecha eta varayu.

*Éma Jesús námapa te mamirahu ema Pilato
(Mt 27.1-2, 11-14; Mr 15.1-5; Lc 23.1-5)*

28 Te jena yáticarahi, te tijarahi, nacuchucapa ema Jesús te mapena ema Caifás. Námapa tayehe eta palacio mávihahi ema Pilato. Váipasera nasiapahini ena tuparairucana. Náimichuhahi ema Pilato. Nanasipa te aneca, namavarairahi náechipejicavahini eta nanisirayarehi eta cordero pascual te jena sache.

29 Tacahe, ema Pilato tíuchucapa, máechajimurihapa éna. Máichavacapa:

—¿Tájaha eta maviurevahi ema maca achane íamaquenepahi eta ani nuyehe? —macahepa ema Pilato.

30 Éna najicapapa:

—Jucarihi eta maviurevahi. Eta tacahe, víamapahi eta piyehe.

31 Tásiha, ema Pilato, máichavacapa:

—Eyana iama. Étina ícuñaca ema maca, taicha jararihi eta eyeherepichuhi eti israelítana —máichapa.

Éna najicapapa:

—Étasera víti, váipa ísapahivihini vítaucha eta viyeherepi vímicapaca mácani ticaviurevahi, vitupisica te márijahi. Émasera ema maca vivaraha máepena. Vivaraha pémetatacaini te crusu —nacahepa.

32 Tacahehi eta táitachiravapaipa tamutu eta máechajirivanapahi ema Jesús eta máepenirayarehi te crusu.

³³ Tisiapavarepa ema Pilato te tajuhe. Máichuhapa ema Jesús. Tacahe, mayaserecapa:

—¿Yátupisareji réyvihi píti nayehe ena pijaneanana israelítana? — macahepa.

³⁴ Ema Jesús máichapa:

—¿Pitupiruvahipuca eta juca píchiranuhi, pivarairahi pecha te yátupihipuca eta nurreyvahi? ¿Pitanucahipucasera eta nuviurevayare, picutihipuca eta napanereruhi ena nujaneanana israelítana? —máichapa ema Jesús.

³⁵ Ema Pilato majicapavarepa:

—Vahi nímati eta epanereruana eti israelítana. Énarichuhi ena pijaneanana ena tuparairucana, éna tiámavianapahi eta ani nuyehe. ¿Tájaha eta pivirevahi eta nayehe? —máichapa.

³⁶ Tásiha, ema Jesús majicapavarepa:

—Jéhesare, jararihi eta návacurehi; váhisera étaina te juca apaquehe. Te étainahini te juca apaquehe eta návacurehi, téhacacauchanuanaripahini ena nímitureanahi, váhivare nacucaratacanuhini ena ticatianacanuanahi. Taicha yátupiquenehi eta návacurehi, vahi étaina te juca apaquehe — macahepa.

³⁷ Tacahe, ema Pilato mápechavarepa mayasereca:

—Tacahe, ¿yátupihi eta pirreyvahi? —máichapa.

Ema Jesús majicapapa:

—Yátupi réynuhi núti. Eta núcupaisirahi, núchucahi te juca apaquehe, nímiturecayarehi eta yátupiqueneana. Nácani tisuapajirahianayare, nasamararayare eta yátupiqueneana —macahepa.

³⁸ Tacahe, ema Pilato macahevarepa:

—¿Píti pímiachava pímati eta yátupiqueneana? Núti, németeaca nájina narataha náimatimahi eta yátupiqueneana —macahepa.

Ema Pilato macavanairipipa náetataca ema Jesús te crusu
(Mt 27.15-31; Mr 15.6-20; Lc 23.13-25)

³⁹ Te tamutupa eta mayaseresirahi, tiúchucavarepa ema Pilato. Máechajimurihapa ena ticatianacanahi ema Jesús:

—Tájina maviurevaina ema maca achane eta nímairahi núti. Étiserá jucarihi eta eyeherepi te Páscuamuhuana eta nucaitisirayare ema émana presu. ¿Evarahapuca nucaítica ema eyehe Rey, iáquenumuri eti israelítana? —máichavacapa éna.

⁴⁰ Énaserá tipiararecanapa eta najicapirahi:

—¡Vahi vivaraha picaitica ema maca! ¡Émaina picaitica ema Barrabás! —nacahepa.

Ema Barrabás táemerataruhi eta máetaviuchirahi eta mámeraivahi.

19

¹ Tacahe, ema Pilato macavanairipipa náestaca ema Jesús.

² Tásiha, ena suntaruana navehapa eta épire itapepi, náitsamemacapa. Nanacapa te machuti ema Jesús, majarapiyarehiji náicha. Namuriachavarepa eta muíriare mularume.

³ Tásiha, nachayacapa éma, nacavayumarajipa nacaecahijiricapa. Ánipa nacahe:

—Tata, ipítitajá nayehevihiji Rey ena israelítana! —nacahepa.

Náehamirahavare te mamira.

4 Ema Pilato tíapechavarepa tiúchucahi. Tásiha, máichavacapa ena achaneana:

—Nímerca te emirahu ema maca achane. Nuvarahasera ácaicutiaraini eta tamajinairahi maviurevainahini eta nímairahi núti —máichavacapa.

5 Tacahe, nacuchucapa ema Jesús, mámapaipa eta itapepi te machuti, majarapihi náepiyarui éna, étapa eta namuriarui mularume. Tásiha, máichavacapa ema Pilato:

—Mácaripa ema maca achane. Ticaemecharáhiripa, ticaestaripavare. Maratapa —macahepa.

6 Te náimahapa ena tuparairucana énapa ena nasuntaruana, tipiaracanapa: —¡Pémetatareca te crusu! ¡Pémetatareca te crusu! —nacahepa.

Ema Pilato máichavacavare:

—Núti tájina maviurevainahini eta nímairahi. Étina écha eta iámairaya éma. Étina émetatareca te crusu —máichavacapa.

7 Éna najicapavarepa:

—Ichape eta maviurevahi ema maca eta viyehe, taicha tímijachavahi Machicha ema Viya. Vivaraha máepena, taicha váhiquene vísapahini eta juca —nacahepa.

8 Eta masamirahi ema Pilato eta machichairahipuca ema Viya ema Jesús, ichaperinehi eta mapisirahi.

9 Tisiapavarepa tayehe eta mayehe palacio. Máichuhavarepa ema Jesús. Mayaserecavarepa:

—¿Nájahavisica píti? ¿Távihasica eta piásinehi? —macahepa.

Émasera ema Jesús, tájina vahi majicapahini.

10 Tásiha, ema Pilato máichavarepa:

—¡Vahi pivaraha pijicapanu! Péchapuca píti eta nuratahairahi nucuchuhavi, énerichuvare nuratahavare nucavanairipi náetatacavi te crusu —macahepa.

11 Ema Jesús mapaenumavapa majicapa:

—Váhiquene piratahaimahi píti jiva pémetatarecanuhini te crusu. Émasera ema Tata tituparacavihi, mavarairahi títauchava eta mavarahaqueneanahi. Eta tacahe, ichape eta napecaturana ena tjararecanuanahi eta piyehe. Píti váhipanaichuhinéni eta pipecaturahi eta píchiranuhi —macahepa.

12 Tacahe, ema Pilato mavarahainipa macuchucuhayarehini ema Jesús.

Énasera ena tuparairucana tipiaracanavarepa:

—¡Te picaitica ema maca, vépiyaequenehaviyare mayehe ema ichapequene aquenuca Emperador! ¡Ema maca achane macatianaruihema Emperador taicha tímijachavahi rey! —nacahepa.

13-14 Tacahe, te masamapa ema Pilato eta náechajiriruvahi éna, tiyanapa te anuquehe, téjacapa tayehe eta máejasirare apaesa namutuyarepa náimaha. (Eta mávacurehi, amairiha máripahi. Eta jena sache, viérnesi táequenereruhi eta Pascua.) Tacahe, tiánehiripa las dóceyarehi eta sache macavanairipipa nama ema Jesús. Tásiha, máichavacapa ena achaneana:

—¡Mácaripa ema eyehe Rey! —macahepa.

15 Énasera tipiaracanavarepa:

—¡Pémetatarecavane! ¡Máepenavanepa! ¡Váhiquene vivaraha ema maca! —nacahepa.

Tásiha, ema Pilato máichavarepa:

—¡Vahi németatarecaimahi ema eyehe Rey! —macahepa.

Énasera ena tuparairucana najicapavarepa:

—¡Nájina apanaina viyehena Rey! ¡Macarichu ema Emperador! —nacahepa.

¹⁶ Tacahe, ema Pilato máisapapa. Májaracavacapa ena masuntarurana eta náetatasirayare ema Jesús. Jéhesaréinehi námapa éma.

Náetatacapa te crusu ema Jesús

(Mt 27.32-44; Mr 15.21-32; Lc 23.26-43)

¹⁷ Tacahe, nájaracapa ema Jesús eta macurusuraya. Tiúchucapa éma, mámapaipahi te majihu. Námapa eta te Calvario (te hebreo ticaijare Gólgota).

¹⁸⁻¹⁹ Tásiha, ema Pilato máepiyacapa eta ajureca eta táechajiriruvahi, ánipa tacahehi: “Ema Jesús Nazareno, Rey nayehe ena israelítana”. Te tápusi eta macurusura nanacapa eta juca ajureca. Natiarihivare ena apinana ticaetanahivare te machacaya. Émasera ema Jesús, te enumuhu mávihahi.

²⁰ Camuriana ena achaneana téchajicuhanahi eta ajureca, taicha eta macaetataiyahi ema Jesús tacachacayaichuhi eta avasare. Eta ajureca, te hebreo, te griego, téhepa latín. Mapana eta táechajiriruvanahi.

²¹ Eta tacahe, ena tuparairucana tiyananapa mayehe ema Pilato nayaseapanahi máitsivachahini eta ajureca. Éna navarahahi áni tacaheyarehi eta ajureca: “Ema maca tímijachavahi Rey nayehe ena israelítana”.

²² Émasera ema Pilato máichavacapa:

—Eta ajureca nunacaquenehi, nájina tihapapicaimahi —macahepa.

²³ Te náitauchapa ena suntaruana eta náetatasirahi ema Jesús, nasuerte-hachapa eta mamuiriha nayehe ena cuátroqueneana. Navehavarepa eta apana mamuiriha. Étasera tájina taparinahini, amairijuheichucha eta it-sameruca.

²⁴ Vaipa návarahahini navetsayucahini. Tásiha, nasuertehachavarepa, náimairayarehi nájahayarehipuca mácani tivecuhayarehi.

Tacahehi eta táitauchiravahi eta Sagrada Escritura eta táechajiriruvahi: “Ticajjiricacanapa eta numuirihaini. Nasuertehachavare eta apana numuiriha”. Jéhesare, tacahehi naicha ena suntaruana.

²⁵ Te tápecu eta macurusura ema Jesús, sutiarihíhi esu maena, ésupa esu mápenaru, ésupa esu apana María mayena ema Cleofas, ésupa esu María Magdalena.

²⁶ Tacahe, te máimahapa esu maena eta sutiarirahíhi te machacaya, nútipa nuti máimiturehi máemunaruquenehi, ánipa máicha ésu:

—Mémechicha, márahi ema nítivayare ema pichichayare. Éma titátiviyare.

²⁷ Tásiha, énerichuvare tituparacanuvarépa nútí:

—Némunacasare, nutuparacavi esu meme. Esu pényare. Pímainanu — máichanupa.

Jéhesaresera, nútí Juan ichaperinehi eta nujacapirahi esu maena. Námapa te nupena.

Eta máepenirahi ema Jesús

(Mt 27.45-56; Mr 15.33-41; Lc 23.44-49)

²⁸ Tacahe, eta máimairahi ema Jesús eta táitauchiravaripa tamutu eta táechajiriruvanahi eta Sagrada Escritura, ánivare macahehi:

—Tétaficava eta numauneva —macahepa.

²⁹ Tatiarihíhi eta tisisica vino te tinaja. Náechipajicapa eta machuchujiruyarehi. Náimicapayacapa tayehe eta majaca te tiúqui curina.

³⁰ Tacahe, machuchujicapa ema Jesús eta tisisica vino. Tásiha, macahepa:

—Jéhevare puiti, títauchavapa tamutu —macahepa.
Tásiha, téyusicapa. Tépenapa.

Éma émana suntaru mayuvaracapa te machene éma Jesús tayehe eta lanza

³¹ Tacahe, éna tuparairucana vahi návarahahini nánasihini éna ticaetanahi te crusu te jena sache sávaru páscuairahi. Tacahe, tiyananapa mayehe éma Pilato, nayaseapanahi macavanairipihini eta nacavetupaiquechavacayarehi apaesa náepenavanehini. Navarahahi náecarávane, taicha tétavicavahi eta tacapicahuirahi nayehe éna eta jena sácheana páscuairahi.

³² Jéhesaréinehi, tiyananapa éna suntaruana, nacavetupaiquechavacapa éna apinana tiámerahiana nacaetataquenehi te crusu te machacaya éma Jesús.

³³ Tásiha, éneyareichuhivaréni éma Jesus. Téhesera te náitecapauchapa, náimahapa eta máepeniraipahi. Tacahe, vaipa nacavetupaiquechahini éma.

³⁴ Táitsivahisera éma émana suntaru mayuvaracapa te machene tayehe eta lanza. Enevane pa tiúchucahi eta iti étapa eta une.

³⁵ Núti Juan nájuequenehahi tamutu eta juca, nímahaqueneanahi. Nuharaha nítametacahe tamutu. Yátupihivare eta numetasirahehi, taicha nuvaraha esuapahini éti apanavare.

³⁶ Títauchavahi eta juca táéchajiriruvahi eta Sagrada Escritura: “Tájina vahi nacavetucaimahi eta máperana”.

³⁷ Jararihivare eta apana Escritura, ánivare tacahe: “Náimahayare éma najarachaquenehi”.

*Nacucupaicapa te crusu éma Jesús, náecarayarepa
(Mt 27.57-61; Mr 15.42-47; Lc 23.50-56)*

³⁸ Te tamutupa eta juca, matiarihihi éma achane José, ticavasahi te Arimatea. Émarichuhi tisuapajirahihi mayehe éma Jesús. Váhisera máimerecavahini, mapisiravacahi éna machamuriana aguenucarahana. Tiyanapa éma mayaseapanahi éma Pilato eta máquehe éma Jesús. Tachahera éma Pilato máisapapa. Tiyanapa éma José, macucupaipanapa eta máquehe éma Jesús.

³⁹ Émapa éma Nicodemo macachanehi, éma téjirapanahi éma Jesús te jena yátimuhuquénehi. Mámapahi éma eta treinta kilo eta perfume mayajihavarehi.

⁴⁰ Tacahe, éma José émapa éma Nicodemo navehapa eta máquehe éma Jesús, náyuruacapa eta te sávana tijapu táurinaquenehi. Nayajihacavarepa tayehe eta tájiyequene perfume. Tacahehi eta viyeherepi te vécarayare éna náepenaqueneana.

⁴¹⁻⁴² Tacahe, te tachacaya eta máepeninehi éma Jesús, tatiarihihi eta huerta te távihahi eta mari natsecajueruhi ecariyare tacutihi eta covacha. Nájinaichaha nacaecarasihini tayehe. Étapa náecarihahi eta máquehe. Tiputuvahuanapa taicha cáperehichicharipahi. Vahi táisapacarehini náecarahini te yati, váhivare táisapacarehini te apanapa sache taicha sávarumuhupahi.

20

*Éta máechepusira éma Jesús te máecari
(Mt 28.1-10; Mr 16.1-8; Lc 24.1-12)*

¹ Tacahe, te jena sache lumincuquenehi, te tijararahichichapa, tiyanapa esu María Magdalena tayehe eta máecari. Timapicuichaha te suítecapauchapa eta ecari, suímahapa tájinaripahi eta márime tajihainihi eta tapajacurahí eta ecari.

² Te suímahapa, tichavavanepa tijunapapaipahi. Suíchuhapanayarehi ema Pedro nútípa nuti Juan. Timetacahavípa ésu:

—Námechapa jácani eta ñáquehéni eñi Viáquenu. Vaípa vecha távihahípuca nanasihahi —súcahepa.

³⁻⁴ Tacahe, nútí émápa ema Pedro víuchucapa viyanapa vijunapapaipahi. Nucachuricapa ema Pedro. Nítecapavanepa nútí tayehe eta máecari ema Viáquenu.

⁵ Nétípaicapa. Nujíñañajuechapa. Tacarinehi nímaha eta máyuruhanainihi. Váhísera nusiapahíni.

⁶⁻⁷ Te títecapapa ema Pedro, tisiapapa éma tayehe eta ecari. Máímahapa eta máyuruhanainihi. Tanasirinecha enurujuhehi, étapa eta mamuhísiequene ema Jesús.

⁸ Tacahe, nusiapavarepa nútí tayehe eta ecari. Nímahapa eta táichararacavahi. Tásiha, ichaperínehi eta nusuapirahi.

⁹ Vipaenumavapa vicaicutiarahi eta táechajiriruvahi eta Sagrada Escritura, eta máechepusirayarehi ema Viáquenu te máecari.

¹⁰ Te tamutupa eta vímairahi, vichavapa te vipena.

*Ena Jesús tímerecavapa suyehé esu María Magdalena
(Mr 16.9-11)*

¹¹ Esu María Magdalena, énerichuvare tíápechavarípa tichava eta te máecari. Sunasípa, tíyaháípa. Tásiha, tétípaicapa sújñañacahí te tájuhe.

¹² Tíáramícarepa suímaha ena apinana ángeleana, tíjapumuírihavacahí. Téjacanahí éna te tájuhe eta máecaríni. Ema émana te tanapainíhi eta machutí, ema apana te máivape.

¹³ Tásiha, ena ángeleana nayaserecapa ésu:

—¿Tájaha ticaiyacaví, nuchícha? —náichapa.

—Ticaiyacanuhí eta náméchirahí eta ñáquehe eñi Viáquenu. Vahí nécha távihapapuca nanasihahi —súcahepa.

¹⁴ Te títapiricapa eta suíchiravacahí, téviurucavapa, suímaharinehi ema Jesús.

¹⁵ Tásiha, éma apanava mayaserecapa:

—¿Tájaha ticaiyacavíhi, nuchícha? ¿Nájaha pitanucahí? —máichapa.

Ésusera suímíjachaichucha ema tíjanearecarahí eta huerta. Tásiha, suíchapa: —Tata, te pítihipuca píámahí eta ñáquehe eñi Viáquenu, pícatájanu pímetacanu távihapuca pinasihahi. Nuvaraha námayare nútí —suíchapa.

¹⁶ —¡María! —máichapa.

Suésenicainehí ésu. Supaenumavapa suímatíhi éma. Tásiha, suíchapa:

—¡Pítiquenehi, Tata Náquenu!

¹⁷ Tásiha, ema Jesús máichapa:

—Vahí picuemamahacanu, taícha vuíchaha nápanahíni te mávihahí ema Tata. Piyana pímetacavaca ena apamuriana nímitureana eta nápanirayare mayehé ema Tata, Ecaiyaquenehívaré éti apanava —máichapa.

¹⁸ Tacahe, esu María Magdalena tiyanapa sumetapanavacahí ena suchamuriana eta suímairahí ema Jesús, étapa eta mametarapianahí.

*Tímerecava ema Jesús nayehe ena máimitureana
(Mt 28.16-20; Mr 16.14-18; Lc 24.36-49)*

¹⁹ Étarichu te jena sáchequenehi lumincuquene, yátiripahi, viúrujicavahi viti máimitureana ema Jesús te tajuhe eta peti. Vérateaquenerecavahi taicha eta vipisirahi ena tupaairucana. Tiáramicarepa titupihahi ema Jesús te vimuri. Téchajicahavipa:

—Ícharacava, nuchichanaveana? —máichahavipa.

²⁰ Tásiha, tímechahavipa eta majarana te mavahuana étapa te machene. Tacahe, víti ichaperinehi eta viúrisamurevahi eta vímairahi éma.

²¹ Tásiha, máichahavipa:

—Vahi ecueñamava. Núti, mavanerunuhi ema Tata núcupaicayare te juca apaquehe, nímitucaheyarehi éti. Puiti nuvanecaheyare núti ímitucavacayarehi ena achaneana, apaesa náehicanuhini éna apanava —macahepa.

²² Tásiha, tiáchajuacahavipa víti. Tásiha, máichahavivarepa:

—Táuri eta ejacapiraina ema Espíritu Santo eta máitecapauchiraheya, mávahásiraheya.

²³ Éma, tímitucaheya eta ítametasiravacaya ena achaneana eta naperdonacharevahi me Viya ena téneuchavanahi. Te vahi nacubaraha téneuchavana, tanasiyare eta naviurevana taicha eta napecaturana —macahepa.

Ema Tomás vahi masuapa eta máechepusiraipahi ema Jesús

²⁴ Te jena sache eta máimeresiravahi ema Jesús eta viyehe, májinihi ema vichamuri Tomás.

²⁵ Tásihasera, ena apamuriana vichamuriana nametacapa éma eta vímairaipahi ema Jesús. Émasera macahepa:

—Vahi nusuapa. Téhesera te nímaha eta majara te mavahu taicha eta clavo, nímisipavare eta nuvaquí tayehe eta majara te machene, tapaenumava nusuapayare eta máechepusiraipahi —macahepa.

²⁶ Te óchopa sache eta táetavisiravahi, viúrujicavaipavare te viúrujisirareva. Matiarhipahi ema Tomás te vimuri. Tásiha, tiáramicarevarepa tímerecavahi ema Jesús. Titupihahi te vimuri. Téchajicahavivarepa.

—Ícharacava, nuchichanaveana —macahepa.

²⁷ Tásiha, máichuhapa ema Tomás:

—Yare, nuchicha —máichapa —. Pímaha eta nujarana te nuvahuana. Pímisiapa eta pivauquí eta te juca nuchene, apaesa pisuapanu.

²⁸ Tacahe, ema Tomás majicapapa:

—Tátachicha, piti yátupiquenévi Viya. Tétavicavahi eta nucasiñairavihi —máichapa.

²⁹ Ema Jesús majicapapa:

—Nuchichasami Tomás, pipaenumava pisuapanu eta pímainuipahi. Tétavicavasera náuricareva nácani tisuapajirahianahi vahi tácomesahini náimahanuhini —macahepa.

Nuvaraha esuapa eta juca libro nájurehi

³⁰ Jucarihichahavare eta apamuriana tiáramicareana máichaqueneanahi ema Jesús, eta vímahaqueneanahi viti máimitureana. Váipasera tamutuhini tacajuhini te juca libro.

³¹ Nuvarahasera ácaicutiara eta nájureanahi apaesa esuapahini ema Jesús eta émairaquenehi Cristo, Machichaquenehi ema Viya. Taicha te esuapapuca éma, máitavacacayare eta ítaresirayare.

21

Tíápechavavare tímercava ema Jesús nayehe ena siétequeneana máimitureana

¹⁻⁴ Tiuri, te táequenepa eta juca, viyanapa víti te Galilea, vicuchapayarehi ema Jesús. Ánaqui matiarhihi ema Pedro, ema Tomás, ema Natanael, ema nuparape Jacobo, nútupa nuti Juan. Natiarihivare ena apinanahi vichamuriana. Tacahe, ema Pedro máichahavipa:

—Nuyanayare nénipanayare te cáquiure —macahepa.

Tásiha, víti vijicapapa éma:

—Véhicaviyare víti apanava —víchapa.

Tacahe, te vítecapapa, viávacuhapa tayehe eta pacure. Vénicaipahi te jena yátiquenehi. Tájinasera vítucavahini. Te títárahichichayaréipa, vímahapa ema Jesús. Titupihapahi te tachausi. Váhisera vímativanehini.

⁵ Tásiha, téchajicahavipa:

—¿Ícharacava, nuchichanaveana? ¿Tájina ítucava eta jima? —macahepa.

Vijicapapa víti:

—Tájina vítucava —víchapa.

⁶ Tásiha, éma tivanecahavipa viáquiieca eta viyehe tarrafa te apachacaya eta pacure tinapaicahi te vaure.

—Eta ítusiavayare eta jima —máichahavipa.

Visuapahisera víti. Tásiha, te vichuruecapa eta viyehe tarrafa, vaipa víchinahini taicha táetaviuchahi eta camurirahi eta jima. Tijitacarenecha.

⁷ Tásiha, nútupa níchapa ema Pedro:

—¡Émara ema Viáquenu! —níchapa.

Masaminenurichuhi ema Pedro eta níchirahi, ticamuirihavanepa taicha tivejamuhiacavahi éma eta mamuiriha. Tépuhecavapa, mavarairahi macapayacavaneyarehi ema Viáquenu.

⁸ Víti apamuriana vipauchapa eta tachausi. Vichuruecapaipahi eta viyehe tarrafa; títicapaipahi eta camuriquene jima. Cien métrorichuhiserapuca eta viyerehirahi eta tachausi.

⁹ Te víucupaicapa te tachausi, vímaharinehi tatiarihahi eta yucu, étapa eta jima jitaruca, étapa eta pan.

¹⁰ Tásiha, ema Jesús máichahavipa:

—Íama eta íturevahi jima —máichahavipa.

¹¹ Ema Pedro machurupaicapa eta tarrafa. Vímaharinehi eta ichapemuriquene jima. Ciento cincuenta y tres eta tasimurivahi. Váhisera táetsayucahini eta viyehe tarrafa.

¹² Tásiha, títchuhahavipa ema Jesús:

—Yare, enica —macahepa.

Tásiha, viyanapa víti, vinicayarehi. Váhisera vipatsicavahini viyaserecchini te nájahahipuca éma taicha tétavicavahi eta viáramesirahi. Vímatiacahisera eta émairahi ema Viáquenu.

¹³ Tásiha, ema Jesús témeñahavapa. Mavehapa eta pan. Tíjaracahavipa. Étapa eta jima táimaqui quenepa, tíjaracahavivarepa.

¹⁴ Eta juca eta mapahequenepa eta máimeresiravahi ema Jesús eta viyehe eta máechepusirahi te máecari.

Ema Jesús mavaraha macaicutiara te yátupipuca máemunaca ema Pedro

¹⁵ Te vítanesipa eta vinisirahi, ema Jesús mayaserecapa ema Pedro. Ánipa máicha:

—Piti Pedro, nuvaraha nuyaserecavi: ¿Picachuricapuca píti ena nani apamuriana eta pémunasiranuhi? —máichapa.

Éma majicapapa:

—Némunacavi, Tata. Pécharichuhi píti jácani némunasiravihi —macahepa.

Éma Jesús máichavarepa:

—Tiuri, te yátuphipuca pémunacanu, nuvaraha pijaneasinanuvaca ena téhicanuanayare, taicha vahi náitucahini nacatiuchavahini. Téñamacareanahi —macahepa.

¹⁶ Te táequenepa, mápechavare mayasereca:

—Pedro, nuvaraha nuyaserecavi: ¿Yátupi eta pémunasiranuhi? —máichapa.

—Némunacavi, Tata. Pécharichuhi píti eta némunasiravihi —máichapa éma Pedro.

Éma Jesús máichavarepa:

—Tiuri, te yátupipuca pémunacanu, pijaneasinanuvaca ena téhicanuanahi —macahepa.

¹⁷ Te táequenevarepa, mapahequene mayasereca:

—Pedro, ¿yátupi eta pémunasiranuhi? —máichapa.

Émasera éma Pedro titsirihapa taicha mapaheripa eta mayaseresirahi. Majicapavarepa:

—Pécharichuhi, Tata, eta némunasiravihi —macahepa.

Tásiha, máichavarepa éma Jesús:

—Tiuri, te yátuphipuca pémunacanu, pijaneasinanuvacayare ena téhicanuanahi.

¹⁸ Nutupiruva numetacavi: Eta piámaperuvahi, píti péchinavahi eta pítare-sirahi. Picamuirihahi, piyanahivare te jácani pivarahaqueneanahi picaijuhe. Jácanisera añoanayare eta pichávicavaipa, apanainapa eta pítaresirayare. Apananainapa ena timuriachavianayare, taicha títijivauchavianayare, tásiha tiámavianainapa te jácani pimavarahaquenénihi picaijuhe —máichapa.

¹⁹ Eta juca máichirahi éma Jesús, mavarairahi máiminecapaequeneharyarehi eta máicharacavayarehi eta máepenirayare éma Pedro. Tétavica-vainapa eta macunachacareva éma Viya maicha éma Pedro, taicha vahi téquecavaimahi eta máimairahi eta macatajivairaya. Tásiha, máichavare éma Jesús:

—Piti Pedro, tacuija tahapapiricahini eta pítauchira tamutu eta nutuparasiravianahi —máichapa.

Eta táichecuine eta májurehi éma Juan, máemunaruquenehi éma Jesús

²⁰ Tásiha, téseniequenehavapa éma Pedro, tímahanupa eta néhiequenehairapahi nuti máemunarunuhi éma Jesús. (Nútirichu nuti nuyaserecavi te mesa te nájahahipuca éma tíjararecayarehi.)

²¹ Eta máimairanuhi éma Pedro, mayaserecapa éma Jesús tájahapuca eta nícharacavayarehi nuti apana. Ánipa macahe éma Pedro:

—Tata, ¿tájahapuca máicharacavayare éma apanava éma maca?

²² Éma Jesús majicapapa:

—Núti nécha. Te nuvarahapuca máitareca máimahayare eta nápechiravayare nuchavirayare, vahi tacuimipanerecavi. Pítisamisera, pítaucha tamutu eta nutuparasiraviana. Tacuija tahapapiricahini eta péhisiranuhi.

²³ Tacahe, ena nuchamuriana, ichaperinehi eta napanerequenehairahi eta numaepenirayarehi. Váhisera mametacahini eta numaepenirayarehi.

Tacarichu macahehi: “Te nuvarahapuca núti máitareca máimahayare eta nápechiravayare nuchavirayare, vahi tacuimipanererecavi” macahepa.

²⁴ Nuparapenaveana, núti yátupiquenenuhi eta máimiturenuirahi ema Jesús. Nutupiruvahi néchajisiha te juca nájurehi eta yátupiqueneana nímahaqueneanahi.

²⁵ Jucarihichaha eta apamuriana máichaqueneanahi ema Jesús. Váipasera támutuhini nájuequenéhahini, taicha tétavicavahi eta táichapemurivahi. Te vítametacapucaini tamutu eta máichaqueneanahi, váipapuca vicuratahahini vítuca, namutuhinéni ena achaneana te juca apaquehe tiájuequenerahiana.

Tamutupa eta juca nájurehi.

Ena San Lucas májuequenehahi eta náichararacavahi ena Apóstoleana eta náehisirahi ena Jesucristo, ticajare LOS HECHOS

¹ Piti Teófilo, títecapáuchaviripa eta táinapure nájure tayehe eta máichavaquenévhahi ena Jesucristo te títecapapa te juca apaquehe. Nájuchahi tamutu eta máichaqueneanahi, étapa eta máimiturapianahi.

² Nararihihi ena manerejiruana apóstoleana. Émaripa ena Espíritu Santo máimicatacahi eta matúparasíravacahi éna. Nájuchavarepa eta mayapirahi te anuma. Puiti nímiamarecavare eta piyehe eta juca nájure, apaesa pímati tamutu eta téchacareana tayehe eta máichavaquenévhahi ena Jesús.

³ Te táequenepa eta máepenirahi, téchepucapa te máecari, tíapechavavare títareca. Tásiha, cuarentaquenehi sache eta macáchanéravacaríhaha ena máimitureana. Máimerecahi íchape eta machavirahi títareca. Máimitucavacahi éna, eta táichararacavayare eta náehisirayare ena Viya ena achaneana te tamutu avasareana.

Ena Jesucristo mametaca eta máucupaisirayare ena Espíritu Santo

⁴ Te jena sache, macáchanévacaríhaha ena apóstoleana, mametacavacapa. Ánipa maicha:

—Vahi ecújúnijica eta juca viávasa Jerusalén. Ecuchapayare eta táitauchiravayare eta máijjararuvahi ena Vicaiyaquene. Étaripa eta juca numetara-pianahi.

⁵ Échavarichu ena Juan, máicachasicavacahi te une ena achaneana. Étisera, puiti juca sácheanayare, tíucupaicayare ena Espíritu Santo. Ena tícachasicaheyare, tíavahácahénapa —macahepa ena Jesús.

Ena mayapira ena Jesús te anuma

⁶ Tacahe, nayaserecapa ena tíurujiácanahi ena Jesús. Ánipa naicha:

—Tata Viáquenu, ¿puítinaríchu píjaracahavi viti israelítana eta vítináini vigóvernachacáca te juca viávasa? —nacahepa.

⁷ Ena Jesús majicapapa, ánipa maicha:

—Vuíchaha táechacare. Vahi tatuparaca étinahíni echa tájahapuca sáchevayare, tájahapuca cájevayare títauchavaya. Taicha tayumururevahi eta juca maicha ena Tata Vicaiyaquene. Macarichu éma máituréqueneha eta juca.

⁸ Jucarihisera eta ítucaquenyare. Ena Tata tíjaracaheyare ena Espíritu Santo, tíavahácaheyare tímicatacaheyare. Tacahe, échajisianuínapa nútí. Tamutuyare avasareana eta epaisiha, te Jerusalén, te Judea, te Samaria, étapa te jácani tayerehiqueneana avasareana tayehe te juca apaquehe —máichapa ena Jesús.

⁹ Tacahe, te títavapa eta máechajirísiravahi, tiyanapa tiyapa te anuma. Tacahe, ena máimitureana náimararaequenehaipa eta mayanirahi. Táepacuchirahi eta úcaji. Vaipa macaecherahini te anuquehe.

¹⁰ Eta mayanirahi ena Jesús te anuma, náimararacáichaha ena máimitureana. Tacahe, tíaramicareanapa tímerecavana ena apinana ángeleana. Tijapumuirihavaca.

¹¹ Tacahe, náichapa ena ángeleana:

—¿Tájaha íchahi ímararacahi eta anuma, eti máimitureana ema Jesús? Puiti enecapararecahi ema Jesús eta majunijisirahepa, mayanirapa te anuma. Vimetacahe: Te jácani sáchezare, ema Jesús tichavayare te juca apaquehe. Tiúcupaicayare tacutiyaereichu eta mayanirahi —náichavacapa ena ángeleana.

Nanerejicapa ema Matías, máitsivayarehi ema Júlasí

¹² Tiuri, eta návihairahi te anuquehe masihi ticaijare Olivoquiji. Tachacayahi eta Jerusalén, apina kilómetro eta tayerehivahi. Tiyananapa tichavana tayehe eta avasare.

¹³ Te títecapanapa te avasare, tisiapanapa te peti apina piso, eta náitecapihahi. Tiápananapa te téqueneha piso. Natiarihíhi ema Pedro, ema Jacobo, ema Juan, ema Andrés, ema Felipe, ema Tomás, ema Bartolomé*, ema Mateo, ema apana Jacobo, ema Simón, émapa ema Judas.

¹⁴ Natiarihivare ena maparapenaveana ema Jesús, ésupa esu maena María, énapa ena apamuriana esenana. Tamutu sácheana, ena nani tíurujicavanahi eta nayujarasirahi.

¹⁵ Tacahe, te jena sácheana, ena náurujiruvanahi náetavicahi ciento veinte eta nasimutuva ena máimitureana ema Jesús. Tacahe, téchepucapa ema Pedro te namuri, titupihapa. Máichapa:

¹⁶ —Nuparapenaveana, ema víyahaini David macaimitucasiquenehi mayehe ema Espíritu Santo, ánaquiríchaha eta áñoana eta matiaríhiraya ema Júlasí, ema tínapumiráuchaya ena suntaruana nacaratacaya ema Jesús. Títauchavapa eta mametarapihi ema Espíritu Santo.

¹⁷ Taicha ema Júlasí, émainichuhi vichamurini tayehe eta juca vématanerepihi —macahepa ema Pedro.

¹⁸ (Émasera ema Júlasí ticapacavahi tichumucavapa. Tiáquipaicavahiséra eta máquehe. Tiúchumuriapa eta maturupiana. Te táequenepa, navehapa eta mavachainíhi eta máijararesirahi ema Jesús. Navacharecapa eta apaquehe.

¹⁹ Te náechapa ena ticavasana te Jerusalén, nanacapa eta táijarehi Acéldama. Eta ticaijarehi puiti “Apaquehe máitinevacha ema Jesús”.)

²⁰ Tímiyanava eta máechajisirahi ema Pedro, ánipa maicha:

—Ema víyahaini David májucunachahi eta mametarapiana ema Espíritu Santo eta te Salmo. Áni macahehi: “Machu nacuija nacusiapa eta mapena majunijiruipa nácani macutipanereruana eta mavainarajiva”. Ánivarepa macahe: “Tatuparacahi masiapaya ema apana achane máitsivaya te mávacu-réníhi” macahepaji ema Espíritu Santo.

²¹⁻²² Tacahe, tituparacahavi vinerejicayare ema apana, máitsivaina ema Júlasí, apaesa vahí macuejiacava te vimuri viti dócequeneana. Máimicatacahavi eta véchajisiha eta máechepusirahi ema Jesús. Nararihi ani te vitaracu ena vichamurianahi te juca áñoana te matiaríhichaha ema Jesús te vimuri. Ena ticachanehavianahi te ticaicachasinapa ema Jesús me Juan. Vahí najunijicahavíhini. Natiarihiquenehi te tiyapapa ema Jesús te anuma —macahepa ema Pedro.

* **1:13** Ema Bartolomé ticaijarehivare Natanael. Ema apana Jacobo, machichahi ema Alfeo (váipasera véchapirica eta máitaresira ema Alfeo). Ema Simón, nachamurinihi ena revolucionario ticaijareana “cananístana”. Ena nani cananístana nacanarajiricahi ena apavasanana romanoana, navarairahi náquijica, nacuchucayare te návasa Judea. Ema maca Judas, matiaríhi ema maparape ticaijarehivare Jacobo, váhisera nachamuriníhini ena apóstoleana. Ema maca Judas, mapanahi eta máijare: eta Tadeo étapa eta Labeo, étapa eta Judas. (Te pivaraha pecha, pitanuca te libro Marcos 3.18 étapa te Mateo 10.3.)

²³ Tacahe, ticanerejianapa ena apinana: ema ticaijare Matías, émapa ema apana ticaijare José Barsabás (énerichuvare náimijarechahi Justo).

²⁴⁻²⁵ Tacahe, tiyujaracanapa, ánipa nacahe:

—Tata Viáquenu, piti pímati eta visamureana vimutu. Pímechahavi nájahapuca ema tiuri nayehe ena nani apinava vinerejiruanahi máitsivayare ema máemitiaruhi apóstoleni Júlasí, táimicuñaruhi eta mapecatura —nacahepa.

²⁶ Tacahe, nasuertehachapa ena apinana. Tatocachapa ema Matías. Tásiha, natuparacapa eta mávacureyare nachamurirayarehi ena apamuriana apóstoleana.

2

Eta máucupaisirahi ema Espíritu Santo

¹ Tiuri, títecapapa eta sache napiestara ena israelítana ticaijarehi Pentecostés. Tiúrujicavanahi ena apóstoleana énapa ena apamuriana nasimutuvaqueneana máimitureana ema Jesús.

² Tacahe, tiáramicarepa eta ticaema te anuquehe tísiha te anuma ticuti-pahi eta muraca técatícava. Ticaemapa muraca te táinahu eta peti návihahi éna.

³ Tacahe, tiáramicarepa tímerecava eta tacuti eta tanene eta yucu. Tijarahivacapa te nápusiana namutu ena nárujiruvanahi.

⁴ Tacahe, ena mávahácavacaripa ema Espíritu Santo. Tiáramicareanapa apéchajiriruvavacapa taicha eta mávahásiravacáipahi ema Espíritu Santo.

⁵ Te jena sache, natiarihivare ena camuriqueneana israelítana te Jerusalén tísihana te tamútuyaréini avasareana. Tipicaurahianahi tayehe eta nayehe religión.

⁶ Te nasamapa eta tacaemairahi te anuquehe, ticurujicacanapa ena achaneana. Náraminehi ichape táichavenehi eta nasamirahi ena apéchajiriruvavacarípahi.

⁷ Ichaperinehi nárami. Tacahe, náichacacapa:

—¿Tájaha tacayema eta juca? Ena nani, váhira vichamurianaina tayehe eta avasare viávihahi. Ticavasana te Galilea ena nani.

⁸ Tásihasera, náituchavare eta véchajiriruvapachu vímiuchurehi víti. ¿Tájahapapuca tacayema eta juca?

⁹ Camuriana eta véchajiriruvana taicha viti viásihahajiruanahi te apanapanejiana avasareana. Nararihi ena tísihana te Partia, te Media, te Elam, te Mesopotamia, te Judea, te Capadocia, te Ponto, te Asia, te Frigia, te Panfilia, te Egipto.

¹⁰ Nararihivare ena tísihana te Cirene te Libia. Nararihivare ena tísihana te Roma, ena yátupiqueneana israelítana énapa ena tépiyacavanaripa israelítana.

¹¹ Nararihivare ena tísihana te Creta etapa te Arabia. Vimutusera visama eta véchajiriruvapachu. ¿Tájahapuca tacayema? Ena nani téchajicanahi timetacahavianahi eta táuricacarequeneana tásihaqueneanayare me Viya. Vicaicutiarahi tamutu taicha téchajicanahi te véchajiriruvapachu —nacahepa.

¹² Namutu napanerequenehahi. Vaipa náimatihini tájahapuca tacayema. Tiyaserejiricacanavarepa:

—¿Tájahapuca tacayema eta juca? —nacahepa.

¹³ Natiarihiserá ena apamuriana nacaecahirichucha, ánipa nacahe:

—Nacavaqueneana ena nani —nacahepa.

Ena Pedro máechajicapa ena achaneana

¹⁴ Tacahe, titupihapa ema Pedro te namirahu ena achaneana. Natiari-hihivare ena óncequeneana apóstoleana. Téchajicapa muraca ema Pedro eta máechajisirahi, ánipa macahe:

—Tátanaveana nujaneanana, emutu eti ecavasana te juca Jerusalén, ecata-jicanu esamanuchaha. Ácacutiaraquenéna eta juca nucayemayare.

¹⁵ Eti ímijachahi vicavaqueneana. Vahi vicavaqueneana. Tapaenumava las nuéverava yáticarahi. Écharichuhi éti vahi vítuca vera viti israelítana te yáticarahi.

¹⁶ Eta juca ímahaquenehi íaramiquenehi puiti, eta tacaheyarehi taicha mametarapihi ema Viya mayehe ema víyahaini profeta Joel. Tásiha, ema Joel májucunachapa eta mametarapihi ema Viya, ánipa tacahe:

¹⁷ “Jararihiya eta sácheanaya níjaracayare ema Espíritu Santo nayehe namutu ena achaneana. Tásiha, ena echichanaveana, ajairana énapa ena esenana, nacametairuinapa eta néchajiriruva. Ena amaperuana, níjaracayare eta náechirayare eta táicharacavayare. Ena ichavicachichana ticametacasia-nayare te navapure.

¹⁸ Taicha nuvanecayare ema Espíritu Santo, níjaracayare mávahácavaca namutu ena nuchanerana. Tasiha, nacametairuinapa eta néchajiriruva tásihaquenehi nuyehe.

¹⁹ Te juca anuma nímeracayare eta tiáramicareana. Te juca apaquehe nucuchucayare eta ecutiarareanaya, apaesa ímatinu nuti nucarichu nura-taha nicha tamutu. Nucamiricaya eta ecuñaraqui. Tépusaicavayare eta náitine ena achaneana váinarajiqueneanahi. Nucamiricayare te avasareana eta yucu étapa eta ichape quijare.

²⁰ Eta sache, nucaemahayare eta tajaraiva. Énerichuvare nítivachayare eta táimahi eta caje. Ítimeyare nícha. Tásiha, útecapainapa eta nusacherayare nuchaviraya nuti Iáquenu. Te jena sácheyare, ichape eta napisirainapa ena achaneana taicha nícuñacavacainapa namutu ena ticapecaturarahia-naichaha.

²¹ Étiserá eti ecasiñanuhi échajicanuhi eta te níjare nuti Iáquenu, nucuchucu-haheyare” macahepa ema Viya.

²² Tiuri puiti, nuparapenaveana nujaneanana, esamavare eta juca apana numetaruheyare. Ímatihí ema Jesús Nazareno. Ema maca ajaira, mavaneruhi ema Viya. Écharichuhi éti eta tiáramicareanahi máichaqueneanahi ema Jesús. Ema Viya máijaracahi eta máitupajijíásiravayare, mavarairahi máimerecayarehi te emirahu eta émairahi mavaneru ema Viya.

²³ Tiyerehichahahi eta juca, ema Viya mapanerecharipahi eta máicharacavayarehi ema Machicha. Eta tacahe, máisapahi eta íjararesirahi ema Machicha nayehe ena váinarajiqueneana achaneana. Éma, émetataruhi te crusu. Éma, ímicaparuhi.

²⁴ Émasera ema Viya macaechepucahi ema Machicha. Macaitarecahi tayehe eta máepenirahi, taicha vahi mávarahahini mánasihini máepenahini.

²⁵ Ema víyahaini rey David timetacahavihi eta te Salmo eta máechajiriruva ema Jesús. Ánipa macahe: “Tata, piti pímararacanuhi eta picáchanéranuhi. Piti pijaneacanuhi te nuchacaya. Péturechanuhi tamutu sácheana.

²⁶⁻²⁷ Tacahe, núrismure ichape. Nuvarahavare nujirauchaviyare néchajisihaviyare. Núti, te népenapa, tájina néñamavaimahi, taicha nucasiñavahi

piyehe eta pímuchavirayarehi piáchanechanu. Vahi písapaimahi témitiequeneha eta náquehe nuti pichicha pémunaruquenehi.

28 Piti píjaracanuhi eta picaechepusiranuyarehi te nécari, nápechiravayarehi nítareca. Tásiha, nuvapinavayare eta nutiarahirayare te pimirahu” tacahepa eta Salmo.

29 Nuparapenaveana, véchahi vimutu eta máepenirahi macaecarasirahi ema viáhucaini David, taicha vímaharichaha puiti eta máecari.

30 Ema víyarahaini David, yátupiquenehi profeta. Macuchapahi eta tátauchiravayare eta mametacasiyahi me Viya, eta matiarahirayarehi ema émana mámariequeneyarehi ema ticaijareyarehi Cristo ema téjacayarehi te trono. Máitsivayarehi ema máhucaini.

31 Ema Viya máimechahi ema David eta máicharacavayarehi ema Cristo máechepusirayarehi te máecari. Tacahe, ema David májucunacharipa eta vahi tánasimahi tépena eta máchaneva ema Cristo; váhivare témitiequenehaimahi eta máquehe.

32 Puíticha, ema Viya macaechepucahi ema maca Jesús. Tásiha, viti véchajisihahi eta juca taicha vímahaquenehi eta mápechiravahi títareca.

33 Tacahe, ema Maiya macayapapa te anuma ema Machicha, macaejacaripa te mavaure. Tacahe, máijaracaripa ema Espíritu Santo ema máitsivayarehi taicha ema matuparaharichuhi. Tacahe, ema Jesús máevatacapa ema Espíritu Santo eta viyehe. Étara eta juca ímahaquenehi puiti, esamaquenehi eta máucupaisirahi ema Espíritu Santo.

34-35 Vahi ecuimijachahini émainahini ema David mápanahini te anuma. Émahisera téchajisihahi eta matiarahirayarehi ema apana tiápanayarehi te anuma. Ánipa macahehi: “Ema Viya máíchapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi, máichapaji ema Viya”. Étara eta juca macayemaquenehi ema víyarahaini David.

36 Tiuri puiti, emutu eti nujaneanana israelítana, nuvaraha ímatiyare ema Jesús émetataruhi, émara ema Viáquenu, émairahivare ema Cristo, maicha ema Viya —macahepa ema Pedro eta máechajiriruvahi.

37 Tacahe, eta nasamirahi eta juca ema achaneana, ichaperinehi eta náéñamiravahi te nasamureana. Tásiha, nayaserecapa ema Pedro énapa ena apamuriana apóstoleana, ánipa nacahe:

—Viparapenaveana, ¿tájahapuca vícharacavaini víti? —nacahepa.

38 Tacahe, ema Pedro majicapapa:

—Ítsivacha eta juca ítaresiraina te mamirahu ema Viya. Eta íjarasiravaya mayehe ema Jesucristo, ecaicachasiya emutu éti. Tásiha, ema Viya macaepahainapa eta epecaturana. Tijaracahénavarepa ema Espíritu Santo.

39 Taicha ema Viya mavarahahi tíjaracaheyare ema Espíritu Santo emutu éti énapa ena echichanaveana énapa ena apavasanana, namutupa nácani manerajiruanahi máichuhaqueneanahi ema Viya, tayanapane ticavasanahi te tiyerehiqueneana avasareana —macahepa ema Pedro.

40 Tacahehi eta juca máechajiriruvanahi ema Pedro. Ichape eta maconsejahiravacahi, ánivarepa máichahi:

—Ácajuhe ema Jesús. Ínajica eta eváinarajivana. Érajicava nayehe ena tíchana eta tamauriqueneana —macahepa.

⁴¹ Tacahe, natiarihi ena tisuapanahi eta máechajiriruvahi. Enevanepa ticaicachasiana éna. Mapanaqueneana mil ena tisuapajirahianahivare.

Eta náitaresirahi ena náinapureana téhicanahi ema Cristo

⁴² Ena achaneana, eta nasamararasirahi eta náimiturapiana ena apóstoleana, ichaperinehi nasuapa. Tásiha, tiúririnehi eta náitaresirana. Náemunacaine ena nachamuriana. Tamutu sácheana ticurujicacanahi eta nayujarasirayarehi étapa eta nanisirayarehi eta pan táicutiarahi eta máepenirahi ema Viáquenu.

⁴³ Ichape eta náramirahi ena achaneana, taicha náimaharipa eta tiáramicareana náichaqueneana ena apóstoleana, máimicatasiravacahi ema Viya.

⁴⁴ Namutu ena tisuapajirahiana tiúrujicavanaparácahi ticajicacanahi eta náimahaqueneana.

⁴⁵ Te náimaha ema mácani nachamuri ticamunuvahi, náijarareca eta náimahaqueneana. Tásiha, náijaracapa eta plata ema ticamunuvahi, náimicasasihayare.

⁴⁶ Tamutu sácheana tiúrujicavanahi eta te Templo. Tásiha, te napenana tíchuhacacanahi ténicacanahi. Ticachanecacananahivare eta nanisirahi eta pan táicutiarahi eta máepenirahi ema Viáquenu. Náurisamurevahi, táurivaipahi te nasamureana.

⁴⁷ Najiraucha nacunachahi ema Viya. Tacahe, namutu ena apamuriana achaneana napicauchahi éna. Tásiha, tamutu sácheana ema Viya máichuhavacahi ena apamuriana tisuapanavare.

3

Eta manarasirahi ema achane masarini

¹ Tiuri, étana sache, te las trespa cáperehi, ema Pedro émapa ema Juan tisananapa tisiapanayarehi eta te Templo. Te jena hora, las trésqunenepa sache, hora eta nayujarasira ena israelítana.

² Matiarahi ema achane masari. Máimiuchurehi eta mamásariva. Tamutu sácheana nanapana eta te Templo. Nanaquica eta te ichapepana tapaja ticaijare Tiúrinapana, mayaseseresihayarehi eta limosna nayehe nácani achaneana tisiapanapahi.

³ Tacahe, ema masari, te máimahavacapa tisiapanayarehi ema Pedro ema Juan, mayaseacavacapa eta limosna.

⁴ Tacahe éna, náesenicapa ema masari. Tasiha, máichapa ema Pedro:
—Pímararacahavi.

⁵ Tacahe, máimararacaripahi. Máimijachaipa náijaracayarehi eta plata.

⁶ Tásiha, ema Pedro máichapa:

—Tájina nuviya eta plata níjaracavihini. Jucarihisera eta juca nucatajicaviyare. Nucanaracaviyare. Táichavene eta máitupajijiásirava ema Jesucristo ema Nazareno, nuvanecavi: Péchepuca, pipaica —máichapa.

⁷ Tacahe, ema Pedro machuruvauchavanepa te mavahu vaure, macaechepucapa. Énevanerínehi túmevaca eta mapaiqueana eta mayucarana.

⁸ Tacahe, ema masarini tíjahúchavapa titupiha, tipaicapa. Tacahe, tisiapanapa te Templo máehicavacapaipa éna. Máeteresinapaipa eta mapaisirapahi. Macunachapaipa ema Viya, mahasulupayachavare eta macanarasirahi.

⁹ Namutu ena achaneana náimararacahi eta mapaisiraipahi, macunacharinehi ema Viya.

10 Te náimatipa ena achaneana ema masarini, ichaperinehi eta náramirahi. Ánipa nacahehi:

—Ánaquiaparipa eta mayaseseresirahi eta limosna ema maca, máejasiraparaca te tapaja ticajare Tiúrinapana taicha eta mamasarivahi. Puitisera tipaicapa, tétérecavarepa. ¿Tájahapuca máicharacavahi eta manarasirahi? — nacahepa.

Ticametarairu ema Pedro te Templo

11 Tacahe, ema masarini vaipa máinajiacavacahini ema Pedro ema Juan. Tacahe, náurujiacapa namutu ena achaneana te návihahi ena apóstoleana te tajuhe eta Templo, te tayehe eta alar máepiyaruihí ema reyni Salomón.

12 Tacahe, eta máimairahi ema Pedro ena achaneana náramirahi eta juca, máichavacapa:

—Tátanaveana, nujaneanana israelítana. Íaramihí éti eta juca víchirahi víti. Ímijachapa vítijivahi vicanaraca ema maca achane masarini. Ímijachapapuca víti vítupajijiacavahi táichavene eta víjarasiravahi mayehe ema Viya. Eta juca ánira tacahehi, vahi vítina vicanaracahini ema maca. Ema ticanaracahi, émaquenehi ema Jesús Nazareno,

13 taicha ema Viya* tjaracahi eta tamutuirayare marataha ema Machicha Jesús. Émara ema maca Jesús ema épuruquenehi éti, íjarareruhi mayehe ema aquenuca apavasajuecu Pilato.

14 Éma, mavarahahineni macaitica ema Jesús, étisera vahi ávarahahini máuchucuhahini ema máuriquenénihi yátupiquenehi santo. Masapihapa eyaseserecachi máuchucuha ema ticapahi.

15 Tásiha, émapa ímicapacahi ema Ticaitarecavahi. Émasera ema Viya macaechepucahi te máecari. Véchajisihahi víti éma taicha vímahaquenehi eta mápechiravahi títareca.

16 Puiti, ímararacahi eta manarasirahi ema maca masarini. Eta juca eta tímicaecherachahi eta machavirahi títareca ema Jesús. Taicha émahí ema tjaracavahi eta vítupajijiasiravahi eta vicanarasirahi ema maca achane, táichavenehi eta vicasíñairahi éma.

17 Tiuri puiti, nuparapenaveana, éti ímicapacahi ema Jesús taicha vahi ímatihini eta émarahi ema Cristo ema vicuchapaquenehi. Énaripa ena tuparairucana eyehe, váhivare náimatihini éma.

18 Étasera tacaheyarehi eta juca taicha máechajiriruvaichuhi ema Viya nametacasivahi ena profetana eta macatajivairayarehi ema Cristo.

19 Tásiha puiti, éneuchavainapa ecáijuhénapa ema Viya, apaesa macaepaha éma tamutu eta epecaturana. Énerichuvare ema Viya técasarechaheyarepa éti.

20 Ene ecahehi etsecava ejacapayare ema Jesucristo te machavapa. Éma, íaquenyare taicha manerejiruhi ema Viya te tépanavainapa tamutu.

21 Ema maca Jesucristo puiti téjacahi te anuma. Jararihiyaresera eta sache eta machavirayare, máetupiricayareva tamutu. Ánaquiaparipa, eta juca mametarapihi ema Viya nayehe ena mayeheana santo profetanaini eta náimitusirayare ena achaneana.

* 3:13 Ema Pedro téhacajahi te náechajiriruva ena israelítana, máimijarechirahi ema Viya: “ema nacasiñaquehehi ena víachucanaveanaini ema Abraham, ema Isaac, ema Jacob, énapa ena apamurianaini víachucanaveanaini”.

²² Ema émana víyahaini profeta ema Moisés, mametacahi ena viáchucanaveanaini, ani macahehi: “Ema Viya Dios tivanecanuhi núti numetacaheyare eta máechajiriruva. Títecayare ema apanayare profeta mavaneruyareva ema Viya, tacutiyare eta mavanesisiranuhi núti. Éma, tiúchucayare te namuri ena viámariéqueneana. Tatuparaca nasuapayare tamutu eta mavanairipianayare.

²³ Taicha ema Viya máimicapacayare namutu ena masuápajirárahánayare mayehe ema profeta máiteruyarehi, taicha mamavarahahi nacasiapahini ena machanerana” macahepa ema Moisés.

²⁴ Namutu ena apamuriana profetana, émaripa ema Samuél énapa ena náequenereruana profetana, náechajisihahi eta juca vímahaqueneanahi puiti juca sácheana.

²⁵ Ánaquiaparichaha, te vuíchaha máuchucahini ema víyahaini Moisés, ema Viya mametacaipa ema viáchucaini Abraham, ánipa macahe: “Nunerejicayare ema émana piámariéquene tiúchucayare. Éma, tíjaracaya eta táurivaya eta náitaresiraya namutu ena achaneana apánapanenéjiqueneána te juca apaquehe” macahepa ema Viya. Tiápechava mametacaipa étarichuhi máechajiriruvana mayehe ema machichaini Isaac, énapa ena mámarinaveánaini. Puiti títauchavaripa eta juca máechajiriruvaichuhi ema Viya. Tásiha puiti, éti tituparacahehi ínapucayare ejacapa eta máijjararuehya ema Cristo, taicha étirichuhi israelítahehi. Ímatihivare eta apamuriana máechajiriruvana ema Viya, nájuchaqueneana ena víyahanaini profetana.

²⁶ Tásiha, eta macaechepusirahi ema Viya ema Machicha Jesús, tivanecahavipa vimetacahe éti. Te ecasiñavapuca eta mayehe, máquijisinaheyare eta evainarajivana. Tijaracahenapa eta iúricacarevayare —macahepa ema Pedro.

4

Ema Pedro émapa ema Juan námaqueneanahi te namirahu ena tuparairucana

¹ Téchajicanarichaha ema Pedro ema Juan te namirahu ena achaneana, títecapanapa ena tuparairucana, énapa ena tímiturecarahiana tciajareana saducéoana. Námapahivare ema náquenuruha ena tasuntarurana eta Templo.

² Tisemanapa taicha vahi náuricahini eta nasamairirisirahi ena apinana apóstoleana náimitusirahi ena achaneana. Vahi náuricahini eta nametasirahi eta yátupiquerahi eta máechepusirahi ema Jesús te máecari, mápechiravahi títareca.

³ Tacahe, nacaratacavacapa, náimisiapavacapa te cárcel. Váipasera nacayaserehíhíni, taicha cáperehíhícharínehi. Tiámainucavapa te apanapa sache, nacuchucavacaya ticayaserehíhanayarehi.

⁴ Camurianasera ena tisuapanahi táichavenehi eta nasamararasirahi eta náechajiriruvahi ena apóstoleana. Eta natupahi ena téhicanaripa ema Viáquenu Jesucristo cinco mil ena achaneana ajairana. Camurianavare ena esenana énapa ena amaperuana.

⁵⁻⁶ Te apanaquenepa sache, ema corregidor Caifás ticurujicapa ena apamuriana aquenucarahana tayehe eta ichapequene cabildo te Jerusalén. Natiarihíhivare ena escribánoana. Mاتيarihíhivare ema Anás ena pasado corregidorhi, énapa ena machichanaveana: ema tciajarehivare Juan émapa Alejandro. Natiarihíhivare ena apamuriana machichanaveana.

⁷ Tacahe, náemepanapa ema Pedro ema Juan te cárcel. Nacatupiacapa te namirahu, nayaseserecapa. Ánipa naicha:

—Éti, vahi vituparacahehine eta ímitusirahi eta juca. ¿Nájaha tivanecahehi icha eta juca? ¿Nájaha ema tíjaracahehi eta ítupajijiasiravahi? —nacahepa.

⁸ Tacahe, ema Espíritu Santo máimicatacahi ema Pedro eta majicapirahi ena tiyaserecanahi, ánipa macahe:

—Tátanaveana juéseana, tátanaveana víyacárana te juca viávasa.

⁹ Evaraha echa eta juca táuriqueneana táicharacavahi eta vicanarasirahi ema maca achane macajumaquenenihi.

¹⁰ Vimetacaheyare puiti. Vivaraha vémechaheyare, eti énapa namutu ena achaneana te juca viávasa Israel. Ema maca achane, ímahaquenehi eta manarasirahi. Vivaraha vímimatichahe eta máitupajijiasirava ema Jesucristo ema Nazareno tacanaracahi eta vipiarasirahi te máijare. Éma, émetatáruhi te crusu, ecaparuhi. Émasera ema Viya macaechepucahi te máecari.

¹¹ Éti, épuruhi ema Jesús, ema manerejiruquenehi ema Viya. Puiti, ecutipa ena máitucarahana tépiyarecana peti, te náepurupuca eta tatumequene esuíqui táesuquirayarehine eta peti.

¹² Macarichu ema Jesucristo eta marataha eta macatiuchirahaviya macuchucuirahaviyarehi. Taicha ema Viya manerejiruhichuhi ema Jesús eta macuchucuirahaviyare. Nájina apanaina manerejiruinihi te vimuri viti achaneana eta te juca apaquehe —macahepa ema Pedro.

¹³ Tacahe, ena tuparairucana náraminehi eta náitusirahi téchajicana ema Pedro ema Juan. Náichacacapa:

—¿Tájina vahi napicacaracavahine eta viyehé! Ena nani tájina náitucaque néna eta letra. Máiturereanahi. Tájina náimatiyahine eta viyehé escuela. ¿Máijaracavacahipuca ema Jesús eta náitupajijiasiravahi te macachaneva-caichaha ema? —náichacacapa.

¹⁴ Tájina naviyahine nacayema taicha matiarahi ema achane masarini, titupihahi te namirahu. Taicha náimahahi eta yátupirahi eta manarasirahi.

¹⁵ Tacahe, navanecapa eta nacuchusiraya ena apóstoleana eta te náuruji-siavahi. Nanasipa ena aquenucana téchajiricavanaripa.

¹⁶ Ánipa nacahe:

—¿Tájaha vícharacavayare nayehe ena nani? Taicha namutu ena achaneana ticavasanahi te juca Jerusalén náechahi eta náichirahi ena nani eta tíaramicare. Tásiha, vahi vísuapacaremahi te vépiyaequenehavacapuca.

¹⁷ Váhisera távaraha vísapa náimiyanova náimitureca nayehe ena achaneana. Vípararecavacaya apaesa vahi nacuimiyanova náechajisiha eta máechepusirahipuca ema mácanínavaji Jesús —nacahepa.

¹⁸ Tacahe, nacasiapavarepa ema Pedro ema Juan. Navanecapa éna, ánipa naicha:

—Vahi vivaraha ímianava échajisiha eta juca, váhivare ecuimitureca nayehe ena achaneana eta máechepusirahipuca ema Jesús —náichapa.

¹⁹ Najicapapasera ema Pedro ema Juan, ánipa naicha:

—Esamahavichaha. Ema Viya timetacahavi eta véchajisiháirayare. Étisera ecaticapa véchajisiha éma. Émaquenehisera tisuapacarepanahi eyehe éti. Epanerecha yátupina.

²⁰ Vítí, vahi vimatinaimahi eta véchajisiháiraya tamutu eta juca vímahaqueneanahi visamaqueneanahivare mayehe ema Jesucristo —nacahepa.

²¹ Tacahe, ena tupaairucana eta nasamirahi eta namasuapirahi, tisem-anapa. Tacahe, náipicararecapa. Tájinasasera náicharachahini. Nacaiticapa taicha tájina naviurevainahini jácani táimicuñacahini. Taicha namutuhi ena achaneana nacunachahi ema Viya táichavenehi eta náimahaquenehi.

²² Cuarenta áñoripa eta mahañora ema maca achane masarini. Tétavica-vahi eta tiáramicarevahi eta manarasirahi maicha ema Vi ya.

Ena téhicana ema Jesús tiyaseserecana eta natumesamurevaina

²³ Eta náuchucuiraripa ema Pedro émapa ema Juan, tiyananapa eta te návihahi ena nachamuriana. Nametacapa tamutu eta nacatianasirahi ena tupaairucana.

²⁴ Te náechapa, ena nachamuriana tiyujaracanapa namutu. Ánipa nacahe eta nayujarasirahi:

—Tata Viáquenu, píti pépiyacahi eta anuma, eta apaquehe étapa eta ichapequene une mar. Pétupiricahi tamutu eta juca vímahaqueneanahi puiti.

²⁵ Píti pimetacahi ema víyahahini David pivanarainihi eta májucunachiraya eta te Salmo. Aní tacahehi eta májurehi: “Tatiarihiya eta avasareana, ena achaneana navarahaya nacanara ema Viya. Énaparichu ena nujaneanana, énerichuvare napanerechaya nacanara ema Viya. Máetupicushiana éna.

²⁶ Ena réyeana te juca apaquehe tísecavanayare eta nacanarairayare. Énaripa ena aquenucarahana nacapanereruya nacanaraya ema Viya, nacanarayareva ema Cristo manerejiruhi éma” tacahehi eta májurehi ema David.

²⁷ Étaripa te juca viávasa, ticuticacahi eta napanerechirahi ema Herodes Antipas, ema Poncio Pilato, ena apavasanana, énapa ena vijaneanana israelítana, navairahi nacapaca ema sántoque ne pichicha Jesús, ema pinerejuruquenehi.

²⁸ Títauchavahi naicha eta juca pipanereruana étairayarehi tacaheyarehi eta péchajiriruvana.

²⁹ Pítisera, Tata Viáquenu, pímararachavihi puiti eta náichirahavihi viti pivanaranahi. Píjaracahavisera vitumesamurevaina eta véchajisihairaya eta péchajiriruva.

³⁰ Píjaracahavi eta vítupajijiásiravaina viratahairaina vicanaraca ena nacajumaqueneana, vímeresiraina eta tiáramicareana táichavenehi eta vicasinairahi ema sántoque nehi pichicha Jesús —nacahepa.

³¹ Te titapiricanapa eta nayujarasirahi, tíjahúchavapa tiyayacare eta apaquehe návihahi éna. Tacahehi eta mávahásiravúchahivare namutu ema Espíritu Santo. Váipasare napicacaracavahini eta náechajisirahi eta máechajiriruva ema Viya.

Ticajicacacahi tamutu eta náimahaqueneana

³² Namutu ena nasimutuvaqueneana tisuapajirahianahi, ticuticacahi eta napanereruana eta nacajicacairahi. Namutu nácani téchanahi eta náimahaqueneana nacayehequeneanahi, vahi nayavanihacacahini. Tatupiruvahi te nasamureana eta nacajirahi.

³³ Tacahe, tímyanavanahi ena apóstoleana eta náechajisihairahi eta máechepusirahi ena Viáquenu Jesucristo. Tisuapacarepaicha eta náimiturapianahi. Máimicatavacahivare ema Viya ena téhicanapahi ema Jesús. Namutu éna, típicauchacareanahivare ne achaneana.

³⁴ Nájina émanáinahíni te nataracu máemepaurechavahíni. Taicha ena ticayeheana apaquehe, pétipuca, náijararecapaipa.

³⁵ Tásiha, náijaracavare eta plata ena apóstoleana. Tásiha, ena apóstoleana náijaracavacavare nácani páurepananahi.

³⁶ Matiarihivare ema achane ticaijare José. (Éma máuchurehi eta te tiúrupuhi te mar ticaijare Chipre.) Ema maca José náumurivaichaha ena levítana. Ena apóstoleana nanacapa eta máijarehi Bernabé (te véchajiriruva ticaijare Ticaurisamurerahi).

³⁷ Ema maca máijararecapa eta mapenapahini. Tásiha, máijaracapa eta plata ena apóstoleana.

5

Eta mapecaturahi ema Ananías ésupa esu mayena Safira

¹ Matiarihivare ema achane ticaijarehi Ananías ésupa esu mayena ticaijaru Safira. Énerichuvare náijararecapa éna eta nayehe apaquehe napenapahini.

² Ema maca achane macaerajicapa ticutimurihacaca eta plata tavachahi eta mayehe apaquehe. Esu mayena suéchahi eta mayumurusirahi eta ticutimurihacaca eta plata.

Tacahe, te títecapapa ema achane nayehe ena apóstoleana, máichapa:

—Níjararecahi eta nuyehe apaquehe. Júcahi tamutu eta plata tavachahi —macahapa.

³ Tásiha, ema Pedro máichapa:

—Píti, Ananías, ¿tájaha tacayema písapavahi ticaetemavi ema Satanás? Pipanerechaipa pivayuaracayare ema Espíritu Santo eta piyumurusirahi ticutimurihacaca eta tavachahi eta piyehe apaquehe.

⁴ Pímaha, Ananías. Piyeherichuhi eta apaquehe píjarareruhi. Nájina tipamicavinahi eta pinaquisiravaya. Puiti eta juca píjarasiravahi pinaquicava, pépiyahirahipaipa pímiyachahi tamutu eta juca plata tavachahi eta piyehe apaquehe. Pátupiruvapaini eta pivarahaquenehi pinaquica. Émasera ema Viya máimararacahi eta juca pépiyahiraivahi. Vahi vítinahini pivayuaracahini —máichapa ema Pedro.

⁵ Te masamapa ema Ananías eta juca, tiáquipaicavapa, matupiru tépena. Te nasamairiricapa ena achaneana, namuturinehi tipicana ichape.

⁶ Tacahe, nararihi ena natuparaháichuhi técararecana. Navehapa eta máquehe ema Ananías. Náyuruacapa. Námapa te ecari, náecarapanapa.

⁷ Te táequenepa eta mapanaquene hora, títecapapa esu Safira, mayena ema Ananías. Vuíchaha suéchahini eta máicharacavahi ema suíma eta máepeni-raipahi.

⁸ Tacahe, ema Pedro mayaserecapa, ánipa maicha:

—Pimetacanu. Eta juca plata mámaquenepahi ema pima, ¿étahipuca tamutu eta tavachahi eta eyehe apaquehe? —máichapa ema Pedro.

Tásiha, sujicapapa:

—Eta tavachahi tamutu —suíchapa.

⁹ Tacahe, ema Pedro máichapa:

—¿Tájaha tacayema ecuticacahi eta juca épiyahiraivahi evayuarasirahi ema Espíritu Santo? Ávane tichavana ena técarapananahi ema pímaini. Tásiha, puiti pítipavayare tiámavianayare —máichapa.

¹⁰ Tacahe, eta máichirahi ema Pedro, enevanepa tiáquipaicavahi ésu te máivapechacaya ema Pedro. Tépenavarepa. Te tichavanapa ena técarapananahi ema suímaini, náimaharinehi ésu tépenaipavare. Navehavarepa esu, námavarepa náecarapana te machacaya ema suímaini.

¹¹ Te nasamairiricapa namutu ena achaneana, ichaperinehi eta napisira ema Viya, navetijipa eta napisirahi ena téhicanahi ema Cristo.

Májaracahi ema Viya ena apóstoleana eta náimeresiraya eta tiáramicareana

¹² Tacahe, ena apóstoleana, ichape eta májarasiravacahi ema Viya eta náimeresirayare eta tiáramicareana te namírahu ena apamuriana achaneana. Ticurujicacánahivare tamutu sácheana ena tisuapajirahiana te náurujsirareva te tajuhe eta Templo, te tayehe eta alar máepiyaruhi ema reyni Salomón.

¹³ Namutu ena apamuriana achaneana máehicarahanaríchaha ema Jesucristo, vahi napatsicavahini nacanara taicha namutu napicauchahi.

¹⁴ Camurianapaipasera ena ajairana énapa ena esenana ena téhicana-paipahi ema Jesús.

¹⁵ Camurianaipa ena nacanararuanapáipahi ena apóstoleana. Tacahe, námavacapaihi ena apamuriana nacajumaqueneana, nanaquicapaipa te calle mayanihayarehi ema Pedro. Eta máetavisirayarehi éma, távichayare eta macuna, tacanaracayarehi eta najumana.

¹⁶ Énerichuvare, títecapanapa te Jerusalén ena achaneana tiásihana te avasareana nachacayarahanahi. Námapahi ena nacajumaqueneana énapa ena návaháruana ena éreanana. Namutu ena nani tinaracanapaihi tayehe eta náichavaquenévanahi.

Naémeratacapa ema Pedro émapa ema Juan

¹⁷ Váipasera máuricahini eta juca ema corregidor, énapa ena machamuriana. (Saduceóanahi éna.) Tisemanarinehi táichavenehi eta náehisirahi ena camuriqueneana achaneana eta náimiturapihi ena apóstoleana.

¹⁸ Tacahe, nacavanairipipa nacaratatajica ena apóstoleana. Náimisiapapa te cárcel, ticaeratanapa.

¹⁹ Émasera ema Viya majaneacavacahi éna. Te jena yati, mavanecapa ema mayehe ángele. Mavejiapana eta cárcel návihahi éna. Mavanecapa náuchuca, ánipa maicha:

²⁰ —Eyana ímrecava te jena Templo. Emetaca ena achaneana eta mavarairahi ema Viya máitsivachaya arairuya eta náitaresirayare ena téhicanaya ema Jesucristo —máichavacapa ema ángele.

²¹ Náuchusihapa ena apóstoleana te cárcel, timapicucuhichaha te tiyananapa tayehe eta te Templo. Tinahacavanavarepa tímiturecana.

Tacahe, te jena yáticarahi ema corregidor mavanecapa ena comisarioana máimichuhapa namutu ena apamuriana tugarairucana énapa ena náiyacarana israelítana. Te tíurujiacavanapa namutu, nacavanairipipa náepana ena apóstoleana eta te cárcel.

²² Te títecapanapa te cárcel ena suntaruana, navejiacapa eta tapaja. Nájinaripahisera. Tacahe, tichavanapa nayehe ena náquenuruhana. Nametacapa eta nájinaripahi ena apóstoleana.

²³ Tacahe, náichapa:

—Te vítecapauchapa eta cárcel, vímahapa tanasihi ticaeratahi eta tapaja. Natiarihivare ena séntinelana tijaneacanahi eta tapaja. Tacahe, te vivejiacapa eta tapaja, nájina émanainahini vichimaphahini te tajuhe —nacahepa ena vanairucana.

²⁴ Te máechapa ema corregidor, énapa ena machamuriana tuparairucana, émapa ema náquenumuri ena tasuntarurana eta Templo, náramirinehi ichape. Tacahe, náichacacapa:

—¿Tájaha tacayema eta juca? Vaipa vímatiequeneha. ¿Tájahapuca vícharacavaya? —náichacacapa.

²⁵ Téchajiricavanarichaha éna, títecapanecha ema émana achane. Mametacavacapa éna. Ánipa macahe:

—Ena naena ajairana érataruanahi te cárcel, náenahi ánaqui te Templo tímiturecanahi nayehe ena achaneana —máichapa.

²⁶ Tacahe, ema náquenukuha ena suntaruana, émajacaruvapa tiyana. Mámamurihapaipahi ena suntaruana, náepanayarehi ena apóstoleana. Jéhesare, námamurihapa, tájinasera náicharacapahini eta námirapahi taicha napicahi ena apamuriana achaneana natupisicavacahini te márijahiana.

²⁷ Te nacaitecapapa, nacatupihapa te namuri ena tuparairucana. Tásiha, ema corregidor ánipa maicha:

²⁸ —Víti vivanecahehi muraca eta vaipa ecuapechava ecuimitureca eta máechepusirahipuca ema Jesús, tasiha, éti ímiyanavarichucha ímitureca. Namutupa ena achaneana tayehe eta juca viávasa Jerusalén náitucapa eta ímiturapiana éti. Visapihapa evaraha vítiyare táecatíha eta máepenirahi ema achane Jesús. ¿Tájaha tacayema vahí esuapahavihini? —macahepa.

²⁹ Tacahe, ema Pedro énapa ena apamuriana apóstoleana najicapapa, ánipa naicha:

—Tatúparáca mativayare visuapa ema Viya. Éma tisuapacarepana eyehe éti.

³⁰ Víti, véhicahi ema Viya, émarichuhi nacasiñaquenehi ena viáchucanaveanaini. Émahi ema ticaechepucahi ema Jesús, ema ímicaparuhi eta émetasirahi te crusu.

³¹ Tásiha puiti, ema Viya máunacahi te anuquehe anuma. Macaejacahi te mavaure tayehe eta trono. Máijaracaripa eta matuparahayarehi Aquenucayarehi Ticatiurahiyareva. Taicha mavarahahi ema Viya vimutuyare viti israelítana véneuchavaya mayehe, apaesa éma tiperdonachaviyare tamutu eta vipecaturana.

³² Víti véchajisihahi eta juca taicha vímahaquenehi eta mápechiravahi títareca. Víti véchajisihahi maicha ema Espíritu Santo máijararuhavihi ema Viya viyehe viti visuapana éma —náichapa ena apóstoleana.

³³ Te nasamapa eta juca ena aquenucana, tiseanapa. Navarahapa nacapacavacayarehini.

³⁴ Matiarihíhisera te nataracu ema achane ticajare Gamaliel. Ema tuparairucahi doctrinero fariseo. Ema maca achane ticapicahuhi nayehe namutu ena achaneana. Tacahe, titupihapa te namirahu. Macavanairípipa náuchucachaha ánipina ena apóstoleana.

³⁵ Tacahe, máichavacapa ena machamuriana aquenucarahana:

—Tátanaveana, nujaneanana israelítana. Échapava eta evarahaquenehi íchaya nayehe ena nani achaneana.

³⁶ Échapuca éti cape juca táitaresirahi, téchepucahi ema émana achane ticaijare Teudas. Éma macahehi eta máitupajijiásiravahi. Tásiha, camuriana ena achaneana téhicanahi. Cuáttrocientoanahi ena ajairana ena machaneranahi. Tásihasera, nacapacahi ena mánarana. Tásiha, namutu ena téhicanainihi téjanerepaicanahi. Títavapa tamutu.

³⁷ Tásiha, te táequenevarepa, te jena sache eta nacatupairahi ena achaneana, téchepucavarepa ema apana ema ticaijare Judas, ema ticavasa te Galilea. Camurianavare ena téhicanahi. Énerichuhivareséra nacapacahi ena mánarana. Namutuhivare téjanerepaicana ena téhicanainihi.

³⁸ Tiuri puiti, esamanu eta juca numetaruheya. Ésamiricachucha ena nani achaneana. Vahi ecuimicasiapava nayehe. Taicha eta juca náichaquenehi te nayehechuchapuca éna, títavayarehi.

³⁹ Téheserapuca mayeheli ema Viya, vahi eratahaimahi ecamitiaca. Échapavachucha. Machu ecucaemuñava ecanara ema Viya —máichavacapa.

⁴⁰ Tacahe, tésamiricavanapa namutu. Náimisipavarepa ena apóstoleana. Náestacavacapa. Tásiha, navanecavarepa eta vaipa nacuapechava nacuechajishi eta máechepusirahi ema Jesús. Tásiha, nacaiticavacapa.

⁴¹ Tacahe, tiúchucanapa ena apóstoleana te náurujisiovahi ena tuparairucana. Tiúrisamurenapáichucha eta nacaestairahi. Ánipa nacahe:

—Ema Viya máimarracahi eta vicamichirahi tamutu eta náimicatsiriasirahivihi táichavene eta véhisirahi ema Jesús —nacahepa.

⁴² Váhiquene nacatsimavahini. Tímiturecanáichucha tamutu sácheana, náechajisihahi ema Jesucristo. Tímiturecanahi te Templo étapa te pétiana.

6

Ticatuparacasiana ena siéteana ajairana

¹ Te jena sácheana, eta nasimutuvaipa ena téhicanahi ema Jesús tisiapanapaipa ticajanemurianapaichucha. Natiarihivare ena israelítana, apáechajiríruvanarípa éna. Natiarihivihi ena páurepanana te nataracu énapa ena máimaruana. Ena nani najacapahi eta nayehe ración tamutu sácheana. Étana sache, ena nani apáechajiríruvanarípa vaipa náurisamurehini taicha vaipa nácuticacahini náechapajirícahini ena máimaruana. Ánipa nacahe:

—Váipa nácuticacahini eta najacapirahi eta tinicacare ena vijaneananarichuhi máimaruana —nacahepa.

² Tacahe, ena dócequeneana apóstoleana nacurujicapa namutu ena téhicanahi ema Jesús. Tásiha, náichapa:

—Vahi táuricahini víchepaichahini eta vicametarairuira eta máechajiriruva ema Viya. Ticaichepairicahavipa eta víjarasirahi eta tinicacare ena víchamuriana.

³ Tiuri puiti, nuparapenaveana, tacamunu vinacayare siéteanaina ena ajairana te emuri éti, nácani ímatiqueneana tiúriana achane, téchemarahiana náimatiqueneha tamutu, mávaháruanahivare ema Espíritu Santo. Énaina vítuparaca naicha eta juca.

⁴ Taicha víti vímijanavayare viyujaraca vímiturecayare eta máechajiriruva ema Viya —náichapa ena apóstoleana.

⁵ Tacahe, namutu navaraha eta náechajiruvahi. Tacahe, ticanerejianapa ena ticatuparahanayare. Navehapa ema Esteban, achane tiuri, tisuapajirahiquene mayehehi ema Viya, mávaháruhivare ema Espiritu Santo. Navehavarepa ema Felipe, ema Prócoro, ema Nicanor, ema Timón, ema Parmenas, émapa ema Nicolás*.

⁶ Tacahe, náichuhapa te namirahu ena apóstoleana. Tásiha, nanacapa eta navahuana te nachutiana, nayujarauchapa, náijarasihapa eta náematanerepiyarehi.

⁷ Tiuri, eta nasamirahi eta máechajiriruva ema Viya, camurianapaipaicha ena téhicanahi tayehe eta avasare Jerusalén. Tisimutuanavare ena tiyujararahiana israelítana náunacaipa te nasamureana eta náehisiraipa ema Jesucristo.

Eta nacaratasirahi ema Esteban

⁸ Tiuri, ema Viya máimicatacahi ema maca Esteban. Májaracahivarehi eta ichape eta máichirahi eta tíaramicareana te namirahu ena achaneana.

⁹ Tatiarihivare te Jerusalén eta apana náurujisirareva. Tiúrujicavanahi ena israelítana prisionéroanaini náuchucureanapasera. Éna tiásihanahi te apanana avasareana, te Cirene, te Alejandría, te Cilicia, etapa te Asia. Nácapaemajiricapa ema Esteban te yátupihipuca ema Jesús émaquenehi Cristo. Vahi nasuapahini taicha tétavicavahi eta namasuapajiraivahi.

¹⁰ Ema Espiritu Santo májaracahi ichape ema Esteban eta máitusiraya téchajica. Eta tacahe, vahi náratahahini nacachuriaca éma. Tisemanapa eta máitahasiravacahi.

¹¹ Tacahe, náimitucapa ena apinana ajairana navachachaqueneanahi eta náepiyequenehairaya ema Esteban. Ánipa naicha eta náimitusirahi:

—Visamahi ema maca macaechihi ema víyarahaini Moisés, macaechivare ema Viya —náichapa.

¹² Tacahehi, eta nacaechepusirahi eta semanere nayehe ena achaneana, énapa ena aquenucarohana, énapa ena escribánoana. Náimiyusemacavacapa. Tásiha, nacaratacapa ema Esteban. Námapa ticayaserehiya te namirahu ena tuparairucana.

¹³ Tásiha, náichuhavare ena apamuriana tépiyaequenehanaya. Ánipa nachehi eta náepiyahiravahi:

—Ema maca achane vahi máituca timatina macaechahi eta viyehé Santo Templo. Máepuruware eta viyeherepiana.

¹⁴ Énerichuvare macahehi ema Jesús Nazareno máquipaicayareji eta Templo, máitsivachayarehiji eta viyeherepiana májararuhavihi ema víyarahaini Moisés —náichapa ena tépiyahirahianahi.

¹⁵ Tacahe, namutu ena natiarihiqueneanahi náejaruanahi náimaracaripa ema Esteban. Eta mamira macavasirahi ema ángele.

7

Eta maconsejarapi ema Esteban

¹ Tacahe, ema corregidor mayaserecapa ema Esteban, ánipa maicha:

—¿Yátupihí ene picahehi eta juca nametarapianahi ena nani? —máichapa.

* **6:5** Ema maca Nicolás, ticavasainihi eta te avasare Antioquía eta máuchusinehi. Éma, apavasanahi, máehichahinivare eta nayeherepiana ena israelítana. Tásiha puiti, máehicaipa ema Jesucristo.

² Tacahe, majicapapa ema Esteban, ánipa maicha:

—Tátanaveana, nuparapenaveana. Esamanuchaha. Eta acane, ema Viya tiúcupaicahi másihahi te mávasa anuma. Tímerecavapa mayehe ema viáchucaini Abraham. Ema Abraham, máviahichaha te tinapaica te apaquehe ticajire Mesopotamia, ticajirevare Caldea. Vuíchaha mayanahini macavashahini te Harán.

³ Máechajicahi ema Viya ema Abraham, ánipa maicha: “Pijunijica eta juca piávasa, énapa namutu ena pijaneanana. Piyana eta te apana apaquehe. Núti nívaracaviya eta arairu piávasaya” máichapa ema Viya.

⁴ Tacahe, ema Abraham masuapapa; tiúchucapa eta te tinapaica te Caldea. Tiyanapa eta te avasare Harán. Te táequenepa eta máepenirahi ema máiyaini, mavanecapa ema Viya ema Abraham máiteca eta te juca apaquehe viáviyahini puiti víti. (Te jena áñoana ticajirehi Canaán.)

⁵ Tájinasera máijarahini mayehenahini apaquehe, ánicuchicháinahipucáini. Mametacahisera eta máijarasirayarehi eta mayeherehi apaquehe. Taicha eta apaquehe máijarayarehi nayeheyarehi ena machichanavequeneana te máepenapa ema Abraham. Nájinarichahasera machichanaveanainahini te jena áñoanahi.

⁶ Énerichuvare mametacahi ema Viya, ánipa maicha: “Ena pichichanavequeneanayare ticavasarecanaya nayehe ena apavasajuecuana. Ticatajivayaresera naicha ena napaureanaya. Nacajireyare. Cuatrociento áñoayare eta náichirayare.

⁷ Nútisera, níjaracayare eta náicuñayare ena achaneana te jena avasare nácani ticajireanayare ena pichichanavequeneanayare. Tásiha, te táequenenapa, nucuchucuhavacainapa. Tásiha, titecanainapa ani te juca najirauchihanuyare” máichapa ema Viya.

⁸ Ema Viya mafirmachapa eta matratune eta máitauchirayarehi eta juca máechajiriruvahi mayehe ema Abraham. Énerichuvare mavanecapa ema Abraham timarcachavayare, máicutiarayarehi eta macasiñavairahi me Viya. Namarcachayareva namutu ena machichanaveana ajairana, énapa ena mámariequeneana ajairana. Eta tacahehi, te óchoquenepa sache eta máuchisirahi ema Isaac machicha ema Abraham, mamarcachapa. Énerichuvare, máichahi ema Isaac te macachichapa ema Jacob. Ema Jacob, énerichuhivare máichavacapai ena dócequeneana machichanaveana, ena víyanaveanaini víti.

⁹ Ema José, nacapinaruhi ena maparapenaveana taicha máemunapanahi ema naiya. Eta tacahe, náijararecapa ena maparapenaveana nayehe ena apavasanana. Tásiha, éna náequcapa náijararecapa mayehe ema ticavasa te apana avasare Egipto. Émasera ema Viya majaneacahi ema amaperu José.

¹⁰ Macatiuchahivare tayehe eta macatajivairana. Máijarahivare eta máitucaqueneyare. Ema rey aquenucachi tayehe eta Egipto máemunacachi ema José. Máimatiacachi eta máitusirahi. Eta tacahe, ema rey macajupahahi eta majaneasirahi tamutu eta máimahaqueneana. Aquenucachi máicha, nayehe namutu ena ticavasa te Egipto.

¹¹ Tásiha, te jena áñoanahi, táitecapauchapa eta ecuha te tamutu eta avasareana tayehe eta táunavahi eta Egipto étapa eta Canaán. Tétavicavahi eta nacatajivairahi ena achaneana. Tásiha, ena viáchucanaveanaini, tájina naviyahini eta nanicaquene.

¹² Émasera ema Jacob te masamairiricapa eta tatiarirahi eta tinicacare te Egipto máunaruhi ema rey, máevatacapa ena machichanaveana eta navacharepana eta tinicacare. Te téchuricanavare eta tinicacare, mápechavarepa máevataca ena machichanaveana.

¹³ Te apihequenepa eta nachavirahi, ema José tímimatichavapa nayehe ena maparapenaveana. Tacahe, ema rey mapaenumavapa máimati éna irahi maparapenaveana ema José.

¹⁴ Tacahe, ema José máimichuhapa ema maiya Jacob énapa ena natiaririque neanahi te mapena. Setenta y cincoqueneana eta nasimutuva éna.

¹⁵ Tacahehi eta mayanirahi ema Jacob macavasairahi tayehe eta te Egipto. Éta pa máepenihahi. Te táequenepa, étarichuvare náepenihahi ena machichanaveanini viáchucanaveánaini.

¹⁶ Váhisera nacaecarasihini eta náperanaini te Egipto. Nacayejecapa eta nacaecarasirahi eta te ecari te tachachacu eta avasare Siquem te tinapaica eta Canaán. Étarichuhi eta máecari ema Abraham*.

¹⁷ Tiuri, tiánehipa eta máítauchirayarehi eta máechajiriruvahi ema Viya matratunehi mayehe ema Abraham, ánaquiaparíchaha eta áñoana eta májárásirayarehi eta apaquehe nayeheyarehi ena machichanavequeneana. Ena nachichanaveana ena viáchucanaveanaini, ánaquipa náejapasihahi te Egipto.

¹⁸ Tayerevahi eta año, titupihapa ema apana rey te Egipto. Éma arairuhi rey, vaipa macapayacahini máimatihini ema José. Váipavare mávarahahini maecha eta manaquiruanainihini máemataneanainihini ema José.

¹⁹ Masapihapa macatianacavacahi ena viáchucanaveanaini taicha eta náejapasirahi éna. Macaetemajiricavacapa. Macavanairipipa eta vahi nacueperajica ena amuyana ajairachichana náuchusiravanahi. Najunijica apaesa vahi nacuitareca.

²⁰ Tacahe, te jena sácheanahi, tiúchucapa ema amuya alauchu Moisés. Ema Viya máemunacahi ichape ema maca amuya. Mapana caje eta nacajurusirahi ena ticachichana te mapena.

²¹ Te náimahapa téchemarahipaipa ema amuya, vaipa mayumurucacarehini. Tacahe, nayumurucapa ema amuya te pacurechicha te curichepiraquiana távihahi te cajacure. Ésusera esu machicha ema rey suíchimavapa, suvehapa. Ésupa ticajurucuhi suchichayarehi.

²² Tacahe, ema amaperu Moisés ticaimitucasipa tamutu eta náitupajijiásiravanahi ena ticavasanahi te Egipto. Tacahe, ichape eta máitupajijiásiravahi eta máechajisirapahi éta pa eta máematanepeianahi.

²³ Te ticayehepa cuarenta año ema Moisés, mavarahapa tiyana máejirapanavaca ena majaneanana israelítana.

²⁴ Te títecapapa ema Moisés, máimahapa ema émana achane ticavasa te Egipto téhararecahi, máehahi ema majaneana ema Moisés. Tacahe, macatiuchapa ema majaneana. Émapa títsirijiequenehahi. Macapacapa ema ticavasa te Egipto.

* **7:16** Ánaquiaparipa tatiarirahi eta avasareni Siquem, návasa ena mámariequeneana ema achane ticajare Hamor. Te tachacaya eta jena avasareni, tatiarirahi eta mari enurujuhe. Tacahe, ánaquiaparipa ema Abraham mavacharecapa eta apaquehe táimivehapa eta mari enurujuhe, mavarairahi suacaecarasiyarehi esu mayena Sara, énapa namutu ena machichanaveana. Émaripa étarichuyareva macaecarasiyahi. Ena machichanaveana ichapemurirahi áñoana eta náechapajirisirahi eta ecari, taicha étarichuyarehi nacaecarasiyarehi éna, énapa ena apamuriana mámariequeneana ema Abraham.

²⁵ Eta mapanereruhi ema Moisés, mavarahahi nacaicutiarayare ena majaneanana eta mavaneruirahi me Viya eta macuchucuiravacayarehi eta te nacatajivairahi. Váhisera nácaicutiarahini éna.

²⁶ Tacahe, te apanaquenepa sache, ema Moisés máimahapa téhacacana ena apinana majaneanana. Mavarahapa macaichepaica. Máichapa: “¿Tájaha tacayema éhacaca éti? Ímaha eparapecahi” máichapa.

²⁷ Tacahe, ema túmepanahi mayehe ema apana, máevatajicapa ema Moisés, máichapa: “¿Tájaha tacayema pímisipava píti eta veyehe? ¿Nájahapuca tivancavihi juéseyarehi eta veyehe, viáquenumuriviyarepuca víti?”

²⁸ ¿Pivarahapapuca picapacanuyareva núti, tacutiyarepuca eta picapasirahi cape ema egipcio?” máichapa.

²⁹ Te masamapa ema Moisés eta náechirahi ena achaneana émairahi ticipa, tiyanapa tijunahi eta te apaquehe ticaijare Madián. Ánaquipa eta máerajisiavahi máitatijiyavahi. Mavehapa esu mayena, ticaparapepa. Apinana ena machichanaveanahi ajairana suyehe esu mayena.

³⁰ Te cuarenta áñoa eta mávihairahi ánaqui, te étana sache, tipairiricahi te mávaphiana apaquehe tachacaya eta cerro ticaijare Sinaí, majanearesirahi eta uvesana. Tacahe, tiúcupaicapa ema Viya eta te távihahi eta chéyaraji yucuqui. Timurujirinehi eta yucuqui maicha ema Viya. Váhisera táijuchahini táitahini eta tapacajiana.

³¹ Eta máimarasirahi eta juca ema Moisés, máramirinehi. Tiyanapa mapauchá, máimatiyarehi. Te macachacayapa, masamapa eta mahu ema Viya. Ánipa máichahi:

³² “Nútichucha Viya nacasiñaquenehi ena piáchucanaveanaini. Nútirichu macasiñaquenehi ema Abraham, ema Isaac, émapa ema Jacob” máichapa ema Viya. Tacahe, ema Moisés tiyayacareinehi eta mapisirahi. Vaipa mapatsicavahini máimarasachahini.

³³ Tásiha, ema Viya máichavarepa: “Pivejuchupevachava eta péparupeva taicha santo eta juca apaquehe piávihahi piácatayapairuhi.

³⁴⁻³⁵ Pisamanuya puiti, jucarihi numetacaviyare. Núti nímararacahi eta nacatajivairahi ena nuchanerana tiávianahi te Egipto. Nusamahi eta náiyairahi. Nuvaraha nucatiuchavacayare. Eta tacahe, núcupaichahi numetapanaviya. Nuvanecaviyare puitirichu piyana tayehe eta Egipto, picuchucuhavacayarehi” máichapa ema Viya.

Tacahehi eta matuparasirahi ema Moisés mayehe ema Viya, mavaneruhi náquenumuriyarehi ena majaneanana, macuchucuhaya éna eta te nacatajivairahi. Étasesa te tinapucainapa vahi náesachahini éma.

³⁶ Tásiha, émarichuhi ema maca Moisés macuchucuhavacapa namutu ena majaneanana tiásihanahi te Egipto. Eta macuchucuiravacahi, máimerecachi eta tiáramicareana te jena avasare Egipto, étapa eta te mar ticaijare Títsiama Une, étapa te mávaphiana vámahí. Cuarenta año macahehi ema Moisés eta máichirahi eta juca.

³⁷ Émarichuva ema Moisés ticaechajiriruvahi nayehe ena majaneanana israelítana eta máuchusirayarehi ema profetayare. Máichapa: “Ema Viya Dios tivanecanuhi núti numetacaheyare eta máechajiriruva. Títecayare ema apanayare profeta mavaneruyare ema Viya, tacutiyare eta mavanésiranuhi núti. Éma, tiúchucayare te namuri ena viámariequeneanayarehi. Tatuparaca nasuapayare tamutu eta mavanairipianayare” macahehi ema Moisés.

³⁸ Émarichuvare ema Moisés, ema máichuhaquenehi ema ángele tiápanaya eta te jena cerro Sinaí, nacuchapirahi ena achaneana machamuriana te vámahi. Tásiha, máechajicahi ema Viya ema Moisés. Te títapiricapa ema Viya, ema Moisés tiúcupaicapa, mametacavacapa ena achaneana tamutu eta mametacasisvanahi me Viya. Énerichuvare ema Moisés májuchapahi te libro eta mavanairipiana ema Viya, tisuapacareanahi viyehe víti israelítana véhicana.

³⁹ Eta mávihairahi ema Moisés te cerro, vaipa náimahahini ena viáchucanaveanaini. Tásiha, vaipa návarahahíni náehicahíni éma. Navarahapa tichavanayarehi te Egipto.

⁴⁰ Tacáhénapa, te náichapa ema Aarón: “Vivaraha pépiyasinahavi eta visiñarajina táinapumirauchahaviya, taicha vaipa vecha tájahapuca máicharacavahi ema Moisés, ema ticuchucuhahavihi tayehe eta viávinénihi te Egipto” náichapa.

⁴¹ Tacahe, náepiyacapa eta nasiñarajiyarehi, amairiha oro, tavasimahi eta torillo. Napiestachayarepa eta náepiyarui nasiñaraji. Tacahe, ticaparecanavare eta vaca; náijaracasichahi eta nasiñaraji eta námavahuhi, náimicutichaipa ema Viya. Ténicacanapa. Tiúrisamureanapa eta náimairahi táurinavahi eta nasiñaraji náepiyarui.

⁴² Émasera ema Viya, eta máimairahi eta juca, vaipa máuricahini. Tásiha, vaipa majaneacavacahini éna. Váhisera máicuñacavanehini. Máisapapa ticasiñarajiana, téneuchavanapa te tamirahu eta nasiñarajiana. Tásiha, tamutupa nacasiñaraji eta jarairiquiana. Taicha ánipa tacahehi eta Sagrada Escritura nájurehi ena profetana. Ánipa maicha ema Viya: “Émitisicanuhi núti, eti israelítana. Vaipa nútinahini ácasíña eta jena cuarentaquenehi año te mávapahi vámahi.

⁴³ Étapa ecasiñahi épuyumirauchahi eta esiñarajiana ticaijare Moloc. Énerichuvare ecasiñahi eta jarairiqui ticaijare Renfán. Eta ecaparui, vahi nútinahini Íjaraca. Étapa Íjaracahi eta esiñarajiana. Éti, éperajiricapa eta esiñarajiana te tayeheana trono tapenahuana épiyaruana. Eta tacahe, nucajanerepaicaheya te apachacaya apaquehe ticaijare Babilonia” máichapa ema Viya.

⁴⁴ Te jena mávapahi vámahi ema Moisés mavanecapa ena viáchucanaveanaini náepiyaca eta mapenayarehi máucupaisirareyarehi ema Viya. Mavecunarui eta tiáviha te anuma máimechaquenehi ema Viya. Étarichu náunasirare eta ajureca tiáma eta mavanairipiana ema Viya.

⁴⁵ Te tépenapa ema Moisés, máevachacapa ema Josué émapa máitsivahi téchapajiricayarehi ena achaneana. Tacahe, tiyananapa mámamuriahapa ema Josué. Ena achaneana námavahi éna eta mapena máucupaisirare ema Viya. Nacaijuhepa eta apaquehe natuparahahi. Natiarhisera ena achaneana ticavasana tayehe. Váhisera tácajerahichaini eta náitahasiravacahi ena nánaranahi taicha ema Viya máimicatacavacahi. Tacahe, tayerevahi eta áñoana ena náeperajicahi eta mapena ema Viya. Te tijurucapa ema rey David, ticatuparahapa, machimapapa eta tatiarihirichaha. Émapavavare máechapajirica.

⁴⁶ Taicha ema maca rey David máemunaruhi ema Viya. Tacahe, ema David mavarahapa tépiyarecaya eta mapenaya ema Viya amairihayarepa mari.

⁴⁷ Váhisera táitachahini eta mapaneruhi ema David, taicha ema Viya

vahi máisapahini. Émapa títauchahi ema machicha ticaijare Salomón. Émapa tépiyacahi eta Templo.

⁴⁸ Tiuri puiti, numetacahevare, ema Viya ticavasahi te anuquehequene anuma. Vahi títecaimahi macapena te témploana vépiyaruanasami viti páureanasami achaneana. Taicha ema Viya máichapa eta máechajiriruva:

⁴⁹ “Te anuma táviha eta nuyehe trono néjasihahi. Ánaqui tásiha eta nuvanairipiana tayehe te juca apaquehe. Núti vahi nácamunu eta peti te juca apaquehe. Núti vahi nácamunu eta nunarasirarena.

⁵⁰ ¿Váhipuca échava eta nútirahi népiyaca tamutu eta juca ímahaqueneanahi te juca apaquehe?” macahepa ema Viya eta máechajiriruvahi.

⁵¹ Puítiripa eti esamararacananahi, ¿tájaha tacayema éhicahi eta namuracasmurevanaini ena iáchucanaveanaini? Váhivare ávarahahini esama puiti eta máechajiriruvahi ema Viya táichavenehi eta evainarajisamurevavacahi étapa eta emasuapirahi ema Espíritu Santo. Éti, eta epanereruana tacuti eta napanereruana ena iáchucanaveanaini eta navainarajivana.

⁵² Éna, náemecatajivachahi namutu ena profetanaini. Nacapacavacahi nácani téchajisihanahi eta máitesirayarehi ema Cristo. Tásiha puiti, eta máitesiraipa ani, épururipa éma, masapihapa íjararecahi ímicapacahi éma taicha tétavicavahi eta máurivahi.

⁵³ Étaripa eta mavanairipiana ema Viya, ángleana ena tíjarapananahi ema Moisés. Échajicuhaipahinéni éti, esamaripahinéni; váhiqueneséra esuapahini —máichapa ema Esteban eta maconsejachiravacahi.

Eta máepenira ema Esteban

⁵⁴ Te nasamapa ema Esteban eta máichirahi, tisemanarinehi. Tinicavaninehi eta nasemaneva.

⁵⁵ Émasera ema Esteban vahi mapicaracavacahini éna taicha mávaháruhi ema Espíritu Santo. Máesenicapa te anuma. Máimaharine eta majaraiva ema Viya, émapa ema Jesús titupihahi te vaure tinapaicahi eta majaraiva ema Viya.

⁵⁶ Tacahe, ema Esteban máichavacapa ena achaneana natiarihique-neanahi:

—Ésenica te anuquehe. Núti nímahahi eta anuma téjiacahi. Émapa ema Jesucristo, máenahi titupihahi te mavaure ema Maiya —máichavacapa ema Esteban.

⁵⁷ Énaserá eta nasemanevahi, tichujiquíñahavanapa. Tijajamurihanapa nátereuchapa namutu.

⁵⁸ Nacaratacapa, námapa te tachachacu eta avasare. Ánaqui eta natupisihayarehi nacapasihayarehi te márjahiana. Ena téhanahi nanaquicapa eta náepacuhána, natuparacapa ema nayehehi comisario ticaijarehi Saulo.

⁵⁹ Tacahe, nanahacarpa natupisicahi ema Esteban. Tiánehiripa nacapaca. Émasera tiyujarauchavaichaha. Ánipa macahehi:

—Tata Náquenu Jesús, pijacapinanu eta náchaneva.

⁶⁰ Eta máquipaisiravahi, tépuyucapa tipiaracapa muraca. Ánipa macahe: —Tata, pipardonachavaca ena nani eta juca náichiranuhi napecaturahi —macahepa.

Te títapiricapa eta mayujarasirahi, tépenapa.

8

Ena Saulo mapanerecha mapanajiricavaca eta macatichiravacahi ena téhicanahi emá Jesús

(Hch 22.6-16; 26.12-18)

¹⁻² Ena maca Saulo, eta mapanereruhi tacutihi eta napanereruana ena ticapacanahi emá Esteban. Tiúrisamurepa éma. Natiarihivaresera ena apamuriana ajairana tiúripanereruanahi. Navehapa eta máquehe emá Esteban, náecarapanapa. Tiyahanapa ichape eta nacatiequenerahi. Étarichu te jena sache tépanavanapa napanajiricavaca muraca ena téhicanahi emá Jesús tayehe eta avasare Jerusalén. Téjanerecanapa náicha, ena camuriqueneana. Tiyananapa te apana avasareana tinapaica te Judea étapa te Samaria. Énasera ena apóstoleana nanasirichuhi te Jerusalén.

³ Tacahe, emá Saulo, emá náinapuraquiphahi ena tipanajiricanahi ena téhicanahi emá Jesús. Tisiapanapaipa te napanana. Nacaratacavacapaipa ena nachimapaqueneanapahi ajairana, esenana. Nachururupaicavacapaipa eta námirapahi te cárcel.

Ena Felipe ticametarairu te avasare Samaria

⁴ Te jácani avasareana náitecapihapahi ena najunaqueneanahi, tímiyanavanarichucha ticametarairuana eta máimiturapiána emá Jesucristo.

⁵ Ena maca Felipe majunaquenehivare. Títecapapa eta te avasare ticaijare Samaria. Tacahe, ticametarairupa nayehe ena achaneana eta náehisiraya emá Jesús, émarahi Cristo emá nacuchapaquenehi. Tiúrujicavanapa ena achaneana.

⁶ Namutu nasamararacahi eta macametarairuirahi emá Felipe.

⁷ Taicha náimahapa eta macanarasiravacahi ena nacajumaqueneana camuriqueneana: ena muracaquihana, ena tiyayacareana, énapa ena masariana. Camuriana ena éreanana máimijunaqueneanahi te náquehe ena achaneana návaháruanahi. Tipiáreacanapáipa eta náuchusirapahi.

⁸ Eta tacahe, ichaperinehi eta náurisamurevahi ena achaneana tayehe eta jena avasare.

⁹ Te jena avasare Samaria, matiarihíhi emá émana achane ticaijare Simón. Iápemarehi éma. Ánaquiaparipa eta macaetemajirisiravacahi ena achaneana. Títupajijiácavahi tépiyacava éma.

¹⁰ Namutuhi ena nasimutuvaqueneana achaneana énapa ena ticaimahaqueneana nasamararacahi nasuapahi eta macayemaqueneanahi. Nacuna-charinehi, ánipa nacahe eta náechajiriruvahi:

—Ena maca achane títupajijiácavahi ichape maicha emá Viya —nacahepa.

¹¹ Ánaquiaparipa eta mavayuarasiravacahi éna, tayehe eta mahiápemarevahí. Eta tacahe, napicauchahi éma.

¹² Téhesera nasamapa emá Felipe, nasuapapa eta nasamirahi eta máechajiriruva emá Viya. Náehicapa eta mametarairuhi mayehe emá Jesús eta émarahi Cristo, emá nacuchapaquenehi. Tacahe, camuriana ena ajairana énapa ena esenana ena ticaicachasianahi taicha eta nasuapirahi emá Jesús.

¹³ Émaripa emá iápemaréni Simón, masuapavare éma. Ticaicachasivarepa. Máehicapa macachanepaipa emá Felipe. Ichape máramipahi eta ichapequeneana tíaramicareana máichaqueneánapahi emá Felipe.

14 Tiuri, te Jerusalén, nasamairiricapa ena apóstoleana eta náehisiraipahi ema Jesús ena achaneana ticavasanahi te avasare Samaria. Tásiha, ticaevatananeanapa ema Pedro ema Juan.

15-16 Tiuri, ena téhicanaripa ema Jesús, vuíchaha mácupauchahini ema Espiritu Santo, mávahácavacahini éna. Tacarichuichaha eta nacaicachasirahi eta navarairahi náehica ema Viáquenu Jesús. Tásiha, te títecapanapa ema Pedro ema Juan, tiyujaracanapa nayaseacapa ema Viya májjarasiraina ema Espiritu Santo eta mávahásiravacaina ena téhicanaripahi.

17 Tacahe, ema Pedro émapa ema Juan nanacapa eta navahuana te nápusiana éna. Tacahe, ema Espiritu Santo mávahácavacaripa eta náemamachutíchiravacahi éna.

18 Tacahe, ema Simón eta manecapirahi eta mávahásiravacahi ema Espiritu Santo te náemamachutíchiravacahi éna, mavarahapa éma mavachachavaca ena apóstoleana.

19 Ánipa máichavaca:

—Íjaracanu núti apana eta nítusiraina eta ítucaquenehi, apaesa te nunaca eta nuvahuana te nápusiana ena nácani achaneana, mácupaicapaini ema Espiritu Santo, mávahácaini éna —máichavacapa.

20 Tacahe, ema Pedro máichapa:

—Pémitiequenehaya píti étapa eta piplatane. Taicha píti vahi tiuri eta pipanereru. Pímijachahipuca vicavacharapiyare eta májjararuhaviana ema Viya.

21 Vahi pítiparacaina píti, taicha eta pipanereruana vahi tátupiruvahini mayehe ema Viya.

22 Pínajica eta pivainarajivana. Piyaseaca ema Viya, tijuricati tiperdonachavi eta tamaurivahi eta pipanereruhi píti.

23 Taicha nímatiacavivi eta pétáviuchirahi eta picapinaruraivahi. Eta juca picahehi taicha vahi tínajiacavimahi eta pivainarajiva —máichapa ema Pedro.

24 Tacahe, tipicapa ema Simón. Ánipa maicha:

—Ímicatacanu éti, eyujarauchanu me Viya apaesa vahi tacuitauchava eta juca ecayemaqueneanahi —máichapa.

25 Tacahe, ema Pedro ema Juan tinahacavanapa túmiturecana eta máimiturapiana ema Viáquenu Jesucristo. Te tamutupa eta náimituresirahi, tiyananapa tichavanayarepa te Jerusalén. Tétávajicanapa te avasarechichana tayehe eta Samaria. Tícametarairuanapa nayehe ena achaneana.

Em Felipe máimituca ema achane ticavasa te Etiopía

26 Tiuri, te jena sácheana, tiúcupaicapa ema émana ángele mavaneruhi ema Viya. Máechajicapa ema Felipe. Ánipa maicha:

—Felipe, pétupiricava, piyana te tinapaica te vana. Pivenacuhayare eta achene tíásiha te Jerusalén, tiyana te avasare Gaza. Pétavicayare eta mávapahiana vámahi —máichapa.

27 Tacahe, tétupiricavapa ema Felipe, tiyanapa. Te achene ticainunacanapa ema achane ticavasa te avasare ticaijare Etiopía. Ema maca achane*, sujupaha esu Candace, reina tayehe eta apaquehe ticaijare Etiopía. Ema maca achane ema tijaneaca eta suímahaqueneana esu reina. Éma, másihehi te Jerusalén, máejirapanahi ema Viya.

* 8:27 Eunucohi ema maca achane.

²⁸ Ema maca achane machavaquenepaipahi te mávasa. Eta mapaisirahi, téjacapahi te mayehe carro. Téchajicurecapahi eta Sagrada Escritura májure ema profetaini Isaias.

²⁹ Tacahe, ema Espiritu Santo mametacapa ema Felipe, ánipa maicha:

—Pémeñahava te tachacaya eta jena carro —máichapa ema Espiritu Santo.

³⁰ Tacahe, te témeñahavapa ema Felipe, te macachacayapa eta carro, masamapa ema achane téchajicurecapahi. Tásiha, mayaserecapa. Máichapa: —¿Picaicutiara eta jara péchajicurepahi?

³¹ Ema achane majicapapa:

—Váiparinehi nucaicutiaraimahi taicha nájina nametacanupahini eta tacayemapahi. Te pítipuca pítipimetacanu, picatajicanu. Yare, piávucuha péjaca te juca nuchacaya —máichapa ema achane.

³² Tiuri, eta máechajicurepahi ema achane, ani tacahehi: “Eta uvesa, te nacarataca nacapacayarepuca, vahi ticatiuchavaimahi. Te nachucamecapuca, váhivare tipiararecaimahi. Ene macahehi ema maca achane, vahi mácapauchavahini, váhivare máechajiuchavahini te námapa tayehe eta nacapasihayarehi.

³³ Tétavacavahi eta nacatsirirairahi éma, tayanapane tájinanéni maviurevainahini. Nájina vave nacatiuchahini. Ena mámariequeneanaini, nájina náechajisihahini éna”.

³⁴ Tacahe, ema maca achane mayaserecapa ema Felipe. Máichapa:

—Picatajicanu pímetacanu. ¿Nájaha ema táechajisihahi eta juca libro májurehi ema profeta? ¿Ema táechajisihahi ema maca profeta, vahi apanapuca? —macahepa.

³⁵ Tacahe, ema Felipe tépanavapa mametaca ema táechajisihahenehi eta libro. Mametacapa eta émairahi táechajisihahi ema Jesús, ema Cristo ema nacuchapaquenehi.

³⁶ Tacahe, te máechapa ema achane, mapanerequenehainehi eta napaisirapahi. Tacahe, te nacapayacapa eta úneure, macahepa ema achane:

—Te juca jararihi une. Nuvaraha pícachasicanu —macahepa.

³⁷ Tacahe, ema Felipe majicapapa:

—Tiuri, te yátupihipuca eta písuapirahi te písamure eta pícasifairaya ema Jesús, níchachasicavi —máichapa.

Majicapapa éma:

—Yátupi nusuapa ema Jesucristo eta émairahi machicha ema Viya —macahepa.

³⁸ Tacahe, macavanairipipa nacaicheca eta carro. Tiúcupaicanapa éna, tiyananapa te úneure. Tacahe, ema Felipe mácachasicapa ema achane.

³⁹ Te tichavanapa tayehe eta úneure, tíjahúchavapa témitiaca ema Felipe, taicha ema Espiritu Santo manaracuhapa. Váipa macaecherahihini. Váipavare máimahahini ema achane. Tímiyanavapasera tipaica ema achane. Tiúrisamurepaipahi.

⁴⁰ Eta máucupaisinehi ema Felipe eta te avasare ticaijare Azoto. Tacahe, tétavajicapaipa eta te avasareana. Ticametarairupaipahi eta máitecapiirapahi eta te apana avasare ticaijare Cesarea.

9

*Ema Saulo masuapa eta máichuirahi ema Jesucristo
(Hch 22.6-16; 26.12-18)*

¹ Tímiyanavarichucha ema Saulo eta mapánajirisiravácahi ena téhicanahi ema Jesús, mavarairahi máimicapacavacaya. Tiyanapa tiyasesereca eta órdeno mayehe ema corregidor tayehe eta Jerusalén.

² Máichapa ema Saulo:

—Nuvaraha nuyanaya te jena avasare Damasco. Nuvarahavare píjaracanu eta órdeno, eta nucaratasiravacaina ena téhicanahicacha ema Jesús, namutu nácani nétupiaruanayarepahi ajairana, esenanapuca. Nutanucavacayare te náurujisirarevana ena vijaneanana. Présowanayarepahi eta námirayare eta te juca Jerusalén —máichapa.

³ Tacahe, tiyanapa ema Saulo. Eta mapaisirapahi éma te achene, tiánehipa títecapa te avasare Damasco, tiáramicarepa eta majaraiva ema Viya tiásiha te anuma. Tamicauchapa éma.

⁴ Tásiha, tiáquipaicavapa eta mapisirahi. Tásiha, masamapa eta mahu ema Jesús. Máichapa:

—Saulo, Saulo, ¿tájaha tacayema picatianacanu pipánajiricanu? — máichapa.

⁵ Majicapapa ema Saulo, mayaserecapa:

—¿Nájahavi piti Tata?

Majicapapa:

—Nuti Jesús. Núti picatianaruhi, eta pipanajirisiravaca ena téhicanuanahi. Pésamiricavachucha, taicha pítijivaichucha píchavahi. Vahi piúrimahi te pímiyanava picatianacanu. Péhicanusera píti —máichapa ema Jesús.

⁶ Tacahe, ema Saulo tiyayacarenecha eta mapisirahi eta máechajisirahi ema Jesús. Macahepa:

—¿Tájahapuca eta pivarahaquene nítauchaquenéna piyehe, Tata? — máichapa.

Tacahe, ema Jesús máichapa:

—Péhepuca. Piyana pítecapa te jena avasare. Ánaqui mararihi ema timetacaviyare eta pítauchaquenyare nuyehe —máichapa ema Jesús.

⁷ Ena apamuriana ajairana macachanequeneanapahi ema Saulo, ichape eta tiáramecana. Taicha nasamahi ema téchajicahi, váhisera náimahahini.

⁸ Tacahe, ema Saulo téhepucapa eta te máquipaisinevahi. Vaipa máimairiricahini. Tacahe, nachurucapaipahi eta nacaitecapiraya tayehe eta avasare Damasco.

⁹ Mapana sache eta mapuchuquivahi. Váhivare tinica. Tájinavare máerahini.

¹⁰ Tiuri, eta te jena avasare Damasco, matiarihíhi ema apana téhichavare ema Jesús, ema ticaijare Ananías. Émarichuvare máechajiruhi ema Viáquenu Jesús. Ánipa tacahe eta máechajisirahi:

—¡Ananías!

Éma majicapapa:

—Nutiaríhi, Tata —macahepa.

¹¹ Tacahe, ema Viáquenu Jesús máichapa:

—Piyana pitupiruya te jena calle ticaijare Titupina. Te jena mapena ema Judas, picayasesereruyare ema achane ticaijare Saulo, ema tiásihahi te avasare Tarso. Puiti máenahi tiyujaracahi.

¹² Núti néchajicahi éma. Numetacahi éma eta pítecapiraya mayehe. Nuvanecavi pinacaya eta pivahu te mápusi apaesa tachava eta máimairirisira —máichapa ema Jesús.

¹³ Te masamapa ema Ananías, macahepa:

—Tata, namutu timetacanuana eta máichararacavanahi ema achane eta mavainarajivahi nayehe ena téhicaviana ticavasana te Jerusalén.

14 Éma, tímitecahi puiti eta ani, mámapahi eta órdena náijararuihi ena tuparairucana eta te Jerusalén eta máepanirahaviya mapresuchirahaviya vimutu viti véhicavianahi —macahepa ema Ananías.

15 Émasera ema Jesús máichapa:

—Piyanchucha, taicha ema maca, nunerejiruhichuhi núti. Nuvanarayarehi éma. Nuvanecayare mayana macametarairu eta nǎjare nayehe ena achaneana te apanana avasareana étapa eta nayehe ena vijaneanana israelítana. Nuvanecayareva máechajisiha eta nǎjare nayehe ena ichapequeneana aguenucana réyeana.

16 Núti nímechayare eta macatajivairayare ichape táichavenenahi eta máehisiranuyare —máichapa ema Jesús.

17 Tacahe, masuapahi ema Ananías. Tiyana tayehe eta peti mávihahi ema Saulo. Tisiapapa. Máechajicapa. Manacapa eta mavahu te mápusi. Tásiha, máichapa:

—Nuparape Saulo, ema Viáquenu Jesús tímerecavahi eta piyehe te achene te pítecinapa. Éma, tivanecanuhi níteca eta piyehe. Mavarahahi tichavayare eta pímairisira. Mavarahavare tiávahácaviya ema Espírítu Santo —máichapa.

18 Tacahe, enevanepa témitiaca eta tépacuchainihi eta máuquiha, téjami-hauquicha. Tichavapa eta máimairirisira. Tásiha, ema Saulo téchepucapa, matúpirupa ticaicachasi.

19 Te tamutupa, tinicapa. Tichavapa eta matumeva. Manasipanapa jena sácheana nayehe ena machamurianaríahi téhicanahi ema Jesús tayehe eta avasare Damasco.

Tépanavapa ticametarairu ema Saulo

20 Tacahe, tépanavapa ticametarairu ema Saulo te náurujsirareva ena israelítana. Máechajisihapa ema Jesús émairahi Machicha ema Viya.

21 Namutu ena tisamararacanahi, ichaperinehi nárami. Tásiha, nacahepa:

—¿Tájaha tacayema? Émara ema maca ema tipánajirícavacahi ena téhicanahi ema Jesús, ena ticavasana te Jerusalén. Tímitecahi te juca eta mapresuchirapanavacayarehi ena apamuriana, mámamurihayarehi nayehe ena tuparairucana eta te Jerusalén. ¡Tásiha puiti, émarinechavare ticametarairuhi mayehe ema Jesús! —nacahepa.

22 Émasera ema Saulo tiápajucavapanapa eta máitusira ticametarairu. Máimerecahi eta yátupiquenerahi ema Jesús émairahi ema Cristo, ema nacuchapaquenehi. Te tamutu eta náurujsirarevana ena israelítana eta te Damasco, macapaquechamuripa nácani ticatianacanahi eta véhiruhi.

Ema Saulo nacaratacayarepaini ena israelítana. Émasera tiyanapa tijuna.

23 Tayerevahi eta áñoana,* ena israelítana napanerechapa nacapacaya ema Saulo.

24 Émasera masamairiricapa eta náemauchirahi. Tamutu sácheana, yátiana nacunehi eta te acheneana máuchujisihayarehi, taicha ichape eta navarairahi nacapaca éna.

* 9:23 Te pivaraha pecha, pitanuca te libro Gálatas 1.18.

²⁵ Énasera ena machamuriana náitucahi eta nayumurusirahi náiyaracuhapa eta te ichape saye. Náitiacapa te tiupi enure. Tacahe, nacajuchucuhapa eta te apachacaya eta yúchama. Tacahehi eta máitujisiravahi tijuna.

Ena Saulo títecaparipa te Jerusalén

²⁶ Te títecapapa ena Saulo te Jerusalén, mavarahapa masiapamuriha ena náinapureanahi téhicanahi ena Jesús. Énasera napicarichucha éma, taicha vuíchaha nasuapahini eta máehisiraipa ena Jesús.

²⁷ Matiarhisera ena achane Bernabé. Émapa tiámahi ena Saulo tímimaticahi nayehe ena apóstoleana. Mametamurihapa eta máichararacavahi ena Saulo eta máimairahi ena Viáquenu Jesús eta te achene, étapa eta máechajisirahi, máichuirahivare ena Saulo. Mametacavare eta yátupirahi máituca ticametarairu ena Saulo mayehe ena Jesús eta te avasare Damasco.

²⁸ Tacahe, ena Saulo manasipa te Jerusalén. Masiapamurihapa éna, énapa macachanejiricavacahi. Vahi mapícarácavahíni eta macametarairuirahi mayehe ena Viáquenu Jesús.

²⁹ Máechajiricavacapahi ena israelítana[†] te jácani mácapajisihavacapahi. Macanaraemachavacahi éna. Vahi náuricahini eta máimiturapianahi. Tisemana ena mayehe. Tásiha, navarahapa nacapacaya éma.

³⁰ Nasamairicapasera ena machamuriana. Tacahe, náevatacapa mayana tayehe eta te mávasa Tarso. Náehicapa ena apamuriana tinapananayarehi tayehe eta avasare Cesarea, étapa nachavinehi. Tiánucuhapa éma, tiyanapa macarichupa.

³¹ Tacahe, tíuricavanapa ena náumurivana ena téhicanahi ena Jesús tiávihana te apanana avasareana tayehe te Judea, te Galilea, étapa te Samaria. Tásiha, tétumehacacananahi eta náimiyániravaya napícauchiraya ena Viáquenu. Máimicatamurihahivare ena Espíritu Santo. Eta tacahe, camurianapai-pavare ena téhicanahi.

Ena manarasirahi ena achane ticaijare Eneas

³² Tiuri, ena Pedro tiyanapa máejiravacapaipa ena machamuriana eta te avasareana. Títecapapa nayehe ena apamuriana machamuriana ticavasanahi eta te avasare ticaijare Lida.

³³ Matiarihi ena émana achane ticaijarehi Eneas. Macajumaquenehi éma. Ocho áñoripahi eta macajumairahi. Vaipa táurihini tiyamuriaca, váhivare máechepucahini te macamane. Tacahe, máitecapauchapa ena Pedro.

³⁴ Máichapa:

—Pésenicanu, Eneas. Ena Viáquenu Jesucristo ticanaracaviya. Puiti tájinapa eta pijumaini. ¡Pécheputa! —máichapa.

Tacahe, ena Eneas enevanepa técheputa. Tájinapa máichiravainahini.

³⁵ Tacahe, náimahapa eta manarasirahi namutu ena ticavasanahi tayehe eta te avasare Lida énapa ena ticavasanahi te tachacaya ticaijare Sarón. Eta náimairahi, náinajicapa eta nayeherepianaini. Tásiha, náehicapa ena Viáquenu Jesús.

Ena suápechirava títareca esu Tabita

[†] 9:29 Ena nani, yátupiqueneanahi israelítanahi, náuchureanahisera te jácaniana apanana avasareana. Táitusiava, apaechajiriruvanaripa eta ticaijare griego. Puiti tichavanaripa eta te Jerusalén, návasahi ena ticachichanaini.

³⁶ Te jena sácheanahi, sutiaríhi esu esena ticaijaru Tabita, eta suátserepíhi Dorcas. Ésu, ticavasahi eta te avasare ticaijare Jope. Ésurichuhivare téhichahi ema Jesús. Eta suítaresirahi esu suca esena, sucajivaca ena páureana eta suímahaqueneana. Tímicatarahi nayehe nácani ticaijuheanapahi.

³⁷ Te jena sácheanahi, esu Dorcas ticajumapa. Suvayuhapa, tépenapa. Tacahe, navehapa, náicachapa eta suáquehe. Nacasiapapa te tajuhe te anuquehe téqueneha piso.

³⁸ Eta juca avasare Jope tachacayaichuhi eta apana avasare Lida, eta mávihahi ema Pedro. Náecharipahi eta matiaríhirahi ema Pedro te Lida. Tacahe, navanecapa ena apinana ajairana, náichuhapanayare éma. Te náitecapauchapa, náichapa:

—Vivaraha viámavi puítirichu ánaqui te Jope. Pímahapanaini esu vémunaruquenehi vichamuri Tabita. Tépenaipahi —náichapa.

³⁹ Tacahe, tiyanapa ema Pedro, máheicavacapa éna. Te tútecapanapa, náimisiapapa eta te tajuhe suávihahi esu Dorcas. Namutu ena esenana máimaruana, te náimahapa ema Pedro, náurujiacapa. Tíyahanapa, náimechapa ema Pedro eta namuirihana superiruanahi ésu te achanerichaha.

⁴⁰ Tacahe, ema Pedro macavanairipipa náuchuca namutu. Tacahe, tépuyucapa éma, tiyujaracapa. Tacahe, máimarracaripa esu esena suépenaquene. Tásiha, máichapa:

—Tabita, péchepuca.

Tacahe, ésu téjamihauquichapa. Suímahapa ema Pedro. Téjahapaicapa.

⁴¹ Tacahe, macaratacapa eta suvahu, macaechepucapa. Énevanepa máichuhavaca ena máimaruana énapa ena apamuriana machamuriana. Máimechapa eta suchaviraipa tútareca.

⁴² Tacahe, náechapa namutu ena ticavasanahi eta te avasare Jope. Camurianarine ena tisuapanahi ema Viáquenu Jesús.

⁴³ Ema Pedro manasipanapa jena sácheana tayehe eta avasare te mapena ema machamuríhivare ticaijare Simón, náimijarechavare Suélareru.

10

Éma Viya mavaneca ema Pedro máimitupanayare ema Cornelio

¹ Te jena avasare ticaijare Cesarea matiaríhi ema émana achane romano ticaijare Cornelio. Militar ema achane. Eta mávacure ema capitán, comandante te étana compañía tayehe eta batallón ticaijare Italiano.

² Ema maca achane mapicauchahi ema Viya. Tamutuhi sácheana tiyujarauchavahi. Máimitucavacahivare namutu ena machichanaveana énapa ena tiávihanahi te mapena. Énerichuvare máimicatacavacahi ena israelítana páurequeneana, máijaracahi eta camuri plata.

³ Te jena sache, las trésquenepa cáperehi, ema Cornelio tiyujaracahi. Tíjahúchavapa máimaha máucupauchahi ema émana ángele mavaneruhi ema Viya. Máechajicapa ema ángele, máichapa:

—¿Pícharacava? Cornelio —máichapa.

⁴ Tásiha, ema Cornelio tipicarínehi eta máimarrasirahi ema ángele. Majicapapa:

—¿Tájaha pivaraha eta nuyehe, tata?

Tásiha, máichapa ema ángele:

—Tímitecanuhi numetacavi. Eta piyeheana oración piyujarauchiravana étapa eta pímicatasiravacahi ena ticamunuvana páureana, táitecapauchahi tamutu ema Viya.

⁵ Pímvianereca puiti náepana ema achane ticaijare Simón, eta máchucarapihivare Pedro. Ema tíavíhahi puiti te jena avasare ticaijare Joje.

⁶⁻⁷ Eta peti máitecapihahi mapena ema apanavare Simón ema náimijarechaqueneva Suélareru. Eta táviha eta peti mapenahi te tachaui eta mar. Ema maca Pedro ema timetacaviyare eta pítauchaqueneánayare —máichapa ema ángele.

Te tamutupa eta máechajisirahi ema ángele, tiyanapa tichava. Tacahe, máichuhapa ema Cornelio ena apinana mamusurana. Máichuhavare ema émana masuntarura. Énerichuvare tipicaurahi mayehe ema Viya, títaurahivare mayehe ema máquenuhi.

⁸ Tacahe, mametacavacapa eta mametarapi ema ángele. Tacahe, máevatacapa tayehe eta avasare Joje.

⁹ Te apanapa sache, tiánehanapáipa ena vanairucana tayehe eta avasare. Te jena las dócequenepa sache, ema Pedro tiápanapa eta te téquenepa piso. Tiyujaracayarehi.

¹⁰ Técuháipaicha éma, taicha tájinarichaha manicahini. Vuíchaha náimaquerecchini eta tinicacare. Tacahe, eta mayujarasirahi máimahapa téjiacahi eta anuma.

¹¹ Máimahavare eta tiúcupaicapahi eta te mávihahi éma, tacutiyaréni eta ichape sávana. Ticaitiapusivacapahi te esquinana.

¹² Camuri eta sárareana, quichareana, cáyureana, támaqueneanapahi eta sávana, tamutu eta apánapanenéjiqueneána sárareana.

¹³ Tásiha, masamapa ema téchajicahi te anuquehe. Máichapa:

—Pécheputa, Pedro. Picapaca étanaina sárare. Pinica.

¹⁴ Émasera ema Pedro, majicapapa:

—Vahi, Tata. Tituparacahavi vahi vicunicahini vinica viti israelítana eta juca sárareana vicajachaqueneana, vinicahini. Tájiha nímatiya nunicahini eta juca —macahepa.

¹⁵ Tiápechavavare máechajica ema Viya, máichapa:

—Vahi picuimijarecha ticajachacareana eta níjararuvianahi tinicacareana —máichapa ema Viya.

¹⁶ Mapahe eta máechajisirahi ema Viya ema Pedro. Tacahe, tichavapa eta sávana tiápana te anuma.

¹⁷ Ema Pedro manasirichaha macájarasamúrehi eta mapanerechirahi tájahapuca tacayemahi eta máimahaquenehi. Títecapananecha te tapaja ena vanairucana mayehe ema Cornelio. Nacayasesererupaipa eta mapena ema Simón Suélareru.

¹⁸ Eta náitecapirahi, nacayasesererupa te éhahipuca mávihahi ema Simón Pedro.

¹⁹ Émasera ema Pedro manasirichaha tipanererecarichaha taicha eta máimahaquenehi. Tásiha, ema Espíritu Santo máichapa:

—Nararihi te juca ena mapanana títanucavianapahi.

²⁰ Piyana pímahavaca éna. Vahi picueñamava eta péhisiravacayare, taicha núti nuvanecavacahi éna —máichapa ema Espíritu Santo.

²¹ Tacahe, masuapapa ema Pedro. Tiúchucapa tiyanapa nayehe ena títanucanapahi. Te máitecapauchavacapa, máichapa:

—Nútira etanurepahi éti. ¿Tájaha tímitecahehi?

²² Tásiha, najicapapa éna:

—Tivanecahavihi ema capitán Cornelio. Ema achane tipicaurahi mayehe ema Viya. Títurahivare nayehe ena achaneana. Namutu ena israelítana napicaucha náemunacavare éma. Puiti víti, vítecapauchavipa, taicha cape juca, ema ángele mavaneruhi ema Viya mametapanahi ema Cornelio máimichuhavi píteca te mapena, apaesa masama eta pimetarapianaya —nacahepa éna.

²³ Tacahe, ema Pedro macasiapavacapa te tajuhe. Nanasipa jena yati mayehe ema Pedro. Te apanapa sache, tiyananapa. Náehicapa ema Pedro ena apamuriana machamuriana ticavasanahi te Jope.

²⁴ Te apanaquenepa sache, napaenumavapa títecapana te avasare Cesea. Ema Cornelio macuchapaipahi te mapena. Tiúrujicavanaripa ena majaneanana énapa ena máemunacasáreana máichuhaqueneánahi.

²⁵ Te títecapapa ema Pedro te mapena ema Cornelio, mácapapa máepuyumi-rauchapa matsiucayarepa.

²⁶ Émasera ema Pedro máichapa:

—Péchepucachucha pitupiha. Vahi táurichahini pitsiucanu, taicha nútirichuhi picutiquenehi achane —máichapa.

²⁷ Te tamutupa eta náechajisirahi, tisiapanapa te tajuhe. Máimaharine camurianahi ena náurujiruvanahi.

²⁸ Tacahe, ema Pedro máichavacapa:

—Écharichu éti eta viyeherepiana viti israelítana. Vahi tituparacahavi visiapamurihahe eti apavasanana. Émasera ema Viya tivanecanuhi eta vahi nupicapa eta nusiapamurihairaheyare. Nájinavare nunerejirumahi nácani ticajachacareana.

²⁹ Eta tacahehi, nítecanepa. Tájina nácyemahini. Tiuri puiti, nuvaraha néchaya. ¿Tájahapuca eta tímichuhanuhi? —macahepa.

³⁰ Tacahe, ema Cornelio majicapapa:

—Cuátropa sache eta táetavisiravahi eta juca nímahaquenehi. Te jena cáperehi sache hora las tres, nútí nunasiquenehi te juca nupena. Ayunanuhi nuyujaracahivare. Tíjahúchavapa tímercava ema ángele. Tijanunuca eta mamuiriha.

³¹ Máichanupa: “Cornelio, ema Viya masamahi eta piyeheana oración piyujarasirana. Táitecapáuchahíavare eta pímicatasiravacahi ena ticamunuvana páureana.

³² Pímivanerecaya puiti náepana ema achane ticajare Simón, eta máchucarapi naicha Pedro. Ema tiávihihi puiti te jena avasare ticajare Jope. Eta peti máitecapihahi ema apanavare Simón ema náimijarechaqueneva Suélareru. Eta távihahi eta peti mapenahi te tachusi eta jena mar. Te máitecapapa ema Pedro, éma tímítucaviyare” máichanupa ema ángele.

³³ Tacahe, enevanepa nímicuhavihi. Tájinasera táichiravainahini eta pítesirahi. Tímararacahávihi ema Viya eta juca viúrujisiravahi puiti. Vivaraha visamaviya tamutu eta pimetasivanahi mayehe ema Viya —máichapa ema Cornelio.

Ticametarairupa ema Pedro te mapena ema Cornelio

³⁴ Tacahe, tépanavapa ticametarairu ema Pedro. Ánipa macahe:

—Nucaicutiarapa puiti vahi vácarichu viti israelítana vijacapacare mayehe ema Viya.

³⁵ Namutuchucha majacapavaca nácani tipicauchanahi éma, tichanahivare eta táuriqueneana.

³⁶ Taicha cape juca ema Viya macaitcapahi eta máechajiriruva viyehe viti israelítana. Tivanecahavihi vimetacavacayare eta najacapacarevahi me Viya nácani ticasañavanahi mayehe ema Jesucristo, maperdonachiraripa ema Viya eta napecaturana. Émara Viáquenu vituparaha téchapajiricahaviya vimutu viti achaneana: viti israelítana, étipa eti apavasanana.

³⁷⁻³⁸ Écharichupuca éti eta táichararacavahi te viávasa Judea cape juca táitaresirahi. Te ticaicachasipa ema Jesús Nazareno mayehe ema Juan, máucupauchapa ema Espíritu Santo máijjararuihi ema Viya. Mávahácapa éma, máijjaracaripa eta máitupajijiásiravaya. Tacahe, tépanavapa ticametarairu nayehe ena achaneana ticavasana te Galilea. Te jácani mapaisihapahi, máichapahi eta táuriqueneana. Macanaracavacapahi ena nacatajivaqueneana mávaháruanahi ema Váinaraji. Maratahahi éma máichahi eta juca, taicha ema Viya máimicatacapahi.

³⁹ Tiuri, viti véchajisiha eta juca, taicha vímahaquenehi tamutu eta máichaqueneanapahi ema Jesús tayehe eta mapaisineanapahi avasareana te Judea, étapa te Jerusalén. Énasera ena tuparairucana nacatichahi éma; náemetatarecapa te crusu eta náimicapasirahi.

⁴⁰ Émasera ema Viya macaechepucahi te máecari te mapanaquenepa sache. Tásiha, máimerecavare te vimuri eta machavirahi títareca.

⁴¹ Vaipa námutihini ena achaneana náimahahini. Vítinecha vímahaparacahi viti manerejiruanahi ema Viya. Vinecapaequenehahi tamutu eta vicachanerahi ema Jesús te vinisirana. Tásiha puiti, vimetacahiva ena achaneana eta vímahaqueneanahi.

⁴² Taicha tivanecahavipa vicametarairuya. Vimetacayare eta émairahi ema Jesús viyeheyarehi Juez viti achaneana énapa ena náepenaqueneana. Taicha ema Viya ema tituparacahi eta mávacureyare juésyarehi.

⁴³ Étaripa eta acane namutu ena profetanaini náechajisihahi ema Cristo. Ánipa nacahehi: “Namutu ena tisuapanaya ticasañanaya ema Cristo, maperdonachavacayare ema Viya tamutu eta napecaturana táichavene eta nacasiñaraya ema Cristo”.

Eta mávahásiravacahi ema Espíritu Santo ena apavasanana

⁴⁴ Tímiyanavarichaha eta máechajisirahi ema Pedro, tiúcupaicapa ema Espíritu Santo. Mávahácapa namutu ena tisamararacanahi eta mametarairuihi ema Pedro.

⁴⁵⁻⁴⁶ Tíjahúchavapa ena mávaháruanahi apáechajirírivanapa. Nacuna-charipa ema Viya. Nasamapa ena machamurianapahi ema Pedro tíásihanahi te Jope. Náraminehi éna eta mávahásiravacahi ema Espíritu Santo ena apavasananahi, taicha ena israelítana náimijachahi nacarichu ena mávaháruanahi ema Espíritu Santo.

⁴⁷ Tacahe, ema Pedro máichavacapa:

—Tájina náechajisiacarevaimahi eta nacaicachasiraya ena nani, cápachi mávahácaripa ema Espíritu Santo vicutiripa víti eta mávahásirahavihi — máichapa.

⁴⁸ Tacahe, macavanairipipa nacaicachasi namutu te máijare ema Viáquenu Jesucristo. Te tamutupa, nayaseacapa ema Pedro vahi macuyanavanehini. Tacahe, manasipanapa te jena sácheana eta nayehe.

11

Eta mametarapiana ema Pedro nayehe ena machamuriana te Jerusalén

¹ Tacahe, téchacarevanepa te Jerusalén eta nasuapirahi ena apavasanana eta máechajiriruva ema Viya. Tásiha, napanerequenehapa ena apamuriana apóstoleana énapa ena náumurivana.

² Tásiha, te títecapapa ema Pedro te Jerusalén, nacajachapa ena apamuriana máinajarahanaichaha eta nayeherepiana ena israelítana.

³ Ánipa naicha:

—¿Tájaha tacayema péjirapanavacahi ena apavasanana? ¡Písapavavare pinica te namesara! —náichapa.

⁴ Tacahe, ema Pedro máichapapa mametacapa eta máicharacavahi eta mapaisirahi. Ánipa maicha:

⁵ —Esamanuchaha. Te návihaipa te avasare Jope, nuyujaracapaihi. Nímahapa téjiacahi eta anuma. Nímahavare eta tiúcupaicapahi tíásiha te anuma tacutiyaeni eta ichape sávana. Ticaitiapusivacapaihi te esquinana. Títecapapa te návihahi nútí.

⁶ Nímahapa eta apánapanenéjiqueneána sárareana támaqueneanapaihi eta sávana. Tátiarihi eta táíñehiqueneana sárareana, quichareana, cáyureana.

⁷ Tacahe, nusamapa eta mahu ema Viya, máichanupa: “Pécheputa, Pedro. Picapaca étanaina sárare. Pinica”.

⁸ Nútisera nujicapapa: “Vahi, Tata. Tituparacahavi viti israelítana vahi vicunicahini eta juca sárareana vicajachaqueneana. Tájina nímatiya nunicahini eta juca”.

⁹ Tacahe, tiápechanuvare téchajicanu ema Viya, máichanupa: “Vahi picuimijarecha ticajachacareana eta níjararuvianahi tinicacareana” máichanupa.

¹⁰ Mapahe eta juca máechajisiranuhi ema Viya. Te tamutupa, tichavapa tiyapa te anuma tamutu.

¹¹ Étarichu jena hora, títecapanapa ena mapanana ajairana titanucanuanapaihi eta te peti nítecapihahi nútí. Mavaneruanahi ema émana achane ticavasahi te Cesarea.

¹² Tacahe, ema Espíritu Santo tivanecanupa néhicavaca éna, taicha tájina táéñamavacarehini. Énerichuvare téhicanuanapa ena nani sáisiqueneana vichamuriana. Vimutuhi visiapa eta mapena ema achane.

¹³ Timetacahavipa éma eta máimairahi ema ángele tiúcupauchahi eta te mapena. Titupihahi te mamirahu. Tacahe máichapa: “Pímivanereca puiti náepana ema achane ticajare Simón, eta máchucarapi naicha Pedro.

¹⁴ Ema maca Pedro, ema timetacaviyare eta piúchucuiraya, píti, esu piyena, énapa ena pichichanaveanahi” máichapa ema ángele.

¹⁵ Tacahe, népanavapa nímitucavaca ena náurujiರುವanahi. Te néchajicaipa, títahúchavapa tiúcupaica ema Espíritu Santo nayehe éna. Mávahácavacapa tacutihi eta mávahásirahavihi viti te tépanavainapa.

¹⁶ Tacahe, enevanepa néchavahi eta mametaruhavihi ema Viáquenu Jesús. Áni macahehi: “Échavarichu ema Juan máicachasicahi te une ena achaneana.

Étiserá tiúcupauchaheyare ema Espíritu Santo. Éma, tícachasicaheyare tiávahá-cahénapa” tacahehi eta máechajiriruvahi.

17 Tiuri, ema Viya máijaracavacahi ena apavasanana ema Espíritu Santo táichavenehi eta náehisirahi ema Viáquenu Jesucristo, tacutihi eta máijarasi-rahavihi víti. Tásiha, váiparinehi nácapaemachaimahi núti eta mavaraha-quenehi ema Viya —máichavacapa ema Pedro.

18 Tacahe, ena ticajachanahi ema Pedro, te náechapa, timatinanapa. Nacunachainehi ema Viya, nacahepa:

—Yátupirichuhi eta majacapiravaca ema Viya ena apavasanana eta náeneuchiravaina. Nácutihavihini víti eta visiapirayare te anuma, máichecua-raquirénapa eta vítaresiraya maicha ema Viya —nacahepa.

Náheicavare ema Jesús ena achaneana ticavasana te avasare Antioquía

19 Te jena sácheana, te nacapacapa ema Esteban, napanajicavare ena apamuriana téhicanahi ema Jesús. Eta tacahe, tijunanapa. Téjanerepáicanapa tiyananapa te Siria, ena apamuriana tiyananapa te tiúrupuhi te mar ticajare Chipre, ena apamuriana te avasare Antioquía. Te jácani náitecapihapahi, ticametarairuanapahi mayehe ema Jesucristo nayehe ena najaneanana israelítana. Vuíchaha nametacahini ena apavasanana.

20 Tásiha, títecapanapa ena apamuriana* eta te avasare Antioquía. Énaserá ticametarairuanapa nayehe ena apavasanana. Nametacavacapa, ánipa naicha:

—Te esupa éhica ema Viáquenu Jesucristo, éma ticuchucuhaheyare eta ícuñayaréni taicha eta epecaturana —náichapa.

21 Ichape eta tasuapacarevahi eta nametarairuana taicha ema Viya máimicatavacahi. Eta tacahehi, nasuapahi ena camuriqueneana achaneana. Náinajicapaipa eta nayeherepinihi tamauriqueneana, náheicapa ema Jesús.

22 Te nasamairiricapa ena nachamuriana ticavasananahi te Jerusalén eta juca téhacareanahi te avasare Antioquía, ticaevatapa ema Bernabé, mayana macaicutiarapana te yátupihipuca.

23 Tacahe, te títecapanapa éma te Antioquía, máimahapa eta máimicatasira-vacahi ema Viya. Tiúrisamureinehi. Maconsejachavacapa namutu éna eta náetumechiracacaina eta náehisirahi ema Viáquenu. Vahi nacucainajiruva te tatiarihinapuca jácani náichavaquenevaya.

24 Taicha ema Bernabé, tétávicavahi eta máuriva. Mávaháruhivare ema Espíritu Santo. Tisuapajirahi éma. Tacahe, camurianahi ena tisuapanahi téhicanahi ema Viáquenu maicha ema Bernabé.

25 Te táequenepa eta juca, ema Bernabé tiyanapa te avasare Tarso. Matanupanapa ema Saulo.

26 Te máetupiacapa, mámapa te avasare Antioquía. Tacahe, nanasipa ánaqui. Étana año nacahe eta nacachaneravacahi ena nachamurianahi. Camuriana ena náimitureanahi. Te jena avasare Antioquía, táepaninevahi eta nacaija-rerahi cristianoana namutu ena téhicanahi ema Jesús.

27 Te jena sácheana, natiarihihí te Jerusalén ena profetana máijararuanahi ema Viya eta máechajiriruvana. Tacahe, tiyananapa nacaijuhe te Antioquía.

* 11:20 Ena nani téhicanahi ema Jesús, yátupihí israelítanahi éna. Náuchusinehisera éna te apanana avasareana: te jena avasare Cirene, étapa eta avasareana táunavanahi eta tiúrupuhi ticajare Chipre.

²⁸ Te títécapanapa, ema émana ticaijare Agabo titupihapa te namuri ena machamuriana. Macaimitucasiquenehi éma mayehe ema Espíritu Santo. Mametacavacapa eta tatiarihiyare eta ecuha te tamutu avasareana. (Eta juca táichavaquenevahi eta ecuha te avasareana te jena áñoanahi matupihairahi ema aquenucaini Emperador Claudio.)

²⁹ Tacahe, ena téhicanahi ema Jesús ticavasana te Antioquia napanerechainapa náimiamarecaya eta nanaquiruana, náimicatasiraya ena nachamuriana ticamunuvanahi, énaripa ena ticavasanahi te Judea.

³⁰ Tacahe, tinaquiquicavanapaipa eta naratahaqueneya nanaquica. Tacahe, náimiamarecapa mayehe ema Bernabé émapa ema Saulo. Náijaracayarehi ena náiyarahana pastoreana. Énapa tíjaracanayarehi ena ticamunuvanahi.

12

Nacapacapa ema Jacobo. Náeratacapa ema Pedro.

¹ Te jena sácheana, matiaríhi ema rey ticaijare Herodes Agripa. Ema macavanairipipa nacaratacavaca ena tachutirihanapahi ena téhicanapahi ema Jesús, náemecharecavacapa.

² Énerichuvare, máimicapacavare ema apóstole Jacobo maparapeni ema Juan. Nayuchatipiquenuhapa eta nacapasirahi.

³ Tacahe, ema rey, eta máimairahi náurisirahi ena ticatianacanahi ema Jesús, máimicaeratacavare ema Pedro. Te jena semanahi, napiestarahi ena israelítana eta nanisiraya eta pan mayehere levadura.

⁴ Eta nacaeratasirahi ema Pedro, náimisiapapa te cárcel. Navanecapa ena dies y seis suntaruana tijaneacanaya te machacaya. Cuátromurianahi ena patrullanahi. Ema Herodes Agripa, mapanerechahi macapacayareva ema Pedro te namirahu ena achaneana te táequeneraya eta napiestara.

⁵ Tacahe, ema Pedro, muracahi eta najaneasirahi te cárcel. Énaserá ena machamuriana tiyujaracanahi me Viya. Nayaseacahi ichape eta nasamacarevaina máuchucuiraina ema Pedro.

Ema Viya macuchucuha ema Pedro tayehe eta cárcel

⁶ Tacahe, ema Herodes Agripa máijarechapa eta sache eta máemepaniraya te cárcel ema Pedro eta nacapasiraya te namirahu ena achaneana. Te jena yati tamirahupa jena sache, ema Pedro tímacahi te nachacaya ena apinana suntaruana. Ticaitiahi te apipi cadenana. Ena apinanavare suntaruana najaneacahivare eta tapaja.

⁷ Tíjahúchavapa tímerecava ema ángele mavaneruhi ema Viya. Tijarahijuheinehi eta cárcel. Tacahe, ema ángele macayamuricapa ema Pedro. Macajamicapa. Ánipa maicha:

—Pedro, péjamica. Pécheputa —máichapa ema ángele.

Tíjahúchavapa téjapumuriha eta cadenana máitihanahi te mavahu ema Pedro.

⁸ Máichavare ema ángele:

—Picapitijuechava eta pítiyuhe. Pinaca eta péparupevana.

Tacahe, ema Pedro masuapahi. Tacahe, ema ángele máichavarepa:

—Pinaca eta pépacuhasa. Yare, péhicanu —máichapa.

⁹ Tacahe, ema Pedro máehicavanepa ema ángele. Ema Pedro váhi máimatihini eta máicharacavapahi, máimijacharichucha mavapure.

¹⁰ Tacahe, náetavicapa ena títapucana sentinélana, náetavicavare ena apamuriana. Títécapanapa eta te tapajacura eta cárcel. Eta tapajacura amairihahi fierro tijitacarehi. Témunahiricavapa téjiaca. Tiúchucanapa te aneca te calle. Te tiyerehianapa eta napaisirahi, majuniicapa ema ángele.

¹¹ Tacahe, ema Pedro mapaenumavapa macaicutiara. Macahepa:

—Nímahapa puiti eta yátupirahi tijaneacanuhi ema Viya. Mavanecahi ema ángele ticuchucuhapananuhi eta macapasiranuyarehini ema Herodes énapa ena nujaneanana —macahepa.

¹² Tipanererecapaipa eta mapaisirapahi. Matupirupa te supena esu María, maena ema Juan ticajarehi puiti Marcos. Éta, náurujisihavahi nayujarahahi ena camuriqueneana machamurianahi.

¹³ Títécapanapa ema Pedro te tapajacura eta nayehe canchón. Máehahamecapa eta tapaja. Tacahe, esu esena amaperu ticajaru Rode, tiyanapa suímahapana nájahapuca ema téhahamecachi eta tapaja.

¹⁴ Suímatahuchavanepa ema Pedro, váhisera suvéjiáequenehahini eta súrisamurevahi. Tiyana tijunapa te tajuhe, sumetapanavacapa eta matiarihirahi ema Pedro te aneca te tapaja.

¹⁵ Énasera vahi nasuapahini. Tacahe, náichapa:

—Máurishivipapuca píti.

Ésusera sumetacarichucha eta yátupirahi. Énasera náichavarepa:

—¡Váhipuca émaina! Émapuca ema mayehe ángele ema tijaneacahi —nacahepa.

¹⁶ Émasera ema Pedro tímianavarichucha máehahamecachi eta tapaja. Tacahe, tiyananapa navéjiáequeneha. Náimaharine émasarehi. Tiáramecanarinehi éna.

¹⁷ Émasera máimicutiarachapa te mavahuana eta namatina. Tacahe, mametacavacapa eta macuchucuirahi ema Viáquenu tayehe eta cárcel. Te tamutupa eta mametasiravacahi, máichapa:

—Emetapana ema Santiago* énapa ena apamuriana vichamuriana —máichapa.

Tacahe, tiúchucapa tiyanapa te apana avasare.

¹⁸ Te tijarahipa, ena suntaruana tinanesicarajianaipa taicha vahi náechahini tájahapuca eta máicharacavahi ema Pedro.

¹⁹ Tacahe, ema Herodes Agripa máimivanerecapa natanuca ema Pedro. Májinasera náetupiacahini. Eta namaetupiasirahi, ticayaserehianapa ena suntaruana tijaneacanuhi. Nájinasera émanainahini nanecapahini eta máchusirahi ema Pedro. Tacahe, macavanairipija ema Herodes nacapacavaca ena suntaruana. Te tamutupa eta juca, tiyanapa ema Herodes te apana avasare Cesarea; étapa mávihahi.

Eta máepenirahi ema Herodes Agripa

²⁰ Te táequenepa, ema Herodes Agripa tise mapa nayehe ena achaneana ticavasana te Tiro étapa te Sidón. Énasera náimivanerecapa mayehe ema Herodes. Tiyaseserecanapa eta náurivaina mayehe éma. Taicha eta návasanahi táitecapauchahi eta tinicacare tiásihahi eta te mávasa ema rey. Tacahe,

* **12:17** Ema maca achane, maparapehi ema Jesucristo. Te náechajirirua ena israelítana, ticajare Jacobo. Te véchajirirua ticajarehi Santiago. Émarichuhi ema tájucharahi eta carta ticajarehi Santiago.

nacasiñapa ema Blasto, ema majupaha ema rey, máechajiuchavacaya eta náurivaina.

²¹ Tacahe, ema Herodes máijarechapa eta sache, máimichuhairaya ena achaneana eta jena sáchequenehi. Ticamuirihapa ema rey eta mamuiriha tiúrina. Téjacapa ema Herodes te máejasirare. Téchajicapa.

²² Tacahe, ena achaneana eta nasamirahi éma, tipiaracanapa. Nacahepa: —¡Ema maca téchajicahi váhiya achaneana! ¡Viya ema maca! —nacahepa eta nacunachirahi éma.

²³ Tacahe, tíjahúchavapa ema émana ángele mavaneruhi ema Viya máijaracapa eta majumahi ema Herodes Agripa. Taicha ema Herodes tímijachavahi Viya, máuricaipahi eta náejirairahi natsiusirahi ena achaneana. Eta tacahe, tanicapa eta vusanuana te majuhe. Tacapacapa.

²⁴ Tacahe, tavetijipaipaicha camurianapa ena achaneana tisuapana eta máechajiriruvana ema Viya.

²⁵ Te títavanapa eta natuparahahi ema Bernabé ema Saulo, tichavana-varepa te avasare Antioquía. Námapa ema Marcos.

13

Ena Bernabé émapa ema Saulo tépanavanapa tipaicana ticametarairuanayare

¹ Ena téhicana ema Jesús ticavasanahi te avasare Antioquía, natiarihi te namuri ena ticametarairurahiana eta máechajiriruva ema Viya. Tímiturahianahi éna. Natiarihichaha ema Bernabé émapa ema Saulo. Natiarihivare ema Simón (ema náimijarechavare Negro), émapa ema Lucio (eta máuchusinehi te avasare Cirene), émapa ema Manaén (ema machajuruhi ema Herodes Antipas, machicha ema Aluresini).

² Étana sache, ticurujicanapa eta nayujarasirahi me Viáquenu. Náichahivare eta ayuna. Tacahe, máechajicavacapa ema Espíritu Santo. Máichapa:

—Ema maca Bernabé émapa ema Saulo, natuparahaichuhi ticametarairuanaya taicha nunerejiruanahi éna. Évatasinanuya puiti ena nani apinana —máichapa.

³ Tacahe, titsecavanapa ena apinana eta napaisiraya. Te tamutupa, tíápechavanapa nahayunacha namutu. Eta nayujarauchirahi, nanacapa eta navahuana te nápusiana ena tipaicamayare. Nayaseacapa ema Viya eta táurivainapahi eta napaisiraya. Tacahe, ticametavanapa. Tiyananapa.

Ena Bernabé émapa ema Saulo tépanavanapa ticametarairuana te tiúrupuhi Chípre

⁴⁻⁵ Tacahe, ena nani ema Bernabé ema Saulo, mavaneruanahi ema Espíritu Santo, tiyananapa te puerto ticaijare Seleucia. Máehicapahivare ema Juan Marcos. Tímicatarecapahi nayehe. Tacahe, tíánuecanainapa nacaijuheya eta tiúrupuhi ticaijare Chípre. Te títecapanapa te puerto ticaijare Salamina, tiyananapa eta te náurujisirárevana ena israelítana (taicha tamutu avasareana tatiarihíahi eta nayehe sinagoga). Ticametarairuanapa eta máechajiriruva ema Viya.

⁶ Tamutu napaica eta táichapevahi eta tiúrupuhi. Títecapanapa te avasare ticaijare Pafos. Ánaqui matiaríhihi ema émana israelita ticaijare Elimas Barjesús. Iápemare ema maca. Tépiyahirahivare tímijachavahi máimati ema Viya.

7 Ema maca iápemare macachanejiricahi ema Prefecto Sergio Paulo. Ema maca Prefecto, téchemarahi. Tásiha, máimivanerecapa náichuhapana ema Bernabé émapa ema Saulo, taicha mavarahahi masamaya eta máechajiriruva ema Viya.

8 Émasera ema maca iápemare macatianacavacapa éna. Mayurucapa ema Prefecto eta vahi macusuapa eta máechajiriruva ema Viya.

9 Tacahe, ema Saulo (éma ticaijarehi puiti Pablo), mávaháruquenehi ema Espíritu Santo, máimararacapa ema iápemare.

10 Tacahe, máichapa:

—¡Tivayuarahitataji matsiriarairaha! ¡Piti machicha ema Váinaraji! ¡Piti picatianaca tamutu eta táuriqueneana! Píti píchejimiráuchavacahi ena tivarahana téhicana ema Viáquenu. ¡Pínajica eta juca piváinarajivahi!

11 Puiti ema Viya tícuñacaviyare. Púchuquiviyare máicha. Tiyereyare eta vahi pímahaimahi eta tajaraiwa eta sache —máichapa ema Pablo.

Jéhesaréinehi, tíjahúchavapa témaha eta máimairirisira, púchuquipa ema iápemare. Tacahe, matanucapa ena tichurucanaya te mavahu.

12 Te máimahapa ema Prefecto eta juca, tipicarinehi. Tásiha, masuapapa eta masamirahi eta náimiturapiana ena apóstoleana mayehe ema Viáquenu Jesús.

Ema Pablo émapa ema Bernabé tiyananapa tayehe eta avasare ticaijarevare Antioquía Ichipichu

13 Tacahe, ema Pablo énapa ena macompañeroana tiávacuhanapa. Najunijicapa eta Pafos. Tiyananapa tayehe eta avasare Perge táunavahi eta provincia Panfilia. Te títecapanapa te Perge, eta jena sácheanahi, ema Juan Marcos majunijicavacapa éna. Tichavapa te Jerusalén.

14 Éna, tiánucuhanapa nacaijuhepa eta avasare Antioquía Ichipichu te tinapaica eta Pisidia. Te títecapanapa, te apanapa sache sávaru, tisiapanapa eta te náurujisirareva ena israelítana eta nayujarauhira. Téjacanapa.

15 Tacahe, tisiapanavarepa ena tuparairucana tayehe eta náurujisirareva. Náechajicuhapa ánihi eta Sagrada Escritura májurehi ema Moisés étapa eta nájurehi ena profetana. Te tamutupa eta náechajicuirahi, nayaserecapa ena aráitecapanahi. Náichapa:

—Viparapenaveana, te tatiarihipuca eta échajisihayare consejo viyehe viti, táuricapa econsejachahavipa —náichapa.

16 Tacahe, ema Pablo titupihapa. Macanuquechapa eta mavahuana eta máechajisirayarehi, mavarahahi tauri eta nasamiraina (taicha tacahehi eta nayeherepi). Ániha macahe:

—Esamanuchaha, nuparapenaveana israelítana. Étipa eti epicaurahianahi mayehe ema Viya.

17 Ema Viya vicasiñaquenehi viti israelítana manerejicavacahi ena viáchucanaveánaini. Te návihaiçhaha te apanaquene avasare ticaijare Egipto, macaejapacavacahi ena nachichanaveana. Énerichuvare, te máiputsicavacapa te jena avasare návinénihi, máimerecapahi eta máitupajijiasiravahi máimicatasiravacapahi éna.

18 Tásihasera, cuarenta año eta macamichirahi ema Viya eta náejecapirávana tayehe eta návihairahi te mávapahi vamáhi.

19 Te táequenepa, macamitiequenehavare eta siétequene avasareana ena apánapanéjiqueneána ticavasanainihi te Canaán. Tásiha, máijaracapa ena

viáchucanaveanaini eta jena apaquehe natuparahaquenehi maicha ema Viya.

²⁰ Tacahe, 450 año eta majaneasiravacahi, mavanecapa ena juéseanaya téchapajirícanayarehi. Tacahe, tíamainucavapa te tijurucapa ema profeta ticaijare Samuel, máequeneréruhi nayehehi juez.

²¹ Tacahe, éna nayasecapa ema Viya ema nayeheyarehi rey. Tásiha, máijarasihapa ema Viya ema nayeheyarehi rey ticaijare Saúl, machicha ema Cis, mámariequenéni ema viáchucaequenéni Benjamín. Cuarenta año eta macatuparahairahi.

²² Te táequenepa, ema Viya máitsivachapa ema Saúl. Ticaijarapa ema David, émapavapa reyhi. Taicha macahepa ema Viya: “Nímararacahi ema David, machicha ema Isai, núrica ema máurivahi. Taicha máitauchayare tamutu eta nuvanairipianaya” macahepa ema Viya.

²³ Tiuri, eta máechajiriruvahi ema Viya, matiarihiyare ema émana mámariequeneyare ema maca David tíuchucayarehi ema Ticatiurahiyare viyehe viti israelítana. Puiti vimetacahe eta máimeresiravaipa ema Jesús ema Tícatiurahiyene viyehe.

²⁴ Te tamirahupaichaha eta máimeresiravayarehi ema Jesús, ticametarairuripa ema Juan nayehe ena achaneana vijaneanana israelítana. Mavane-capahi eta náeneuchiravaina náinajisiraina eta napecaturana, étapa eta nacaicachasiraina. Títecapapa eta sache máitauchiraipa ema Juan tamutu eta mavanahianahi me Viya. Ticametarairurichaha ema, máichavacapa ena achaneana:

²⁵ “Ímijachaipapuca nútihi ema Cristo, ema vicuchapaquenehi. Váhira nútina. Títecapainapasera éma, téhicanupahi te néquene. Malayarinehi núti nácutinasihini eta máitupajjiasiravahi éma. Váiparinehi nácaemuñavaimahi macamusuranuhini nuti páuresami” máichavacapa ema Juan.

²⁶ Esamanuchaha, emutu eti nujaneanana, eti nucutiqueneanahi eta mámariequenerahavihi ema viáchucaini Abraham, étipa eti apamuriana epicaurahianahi mayehe ema Viya. Ema Viáquenu tivanecahavi vimetacahyare yátupina eta iúchucuirayare éti apanava, te ecasiñava me Jesús.

²⁷⁻²⁹ Máchusera ácutihini ena tuparairucana te Jerusalén, énapa ena ticavasanahi te jena avasare. Tamutu eta sávaruana eta náurujisiravana, náechajicuhaparacahi eta libro nájuchaquenehi ena profetanaini. Váhiserá nácaicutiarahini. Eta tacahehi, vahi náimatihini ema Jesús eta émairahi Cristo. Váhivare najacapahini. Éma, tájinahinéni matapiravainahini taviuchahini eta táimicapacahini. Énasera nayasecapa ema Pilato eta máimicapasiraya. Tacahepa masuapapa éma eta nayasearapihi. Tásiha, te títauchavapa eta nacapasirahi, ena máimitureana nacucupaica te macurusura, náecarapa. Tacahehi eta táitauchiravahi tamutu eta nametarapiana ena profetanaini eta máicharacavayarehi ema Cristo eta máepenirahi, taicha tacajuquenehi éta te Sagrada Escritura.

³⁰ Émasera ema Viya macaechepucahi te máecari.

³¹ Tacahe, camuri eta sácheana máimeresiravahi ema Jesús nayehe ena máimitureana, ena nani macachanevacapahi te másihapa te Galilea, téhepa te tianapa te Jerusalén. Ena nani tímahanahi, énará ena téchajisihanahi puiti eta máechepusirahi.

³²⁻³³ Acane, ema Viya macametarapihi nayehe ena viáchucanaveanaini eta macucupaisirayarehi ema Cristo. Títauchavaipahiserá puiti eta máechaji-

riruvahi taicha vímatiripa ema Cristo viti nachíchanavéqueneana. ¡Tímerecavaipa ema Jesús, émairahi yátupiquenehi Cristo manerejiruhi ema Viya! Máimerecapa ema Viya ema Jesús eta émairahi yátupiquenehi Cristo, taicha macaechepucahi te máecari. Étara tímitecahavi vimetapanaha eta juca táuriquene téchacareana. Étara tacayemaquenehi eta máechajiriruva ema Viya eta te Salmo 2, ánipa macahehi: “Pítira nuchichavi. Puiti jena sache, nímimaticaviyare nayehe ena achaneana eta nuchichairavihi eta nucaechepusiravihi te pécarí” máichapa.

³⁴ Eta máechepusirahi ema Jesús te máecari, vaipa tiápechavaimahi tépena. Taicha máechajicahi ema Viya ena israelítana, ánipa máichahi: “Níjaracahayare ema máuriquene Iáquenuyare. Éma ticatiuchaheyare tamutu sácheana. Máichecuaraquireyare eta itaresiraya máicha, eta eeachanerayare éma. Taicha níjararuvahi eta juca néchajiriruvahi mayehe ema David” máichapa ema Viya.

³⁵ Énerichuvare, acane ema Cristo macahehi eta máechajiriruvahi te apana Salmo: “Vahi písapaimahi témitiequeneha eta náquehe nuti pichicha pémunaruquenehi” máichapa.

³⁶ Tiuri, ema David, yátupihí eta máechapajirisiravacahí ena machanerana. Te títecapapa eta matuparahahi mayehe ema Viya, tépenapa ema David. Tacahe, náecarapanapa éma. Tépachaicavahi eta máeche te máecari.

³⁷ Émasera ema Jesús vahi táepachaicavahini eta máeche te máecari taicha macaechepucahi ema Viya.

³⁸ Nuparapenaveana, nuvaraha numetacahe puiti apaesa ímatiequeneha. Ema Viya mavaraha tiperdonachahe eta epecaturana te ácasíña ema machicha Jesús.

³⁹ Viti israelítana, ichape eta véjecapiravahi me Viya taicha vimaitauchirahi eta viyeherepiana máijararuhavihi ema Moisés. Téhesera véhica puiti ema Jesucristo, viperdonachacareya víti mayehe ema Viya.

⁴⁰ Tásiha puiti, ecaunevayare éti, machu ácutiriana ena achaneanaini máechajiruanahi ema Viya eta acane. Ani máichahi:

⁴¹ “Ímahayare, eti épurunuanahi nútí. Nútí níchayare eta tiáramicare te emirahu te juca sácheana. Te nímimetacahepa eta juca, váhiquene esuapahini éti. Tásiha, tapaenumavainapa te ímahapa eta níchaqueneya, iáraminapa. Nímitiesera eta emásuapajiráivanahi. Épenainapa táicha” máichapa ema Viya.

⁴²⁻⁴³ Te tamutupa eta máechajisirahi ema Pablo, nayaseacapa ena achaneana, ánipa naicha:

—Picatajicahavi. Piápechahavini pímitucahavi eta juca te apanainavare sávaru —náichapa.

Te tiúchucanapa eta te náurujisirareva, tiyananapa ena apinana apóstoleana eta te náitecapihahi. Náehicapa ena camuriana israelítana, énapa ena apavasanana tépiyacavanaripa israelítana taicha napicauchaipa ema Viya. Ticaimitucasianapa táurivaina eta najicapiraya eta máurivahi ema Viya, nacasiñairava me Machicha Jesús.

⁴⁴ Te apanavarepa sávaru, namutuyareni ena achaneana ticavasanahi te avasare tiúrujicavana nasamararacayarehi eta máechajiriruva ema Viya mametarapiyarehi ema Pablo.

⁴⁵ Énasera ena israelítana masuapajirairahanahi, te náimahapa eta natiarirahahi ena apavasanana, tiseanapa eta mametasiravacahi ema Pablo eta

najacapacarevahi me Viya éna apanava. Eta tacahe, nácapaemachapa ema Pablo, nacajachapa.

⁴⁶ Te nasamapa ema Pablo émapa ema Bernabé eta náichirahi ena ticatianacanahi, tájina vahi nayútutuémahini. Náichavacapa:

—Tatuparacahi étivayarehi eti vijaneanana vímitucahe eta juca máechajiruruva ema Viya. Étiserá vahi iúricahini eta esamirahi, váhivare ésachahini ésenica eta mávasa ema Viya. Tacahe puiti, énainarinepuca vímitucavacaya ena apavasanana.

⁴⁷ Taicha víti vivanecasivahi me Viya. Vítauchayare eta juca mavanairipi, ani macahehi: “Nutuparacaviyare piti pipaicyare tamutu avasareana te juca apaquehe. Picametarairuyare eta néchajiriruvana nayehe ena achaneana eta nucuchucuiraya nácani tisuapanuanaya” —macahepa ema Pablo.

⁴⁸ Te nasamapa eta juca ena apavasanana, tíurisamureanapa. Tásiha, nacahepa:

—Tétavicavapa táurinava eta juca máechajiruruva ema Viya —nacahepa.

Énerichuvare, nasuapapa ena máichuhaqueneanahi ema Viya eta náitare-siraya máichecuaraquireya te táequenenapa eta náepeniraya.

⁴⁹ Tacahe, ena tisuapanaripa nacametarairuvare eta máechajiruruva ema Viya nayehe ena achaneana ticavasanahi te tachacayarahana eta avasare Antioquía Ichipichu.

⁵⁰ Nararihihiserá ena ticatianacanahi ema Pablo émapa ema Bernabé. Israelítanahi éna. Tacahe, náimitucapa ena tuparairucana te avasare, énapa ena ésenana ticapicahucareanahi, téhicanahi eta nayeherepiana ena israelítana. Énerichuvare napamicapa ena achaneana, navarairahi náquijicaya tayéhe eta avasare ena apóstoleana. Jéhesareinehi, ticuticacanapa eta nacatichiravacahi, nacuchucavacapa ena apinana.

⁵¹ Tacahe, eta nayanirayarepa ena apóstoleana, náetatapevachavaca eta náeparupevana te namirahu ena ticatianacanahi. Táicutirahi eta namáimitucacárevahi éna, tájinavarepa tímiapéchaimahi náimitucavacahini. Tacahe, tiyananapa nacaijuhepa eta te avasare Iconio.

⁵² Énaserá ena apamuriana téhicanaripa tímiyanavanapa eta nasuapirahi ema Viya. Tíurisamureanahivare éna taicha eta mávahásirahi ema Espiritu Santo.

14

Ema Pablo émapa ema Bernabé títecapanapa eta te Iconio

¹ Tacahe, títecapanapa ema Pablo émapa ema Bernabé eta te avasare ticajare Iconio. Tiyananavare natupiru eta te náurujisirareva ena israelítana. Ticámetaráruanavarepa. Tacahe, camurianavare ena achaneana tisuapanahi eta nametarairuhi: ena israelítana énapa ena apavasanana.

² Váhiserá téjiacavana ena apamuriana israelítana masuapajirairahanahi. Nayurucavacapa ena apamuriana achaneana apavasanahi. Navarahapa náimiyusemacavaca. Navarahahivare ticuticacananayare nacatichavaca ena téhicanaripa ema Viya.

³ Eta tacahe, nanasipanapa ena apóstoleana. Vahi nayanavanehini. Tiyerehi eta náimituresirahi, taicha navarahahi náetumechavacaya eta nacasiñairahi ema Viya. Tacahe, ema Viya máimicatacavacahi. Májaracahi eta náichiraya eta tíáramicareana. Eta juca, máicutirahi eta mavanésiravacahi

eta nacametarairuirayarehi eta majacapiravacahi nácani achaneana ticasinávana mayehe.

⁴ Tásiha, típutsimurihavanapa ena achaneana ticavasanahi tayehe. Ena apamuriana náehicapa ena israelítana masuapajirairahana. Ena apamuriana náehicapa ena apóstoleana.

⁵ Tacahe, ticuticacanapa eta napanereruana ena apavasanana énapa ena israelítana énapa ena náquenuruhana, eta nacajachiraya ena apóstoleana. Navarahapa nacapacaya natupisicaya te márijahiana.

⁶⁻⁷ Énaserá, ema Pablo émapa ema Bernabé, te nasamairiricapa, tijunanapa nacaijuhepa eta te provincia ticaijare Licaonia. Ánaqui ticametarairuanapa tayehe eta avasare Listra, tásiha, tiyananavarepa te avasare Derbe, étapa te avasareana tachacayarahanahi.

Emá Pablo macanaracahi ema masari ticavasahi te avasare Listra

⁸ Te jena avasare ticaijare Listra, matiarihíhi ema émana achane masarihi eta máitaresirahi. Vahi táurihini tipaica, taicha máimiuchurehi eta mamasarivahi.

⁹ Macahepica ticasamarahihi éma eta mametarairuhi ema Pablo. Tacahe, ema Pablo máesenicapa, máimatiacapa eta macasiñavairahi ema masari mayehe ema Viya macanarasirayarehi.

¹⁰ Tacahe, ema Pablo mapiaracapa:

—Pécheputa píti. Pétumecha eta jara piápeana. Pitupíha —máichapa.

Eta masamairahi eta juca ema masarini, enevanepa téchepuruca. Titupihapa. Tipaicapa.

¹¹ Eta náimairahi ena achaneana eta macanarasirahi ema Pablo ema masarini, náraminehi ichape. Tipiaracanapa te náechajiriruvaichu, ánipa nacahehi:

—Viyana ena nani. Achanemahianahiséra eta náimahi eta nácupauchirahávihi.

¹² Ema maca ticaijare Bernabé, émara Viya Júpiter. Ema maca apana ticaijare Pablo, émara Viya Mercurio taicha ema ticametarairurahi —nacahepa.

¹³ Tiúri, tatiarihi eta peti te tasiaparacu eta avasare, mayujarasirarehi ema achane tavanarahi eta nasiñaraji ticaijare Júpiter. Tatiarihivare eta apina turu mamansurehi. Tacahe, ema maca achane máepanapa eta turu. Mayehehecapa eta flure taicha mavaraha macapacayarehi eta turu. Máijaracasihayarehi ema Pablo émapa ema Bernabé. Énerichuvare ena achaneana navarahahi náejirayarehi ena nani apinana apóstoleana taicha náimijachaipa énaripa ena nasiñarajianahi.

¹⁴ Étasera te nasamairiricapa ena apóstoleana eta náichirayarehi, ichape eta náeñamirava. Tiúchucanapa, nasiapamurihapa ena achaneana. Tipiaracanapa, ánipa nacahe:

¹⁵ —¡Tátanaveana, mémenaveana! ¡Váhirine táurihini eta juca íchirayare! Vítirichu ecutiqueneana achaneana. Tímitacahavihi vimetapanaha ínajica eta juca eyeherepianahi. Taicha vahi tiuri, tamapurujíhi eta eyeheheasirapacahi eta esíñarajiana. Ínajicaya eta juca. Éhicayaresera ema Viya, ema yátupiquenehi tisamahavi. Éma tépiyacahi eta anuma, eta apaquehe, eta íchapequene mar. Tétupiricahi tamutu eta vímahaqueneanahi puiti.

¹⁶ Ánaquiaparipa eta macamichirahi ema Viya eta náichirahi eta navarahaqueneana ena achaneana.

17 Mámirecahinénisera eta émairahi tépiyaca eta juca táuriqueneana. Tíjara-cahavihi eta tiquiva. Tiúrinachayare eta sucurecana vinicaqueneana máicha. Máijarasirahavihi tamutu eta vicamunuqueneana. Ticurisamurechahavivare. Eta tacahe, ímatiquenéha yátupina eta émairahi Viya esñarajiya —náichapa ena apóstoleana.

18 Eta tacahehi, nametacaripahinéni eta tamaurivahi eta juca navara-quenehi naicha. Énaserá ticamesavanarichucha eta navarairahi ticaparecana eta túruana. Váhiqueneséra náisapahíni ena apóstoleana náichahini eta juca.

Natupisicapa te márijahiana ema Pablo

19 Tayerevahi eta sácheana, títecapanapa ena israelítana tiásihanahi te Antioquía Ichipichu étapa te Iconio. Éna ticitianacanahi ena apóstoleana. Nayurucavacapa ena achaneana, náimiyusemacavacapa. Eta nachimapiarahi ema Pablo te calle, natupisisihapa te márijahiana. Náquipaicapa. Eta náimairahi máquipaisiravahi, náimijachaipapuca tépenahi. Nachururupaicapa náquijicayarehi te tachachacu eta avasare.

20 Tacahe, tiyananapa ena machamuriana ema Pablo, náimahapanayarehi. Te náitecapauchapa, náurujiacaripa. Émasera téchararahaipa téchepucapa. Máehicavacapa tiyanapa eta te máitecapihahi. Te apanapa sache, tiyananapa ema Pablo émapa ema Bernabé te avasare Derbe.

21 Te títecapanapa tayehe eta avasare Derbe, nanasipanapa tayehe. Ticametarairuanahi eta máechajiriruva ema Viya. Camuriana ena tisua-panahi téhicanahi ema Jesús. Te tamutupa eta náimitusiravacahi, tiyananavarepa tichavanapaipa eta te avasareana náimituresinepahi eta te Listra, te Iconio, étapa te Antioquía Ichipichu.

22 Eta te juca avasareana, náimitucavarepa eta téhicanaripa ema Jesús. Náetumechavacapa eta táurivaina eta náehisiraya ema Viya. Náíchavarepa:

—Vahi ecuarameca eta nacatianasiráhe ena achaneana táichavene eta éhisira ema Viáquenu. Ecamichachucha tamutu. Echava eta esiapiraya eta mávasa ema Viya —náichapa.

23 Énerichuvare, natanucapa ena nayeheanapachu pastor nácani náijamuripachu. Téchanayarehi eta nayujarasirana. Tacahe, natuparacapa eta návacureanaya. Te tamutupa eta natuparasiravacahi, tiyujaracanapa nahayunachavarepa, nayaseacapa ema Viya eta majaneasiraina táurivaina eta náehisiraya namutu ena ticasñanaripa ema Viya.

Ema Pablo, ema Bernabé tichavanavare tayehe eta avasare Antioquía

24 Tacahe, tiyananapa ema Pablo émapa ema Bernabé, tétavajicanapa eta te avasarechichana tayehe eta Pisidia. Náitecapirapa tayehe eta avasare Perge táunavahi eta provincia Pamfilia.

25 Ticametarairuanapa eta máechajiriruva ema Viya nayehe ena achaneana ticavasana tayehe eta avasare. Te tamutupa eta nacametarairuirahi, tiyananavarepa nacaijuhepa eta Atalia.

26 Étapa návacuinehi eta nánuesiraya eta mar, nacaijuhepa eta avasare Antioquía. Tichavanapa tayehe eta juca avasare náuchusinehi te ticavanahianapa mayehe ema Espíritu Santo. Étarichuvare nayujarauchinehi ena nachamuriana eta majaneasirayare ema Viya ena apóstoleana eta napaisirayare. Puiti eta juca náitauchaquenéipa eta náematanehi.

²⁷ Eta náitecapiraipa, nacurujicapa ena nachamuriana. Nametacapa tamutu eta máimicatasiravacahi ema Viya tayehe eta napaisirapahi. Éta pa eta majacapiravacahi ema Viya ena apavasanana eta nasuapiravacahi nacasiñairahi éma.

²⁸ Tacahe, ema Pablo émapa ema Bernabé, tiyerehi eta nanasirahi nacachaneravacahi ena nachamuriana.

15

Ticurujicacanapa te Jerusalén. Ticaechacasinapa eta panererucanahi.

¹ Te jena sácheana, títecapana te Antioquía ena apamuriana israelítana, tíasihanahi te Jerusalén. Navarahapa nahapapiricavaca ena apavasanana téhicanaripa ema Jesús. Ánipa naicha eta náimituresirahi:

—Te evaraha íuchucuha eta ícuñayaréni, tacamunu ítauchayare eta mavanairipihí ema Moisés eta vicamarcairaya* —nacahepa.

²⁻³ Émasera ema Pablo, émapa ema Bernabé nacapaemachavacapa muraca ena tipamicanahi ena apavasanana eta nacamarcairahi. Ichape eta nacapaemachiracacahi. Tacahe, ena nachamuriana navarahahi náetupirica eta juca. Tásiha, natuparacapa ema Pablo émapa ema Bernabé, nayanahini eta te Jerusalén. Eta ánaqui, ticaechacasiyarehi nayehe ena apóstoleana énapa ena náiyarahanahi. Náevatacavare ena apamuriana téhicanayarepahi ena apinana.

Tacahe, eta napaisirapahi te achene, tétavajicanapaipahi tayehe eta avasarechichana táunavanahi eta Siria, éta pa te Samaria, návihahi ena apamuriana nachamurianahi. Nametacapaipa eta náinajisirahi ena apavasanana eta nayeherepianahi namauriqueneana, taicha eta náehisiraipa ema Jesús. Tacahe, ena nachamuriana, eta nasamairirisirahi eta juca, tíúrisamureanarinehi éna.

⁴ Tacahe, eta náitecapirahi eta te Jerusalén ema Pablo émapa ema Bernabé, ena apóstoleana énapa ena náiyarahanahi pastoreanahi nacurujicapa ena nachamuriana eta najacapiraya ena araitecapianahi. Tacahe, ena apinana nametacapa eta máimicatasiravacapahi ema Viya eta napaisirapahi éna.

⁵ Natarihivare ena religiošana téhicanarípahi ema Jesús. Titupihanapa éna. Téchajicanapa, ánipa nacahe:

—Táitaurevaquene tacamunurichu nacamarca ena apavasanana téhicanaripa ema Viáquenu Jesús. Tacamunuhivare nacaravahu náehica eta juca mavanairipianahi ema Moisés —nacahepa.

⁶ Tacahe, te apanapa sache, tíurujicavanapa ena apóstoleana énapa ena náiyarahana. Navarahapa náetupirica eta juca.

⁷ Nacaemataneacaripa eta juca náechajisihahi. Tacahe, titupihapa ema Pedro. Máichavacapa:

—Nuparapenaveana, écharichuhi éti ánaquiaparipa eta manerejisiranuhi ema Viya eta nucametairuya eta nayehe ena apavasanana eta náuchucui-rayarehi táichavenénahi eta nasuapirayare ena apana.

* **15:1** Eta mavanairipini ema víyarahaini Moisés ticamarcanayarehi namutu ena amuyana ajairana israelítana. Éta tímereuchayarehi eta yátupiquenerahi israelítana. Te juca, ena napaipiruanahi tíasihanahi te Judea, navarahapa nacamesaequeneha nacarmacavaya ena ajairana ichanaruanaripa, apavasanahivare.

⁸ Ema Viya máimatihí eta nasamureana ena apavasanana eta nasuapirahi. Tásiha, máimerechahi eta majacapiravacahi eta mávahásiravacahi ema Espíritu Santo tacutihí eta mávahásirahavihi víti.

⁹ Ema Viya, nájina manerejiruina eta máemunasirahavi. Témunacahavihi vimutu: víti israelítana, énapa ena apavasanana. Eta tacahehi, masípasinavacari pa eta nasamureana éna táichavénehi eta nasuapirahi.

¹⁰ Étiserá evarahapa épuryare eta máichaqueneanahi ema Viya. Ticaje-raequenepa eta véhisirainahini eta nayeherepiana ena viáchucanaveanaini. Énaripa vahi náitauchapahini tamutu eta nayeherepianapahi. Vítiripa váhivare váratahahini vítauchahini. Tacahe, váipa táuricahini vécatihavacahini ena vichamuriana apavasanana náichahini eta juca.

¹¹ Vécharipahisera yátupi eta viúchucuiraya táichavénehi eta macatajisirahavihi ema Viáquenu Jesucristo. Viti israelítana, vahi étaparacaina eta vicamarcairahi. Ena apavasanana, váhivare étaparacaina eta tájinairahini namarcainahini —máichapa ema Pedro.

¹² Tacahe, timatinanapa namutu. Nasamararacaripa ema Bernabé, émapa ema Pablo. Nametamurihapa eta máimechirahi ema Viya eta mavanesisravacahi éna, taicha máíjaracavacahi eta náichirahi eta tiáramicareana te namirahu ena apavasanana.

¹³ Te títapiricanapa eta nametarapianahi, émapavapa ema Santiago téchajica. Macahepa:

—Nuparapenaveana, esamanuchaha.

¹⁴ Ema Simón Pedro timetacahaviripa te tépanavainapa majacapavacainapa ema Viya ena apavasanana machaneranyarehi.

¹⁵ Eta juca eta náechajisihaguenehi namutu ena víyarahaini profetana. Émaripa ema víyarahaini profeta Amos májuchahi eta juca máechajiruvana ema Viya, ani macahehi:

¹⁶ “Te táequenénapa eta juca, nápechavaya núcupaicayare te juca apaquehe. Nétupiripanaya eta nupena táquipairuvahi. Tásiha, tiápechavanayare tiyujarachuanyayare ena achaneana, tacutiyare eta náejirairanuhi ena machaneranyare ena rey David. Tisuapanuanyareva.

¹⁷ Énerichuvare títanucanuyare namutu ena apavasanana. Nuchaneranyareva éna, taicha námayare eta níjare”.

¹⁸ Étara eta juca macayemaquenehi ema Viya. Ánaquiapari pa eta mavarairahi vicaicutiaraya eta juca.

¹⁹ Tímiyanava eta máechajiruvana ema Santiago, ánipa macahe:

—Tiuri, eta juca eta nupanereruhi núti: Tiúripa vésamiricavacachuca ena vichamuriana apavasanana náequeruvanaripa mayehe ema Viya.

²⁰ Taratarichu vicajurevaca tametaca eta vaipa nacuapechava nacunica eta taeche eta sárare náíjaracasiruana eta nasiñarajiana. Váhivare nacuveha súcani apana esena. Énaripa ena esenana, váhivare nacuveha ema apana achane. Váhivare nacunica eta taeche eta sárare namaechatinure. Étaripa eta táitine, váhivare nacunica.

²¹ Eta vimetacavacayare ena vichamuriana apavasanana eta juca, apaesa vahi nacusemaracavaca ena téhicanarichaha eta mavanairipiana ema Moiséini. Taicha ánaquiapari pa te avasareana eta náechajicuiraparacahi ena vijaneanana israelítana eta mavanairipiana ema Moiséini te náurujisiravana.

Puíticha nararihichaha ena náimicapicaucharichucha —macahepa emá Santiago.

²² Tacahe, ena apóstoleana, énapa ena náiyarahana, énapa ena náumurivana, tíurihi nasama eta mapanereruhi emá Santiago. Tacahe, ticavanahianapa ena apinana téchemarahiana ticapicahuanahi, emá Judas Barsabás émapa emá Silas. Éna téhicanayarehi emá Pablo émapa emá Bernabé eta nachavi-rama te Antioquía.

²³ Tiuri, eta juca táechajiriruvahi eta carta. Ani tacahehi:

“Vímiamareca eta juca véchajiriruva viti apóstoleana, énapa ena víyarahana, énapa ena vichamuriana te juca Jerusalén. Vívaraha tativayare véchajicahe eti viparapenaveanahi te mavahuana emá Viáquenu: eti apavasanana tiávianahi te Antioquía, étipa eti tiávianahi te táunavanahi eta Siria étapa eta Cilicia.

²⁴ Visamairirichahi eta nayanirahi ena tiásihanahi ani te juca. Tiávajiriri-caheanapa. Navarahahi nahapapicayare eta epanereruana. Ticamesa-heanahi itauchayare eta mavanairipiana emá Moisés eta ecamarcairaya. Váhiserá vanairucanaina eta viyehe eta náimitusirahehi eta juca.

²⁵⁻²⁷ Vévatacahi emá Judas émapa emá Silas, vanairucanahi viyehe. Éna, tímatacaheanayare tamutu eta juca téchacareanahi viyehe. Ena nani téhica-napahi emá Bernabé emá Pablo, ena viparapenaveana vémunaruqueneana. Emá maca Bernabé émapa emá Pablo, tíjaracavanahi éna náepenacaya emá Viáquenu Jesucristo taicha eta nacametairuirahi.

²⁸ Áni te juca víti, vicuticacahi eta vipanereruani, máimitusirahavihi emá Espíritu Santo. Vahi vávarahahini tacajeraequenehini eta éhisirayare emá Viáquenu.

²⁹ Tacarichu vimetacahe eta juca ticamunucarepana te mamirahu emá Viya:

1. Vahi ecunica eta taeche eta sárare nayujaraurehi ena achaneana te tamirahu eta nasiñarajiana.
2. Váhivare ecunica eta táitine eta sárareana.
3. Váhivare ecunica eta taeche eta sárare nãamaechatinure.
4. Váhivare ecuveha esu apana esena. Énerichuvare eti esenana, vahi ecuveha emá apana achane. Énerichuvare ímitucavaca ena echichanaveana tacuija eta natuhusivaina.

Te yátupina esuapa eta júcana, tájina íchiravaimahi te mamirahu emá Viya. Éma tímicatacaheyare tijaneacaheyareva tamutu sácheana. Tamutupa eta juca véchajiriruvanahi eta eyehe”.

³⁰ Tacahe, tiyananapa ena tiámana eta carta, nacaijuhepa eta Antioquía. Te títecapanapa ánaqui, nacurujicapa ena nacaijuhequeneanahi nachamuriana. Náijaracapa eta námaquenepahi carta.

³¹ Te najacápapa eta carta, navejiacapa. Náechajicuhapa te namirahu namutu ena nachamuriana. Tétavicavahi eta náurisamurevahi eta nasamirahi.

³²⁻³³ Nanasipanapa jena cájeanahi emá Judas émapa emá Silas. Éna, énerichuvare eta tíutanahi eta máechajiriruva emá Viya. Tiúrihi eta náimitusi-ravacahi ena nachamuriana. Naconsejachavacahi, náetumesámurechavacáinehi náicha. Te tamutupa eta náimitusirahi, tichavanayarepa nayehe ena tivanecanahi. Tacahe, ena nachamurianahi náechejiemachavacapa. Nayaseacapa emá Viya táurivainapahi eta napaisiraina.

³⁴ Émasera emá Silas mavarahapa manasiyare.

³⁵ Énerichuvare, ema Pablo émapa ema Bernabé nanasivarepa tayehe eta avasare Antioquía. Tímiyanavanapa ena tímiturecana nayehe ena nachamuriana. Ticametairuanavare nayehe ena apamuriana achaneana. Natiarihivare ena apamuriana tímicitacana.

Tiápechavánavare tiyanana ena apóstoleana te avasareana

³⁶ Te táequenepa eta juca semanana, ema Pablo máichapa ema Bernabé: —Viyanavare víapechava vipaica tayehe eta avasareana, véjiravacapa ena vichamuriana te vipaisineanapahi cape juca te tínapucainapa viyanahi. Víamaha tájahapuca náicharacavahi —máichapa.

³⁷ Tacahe, ema Bernabé tísapavahi tiyana. Mavarahapasera mama ema Marcos.

³⁸ Émasera ema Pablo vahi mávarahahini mayanahini ema Marcos. Taicha te tínapucainapa tipaicana manaquimuriahahi ema Marcos te avasare Perge tayehe eta Panfilia. Vahi máimicitacahíni tayehe eta náemataneanapahi.

³⁹ Nacaemataneacaripa eta mamavarairahi mayanahini ema Marcos. Tacahe, tínajicacana. Ema Bernabé tiyanapa, macachanehi ema Marcos. Tiávacuhanapa, nacáijuheyarepa eta tíurupuhi Chipre.

⁴⁰ Tacahe, ema Pablo mapanerechapa mámayare ema Silas. Te tétupiricavanapa, nayujarauchanumapa ena nachamuriana. Nayasecapa ema Viya eta máimicitasirainapahi eta napaisiraya. Ticametavanapa tiyananapa.

⁴¹ Eta napaisirapahi te achene tétavajicanapaipa tayehe eta avasarechichana Siria étapa te Cilicia. Náejiravacapaipa ena nachamuriana natiarihiqueneanapahi. Náetumesámurechávacapáipahi.

16

Ema Timoteo máehicavacapa ema Pablo, ema Silas

¹ Tacahe, ema Pablo émapa ema Silas náejiravacapaipa ena nachamuriana ticavasanahi te Derbe. Tásiha, tiánucuhanavarepa te Listra. Ánaqui te Listra matiaríhihi ema Timoteo, suchicha esu ésuna esena israelíta, téhichavare ema Jesús. Émasera ema maiya, apavasanahi griego éma. Ema maca Timoteo émarichuvare téhichahi ema Jesús.

² Énerichuvare, nacunachahi eta máurivahi ena machamuriana ticavasanahi te Listra énapa ena ticavasanahi te Iconio.

³ Tacahe, ema Pablo mavarahapa mámayare ema Timoteo eta napaisiraya. Tacahe, mavanecapa macamarca* apaesa tacuija nacucayema ena israelítana ticavasanahi tayehe eta napaisihayare. Taicha náimatíhi éma eta machichairahi ema apavasanahi.

⁴ Tacahe, tiyananapa. Náejiravacapaipa ena nachamuriana te tamutu avasareana. Nametacapaahi éna eta táechajiriruvapahi eta carta náimiamarehivare ena apóstoleana énapa ena náiyarahana tiávihanahi te Jerusalén.

⁵ Ema nachamuriana, eta nasamirapahi eta mametarairu ema Pablo, tétumechacanapaipa eta nasuapajiraivapahi. Tamutu sácheana ticajane-muríanapáichucha ena téhicanapahi.

Ema Viya máechajicahi ema Pablo mayana eta te Macedonia

* **16:3** Eta juca nayeherepi eta nacamarcairahi ena israelítana, te tiúchucha ema amuya ajairachicha, te óchopa sache eta máuchusirahi, namarcachayarepa. Émaripa ema Timoteo ichanaruipahinéni. Émasera ema Pablo macavanairipipa macamarcahivaréni éma apanavare, apaesa tacuija nayunacahi ena israelítana.

⁶ Tiuri, ema Espiritu Santo mametacahi vahi nacuyana eta te tinapaicahi eta avasareana te Asia. Tásiha, náetavicapa eta avasarechichana táunavanahi eta Frigia (ticaijarehivare Galacia).

⁷⁻⁸ Nacaijuheyahehi eta provincia ticaijare Bitinia. Téhesera te tiánehanapa, ema Espiritu Santo mavanecavarepa vahi nacuyana tayehe. Tacahe, náetaviequenehapa. Tiánucuhana tayehe eta táunavahi eta Mísia. Náitecapirapa te puerto ticaijare Troas.

⁹ Te jena yati, máimahapa ema Pablo te mavapure ema émana achane ticavasahi te tinapaica te Macedonia. Titupihahiji éma. Máichapaji eta máechajisirahi:

—Picatajicahavi, piánueca te juca viávihahi Macedonia. Pímicatapanahavi —máichapaji.

¹⁰ Eta máimairahi ema Pablo te mavapure eta juca, enevanepa vétupiricavapa eta viyaniraya tayehe eta Macedonia, taicha vémeteacahi eta mavarairahi ema Viya eta viyaniraya eta ánaqui, vicametarairuyare.

Títecapanapa te avasare ticaijare Filipos

¹¹ Tacahe, viávacuhapa eta te puerto Troas. Viyanapa tayehe eta tiúrupuhi ticaijare Samotracia. Te apanapa sache, vítecapapa te Neápolis.

¹² Viúcupaicapa viyanapa te avasare Filipos. Eta juca avasare nayehe colonia ena romanoana. Eta ichapepanahivare tayehe eta avasarechichana tinapaicahi eta te tacunahu táuchusine eta sache eta Macedonia. Vinsipanapa tayehe te jena sácheana.

¹³ Te jena sache sávaru, viyanapa eta te nayujarasirarehi te tachachacu eta avasare te tachausi eta cajacure. Véjacapa tayehe. Vicametarairupa nayehe ena esenana náurujiruvanahi tayehe.

¹⁴ Sutiarihi esu ésuna esena ticaijaruhi Lidia. Ésu, tiásihai eta avasare eta suchusinehi. Esu suca tíjararecarahi eta yéerucava sédana mularumeana. Ésurichu, tipicaurahi me Viya. Susamaracaripi eta mametarairuhi ema Pablo. Ema Viya mavejiasinaipa eta susamure sujacapirayarepahi eta mametarairu ema Pablo.

¹⁵ Enevanehi ticaicachasihi esu esena énapa namutu ena tiávihanahi te supena. Tacahe, suvarahapa tiámahavi eta te supena. Sucahepa:

—Te esuapapuca eta yátupirahi eta néhisirahi núti eñi Viáquenu Jesús, ítecapauchanupaini te nupena —sucahepa.

Tásiha, ticamesahavipa tiámahavi te supena. Tacahe, vísapavapa véhica.

¹⁶ Te apana sache, te viápechavavarepa viyana tayehe eta nayujarasirare, vicainunapa esu ésuna amaperu mávaháruhi ema éreana. Tijarauquihi ésu máicha. Esu suca amaperu vanaracahi. Ichapemurihi eta plata suvachanahi, sújaracapahisera ena suáquenuana.

¹⁷ Te tímahahavivare viánucuha, téhichahavivare esu suca amaperu. Tipiarcapahi te véquene. Ánipa sucahe:

—Ena nani ajairana ñivanarana eñi Viya Viáquenu vimutu viti achaneana. Náechajisihavare eta eyehe eta achene ticaijuhe ñe Viya nayanihayare ena náuchucureanayare —sucahepa.

¹⁸ Ichapemuri eta sácheana eta suéhicarairisrahavihi. Mapuñacapa ema Pablo. Téquerucavapa. Tásiha, máichapa ema éreana ema tiávahácahi ésu:

—Te máijare ema Náquenu Jesucristo, nuvanecavi piúchuca te suáquehe esu suca amaperu —máichapa.

Enevanepa tiúchuca ema éreana. Majunijacapa ésu.

19 Te náechapa ena suáquenuanahi, tise manapa taicha tájinapa suviahini eta suplatanechihavacahini. Tacahe, nacaratapaca ema Pablo émapa ema Silas. Námapa te plaza te namirahu ena tuparairucanahi.

20-21 Tacahe, nametauchavacapa nayehe ena tuparairucanahi. Ánipa nache:

—Ena nani ajairana israelítanacacha. Nacaehepuca eta tamauriqueneana. Navarahapa tímicajicahaviana eta viyeherepiana. Navarahavare véhica eta vimaímatiequeneruhi viti romanoana. Váhivare táisapacarehini vítauchahini eta nayeherepianahi énatatajiana —náichapa.

22 Tacahe, ena achaneana tise manapa nayehe ema Pablo émapa ema Silas. Tacahe, ena tuparairucana juéseanahi nacavanairipipa navejamuhiacavaca, náestacavacapa te yucuípiana.

23 Te tamutupa eta náestasiravacahi, námapa te cárcel. Navanecapa ema nacapitara ena carceléroana máechapajirica muraca eta tapaja.

24 Te masamapa ema nacapitara eta navanairipihi, máimisipavacapa tayehe eta téqueneha cuarto. Máeratapaiquechavacapa te cepo. Manacapa cantavu eta tapaja.

25 Tacahe, eta jena enumuhuquenepa yati, eta nacaeratairahi ema Pablo émapa ema Silas, tijiranaichucha tiyujaracanahivare me Viya. Ena apamuriana présoanahi nasamararacaripa eta jirasare.

26 Tíjuhúchavapa tiyamurica muraca eta apaquehe. Tiyamuricapa eta yúchamana. Tíjuhúchavapa téjiacavaca eta tapajacurana eta cárcel. Téjapucapa eta cadenana náitihanahi ena présuana.

27 Téjamiuchavapa ema nacapitara ena carceléroana. Máimaharine eta tapajana téjiacavacarihiri. Máimijachapa nájinaripahi ena présoanahi. Tásiha, mavehapa eta mayehe espada. Mavarahapa ticapacavayarehini táichavenehi eta mapisirahi.

28 Émasera ema Pablo mapiaracapa:

—Vahi picucapacava. Vitiaririchuhi vimutu. Nájina émanaina téjiacavaina —máichapa.

29 Tacahe, ema nacapitara tiyaseserecapa eta namicahuyare. Tisiapapa máimamurihayarehi éna. Tiyayacarepainecha eta mapisirapahi. Tépuycapa te namirahu ema Pablo émapa ema Silas.

30 Máichuhavacapa éna, mámapa te mapena. Mayaserecavacapa:

—Tátanaveana, ¿tájahapucaini nícharacavaini eta núchucuirayare nútí apana?

31 Éna najicapapa:

—Pácasiña pisuapa ema Viáquenu Jesucristo. Tásiha, éma ticuchucuhaviyare píti, énapa ena pichichanaveana —náichapa.

32 Tacahe, náimitucapa éma eta máechajiriruva ema Viya, énapa namutu ena tiávihanahi te mapena.

33 Étarichu jena yati ema nacapitara masipasinavacapa eta najarana ema Pablo émapa ema Silas. Tacahe, ticaicachasipa éma, esu mayena, ena machichanaveana, énapa ena apamuriana tiávihanahi te mapena.

34 Te táequenepa eta juca, mámamurihavarepa te mapena. Máenicavacapa. Tiúrisamureripa éma, énapa namutu ena tiávihanahi te mapena, eta macuchucuiravacayare ema Viya eta nasuapiraipa.

35 Te las nuévapa sache, ena juéseanahi navanecapa ena nasuntarurana nacuchupanavacayarehi ena náerataruanahi.

³⁶ Tacahe, ema nacapitara ena cárceleroana máichapa ema Pablo:

—Jucarihi eta órdena nayehe ena juéseana eta nacaitisiraheya. Tiúripa eyana iúchuca. Vaipa táeñamavacare —máichapa.

³⁷ Émasera ema Pablo máechajicavacapa ena suntaruana. Máichapa:

—Víti tavanarahavi eta Estado te Roma. Viávacuhahi eta ley. Vahi táuricahini náichahavihini ena juéseana ticaratacavahanapa téstacavahanapa te namirahu ena achaneana. Vahi nayaserecavahinumahini te tatiarihipuca eta viviurevahi. Tásiha puiti, navarahapa nayumurucayare eta nacuchusirahaviyare. ¡Vahi ene tácahe! Emetaca énaina náiteca nacuchupanahavi —máichapa ema Pablo.

³⁸ Tacahe, tichavanapa ena vanairucana. Nametacapa ena juéseana eta máechajiriruva ema Pablo. Ichaperine tipicana ena juéseana eta nasamirahi tavanaranairahi eta Roma.

³⁹ Tacahe, tiyananapa ena juéseana nacuchupana. Tiperdonachavanapa nayehe. Náichapa:

—Ájapanuhavi. Eperdonachahavi eta juca víchirahehi. Ecatajicahavi, vahi ecumetauchahavi. Ájapanuhavichucha, tiúripanahipucáini iúchucaini eta te juca avasare viávihahi, apaesa náesamiricahepa ena iánaranahi —náichapa.

⁴⁰ Tacahe, te tiúchucanapa te cárcel ema Pablo émapa ema Silas, tiyananapa tichavana te supena esu Lidia, viávihahi víti. Vicurujicapa ena vichamuriana. Tásiha, náetumechavacapa, náimitusiranumapa eta náimiyavachucha eta nasuapajiravaina mayehe ema Viya. Tásiha, tiyananapa.

17

Nacaechepuca eta semanere ena israelítana te avasare Tesalónica

¹ Eta nayanirahi ema Pablo émapa ema Silas, tiánucuhanapa tayehe eta avasareana Anfípolis étape te Apolonia. Títecananapa tayehe eta apanavare avasare Tesalónica. Tatiarihihi ánaqui eta náurujisirareva ena israelítana.

² Eta mayeherepihi ema Pablo, matupiru te náurujisirareva. Mapana sávaru eta macametairuirahi nayehe ena achaneana.

³ Manerejicapahi eta te Sagrada Escritura eta máechajicurepahi. Máimitucavacahi eta máitesiraipahi ema Cristo. Ánipa máichavacahi:

—Tiyerehi eta vicuchapirahi eta máimeresiravayare ema Cristo eta viyehe víti israelítana. Tímitucavahihi eta Sagrada Escritura eta macatajivairayarehi, nacapacayarehi. Émasera téchepucayarehi te máecari. Puiti numetacahé: Nímatipa ema Jesús Nazareno, ema nacaparuhi. Téchepucaipahi éma. Eta juca tímicaecherachahi émahí ema Cristo —máichapa.

⁴ Tacahe, tinerejicavanahi ena achaneana. Natiarihi ena tisuapanahi, náurujiacahi ema Pablo émapa ema Silas. Camurianavare ena griégoana apavasanana tipicauchanahi ema Viya, téhicanahivare. Énerichuvare ena esenana nayenana ena táiyarahana eta avasare tinerejicavanahivare ena téhicanahi.

⁵ Énaserá ena apamuriana israelítana masuapajirairahanahi, ticapinaruanahi eta náimairahi ena camuriqueneanahi achaneana téhicanahi ena apóstoleana. Tisemasamureanarichucha. Nacurujicapa ena ajairana váinara-jipanereruana, máematanereanahi te cálleana. Tíchuhajiricacanapa eta nacaechepusiraya eta semanere. Natanucapa ema Pablo émapa ema Silas,

navarairahi nacaetemajiricavaca te namira ena achaneana. Tiyananapa eta te mapena ema Jasón. Náquipaicapa eta tapaja. Tisiapanapa.

⁶ Eta namaichimavirahi ema Pablo émapa ema Silas, nacaratapaca ema Jasón énapa ena apamuriana machamuriana. Nachururupaicavacapaipahi eta námirapahi te namirahu ena tuparairucanahi. Tipiaracanapa eta nasemanevahi, nacahepa:

—Títecapauchahavianahi ena nani achanetatajiana náitecapaurehavianahi. Najararecapahi eta viyeherepiana, nahapapicahivare eta napanereruana ena vijaneanana.

⁷ Éna majacapaqueneanahi ema Jasón te mapena. Namutu ena nani nacaecahihi ema aguenuca viyehe Emperador romano, náepuruvare eta mavanairipiana. Náimijachahiji mararihi ema apana rey ticaijarehipuca Jesús —nacahepa.

⁸ Te nasamapa eta juca, ena tuparairucana énapa ena apamuriana achaneana, napanerequeneháinehi.

⁹ Tájinasera apanainahini náicharachini, nayasecapa nanaquica eta prenda eta náuchusirayare ema Jasón énapa ena machamuriana. Tiámainucava te náuchucapa te avasare ema Pablo ema Silas, náimichavayarepa eta prenda.

Éma Pablo, ema Silas títecapanapa te avasare Berea

¹⁰ Te jena yátiquenehi, ena vichamuriana námapa nayumurucapa eta nacuchusirahi ema Pablo émapa ema Silas tayehe eta avasare. Tiyananapa nacaijuhe eta avasare Berea. Te títecapanapa ánaqui, tiyananavare tayehe eta náurujisirareva ena israelítana.

¹¹ Ena nani israelítana ticavasanahi te Berea, tíúripanereruanapana nayehe ena ticavasanahi te Tesalónica. Navapina éna, nasamararaca eta mametarairuhi ema Pablo. Tamutu sácheana nacaravahuhi eta Sagrada Escritura. Navarahahi náechayare te yátupihipuca eta mametarapihi ema Pablo.

¹² Jéhesareinehi, camuriana ena tisuapanahi. Camurianavare ena apavasanana tisuapanahi. Te namuri, natiarihivare ena esenana ticapicahuque-
neanahi, énapa ena ajairana.

¹³ Nasamairiricavarepasera ena israelítana ticavasanahi te Tesalónica eta macametarairuripahiva ema Pablo eta te Berea. Enevanepa tiyanana nacapayaca. Te títecapanapa, náimiyusemacavarepa ena achaneana.

¹⁴ Énasera ena machamuriana ema Pablo enevanepa náevataca éma te tachaui eta mar. Nanasipasera te Berea ema Silas, ema Timoteo.

¹⁵ Ena tiámanahi ema Pablo, te títecapanapa te puerto, tiávacuhanapa tiyananapa tayehe eta avasare Atenas. Te títecapanapa, émapa nachavinehi ena tinapananahi ema Pablo. Tacahe, ema Pablo matuparacavacapa nametaca ema Silas, ema Timoteo nayanavane nacapayaca éma eta te mávihahi.

Tímiturecapa ema Pablo te avasare Atenas

¹⁶ Eta macuchapiravacahi náitecapiraya ema Silas, ema Timoteo, vaipa máitucacarehini ema Pablo eta máimairavacahi ena achaneana nayehehearacahi eta camuriquene nasiñarajiana.

¹⁷ Tacahe, tamutu sávaruana, tiyana eta te náurujisirareva ena israelítana. Máechajisilhahi eta tíúrina échájirirucava nayehe éna, énapa ena apavasanana

griego tipicauchanahi ema Viya. Tamutuvare sache máechajisihahi éma te plaza nayehe ena achaneana natiarihiqueneanahi.

¹⁸ Natiarihahi ena ajairana ena téhicanahi eta máimiturapi ema ticajare Epicuro, énapa ena apamuriana ticaravahuanahivare eta náimiturapiána ena estoicoana. Te jena sácheana, téchajiricavanapa mayehe ema Pablo. Váhiserá nácautiarpahini eta macayemapahi. Nacahepa:

—¿Tájahasamipucara tacayemahicácha eta mapanereruhi ema maca?

Ena apamuriana ánivare nacahe:

—Ema maca ticametarairurahi tayehe jácani apanavare masiñarajia-narichu —nacahepa.

Nacahehi éna eta juca, taicha ema Pablo mametacavacahi eta máepenirahi ema Jesús étapa eta máechepusirahi, mápechiravahi títareca.

¹⁹ Tacahe, tiyananapa tayehe eta cabildo náurujisirareva ticajarehi Areópago. Ánaqui nayaserecapa ema Pablo:

—Vivaraha vímati víti eta juca arairuhi pímiturapihi eta viyehe.

²⁰ Taicha tiáramicarehi eta juca vimaimatiquenehi. Vivaraha véchayare tájahapuca tacayemahi eta juca —náichapa.

²¹ Taicha ene nacahehi namutu ena ticavasanahi te Atenas, énapa ena náiteruanapahi. Náuricarinehi náechajisiha tamutu sácheana eta náimahaqueneana nasamaqueneanapahi arairuqueneana.

²² Tacahe, ema Pablo titupihapa te namirahu te nayehe cabildo. Máichavacapa:

—Tátanaveana, eti ecavasana te juca Atenas. Nímararacahehi eta yátupirahi religióshe.

²³ Taicha te nítecapapa núti eta ani eyehe, nupaicahi tamutu eta eyujarasirareana. Nímahapa eta eyehe altar tatiarihahi eta ajureca ani tacahehi: “Ema Viya vimaimatiquene”. Tiuri, ema maca Viya eyujaraureasa emáimatiqúenehi éti, émara ema Viya néchajisihaquenehi núti.

²⁴ Émara tépiyacahi eta apaquehe, étapa eta vímahaqueneanahi távaphianahi eta juca apaquehe. Émara téchahi ticavanairipihí te anuquehe étapa te juca apaquehe. Éma Viya vahi tácarichuimahi máucupaisihaya eta te vépiyaruana hi templo, taicha vahi mácamunu eta mapenainaichuhini eta te juca apaquehe.

²⁵ Váhivare mácamunu víjaracasichahini eta víámavahu viti achaneana. Vítira vicamunuvahi eta mayehe. Éma, téchapajiricahavihi vimutu. Tíjaracahavihi eta táurivahi eta vítaresira.

²⁶ Acane te tépanavainapa tamutu, ema Viya máepiyacapa ema máinapuiru achane ticajare Adán. Vimutu viti achaneana, mámariequenehavi ema Adán. Apánapanenéjihavíhiséra maicha ema Viya. Tamutu eta apaquehe víávapaicahi máicha. Máimicutiarachaphisera eta táenasihayarepahi eta víávasanapachuyarehi. Énerichuvare, máimicutiarachahivare eta táichecui-rayare eta vítaresirana.

²⁷ Vitiarihiserá viti achaneana vémitisicaipa ema Viya. Émasera mavarahahi vitanucayare. Váhinéni máyerehíhávihini. Titsecavahi éma te vichacaya. Mácani mavaraha matanuca, máichimavávaneyarehi.

²⁸ Taicha vítarecahi máicha, tímipaicahavihi, achanehavihi máicha. Émaripa éma ichapequene escribáno te emuri éti macahehi eta máechajiriruvahi: “Viti achaneana cáitarecahavihi ema Viya”.

²⁹ Víti vímatihi eta máchanechirahavihi ema Viya, macaitaresirahavihi. Viyamuricahi vipaicahi máicha. Tacahe, véjecapiravahi víti te vímijachapuca virataha víáchanecha eta visiñaraji. Vímivasichahineni eta jácani, váhisera tasamarahihini, váhivare tapaicahini, váhivare tayamuricahipucaini. Tayanapanepuca táurina te vépiyaca eta óropuca, plátapuca, chínapuca. Váhivare váratahaimahi nacasiñacarehini vícha.

³⁰ Te vicasiñarajhipuca eta vépiyaruana, vimáimatiririchaha. Ánaquiapáipa eta macamichirahi ema Viya ena achaneana eta nacasiñairahi eta nasiñarajiana. Puítisera vaipa macamicha eta juca. Tivanecahavipa vimutu víti achaneana vínájica eta juca, tátupiruvapa eta véneuchiravaina eta mayehe.

³¹ Taicha tatiarihiyarehi eta jena sácheyare máicuñacayare namutu ena tíchanahi eta juca. Tamutuina mátupiricayare. Mararihi ema achane manerejiruhi ema Viya, juéseyare eta viyehe. Éma, ticaijare Jesús. Ema Viya máimerecahi eta manerejisirahi ema Jesús juéseyarehi, taicha macaeche-pucahi te máecari te táequenepa eta máepenirahi —macahepa ema Pablo.

³² Te nasamapa eta máechajisihairahi eta máechepusirahi te máecari ema Jesús, natiarihi ena nacaecahiríchucha. Énaserá ena apamuriana napanerequenhapa. Tacahe, náichapa:

—Téhenarinevare apahena péchajisihavare eta juca, apaesa visamavi — náichapa.

³³ Tacahe, tiúchucapa ema Pablo eta te náurujisirareva. Tiyanapa.

³⁴ Natiarihisera ena apamuriana nasuapahi náehicapa eta mametarapi ema Pablo. Matarihíhi ema Dionisio táiyaraha eta nayehe cabildo, ésupa esu ésuna esena ticaijaru Dámaris. Natiarihivare ena apamurianahi.

18

Éma Pablo tiyanapa te avasare Corinto

¹ Te táequenepa eta juca, tiyanapa ema Pablo. Tiúchucapa eta avasare Atenas. Ticaijuhe eta apana avasare ticaijare Corinto.

² Ánaqui macainunapa ema émana israelíta ticaijarehi Aquila, ésupa esu mayena ticaijaru Priscila. Ema maca Aquila máuchusinehi te tinapaica eta departamento Ponto. Tayerevahisera eta áñoana, tiyananapa tayehe eta avasare Roma. Macáemataneínehi ánipíhi. Émasera ema aquenucaini Emperador Claudio macavanairipipa náuchuca namutu ena israelítana eta te Roma. Tacahe, tiyanapa ena Aquila tayehe eta avasare Corinto, étapa macainunainehi ema Pablo.

³ Énapa mávayechavacahi ema Pablo. Ena nani ticaticacanahi eta náematanerepiana tálabarteroana. Tímicatacacanapa eta nacaematanerahi.

⁴ Tiuri, tamutu sávaruana ema Pablo tiyanahi tayehe eta náurujisirareva. Maconsejachavacahi ena achaneana. Macajimuyacahi eta nasamureana ena israelítana énapa ena apavasanana.

⁵ Tacahe, napaenumavapa nacapayaca ema Silas émapa ema Timoteo, tísihanahi te Macedonia. Eta natiarihirahi éna, tépanavapa ema Pablo ticametarairu tamutu sácheana eta máechajiriruva ema Viya. Mavarahapa macajimuyacavaca ena israelítana ema Jesús émairahi Cristo ema nacuchapaquehehi.

⁶ Natiarihisera ena apamuriana masuapajirairahanahi. Nacatianacapa ema Pablo, napanararachavare. Tásiha, tétatajicavapa ema Pablo eta

máepacuhasa, táicutiarahi eta namaimitucacarevahi ena nani. Majunijicayarepa. Tásiha, máichavacapa:

—Étipa ecatapiravayare vaipa iúchucuhaimahi tayehe eta ecuñaraqui te apana vítaresira taicha eta emajacapirahi eta máechajiriruva ema Viya. Vaipa necha núti. Puiti juca nuyaninapa, nímiturecaya nayehe ena apavasanana — máichavacapa.

⁷ Tacahe, tiúchucapa tayehe eta náurujisirarevahi. Tiyanapa te mapena ema apana machamurihi ticaijare Justo. Ánaquipa eta máimituresihahi. Ema maca Justo, vahi israelítana, mapicauchahisera ema Viya. Eta mapenahi te tachacaya eta náurujisirareva ena israelítana.

⁸ Matiarahi ema apana achane ticaijare Crispo, tuparairucahi tayehe eta náurujisirarevahi. Masuapahi éma, ésupa esu mayena, ena machichanaveana, énapa ena apamuriana távihanahi te mapena. Camurianavare ena tisuapanahi ticavasanahi tayehe eta avasare Corinto eta nasamirahi eta máechajiriruva ema Viya. Namutu ticaicachasianahi.

⁹ Tacahe, étana yati, ema Viáquenu Jesús máechajicapa ema Pablo, ánipa maicha:

—Vahi picupica. Pímiyanavachucha picametarairu te juca avasare,

¹⁰ taicha camuriana ena nuchaneranaya. Núti nutiarahiya te pichacaya. Tájina náicharacavimahi ena piánarana —macahepa ema Jesús.

¹¹ Tacahe, ema Pablo manasipa. Étana año y medio macahehi tayehe eta avasare Corinto. Tímiturecahi nayehe ena achaneana eta máechajiriruva ema Viya.

¹² Étasera jena sácheana matupihairahi ema Prefecto ticaijare Galión. Aquenucahi éma tayehe eta avasare Corinto tayehehi capital eta departamento Acaya. Tiuri, ticurujicacanapa ena nacanarayarepa ema Pablo. Nacaratacapa námapa te mamirahu ema aquenuca, nametauchayarehi.

¹³ Tacahe, náichapa ema aquenuca:

—Ema maca achane macontracha eta viyeherepi. Ema máimitucavaca ena vijaneanana, náitsivachayare eta véjirairaya ema Viya —náichapa.

¹⁴ Téchajiuchavayarepaini ema Pablo, émasera ema Galión macachuricapa. Máichapa ena israelítana:

—Tiuri, esamanuchaha éti. Te tíñehhipuca eta májecapiravahi ema maca, ticaparecahipuca, núti apana nímisiapavahini juésenuinahini eta eyehe eta nusamirahénahini.

¹⁵ Étasera échájirirucavánachucha te máijare ema mácani apana, étapa eta eyeherepiana éti. Tájina táíñehicaréna eta juca. Vahi nímisiapavaimahi núti, juésenuinahini tayehe eta juca. Ímahainepa éti —máichapa.

¹⁶ Tacahe, máevatacavacapa náuchuca te mamirahu.

¹⁷ Tacahe, namutu ena apavasanana griégoana nacaratapaca ema Sóstenes, nacapitarahi ena israelítana. Náestapaca te mamirahu ema Prefecto Galión. Émasera váhiquene máimisipavahini. Váhivare macatiuchahini. Ema Pablo tichavapa tayehe eta Antioquía

¹⁸⁻¹⁹ Tiyerehichaha eta jena sácheana manasirarichaha ema Pablo. Te ticaicutiaravapa, mavarahapa tiyanaya eta te Jerusalén, tétavajisirayarepahi eta te avasare Efeso, étapa te avasare Tiro, táunavahi eta Siria. Tásiha, ticame-tavapa nayehe ena machamuriana. Macachanevacapaipa ema Aquila ésupa esu mayena Priscila. Tiyanapa tipaicana eta te puerto ticaijare Cencrea.

Te tiánuecanayarepa, ema Pablo ticachucasinumapa títahisinumapa eta machuti, máitachirayarehi eta mayehe promesa. Te títecapanapa te avasare Efeso, nanasihayarehi ema Aquila ésupa esu Priscila. Te jena sache sávaru, tiyanapa ema Pablo tayehe eta náurujisirareva ena israelítana. Téchajiricavaipa nayehe, máimitusiravacahi éna.

²⁰ Tacahe, éna navarahapa náiminasicha, émasera vahi máisapavahini.

²¹ Téhesera te ticametavapa nayehe, máichapa:

—Nuyanayare tayehe eta Jerusalén. Ánaqui nunarasihayare eta jena sácheana piéstairayare. Nuchavayaresera nímahapanaheyare éti, te mavaraha ema Viya tacuijaichu níchava —máichavacapa.

Tacahe, tiavacuhavarepa. Majunijicapa eta Efeso.

²² Te títecapapa ema Pablo tayehe eta avasare Cesarea, tiánucuhapa tayehe eta Jerusalén. Máechajipánavacapa ena machamuriana. Te táequenepa, tiyanapa te avasare Antioquía.

²³ Tiyerehi eta cájeana manasiranumahi tayehe eta avasare Antioquía. Tacahe, tiápechavavare tipaica. Máejiravacapahi ena machamuriana te jácani návihavacapahi tayehe eta avasarechichana te Galacia étapa eta Frigia. Maconsejachavacapahi ena machamuriana. Matiaríhi ema Apolo te Efeso

²⁴ Te jena sácheanahi, títecapahi te avasare Efeso ema émana israelíta ticaijare Apolo. Éma máuchurehi te avasare Alejandría. Máituca ticametarairu éma. Máimativare yátupi tamutu eta Sagrada Escritura ticaijare Antiguo Testamento.

²⁵⁻²⁶ Mavapinahi éma tamutu, étaripa eta máechajisirana. Ema Apolo máitucahi eta máimiturapiana ema Juan Ticachasiricarahi eta máitecapirayare ema Cristo ema nacuchapaquenehi. Máechahi eta máicachasisírahi ema Juan ema Jesús, ema yátupiquenehi Cristo. Váhisera tamutuhini maecha eta máichavaquenevahi ema Jesús. Tamutu sávaruana, tiyanapa tayehe eta náurujisirareva ena israelítana. Ticametarairupa, vahi mapicacaracavahini. Ánipa macahe:

—¡Títecapaipa ema Cristo ema vicuchapaquenehi! Ema ticaijare puiti Jesús. Vétupiricavaya vimutu eta viyaniraya te Jerusalén. Ema véhicaya taicha ema viáquenuya —macahepa.

Étasera te nasamapa ema Aquila ésupa esu Priscila, námapa éma te napena. Tásiha, náimitucapa tamutu eta apamuriana téchacareana mayehe ema Jesús.

²⁷ Manasipanapa ema Apolo te jena cájeana. Tacahe, mavarahapa tiyanayare te tinapaica eta departamento Acaya. Tásiha, ena machamuriana náimicatacapa. Ticajureanapa eta carta nayehe ena nachamurianahi tayehe eta avasareana macaijuheyarehi apaesa táuri eta najacapiraina. Te títecapapa éma tayehe eta Acaya, ichape eta máimicatasiravaca ena machamuriana taicha ema Viya máijaracahi eta máitupajijiasiravahi.

²⁸ Máimitucahivare ena israelítana eta te náurujisiravana. Máiminecapáequenehávacahi tayehe eta Sagrada Escritura ema Jesús émahí ema Cristo ema nacuchapaquenehi.

19

Títecapapa ema Pablo te avasare Efeso

¹ Tiuri, manasipa ema Apolo eta te avasare Corinto. Te jena sácheana, ema Pablo tiúchucahi eta avasareana táunavanahi eta Frigia. Eta mayanihapahi te

achene te márijuecuana. Tacahe, títecapapa tayehe eta avasare Efeso. Te jena avasare, natiarihihi ena apamuriana tisuapajirahianahi. Máimativacapaipa éna.

² Tacahe, mayaserecavacapa:

—¿Mávaháruhépa ema Espíritu Santo te ecáijuhéinapa ema Viya? — máichavacapa.

Tásiha, éna najicapapa:

—Váhira visamairica eta matiarahirahi ema Espíritu Santo.

³ Mápechavare ema Pablo mayaserecavaca:

—¿Tájahasica tacayemahi eta ecaicachasirahi éti? —máichavacapa.

Éna najicapapa:

—Eta vicaicachasirahi véhicahi eta máimiturapianahi ema Juan Tícachasirarahi —náichapa.

⁴ Ema Pablo mametacavacapa:

—Tiuri, yátupi ema Juan máicachasicavacahi ena achaneana eta náitsiva-chiraya eta náitaresirana. Énerichuvare, mametacavacahi eta nasuapirayare ema achane téhiequenehapahi éma. Puiti numetacahe: Ema maca téhiequenehapahi ema Juan ticaijare Jesús. Émaqueneripahi ema Cristo —máichavacapa.

⁵ Tacahe, te nasamapa eta juca, navarahapa ticaicachasiana te máijare ema Víaquenu Jesucristo. Tacahe, ema Pablo máicachasicavacapa.

⁶ Tacahe, manacapa eta mavahu te nápusiana. Tásiha, tiúcupaicapa ema Espíritu Santo, mávahácavacapa. Témunahircavanapa apáechajirírúvána. Ticametarairuanapa eta máechajiriruva ema Viya.

⁷ Eta nasimutuvahi ena nani, dóceanahi ena ajairana.

⁸ Tamutuhi sávaruana tiyana ema Pablo te náurujisirareva ena israelítana. Mapana caje ticametarairu nayehe ena achaneana. Vahi mapicacavahini eta macametarairuirahi. Macajimuyacavacahi ena achaneana, náehisiráina ema Jesús, náimatiraina eta émairahi Cristo, ema nacuchapaguenehi.

⁹ Natiarihisera ena apamuriana murácasamureánaríchucha. Váhivare návarahahini náehichahini ema Jesús. Te jácani náurujisiravana, nacaecahirichucha eta arairu máimiturapihi ema Jesús. Tacahe, ema Pablo térajicavapa eta nayehe. Máiputsimurihapa ena tisuapajirahianahi, mámamurihapa tayehe eta colegio máimituresirarehi ema ticaijare Tirano. Tacahe, ema Pablo tímiyanavapa tímitureca tamutu sácheana nayehe ena machamuriana.

¹⁰ Apina año eta máimituresirahi. Tacahe, ena máimitureanahi tiyananapa tipaicana. Ticametarairuanapaipa eta máechajiriruva ema Viya nayehe ena achaneana ticavasanahi eta te avasarechichana táunavanahi eta avasare Efeso, tayehehi capital eta departamento Asia. Tásiha, nasamairícapa namutu ena achaneana: ena israelítana énapa ena apavasanana.

¹¹ Ema Viya máimicatacahi ichape ema Pablo eta máichirayare eta tiáramicareana.

¹² Ichapemuriana ena achaneana macanararuanapahi tayehe eta páñoana, camisapuca macaratajiruanapahi. Máijaracavare nacaítecapaya nayehe ena nacajumaqueneana, tásiha tacanaracapaipa. Énerichuvare táquijicapahi ena éreanana.

¹³⁻¹⁴ Te jena avasare, natiarihihi ena siéteana israelítana ticapapejiricacana, machichanaveanahi ema ticaijarehi Esceva, náiyarahaini ena tiyuja-racarahiana te Jerusalén. Tacahe, ena nani siétequeneana napaiririruanahi.

Náitucahi naveha eta itiriji. Éna, eta navehairahi eta itiriji, navarahapa éna apanava napiaracayare eta máijare ema Jesús. (Váhisera náehichahini eta máimiturapiana.) Matiarihihivare ema achane macajumaquenehi maicha ema éreana. Tacahe, te napauchapa ema macajumaquenehi, náichapa:

—Piti éreana, vivanecavi te máijare ema Jesús máechajisihaquenepahi ema Pablo. Piúchuca te máquehe ema maca macajumaquene —náichapa.

¹⁵ Tásiha, ema éreana majicapapa:

—Nímati ema Jesús, émapa ema Pablo. Étiserá vahi nímatihe. ¿Nájahahepuca? ¡Ásajipucaini nusuapahehini! —máichapa.

¹⁶ Tacahe, ema achane mávaháruhi ema éreana majunauchavacapa éna. Máehavacapa máquipapaicavacapa namutu ena siétequeneana. Tiyananapa tijunana, najunijicapa eta mapena ema macajumaquene. Mamuiireanapaipa, ticajaranapaipa.

¹⁷ Tásiha, téchacarehi eta juca nayehe namutu ena ticavasanahe tayehe eta avasare Efeso, énaripa ena israelítana. Te nasamairiricapa, tipicanarinehi. Tásiha, nacahepa:

—Tétavicavapa tamutuirá tarataha eta máijare ema Jesús, náquenu ena nani —nacahepa.

¹⁸ Tacahe, ena téhicanapaipa ema Jesús, te náurujisiravana te tiyujaracana, timetaurecavanapaipa tamutu eta náejecapiravana eta náitaresirahi.

¹⁹ Natiarihi ena apamuriana ticaratacanahi eta iápemarecare. Námavacapaipa eta náitucaqueneanaini nasiñarajianainihi, nayehepuca libro. Náijuquechavacapaipa te namirahu ena nachamuriana. Vaipa nactiequenehapahini. Natupaequenehapasera eta tavachanahi te navacharecainapa tacapayacahi eta \$b250,000.

²⁰ Tacahe, ichape eta nasuapira ena achaneana eta máechajiriruva ema Viya. Camurianapaipa ena téhicanapahi.

²¹ Te táequenepa eta juca, ema Pablo macahepa:

—Nuvarahapa néjirapanaya ena vichamuriana ticavasana te Macedonia énapa ena apamuriana ticavasana te Acaya. Tásiha, nánucuhayare te Jerusalén. Te tamutupa eta juca, nuyaninavarepa te Roma —macahepa.

²² Tacahe, máevatacavacapa náinapuca ena apinana machamuriana ema Timoteo émapa ema Erasto. Tiyananapa tayehe eta Macedonia. Émasera manasipanarichaha tayehe eta Efeso.

Tisemamurianapa ena achaneana te avasare Efeso

²³ Tacahe, te jena sácheanahi, tisemamurianapa ena apamuriana achaneana taicha camurianapaipa ena téhicanapahi ema Viáquenu Jesús. Áni tacahehi eta nasemirahi.

²⁴ Matiarihihí ema achane ticajare Demetrio. Ema maca achane, máepiyacahi eta suyehe trónochicha esu nasiñaraji ticajaru Diana. Ticutihí eta peticichá eta táimahi eta templo suávihahi ésu. Amairihahi plata. Tiúrihi eta maganaresira éma, énapa ena apamuriana plateroana macutiqueneanahi.

²⁵ Tacahe, macurujicapa ena apamuriana plateroana. Tásiha, máichavacapa:

—Tátanaveana, éti ímatihi eta juca vématanerepíhi, tiúrihi eta viganaresira.

²⁶ Ímaharichuhi puiti éti, esamahivare ema maca Pablo macahehi eta máechajiruvahi ena nani visiñarajiana vépiyaruana viti achaneana váhiji yátupinahini vénainahini. Ichapemurianaripa ena tisuapanahi, taicha

nasamaripa eta máimiturapiana namutuyareni ena achaneana ticavasanahi te juca viávasa Efeso, énerichuhivare ena ticavasanahi eta te avasarechichana táunavana eta Asia.

²⁷ Ticauyayacarehi eta juca. Táemitiequenehahini eta juca táurivahi eta viganaresira. Étaripa eta templo suávihahi esu súrinaquene visiñaraji Diana témítiequenapapuca, nacuijapapuca nacuechahi. Náemitisicáinapapúca eta táurivainihi eta náejirairahi namutu ena achaneana te juca apaquehe — máichavacapa.

²⁸ Tacahe, eta nasamirahi ena apamuriana, tisemanarinehi, tipiaracanapa. Ánipa nacahe:

—¡Viva esu Diana visiñaraji viti efesioana! —nacahepa.

²⁹ Tacahe, tisemamurianapa ena apamuriana achaneana. Apanapa eta napanerecha. Tiuri, natiarihihi ema Gayo émapa ema Aristarco, macompañeroana ema Pablo náuchureanahi eta te avasare Macedonia. Tacahe, ena achaneana nacaratapaca ena nani apinana. Námapa tayehe eta náurujisiráveva.

³⁰ Émapa ema Pablo mavarahapa masiápamuriháyarehíni máechajicavacayarehi, énasera ena machamuriana vahi náisapahini.

³¹ Natiarihivare ena apamuriana, tuparairucanahi tayehe eta departamento Asia, mayeaneanahi amigo ema Pablo. Nacametarapipa vahi macuímisiápava.

³² Tacahe, eta náurujisirávahi tijajamurihanahi. Ema émana tipiaracahi, apanahi eta macayema. Ema apana, énerichuvare tipiaracahivare apanahivare eta macayema. Namutuyareni ena achaneana apápipijivácachucha eta nacayemaqueneana. Vahi náimatíequenehahíni tájahapuca tacayemahi eta naúrujisirávahi.

³³ Tacahe, ena apamuriana israelítana náichuhapa ema Alejandro. Nametacapa eta táicharacávahi eta náurujisirávahi. Tacahe, navanecapa téchajica, maconsejachavacayarehi ena achaneana. Tásiha, ema titupihapa te namirahu. Máimicutiarachapa te mavahu namatinachaha.

³⁴ Tásiha, náimativanepa ema émarichuhi israelítahi. Tépanavanavarepa tipiaracana. Apina hora nacahe eta napiarareresirahi:

—¡Viva esu Diana visiñaraji viti efesioana! —nacahepa.

³⁵ Tacahe, títecapanecha ema tayehehi alcalde eta avasare. Macamatina-cavacapa. Tásiha, téchajicapa. Ánipa macahe:

—Tátanaveana, mémenaveana. Emutu eti tachichanaveana eta juca viávasa Efeso. Nájina émanáina achane vahi macuechahini eta véchapajirisira vimutu eta templo suávihahi esu súrinaquene visiñaraji Diana, esu sucapichahuquenehi taicha eta juca mari suáquehehi ánaquiaparipa eta táemirisirahi te anuma.

³⁶ Nájina tépuruina eta juca. Ésamiricavachucha. Vahi ecuijajahuchava. Epanerechinava te tiúriyarepuca.

³⁷ Taicha ena nani ajairana íamaqueneanapahi, tájina natapiravainahini. Vahi nacaecahi esu visiñaraji, váhivare námeyecha ésu eta suyereruvana.

³⁸ Tiuri puiti, ema Demetrio, énapa ena machamuriana, te navarahapuca tímetaurecana, nararihi ena juéseana. Nacaunehi nácani tímetaurecanaya. Táuchusihayare eta natapiravana.

³⁹ Téheserapuca apana jácani evarahaquene, ticaechacasiyarehi te reunión tásihaquenezarehi viyehe viti tuparairucana.

⁴⁰ Tíñehicare eta juca íchaquenehi. Náimijachaipa ena achaneana víchahi eta revolución puiti jena sache. Tijuricati natiarihi tiyaserechávianaya eta táicharacavahi eta juca. Tájina viviyavaimahi —macahepa ema alcalde.

⁴¹ Te tamutupa eta máechajisirahi, mavanecapa téjanerecana ena achaneana. Títavapa eta náurujisirávahi. Tacahe, téjanerecanapa ena achaneana, tamutupa eta nasemirahi.

20

Tiyanavare ema Pablo te departamento Macedonia étpa te Acaya

¹ Tacahe, te táequenepa eta jácani sácheana, ema Pablo máichuhavacapa ena machamuriana, maconsejachavacapa. Tásiha, ticametavapa nayehe. Tiyanapa tiánueca macaijuhepa eta te departamento Macedonia.

² Máejiravacapaipa namutu ena machamuriana ticavasanapahi te avasarechichana. Máetumechavácaphi éna eta maconsejachiravacaphi, máitecapirapa tayehe eta avasare Corinto, táunavahi eta departamento Grecia (ticajarehivare Acaya).

³ Ánaqui manasipanapa tayehe, mapana caje eta mávihairahi. Tásiha, mapanerechaipa tiávacuhaya te pacure eta mánesirayare macaijuheraya eta te Siria. Étasea te máechapa eta navairairahi nacapaca ena israelítana mánarana, téquecavapa eta mapanereru. Tiyanapa tipaíca tichavapa tayehe eta Macedonia eta mávacuíyayarehi.

⁴ Eta machavirapa, náehicapa ena machamuriana ema ticajare Sopater ticavasahi te Berea, ema Aristarco émapa ema Segundo ticavasanahi te Tesalónica, ema Gayo ticavasahi te Derbe. Máehicavare ema Timoteo. Natiarihivare ema Tíquico émapa ema Trófimo ticavasanahi te tinapaica eta Asia.

⁵ Tacahe, títetapanapa te Filipos, návihahi nútí. Tacahe, ena siétequeneana vichamuriana títapucanapa tiyanana tiánuecanapa, nacaijuhepa eta apana puerto ticajare Troas. Ánaquipa nacuchapíhahavihi.

⁶ Tásiha víti, te táequenepa eta Pascua vinisirahi eta pan mayehere levadura, vipaenumavapa víuchuca tayehe eta Filipos. Viávacuhapa viyanapa. Cinco sache eta víánesira. Vicápayamuríhapa te Troas. Vinasipanapa tayehe, siete sache vicahe.

Máejirapa ema Pablo ena machamuriana ticavasanahi te Troas

⁷ Te jena títapuca sáche tayehe eta semana, tiúrujicavanapa ena vichamuriana. Viyuvetucayare, vinicayare eta pan táicutiarahi eta máepenirahi ema Viáquenu Jesucristo. Tacahe, ema Pablo maconsejachavacapa jena yati, taicha tiúchucayarehi te jena yáticarahi. Tiúnahi eta máechajisirávacahi. Te énumuhupa yati tímiyanavaríchaha téchajica.

⁸ Eta viúrujisirávahi te anuquehe peti te mapanaquene piso. Tatiarihihi camuri eta namicahuana.

⁹ Matiarihihi ema émana amaperu ticajare Eutico. Téjacahi éma eta te ventana. Tacahe, eta táunavahi eta máechajisirahi ema Pablo, ema amaperu téyucaipahi. Eta máimasirahi, tiáquipaicavapa te anuquehe ventana. Tacahe éna, tiúcupaicanéanapa nacáechepupánayarehi. Éma tépenaripahi.

¹⁰ Tacahe, ema Pablo tiúcupaicaipa, mapauchapa ema amaperu. Mayurata-nauchapa majupahacapa. Tacahe, máichapa ena machamuriana:

—Vahi ecueñamava. Tichavayare títareca —máichapa.

Jéhesaréinehi, tichavapa títareca ema amaperu.

¹¹ Tacahe, tichavanavare tiápanana te náurujisiávahi. Tacahe, tinicanapa. Tásiha, ema Pablo tijárahíacaríhaha eta máechajírísiravacahi. Te títapiricapa, tiyanapa.

¹² Tacahe, te téjanerecanapa, námapa ema amaperu máitareruhi. Ichape eta náurisamurevapahi.

Tiúchucanapa tayehe eta Troas, nacaijuhepa te Mileto

¹³ Viti viávacuharipa, viyanapa vicainapucavahi tayehe eta apanavare puerto Asón eta mávacuiyarehi ema Pablo, taicha ichape eta táepiñu. Émasera ema Pablo tipaicayarehi tímitupiruchavapa.

¹⁴ Te vítecapapa te Asón, tiávachapa éma. Tacahe, viyanapa vicaijuhehi eta apanavare puerto Mitilene.

¹⁵ Te apanapa sache viúchucavarepa tayehe, viánucuhapa te tachacaya eta tiúrupuhi ticaijarehi Quío. Te apanavarepa sache, vítecapapa te apanavare tiúrupuhi ticaijarehi Samos. Víchecapa tayehe, vinaracanumapa eta te puerto ticaijarehi Trogilio. Te apanapa sache viyanavarepa, vítecapapa te puerto ticaijarehi Mileto.

¹⁶ Váipa vétavajichahini te Efeso, taicha ema Pablo vaipa mávarahahini váyereréjipahini eta vipaisirapahi te táunavahi te Asia. Taicha mavarahahi títecapavaneyare te Jerusalén, eta máimaiyarehi eta napiestara ticaijare Pentecostés. Étapa tiámahaviyare te viratavayarepuca.

Eta maconsejachira ema Pablo nayehe ena náiyarahana pastoreana ticavasana te Efeso

¹⁷ Etasera eta viávihairahi te Mileto, ema Pablo máimichuhavacapa ena náiyarahana pastoreana tayehe eta avasare te Efeso.

¹⁸ Te títecapanapa éna, majacapavacapa. Tásiha, tépanavapa máechajírí-cavaca, máichavaca:

—Éti ímatinuhi táicharacavahi eta nítaresirahi eta jena sácheana te níteca-pauchahénapa. Tájina níchahini núti eta nuyehéchiravana.

¹⁹ Tájínavare vahi népiyacavahini aquenucanuinahini eta eyehe. Nucaemata-
taneacahi ema Viáquenu. Vahi nusemaimahi tayehe tamutu eta níchava-
quenévanahi naicha ena nujaneanana israelítana, navarairahi títaequene-
hanuana. Tasapiha ticaiyacanu naicha eta namásuapajíríavana.

²⁰ Tamutu numetacahehi eta táuriqueneana tiúríchaheyare éti apanava. Nímitucahehi te jácani viúrujisirávana étapa te epenana.

²¹ Nuconsejachahivare namutu ena achaneana, eta náeneuchiravaina me Viya, eta náitsivachiraina eta náitaresirana, étapa eta nasuapiraina nacasi-
ñairaina ema Viáquenu Jesucristo.

²² Puítisera nuyaninapa te Jerusalén. Taicha nuvanecasivahi mayehe ema Espíritu Santo. Vahi necha núti tájahapuca nícharacavaya eta ánaqui.

²³ Tacarichu necha eta mametasiranuana ema Espíritu Santo. Tamutu eta avasareana nupaisihanapahi, timetacanutapahi éma eta nucatajivairaya, napresuchiranuya te cárcel te Jerusalén.

²⁴ Tájinasera vahi nupicacava. Tayanapanéine népenapuca, vahi néñama eta nítaresira. Nuvaraha nímiyanavaya eta núrivahi mayehe ema Viya. Nuvapi-
navahi eta nítauchiraya eta nutuparacasivahi mayehe ema Viáquenu Jesu-
cristo. Taicha éma tituparacanuhi nucametarairuya eta máemunasirahavihi
ema Viya vimutu viti achaneana.

²⁵ Numetacahe: Puiti juca nuyaniraya, vaipa iápechavaimahi ímahanu. Eti ínapureanahi nímítuceanahi emutu éti te iávasanapachuhi. Nímítuceahehi tamutu eta véhisiraya ema Viáquenu Jesucristo.

²⁶ Eta tacahe, numetacahe puiti: Vaipa nútíparacáina te natiaríhinapuca téjecapavanaya te etaracu éti.

²⁷ Tamutuhi numetacahe eta mavarahaqueneana ema Viya. Tájina vahi nuyumurupichahini.

²⁸ Tiuri puiti, ejaneacavayare éti, énerichuvare ejaneacayare ena iúmúrivana taicha etuparahaipa mayehe ema Espíritu Santo eta ejaneasirayare ena manerejiruanahi ema Viáquenu, énavenehi tépenahi éma, máepusaicahi eta máítine.

²⁹ Ecaunevaicha muraca, taicha puiti juca nujuníjisiraheya, tijuricati títecanaya ena navarahaya témejecapávachaheánaya. Navarahaya ticajanerecaheanaya tacutiyaire eta chuye tinícarahi te tajanereca eta varayuana.

³⁰ Énaparichu ena vichamuriana te etaracu, natiaríhiyaire ena tímítuceanaya nahapapicayare témejecapávachanaya ena nácani apamuriana vichamuriana, navarairainahi éhicayare eta napanereruana.

³¹ Tásiha, ecaunevaicha yátupina. Échavayare eta mapanaquene año eta nutiaríhirahi eyehe. Tamutuhi sácheana, yátiana nuconsejachahehi, émanapachuhi numetaca. Níyahasamurehi taicha eta nímairahahi.

³² Puitísera, nuparapenaveana, nuyanainapa. Nuyáseuchahéyareséra me Viya eta majaneasiraheya. Ecaravahuirainapa yátupina eta máechajiriruvana ema Viya. Túmeheyarepaipa táicha. Ema Viya mavarahahi ímijuruchayare eta juca máechajiriruva; taicha mavaraha tíjaracaheya eta ícuchianahi te anuma eta iávihayare, ecachaneraya ena apamuriana masántuchaqueneánarípa.

³³ Eta návihairahi eyehe, vahi nujamurachahini eta emuirihana étaripa eta plata íjaracanhini.

³⁴ Ímararacanhini éti eta táchararacavahi eta nucaematanera. Nucaematanehi tiásihanahi te nuvahuana, nuviyahi eta nucamunuqueneana, énapa ena tímícatacanuanahi.

³⁵ Tamutu nímítuceahehi tacaheyare eta vicáematanéraya, vímicatasirayareva ena ticamunuvana, nacajumaqueneana. Véchavayare tativa eta máechajiriruvahi ema Viáquenu Jesucristo, ani macahehi: “Viúripanaya me Viya, te vicajirica eta vímahaqueneana nayehe ena apamuriana. Vahi vicujamuracha nájjaracasichahavi” macahepa.

³⁶ Te tamutupa eta juca maconsejachiravacahi ema Pablo, tépuyucanapa namutu. Tiyujaracapa mayaseuchavacapa me Viya.

³⁷ Tásiha, tíyahanapa namutu, najupacapa náetserarecapa ema Pablo.

³⁸ Tipanererecanaipa taicha eta mametasiravacahi vájpa tíápechavainaimahi náimaha éma. Tásiha, tiyananapa nanapana eta te mávacuiyayarehi.

21

Eta viyanirapa eta te Jerusalén

1 Te vijuníjicapa ena vichamuriana, viávacuhapa viyanapa vitupiruruchapaipa eta tíurupuhi ticaijare Cos. Te apanapa sache vicaijuhepa eta tíurupuhi ticaijare Rodas. Te apanavarepa sache viánucuhavarepa eta puerto ticaijare Pátara.

² Éta pa vicainunainehi eta apana pacure tiyanayarehi tayehe eta apachara apanavare departamento Siria. Tacahe, viávacuhapa tayehe, viyanapa.

³ Eta vipaisirapahi, viánucuhapa eta tiúrupuhi Chipre tanapaicapahi te sapa eta viyehe. Vímiyanavachucha vipaica vítecapira te puerto ticaijarehi Tiro tayehe eta Siria. Taicha eta pacure véhirupahi tanaquicayarehi eta carga támaquenepahi tayehe eta puerto.

⁴ Éta pa vicainunainehi eta apamuriana vichamuriana. Vinasipanapa nayehe, siete sache vicahe. Te juca, ema Espiritu Santo mametacavacahi ena vichamuriana eta máichavayare ema Pablo te Jerusalén. Tacahe, nametacapa ema Pablo eta vahi macuitecapa te Jerusalén.

⁵ Téhesera tíuchucayarepa eta pacure véhirupahi, viyanapa te puerto. Téhicahavianapa namutu ena vichamurianahi, énapa ena nayenana énapa ena nachichanaveana. Tinapanahavianapa te pacure. Te vítecapapa te playa, vépuyucapa vimutu, viyujaracapa.

⁶ Te tamutupa, vémamavauchavacapa vicametavapa eta nayehe, viávacuhapa. Tásiha, tichavanapa éna te napenana.

⁷ Eta viásihairahi te Tiro, vítecapapa te Tolemada. Éta pa táenasihahi eta vipaisirahi te une. Viyanapa véchajicavacahi ena vichamuriana. Vinasipa éta na sache eta nayehe.

⁸ Te apanaquenepa sache viyanapa vicaijuhepa eta avasare Cesarea. Te vítecapapa, viyanapa te mapena ema Felipe ema ticametarairurahi, ema nasitenehi ena nanerejiruanahi téchapajiricanahi eta nirureana nayeheana ena máimaruana. Vinasipa eta mayehe.

⁹ Ema Felipe, natiarihi ena cuátroana machichanaveana esenana, máimaruana richaha. Ena nani máijaracahi ema Viya eta náitusirahi ticametarairuana.

¹⁰ Eta jena sácheana viávihairahi mayehe ema Felipe, títecapapa ema émana profeta ticaijarehi Agabo. Éma tiásihahi te Judea.

¹¹ Títecapauchahavipa tímahapanahaviyarehi. Tacahe, mayaseacapa eta máitijuhe ema Pablo. Tásiha, títiapechavapa, éta pa eta mavahuana. Tásiha, macahepa:

—Ema Espiritu Santo ani macahehi eta máechajiruvahi: “Ena vijaneanana te Jerusalén nacaratacayare ema ticayehe eta juca itijuere. Náitiacaya, náijarecayareva nayehe ena apavasanana” —macahepa ema Agabo.

¹² Tacahe, vimutu viti, énapa ena ticavasanahi tayehe, viyaseacapa ema Pablo eta vahi macuyana te Jerusalén.

¹³ Émasera ema Pablo máichahavipa:

—¿Tájaha tacayema ímipanererecanu eta juca íyáuchiranuhi? Vahi nupica te náitiacanupuca. Núti níjaracava népena te Jerusalén máichavenénahi ema Viáquenu Jesucristo —máichapa.

¹⁴ Te vímahapa vahi váratahahini víchejica, vísapapa tiyana. Vicahepa:

—Énenarinepuca tácahe, máimahavirinepa ema Viya —vicahepa.

¹⁵ Te tamutupa, vétupiricavapa. Viyanapa te Jerusalén.

¹⁶ Téhicahavianapa ena vichamuriana ticavasanahi te Cesarea. Téhicahavipahivare ema vichamuri ticaijare Nasón. Ánaquiripahi eta máehisirahi ema Jesús. Éma, máuchurehi eta te tiúrupuhi Chipre. Tatiarihisera eta mapena te Jerusalén, eta vítecapihayarehi.

Ena Pablo máejirapanapa ena Santiago

¹⁷ Te vítecapapa te Jerusalén, ena vichamuriana tiúrisamureanaríne eta najacapirahavihi.

¹⁸ Te apanapa sache ena Pablo tiámahavipa, viúrucicavayarehi te mapena ena Santiago. Vichimapapa natiarihipa namutu ena víyarahana pastoreana.

¹⁹ Tacahe, ena Pablo máechajicavacapa éna. Mametacavacapa tamutu ena máimicatasirapahi ena Viya eta macametarairuirapahi nayehe ena apavasanana étapa eta máichirapahi eta tiáramicareana.

²⁰ Te nasamapa ena mametaruanahi, nacunacharinehi ena Viya. Tacahe, náichapa ena Pablo:

—Tétavacavapa táuriva eta juca pimetarapiana. Pímahapasera natiarihihira ena camuriqueneana ena vijaneanana téhicanahi ena Jesús. Énaserá, muracaqueneanahi religiúsoanahi, téhicanahi eta mayeherepini ena Moisés.

²¹ Puiti, jucarihi eta pépiyaequenehi eta pihápapicahíji eta pímitusiravacahi ena vijaneanana ticavasanahi te avasareana estranjeroana. Pímitucavacahiji eta váhiji nacusuapa eta mavanairipiana ena Moisés, váhivaréji nacumarcacha ena nachichanaveana ajairana, váhivaréji nacuehica eta viyeherepiana.

²² ¿Tájahapuca táicharacava eta juca? Tijuricati ena achaneana tiúrucicavanapapa, te nasamairiricapa eta pitarihirahi.

²³ Tiúripapa eta juca píchayare. Nararihi te juca vitaracu ena cuátroana ajairana. Títáuchanapáipa eta nayehe promesa.

²⁴ Pisipahacavaya, piámamuriha éna eta pímeresiravaya tayehe eta Templo. Pívachachinaya eta uvesa navehaqueneana apaesa éna náisapava nacachucasi eta nachutimacana. Eta táicutiarayare eta vahi yátupinahí eta pépiyaequenehi, apaesa náimahavi eta pipicauchirahi eta mavanairipiana ena Moisés.

²⁵ Énaserá ena vichamuriana apavasanana, vímiamarecaripa eta vicartane. Náecharipa eta vaípa étaparacáinahíni nayehe eta juca. Tacarichu vahi nacunica eta taeche eta sárare nayujaraurehi te tamírahu eta nasiñarajiana, váhivare nacunica eta táitine eta sárareana, váhivare nacunica eta taeche eta sárare namaechatinure. Énerichuvare vahi nacuveha esu súcaini apana esena. Énaripa ena amaperuana, tacuija eta natuhusivaina —náichapa ena pastoreana.

Nacaratacapa ena Pablo eta te Templo

²⁶ Tacahe, ena Pablo tísapavapa. Te apanaquenepa sache, tisipahacavapa, énapa ena cuátroqueneana ajairana. Mámavacapa, tiyananapa te Templo. Nametapanayarehi ena téchapajicarahiana eta Templo, semanayareipahi eta nanaquisiravayare eta námavahuana.

²⁷ Tacahe, te náitauchapa eta siete sache eta nasipahasiravahi, tichavanapa te Templo. Te jena sache, natiarihipavare ena apamuriana najaneanana tiásihanahi te tinapaica eta Asia. Eta mávihairarichaha ena Pablo te Templo, náimahapa éna. Tacahe, náimiyusemacapa namutu ena achaneana. Nacaratacapa ena Pablo.

²⁸ Tipiaracanapa:

—¡Tátanaveana israelítana! ¡Yare, ímicatacahavi! Émara ena maca achane ena tipaichi tamutu avasareana. Tímiturecapahi nayehe ena achaneana eta macontrachirahi eta víávasa. Énerichuvare macatianacahi

eta mayeherepi ema Moisés, étapa eta juca viyehe Templo. Puiti macasiapavare te juca Templo ema apavasanatataji. Majararecapa eta juca tacapichahuquenehi —nacahepa.

²⁹ Ena nayunacahi eta juca, taicha náimahahi te calle ema Pablo macachanepahi ema Trófimo ticavasahi te Efeso. Náimijachahi mámahi ema Pablo te tajuhe eta Templo.

³⁰ Tacahe, tijúnapacarajíanapáipa namutu ena achaneana te tajuhe eta avasare. Ena ticatianacanahi ema Pablo nacaratacapa éma, nachururupai-capaipe eta nacuchusirahi tayehe eta Templo. Tacahe, ena apamuriana náeratacavanepa eta tapajacura eta Templo.

³¹ Navarahapa nacapacavaneyarehini. Masámairiricavánepaséra ema comandante nayehe ena suntaruana, tatiarirahahi eta revolución te tajuhe eta avasare.

³² Tacahe, ema comandante máichuhapa ena masuntarurana énapa ena oficialeana. Tiyananapa tijunapanapaipa. Ena achaneana, te náimahapa eta máitecapauchirahi ema comandante, náinajicapa eta náehairahi ema Pablo.

³³ Tacahe, ema comandante mapauchapa ema Pablo, macavanairipipa nacarataca, náitiacapa te apipi cadena. Tásiha, mayaserecapa te nájahhipuca, tájahapuca maviurevahi.

³⁴ Énasea ena achaneana tipiaracanarichucha, apapipijipa eta nacayema. Vaipa mácaicutiarahini ema comandante tájahapuca eta nacayemahi taicha eta najajasirahi. Tásiha, macavanairipipa náma te cuartel.

³⁵ Ticajerahisera eta nápanirapaipa te tayehe grada eta cuartel. Nanarahapapa ema Pablo, taicha ena achaneana navarahaichucha nacapacavane.

³⁶ Taicha namutu náehicapahi tipiaracanapaipa:

—Máepenávanetataji —nacahepa.

³⁷ Te tisiapanayarepa te tajuhe te cuartel, ema Pablo máichapa ema comandante:

—¿Písapanupuca néchajica?

Tacahe, ema comandante majicapapa:

—¡Jéhepuca, píti pítuca péchajica te véchajiriruva griego!

³⁸ Tacahe, ¿váhiyara pífina ema ticavasa te Egipto, ema tíchahi eta revolución ticaeteharecahi cape juca viásinequenehi, ema majunaquenehi tiámamurirahi te mávapahi ena cuatro mílqueneana ticapahiana? —máichapa.

³⁹ Tacahe, ema Pablo máichapa:

—Vahi nútina, tata. Nútirichu israelítanu. Eta núchusine te Tarso. Tavanaranu eta ichape avasare capital te Cilicia. Picatajicanusera písapanu néchajicaya nayehe ena achaneana —máichapa.

Téchajicapa ema Pablo te namirahu ena achaneana

⁴⁰ Tacahe, ema comandante máisapapa téchajica. Titupihapa ema Pablo te tayehe grada eta cuartel. Tacahe, macanunquechapa eta mavahu, macamatinacapa ena achaneana. Te timatinanapa, tépanavapa téchajica eta náechajiriruha ena majaneanana, ánipa macahe:

22

¹ —Tátanaveana, nuparapenaveana. Esamanuchaha eta néchajisiraheya nucatiuchiravaya —macahepa.

² Tacahe, te nasamapa eta máechajisiravacahi te náechajiriruva, tésamirimuriávanapa ticasamarahianapa. Tinahacavapa téchajica ema Pablo, máichavacapa:

³—Nútirichu ejaneana, israelítanu. Eta núchusine te avasare Tarso tayehe capital eta Cilicia. Ánipasera nujurusinehi te juca viávasa Jerusalén. Ema tímítucanuhi ema víyacara Gamaliel. Nujuruchahi eta nupicauchirahi yátupi eta viyeherepi nájararuhavihi ena viáchucanaveanaini. Eta nítaresirahi, nímicapicáuchahi ema Viya, tacutihi puiti eta ímicapicáuchirahi éti te juca sácheana.

⁴Eta nítaresirahi, nucatianacavacainihi ena téhicanahi ema Jesús. Nupresuchavacahi nucasiapavacahi te cárcel ena ajairana énapa ena esenana. Nímicapacavacahi éna.

⁵Tímatinuanarichuhi namutu ena aquenucarahana émapa ema corregidor. Taicha éna tíjaracanuanahi eta órdena nayeheya ena vijaneanana ticavasanahi te Damasco, náimicatasiranuyare eta nucaratasiraya ena téhicanahi ena Jesús. Tacahe, nuyanapa népanavacayarehini éna, ticaemecharahianayarehi.

Ena Pablo mametacavacapa eta máehisrahiva éma apanava ema Jesús (Hch 9.1-19; 26.12-18)

⁶ Tacahe, eta nupaisirapahi te achene, nánehiripa eta avasare Damasco. Te jena las dócequeneyárepa sache, tiáramicarepa eta tijarahi tímícauchanuhi tísiha te anuma.

⁷Náqui paicavapa te apaquehe. Nusamapa ema téchajicanuhi, máichanupa: “Saulo, Saulo, ¿tájaha tacayema picatianacanu pipánájiricanu?”

⁸Tacahe, nuyaserecapa: “¿Nájahavi piti tata?” níchapa. Tásiha, tijicapanupa: “Nuti Jesús Nazareno, nuti picatianaruhi, eta pipánájirisiravaca ena téhicanuanahi” máichanupa.

⁹Énerichuvare ena téhicanuanapahi náimahahi eta tijarahi tímícauchanuhi. Tiáramecanarinehivare éna apanava. Váhisera nácacutiarahini ema téchajicanuhi.

¹⁰Tacahe, nujicapapa núti: “¿Tájahasica níchayare, Tata?” Tásiha, ema Viya máichanupa: “Péhepuca, piyana pítecapa te avasare Damasco. Ánaqui mararihi ema timetacaviyare tamutu eta pématanerepiyare pítauchaqueneyare nuyehe” máichanupa.

¹¹Tásiha, púchuquinupa taicha eta tijarahi. Tacahe, ena nucompañeroanapahi tiámanuanapa tichurucanuanapaipa te nuvahu, nacaitecapiranupa te avasare Damasco.

¹²Eta ánaqui, matiarihihhi ema émana vijaneana ticaijare Ananías. Títaurahi éma tayehe eta mavanairipiana ema Moisés. Namutuhi ena vijaneanana ticavasanahi te Damasco nacunachahi éma.

¹³Títecapa ema Ananías, tímahapananuhi. Te títecapauchanupa, máichanupa: “Nuparape Saulo, tachava eta pímairisira”. Tacahe, tíjahúchavapa nímaírira. Nímahapa éma.

¹⁴Tacahe, máichanupa éma: “Ena Viya nacasiñaquenehi ena viáchucanaveánaini, píti manerejiruvihhi taicha mavarahahi tímimatichaviya eta mapanereru. Énerichuvare mavarahapa tímimatichavi ema máuriquene Cristo, émaquenehi téchajicavihi eta cape.

15 Péchajisihayare éma eta picametarairuirayare nayehe namutu ena achaneana picainunaqueneanaya. Pimetacayare eta juca pímairahi étapa eta písamirahi éma.

16 Tiuri puiti, enevane picaicachasiya te máijare ema Viáquenu Jesucristo. Picasiñava mayehe eta tacasipairaya eta pipecaturana” máichanupa ema Ananías.

Éma Pablo mametacavacapa eta macavanahirahi nayehe ena apavasanana

17 Tásiha, te nuchavapa ani te Jerusalén, nítecapa ani te juca Templo. Te nujuaracaipa, tíapechanuvarepa téchajicanu ema Viya.

18 Eta nímairahi éma, máichanupa: “Piyayauchavayare eta piúchusiraya te juca Jerusalén, taicha vahi tisuapavianaimahi eta péchajisiháiranuya”.

19 Tacahe, núti níchapa: “Tiuri, Tata. Énasea, tímatinuanahi eta néstarasiravacahi nupresuchiravacahi ena téhicavianahi. Tamutuhi te náurujisirarevana nutanusihavacapahi éna.

20 Énerichuvare, te nacapacapa ema Esteban ema pivanarainihi, nutiarihivare. Nímícatacahivare ena ticapacanahi, nujaneasiravacahi eta namuirihana. Tijuricatipuca nasamararacanu eta numetasiravaca eta péchajisiranuhi” níchapa.

21 Émasera ema Viáquenu tipamicanuichucha: “Piyanyaresera. Núti nuvanecavi pipaicyare nayehe ena apavasanana ticavasanahi te tayerehi-queneana” máichanupa.

22 Tacahe, ena achaneana, eta nasamirahi eta juca, vaipa návarahahini nasamararaca. Tisemanapaicha. Tipiaracanapa:

—Tiúripa náepenachucha ema maca achanetataji. Vaipa táuricahini máitarecarichahahíni —nacahepa ena mánarana ema Pablo.

Éma comandante macasiapapa te tajuhe ema Pablo

23 Muracapanapa eta napiarasira. Tivejamuhiacavanapa eta nacamisana eta nasemaneva. Navehavare eta máteji. Náevajasicapa ema Pablo.

24 Tacahe, ema comandante macavanairipipa nacasiapa ema Pablo te tajuhe eta cuartel. Macavanairipivare náestaca, mavarairahi máimicaeche-rachaya ema Pablo eta maviurevahi, tájahapuca tacayemahi eta nasemirahi ena achaneana eta mayehe.

25 Étasea te náitiacyarepa eta náestasirayarehi, téchajiuchavanumapa ema Pablo eta mayehe ema nacapitara ena suntaruana. Máichapa:

—Núti tavanaranuhi eta viávasa Roma. Picunevachucha, machu péjecapava eta péstasiranu, vuíchaha táimaticarehini eta nutapiravapuca —máichapa.

26 Te masamapa ema nacapitara eta juca, tiyanapa mametaca ema comandante. Máichapa:

—Péchapavachucha eta pivairairahi pémostareca ema maena achane. Taicha tavanaráji eta Roma —macahepa ema nacapitara.

27 Tacahe, ema comandante tiyanapa mapauchahi ema Pablo. Máichapa:

—¿Yátupisaréji tavanaravi eta Roma? —macahepa.

Éma Pablo majicapapa:

—Yátupi —máichapa.

28 Tásiha, macahepa ema comandante:

—Núti, ichapemuri plata náquijica eta nusiapirayare eta tavanaranuirayare eta Roma. Píti, ¿tájahapuca eta pítujisiravahi eta pisiapirahi? — máichapa.

Ena Pablo máichavarepa:

—Núti tavanaranuhi eta Roma taicha étarichuvare náuchusinehi ena ticachichanuana — máichapa.

²⁹ Tacahe, térájijicavanapa ena téstacanayarehini ena Pablo. Émaripa ena comandante, te máechapa eta tavanarairahi eta Roma, tipicarinehi eta máitiasirahi.

Ena Pablo námapa te namirahu ena aquenucarahana

³⁰ Te apanapa sache, ena comandante mavarahapa máechayare tájahapuca eta maviurevahi ena Pablo eta nayehe ena majaneanana. Mavejapuacapa eta cadenana máitihanahi. Macurujicapa ena corregidor énapa ena aquenucarahana. Tiyana mámahí ena Pablo, macatupihapa te namirahu.

23

¹ Tacahe, ena Pablo máesenimurihapa ena aquenucarahana, máichavacapa:

—Nuparapenaveana. Núti eta nítaresirahi puíticha juca nucahehi, tájina níchiraváinahi eta nusamiravahi te mamirahu ena Viya — macahepa.

² Ena corregidor Ananías, tisemapa eta masamirahi eta máechajiriruvana ena Pablo. Macavanairipipa ena titupihanahi te machacaya ena Pablo. Máichapa:

—¡Ésapajacacha ena mácatátaji!

³ Émasera ena Pablo majicapapa:

—¡Pítira téhaviyare ena Viya, táichavene eta apimirairavi! Te juésvihipuca píti eta péjasirahi eta te jara, tatuparacavi pímatinuma te tatiarihipuca eta néjecapirava apaesa pémehanu. ¿Tájaha tacayema eta juca pivanairipihí? — máichapa.

⁴ Ena apamuriana achaneana natiarihiqueneanahi náichapa ena Pablo:

—¿Tájaha tacayema piácapaemacha ena corregidor, macapicahuquenehi tiyujaracarahi mayehe ena Viya? — náichapa.

⁵ Ena Pablo majicapapa:

—Tátanaveana, eperdonachanu. Vahi néchahini eta émairahipuca corregidor, macapicahuquenehi tiyujaracarahi. Tájina nímatiya nucajachareca ena tuparairucana, taicha nusupa eta máechajiriruva ena Viya. Ani tacahe: “Vahi picujacacha mácani tuparairuca tayehe eta piávasa”.

⁶ Tacahe, ena Pablo máimativacapa ena aquenucarahana, natiarihirahi ena saducéoana, énapa ena apamuriana fariséoana. Tásiha, tijaranupa eta máechajisirahi:

—Nuparapenaveana. Nútirichuvare fariséonu. Énerichuvare ena ticachichanuana fariséoanahivare. Ecatupiacanuhi te juca emirahu táichavenehi eta nucuchapirahi eta véchepusiraya te táequenenapa eta vépenira — máichavacapa.

⁷ Te nasamapa eta juca, ena fariséoana énapa ena saducéoana típutsimuríavanapa, napanerequenehapa.

8 (Taicha ena saducéaana, vahi nasuapa eta náechepusiraya ena náepenaqueneana; váhivare nasuapa eta natiarirahira ena ángeleana; váhivare nasuapa eta tatiarirahira eta náchaneva ena náepenaqueneana. Énaserá ena fariséaana nasuapa tamutu eta juca.)

9 Tacahe, téchajicanapa muraca. Tacahe, te nataracu ena fariséaana, natiarirahi ena escribánoana. Téchepucana. Nacahepa:

—Ema maca achane, tájina matapiravaina. Éneserapuca táechajicahi eta máchaneva ema Jesús, ángelepuca mácani. Vahi vicucanara ema Viya —nacahepa.

10 Tacahe, ichape eta semanere. Tíñepipa náicha. Tacahe, ema comandante, eta máimairahi eta nasemavahi, tipicanecha tájahapuca náicharachahini ema Pablo. Tásiha, máimichuhavanepa ena suntaruana navehapa ema Pablo, náimijunijicapa te namirahu ena mánananahi. Náimichavavárepa ema Pablo te cuartel.

11 Tásiha, te jena yátiquenehi máechajicapa ema Viya ema Pablo, máichapa:

—Túmevinachucha, Pablo. Taicha tíúrihi eta péchajisihairahi eta níjare te juca Jerusalén. Puiti piyanayare eta te Roma, éneyareichu tacaheyare eta péchajisiraya —máichapa.

Napanerechapa eta nacapasiraya ema Pablo

12 Te apanaquenepa sache, natiarirahi ena apamuriana napanerechapa eta nacapasiraya ema Pablo. Nacahepa eta náechajiriruvahi:

—Tacamunurine máepenavane ema mácatátaji Pablo. Tásiha puiti, víti vinacaya eta juca vícutiaraya. Vuíchaha vinicaímahi, vuíchahavare véraímahi, machu vásapiha vicaicuña me Viya te vahi vicuitaucha eta juca vipanereruhi. Tíámainucava te víturucapa vicapaca ema maca, vinicapa —nacahepa.

13 Náetavichipuca cuarentana ena ajairana, ena tjaracavanahi ticaechajiriruvanahi eta juca.

14 Tacahe, tiyananavarepa nayehe ena tuparairucana. Náichapa:

—Víti víjaracavapa eta vítaequeneháiraya ema mácatátaji Pablo. Vinacaripa eta juca vícutiaraya. Vuíchaha vinicaímahi, vuíchahavare véraímahi, machu vásapiha vicaicuña me Viya te vuíchaha vicuitaucha eta juca vipanereruhi.

15 Tacahe, puiti eti tuparairucana eyaseacayare ema comandante máma achichu te emirahu, etanuca eta etseraruina macayaserehi ema Pablo eta juca máchavaquenévahi. Tásiha, víti vítsecavayare eta vicapasirayare éma te vímahapa máuchuca —náichapa.

16 Tiuri, matiarirahi ema suchicha esu maparape ema Pablo. Masamairicapa eta juca. Tiyanapa te cuartel mametapana ema Pablo.

17 Tacahe, ema Pablo máichuhapa ema nacapítara ena suntaruana, máichapa:

—Píáma ema maca amaperu te mamirahu ema comandante. Jucarihi eta juca mametacaya —máichapa.

18 Tásiha, ema nacapítara mámapa ema amaperu mayehe ema comandante. Máichapa:

—Ema máena macarataquene Pablo tiyasecanuhi náma eta piyehe ema maca amaperu. Jucarihiji eta timetacaviya —máichapa.

19 Tacahe, ema comandante macaratavauchapa ema amaperu, mámapa máiputsiacapa. Tásiha, mayaserecapa, máichapa:

—¿Tájahasica eta pimetacanuya?

²⁰ Ema amaperu máichapa:

—Nararihi ena nujaneanana navarahahi nacapaca ema nécuca. Achichu tiyaseacavianayare piama éma te namirahu ena tuparairucana te cabildo. Nacaetseraruya ticayaseserehiyare eta juca máichavaquenévahi.

²¹ Váhiserá picusuapavaca taicha cuarentana ena ajairana ticuchapanahi te picuchucapa éma, nacapacayarepa. Taicha najurachahi eta nacapasiraya ema Pablo, tásiha napaenumavainapa te náitauchapa eta napanereruhi, tinipananainapa. Puiti éna, pítinecha nacuchapahi te pisuapayarepuca éna —máichapa ema amaperu.

²² Tacahe, ema comandante macahepa:

—Tiuri, piyana te pipena. Nacuijaserá picumetaca eta juca pimetarunuhi —macahepa.

Ema comandante máevatacapa ema Pablo mayehe ema Prefecto Félix

²³ Tiuri, ema comandante máichuhapa ena apinana nacapitarana ena suntaruana. Máichapa:

—Etsecayare ena docientoana suntaruana tiámanaya eta espada, docientoanavare ena tiámanaya eta lanza, setentana ena ticaperanayarepahi. Enápanayare ema Pablo te Cesarea. Iúchuca puiti te las nueve yati.

²⁴ Énerichuva etsecayare étanaina cavayu maperainapahi ema Pablo. Táurisera eta iámirainapahi. Íjaracaya ema Prefecto Félix —máichavacapa.

²⁵ Tacahe, máimiamarecavarepa eta carta. Eta juca táechajiriruvapahi eta carta:

²⁶ “Nutí Claudio Lisias nímiámareca eta juca carta piyehe piti piúriquene excelentísimo aguenuca. Néchajicavinuma tativa.

²⁷ Jucarihi eta juca téchacarehi. Ena israelítana nacaratacachi ema émana achane ticaijare Pablo. Navarahahi nacapacaya. Étaserá te néchapa nútí tavanarairahi éma eta Roma, nuyanapa námahi ena nusuntarurana nucatiuchapanapa.

²⁸ Eta nuvarairahi necha eta maviureva, námapa te namirahu ena tuparairucana israelítana te juca.

²⁹ Nímahapa tájina matapiravainahini táimicapacahini táemeratacahipucáini te cárcel. Étachuchanéniyuca tímicitichahi eta nayeherepiana.

³⁰ Tásiha, nusamairiricavarepa eta nacamesairayarehi nacapaca. Tacahe, nímiámarecapa puiti eta piyehe. Énerichuvere nuvanecahi ena timetauchanahi náiteca ara piyehe, étaina macayaserehiya. Tamutupa eta juca néchajiriruvana piyehe”.

³¹ Tacahe, ena suntaruana náitauchahi eta vanairipi. Námapa ema Pablo te jena yati. Títecanapa te avasarechicha ticaijare Antípatris.

³² Étapa nachavinehi te apanapa sache ena suntaruana ena tipaicanapahi. Énaserá ena ticaperana tímiyanavánapa eta nanapaniraya ema Pablo.

³³ Tacahe, te títecanapa te Cesarea, náijaracapa ema prefecto eta carta, émapa ema Pablo.

³⁴ Te tamutupa eta máechajicuirahi eta carta, ema prefecto mayaserecapa ema Pablo:

—¿Táviha eta piúchusine píti? —macahepa.

—Núti núchusine te Cilicia —máichapa ema Pablo.

³⁵ Tacahe, ema prefecto máichapa:

—Tiuri, véchayare te náitecapa ena piánarana —máichapa.

Tásiha, macavanairipipa macajaneha te palacio máepiyaruinihi ema ichav-
icaini Aluresi.

24

Téchajiuchavapa ema Pablo te mamirahu ema Félix

¹ Te táequenepa eta cincoquene sache, titecapanapa te Cesarea ena tuparai-
rucana tiásihanahi te Jerusalén. Matiarihihí ema Ananías corregidorhi, énapa
ena apamuriana náiyacaranahi. Matiarhipahiva ema abogado ticaijare
Tértulo. Tiyananapa mayehe ema prefecto, timetaurecanapa.

² Tacahe, náepanapa ema Pablo. Te titecapapa, tépanavapa téchajicapa ema
Tértulo, ánipa macahe:

—Vihasulupayachavi, tátachicha Prefecto, eta viúrivahi pícha. Tájina víchira-
vainahini eta pítusirahi, pijaneacahavi eta juca aquenucairavihi eta viyehe.

³ Vimutu viti achaneana te avasareana, tamutuvare sácheana vicuna-
chavihi. Vihasulupayachavihi, tátachicha Félix, eta piúrivahi eta viyehe.

⁴ Picatajichavi, tata, pisamahavi. Vahi picuyacujihavi eta juca viyasearu-
vianaya.

⁵ Puiti vímatipa ema maca achanetataji, tihapapirahi éma. Tamutu avasare-
ana te jácani viáviyahavihi viti israelítana, mayurucavaca ena vijaneanana.
Émarichuva tachutirihahi nayehe ena téhicana ema Jesús Nazareno.

⁶ Énerichuvare mavarahapa máechipejicayare eta tacapicahuquene Tem-
plo. Eta tacahehi vicaratacapa. Vícuñacayarehi taicha tacahehi eta tavane-
sirahavihi eta viyehe ley.

⁷ Émasera ema comandante macatiuchapa tiverejimirauchahavipa taicha
camuriana ena masandarurana.

⁸ Tásiha, máichahavipa: “Te evarahapuca emetaucha ema maca, eyana te
mamirahu ema viáquenuruha Prefecto” máichahavipa. Tiuri, puiti vitupi-
rivahi viti eta vimetasiravi. Te pivaraha, picayasasereru éma eta yátupirahi
eta máichavaquenevahi ema maca eta vimetauchirahi puiti —macahepa ema
Tértulo.

⁹ Tacahe, ena apamuriana natiarihiqueneanahi, énerichuvare nacahehi:

—Yátupi eta juca máechajiriruvanahi —nacahepa namutu.

¹⁰ Tacahe, ema prefecto máimicutiarachapa máechajiuchava ema Pablo.
Tépanavapa téchajica ema Pablo, ánipa macahe:

—Tájina táichava néchajiuchavaya te pimirahu taicha néchahi núti ánaquí-
paripa eta juéservavihi tayehe eta viávasa.

¹¹ Tiúripa picayasasereru. Núti, dóceravahi sache eta nítecapirahi te jena
viávasa Jerusalén eta néjirairayarehi ema Viya.

¹² Nájina nucájachaquenéna. Nájinavare nímiyusemaruina te tajuhe eta
Templo, étaripa te náurujisirareva ena nujaneanana. Téhepucaini cáleana
nujacharechahini.

¹³ Ena nani ticatianacanuana, tájina naviya náetseraruinahini eta
nametauchiranuhi. Vaipa tisuapacareana.

¹⁴ Ena nani náimijachahi vahí nétupicava eta nímituresirahi. Nútisera
nusuapa tacutihí eta nasuapirahi namutu ena viáchucanaveanaini.
Émarichuhi nucasiñahi ema Viya, ema nacasiñaquenehivare ena
viáchucanaveanaini. Núti nusuapahi tamutu eta táechajiriruva eta Sagrada
Escritura.

15 Núti nucasiñavahi mayehe ema Viya, nucuchapavahi eta véchepusiraya te vécarí vimutu viti matapiravareanahi, énapa ena ticatapiravana. Puiti, énaripa ena timetauchanuanahi ticutinuanahi eta nasuapirahi eta macaechepusiraya ema Viya ena náepenaqueneana.

16 Núti, eta nusuapirahi tamutu eta juca, vahi návarahahini néjecapavahini te mamirahu ema Viya. Váhivare návarahahini néjecapava te namirahu ena achaneana.

17 Tiuri, camuripa áñoana nupaisirahi. Tacahe, nuchavapa te návasa Jerusalén. Náminapahivare eta nanicavachaya ena nujaneanana páureana. Énerichuvare nucamavahupahiva me Viya.

18 Te tamutupa eta tacasipairahi eta náchaneva éta pa eta nuvahuana, nuyanapa te Templo eta nunapanayarehi eta námavahuana me Viya. Eta návihairahi te Templo, tichimapanuanapa ena nujaneanana tíasihanahi te departamento Asia. Nájinasera achaneanahini nachimaphahini te nuchacaya. Váhivare náimahanuini númiyusemacavacahini ena achaneana.

19 Ena nani nujaneanana tíasihanahi te Asia, énara títecanayarehini timetaurecana, te tatiarihinahipucaini eta nuviureva.

20 Piyasereca ena nani natiarihiqueneanahi puiti, te náimicaecherachapuca eta nuviurevahi te ticatupiacanuanapa te namirahu ena tuparairucana.

21 Téheserapuca eta tímicaviuchanuhi eta numetasiravacahi éna: “Puiti juca sache ecatupihanuhi te juca emirahu táichavenehi eta nusuapirahi eta véchepusiraya te táequenénapa eta vépenira” níchavacapa núti — máichapa ema Pablo.

22 Émasera ema Prefecto Félix máecharipahi tamutu eta náehisirahi ena achaneana ema Jesús, éta pa eta táurivahi eta nayeherepiana. Tásiha, te tamutupa eta náechajirisiravahi, máichavacapa:

—Tiuri, tácaheine achichupaine vécha eta juca, te máitecapa ema comandante Lisias. Nuyaserecaya éma eta juca íchavaquenevahi éti — máichavacapa.

23 Tacahe, ema prefecto Félix mavanecapa ema mayehe capitán máimichava te palacio ema Pablo. Macavanairipivare vahi nacueratata, táuri eta manarasiraina. Táuri eta náechapajirisiraina ena vichamuriana, téjiranayarepahi.

24 Te jena sácheana, tiyanapa ema Félix te apana avasare. Te tichavapa, mámapa esu mayena ticaijaru Drusila. Ésurichuvare israelíta. Náimichuhapa ema Pablo, téchajiricavanayare. Tacahe, ema Pablo mametacavacapa eta táicharacavahi eta máehisirahi ema Jesucristo.

25 Eta máechajirisiravahi ema Pablo, máichavacapa:

—Te ecasiñava me Jesucristo, éhicavare eta máimiturapiana, tiperdonacheyare ema Viya. Matapiravarehena te mamirahu. Énerichuvare, tiúrina pa eta ítaresiraya, eratahainapa ecaratacavayare. Puiti, táuricapa ecasiñavavane, taicha járajapa eta sáchevare nacayaserehirayare nácani ticatapiravanahi. Ticaicuñanainapa te yucu — máichavacapa ema Pablo.

Te masamapa eta juca ema Félix, tipicarinehi. Máichapa:

—Tiuri, taratapa puiti eta juca. Nuvarahasera nápechavaya nusamararacavi. Te apahenavare nímicuhaviyare — máichapa.

26 Ema Félix ticuchapavahi te májaracayarepuca eta plata ema Pablo eta máuchucuiraya. Eta tacahehi máimichuhaparacahi téchajiricavanayarehi.

²⁷ Váhiserá máuchucuhahini emá Pablo, taicha emá Félix mavarahahi tíuriyarehi nayehe ena israelítana. Apina año eta tayerevahi. Ticaitsivanecha emá Félix. Tisiapapa emá Porcio Festo, émapavapa prefectohi.

25

Nacatupiacapa emá Pablo te mamirahu emá Festo

¹ Te émapavapa aquenucahi emá Festo, te mapanaquenepa sache, tianapa te Jerusalén.

² Tacahe, emá corregidor énapa ena apamuriana tuparairucanahi, ticurujicacanapa mayehe emá aquenuca Festo. Nametauchapa emá Pablo.

³ Nayaseacapa emá Festo macátajicavacahini eta máevataca te Jerusalén emá Pablo. Taicha navarahahi titsecavanayarehi te achene eta nacapasiraya.

⁴ Émasera emá Festo majicapapa:

—Tiuri, emá Pablo ticaeratahi te Cesarea. Núti achichupaichu nuyanayare nuchavaya tayehe.

⁵ Eta tacahe, te tatiarihipuca eta échaqueneanahi eti tuparairucana, tíuripana éhicanu te Cesarea apaesa vecha te ticaviurevahipuca emá maena achane —máichavacapa.

⁶ Te tiánehipa eta diésquene sache eta mávihairahi emá Festo te Jerusalén, tichavapa te Cesarea. Te apanapa sache téjacapa tayehe eta mávacure. Máimichuhapa emá Pablo.

⁷ Te títecapapa emá Pablo, tisiapapa te mamirahu emá Festo. Témeñahavanapa ena mánarana tiásihanahi te Jerusalén. Timetaurecanapa emá Pablo. Camuri eta máejecapiravahiji. Ichape eta maviurevahiji nayehe. Tájinasera naviyahini eta náetserarúinahíni.

⁸ Émasera emá Pablo máichavacapa eta macatiuchiravahi:

—Núti tájina nutapiravaina tayehe eta nayeherepiana ena nujaneanana, étainapucáini eta Templo, émainahivarepucáini nucaecahi emá ichapequene aquenuca Emperador —máichavacapa.

⁹ Émasera emá Festo, énerichuhivare mavarahahi tíuriyare nayehe ena israelítana. Tacahe, mayaserecapa emá Pablo:

—¿Pivarahapuca piyana te Jerusalén, étaina tacaechacasiya te numirahu eta juca píchavaquenévahi?

¹⁰ Tacahe, emá Pablo majicapapa:

—Étaripa návihahi puiti te pimirahu píti viyehe juez manacaquenevihi emá Emperador. Pítipa tituparacavi picuchucuhanuyarehi taicha pécharichuhi píti tájina nuviurevainahini nayehe ena nujaneanana.

¹¹ Téheserapuca nucaviurevahini, táimicapacanuríne eta nuviureva. Vahi nucatiuchavaimahi. Tájinasera nuviurevaina eta nametauchiranuhi ena nani. Váhivare tituparacavi píjararecanuhini eta nayehe ena nani. Téheserapuca te vahi picucaíticanu, nuyasesereca puiti nuyana te mamirahu emá Emperador. Étaina nucametauchacasiya mayehe —máichapa emá Pablo.

¹² Tacahe, emá Festo macayasasererupa nayehe ena mayeheana abogado. Tásiha, máichapa:

—Píti Pablo, píyasaserercahi piyana te mamirahu emá Emperador. Nísapavi piyana —máichapa.

Títecapapa emá rey Agripa, ésupa esu Berenice

¹³ Te jena sácheana, títecapapa te Cesarea ema rey Agripa, ésupa esu Berenice. Náechajipanayarehi ema Festo.

¹⁴ Eta nanasiquenerahi te jena sácheana, ema Festo mametacapa ema rey eta máichavaquenévahi ema Pablo. Máichapa:

—Mararihi ani ema achane ticaeratahi ticaijare Pablo. Manaquiruhi ema Félix.

¹⁵ Te nuyanapa te Jerusalén, ena tuparairucana timetacuananapa eta máichavaquenevahi, tiyaseacuananapa eta nímicapasiraina.

¹⁶ Tásiha, núti nujicapavacapa: “Viti aquenucarahana tayehe eta Roma, vahi tituparacahaví vímicapacahini mácani ticametauchacasíhi te vuíchaha ticamirahucacanahi ema mánarahi” níchavacapa.

¹⁷ Tacahe, te títeapanapa ani, vahi náyererejihini núti. Te apanaquenepa sache néjacavanepa te návacure, nímichuhapa ema Pablo.

¹⁸ Núti nímijachapa ichape eta maviureva. Étasera eta nametauchirahi, tájina vahi táíñepihini.

¹⁹ Étachuchanénipuca tímícvíuchahi eta nayeheana religión. Émapa ema náehiruhi ticaijarehipuca Jesús, ema mácani tépenahi. Puítisera ema Pablo máechajisihahi eta mápechiravahi títareca.

²⁰ Núti vahi nímatiequeneha eta táícharacavaya eta juca. Tacahe, níchapa ema Pablo: “¿Pivarahapuca piyana te Jerusalén, étaina tacaechacasiya eta juca píchavaquenévahi?”

²¹ Émasera tiyaseuchavapa eta mayaniraya te mamirahu ema Emperador Augusto. Tacahe, nímivanerecapa macajaneha tíamainucava te nítujicava nímivanerecapa nanapana mayehe ema Emperador —máichapa ema Festo.

²² Tacahe, ema Agripa máichapa ema Festo:

—Núti apana nuvarahasa nusamaini ema mácara achane —máichapa.

Tacahe, ema Festo máichapa:

—Tiuri, achichu pisamaya éma.

²³ Tacahe, te apanapa sache tisiapanapa ema Agripa ésupa esu Berenice tayehe eta náejasirare ena aquenucana. Tiúrina eta náítecapira. Jánunuha-cavaca eta namuirihana. Énapa ena aquenucana tachutirihana nayehe ena militáreana énapa ena tuparairucana tayehe eta avasare. Tacahe, ema Festo máimichuhapa ema Pablo.

²⁴ Tacahe, téchajicapa ema Festo, ánipa macahe:

—Tata Rey Agripa. Tátanaveana. Emutu eti etiarihiqueneanahi te juca víurujisirávahi. Mácahi ema maca achane nametaurehi ena majaneanana eta nuyehe, ánaqui te Jerusalén, étapa ani te juca Cesarea. Nararihi camuriana navaraha náimicapaca ema maca.

²⁵ Nútisera tájina nímaha matapiravaina táimicapacahini. Émasera tiyaseuchavapa tíyanayare te mamirahu ema Emperador Augusto. Nísapahisera mayana eta mayehe.

²⁶ Vuíchahasera nucajurehini ema náquenu Emperador, taicha tájina nu-viyahini eta matapiravainahini. Puítisera nucatupíha éma te pímirahu piti rey Agripa, étipa eti tátanaveana. Nuvaraha ímicatapanu eta táícharacavaya eta juca, apaesa nucajurepaina ema Emperador.

²⁷ Taicha vahi tiuri vévatata ema présuhi te tájina matapiravaina — macahepa ema Festo.

26

Emá Pablo téchajichavapa te mamirahu emá rey Agripa. Mametacavacapa eta máitaresirahi te vuíchaha máehicahini emá Jesús.

¹ Tacahe, emá Agripa máichapa emá Pablo:

—Tiuri, nímaha péchajica —máichapa.

Tacahe, emá Pablo macanuquechapa eta mavahu. Tépanavapa téchajica, ánipa macahe:

²—Tiúrisamurécare eta nítujsiravahi néchajica te pimirahu, piti rey Agripa, eta nucatiuchiravaya núti apanava eta juca nametauchiranuhi ena nujaneanana israelítana.

³ Núrismure ichape taicha píti pímatihí tamutu eta juca viyeherepiana viti israelítana, étapa eta véchapajirisirahi. Eta tacahe, nuyaseacavi puiti pisamanu eta nucayemaya. Pácayehe paciencia nuyehe.

⁴⁻⁵ Eta námaperuvahi núti, fariséonuhi te návasa núchusinehi étapa te Jerusalén nujurusinehi. Néhicahi eta viyeherepiana viti israelítana eta nítaresirahi. Nucachanevacahi ena fariséoana ena típícauchacareánapána. Namutu ena nuchajuruanahi tímatinuanahi eta nítaresirahi. Ena títametacavíanaya eta nítaresirahi.

⁶⁻⁷ Puiti ticatupiacanuanahi te pimirahu, piti rey, táichavene eta vicuchapiravahi eta macaehepusirahaviya emá Viya te vépena, taicha tacahehi eta máechajiriruvahi nayehe ena viáchucanaveánaini. Vimutu viti tachichanaveanahi eta viávapáiru Israel, vimutu vicuchapavahi eta juca táitauchiravaya eta máijararuhaviya emá Viya. Eta tacahehi, tamutuhi sácheana, yátiana vítatihí emá Viya, viyujaracahi mayehe. Táichavenehi eta nucuchapiravahi núti, timetauchanuanahi ena nujaneanana.

⁸ Tiuri puiti éti, németeaca tisuapacarehi eyehe eta macaehepusiraya emá Viya ena náepenaqueneana.

Emá Pablo mametacavacapa eta mapánajirisírvaca ena téhicanahi emá Jesús (Hch 8.1-3; 9.1-2)

⁹ Nútiripa acane nímijachahi nétupicava eta me Viya eta níchaqueneánahi nucatianasiravacahi ena téhicanahi emá Jesús Nazareno.

¹⁰ Eta juca níchirahi te Jerusalén. Tímícatacanuanahi ena tuparairucana eta nucaratasiravacahi ena matapiravareanahi téhicanahi emá Jesús; nímisia-piravacahi te cárcel. Eta nímairahi eta nacapasirayarepahi, néhicahi eta napanereru éna.

¹¹ Ichapemurianahi ena nucarataruana. Némecharecavacapahi ena nétupiaruanapahi te náurujisirevana. Níminajicavácapáipa eta náehisirahi emá Jesús. Nécatihavare eta náepuruiraya. Muraca eta nuvainarajichiravahi nayehe. Tamutuhi nutanusihavaca te apanaqueneana avasareana tayerehiqueneana.

Emá Pablo mametacavarepa eta máehisiraipa éma apanava emá Jesús (Hch 9.1-19; 22.6-16)

¹² Étarichuvare tímiyananuhi te avasare Damasco. Tivanecanuanapa comisiónnuhi ena tuparairucana; tíjaracanuanahi eta órdene.

¹³ Tacahe, tata rey, te nánehipa te avasare, te jena sache las dócequenepa, tíjahúchavapa tímícauchanu eta majaraiva emá Viya, tiásiha te anuma. Tijarahipana tayehe eta sache. Tímícauchanupa, énapa ena téhicanuanapahi.

14 Tacahe, viáquipáicavapa vimutu eta vipisirahi. Nusamapa ema Viya, téchajicanuhi te véchajiriruva viti israelítana. Máichanupa: “Saulo, Saulo, ¿tájaha tacayema picatianacanuhi? Pésamiricavachucha, taicha pítijiváichucha píchavahi. Vahi piúrimahi te pímiyanava pipanajiricavaca ena téhicanuanahi” —máichanupa.

15 Tacahe, níchapa: “¿Nájahavi, piti Tata?” Tijicapanupa éma: “Núti Jesús. Núti picatianaruhi, eta pipanajirisiravaca ena téhicanuanahi.

16 Péchepuca, pitupiha. Núti nímerecavahi eta piyehe, taicha nunerejiruvihí nuanaraviya. Puiti numetacaviya eta juca pématanerepiyare eta nuyehe. Péchajisihayare eta níjare nayehe ena achaneana eta juca pimairanuhi puiti, étapa eta apamuriana nímerereruanayare.

17 Núti nucatiuchaviya te tájahapuca náicharacavi ena vijaneanana israelítana énapa ena apavasanana. Puiti nuvanecavihi péchajisihanuya eta nayehe ena apavasanana.

18 Pímitucavacayare eta mavanairipiana ema Vicaiyaquene. Nacaijuhe éma, apaesa náitujicava náimaha eta majaraíva. Náinajicapa eta náichaqueneasana te timapícu. Vaipa nacuehica ema Satanás. Ena tisuapanuanaya téhicanuanaya, nuperdonachavacaya eta napecaturana. Nasiapamurihaya ena náinapureanahi nunerejiruana” máichanupa ema Jesús.

Éma Pablo mametacavacapa eta masuapirahi eta matuparacasivanahi me Jesús

19 Tacahe, tata rey Agripa, nusupahi núti ema Jesús eta mavanesianuhi.

20 Nucametarairupa tatívahi nayehe ena ticavasanahi te Damasco. Te nuchavapa, étapa te Jerusalén, étapa te avasarechichana te Judea. Tásiha, núchucapa tayehe eta avasareana tayerehiqueneana nayehe ena apavasanana. Numetacavacapahi eta nácaijuherraina ema Viya, náeneuchiravaina náitsivachiraina eta náitaresiraina, táuripa eta náitaresiraina.

21 Étara eta juca tivichuanuhi nayehe ena nujaneanana eta nacaratasiarunhi te Templo, navarairahi ticapacuanana.

22 Émasera ema Viya tímicitacanuhi. Púitirichucha tímicitacanuhi éma. Eta tacahe, nutiarihichucha puiti. Tásiha, vahi nuchávacuéjchavahíni nucametarairuyarechucha nayehe namutu ena achaneana, ena páureana énapa ena rícoana. Tájinasera vahi nuhapapicahini eta táéchajiriruvanahi eta Sagrada Escritura eta táitauchiravayarehi eta macatajivairayarehi máepenirayarehi ema Cristo.

23 Tásiha, émayarehi títapuca téchepuca te máecari. Éta, táicituarahi eta véchepusiraya víti apana te vécarí vimutu viti achaneana, viti israelítana énapa ena apavasanana. Tásiha, tivanecahavipa vimetacaya ena achaneana, apaesa nácasíñava nayehe éma.

Éma Pablo mavarahapa macajimuyasamurechayare ema Agripa eta máehisiraya ema Jesús

24 Tímiyanavarichaha téchajica ema Pablo eta máéchajiuchiravahi, témechajicavapa muraca ema Festo, macahepa:

—Máurishivipa piti Pablo, táichavene eta pivayuchiravapa picaravahu. Étapa tímaurishichavihi.

25 Émasera ema Pablo majicapapa, macahepa:

—Váhiya máurishinuina, tata aquenuca Festo. Nutupiruvahi eta juca nucayemaqueneanahi. Jéhevare eta yátupiqueneanahi.

²⁶ Émaripa ema maca rey Agripa máimativare tamutu eta juca. Eta tacahehi vahi nupicacaracavahini eta néchajisirahi te mamirahu taicha nucasínavahi núti eta máimatirahi ema. Namutuhivare ena achaneana náechahi, taicha tájina vahi tayumurucavahini.

²⁷ Pítiripa piti rey Agripa ¿pisuapahi jácani eta nacayemaqueneanahi ena profetanaini? Núti németeacahi pisuapahi píti.

²⁸ Ema rey Agripa majicapapa:

—Picájimuyacayaréni eta nusamure. Núti apanavare néhicayare jácani ema Jesús.

²⁹ Tacahe, ema Pablo máichavarepa:

—Tiúripa pisuapavane puitinarichu, yátupina te pisamure. Nuyaseacaya ema Viya eta pisuapiraina. Érichuvare nuyaseacayare eta esuapiraina emutu eti apamuriana eti esamararacananahi. Éhicavanéni ema Jesús, tácutihini eta néhisirahi núti. Váhisera nacuératacahéni, vahi ecucutinuhini núti eta nucaeratairahi táichavenehi eta néhisirahi ema Jesús —máichapa.

³⁰ Te nasamapa eta juca máechajiriruvahi ema Pablo, téchepucapa ema rey, ema prefecto, esu Berenice, énapa namutu ena natiarihiqueneanahi náejaruanahi.

³¹ Tásiha, tiyananapa típutsiacavanapa, náechajisihayarehi eta juca. Náichacacapa:

—Ema maca achane, tájina maviurevaina táimicapacahini. Váhivare táuricahini macaeratahini te cárcel.

³² Ema Agripa mametacapa ema Festo:

—Tiúrihini picaitica ema maca achane te vahi macúyaseserécahini eta mayaniraya te mamirahu ema Emperador —máichapa.

27

Ticaevatapa ema Pablo te Roma

¹ Tiuri, matiarhihi ema capitán ticaijare Julio, nacapitarahi ena masuntarurana ema aguenucaini Augusto. Tacahe, te tiúripa eta napanereru eta náevatasirahaviya te Roma, natuparacapa ema Julio mámaya ema Pablo énapa ena apamuriana présoana.

² Viávacuhapa te ichape pacure tiásihahi tayehe eta puerto Adramitio. Tiyanayarehi te apanavare puértoana te Asia. Téhicahavipahi ema Aristarco ticavasahi te Tesalónica tayehehi capital eta departamento Macedonia.

³ Te apanapa sache, vítecapapa te puerto Sidón. Tacahe, ema Julio majapanupahi ema Pablo, máisapahi tiyana máejirapanavaca ena víchamuriana. Náechapajiricahi ema Pablo.

⁴ Te viásihavarepa te Sidón, vétavicapa eta tiúrupuhi Chipre tinapaicapahi te sapa, váipasare viácapapahini eta técatícava.

⁵ Tacahe, vijuchecherecapaipa eta mar te tachacayapahi eta Cilicia, etapa eta Pamfilia, vítecapirapa te avasare Mira tayehe eta Licia.

⁶ Eta tayehe, viávacuhavarepa tayehe eta apanapa pacure máechajiaruhi ema capitán Julio. Eta juca pacure tiásihahi te avasare Alejandría. Puiti tacaijuheyarepa te Italia.

⁷ Te jena sácheana vahi vijuricatipahicháini eta vipaisira. Muracarichucha eta técatícava eta viácapirapahi. Muraca eta nacaemataneasirapahi, vítecapirapa te tánara eta puerto Gnido. Tacahe, vétavicavarepa eta puerto Salmón

te tasumuqui eta apanavare tiúrupuhi ticaijare Creta. Viávicuchapáipa eta tiúrupuhi, étapa tiávichahávipahi tayehe eta técatícava.

⁸ Ticajerapahi eta vipaisirapahi. Vijúchecherecapáichucha, vítecapiravarepa tayehe eta apanavare puerto Buen Puertohiji eta ticaijare te tachacaya eta avasarechicha Lasea.

⁹ Ticachurichavipa eta tiempo taicha eta viyérejevápahi. Tíñehiripa eta tapaisirava te mar, taicha tinacuchavaipa eta muracana técatícava. Eta tacahéhi ema Pablo maconsejachavacapa, macahepa:

¹⁰ —Tiuri, tátanaveana. Váipara tiuri vímiyanavahini vipaica, taicha tíñehicarepa vécharicava. Machu vicamitiaca eta pacure, eta carga, vítipa machu vérica —macahepa.

¹¹ Émasera ema capitán Julio, ema comandante tayehe eta pacure, émapa ema piloto vahi návarahahini nánasihini. Vahi nasuapahini ema Pablo.

¹² Taicha vahi táurihini eta puerto, tájina távichahini tayehe eta muracana técatícava. Napanerechaichucha tiyananayare. Ánipa nacahehi:

—Vahi tiuri eta vánasi te juca. Viyanachucha tayehe eta apanavare puerto Fenice tayehe eta juca Creta. Tiúripa eta jena, távichahi tayehe eta muracana técatícava. Étaina vicuchapiha eta te táetupiricavapa eta sácheana —nacahepa.

Muraca técatícava te mar

¹³ Tacahe, tépanavapa eta técatíticavahi te vana. Tiápajuecavanapa éna. Náimijachapa tímiyanavanayarehi tiuri eta náehisirayarepahi eta técatícava*. Vahi náemetecahini táequcavahini te cajaha. Viánehipaipa vicachacaya eta tiúrupuhi Creta.

¹⁴ Te ticaicutiaravapa, tñahúchavapa téqucava, muracapa técatícava tiásiha te cajaha.

¹⁵ Tavehapa eta vipacure. Tiámahavipa. Viyerehapa eta tachausi. Navarahainipa náimichava eta pacure te tachaupahi, váhísera náratahahini. Tásiha, náisapapa tiámahavi eta técatícava.

¹⁶⁻¹⁷ Témetavichavipa te apachacaya eta tiúrupuhichicha ticaijare Clauda, étapa tiávichahavihi. Váiparichu muracainahini eta técatícava. Étapa víturusine vijataca eta étasi pacure vichururepahi. Vinacacuhapa te tajuhe eta ichapepana pacure. Ichapesera eta vicaemataneasirapahi. Tacahe, náinunuacapa eta pacure te enureana apaesa vahi tacuvejajuecha eta táepacuruha. Nacamiricapa eta ichapepana tavanterame tévatajicapahi eta pacure taicha napicahi támahini eta técatícava, táejahapaicahini eta pacure tayehe eta playa ticaijare Náecharisirareva. Tacahe, táevatajicapaipa eta vipacure, vétaviequenehairapa eta playa.

¹⁸ Tíñehichucha eta táepacuruhana. Eta napisirahi éna, náepuhecavacapa te une eta támaquenepahi.

¹⁹ Te mapanaquenepa sache, vivehavarepa eta apamuri támaqueneanapahi tayereruvanaichuhi eta pacure, véchipaicavarepa.

²⁰ Jéhesare, ichapemurihi eta sácheana vahi tacaecherahini eta sache, étapa eta jarairiquiana. Eta vímairahi vahi tarasahini eta muraca tépacuca, vaipa véteteacavahini víuchucuhahini.

* **27:13** Acane eta ichapequeneana pacure, amairihaichaha te náurape eta napaisihahi te une. Camurianahi ena achaneana tinaucanapahi. Nacatupihavare eta ichapemequeneana sábanana tímícatacayarepahi tévatajica eta técatícava.

²¹ Ichapemurihi eta sácheana tájina vinicahini. Tacahe, ema Pablo titupiha te vimirahu, máichahavipa:

—Tátanaveana, tiúripanáichuhipucáini esuapanuhini te vuíchaha viúchucahini tayehe eta Creta. Puiti vahi vicucatajivahini.

²² Puítiserá, vahi ecupica, taicha nájina tépenaimahi. Técharicavayaresera eta pacure, témitiacaya.

²³ Néchahi núti eta juca, taicha yati téchajicanuhi ema ángele mavaneruhi ema Viya, ema náquenuhi nucaematanearuhi.

²⁴ Ani macahehi eta mametasiranuhi ema ángele: “Vahi picupica, Pablo. Vahi pépenaimahi. Énaripa ena nani picachanequeneanapahi, váhivare tépenanáimahi táichavenehi eta pitiarahirapahi eta nayehe. Picamesavayare pítecapaucha ema Emperador pitupihamiraureya” máichanupa ema ángele.

²⁵ Eta tacahe, tátanaveana, túmehénachucha, taicha núti nucasíñavahi mayehe ema Viya. Nusuapahi eta mametarapiana ema ángele eta nuyehe.

²⁶ Tiámahaviyaresera eta técatícava tayehe eta tiúrupuhi —máichavacapa ema Pablo.

²⁷ Apinaquenepa semana eta támirahavipahi eta muraca técatícava te ichapequenehi mar. Te jena enumuhuquenepa yati, ena marinéroana náimijachaipa tiánehianaripa eta tiájipahi taicha nasamahi eta cachuela te tachausi.

²⁸ Náicutiecapa eta táupenava eta une. Náimahapa treinta y seis metro eta táupenavahi. Te tiyererehavare, náicutiecavarepa, veinte y siete metro eta táupenava. Náemeteacapa tiánehianaripa eta tachausi.

²⁹ Tacahe, nacajuchucupaca eta cuatro ánclana te tahivu eta pacure, taicha napicahi táemestaquihahini eta vipacure tayehe eta máriana. Navarahaipaicha táijahúchavahini tijarahi.

³⁰ Eta napisiraipaicha, ena marinéroana navarahapa tijunanayarehini, tijunijchavianayarepa. Nacucupaicapa eta étasi pacure vicavacurehi. Nacaetserarupa nacajuchucucayare eta apana ancla te tasumu eta pacure.

³¹ Ema Pablo máimatiacavacapa eta navarairahi tijunana. Tacahe, mametacapa ema capitán Julio énapa ena masuntarurana. Máichavacapa:

—Te vahi nacunasi te juca pacure ena nani, éricayare éti, vahi iúchucu-haimahi —máichavacapa.

³² Tacahe, ena santaruana náechupicavacapa eta enureana táitihapahi eta étasi pacure. Náinajicapa te une.

³³⁻³⁴ Te tijarahipa, ema Pablo tivanecahavipa vimutu vinicanuma. Máichahavipa:

—Enicanumapa apaesaina, taicha apinapa semana eta juca iávamina, emaimasirahivare. Tatuparaca enicanuma apaesa táetumechahe eta iávaresirayare. Nájinasera témitiacaimahi te vitaracu —máichavacapa.

³⁵ Tacahe, te tamutupa eta mavanesisravacahi, ema Pablo mavehapa eta pan; mabendiciónchapa te vimirahu. Mavejecapa, tinicapa.

³⁶ Vétumechavapa vimutu, vinicapa víti apanava.

³⁷ Camurihavihi viti támaqueneanapahi eta pacure. 276 eta visimutu-vapahi.

³⁸ Te vítanésipa eta vinisirahi, navehapa ena marinéroana eta apamuri trigo, náquijicapa te une, navarairahi téchacayare eta támaquene eta pacure.

Técharicavapa eta pacure

³⁹ Te tijarahipa, ena marinéroana vahi náimativahini távihahipuca eta viávihihi. Náimahasera eta tachausi ticayehehi playa. Navarahapa náimipauchayare eta pacure, viúcupaisihayarehi te playa.

⁴⁰ Tacahe, náechuacavarepa eta enureana ticaratacanahi eta ánciana. Tanasivacapa te amahe une. Nacaesimucavarepa eta tayeheana leme eta pacure. Tacahe, nacanunquechapa eta étana tavanterame ticarataca eta técatícava tiávihihahi te tasumu. Táimicatacapa eta napauchiraya eta playa.

⁴¹ Tiámahavipasera tayehe eta remanso. Vaipa táupenahini. Tásiha, ticaratacavipa eta playa. Tachuchucapa eta tavaparu. Vaipa tayamuricahini. Tacahe, eta tamuracavahi eta tépacuca, tacavaracapa eta tahivu eta pacure.

⁴² Ena suntaruana navarahapa nacapacayarehi ena présoana, napisirahi náitujicavahini tijunana eta návaresiraya.

⁴³ Émasera ema capitán Julio vahi máisapahini taicha mavarahahi macuchucuhayarehi ema Pablo. Macavanairipipa ena náitucanahi tiávarecana napauca eta tachausi.

⁴⁴ Ena apamuriana máitucarahanahi tiávarecana nayuratamecavacapa eta tabla, nacuchucuiyavahi te tiájipahi. Tacahehi eta viúchucuirahi vimutu.

28

Ena Pablo mávihaipa te tiúrupuhi Malta

¹⁻² Tacahe, te vimutupa viúchucuhahi, tiúchujichahavianapa ena ticavasanahi tayehe eta tiúrupuhi. Timetacahavianapa eta táijarehi Malta eta viúcupaisihahi. Nacamuruequechapa eta yucu, tíchuhahavianapa viásacavayarehi taicha vicasarechavacaipahi taicha eta une étapa eta tiquiva. Énapa tíátihavianahi.

³ Tacahe, ema Pablo tinerecapa eta yucuqui máijuquechapa. Tatiarihihipuca eta quichare te manereru. Tásiha, tiúchujicapa eta quichare, táimijunapa eta yucu. Táechucapa te mavahu ema Pablo.

⁴ Te náimahapa ena ticavasanahi tayehe eta tiúrupuhi eta táechusirahi ema Pablo te mavahu, nacahepa:

—Ema maca achane ticaviurevapuca jácani, ticáparecahíchupuca. Tiúchucuhahi te une, ánipasera taviyihahi te tiájipahi eta matuparahahi. Vaipa máuchucuhahíni —nacahepa.

⁵ Émasera ema Pablo máquijipicapa te yucu eta quichare. Tájina máichavahini.

⁶ Tacahe, ena tímaracananahi nacuchapaipa máepenahini, támahipuchahini eta mavahu. Eta náimairahi tájina máichavahini, napanerequenehapa.

—Viyachupuca ema maca —nacahepa.

⁷ Te tachacaya eta vécharisinevahi, tatiarihihi eta barraca, maverahi eta pétiana napenanahi ena machaneranahi ema subprefecto, tuparairucahi tayehe eta tiúrupuhi. Ema ticaijarehi Publio. Émapa tíchuhahavihi téchapajiricahavihi eta jena mapanaquenehi sache.

⁸ Matiarihihivare ema maiya ema Publio. Ticajumahi éma, eta muraca fiebre. Tisacahivare iti. Tívecahi éma te matuleta. Tiyanapa ema Pablo, máejirapanahi. Tiyujaracapa, mayasecapa ema Viya eta macanarasiraina ema macajumaquene. Tásiha, manacapa eta mavahu te máinahu. Jéhesare, tinaracapa ema achane.

⁹ Eta náimairahi ena apamuriana achaneana eta macanarasirahi ema macajumaquene, náepanavacapa ena apamuriana nacajumaqueneana. Macanaracavacapaipa ema Pablo.

¹⁰ Mapana caje eta viávihairahi tayehe eta tiúrupuhi. Ichaperinehi eta náitátirahavihi ena achaneana. Te viávacuhayarepa, tíjaracasichahávianapa eta vipaisirayarepa eta vipaisirayarepa.

Tímiyanavanavarepa eta napaisirahi, nacaijuherahi eta Roma

¹¹ Tasiha, viávacuhavarepa tayehe eta apanavare pacure tachimararuhivare eta muracana técatícava tayehe eta puerto viávihahi. Eta juca pacure ticaijarehi Castor-Polux, Chámeana. Tiásihahivare te Alejandría.

¹² Eta vipaisirahi, vítecapapa te apanavare puerto ticaijarehi Siracusa. Vítecapa tayehe mapana sache vicahe.

¹³ Te viyanavarepa, vijuchecapapa vítecapirapa tayehe eta puerto Regio. Te apanapa sache tépanavavarepa eta técatícava te vana. Tímicatachavipa eta vipaisirapahi. Te apanapa sache, vítecapapa tayehe eta puerto Puteoli.

¹⁴ Te jena avasare, vicainunapa ena apamuriana vichamuriana, tíminasichahavianapa. Éтана semana vicahe eta nayehe. Tásiha, vipaicapa te tiájipahi, vicaijuhepa eta te Roma.

¹⁵ Ena apamuriana vichamuriana ticvasanahi te Roma tisamairiricahavianapa eta vítecapirayarehi. Nárajapapa tiácapahavianahi te achene te apanahivare avasare ticaijarehi Foro de Apio. Énerichuvare ena apamuriana tiácapahavianahivare, ticuchapahavianapa tayehe eta apanahivare avasarechicha ticaijare Tres Tabernas. Te máimahavacapa ema Pablo, tiúrisamuréinehi naicha eta nácapirahavihi ena vichamuriana. Tétumechavapa ema apana. Mahasulupayachapa ema Viya.

¹⁶ Te vítecapapa te Roma, ema capitán Julio mahentregachapa ema comandante tayehe eta guardia ena présoana. Émasera ema Pablo náisapapa títecapapa te apana peti, matiarihisera ema émana suntaru tijaneacahi.

Ema Pablo máimitucavacapahi ena téjirapanana te máitecapihahi

¹⁷ Te mapanapa sache eta vítecapirahi te Roma, ema Pablo máimichuavacapa ena náiyarahana ena israelítana ticvasanahi te jena avasare. Te tiúrujicavanapa, ema Pablo máichavacapa:

—Nuparapenaveana, tájjanéni nutapiravainahini. Tájinavare nícharacahini ena vijaneanana. Váhivare nucaecahi eta nayeherepianaini ena viáchucanaveanaini. Nucaeratahisera te Jerusalén, timetauchanuanahi te namirahu ena tuparairucana romanoana.

¹⁸ Eta nayaseresiranuhi, navarahahineni ticaitcanuana taicha náimahahi éna tájina taviuchanuhini táimicapacanhini.

¹⁹ Énasera ena vijaneanana tuparairucanahi váhiquene návarahahini nacaitcanuhini. Eta tacahehi nuyaseserecapa núti étaina nucametauchacasiya te mamirahu ema Emperador. Tájinasera vahi numetauchaimahi ena nujaneanana ticaetemajiricanuanahi.

²⁰ Eta tacahe, nímuchuhahehi nuvarahahi nímatiheyare éti, numetacaheyareva eta juca níchavaquenevahi. Ticaviurenuhi eta néhisirahi ema Cristo, ema vicuchapaquenehi vimutu viti israelítana, eta tímiticanuhi puíticha te juca cadena —máichavacapa.

²¹ Tásiha, ena náichapa:

—Tájina váhiya visamairiricavi. Váhivare vijacapa eta carta tiásiha te Judea táechajisihavihini píti. Énapa ena vichamuriana israelítana tiásihanapahi eta ánaqui, váhivare náechajisihahini eta piviurevahipuca píti.

²² Vivarahasera visamavi puiti péchajisiha eta pipanereruanahi, taicha visamairiricahi eta nacatichirahi ena vijaneanana tiávihanapahi te avasarena eta juca arairuhi éhiruhi —náichapa.

²³ Tacahe, náijarechapa eta sache máechajisiraya. Te jena sache, títecanapa ena camuriqueneana israelítana tayehe eta máitecapihahi ema Pablo. Tépanavapa te jena yáticarahi téchajicahi éma. Tiámainucava te cáperehichichapa títapiricapa eta macametarairuirahi eta máechajiriruva ema Viya. Máimivehapticapahi eta máechajicuirapahi eta Sagrada Escritura. Máimitucavacahi éna eta náimatiraya ema Jesús eta émairahi Cristo, ema nacuchapaquenehi. Macajimuyacavacahi eta náehisiraina éma.

²⁴ Tásiha, típutsimurihavanapa ena tisamararacana. Natiarihihi ena apamuriana nasuapa eta macáyemaqueneana ema Pablo. Natiarihisera ena apamuriana vahi nasuapahini.

²⁵ Éna, vahi návarahapahini nasama, timutserahavanapaipa tiyanana. Tacahe, ema Pablo máichavacapa:

²⁶⁻²⁷ —Machu ecucutihini ena viáchucanaveánaini acane. Matupiruvahi ema Espíritu Santo eta máechajisihavacahi éna te mametacapa ema víyarahaini profeta Isaías. Máichapa: “Pijanapa pimetaca ena naena achaneana. Ani píchayare: Nímatihe éti eta emasuapajiraivahi. Épiyacavahi religiósohehi; tétavicavahisera eta tamuracavahi eta esamureana. Eta juca emasuapajiraivahi, tahapapiricahi eta ecaicutiarairahi eta numetarapiana étapa eta nímereuchaqueneana. Tájina náichahini vicuchapahini eta éneuchiraváina, evarairapucaini ecasiñahini me Viya, apaesa macanaracahehinehi” máichapa ema Espíritu Santo.

²⁸ Ácaicutiaraquenéna éti, puiti juca vicaijuheya vimetacaya ena apavanana eta mavarairahi macuchucuhaya éna apana ema Viya. Tásiha, éna nasapihayare nasamararacayare —máichavacapa ema Pablo.

²⁹ Te tamutupa eta máechajisirahi ema Pablo, tiyananapa ena majaneanana, tiúmehavenapaipahi.

³⁰ Apina año macahehi ema Pablo tayehe eta máitecapihahi. Tamutu sácheana majacapavacahi ena tipaipiuchanapahi.

³¹ Máechajisihahi eta máechajiriruva ema Viya, máimitucahivare eta náehisiraina ema Viáquenu Jesús, émairahi yátupiquenehi Cristo. Nájina nacamatinaahini. Náisapahi ticametarairu.

Tamutupa eta néchajiriruvana eta piyehe.

Eta macartane ema Apóstole Pablo nayehe ena machamuriana ticavasanahi te Roma, ticaijare ROMANOS

¹ Nuti Pablo, mavanaranuhi ema Viáquenu Jesucristo, manerejirunuhivare eta mayehenyarehi apóstole. Tituparacanuhi eta nucametarairuirayare eta mapanerechirahi ema Viya eta mavarairahi macuchucuhaya namutu ena ticasifanaya mayehe ema Machicha.

² Ema Viya, ánaquiaparipahi eta juca mametasiravacahi ena víyaranaini santo profetana eta mapanerechirahi eta macuchucuiraya ena achaneana. Tásiha, nájuequeneharipahivare éna.

³ Eta Sagrada Escritura táechajisihai pa ema Machicha ema Viya eta máucupaisirayarehi te juca apaquehe. Yátupiyarehi Crísto hi éma. Achanequenehi eta máimahi.

⁴ Natiarihiserá ena ticatianacanáhi éma. Náimicapacáhi éma. Émasera ema Espíritu Santo, tiámicarehi eta macaechepusirahi éma te máecari. Éta pa tímereuchahi eta yátupiquenérahí Machicha ema Viya.

⁵ Puiti ema Viáquenu Jesucristo tijapanunúhi eta matuparasiranuhi eta nuyaniraya nupaicaya te tamutu avasareana, nucametarairuyarehi eta najacapacarevayarehi me Viya namutu ena tisuapanayare, náehica éma.

⁶⁻⁷ Te namuri ena nasimutuqueneana, etiarihivare éti apanava. Tíchuhahehivare ema Viya, machaneráyarehi ema Machicha Jesucristo, mavaraha tauri eta ecaemataneasiraya éma. Puiti nucajurehe eta juca nucartane emutu eti nuchamuriana ecavasanahi te avasare Roma, máemunaruqueneanahi ema Viya. Nuvaraha macatajicahehíni ichape ema Tata Vi-caiyaquene, émapa ema Viáquenu Jesucristo; nájjaracahéhíni táurivaina eta epanereruana.

Ema Pablo mapanerechaipa tiyanayare te Roma

⁸ Núti, tétavicavahi eta nucunachirahi ema Viáquenu Jesucristo, nuhasulupayachahi ema Viya íchavenéhi emutu éti. Namutu ena achaneana te avasareana téchajisiaheanáhi eta yátupiraripahi éhica ema Viya.

⁹ Núti nuvapinavahi eta nucaemataneasirahi ema Viya, eta nucametarairuirahi eta máimiturapiana ema Machicha Jesucristo. Ema Viya tímararacanuhi eta néñamiravahi eyehe éti. Núti, tamutu sácheana te nunarasirana, te néchepusirana, nuyaseuchahehi me Viya, máijjaracahéhíni eta iúriváinahíni éti.

¹⁰ Nuyaseuchavahivare eta máisapiranuínahíni nítujisiravainahíni nu-pai-piuchahe.

¹¹ Ichape eta nuvarairahi nímaháhe, nímicatacahehíni eta tajurusiraya eta íchanevana apaesa muracaquenénapaini eta éhisiraya ema Viya.

¹² Éti apanava ímicatacanuhíni. Vétumejiricacahivaréni eta véhisirahi ema Viáquenu.

¹³ Nuparapenaveana, nuvaraha numetacahe apaesa echa. Ichapemurihi eta nuvarairahi níteca nímahapánahe. Puíticha, vuíchahasera nítujicava. Tijuricati nítupicavahíni eta nítesirainahíni eyehe, natiarihichuhupucaini nucajimuyacavacahíni eta nanerejisiravainahíni náehicahíni ema Viáquenu, tácutihíni te nupaicainapa te apana avasareana.

¹⁴ Taicha ichape eta néñamiravahi núti eta nucatuparahairahi nucame-tarairuirayare nayehe namutu ena achaneana te ichapeana avasareana énapa ena tiávihana te vámahiana, ena tiávihana te isanitiana. Nájina nunere-jiruimahi. Namutuyare numetacavaca: ena cráyanana rícoana énapa ena páureana.

¹⁵ Tacahe, núti nutserereacavahi eta nupaipiuchiraheya te iávasa Roma, nuvarairahi nímitucahe eta máechajiriruva ema Viya tayehe eta véhiruhi.

Vijacapacareipahi mayehe ema Viya táichavene eta vicasiñavairahi mayehe

¹⁶ Núti nuvavinavahi eta nímitusirahehi tayehe eta véhisirahi ema Cristo. Tájina vahi nutsirihahini, taicha tétavicavahi eta macasiñacarevahi ema Viya máitauchayare tamutu eta macuchucuirahavi. Éma, tétavicavahi eta mavarairahi nacasiñavahini ena israelítana eta mayehe, énapa namutu ena apamuriana achaneana. Tétavicavahi eta máitupajijiasiravahi máitsiva-chinahi eta náitaresirana, tamutupa arairuhi máicha.

¹⁷ Taicha ema Viya máimerecaripa eta vijacapacarevahi eta mayehe vimutu viti vicasiñavanahi mayehe. Tájina vácamunuhini. Tarataripa eta vicasiñavairahi mayehe. Tásiha, éma ticuchucuhahaviripa. Taicha eta Sagrada Escritura, ani tacahehi eta táechajiriruvahi: “Nácani ticasíñavanahi eta me Viya, tijacapacareanahi, máichecuarequireyare eta náitaresiraya táicha”.

Ticaviurevana namutu ena achaneana táichavene eta náejecapiravana

¹⁸⁻¹⁹ Acane ema Viya manacasamurechahi ena achaneana eta matiari-hirahi éma. Manacasamurechahivare eta máicuñasiraya namutu ena téjeca-pavanahi, máurirahanahi. Yátupihí eta nacaicuñairayare táichavenehi eta namasuapirahi eta yátupiqueneana, váhivare návarahahini náinajicahini eta navainarajivana.

²⁰ Máimahasihinéni ema Viya Eterno eta viyehe, véchahisera eta matiari-hirahi, taicha tamutu vímaha eta máepiyaruanahi, étaripa eta apaquehe étapa eta tatiarihiqueneanahi. Émarichuhi ema Viya téchapajiricahi tamutu eta táepaniravahi eta juca apaquehe, puíticha eta juca viávacurehi. Étara vímatiarahi eta matiarihirahi ema máitupajijiaruvaquenehi. Énaserá ena achaneana, vai návarahahini nacasiñavahini eta mayehe. Étapa naviurevahi éna.

²¹ Tamapurujihisera eta náimatirahi ema Viya, vahi návarahahini nasua-pahini; váhivare napicauchahini. Váhivare nahasulupayachahini éma. Tétavi-cavahi eta táejecapiravahi eta napanereruana. Étachucha napanerechahi eta tájiparacana. Muracasamureanahivare.

²² Ticasíñavavaicanahi taicha tímijachavanahi títupajijiacavana. Tétavica-vahisera eta namaiturerevanahi.

²³ Vaipa najirauchahini ema Viya máepenacacahi. Váipavare mapicauchacarehini nayehe. Tásiha, náemitisicaipa éma. Nasapihapa najirauchahi eta nasiñarajiana achanemirana matumerairahanahi náipunechucha ena achaneana. Tamutuchucha nacasiñarajipahi cáyurepuca, quicharepuca, sáramirapuca.

²⁴ Tacahe, eta máimairahi ema Viya eta náichirahi eta júcana, máisapapa éma. Máinajiacavacapa. Puíticha navaraharichucha tímijanavana naicha eta natuhusivana titsiriacareanahi. Tavayuacahivare eta najamuraraivana tauriqueneana. Tétavicavahi eta namaeperajisracacahi.

²⁵ Tétavicavahivare eta náepuirahi ema Viya, émayarehi najiraureya-rehini. Tasapihapa téjecapavanahi, eta náimijachirahi tíuripana eta najirauchira eta nasiñarajiana náepiyaruanahi. Tásiha, náemitisicapa ema yátupiquenehi. Jéhevarequenehi máichecuaraquireyarehi eta majirauchacareva. Amén.

²⁶ Eta tacahe, ema Viya macaerajicavacapa. Vaipa mávarahahini máemechavacahini. Máisapapa náichahi eta navarahaqueneanahi. Tásiha, tétavicavahi eta náichaqueneanahi. Nararihi ena esenana, énjicacapa náichacacahi eta napecaturana. Vaipa nácomesahini ema ajaira.

²⁷ Énaripa ena ajairana, nararihivare énjicacahi náichacacahi eta pecat-uana. Vaipa nácomesahini esu esena. Navayuchaipa eta najamurachiracacahi. Váhiquene nátsirihahini. Táichavenehi eta náejecapiravahi, énjivapa tímitaequenehavana tayehe eta náicuñayare.

²⁸ Ena nani, ichape eta nacaerajisiravahi eta me Viya. Vaipa návarahahini náesenicahini éma. Váhivare návarahahini napanerechahini eta táuriqueneana. Tásiha, ema Viya máinajiacavacapa, vaipa émainahini máechavacahini. Máisapapa tímiyanavana eta náichirahi eta tájiparacana tamauri-queneana.

²⁹ Tétavicavahi eta náepiyaresirahi eta napecaturana tamauriqueneana: Navehahi esu esena apayena. Ena amaperuana náichahi eta natuhusivanahi. Téharahiana nayehe nácani matapiravareanahi. Tamutupa navaraha nacayehe, cáetemarահiana, ticapinarurահiana, ticapահiana, tipiararecana te tise mana, tivayua-recana, sémarairihiana, téchejihiana.

³⁰ Tíñemahi eta náechejisirana nayehe ena apana achaneana. Nacati-chavare ema Viya. Tiácapa-emarahiana, cájamuravana, píncanillana, tisiñavavairicana. Tisipanerehiana eta náichirayare eta apana pecatu navaraha-queneana. Masuapajirairahanavare nayehe ena ticachichana.

³¹ Tímijachavanahi tétupicavana eta náichirahi eta tamauriqueneana. Tivayuarահiana eta náechajirisiravana. Vahi témunarahiana. Váhivare típerdonarahiana, nájina najapanuquenéna.

³² Náechahinéni éna eta tamaurivahi eta júcana me Viya. Náechahivare éna, eta táimicapacasiravacayarehi, tímiyanavanarichuchasera eta náichirahi. Náimiquipaicahi nácani apamuriana. Émasera ema Viya máítauchayarehi eta náicuñayare.

2

Éma Viya titupiruvahi eta máítauchirayarehi eta náicuñayare

¹ Étiarihiserá éti ímijachahi tájina eviurevaimahi eta vahi ácutimahi ena apamuriana máimatirahanahi ema Viya. Ímijachavahi tájina epecaturaina. Éti ecaecahivacahi ena tíchanahi eta tamauriqueneanahi. Váhiserá étupicavahini eta ecaecahirahi, taicha étirichuhi nacuti-queneanahi eta íchaqueneana. Énerichuhivare éti ecaviurevahivare.

² Viti véchahi matupiruvahi ema Viya eta máicuñasiravacaya ena tíchanahi eta juca tamauriqueneana.

³ Étipa, éjecapavahi eta ímijachirahi ticaiticaheyare eta ícuñayare, eti ícharահiana eta tavasi-queneana ecutirichuhinéni ena ecaecahiqueneana.

⁴ Émasera ema Viya, tétavicavahi eta máurivahi eta eyehe. Vahi maícuña-cahevanehini. Ticamichahehi, ticuchapahehivare, mavarairahi éneuchavahini eta mayehe, ínjicahini eta íchira eta tamauriqueneana. Tásiha, vahi ecuemepurureca eta máurivahi eta eyehe.

⁵ Taicha táíñehiqueneyare eta ícuñasamiyare éti, te vahi ecueuechava, ínjicavare eta tamuracavahi eta esamureana. Taicha evayuchapaichucha eta ecurumutusráhi eta etapiravana.

⁶ Taicha éma, matupiruvahi eta májjarasirayare eta táitsivayare eta víchaquenepachu.

⁷ Vítiripa viti machanerana ema Viya, tíjaracahavinapa éma máichecuaraquireyare eta vítaresiraya, taicha vivaraha puiti vicurisamurechaya éma, vímíyanavaya eta vivapinairavayare vicha eta táuriqueneana. Vicuchapavaya eta visipiraya eta te majaravahi, vicunachacareya mayehe, máichecuaraquireya eta víuricacarevaya.

⁸ Muracainapasera eta máicuñasiravacaya namutu ena masuapajirairahanahi énaripa ena ticatianacanahi eta yátupiqueneana, tasapíhahi náuricahi eta tamauriqueneanahi. Navayucharipa eta náimiyusemasiráhi ema Viya.

⁹ Ichape eta nacatajivairaya, tíyahahacavanayare namutu ena tíchanahi eta juca tamauriqueneana. Ticuticanayare namutu eta náicuñayare, ena israelítana énapa ena apavasana.

¹⁰ Étísera eti íchanahi eta táuriqueneana, tíjaracahénapa ema Viya eta íávhaya te majaravahi. Tétavicavaya eta ecunachacarevaya mayehe. Tinaracainavarepa eta epanereresiranainihi. Ecuticacaya emutu eta íuricacarevaya. Eti israelítana, vahi ecachuricaimahi ena apavasana.

¹¹ Ema Viya vahi manerejicaimahi ena máicuñaruanaya. Ticuticanayarehi máicha.

¹² Nácani máimatirahanahi eta mavanairipiana ema víyarahaini Moisés, ticaicuñanayare. Énerichu nácani náimatihénípuca, tavetijinapa ticaicuñanayare taicha vahi nasuapahini.

¹³ Taicha vahi tijacapacareanaimahi mayehe ema Viya nácani vahi náítauchahini eta nasamaqueneanahi. Tijacapacareanayaresera nácani títauchanahi típticauchanahi eta vanairipiana.

¹⁴ Nararihivare ena tinerejicavanahi ena apavasana, váhinéni náimatihini eta vanairipiana, nasapíhasera natupiruvahi te nasamureana eta náichirahi eta táuriqueneanahi, taicha yátupíhi eta nasuapirahi eta manacasamurechaquenehi ema Viya.

¹⁵ Éna, náimerecáhi eta manacasamurechiráhi ema Viya eta vanairipi te nasamureana. Énajivaya tisamavana te napanereruana eta táurivahi eta náichaqueneana, éta ticatiuchavacáhi. Te téjecapavanapuca, tisamavanahivare eta taurivahi eta náichaqueneana. Tásiha, napicáhi eta náicuñayarehi táicha.

¹⁶ Járájapa eta sácheyare, ticayaseserehianainapa namutu ena achaneana te mamirahu ema Víáquenu Jesucristo. Éma, máimatiya tamutu eta náichaqueneana tayumurevanahi. Étarichuhi eta numetarapíhi te nucametarairupa.

Ena israelítana, ena ticatuparahanainihi eta vanairipiana, váhisera náítauchahini

17 Étiserá eti israelítana, ímijachavahi yátupihí ítaucha eta vanairipiana, ecunachavaipahi mayehe ema Viya.

18 Ímijachahivare ítuca eta mavarahaqueneanahi ema Viya. Énerichuvare eta vanairipi éhiruhi tímítucahehi eta enerejisirayare ícha eta táuriqueneana.

19-20 Tétavicavaipahivare eta ecunachiravahi taicha ímijachavaripa ecaturaraha eta ímitusiraya ena apavasanana apaesa náesenicahini ema Viya, náimatiyareva eta máechajiriruvana, náinajicayareva eta napecaturana, váipavare nanasimahi eta te tímápicu. Ímijachahivare ímatiequeneha tamutu eta vanairipiana, ítamuturusirahi tamutu eta tayeheana yátupiqueneana.

21 Éti evarahahipuca ímitureca. Tituparacahehisera étivaya ítaurahi. Éti, ímiturecahi vahi nacuamereca ena achaneana; étiserá epanerechahi eta íámeresiraya.

22 Tacutíquene váhivare iúrica nacaesenarahini ena eparajairavana; étiserá epanerechahi eta ecaesenaraya. Ecatichavare eta nasiñarajiana; étiserá matsirairahahehi eta evehairahi eta tájaracasiana eta nasiñarajiana.

23 Ecunachavahi eta ímijachiravahi ítuca eta mavanairipiana ema Viya; étiserá tamutu sácheana íacatayajicahi eta mavanairipiana. Tétavicavahi eta emapicauchirahi éma.

24 Aní tacahe eta Sagrada Escritura: “Ena achaneana vahi napicauchahini ema Viya íchavenehi éti israelítana” tacahepa.

25 Eti ecunachavaipahi eta israelítairahéhi. Tacamunuhisera eta ítauchirainahini eta vanairipiana. Taicha eta juca emaitauchirahi, tímicitijirica-vaichucha vahi étinahini israelítanainahéhi.

26 Ticachuricaheanaripa nácani apavasanana, nasapihaipa náitauchahi eta vanairipianahi. Ema Viya máimahahi eta táurivahi eta náitauchirahi, váhineni israelítanainahíni éna.

27 Ena apavasanana títaurashianahi tayehe eta vanairipiana, éna tiyasesecanainapa eta ícuñayare emutu eti emaitauchanahi, émepurecavaipahi israelítairahéhi, étapa eta ecaravahuirahi eta vanairipiana.

28 Váhivare étaimahi ecunachacarevaya eta ecomarcairahi te íáquehe eti israelítana.

29 Nácanisera yátupiquenehi eta nasuapajiraiva, jéhevare ena yátupiqueneanahi israelítana. Vahi tácomesaimahi ticamarcana te náqueheana, taicha éna yátupiquenehi te nasamureana námahi eta nacamarcairahi eta machanearavacahi ema Viya. Vahi étaparacainahini eta nacaravahuirahipuca eta vanairipiana, étainapapucaini nacunachacarevainahini nayehe ena achaneana. Eta ticamunucarehi eta náitauchirayare eta mavanairipiana ema Viya. Étapa nacunachacarevaya eta mayehe.

3

Ena israelítana tímijachavanahi nacarichu ticunachacareana

1 Eti nujaneanana ímijachavaipa ecunachacarehi taicha eta israelítairahéhi, ecomarcairahivare te íáquehe.

2 Jéhesare, jararihi eta ecunachacarevahi, máicha ema Viya. Éma, matuparacavacahi ena víachucanaveanaini eta náimituresirahi eta yátupiqueneana máechajiriruana, vítipa víti námariéqueneana.

3-4 Tayanapane natiarihíhi ena vijaneanana vahi náitauchahini eta natuparahahi, émasera ema Viya, váhiquene títavaimahi eta máitauchiraya tamutu

eta májjararuvanahi eta nayehe. Taicha tétavicavahi eta máitauravahi éma. Tayanapanepuca natiarihi ena achaneana énaína náepiyahirahi, émasera ema Viya máitachayare tamutu. Eta Sagrada Escritura, aní tacahe: “Tayanapanepuca ena achaneana vahi navarahahini nasuapa eta pítauravahi, piti Tátachicha, tamutu sácheana pímerechahi píti eta pítauravahi. Tayanapanepuca natiarihi náimijachahi vahi tátupiruvahini eta píchaqueneana, tétavicavahisera eta pitupiruvahi te tamutu” tacahepa.

⁵⁻⁶ Vimutu vímati tétavicavahi eta majapanuravahi ema Viya. Németeacasa etiarihi eti ímijachahi tiápajucavayarehi eta macunachacareva taicha eta esipeaturairavacahi. Ímijachavavare vahi tátupiruvahini eta mase-mairahi eta ecapeaturairahi. ¡Tétavicavahi eta éjcapiravahi! Ecuti ena achaneana mapanerereana. Ema Viya, tatuparacahi máicuñacavayare namutu ena téjcapavanahi, taicha tétavicavahi eta masantovahi.

⁷⁻⁸ Ímijachavahi tísapacarehi eta épiyahiraiva, taicha ímijachavahi títame-tacahe eta yátupirahi eta tatupiruvahi eta máechajiriruvana ema Viya. Ánipapuca tacahe eta epanereruana: “Ema Viya ticaijare tijapanurahi. Tacahe, tiápajucavayare eta macunachacarevahi éma, taicha táetaviuchayare eta majapanuirahavi eta máimairainapa eta vivayuchiravahi eta vivainarajivana. Tásiha, vahi tátupiruvahini eta mavairahi tícucachavi, taicha tiápajucava eta macunachacareva vícha, ¿masi?” ecahepuca eta epanereru. Natiarihivare ena tépiyaequenehahavi náimijachahiji tacahe eta vímiturapi viti apóstoleana. Muracayaresera eta náicuña namutu ena tacahehi eta napanereruana.

Vimutu viti achaneana vicaviurevahi eta me Viya

⁹ Eti nujaneanana, vahi ecuimijachava viti israelítana viúripanahi nayehe ena apamuriana achaneana. Tájinaquene viúrivainahini te mamirahu ema Viya. Taicha vímatiequenehapa eta vimutuirahi vicaviureva me Viya viti achaneana, viti israelítana énapa ena apavasana.

¹⁰ Eta Sagrada Escritura, aní tacahe: “Nájina náurihini, émanainahipucáini máurihini, ésunainahipucáini esena súrihini.

¹¹ Nájina vata énajivainahini náimatihini ema Viya, váhivare navaraha náesenica ema Viya.

¹² Namutuhi téjcapavana, namutuhivare táquipacahi eta tamauriqueneana. Nájina náichahini eta táuriqueneana, émanainahipucaini máichahini.

¹³⁻¹⁴ Tíñmahipi eta náechajiriravana. Tétavicavavare eta navayuarivanahi. Éna nacuti eta quichare téchurahi, tétavicavahi eta nacaetemarai. Náematanechucha namaldicióncha nácani apamuriana.

¹⁵ Apaesarichu nacamunu navarahaipavare ticaparecana.

¹⁶ Sirujiana eta náitaresirana, ticaetemarerecana.

¹⁷ Vahi natanuaimahi eta náurivainahini nayehe ena apamuriana.

¹⁸ Tájina vahi napicauchaimahi ema Viya” tacahepa eta Sagrada Escritura.

¹⁹ Nujaneanana, eti ímijachavaipapuca vahi étinahini táechajisiha eta Sagrada Escritura. Téchajisihahisera, taicha eti iávacuhanahi eta vanairipiana. Emutuhi ecaviurevahi. Te jena sáchevare, vaipa ecatiuchavaimahi. Ematinainaripa emutu taicha eta eviurevanahi. Táurica eta ecaicuñairayare emutu.

²⁰ Natiarihipucasera nácani tímijachavanaripahi tijacapacareana taicha navarahainapa náitauchaya eta vanairipiana. Váhiquenesera tijacapacareanaimahi me Viya, taicha vahi étaparacaimahi eta náitauchirahi. Taicha eta vanairipiana, tímimatichahavichucha eta vicapecaturairahi.

Vijacapacarehi mayehe ema Viya táichavenehi eta vicasíñavairahi mayehe ema Machicha Jesucristo

²¹ Puítisera, ema Viya tímimatichahaviripa eta vijacapacarevayarehi eta viúchucuiraya. Vahi étaparacaina eta vivarairahipuca vítaucha eta vanairipiana. Tanasiquneripa eta Sagrada Escritura, táechajisihaiipahi eta máitecapiraya ema ticatiuchahaviya, vijacapacareya máicha.

²² Eta tacahehi puiti, yátupihí eta vijacapacarevahi vimutu viti vicasíñavanahi mayehe ema Jesucristo. Ema Viya vahi manerejicaimahi nácarihini ena tíuriana. Váhivare máepuruimahi ena achaneana tisipecaturanahi. Eta nacasiñairavahi eta mayehe, majacapavacahi namutu.

²³ Taicha yátupihí eta vicapecaturairahi vimutu. Vimutu véchuriaca eta viúrivana, vijacaparéni me Viya. Nájina émanáinahíni mátupiruhíni.

²⁴ Étasera eta máemunasirahavihi ema Viya, tijapanuhavihi. Tijacapahavihi táichavenehi eta vicasíñairahi ema Machicha Jesucristo. Émapa tivachachinahavihi eta vitapiravana táichavenehi eta vipecaturana.

²⁵⁻²⁶ Ema Viya, tétavicavahi eta matupiruvairahi. Vahi macamichaimahi ena téjecapavanahi te machacaya. Tásihasera, tijapanuhavihi. Májararecahi ema Machicha eta mavachachirahi eta vipecaturana, vímicapacahi éma. Eta vicasíñaira ema Jesucristo, macaepahahi eta véjecapiravanahi vipecaturanahi. Tásiha, vijacapacarehi mayehe ema Viya.

²⁷⁻²⁸ Tacahe, puiti visamaripahi eta majacapirahaviripa ema Viya, étachucha tíchahi eta vicasíñairahi ema Jesucristo. Vahi vétupicavahini eta vicasíñavavairisirahi eta vítauchiraipa eta vanairipiana. Váhiquenevare étaparacaina.

²⁹⁻³⁰ Vahi ácarichuimahi eti israelítana ejacapacarehi me Viya. Énerichuvare tijacapacareanahi namutu ena apavasanana ticasiñanahi. Tijacapahavihi ema Viya vimutu viti vicasíñavanahi eta mayehe.

³¹ Váhivare ecuimijacha nútinahípucaini nímitucahe vaipa tasuapacarehini viyehe eta mavanairipiana me Viya. Viti véhicanahi ema Jesús, táitusiava vicarichuhi virataha vítaucha eta mavanairipiana ema Viya. Vahi vínajicaimahi.

4

Vicutiyarehi ema víyarahaini Abraham eta macasiñavairahi mayehe ema Viya

¹⁻² Németeaca etiarihi eti evarahaipa échajisiha ema viáchucaini Abraham. Evaraha ecunacha eta macaemataneasiranahi ema Viya, ímijachirahi éta tíchahi eta majacapacarevahi me Viya. Ímijachahivare táuriha eta macasiñavavaisiravapuca éma. Numetacahesera: Eta majacapacarevahi me Viya, vahi étainahini táichahini eta macaemataneasirahi ema Viya.

³ Eta Sagrada Escritura, ani tacahe: “Ema Abraham, tétavicavahi eta macasiñavairahi me Viya. Eta tacahe, tijacaparénehi me Viya” tacahepa.

⁴⁻⁵ Tiuri puiti, viti achaneana, te vicaematanerecahi, tatuparacahi ena vicaemataneyeruanahi eta navachachirahaviyarehi. Vahi tíjaracasichahavianaimahi eta najapanuirahavihini. Émasera ema Viya tijapanuhavihi,

tijacpahavihi táichavenehi eta vicasíñavairahi eta mayehe. Vahi étapara-
caimahi eta vicaemataneasirahi.

⁶ Énerichuva ema víyahaini David máechajisihahi eta náuricacarevahi ena
ticapecaturarahiana eta majacapiravacahi ema Viya, tájina étaparacaina eta
nacaemataneasirahi.

⁷⁻⁸ Ánipa macahehi: “Tétavicavapa eta náuricacarevahi nácani maperdona-
chaqueneanahi ema Viya eta napecaturanaini, tijacpahavihi tímicutijirica-
vainehi tacuijahini véjcapiravainahini” macahepa.

⁹ Tacahe, eta juca víuricacarevahi, vahi vácarichu vicutuparahahini viti
israelítana. Énerichuhivare tatuparacahivare ena apavasanana. Vécharipahi
eta majapanuirahi ema Viya ema Abraham. Tacarichuhi eta macasiña-
vairahi, majacapahi ema Viya.

¹⁰⁻¹² Ímjachapapuca éti, eta majacapacarevahi ema Abraham tásiha-
quenehi eta macamarcairahi. Numetacahesera: Váhiquene étainahi táichahini
eta macamarcairahi éma, taicha te táequenepa eta majacapirahi ema Viya,
mapaenumavahi ticamarca ema Abraham. Éta pa táicutiarayarehi eta
majacapiraipa ema Viya táichavenehi eta macasiñavairahi. Émara ema
achane máinapuiruhi ticasíñavahi me Viya. Puiticha ema Abraham, émapa
vicaiyaquenehi vimutu viti vicasíñavanahi me Viya, vijacapacareipa viti
apanava. Tacamunui pasera vácuticacahini vicasíñavahini mayehe, viti
israelítana étipa eti apavasanana.

*Éma Viya máitachayare eta máijarasirahaviya eta vícuchihi táichavene eta vi-
casiñavairahi eta mayehe*

¹³ Éma Viya tíjaracavahi eta máijarasirayare ema Abraham énapa ena
mámariéqueneana tamutu eta apaquehe, návapairuyare. Máijaracayare
táichavenehi eta macasiñavairahi ema Abraham. Vahi étaparacainahini eta
masuapirainahini eta vanairipiana.

¹⁴ Taicha te tatiarihinahini eta náicuchihi ena títauchanahi eta vanairip-
iana, tamapurujipapucaini eta vicasíñavairahi, tamapurujipavarepucaini
eta máijarasiravahi ema Viya eta majacapirahaviyare.

¹⁵ Taicha eta vanairipiana, étachucha támaparaucha eta náicuña ena téjecapa-
vanahi. Tásiha, vimutu vicaiçuchiyarehini eta vícuña, taicha vimutu véjca-
pavahi*.

¹⁶ Éma Viya, tétavicavahi eta majapanuraivahi. Tásiha, yátupi máitachayare
eta máijarasiravana nayehe namutu ena mámariéqueneana ema Abraham.
Vahi nácarichuhini ena téhicanahi eta vanairipiana. Nayeheyareva namutu
ena ticasíñavanahivare mayehe, ticutianahi ema Abraham eta macasiña-
vairahi. Eta tacahe puiti, eta vicaiyairahi vimutu viti ema Abraham te
mavahuana ema Viya.

¹⁷ Taicha ema Viya, ánipa maicha ema Abraham: “Puiti nunacaviyare
píti nacaiyaquenyare ena achaneana te camuriquene avasareana”. Tásiha,
ema Abraham, ticasíñavahi muraca me Viya eta máitachirayare eta máijara-
sirayare ema machichaya, tayanapane eta mácheruanahi éma, ésupa esu
mayena. Taicha ema Viya, tamutuhi máituruequeneha. Éma Abraham

* **4:15** Éma Pablo te mayeherepi eta máechajiriruvana, ani macahe: “Te táviha tájina vanairipi,
nájinavare ticaviurevahini eta náječapira tayehe”. Étasera eta macayemaquenehi, ani tacahe: “Tatiar-
ihi eta viviurevahi vimutu, taicha tatiaríhi eta vanairipi te tamutu jácani vicaijuhepuca”.

ticasíñavahivare eta majacapirayare eta máicuchihi, tayanapane tájinaichaha máimahahini.

¹⁸ Ema Viya mametacavarepa ema Abraham eta macachichairayare, camurianayare ena mámariéqueneanayare. Eta nasimutuvayare, tamutu nacavasayarepahi, camurianayarehi eta návasanaya. Ema Abraham, ticasíñavahi eta táitachiravayarehi tamutu. Ticuchapavaipa eta máuchusirayare ema machichayarehi.

¹⁹⁻²¹ Ema Abraham, ichavicaipa éma, cien año eta mahañora. Ésupa esu Sara, ichavicaipavare, macheruhivare. Vaipa náuriahini eta nacachichairayarehi. Váhisera máefamavahini ema Abraham. Ticasíñavahi muraca eta mayehe ema Viya eta tamutuirahi máituruequeneha eta máitachirayarehi tamutu eta máijarasiravanahi. Váhivare mapicacaravahini. Eta macasiñavairahi, tétavicavahi eta macunachirahi ema Viya.

²² Eta tacahe, ichape eta majacapacarevahi me Viya táichavenehi eta macasiñavairahi muraca.

²³ Tacahe, eta vicaravahuirá eta Sagrada Escritura, vímatiequeneha vahi mácarichuhini ema Abraham majacapacarehini me Viya.

²⁴⁻²⁵ Puiti, víti apanava vijacapacarehi me Viya eta vicasíñavairahi mayehe. Taicha ema Viáquenu Jesucristo táimicapacahi eta vipecaturana. Émasera ema Viya macaechepucahi ema Machicha te máecari apaesa vijacapacareyarehi mayehe vimutu viti vicasíñavanahi mayehe.

5

Tétavicava eta viúricacarevahi táichavene eta majacapirahavihi ema Viya

¹ Puitiripa vijacapacareipa me Viya táichavenehi eta vicasíñavairahi eta mayehe. Tásiha, tétavicavaipa viúrivahi eta mayehe. Vaipa vipicacaravahini tayehe eta vícuñayarehini, taicha ema vímicuñaruhi ema Viáquenu Jesucristo, macaepaharipa eta vícuñayarehini.

² Máichavenehi ema Cristo, tétavicavahi eta majapanuirahavihi ema Viya. Tásiha, tijacpahaviripa táichavenehi eta vicasíñavairahi eta mayehe. Tamutu sácheana viúrisamurehi eta vicuchapiraipa eta vijacapirayare eta vícuchihi visiapirayare te majaraivahi ema Viya.

³ Te tatiarihinapuca eta vicatajivairayare, vivapinavachucha eta vicamichirahi taicha tétumechaviya eta vímianirava véhica ema Viáquenu.

⁴ Táichavenehi eta vímianirava véhica, vijacaparipavare eta vitumevayare viratahairayare vicamicha tamutu. Tásiha, eta vicamichirahi tamutu, vicuchapainapa eta táitsivayare vícuchihi.

⁵ Tájina tímipanererécahavimahi taicha yátupiyarehi eta vijacapirayare eta vícuchihi. Vicasíñavahi mayehe ema Viya taicha tímimatichahaviripa te visamureana eta máemunasirahavihi máichavenehi ema máijararuhavihi Espíritu Santo.

⁶ Víti, tájina viviyaimahi eta vicuchucuiraváinahini. Émasera ema Cristo, te tíurihi eta máimairahi, tíjaracavahi tépena víchavenehi víti máurirahanahi, eta macuchucuirahaviya.

⁷ Váhisera tááticacahini eta visamureana viti achaneana. Vimutuhi véñama eta vítaresira. Téhesera tatiarahinapucaini eta véñamirainahini mácani achane máetaviuchahi eta máuriva, víjaracavapapucaini vépena eta vicatiuchirainahini éma.

⁸ Émasera ema Viya, tétavicavahi eta máemunasirahavihi, tayanapane eta vicapecaturarahirichahanéni. Máijararecahisera ema Machicha Jesucristo máepeninahavihi.

⁹⁻¹⁰ Tásiha puiti, vijacapacareipa me Viya táichavenehi eta vicasifairahi ema Jesucristo eta máepeninahavihi. Ichapehinéni eta véjecapiravahi, vimaesenisirahi ema Viya, mavarahahisera éma macaepahayarehini eta vícuñayarehini táichavenehi eta vipecaturana. Eta máepenirahi te crusu ema Machicha, puiti ema Viya tíchuhahavihi vipauchayare éma. Tájina vipicahini eta vívahásiraipa éma. Tásiha puiti, eta vicasifairahi eta mayehe, vaipa véñamavahini tayehe eta víúchucuirayare taicha eta máechepusirahi te máecari, eta tímicaecherachahi eta máitupajijiasiravahi eta macuchucuirahaviya.

¹¹ Puiti, tétavicavaipa eta víúrisamurevahi mayehe ema Viya máichavene ema Viáquenu Jesucristo. Tétavicavahi eta víúrivahi mayehe.

Éma Adán tímiaquipaichavi vimutu. Émasera ema Cristo émapa ticuchucuahaviyare.

¹² Tacahe, ema Adán, ema máinapuiruhi achane tiávapaicahi eta juca apaquehe, éma tinacuchahi eta pecatu. Tásiha, táichavenehi eta pecatu, járajapapa eta vépenira, tavachaequenehi eta pecatu, taicha tímirijicahaviripa tayehe eta pecatu.

¹³ Te tájinaichaha májuchahini ema Moisés eta vanairipiana, tatiarhipahi eta pecatu te juca apaquehe. Étasera tamajinairachaha eta vanairipiana, vuíchaha nacaviurevahini ena achaneana.

¹⁴ Namutusera ena mámariéqueneana ema Adán tépenanapaipahi taicha mámaparaucharipahi eta mapecatura éma, tayanapanepuca eta napecaturana vahi tácutihini eta mamasuapajiraivahi, tayanapanehivare tájinaichaha eta vanairipi májurehi ema Moisés. Éma Adán, émapa ticaetehahavihi. Te táequenepa, márapiainapa ema apana, émainapa tétupiripanahaviyare.

¹⁵⁻¹⁶ Víti, tétavicavaipahi eta visimutuvahi viti vicaicuñanayarehini tayehe eta ecuñaraqui te yucu infierno, étanaichuhinéni eta máejecapiravahi ema víachucaini Adán. Émasera ema Viya, ichaperinehi eta majapanuirahavihi vimutu, mavarairahi ticuchucuhahaviyare máichavenehi ema Machicha Jesucristo. Tamuturipahi macaepahahi eta tasimutuqueneana vipecaturana. Tájina tavachaequenénahini. Tájina vare jácani vicaematane aracaímahi.

¹⁷ Étanarichuhinéni eta pecatu máejecapiravahi éma émana achane, émaripa ema víachucaini Adán. Tiámairijicahaviripasera eta vépeniraya vimutu. Émasera ema Viya tiápajucavaipa eta majapanuirahavihi. Tijacapahaviripa máichavenehi ema émanaquenerichuvare achane, ema Jesucristo. Tijaracahavinavarepa eta arairuyare vítaresirayare vimutu viti vicasifavanahi eta mayehe.

¹⁸ Eta mapecaturahi ema Adán, yátupi tiámaparáuchahaviripa vimutu eta vicaicuñairaya. Émasera ema Jesucristo, tájina matapiravainahini eta máitare-sirahi. Éma, tiámaparáuchahaviripa eta vítaresiraya víti, vijacapacareipa me Viya.

¹⁹ Camurihavihi viti tacaerajiruanahi me Viya, táichavenehi eta mamasuapajiraivahi ema émana achane. Puítisera camurihaviripa viti vijacapacarea-

naripahi me Viya táichavenehi eta masupajiraivahi ema apana achane Jesús, taicha tájina matapiravainahini eta máitaresirahi.

²⁰ Te táequenepa eta máejecapirahi ema Adán, ema Viya manaquicahi eta vanairipi. Éta tímítucahaviyarehi eta tavayuchiravahi eta vipecaturanahi. Puiticha tiápajucavapaipaicha eta pecatu, émasera ema Viya tiápajucavaichucha eta majapanuirahavi.

²¹ Tacahe, eta pecatu, ichape eta támaparáuchirahavihi tayehe eta vépenira. Étasera eta majapanuirahavi ema Viya tiámaparáuchahaviripahivare eta vijacapacarevahi mayehe. Tásiha, píjaracahavinavarepa eta vítaresiraya máichecuaraquireyare máichavenehi ema Viáquenu Jesucristo.

6

Puiti eta majacapirahavipa ema Viya, vicutuparahapa vitupiruvainapa eta vítaresiraya. Vinajicainapa eta pecatuana.

¹ Tiuri puiti, németeaca etiaríhi eti ímijachaipapuca tíuríhi vímíyanava vícha eta pecatu apaesapuca tácaecherapaipa eta táetaviuchirahi eta majapanuirahavi ema Viya.

²⁻³ Váhiquenesera táuricahini vímíyanavahini vícha. Taicha tépaharipa eta tapamisirahavini eta pecatu. Nuvaraha vahi ecuemitísica eta ímitucasi- vanahi. Eta vicaicachasirahi eta víjarasiravahi véhicaya ema Viáquenu Jesucristo, víurujacaripa éma. Tásiha, tímícutijiricavaipa vácachanehini eta máepenirahi, vépenahivaréni víti. Vaipa tárataha tipamicahavi eta pecatu.

⁴ Eta vicaicachasiraipa te une, tímícutijiricavahi vicaecarsihi, vicahanepa ema Cristo eta máepenirahi. Énerichuvare eta víuchusirahi te une, vicutipa éma eta máechepusirahi te máecari. Tanasiripa eta ichasini vítaresira. Tásiha puiti, arairupa eta vítaresirahi taicha máetaviuchirahi ema Viya eta macaemataneasirahavi tacuti eta ichape máitupajijiasiravahi te macaechepucapa ema Machícha. Vaipa táuricahini víchahini eta pecatu.

⁵ Taicha eta víurujiasiraipa ema Cristo, vicutiripahi éma eta máepenirahi. Tásiha, étarichu vicaheyarehi víti apanava eta véchepusirayarehi, vicutiyarehi éma eta máitaresirahi, tájina matapiravainahini. Tásiha víti, arairuinapa eta vítaresira.

⁶ Tacutiquene, eta tamaurivainihi eta ichasini vítaresira tacapecaturarai- vainihi, tímícutijiricavahi te vicaquenureca. Tétavicavahi eta tacavanarai- rahavihi, tipamicahavihi eta víchirayarehi eta tamauriqueneana. Puítisera táecarasipa eta ichasi vítaresira, tacutihí eta náecarairaipa ema Viáquenu Jesús. Vaipa tipamicahavimahi.

⁷ Taicha mácani achane eta máepeniraipahi, tícheaipahi eta macapecaturairahi.

⁸⁻⁹ Puiti vécharipa eta máechepusirahi te máecari ema Viáquenu Jesucristo, tájinapa tímiapechaimahi máepenahivaréni taicha tájinapa tárataha táimicapa- cahini. Ene vicahehi víti eta víurujiasirahi ema Cristo. Vécaraipahi eta tamaurivahi eta ichasíhi vítaresirahi. Puiti, tamutupa ticaitsivahi. Vicutinapa éma eta vítaresirainapa.

¹⁰ Eta máepenirahi ema Cristo, éta tímicapacahi eta vipecaturana. Éma, vaipa tiápechavaimahi tépena. Tamuturipahi. Tásiha, eta máechepusiraipahi, máichecuaraquirénapa eta máitaresira te mavaure ema Maiya.

11 Ene ecaheyare éti, écarainapa tamutu eta tapamisirahéni eta epecaturana. Puiti eta itaresirainapa, macarichu ema Viya ecaematanearya, táichavenehi eta iúrujasirahi ema Viáquenu Jesucristo.

12-13 Vaipa ecuisapa eta tapamisirahe eta pecatu. Váhivare ecusuapa jácani tajamurachaqueneanahi eta iáqueheana, taicha tétavicavahi eta tamaurivahi eta tajamurachaqueneanahi. Tímicutijiricavainapa épenaquene, vaipa échaimahi eta pecatu. Ítarecainapasera mayehe ema Viya, íjararecainapa eta iáqueheana mayehe. Ísapainapa ema Espíritu Santo tipamicahe eta ecaemataneasiraya ema Viya, eta íchiraya eta táuriqueneana.

14 Eta pecatu, vaipa ticavanarahémahi. Émainapasera puiti ema Viya, tímícatacahénapa eta íchirahi eta táuriqueneana. Énerichuvare vaipa tácamunuhini eta táipicararesirahe eta vanairipiana apaesa vahi ecuquicha eta tamauriqueneana.

Ena ticapecaturarahiana tímícutijiricavahi ena ticaquenureana eta tapamisirahi eta náichirahi eta pecatu

15 Puiti, németeaca etiarahi eti ímijachahi tísapacarechaha eta vicepecaturaira taicha vaipa táipicararechavihini eta vanairipiana. Étísera, tétavicavahi eta táejecapiravahi eta epanereruana. Ímipanapa eta majapanuravahi ema Viya. Vaipa epicauchahini.

16 Écharichuhi éti, te ímíyanavayarechuchapuca eta tapamisirahehi eta pecatuana, ecutirichahapuca mácani ticaquenurecahi, tipamicavayarehi eta masuapirayarehi ema máquenu. Ene ecahehi eta esuapiraichaha eta pecatu. Éta tiámaparáuchahehi eta esiapiraya te yucu infierno. Téheserapuca émainapa esuapaya ema Viya, tatupiruvainapa eta itaresiraya.

17-18 Nuhasulupayachasera ema Viya eta ínajisiraipa eta tapamisirahénihi eta pecatuana. Puiti tatupiruvaipa te esamureana eta esuapirahi eta véhiruhi ímitucasivahi. Puiti íjaracavainapa ecaemataneaca ema Viya, iávácuharipa eta táuriva eta itaresiraya.

19 (Nímícutichinahehi eta juca, taicha vahi máejerarena eta ecaicutiarairaina éta. Nuvaraha yátupina ecaicutiaraya.) Cape eta itaresirahi, étarichaha íjararecahi eta iáquehe tayehe eta tamauriqueneana, étaviuchahi eta evainarajivanainihi. Puiti íjararecaya eta iáquehe íchayare eta táuriqueneana, táurivaya eta itaresira. Tacuija tahapapicahe eta ecaemataneasiraya ema Viya.

20 Taicha cape juca itaresirahi étarichaha tipamicahehi eta epecaturana. Vuíchaha étainahini ecaemataneaca eta táurivaya eta itaresira.

21 Tájinavare ímaequenehahini eta íchirahi eta tamauriqueneana. Púitísera, tétavicavahi puiti eta etsirihacarevahi tayehe, taicha ímatipa tiámaparáuchahehi eta esiapirayahini te yucu infierno.

22 Púiti iúchurepa tayehe eta tapamisirahehi eta pecatu. Iávacuhaipa eta ecaemataneasiraya ema Viya. Jéhevere eta iúritaresirayare me Viya, máichecuarquirenapa eta itaresiraya.

23 Eta víchirahi eta tamauriqueneana, tacarichu tiámaparáuchahavi eta visiapirayarehi te yucu infierno. Émasera ema Viya mavaraha títjaracasichahaviya eta vítaresirayare máichecuarquireya, te yátupina eta vícasiñairayare mayehe ema Viáquenu Jesucristo.

7

Viti véhicanahi ema Jesucristo, títavaripa eta tapamisirahavihi eta vanairipiana

¹ Nuparapenaveana, écharichu éti eta yátupirahi tisuapacarehi eta vanairipiana nayehe ena achaneana, étachuchasera te títarecanarichaha.

²⁻³ Timicutijiricavahi súcani esena sucaimaquene. Tatuparacahi ésu sucachaneyarehi macarichuhi ema suima, vahi sucucaecahi éma, te jácani achanerichaha éma. Te suvehapuca ema apana achane, ticapecaturaipa ésu. Téhesera te tépanaipapuca ema suima, ésupa téchinava. Tísapacare suápechava suácaima mayehe mácani suvarahaquenezare suímayare. Vahi pecatuina eta suápechiravayare ticaima.

⁴ Ene ecahehi eti nuparapenaveana. Ema Cristo, máepeninahehi te crusu, macaepaharipa eta tapamisirahénihi eta vanairipiana. Puiti émapa téchahehi ema Cristo. Ecutiripa esu esena suépenaimaquene te tiápechava ticaima, tásiha apanapema ema téchahi ésu. Puiti mavanarayeripa ema Cristo, ema máecheppurequenehi te máecari. Mavarahahi ichapeyarehi eta ecaemataneasiraina eta mayehe ema Viya.

⁵ Taicha cape juca ítaresiraichaha, esuapahi eta tavarahaqueneana eta íáqueheana. Te esamapa eta vanairipi tiápajucavahi eta evarairahi ícha eta tauriqueneana. Tásiha éta, tiámaparáuchahehi eta ícuchihi eta esiapirayare te yucu infierno.

⁶ Puítisera vaipa tapamicahavihini eta vanairipiana. Puiti viúchucurepa eta ichasi vítaresiraini. Émapa vicaemataneacayare ema Viya taicha tépanavaripa eta arairu vítaresira eta mávahásirahaviripa ema Espíritu Santo.

Eta viáquehe tichurucavavihi eta tavarairahi vicha eta tauriqueneana

⁷ Etiarhipuca eti ímijachahi tipamicahehi eta vanairipiana eta ecapecaturairaya. Váhiquenesera étaina. Vítiripa vahi vímatiequenehavanehini eta taurivahi eta vicapecaturairahi, te vuíchaha vímatihini eta vanairipiana. Vuíchahavare vímatihini eta taurivahi eta vijamurachirana eta apayehe. Eta vanairipi, ani tacahehi: “Vahi picujamuracha eta apayehe”.

⁸ Téhesera te vímatipa eta juca vanairipi, viápajucavapa vijamuracha tamutu eta vímahaqueneana tájiparacana. Te tacuijahini eta juca vanairipiana, váhirichuhini vicujamurachahini eta apayeheana.

⁹ Eta viámaperuvaichaha apaicape, vuíchaha vímatihini eta vanairipiana. Téhesera te vímatiequenehapa, visamavapa eta tatiarhipa eta véjecapiravahi eta vimaitauchirahi eta vanairipiana. Tásiha, véchapa eta vépenirayare, tatiarhirahi eta vícuchihi eta vícuñayarehi.

¹⁰ Tacahe, víti vímijachaipahi viúchucuhayare te vítauchapapuca eta vanairipiana. Tájinachuchasera tájjaracahavihini eta viúchucuirainahini. Étachucha tiámaparáuchahavi tayehe eta vépenirayarehi.

¹¹ Téhesera te amahe eta visamure, jarirahi eta pecatu. Tavayuarachavipaipa, tacamapurairavahi eta tatiarhirahi eta vanairipiana, taicha tavaraha táimicacahavi.

¹² Nuvaraha numetacahe: Tiúrihisera eta vanairipi, sántohivare, tatupiruvahivare.

¹³ Németeacasera etiarahi eti ímijachapuca vahi tiuri eta vanairipi taicha támapuricahi eta vépenirayarehi. Vahi tacucahe eta epanereruana. Numetacahe: Váhiquene étainahini eta vanairipi támaparauchavihini eta

vépeniraya. Étarichu eta vicapecaturairahi, étapa tiámaparáuchahavihi eta vépenirayarehi. Étasera eta vanairipi tímereuchahavi eta vimaaurivahi víti te visamureana, tétavicavahivare eta vimasuapajiraivahi.

14 Eta vanairipiana tavarahahinéni tímitupiruchahavi. Étasera eta veche máteji, tavayuararuhi eta tavarairahi víchaya eta tamauriqueneana.

15 Taicha víti váhiquene vímatiequeneha tájahapuca eta vícharacavaya. Vahi véhicahini eta vipanerechaquenehi vivarahaquenehi vicha. Tasapihachucha víchahi eta vicatichaquenehi vimavaraquenehi vicha.

16 Tatupiruvahi eta vanairipiana eta tametasirahavi eta vicaicuñairayare táichavenehi eta vipecaturana. Tásiha, te víchapapuca eta tamauriqueneana, visamava te visamure eta tamaurivahi eta víchirahi, vémechaemachirava eta tametasirahavihi eta vicaicuñairayare.

17 Tatiarihi te viáchaneva eta pecatu. Tásiha, váipanéni vítijiricavahini víchahini eta pecatu. Étasera eta távahásirahavihi te visamure eta pecatu, étapa tipamicahavihi eta víchirayarehi eta tamauriqueneana.

18 Véchahivare víti eta tamaurivainihi eta táitaresiraini eta viáquehe. Tétavicavahi eta tamasuapajiraivainihi. Tímicutijiricavaipa tichururerechahavihi. Vivarahahinéni vétupiricavahini, váhiquenesera táisapahavíhini eta viáquehe vétupiricavahini.

19 Te vivarahainipa vicha eta táuriqueneana, vahi váratahaimahi vicha. Étachucha víchahi eta tamauriqueneana vimavaraquenehi vicha.

20 Te víchahipuca jácani vimavaraquenehi vicha, vaipa vítinahini tásihahini eta víchirahi, étapa eta pecatu tipamicahavihi, taicha tiávahácahavi víti.

21 Te vivarahainipa vicha eta táuriqueneana, tasapihachucha eta pecatu tímiapitavairicavahi tíchejimirauchahavihi. Eta tacahehi eta víchavaque-nevahi.

22 Étasera eta viáchaneva, tétavicavahinéni eta tajamurachirahi víchahini eta mavaraqueneanahi ema Viya.

23 Jararihísera eta pecatu te amahe eta viáquehe. Ichapemurihi eta táehacacairahi tacanarahi eta paure viáchaneva. Tavaraha tíchejimirauchahavi apaesa vahi vicuitauchahini eta mavaraqueneana ema Viya. Tétavicavahi eta táitiasirahavihi, tímicutijiricavaipa vicaerata.

24 ¡Tétavicavapa eta véjapanuraivasamíhi viti páureana! ¡Tacahehi eta vícharacavahi! Németeaca eta vipanereruanahi víti, ticutimahinepa nájinapa tiratahaimahi ticuchucuhahavi tayehe eta tavayuasirahi eta viáquehe eta pecatu, támirahaviyare tayehe eta vépenira.

25 ¡Mararihísera ema Viáquenu Jesucristo! ¡Macarichu éma marataha ticuchucuhahavi tayehe eta juca tamauriqueneana! Puítiripa núti, ichape eta nuhasulupayachirahi ema Viya. Tétavicavahi eta nuvapinairavahi eta níchirahi eta mavaraqueneanahi. Étasera eta ichasiqenetetaji náquehe, ticavanaranuichucha tayehe eta pecatu.

8

Tiúriyarehi eta vítaresira taicha eta mávahásirahavihi ema Espíritu Santo

1-4 Puítisera témitiacaripa eta vícuñayarehíni viti viávahácanaipahi ema Cristo Jesús. Eta mávahásirahavihi ema Jesucristo, tiávahácahaviripavare ema Espíritu Santo. Émapa, ticaepahahi eta tapamisirahavihi eta pecatu, étapa eta támaparauchirahavihi eta visiapiraya te yucu infierno. Ema Viya,

eta máimairahi eta vimaetumechiravahi, vimaratahairahi vítauchahini eta vanairipiana, mavanecapa tiúcupaicahi ema Machicha, macaqueheyarehi eta juca víaquehe viti achaneana. Eta máijarasiravahi, macamitiequenehaipa eta tapamisirahavihi eta víaquehe eta vicapecaturairana. Puiti émainapa téchahaviyare ema Espírítu Santo. Véhicainapa eta mavarahaquenehi. Tásiha vinajicainapa eta visuapirainihi eta tavarahaqueneanainihi eta víaquehe tacapecaturaravaini. Émapa tétumechahavihi eta vítauchiraya eta mavarahaqueneana ema Viya.

⁵ Nácanisera nasuapahi eta tavarahaqueneana eta náquehe, étachucha napanerechahi eta náichiraya eta tamauriqueneana. Vítisera viti visuapanahi eta mavarahaqueneana ema Espírítu Santo étainapa vipanerechaya eta vicurisamurechiraya ema Viya.

⁶ Nácani napanerechahi eta tavarahaqueneana eta náquehe, támaparau-charipa eta nasiapiraya te yucu. Vítisera viti vipanerechanahi eta mavarahaqueneanahi ema Espírítu Santo, viti vítarecayare. Viúrinapa mayehe ema Viya.

⁷ Nácani napanerechaichucha eta tavarahaqueneana eta náquehe, éna macatianaruanahi ema Viya. Taicha váhiquene návarahaimahi nasuapa eta mavanairipi.

⁸ Tacahe, éna étachucha nacurisamurerechahi eta náquehe, vahi náituchahini nacurisamurechahini ema Viya eta mavarahaquenehi.

⁹ Puítisera éti, eta mávahásiraheripahi ema Espírítu Santo, vaipa étaimahi epanerecha eta tavarahaqueneanahi eta iáquehe. Étapa epanerechaya eta mavarahaqueneanahi éma. Nácani vahi mávaháruanainahini ema Espírítu Santo, váhivare machanerainahini ema Cristo.

¹⁰ Étisera, eta mávahásiraheripa ema Cristo, tayanapane táicuchirichuhi eta iáquehe eta táepeniraya táichavenehi eta pecatu, étasera eta iáchaneva títarecayarechucha, taicha ejacaparéipahi me Viya.

¹¹ Táichavene eta mávahásiraheripa puiti éti ema Espírítu Santo, ema Viya macaechepucayare eta iáqueheana, tayanapanepuca épenaquenénaripa. Tacutiyahehi eta macaechepusirahi ema Machicha Jesucristo te máecari. Éti iápechavayare ítareca maicha ema Espírítu Santo.

¹² Tacahe, nuparapenaveana, vícatuparahapa eta visuapiraya ema Espírítu Santo. Vaipa étaimahi visuapa eta tavarahaquene eta víaquehe.

¹³ Taicha te étachuchapuca esuapa eta tamauriqueneana tavarahaqueneanahi eta iáquehe, tájinapa iúchucuiyaimahi, ecaicuchihi eta épeniraya. Téhesera éhichahi eta mavarahaquenehi ema Espírítu Santo, ínajicayareva eta íchira eta tavarahaqueneanahi eta iáquehe, ejacapainapa eta ícuchihi eta ítesirainapa.

¹⁴ Taicha vimutuhi viti visuapanahi ema Espírítu Santo, machichahaviripa ema Viya.

¹⁵⁻¹⁶ Émaripa ema Espírítu Santo timetacahaviripa eta machichairahaviripa ema Viya. Visamavaipa te amahe eta visamure. Éma, vahi tipamicahémahi. Váhivare típicararecahémahi tayehe eta ícuñayarehini. Timimatichahénapasera eta yátupirahi macachichairahahi ema Viya. Tásiha, ecasiñavaipa eta mayehe ema Viya, émairapahi ecaiyaquenehi. “Tátachicha Nucaiyaquene” ecaheyarehi.

¹⁷ Eta macachichahaviraipa ema Viya, vijacapainapa eta vícuchihi máijarahaviraya. Vicutinapa ema Cristo eta máijarasirahi eta máicuchihi éma. Puiti,

eta vicatajivairahi te juca vítaresirahi, vicutihi ema Cristo eta macatajivairahi, tásiha, vicachanénapa éma tayehe eta mávihahi eta majaraivahi.

18 Puiti németeacahi núti, tayanapane ichapepuca eta vicatajivairahi puiti juca sácheana, tájinachucha táichavahi taicha jararihiyare eta ichape táitsivayare, vijacapaya eta ichape viúricacarevaya te majaraiva ema Viya.

19 Jéhevare, tétavicavahi eta tajamurachacarevahi te táitecapapa eta sáheyare eta vímairaya eta vicuchapaquenehi eta tacaitsivairaya eta viáquehe vimutu viti machichanaveana ema Viya.

20-22 Tacutiquene te jena sáheyare vicuchapaquenehi, tamutuinaapa témitiacayare eta témecatajivachahavianainihi te juca apaquehe. Tamutuinaapa arairuyare, tétavicavainapa eta táurivaya eta apaquehe. Vímaha puiti ticatajivanahi tamutu te juca apaquehe: Eta sárareana, ticajumanahi, táepenanihi; étapa eta sucurecana. Eta tacatajivairahi tacutihi eta sucatajivaira esu súcani esena ticacatiruhahi eta súnasira. Étasera eta arairuyare apaquehe, ticaitsivainapa tamutu. Vaipa pecatupairemahi, tamicauchainevarepa eta majaraiva ema Viya eta viávihaya viti machichanaveanahi.

23 Ema Espiritu Santo máitsivacharipa eta viáchanevana. Vaipa táesachaimahi vicha eta pecatu. Váipavare víchaimahi eta tamauriqueneana. Tásiha, víti, ichaperipa eta vicuchapiraipaicha eta jena sáheyare eta tacaitsivairayare eta viáqueheana. Títauchavainapa eta macachichairahavinapa ema Viya. Yátupinapa mayehavinapa.

24-25 Yátupihí puiti eta machichahavirahi ema Viya. Ichapevare eta vicasiñavahi eta mayehe eta vicuchapirahi eta viúchucuirayare te jena sáheyare. Vácamicha tamutu, vímianava eta vicasiñavairahi eta mayehe támutu sácheana. Tapaenumavainapa vímahainapa, tájinapa vicuchapaimahi.

26 Énerichuvare, ema Espiritu Santo tímicatadahavihi te tamutu eta vimaratahaqueneanahi. Tavetiji tímicatadahavihi eta vimaitusirahi eta viyaseuchiravayarehi te viyujarasirana. Éma, tiyaseuchahavi te viáchanevana. Viúmitichahi taicha muraca eta vivarairahi eta mayasearuana. Vaipa vi-rataha véchajicahini.

27 Émasera ema Viya máimatihí eta visamureana jácani vivarahaqueneana viyaseaca, étaripa eta mayasearapi ema Espiritu Santo. Taicha ema Espiritu Santo máimatihí eta mavarahaqueneanahi ema Viya, tásiha tiyaseuchahavihi viti machaneranahi.

Ema Viya mavaraha ticachanehaviyare víti te majaraivahi

28 Vécharipahivare tétavicavahi eta majaneasirahavihi ema Viya vimutu viti vémunacanahi éma. Tayanapane vicatajivahipuca, éma tamutuhi tiuri máicha. Títauchavayare eta mapanereruana éma eta viúricacareyarehi eta máichuirahavihi.

29 Acaneripahi eta máimatirahavihi, tinerejicahavipa machichahaviyarehi. Mavarahahi éma vicutiyaare ema Machicha Jesucristo eta máurivahi. Tímicitijiricavayarehi viparapeya éma, véchavimurihi eta macachichairahavihi ema Viya.

30 Tásiha, te máimahapa tiuri, tíchuhahavipa viti manerejiruanahi. Eta visuapirahi vipauchaipa éma, tijacpahavipa. Tásiha, tíjaracahavipa eta vícuchihi eta visiapiraya tayehe eta majaraiva.

Tájinaquene ticaerajicahavimahi mayehe ema Viya taicha yátupihí eta máemunasirahavihi

³¹ Tásiha puiti, nuvaraha yátupina eta ecaicutiarairaya eta juca: ¡Tétaví-cavahi eta macatiuchirahavihi ema Viya! Tájina táichava eta nacatianasira-havipuca nácani achaneana. ¡Váhisera nárataha ticapaquechahavianaimahi!

³² Eta majapanuirahavihi ema Viya, vahi mavayuacahini májjararecapa ema Machicha eta nacapasirahi víchavenehi vimutu víti. Tásiha, mavetijinapa eta macatiuchirahaviyare puiti te tamutu eta jácani víchavaquenevana.

³³ Puiti tájinapa viviurevaina táimicuñacahavihini viti manerejiruanahi, taicha ema Viya tépachiacahaviripa eta majacapirahavihi.

³⁴ Tájinaquenepa tímicuñacahavimahi taicha ema Cristo máepeninaha-viripa, tichavaripavare títareca. Puiticha téjacahi te mavaure ema Viya, téchajirucahaviripa éma.

³⁵ Ema Cristo, tájinaquene vahi máinajicaimahi eta máemunasirahavihi. Tásiha, yátupina eta vicasiñairaina éma. Tayanapanepuca vicatajivahi, váhiva-repuca vicuitucahi vétupirica eta víchavaquenevanahi, vicamichahisera máicha. Te vécuhapuca, te vítajihapuca, vahi vicainajirucahini máicha. Te típicararechavianapuca, te típanajiricahavianapuca, te navarahapuca ticapacahavana, váhiquenesera vicainajiruvahini máicha.

³⁶ Te tamutu eta juca, vicuti ena machanerana ema Viya ena táechajisiha-quenena acane eta Sagrada Escritura, ani tacahehi: “Tamutu sácheana ena tícatianacanahi ema Viya titanucahavianahi viti machanerana, navaraha ticapacahaviyare. Tivapinavanahi eta nacapasirahavihi, ticuti ena ticapa-recanahi eta vaca te náichayare eta ichape piesta”.

³⁷⁻³⁹ Váhiquenesera vipicaimahi eta náipicararesirahavianahi. Tétavi-cavahi eta máetumechirahavihi ema Jesucristo táichavenehi eta máemunasi-rahavihi. Tájina vahi tihapapicahavimahi eta véhisirahi éma. Núti nucasíñava ema Víaquenu eta majaneasirahaviya. Tájinaquene ticaerajicahavimahi eta máemunasirahavihi. Vahi étainapucaini eta vicatajivapuca eta vítaresira, étainapucaini eta vépenira, étainapucaini náipicararesirahavipuca puiti juca vítaresiraichaha, étainahipucaini táimipanererechavihini, jácani víchavaque-nevaya eta vítaresiraya. Tájinaquene vahi vipicahini eta típicacareanahi te juca apaquehe, énainapucaini ena ichapemuriqueneana mayeheana ángele ema Váinaraji, étainahipucaini eta náíñehivanahi. ¡Tájinaquene ticaerajica-havimahi mayehe ema Tata taicha yátupihí eta máemunasirahavihi taicha víaváhacahi ema Víaquenu Jesucristo!

9

Ena israelítana, éna manerejiruanahi ema Viya

¹⁻³ Nuparapenaveana, téta vicavahi eta némunasirahi ena nujaneanana israelítana. Eta tacahe, ichape eta náimipanerechiranuhi nucatisamure-hivare, táichavenehi eta namaehisirahi ema Víaquenu Jesucristo. Táetaviucha eta néñamiravahi eta nayehe, nuvarahainehi níjararecavahini nuyanahini núti te jena yuca, apaesa vahi nacuyanahini éna. Énainahini náurihini éna mayehe ema Cristo. (Núti nutupiruva puiti juca numetasirahehi. Ema Espiritu Santo, émaripa téchahi tamutu eta nupanereruanahi. Tímisamanuhi eta nétupirisirahi eta numetasirahehi.)

⁴⁻⁵ Tétaví-cavahi eta náuricarevayarehini éna, taicha manerejiruanahi ema Viya, máichavenehi ema náchucaequenéni Israel, mavarairahi ema

Viya machichanaveanayarehi. Ichapemurihi eta macachaneravacahi, máimechirahi eta majaraiva. Máijaracavaca eta matratune eta majaneasiravacayare. Máimimaticahivare eta mavanairipiana. Máimimaticahivare eta náechajisiraya émachuca te nayujarasirana. Mametacahivare eta máitesirayarehi ema ticatiurahiyare nayehe. Ena nani, tétavicavahi eta táurivahi eta náicuchiyarehini taicha manerejicavacahi ema Viya éna máumurivana-richuhi ema Cristo, najaneanarichuhi eta máucupaisirahi te juca apaquehe. Émasera, Viyahi éma. Puíticha émaripa téchahi tamutu. Máitavacacaipa eta vijirauchirahi. Amén.

⁶ Tayanapane eta macatajisiravacahi ichape ema Viya ena nujaneanana israelítana, tamapurujisera, éna namutuyaréni témepururecavana. Vahi návarahahini náehica. Váhisera étainahini táichahini eta mamaitauchirahi eta matratune ema Viya. Nasapihapa namapuruji namutuyaréni, vahi machichanaveanainahini ema Viya, táichavenehi eta namasuapajiraivanahi.

⁷⁻⁹ Nuvaraha némechahe eta manerejisirahi ema Viya éna apinana machichanaveana ema Abraham. Matiarihíhi ema Ismael, émapa ema Isaac. Ema Viya vahi manerejicahini ema Ismael, máijarasiravacayarehi eta náicuchihi éna mámariequeneana. Macarichu ema Isaac, manerejiruquenehi ema Viya. Eta mametacasihahi ema Abraham eta me Viya, ani tacahehi: “Puiti juca cájeyare, níjaracaviyare píti ésupa esu Sara ema echichayare, ticaijareyare Isaac. Núti níjaracayare eta máicuchiyarehi ema Isaac, énapa éna mámariequeneana” macahepa. Puiti nuvaraha ecaicutiaraya eta juca: Ema Viya máimijarechahi “nuchichanaveana” nacarichuhi éna navaraha najacapayare eta náicuchihi, nasuapirahi eta máijarasiravahi nayehe.

¹⁰ Numetacaheyareva eta táicharacavahi eta macachichairahi ema Isaac ésupa esu mayena Rebeca. Chámeanahi éna náinapureanahi nachichanaveana.

¹¹⁻¹³ Tacahe, vuíchaha náuchuchahini éna nani amuyana, tájinaichahavare napecurainahini, táimaticarepahipucaini eta táuriva eta náichaquene. Te tiánehípa eta suínasirayare, ema Viya mametacapa esu Rebeca, ánipa macahe: “Chámeanayarehi éna pichichanaveana. Émasera ema tínapucayare tiúchuca, éma, mósoyare mayehe ema máti”. Étapaichuhi eta macayemaquenehi ema Viya te Sagrada Escritura, ani macahehi: “Némunacahi ema Jacob, máequenereruhi tiúchuca. Émasera ema Esaú, máinapurehi tiúchuca, vahi núrianaca éma” macahepa. Tacahe puiti, vímatiequenehaipahi eta táicharacavahi eta manerejisiravacahi ema Viya, máichuiravacahivare nácani mavarahaqueneana. Vahi étaparacainahini jácani táurivainahini eta náichaqueneana.

¹⁴ Puiti, vahi ecuimijachahini vahi tétupicava ema Viya eta manerejisiravacahi éna achaneana. Váhiquenesera énéna tácahe.

¹⁵ Ema Viya mametacahivare ema Moisés, ani macahe: “Núti necha mácani nujapanuqueneyare” macahepa.

¹⁶ Tacahe, vahi vámutu vácuticaca eta majapanuirahavi ema Viya máichuirahivarehi. Éma téchahi eta manerejisiravacahi nácani majapanuqueneana máichuhaqueneanayare. Vahi étainahini eta náimijachiravahi tíchuhacareana taicha eta náurivahíji, napamisirahipuca naicha eta táuriqueneana.

¹⁷ Ema Viya ánivare macahehi eta te Sagrada Escritura mayehe ema rey te avasare Egipto: “Núti nunacavihi eta piávacurehi pirreyvayarehi, taicha nímativi eta pímuracasamurevahi. Nuvarahasera núti nímicahivare

eta tamutuirahi nurataha nítupajijiasirava, apaesa táimaticare eta níjare te tamutu eta juca apaquehe” macahepa ema Viya.

18 Tacahe, ema Viya manerejicahi nácani mavarahaqueneanayare máichuha. Máisapahisera ena masupajirairahana tajurucachuchaini eta namuracasamurevahi.

19 Németeaca, áninapapuca ecaheyare éti: “Ene tacahe jácani, ¿tájahapuca tacayema eta vicaviurevahi eta mayehe? Taicha vahi véchavahini eta víchirahi eta tamauriqueneana. Émarichuhinéni tíchahavihi” ecahénapapuca éti.

20 Vahi tacucahe eta epanereruana. ¿Vahi epicahini iácapaemachirahi ema Viya? Eta cachapare mátejisi vahi táuricaímahi tácapaemachahini súcani tépiyacahi: “¿Tájaha tacayema pímpipananajicanu eta pépiyasiranuhi, váhiyapa nuncunachacarehini eta pépiyasiranuhi?” vahi táichaimahi.

21 Esu típuarecarahi, ésu téchinavahi jácani táimahanayare eta suípune, suíchayarehi eta súcarahiyare, tásiha suépiyacavare eta suyehe vásenilla, tac- ahehi eta suvarahaquenehi.

22 Tatuparacahi ema Viya máicuñacavaneya namutu ena achaneana váinarajiqueneana, máimitaéquenehavacavane éna. Tatuparacahivare máimerecavane eta máitupajijiasirava étapa eta masemirahi tayehe eta namaurivahi. Tétavicavahisera eta macayehevahi paciencia.

23 Viti apana, ene tacahehi eta táetaviuchirahi eta majapanuirahavihi, máimerecahi eta táichapeva eta macunachacareva. Acaneripahi eta manereji- sirahavihi eta vicachaneraya éma tayehe eta majaraiva.

24 Vahi vácarichuhini viti israelítana manerejiruhavihi; énerichuhi eti apavasanana manerejiruhehivare.

25-26 Eta Sagrada Escritura májurehi ema víyahaini Oseas, eta máechaji- riruva ema Viya, ema yátupiquenehi eta macasiñacarevahi, ani mac- ahehi: “Núti nunerejicayare níchuhavacayare ena ichapemuriqueneana ena achaneana apavasanana. Tayanapane vahi náesenicanuhini cape eta náitaresirahi, tijacapacareanahisera nuyehe. Ichape eta némunasirava- cayare taicha nuchichanaveanayarehi éna” macahepa.

27 Énaserá ena nujaneanana israelítana, ánimurianarichuhi ena tisuapanahi eta máichuarapi ema Viya. Nacuti éna ánimuriqueneana náechajisihahi ema víyahaini profeta Isaías, ani macahehi: “Tétavicavahinéni visimutuva viti israelítana, ánimurihavirichuchasera viti víuchucuhanayare.

28 Ema Viya, vaipa macamichaimahi eta náejecapiravanahi ena achaneana. Tíjahúchavayarepa eta máicuñasirayare eta apaquehe. Máijahúchayarehi máítaequeneha tamutu”.

29 Ánivare macahehi ema Isaías: “Muracarinehi eta náquipaisirahi eta viávasa. Te tacuijahini eta majapanuirahavihi ema Viya viti vinerejiruanahi véhica éma, vítaequenehini vimutu. Nájina nánasihini te viávasa. Vicutiyaréni ena ticavasanahi te Sodoma, énapa te Gomorra, máítaequeneruanahi ema Viya, ema tétavicava eta máitupajijiasirava, máituruequenehahi tamutu” mac- ahepa ema Isaías.

Ena israelítana, vahi návaraha náehica ema Jesucristo

30 Nuvaraha numetacahe eta juca, apaesa écha. Ena apavasanana nasapi- hahi tijacapacareanahi me Viya, váhinéni náesenicahini éma cape eta náitare- sirahi. Tacarichusera puiti, táichavenehi eta nacasiñavairahi eta mayehe, tijacapacareanaripahi éna.

³¹ Énasera ena nujaneanana, tímijachavanahi tijacapacareanayarehi me Viya táichavenehi eta navarairahi náehica eta vanairipiana. Váhisera najacapacarehini.

³² Taicha éna, náemepururecahi eta najacapacarevayarehini me Viya. Vahi návarahahini nacasiñavahini mayehe ema Machicha Jesús. Éna tímijachavanahi étachucha nacunachivavahi tayehe eta náitauchirahi eta navanesiracacanaahi. Eta tiviuçhahi eta nacatianasirahi muracaquenehi ema Viáquenu Jesús, vahi návarahahini nacasiñavahini eta mayehe.

³³ Ema Viya, eta máechajiriruvana eta Sagrada Escritura, ani macahehi: “Puiti névatacaya ema Nuchicha Cristo nayehe ena israelítana. Nímahaya nájahapuca ticatianacanaya éma, énapa ena ticasíñavanayare eta mayehe. Nácani ticatianacanapuca, énajivayare ticamitiequenehavanayare, ticaicunayareva táicha. Nácansera ticasíñavanayare eta mayehe ema nuvaneruyare, vahi máinjajicavacaimahi” macahepa ema Viya.

10

¹ Nuparapenaveana, tétavicavahi eta néñamiravahi nayehe ena nujaneana israelítana. Eta nuyaseserepi me Viya te nuyujarasirana, nuvarahahi náuchucuhahini.

²⁻³ Nucunachavacahi éna eta náetaviuchirahi eta napicauchirahi ema Viya. Téjcapavanahisera éna eta táicharacavahi eta vijacapacareva me Viya. Éna, tímiuricavanahi tíúrianahi, tímijachavanahi tijacapacareanahi me Viya táichavenehi eta náitauchirahíji eta vanairipiana. Vuíchaha náimatihini eta táicharacavayarehi eta najacapacareva eta nacasiñavairaya me Viya. Váhivare návarahahini nasuapahini.

⁴ Taicha ema Cristo macaepaharipa eta tasuapacarevahi eta viyehi eta mavanairipiana ema Moisés. Vaipa étaparacaina eta viúchucuiraya. Tacarichu eta vicasíñavairahi mayehe éma, vijacapacareyare me Viya.

⁵ Émarichuhi ema Moisés, muracahi eta matuparasirahi ena achaneana, ánipa macahe: “Éti, tapamiruanahi eta ítauchirayarehi tamutu eta vanairipiana. Te yátupipuca ítauchahi tamutu sácheana, te tájinapuca eta éjcapiravainahi, tásiha ejacapacarenapa me Viya” macahepa. Nájinasera náratahahini náitauchahini eta vanairipiana.

⁶⁻⁸ Máejerarepanasera eta vijacapacarevahi me Viya táichavenehi eta vicasíñavaira eta mayehe. Vahi tácomesahini vitanupanahini ema Cristo te anuma, taicha tíucupauchahaviripa éma. Váhivare tácomesahini vitanupanahini te máecari vicaechepupanahini éma, taicha téchepucaripahi éma. Tacamunuhisera eta vicasíñavairaina mayehe ema Cristo te visamureana. Eta vipiarsiraina eta máijare eta víjarasirava eta véhisirayare éma.

Tásiha núti, eta nucametarairuirahi, néchajisihá étachucha eta arairu véhiruhi eta majacapirahavihi ema Viya viti vicasíñavanahi eta mayehe.

⁹⁻¹⁰ Eta juca eta nímiturapi: Eta viúchucuiraya viti achaneana, tacamunuhi eta visuapiraina ema Viya eta macaechepusirahi ema Machicha te máecari. Éma, macaepahayare eta vipecaturana, te yátupina eta vicasíñavairahi te visamure ema Jesucristo. Tacamunuhivare yátupina eta víjarasiravahi véhica éma. Víchayarehi éma: “Núti níjaracavahi néhicavi, Tata Jesús. Pítipa náquenuvihu, péchanupa píti” vicahepa.

¹¹ Eta Sagrada Escritura, ani tacahehi: “Nácani ticasíñavanayare mayehe ema nuvaneruyare, tájina náichiraváimahi. Tamutu tíúriyare eta náitaresira”.

¹² Ema Viya, vahi máepuruimahi nácani ticasíñavanahi mayehe. Ticuti-cacayarehi eta majacapiravaca ena israelítana énapa ena apavasanana, taicha émaichuhi ema Viáquenuhi vimutu. Tétavicava eta majapanuirahavihi, ticuchucuhaviya vimutu viti vicasíñavanahi mayehe.

¹³ Taicha ánivare tacahehi eta Sagrada Escritura: “Ema Viáquenu macuchucuhavacayare namutu nácani tipiaracanahi eta máijare táichavenehi eta nacasiñavairahi mayehe” tacahepa.

¹⁴ Tásiha, eta náuchucuhairayare, tacamunu napiaracaya eta máijare ema Viáquenu táichavenehi eta nacasiñavaira mayehe. Táurivaina eta nasamirahi eta náimitucasivana. Tacahe, tacamunuhivare eta viyana vipaicayare víti te tamutu avasareana eta vicametarairuiraya nayehe éna.

¹⁵ Émaripa ema Viáquenu, ichape eta máichuhairahavihi viti visuapajirahiana, mavaraha eta vicametarairuirayare. Títauchavayare eta tacayemaquene eta Sagrada Escritura, ani tacahehi: “Tétavicavahi eta náurisamurevana ena achaneana eta nasamirahi eta táuriquenehi máichuarapi ema Viya eta majacapiravacaya. Tásiha tiúriyare eta majacapirahavihi viti mavanerunana ema Viya” tacahepa.

¹⁶ Váhiserá námutihini nasuapahini eta juca arairuhi véhiruhi vímitucaquenehi. Ema Isaías, ani macahehi te Sagrada Escritura: “Tata Náquenu, ánimurianarichu ena tisuapanahi eta juca nímiturapiana nuvanahiana piyehe” macahepa.

¹⁷ Téhesera te táurihini nasama ena achaneana eta vímiturapiana mayehe ema Cristo, titupiruvanayarehi ticasíñavana mayehe.

¹⁸⁻¹⁹ Esamanuchaha. Ena nujaneanana israelítana, tájina naviyahini nayunaca eta namacasiñavairahini mayehe ema Cristo. Nasamapa eta máechajiriruvana ema Viya, taicha te tamutu avasareana tismacarepaipa. Eta Sagrada Escritura, ani tacahehi: “Tamuturipahi te juca apaquehe ticasamahuhi. Eta máechajiriruva ema Viya tamuturipahivare tacaitatapahihi te juca taquíñacucujiana te apaquehe” tacahepa. Náimatipavare. Váhivare návarahahini nasuapa. Eta máechajiriruvanahi ema Viya májurehi ema Moisés, ani macahehi: “Ímaha, eti israelítana. Nasapihaya nujacavacayare nuti ena apamuriana achaneana, énaripa ena máesenicanurahanahi. Nuvaraha etsirihaini éti, éneuchavayare eta nuyehe” macahepa.

²⁰ Jararihivare eta apana máechajiriruvahi, májurehi ema víyahaini Isaías, ani macahehi: “Núti nímercavaipa nayehe ena nani váhiquenehi náesenicanuhini, váhivare nacayaseseruruhini”.

²¹ Ánivare macahe ema Viya: “Tamutuhi sácheana eta níchuiravacahi ena nani israelítana. Tétavicavahiserá eta namasuapajiravahi. Vahi návarahahini nachavahini eta nuyehe” macahepa.

11

Ánimurianarichu ena israelítana ena tisuapajirahianahi, macuchucureanayare ema Viya

¹ Esamanuchaha. Nuvaraha vahi ecuimijachaimahi macaerajicavacahipuca ema Viya ena machanerana israelítana. ¡Váhiquene énéna tácahe! Éti ímatinuhi nútirichuhi israelítanuhi, mámaríquenenuhivare ema Abraham, émapa ema apanavare náchuca Benjamín.

² Eta acane, tétavicavahi eta máemunasirahavihi ema Viya viti israelítana. Puíticha vahi máinajiacahavihini. Échava éti eta tacayemahi eta Sagrada Escritura eta máichavaquenevahi ema víyahaini profeta Elías. Ani tacahehi eta mametauresiravahi me Viya eta mayujarasirahi:

³ “Tátachicha Nucaiyaquene, ena nani apamuriana nujaneanana israelítana nacapapajicavacahi namutu ena piyeheana profetana nuchamuriana. Puiti navarahahivare ticapacanuana. Navetataicaipavare eta pipena. Nucarinehi núti nítarecahi puiti” macahepa.

⁴ Tásiha, ema Viya majicapapa, ánipa macahe: “Vahi picarichuhini píti. Nararihi siete mil ena ajairana nujanearuanahi, ticasíñanuanahi. Vahi náisapavahini éna náepuyumirauchahini ema nasiñaraji Baál ena masuapajirairahanatatajihi” macahepa ema Viya.

⁵ Ene vicahehi viti, vahi vámutuhini viti israelítana masuapajirairahanahi me Viya. Vitiarihichaha ánimurihavihi viti manerejiruanahi majapanuque-nehavihi.

⁶ Numetacahe: Ema Viya, eta majapanuirahavihi viti israelítana, váhiquene táichavenénahini jácani víchirainahipucaini eta táuriqueneana. Jéhesare, tijapanuhavihi táichavenehi eta táetaviuchirahi eta máemunasirahavihi. Tájina étapacacaina eta víchirapuca eta táuriqueneana.

⁷ Tacahe, vímaha puiti ena nujaneanana, ánimurianarichuhi ena ticasíñanvanahi me Cristo, manerejiruanahi majacapaqueneana. Énasamisera ena apamuriana, vahi nacasiñavahini mayehe, muracanaichucha te nasamureana. Étapa tivichahi vahi tijacapacareanaimahi me Viya, tayanapane nácani navarahahi.

⁸ Títauchavapahi eta táechajiriruvahi eta Sagrada Escritura eta nayehe. Émarichuhi ema Viya ticamitiscavacahi apaesa vahi nacucaicutiara eta máimiturapiana ema Cristo. Puíticha ene nacahehi.

⁹ Ema víyahaini David, ánivare macahehi tayehe eta Sagrada Escritura: “Ena nani, ticasíñavavaicana eta tavayuchirahi eta náimahaqueneana. Ichapemurihi eta nacapiestarairana náenisiracacana. Ichapevaresera eta náichirahi eta tauriqueneana. Puiti, Tátachicha, pítsivachayare eta náurisamurevahi. Járjapainapa eta pícuñasiravacayare.

¹⁰ Nuvaraha púchuquianaina pícha. Vahi nacucaicutiara eta náitaresira. Tacaetipapaicainapa eta tajitacareva eta napisirahi. Tájina nanarasiraimahi” macahehi ema David.

Eta majacpirahi ema Viya ena apanapanenejiqueneana

¹¹ Esamanuchaha. Nuvaraha vahi ecuímijacha tanasiyarehi eta náquipairahi ena nujaneanana. ¡Váhiquene énéna tácahe! Puítisera nasapiha ena apavasanana najacapacarehi me Viya, taicha mavaraha máimicatsiria-cavaca ena israelítana, apaesa náeneuchavayare eta mayehe.

¹² Puiti tijacapacareanahi me Viya namuturipa ena apanapaneneji-queneana achaneana te juca apaquehe, taicha eta náquipaisiravaipa ena nujaneanana. Puiti eti apavasanana, tétavicavahi eta iúricacarevaipa. Jéhesare tiápajucavapanayaresera eta iúricacarevaya éti, étapa eta náuricacarevayare éna, te nachavapa náeneuchava.

¹³ Németeaca ímatinuhi núti eta nucatuparahairapa eta nímitusiraheyare eti apavasanana. Táitusiava puiti tétavicavahi eta nucunachiravahi eta nucaemataneasirahehi.

14 Numetacavacahi ena nujaneanana eta yátupirahi eta ejacapacareirahi me Viya, apaesa nímahahini éna, te najamurachayarepuca eta najacapacarevahi éna apanava, ticutiheanayarepuca éti. Nuvaraha nanerejicavahini nácani náneuchavahini, apaesa náuchucuhayare.

15 Páureanasami éna eta náquipaisirahi. Esapihahi éti apanapaneneji-queneana te juca apaquehe, tétavicavahi táuriva eta ejacapacarevahi me Viya. Jéhesaresera, tétavicavapaini eta tajaraivainahini te visamure te nachavirainahini, náneuchavapaini éna, náehicapaini ema Cristo. Tímicutijiricavapaini eta navayuchirahi eta náurisamureva ena achaneana te macaechepusiravacaya namutu ena náepenaqueneana tíurianahi.

16 Eta natiarahirapa puiti ena nujaneanana tinerejicavanahi téhicana ema Cristo, németeaca namutuyare jácani náehicayare ena apamuriana.

Tacutiquene, viti machaneranahi ema Viya vicuti eta ichape yucuqui. Ema Abraham macutihi eta táquehequi. Viti israelítana mámariequeneanaini vicutihi eta tatavavajiana. Ema viáchucaini majacapaqueneripa ema Viya. Tásiha, németeaca namutuyaréni ena nujaneanana, énerichuvare náneuchavapapucaini nacasiñavahini me Viya te jácani sácheyare, apaesa najacapacarevarepaini éna apanava.

17 Puiti ena nujaneanana náquipairuvahi, vuíchaha nasiapahini eta náicuchihi te namuri ena machaneranahi ema Viya. Étipa eti apavasanana, esapihaipa machaneraheripa ema Viya. Tíjaracaheripa éma eta táuricacarequene iávihayarehini te majaraivahi eta náicuchinihi ena israelítana.

18 Puiti étipavaipahi machanerahehi ema Viya. Nutuparacahesera, vahi ecucasiñavaica eta ítujisiravahi esiapa tayehe eta náicuchihi ena nujaneanana israelítana. Taicha vahi ecachuriacavacaimahi éna eta iúrivahinéni eta ejacapacarevahi me Viya. Vahi ecuemitísica eta esiapirahi táichahi eta náquipaisiravahi ena masuapajirairahana. Éti máetumechaqueneana ema Viya; vahi étina étumechahini éma.

19 Váhivaresera ecupanerecha te esamureana: “Yátupi éna máquijicavacahi ema Viya eta namasuapajiraivahi. Tásiha, tinerejicahavipa víti, taicha viúripanahi víti eta máimairahavihi ema Viya” váhinéni tácahehini eta epanereru.

20 Tacahe, échapava éti apanava, machu ácutiriana ena nujaneanana. Éna, eta náquipaisiravahi tímicutijiricahi ticaechuanahi, táichavenehi eta namacasiñavairahi me Viya. Puiti étipa náitsivahi éna eta ecasiñavairahi mayehe. Váhiserá ecucasiñavaica. Ecuneuchava éti apanava. Epicaucha ema Viya.

21 Ena nujaneanana israelítana, éna títapucanayarehíni nasiapamuriha ena machanerana ema Viya. Váhiserá nacasiñavahini eta mayehe. Éti apanava, tacamunuhivare ecasiñava eta mayehe apaesa esiapahini.

22 Tacahe, ticaecheravapa eta máurivahi ema Viya, étapa eta matupiruvahi. Tétavicavahi eta matupiruvairahi eta náerajisiravacahi ena masuapajirairahana. Tétavicavahivare eta máurivahi eta eyehe, eta ímianiravahi eta ecasiñavairahi eta máurivahi. Nácaniserá vahi nacasiñaimahi, macaerajicavacayare.

23 Tiuri puiti, te náneuchavapuca me Viya ena nujaneanana, nacasiñavahivarepuca mayehe, éma majacapavacayarehi éna, machichanaveanavarepa. Taicha éma, tétavicavahi eta majapanuirahi.

²⁴ Taicha éti cape juca eta ítasesira, énerichuvare masuapajirairahéhi éti, emaesenisirahi ema Viya, tásiha, tájinahinéni ejacapacarevainahini. Esapihasera éti esiapamuriharipa ena apamuriana machanerana hi ema Viya. Ene nacaheyarehi ena israelítana. Éna, te náesenicapa ema Viya, camuriqueneanayarehi ena ticasíñavanaya mayehe. Tisiapanayareva tayehe eta náicuchihi.

Te namutupa ena apavasanana manerejiruanahi ema Viya, tapaenu-mavainapa náesenicayare ema Viya ena israelítana

²⁵ Tiuri puiti, nuparapenaveana, vahi nuvaraha ecasiñavavaica eta ítupajijiasirava. Tásiha, nuvaraha numetacahe eta juca tayumurevainihi, máimimatichaquenénuhisera ema Viya. Eta namuracasamurevavacahi ena nujaneanana, vahi tánasimahi. Téhesera námutupa nasiapa ena apavasanana manerejiruanahi ema Viya, napaenumavainapa ena nujaneanana náesenicayare ema Viya.

²⁶ Tacahe, eta nacasiñavaira me Viya, tiúchucuhanayare namutu éna. Títauchavayare eta máechajiriruvahi ema Viya te Sagrada Escritura, ani macahehi: “Nuvanecayare ema Ticatiurahiyare nayehe ena achaneana. Ticavacureyarehi te Jerusalén. Masipahacavacayare ena majaneanana israelítana eta navainarajivana, máitsivachirayareva eta náitasesirana.

²⁷ Núti nátauchayare eta nutratunehi nayehe eta népachiasiravacayare namutu eta napecaturana” macahepa.

²⁸ Tacahe, ena nujaneanana nacatianacapa puiti eta juca véhiruhi. Étasarepa ítujisiavayare éti. Émasera ema Viya máemunacavacarichucha, taicha manerejiruanahi ena náchucanaveanaini.

²⁹ Taicha ema Viya, tamutu eta máijararuanahi, vahi máemepururecaimahi. Máítauchayarehiva tamutu eta máichuarapiana.

³⁰ Éti acane eta ítasesirana, vahi ávarahahini esuapahini ema Viya. Puítisera eta namasuapajirairavahi ena israelítana, ichaperipahi eta majapanuirahéhi éma.

³¹ Énerichuvare éna, te jena sácheyare, majapanuvacayarehi éna, tacuti eta majapanuirahéhi éti puiti.

³² Taicha ema Viya máimatihí eta emutuirahi emasuapajirairavahi éti apavasanana, vítipa víti israelítana. Mavarahasera vicuticacayarehi eta majapanuirahavíhi vimutu.

³³ Ema Viya, ¡tétavicavahi eta majapanuraivahi eta viyehe, tavayuchahi eta viúricacarevahi máicha! ¡Tétavicavahivare eta máitupajijiasiravahi! ¡Tétavicavahivare eta macachuriasirahavíhi eta máimatiequenehairahi tamutu! ¡Matupiruvahi éma tamutu eta manerejirisirahi! ¡Vahi víturuequenehaimahi vicaicutiara eta mapanereruana!

³⁴ Taicha nájina tímatiequenehaimahi eta mapanereruana. Nájinavare náimitucahíni éma.

³⁵ Nájinavare náijaracasichahíni tájaháinahipucáini, étanainahipucáini máitsiríjicavacahipucáini eta máijarasirahi éma.

³⁶ Taicha tamutu eta tatiarihiqueneanahi, tacarichu tásihaqueneanahi mayehe, étaripa eta víjararuanahi mayehe, mavaraha táítauchavapaini eta mapanereruanahi táuriqueneanahi. ¡Máitavacacahi eta vicunachirahi éma! Amén.

12

Vicatuparahahi yátupina víjaracava eta véhisira ema Viya

¹ Tacache, nuparapenaveana, nuvaraha ácaicutiara yátupina eta majapanuirahahi ema Viya. Eta táetaviuchirahi eta majapanuirahahi, ecaturarahahi íjaracava yátupina eta íáqueheana étapa eta íáchanevana eta éhisiraina émainachucha ema Jesucristo. Tacutihi eta íámavahuhi me Viya. Jéhesare, tétaví-cavaya eta ecurisamurechiraya éma tayehe tamutu eta ecaemataneasirana éma.

² Énerichuvare eta ítaresirana, vaipa ecuehica eta tayeherépi eta juca apaquehe. Ítsivachapasera eta epanereruana, apaesa támutupa apanainahi eta ítaresiraina. Tásiha, ímatisarepa eta mavarahaqueneanahi ema Viya, ítucayareva icha eta táuriqueneana. Ecurisamurechayare éma eta íchira eta tatupiruvaqueanahi.

³ Núti mayehenuhi apóstole ema Viya. Tituparacanuhi numetacaheyare: Emutu éti, tátupiruva eta epanereruana tayehe eta ítucaqueneana máíjararuheanahi ema Viya, apaesa tauri eta ecaemataneasiraina mayehe. Nacuija nacasiñavavaica.

⁴ Tacutihi eta víáquehe viti achaneana. Camurianahi eta táunavanahi, táemataneapachuhivare. Vahi étainarichuhini eta táitucaqueneanahi.

⁵ Ene vicahehi víti. Camurihavihi, étanaichuhisera eta víáquehehi eta víúrujasiracacahi eta véhisirahi ema Cristo, vímicatacairahi eta vicaemataneasirahi éma.

⁶ Ema Viya, apanapanenejihi eta vítucaqueneana eta máíjarasirahavihi eta vémataneapachuyarehi máicha. Tacamunuhisera vahi vicuemepururecava eta vítucaqueneanahi máíjararuhavianahi, apaesa táuri eta vicaemataneasiraya. Te tíjaracahavipuca éma eta vítusirayare vicametarairu, vijaneacavainapa, machu vihapapiricahini eta táimiturapiana eta véhiruhi.

⁷ Te tíjaracahavipuca eta vítusirayare vímicataca ena vichamuriana, tatupiruvayarehi te visamure eta vímicatasiravacaya. Nácani náitucachi tímiturecana, vahi nayacujimahi eta náimituresiraya.

⁸ Nácani náituruequenehahi eta náetumechiraya nácani apana, váhivare nayacujimahi. Nácani tíjaracasírecanahi eta náimahaqueneana, tátupiruvayarehi te nasamure eta nacajirahi ena ticamunuvanahi. Nácani cátiparahahanahi téchapajiricarahanayare, tivapinavanayare eta náitauchirahi eta natuparacasivahi. Nácani tímicatacanahi ena tijapanucareanahi, tíúrisamureanaya eta náimicataresir ahi.

Eta víúrivahi nayehe ena achaneana ticaecherayare eta yátupirahi eta véhisirahi ema Víáquenu Jesucristo

⁹ Nuparapenaveana, yátupina eta émunasiracacaina ena echamuriana. Vahi apimirahe mahi, ímijachava eta émunasiracaca. Evapinavaya eta íchira eta táuriqueneana. Épuruyare eta tamauriqueneana.

¹⁰ Tíápajucavainapa eta émunajirisiracacaina eta echamuricacairahi. Ecnachainapa namutu ena echamuriana. Yátupina eta epicauchiracacahi.

¹¹ Étumechavaina eta ecaemataneasirahi ema Víáquenu. Tavapinava eta esamureana. Tacuija eplujuvavacaina.

¹² Íúrisamureacavayare eta ejaçapiraya eta ecuchapaquenehi. Ecayeheyare paciencia tayehe eta ecatajivairana. Vahi tacuechuquiha eta eyujarasirana.

13 Ímicatajiricaca ena echamuriana, tayehe eta nacamunuiravana. Tiúriyare eta ejacapiracaca te epaiiuchacaca.

14 Te natarihinapuca nácani náehahe, napanajiricahepuca, eJapanuyare éna. Eyaseuchaya me Viya eta náuricacarevaina. Váhisera ecuyaseucha jácani náicuñavanéna.

15 Te tatiarihinapuca jácani tiúrisamurecare nayehe nácani, éti apanava iúrisamureyareva. Téhesera te tatiarihinapuca eta ticatisamurecarehi nayehe nácani, eJapanuvacayare éna, íyahayareva éti apana.

16 Ecurisamurechacacaya ena echamuriana. Vahi ecucasiñavairica. Ácuticacahi nayehe ena mánsuanahi, váhivare ecucasiñava eta ítusirahi.

17 Te tatiarihinapuca náicharacahe eta nacatichirahe, vahi ecuitsicava. Íchayaresera eta jácani táuriqueneanahi nayehe namutu ena achaneana.

18 Nacuija ecucatica. Te natarihinapuca nacatianacahe eyanauchayare te napena émemunacavayare apaesa vaipa nacucaticaha.

19 Némunarugueneana, te tájahapuca náicharacahe, vahi ecuitsicava. Cápachi mararihi ema Viya, máimahainepa éma téchayare eta náicuñayare. Taicha ema Viáquenu, aní macahehi tayehe eta Sagrada Escritura: “Nímahainepa núti eta táitsivayare. Núti néchahi eta náicuñayare ena ticaviurevanahi eyehe” macahepa.

20 Ánivare macahe éma: “Te pímaha máecuhapahi mácani ticatianacavihi, péncayare. Te mamaunepahipuca, pésicayare. Eta máimairainahi eta pémunasirahi, ticatisamurevainapa tísirihainapa” macahepa.

21 Vahi ecuisapava ítsicava eta náichiraheya te táíñehiqueneana. Étumechavasera eta íchiraya eta táuriqueneana. Éta ticaepahayare eta nasemaneva.

13

1 Éti, emutu esuapajirahiyare nayehe ena tuparairucana, taicha éna manacaqueneanahi ema Viya eta návacureanahi. Nájina émanaina máemunasiricavahini.

2 Eta tacahe, nácani tiácapauchavanahi nayehe ena tuparairucana, tímucitijiricavahi nácapaemachahivare ema Viya. Jéhesare, ticaicuñanayarehi ena téjecapavanaripahi.

3 Taicha ena tuparairucana, vahi étaina tuminacavacahi éna eta náipicarare-siraya nácani tichanahi eta táuriqueneana. Nácanisera ticaviurevanahi, táuricahi tipicanayarehi. Te evarahhipuca iúri nayehe, esuapajirahiya nayehe, tásiha, éna ticunachaheanainapa.

4 Taicha ema Viya, émahí macaejacavaca te návacureanahi, náurichayarehi ena achaneana. Téhesera ecaviurevahi, epicayarehi taicha éna vahi támapurujimahi eta nacatuparahairahi. Natuparacasivahi me Viya eta náicuñasirayare ena ticaviurevana.

5 Eta tacahe, tavarahaichu esuapajirahiyare nayehe ena tuparairucana, apaesa vahi nacuicuñacahe. Tavetijipa esuapajirahiyare taicha éti etuparacasivahi me Viya.

6 Tacutiquene tatuparacahehi eta evachachirayare eta impuesto. Taicha ena tuparairucana, natuparacasivaichuhi mayehe ema Viya, náitauchiraya eta nacaemataneasira éma.

7 Tásiha, ítaurahiyare te jácani nayaseasiraheana eta cuota éta eta nayaseasiraheana eta impuesto. Epicauchavare nácani tipicauchacareanahi. Émunacavare nácani témunacacareanahi.

⁸ Nacuija ecantevéya. Tituparacahe evachachavaneyare jácani entévehi nayehe. Tituparacahevare émunacacayare ena echamuriana. Nácani títauchanahi eta juca náemunasira, náitauchahi eta mavanairipi ema Viya.

⁹⁻¹⁰ Te pémunarahihi píti nayehe ena achaneana piparaepiyanaahi ticuti-yarehi eta pémunasiravahi píti, vahi pipanerechaimahi picapinaru, váhivare picaparecaimahi, váhivare piámerecaimahi, váhivare pivehaimahi esu apana esena mayena ema apana achane, váhivare pépiyaéquenerecaimahi. Taicha nácani témunarahanahi, vahi nacaetemaimahi ena naparaepiyana. Te yátupi eta émunaravaya, máejerare eta ítauchirayare tamutu eta vanairipiana.

¹¹ Eta tacaheyare eta ítaesirayare. Vaipa véjekaracha eta sácheana. Vahi vímacacaracavaimahi. Vitsecavayarehisera taicha viánehipaicha eta jena sácheare eta máitecapiraya ema véhiruhi.

¹² Eta vicuchapiraipa eta machavirayare ema Viáquenu, tacutihi te vicuchapaipa te jena yati eta tijararahi. Puiti vímahapa eta tajarahiquene. Tásiha, ínjicapa eta íchaqueneanaini te timapicu. Puiti tíapajucavasera eta iúrivana, étapa eta íchaqueneanaina te tijarahi.

¹³ Ímicapicauchavayare eta ítaesirana. Iúrisiyare tamutu sácheana. Vahi ecavahaimahi. Váhivare ímisiapavaimahi nayehe ena ticapiestaranahi. Váhivare túhusihémahi. Vahi tivayuacahémahi eta tájiparacana. Vaipa iúmeharerecaimahi, váhivare ecapinarurahimahi.

¹⁴ Tásihasera, ímerea eta iúrivaina. Ácuti ema Viáquenu Jesucristo eta máurivahi éma. Vaipa ecusuapa eta tajamurachaqueneanahi eta iáqueheana. Váhivare ecupanerecha eta íchiraya éta.

14

Vahi ecucaecahi ena echamuriana

¹ Te napauchahépuca nácani navarahahi tisiapamurihaheana, echamurianayare, vahi ecuepuruvaca. Ejamanuvacasera eta ejacapiraya. Te jácani apaesarichuhi eta nacasiñavairahi mayehe ema Viáquenu, napicauchaichaha eta nayeherepiana ichasiana, vahi ecucaapaemachahini éna.

²⁻³ Nararihi ena títuca nanica tamutu eta tinicacareanahi. Nararihivare ena apanahi eta nayeherepi, náimijachahi vahi tiuri nanica eta vaca. Tásiha, máechejirechucha eta nanica. Éna, vuíchaha muracanainahichaini tayehe eta véhiruhi. Eti ítuca enica tamutu, vahi ecuepuruvaca éna vahi tinicanahi eta vaca. Étipa eti máechejirehi eta enica, váhivare ecuepuruvaca ena tinicanahi tamutu. Taicha majacapaquenehevacaipahi ema Viya emutu.

⁴ Vahi ecuimijachavaimahi étinahi échavaca eyaseseracarahi ena machaneranahi ema Viya. Éna, téchavacahi ena mavanaranahi. Máimararacahi eta táurivahi náicha, macunachavacahi éna. Te váhipuca, émainahi techa eta máemechiravacaya.

⁵ Tacutiquene váhivare ecuepurucaca tayehe eta sache iúrujisiravana eyujarasirana. Nararihi náimijachahi tíuripana te sávarumuhuana. Nararihivare tíuripanaahi nasama te lumincumuhuana. Nararihivare tamutuchucha sácheana tíurihí eta náimairahi. Étipa échinava eta sache éhiruyare.

⁶ Nácani tíyujaracavanahi te jena sache, ena navarahahi napicaucha ema Viáquenu. Ena apamuriana, vahi tácamesahini nanerejicahini eta sache, éna apanava napicauchahi ema Viáquenu. Ena nacahehi nácani tamutuchucha nanicahi, eta napicauchirahi ema Viáquenu, nahasulupayachahi

éma. Nácanisera náepuruhi nanica eta jácani tinicacareana, táichavenehivare eta napicauchirahi ema Viya, nahasulupayachavare éma. Tamutuhi tiuri naicha.

⁷⁻⁸ Taicha vahi vítijiruváinahini eta vítaresira. Émaripa téchahavihi ema Viáquenu. Émachucha vicaematanearuhi, visuapirayarehi éma te tamutu. Étaripa eta vépenirapuca, váhivare vítijiruváinahini véchinavahini. Émarichuhi téchahavhivare te tamutu.

⁹ Ema Jesucristo, tatuparacahi eta máepeninahaviyarehi, tíapechavayarehivare tichava títareca, apaesa émainapa Viáquenuya viti vítareruaichaha, énapa ena náepenaqueneanaripa.

¹⁰ Étisera, vahi étinahini tátuparacahehini échavaca eyaseserecarahi ena echamuriana. Váhivare étupicavahini eta épurujirisiracacahi. Échavarichu eta vimutuirayare vicayaseserehi te mamirahu ema Viáquenu Jesucristo.

¹¹ Ema Viáquenu, ani macahehi te Sagrada Escritura: “Núti acaneripahi eta nítaresirahi; puíticha máepenacacanhivare eta nutiarihirayare. Tásiha, nútirichu nucatuparahahi nuyaseserecavacayare namutu ena achaneana. Namutu tépuyumirauchanuanayare te numirahu. Tímatinuanayare eta yátupirahi núti tituparacanu júesnuhi nayehe, nuti Iáquenu” macahepa.

¹² Tacahe, vimutu émanapachuhaviya vimetaurecava mayehe ema Viya. Éma máimatiya tamutu. Tájina virataha viyumurucahini.

Vahi ecuimiaquipaica ena echamuriana

¹³ Tásiha éti, vaipa ímijachavaimahi étinahí échavaca, eyaseserecarahi ena echamuriana. Táurisera eta ecachanéracacaina. Tasapihasera, te tamutu jácani íchaqueneana, étaviuchaya eta iúrivahi nayehe. Tacuija jácani táimiaqui-paicavaca éna ícha.

¹⁴ Núti, eta mavanaranuirahi ema Jesucristo, numetacahe: Tájina eta tinicacareana tamaeperajichavimahi eta vinisirahi. Nararihiserá ena vichamuriana, tépuruana eta jácani tinicacareana, napsirahi eta tamaeperajisravacayarehíji.

¹⁵ Tásiha, nuconsejachahe: Vahi ecuimiyusemaca ena nani, váhivare ecuacapaemachahini tayehe eta jácani tinicacare, machu ímicainajiruchavaca ena echamuriana mavachareruanahi ema Cristo eta máepenirahi.

¹⁶ Máchuvare émechajisiava tayehe eta ímatiquenehi tiúri.

¹⁷ Taicha eta véhiruhi ema Viya, vahi étaparacaina jácani vinicaquene-repiana, véraqueneana. Étaripa eta ticunachacarehi mayehe, eta víchirapaipa eta táuriqueneana, navetijiva nayehe ena vichamuriana. Mavarahahivare vítucavahini tájina tahapapiracahini eta vicurujisiracacahi, apaesa táimiyanavaini eta víúrisamureva vimutu, maicha ema Espíritu Santo.

¹⁸ Éti, te yátupina eta émunasiravacahi ena echamuriana tépuruanahi eta jácani tinicacare, tiúriyare eta ecaemataneasiraya ema Cristo. Tétavichavahi eta ecurisamurechirahi ema Viya, ecunachacarehivare nayehe ena achaneana.

¹⁹ Tacahe, vitanucayare eta víúrivaya nayehe ena vichamuriana, apaesa vétumechacaca tayehe eta véhiruhi.

²⁰ Vaipa iácapaemachacacaimahi tayehe eta jácani tinicacare. Váipavare ecuiputsicacaimahi, machu émitiaca eta echamuricacairahi eti majaneauruanahi ema Viya. Yátupiquene eta táurivahi tamutu eta tinicacare. Tájina

táimanéna. Énasera nácani tépuruanahi jácani tinicacare, te nanicapuca, ticauyayacare táimiaquipaica tayehe eta pecatu.

²¹ Tiúripañaichu vahí ecunica eta vaca, váhivare ecuera eta cátsiama, machu étaina táimiaquipaicapuca ena echamuriana tayehe eta pecatu, máchuvare nacainajiruva eta véhiruhi.

²² Éti, yátupihí eta esuapirahí ema Viya tayehe eta tinicacareana. Ejanea-cavasera te mamirahu éma. Tétavicava eta náuricacareva nácani náimatihí eta náurivahí te nasamure, vahí nacaecahirahihini énajivainahini.

²³ Nácanisera tísapavanahi tinicana, tiávamirahuanahi, énajivapa tímiaquipai-cavanahi eta nanisirahí, taicha vahí tátupiruvahini eta nanisirahí. Tamutu jácani vahí tátupiruvahi eta visamure eta víchira, pecatuanahi éta.

15

Ecurisamurechaya ena eparaepiyana. Vahí étijiricavaimahi ecaurisamurechava.

¹ Tacahe, viti vímatianahi eta táurivahí eta vinisirahí eta jácani tinicacareana, tituparacahaviripa véchapajiricavacaya ena vichamuriana tímijachanahi vahí táurihini eta nanisirapuca. Vácayehe paciencia nayehe. Vaipa vipanerechahini étachucha vicurisamurechirava vítijiricáva.

² Emutuchuchasera éti, ecurisamurechaya ena eparaepiyana. Éñamava éti eta náuricacarevayare, apaesa tápajucavapaipa eta nasuapiraina eta véhiruhi.

³ Taicha ema Cristo, vahí mácarichuhini macurisamurechavahini. Éma, ticurisamurechahí ema Maiya te tamutu. Eta tacahe, nacatianacahí ena achaneana váinarajiqueneana. Tásiha, títauchavahí eta tametarapí eta Sagrada Escritura, aní tacahehi: “Núti nímiyanavahí eta nítauchirahí eta pivanairipiana eta nuyehe, tayanapane eta náumehairanuanahi ena piánaranahi” tacahepa eta Sagrada Escritura.

⁴ Ema Viya tivanecahí ena víyarahanaini profetana nájuchahí eta máechajiriruvana te Sagrada Escritura. Éta, ticamapuravacareyarehí eta táimitusirahiviyarehí, apaesa táetumechahavi eta véhisira, tacurisamurechahivnavare. Tímitucahivihivare yátupina eta vicasiñava me Viya eta máijarasiraparaca eta viúricacarevaya.

⁵ Puiti nuvaraha máijaracahéhini ema Viya eta evarairahí ecutiya ema Jesucristo eta mapanereruana, étaripa vahí mácarichuhini macurisamurechavahini. Ema Viya máetumechahehí emutu, macurisamurechahevaréni te jácani íchararacavanapuca, apaesa táuri eta ecachanecacaira.

⁶ Nuvarahavare ácuticacahini eta epanereru. Tásiha, te iúrujisiravana, étanainarichuhini eta iáhuana eta ecunachirayare ema Viya, Macaiyaquene ema Viáquenu Jesucristo.

Éma Pablo ticatuparahahi ticametarairuyare nayehe ena apavasanana

⁷ Tacahe, nuparapenaveana, ejacapacacayare eti echamuricacanahi, apaesa macunachacarehí ema Viya nayehe namutu ena achaneana. Ecutiya ema Viáquenu Jesucristo eta majacapirahavihí viti.

⁸ Écharichuhivare eta máucupaisirahí éma te juca. Tétavicavahí eta mamansuvahí eta máimitusiravacahí ena majaneanana israelítana. Mavarahahi máimimatichavaca éna eta máitauravahí ema Viya tamutu eta máechajiriruvana máijararuvanahi nayehe ena viáchucanaveanaini. Váhiquene tivayurahi.

⁹ Énerichuvare máimimaticahahi ena apavasanana eta majapanuiravacahi ema Viya apaesa nacunachayarehi éna apanava éma. Títauchavayarehi eta máechajiriruvahi ema Cristo eta Sagrada Escritura, ani macahehi: “Puiti núti, énapa ena nuchaneranahi apavasanana vicuticacahi eta vicunachiravihi, píti Tata, vijirauchiravihi eta vipicauchiravihi”.

¹⁰ Te apana Escritura, ánvire tacahe: “Eti apavasanana, étipa eti israelítana, étamurihépa ecuticacainapa eta iúrisamurevaya me Viya”.

¹¹ Te apanavare Escritura, ánvire tacahe: “Étamurihénapa eta ecunachirahi ema Viya, eti apavasaqueneanahi. Váhivare ínajicahini eta ecunachiraya éma”.

¹² Eta májurehi ema víyarahaini Isaías te Sagrada Escritura, ánvire tacahe: “Tíjahúchavainapa ema Cristo, te nájina nacuchapaimahi. Éma, aquenu-cayare nayehe ena apavasanana. Macarichuyare éma ticasíñavanayare mayehe, eta nacuneraya éma” tacahepa.

¹³ Ema Viya, tétavicavahi eta macunecarevahi, ticasíñacarehivare. Tásiha puiti, tétavicavahi eta nuvarairahi májjaracahéni éti eta tavayuchiraina eta iúrisamurevaina, tavayuchirainavare eta ecasiñaira mayehe, apaesa tanaracaina tamutu eta epanereruana. Eta mávahásirahehi ema Espiritu Santo, máetumechahéni muraca apaesa táetaviuchiravaya eta ecasiñavai-rayare mayehe ema Viya eta májjarasiraparaca eta iúricacarevaya.

¹⁴ Tiuri puiti, némunaruqueneana nuparapenaveana, nucasiñavahi núti eta eyehe, eta étaviuchiraipa eta iúriwa étapa eta ímatiequenehairahi tamutu eta máimiturapiana ema Viáquenu. Yátupihivare ítucahi econsejachaca.

¹⁵ Nucasiñahéhivare eyehe puiti juca eta níjarasirava nucajurehe eta juca nucartane étapa eta juca táechajisihagueneanahi, apaesa vahi ecuemitísica, taicha nutuparahahi me Viya eta nujaneasiraheya eti apavasanana.

¹⁶ Éma, tituparacanuhi eta nuyanirayare nupaipica te tamutu avasareana, nucametarairuiraya nayehe namutu ena achaneana eta najacapacareipahi me Viya eta nacasiñavairahi eta mayehe. Tituparacanuhiare eta nujaneasi-raheyare emutu eti esuapanahi éma. Tásiha, nuvaraha núti nímerecaheya te mamirahu ema Viya te jena sache ticutiyarehi námavahuhe. Éma tíúrisamu-rénapa eta majacapiraheya, taicha máepachiaruhéipahi ema Espiritu Santo.

¹⁷ Eta mavanaranuirahi ema Jesucristo, nucunachava eta nucaematanea-sirahi ema Viya.

¹⁸ Váhisera nucasiñavaimahi, nucuneuchavaimahi tayehe eta jácani nacaemataneasiranahi ena apamuriana mavanarana. Nútisera nítauchahi eta nucatuparahairahi me Cristo eta nímicatichiravacahi ena apavasanana eta nasuapirahi ema Viya, náehisirapaipahi eta nímiturapíhi étapa eta núrivahi eta nayehe.

¹⁹ Nímechavacahi ichape eta tiáramicareana eta nítapajjiasirava maicha ema Espiritu Santo. Tacahehi eta nítauchirahi tamutu eta nucametarairuirahi eta máimiturapiana ema Jesucristo. Tamutuhi nupaica, népanavahi te Jerusalén, níchecuhapa tayehe eta departamento Ilírico.

²⁰ Taicha ichape eta nuvarairahi nítecapauchaya tamutu avasare, te jácani nájinaichaha nacametarairuhini. Nuvarahaya nucametariruyare nayehe ena achaneana tájinahi nasamihahini eta májare ema Cristo.

²¹ Nítauchahi eta táechajiriruvahi eta Sagrada Escritura, ani tacahehi: “Náechapa puiti eta májare ema Cristo ena achaneana tájinaquenehi apaesai-

nahini nasamairiricahini eta máijare. Náimatiequenehapa eta máimiturapi, éna eta namaitucaquenehi namasamaquenehivare” tacahepa.

Em a Pablo mapanerechapa tìyanayare te Roma

²²⁻²³ Ichapemurihi eta áñoana nuvarairahi nupai piuchahe éti, nucachaneheya apaesaina. Váhisera nítujicava, taicha eta nupai piuchirapahi eta apana avasareana. Puítisera nítauchapa eta nupaisirahi tayehe eta avasareana.

²⁴ Tásiha, puiti nupanerechahi nétavauchaheyare achichu juca, nuyaniraya te avasare España. Nuvaraha vicaurismurechacacainapa. Te támutupa eta nucachaneraheya eta nétavauchiraheyare, németeaca ímicatacanuyare jácani eta nuyanirayareva.

²⁵ Nuyananimayaresera te Jerusalén. Nunapanumayare eta nanaquiravana ena vichamuriana nayeheyare ena apamuriana vichamuriana-hivare ticavasanahi ánaqui.

²⁶ Taicha ena vichamuriana te Macedonia, énapa ticavasanahi te juca Acaya, tinaqui quicavanahi eta náimicatasihaya ena apamuriana vichamuriana páureana ticavasanahi te Jerusalén.

²⁷ Tétavicavahi eta náurismurevahi eta nanaquisiravahi, navarairahi títsirijicavanaya nayehe. Táurica eta juca náitsirijisiravaya, taicha ena nachamuriana israelítana tímimatichanahi ena apavasanana eta máimiturapiana ema Viáquenu. Tásiha puiti, énapavaya ena vichamuriana apavasanana, nacajiyare ena nachamuriana israelítana.

²⁸ Tacahe, te támutupa eta níjarasiravacayare ena vichamuriana páureana eta nanaquiravana ena nachamuriana te juca, nuyaninavarepa nucaijuhe te España. Nétavajicainapasera eta ara eyehe.

²⁹ Németeaca eta nítecapauchiraheya, ichapeyare eta viúrisamurevaya eta vétumechiracacayare taicha eta véhisirahi ema Cristo.

³⁰ Nuparapenaveana, nuyaseacahe te máijare ema Viáquenu Jesucristo étapa eta vémunasiracacahi maicha ema Espíritu Santo. Nuyaseacahe ímicatcanuhíni eyaseuchanu me Viya te eyujarasirana.

³¹ Eyaseacahini eta majaneasiranuhini eta nítecapauchiravacayare ena masuapajirairahanahi ticavasanahi te Judea. Étapa eta juca námaquene-yarepahi nanaquiravanahi ena vichamuriana, táurihini eta najacapirayare ena vichamuriana ticavasanahi te Jerusalén.

³² Eyaseacahivaréni ema Viya máisapanuhini eta núrismurevainahíni eta nítecapauchiraheya, ímicatasiranuhíni eta nítujisiravaina nucachanehe.

³³ Ema Tata Vicaiyaquene, tétavicava eta macanarasirahi tamutu eta vipanereruana. Nuvaraha puiti yátupina esamava eta macanarasirahehi éti. Amén.

16

Em a Pablo mámechajirisiha te macartane namutu ena máimatiqueneana machamuriana

¹ Nutuparacahe emutu échapajirisinanu eta suítecapauchiraheyare esu apana vichamuri Febe. Taicha ésu, tétavicavahi eta suítatiravacahi ena vichamuriana te avasare Cencrea.

² Tauri eta ejacapiraina esu, evapinavayare te máijare ema Viáquenu Jesucristo. Ímerecayare eta yátupirahi eparapehivare ésu eta echamurirahi tayehe eta véhiruhi. Ímicatcayare te jácani sucamunuiravana. Taicha ésu,

camurianahi ena suímicataruanahi. Nútiripa, tétavicavahivare eta suímicata-siranuhi.

³ Échajisinanuyare ema Aquila ésupa esu mayena Priscila. Vahi némitisi-cavaca éna eta nucachamurirahi tayehe eta vicaemataneasirahi ema Jesu-cristo.

⁴ Ena, vahi nacatiequenehahini eta náitaresirana eta nacatiuchiranuhi. Nuhasulupayachavaca éna. Énerichuvare nahasulupayachavare namutu ena apamuriana vichamuriana apavasanana.

⁵ Échajisinanuvare ena apamuriana vichamuriana tíurujicavaráhianahi te napena ema Aquila ésupa esu Priscila. Échajisinanuvare ema némuna-ruquenehi nítunacasare Epeneto. Éma tínapucahi majacapahi ema Cristo apaícape te nuyanapa te Acaya.

⁶ Échajisinanuvare esu María. Nusamairiricahi eta ichapemurirahi eta suímicatasirahehi éti.

⁷ Échajisinanuvare ena nujaneanana Andrónico émapa ema Junias. Éna, nuchamurianainihi eta vicaeratairahi te cárcel. Tétavicavahi vémunasirahi éna viti apóstoleana. Éna, tínapucanahi nuyehe eta náehisirahi ema Cristo.

⁸ Échajisinanuvare ema Amplias, émarichuvare némunaruquenehi eta véhisirahi ema Viáquenu.

⁹ Échajisinanuvare ema Urbano, ema vichamurirahi tayehe eta vicaemata-neasirahi ema Viáquenu Jesucristo. Échajisinanuvare ema némunaruquene Estaquis.

¹⁰ Échajisinanuvare ema Apeles. Yátupihí éma eta máimeresirahi tíuríhi eta máehisirahi ema Cristo. Échajisinanuvare ena machichanaveana ema víarahaini Aristóbulo.

¹¹ Échajisinanuvare éma apanavare nujaneana Heredión. Énapa ena machichanaveana ema víarahaini Narciso, tétavicavahi eta nasuapajir-aiivahi éna me Viáquenu Jesucristo.

¹² Échajisinanuvare esu Trifena ésupa esu Trifosa. Énarichuvare ticaemata-neacanahi ema Viáquenu. Échajisinanuvare esu vémunaruquene vichamuri Pérsida. Tétavicavahivare eta sucaemataneasirahi ema Viáquenu.

¹³ Échajisinanuvare ema Rufo. Éma, tétavicavahivare eta masuapirahi ema Viáquenu. Échajisinanuvare esu maena. Ésu, tímicutijiricavahi mémenahini eta nuyehe ésu.

¹⁴ Échajisinanu ema Asíncrito, ema Flegonte, ema Hermas, ema Patrobas, ema Hermes. Échajisinanu ena vichamuriana tíurujicavarahiana te napena.

¹⁵ Échajisinanu ena Filólogo, ésupa esu Julia, ésupa esu Olimpás émapa ema Nereo, ésupa esu maparape. Échajisinanuvare ena vichamuriana tíurujicava-rahiana te napena.

¹⁶ Puiti eta néchajisirahehi emutu eti nuchamuriana, nuvaraha nétsera-recahe emutu te máijare ema Cristo. Ani te juca, téchajicaheana namutu ena apamuriana vichamuriana te tamutu avasareana.

¹⁷ Nuparapenaveana, nuvaraha ecuneuchavare nayehe ena tipanere-ghanahi típutsimuríhaheana taicha navarahahi tihapapícaheana eta te éhiruhi. Ena nani nacatianacahi eta juca vímiturapíhi íaravahuhi.

18 Érajicavayare eta nayehe, taicha éna vahi émainahini nacaematanea-cahini ema Viáquenu Jesucristo. Énajivachucha navaraha tiúrichavana. Tétavica-hivare eta náitusirahi téchajiricavana. Títivehi eta náechajirisirava. Étachuchasera navarahahi tivayuarecana te nasamureana ena achaneana tijimuyapanereruana.

19 Namutuhi tímatiheana éti, náechahivare eta esuapajiraivahi. Eta tac-ahe, tétavicavahi eta núrisamurevahi ícha. Ecajurucaseraini eta íchirahi eta táuriqueneana. Vahi ecuquicha eta tamauriqueneana.

20 Nuti nucasiñavahi me Viya, máimicatasiraheya íputsicavaneya ena machanerana ema Satanás. Tásiha, tiúriyare eta íchararacavahi maicha ema Viya. Nuyaseacaparacavare ema Viáquenu Jesucristo táetaviuchahíni eta iúricacarevaya máicha.

21 Téchajicahe ema Timoteo, ema nuchamurihi eta vicaemataneasirahi ema Viáquenu. Énapa ena nujaneanana: ema Lucio, ema Jasón, émapa ema Sosípater.

22 Núti apana nuti Tercio, núti nájuchahi eta juca carta, néchajicahe núti apana te máijare ema Viáquenu Jesucristo.

23 Téchajicahevare ema Gayo, ema nítecapaurehi te mapena. Étarichu-hivare viúrujisirarevahi te viyujarasirana. Téchajicahevare ema Erasto, ema tayehehi secretario tésorerohi eta te alcaldía. Téchajicahevare ema viparape Cuarto.

24 Nuyaseuchaheparaca emutu éti me Viáquenu Jesucristo, táetaviuchahíni eta iúricacarevaya máicha. Amén.

Eta táichecuaraqui eta macartane ema Pablo

25-26 Nuvarahahi vácuticacaini eta vijirauchira ema Viya. Éma, mavara-hahi tétumechaheya tayehe eta éhisirahi ema Viáquenu Jesucristo. Eta tac-ahehi eta nucametairuirahi, nímitucavacahi namutu ena achaneana eta majacapiravacahi ema Viya eta nacasiñavairahi me Machicha. Acane eta táepaniravahi eta apaquehe, ema Viya Eterno mapanerechapa eta majacapi-rayare namutu ena achaneana ticasíñavanaya eta mayehe. Ena israelítana énapa ena apanapanenejiqueneana achaneana, namutu tijacapacareana-yarehi. Étaripa eta náechajisihaqueneanahi ena víyarahanaini profetana tayehe eta Sagrada Escritura. Nájinasera nácaicutiarahini. Mapaenumavapa tímimatichanuhi núti ema Viya eta mapanereruhi.

27 Ema Viya, ¡tétavicavahi eta máitupajijiasirava! ¡Macarichuhi tijiraucha-carehi ticunachacarevare tayehe tamutu! ¡Máitavacayarehi eta vihasulu-payachirayare éma tivanecahavihi ema Jesucristo eta macuchucuirahavi-yarehi! Amén. Tamutupa.

Eta macartane ema Apóstole Pablo nayehe ena machamuriana ticavasanahi te avasare Corinto, ticaijare 1 CORINTIOS

¹⁻² Nuti Pablo, mayehenuhi apóstole ema Jesucristo. Níchuarecasivaichuhi mayehe, manerejirunuichuhi ema Tata Vicaiyaquene, mavarairahi nímitucaya eta náechajiriruvana éna. Puiti nucajurehe núti émapa ema vichamuri Sóstenes, eta juca carta eyehe eti vichamuriana ecavasanahi tayehe eta avasare Corinto. Puiti éti iávaháruvipa ema Viya taicha etupiruvahi esupa eta máichuirahéhi éti apanava, mavarairahi émayarepa ema Machicha Jesucristo ecaemataneacayarehi. Ecutiripa ena apamuriana vichamuriana ticavasanahi te tamutu avasareana, taicha ecasiñavahi eta eyujarasirana eta mayehe. Vimutu víti, émanarichuhi ema Viáquenu Jesucristo ema visuapaquenehi.

³ Nuvaraha macatajicahehíni ichape ema Tata Vicaiyaquene, émapa ema Viáquenu Jesucristo; nájaracahéhíni táurivaina eta epanereruana.

Viúricarepa ichape maicha ema Cristo

⁴ Núti nuhasulupayachaparaca ema Viya táichavene eta majapanuiraheripa. Eta iávahásirahi ema Jesucristo, ichaperinehi eta iúricarevahi.

⁵ Tíjaracaheripa eta ítupajjiasiravahi eta échajisirana, échemaharipíhi tamutu.

⁶ Écharipa eta numetacahequenehi eta májjarasiraheya ema Cristo eta iúrivaya. Puítipa tíjaracaheripahi.

⁷ Tamuturipa tíjaracahéhi ema Viya. Tájinapa iátajivainahíni eta ítupajjiasiravaipahi. Étanecha ecuchapayare eta jena sáchezare machavirayare ema Viáquenu Jesucristo.

⁸ Puiti ema Viya tétumechahezare puiti juca vicaijuhezare eta ítaresiraya apaesa tacuíja ecuavamirahu te jena sáchezare machaviraya ema Viáquenu Jesucristo.

⁹ Ema Viya vahi mahapapicaimahi eta mapanereruanahi. Yátupi eta máitachirayarehi eta máichuirahéhi, mavarahahi iúrujicavayare ecachenapa ema Machicha Jesucristo ema Viáquenu.

Vahi táurica vicaerajicaca

¹⁰⁻¹¹ Nuparapenaveana, ztájahapapuca ecayema éti vaipa tétupicava eta epanereruana? Núti nusamairiricahi eta íputsiaravavacaripa. Taicha tacahehi eta nametasiranuhi ena suchichanaveana esu vichamuri vénaraha Cloé. Nuparapenaveana, nutuparacahézare te májare ema Viáquenu Jesucristo, tácuticáca eta epanereruana. Nuvaraha étanainarichu eta epanereruana. Vaipa ecuiputsiacaca.

¹² Taicha ani tacahehi eta nusamairirisirahehi. Ena apamuriana ánipaji nacahehi: “Víti viúripanahi víti véhicanahi ema Pablo”. Ena apamuriana énerichuvare nacahehiji: “Vítira viúripanahi víti véhicanahi ema Apolo”. Ena apamuriana énerichuvaréji nacahehi: “Jéhevaresera víti viúripanahi víti véhicanahi ema Pedro”. Ena apamurianavare nacahepaji: “Vítira viápajupanavahi viúripanahi víti véhicanahi ema Cristo”.

¹³ Váhira tiuri énenahini ácahehini, taicha ema Cristo vahi apapipijinahini eta máimiturapiana. Nuti Pablo, váhira nútinahini népenahini te crusu íchavenénahini éti. Eta ecaicachasirahi, váhivare étainahini te níjare.

¹⁴⁻¹⁵ Tiúrichuhi vahi nútinahini nícachasicahéhini éti. Nájina tiyuna-caimahi eta nútinahini nícachasicahéhini te níjare, náepiyaequenehanuhi-pucaini. Yátupi nícachasicavacahi ema Crispo émapa ema Gayo. Téhesera te májjare ema Cristo eta nícachasisiravacahi.

¹⁶ (Néchavapasera eta nícachasisirahivare ema Estéfanas, énapa ena machichanaveana. Váipasera néchava nájahapuca nácani nícachasiruanahi.)

¹⁷ Ema Náquenu Jesucristo tituparacaruhi nucametarairuyare eta viúchucuirayare máicha. Váhira étainahini mavanecanuhini nícachasiricahini. Tacahe, tatupiruvahi eta nucametarairuirahi. Váhisera nuvayuyujicaimahi nútinapapucaini nápacjavahini eta nusuapacareva, tásápihapapucaini vahi tacusuapacarehini eta máepenirahi ema Cristo te crusu.

Ena Viya májjaracahi ema Machicha Jesús eta máitupajjiasiravahi

¹⁸ Natiarihíhi ena achaneana náimijachahi súnsurupiana eta juca nucametarairuirahi eta viúchucuiraya taicha eta máepeninahavihi te crusu ema Viáquenu Jesucristo. Ena nani masuapajirairahanahi énará táiturevanayare eta ecuñaraqú. Vítisera viti macuchucureanayare, tiúrihi visama eta yátupi-queneana tásihaquenehi me Viya.

¹⁹ Ema Viya ani macahehi eta máechajiriruva eta te Sagrada Escritura: “Tamapurujíhi eta náitucaqueneanaini ena títupajjijíhanainihi, énaripa máehicanurahanahi. Súnsurupíhi nuyehé eta náechemaraivanahi” macahepa.

²⁰ Eta tacahe puiti, tájina tacunachacarevainsami me Viya eta máitucaquenehi ema achane títupajjijiacavahi, mácani máestropuca, tayanapane macarichuhi nayehe ena apamuriana tímatiequenehanahivare eta tayeheana eta juca apaquehe. Taicha tájina vahi étaparacaina mayehe ema Viya eta júcana taicha súnsurupianachucha eta mayehe éma.

²¹ Tamutusera eta mapanereruanahi ema Viya, tétavicavahi eta tapachinavavacahi. Éma, tivanecahavihi viti vicametairuanayare. Nararihi ena tisuapanapahi eta vimetarairuana. Énaripa tíuchucuhanayarepahi. Tayanapane ena apamuriana náimijachahi súnsurupianahi eta vimetarairuana. Ena nani achaneana, tamapurují eta náechemaraivanahi, taicha vahi táimimatichavacahini me Viya.

²² Ena nani nujanenana israelítana náepiyarichuhi tiyaseserecana, navaraha náimaha eta tíamicareana tíásihana me Viya. Ena griégoana eta nayeherepi natanucahi eta tápacusiravaya eta náechemaraivaya.

²³ Eta tacahe, vahi tasuapacarehini nayehe eta vimetasirahi eta viúchucuirayare táchavene eta máepenirahi te crusu ema Cristo. Ena nujanenana titsirihanahi eta juca, tásíha náepuru náehica éma. Ena apamuriana apavasanana náimijachaichucha súnsurupiana eta juca.

²⁴ Natiarihísera ena tisuapanapahi eta máichuirahi ema Viya, ena israelítana énapa ena apavasananahi. Náimatiripa ema Cristo, eta vanairucairahi mayehe ema Maiya taicha éma tíjaracahi ema Machicha eta máitupajjiasiravahi étapa eta matumeva.

²⁵ Tayanapaneinesera te súnsurupihipuca nasama ena achaneana eta vimetarairuana, étasera tiápajucavahi tiúripanahi tayehe eta náitucaque-
neanahi éna. Tayanapanevare náimijachahi mamaratahairainahi ema Viya,
émahisera túmepanahi nayehe namutu éna.

²⁶ Ímativaichuhi, eti nuparapenaveana, te tíchuhahepa ema Viya, vahi
ámutihini ímatihini eta táchararacavahi eta ítaresirahi te juca apaquehe.
Váhivarenéni ámutuhini tuparairucahevacainahini. Váhivarenéni ámutuhini
ecaímahaquenevacahini.

²⁷ Tayanapane ena achaneana náimijachahepuca súnsuhéna éti, manere-
jiruhehisera ema Viya, taicha mavarahahi máimicatsiriacavacayarehi ena
tímijachavanahi títipajijiacavana. Tinerejica heripa éti váhirichu túmeji-
cuhénahini, mavairahi máimicatsiriacavacayarehi ena tímijachavanahi
túmejicuana.

²⁸ Tayanapane eta épurucarehi, náimijachavare máiturerehe, manerejiru-
hisera ema Viya. Eta tímicaecherachavacahi eta tájecapiravahi eta napane-
reruana mayehe ema Viya, taicha vahi éna ina matanuca ema Viya ena títipa-
jijiacavana, aquenucarhana, ticaímahaqueneanapuca.

²⁹ Eta juca mapanereruhi ema Viya, mamavarairahi nacuija nacucasiña-
vaiva te mamirahu éma, náimijachirapuca matuparaca éma nayehe éna.

³⁰ Púitiserá éti, majacapaqueneanaripa ema Viya. Mávaháruhevarepa ema
Jesucristo maicha ema Maiya. Tacahe, ichaperipa eta échemaraivahi máicha.
Sántuheripa máicha, ecutipaipe eta masantuvahi éma. Iúchucurepaipahi
tayehe eta ticaviurecarevana.

³¹ Tavaraha vítaucha eta táechajiriruvanahi eta Sagrada Escritura, ani
tacahe: “Vahi vítijivaimahi vicunachava taicha eta vítipajijiasiravana. Éma
vicunachayare ema Viáquenu taicha ema tíúrichahavihi”.

2

Éma Pablo macametairuhi eta máepenirahi ema Jesucristo te crusu

¹ Nuparapenaveana, échavarichuhi te nítecapauchahénapa cape juca
viásinequenehi. Eta nímitusirahehi eta máechajiriruva ema Viya, tíúrihi
eta níminecapaequenehairahehi, tamutuhi ticaicutiaracare eta néchajirisi-
rahehi. Vahi tácajerapihini eta néchajirisirahehi.

² Taicha nuvarahahi nímitatichaheyare ema Jesucristo, nuvarahavare
yátupinahini ácaicutiara eta masivachaquenehi macatajivairahi éma eta
máepenirahi te crusu íchavenehi éti. Eta tacahe, nupamicavahi núti eta
nímitusirahehi.

³ Núti, te nímitucahénapa, vahi nítipajijihahini eta nusamiravahi. Nupíca-
carácavahi támapurujihini eta nímitusirahehi. Ichape eta tayayacarevahi
eta náquehe taicha eta néñamiravahi vahi tacusuapacarehini eta eyehe eta
nímiturapiana.

⁴ Núti, vahi nácutihini mácani achane mavayuyupica eta máechajirisirava.
Étiserá ecaicutiaravanehi eta nímitusirahehi maicha ema Espíritu Santo.
Ecaicutiaravanehi étairahi eta yátupiqueneana tásihaqueneana me Viya.

⁵ Taicha nuvarahahi yátupina muracaina eta ecasiñavairahi mayehe ema
Jesucristo taicha ímatihini te esamureana eta yátupirahi másihairahi me Maiya.
Vaipa ecuehica eta nayeherepianaini ena víáchucanaveanaini.

Éma Espíritu Santo tímimatichavihi eta mapanereruana ema Viya

⁶ Étiserá ánaquiaparipa eta éhisirahi. Ímatiequenehávacaripa. Tacahe, táuricapa puiti vímitucaca eta apamuri échajirirucava títuacareana ticajerarapianahi. Eta juca títuacareana tiásihanahi me Viya. Vahi tásihaquenénahini mayehe mácani vicutiquene achane. Énainahipucaini tásihahini nayehe ena ichapequeneana aquenucana, taicha vahi tánasimahi eta napanereruana éna.

⁷ Eta júcana títuacareana tásihaqueneanahi me Viya, mapanereruanahi te tépanavainapa acanevaca. Ánaquiaparipasera eta macaerajisirahini. Tapaenumavapa puiti máimicaecherachinahavihi viti achaneana, mavarairahi visiapaya tayehe eta mávasa anuma.

⁸ Ena aquenucanahi, vahi náimatihini eta mapanereruana ema Viya. Nájina émanainahini ema ichapequene aquenuca máimatihini. Taicha te náimatihini eta mapanereruana ema Viya, váhirichuhipucaini nacuémetatacahini te crusu ema Viáquenu. Tájina náimatihini eta émairaquenehi Viya, tiásihahi te anuma.

⁹⁻¹⁰ Vítiserá víti, máimitureanahi ema Espíritu Santo. Vímatihí eta mapanereruana ema Viya. Émahí ema tímimatichahavihi taicha macarichu máimatihí eta tayumururevanahi te mapanereruana ema Viya. Taicha aní tacahe eta Sagrada Escritura: “Tétavicavaya eta náuricacareva ena nani témunacanahi ema Viya. Taicha máijaracavacaya eta náicuchihi natuparahahi maicha éma. Máimahasirichaha eta tacutiquenehi eta náuricacarevaya. Váhivare tisamairicacarehini eta tacutiquenehi te jácani tiyerehi avasareana. Nájina naratahahini náimijachaimahi eta táetaviuchiravaya” tacahepa eta Sagrada Escritura.

¹¹ Viti achaneana, vicarichu vecha eta vipanereruanapachu tásihaqueneanahi te visamureana. Nájina apanaina náratahahini naecha. Ene macahehi ema Espíritu Santo. Macarichu éma téchahi tamutu eta mapanereruanahi ema Viya, taicha émarichuhi máchanevahi.

¹² Víti, tájina vahi vítijivainahini vímipanerechavahini mayehe ema Viya. Émasera ema Espíritu Santo tímítucahavihi tamutu eta títuacareana tásihaqueneanahi me Viya, taicha mavarahahi véchayare.

¹³ Eta tacahe, eta juca vímiturapianahi tásihaqueneanahi mayehe ema Espíritu Santo. Vahi tásihaquenénahini te vipanereruana. Táitusiava, ena vímitureanahi natupiruvahi najacapa taicha mávaháruanahi ema Espíritu Santo.

¹⁴ Énasera nácani achaneana vahi mávaháruanaina ema Espíritu Santo, vahi najacapaimahi eta máimiturapiana, taicha náimijachahi súnsurupiana. Váhivare nárataha nacaicutiarahini, taicha ticamunucarehi eta máimitusiravacainahini ema Espíritu Santo.

¹⁵ Vítiserá víti yátupiqueneanahi mávaháruana, vicaicutiarahi tamutu eta máimiturapiana éma. Énasera ena máehicarahanahi, vahi nacaicutiaraimahi eta apanairaipahi eta viyeherepianahi víti.

¹⁶ Tacahehi eta táechajiriruvana eta Sagrada Escritura: “Nájina émanaina achane máemunahiricavahini máimatihini eta mapanereruana ema Viáquenu. Tavetijicha májina mácani máitucahini máimituca ema Viya eta mamaitucaqueneanapucaini” tacahepa. Nájnavare nácutihavihíni víti vicaravahuquenehi eta máechajiriruanahi ema Cristo. Vímatiripa eta mapanereruana.

3

Vimutu vicompañerocaca tayehe eta vicaemataneasirahi ema Viya

¹ Nuparapenaveana, cape te nítecapauchahénapa, vahi tacajerapahini eta nímitusirahehi. Tacutihi te vicajuruca eta amuya, vépiyasinahi eta vímitusira. Tativahi nímitucahe eta epaisirayare éhisirayarehi ema Jesucristo. Taicha éti vuíchaha támutuhini ínajicahini eta tajamurachagueneana eta íáqueheana. Vuíchahavare éhicahini eta mavarahaquene ema Espíritu Santo.

² Vahi námainunujicahehine eta nímitusirahehi. Éti ecutihi ena nácani amuyana tíajicanarichaha. Vahi námainucavahini nanicahini eta cheruji. Ene ecahehi éti, vahi íámainucavaimahi ácaicutiarahini támutuhini. Puítirichucha vuíchahavare áratahaimahi ácaicutiarahini eta apamuriana títuacareanahi murácapanáni.

³ Taicha éti vuíchaha támutuhini ínajicahini eta tajamurachagueneana eta íáqueheana. Taicha ecapinarujiricacaichaha, ecatianajiricacaichaha, íputsi-murajiricacaichaha. Eta epanereruana ecutirichaha eta napaneremuanahi ena apamuriana achaneana masupajirairahanarichaha.

⁴ Éti épurujiricacahi nayehe ena echamurianahi, ánipa ecahe: “Víti viúripanahi víti véhicanahi ema Pablo”. Éti apamuri ecahepa: “Vítira viúripanahi víti véhicanahi ema Apolo”. Eta juca ecahehi, tacutirichaha eta napanereruana ena apamuriana achaneana masupajirairahanarichaha.

⁵ Váhira nútinayarehi éhica nuti Pablo. Váhivare émaimahi ema maca Apolo éhicayare. Vahi véhicacare víti, taicha mavanarahavichucha ema Viáquenu Jesús. Yátupi víti vímitucahehi. Tamutuhisera mayeaneanahi ema Viya eta esamaqueneanahi. Ema Viáquenu tíjaracahavihi eta vituparahapachuyarehi.

⁶ Yátupi nútí nínapucahi nímisamahehi eta máechajiriruva ema Viya. Te néquenepa, títecapauchahépa ema Apolo, émapa títametacahehi tamutu. Émasera ema Viya, ema ticajurusinahehi eta esupajiraivanahi.

⁷ Táitaurevaquene nútihinéni névacahi te esamureana eta echajirirucavana, tájinasera vahi nútina néchahe. Émaripa ema Apolo, ema títametacahehi, váhivare émaina téchahe. Émara ema Viya, ema téchahi tamutu eta juca. Éma ticunachacare.

⁸ Nútí, émapa ema Apolo, vicuticacahi vínunahi eta vicaematane. Vituparahapachuhisera. Ema Viya tíjaracahaviya eta vícuchianapachu, te tíurihi eta vícáematanérana.

⁹ Víti mamusurahavihi ema Viya. Éti ecutihi eta sucurecana eta macajurusirahehi ema Viya.

Eta éhisirahi ema Jesús tacutihi eta náepiyasirahi eta ichapequene peti.

¹⁰⁻¹² Tativa, ema maestro tépiyarecarahi peti arquitecto, éma tinacucha eta labriyu eta tatumearaya eta yúchama. Tásiha, ena apamuriana máestroana, énapa tíunachana eta yúchama étapa eta tamaíquehe. Tiúriyare eta nacaemataneraya. Nanerejicayare eta táuriqueneana tasivachagueneana, navarairahi tíjanunucayarehi eta náematane. Váhiya nanacaimahi eta tíjuchacareana, yucuquí, muiji, cáchipaca; apaesa vahi tacuiju eta peti. Taicha títecahare máimahapanaya ema ticayeheyarehi eta peti. Tásiha, te máimahapa tíurihi, mavachachainapa namutu ena ticaemataneanahi. Nuti manerejirunuhi ema Viya eta nímimatichirahehi ema Jesucristo, éhicapaípa éma. Puíticha eta ecajúherapaípa te anuma, nájina apanaina naratahahini námahehine. Macarichuhi marataha éma. Puiti, ena apamuriana mamusurana ema Viya

tímitucahehi apaesa tajuruca eta esuapirahi. Tacamunusera tiúriyarehi eta náimitusiraheya.

¹³⁻¹⁴ Taicha tatiarihiyare eta sácheyare máimahayare ema Viya eta vémataneanapachu, te tiúripuca. Te tiúrihi eta vémataneanahi, ema Viya tajaracahaviya eta táitsivayare eta vématanerepihi. Téhesera vahi táurihini, eta mayucune tájuchayarehi eta vémataneanahi.

¹⁵ Tacamitiequenehayare tamutu jácani tájina tacunachacarevainahini. Tájina táimaequenénaimahi. Yátupi viúchucuhahi víti, tájinasera vímaequené-haimahi.

¹⁶⁻¹⁷ Écharichuhi éti eta mávahásirahehi ema Espíritu Santo. Éti ecutihi mayehehi templo ema Viya, étarichuhi eta máucupaisirarehi máemunaruquenehi. Éma, máicuñacayare muraca nácani tjararecanahi éta. Táitusiava, ejaneacava éti, machu ejarareca eta iúrujiasiracacahi, ímiyusemaca ema Viya.

¹⁸ Vahi ecuejecapava eta ímijachirahi ímatipa tamutu eta juca vítaresirahi. Étiserá ecaravahuya eta me Viya. Éma, tímitucahe eta ítupajijiasiravanaya yátupiqueneana. Échemaraívaina máicha.

¹⁹ Taicha eta náitucaqueneanahi ena achaneana te juca apaquehe, súnsurupianachucha eta máimairahi ema Viya. Taicha eta Sagrada Escritura, ani tacahe: “Ena tímijachavanahi náimatiequeneha, énajivachucha tímiaquipaicavanahi maicha ema Viya, taicha eta namáetupisirávanahi”.

²⁰ Ánivre tacahe eta Sagrada Escritura: “Ema Viya máimati eta napaneruana ena tímijachavanahi títipajijiacavana. Tájina eta tacunachacarevanahi eta mayehe”.

²¹ Táitusiava, vahi tiuri ecasiñavavaicahini. Vahi étupicava eta éhisiravacahi ena enerejiruanahi éhica.

²² Ecaravahuinaserá tamutu eta vímiturapiana viti mavanaranahi ema Viya: ema Apolo, émapa ema Pedro, nútupa nuti Pablo. Ecamapurava eta ítaresiraichaha te juca apaquehe. Jararihiyarehi eta iúricareva puiti étapa eta sácheana vicaijuhequeneana. Vaipa ecupica eta épeniraya.

²³ Échava ema Viya ema téchahehi, taicha éti mayeheripa ema Machicha Cristo.

4

Eta nacatuparahairahi ena apóstoleana

¹ Nuvaraha némechahe eta vicituparahairahi viti mayeaneanahi apóstole ema Cristo. Mamusurahavihi víti. Tivanecahavihi eta vímitusiraheyare eta mapaneruana ema Viya, eta tayumururevanainihi.

² Puiticha, mácani ticatuparahayare tayehe eta ematanecana, tacamunuhi yátupiyare eta máitauchiraina.

³ Natiarihipuca ena ticaunenuanahi te nítaurahihipuca. Étiripa, enevanehipuca ecaunenu. Núti, tájinavare tácyema te ticaunenuanahipuca. Németeaca nítauchapaipa tamutu eta nucatuparahairahi me Viáquenu.

⁴ Váhisera nucasiñavavaicahini, taicha néchahi ema Viáquenu, máimahahi éma tamutu eta nucaemataneasirahi éma, te tiúrihipuca, váhipuca.

⁵ Eta tacahe, vahi táurichahini tativainahini ecaunehini eta júcana, te vuíchaha ímatiequenehahi. Ecuchapaya eta mápechiravayare títeca ema Viáquenu. Éma tímicaecherachayare eta tayumururevahi te timapicu. Éma

tímereuchahaviya eta vipanereruana te visamureanapachu. Tacahe, ema Viya ticunachahavinapa eta viúriyani.

⁶ Nuparapenaveana, numetacahe eta juca eta tiúrichaheyare apaesa ácuti eta máuriva ema Apolo, ácutinuvare núti apana eta núrivahi, taicha étanarichuhi eta vimiturapianahi tayehe eta véhiruhi. Vahi táurica enerejicahini nácani émunaruanaya. Vácuticacasa eta émunasirahavina viti vímiturahianahi. Nacuijavare épuruquenéna nácani tímiturahianahi.

⁷ ¿Tájaha tacayema ímijachavahi éti iúripana nayehe ena apamuriana? Tájina apanaina ecasiñavaiya, tacarichu ecasiñavaiyaya tayehe eta májararuheanahi ema Viya. Váchuripa tújaracaheipa éma eta iúriyani, vahi étijivainahini iúrichavahini. Tásiha, ¿tájaha tacayema ecasiñavavaicarichucha éti?

⁸ Éti, eta esamiravahi ecaemuñavaipa tímicitijiricavaipa ecayehehine tamutu, ecaimahaquenehine. Ímicutichavaipavare aquenucahenahine eta esamiravahi. Ímijachavapa vaipa nucamunucarehi eyehe. Jéhechapucaini malayarine yátupinahine aquenucahenahine apaesa víti apanava vémeñahavapai eta eyehe.

⁹ Ímatirichu éti eta procesión náchaqueneasa ena tiverearecanapahi tayehe eta guerra. Nanacahi te náijiquimuri ena ticatuparahanahi eta náepeniraya taniruanayare eta sárareana. Ichape eta náimhacarevahi nayehe ena achaneana. Viti apóstoleana ticutimahi tinacahavi ema Viya eta vicutihi ena nani páureanasamí. Ichape eta vímahacarevahi nayehe ena achaneana, énapa ena ángeleana.

¹⁰ Viti apóstoleana, eta vicaemataneasirahi ema Cristo, tisunsuchahavianasamihiji ena achaneana. Étiserá étaviucharipahiji eta ítupajjiasiravahi tayehe eta títucacareana mayehe ema Cristo. Tacutiquene náimijachahivare matumerairahahavisami. Éti, tétavicavaipáji eta etumevavacahi. Tipicauchaheanaripáji ena achaneana. Vítisami tájinapa vipicauchacarevainahine nacahehi éna eta náechajiruvahi.

¹¹ Puítiripa vinasirichuhi eta vicatajivairahi eta vinicaquenerepi, eta vimauneva, etapa eta véchuriasirapa eta vimuirharapi. Ena achaneana téhahaviana. Tájina viviyava vijunaiya.

¹² Vicávitarcávahi te vivahuana eta vicaematamera. Ena achaneana ticajachajicachaviana. Vítiserá tájina vácyemahine nayehe. Tiúrihi eta vijicapiravacahi éna. Tipanajirichavianapa, vítiserá vicamichahi tamutu.

¹³ Tamutu sácheana téchajcanahi eta vyehe. Tíñemahi eta nacayemaihavi. Ichape eta vépurucarevahi nayehe. Vítiserá vicayehehi paciencia nayehe, viconsejachavacahi.

Eta mahapasamuresiravahi ema Pablo nayehe ena machamuriana

¹⁴ Eta juca nucajureheirahi, vahi étaina nupanerecha nímicatsiriacahe. Nuvarahahisera nuconsejachahevare. Tétavicava eta némunasirahehi, tacutirichu eta nucachichairahine.

¹⁵ Tayanapane camurianahi ena eyeheanahi máestroana tímitucaheanahi eta éhisiraina ema Cristo, diez mílnáinahipucaini; nútiserá tímicitijiricavahi nácarichuhine éyanuinahine maestro taicha núti nímitichahehi tayehe eta iúchucuirayare maicha ema Jesucristo.

¹⁶ Eta tacahe, nécatiahehi eta éhisiraina eta núrivahi núti.

¹⁷ Eta tacahe, névatacayare eta ara eyehe ema némunaruquene nuchicha Timoteo. Éma, títaurahi eta macaemataneasirahi ema Viáquenu. Éma, tímitucaheyare, mámechiraheyareva eta tacayemaqueneana eta nímiturapiana eta véhisirahi ema Cristo. Táuriquenehi eta máimiturapiana taicha étarichuhi eta nímiturapihi nayehe ena vichamuriana te jácani nupaisineanapahi.

¹⁸ Etiarիրipapuca eti ecasiñavaripa eta numaitujisiravaripa néjirapanahelihini. Ímijachaipapuca nupicahi.

¹⁹ Nuvarahapaicha núti níjahuchavahini nítecapauchahehini. Nucuchapahi eta nítujsiravainahini maicha ema Viáquenu. Te nítecapauchahepa, nímahainapa ena nácarana tisiñavavaicanahi, te yátupihipuca eta nacaemataneasirapa. Vahi tisuapacareimahi eta nacunachiravana te vahi náimicaeche-rachahini eta táurivahi eta nacaemataneasirahi ema Viya.

²⁰ Taicha eta véhisirahi ema Cristo, tacamunuhi vítauchayare vícaemataneacayare. Vahi tácarichuimahiya eta véchajiriruvana.

²¹ Tiuri puiti, te ímijanava ene ecahehi, némecharecaheyarehi te nítecapauchahepa. Téhesera te étupiricava eta epanereruana, ichape eta núrismurevayarepahi eta nímairaheyare, nétserajicahénapa.

5

Éma Pablo mavaraha nacaerajica mácani téjecapavahi

¹ Jucarihivare eta juca apana téchacarehi eta matiarիրirahi ema émana echamuri téjecapavahi, tíñehicarehi eta juca máichaquenehi. Mavehahiji esu máenaharuva. ¡Váhicha tiuri eta juca máichaquenehi! Énaripa ena navayurevaqueneana ticapecaturahiana vahi náuricaimahi eta juca.

² Esapihaichucha éti, ¡tétavicavahi eta tahapasamurechirahehi eta íputsimuricacairahi tásihaquenehi eta ecasiñavavaisirahi! ¡Íúrihaipa etsirihapaini, táichavenehi eta máichaquenehi ema echamuri! ¡Íúrihaipavare étupiricahini ema maca! Taicha ema Viáquenu Jesús tituparacahavi vicuchucayare te vimuri nácani téjecapavanahi te vahi návarahahini náetupiricava.

³⁻⁴ Puiti, nuvaraha íúrujicavayare éti. Eyaseacayare ema Viáquenu Jesucristo máimicatacahe eta étupirisirayare eta juca. Núti apanavare, tayanapane eta nuyerehihehi, étasera eta náchaneva ticachaneheya.

⁵ Íchayare: “Te máijare ema Viáquenu Jesucristo, víti émapa ema Pablo, vicuchucavi te vimuri. Vaipa tijaneacavimahi ema Viya. Máimahavinépa ema Satanás, émainapa téchaviyare. Vivaraha pínajicaini eta juca pimaurivahi, apaesa táuchucuhaini eta piáchaneva te táitecapapa eta jena sáchehare machaviryare ema Viáquenu Jesús” Íchayare.

⁶⁻⁷ Éti, vahi táuricahini ecasiñavavaicahini. Tacamunu ecuchucavane ema mácara achane téjecapavahi apaesa vahi macupareacahe eti apamuriana, machu mámairijicahe. Taicha éma macutiripa eta levadura te nanaca te masa eta pan, tayanajicahi tamutu. Étisera, nuvaraha ecutiya eta pan mayehere levadura vínicasare te páscuamuhuana. Yátupiquenehi arairu taicha vahi tasisijicahini. Ene ecaheyare éti, vahi tépahaimahi eta iásinequenehi te arairuhepa tacuti eta épaniravahi te éhicainapa ema Jesucristo. Taicha éma, tamutuhi mavachacha eta vímicapasirahi, macutihi eta uvesa eta vímijarare-sirahi.

⁸ Táitusiava puiti, vicutinapa ena nujaneanana israelítana eta nacaerajisira eta levadura te napenana te páscuamuhuana. Tamutusera sácheana

vicauneuchavaya tayehe eta tamauriqueneana, vahi pecatumarehavimahi. Tamutu sácheana eta juca vítaresirahi matapiravarehavinahi, tájinasarepa víchiravaimahi te mamirahu ema Viya.

⁹ Cape eta nucartanehivare eyehe, nímimetacahehi eta tamaurivahi eta ecachanevacahini ena tíchanahi eta juca pecatuana tivehajiricacani: Súcani esena suvehahi ema apana achane, mácani achane mavehahivare esu apana esena.

¹⁰ Tiuri, núti eta numetasirahehi, váhisera énaína nicha ena nani máehicarahanarichaha ema Viya ena nani tivehanahi esu apana esena apayena, énapa ena tavayuaruana eta plata, énapa ena tiámerahiana, énapa ena ticasíñarajiana. Ena nani, náetaviuchahi eta nasimutuvavacahi, tamutuhi návihávaca. Tacamunuipapuca vérajicavahini eta te juca apaquehe, apaesa vaipa nacuitcapauchahavihini. Váhira énaína níchaquenénahini.

¹¹ Mácanisera tímijachavahi echamuri, vahi nuvaraha ecachanejirica ema tivehahi esu esena apayena, émapa ema tivehahi esu esena amaperu máimaruchaha, émapa ema tavayuaruhi eta plata, émapa ema ticasíñarajiji, émapa ema titupiarahi, émapa ema ticavaharasi, émapa ema tiámerahi. Mácani echamuri, te ene macahehi, tájina vahi táuricahini ácachanevacahini te enisirana.

¹²⁻¹³ Vahi nútina tatuparaca eta nacayaseserehiyare te numirahu ena anecaqueneanahi eta viyehe. Téhesera te mamirahu ema Viya eta nacayaseserehiraya. Éma téchavacahi éna. Étisera éti, échahi ena echamurianahi. Éti eyaserejiricacayare étijicacaya. Eta tacahe, ecaevuisihayare ema mácara téjcapavahi te emuri.

6

Vahi táurica vimetauchacacahini te namirahu ena máehicarahanahi ema Viya

¹ Énerichuvare nuvaraha numetacahe eta apana: Te natarihinapuca ena echamurianahi navaraha timetauchacacana, vahi távaraha nayanahini nayehe ena tuparairucana máehicarahanahi ema Viya. Étarichu nacamirahucacaiyare te emirahu eti nachamuriana.

² Tativayare échava eta machaneraherahi ema Viya. Étijivayarehi étupiricaca eta íchavaquenevanahi. Vahi étinayare etanuca ena masuapajirairahanahi taicha járajapayare eta sácheyare ticayaseserehianaya te emirahu éti ena masuapajirairahanahi. Puítisera eta íchavaquenevanahi ánichichaqueneanahi, éti tatuparaca étupiricaya.

³ Écharichu éti tituparacahaviyareva ticayaseserehianayareva ena ángeleana te vimirahu. Tacumapurujichapucáni eta tayeheanahi te juca vítaresirahi, vahi vicuituruequenehahini.

⁴ Puiti éti, te tatiarihpuca eta íchavaquenevahi tayehe eta juca vítaresira puiti, váhiquenesera etanucaimahi ena emetauresihahini nácani vahi énaparacaimahi nayehe ena echamurianahi.

⁵⁻⁶ Némechahe eta juca, nímaha te etsirihapuca. Váhiquene táuricahini mayanahini mácani vichamurihi matanucahini ena tuparairucana máehicarahanahi ema Viya. Tasapiahahini étainahini mametauchihahini mácani machamurihi. Cúverarecapa nacujjahini te etaracu mácani émanainahini vahi macuituruequenehahini mayasesereca jácani téchacareanahi nayehe ena vichamuriana.

7 Vahi táuricachini íchahini eta juca. Éttijicacainahini eta echamuricacahi evarahapa ejararecaca. Tivarahacarepana eta eratahairaina ecamicha, tayanapanerine ecatajivahi naicha, tiámeyechaheanapuca.

8 Étiserá etivavaicapa íchahi eta juca émecatajivachacacapa. Vahi táuricachini eta juca; násapíhahini énahini echamuriana ena etupiaruanahi.

9-10 Váhipuca échahi éti eta namaitujisiravaya tisiapana te mávasa ema Viya ena tichanahi eta tauriqueneana. Taicha yátupíhi eta namaitujisiravayare tisiapana ena ajairana tivehanahi esu apana esena apayena énapa ena vahi nayenacacaquenena, énapa nácani tivehana esu esena amaperu máimaruchaha. Énerichuvare ena esenana, váhivare títujicavanaimahi tisiapana te mávasa ema Viya, súcani tivehahi ema achane vahi suímaquenena, ésupa súcani amaperu esena namutuchucha suvehapahi. Váhivare títujicavanaimahi tisiapana ena nani tivehacacana ajairacacana, énapa ena nani ticasíñarajiana, ena nani tíamerahiana, ena nani ticapinarurahiana, ena nani ticavaharasiona, ena nani titupiarahiana, énapa ena nani nápicararecapahi eta námeresirayare.

11 Ene ecaheni éti eta iásinequenéni. Puítiserá títivachavaipahi eta ítaresira, sántuheripa maicha ema Espíritu Santo, ejaçapacarepa mayehe ema Viya, máichavenehi ema Viáquenu Jesucristo.

Tiávahácachaviripa ema Espíritu Santo eta te viáquehe víti machanerana ema Viya; tásiha, tituparacahavipa tacuíja eta vituhusívaina

12-13 Puiti jucarihivare eta numetacaheyare. Nararhipuca ena nacahehi: “Núti néchinava eta nítaresirahi. Eta náquehe tajamurachahi eta tavarahaqueneanahi. Eta tinicacare táicuchíhi eta víami. Eta víami tatuparahaichuhi tajacapaya eta vínicaqueneayare. Ene tacahe eta náquehe tavarahahi nuveha esu esena tacutíhi eta víami tavarairahi tinica” nacahepa. Nútiserá te nupanereru, vahi énéna tácahe. Yátupi víti véchinavahi. Váhiserá távarahacarehíni támutihicháini víchahini eta tavarahaqueneanahi eta viáquehe, vivayuchahini víchahini eta tauriqueneana. Yátupi tísapacarehi eta vínisiraya eta tinicacareana. Tatiaríhiserá eta sácheayare, vaipa vácamunuimahi eta tinicacare, maicha ema Viya. Ema Viya máepiyacahi eta viáquehe, mavarairahi vícaemataneacayare éma. Émapa téchahavíhi puiti eta juca vítaresirahi. Vahi étainahini táemepiyacahavíhíni eta víchiraya eta pecatuana esenamarehavinahini.

14 Ema Viya macaechepucahi ema Viáquenu Jesús te máecari. Ene vícaheya víti eta macaechepusirahavíyare víti apanava, taicha tétavíavahi eta máitupajíiasiravahi.

15 Écharichuhi emutu éti, eta iáqueheana mayeheripahi ema Cristo. Émaripahi téchahéhi. Etiaríhipucasera ímíjchapuca táuricachini vímicachanechahíni eta viáquehe tayehe eta suáquehe esu esena túhusi. Váiparinehi táuricaímahi.

16 Nuvarahavare némechahe, te mavehahi ema achane súcani esena túhusi, táncacachi eta náqueheana eta nacamujichiracacahi. Acane, ema Viya máíjaracapa esu Eva mayehe ema Adán. Tásiha, eta Sagrada Escritura, ani tacahe: “Te tivehacacapa, tímícutíjiricavapa étanarinehi eta náqueheana”.

17 Ene tacahehi eta vítaresira mayehe ema Viya, eta mávahásirahaví ema Viáquenu, eta víáchaneva tacachanerípa éma.

18 Eta tacahe, ejaneacava yátupina, machu iáquipaicava tayehe eta túhúscare. Tamutu eta pecatuana náíchaqueneanahi nácani achaneana, tajararecachi

eta náchanevapachu. Tavetijipa, mácani achane tivehahi esu esena vahi mayenaquenelahini máimijarecavivare ichape eta máquehe. Ticajachacareinehi eyehe éti eta juca.

¹⁹ Écharichuhivare éti eta mávahásiraheeripa ema Espíritu Santo eta te iáqueheana, taicha mavaneruichuhi ema Viya eta mávahásiraheyarehi ema Espíritu Santo. Vaipa étinahini écha eta iáqueheana.

²⁰ Taicha mavachareruhehi ema Viya. Ichapemurihi eta macatajivairahi íchavenehi éti. Puiti, eta iáqueheana étape eta íchanevana mayeheripahi ema Viya. Tacahe, puiti, ejaneacavapa eta ítaresiranahi te namirahu ena achaneana, apaesa namutu nacunachaya ema Viya.

7

Eta maconsejarapi ema Pablo nayehe ena máimaruana, énapa ena nacaimaqueneana

¹ Tiuri puiti, nujicapaheyare eta juca eyaseresiranuhi te ecartane. Yátupi tíurihinéni máyénareshini mácani achane.

² Táichavenesera eta tavayuaravahi eta pecatu, ticamunucarehi ena ajairana nayenapachuina, énaripa ena esenana ticamunucarehivare náimapachuina.

³ Mácani achane te sutiarihípuca esu mayena, tacamunuhi máitachayare eta máitátiraya máemunasiraya esu mayena. Ésuripa esu esena te ticaimaripapuca, énerichuvare suítauchayare eta suítátiraya suémunasiraya ema suima.

⁴ Taicha esu esena vaipa ésuinahini téchinava eta suáquehe. Émapa téchahi ema suima. Ene macahehi ema achane, váipavare émainahini téchinava eta máquehe. Ésuripahi téchahi esu mayena.

⁵ Éti ecaimaqueneanaripa, vahi ecuepurucaca tayehe eta iánesiracacairana. Téhesera tatiarihínapuca eta eyujarauchiravayare me Viya, ecuticacahipuca eta epanereruhi, tísapacare ínajica ánipina eta iánesiracacana. Te táequenénapa, táuricavare échávauchacacavare, apaesa ema Satanás vahi macuiturucache eta máimijamurachirahe ena apanana.

⁶ Tiuri, eta juca numetasirahehi, vahi nútina nucavanairipi. Nísapasera eta énéna ácahe.

⁷ Nuvarahahinéni ácutinuhini nútí eta mayénareshini. Víjaracasipachusera me Viya eta vítaresiraya. Nararihi ena ajairana máyénareshina eta náitaresira. Nararihivare ena esenana máimaruana eta náitaresira. Nararihivare ena apamuriana máijararuichu ema Viya ticaimana.

⁸ Énaripa ena nácara vichamuriana máyénareshina, énapa ena máimaruana, énapa ena tépenaimana, tíuripahaninéni nánasihini máimaruanaishini; nácutinuhini nútí.

⁹ Étasera te vahi náratahahi ticaratacavana, tacamunuichuhi ticaimanayare, apaesa vahi nacuepujuquichava tayehe eta pecatu.

¹⁰⁻¹¹ Tásíha puiti, nutuparacavacayare ena nacaimaqueneanaripa. Ema ajaira vahi macuinajica esu mayena. Esu esena váhivare sucuinajica ema suima. Eta juca vanairipi tásíhaquenehi mayehe ema Viáquenu, vahi tásíhaquenéna nuyehe nútí. Téhesera natiarihínapuca ena vichamuriana náinajicaca, vahi táuricahini nápechavahini nacaimahini, nacacachanehipucaíni. Tacamunuhi tichavauchacacanayare tivehacacana.

¹² Tiuri puiti, tájinachaha vanairipina tásihaquenéna me Viáquenu tayehe eta náinajisiracaca ena nacaimaqueneana. Níjaracahesera eta juca nupanereru núti. Te matiarhipuca mácani vichamuri esu mayena vuíchaha vichamurinahi, te tíurihipuca eta nacachaneracacahi, vahi táuricachini máinajicachini ésu.

¹³ Énerichuvare, te sutiarhipuca súcani esena vichamuri ema suima vuíchahavare vichamurinahi, te tíurihipuca eta nacachaneracacahi, váhivare táuricachini suínajicachini éma.

¹⁴ Taicha ema suima, ichape eta majapanucareva me Viya táichavenehi eta sucaimairahi esu mayena. Énerichuvare esu esena mayenahi ema vichamuri, ichape eta sujapanucareva me Viya táichavenehi eta mayenairahi ema achane vichamuri. Énaripa ena nachichanaveana majapanuhivare ema Viya náichavenehi ena ticachichana, vaipa náepurucarehini me Viya.

¹⁵ Téhesera mácani vuíchaha vichamurina suímahi esu vichamurihi mavarahapuca máinajica esu mayena, suísaparine máinajica. Ema Viya vahi macavanairipi eta suíchejiricachini éma, mayanarine. Taicha ema Viya mavarahahi viúriyare, tacuijapa tahapapiricachavihi eta vipanereruana. Énerichuvare súcani esena vuíchaha vichamurinahi mayenahi mácani vichamuri, te suvarahapuca suínajica ema suima, énerichuvare máisaparinevare suyana.

¹⁶ Taicha piti esena, vahi pecha te pimaitacayarepuca picajayasamurecha ema pima eta máehisiraina ema Viya. Pítiripa piti achane, váhivare pecha te pimaitacayarepuca picajayasamurecha esu piyena eta suéhisiraina ema Viya.

¹⁷ Ema Viáquenu tíjaracahahi eta ématanerepianahi te tíchuhahenapa. Etuparahapachuhi eta ématanerepiya. Váhisera ínjicaimahi, ímiyanavare ítauchaya eta etuparahanahi. Étara eta juca nuvanairipi nayehe ena vichamuriana ticavasanahi te tamutu avasareana.

¹⁸ Nácani ticamarcanaripa te máichuhavacapa ema Viya, vaipa táuricachini nacaepahavahini eta nacamarcairahi. Nácani má márcareanarichaha te máichuhavacapa ema Viya, vaipa táurica nacamarcahini.

¹⁹ Tájina vahi étaparacaina te vicamarcahipuca, étasera tivarahacarehi vicaemataneacayare eta mavarahaqueneanahi ema Viya.

²⁰ Namutu nácani máichuhaqueneana ema Viya, vahi náitsivachaimahi eta náematanerepianahi nájaracahi te máichuhainapa ema Viya.

²¹ Te ecaquenuhipuca éti te tíchuhahenapa ema Viya, vahi ecueñamava eta ecaquenuirahi. Téhesera ímaha eta iúchucuiraina, tájinachucha táichava.

²² Taicha mácani achane músuhi eta máítaresira, tayanapanerine matiarihinahi ema máquenuinahí; téhesera te mamirahu ema Viya, tínunánaripahi mácani achane nájina máquenuinahini eta máítaresira. Puiti ena apinana mavanaranaripahi ema Viáquenu Jesucristo, taicha ticuticacanaripa eta nacaemataneasiraipa éma.

²³ Taicha mavachareruhehi ema Viya. Ichapemurihi eta macatajivairahi íchavenehi éti. Puiti machaneraheripa éma. Eta tacahe, te navarahapuca nayurucahe ena achaneana, vahi ecuisapava nahapapicahe eta ecaemataneasirayare ema Viya.

²⁴ Eta tacahe, nuparapenaveana, ímiyanavayare ecaematane mayehe ema Viya. Ítauchayare eta ématanerepipachu íjaracasíhi me Viya.

²⁵ Tiuri puiti, tájina vanairipina tásihaquenéna me Viáquenu nayehe ena amaperuana máyénareanaríchaha énapa ena máimaruanachaha. Nútisera

numetacaheya eta nupanereruhi. Nuvarahasera esuapanu taicha núti nucaimitucasiquenehi mayehe ema Viáquenu, táichavenehi eta majapanuiranuhi.

²⁶⁻²⁷ Puiti juca vítaresirahi, tétavicavahi eta vicatajivairahi. Eta tacahe, németeaca núti tíurírichu nánasi ena ajairana nayehe ena nayenana nácani nacayenaqueneanaripahi. Vahi nacuinajicaca. Énaripa ena máyénareanarichaha, vahi nacutanuca ena nayenaina.

²⁸ Mácanisera sutiaríhi esu mayena, tájinachucha pecatuina eta mavirahi esu esena. Ésuripa súcani amaperu esena, te tatupiruvahi eta sucaimaira, tájinachuchavare pecatuina eta sucaimairahi. Táitsivasera ichapeyare eta nacatajivairaya eta náitátiracacaya, tavetijipa te natiaríhinapa ena nachichanavenaya. Eta tacahe, nuvaraha numetacahe apaesa vahi ecucatajivahini.

²⁹ Tiuri, nuparapenaveana, nuvaraha numetacahe ticutimahi ánipirine eta juca vítaresiraya puiti juca vicaijuheya. Eta tacahe, táurica eta íjarasiravahi yátupina eta ecaemataneasira ema Viáquenu. Étiripa, éti natiaríhi ena eyenana, vahi tacucarichu eta ecañamasirava nayehe ena eyenana, énerichuvare me Viya.

³⁰ Te jararíhipapuca eta tacáiyasiráhe écatísamurepuca, vahi ecuisapa tahapapicahehíni eta ecaemataneasira ema Viáquenu. Te jararíhipapuca eta tacaurisamurechiráhe, váhivare ecuisapava tahapapicahehíni. Te ecaimahaquenehipuca, tísapacare eta ecamapura eta ímahaqueneana eta májjararuhehi ema Viya, váhivare ecuisapa tahapapicahehíni eta ecaemataneasirahi ema Viáquenu.

³¹ Nuvaraha táuríhíni eta ítaresirayare te juca. Váhisera ecuisapava ecucañamaracava eta ecayeheirayare eta ímahaqueneana te juca apaquehe. Taicha tamutuyarehi témitiaca te táitecapapa eta táitaviraya eta juca apaquehe.

³² Eta tacahe, vahi nuvaraha ecañamaracava tayehe eta júcana, taicha mácani achane máyénarehi, tájina tahapapiricahíni eta macaemataneasirahi ema Viáquenu, mavarahahi máicutichiravaya eta macurisamurechiraya ema Viáquenu.

³³ Mácanisera achane te sutiaríhipa esu mayena, ticañamaracavainapa taicha eta máitátirayare esu mayena, mavarairahi macurisamurechaya ésu.

³⁴ Ene nacahehi ena esenana. Vahi tácuticaca eta napanereruana suyehe esu esena sucaimaquene ésupa esu esena máimaruchaha. Taicha súcani máimaruhi tahapasamurechahi eta suítátiraya ema Viáquenu, suvarairahi suítauchaya eta mavarahaqueneana. Suíjaracayarehi ema Viya eta suáchaneva étapa eta suáquehe. Ésusera esu esena sucaimaqueneapa tahapasamurechapa eta suítátiraya ema suima, suvarairahi sucurisamurechaya éma.

³⁵ Eta júcana nuconsejarapianahi eyehe, nuvaraha eta táurivaina eta ícharacavaya. Vahi nuvaraha nupamicahe tayehe eta tacajeraqueneana. Nuvarahasera tacujahíni eta tihapapicahe eta ítátirayare ema Viáquenu.

³⁶ Tiuri puiti, eta juca nuconsejarapi mayehe mácani achane te sutiaríhipuca esu machicha esena máimaruchaha. Te tahapapiricaipapuca eta sucaimairayare esu machicha, táichavenehi eta suítanahasiraipa; te tíuríhi eta máimairahi, máisapayarehi ticaíma esu machicha. Tatupiruvayaresera eta sucaparaperayare. Tájinachucha táimanena; váhivare pecatuina.

³⁷ Mácanisera achane, te tájina máichiravainahíni, nájinavare tipamicaimahi; te mavarahapapuca suánasi máimaruina esu machicha, tíuríhi maicha.

³⁸ Tacahe, tiuri máichayare mácani achane máimachayarehi, tatuparacahi ticaparapeyare esu machicha. Mácanisera vahi máimachahini esu machicha, éma tiúripana maicha.

³⁹ Esu esena ticaima tatuparacahi suítauchayare eta suíjarasiravahi ticaima, sunasirichuya eta mayehe ema suima eta náitaresirana. Tiámainucava te táitecapapa eta máitaviraya ema suima, tiúchucuhapa ésu. Ésupa téchinava eta suítaresirayare. Tísapacarepa eta suápechava sucaima. Tacamunuhisera mácani vicutiquenehi vichamurihi tisuapajirahi me Viya.

⁴⁰ Tiápajucavasera tiúripanaya te suánasipa máimaruina. Eta juca tásihaquenepa te nupanereru. Németecahi núti tétupicavapahi eta nuconsejariana taicha mávahárunuhi ema Espíritu Santo.

8

Éma Pablo mametacavaca eta nayaseresirahi te tiúrihipuca nanica eta tinicacareana tacayujarahuquene te tamirahu eta nasiñarajiana ena achaneana

¹ Puiti numetacaheya eta táicharacavahi eta enisira eta tinicacareana nayujaraurehi te tamirahu eta nasiñarajiana ena achaneana. Yátupi vimutu vímatiequeneha tájinachucha táimanena eta juca. Váhisera vácasiañavaimahi eta vítusirahi. Tacamunuhisera tajurucaya eta vémunasiravaca ena vichamuriana, vímicatasiracacaya eta véhisira ema Viáquenu.

² Taicha nararihi ena ticasiañavavaicanapa, tímijachavanapa náimatiequeneha tamutu. Eta juca náichahi táimerecachi vuíchaha náitucahini, vuíchaha nacapayayaracahini eta mapanereru mácani yátupipa máituca.

³ Nácanisera yátupihí témunacanahi ema Viya, éta tímicaecherachahi eta machichanaveanairahi éma.

⁴ Tiuri puiti, numetacaheya eta juca nuconsejarapi tayehe eta juca enisirana eta tinicacareana tacayujarahuquenehi te tamirahu eta nasiñarajiana ena achaneana. Tájinachucha táichava, taicha eta nasiñarajiana vahi yátupinahini víyanainahini te juca apaquehe, taicha émanarichuhi ema yátupiquenehi Viya.

⁵ Éna achaneana náimijachahi camurianahi ena víyana te anuma, étaripa te juca apaquehe. Namaveracapa ena náquenuanahi nayeheanahi viya, camurianapa naicha eta nasiñarajiana.

⁶ Vítisera viti vímatiequenehanahi émanarichuhi ema Viya Vicaiyaquene te anuma. Éma Jesucristo, émanarichuhi ema Viáquenuhi. Éma Tata Vicaiyaquene mapanerechapa eta tatiarihiyare tamutu eta vímahaqueneanahi; vítipa vimutu achaneana, mavaraha vitarihiya eta vicaemataneasiraya éma. Tásiha, ema Machicha tépiyacahi tamutu. Puiti émapa téchahavihi vimutu. Éma, tíjaracahavihi eta arairu vítaresira.

⁷ Tisimutuanasera ena vahi náimatiequeneha eta juca. Énaripa ena vichamuriana, nararihi ena vuíchaha náemitisicahini eta navaraira napi-caucha eta nasiñarajianaini. Éna, tisamavanahi vaipa náetupicavanahi eta nanisirahi eta tinicacare tacayujarahuquenehi, vahi táuricahini eta nasami-rahi.

⁸ Numetacahesera puiti, vahi étaparacaina eta tinicacare, vijacapacareyare me Viya táicha. Váhivare étaimahi tiúrichahavihi mayehe ema Viya, te vahi vinicahi. Váhivare tíjararecavimahi mayehe te tiúrihipuca eta vinisira.

⁹ Éta tacahe, ecauneuchava yátupina machu émejecapavacha ena apamuriana vichamuriana vuíchaha náimatiequenehanahi eta júcana.

¹⁰ Étisera éti ímatiequeneanaripa, te ísapavayarehipuca enica eta tinicacare nayujaraureanahi te tamirahu eta nasiñarajiana; tacahe, te máimahahepuca ema echamuri, énerichuvare ísapavayarehi tinica. Táitsivahisera tipicacarcavahi jácani te masamure.

¹¹ Eta tacahe, échapavaya éti tayehe eta ímatiequenehairaripa machu émejecapavacha ema echamuri mácani vuíchahapiravahi máimatiequenehahini eta júcana. Émarichuhi iúmuvivahi eta mavacharesirahehi ema Cristo eta máepenirahi te crusu.

¹² Éti, te ehapapicapuca eta táurivahi eta napanereruana ena echamuriana, éti ecapecaturaipa eta mayehe ema Cristo, taicha eta émejecapavachirahi ena echamuriana.

¹³ Ácutinu eta juca nuyeherepihi: Te nútinahipucaiini némejecapavachaini mácani nuchamuri táichavene eta nunisirainahini eta vaca, váhirine nuni-caimahi, apaesa vaipa nucuemejecapavachahini éma. Éti apanava, ene ecaheyare. Váhivare ecuemejecapavacha ena echamuriana.

9

Ena apóstole Pablo, tatuparacahi náitátityare ena máimitureana

¹ Núti, nájina náquenuinahini te juca apaquehe. Yátupi apóstolenuhi mayehenuhi ema Viáquenu Jesucristo. Nucutinasivacahi eta návacurehi nayehe ena apamuriana apóstoleana taicha nímahaquenehi ema Viáquenu Jesús. Étiripa, etupiruvahi esuapanu eta nímitusirahehi. Éta tímereuchanuhi eta táurivahi eta nucaemataneasirahi ema Viáquenu.

² Tayanapane nacañajivarinepuca nácani vahi tisuapapajicanuanahi eta apóstolenuirahi. Étisera esuapanuyarehi, taicha etiaríhi eti nímitureanahi, étira ímereuchanuhi eta yátupirahi apóstolenuirahi mayehe ema Viáquenu.

³ Étara nucatiuchiavahi eta juca nayehe ena tépurujiricanuanahi.

⁴ Éti tituparacahehinéni ítátinuhini núti tayehe eta nunicaquenerepi táichavenehi eta apóstolenuirahi.

⁵ Énerichuvare tituparacahehi ítátihivaréni te sutiarihinahini esu esena nuyenainahini, súcani nucutiquenehi tisuapajirahi. Tácutihini eta ítátiravacahi ena esenana nayenanahi ena apamuriana apóstoleana, émaripa ema Pedro, énapa ena maparapenaveanahi ema Viáquenu.

⁶ Éti, ímijachaipapuca núti émapa ema Bernabé, vicarichuhi vahi tatuparacahavihini eta ítátirahavinahini eta vicametairuirahi.

⁷ Puiti nuvaraha nímicutiarachinaheyare eta nacaitaticasira ena ticaematanerahiana. Ani tacahe: Namutu ena suntaruana ticaitaticasianayarehi nayehe ena comandanteana. Énerichuvare, ema tiscurecahi eta tinicacare, tatuparacahi masamapuhayarehi eta tahi eta masucureanahi. Émaripa ticayehéhi vaca tatuparacahi máerayarehi eta tacheneama eta mavacane.

⁸ Eta juca níchirahéhi, vahi nácarichu núti nucapanereruhi eta júcana. Énerichuvare eta Sagrada Escritura májurehi ema Moiséini títametacahavíhivare.

⁹ Ánipa tacahehi eta táechajiriruvahi: “Vahi picuitisumucha eta pivuiyera, te ticaemataneapahi taicha técuhanapahi éta”. Táitaurevaquene ema Viya vahi tácarichuhini eta vuyie eta máechajisihahi.

¹⁰ Énerichuvare víti mayunacahi te máechajiruvahi. Mavarahahi vicaeni-casiyare vimutu viti vicaematanerahiana. Tacutihi mácani achane ticaematanerahi. Macaemataneacahi muraca eta máesane, mavarairahi máimaeque-nehayare eta távameanahi eta máesane.

¹¹ Ene vicahehi víti eta vévasirahi eta máechajiruruva ema Viya te esamureana. Éta tiúrichahehi. Tásiha, éti ecutinapa eta sucureca túmecavahi eta táhi. Tájina táichava eta ítátirahaviyarehi víti.

¹² Ena apamuriana ticasíñavanahi eta eyehe. Tásiha éti, tiúrihi eta ítátirahi. Vivetijipa víti vítáticarehi eta eyehe.

Váhisera vávarahahini vicasíñavahini víti eta eyehe, viyaseacahehini eta ítátirahavinahini. Vicamichahi tamutu, vimavarairahi tatiarihinahini jácani apanainahini tahapapiricahini eta esamirayarehi eta máechajiruruva ema Cristo.

¹³ Écharichuhi éti eta mavanairipi ema Viya nayehe ena téchapajiricana eta mayehe Templo, nanicayarehi eta tinicacare námaqueneasana ena achaneana nájjaracasiruanahi ema Viya. Cájjaracasianayareva éna eta vaca táeche eta námavahuanahi ena achaneana.

¹⁴ Ene tacahehi eta mavanairipihí ema Viáquenu eta viyehe viti vicametarairuanahi eta tapachinaquene máechajiruruva, tituparacahavihi vijacapayarehi eta vinicaquene taicha eta vicametarairuirahi.

¹⁵ Nútisera tájina nímatiyahini nuyaseacahehini eta ítátiranuinahini. Étaripa puiti te juca nucartane, váhivare nuyaseacahe íjaracanhini. Nucamichahi tamutu. Tiúririnehipucaini népenavanehini, machu tachimaranucaru táitava eta juca núrismurevahi nútí tamajinairahi nuyaseacahehini.

¹⁶ Nútí vahi étaparacaina nucasiñavahi taicha eta nucametarairuirahi. Nutuparahaichuhi eta juca. ¡Páurechichanusami te némunahacava nínajica eta juca nucametarairuirahi!

¹⁷ Taicha nútí, vahi nútijivainahini níjaracavahini mayehe ema Viáquenu eta nucametarairuiraya, étapapucaini nujacapihahini eta nuvachayarehi eta mayehe. Nuvanecasivahisera me Viya eta matuparasiranuhi eta juca némataneyarehi.

¹⁸ Ichapesera eta nuvarairahi eta nucametarairuirahi, taicha tijarahi te nusamure eta nuratahairahi nucametarairu, tamajinairahivare nuyaseacahehini eyehe éti. Vahi nupamicahehini eta ítátiranuinahini táichavenénahini eta nucatuparahairahi eta apóstolenuirahi.

¹⁹ Nájinahinéni te juca apaquehe napamicanhini eta nucaemataneasirainahini táichavénehipucaini jácani náítátiranuhini, énnainahipucaini náechanhini. Nútisera níjaracavahi nítauchayarehi tamutu eta nucamunucarevahi nayehe ena achaneana, apaesa étainahipucaini níurusihavacahini ena nasimutuvaqueneana, machaneranainahini ema Cristo.

²⁰ Étaripa te nítecapauchavacavare ena nujaneanana israelítana, ichape-rinehivare eta nupicauchiravacahí éna, apaesa najimuyasamurepapucaini eta náehisirainahini ema Cristo, étainapapucaini níurusihavacahini éna. Ena nani, ichape eta nasupirahi eta mayeherepiana ema Moiséini. Tásiha, te nucainunavaca éna, tájinavare vahi nucaecahihini eta nayeherepihi, nupicauchahivare éna apanava. Váhineni nútíparacainahini tayehe eta náehiruhi.

21 Tatiarihisera eta yátupiquenehi néhiruhi nuvanahihi mayehe ema Viya, máijjararunuhi ema Cristo. Énerichuvare te nucaínunavaca nácani apavasanana máehicarahanahi eta mayeherepianahi ema Moiséini, váhivare nucaecahivaca. Nupicauchahivare éna, nuvarairahi nucajimuyasamurechavacahini éna apanava.

22 Te nucaínunahivarepuca ena vichamuriana nácani vuíchahahi náitamuturucahini náimatiequenehahini eta véhisirahi ema Cristo, váhivare nucaecahivaca eta namaimatiequenehairarichaha. Ichaperinehi eta nujapanuiravacahi. Nímicatacavacapa, nuvarairahi náimatiequenehapaini yátupinahini eta véhiruhi. Namutu ena achaneana, nujapanuvacahi. Nutanucahi eta nucajimuyasihayare eta nasamureana apaesa nanerejicavapaini náehicahini ema Cristo, machaneranainahini éna.

23 Núti nítauchahi tamutu eta júcana apaesa najacapa eta tapachinaquene máechajiriruva ema Viya, apaesa vácuticacapai vámutuhini vijacapa eta viúrivayare maicha ema Viya.

24-25 Écharichuhi éti, ena ticavijarurahiana pelota, tijaneacavanayarehi muraca, ichape eta ticaravahunumanayare apaesa túmeanainapa eta naratahairaya navereasihaya ena nánaranayarehi. Te vahi najaneacavahini, vahi tiverearecanaimahi. Ene ecaheyare éti, ichape eta étumechiravayare apaesa tauri eta ecaemataneasiraya ema Viáquenu, ejacapihainasarepa eta étuparahahi mayehe. Eta navereareruanahi ena ticavijarurahiana, vahi tánasimahi. Témitiequenehavaneyarehi. Vahi tácutimahi eta vijacapaquenezare me Viya. Éta, tájinapa ticamitiequenehaimahi.

26 Nútripa eta nucaemataneasirahi ema Viáquenu, ichape eta nupamisiravahi, taicha eta nímatirahi eta mavarahaquene. Vahi némpururecavaimahi.

27 Nucaratacavahi muraca. Vahi nusuapahini eta tajamurachaqueaneanahi eta náquehe. Nupamicahi eta táemitisisirainahini eta tamauriqueneana, machu néjcapavapapucaini, tásiha váipapucaini nucujacpahini eta nícuchihi. Ichape eta nutsirihacarevavapucaini, tavetijipa eta camuriannairahi ena nímitureana tayehe eta véhisira ema Cristo.

10

Ema Pablo maconsejachavaca vahi nacucuti ena ticasíñarajjiana

1 Nuparapenaveana, nuvaraha némechaheyare eta náicharacavahi acane ena viáchucanaveanaini mámurivanaini ema Moiséini. Eta náehisirahi éma, tatiarihi eta úcaji tímicauchavacapai namutu éna. Eta nánuesirahi eta mar ticaijarehi Títsiama Une, namutu náimahahi eta tájjivahi eta nánuesiraya.

2 Namutu ena nani tíjaracavanahi eta náitauchiraya eta náehisiraya ema Moisés, eta nánuesirahi eta ichape une mar, náehisirahi eta úcaji*.

3 Énerichuvare namutu ticuticacanahi eta nanisirahi eta tinicacare tásihaquenehi me Viya.

4 Namutuhivare térana eta une tásihaquenehi me Viya. Eta juca une náeresaparacahi éna, táchurehi tayehe eta mari, maicha ema Cristo. Émairahi ema tínapumirauchapahi éna, máitativacapai eta napaisirapahi.

* **10:2** Ema Pablo máimicuticha eta nánuesirahi eta ichapequene mar, tímicitijiricavahi eta nacaicachasihini te une, étapa te jara úcaji.

⁵ Tamapurujihisera eta majaneasiravacahi ema Viya. Vahi émainahini éma náesenicahini. Tájínachucha vahi nacaurisamurechahini éma. Eta tac-ahe, máicuñacavacapa ema Viya. Namutuyaréni tépenaracánahi tayehe eta mávapaihí apaquehe. Tiúchucuhanahisera ena nachichanaveana.

⁶ Ena viáchucanaveanaini, táimicuñacahi eta najamurachirahi eta tamauri-queneana. Étara eta juca ticauyayacarehi eta viyehe, énémahihávinahini víti apanavare vácutihini éna eta najamurachirahi eta tamauriqueneana.

⁷ Váhivare ecucutipa éna eta nacasiñarajirana. Échava eta Sagrada Escritura ani tacahehi: “Ena achaneana náichapa eta napiestachirahi eta nasiñaraji. Ticeajacapanapa eta nanisiraya, téranapa. Técheputanapa tírimaicapanapa te tamirahu eta nasiñarajihí” tacahepa eta Sagrada Escritura.

⁸ Váhira énéna vicucahe víti. Váhivare vicuveha esu apana esena. Tacuija eta vituhusivaina. Machu vácutiriana éna eta nacaicuñairahi táichavenehi eta náichirahi eta juca tamauriqueneana. Tépenaracapanapa. 23,000 achane ena tépenanahi te jena étanaquenehi sache.

⁹ Váhira vicuyururujica tayehe eta mapanereruanahi ema Viáquenu. Ena nani tíyuruchavanahi, vaipa nasuapahini ema Viya. Tásiha, máicuñacavacapa éma, táechucavacapa eta quichare. Tépenaracapanapa.

¹⁰ Váhira tacucaracava eta échajisirana mayehe ema Viya. Vahi ecucuti eta náejecapiravahi ena viáchucanaveanaini. Macapapajiruanahi ema ángele mavaneruhi ema Viya.

¹¹ Tacahehira eta juca náichavaquenevahi ena viáchucanaveanaini. Púiticha tanasihi te ajureca téjacahi tamutu maicha ema Viya. Tamutu eta juca témechahavihi víti, ticatsimavacarehivare viyehe víti vinicapaequenehanahi eta juca táitavirainapa puiti juca sácheana vicaijuheyare.

¹² Eta tacahe, vahi ecumijachahini tájina tiáquipaichena. Tatuparacahi ecauneuchavayare tayehe eta tamauriqueneanahi.

¹³ Puiti juca eta vítaresira, jararihi eta tavaraha témejecapavachahavi. Váhiserá ecuaramihini, taicha eta tacahehi eta náichararacavahi namutu ena achaneana te juca apaquehe. Ecasiñavayaresera muraca mayehe ema Viya, taicha yátupi eta macasiñacarevahi. Éma, vaipa máisapaimahi távayuchavahichaini eta tapamisirahe. Jéhesare éma, tíjaracahénapa eta etumevayare, ecamichirayare tamutu.

¹⁴ Tásiha puiti, eti nuparapenaveana némunaruqueneana, érajicavayare nayehe ena ticasíñarajijiana.

¹⁵ Éti ímatiequenehahi tamutu. Eta tacahe, numetacahe apaesa táuri eta epanerequenehairaya.

¹⁶ Étaripa eta juca vérasahi vimutu viyujaraureasahi te vinicayare, étarichuhi táicutiarahi eta máitine máepusairuhi te crusu ema Viáquenu Jesucristo. Étaripa eta pan vinicaqueneasa viyuvetuhejiricacahi, étarichuhivare táicutiarahi eta máeche ema Viáquenu. Eta vérirahi étapa eta vinisirahi, táicutiarahi eta viúrujasiracacahi te májare, tásiha éma tiávahácahavihivare vimutu víti viúrujiacanahi éma.

¹⁷ Yátupi apanapanenejihavihi víti, visimutuvaqueneanahi. Émanarichuhisera ema viávaháruhi. Eta vinisirahi eta pan, étarichuhi te májare eta viyuja-rachirahi.

18 Eta juca viúrujasiracacahi, vicutivacaipa ena nujaneanana israelítana. Éna, tiúrujiacacanaahi eta nanisiraya eta tacayujarahuquenehi me Viya eta tinicacare, navarairahi mávahácavacaini ema Viya táichavenehi eta nanisira.

19 Tiuri puiti, vímatiequenehahi tájinachucha táimanéna eta vaca nayujaraurehi náijaracasiruhi eta nasiñaraji ena achaneana. Tacutirichu eta vaca mayujaraurehi. Taicha eta nasiñaraji, tájinachucha tasamacarevaihini.

20 Nuvarahasera némechahe, eta nayeherepiana ena nani máimatirahanahi ema Viya, énachucha náijaracasichahi ena éreanana eta tinicacare. Vahi émainahini ema Viya náijaracasichahini. Eta tacahe, vahi nuvaraha ímica-siapava éti eta nayehe, machu náimivehahe nayehe ena éreanana.

21 Vahi táuricahini apiquerehahavinahini: eta véhisirahi ema Viáquenu, tásiha véhichavarepucaini ena éreanana. Te enicayare eta tinicacare, te érayarepuca, tatupiruva eta ecurujisiracacaina mayehe ema Viya. Mácarichu émaina ecasiña.

22 Machu ímiyusemaca ema Viáquenu, taicha vahi áratahaimahi ecanara éma.

Vímerecaya eta vémunaraivanaya nayehe ena vichamuriana

23 Yátupinéni víti véchinavahi, viyeherepipachuyarehi eta vinisiraya, váhisera tácuticacahini táetupicavahini mayehe ema Viya, váhivare tácuticacahini táimicatacavahihini eta vipauchiraya ema Viya.

24 Tásiha, nuconsejachahe puiti: Vahi ácarichuimahi eti iúrichavayarehi; énerichuvare etanucayarehi eta táurichiravacayarehi ena apamuriana.

25 Te enicayarepuca eta vaca tiásiha te mercado, vahi ecuavamirahu eta enisirayare, váhivare ecucamesa ecuecha te ticayujarahuhupuca eta vaca, apaesa tacuija tahapasamurechahe.

26 Taicha ema Viáquenu, éma tépiyacahi eta apaquehe, étapa tamutu eta távapahianahi. Vituparahaichuhi eta vinisiraya máicha.

27 Títecapa te náichuhahepuca enica nácani vahi vichamurianainahini, te ísapavayarepuca tíamaheana, tiúrichucha enica eta nájararuheyare. Váhisera ecuyasereca te ticayujarahuhupuca eta tinicacare.

28-29 Téhesera natíarihinaupuca nácani tinecapaequenehanahi, te nameta-cahepuca eta nayujarauchirahi te tamirahu eta nasiñaraji, tiúripána vahi ecunica, apaesa tacuija tahapasamurecha eta mapanereru ema timeta-cahehi. Éti, émitisicapuca eta epicauchirahi eta nasiñarajiana. Émasera ema echamuri, vuichaha máemitisicahini. Tásiha, nuvaraha tacuija tahapapicahini eta mapanereruana icha éti.

30 Téhesera etarihinaupuca ecahe: “Vahi núraica nucarinepapuca núti tituparacanuhi nujaneacavayare apaesapuca vaipa nuemejecapavacha eta mapanereru ema apana. Núti nuhasulupayachaparaca ema Viya eta nunisirayare” ecahepuca.

31 Tiuri puiti, nuconsejachaheya: Tamutu eta enisirana étapa eta érirana, étapa eta ecaematanerana, tiúriyare tamutu eta íchirayare te mamirahu ema Viya énapa ena achaneana. Jéhesare, ena achaneana nacunachainapa ema Viya taicha eta náimairaheyarehi tiúrihi icha tamutu.

32 Jéhesare, nájinapa émejecapavaruímahi, énaripa ena israelítana, énaripa ena apavasanana, navetijipa ena vichamurianahi, taicha vicuticacahi eta machichairahavihi ema Viya.

³³ Ácutinu núti eta nuyeherepihi. Ichapemurihi eta nuvarairahi nucuri-samurechavaca namutu. Vahi nácarichuhini núti nutanucahini eta núrichi-ravayare. Énerichuva nutanucahivare eta núrichiravacaya ena apamuriana, taicha nuvarahahi tauri eta náehisiraina ema Viya, náuchucuiraina éna apanavare.

11

¹ Núti puiti juca nítaresirahi, étapa nupanahi eta máitaresirahi ema Cristo. Nuvaraha éne ácahéni éti apanavare, epananuyare núti eta juca nítaresirahi.

Esu esena témetserejicavaya nayehe ena suchamuriana te úrujisiravana

² Ichape eta nucunachahe eti nuparapenaveana, taicha eta emaemitisisiranuhi. Ímiyanavahivare éhica eta ímitucasivanahi nuyehe.

³ Nuvarahasera némechaheyare eta juca apanavare téchacarehi. Ema Tata Vicaiyaquene, éma machutirihahicha ema Cristo. Ema Cristo, émapa vichutirihahi vimutu viti ajairana. Ene nacahehi ena ajairana nacayenaque-nanapa, éna nachutirihanahivare ena esenana nayenana.

⁴ Eta tacahe, viti ajairana vahi viúrihahini vicaepacasihini te viyujarau-chavaya étaripa te vicametairuyare. Taicha te vicaepacasihi, tímicutijiricavaipa vémeperuhi ema Cristo eta vichutirihairahi éma.

⁵ Ésusera esu esena tatuparacahi ticaepacasiyarehi te tiyujarauchavayare, étaripa te ticametairuyare. Taicha te vahi ticaepacasihi, tímicutijiricavaipa suémepuruhi ema suíma eta suchutirihairahi éma. Te vahi ticaepacasihi ésu, tímicutijiricavaipa sucachucasiquenénahini ésu. Sucutihí ena túhusiana.

⁶ Esu súcani esena vahi suávarahahini ticaepacasi, ésu tivaraha sucutihare ema mácani ajaira. Tásiha, te suvarahapuca suácutihavi viti ajairana, tíúripanahi sucachucaspaini, suítahisivanepaini. Téhesera te tímitsiriacavaya-rehipuca eta suítahisiraya, tíúripanaichuhi sucaepacasihini, suácutihini ena supáraseenávana.

⁷⁻⁹ Taicha te tépanavanainapa ena achaneana, ema máinapuiruhi ajaira vahi étainahini máuchusinénahini suyehe esu esena. Te mavahuana ema Viya máepiyasinehi ema ajaira. Ema Viya manacahi eta máimahi, navasirichuhi eta máimahi ema Viya. Eta máurinavahi tásihaquenehi me Viya. Ésusera esu esena suínapuiruhi, súchurepa esu te máquehe ema ajaira, étaripa eta súrinavahi tásihaquenehi mayehe. Eta témepiyacahi esu esena, macompañerayare ema ajaira, mayenayarehi ésu. Vahi ésuina esu suémepiyacahini ema ajaira eta sucaimairaya. Eta tacahe, eta viyujarauchiravana, viti ajairana tatuparacahavi vahi vicaepacasihini, taicha viti vicaquehehi ema Viya, vicuticacahi ema viáchucaini Adán.

¹⁰ Énasera ena esenana, tatuparacavacahi ticaepacasianayare eta nayujarauchiravana, nacutiharehi ena ángeleana ticaepacamiranahi te natupihamirauchayare ema Viya, navarairahi náimereca eta napicauchirahi.

¹¹ Puitísera, eta juca vítaresirahi véhisirahi ema Viáquenu, ichapemurihi eta véjisiraipa eta náitátirahaviya ena esenana. Vítiripa ichapemurihivare eta náéjiasirahavihi éna eta vítátiraya viti ajairana.

¹² Esu esena, yátuphi eta súchusirahi ésu te maeché ema ajaira, puitísera viti ajairana étapa viúchusihahi te sujuhe esu esena ticachichahavi. Viásihaquenehisera vimutu mayehe ema Viya.

¹³ Nuvaraha epanerequenehaya yátupina eta juca. Németeaca nájina éti ímijachavahini tíuríhi esu súcani máepacasinávehi eta suyujarauchiravahi me Viya.

¹⁴ Viti ajairana véchahi eta tatsirihacarévahi viújjiquihini eta vichutimaca.

¹⁵ Suímiturevahisera esu súcani esena súrihahi tíújjiquiyarehi eta suchutimaca. Étara tíúrinachahi ena esenana. Nájaraichuhi éna eta nacaepacsiraya taicha natuparahaichuhi éna.

¹⁶ Te natiarihnapuca nácani vahi navaraha nasama eta juca nímiturapihi, tacamunuhi napanerechinavayare tativaina. Tájina vímatiyahini eta juca apayeherepi. Énaripa namutu ena vichamuriana, tájina apanaina nayeherepinahini.

Éma Pablo macajachavaca eta namaetupisiravahi te tinicanayare eta tinicacare táicutiarahi eta máepeninahavihi éma Viáquenu

¹⁷ Tiuri puiti, numetacaheyare eta juca apana. Tájínapa ecunachacarevaihini nuyehé, taicha vaipa táetupicavahini eta iúrujisiravanahi eyujarouchiravana.

¹⁸ Jucarihiserá eta juca ticatíhi nuyehé. Nusamairicahi te iúrujisiravana íchirana eta culto, vaipa tacuticacahini eta epanereruana, íputsimuriavavaca. Németeaca núti cañarihíhi eta íchavaquénévahi.

¹⁹ Páurehesami eta íputsimuriavairacacahi. Étainapasera ecaecheraiyaya eti yátupiqueneanahi machaneranahi éma Viya, énapa ena vahi machaneranaihini.

²⁰ Eta juca tíchahehi vaipa táetupicavahini te ecurujicaca enisirayare eta tinicacare táicutiara eta máepeninahavihi éma Viáquenu te crusu. Váipasera émainahini tatupiruruchahini.

²¹ Títecapa vaipa ecuchapacacahini. Nararihi ticainapupuiricavanapa tinicana nayéhechirávacapa. Tinahacavanapa térana técavahachávanapa. Nararihiserá ena apamuriana técuharipaicha.

²² Tájínapa táurivinahini eta juca íchaquenehi. Ticutipá tacuijaquénénahini epeninahini, étainapaini enisihahini érihahini. Tímicutijiricavaipa épuruvacahi ena apamuriana machaneranahi éma Viya. Ímicatsiriacavare nácani tájinaquenehi naviyavahini. Étupicavaipapuca eta juca ecahehi. Tájinaque-nepasera ecunachacarevaina eta nuyehé.

Éta táetupisiravahi eta vinisirahi eta tinicacare táemechahavihi eta máepeninahavihi éma Viáquenu te crusu

(Mt 26.26-29; Mr 14.22-25; Lc 22.14-20)

²³ Núti tatupiruvahi eta nucaimitucasirahi mayehé éma Viáquenu. Tásiha, étarichuhivare eta nímiturapihi eyehe. Taicha ani tacahehi eta nímitusirahéhi: Te jena yátiquenehi te ticaijararecasiyarepa éma Viáquenu Jesús, mavéhapa te mavahuana eta pan.

²⁴ Te tamutupa eta mahasulupayachirahi éma Viya, mayuvetucapa eta pan. Tásiha, máichavacapa ena máimitureana: “Enica eta juca néche. Étivenéhi nímiararecavahi eta népeniraya. Éta juca apajarahiyare te apaquehe, te étipava énicaca, éta témechaheyare nuyehé” macahepa.

²⁵ Te tamutupa eta nanisirahi, mavéhavarepa te mavahuana eta máerirare, mahasulupayachavare éma Viya. Tásiha, máichavarepa ena máimitureana:

“Era eta juca nítineama táepusairuvayare. Eta juca táicutiarahi eta nucaejasirayare eta arairu matratune ema Tata Vicaiyaquene eta eyehe, majacapirahayare eti ecasiñanuanayare, arairupa eta éhiruyare. Eta ichiraparacayare te énicaca, éta témechaheya eta nuyehe” macahepa ema Viáquenu.

²⁶ Puíticha tanasi eta juca. Apajarahiyahehi viyehe. Te vénicaca étapa eta véshacaca, vémechacacahi ena vichamuriana eta máepeninahavihi ema Viáquenu. Tiámáinucava vicainajiruyare te mápechavavare máiteca.

Tacamunu eta vipicauchirayarehi te vinicaya

²⁷ Namutu nácani tinicanahi téranahi eta táicutiarahi eta máepeninahavi ema Viáquenu, te vahi tétupicavahi eta napanereruanahi, váhivare napicauchahini, ticapecaturanaripa éna. Náemepururecaripa eta máítine étapa eta máepenirahi.

²⁸ Eta tacahe, nácani tinicanayare, tativanumayare tipanereacavanayare te tájinahipuca náichiravainahini te mamirahu ema Viya. Te tájinahini nasama, tísapavanayarehi eta nanisirayare, náerirayare.

²⁹ Taicha te vahi tipicauchacarehi eta náimairahi eta máeche ema Viáquenu eta nanisirayare, náerirayare, énajivaichucha tíchavanahi, tímicuñacavanaripahi eta nanisirahi.

³⁰ Étara tíchahehi eta juca táitusiava esimutupa eti ecajumanahi, tájinapa tatumevainahini eta iáqueheana. Ena apamuriana tépenanapaipa táicha.

³¹ Téhesera vítijivahi vétupirica eta vítaresirahi, ema Viáquenu vahi tícuñacahavimahi.

³² Taicha mavarahahi vétupiricayarehi. Vaipa vicaicuñaimahi tayehe eta nacaicuñairayare ena apamuriana achaneana máimatirahanahi ema Viya.

³³ Eta tacahe, eti nuparapenaveana, te ecurujicacayare eta enisirayare, ecuchapacacayare apaesa ínuna eta enisirayare.

³⁴ Téhesera matiarhipuca mácani técuhasamureripaicha, tíuripana manicanuma te mapena, apaesa vaipa macuemecharecahe ema Viya taicha eta tamaetupisiravahi eta iúrujisiravahi. Étasera eta juca apamuriana téchacareanahi viyehe, nímaharinepa núti. Nétipiricaya te níteca eta ara eyehe.

12

Vimutu viti vítupajjiasiravapachuyare maicha ema Espíritu Santo

¹ Nuparapenaveana, nuvaraha numetacaheyare eta apana téchacareana, apaesa yátupina ácaicutiara. Jucarihi apanapanenejihi eta vítupajjiasiravayare maicha ema Espíritu Santo.

² Écharichuhi éti, te vuíchaha émainahini éhica ema Viáquenu Jesucristo, ísapajiricavaichaha tipamicaheana éhica eta nasiñarajiana tájinaquenehi eta tájica-paraiváinahini.

³ Nuvaraha némechaheyare eta juca ímatirayare nayehe nácani vahi mávaháruanaimahi ema Espíritu Santo. Te nacahepuca: “Másájitatajipucaini ema iáquenu éti”, te nacahepuca eta juca, ímativacaya éna. Taicha ena mávaháruanahi ema Espíritu Santo, nacarichu ena tatuparacahi náimatiyare eta aquenuairahi ema Jesús. Énasera ena vahi mávaháruanainahini ema Espíritu Santo vahi tatuparacahini nácahepucaini: “Ema Jesús émara Viya Viáquenuhi”.

⁴ Viti mávaháruanahi ema Espíritu Santo, apanapanenejihi eta vítupajjiasiravana májjararuhavianahi. Émanarichuhisera éma.

5 Énerichuvare apanapanenejihi eta vémataneana máijararuanahi ema Viáquenu. Émanarichuhisera éma.

6 Te tamutu eta vicaemataneasira, ema Viya émarichuhi ema téchahavihi, tjáracahavihi eta vitumevahi, viratahairaya vimutu.

7 Énerichuvare ema Espíritu Santo, víjaracasípachuhi eta vítupajijiasiravayare máicha, vímitusihayarehi eta tasimutuqueneanahi namutu ena vichamuriana.

8 Nararihi ena máimicatacavaca ema Espíritu Santo eta náitusiraya téchajicana, náimituresiraya. Ena apamuriana máijaracavacavare máejerareyare eta nacaicutiarairaya eta mapanereruana ema Viya. Émanarichuhisera ema Espíritu Santo tjáracahi eta juca.

9 Nararihivare ena máijararuanahi eta nacuchapirayare muraca eta nayasearuanahi ema Viya táichavene eta nacasiñavairahi eta mayehe. Nararihivare ena máijararuanahi eta nacanarasirayare ena nacajumaqueneana.

10 Nararihivare ena máijararuanahi eta nacuchusiraya eta tiáramicareana. Ena apamuriana náijaraichuvare eta ticametacasianaya mayehe ema Espíritu Santo eta máechajiriruvanahi ema Viya. Ena apamuriana máijaracavare eta náimatisiravaneya ena achaneana nájahapuca nácani mávaháruanahi ema Espíritu Santo, nájahavarepuca ena mávaháruanahi ena éreanana. Ena apamuriana máijaracavare eta tíuririchuya eta náechajisiraya eta apaechajiriruvana. Ena apamuriana máijaracavare eta náitusirayare, nápepica náechajisiha eta apaechajiriruva, trépeteanayarehi.

11 Tamutu eta juca máichaqueneanahi ema Espíritu Santo. Macarichuhi ema máítaparahahi máijaracavaca eta náitucaquenepachuyare namutu ena mavarahaqueneanahi máijaraca.

Émanarichuhi ema véhiruhi

12 Viti achaneana, apanapaneneji eta táijareana eta viáquehe. Tisimutuhi eta táitupajijiasiravana. Étanarichuhisera eta táuchusihahi te viáquehe. Ene tacahehi eta véhisirahi ema Viáquenu Jesucristo. Vimutu viti véhicanahi éma, apanapanenejihavihi, visimutuhivare. Émanarichuhisera ema véhiruhi.

13 Tacahe, vahi étaparacaina te israelítahávipuca, te apavasajuecuha-vihivarepuca, étaripa te máquenurehavihipuca. Téhesera te vicaicachasipa eta véhisirayare ema Viáquenu, étanarinepa eta vímahi maicha ema Espíritu Santo. Énerichuvare, eta mávahásirahaviripa, vicuticacaripa eta máecasarechirahavihi eta viáchanevana.

14 Yátupi eta viáquehe vahi étanainarichuhini eta táimahanahi, étape eta táitupajijiasiravanahi.

15 Étaripa eta vívape, vahi távasihini eta vivahu, váhivare tacuticacahini eta táitupajijiasiravanahi. Étarichuhisera táunavahi eta viáquehe.

16 Étaripa eta vichaca, vahi távasihini eta víuquiha. Étarichuhivaresera táunavahi eta viáquehe.

17 Váiparinehi táuricaímahi amairihainahini eta viáquehe tacaquihahini. Tásiha, tacuijapucaini víquiñainahini, tacuijapaini visamaquenenahini. Váhivare táuricaímahi amairihainahini eta viáquehe tacaquiñahini. Tásiha, tacuijapucaini visirinahini, tacuijapaini vijiurenahini.

18 Ema Viya manacahi eta táematanerepianayarepachuhi eta juca táunavanahi eta viáquehe. Taicha tacahehi eta mapanereruhi ema Viya te tépiyacahavinapa.

19 Vahi mávarahahini étanainarichuhini eta táitupajijiasiravainahini eta viáquehe, amairiquihahavinahipucaini.

20 Yátupi tisimutuhi eta táitupajijiasiravanahi eta viáquehe, étanarichuhisera eta távihahi.

21 Tamutu eta juca viáquehe ticamunujiricacahi. Étaripa eta viúquiha tacamunuhi eta vivahuana. Étaripa eta vichuti tacamunuhivare eta vívapeana, vipaisihayare.

22 Étaripa eta tiávihanahi te amahe vijuhe, matumearairahapahi eta vímairahi, étahisera tiápajucavahi ticamunucarepanahi.

23 Jucarihi eta viáquehe ticutimahi vahi múnainahi eta vímairahi. Étahisera tiápajucavapanahi vimuriachahi. Jucarihivare eta viáquehe vaipa táuricachini vímereichini. Tásiha, tiápajucavapanahi vépacucurehi, vicatiuchahivare.

24 Jucarihivare eta apana táunavahi eta viáquehe ticutimahi vaipa vicamunuhi vépacuchahini. Tímererecavahi nayehe ena achaneana. Tamutu eta juca máepiyaruanahi ema Viya, máicuchahi eta táimahianapachuhi, mavarahahi tácuticacahi eta vémunasiraya tamutu eta táunavanahi eta viáquehe.

25 Eta tacahe, te vicaematane, tamutu eta viáquehe tiyamuricahi, tímicatajiricacahi. Ichapehi eta táejiasiracacahi. Vahi táiputsiacacahini.

26 Étaripa te tatiarhipuca eta táichavaquenevahi eta táunavahi eta viáquehe, támaiicachini ticati eta viáquehe. Téhesera tatiarhipuca eta táurisamurevahi taicha eta táitupajijiasiravanahi, tamutuyarehi eta viáquehe tiúrisamure.

27 Ene ecahehi éti eta éhisirahi ema Viáquenu Jesucristo. Eta iúrujisiravahi mayehe, ecuticacahi eta táunavanahi eta máquehe.

28 Énerichuvare, ema Viya tituparacahavipachu eta viávacurepachuhi, mavarairahi vijaneacaheyare eti vichamuriana, machaneranahi. Tituparacahavihi viti apóstoleana vímahaheya, énapa ena profetana, énapa ena tímiturecarahianahi eta máechajiriruvana ema Viya, énapa ena títuruequenehanahi nacuchuca eta tiáramicareana, énapa ena ticanararecanahi ena nacajuqueneana, énapa ena tímicitarahianahi nayehe ena nacamunuquenevána, énapa ena tiúrianahi eta nacavanairipirana, énapa ena tiúririchu eta náechajisiha eta apaechajiriruvana, énapa ena trépeteana títucanahi nápepica eta apaechajiriruvana.

29 Vahi étanainarichuhini eta viávacureanahi. Vahi vámutuhini apóstolehavinahini, vahi vámutuhini profetahavinahini. Vahi vámutuhini vímiturecahini. Vahi vámutuhini vicuchuca eta tiáramicareana.

30 Vahi vámutuhini vítupajijiacavahini vicanararecahini ena nacajumaqueneana. Vahi vámutuhini véchajicanahini te apaechajiriruvana. Váhivare vámutuhini trépetehavinahini.

31 Tiuri puiti, étipa tacamunu eyaseaca ema Viya máíjaracahé eta ítupajijiasiravaina eta ticamunucarepana. Jéhesare, nuvaraha nímitucaheyare eta apana táurinaquenepana. Esamanuchaha.

1 Vítiripa, te tacuijahipucaini eta vémunaraivainahíni, vaipa tisuapacarémahí eta vimetarairuana. Vémunasiricavapa. Tayanapane vítucahipuca véchajica tamutu eta apaechajiriruvana, vácutipucaini eta náechajisira ena ángeleana.

2 Te tacuijahipucaini eta vémunaraivainahíni, tájinapa vicunachacarémahí me Viya. Tayanapane vicametarairuhipucaini eta vimetacasicavanahi te anuma, támutuhivarepucaini víturuequeneháini, étaripa te máijahúchapucaini macayejecahini ema Viya eta ichapequene mari táichavenénahini eta viyaseasirainahini eta vicasiañavairainahini eta mayehe.

3 Tásiha, te tacuijahipucaini eta vémunaraivainahini, tájina vijacacacarémahí me Viya táicha. Tayanapanevare vicajirichahipucaini tamutu eta vímahaqueneana te vipena, téhevare visapapucaini náijuchaini eta víaquehe táichavenénahini eta namaurisirahi véhica ema Viáquenu.

4 Téhesera yátupihí vémunarahi, vicayeheyarehi paciencia, vijapanurahiye. Vahi vicapinarurecaimahi. Váhivare píncanillahavimahi. Váhivare vicasiañavavaicaimahi.

5 Váhivare vicavapajaimahi jácani táíñemahiqueneana. Váhivare víverejimirachaimahi ena apamuriana achaneana. Váhivare tijuricati visemaimahi. Váhivare vicitianarecaimahi.

6 Váhivare táurichahini vicaecahirahihini te vímaha nácani ticaejeanahi. Viúrisamuresera te vímaha ena achaneana tíúrihi eta náitaresira.

7 Te yátupihí vémunarahi, vicamichayare tamutu. Vahi énevanémahi visuapa eta echajirirucavana náepiyapiruanahi ena achaneana. Vicuchapayarehi eta táetupirisiravayare eta panererucana. Vahi víjahúchavaimahi vínajcava, vicuchapínávayare.

8 Tájinapa títaimahi eta vémunaraivayare, vímiyanavainapa eta vítaresiraya. Eta jena sácheanayare, vímatiequeneha tamutu. Vaipa vicamunu eta vimetacasicavana eta metarapianayare tásihaqueneanayare me Viya. Tájinapa víatájivaimahi eta visamirayare eta apaechajiriruvana. Váipavare tácajeraimahi eta visamirayare vímatiequenehavanénapa.

9 Taícha puiti te juca vítaresirahi, apaesachicharichu eta vímatiequenehairahi, apaesachicharichu eta vítusirahi eta metarapiana tásihaqueneanahi me Viya.

10 Járjapainapasera eta sácheyare, vímatiequenehainapa yátupi eta mapanereruana ema Viya, eta vímáimatiequeneruanahi puiti. Vaipa vácamunu ena tímitucahiviana.

11 Nímicutichavahi núti eta víamaperuvahi. Vuíchaha vítucahini vipanerereca, vimapachichijiricavaichaha. Téhesera te ajairhavipa, te esenapuca, títsivachavapa eta vipanereruana. Vínajcava eta víamaperuvainihi.

12 Ene vicahehi víti eta juca vítaresirahi. Puiti vuíchaha támutuhíni vímatiequenehahini. Ticutirichaha te vímararacaicha eta vicuna te jácani ichasi espejo, vahi tacaecherahini. Járjapainapasera eta sácheyare ticaecherainapa tamutu. Puiti, ticajera eta vicaicutiarairahi víti. Ema Viya vuíchaha tímitucahávihíni tamutu eta mapanereruana. Téhesera te apajarahinapa, tamutuya vicaicutiara máicha. Tacutirichu eta máimairahi puiti eta vipanereruana víti te amahe eta visamureana.

13 Puiti, eta juca vicaijuheya, vímiyanava vámutu muracaina eta vicasiañavairahi me Viya, váhivare vicuyacujihini eta vicuchapirapaipa eta víúrivai-

napaipa, tacuijavareni tahapapirichahini eta vémunaraivayare. Jéhesare, tíápajucavapanayarehi eta vémunaraiva. Étara ticunachacarepanahi me Viya.

14

Tísapacare eta náechajisiraya eta apaechajiriruvana

¹ Tacahe, nuvaraha núti yátupina eta émunaraivaina. Nuvarahahivare eyaseaca ema Espíritu Santo eta ítupajijiasravaina, étaripa eta ítusiraina ecametarairu eta máechajiriruva tásihaqueneanahi mayehe ema Viya.

² Tájina táichava, nácani téchajicana ema Viya eta apaechajiriruva. Éma masamahi. Vítipasera viti apamuri vaipa vácaicutiarahini eta náechajiriruvahi. Yátupihpuca máimitureanahi ema Espíritu Santo, váhisera náimereuchavahini eta máimiturapihi éma.

³ Vahi tácuti nácani nacametarairuhi eta máechajiriruvana tásihaqueneanahi mayehe ema Viya, ticaicutiaracarehi tamutu eta nametarapianahi. Tatupiruvahi eta náimitusiravacahi ena apamuriana. Náetumechahi eta náchanevana eta nasuapiraina. Éta nacurismurechihavacahi te jácani napanereresirana.

⁴ Ema mácani téchajicahi ema Viya te apaechajiriruva, mayechiravarichuhi te máchaneva eta macajurusiraya eta masuapajiraivaya. Émasera mácani tcametarairuhi eta máechajiriruvana tásihaqueneanahi mayehe ema Viya, macajurusirahi eta nasuapajiraivayarehi ena machamuriana.

⁵ Nuvarahahinéni núti ámutuhini ítupajijiacavahini maicha ema Espíritu Santo, échajicahipucaini te apaechajiriruvana. Tíápajucavahisera eta nuvarairahi ecametarairuhini eta máechajiriruvana tásihaqueneanahi mayehe ema Viya, taicha étara tíúripanahi eta juca tayehe eta échajisirainahini te apaechajiriruvana. Tíúrihinéni échajicahini, tacamunuhisera natiarihinahini nácani trépete, nametacavacasarepaini ena apamuriana eta tacayemaqueneanahi apaesa tajurusihapaini eta nasuapajiraivainahini.

⁶ Nútiripa, nuparapenaveana, nítecapauchahepucaini néjirapanahini, tásiha néchajicapahipucaini te apaechajiriruva eta eyehe, éti vahi ácaicutiaraimahi, váipavare tímicatacáhémahi eta tajurusirainahini eta ecasiñavairahi me Viya. Tacamunuhi néchajicahini te échajiriruvaichu eta nímitusirahénahini, éti ecaicutiarasarepaini tamutu eta numetacasicavanahi me Viya, étapa eta máimerechaquenuhi, étapapuca eta máimatiquenehi, arairu eta vyehe.

⁷ Eta juca tímicutijiricavahi te mapacharajihí eta masiviviripi ema ticasivivihí. Vaipa tacaicutiaracarehini tájahapuca eta masiviviripi. Émaripa ema violinista, váhivare ticaicutiaracarehini tájahapuca eta mapununerapi.

⁸ Énerichu tacutihí mácani cúrnetéru nayehe ena suntaruana, te váhivare ticaicutiaracarehi eta macachujairahi, váiparinehi tíurujicavanaimahi ena suntaruana táichuhaqueneanahi, taicha vahi nácaicutiarahini.

⁹ Ene ecahehi éti, eta échajisirahi eta apaechajiriruva, nájina nacaicutiarahini. Tímicutijiricavaipa nacuijahini nasamararacahini eta échajisirahi.

¹⁰ Yátupi tisimutuhí eta apaechajiriruvanahi te juca apaquehe. Nayehepachuhisera nácani ticaechajiriruvanapahi.

¹¹ Vítiripa te náechajicahavipuca ena extranjeroana te náechajiriruva, váiparinehi vácaicutiaraimahi. Énaripa váhivare ticaicutiarahavianaimahi víti.

12 Tiuri puiti, vahi tacumapuruji eta evarairahi ejacapa eta ítupajijiasi-ravanaya máijjaruheyarehi ema Espíritu Santo. Tiúripa eyasesereca eta ítusiraina ímitucavaca ena echamuriana apaesa tajurucapaipa eta nasuapajiraivaina éna apanava.

13 Tásiha, mácani téchajicahi te apaechajiriruva, tacamunuhi mayaseacahini ema Viya eta máitusirainahini mametacavaca eta tacayemaquenehi eta máechajiriruvahi apaesa nacaicutiarasarepaini nácani tisamararacanaahi.

14 Taicha eta viyujarasirahi víti te apaechajiriruvana, te vítapiricapa eta viyujarasirahi, vahi tánasihini véchavahini eta vicayemaqueneanapahi, vémitisicavanehi tamutu.

15 Eta tacahe, tiúripaahi viyujaraca te véchajiriruvaichu, tásihaqueneanahi te visamure. Te vijirayarepuca, tiúripaahivare te véchajiriruvaichuvare, tásihaquenéahivare te visamure, vicaicutiarasarepaipa eta vicayemaqueneanapahi.

16 Téhesera apaechajiriruvahi eta eyujarasirahi me Viya, yátupihí eta ecunachirahi éma. Énaserá ena tisamararacaheanahi vahi náehicaímahi eta eyujarasirahi náimicatasirahehíni eta nayujarasirahi; taicha vahi nácaicutiarapahíni eta ecayemaqueneanapahi.

17 Tiúrihinéni eta eyujaracasahi eta ehasulupayachirahi ema Viya, énasera ena echamuriana vaípa táimicacavacahíni eta eyujaracasahi.

18 Jéhevaesera núti, ichape eta nuhasulupayachirahi ema Viya taicha eta níтусirahi néchajica eta apaechajiriruvana. Nucachuriacahehi emutu éti.

19 Étasera te nucametarairuyare te namuri ena vichamuriana, vahi nuvaraha nácuti ena tiúpiemana eta náechajisira te apaechajiriruvana. Núti ánipirichu te néchajica, tamutuhisera ticaicutiaracarehi nayehe ena nímitureanahi.

20 Nuparapenaveana, éti vaipa amaperuhénahini. Nuvaraha táuripaini eta epanereruana, eta íchirayare eta táuriqueneana. Nuvarahasera ácutihini ena amaperuana vuíchaha náitucahini naicha eta tamauriqueneana. Énenapaini ácahehíni éti.

21 Ema Viya, ani macahe eta te Sagrada Escritura: “Nutuparacayare ena apanaqueneana achaneana apaechajiriruana náimitureca eta nuvanairipiana eta nayehe ena achaneana távacuanahi eta avasare. Váhiquenesera nasuapaimahi” macahepa ema Viya.

22 Tacahe, nácani tiyujaracanahi te apaechajiriruvana, táicutiarahi eta máijjarasiravacahi ema Viya náichavenehi ena máehicarahanarichaha ema Viáquenu. Jéhesare, tayuchusamurechavacayare eta nasamararasirahi. Énasera nácani ticametarairuanahi eta máechajiriruvana ema Viya, tayuchusamurechavacayare ena téhicanahi ema Jesús, taicha ticaravahuanayare eta nasamararasirahi.

23 Étasera te jácani iúrujisiravana, te eyujaracahipuca emutu te apaechajiriruvana, tásiha, te natiarhipuca nácani masuapajirairahanarichaha, ticaeca-híheanayarehi éna, náimijachayarehi máurishihehi.

24 Tiúripaayare eta ecametarairuiraya emutu eta máechajiriruvana ema Viya, te échajiriruvaichu. Tásiha, te natiarhipuca te iúrujisiravahi ena masuapajirairahanarichaha, ticatisamurevanayarehi taicha eta nasamararasiraya. Típanerequenehavanainapa eta nacapecaturairahi.

25 Tacahe, tímaticavanainapa eta máimatirahi ema Viya tamutu eta napecaturana tayumurevanainíhi. Tépuycanainapa téneuchavanainapa

mayehe ema Viya. Téchajisiaheanainapa: “Yátupiquenéyapa mávahácavacahi ema Viya ena nániana” nacahenapa.

Tacapicahu tamutu eta úurujisiravana

²⁶ Nuparapenaveana, áni tacaheyare eta úurujisiravanayare. Enerejicava eti íputsiacavayare eta ejirairaya. Énerichuvare tinerejicavayare mácani tíjaracavayare ema tímiturecayare. Énerichuvare te matiarihinapuca mácani mavarahahi ticametarairuyare eta mametacasivanahi me Viya, tájinachucha táichavahi. Tísapacarehivare eta échajisirayare te apaechajiriruvana. Tacamunuhisera matiarihiyare ema trépeteyare. Tamutu eta júcana, étera ticajurucayare eta nasupajiraívainapaipaicha ena echamuriana.

²⁷ Téhesera te natiarihinapuca apinana, mapananapuca ena tivarahanahi téchajicana te apaechajiriruva, tájinachucha táichava. Tísapacarechucha. Tévacajiricacanayarehisera te jácani náechajisirayare. Váhivare téjiacavaimahi ema nayeheyare trépete.

²⁸ Téhesera nájinapuca naviyavahi ema nayeheyare trépete, tíuripanaichuhi vahi nacuechajica te apaechajiriruva te namuri ena echamuriana náurujiruvanahi. Tíúri, te navarahhipuca náechajica ema Viya, tavarahahi nacari-chuyarechucha eta náechajisiraya.

²⁹ Nácani ticametarairuanayare eta máechajiriruvana tásihaqueneanahi mayehe ema Viya, te apinanahipuca, mapananahipuca, tájinachucha táichavahi, tíurichucha. Ticamunucarehisera ena náurujiruvanahi tisamaracananahi napaneréquenehayarehi tamutu eta nacayemaqueneanapahi ena ticametarairuanahi.

³⁰ Téheserapuca matiarihíhi mácani máejaruhi, ticametacasihiquenehi me Viya; tásiha mavarahapuca macuchujipica eta mametacasivahi, tísapacarechucha eta máechajisiraina. Macuchapavayaresera máitapiricanuma mácani máinapuiruhi téchajica.

³¹ Emutu eti ecametacasiqueneanahi eta máechajiriruvana ema Viya, ítsivajiricacayare. Émanainapachu mácani téchajicayare, apaesa ena ímitureanahi namutu nacaravahu, náetumechavahivare éna apanava.

³² Ena ticametarairurahiana tatuparacahi ticuchapavanayare. Vahi ticainapupuicavanaimahi.

³³ Taicha ema Viya vahi mávaraha mapacharajinahini nácani ticametarairuanayare. Tásiha, éti ecaejarusinavayare apaesa ecurisamurecha ema Viya.

Táepiyarichuhi eta juca viyeherepi víti te víurujisiravana.

³⁴ Ena vichamuriana esenana timatinanayarehi. Vahi téchajicanaimahi. Nasamararasinavaichucha. Taicha sujárachuhi me Viya esu esena susamararasiyareichuhi.

³⁵ Te tatiarhipuca eta suvarahaquenehi suecha esu esena, tíuripanaahi te náitecapapa te napena suyaserecapa ema suima. Taicha vahi súriahini esu esena sucayaseseruruhini eta suvarahaquenehi suecha te namuri ena echamuriana.

³⁶ ¿Tájaha tacayema eta ecasiñavavaisirahi? Vahi étinahini ínapucahini mametacahehíni ema Viya eta máechajiriruva. Váhivare ácarichuhini éti tatuparacahini eta ejacapirahi.

³⁷ Te natiarhipuca nácani tímijachavanaripa náimatiequeneharipa tamutu eta máechajiriruva ema Viya, náimijachaipapuca mávahácavacaripa ema

Espíritu Santo, tatuparacahi éna napánerechinávanumayare eta juca nájurehi eyehe, tásihaquenehi me Viáquenu, mavanairipichuhi éma.

³⁸ Téhesera matiarihhipuca mácani tépuruyare eta juca numetarapianahi, émaina máepurucare, vaipa tisamacaremahi eta eyehe.

³⁹ Tiuri, nuparapenaveana, epamicavachucha ecametarairu eta máechajiriruva ema Viya. Tásiha, táuricachucha ísapa nácani téchajicanaparacahi te apaechajiriruva.

⁴⁰ Tacapicahuhsiera támutu eta iúrujisiravana. Ecaejarusinavapahi tamutu eta íchaqueneanayare te iúrujisiravanahi.

15

Eta máechepusirahi ema Cristo te máecari

¹ Nuparapenaveana, nuvaraha némechaheyare eta numetarairuhi eyehe eta máechajiriruvahi ema Viya tayehe eta viúchucuirayare. Étara táemesiavahi eta juca te esamainapa, etupiruvavanehi ejacapa. Puíticha tanasihi eta esuapirahi.

² Tásiha, puiti iúchucuhapaipa táichavenehi eta ímiyaniravahi esuapa eta numetarairuanahi eyehe. Németeaca yátupihí eta íjarasiravahi eta éhisiraya eta juca esamaquenehi.

³ Écharichuhi eta nímiturapianahi eyehe, étarichuhivare tacahehi eta nímitucasivahi. Eta júcana eta tisupacarepanahi: Yátupirahi máepeninahavihi ema Cristo táichavenehi eta vipecaturana, émairahi ema táechajisihaquenehi eta Sagrada Escritura.

⁴ Eta náimairahi tépenapa éma, náecarapa. Técheputchisera éma te mapanapunepa sache, taicha tacahehi eta tametarapihi eta Sagrada Escritura, tímatacavahi tamutu eta máíchararacavayarehi éma.

⁵ Tímerecavahi mayehe ema vichamuri Pedro, énerichuvare ena apamuriana apóstoleana.

⁶ Tásihapa tímerecavavarepa nayehe ena quinientoqueneana eta nasimutuvanahi ena vichamuriana. Puíticha nararihichaha maverana ena tímahanahi. Nararhipasera ena tépenanapaipahi.

⁷ Te táequenevarepa, tímerecavavarepa mayehe ema Santiago. Tásiha, tíapechavavarepa tímerecava nayehe namutu ena apóstoleana.

⁸ Tásiha, te táequenevarepa eta júcana, tíapechavapa tímerecava nuyehe, nútípavapa nímahahi éma. Ichape eta táramicarevahi nuyehe eta máichuiranuhi nútí néquenereruhi mayehenuyarehi apóstole, tacuti eta táijahúchirava te tiújucayare esu esena.

⁹ Ichapemurihinéni eta némeputurávahi nútí nayehe ena apamuriana apóstoleana. Váhivare táuricahini apóstolenuinahini eta nímairavahi, taicha ichapemuríhi eta nupanajirisirávacahi ena náinapureanahi machaneranahi ema Viya.

¹⁰ Tíchuhanuhisera ema Viya, taicha eta máemunasiranusamihi. Apóstolenuhi puiti eta mayehe. Váhisera némeputurecavahini eta máemunasiranuhi. Jéhevare nútí, nucachuricahi ena apamuriana apóstoleana. Ichapemuripanihi eta nucaemataneasirahi éma. Váhisera níputsiaracavahini nútí. Eta máemunasiranuhi ema Viya, tímícatacanuhi eta nucaematanerahi. Tíjaracunuhivare eta nétumechiravahi.

¹¹ Tájinasera vahi étaparacaina eta juca nájahapuca nácani ena ticaemataneapanahi. Étarichuhi eta vímiturapiana eyehe, eta esuapaquenehi puiti.

Tayanapane vépenaipapuca, véchepucayahisera

¹² Vítí vímitucaheripa eta máechepusirahi ema Cristo te máecari. Németea-casera etiarichaha eta víuchaha esuapahini taicha nusamairiricahi eta ecahehiji: “Vahi téchepucanaimahi ena náepenaqueneana”. ¿Tájahapuca tacayema víuchahacaruhi tasuapacarehini eyehe?

¹³ Éti éjecipavahi eta epanereruana. Ímijachaipapuca vahi máratahaimahi ema Viya mácaechepucavaca ena náepenaqueneana. Te vahi macuratahahini, váhivarepucaini macucaechepucahini ema Cristo te máecari.

¹⁴ Tacahe, te vahi macuechepucahini ema Cristo, váipapucaini tacusuapacarehini eta vímiturapianahi eyehe, tamapurujipapucaini eta esuapirahi.

¹⁵ Te yátupinahini vahi tacusuapacarehini eyehe eta náechepusirayare ena náepenaqueneana, váhivare tacusuapacarehini eta macaechepusirahi ema Viya ema machicha Cristo. Tímicutijiricavaipahini vépiyahirahihini vivayuarerecaipapucaini víti te máijare ema Viya, taicha eta vímitusirahehi eta macaechepusirahi ema Viya ema Cristo.

¹⁶ Te yátupinapuca vahi tisuapacarehi eta náechepusirayare ena náepenaqueneana, váipavarepuca tásuapacarehi eta máechepusirahi ema Cristo.

¹⁷ Énerichuvare, te váhipuca tisuapacarehi eyehe eta máechepusirahi ema Cristo, tásiha énerichuvare váipapuca tisuapacarehivare eta macaepahaira ema Viáquenu eta epecaturana táichavenehi eta ecasíñairahi éma.

¹⁸ Te yátupinapuca vahi tisuapacarehi eta júcana, tímicutijiricavaipa témitiequeneanaripa ena náepenaqueneanahi téhicanahi ema Cristo te achaneanarichaha.

¹⁹ Te yátupinapuca vahi tisuapacarehi eyehe eta júcana, tamapurujiripa eta vijaneasiravahi eta vítaresirahi puiti juca táichavenehi eta vicuchapiravahi vivarairahi vicachane ema Cristo te apana vítaresira. Te vahi tacuítauchava eta juca, ichapeyare eta vicatisamurevairaya.

²⁰ ¡Yátupiquenehisera eta máechepusirahi ema Cristo te máecari! Tacahe, éma ecutiararehi viyehe eta véchepusirayare víti apanavare te vépenaripapuca.

²¹ Taicha eta vépenira manaquipairuhi ema máinapuiruhi ajaira te juca apaquehe ticaijare Adán. Ene macahehi ema Cristo, éma tinaquipaicahi eta máinapuisirahi tayehe eta véchepusiraya te vécari.

²² Táichavenehi eta mámariequenerahavihi ema Adán, émapa tiámahavihi tayehe eta vépenira. Puítisera táichavenehivare eta véhisirahi ema Cristo, émapa tiámahaviyare tayehe eta víápechiravayare vítareca.

²³ Yátupiquenehi táejarurevahi eta juca. Tínapucahi ema Cristo téchepuca. Éma ecutiararehi viyehe. Tásiha, te mápechavavare máiteca te juca apaquehe, émainapa téchepucanayare ena náepenaqueneanaripa machaneranahi.

²⁴⁻²⁷ Tacahe, tiánehinapa eta táichecuaraqiyare eta tamauriqueneanahi te apaquehe. Taicha ema Cristo macamítiequenehainapa tamutu eta náitupajjiasiravanainihi ena táquenuruhanainihi eta tamauriqueneana. Ema Viya máíjaracayarehi eta matumevayare macapaquechirayarehi namutu ena máinaranahi, étainapa mácatayanusihavacayare. Tacahe, macaepahainapa eta vépeniraini. Nájinainapa tépenaimahi. Taicha ema Cristo matuparahaichuhi mayehe ema Maiya eta aquenucairayarehi, émayarehi téchayarehi tamutu. Taicha ánipa macahehi ema Viya eta te Sagrada Escritura: “Éma nutuparacahi téchayarehi tamutu”.

28 Tájinasera vahi ticasíñavavaicaimahi ema Cristo eta émairaipa técha. Te máimahapa támutupa máetupirica, macuchapainapa eta vanairipianayarehi mayehe ema Maiya, taicha éma tjaracahi ema Machicha eta máitupajjiasirava. Tásiha, ema Cristo máimereuchainapa étairahi tásiha eta vanairipiana mayehe ema Maiya. Émarichuhi téchahi tamutu.

29 Tiuri puiti, nararihi ena apamuriana ticaicachasianahi náitsivahi ena náepenaqueneanaripa, namavarairahi náemitiequenehahini tayehe eta náechepusirayare. Ena nani, muracahi eta nasuapirahi eta yátupirahi eta náechepusirayare ena náepenaqueneanaini.

30 Nuvaraha ácutihavi víti eta vicasíñairavahi me Viya. Tayanapane ichape eta tacauyayacarevahi eta vépenirainahini puiti juca sácheana, vicamichahisera tamutu taicha vicuchapavahi eta macaechepusirahaviya ema Cristo.

31 Nútiripa, nuparapenaveana, tamutuhi sácheana ticauyayacarehi eta népenirainahini. Ichape eta tapicacarevahi. Nucurisamurechavasera eta núrísamurevahi icha éti eta iúri vaipahi mayehe ema Viáquenu Jesucristo.

32 Núti muracahi eta nusuapirahi eta véchepusiraya te vécariana. Te váhipuca nusuapahini, vahi nacucanaranuhini te juca avasare Efeso. (Náetaviuchahi eta navainarajivanahi, nacutihi éna eta sárareana táíñehiqueneanahi.) Tájinachuchasera táímaequenénahini nuyehe eta nímiyanavayare eta nucatiuchira eta véhiruhi, te tacuija yátupinahini eta véchepusirayare te vépena. Nararihisera ena téjcapavanahi eta napanereruana. Tímijachavanahi vaipa téchepucanaimahi te náepenapa, taicha ani nacahehi: “Vicamapuravachucha puiti vera vinica, víúrisamureyare taicha achichupuca vépenacaru. Tásiha, útavainapa tamutu eta viyehe” nacahepa.

33 Vahi tacucahe eta epanereruana éti. Taicha éna, vahi tétupicavahi eta nayeherepianahi. Ticauyayacarehi najarareca eta táurinavaipahi eta eyeherépiana.

34 Tátupiruvapa táuri eta ítaresiraina éti. Váipavare ecuquicha eta pecatuna. Taicha nararihi ena vuíchaha náimatihini ema Viya te emuri. Titsiriaceripahi eta nacasiriquirahehi eti machaneraqueneanahi ema Viya.

Apanainapa eta vicaqueheyare eta véchepusirainapa

35 Németeaca núti nararihi vuíchaha nasuapahini. Navarahapuca tiyase-recanuanaya: “¿Tájahapuca náícharacavayare eta náechepusirayare ena náepenaqueneanaini? ¿Tájaimahinapapuca eta nacaqueherayare?”

36 Ena tiyase-recanuanaya, tájina náechaquenéna. Puiti, nuvaraha epanerequeneha. Nímicutiarachinaheyare tayehe eta evaraquí. Eta evaraquí váhira tímaruca te vahi vémuriahahini te apaquehe. Ene vicahe viti achaneana. Tínapuca eta vépenira étapa eta náecarairahavi. Tásiha, te táequenepa, vijacapaya eta viáqueheana arairuya.

37 Te vévacapa eta jácani evaraquí, vémuriahapa te apaquehe. Te tinanapahi eta apaquehe, tímaruca eta vévaraquí. Váhisera étainahíni tachavahini táuchuchahini eta evaraquíhi.

38 Táquehepachuhi eta táímarusirahi eta evaraquí maicha ema Viya. Vahi apaimamajínahini eta táímaru.

39 Étaripa eta veche viti achaneana, vahi távasimahihíni eta taeche eta sárare. Apanahi eta táimahi. Eta taeche eta cáyure, apanahivare eta táimahi. Eta taeche eta jima, énerichuvare apanahivare eta táimahi.

⁴⁰ Énerichuvare, eta nacaquehera ena tiávihanahi te anuma, vahi távasihini eta vicaqueherahi viti viávihanahi te juca apaquehe. Apanahivare eta táurinavahi eta nacaqueherahi éna. Viti, apanahivare eta táurinavahi eta vicaqueherahi.

⁴¹ Énerichuvare nuvaraha ácaicutiara eta tajaraivahi eta sache, apanahivare eta táimahi. Vahi távasihini eta tajaraivahi eta caje. Étaripa eta tajaraiva eta jarairiquiana, apanahivare. Jararihivare eta tijarahipanavacahi tayehe eta apamuriana.

⁴² Ene tacaheyare eta vicaquehera viti te véchepucapa. Apanayare eta táimahi. Te vépenapapuca, ticaecarasiyarehi eta viáquehe, timuyuyarepa eta véche, tépachaicavayarehi. Téchepucayarehisera eta apana viáqueheyare eta máepenacacainapa.

⁴³ Ticaecarasiyarehi eta viáquehe, taicha ticajachacarepuhapa eta véche. Téchepucayarehisera eta tapachinaqueneyare viáqueheyare. Ticaecarasiyarehi eta viáquehe, matumerairahahi. Téchepucayarehisera eta viáquehe, tétavicavainapa eta tatumevayare.

⁴⁴ Ticaecarasiyarehi eta enaha viáquehe. Téchepucayarehisera eta viáqueheyare apaimahinapa, tijarahinapa eta vicaqueheraya vicutinapa eta macaqueherahi ema Cristo eta máechepusiraipa. Tanasiyareichuhi eta táimahi eta viáquehe, esprituinapasera.

⁴⁵⁻⁴⁶ Eta Sagrada Escritura, tacahehi eta táechajiriruvahi: “Ema Adán, máinapuiruhi ajairahi máchaneruhi ema Viya”. Éma ticaejaparecachi eta vímarusirahi viti achaneana, vicutihi éma eta vijurusirahi eta vítaresirahi. Tásiha, te táequenénapa, ema apana ajaira ticaijare Cristo, émapa tíjaracahaviyare eta apanayare vítaresirayare, vicaquehenapa eta máquehe.

⁴⁷ Ema ajaira máinapuiruhi, te ticaepiyainapa, máteji eta máquehehi. Éma, távapahiyarehi eta apaquehe. Émasera ema apana ajaira, mávasarichuhi te anuma. Éma Viáquenuhi.

⁴⁸⁻⁴⁹ Viti achaneana, énerichuhivare mátejiji eta viáquehe, taicha mámariequenehavihi ema máinapuiru ajaira. Eta vicaqueherahi tavasimahihi eta macaqueherahi éma. Tipachinayarehisera eta viáqueheyare, tacutiyaere eta tapachinavahi eta macaqueherahi ema ticavasahi te anuma. Eta vicaqueherayare tavasimahiyare eta macaqueherahi ema ticavasahi te anuma, taicha machichahavihi viti.

⁵⁰ Nuvaraha níminecapáequenehahéyare, nuparapenaveana, eta veche máteji vahi étaimahi tisiapayare te mávasa ema Viya. Tínapucayarehi ticaitsiva eta veche máteji, máepenacayarehi éta.

⁵¹ Énerichuvare nuvaraha níminecapáequenehahéyare eta juca tayumuru-revainihi: Vahi vámutuimahi vépenayare viti vítareruanáichaha. Ticaitsivayaresera eta viáquehe, viti énapa ena náepenaqueneanaripahi.

⁵² Ticaema eta chujare, tichuhahavinapa viti véhicanahi ema Cristo. Tíjhúchavainapa eta táitsivachiravainapa eta viáquehe viti vítareruanáichaha, tacutiyaerechucha viúmatsisina. Tíjhúchavainavarepa téchepucanayare ena náepenaqueneana, máepenacacainavarepa éna.

⁵³ Taicha tatuparahahi eta viáquehe ticaitsivayare, máepenacacainapa. Máichecuaraquirenapa eta vítaresiraya.

⁵⁴ Te tamutupa eta táitsivachiravayare eta viáquehe, títáuchavainavarepa eta tametarapianahi eta Sagrada Escritura: “Ema Viáquenu macaepahaipa

eta vépeniraini”.

⁵⁵ ¡Vaipa tápicacarehi viyehe eta vépenirapapuca, taicha vahi vánasimahi vépena! ¡Yátupihí eta véchepusíraya te vécarí!

⁵⁶⁻⁵⁷ Eta tacahe, vihasulupayacha ema Viya, taicha éma ticatiuchahaviyare tayehe eta vépenira. Tájina vahi vémitiequenémahi, véchepucayahisera máichavenehi ema Viáquenu Jesucristo. Tásiha, te jena sácheyare, vaipa vicape-caturaimahi. Váipavare vícaicuñaimahi táicha. Vaipa vépenaimahi.

⁵⁸ Táitusiava, eti némunaruqueneanahi nuparapenaveana, ímiya-navachucha eta étumechiravaina tayehe eta juca véhiruhi. Vahi tacuequequérecava eta epanereruana. Ecaemataneacaquenena yátupina ema Viáquenu, taicha écharichuhi éti vahi támapurujimahi eta ecaemataneasirahi éma.

16

Eta nanaquiruvanayare

¹ Étasera eta juca enaquisiravayare eta nayeheyare ena vichamuriana ticavasanahi te Jerusalén, étarichu éhicayare eta nímitusiravacahi ena vichamuriana ticavasanahi te avasareana eta táichapevahi eta departamento eta Galacia.

² Puiti, nuvaraha nutuparacaheyare: Te lumincumuhuana, íputsisinavayarepahi, émanapachu eta manaquiruvanayare. Étisera échinavahi áyanahipuca jácani evachasanahi te semanamuhuana. Iúnasinávapaipa apaesa tacujapa étaparacaimahi te nítecapauchahepa.

³ Te nítecapapa eta ara eyehe, vévatacapa ena enerejiruanahi éti nayana te Jerusalén. Éna tiámanayare eta enaquiruvanahi éti. Níjaracayaresera eta nucartane eta náimeraquíyarepahi.

⁴ Téheserapuca nútinapaichu návaraha nuyana apaesa nútinapaipa nácáchanupahi ena vanairucanayare.

Ema Pablo mavarahapa tiyanaya máejirapanavacaya

⁵ Eta nítesirayare, nuvaraha nétavajicayarepahi te avasareana tayeheana provincia eta Macedonia, nítecapirainapa eta ara eyehe.

⁶ Nuvaraha nunasipanayare eta eyehe. Tijuricati nucuchapa eta táetavisirahavina eta muracana técatícava. Tijuricati ímicatcanupahi éti apanava eta nímiyaniravayare nupaica.

⁷ Taicha vahi návarahahini ánipinarichuhini eta néjirairaheyare. Nuvarahahi nunasipanayare. Émapasera téchanuyare ema Viáquenu.

⁸ Nuvarahahivaresera nunasipananumayare aní te juca Efeso. Tiámainucava te táetavicavapa eta piesta ticaijare Pentecostés, nútijapainapa.

⁹ Taicha nuvarahahi nucamapuravanumayare nucametarairu taicha camurianaahi ena tivarahanahi tisamararacanuana. Énerichuwaresera nararihivare camuriana ena víánaranahi.

¹⁰ Nutuparacaheya, te máitecapauchahepa ema Timoteo, tauri eta ejacpiraina. Échapajirisinanuyare, taicha émarichuhi nucutiquenehi eta vicaemataneasirahi ema Viáquenu.

¹¹ Nutuparacahevare nacuija nacuepuru éma. Ímicatacasera eta mapaisirayare éma apaesa máitecapauchanúvane, émapaicha nucuchapahi nútí, énapa ena apamuriana nuchamuriana te juca.

12 Nuvarahahivaréni mayanahini ema vichamuri Apolo eta ara eyehe, máhicavacahini ena tiámanahi eta nucartane. Váhisera máisapavahini mayanahini puiti. Téhénarínevare apahenavare, mayanapa.

Táichecuaraqui eta macartane ema Pablo

13 Ecuneuchava yátupina. Túmehénahi tayehe eta juca véhiruhi. Yátupina eta éjairavacáina. Vahi ecupica eta vicatajivairanahi.

14 Eta émunaraivayare yátupina táuchurena te esamureana, étaina táemesiava tamutu jácani íchaqueneanayare.

15 Puiti nuvaraha némechahe ena tinapucanahi téhicana ema Viáquenu te avasare Corinto, ema Estéfnas, esu mayena, énapa ena machichanaveana. Ichapemurihi eta náijarasiravahi eta náitátirahi ena apamuriana vichamurianaahi.

16 Puiti nuvaraha epicauchavaca esuapavaca ena nani. Énerichuvare epicauchavare esuapa ena apamuriana tímícatacahavianahi eta vicaemata-neasirahi ema Viáquenu.

17 Ichaperinehivare eta núrísamurevahi puiti eta náitecapauchiranuhi ema Estéfnas, ema Fortunato, émapa ema Acaico. Tímícutijiricavainehi ámutuhini ítecapauchanuhini éti eta nímairavacahi ena nani mapanana tiásihanahi eta ara eyehe.

18 Téchararahainehi eta nusamure, túmenuinevare eta nusamiravahi. Ene ecaheyare éti eta táetumechiravayare eta esamureana eta ímairainahi ena nani mapanaqueneana te nachavapa eta eyehe. Epicauchayare ena nani, émunasinavayare.

19-20 Téchajicaheana namutu ena vichamuriana ticavasanahi tayehe eta avasareana te juca Asia. Téchajicahevare ema Aquila ésupa esu Priscila, énapa namutu ena tiúrjiricavanahi te napena, taicha énarichuhi vicutiqueneanahivare eta véhisirahi ema Viáquenu. Te iúrjicavapa, ejupacacayare éti, táicutiarainahi eta émunajirisiracacahi.

21 Nuti Pablo eta nímiamaresirahi eta néchajiriruva eta eyehe, nútijacuruvapa nájucha eta táichecuaraquihi eta nucartane.

22 Nácanisera máesacharahanahi ema Viáquenu náimainavapainepa éna eta náicuñayare te machavapa. ¡Tata Viáquenu, pítecávanéni!

23 Nuyaseuchaheparaca me Viáquenu Jesucristo táetaviuchahíni eta iúricacarevaya máicha.

24 Nuvaraha ejacapaini ámutu eta némunasiráhevacahi máichavenehi ema Viáquenu Jesucristo. Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te avasare Corinto, ticajare 2 CORINTIOS

¹ Nuti Pablo, mayehenuhi apóstole ema Jesucristo. Manerejirunuichuhi ema Tata Vicaiyaquene, mavarairahi nímitucaya ena achaneana eta máechajiriruvana éma. Puiti juca nucartane, nápechava nucajurehe nútí, émapa ema viparape Timoteo. Véchajicahehi emutu eti machaneranahi ema Viya ecavasanahi tayehe eta avasare Corinto, énapa namutu ena vichamurianahi machaneranahivare ema Viya ticavasanahi te avasareana tayehe eta departamento Acaya.

² Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Nájaracahehini eta táurivaina eta epanereruana.

Tétavicavahi eta macurisamurechirahavi ema Viya, macaepahairahi eta vicatajivairanahi

³ Nútí nuvaraha nucunachaparaca ema Viya Macaiyaquene ema Viáquenu Jesucristo. Taicha éma, Vicaiyaquenehivare víti. Tétavicavahi eta majapanuirahavihi, tétavicavahivare eta macurisamurechirahavihi.

⁴ Puiti éma, ticurisamurechahavihi tayehe tamutu eta víatajivana, apaesa viratahahivaréni víti apanava vicurisamurechahavahivaréni nácani ticatajivanahivare, tacutihi eta macurisamurechirahavihi víti ema Viya.

⁵ Tayanapanehipuca ichapepuca eta vicatajivairahi eta véhisirahi ema Cristo, táetaviuchaquenehivare eta táichapevahi eta macurisamurechirahavihi ema Espíritu Santo májararuhavihi ema Cristo.

⁶ Yátupiquene ichape eta vicatajivairahi táichavenehi eta vímitusirahehi eta máechajiriruvana ema Viya, vivarairahi vétumechaheyare apaesa iúchuchayare. Émapasera ema Viya ticurisamurechahavipa tayehe eta vicamichirahi tamutu. Taicha éma, mavarahahi ímatiequenehayare eta macurisamurechirahe éti apanava te tamutu jácani ecatajivairana.

⁷ Víti vicasiñavahi eyehe eta ecamichirayare taicha vicuticacahi eta vicatajivairahi étapa eta macurisamurechirahavihi vimutu.

Eta macatajivairana ema Pablo

⁸ Nuparapenaveana, nuvarahavare numetacahe eta vícharacavahi víti tayehe eta jena avasare departamento Asia. Ichapemurihi eta vicatajivairahi. Tiánehipa véchurihayaréni eta vitumevanahi tayehe eta vicamichirana tamutu. Váipavare vémeteacahini víuchuchahini tayehe eta vépenira.

⁹ Vicutiripa nácani nacaparuasana te navahu ena aquenucana. Ema Viya máisapapa eta juca, mavarairahi vaipa vítijivaimahi vicasiñava. Mavarahapa yátupina eta vicasiñarayarehi eta mayehe, taicha éma, macarichu maratahahi máimichava ticaitarecavahi te vépenapapuca.

¹⁰ Cape juca ticatiuchahaviripa tayehe eta vépenirayarehini. Puiticha ticatiuchahavirichaha. Tétavicavainehivare eta vicasiñavairahi eta mayehe, vahi tísapahavimahi vépenávanehíni.

¹¹ Tacahe, nuvaraha ímicatacahaviñi eyujarauchahaviñi víti. Éti, németeaca camurihéñapa éti eyujarauchahaviyare, camuriheyareva éti ehasulupaya-chainapa ema Viya eta máimiyañirava ticatiuchahavi.

EMA PABLO VAHI MÁITUJICAVAVANEHINI MAYANAHINI TAYEHE ETA AVASARE CORINTO

¹² Visamavahisera víti eta vicunachiravahi eta tájinairahi víchiravainahini, váhivare apiapiemahavinahini. Sánturuhahaviripa te nataracu namutu ena achaneana, evetijipa éti. Émahisera ema Viya tímicatacahavihi táurihi eta vítaresirahi táichavenéhi eta máemunasirahavihi. Vahi vítijiriruvainahini eta vítuþajijiasiravanahi.

¹³ Puiti, tacahehi eta nucartaneana. Vahi apiapiemanuinahini. Váhivare tácajerahini eta ímatiequenehairayare.

¹⁴ Éti, ímatiequenehapaipa eta nímiturapiana. Puiti nuvaraha esamayareva eta nuconsejarapiana apaesa vácuticaca vivapinacaca vítijicaca te jena sache te machavapa ema Viáquenu Jesucristo.

¹⁵⁻¹⁶ Tacahe puiti, eta táinapuiruhi nupanereruhi, nuvarahahi néjirapanahayarehini, nétavauchirahayarehini te nuyañirayarehi tayehe eta departamento Macedonia. Tásiha, te nuchavayareþaini, nápechavavare néjirapanáhe, apiheyarehini eta nucurisamurechirahayarehini. Tacahe, te tamutuyarepa, ímicatacanupapucaini éti eta nuyañirayarevare tayehe eta departamento Judea.

¹⁷ Apanaripahisera eta nupanereruhi. Vuíchaha néjirapanahémahi. Váhivare nuvayuacahemahi eta nuvarairahi néjirapanáhe. Nítauchayare núti. Vahi ímjichaimahi éti nucuti mácani achane te mapanerechahi, váhisera máítauchahini.

¹⁸ Núti nucasiñavahi eta máimatiranuhi ema Viya. Vahi nuvayuacahemahi éti.

¹⁹ Cape juca, te nímitucahepa núti, émapa ema Silvano, émapa ema Timoteo, vímimatichahehi ema Jesucristo, Machichaquenehi ema Viya. Puiti ímatipa éma, tájinaquenehi mavayuaravaina éma. Núti apanava, tájina nuvayuacahehini taicha mavanaranuhi núti.

²⁰ Máichavenéhi éma, títauchavahi tamutu eta mapanereruanahi ema Viya. Víti, te visamavaipa eta májjararuvanahi ema Viya, vijjirauhahi éma. Vícahehi: ¡Amén! ¡Vicasíñava vímahainapa eta máítauchirainapa!

²¹⁻²² Émaripa ema Viya témuracachahavihi eta víurujiasirahi ema Cristo, víti étipa éti. Timarcachahaviripahivare éma, táicutirahi eta machichairahavipa, taicha manerejiruhavihi. Tíjaracahaviripavare eta mávahásirahavihi ema Espíritu Santo te visamureana, máitametasirahaviparaca títauchavaya tamutu eta víuricacareyarehi.

²³ Núti, vuíchaha nítecaimahi eta ara eyehe, taicha némunacahehi, numavarairahi nucareamecahehini éti. Ema Viya tímatinuhi eta nutupiruvairahi.

²⁴ Vahi nuvaraha nupamicáhe eta esuapiranuinahini nápepejicahehini, taicha éti muracaheripahi eta esuapirahi eta juca véhiruhi. Nuvarahahisera nímicatacahe eta tápajusiravaina eta iúrisamurevayare éti.

2

¹ Eta tacahe, vuíchaha nítecaimahi. Taicha vahi návarahahini nápechavahini némecatajivachahehini te esamureana eta néjirairahayare.

² Taicha te ecatisamureva nícha, tímaticaréipahi nájina ticurisamurechanuimahi núti. Ecarichuyarehi éti ecurisamurechanuyarehi.

³ Tacahe, eta táitsivahi eta néjirapanairahe, nucajurehepa eta táinapuuru nu-cartane, nuvarairahi ésamiricavayare apaesa vaipa nucatisamurevaimahi icha éti. Nuvarahahisera núrismurehini ícha. Tacahe, németeaca étiripa úrisamurehivaréni ámutu eta nuyehe.

⁴ Jéhevare, te jena sache, te nucajurehepa eta nucartane, ichapemurihi eta nupaneresirahi, nucatisamurevahivare. Níyahacavahi ichape. Váhiserá étaparacainahini nuvaraha némecatajivachahehini te esamureana. Núti nuvarahahi ímatihini eta táichapevahi eta némunasirahehi.

Éma Pablo máijaracahi eta maconsejarapi eta naperdonachirayarehi éma téjicapavahi

⁵⁻⁶ Tiuri puiti, éma maca téjicapavahi máichahi eta pecatu, tétavicavahi eta ecatisamurevahi máicha. Núti apanavare nucatisamurevahivare. Váhiserá táurica vivayuchava eta vémechaesira éma. Puiti, tarataharipa eta ecuchusirahi te emuri éti.

⁷ Puiti táuricapa eperdonachayare eta máichavaquenevahi. Ecurisamure-chainapa éma apaesa vahi macuvayuchava eta macatisamurevahi, máinajicavapuca.

⁸ Nuvaraha puiti íápechavahini ímereco eta émunasirasamihi éma. Ejacapavare te emuri.

⁹ Eta tacahe, nucajurehi cape juca, nuvarairahivare nucaicutiaráhe te esuapayarepuca eta nuvanairípianahi.

¹⁰ Núti nuperdonacharipa, éma maca achane te máijare éma Cristo. Táuricapa eperdonachayarepa, ecutiranuyare eta nuperdonachirahi.

¹¹ Taicha te váhipuca víperdonachacacahi, tíñehicarehi macamapurava éma Satanás, taicha tímaticarehi eta mavarairahi tímiáqui paicahaviyare.

Vaipa máitucarahahini éma Pablo

¹²⁻¹³ Núti, te nítecapapa eta te avasare Troas, nímijachahi nuchimaphani éma nuparape Tito. Tétavicava eta néñamiravahi, nuvarairahi néchayarehi tájahapuca eta íchararacavahi éti. Yátupihinéni natiaríhihi éna camuriqueneana éna tivarahanahi tisamana eta nímituresirahi eta máimiturapiana éma Jesucristo. Étasera eta néñamiravahi eta eyehe émapa éma Tito, nucame-tavavarepa nayehe éna vichamuriana. Nuyanavarepa tayehe eta juca departamento Macedonia, nutanusirayare éma.

Éma Viya, tétavicavahi eta majaneasiravacahi éna mavanaranahi

¹⁴ Tásiha, tétavicavahi eta núrismurevahi eta nuchimahirahi éma Tito eta te juca. Puiti, ichape eta nuhasulupayachirahi éma Viya eta majaneasirahaviparaca, tíjaracahavíhivare eta máitupajijiasirava eta viratahairahi vicánara tamutu, táichavenéhi eta mávahásirahavíhi éma Jesucristo. Tituparacahavivare vicametarairuyarehi eta máimiturapiana, mavarairahi tíuriyarehi eta nasamiraya namutu éna achaneana tacuti eta najiusira jácani táijiyequeneana.

¹⁵⁻¹⁶ Taicha eta vicametarairuirahi tímicutijiricavahi eta táijiyeva eta incienso, eta máijarasirahi éma Cristo te mamirahu éma Maiya. Tacapusiacahi namutu éna tisamahaviana. Natiaríhi éna masuapajirairahana, náemitarianayare taicha namavarairahi nasuapahini. Tíjechehi eta najiusira tacutihi eta máquehe mácani máepenaquenehi. Natiaríhivare éna tisuapanapahi náuchucureanayarehi;

ticutirinehi najiucahini eta táijiyequene. ¡Tétavicavahi eta néñamiravahi eta vicutuparahairahi!

¹⁷ Viratahasera vítaucha eta vituparahahi. Taicha víti, eta vicametarairuira, tájina vahi vicavacharapi eta máechajiriruva ema Viya, vétupiripicapahipucaini, vivarairainahini tajamurachacarehini, tácutihini eta náichira ena apamuriana tímijachavanahi yátupiqueneana mavaneruana ema Viya. Vítiserá yátupiquenehavíhi mavanarahavíhi ema Viya; vitupiruvahi eta vicametarairuira eta máimiturapi ema Cristo.

3

Viti vicametarairuhiana eta téqueneha matratune ema Viya

¹ Vahi nuvaraha ímijachahavi eta vicunachiravainahini puiti. Váhivare vácutihini ena nácani apamuriana tímiturahianahíji, típairiricana tiámanahi eta carta táechajisihahi eta nacunachacarevahi. Tájinavare vímatiyahini víyaseacahehíni víti eta carta vímeraquinapahíni táechajisihahíni eta ecunachirahavinahíni.

²⁻³ Étiserá, tájina véñamiravaimahi eyehe. Taicha tímaticarehi te avasarena eta táurivahi eta ítaresirana éti, táichavenehi eta vinacasamurechirahehi eta máechajiriruva ema Viya. Eta juca tímereuchahavi víti eta yátupirahi mavanarahavianahi ema Viya. Éti, ecutihí eta carta vímeraquinapahi. Émaquene ema Cristo, ema íájuchahi, taicha tíjaracahehi ema Espíritu Santo máitsivachaheyarehi eta ítaresirana, táuriyarehi eta esamureana. Arairuripa eta ítaresirahi. Puiti juca eta ítaresirahi, tájinapa étaparacaina esuapahíni eta vanairipiana tacajuquenehi acane te márime tabla.

⁴ Eta tacahe, tájina vahi néñamavaimahi tayehe eta apóstolenuirahi. Nétumechava ichape, taicha nusiñavahi eta manerejirunuirahi ema Cristo, máíjarasiranuhivare ema Viya eta máitupajijiasiravana.

⁵ Taicha víti vahi vítijivainahíni víjaracava eta vítupajijiasirava. Émaquenehi ema Viya tíjaracahavíhi eta vitumevanahi eta vicaemataneasirahi éma.

⁶ Émaquenehi tituparacahavi vicametarairuyarehi eta arairu matratune. Vahi étainahíni nupamicahéyare eta esuapirayarehi eta vanairipiana. Taicha eta juca arairu matratune ema Viya, tíjaracahehi emutu ema Espíritu Santo, máitsivachinaheyare eta ítaresirana, arairuinapa. Étasera eta vanairipi tacarichu táimivanerecahi eta náepeniraya ena téjecapavana.

⁷ Acane, te jena sache te tíucupaicapa ema Moisés te cerro, mámapahi eta vanairipiana tacajuquenehi te márime tabla. Eta mamira, tétavicavahi eta tarapepesirapahi táichavenehi eta macachanerahi ema Viya. Ena achaneana, vaipa náratahahíni náimáracá eta mamira. Ichapehinéni eta tapicauchacarevahi eta vanairipiana taicha tétavicavahi eta tarapepesirapahi eta mamira ema tiámapahi. Étasera eta mayerevapa, tímutserahavapaipahi témitiaca eta tarapepesirahi. Eta vanairipiana, tacarichuhí táimicapachí nácani téjecapanahí.

⁸ Étasera eta arairu matratune ema Viya, eta nucametarairuquenehi puiti, tétavicavahi eta tápajusiravahi eta tasuapacarevahi taicha tiámahavíhi eta mávahásirahavíhi ema Espíritu Santo.

⁹ Yátupíhi eta tasuapacarevahi eta vanairipiana, tiápajucavahiserá eta tasuapacarevapanahi eta máichuarapi ema Viya, víjacapacarehi mayehe táichavenehi éta.

10 Yátupi tirapecahi eta mamira ema tiámapahi eta vanairipiana, váhisera étaparacainahini táurichahavihini. Jéhevarequenehi puiti, tétavicavahi eta viúrivahi maicha ema Espíritu Santo.

11 Eta tarapepesirahi eta mamira ema Moisés, timutserahavapaipahi témitiaca. Eta juca táicutiarahi eta ánipirichuhi eta tasuapacarevayarehi eta mavanairipiana. Étasera eta juca máichuhairahavi ema Viya, tiápajucavahi eta tasuapacarevahi taicha máchecuarequireyarehi eta viúrivaya táicha.

12 Étavenehi eta vicasínavairahi vímahayare eta juca sache vicuchapac-
quenehi, viti matupararuana vétumechavahi eta vicametarairuirana.

13 Váhi vácutihini ema víarahaini Moisés, tépacamirahavahi te páñome, tíuriyarepa eta náimararasirayarehi ena machamuriana. Váipasare nanecapahini te timutserahavapa eta táemahairapahi eta tarapepesirahi eta mamira, táicutiarahi eta táepahairaya eta tapamisirahavini eta vanairipiana eta vítauchirayarehi.

14-15 Puíticha ena nujaneanana israelítana vahi nácaicutiarahini eta juca. Tacahe, te náechejicuha eta ichasiquene matratune ema Viya tacajuquenehi eta te libro májurehi ema Moisés, vuíchaha nácaicutiarahini. Tímicutijirica-
váichucha táepacuchahi eta máepacamirahi ema Moisés. Ticajeraichucha eta nacaicutiarairayarehi.

16 Mácanisera achane, esenapuca, tjaracavapa eta máehisirayarehi ema Viáquenu, ichapenapa eta macaicutiarairayare. Tájina taépacaquiñahaimahi.

17 Jéhesare, ema Viáquenu tjaracahavisarepa ema Espíritu Santo. Tásiha, vaipa vipicacaracavahini eta vipauchiraya éma. Yátupina eta vivapinairavahi maicha ema Espíritu Santo.

18 Tacahe, vimutu viti véhicanahi ema Viáquenu vicitiripa eta espejo eta tarapepesirahi eta tajaraivahi eta sache. Víti, yátupihí vímerecohi eta máurivahi ema Viáquenu. Vaipa vicaepacamirahini. Eta tacahe, víti puiti tiápajucavainapaipa eta vicitirayare ema Viáquenu taicha tiápajucavahi eta majaraivahi te visamureana. Étavenehivare eta mávahásirahavihi ema Espíritu Santo máijararuihi ema Viáquenu.

4

1 Eta tacahe, váhiquene viyacujiequenehavaimahi eta vicametarairuir, taicha ema Viya tímechahavihi eta máemunaraiva eta matuparasirahavihi eta juca vicaemataneasirayarehi éma.

2 Víti, tájina vímatiyahini viyumurujiricahini eta víchaqueneana. Váhivare víchahini eta titsirihacareana. Váhivare viútserrupinahipucaini vihapapicahipucaini eta máimiturapiana ema Viya, taicha vivaraha vicurismurechaya éma. Tamutuhi véchajisihahi eta yátupiqueneana. Jéhesare, vivaraha nacaicutiarahini ena achaneana eta vímiturapianahi tásihaqueneanahi me Viya.

3-4 Nararihisamisera nácani vahi nacaicutiarahini eta vímiturapiana, taicha ema Váinaraji, tacaiyaquenehi eta juca apaquehe, éma tépacaquiñahavacahi éna. Taicha vahi mávarahahini náimatiequenehahini eta máimiturapiana ema Jesucristo, tétavicavahi eta tajarahiquenérahí taicha émaquenehi macunaquenehi ema Viya. Táitusiava éna, vaipa nácaicutiarahini eta vímiturapi. Náemituaruanayarehi tayehe eta ecuñaraqui táicha.

5 Te vicametarairu víti, vahi vítinahini vicunachavahini, vivarahahini éhichavi. Vivarahahisera esuapahini ema Jesucristo, ecaquenyarehivare

éma. Vítí vanairucahavichucha eta eyehe, taicha vicaemataneacahi ema Jesús.

⁶ Ema Viya, te máepiyacainapa eta juca apaquehe, macavanairipipa tatiarihiyarehi eta tijarahi, témitiacayarepa eta timapicuquenénihí. Ene macahehi eta viyehe. Tímimaticahávihí eta majaraiva ema Machicha. Tétavicavahi eta tajaraivahi te visamureana. Éma, tímimaticahavipaipahi eta máetaviuchaquenehi máurivahi ema Viya.

Puiti eta vítaresirahi, vímerecavaya yátupihí eta vicasiñairahi eta macatiuchirahavipaipa ema Viya

⁷ Eta juca véhiruhi vímiturapiñanahi, tétavicavahi eta tacunachacarevahi. Vahi vítinahini vicunachacarehini. Taicha víti páureanasami, vicutichucha eta muñeca náipune. Émasera ema Viya máimerecahi eta máitupajijiasiravahi, máijarasirapa eta tatumevayarehi eta viáquehe. Váhiserá vítijivainahini.

⁸ Táichavenehi eta vicametarairuira, tatiarihihi jácani víchavaquenevahi; ticatiuchahavihisera ema Viya apaesa víúchuchaparaca. Ichapevare jácani eta táimipaneresirahavihí; vicasiñavahisera eta majaneasirahavihí ema Viya.

⁹ Tipanajirichavianahi ena viánarana, váhiserá tijunijicahavimahi ema Viya eta majaneasirahavihí. Tayanapane nachururupaícahavihini, émasera ema Viya vahi máisapaimahi ticapacahaviana.

¹⁰⁻¹¹ Tamutu te jácani vicaijuheanapahi, natiarihi ena navaraha ticapacahaviana táichavenehi eta véhisirahi ema Jesús. Tamutu sácheana víámarairicapahi eta vépenira, vicutihí ema Jesús eta napanereuchirahi éma. Émarichuhisera ema Jesús máechepurequenehi. Éma máimerecahi eta máitupajijiasirava eta macuchucuirahavipaipahi tayehe tamutu eta vícharacavaqueneanahi.

¹² Tayanapane víti víámarairicahi eta vépenira táichavenehi eta vímituresirahi, táitsivahisera ejacapaihí éti eta tamaichecuaraquireyarehi eta ítaesira táichavenehi eta esuapirahavihí.

¹³ Ema víyarahaini David, ani macahehi eta máechajiriruvana eta te Salmo: “Núti nucasíñavahi mayehe ema Viya, tásiha vahi nupicacaracavahini eta néchajisirayare mayehe” macahepa. Énerichuhi vicahehi víti puiti. Vicasiñavahi mayehe eta macatiuchirahaviyare. Táitusiava, vahi vípicacaracavaimahi eta vímituresiraya.

¹⁴ Taicha véchahi eta macaechepusirahaviyarehi ema Viya, vicutihíyarehi eta macaechepusirahi ema Machicha Jesús te máecari. Tásiha, étamurihanapana, éti apanavare, eta vímeresiravayare te mamirahu éma.

¹⁵ Tamutu eta juca víchavaquenevanahi, támahi eta iúrivayarehi. Vicamichahi tamutu, taicha vivarahahi éti esimutuqueneanahi ejacapahini eta iúrivayare máijararuhehi ema Viya, apaesa ámutuhivaréni eti esimutuqueneanahi ehasulupayachahini éma, ecunachahivaréni.

¹⁶ Eta tacahe, váiparinehi vicainajiruvaimahi. Tayanapanepuca tivitaji eta viáquehe, étasera eta víáchaneva tétavicavaichucha eta tatumeva tamutu sácheana.

¹⁷ Táicha eta víátajivanahi puiti juca vítaresiraichaha, vahi táunacacare. Tétaticavánachucha, tiánucuhávanepa. Énerichuvare, jararihi eta táitsivahi, taicha vijacapaihí eta táetaviuchiravaya eta víúricacarevayare. Puiti tájina tácutimahi eta víúricacarevaya, taicha máichecuaraquirénapa éta.

18 Eta tacahe, vahi vipicacaracavaimahi eta viátajivanahi, taicha vahi táunacacarehini. Vicasañavahisera mayehe ema Viya eta máimisipirahaviya eta te mávasa anuma. Tásiha, máichecuaraquirénapa eta viúricacarevaya eta viávihairaya tayehe.

5

1 Vimutuhi vímati te náquipaicapuca eta viáquehe, tépenayarehi éta. Taicha éta, vahi muracainahini. Tacutihi te viáquipaica eta peti. Máejerarehi vicha taicha vahi muracainahini. Jararihisera eta viáqueheyarehi te anuma vícuchihi mayehe ema Viya. Éta, nájinapa tiratahaimahi tiáquipaica taicha máepiyaruihí éma.

2 Puiti, tétavicavahi eta tacatajivairahi eta viáquehe. Tamutuhi tasama. Eta tacahe, vivarahainehi táijahúchavahini tacaitsivahini eta viáqueheyare te anuma.

3 Taicha vicamunurinehi eta arairu viáquehe, apaesa vahi vitsirihaimahi eta vicachanerayare ema Viáquenu taicha vicutiyare éma.

4 Puiti eta juca vítaresiraichaha, tamutuhi tasama eta viáquehe. Ichape-murihi eta táimipaneresirahavihi. Váhiserá étainahini eta vivarairainahini vépenávane, étasera vivarairahi tacaitsivahini eta viáquehe arairuinahini.

5 Tacahe, ema Viya tamutuhi máicucha eta táichararacavayare te apana vítaresira. Puiti tjaracahavivihare ema Espíritu Santo. Émapa títametacaha-viparaca eta vijacapirayare eta vícuchianahi.

6-7 Tacahe, núti vahi nupicahini eta népenirayarepuca, taicha ichape eta nucasiñavairahi mayehe ema Viya. Tájina vahi néñamavaimahi mayehe eta máijarasiranuinapa eta arairu náquehe, tayanapane vuíchaha nímahahini. Eta táimiyansiravaya eta nítaresirahi, nuyerehi eta nícuchihi náqueheyare.

8 Nuvarahainehisera táijahúchavahini tacaitsivahini eta juca náquehe, nuyanasarepaini nucachanehini ema Viáquenu.

9 Eta tacahe, vivaraha ichapemurihi eta vicurisamurechirahi eta vicaemataneara ema Viáquenu puiti juca vítaresiraichaha. Tásiha éma, tiúrisamureyare eta vijehe te vímerekavainapa te mamirahu.

10 Taicha vimutu vímerekavayare te mamirahu ema Cristo te mávacu-reyare. Ánaqui tímaticareyare tamutu eta víchaqueneanapachuhi puiti juca vítaresiraichaha, te víchahipuca eta táuriqueneana, te étahipuca eta tamauriqueneana. Te víchahipuca eta táuriqueneana, vijacapaiñapa eta vícuchia-napahi.

Ema Viya mavaraha vipauchayarehi éma, macaepahairaya eta vipi-cacarasiravahi eta vícuñayare

11 Nútisera, ichape eta nupicauchirahi ema Viya. Eta tacahe, nímijanava numetacavacahi ena achaneana eta mayehe, taicha nuvarahahi námutihini napicauchahivaréni éma. Émasera, tétavicavahi eta máimatiranuhi táurivahi eta nupanereruana eta nucaemataneasirahi éma. Puiti nuvaraha échahivaréni éti apanava eta táurivahi eta nupanereruana.

12 Tacahe, eta juca néchajisihahi, vahi nútinahini nucunachavahini. Nuvarahahisera nucunachacarehini eta eyehe, apaesa áratahahini ecamatinaca ena tímijachavanahi námatiequeneha. Váhiserá yátupinahini táuchurequenénahini te nasamureana.

¹³ Éna, tépiyaequenehanuanahi, máurishinuhíji náicha, taicha ichape eta nuvapinairavahi eta nucaemataneasirahi ema Viya. Tiúrihisera eta nuchuti. Nuvarahaparaca ichapenaini eta iúricacarevaina éti.

¹⁴⁻¹⁵ Núti nímatihí eta táetaviuchirahi eta máemunasirahavihi ema Cristo, taicha máepeninahavihi te crusu. Vimutu viti achaneana vituparahaichu vépenirapachu. Mavachachai pasera tamutu ema Cristo. Eta tacahe, tatuparaca vítsirijicava vicaemataneaca éma. Tásiha puiti, viti machanerahavipa. Vaipa vítijiricavaimahi. Émapa téchahi eta vítaresira, taicha eta machavirahi títareca.

¹⁶ Eta tacahe, viti véhicanaripa ema Cristo, étainapa vipanerechayare eta vítsivachiraipa eta vítaresira. Vaipa véhicaímahi eta apana panereruca tayeheanahi te juca apaquehe. Étaripa cape juca viásinequenehi váhirichu vísuapapajicahini ema Cristo, vímijacharichucha éma vicutihí viti achaneanasami. Púitísera vaipa tácahehi eta vipanereruana. Visuapahi émaírahi Machichaquenehi ema Viya.

¹⁷ Púítiripa viti víúrujiacanahi ema Cristo, apanahaviripa. Vínajicaipa eta viyeherepinihí tamauríqueneana. Tamutupa arairuhí puiti eta viyeherepiana.

¹⁸⁻¹⁹ Ema Viya, tétavícvavahi eta máurivahi eta viyehe. Éma, mavarahahi vipauchayarehi éma. Mavarahahivare macaepahayarehini eta vipicacarasiravahi eta vícuñayare táichavenéhi eta vipecaturana. Tásiha, mavaneca ema Machicha Jesucristo apaesa macaepahayarehi eta vipecaturana vimutu viti vicasiñavana eta mayehe, vaipa máecharairicaimahi. Tásiha, tájina eta vipicacarasiravaimahi eta vícuñainahini. Tásiha puiti, ema Viya tituparacahavipa viti véhicanahi eta víchuhairavacayare namutu ena apamuriana achaneana, apaesa éna apanava nacasiñavavare eta mayehe, váipavare tipicacacavanaimahi eta mayehe.

²⁰ Tacahe, víti mavaneruhavihi ema Cristo víchuhavacayarehi namutu. Tímicutijiricavaipa émaquenénahini máechajicavacahini ema Viya. Puiti viyaseacavacahí namutu nacasiñava mayehe ema Jesucristo; váipavare tipicacacavanayarehini eta náicuñainahini náicuchiyaréni.

²¹ Ema Cristo, tájina mapecaturainahini. Étásera mavaraírahi ema Viya víuchucuhayare víti, émapa ema Cristo tamuriacahí eta vipecaturana. Puiti, tájinasarepa víchiravaimahi, tájinavarepa víviurevaina te mamirahu ema Viya vimutu viti víúrujiaruanahi ema Cristo.

6

¹ Tásiha, núti mavanaranuhi ema Viya, nuyaseacaheyare ímíyanava tauri eta éhisirahi éma. Vahí ecuemepurureca eta máemunasirahehi, majacapirahehivare.

² (Taicha ani macahehi eta máechajiriruvahi tayehe eta Sagrada Escritura: “Nuchicha, tétavícvava eta pisamacarevayare eta nuyehé te pipiaracanu. Nucatiuchavivaneyare” macahepa. Jéhesare, puiti juca sache ticamapuracarehi eta epíarasirayarehi éma, éjacapacarechaha me Viya mapurare achanehechaha. Esamacarechaha puiti, taicha ema Viya mavaraha ticuchuhaheyare eta te ícuñayaréni taicha eta epecaturana.)

³ Núti nuvaraha nacuíja nacaecahini eta vématanerepi viti apóstoleana. Eta tacahe, nupamicavahi núti tíúriyare eta nuyeherepiana.

⁴ Eta tacahe, ichape eta néchampiravahi te nímitureca. Nímerecavahi yátupi eta mavanarairanuhi ema Viya. Ichapemuri eta nucamichirahi eta nucatajivairana, eta néchuriasirana, étapa eta tacajeravana eta nítátijirisirava.

⁵ Vahi nucaínajiruvaimahi táichavene eta náestasiranuhi ena nánarana, náeratasiranuhivare, tájinanéni viviurevainahini. Te apana avasareana tímurijiacanuanahi taicha eta nasemaneavahi. Eta nítátijirisiravahi, ichape eta tamuracavahi eta nucaematanerahi. Camurihivare eta numacaimasiravahi. Camurihivare eta nécuava eta nupaisirana.

⁶ Éti ímatinuhi yátupihí eta táurivahi eta nítaresira. Ímatinuhivare eta nucaimí-tucasihí mayehe ema Jesucristo. Táichavenehi eta mávahásiranuhi ema Espíritu Santo, nucayehehi eta paciencia nayehe namutu, nujapanurahi-hivare. Yátupiquenehi eta némunaraivahi.

⁷ Nímitucahi eta yátupihí máimiturapiana ema Viáquenu. Énerichuvare ema Viya tímícatacanuhi tayehe eta máitupajjiasiravahi te tamutu eta nucameta-raírurahi eta máechajiriruvahi, étapa eta nucatiuchirahi eta véhiruhi.

⁸ Eta nupaisirapaipahi, natiaríhí ena ticunachuanahi, tíuriemanahi eta nuyehe. Natiaríhíhivare ena tépurunuanahi, tíñemahípivare eta nacayemaquene eta nuyehe. Natiaríhíhivare ena tímijarechanuana tépiyahirahi. Nutupiruvahisera tamutu eta nítaresirahi.

⁹ Natiaríhíhivare ena vahi tisuapanuanaimahi, taicha tépuruanahi eta apóstolenuirahi. Natiaríhisamivaresera ena tisuapanuana taicha tisamairicanuanahi eta yátupirahi eta nímiturapiana. Tatiaríhíhivare te tíánehípa eta népenirayaréni. Núchuchisera, maicha ema Viya. Natiaríhíhivare ena téhanacanuana muraca. Váhisera máisapavaca ema Viya eta nacapasiranui-nahini.

¹⁰ Tatiaríhíhivare te nucatisamurevahi ichape. Nútisera nucurísamure-reacavahi tamutu sácheana. Páurenuhi eta náimairanuhi ena achaneana. Ichapemurianahisera ena níjararuanahi eta tacaimahaquenehi eta náchanevana. Ani, tájina nímahaquenéna. Téhesera apana nítaresira, tétaicavaya eta nucaímahaqueneraya.

¹¹ Nuparapenevana némunaruqueneana, nutupiruvahi te nusamure eta juca nuconsejarapianahi eyehe.

¹² Vahi nuvaraha ecuímijachahini nínjacáche eta némunasirahehi. Németeacahisera éti ínajiacanuhi eta émunasiranuhi.

¹³ Éti, ecutihí nuchichanavehénahini eta némunasirahehi. Nuvaraha tachavahini eta émunasiranuhi, esuapiranuhivaréni.

Viti, tiávahácahavihi ema Viya taicha machanerahavihi

¹⁴ Nuparapenevana, vahi ecuávahácavaca nácani máehicarahanahi ema Viáquenu. Étarípa te arayenaheyare, vahi ecuveha nácani máehicarahanahi. Taicha téjecacayarehi eta panererucana. Viti véhicanahi ema Viáquenu, tatupiruvahi eta vípanereru. Énasera ena máehicarahanahi, tavayuacahi eta tamauríqueneana. Vítí víurícahi eta tíjarahí; énasera náurícahi eta tímápicu.

¹⁵ Taicha víti, mávaháruhavihi ema Cristo. Váiparinehi vícachanémahí ema Váinarají. Tásiha, te víávahácavaca ena masuapajirárahana, tíápitavairícanahí eta véhisirahí ema Viáquenu.

¹⁶ Énerichuvare, tiávahácahávípa ema Viya, émarípa ema Vícaíyaquene. Taicha ani macahehi: “Núti návahácavacaya ena téhicanuanahi. Néchavacayareva éna, taicha éna yátupíqueneanahi nuchaneranahi” macahepa. Eta

tacahe, váhiquene táuricahini eta vicasiapiravahini eta nayehe ena vahi machaneranainahini ema Viya, taicha apanahi ema nasiñarajihí.

¹⁷ Taicha acane macavanairipipa ema Viya, ani macahehi: “Érajicava eta te namuri ena vahi nuchaneranaina, machu napareacahe eta namaepera-jivana éna. Tacahe, éti nujacapaheyarehi.

¹⁸ Núti yátupiquenénuyarehi Ecaiyaquenenuhi. Éti nuchichanaveanahi” macahepa ema Viya máitupajijihaquenehi.

7

¹ Tacahe, némunaruqueneana nuparapenaveana, vahi távarahahini vínajicavahini tayehe eta juca vicuchapaquenehi puiti. Tacahe, vépachinachayarehi tamutu eta viáquehe étapa eta viáchaneva. VÍjaracavayarehi tamutu te visamureana me Viya taicha eta vipicauchirahi éma.

Eta máurisamurevahi ema Pablo táurivaipa eta náitatesira ena machamuriana

² Nuparapenaveana, nuvaraha ímiyanavahini esuapanuhini. Taicha nájinahi te etaracu éti nacatajivahini náinajicavahini níchavenénahini núti. Nájinavare nucaetemaquenénahini, nímipananájicavacahipucaini.

³ Váhivare nuvaraha nucajachahe puiti. Nutupiruvahi eta numetasirahehi cape juca: “Tétavicavahi eta nucasamurerarehi. Tájina ticamitiscanumahi, tayanapanepuca népena”.

⁴ Ichape eta nucasíñavairahi eta eyehe, nucunachahehi eta ecurisamurechiranuhi. Tayanapanehinéni ichape eta nucatajivairahi, tétavicavahisera eta étumechiranuhi ecurisamurechiranuhi.

⁵ Étaripa te nítecapapa tayehe eta Macedonia, tájina nunarasirainahini. Ichape eta nucatajivairahi naicha ena ticatianacuanahi. Ichaperinehivare eta néñamiravahi eta eyehe.

⁶ Émasera ema Viya tétavicavahi eta máetumeravahi nayehe nácani téñamasamureanahi. Nútiripa nétumechavainehi maicha éma, eta nímairapa máitecapauchiranuhi ema Tito.

⁷ Tavetijipa eta mametasiranupa ema Tito eta ecurisamurechirarinehi éma. Timetacanuvere ichape eta éñamiravahi eta nuyehe; evarairaipacha ímahanu; ichapevare eta evarairahi esuapanu eta étupirisirahi ema maca achane téjecapavahi. ¡Eta juca, tétavicavainehi eta ecurisamurechiranuhi!

⁸ Ichapehinéni eta táimipaneresirarehi eta nucartane. Nútiripa, ichaperinehivare eta táimipaneresiranuhi nucatisamurevahi te nucajurepa. Némitiscapasera puiti, taicha ánipi eta táimipaneresirarehi.

⁹ Púitiserá, tétavicavainehi eta núsamurevahi ícha, eta táetaviasiraheripahi eta ecatisamurevahi. Eta núsamurevahi, vahi étainahini taicha eta ecatisamurevahi. Núti núsamurevahi taicha títsivachavaipahi eta táurivaipahi eta epanereruana, evarairahi ecurisamurecha ema Viya. Eta tacahe, víti tájinapa vácayemahini eta eyehe.

¹⁰ Taicha tatiarihíni eta jácani májjararuhi ema Viya, táimipaneresirarehi, mavarairahi eta éneuchiravaya tayehe eta ejacapiravahi apaesa macuchucuhahe. Eta ecatisamurevahi tiámahi eta iúricacarevaya. Énasera ena apamuriana achaneana tayehe eta juca apaquehe, yátupi ticatisamurevanahi, váhisera náneuchavahini eta me Viya. Éta, tiáma eta náepenira.

¹¹ Étiserá, jtétavícavahi eta iúrivahi tásihaquenehi eta ecatisamurevairahi! Enevanerinehi ínajicahi eta éjecapíravahi taicha evarahahi ímiyanava ecurisamurecha ema Viya. Ichaperinehi eta nucunachirahehi taicha epicauchainehi ema Viya tayehe eta juca íchavaquénévahi. Evarahainehi nájahúchavahini nítecahini eta eyehe nímicatacahehíni. Étiserá enevanepa ecurujicacahi taicha eta esemanevahi maicha ema téjecapavahi te etaracu. Enevanepa émecharecapa éma. Ímrecavahi eta tamajinairahi éjecapíravainahini éti.

¹² Núti, te nucajurehénapa eta táinapure nucartane, vahi émainahíni máimipanererecanuhini ema téjecapavahi, váhivare émainahíni máimipanererecanuhini ema maiya, émaripa ema majarareruhi. Íchavenehi éti eta ímipaneresiranuhi te nucajurehénapa, nuvarairahi ímereuchavayarehi eta yátupipapuca eta esuapiranuinahini te mavahuana ema Viya.

¹³ Eta tacahe, tétavícavainehi eta étumechiranuhi núti eta nusamairisirahehi eta esuapiranuípa.

Tavetijípa eta núrísamurevapa eta táurivahi eta ejacapírahi ema Tito. Tétavícavahi eta márisamurevapahi ícha éti eta ésamirisiravaípa.

¹⁴ Váhirichu támapurujihini eta nucunachirahehi mayehe ema Tito eta núrísamurevahi ícha éti. Puítiripa, ímereuchavapa yátupíhi eta ecunachacarevahi.

¹⁵ Éma, tiápajucavapaípa eta máemunasirahehi éti. Máecharairicahi eta táurivahi eta ejacapírahi éma, esuaparinehivare, táichavenehi eta emansuiravahi étapa eta epicauchirahi íchape ema Víaquenu.

¹⁶ Núti apanavare, tétavícavahivare eta núrísamurevahi ícha éti. Nucasiñavahi táimiyana eta esuapiranuína te tamutu.

8

Tatupiruvayare te visamure te vivaraha vicajirica

¹ Tiuri puiti, nuparapenaveana, vivaraha vimetacahe eta nanaquisiravahi íchape éna apamuriana vichamuriana ticavasanahi te avasareana tinapaica te juca Macedonia. Éna, nasuapavanepa eta manacasamurechirahi ema Viya eta nacajirisirayarehi.

² Ichapemurihinéni eta náichirahi éna ticatianacanahi náemepaurechavacahi, váhisera náinajicavahini. Tivapinavanarichucha. Tatupiruvahi te nasamureana eta nájarasirahi eta nanaquiruvana. Páureanahinéni, tímecevahisera eta nanaquiruvana, ticutirine rícoanainahini.

³ Núti néchajisihahi eta juca taicha nunecapaequenehahi eta tápajusiravahi eta nanaquiruvana. Vahi náeñmahini, nájaracahi jácani nacayehequene. Vahi vipamicavacahini víti.

⁴ Énaserá, ichapemurihivare eta nayaseasirahavihi vísapahini tinaquicavana éna apanava, navarairahi nacajiyare éna vichamuriana ticavasanahi te Jerusalén.

⁵ Éna, náetaviuchahi eta navapinairavahi. Tínapucapa tinaquicavanahi eta nacaemataneasirahi ema Viya, navarairahi nacurisamurecha éma. Tásiha, étapa eta náicurehi éna vichamuriana.

⁶ Eta nímairahi nútí eta navapinavairahi eta nacajirisiraya, nupanerechahi nuanecaya ema Tito machava máiteca eta ara eyehe apaesa táitachavapaiñi eta enaquiruvanahi éti apanava. Cape juca épaniravainapa. Puiti ítauchavanepaini.

⁷ Taicha éti, ichapemuri eta ecasiñavairahi me Viya. Tétavicavahivare eta échemaraivahi. Camurihevare éti ímiturahiana. Evapinavahivare eta ecaemataneasirahi ema Viya. Tétavicavahivare eta émunaraivahi eta viyehe. Eta tacahe, táurica tápajucavahivaréni eta enaquiruvana ecajirisiraya.

⁸ Váhiserá nupamicáhe eta nuanesirahénahini. Nuvarahahisera ímatiequenehahi eta navapinaraivahi ena apamuriana vichamuriana apaesa ímerecahini éti apanava eta yátupiquenérahí émunaraivahi.

⁹ Ímatirichuhi éti eta máemunasirahavihi ema Viáquenu Jesucristo. Éma, tamutu tiúricacarehi te máviahí te anuma, tájinahinéni mácamunuhini. Étive-nehisera tiúcupaícapa te juca apaquehe. Páurehí éma eta máitaresirahí apaesa éti ejacapahini eta iúricacareva maicha éma.

¹⁰⁻¹¹ Németeaca táurica ítauchavanéni eta juca enaquisiravahi, váchupa épanavaqueneripahi cape año. Táimiyana va eta evapinairavayarehi eta ítauchiraya eta enaquiruvanayare tásihaquenehi eta jácani tatiarihiqueneanahi ecayehequeneanahi.

¹² Etiarihi erataha enaquica apaesachicha. Etiarivare erataha íápajucava eta enaquisiravahi. Etiarihi erataha enaquica camuri. Tacamunuchucha tátupiruva te esamureana, evapinavahi eta enaquiruvaya apaesa tijacapacareya mayehe ema Viya.

¹³ Vahi nuyaseacahe échuriahahini éti táichavénenahini eta ímicatasirayare ena apamuriana.

¹⁴ Nuvarahahisera ímerecavahini eta ímicatasiravacayare ena vichamuriana. Puiti ecaimahaquenevacahí, eratahahí ecájríca ena náechuriruanahi. Tijuricati te apana año, étipavainapapuca échuriaca. Éna tísirijicavanainapa eta eyehe, énapavainapa tinaquícavanayare. Ene tacaheyare eta ítaresirayare, ecuticacayare. Nacuija nacucatajiva tayehe eta ecamunqueneana.

¹⁵ Vítauchayare eta tacayemaquenehi eta Sagrada Escritura, ani tacahe: “Namutuhí ticaniruana. Nájina nácatajivahini, nájinvare náechuriahahini, váhivare námepururerecahini” tacahepa.

Éma Tito énapa ena apinana vanairucanahi mayehe ema Pablo

¹⁶ Nútí nuhasulupayachahi ema Viya eta manacasamurechirahi ema Tito máenamiravahi eta eyehe, tacutihí eta nusamure nénamiravahi eta eyehe.

¹⁷ Éma, matupiruvahi tijicapanuhi eta nutuparasirahi téchapajiricaheyare. Ichape eta mavarairahi téjirapanahayare, taicha tétavicavahi eta máemunasirahehi.

¹⁸ Eta mayanirayare ema Tito eta ara eyehe, vévatacayare macachanayarepahí ema apana vichamurivare. Tímaticarehí éma eta macunachacarevahi te jácani máimituresirapahí nayehe ena vichamuriana tayehe eta véhiruhi.

¹⁹ Éma maca nerejihí ne vichamuriana eta máimicatasiranuyare eta vipaisirayare, víjarasirayare ena vichamuriana eta enaquiruvanahi. Víchahí eta juca, vivarairahi vicurismurechaya ema Viáquenu. Vímereuchaheyareva eta evapinairavahi éti ecájríraivahi.

20-21 Taicha núti eta víamirayare eta ichapequene enaquiruvana, nuvaraha nímerecayare eta táuriva eta víchira, apaesa vahi nacuechajisianu nácani achaneana. Ema Viya tímararacanuhi eta táuriva eta nupanereruana. Nuvarahavare tiuri eta náimairahi ena vichamuriana.

22 Énerichuvare névatacayareva ema apanavare vichamuri. Éma, ichapemurihi tímereuchava eta mavapinairahi eta macaemataneasirahi ema Viáquenu. Puiti éma, tivapinavavarepa eta máitecapauchiraheya, taicha macasiñavahi eta máimatirainapa eta evapinavahi eta ecajiraivahi éti.

23 Núti nuvarahahi náimatiyarehi namutu ema Tito, eta émairahi nujupaha tayehe eta juca vématanerepi. Vicuticacahi eta vicaemataneasirahe, véchapajirisirahehi éti. Étaripa te nacayasesererupuca nayehe ena apinana vichamuriana macachanequeneanayarehi ema Tito, énerichuvare emetacayare eta nerejianahi ena apamuriana vichamuriana, táichavenehi eta táurivahi eta nacaemataneasirahi ema Cristo.

24 Nuvarahahi ímerekavayare eta nayehe ena nani apinana vichamuriana eta yátupirahi eta émunaraivahi, apaesa ecurisamurecha namutu ena vichamuriana te nasamairiricapa, náimatirayare vahi támapuruji eta nucunachirahehi.

9

Tiúripana vivapinavayarehi eta vinaquisiravana nayeheyare ena vichamuriana

1 Tiuri puiti, núti námatihiripahi eta evapinairava tayehe eta ecajirisira nayeheyarehi ena vichamuriana ticavasanahi te Jerusalén. Vaipa tácamunucarehini nápepejiricahehini.

2 Ichapemurihi eta nucunachirahehi nayehe ena vichamuriana ticavasanahi te juca Macedonia. Numetacavacahi eta evapinairavahi eta épaniravahi ena quicava cápequeneripahi te apanahi año. Tacahe, eta nasamairirisirahi eta evapinairavahi éti, éna apanava tivapinavanavarepa ichape.

3 Eta tacahe, névatacahi puiti ena nani mapanana vichamuriana, apaesa vahi ecuvayuaracanu. Vahi tacumapuruji eta nucunachirahehi eta enaquisirava. Nuvaraha tatsecavaipa támutu te nítecapauchaha.

4 Tijuricati náehicanupahi te níteca ena vichamuriana ticavasanahi te juca, tacujirichaha tatsecavahi machu átsirihacare, machu támapuruji eta nucunachirahehi. Váipasare ecuimicatsiriacanu núti apanava.

5 Tásiha, tacahehi eta nupanereruana eta névatasirahi puiti ena nani vichamuriana, náinapumirauchanu náitecapauchaha, náimicatacahe eta ecurujisirayare eta enaquiruvana. Nuvaraha evapinavayarehi eta enaquisiravahi. Nájina vahi náimijachanu nútinachucha nupamicaha.

6 Némechaheyare jucarihi eta échajirirucava, ani tacahehi: “Mácani achane ánicuchicharichu eta máesane máevaruhi, ánimurichicharichu eta mavehayare eta távame eta máesane. Mácánisera ichapepana eta máesane, ichapemurivare eta távame mavehaquenyare” tacahepa.

7 Namutu nácani tinaquicavanayare, tavarahahi tatupiruvayarehi te nasamureana eta nanaquisiravaya. Vahi nacatiequenehaimahi, taicha nájina típamicaimahi. Taicha ema Viya, tétavicava eta máemunasirahi mácani tatupiruvahi eta májaracasiresirahi.

8 Ecasiñavaya yátupina mayehe ema Viya, taicha éma, tétavicavahi eta máitupajjiasiravahi. Mavarahahi tíjaracaheya tamutu eta

ecamunuqueneana. Vaipa échurihaimahi maicha éma. Ecayehenasarepa eta ímicatasiravacaya nácani apamuriana ticamunuvanahi.

⁹ Ecutiyahehi ema achane tiuri, ema táechajisihahi eta Sagrada Escritura, ani tacahehi: “Ema achane tíurihi ticunachacarehi me Viya, tivapinavahi eta macajiraparacahi ena páureana. Tájina vahi téchuriacaimahi eta macajirisira te tamutu eta máitaresirahi” tacahepa.

¹⁰ Ema Viya, émahi ema tinaquicahi eta evaraquiiana. Éma, macaejapacahivare eta tinicacare, étapa víáchanechiavayarehi. Ene macaheya eyehe éti. Tjaracahepa eta enaquisiravaya, tímicutijiricavahi eta táejapasira eta evaraqui. Éma, ticajurucayareva eta enaquiruhi apaesa camurianaina ena ecatajiruanayare.

¹¹ Tásiha, ema Viya tjaracahenapa eta ímahaqueneanayare apaesa ímiyanavayarehi íjaracasireca. Púitiripa eta víamaqueneyare enaquiruvanahi nayehe ena vichamuriana, ichape eta nahasulupayachirayarehi ema Viya.

¹² Taicha eta ímicatasiravacahi ena vichamuriana, ecuchucuhavacayarehi tayehe eta nacamunuiravahi. Tásiha éna, tiápajucavainapa te nasamureana eta nahasulupayachirayarehi ema Viya.

¹³ Ichapeyarehivare eta najirauchirayarehi ema Viya, nacunachirayareva éma. Eta evapinairavahi eta ecajirisirahi eta ímeresiravahi eta esuapirahi yátupi eta véhiruhi, étaripa eta máimiturapihi ema Cristo. Tímereuchahehivare eta íáchanevahi nayehe nácani ticamunuanahi.

¹⁴ Tásiha, tiyaseuchaheanainapa me Viya te nayujarasirana. Ichape eta náemunasiraheyarehi, navarairayareva náimahahevane táichavenehi eta ítsirijisiravahi eta máemunasirahehi ema Viya.

¹⁵ ¡Tétavicavahi eta víúricacarehi maicha éma! ¡Tájinapa viviya apanaina vácayema eta vihasulupayachira ema Viya táichavenehi eta juca víjaracasi!

10

Yátupi eta masuapacarevahi eta apóstolériahi ema Pablo

¹ Nuti Pablo, yátupiquenénuhi eta apóstolenuira. Puiti nuyaseacahe eta ímatiranuína eta némunasirahehi. Nucutihi eta máemunaraivahi ema Cristo étapa eta majapanuraivahi. Etiarihipuca eti ímijachahi népiyacavahi núri te emirahu; tásiha, te nuyerehihevare, tétavicavahíji eta nuvainarajivahi mapicaurairahanuhíji.

² Puiti nutuparacahe: Étupirisamurechavaipahini te tamirahu eta nítecapauchiraheya, apaesa vahi tacuitauchava nucusemaracahehini. Ena nani náimijachahi nucutihi mácani achametataji, étachucha nutanuca eta nuvarahaquenehi. Nucamatinaacavacayaresera te nítecapauchahépa.

³ Yátupi ecutiqenenuhi achanenuhi. Váhiserá nácutihini ena apamuriana ajairana nápicararecanuma eta náeharaviana, navarairahi tisuapacareanayarehi.

⁴ Taicha núti vahi néhacacaimahi te nuvahuana, tájinavare nácasíñaimahi. Mararihiserá ema Viya ema tjaracanuhi eta nútupajijiasiravaya nucamatina-sihayare éna. Ema Viya, nájina ticachuricaimahi.

⁵ Eta tacahehi eta nucaepahairahi eta semanereana, ena ticasíñavavai-canahi, tímijachavanahivare ena téchinavanahi, vahi návarahahini máimicatavacahini ema Viya. Váhivare návarahahini náesenicahini éma. Níturucaya-rehiserá nácani muracapanereruanahi eta nasuapiraina yátupi ema Cristo.

6 Nucuchapahesera eta yátupina eta esuapajiraivaina. Tásiha, te nítecapa, nímiratahacava eta nítsivachirayare eta napanereruana ena masuapajiraيرانا. Te váhipuca náeneuchava, némechavacayare.

Natiarihi ena tímijachavanahi apóstoleana, tímicutichavanahi ema Pablo

7 Éti ímijachaipapuca tájinaquenénuhi nítupajijiasiravainahini, eta ímairanuhi eta nímahisami. Németeacavare natiarihi ena ticunachavanahi machaneranahi ema Cristo. Nuvarahasera náimatinuhini eta machanerairanuhi nútí apanava.

8 Natiarihipapuca náimijachaipapuca vahi nétupicavahi nútí eta nupamisirahehi eta esuapiranuhi. Váhisera nutsirihahini taicha yátupíhi nutuparahaichuhi eta návacure apóstolenuhi. Taicha ema Cristo mavarahahi nétumechaheyare eta éhisirahi éma. Tájina vahi nucamitiequenehahémahi nútí.

9 Numetacahehi eta juca, váhisera tácarichumahi nípicararecahehini te juca nucartane. Tamutuyare títauchava te nítecapauchahepa.

10 Ena nacahehi eta náechajiriruvahi: “Vahi ecusuapa eta macartane. Tayanapane muracapahi eta táechajiriruvana, émasera tájina mamuracavaina. Énerichuvare muracacaema eta máechajisira” nacahepa.

11 Éna náimijachahi tacarichuhi muraca eta táechajiriruvahi eta nucartane. Tímahanuanayaresera te váhipuca nusuapacarehi te nítecapauchahepa eta ara eyehe.

12 Nútí vahi nímicutichaimahi nayehe ena tímijachavanahi ticunachacareanapanahi. Ena nani énajiricavaichucha ticunachavana, tímijachavanahi nájina ticachuricanaina éna. Súnsurupichucha eta juca náichaquenehi.

13 Nútisera vahi nútíjivaimahi nucunachavahini. Émayarehi ema Viya ticunachanuyarehi, taicha éma tíjaracanuhi eta nusuapacarevahi eta eyehe, tásihaquenehi eta níjarasirahehi eta táurinaqueneana máechajiriruvana ema Cristo.

14 Váhivare nétaviviriacavahini eta nusuapacarevahi eta eyehe. Nútihinéni nínapucahi te nítecapauchahepa te nímitucahepa eta máechajiriruva ema Cristo. Tacahe, tituparacanuhi eta esuapiranuyarehi.

15 Váhivare nucunachavaimahi tayehe eta apaematanehi násapihahipucaini. Nuvarahasera tápajucavaini eta esuapajiraivaina mayehe ema Cristo. Nuvarahavare nímitucaheyare eta apamuriana yátupiqueneana, nítauchiraina eta nucatuparahairahi me Viya. Tájina vahi nétaviviriacavahini eta nusuapacarevahi eta eyehe.

16 Nútí, váhiquene nímicasiapavaimahi te jácani avasare nacametarairuquenéipa nácani apana, nucunachiravayarepuca tayehe eta táitaurevapaipa apaemataneanahi.

17 Numetacahe: Nácani tímijachavanahi ticunachacareana, yátupinahi-seráini eta nacunachacarevaina mayehe ema Viya.

18 Taicha mácani achane, te yátupíhi eta macunachacarevahi, vahi émajivaimahi ticunachava. Émayarehi ema Viya ticunachayarehi.

11

Ichape eta máeñamiravahi ema Pablo nayehe ena machamuriana

1 Tiuri puiti, nuvaraha ecamichaini eta juca nucayemaqueneanayare eta eyehe. Ticutiyare súnsurupiana. Nuvarahasera ítasamahini.

² Puiti, tétavicavahi eta néñamiravahi ícha éti, tásihaquenehisera me Viya. Nucutiripa mácani achane suiya esu amaperu eta majaneasirahi ésu. Taicha nuvaraha táurihini eta majacapiraheyare ema Cristo te jena sáchezare. Ácutihini súcani esena amaperu te sutupiruvahi eta sucaimaira, tájinasarepa mácayemahini ema suima.

³ Eta néñamiravahi eyehe, nuvarahahi ecuijahini iáquipaicava, ecucamitiequenehahini eta táurivahi eta éhisirahi ema Cristo. Vahi ecucuti eta suáquipaisiravahi esu vénarahaini Eva, maicha ema Váinaraji Satanás.

⁴ Ímicatisamurechanuhi eta esuapiravanehi ena tépiyahirahiana, apapi-pahi eta nametarairu tayehe eta náuchucuiraya. Núti, émahi ema Jesucristo ema néchajisahasahi. Énaserá, apanahi ema náechajisihahi. Émaripa ema Espíritu Santo, váhivare émainahini náechajisihahini éna. Apanachucha ema nacasiñahi. Éti ejacaparipahi ema yátupiquenehi Espíritu Santo.

⁵ Núti németeaca vahi ticachuricanuanaimahi eta nucametarairuira ena tímijachavanahi apóstolequeneana ticametarairurahianahíji náichava.

⁶ Tayanapanepuca táepurucarehi nayehe eta néchajisirasami, étasera eta nútupajijiasirava, tamutuhi nímatiequeneha. Ímatinuhi éti tayehe tamutu jácani nímitusiraheana níchaqueneanahi.

⁷ Etiarisherapuca éti ímijachahi néjecapava eta némepaurechiravahi. Táitusiava népurucarehi eyehe, ichaperipahisera núrichahehipahi éti.

⁸ Váhivare nuyaseacahehipucaini eta nunicaquenerépi eta nímitusirahehi. Yátupi tjaracananahi ena apamuriana vichamuriana eta nénisiavayare.

⁹ Tásiha, te níthapa eta plata, váhivare nuyaseacahehini eta nunicaquene. Taicha ena vichamuriana ticavasanahe te provincia Macedonia náimiamarecahi eta nucamunuqueneanahi. Tacahe, nujaneacavahi, vahi nuyaseacahehini éti. Váhivare nuyaseacahémahi puiti.

¹⁰ Jéhesare, nájina tiratahaimahi tihapapica eta nucunachacarevahi tayehe eta tájina nucobrachirahehini eta nímitusirahehi emutu eti ecavasanahi te Acaya, taicha yátupíhi eta nímatiequenehairahi tamutu eta yátupiqueneanahi máimiturapiana ema Cristo.

¹¹ Eta juca nucayemaqueneana, vahi ímijachaimahi étainahipucaini táichanu eta numaemunasirahénahini. Ema Viya máimatíhi eta yátupirahi némunacáhe.

¹² Énesera nucaheyare núti. Váhiquene nuyaseacahémahi. Nímiyanavaya eta nujaneasirava apaesa tacuija navíya eta taviuchanu nayehe ena tímijachavanahi tímiturahiana nácutinuhini eta apóstolenuirahi núti. Taicha navarahahi ticunachacareanayarehi tímícutichavanayarehi eta nucunachacarevahi núti.

¹³ Éna, tépiyacavanahi apóstoleana. Tivayuarahianasera eta náitaresirahi. Váhiquenevare vanairucanaimahi me Viáquenu Jesucristo.

¹⁴ Éna nani, vahi tiáramicareana éna eta navayuaravahi, taicha ema Satanás, yátupiquenehi náquenu éna, tépiyacavahi macuti ema ángele vanairu-cahi me Viya, mavarairahi tivayureca.

¹⁵ Ene nacaheyarehi ena nani mavanaranahi ema Satanás, tépiyacava-napahi pastoreana náuriqueneana. Járájapayarehisera eta sáchezare najaca-pirayare eta náicuñayare táchaveneyare eta juca náimíquipaisirahéhi.

Ichapemuri eta macatajivairahi ema Apóstole Pablo taicha eta macametarairuirahi

16 Nuvaraha nápechava numetacahe: Vahi ecusuapa eta náimijachiranuhi máurishinu. Te etiarhipuca éti ímijachanu máurishi, ecayehe paciencia eta nuyehe. Ecamichanu eta juca nucunachiravasamipaini apaesachichainahini nácutipaini eta nacunachiravahi ena apamuriana.

17 Tájina mavanaripina ema Viáquenu tayehe eta vicunachacarevahi. Tíchanuhisera nuncunachava taicha éti ímijachanu máurishinuhi.

18 Táichavenehisera eta nusamairirisirahi eta nacunachiravahi eyehe eta náitupajijiasiravahíji, énenapa nucaheyare núti eta nuncunachirava.

19 Éti, ímijachavahi ichape eta échemaraivavacahi. Evapinavahisera eta esuapirahi eta nayaseasirahehi ena máurishiana.

20 Ecamichahivare tamutu eta napamisirahe ítaucha eta tivitacareana vanaripiana. Tiverējaheanahi eta ecayehequeneana. Tiyurucacheana éhicavaca éna. Tasapihapa éti ecamichahi tamutu eta juca.

21 Núti, tétavicavahi nutsirihahi énemahinuhinahini nácahehine. Te ímijachahipuca tíuríhi tamutu eta juca náichirahehi, eperdonachanuhini vahi níchahine éta.

Ena nani ticunachavanahi eta náurivahi. Núti apanava núriha eta nuncunachiravayarehi, tayanapane ímijachanupuca máurishinuhi.

22 Éna ticunachavanahi énaírahi hebreo israelítana. Núti apana hebréonuvare, israelítanuvare. Énerichuvare núti mámariequenenu ema viáchucaíni Abraham, ncutirichuhivare éna.

23 Éna, tímijachavanahi mavanarana ema Cristo. Nútisera, jéhevarequenenuhi mavanaranuhi ema Cristo. Nápapujanavahi núti eta nayehe. (Máurishinuhi eta nímaíravahi eta juca nuncunachiravahi.) Jéhevare núti nápapujanavahi eta nucaemataneasirahi ema Viya, nucachuricavacahi namutu éna. Eta juca nucaemataneasirahi me Viya, témestacanuhi, témeratacanuhivare. Énerichuvare ichapemuríhi eta táimicapasíranuyarehini. Ena nani nánarana, vahi náichahine, nájina nacatíancavacahine.

24 Tacutiquene cíncohevere nucaesta naicha ena nujaneanana israelítana te jácane nupaisíranapahi. Mapana arroba eta náestíranuhi.

25 Mapahevare tépuchírícanuanahi. Étahevare tiyucararacuanahi te márijahiana. Mapahevare térica eta pacure tíámanupahi. Tásiha, étanavare sache étanapa yati nucahehi te táínahu eta une te ichapequene mar.

26 Ichapemuríhivare eta nupaisíranahi. Nímahavahivare eta táíñehicarevahi eta tamuracava tajunapírahi eta une te ichape cajúcare. Nupicacavahivare naicha ena tíámerahiana. Tipanereuchanuanapahi ticapacuanana ena nujaneanana, énapa ena apavasanana. Tamutuhi náemauchianupahi te jácane avasare, téhepa te mávapahi apaquehe, étape te jácane nupaisírana te une tayehe eta pacure. Énerichuvare témauchuanana ena tímijachavanahi nuchamuriana táichavenehi eta népiyaequeneanahi.

27 Ichapemuri eta nucaematanerahi. Nucatajivahi muraca. Ichapemuríhivare eta numacáimarasíravahi. Nucatajivahivare tayehe eta nécuava étape eta numaneva. Ichapemuríhivare eta nucamíchira eta ayunanuíranuhi. Nucatajivahivare taicha eta ticasarahi. Néchuríhavare eta numuríharapí.

28 Tayanapaneinesera eta nucatajivairahi ichape, nímiyanavahisera eta néñamíravahi ícha emutu eti nuchamuriana te tamutu avasareana, nuvarairahi tacuíjahine tahapírícahehine tayehe eta éhisírahi ema Cristo.

²⁹ Te etiarhipuca eti vahi túmehénahini eta éhisirahi ema Viáquenu, ichape-rinehi eta néñamiravahi núti. Tacutiquene te etiarhipuca éti náimiauipai-ruhehi, tétavicavahi eta nutsirirahivare, nusemasamurevarepa.

³⁰ Téhesera tatiarhipuca eta nacunachiravahi, núti apanavare nucunachavavare. Étasera numaitupajijiasiravahi, étachucha ticunachacarehi eta nuyehe.

³¹ Émasera ema Tata Vicaiyaquene, Maiya ema Viáquenu Jesucristo, máimatihí éma eta tatupiruvairahí eta nucayemaqueneanahi te juca nucartane. Éma, máitavacacahi eta majirauchacarevahi.

³² Tacutiquene te návihaipahi te Damasco, ema tuparairucahi tayehe, majupahahi ema rey Aretas, máimivanerecachi ena séntinelana te tapajana tayehe eta avasare, mavarairahi ticaratacanuana.

³³ Énasera ena nuchamuriana tinacacuhanuanapa tayehe eta ichape saye túmehi, ticuchucanuanapa te ventana, ticajuchuchucanuanapa te tiupi enure te apachacaya eta yúchama tayehe eta avasare. Tacahehi eta núchucuirahi. Vaipa nacaratacanuhini.

12

Em a Pablo mavapuchahi tímerecava ema Viya

¹ Yátupi tájina nuvehaimahi eta nútijivairahi nucunachava. Numetacahe-yaresera eta nímairahi te nuvapure máechajisiranuhi ema Viáquenu.

²⁻³ Catorce áñoa eta táetavisiravahi eta nímairahi tiámanuanapa tímipairi-ricanuanahíji te anuma te mávasa ema Viya. Váhisera necha te étahipuca eta náquehe námaphi eta nuyanirahi, te étachuchapuca eta náchaneva. Émasera ema Viya, éma téchahi eta níchararacavapahí eta mámiranuhi te mávasa anuma.

⁴ Ánaqui nusamapa eta mahu. Timetacanupa eta téchacareanahi tayumurevahi. Váhisera táisapacarehini numetajiricahini.

⁵ Étapapucaini nucunachiravahini tayehe eta nímahaquenehi nusamaque-nehivare, taicha tímimatichanuhi ema Viya. Váhisera nucunachavaimahi tayehe. Núti nucunachavahi tayehe eta numáitupajijiasiravahi. Étachucha nucasiñavaiyahi tayehe.

⁶ Yátupihinéni eta nucunachacarevahi. Váhisera nucajamuravahini, taicha tájina nímatihini nutanuca eta nacunachiranuhini ena achaneana. Nuvarahasera nanecapaequenehahini eta táurivahi eta nítaresirahi.

⁷ Tétavicavahi eta tiáramicare eta nímahaqueneana te anuma. Tásiha, ema Viya vahi mávarahaimahi nucasiñavavaicahini eta nímairahi. Máisapahi ema Váinarajiquene Satanás técajumachanuhi, cútirine tatiarihinahini itape tayuvaraca te neche. Taicha ema Viya mavaraha vahi nucuvayuchava eta nucunachacarevaina.

⁸ Mapahe eta nuyaseasirahi ema Viya eta macanarasiranuinhini eta nucatiruhavahi.

⁹ Émasera ema Viya, ánipa máichanuhi: “Vuíchaha nucanaracavimahi. Nujapanavisera. Níjaracaviyare ichape eta pitumevaya, tayanapane eta pimaitupajijiasiravahi. Taicha nuvaraha náimatiyarehi ena achaneana eta nútupajijiasiravahi piyehe” máichanupa. Eta tacahe, núrismuréchucha puiti eta tamajinairahi eta nútupajijiasiravainahini apaesa máimerecavahini ema Cristo eta máijarasiranuhi eta máitupajijiasiravahi.

10 Tásiha, nuvavinavahi puiti eta napanajisiranuhi, nucatajivairahi náicha, náumehairanuhivare táichavenehi eta mavanarairanuhi ema Cristo. Nuvavinavahivare eta numaitupajijiasiravahi étapa eta néchuriasirana, taicha eta nímairavahi tamajinairahi nitupajijiasiravainahini, nútisera nusamavahi eta nutumevapaipaicha maicha ema Viáquenu.

Ena Pablo tétavicava eta máeñamiravahi nayehe ena machamuriana

11 Yátupi puiti eta néchajisiavairahi nucatiuchiravahi, tímicutijirícavaipa máurishinuínahíni. Íchavenehisera éti, taicha éti tatuparacahi ecatiuchanuyarehini, váipasare nucuechajisiavahini núti, vahi nútijivainahini nucunachavahini. Navetijisera ena tímijachavanahi apóstoleanahíji ena éhiruanahi, jéhevare éna, tájinaquenepa nacunachacarevaina.

12 Nímerecavahisera eta eyehe eta yátupiquenénuirahi apóstolenu eta nucaemataneasirahehi. Tayanapane camuri eta nucatiuhavana, nucamichahisera tamutu. Nímechaheripahinéni eta tiáramicareana níchaque-neanahi, maicha ema Espíritu Santo. Éta tímicaecherachanuhi eta yátupiquenénuirahi apóstolenu.

13 Ena apamuriana vichamuriana te apana avasareana ticajinuanahi éna eta nucamunuqueneanahi. Étisera, tájina vahi nuyaseacahehini étainhipucaini eta nunicaquene, nítecahipucaini íjaracanuíni. ¡Váhisera ecusema eta juca numaitepauchirahihi!

14 Puiti nutserereacavaipa eta mapaherayarepa níteca eta ara eyehe, nupaipiuchiraheya. Váhivaresera nácamunuimahi ítátinuhini. Váhivare étaina nutanucapahini eta ecayehequeneana. Étiquenesera nucamunuhepahi eta esuapiranuinahini. Taicha nuchichanavehehi éti. Vahi étinayare ítátinu. Núti nítátiheyare taicha núti ecaiyaquenenuhi.

15 Váhivare néñamiáhemahi eta nucayehequenehi eta nítátirahéyare. Váhivare nuyacujimahi eta nucaemataneasiraheyare táurivayare eta iáchanevana. Tayanapane váhipuca ecuemunanjicanuhi, nútisera tétavicavahi eta némunasirahehi.

16 Nararihivare ena téchajicanahi eta nuyehe. Ani tacahehi eta náechajiriruvahi: “Yátupi te tipaipiuchahavi éma, váhinenicacha tiyaseacahavi eta macamunuquene. Máitucasera eta mavereasirahaviya eta viplatane” nacahehi.

17 Eti ímatihí vahi énavanerecainahipucaini ena névataruasanahi eyehe, énaiahipucaini navereacahehini níchavenénahini núti.

18 Te nuvanecapa ema Tito émapa ema macachanequenepahí, téjirapanahéanayarehi, ¡tájjinavare mayaseacahehini éma! Taicha vicuticacahí víti eta viúrivahi eta eyehe, táichavenehi eta vémunasirahehi ichape.

19 Eti ímijachaipapuca nutanucahi núti eta nucatiuchiravayarehi eta eyehe. Váhisera tácahehini. Vahi tácamunucarémahi eta nucatiuchiravaya taicha núti nutupiruvahi eta néchajisirahehi te mamirahu ema Viya étapa te májare ema Cristo, nuvarairahi tajuruchahini eta táurivaina eta iáchanevana, eti némunarqueneanahi nuchamurichichana.

20 Núti, te níteca eta ara eyehe, nupicahi vahi núricaimahi ácahemahíni eta nuchimapiraheya: éhajiricácahipucaini, ecapinarujiricacahipucaini, esemajiricacahipucaini, íputsimuriácacahipucaini, épiyéquenerelijiricacahipucaini, íumehajiricacahipucaini, ecasiñavavairicahipucaini, váhipuca

tacuaquejiricacahi eta epanereruana. Te ecahehipuca, vahi iúricaimahi némecharecahehini.

²¹ Nupicahisera nátsirihacarehini núti mayehe ema Viya íchavenénahini éti, vuíchaha étupiricavahini eta nuchimapuraheyare. Vahi nuvaraha ecaiyacanu éti enerejicavana éjecapavanahi, taicha eta ánaquiaparipahi eta émainajisiraichaha eta ecapecaturairana. Ímiyanavaichucha eta esenamarahehi, étapa eta emapicaurahivaichucha.

13

Eta máipicararesirahi ema Pablo eta táichecuarauqui eta macartane

¹⁻² Puiti mapahenapa eta néjirairaheya. Cape te nítesinehi, numetacahavanehi nútijacaruvahi, camuriripa eta nuconsejachirahehi eti éjecapavanahi. Iúrihapaini ínajica eta emaurivana. Puiti te nucartane, nápechavahi numetacahe emutu. Vaipa nucaiticaimahi nácani téjecapavanahi. Núti nétupiricavacaya.

³ Etiarihihi eti épurunuhi eta mavanesianuhi ema Cristo. Ímahayaresera ichape eta máimicatasiránuhi eta nétupirisiraheyare. Taicha éma, títupajjiacavahi eta máemecharesiraheya. Tipicacare eta máicuñaraqui.

⁴ Yátupi éma tísapavahi ticaetata, tímicitijiricavaipahi vahi macuratahahini ticatiuchava. Váhisera mánasihini máepenahini, tichavahi títareca puiti taicha eta máitupajjiiasiravahi ema Viya. Ene nucahehi núti nísapayarehi, tímicitijiricavahi vahi nucuratahairainahini. Ímahanuyaresera eta máijarasiranuhi eta máitupajjiiasirava táichavenehi eta mávahásiranuhi eta nétupiricaheyarehi taicha nucatuparahahi eta nujaneasiraheyarehi emutu éti.

⁵ Nuvaraha esamavayare étijiva, te yátupihipuca tíuríhi eta éhisirahi ema Viáquenu Jesucristo, te yátupipuca eta mávahásirahehi éma. Taicha éma mávahácavacahi namutu ena machichanaveana yátupiqueneana. Machu émepurucava eta íjarasiravahi éhica éma.

⁶ Nuvarahasera némechahe ímatinuhini yátupinahini eta mávahásiranuhi ema Cristo, jéhevare núti yátupiquenenuhi machaneranuhi.

⁷ Núti, ichape eta nuyujarauchirahehi, nuyaseacahi ema Viya eta étupirisiravayarehi apaesa tacuija eviurevaina mayehe. Ichape eta nuvarairahi íchahini eta táuriqueneana. Tayanapanerinehipuca náepurunuhini, nuvarahasera ímiyanavayare éti íchayare eta táuriqueneana.

⁸ Taicha núti nutupiruvahi nicha eta táuriqueneana yátupiqueneana. Váhiquene nísapavaimahi nuhapapica eta yátupiqueneana. Eta tacahe, yátupina ésamiricava. Vaipa ecucamesa eta nápepejiricahé numetacahe.

⁹ Ichape eta ecurisamurechiranuya te yátupinapa étupiricava. Étijivainapa eratahayare ecaratavaca. Vaipa nútiparacaimahi eyehe. Puiti eta nuyasearapi núti me Viya, tamutuyarepa tichavaya eta táurivahi eta ítaresira.

¹⁰ Puiti nucajurehe eta juca carta, nucuchapavahi núti eta néjirairaheyare, támuturipahini étupirica apaesa tacuijahini nucucayema. Váhivare nucusemaini eyehe. Nuvarahasera nétumechaya eta íchanevana. Étahi eta nutuparacasanvani me Viáquenu eta apóstolenuirahi mayehe.

¹¹ Tiuri puiti, nuparapenaveana, ítátijiricavahi. Etanucayare eta táuriqueneana eta ítaresirana. Ecurisamurechacaca. Tacuijahini eta semanerena eta eyehe. Tácuticaca eta epanereruana. Máíjaracahehini

ema Viya eta tanarasiraina eta iáchanevana, taicha tétavicavahi eta máemunaraivahi éma.

¹²Núti néchajicahe emutu. Nuvaraha nétserarecahevacayare táicutiarahi eta táetavisiravahi eta némunasirahehi te mavahuana ema Viáquenu.

¹³Ani te juca téchajicaheana namutu ena vichamuriana.

¹⁴Nuyaseuchaheparaca emutu éti me Viáquenu Jesucristo táetaviuchahini eta iúricacarevaya máicha, evapinavavaréni taicha eta máetaviuchirahi eta máemunasirahehi ema Viya. Macurisamurechaheparacaini tamutu sácheana ema Espiritu Santo. Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te Galacia, ticajare GÁLATAS

¹ Nuti Pablo, yátupiquenenuhi mayehenu apóstole ema Jesucristo taicha manerejirunuhi. Emá Tata Vicaiyaquene ticútihi eta mapanereruhi ema Machicha eta máichuiranuhi. Puíticha émaquenehi ema Jesucristo tinacanuhi eta juca návacurehi apóstole, émarichuhi ema macáechepucasiquénehi te máecari. Vahi apanainahini achane ema tinacanuhi, énaiahipucaini ena nucutiqueneanahi apóstoleana nanacanuhini eta juca návacurehi.

² Puiti nucajurehe eta juca carta eyehe eti nuchamuriana ecavasanahi tayehe eta avasarena tayeheana provincia eta Galacia. Téchajicaheana ena apamuriana vichamuriana te juca návihahi.

³ Nuvaraha macatajicahehine ichape ema Tata Vicaiyaquene, émapa ema Viáquenu Jesucristo. Náijaracahehine eta táurivaina eta epanereruana.

⁴ Ema Viáquenu tíjaracavahi tépena te crusu taicha mavarahahi ticuchucuhahaviyare tayehe eta vícuñayarehine táichavene eta vipecaturana, macámitiásinaháviripahivare eta vijamurachirainihi eta tamauriqueneana tayehe eta juca apaquhe. Eta tacahéhi eta mapanereruhi ema Tata Vicaiyaquene.

⁵ ¡Máichecuaruireyarehi eta vijirauchiraya éma! Amén.

Étanarichu eta doctrina véhiruhi, tájina apanaina

⁶ Ichaperinehi eta ímipaneresiranuhi. Váhicha németeaca ene ácahehine eti éhicahine eta apanaquene doctrina. Tasapihapa esuapahi eta juca, vaipa émainahine esuapa ema Viya. Ínajicavanepa eta esuapirainihi éma. Émepururecapa eta máichuirahéhi. Tasapiha émepururecapa eta máepeninahéhi ema Jesucristo eta máemunasirahéhi.

⁷ Nutupiruva numetacahe, tájina apanaina doctrinaina tácuti eta juca véhiruhi víti. Néchahi eta juca íchararacavahi éti, nararihi ena témejecapavachaheanahi, navarahahi nahapapicayare eta vímiturapianahi tásihaqueneanahi mayehe ema Cristo.

⁸⁻⁹ Víti vímitucaheripahi eta juca yátupiqueneana, étarichuhi eta máechajiriruva ema Viya. Cape juca, te viávihaichaha eyehe, vimetacahévanehi eta macatichira ema Viya eta apanapanequeneana doctrina nahapapiruanahi. Puiti nápechahevere numetacahe: Ticatichacareya me Viya nácani nahapapica eta vímitureheanaripa yátupiqueneanahi. Nútiripa, te nápechavahivaréni níteca eyehe, apánainapáipahivarepucaini eta nímiturapiana, ticatichanuhine ema Viya taicha eta nuhapapísirainahine eta máechajiriruvana. Téhevare máitecapucaini mácani émana máimicutichavapahine ema ángele másihaquenénahipucaini te anuma, te mavarahahivarepuca mahapapica eta vímitureheanaripa víti, énerichuvare macatichayarehi ema Viya.

¹⁰ Nararihipuca ena témeteacanuanihi nuhapapicahi eta máechajiriruvahi ema Viya, étainahipucaini níurusihahine ena achaneana, némemunasiravainahine nayehe. ¡Tájinasera vahi nuhapapicahine núti! Nutupiruvahi eta nímituresirahi taicha nuvarahahi nucurisamurechaya ema Viya, nímerecavayarehi eta núriva eta mavanaranuirahi ema Jesucristo.

Ema Pablo tímerechava eta táichararacavahi eta masiapirahi apóstoleyare

11 Nuvaraha numetacahe eti nuparapenaveana eta juca nucametarairuirahi, vahi tásihaquenénahi te nupanereru nútí.

12 Váhivare nímitucasivainahi mayehe mácani apana achane nucutiquenehi apóstole. Émaquenehi tímitucanuhi ema Jesucristo.

13-14 Éti esamairiricanuhi jácani eta níchararacavahi eta nítaresirahi cape juca násinequenehi, te étarichaha néhicahi eta nayeherepiana ena israelítana náchucanaveanainíhi nútí. Nútí, eta nujurusirahi, nímahahi eta tacapicahuirahi eta viyeherepiana. Ichapehi eta némuracachiravahi, nucachuricavacahi ena nuparajuruanahi. Nímicapicauchahi muraca, numavarairahi táemitiéquenehini eta viyeherepianahi nanaquipairuanahi ena náchucanaveanaini. Eta tacahehi, ichapemurihi eta nupanajirisiravacahi ena machaneranahi ema Viya, nuvarairahi nucámítiéquenehavacayarehíni eta náehisirahi ema Jesucristo.

15 Námavaquenévahiséra eta manerejisiranuhi ema Viya, te vuíchaha núchuchahini te sujuhe esu ticachichanu; tacahehi eta mapanereruhi eta máichuiranuyarehi, taicha eta máemunasiranuhi.

16 Tásiha, tímimatichanuhi ema Machicha, taicha mavarahahi nucametarairuyare nayehe ena apavasanana eta macuchucuirayare namutu ena tisupana ema Machicha. Váhiserá nutanucahíni nácani náimitucanuhini eta nucametarairuyare. Nájinavare nuyasereruina.

17 Váhivare nuyanahini te Jerusalén nutanupanahipucaini ena náinapureanahi apóstoleana. Téhechucha apaquehe Arabia nucaijuhehi. Émasera ema Jesús, éma tímitucanuparacahi. Te váchupa, nuchavavarepa te avasare Damasco.

18 Te mapanaquenepa año, nupaenumavapa nuyanahi te Jerusalén, étapa nímatinehi ema Pedro. Nunasipanapa quince sache nucahehi eta mayehe.

19 Émapa ema Santiago, maparape ema Viáquenu, ema nímahaquenehivare. Énasera ena apamuriana apóstoleana, nájina nímahavacahini.

20 (Puiti tímararacanuhi ema Viya, tájina vahi népiyahiraivaina eta juca nucáyemaqueneánapahi te juca nucartane. Nutupiruvahi eta numetasi-rahehi.)

21 Tájinasera vahi nucaimitucasihini nayehe taicha nuyanavanevarepa nucaijuhehi eta te Cilicia, nánucuhapa tayehe eta Siria.

22 Tacahe, ena vichamuriana ticavasanahi te Judea, váhivare náímatinuhini taicha vahi náyerehini tayehe.

23 Tisamairiricanuanahisera eta néquesiravaripahi. Ánipaji tacahehi eta nasamairirisiranuhi: “Ema maca Pablo tipanajiricahavihi cape juca viásinequenehi, ¡téquecavaripahi! Cape juca mavarahahi ticámítiéquenehaháviyarehíni eta juca véhiruhi. ¡Puiti émarinecha tétucaracavahi ticametarairuhi eta juca véhiruhi víti!” nacahepaji.

24 Tacahe, ichaperinehi eta nacunachirahi ema Viya níchavenehi nútí eta néquesiravahi.

2

Ema Pablo tímereuchava eta masiapamurihairapa ena apóstoleana, tásiha natupiruva najacapa éma

¹ Catorce áñoripa eta táetavisiravahi, nupaenumavapa nápechavahi nuchava te Jerusalén. Émapasera ema Bernabé nucachanehi, émapa ema Tito.

² Taicha numetacasivahi me Viya te nuvapure eta nuyanirayarehi tayehe eta Jerusalén, véchajicacayare nayehe ena tachutirihanahi. Eta nítecapirapa, viúrujicavapa, énachuchasera vicachanehi ena tachutirihanahi. Tásiha numetacavacapa eta nímiturapianahi eyehe eti apavasanana étapa eta es-uapirahi. Taicha nuvarahahi ena vichamuriana israelítana najacapahehini eti apavasanana vichamurianaripahi.

³⁻⁴ Te jena, natiarihihi ena tépiyacavanahi vichamurianahi, tépiyahirahianapahi eta nasiapamurihairahavihi. Éna, navarahahi tipamicahavianayarehi eta vímitusirahe éti apavasanana éhica eta nayeherepiana ena israelítana. Taicha tacahehi eta náechajiriruvahi éna, itauchayarehiji eta nayeherepiana éna, váhiji tacarichuimahi eta éhisirahi ema Jesucristo. Navarahahivare napamicayarehini eta macamarca ema Tito, eta apavasanairahi éma.

⁵ Tájinasera vahi vísapavahini nacachuriacahavihini, taicha víti vivarahahi tacujjahani tahapapicahéhini eta éhisirahi eta yátupiqueneana téhicacareanahi.

⁶⁻⁹ Tacahe, énaripa ema Santiago, ema Pedro, émapa ema Juan, énapa ena apamuriana náiyarahana ticutinuanahi eta nupanereruhi. Tájinavare vahi nametacanuhi eta apamuriana téchacareanahi nayehe. Étasera eta nasamiranuhi, náimativanepa eta émairahi ema Viya tituparacanuhi eta nucametairuiraya nayehe ena apavasanana. Nucutihi eta macatuparahairahi ema Pedro máimitusirayarehi ena israelítana. Ema Viya máijaracahi eta mávacurehi ema Pedro apóstolehi nayehe ena israelítana. Máijaracahivare eta máitupajjiasiravahi. Ene nucahehi núti tjaracanuhi eta návacurehi apóstolenuhi nayehe ena apavasanana. Tjaracanuhipare eta nítipajjiasiravahi. Eta tacahehi, náimatipa eta émairahi ema Viya tjaracasichanuhi eta juca nítucaquenehi. Tacahe, tijupacahavianapa, núti émapa ema Bernabé. Eta juca náichirahavihi táicutiarahi eta náisapirahaviyarehi vímiyanava vímitucavacayare ena apavasanana. Éna, tímiyanavanayare tímiturecanahivare ena israelítana. (Tépurunuanarichuchapuca eta náimairanuhi. Tayanapanesera váhipuca nujacapacarehi nayehe eta apóstolenuírahí. Nútisera néchahi eta manerejisiranuhi ema Viya eta apóstolenuírayare.)

¹⁰ Tacarichu tituparacahavianahi eta vímicatasirayarehi ena páureana. Eta tacahehi puiti, nítauchahi núti eta nuvanecasivahi nímicatasiravacaya ena páureana.

Éma Pablo tímereuchava eta macajachirahi ema Pedro

¹¹ Te táequenepa, te jena áñoanahi, títecapauchahavipa ema Pedro te avasare Antioquía. Étasera eta mávihairahi viyehe, téjecapavainapa. Eta tacahe, nucajachapa éma.

¹² Eta máitecapirapa ema Pedro, tájinaipa máichiravainahini eta masamiravahi eta macachanejirisiravacahi ena apavasanana vichamurianahi, tinicahi eta nayehe. Tacahe, te jena sácheana, títecanapana ena máemunacareanahi ema Santiago, israelítana vichamurianahivare. Te máimahavacapa ema Pedro, titsirihapa éma eta macachaneravacahi ena apavasanana vichamurianahi. Vaipa mávarahahini macasiriquivacahini. Tipic-

ahi eta nacaecahirahi ena tímicapicauchanahi eta nayeherepianahi ena israelítana.

¹³ Tacahe, ena apamuriana israelítana vichamurianahi, énerichuvare éna náehicapa eta máejecapiravahi ema Pedro. Térajicavanavare éna apanava. Émaripa ema Bernabé máehicavarepa eta náejecapiravahi éna.

¹⁴ Tacahe, te nímahapa núti eta náejecapiravahi, vahi táurihini eta náichaquenehi, nuchajachapa ema Pedro te namirahu ena vichamuriana taicha máejequihapa eta tavanairipihhi eta yátupiqueneana máechajiriruvana ema Jesús. Níchapa ema Pedro: “¿Tájaha tacayema eta pitsirihahi ena vijaneanana israelítana eta picachaneravacahi ena apamuriana vichamuriana apavasanana? Pémitisicavapapuca eta israelítavirahi cape juca pítaresirahi, táitusiava eta picachanejiricavacahi ena apavasanana vichamurianahi. Tásiha puiti, eta pímarapa náitecapirahi ena vijaneananarichu násihaqueneanahi te Jerusalén, péquecavavarepa nayehé. Váipa pávaraha picachanehini ena apavasananahi vichamurianahi ticutiripahi eta vahi vichamurianainahini éna. Pivarahapuca náepiyacava israelítanáina éna apanavare” níchapa ema Pedro.

Namutuchucha tijacapacareanaya me Viya nácani navarahaya téhicanayare ema Jesús

¹⁵⁻¹⁶ Tacahe, numetacavacapa namutu eta juca yátupiquenehi: Véchahi víti eta vahi tácomesaimahi vítauchahini eta nayeherepianaini ena viáchucanaveanaini. Tarataripahi eta véhisirahi ema Jesucristo, vijacapacaréipa vimutu eta mayehé ema Viya. Énaripa ena apavasanana, tayanapanehi náetaviuchahi éna eta nasipecaturaraivahi viyehé víti israelítana, títujicavanayarehisera tijacapacareanaya me Viya taicha eta náehisirahi ema Jesucristo. Tayanapané vítamuturucahipuca eta mavanairipiana ema Moiséini, tájina vahi vájacaparémahi víti eta me Viya táicha. Vimutu vijacapacare eta me Viya táichavenechucha eta véhisirahi ema Jesús.

¹⁷ Natiarihípuca ena téjecapavanahi te napanereruana, ánipuca nacahehi eta náechajiriruvahi: “Yátupipucáji eta vijacapacarehi me Viya táichavenechucha eta véhisiraya ema Cristo, vivetijnapaserapuca tíapajucavainapapuca eta visipecaturaivaya taicha vínajicainapa eta vanairipiana. Tacahe, émapapuca ema Cristo táemesiavaya eta vícapecaturaivaya” tacahenapapuca eta napanereruhi. Éna, tímápachichijíruvachucha te napanereruana. Ema Cristo váhiquene émaina tásiha eta pecatuana.

¹⁸⁻¹⁹ Eta néhisirainihi apaicape eta vanairipiana, tájinachucha vahi táimicatatanuhini eta nujacapacarevarehi me Viya taicha váhiquene étaparacaina. Eta tacahe, núnajicahi eta néhisirainihi. Nímatiripasera eta nujacapacarevarehi me Viya táichavene eta nucasiñairahi eta mayehé. Puíticha tíuripa eta nítaresirahi me Viya. Tásiha, ichapenapahini eta néjecapiravaya núti apana, te nuchavapuca néhica eta mavanairipiana ema Moiséini.

²⁰ Eta nusuapirahi eta máepenirahi ema Cristo te crusu, nujacapacarehi me Viya. Puiti, vaipa nútijivaina necha eta nítaresirahi. Émapa téchanuhi ema Cristo tamutu eta nítaresirahi. Émapa nucasiñahi taicha yátupihhi eta macasiñacarevahi taicha yátupiquenehi Machichahi ema Viya. Eta máemunasi-ranuhi, tímijararecavahi níchavenehi núti.

²¹ Vahi némeppurecaimahi núti eta máemunasi-ranuhi ema Viya. Nararihiserá ena tímijachavanahi tijacapacareana mayehé

táichavenechucha eta navarairahi náitaucha eta vanairipiana. Ena nani, tímicutijiricavahi náemepurarecahi eta mapanereru étapa eta máemunasiravacahi. Tímicutijiricavahi náemepurarecavare eta máepenirahi ema Jesucristo te crusu.

3

Tacarichuchucha eta vicasiañairahi ema Jesús, vijacapacaréipa me Viya

¹ ¡Páurehechapucaini, eti nuparapenaveana gálatana! Ímijachaipapuca étupicavahi eta juca ecahehi. Ínajicavanepa eta éhisirainihi eta yátupiqueneanahi. Vímicaticaheripahi eta iúricacarevahi tásihaquenehi eta máepenirahi ema Viáquenu Jesucristo te crusu. ¿Tájaha tacayema émepurarecahi eta juca iúricacarevayahini?

² Esamanuchaha, puiti nuvaraha numetacaheyare. Eta mávahásirahehi ema Espíritu Santo, éta tóchahi eta éhisirahi ema Jesucristo. Vahi étainahini taicha eta ítauravainahipucaini eta vanairipiana.

³ ¡Tétavicavapa eta esunsuvaca éti! Te épanavapa eta éhisirahi, tájinainiripahi íchiravainahíni máicha ema Espíritu Santo. Éma tétumechahehi. Puítisera éti evarahapa ínajicaya eta mávahásirahénihi, ímijachaipapuca eta ticuchucuhaheyare eta éjairavanahi.

⁴ Tamapurujinapapuca eta máimicatasirahehi ema Espíritu Santo. Németeacaserá núti vuíchaha émepurarecavaimahi.

⁵ Ema Viya tjaracaheripahi ema Espíritu Santo eta mávahásirahehi. Tímechahehivare eta tiáramicareana. Étaripa macatajísirahehi táichavenehi eta ecañañavairahi tayehe eta máechajiriruvana. Étasera eta ítauravainahipucaini eta vanairipiana, tájinainapa táimijaracahénihi.

⁶ Énerichuvare macahehi ema viáchucaini Abraham. Ticasiñavahi éma tayehe eta máechajiriruvana ema Viya. Tásiha, ema Viya, ichape eta majacápirahi éma. Máemitisicahi tamutu eta máejecapiravanahi.

⁷ Puiti, yátupina ácaicutiara eta juca: Te yátupina vicasiañava me Viya, vijacapacareya mayehe, taicha vicutiyaere ema viáchucaini Abraham eta macasiñavairahi me Viya.

⁸ Ema Viya mametacahi ema Abraham eta najacapacarevahi mayehe, nácani ticasiañavanayare éma. Áni macahehi eta máichirahi: “Tétavicavayare eta náuricacarevayare ena achaneana te tamutu avasareana nácani ticutivianayare eta picasiñairanuhi núti” máichapa ema Viya.

⁹ Tásiha, viti vicasiañanahi puiti, tétavicavayarehi eta viúricacarevayare, taicha vicutinapa ema Abraham eta macasiñairahi ema Viya.

¹⁰⁻¹² Natiarihiserá ena tímijachavanahi tijacapacareanayare me Viya táichavenehi eta navarairahi náitamuturuca eta vanairipiana. Téjicapavanapahiserá. Taicha aní tacahe eta vanairipi: “Tamutu sácheana ítachayare tamutu eta juca vanairipiana. Te éjequiha apaesachichaina, éta tímicuñacahéyare”. Váhiquenesera naratahahini náitaucha tamutu eta vanairipiana. Eta tacahe, náviraichu ticaicuñaya, vahi tijacapacareanaimahi. Ánivare tacahe eta vanairipi: “Te ítamuturuca eta vanairipiana, máichecuarequireyare eta ítasesirayare táicha”. Tásiha, vímatiequeneha eta juca: Eta náitamuturusira ena achaneana, éta tavaraha eta vanairipiana. Tájina étaparacaina eta nacasiñairava me Viya. Ánisera tacahe eta Sagrada Escritura: “Nácani ticasiañavanahi me Viya, tijacapacareanahi, máichecuarequireyare eta náitasesiraya

táicha”. Tásiha, nuvaraha ácaicutiara eta juca: Eta vijacacarevahi tásihahi eta vicasíñavairahi me Viya. Eta vítauchirapuca eta vanairipiana, tájina étaparacainahíni tayehe eta vijacacareva me Viya.

¹³ Ánivare tacahe eta Sagrada Escritura: “Mácani achane ichape eta mav-iureva, ticaetatacasiyarehi te yucuqui. Eta táicutiarahi eta máicuñasirayare ema Viya eta máchaneva”. Viti achaneana, ichape eta vícuñayarehini taicha eta vimaitauchirahi tamutu eta vanairipiana. Émasera ema Jesucristo, tépeni-nahavihi te crusu, tamuriasirahi tamutu eta vícuñayarehini víti.

¹⁴ Éma máichahi eta juca, mavarairahi eta iúricacarevayare eti apava-sanana táichavenehi eta ecutirahi ema Abraham eta macasiñairahi ema Viya. Puiti, tétavicavahi eta viúricacareva vimutu, taicha tiávahácahavihi ema Espíritu Santo máijararuhavihi ema Viya táichavenehi eta vicasíñairahi ema Jesucristo.

Tájinachucha tájjaracahavi eta véhisirahi eta mavanairipiana ema Moiséini. Macarichu ema Viya tjjaracahaviya eta viúricacarevaya.

¹⁵ Nuparapenaveana, nuvaraha nímicutiarachináheyare eta juca. Te matiaríhipuca ema achane, te tépiyarecahi tratu mayehe ema apana achane, náfírmachayarehi eta natratunehi. Tásiha, náfírmacharipa eta natratunehi, vaipa táuricaímahi nacaepaha eta tacajuquenehi. Nájinapavare tihapapí-caímahi.

¹⁶ Ene macahehi ema Viya eta matratunehi mayehe ema Abraham. Ani macahehi: “Níjaracaviyare píti eta piúricacarevayare. Énerichuvare níjaracayare eta máuricacarevayare ema piámariéqueneyare” macahepa ema Viya. Tacahe, émanarichuhi ema mámariequenehi ema táimijarechaquenehi eta matratune, vahi námutihini ena nasimutuvaqueneanayarehi mámariequeneanayarehi ema Abraham. Émahi ema ticaijarehi Cristo.

¹⁷ Tiuri puiti, nuvaraha nímicacherachaya eta eyehe: Eta juca matratunehi ema Viya mayehe ema Abraham, mafírmachaquenehi eta májjarasirayare eta náuricacarevaya nácani ticasíñavana eta mayehe. Étasera eta táetavisiravahi eta 430 áñoripahi, te májuchapa ema Moiséini eta vanairipianahi, vahi macaepahahini ema Viya eta matratunehi, váhivare máítsivachahini eta májjarasirayarehi ema Jesús, mámariequenehi ema Abraham.

¹⁸ Ema Viya mametacahi ema Abraham eta májjarasirayare eta máuricacarevayare, taicha eta máemunasirahi éma. Ene vicahehi víti. Ema Viya tjjaracahaviyare eta viúricacareva taicha témunacahavihi. Eta viúricacarevaya, vahi étainahini eta vítauchirainahipucaini eta vanairipiana.

¹⁹⁻²⁰ Etiaríhipuca eti evaraha eyaserecanu, ánipapuca ecaheya: “Te yátupipuca vaipa étaparacaina eta vítauchiraina eta vanairipiana, ¿tájahaserapuca tacayemahi eta mavanasirahi ema Viya májucha ema Moiséini eta juca mavanairipiana?” Tiuri, puiti numetacaheya: Yátupi ema Viya máimivanerecahi ema Moiséini májucha eta vanairipiana, taicha mavarahahi máimimatichayare ena achaneana eta tamaurivahi eta pecatuana. Téhesera te titecapapa ema Cristo, vaipa táimiyana vahini tasuapacarehini eta mavanairipianahi ema Moiséini. Arairupu tamutu eta véhiruhi maicha ema Jesús. Yátupi ema Viya matupiruvahi eta máechajisirahi ema Abraham. Vahi máimivanerecahini ema Viya, émajacarúvahi éma, eta máechajisirahi. Émasera ema Moiséini macaimitucasiquenechucha nayehe ena ángeleana.

Eta mavanairipiana ema Moiséini tivanecahavi vahi vicuquicha eta pecat-uana taicha tñehicarehi eta júcana mayehe ema Viya

²¹ Puiti németeaca etiarichaha eti ímijachahipuca tacarichuhi téhicarehi eta vanairipiana. Esamanuchaha. Váhiquene étaimahi vácacapa-rehíni eta me Viya. Váhivare étainayare ticaitarecahaviyare.

²² Esama eta juca máechajiriruvahi ema Viya eta te Sagrada Escritura, ani tacahe: “Náicuchirichuhi eta náicuñayarehi namutu ena achaneana taicha eta napecaturanahi” tacahepa. Jararihiserá eta víuchucuirayare taicha tíjaracavahi ema Viya ticuchucuhahaviyare vimutu viti vicasíñanaya ema Machicha Jesucristo.

²³ Ánquiaparipa eta tacaratasiravacahi eta mavanairipiana ema Moiséini nayehe ena israelítana náchucanaveanaini nútí. Vahi táisapahini tasimutu-hichaini eta napecaturana. Tiámainucavapa te títecapapa ema Jesucristo, émapa tímitucahavihi eta arairuyarehi eta véhiruyare.

²⁴ Táitaurevaquene eta mavanairipiana ema Moiséini eta típicararécahávihi tayehe eta táíñehicarevahi eta vicapecaturairana. Éta, tétupirichavihi tacutihi mácani profesor eta máetupirisiravacahi eta napanereruana ena máimitureana. Ene tacahehi eta táechapajirisirahavihi eta mavanairipiana ema Moiséini. Puítiserá eta máítecapiraipahi ema Jesucristo, émapa véhicayare, víjacapacarénapa me Viya taicha eta vicasíñairahi ema Jesús.

²⁵ Puíticha, émainapa véhicayare éma, vaipa étaimahi véhica eta mavanairipiana ema Moiséini.

²⁶ Puiti, eta ecasíñairapa ema Jesucristo, machichaheripa ema Viya.

²⁷ Puiti, eta ecaicachasirahi te máijare ema Jesucristo, tiávahácheripa éma, éti ecutinapa eta máurivahi.

²⁸ Tayanapane apavasasajuecuhehi éti; tayanapanehivare ecasiriquíqujihi eti ajairana, ena esenana; tayanapanehivare músuanapuca, líbreanapuca. Téhesera te mamirahu ema Viya, étanarichuhi eta vímahi.

²⁹ Puiti machichaheripa ema Cristo; tásiha, ecutiripa mámariequenehé-nahini ema Abraham. Ímaequenharichucha eta matratunehi ema Viya eta máíjarasiraheyare eta iúricacareyare táicha.

4

¹⁻² Esamanuchaha. Nuvaraha nímicutiarachináheyare. Te matiarhipuca ema achane camurihi eta máímahaqueneana te mapena, te matiarhipuca ema machicha, téhesera te amaperuríchaha éma, natiarihiyarehi ena téchapa-jiricanayare, énapa ena tímitucanayareva. Vahi náisapaimahi mamápachi-chijcaimahi eta máímahaqueneanahi ema maiya, tayanapane émahinéni ticayeheyare tamutu. Tiámainucavasera te máímahapa ema maiya eta máechemaraivahi ema machicha, máisapainapa eta máemamaca eta máímaha-queneanahi.

³ Ene vicahehi viti cape juca víásinequene te vuíchaha vímatihini ema Cristo, vicutinihi ena amaperuana. Tipamicahavianahi véhica eta nayeherepiana ena víáchucanaveanaini.

⁴ Émasera ema Viya, te máímaha tiuri eta táitauchiravayarepa eta mapanereruhi, máévatacapa ema Machicha te juca apaquehe. Ema Jesús, tiáchane-chavapa te sujuhe esu maena. Eta máuchusirahi, vivasimahi eta vicaqueherahi viti achaneana. Eta majurusirahi, ticaravahupa eta viyeherepiana viti israelítana.

5 Eta tímitecahi éma, mavarahahi ticuchucuhahaviyare viti achaneana. Mavarahahivare vimutu vijacapacareyarepa me Viya, machichahaviyarepa.

6 Puiti, eta machichairaheripa ema Viya, tįjaracaheripa ema Espńritu Santo tiávahácaheripa te esamureana. Émapa témechahehi mayehe ema Viya, tímitecahepa eta eyujarauchiravaya: “Tátachicha Vicaiyaquene” ecahenapa.

7 Tacahehira eta machichairaheripa, vaipa ísapaimahi nácani napamicaherini tayehe eta nayeherepiana. Tįjaracaheripa ema Cristo eta iúrivaya, iúchucuirayare máicha.

Em a Pablo, nahapasamurechahi ena machamuriana

8 Cape juca íásinequenehi éti, vuíchaha ímatihini ema Viya, váhivare epicauchahini éma. Énachucha epicauchavacahi ena esíñarajiana. Tájina eratahaimahi émitisica eta eyujarauchirahi tayehe. Éna, vahi yátupinahini víyanainahini, váhivare távahácavacaimahi eta máchaneva ema Viya.

9 Puitisera, ímatipa ema yátupiquenehi Viya. Tásiha, énerichuvare éma tímatihevaca, esamacarepa mayehe, taicha machichaheripa. Tásiha puiti, ¿tájaha tacayema evarahavarepa echavayare eta ecasiñayare eta esíñarajiana? Eta ecasiñasanahi, tájina vahi tisamaheanaimahi, váhivare tímicatacaheanaimahi tayehe eta panererucana. ¿Tájaha tacayema ísapava napamicahé eta ítauchira eta nayeherepiana?

10 ¿Tájaha tacayema enasirichuhi epicaucha eta piéstamuhuana, étapa eta aracherumuhuana caje?

11 ¡Ichape eta néñamiravahi eyehe! ¡Tájuricati támápurujipahi eta juca nímitusirahehi!

12 Esamanuchaha, nuparapenaveana. Nuvaraha vácuticacahini eta vipanereruana. Váhini vicuehicaini eta nayeherepiana ena achaneana. Németeaca esuapanu taicha vahi eyacujiequenehanuhini.

13 Éti etupiruvahi ejacapanu cape te nítecaínapa eta ara eyehe. Écharichuhi eta nucajumairapahi te nítecapauchahepa. Etupiruvahisera esuapa eta numetarairuhi eta eyehe.

14 Vahi ecaecahinuhini eta nucajumairapahi. Váhivare épurunuhini. Tiúrihi eta ejacapiranuhi tímicitijiricavainehi ángelenuinahini, Crístonuinahipucaini.

15 Ichape eta iúrisamurevahi te jena sácheana eta návihairahi eyehe. Nímatihí tétavicavahi eta émunasiranuhi. Te nucamunuvahi, evarahahi íjaracanu eta ecayehequeneana. Tájina éñamahini. Ichape eta nucunachirahehi. Tacahe, máejeha néchajisiháhe eta émunasiranuhi.

16 Eti ímijachaipapuca nucatichirahehi eta numetasirahehi puiti eta juca yátupiqueneana.

17 Ena nani téchapajiricaheanahi, váhisera tátupiruvahini eta náemunasirahehi, navarairachucha típicasicaheanayare apaesa vahi ecusuapanu núti, eta vaipa ecuehicanuhi. Navarahahivare éhicayare eta nayeherepiana apaesa éñainapa échapajiricayarehi.

18 Tiuri, núti vahi nucaticha eta ítatiraina ena apamuriana achaneana. Táurisera eta náemunasiráhena tácuti eta némunasirahehi núti. Éti apanavare evapinavayare tácutirichu te nutiarihíhi eyehe.

19 Nuchichanavechichana, tétavicavapa tacativa nusama taicha eta ímipanereresiranuhi. Ticutirinehi súcani esena ticatiruhapa, taicha ticatihí

susama eta amuya. Ene nucahehi núti eta nucatisamureravahi, néñami-ravahi icha éti. Nuvaraha ácutini ema Cristo eta máurivahi. Tiámainucava te nímahahepa ecutinasipa éma eta máurivahi, núrísamurenapa ícha.

²⁰ Eta tacahe, nuvarahanecha nójahúchavahini nítecapauchahe. Nútijacaruvainapáini néchajiricavahini eta eyehe eta nímitusirahenahini. Ichape-murihi eta ímipanererésiranuhi.

Em a Pablo máimicuticha ena apinana machichana ema Abraham

²¹ Éti evarahapa éhica eta mayeherepianaini ema Moiséini, puiti nuvaraha nímínecapaequenehaheya eta táechajiriruvahi eta Sagrada Escritura mayehe ema Abraham.

²² Táechajisihahi éma, apinanairahi ena machichanaveana ajairana. Ema máinapurehi machicha ticajarehi Ismael, esu maena ticajaru Agar. Ema máequenereruhi machicha ticajarehi Isaac, esu maena ticajaru Sara. Esu Sara, mayenaquenehi ema Abraham. Esu Agar, suvanarahi esu Sara.

²³ Esu Agar, araitanaichahahi ésu, te sucachichainapa ema Ismael. Ésusera esu Sara macheruhi eta suítaresirahi. Étasera eta máitupajijiasiravahi ema Viya, májaracapa ema suchichahi Isaac. Taicha ema Viya máechajicahi ema Abraham, ánipa macahe: “Esu piyena Sara ticachichayare. Ajairayare ema suchicha”.

²⁴⁻²⁵ Puiti, nuvaraha nímicutiarachinaheya nayehe ena nani apinana esenana. Esu Sara, tájina suímatiyahini eta vanaracacare, nájina nahapapiricahini ésu. Ene vicahehi víti eta véhisirahi ema Cristo, nájina tihapapiricahavimahi. Vahi suácutihini esu Agar, tapamícáichi eta suématanerepi taicha sirvientahi ésu. Ene nacahehi ena israelítana náchucanaveanaini núti, napamicasivahi naicha tayehe eta nayeherepianaini. Étarichuhi eta vanairipiana májuchaqueneanahi ema Moiséini te mávihalpahi eta te anuquehe mari ticajarehi Sinaí, táupahiva eta provincia Arabia, návasahi ena suámariqueneanaini esu Agar. Puiticha ena nujaneeanana tachichanaveanahi eta Jerusalén nanasirichuhi eta tapamisiravacahi eta vanairipiana.

²⁶ Jararihiserá eta apanahivare avasare ticajare Jerusalén, tiávihahi te anuma. Víti tachichanaveanahi. Vaipa vítiparacainahini tapamicahavihiní eta vanairipianaini.

²⁷ Ema Viya máechajisihahi eta te Sagrada Escritura eta juca arairu Jerusalén. Máimicutichinahi esu ésuna esena. Ánipa macahe: “Piti esena macheruvinihi eta pítaresirahi, tájina vahi pímatihini eta tacativa eta amuya. Púitiserá tétaavicavainapa eta píurísamurevaya. Vaipa pánasimahi macheruvimahi taicha nárajapainapa ena pichichanaveanaya nójjaruviyare núti. Picachuricainapa nácani esenana ticachicharahiana” —macahepa ema Viya.

²⁸ Nuparapenevana, víti véhicanahi ema Jesus, vítira tachichahavianahi eta arairu Jerusalén, taicha vituparahaichuhi eta tachichairahaviyare tacuti eta sucatuparahairahi esu Sará mayehe ema Viya, eta sucachichairayare ema Isaac.

²⁹ Tacahe, ema Ismael, suchicha esu Agar, macatianacapa ema amuya Isaac, ema suchicha esu Sara májjararuhi ema Espíritu Santo. Púiticha, tanasirichuhi eta nacatiansirahavihi ena téhicanahi eta vanairipiana vimutu víti mávaháruanahi ema Espíritu Santo.

³⁰ Ánivarepa tacahe eta Sagrada Escritura: “Pivaneca esu Agar émapa ema suchicha, nayana náuchuca eta piyehe. Taicha vahi táuricahini mavehahini

eta pímahaqueneana te táitecapapa eta pépeniraina. Macarichuyare ema pichicha suyehe esu piyenaquene tivehayare tamutu” tacahepa.

³¹ Nuparapenaveana, ene vicahehi víti. Vahi vácutihini ema suchicha esu sirvienta. Vicutihí víti ema Isaac eta tamajinairahi eta vipamicasivainahini eta vítauchiraya eta vanairipiana, maicha ema Jesús.

5

Vímiyanavachucha véhica ema Jesús. Vahi vicuehíca eta mavanairipiana ema Moiséini.

¹ Puiti nuvaraha yátupina ácaicutiara eta macatiuchirahehi ema Cristo, eta vaipa étaparacainayare ítaucha eta vanairipiana. Váipavare ecuisapava te náviraichupuca napamicahe, taicha ticajerayare eta ítauchiraina, machu ajirehéna táicha. Étipasera tacamunu étumehava te nayehe ena nani.

² Nuti Pablo nutupiruva numetacahe: Te ísapavapuca namarcachahe, tímicutijiricavahi tépurucarehi eyehe ema Cristo. Tímicutijiricahivare vahi márataha ticuchucuhahe éti.

³ Énerichuvare numetacahe: Namutu nácani ajairana tísapavanayare ticamarcana, tacamunuhi náitauchayare tamutu eta vanairipiana. Tájina ánichichaimahi náejequihaimahi éta.

⁴ Eti enerejiruvana éhica eta vanairipiana, ímijachaipapuca ejacapacareipa mayehe ema Viya. Émepururecaripasera eta máemunasirahehi ema Viya. Émepururecahivare eta máimicatasirahehi ema Cristo.

⁵ Vítisera víti vicasiñanahi ema Jesucristo vicunevaripa eta majacapirahaviya ema Viya máichavenehi ema Espíritu Santo eta mávahásirahavihi.

⁶ Éta mávahásirahavi ema Jesucristo, vahi étaparacaimahi eta vicamarcapucaini. Tacarichu ticamunucarehi eta vicasiñairayare yátupina éma, vémunarahinapa eta vítaesiraya.

⁷ Éti, iúrinipahi eta éhisirahi ema Jesús. ¿Tájahaserapuca tacayemahi eta evarairahi ecainajiruva? Ísapavayarepa tiyurucaheana, tímijnajicaheanayarrepaini eta yátupiqueneanahi.

⁸ Éti máichuhaqueneanarichuhi ema Viya eta éhisiraya eta yátupiqueneanahi. Váhiquene mávarahahini ísapavahini nácani nahapapicahehini.

⁹ Échapavaicha nayehe ena tiyururahiana, machu napareacahe.

¹⁰ Nútisera nucasíñavahi eta me Viáquenu eta mamaisapiraheyare ínajicava. Németeacahi vahi ínajicaimahi eta nímiturapianahi. Émasera ema Viya téchahi eta juca náicuñayare nácani tivarahanahi tíhapapicaheana.

¹¹ Esamanurichuhi, eti nuparapenaveana. Natiaríhipuca nácani tépiyaequenehanuanahi eta nupamisirahehi eamarca eti nuchamurianahi apavasananahi. Étasera eta nímitusirahehi, tájina váhiquene nupamicahehini eta ecamarcairayare. Nasapihapa ena nujaneanana israelítana tipanjiricanuanahi taicha vahi nupamicahehini eamarca. Étara tímiyusemacavacahi eta nasamirahi eta nupametarairuirahi eta víuchucuiraya táichavenehi eta máepenirahi te crusu ema Jesús.

¹² Ena nani tipamicaheanahi eamarca, ¡náechaticavaichaha énajivainal! ¡Nuvarahasa yátupinapaini náechatihicavaini!

13 Taicha eti nuparapenaveana, vahi étaina tímichuhahehi mayehe ema Viya eta éhicayare eta mavanairipiana ema Moiséini. Váhivaresera étijiricavaimahi íchayarehi eta evarahaqueneanahi tamauriqueneana. Ema Viya tíchuhahehi, mavarairahi étijivaya ítátijiricacayarehi taicha eta émunasiracainahi.

14 Ema ticavanairipi, ánipa macahe: “Pémunaca ema piparaepiya tacuti eta pémunasiravahi píti” macahepa. Te vítauchapuca yátupi eta juca mavanairipi, vahi tácajera eta vítauchiraina jácani apana vanairipi.

15 Vahi táurica ecatichajiricacahini. Váhivare táurica ecatianajiricacahini, machu étijivaina ecamitiequenehacaca.

Ema Espíritu Santo tímicatacavahi eta vahi vicusuapa eta tajamurachaqueneanahi eta viáquehe

16-17 Esamanuchaha. Ema Espíritu Santo mavaraha tímicatacavahi eta vahi vicusuapa eta tajamurachaqueneanahi eta viáqueheana. Étasesa eta viáquehe vahi táisapa eta víchiraina eta táuriqueneana. Étachucha tavaraha vícha eta tajamurachaqueneanahi. Eta tacahe, íchapemuríhi eta tacanarairahi ema Espíritu Santo. Tacahe, nécatiacachecha puiti eta esuapirainaiha eta mavarahaqueneanahi maicha ema Espíritu Santo eta eyehe.

18 Eta tacahe, éti, te émainapuca ema Espíritu Santo tímítucae, máejeha eta íchiraina eta táuriqueneana. Vahi étaparacaimahi eta episira eta ícuñayarepuca, táichavenehi eta jácani éjecapiravanapuca tayehe eta vanairipiana.

19 Tímaticareanahi eta tamauriquenehi eta náchaqueneana ena tisuapanahi eta tavarahaquenehi eta náquehe: Navehapa esu apana esena, ésupa esu esena suvehapa ema apana achane. Ena amaperuana náichahi eta natuhusivanahi. Nararihi ena tivehacacana ena nacutiqueneana ajairana. Tavayuasiravacahi eta najamurairavanahi.

20 Natanucahi eta nasiñarajiyare. Nacaravahuhi eta iápemarecáre. Ticatiana-recanahi tiseamacanahi. Téteajiricacana. Apaesarichu nacamunu tiseanmaripavare. Énachucha navaraha títucavana, nacachuriaracapa mácani achane. Típutsimuríavanapa nayehe nácani apamuriana. Vaipa navaraha típauchacacana.

21 Ticapinarucacana. Ticapahiana. Ticavaharasiavare. Piéstamareana. Tamutuchucha naicha eta tájiparacana. Puiti numetacavevare nápechava, tacutihi eta numetasirahehi cape juca viásinequenehi. Vahi títujicavanaimahi tisiapana te mávasa ema Viya ena tíchanahi eta juca tamauriqueneanahi.

22 Vítisera, tiávahácahavihi ema Espíritu Santo. Te vísapa éma, tíjara-cahavihi eta vémunaravaya. Viúrisamurerecavayare, tinaracainapa eta vipanereruana máicha. Tíjaracahavi eta vicayeheraya paciencia. Vijapanurahi máicha. Vicajiravayareva máicha. Vítaurahiyare. Vétaviuchaya eta viúrivayare. Tímicatacavahiya eta vijaneasiravaya apaesa vahi vicuquicha eta tamauriqueneanahi.

23 Te vítauchahi tamutu eta júcana, vicurisamurechahi ema Viya*.

24 Tacahe, viti véhicanaripa ema Jesucristo, vaipa víchaimahi eta tamauri-queneanahi tajamurachaqueneanahi eta viáquehe.

* 5:23 Ema Pablo te mayeherepi eta máechajiriruvana, ani macahe: “Tájina jácani vanairipi tapamicahavihini vahi vícha eta juca táuriqueneana”. Étasesa eta macayemaquenehi, ani tacahe: “Vicatu-paraha víchayarehi tamutu eta juca táuriqueneana”.

²⁵ Tásapihapapuca, eta mávahásirahaviripa ema Espiritu Santo, vísapavaya vámutu eta mavarahaqueneana máichayare te viáquehe.

²⁶ Vaipa táuricahini ecasiñavavaicahini ecapinarujiricacahipucaini. Váhivare etanucaimahi eta semanere mayehe mácani echamuri.

6

Vímicatajiricacayare

¹ Nuparapenaveana, te natiarihipuca ímaha téjecapavanahi ena vichamuriana, econsejachayare éti ímatiequeneharipa maicha ema Espiritu Santo. Táurisera eta échajirisiraina. Ecauneuchava éti apanava, machu iáquipaicava tayehe eta máquipaisiavahi ema echamuri.

² Ímicatacaca eta ecatiuchiravaina eta jácani íchararacavanahi. Ene tac-ahéhi eta ítauchirahi eta mavanairipi ema Viáquenu Jesucristo, étaripa eta vémunasiracacayarehi.

³ Taicha nararihi ena tímijachavanahi vahi tiáquipaicavanaimahi tayehe eta pecatuana. Vahi ecucahe éti. Vahi tacaemuñavacarehini, taicha eta juca vahi tánecapácare.

⁴ Váhivare tácaemuñavacare vácahehipucaini: “Núti, váhirichu nusipeatura. Núripana nayehe ena apamurirana”. Te viúrihipuca, vimatinairayarechucha. Víti véchinavahi eta viúrivahi eta vítaresirahi.

⁵ Véchaquenevapáchupa víti eta vítaresiraya mayehe ema Viya.

⁶ Nutuparacahe eta apana. Ecajiyare eta ímahaqueneana mácani tímitucahe eta máechajiriruva ema Viya, taicha eyeheyarehi eta máimiturapiana eta tíurichaheyarehi.

⁷ Numetacahevare eta apana. Nuvaraha étupiricaya eta epanereruana. Machu ecatianaca ema Viya. Taicha te icha eta pecatuana, yátupiqueneyare eta ecamitiequenehavayare.

⁸ Te icha eta tájiparácana tavarahaqueneanahi eta iáqueheana, étarichuhi ticamitiequenehaheyare eta ítaresirana, tímicuñacaheyareva. Téhesera icha eta táuriqueneana mavarahaqueneanahi ema Espiritu Santo, yátupina táurina eta ítaresira. Ímahayareva eta iúchucuiraya, máichecuarquirénapa eta iúricacareva.

⁹ Eta tacahe, vahi vicucainajiruva eta víchirahi eta táuriqueneana. Váhivare vicuyacujiequenehava eta vicuchapirahi eta vícuchihi mayehe ema Viya te táitecapapa eta jena sácheyare máijarasirahaviyare.

¹⁰ Táitusiava, te tatiarihinapuca eta vicamunucarevana nayehe ena achaneana, te vímahahipuca eta nacamunuiravahi, vítijivayare víchayare eta táuriqueneana nayehe. Tavetijipa te énahipuca tipauchahavianahi ena vichamurianahi tayehe eta juca véhiruhi, vicajiyarehi éna.

Eta táichecuarqui eta máechajiriruva ema Pablo

¹¹ Ímaha ichapevacanecha eta juca nuletrana. Nuvahurupajipa núti eta juca nucajureirahehi éti.

¹² Ena nujaneanana israelítana, tétavicavahi eta nasemanevahi viyehe viti vicametarairuhi eta viúchucuiraya táichavenéhi eta máepenirahi ema Cristo te crusu. Tásiha, ena nani ticamesajiricaheanahi navaraha ecamarcaya, éna navaraha témemunacavanayare nayehe ena nujaneanana, apaesa vaipa nacupanajiricavaca. Navaraha nahapicayarehi eta nasemaneva.

¹³ Navarahahivare ticunachavanayare eta nacamesairahehi ecamarca te iáquehe, náimiturehéna éti eta éhisiraina eta vanairipiana. Énayapasica vahi náitauchahini támutuhini eta vanairipiana.

¹⁴ Nútisera, eta nítaresirahi, nuvavinavahi ichape maicha ema Jesucristo, máepeninuhi te crusu níchavenehi núti. Tacahe, núti apana nínajicaripa eta néhisirainahini eta tayeherepiana eta apaquehe. Vaipa nútiparacaina tayehe, taicha eta máepenirahi níchavenehi núti.

¹⁵ Eta mávahásirahavihi ema Jesucristo, tamuturipa arairuhi eta vítaresira. Apanapa eta viyeherepiyare. Vaipa étaparacaimahi eta viyeherepiana ichasiqueneanahi, váhivare eta vicamarcapucaini te viáquehe.

¹⁶ Éti, te esuapa eta juca nímiturapianahi eyehe, nuvaraha májapanuhehinehi ema Viya, máíjaracahehinehi táurivaina eta epanereruana taicha eti yátupiquenehi machanerahehi ema Viya.

¹⁷ Tiuri puiti, németeaca núti tájina táenamavacarehíni eta esuapajiraivahi eta nuyehe, váhivare ísapavahíni ena nácani ticamesajiricaheanahipuca éhica eta nayeherepiana. Núti, yátupiquenenuhi apóstolenuhi mayehe ema Viáquenu Jesús. Eta juca nujaranahi te náquehe, éta tímereuchanuhi eta yátupiquenerahi eta nucaemataneasirahi éma.

¹⁸ Nuparapenaveana, nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi eyehe.

Eta macartane ema Apóstole Pablo nayehe ena machamuriana ticavasanahi te avasare Efeso, ticajare EFESIOS

¹ Nuti Pablo, mayehenuhi apóstole ema Jesucristo, taicha manerejiru-nuichuhi ema Tata Vicaiyaquene, navarairahi nímitucaya ena achaneana eta máechajiriruvana. Tásiha puiti, nucajurehe eta juca carta eyehe eti nuchamuriana ecavasanahi tayehe eta avasare Efeso, taicha éti machane-raherya ema Viya, táuriquenahi eta éhisirahi ema Jesucristo.

² Nuvaraha macatajicahehine ichape ema Tata Vicaiyaquene, émapa ema Viáquenu Jesucristo. Nájaracahehine eta táurivaina eta epanereruana.

Tétavicavahi eta viúricacarevana táichavenahi eta viúrujasirahi ema Jesucristo

³ Núti nucunachaparaca ema Viya, ema Macaiyaquene ema Viáquenu Jesucristo taicha ichape eta máimicatasirahavihi táichavenahi eta viúrujasirahi ema Cristo. Puiti tachichahaviripa eta anuma. Ichape eta viúricacarevahi maicha ema Espíritu Santo.

⁴⁻⁵ Acane, te tamirahu eta táepaniravapa eta apaquehe, ema Viya tétavicavahi eta máemunasirahi namutu ena achaneana natarihiqueneanayarehi. Tásiha, émajivapa manacahi eta mapaneruhi eta mavarahaquenehi, étarichuhi eta majacapirayarehi namutu ena ticasíñavanayare mayehe ema Machicha Jesucristo. Eta viúrujasirayare ema Jesucristo, yátupiqueneyarehi machichahavi, matapiravarehaviyarehi te mamirahu, sántohaviyarevare.

⁶ Taicha mavarahahi vijirauchayare éma, vítsirijicavayarehi eta táetaviuchirava eta máemunasirahavihi. Mavarahahivare ichape eta viúricacarevana táichavenahi eta viúrujasiraya ema máemunaruquene Machicha.

⁷⁻⁹ Tásiha ema Viya, tíurihi eta máimaira, máimerecahi eta máemunasirahavihi ichape. Tjaracahavihi ema Machicha tépeninahaviyarehi eta macaepahairayare eta vipecaturana, viúchucuhayarehi máicha. Énerichuvare tjaracahavivare eta véchemaraivaya vímatiequenehairaya ichape, taicha tímitucavahihi eta mapanereruana. Váhisera máimerecavanehine eta juca mapaneruanahi acane; tapaemunava te tíucupaicapa ema Machicha. Tivapinavahi éma eta máítauchiraya eta mapaneruanahi ema Maiya.

¹⁰ Tamutu eta juca mapaneruanahi títauchavayarepahi, jácani tatupa-raquipahi. Te jena sácheare manerejicaripa, ema Viya manacainapa ema Machicha Jesucristo aguenucaqueneyarehi, téchayarehi tamutu eta táicharacavana. Nasuapayarehiva namutu ena tíavihanahi te anuma, énapa ena tíavihanahi te juca apaquehe.

¹¹ Eta acane te tépanavainapa, ema Viya máetupiricapa eta mapaneruhi. Vahi máejequihahine. Tásiha, manacapa eta mavarahaquenehi. Acane tinerejicahavihi machichahaviyarehi vimutu viti viúrujiacanayarehi ema Jesucristo, mavarairahi tjaracahavi eta vícuchianahi.

¹² Viti vínapuicanahi véhica ema Cristo, mavarahahi tíuriyare eta vítare-siraya, apaesa nacunachayare ema Viya ena apamuriana achaneana eta máimicatasirahavi ichape.

¹³ Tacuti quene éti, te tínupucainapa esama eta máechajiriruva ema Viya eta mavarairahi ticuchucuhahe, enévanehi éhicahe ema Cristo. Tásiha, eta iúrujasiraipa éma, tiávahácaheripavare ema Espíritu Santo. Émapa títametacahe eta machichairahépa ema Viya. Ema Espíritu Santo, ema vituparahahi vimutu viti vicasíñanahi ema Cristo.

¹⁴ Eta mávahásirahavihi éma, títametacahaviparaca eta vijacapiraya eta vícuchianahi mayehe ema Viya te táitecapapa eta víuchucuiraya viti machichanaveanahi. Tásiha, tétavicavainapa eta vicunachirayare ema Viya taicha ichapequene eta máimicatasirahavihi.

Te tiyujaraca ema Pablo, mayaseaca ema Viya eta náitupajjiasiravaina ena téhicanahi ema Jesús

¹⁵⁻¹⁶ Eta tacahe, núti néchahehi éti tamutu te nuyujarasirana, taicha nusamairiricapa eta yátupirahi éhica ema Viáquenu Jesucristo étapa eta émuna-jirisiracacahi emutu eti machaneranahi ema Viya. Nuhasulupayachahi ema Viya eyehe.

¹⁷ Éma, macaiyaquenehi ema Viáquenu Jesucristo. Máetaviurehi eta maraiva te mávihahi te anuma. Nuyaseacahi májaracahehini eta échemaravainahini maicha ema Espíritu Santo, apaesa ímatiequenehahini yátupina eta emetacasilanaya eta mapanereruanahi ema Viya. Nuvaraha ímatipai-paichaini éma.

¹⁸ Nuyaseacahivare éma yátupina eta ecaicutiarairaya, eti máichuhaque- neanahi éma, eta táetaviuchirayarehi eta víuricacarevayare te jena sáchezare vicuchapaquenehi. Nuyaseacahivare ecaicutiaraya eta táetaviuchirayarehi eta táuricacarevayare eta víávihaya te anuma, vícuchihi viti machanerana ema Viya.

¹⁹ Nuvaraha ecaicutiaravare eta táetaviuchirahi eta máitupajjiasiravahi ema Viya, váhiquene tivitaimahi. Éma, macaemataneacahi eta vítaresira, mavarairahi víuripanayare viti vicasíñavanahi mayehe.

²⁰ Ema Viya máimerecachi eta máitupajjiasirava ichape te macaeche-pucapa ema Cristo te máecari, macaejacapa éma te mavaure tayehe eta anuma mávihahi puiti.

²¹ Ema Cristo, émaripa ichapequenehi aquenuca nayehe ena ángeleana. Tétavicavahi eta masuapacarevahi nayehe. Énerichuvare ena éreanana, mapamicavaca eta nasuapiraina. Éma, tétavicava eta macapichuirahi. Nájiná nácutihini éma. Nájinavare ticachuricaimahi. Aparahiyarehi eta aquenucaira éma.

²² Ema Viya macaejacachi éma téchahi tamutu eta tatiarihiqueneana. Émaripa vicaiyaquenehi vimutu viti machanerana.

²³ Víti, eta víurujiasirahi éma, tímicutijiricavaipahi máquehehavihi te juca apaquehe. Vicaemataneacahi eta táuriqueneana tímicutijiricavahi émainahini macaematanehini, taicha tamutu eta víchaqueneanahi, éma téchahavihi, tétumechahavivare.

2

Eta máemunasirahavi, ema Viya ticuchucuhahavihi tayehe eta vícuñayarehíni

¹ Ema Viya tíjaracaheripa arairupa eta ítaresira. Tichavapa títareca eta íachanevana, tacuti eta machavirahi títareca ema Cristo te máecari. Taicha éti,

cape juca ítaresirahi, tímicutijiricavaichaha épenaquenénahíni táichavenehi eta evainarajivanaini étapa eta epecaturanaini.

² Cape juca ítaresirahi éti, éhichavare eta tayeherepiana eta apaquehe, tamauriqueneanahi. Esuapahivare eta mavarahaqueneana ema Váinaraji, éma mapamicavacahi ena achaneana masuapajirairahanahi me Viya.

³ Vimutu viti, tacahenihí eta vítaresirahi eta acane. Étachucha véhichahi eta tavarahaqueneana eta viáquehe. Vítijiricavaripahi víchahi eta tajamurachaqueneana eta viáquehe, étapa eta vipanereruana tamauriqueneanahi. Ichapemurihi eta vímiyusemasirahi ema Viya, vicutihi ena apamuriana masuapajirairahanahi mayehe.

⁴⁻⁵ Tímicutijiricavaichaha vépenaquenénahini táichavenehi eta vipecaturanainihí. Tétavicavasera eta majapanuirahavihi ema Viya. Ichapevare eta máemunasirahavihi. Tíjaracahaviripa arairupa eta vítaresira táichavenehi eta víurujiasirahi ema Cristo. (Táichavenehi eta majapanuirahéhi, ticuchucuhaheyarehi.)

⁶ Puiti, eta viávahásirahi ema Cristo, yátupihí eta véchepusiraya, vi-caicuchipa eta macaejasirahavinapa tayehe eta viávacureyare te anuma, vichaneya ema Cristo.

⁷ Eta juca émavenehi ema Viya, mavarahahi máimereca maverahi eta víuricarevana máijararuhaviyare eta viyehe te jena sácheyare, taicha tétavicavahi eta máemunasirahavihi táichavenehi eta víurujiasirahi ema Jesucristo.

⁸⁻⁹ Taicha eta víuchucuirayare eta viápechiravaya vítareca, étavenehi eta majapanuirahavihi ema Viya. Vijacapacareripa eta mayehe, táichavenehi eta vicasiñairahi ema Jesús. Vahí étaparacaina tacuchucuhahavihihi eta víchacueneanahi, taicha vahí vítijivainahini váratahahini vijacapacarehini. Tacahehi éta, apaesa nacuija nacucasiñavavaica eta nacuchucuiravapuca.

¹⁰ Arairuinapa eta vítaresira maicha ema Viya. Émarichuvare ticajurucavahi eta véhisirahi ema Jesucristo, mavarairahi víchayare eta táuriqueneana. Eta víchirahi, vítauchahi eta mapanereruana acane.

Eta véhisira ema Jesucristo, étamurihavinapa. Vaipa víputsimuriavavacaimahi.

¹¹ Németeaca échavahi éti eta nacatianasiráhehi ena nujaneeana táichavenehi vahí éhichahini eta nayeherepiana.

¹² Éti, cape juca, tájina ímatiyahini eta máimiturapianahi ema Jesucristo. Vuíchahavare ímatihini eta iúricacarevayarehi táichavenehi eta matratune ema Viya viyehe viti israelítana, taicha ticaerajicaheanahi te vimuri. Vuíchahavare ímatihini eta ícuchianayare máijararuheanaya ema Viya. Eta tacahehi, éti ímijachaipa vahí ejacapacare eta mayehe. Vuíchahavare ácasiñavahini eta mayehe.

¹³ Puitipasera eta éhisirahi ema Jesucristo, iúrujiacaripahi éma. Tásiha, émeñahavaipahi mayehe ema Viya, taicha ecasiñavahi eta máepeninahehi ema Jesucristo.

¹⁴ Énerichuvare, étavenehi eta víurujiasirahi éma, tihétamurichahaviripahi vimutu: éti apavasanavaha, vítipa viti israelítana. Vaipa víputsimuriavavacahini. Tímicutijiricavaichaha étanainehi eta víuchusine. Macaepaharipahi eta vicitianajirísiracacáinihi.

¹⁵⁻¹⁶ Eta máijararesirahi eta máquehe te crusu ema Jesucristo, macaepaharipavare eta tapamisirahavini véhica eta vanairipiana étapa eta nayeherepiana tipicauchacareana. Puiti, vaipa étaparacainahini

eta viúchucuiraya. Énerichuvare macaepaharipa tamutu eta vicátianajirísiracacáinihi táichavenehi eta apavasanahavirahi. Puiti vimutu viti véhicanahi ema Jesucristo, étamurihaviripahi máicha. Tájina víchiravaimahi. Táitusiava tiúrichahaviripa vimutu mayehe ema Viya.

¹⁷ Eta tímitecahi ema Jesucristo, timetapanahavihi eta táurinaquene echajirirucava eta najacapacarevaya namutu ena achaneana. Éma, tiúrichahavirahi mayehe ema Viya vimutu: viti vínapucanahi vímati eta máechajiriruvana, étipa eti epaenumavahi ímati eta máechajiriruvana.

¹⁸ Puiti, eta víurujiasirahi ema Jesucristo, tiávahácavahi ema Espíritu Santo. Tásiha, máichavenehi ema Espíritu Santo, vimutu vicuticacaipahi eta vípauchiraipa ema Tata Vicaiyaquene.

¹⁹ Eta tacahe, tájinapa táeñamacarehini eta ejacapacareva eta viyehe viti machanerana ema Viya. Esiapamurihahaviripahi víti. Tachichaheripa eta mávasa anuma.

²⁰⁻²² Eta esiapamurihahavirahi te vimuri, nímicuticharipa te náepiyaca eta ichape peti. Ema Jesucristo, tétavicavahi eta máetumechirahavihi vimutu viti véhicanahi éma. Macuti eta tatumearaya eta yúchamana, eta manasirahi eta máimiturapiana. Tásiha, visiapa viti apóstoleana énapa ena profetana. Tacahe éti, eta esuapirahi eta vímiturapiana, esiaparipahivare. Ecuti eta labriyuana étapa eta yucuquiana. Ema Espíritu Santo, tétavicavahi eta máitupajijiasiravahi tihétamurichahavihi. Vituparahapachuhi eta manasirahavihi. Máepiyacavacapaipa. Te máítauchapa tamutu, tétavicavainapa táurinavaya eta ichapequenehi templo, mapenayare ema Viáquenu, sántoquenehi.

3

Ema Pablo, éma ticatuparahahi ticametarairuyare nayehe ena apavasanana

¹⁻² Németeaca nuti ímatiequeneharipa eta máetaviuchirahi eta máemunasirahehi ema Viya. Éma, tivanecanuhi níchuhaheya eti apavasanana, mavarairahi éhicayare ema Machicha Jesucristo. Eta juca nucametarairuirahi eta eyehe, étara tivichanuhi puiti juca nucaeratairahi. Nútisera nuyaseuchaheparaca éti te nuyujarasirana.

³⁻⁴ Taicha ema Viya timetacanuripahi te nuvapure eta mapanereruhi tapaemunava téchacarehi. Puiti te juca nucartane, eta échajicuirá eta nájurehi, németeaca ímatiequenehayare tamaturipa nímatiequenehahi eta mapanereruhi ema Viya tayehe eta macuchusirahavihi ema Jesucristo.

⁵ Eta juca mapanereruhi ema Viya, nájina náimatiequenehahini cape juca tásienequenehi. Puitisera, ema Espíritu Santo tímechahaviripa viti mayeheana santo apóstoleana énapa ena profetana.

⁶ Aní tacahehi eta juca tayumurevanainihi: Eti apavasanana, éti apanavare ejacapacarehivare mayehe ema Viya máicha ema Jesucristo. Iúchuchuhayare táichavenehi eta éhisirayare eta vimetarairuana. Esiapamurihahaviyare viti machanerana ema Viya. Étamurihaviripa. Vicuticacainapa eta vícuchihi viti israelítana.

⁷ ¡Tétavicavahi eta majapanuiranuhi ema Viya! Nútisamipa máichuhaquenehi eta nucametarairuyarehi eyehe. Tásiha éma, tétavicavahivare eta máetumechiranuhi te tamutu eta nucametarairuirahi.

⁸ Vahi németeacavahini nútinasamihini manerejica, taicha nararihihi ena titupajijiaapanavanahi eta nuyehe. Tijapanunuhisera ema Viya. Nútisamipa

manerejiruhi, mavarairahi numetapanahe eta máichuirahéhi éti apana eti apavasanana, eta ejacapiraya eta táuricacarequene vícuchi maicha ema Cristo. Tétavicavaya eta viúricacárevayare.

⁹ Tacahehi eta mapanereruhi ema Viya eta viyehe acane te tépanavainapa máepiyacaya tamutu. Váhisera táijahúchavahini mametacahavihini. Tapaenumava timetacanuhi núti, matuparasiranuhi eta numetasiraheyare tamutu.

¹⁰⁻¹¹ Taicha mavarahahi natiarihiyare camurianayare ena tisuapanayare yátupi. Eta táurivayare eta náehisira, tímereuchayarehi eta máetaviuchirahi eta máitupajjiasiravahi ema Viya. Náraminehi ena aquenucanahi táivihanahi te anuma eta náimairahi eta juca. Eta tacahehi eta mámirapahi ema Viáquenu Jesucristo tamutu eta mapanereruana eta acane ema Maiya.

¹² Tásiha puiti, tájina táeñamavacaréimahi eta vipauchira ema Viya. Vicasiñavahi eta mayehe, taicha ema Jesucristo émahi ema vicasiñasarequenehi.

¹³ Eta tacahe, nutuparacaheya: Vahi ecuinajicava eta juca éhiruhi, váhivare ecupica eta esamairirisirahi eta nucaeratairahi táichavenéhi eta nucameta-rairuirahi eyehe. Evapinavasera eta nucamichirahi eta nátajivana, taicha nuvarahahi nímereca eta táetaviuchirahi eta némunasirahéhi.

Éma Pablo mayujaraucha ena machamuriana

¹⁴ Eta némechirana eta táetaviuchirahi eta máitupajjiasiravahi ema Viya eta juca mapanereruana, núti népuyumiraucha ema Macaiyaquene ema Viáquenu Jesucristo, nucunachirahi éma.

¹⁵ Éma, Táiyaquenehi tamutu te anuma. Émarichuvare téchahi tamutu te juca apaquehe.

¹⁶ Nuyaseaca éma májjaracaheni éti, ichapenahini eta ítupajjiasirava étapa eta etumevainahini te íachanevana, maicha ema Espíritu Santo. Taicha ema Viya, tétavicava eta máitupajjiasirava, váhivare mayavanaimahi.

¹⁷ Nuyaseacavare yátupina eta ecasiñairaya ema Cristo, yátupinavare eta éhisiraina eta máimiturapiana. Túmeheyare eta émunaraivahi. Tájina tihapacahéimahi eta éhisirahi.

¹⁸⁻¹⁹ Nuyaseacavare ácutihini ena apamuriana echamuriana te tamutu avasareana, te yátupina ecaicutiara eta táichapevahi eta máemunasirahavi ema Cristo. Tájina títaina éta. Tayanapane vahi vicúcaicutiaraquenéna. Nuyaseacahivare yátupina émainahini ecasamure ema Viya.

²⁰ Tétavicavahi eta nucunachirahi ema Viya, taicha máituruequenehahi tjaracahavi tamutu, máemetavicahi eta viyasearuana, étapa eta vípanerechirana. Tétavicava eta máitupajjiasirava ema Espíritu Santo eta máetupirisirahi eta visamureana.

²¹ ¡Vicunachaparacahini ema Viya vámutu viti véhicanahi ema Jesucristo! ¡Máichecuaraquirénapa eta vicunachira! ¡Amén!

4

Viúrujiacacahi maicha ema Espíritu Santo

¹ Yátupi núti tipresuchanuhi puiti táichavenéhi eta néhisirahi ema Viáquenu. Eta tacahe, nutuparacaheya: Tacuija íchiravaina eta ítaresira te mámirahu ema Viya; taicha éti máichuhaquenéherichuhi éma, mavarairahi machane-raheyare.

² Yátupina eta emansuvaina, étapa eta iúrivaina. Ecayehe paciencia. Ecami-chayare jácani te ticaviurevanapuca nácani echamuriana, táichavenénahi eta émunasiracacainahi.

³⁻⁴ Émanarichuvare ema tiávahácahe, émaripa ema Espíritu Santo. Ísapava eta macurujisirahehi. Tacuija íchiravaina eta iúrujisiravahi. Étanainarichuhi eta epanereruana. Taicha ema Viya tíchuhahéhi. Puiti ecuchapahi eta iápechiravare ítareca.

⁵ Émanarichuhi ema Viáquenu. Tacarichuhi véhica eta máimiturapiana. Étanarichuhivare eta vicaicachasira eta viúrujisira éma.

⁶ Émanarichuhivare ema Viya, Vicaiyaquenehi vimutu. Éma téchahavihi vimutu. Ticaemataneacahavihi vimutu. Émavare tijaneacahavihi vimutu.

Vítucaquenepachuhi maicha ema Espíritu Santo

⁷ Énerichuvare ema Cristo, éma tíjaracahavihi eta vítucaqueneyarepachu, jácani mavarahaquenehi.

⁸ Taicha eta Sagrada Escritura, ani tacahehi: “Te tiárapa éma te anuma, mámurihapaipa ena macuchureanahi. Májaracasichavacapa eta náitupujijiasiravaya ena machanerana” tacahepa.

⁹ Epanerechaya puiti eta tacayemaquenehi eta márairahi. Eta juca tavaraha vicaicutiara eta máucupaísirahi tativa te juca apaquehe.

¹⁰ Te títauchavapa eta tímiucupaicahi, tiárapa tichavapa te mávasa anuma. Tichavavarepa eta émairayare técha tamutu.

¹¹ Tásiha, ema Viáquenu títiparacahavi víti, tíjaracahavivare eta vítucaqueneanayarepachu. Taicha tinacahavipa eta viávacurepachuya apóstolehaviya viti manerejiruqueneanahi. Ena apamuriana, manacahivare profetanahi náimatiequenehayarehi eta mapanereruanahi ema Viya apaesa náitame-tacavaca ena vichamuriana. Ena apamuriana, manacavare ticame-tarairurahianayare, náichuhayare ena achaneana náehica ema Viáquenu. Ena apamuriana, manacavacavare pastóreanayarehi, najaneacavacayare ena vichamuriana. Énapa ena apamuriana, manacavacavare máestroana, náimitucavacayare eta máimiturapiana ema Viáquenu.

¹² Taicha éma, mavarahahi máetupiricayarehi tamutu te etaracu eti machanerana; mavarahavivare vitiarihiyare viti vítatijiricaheyare eti vichamuriana, vicajurusiraheyarehi eta éhisirahi éma.

¹³ Apaesa yátupina vácuti vámutu eta máurivahi ema Machicha ema Viya; táitecapavanevaréni eta sache eta viúrujisiravaya, tájinapa tahapapicahavimahi eta véhisirahi; vítamuturucaripahini tamutu eta vítucaqueneanahi tásihaqueneanahi me Cristo. Vácutipaini éma tamutu eta máitupajijiasiravahi.

¹⁴ Mavarahavivare vimutuyare vímatiequeneha. Vaipa vácutimahi ena amuyana, tímunanasiricavanarichaha éna. Tísapajiricavanarichaha navayuaca tayehe eta apana náimiturapiana ena títuréquenehana tivayurecana, napamisiravacahi namutu náehica eta tamauriqueneana.

¹⁵ Eta tacahe, vétumechavayare eta véhisirahi eta máimiturapiana yátupi-queneana, yátupinavare eta vémunaraivahi, vicajurucacayarehivare eta viúriya, vicutiyahe ema Viáquenu Jesucristo, taicha émahí ema téchahavihi.

¹⁶ Nímicutihahehi eta viáquehe. Camurihi eta táunavahi eta viáquehe; étanaichuhisera. Camurihivare eta táitupajijiasiravanahi; tamutu hisera ticaematanehi, víchirahi eta vivarahaquenehi. Tájina vahi táejiacavahini. Tamutu tijaneacacahi. Ene vicahehi viti machanerana ena Jesucristo.

Éma, tétumehahavihi vimutu víti. Eta viúrujasirahi mayehe éma, étamurihavihi. Vimutu vítucaquenepachuhi máicha. Vématanerepipachuhi máicha. Vijaneacacahivare. Vicajurucacapaipahi táichavenehi eta vémunasiracacahi.

Apanainapa eta vítaresira taicha eta viávahásirahi ema Cristo

¹⁷ Eta juca numetarapiana eyehe, nutuparacahéicha taicha matupararunuhi ema Viáquenu. Nucavanairipipa puiti: Vaipa ecuapecha ecuquicha eta náichaqueneanahi ena máimatirahanahi ema Viya, náichahi éna eta náitairesirahi jácani tavarahaqueneanahi eta napanereruana súnsurupiana.

¹⁸ Tamutu eta napanereruana tétavicavahi eta tamapicuvahi. Vahi apaesainahini tavehahini eta tizarahi. Máecharaireanahi éna, táichavenehi eta tamuracavahi eta nasamureana. Váhiquene navarahaimahi napauca ema Viya apaesa macanaracavacahini éna.

¹⁹ Tájínapa apaesainahini náimatihini eta titsirihacare. Tíjaracavanapa tayehe tamutu eta najamuraraviana. Tétavicavahi eta navapinairahi náichahi eta tamauriqueneana tájiparacana.

²⁰ Étiserá vahi tacucahe eta ítairesiraya puiti eta éhisirahi ema Cristo.

²¹ Taicha németeaca yátupihí esamararacahi eta vímitusirahehi. Ímatiripahi eta táuriqueneanahi yátupiqueneanahi tásihaqueneanahi mayehe ema Jesucristo.

²² Tásiha puiti, vaipa ecuesacha echavaucha eta ítairesirainihí acane echipejiricavahi taicha tivayuacahe eta ejamurachirahi eta tamauriqueneana.

²³ Puiti éti, ísapaya ema Espírítu Santo mávahácahe, máitsivachirayare eta epanereruana étapa eta ejamurachirana te iáchanévana.

²⁴ Tásiha, apanainapa eta ítairesiraya. Yátupi eta ecaquehéraina ema Viya, ácutini éma eta máurivahi étapa eta masantuvahi.

Étupiricayare tamutu eta ítairesirana

²⁵ Tásiha puiti, vaipa épíyahirahimahi. Étupiruvayare tamutu eta échajirisiravaya nayehe ena echamuriana eparaepiyana, taicha étanarichuhi eta echamuriracacairahi, émanarichuhivare ema Viúrujiaruhi, ema Jesús.

²⁶ Te tatiarihípuca eta táimiyusemacahe, ejaneacavaicha machu ecapeatura. Te esemapuca, vahi tacunasi eyehe. Énevanéna eperdonachacaca.

²⁷ Ecaunevayare, machu máiturucahe ema Váinaraji, táichavenénahi eta esemanevahi.

²⁸ Mácani tiámerahinihi, vaipa macuapechava macuamereca. Mácaematane apaesa macunachacare, apaesavare eta jácani máematanevachayare eta máviyhayare eta macajirayare ena ticamunuvanahi.

²⁹ Váhivare ecunacajacachava eta tájiparácana échájirirucavana tamauriqueneana. Tátupiruva eta échajirisiraváina apaesa étaina eyuchusiha eta nasuapiraina nácani tisamaheanayare, éta tétupirisamurechavacayare éna.

³⁰ Vahi ecuisapava ícha jácani tamauriqueneana, machu ímpanerereca ema Espírítu Santo, émaripa ema sántoquenehi, tiávahácaheripa éma. Eta mávahásirahehi tímicutijiricavaipahi eta ecamaracahi, taicha ímaticaréipahi eta machanerahéirahi ema Viya; puiticha, étapa eta te títecapapa eta jena sáchezare viúchucuirayare.

³¹ Váipavare ecunaca eta semanereana. Váipavare ecatianarahimahi. Váipavare ecusemarairihi, váhivare ecuijajachava ecapiaracava. Vahi ecuichanareca. Ínajicaya éti tamutu eta júcana tamauriqueneana.

³² Táitsiva étaviuchayare eta iúrivayare nayehe nácani apamuriana, eJapanurahiya. Te tatiarihipuca eta náejecapirava, eperdonachacayare taicha ene macahehi ema Viya eta maperdonachirahehi máichavenehi ema Cristo.

5

Tiúriyarehi eta náitaresirayare ena machichanaveanahi ema Viya

¹ Puiti éti machichaheripahi ema Viya, máemunaruqueneheripa, tásiha ácutipa éma eta máurivahi.

² Émunajiricacayare eta itaresiraya. Ecutiyare ema Cristo eta máemunasi-rahavihi. Éma, macurisamurecharipa ema Maiya eta máimijararesiravahi víchavenehi víti, macutihi eta sárarechicha uvesa nacaparuhi eta námavahuhi me Viya.

³ Eta machaneraheriripa ema Viya, vaipa táuricahini íchahini eta túhucare. Tíñehi te mamirahu ema Viya. Váhivare ecupanerecha ícha jácani tiámanahi eta tauriqueneana. Váhivare tacuvayuacahe eta tájiparácana.

⁴ Vahi ecunacajacachava eta échajirirucavana titsirihacarepiana, súnsurupiana, tájiparácaqueneana, taicha tájina tacunachacarévaína éta. Tamutusera eta échajisiranaya, amairipiquenéna eta ehasulupayachiraya ema Viya. Jéhevare, éta iúrihaquenehi.

⁵ Németeaca ímatiequeneharipa éti eta vahi tiúchuchuanaimahi nácani ticaecahicacanayare, ema achane te mavehapuca esu esena apayena, esu esena te suvehapuca ema achane apaima; nácánivare ena amaperuana tivehajiricacanahi; mácanivare achane mavehapuca ema maparajairava; nácánivare tijamurachana tamutu jácani náimahaqueneanahi. (Ena tavayua-cavacahi eta najamurachirana, énarichuhi ticasíñarajiana.) Namutu ena nani túmereuchavanahi vahi machaneranainahini ema Cristo. Vahi tisiapanaimahi te mávasa ema Viya.

⁶ Tásiha éti, vahi ecuisapava nácani navaraha navayuacahe te náechajiriruva súnsurupiana, napamisiraheya ícha eta júcana tauriqueneana, taicha eta júcana, éta tíviuchavacayare nácani masupajirairahanahi me Viya, muracayare eta náicuñayare.

⁷ Tásiha, ejaneacava, machu ácuti ena nani tíchanahi eta júcana tauriqueneana.

⁸⁻⁹ Échavaripa tacáhénihí eta itaresirahi acane étarichu íamapiricainihí íávachahi te tímapícu. Púitísera eta iúrujasiraípa ema Viáquenu, tijarahiripa eta itaresirahi. Tásiha, ímerezayare eta emicauchirayare ena apamuriana achaneana, ímeresirayare eta iúriya, étapa eta tipachinaqueneana eta itaresira, étapa eta yátupirahi eta éhisirahi ema Viya.

¹⁰ Tamutu sácheana ecaravahuinavarepa eta mavarahaqueneanahi máuriruanahi ema Viáquenu.

¹¹⁻¹³ Ejaneacava éti, machu íápechava ícha eta tauriqueneana náichaqueneásahi ena achaneana te tímapícu. Taicha tétavícvahi eta tatsirihacarevahi eta náichaqueneanahi eta nayumurusiravahi. Étísera ímitucavacayare éna. Emicauchayare eta taurivahi eta náichaqueneana, apaesa náimaha eta táíñehivahi eta náichaqueneanahi. Tásiha, natiarihipuca ena tivarahanaya náinajicayare.

¹⁴ Éta emicahuchiravaca éna, tacuti eta táechajiriruva eta jirasare, ani tacahe:

Pítisami pímicutijiricava pépenaquene taicha eta tavayuasiravihi eta pecatuana.

Péjamiuchavaichu eta pímacacarasiravahi te timapicu.

Písapava macaechepucavi ema Cristo, mavarahahi timícauchaviyare.

15 Eta tacahe, yátupina eta ejaneasiravaina. Vahi ecucuti ena máecharaireana. Ímerecavaya eta ítupajijiasiravahi.

16 Ecamapuravachaha tamutu sácheana eta ímitusiravacahi ena achaneana, taicha maverana ena tichanahi eta tamauriqueneana.

17 Tacuija eta esunsuvanaina. Epanerechayare apaesa ácaicutiara yátupi eta mavarahaquenehi ema Viáquenu.

18 Vahi ecucavaha taicha éta ticauyayacarehi ticamitiacahe. Ísapavasera émaira máechahe ema Espíritu Santo tamutu eta itaresira.

19 Eta ímiturapiyare nayehe ena echamuriana, eta salmo étapa eta jirasareana majiriahuaana ema Viya. Eta ecunachirainahi ema Viáquenu, iúrisamureyarehi eta ejiraira.

20 Ehasulupayachaparacaya ema Vicaiyaquenehi te máijare ema Viáquenu Jesucristo tayehe tamutu jácani íchararacavana taicha tásihaqueneanahi eta mayehe.

21 Emutu éti, ímereca eta iúriava táichavenehi eta epicauchirahi ema Viya. Ísapava eta nacamunuirahahi ena echamuriana. Vahi étainachucha éhica eta evarahaqueneana.

Em a achane ésupa esu mayena náimerecayarehi eta náuriva énjicacayarehi

22 Étiripa eti esenana ecaimaqueneanaripahi, tituparacahehi epicauchayarehi ena ímanaveana. Esuapajirahiyarehiva nayehe, tacutiyaereichu eta esuapirahi ema Viáquenu.

23 Taicha mácani achane, tatuparacahi éma, téchaya eta máitátiraya esu mayena, tacutihi ema Jesucristo tatuparacahi éma téchahaviyarehi vimutu viti véhicanahi éma. Émarichuvare ema ticatiuchahaviya vimutu viti machaneranahi.

24 Tásiha, yátupihí eta vipicauchirahi visuapahi ema Cristo. Ene nacaheyahehi ena esenana, nasuapayarehi napicauchayarehi ena náimanaveanahi te tamutu.

25 Étiripa eti náimanaveanahi, tituparacahehi émunacavacayare ena eye-nana, tacutihi eta máemunasirahavihi ema Jesucristo viti machaneranahi. Éma, tímijararecavahi víchavenehi,

26 taicha mavarahahi tisantuchahaviyarehi. Tásiha, masipahasinahavipa eta viáchanevana eta visuapirahi eta máimiturapiana. Eta masipahasirahavi tacuti eta sucavira te une esu araimayare te tétupiricavapa tayehe eta sucaimairayare.

27 Taicha mavaraha tacuija víchiravaina viti machanerana te táitecapa eta sache vitupihamirauchirayare éma. Vétaviuchayarehi eta viúrinavaya. Tájina véchipejcaimahi, tájinavare tijararechavimahi, apanaimahi víchava. Mavarahahivare tétavicavayarehi eta visantovaya. Yátupi matapiravarehaviya viti.

²⁸ Ene ecaheyarehi eti náimanaveanahi, ímerecayarehi eta émunasirahi ena eyenana, tacutihi eta émunasirahi eta iáqueheana. Mácani máemunacahi esu mayena, tímicutijiricavahi eta máemunasiravahi éma.

²⁹ Taicha viti achaneana, eta vítaresirahi, váhiquene vicatichaimahi eta vécheana. Tétavicavahi eta vijaneasirahi, véchapajiricahi, vénicahivare eta véche. Ene macahehi ema Cristo eta majaneasirahavihi, máechapajirisirahavihivare viti machanerana.

³⁰ Víti tímicutijiricava eta táunavanahi eta máquehe táichavenehi eta viávahásirahi éma. Vicutijiricavavare eta maeche, máperanavare.

³¹ Échavaya eta táechajirisirahi eta Sagrada Escritura, ani tacahe: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa títáticacayanare. Eta navehacairahi, tímicutijiricavaipa étanarinehi eta náqueheana” tacahepa.

³² Te juca tametarapi, jararihi eta tacayemaquene tayumurevaquenehi. Puiti nimitucahe: Viti machanerana ema Cristo, eta viúrujasirahi éma, étanamuriháviripa tacuti eta étanarinehi eta náqueheana ena ticaimanahi.

³³ Tásiha, nuvaraha yátupina ácaicutiara eta juca nucaayemaquenehi. Tituparacahehi eti ajairana, yátupina eta émunasiraina ena eyenana tacuti eta émunasirahi eta iáquehe. Énerichuvare eti esenana, tituparacahehi epicauchayarehi ena ímanaveana.

6

Ena amaperuana, náimerecayarehi eta náuriva nayehe ena ticachichana

¹ Étiripa eti amaperuana, yátupina eta esuapajiraivaina nayehe ena ticachichaheana, taicha tituparacahehi ene ecaheyarehi eta éhisirahi ema Viáquenu.

²⁻³ Ema Viya tíjaracavapa tíjaracaheyare eta iúricarevaya eti esuapajirahiana, taicha ani tacahe eta máechajiriruva: “Epicauchayare ena ticachichaheana. Te esuapajirahi éti, nucajurucaheya te apaquehe. Tájina íchiravaimahi, iúritaresirainapa” macahepa. Tétavicavahi eta tasuapacarevahi eta juca mavanairipi ema Viya eta eyehe.

Ena náiyana, náenana, táurini eta náimitusiravacaina ena nachichanaveana

⁴ Énerichuvare, eti náiyana, náenana, vahi ecuimiyusemaca ena echichanaveana tayehe eta evanesirana. Tauri eta ecavanairipira, apaesa napicaurahi eta najurusiraina, énajivayare ticaratacavana. Ímitucavaca tamutu eta máimiturapiana ema Viáquenu, apaesa nasuapajirahi.

Ena ticaquenurecana, táurini eta nacaemataneasiraina

⁵ Énerichuvare eti ecaquenurecana, tituparacahehi esuapajirahiyare nayehe ena iáquenuanahi. Epicauchavacayareva, émunacayareva. Táurivainahini eta ecaemataneasirahi, tacutirichu eta táurivahi eta ecaemataneasirahi ema Cristo.

⁶⁻⁷ Evapinavayarehi te esamureana eta ecaematanera, vahi tacucarichu te natirihini ena iáquenuanahi te emirahu. Vahi ecuyacujiriraha. Evapinavayaresera eta ecaemataneasirahi éna, taicha émarichuvare ema Viáquenu ema ecaematanearuhi. Ímerecavayare eta yátupirahi mavanarahehi éma. Tacaheyarehi eta itauchirayare eta mavarahaqueneana ema Viya.

⁸ Taicha écharipahi émutu éti, vijacapyare eta vícuchihi mayehe ema Viáquenu te vítauchahi tamutu eta táuriqueneana. Vahi manerejicaimahi nácani líbreati énapa ena ticaquenurecanahi; vínunayarehi tayehe eta vícuchihi.

Énapa ena náquenuana, tituparacavaca eta náurivaina nayehe ena nachanerana

⁹ Énerichuvare eti náquenuana, tituparacavehi iúriyareva nayehe ena echanerana, eJapanuyare éna tayehe eta evanesirana. Vahi ípicararecaimahi te evanesirana. Ínunayarehi échava eta matiarahirahi ema Iáquenuhivare éti apanava, ema tiávihihi te anuma. Taicha éma, nájina máepuruquenéna ena acha neana.

Yátupina eta vicasíñavairahi me Viya; vétumechavavare eta véhisirahi

¹⁰ Puiti nutuparacavehare, nuparapenaveana, ecasiñava yátupina mayehe ema Viáquenu apaesa máíjaracahe éma eta matumeva étapa eta máitupajijiasirava.

¹¹⁻¹³ Nuvaraha numetacahe eta juca: Ema Váinaraji ticanarahavihi víti machaneranahavihi ema Viya. Tétavicavahi eta mavairairahi tiáquipacahavi. Tásiha, tituparacahavi eta véchapajirisiravaya eta vicatiuchiravaya mayehe éma. Natiarivare ena camuriqueneana majupahana, énapa ena masuntarurana. Váhisera achaneanainahini, váhivare víparaepiyanainahini. Éreananahi éna, váinarajiqueneanahi. Tétavicavahi eta nasimutuvahi éna. Tétavicavahivare eta náitupajijiasiravahi étapa eta natumeva eta nacaematanera tayehe eta juca apaquehe, tamapicuquenehi náicha. Eta tacahe, échapajiricavayare eta ecatiuchiravayare tayehe eta mavayuarauiana ema Váinaraji. Étumechava eta éhisira. Ecuti ema suntaru ticasíñavahi tayehe eta mamuiraha vahi tasiapahacaimahi eta espada. Tásiha, eratahayare ecamicha tamutu eta ecatajivairana. Vahi ecainajiruvaimahi. Iáquipaicareva namutu ena machamuriana ema Váinaraji.

¹⁴ Yátupinahisera esuapa eta vímiturapiana yátupiqueneana. Vahi ecuchavacuéjehava. Átipuruvahini eta ítaesirahi. Ecutiyare ema suntaru, manacahi eta máitijuhe, étapa eta fiérrromehi tiávichayarehi eta matupa, tájinasarepa náicharaca ena mánarana.

¹⁵ Vahi tacuechuquiha eta ecametarairuirayare eta majacapiraya ema Viya namutu ena achaneana. Etanucayareva eta eparupevaya apaesa erataha eta epaisirayare te acheneana eta ítecapirayare tayehe eta tayerehiqueneana avasareana.

¹⁶ Tacutiquene eta ticamunucarehicha, yátupinahi eta ecasiñavairaina mayehe ema Viya. Eta ecasiñavairayare táimicutijiricavahi iávihiuinahini eta ticaemahaequenehayarehi eta tamuruirapahi eta mayucaraqui ema Váinaraji.

¹⁷ Tacutiquene, ecasiñavahi yátupina eta iúchucuirayare, tácuti eta macasiñavaira ema suntaru eta mayehe casco te machuti. Iúnacahi eta máechajiririva ema Viya, máimiturehequenehi ema Espíritu Santo. Eta juca tímicutijiricavahi eyehenahini espada eta ecatiuchiravahi.

¹⁸ Te eyujaraca, eyaseacaya ema Viya máíjaracahe eta etumevaina. Eta eyujarasirana, tacuija tahapapiricahe eta máimitusirahehi ema Espíritu Santo. Vahi ecuyacuji eta eyaseuchiravaca namutu ena vichamuriana, majaneacavacahini ema Viya, táurivaina eta náehisirahi.

¹⁹ Énerichuvare, te eyujarasirana, eyaseuchanuhini me Viya, apaesa máijaracanhini éma eta nuvapinairava, tacuijavare tahapapiricanu eta néchajisirayare ena achaneana. Nuvaraha tasuapacarehini nayehe eta najacapacarevahi mayehe ema Viya.

²⁰ Ema Viáquenu tinacanuhi núti námayarehi eta máechajiriruva, nucuti-yarehi mácani achane embajador mayehe ema aquenuca Emperador. Éta tíchanuhi ticaviurenuhi eta napresuchiranuhi puiti. Eta tacahehi, nutuparacahe eyujarauchanu, eyaseuchanu me Viya, máijaracanhini eta nutumevaina eta nucametarairuirayarehi nayehe namutu ena achaneana te avasareana, váhivare nucuyacujihini eta nucametarairuirayarehi.

Eta táichecuaraqui eta macartane ema Pablo

²¹ Tiuri puiti, máimahaherinesera ema vémunaruquenehi vichamuri Tíquico. Éma, títametacaheyare tamutu eta níchararacávahi núti. Tétavicavahi eta máimicatasiranuhi eta vicaemataneasirahi ema Viáquenu.

²² Eta tacahe, névatacahi éma eta ara eyehe. Títametacaheyare eta víchararacavahi, tétumechaheyareva éti eta éhisiraya ema Viáquenu.

²³ Puiti nuyaseacahi ema Vicaiyaquenehi émapa ema Viáquenu Jesucristo, náijaracahehini eti nuchamuriana eta enarasirahi te esamureana tamutu eta epanereruana, tajurucahivaréni eta ecasiñavairahi eta nayehe, étapa eta émunasiracacahi.

²⁴ Nuyaseuchahevare táetaviuchahini eta iúricacárevaya emutu eti yátupihini éta émunasirahi ema Viáquenu Jesucristo.

Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te avasare Filipos, ticaijare FILIPENSES

¹ Nuti Pablo émapa ema Timoteo, mavanarahavihi ema Viáquenu Jesucristo, vímiamareca puiti eta juca vicartane eyehe emutu eti vichamurianahi ecavasanahi te Filipos, énaripa ena pastoreana énapa ena najupahana. Taicha eti machaneranahi ema Viya eta iúrujasiravahi ema Jesucristo.

² Nuvaraha máetaviuchahini eta macatajisirahema ema Tata Vicaiyaquene, émapa ema Viáquenu Jesucristo; nájaracahehini táurivaina eta epanereruana.

Emapa Pablo mayaseuchavaca te mayujarasirana ena machamuriana

³ Tatiarihi eta te néchahe, nuhasulupayachahi ema Viya íchavenehi éti.

⁴ Te tamutu eta nuyujarasirana, tétavicavahi núrismureva eta nuyaseuchirahehi emutu éti.

⁵ Taicha te jena títapucainapa sache eta nucametarairuirahi eta eyehe, ichapequene eta ímicatasiranuhi. Puíticha enasirichuhi.

⁶ Ema Viya, tétavicava eta máurichirahe eta ítaresira cape juca. Núti, tétavicavahi eta nucasiñavairahi mayehe eta máimiyaniravaina eta máurichiraheya, mavarairahi iuri eta machimapiraheya ema Jesucristo te jena sache machavirayare.

⁷ Énerichuvare nucasiñavahi eyehe eta ejacapiraya eta máurichirahehi éma, taicha némunacahehi ichape emutu éti. Nucasiñavahivare viciticacaiipahi eta vijacapirahi eta máimicatasirahavihi ema Viya, tayanapane viyerehica-ahipuca, étaripa te juca návihahi cárcel. Étaripa te nutupihamirauchavaca ena tuparairucana eta nucatiuchirayarehi eta yátupira eta viúchucuiraya maicha ema Jesucristo, apaesa te nasuapapuca éna apanava.

⁸ Tímararacanuhi ema Viya eta némunasirahehi emutu éti, nucutihi ema Jesucristo eta máemunasirahehi éma.

⁹ Nuyaseacahivare ema Viya eta iápajusiravainahini eta émunaraivaya. Ítupajjiacavahini, támutuhini ímatiequeneha, apaesa ímatiparahini eta enerejisiraya eta táuriquenehi.

¹⁰ Taicha nuvaraha tápajupanávainahini eta iúrivaina eta ítaresirana, tájina téchipejicahémahi. Matapiravarehéyare, tíuriyarepa eta machimapiraheyare te machava ema Jesucristo.

¹¹ Nuvarahavare iápajusiravainahini eta íchaqueneana táuriqueneana eta ecaemataneasirahi ema Viáquenu Jesucristo. Tásiha, tétavicavayarehi eta nacunachirayarehi ema Viya ena achaneana eta náimairahehi éti.

Eta vítaresirahi, puiti émapa ema Cristo téchahavihi

¹² Nuparapenaveana, nuvaraha numetacahe tájinaichucha táichavahini eta nucaeratairahi. Eta návihairahi núti te juca cárcel, camuriana ena numetaruana eta máemunaraivahi ema Viya eta nayehe.

¹³ Énaripa ena tasuntarurana eta palacio énapa ena apamuriana achaneana náecharipahi eta táemeratasiranuhi eta néhisirahi ema Cristo.

14 Tacutiguene, eta náimairanuhi eta nupresuvahi, ena camuriqueneana nuchamuriana táetumechavacainehi eta nacametarairuira eta máechajiriruva ema Viya. Vaipa napicahini taicha ichape eta nacasiñavairahi mayehe ema Viáquenu.

15-17 Nararihi éna, tiúrihi eta napanereruana eta náimituresirahi te máijare ema Cristo. Tatupiruvahi eta náichirahi, tásihaquenehi eta náemunasiranuhi, taicha náechahi éna eta návihairahi ani, nucatiuchirayarehi eta yátupira eta viúchucuiraya maicha ema Jesucristo. Nararishamisera ena tímiturecanahi te máijare ema Cristo, váhisera tátupiruvaquenénahini eta napanereruana. Nacapinaruraivarichucha, navarairahi ticachuricanuana. Napanerechachuchavare tiápajucavayarehi eta néñamiravana, tavetijipa eta návihairahi nuti te juca cárcel.

18 Tájinchuchasera táichavahi. Núti vahi nucapinaruvacaimahi ena nani páureanasami. Ticurisamurechanuarichucha núti eta náechajisihairahi ema Cristo namutu.

Énerichu ichapemuriyarechucha eta núrismurevaya,

19 taicha németeaca tiúriyare tamutu eta níchavaquenevayare. Taicha tisamacarehi me Viya eta eyaseuchiranuhi. Émaripa ema Espíritu Santo, ichape eta máimicatasiranuhi.

20 Núti, ichape eta nuvarairahi váhini nucutsirihaini. Nuvaraha nuva-pinava eta nímiyanirava nucasíñavaya mayehe ema Cristo eta majaneasiranuhi apaesa náimatihini ena achaneana eta yátupirahi eta macasiñacarevahi ema Cristo. Tájina vahi nupicacavahini eta náimicatchiranuhipuca, táimicapanupuca.

21 Taicha, eta nítaresirahi puiti, ema téchahi ema Cristo. Te népenapuca, tiápajucavainapa eta núrillacarevaya.

22 Téhesera te nítarecarichahapuca, nucamapuravayarehi nucaemataneacayare ema Viáquenu. Eta juca, vaipa nímatiequeneha tájahapuca tiúripanayarehi nuyehe.

23 Nuvarahaipanéni níjahúchavahini népenahini apaesa nunaracapaini te machacaya ema Cristo. Eta juca tiúripanahi eta nímairahi. Váhisera nímatiequeneha tájahapuca eta néhiruyare.

24 Néchahevasera éti, néñamahevare nujunijicahe. Tiúripanaichupuca vuíchaha nucuepena.

25-26 Tásiha, németeaca vuíchaha mavaraha népenahini ema Viáquenu. Nucuchapa nápechavahivaréni níteca eta ara eyehe, nucachaneheyaréchaha éti. Nímicatacahenumayare apaesa tápajucavahini eta iúrisamurevana eta ecasiñavairahi me Viáquenu Jesucristo. Tacahe, tétavicavapaini eta viúrisamurevainahini eta viúrujiacairaya.

27 Eta ítaresiraya, ímerea yátupina eta éhisiraina eta máimiturapiana ema Cristo. Tayanapane váhipuca nucuíteca eta eyehe, ímiyanavasera eta étumechiravaina eta iúrujasiracacahi. Nusamairiracahéhini táurihini eta ímiyaniravahi éhica emutu, étanainarichuhi eta epanereru, evapinavahi eta ecametairuiru eta véhiruhi tayehe eta viúchucuiraya.

28 Vahi ecuaremea naicha nácani iánanahahi. Eta nacatianasirahehi, tímicaecherachahi eta nacaicuchirahi eta náicuñayare. Táimicaecherachahi eta iúchucuirayarehi éti maicha ema Viya.

²⁹ Éti, iúricacarehi maicha ema Viya eta ejacapacarevahi mayehe, táichavenehi eta ecasiñavairahi me Cristo. Tacamunuhisera eta ecatajivairayare táichavenehi eta éhisirahi éma, ecaicuchirahi éta.

³⁰ Ecutinuripahi eta vicanarajirisiravacahi ena viánaranahi. Éti ímahanurichuhi cape juca eta nuncanaravacahi, puíticha esamairicanuipahivare eta nunasirichuhi nuncanaravacahi.

2

Tétavicavahi eta masuapajiraivahi ema Cristo. Tásiha puiti, tétavicavayarevare eta masuapacarevayare.

¹ Tacahe puiti, németeaca esamavahi eta máetumechirahehi ema Cristo, iúrisamurerahivare táichavenehi eta máemunasirahehi; evapinavahivare eta mávahásirahehi ema Espíritu Santo, máimitusirahehi eta ecajirahi ejapanurahihivare.

² Tacahe puiti, nuvaraha étanainarichuvare eta epanereru, ácuticacaini eta ecaemataneasiraina ema Viya; tácuticacahivaréni eta émunasiracacahi. Tásiha, tétavicavayare eta núrisamurevaya ícha.

³⁻⁴ Éti eta ítaresiraina, tacuija eta ecasiñavavaisiraina, váhivare ecuimijuquiha eta evarahaqueneana. Nuvarahasera ímerecohahini eta emansuvaina nayehe ena echamuriana; énahi émunaruqueneanahi. Nativaina ímicatacavaca éna, táetaviuchiravainahini eta náuricacareva ícha. Vahi ecuíátíjiva.

⁵ Emutu éti íamanahini eta táurivahi eta juca mapanereru ema Jesucristo, tisuapajirahi éma.

⁶ Éma, tacahehi eta mapanereruanahi: Vahi macasiñavahini eta víyairahi éma. Tétavicavahisera eta mamansuvahi, étapa eta máurivahi. Tísapajiricavahi.

⁷⁻⁸ Tacahe, manaquicahi eta mávacuréni. Eta máucupauchirahavihi, macutipaipa mácani achane macahequenechucha eta máuchusirahi. Tamutusera eta máítaresirahi, tétavicavahi eta masuapajiraivahi, macutihi mácani moso. Eta masuapajiraivahi, étapa tíamaparauchahi eta máepenirahi te crusu. Títisrihacavahineni, máítauchahisera.

⁹ Eta tacahe, ema Viya máijaracapa eta máejasihayarehi tayehe eta anuquehepana mávacureyarehi, étapa eta tacapicahuirahi ichape eta máijare,

¹⁰ apaesa námutu nácani tisananahi eta máijare Jesús, tépuyucanayarehi: ena tiávihanahi te anuma, énapa ena tiávihanahi te apaquehe, énapa ena nacaerataquenehi puiti te amahe apaquehe.

¹¹ Namutu náichayare: “Yátupi Aquenucaquene éma”. Tacahe, tétavicavahi eta vicunachirayarehi ema Tata Vicaiyaquenehi.

Tétavicava eta najaraiva ena téhicana ema Jesús, nacuti eta jarairiqui

¹²⁻¹³ Núti nucunachahehi, eti nuparapenaveana némunaruqueneanahi, taicha tétavicavahi eta esuapiranuhi te nutiarahirichaha te echacaya. Puítisera nuvaraha tápajucavaini eta esuapiranuyare, puiti eta nuyerehirahahi. Ema Viya, émarichuhi ema tinacahi te esamureana eta evarairayare ecurisamurechayare éma; tiávahácahevare eta ítauchirayare tamutu. Tásiha, muracaina eta ejaneasirava tayehe eta tájiparacana, epicavareni eta ímicatisamurechira ema Viya. Tacuija táemitiequenehahini eta tapachinavahi eta íáchanevana.

¹⁴ Te tatiarihinapuca jácani íchaqueneanayare, vahi ecuevataemachavaca, váhivare ecuacapauchava,

15 *apaesa tacuija échajisiacarevaina emutu. Tacuijavare etapiravainahi eta náimairaheyare ena achaneana. Ímrecavayarehi eta machichahérahí emá Viya, tájina táechipejicahehíni nayehe ena achaneana váinarajipane-réruana. Nímicutichínahe eta táurinavahi eta jarairiquiana vímahaqueneana te anuma te jácáni yati timapícuquenehi.*

16 *Ímitucavacahíni eta máechajírírúva emá Viya, eta íchuhairavacavare náehicavare, apaesa náuchucuhahíni tayehe eta apana náítaresira. Tacahe, te máiteca machava emá Viáquenu Jesucristo, eta máimairaheyarehi eta juca táuriqueneana íchaqueneanahi, tétavícvainapa eta nucunachiravaya nútí íchavenehi éti eta táurivahi eta nímitúsírahehi. Vahi támapurujíhíni eta nucaemataneasírahehi.*

17-18 *Nímicutíchahe eta esuapajíríavahi tayehe eta ecaemataneasírahí emá Viya. Tícutíhí eta íámavahuhí mayehe. Nútí, tíjurícati táimícapacánu puca eta nucametarírúrahí eta eyehe. Eta népenírainapucáini tacutíyareva eta námavahuhí mayehe emá Viya, tacachane eta íámavahuhí éti. Nútí nuvápínavahi eta níjarasíravahí népena, núsísamurehívaré eta nucamavahúrahí me Viya. Nuvaraha íúrisámureyareva éti apanava. Vahi ecucatieque-nehánu. Ácutínu eta núsísamurevahí nútí.*

Éma Timoteo émapa emá Epafrodíto, vanáírúcanayare me Pablo

19 *Nupanerecháhi névatacayaréni emá Timoteo eta ara eyehe, máimaha-panahe apaesa núsísamurepáini eta nusamáírírísíraheya te machavapa. (Máimáhahavírínéséra emá Viáquenu Jesús eta vítújísíravaya.)*

20 *Taícha emá Timoteo, yátupíhí macutínúhí eta nuhápásámurechírava eta íúricarevahnahíni éti. Nájína apanáinahíni nácutíhíni éma.*

21 *Nararíhíníni éna apamúríana, énachuchasera tíyayaúrírcavanahí. Vahi tíhápásámurechavánáimahi eta íúricarevaina éti machanéranahí emá Jesucristo.*

22 *Ímatírípáhí éti eta máúrívahí emá Timoteo eta máímícatasíránúhí tayehe eta vícametarírúrahí, tacutíhí mácáni machícha emá achane, eta táurívahí eta máímícatasírahí emá máíya.*

23 *Vuíchahasera névatacáimáhí éma. Néchanumayare eta juca níchararacavayare te juca.*

24 *Nucasíñavahínéníséra mayehe emá Viáquenu Jesucristo eta nútíjácárúvahnahíni nímahapanáhe.*

25 *Tásíhasera, nupanerecháhi névatacáhívaréni púítíríchu emá apana víparape Epafrodíto, emá évataruhí tímícatacánuyarehí, tíámápáhívaré eta enaquírúvana. Púítí éma, tétavícvahí eta máímícatasíránúhí tayehe eta juca vématanérepíhí, vícanaríráhí eta tamauríqueneana.*

26 *Mavarahaípaíchavare tímaháhe éma apanava. Téñamaváipáhí eta eyehe emutu éti taícha máéchahí eta esamáírírísírahí eta macájumáíráhí.*

27 *Yátupíhí eta macájumáíráhí, tíánehíyarehíni tépena. Májapanuhíséra emá Viya; tínaracáhí. Tíjapanunúhívaré nútí apana apaesa vahí nucueñamavahíchainí, vahí tacuapíquíhanuhíni eta néñamíravahí púítí.*

28 *Éta tacahe, nuyayaucha púítí névataca éma, apaesa eta ímáírínahíni éti, íúrisámurevarepáini. Te néchápa eta íúrisámurevahí, étapa tacaepaha eta néñamavahí eyehe.*

29 *Táúriséra eta ejacápírína éma te esámureana, taícha yátupíhí echamúríhí éma eta éhísírahí emá Viáquenu.*

³⁰ Taicha éma, yátupihí tiánehipa eta máepenira, táichavenehi eta táetaviuchirahi eta mavaraira macaemataneaca ema Cristo. Váhiquene tiyavana-vahini eta máitaresirahi, taicha muraca eta mavarairahi máिताча eta etuparasiranahi mayehe. Taicha éma ítsivahi éti, eta vahi ítujicavahini ítecahini étijacarúvainahini ítátinuhini.

3

Tiúripána véhica eta juca yátupiqueneana

¹ Nuparapenaveana, evapinava eta macachaneraheripa ema Viáquenu. Núti, vahi nuyacuji eta nápechirayare numetacahe te juca néchajiriruvahi te nájure taicha eta tiúrichaheyare éti.

² Échapavayare nayehe nácani achaneana tipamicaheana éhica eta mavanairipiana ema Moiséini, navarairahivare ecamarcayare, náimijachahi machaneraheya ema Viya taicha eta ecamarcairahi. Ena nani, tétavicavahi eta náíñehivahi eta náemejecapirachira ena vichamuriana. Éna, nacutihí eta jácáni tamucu tétavicavahi eta tanicaraivahi.

³ Jéhesaresera vítiquenehi machanerani ema Viya yátupiquenehavihi. Vicamarcaqueneanahi víti te visamureana maicha ema Espíritu Santo. Vítiquenehi yátupiquenehavihivare viti véneuchavahi me Viya. Vivapinavahivare táichavenehi eta vicasíñairahi eta machanerahavirahi ema Jesucristo. Véchahi vahi étaparacainahini vítauchahini eta vanairipiana, étainapucaini visamacarehini táicha.

⁴ Jéhevare núti, táuricahinéni nucasíñavahini núti nusamacarehini, taicha nítauchahi tamutu eta viyeherepiana viti israelítana. Nucachuricahi ena nujaneanana.

⁵ Núti yátupiquenenuhi israelítanuhi taicha nucamarcaripahi te óchopa sache eta núchusirahi, náitauchahi éna eta viyeherepi. Mámariéquenenuíni ema Benjamín. Yátupiquenenuhi hebreo. Yátupiqueneanahivare hebreóana ena ticachichanuana, énapa ena náchucanaveanaini. Núti náchamurinuínihivare ena fariséoana. Nítucahi nímicapicaucha eta náitauchiraina yátupi eta víápajusiravahi religiósohavíhi nayehe ena apamuriana nujaneanana israelítana.

⁶ Eta nímicapicauchira, ichape eta nupanajirisiravacahi ena náinapureana creyénteana. Nucasíñavahi núti eta nítauchirahi yátupi eta viyeherepiana. Tájina néchajisiacarevahini nayehe ena achaneana.

⁷ Puítisera eta néhisira ema Cristo, vaipa tacunachacarehini eta nusamiravahi tamutu eta juca níchaqueneanahi nusiñavirainíhi.

⁸ Tacahe, eta nímairahi, váhinéni étaparacainahini tayehe eta víuchucuiraya. Puiti nínajicapa tamutu eta júcana, taicha tihapapicanuhi eta néhisirayarehi ema Cristo; táichavare vahi tácutihini eta táetaviuchiravahi eta táurivahi eta néhisirahi ema Náquenu Jesucristo. Puíticha tamutupa némitisica. Émachucha nucaemataneacahi.

⁹ Puiti eta návahásirahi éma, vahi étainahini eta táurivahi eta néhisirahi eta viyeherepiana. Ema Viya tijacapanupa táichavenehi eta nucasíñavairahi me Cristo. Taicha namutu ena ticasíñavanahi éma, tijacapacareanaya me Viya.

¹⁰ Nuvarahahi núti tajurucachucha eta nímatirayarehi ema Cristo. Nuvarahavare tacuíja tahapapica eta macaemataneasiranuhi, máimeresirahi eta táetaviuchiravahi eta máitupajijiasiravahi, tacutipa eta máechepusiraipa éma te máecari. Nuvarahavare nucapayarácavivaréni

eta macatajivairahi. Étape eta népenira, nuvarahavare táurichavacayare ena nuchamuriana, tácutihini eta táurichirahavihi eta máepenirahi ema Jesús.

¹¹ Taicha núti nucaunevahi eta néchepusiraya núti apanava te nécarí.

Yátupiya eta vicaratasiravaya te vivaraha vítujicava viveha eta vícuchihi

¹² Núti vahi nímiyachavaimahi tamutihini nítaucha eta nítujisiravaya. Vuíchaha nítamuturuca. Nímiyanavaichuchasera eta nupamisiravahi, nuvarairahi nucurisamurechayare ema Cristo te tamutu, taicha eta tacahehi eta máichuiranuhi néhisirayare.

¹³ Nuparapenaveana, yátupiquenehi vuíchaha támutu nuicapayayarahini. Nuvarahaipasera némitisicayare tamutu eta nunaquiruana. Tásiha, nétumechavainapa eta nítauchiraya tamutu eta mavarahaqueneanahi níchaqueneanayarehi.

¹⁴ Nupamicavahi taicha ichape eta nuvarairahi nucurisamurechahini ema Viya, nuvehahini eta nícuchihi mayehe. Taicha eta tacahehi eta máichuirahavihi, mavarairahi tíjaracahavi eta víurujiasirahi ema Jesucristo.

¹⁵ Tacaheyarehi eta epanerechirayare éti. Ecutinuyarehi emutu eti échemachanaripahi eta juca véhiruhi. Te vuíchaha ecaicutiarahini eta juca, németeaca tímitucaheyare ema Viya.

¹⁶ Jéhesare, yátupina vímiyanava véhica tamutu eta vímitucasivanahi.

¹⁷ Nuparapenaveana, nuvaraha yátupina ácutinu núti eta núrivahi eta nítaresira, éhícaréni eta náurivahi ena apamuriana téchemachanaripa.

¹⁸ Ichapemurihi eta nutuparasirahehi tayehe eta juca. Puiti eta nápechirahehi numetacahehi, níyahasamurehi taicha nararihichaha ena vuíchaha náimatiequeneha eta tacayemaquenehi eta máepenirahi ema Cristo te crusu. Eta nacatichirahi, vahi navaraha nasamararaca te véchajisiha.

¹⁹ Ena nánisami témitiequeneanayare taicha tétavicava eta tavayuasiravacahi eta najamurachaqueneana. Nacasamurechucha eta tájiparacana te juca apaquehe. Tisiñavavaicanahi, tivapinavanahi eta náichirahi eta tamauriqueneana titsirihacareana.

²⁰ Vítisera tachanerahavihi eta anuma. Eta tacahe, vicunevaipa eta vicuchapirahi ema Viáquenu Jesucristo ticatiurahiquene, másihairaya te anuma.

²¹ Máitsivachainapa éma eta juca viáquehesami. Apanainapa eta táimahiya. Tacutinapa eta macáquehéra éma, tapachinaquenehi. Tétavicavainapa eta tatumevayare taicha ichapequene eta máitupajijiasiravahi éma. Maratahahi macapaquecha tamutu.

4

Iúrisamurereacavayare me Viáquenu

¹ Nuparapenaveana némunaruqueneanahi, tétavicavahi eta nuvarairahi nímahahe, taicha nucajamurahehi éti, tétavicavahi eta núrísamurevahi ícha. Puiti nuvaraha ímiyanava túmehéna tayehe eta éhisirahi ema Viáquenu, eti némunaruqueneanahi.

² Nuvarahavare nutuparacavaca ena vichamuriana esu Evodia ésupa esu Síntique: Tachavaini eta náemunasiracaca. Vahi tacunasi eta nacatichiracacahi, taicha naparapejiricacahi te mavahuana ema Viáquenu.

³ Nutuparacavivare, piti némunaruquenehi nucompañeruvihí: Pímicatacavacahini ena nani apinana esenana viparapenaveanahi, taicha éna ichape-murihi eta náimicatasiranuhi tayehe vicametarairuirahi. Náimicatacahi ema

Clemente, énapa ena apamuriana ena nucompañeruanahi. Eta náijareana ena nani ticajuanaripa tayehe eta libro tiama eta víjareana viti vítareruanayare.

⁴ Támutihini sácheana iúrisamurereacavahini me Viáquenu. Nuvaraha nápechahe numetacahe: Iúrisamurereacavahini mayehe.

⁵ Námutuhini ena achaneana náimatihelihini éti eta táetaviuchirahi eta iúriua. Taicha ema Viáquenu, tiánehipa eta máitesiraya.

⁶ Vahi ecueñamava, te tatiarihinapapuca eta íchava. Ecasiñavasera eta eyaseasira ema Viya te eyujarasirana. Ehasulupayachavare tayehe jácani májjararuheanahi.

⁷ Jéhesare, ema Viya macaepahayare eta jácani ecatisamurevana eta juca májjarasiraheyarehi táurivayare eta esamureana étape eta epanereruana, táichavene eta iúrujasirahi ema Jesucristo. Eta macurisamurechirahavihi ema Viya, tévaticavahi eta tacachuriasirahi eta nacurisamurechira nácani achaneana.

Epanerechayare eta táuriqueneana

⁸ Títecapa, nuparapenaveana, epanerechinavayare tayehe tamutu eta yátupiqueneana, tayehe tamutu eta típicauchacareana, tayehe tamutu eta itauravaya tacuija taviuchahe, tayehe tamutu eta ticatajicaheyare eta íchirahi eta táuriqueneana. Epanerechayareva tayehe tamutu eta ecurisamurechirahi ema Viya, tayehevare tamutu eta ticunachacareana. Ecasamure tamutu jácani táuriqueneana apaesa ticunachacareyare tamutu eta íchaqueneanaya.

⁹ Ímiyanava éhica eta nímiturapiana. Ítauchayare eta numetarapianahi esamarararuanahi. Ácutinu eta níchaqueneanahi ímahaqueneanahi. Ítauchaya eta juca, tásiha ema Viya, tamutuínapa tíjaracaheyare eta táurivaya eta epanereruana éti.

Tinaquiucavanapa ena machamuriana ema Pablo, náimicatasiraya éma

¹⁰ Tétavicava eta núrissamurevahi eta mayehe ema Viáquenu eta májjarasirahehi éma eta epanerechiranuhi tayehe eta íapechavahi ímiámareca eta nuyehe. Németeaca váhiquene émitisicanuhini. Étachucha eta emaitujisiravanehi ímiámareca eta ímicatarapi eta nuyehe, tapanumavahi.

¹¹ Vahi táichavenénahíni jácani nuvayuchiravainahini eta nucamunuirava. Núrissamuréichucha, nítucasamíhi nútí eta nítátiravahi tayehe jácani tatiarihiquenehi.

¹² Nítucahi eta nítaresirahi puiti eta nupaurévahi. Nítucahivare te nucaimahaqueneíchaha. Nítucahi eta nucamíchirahi eta nátajivanahi, te nuncapuca, váhipuca; te nucaimahaquenehipuca, te tájinahivarepuca nímahaqueneénahini.

¹³ Nútí nuratahahi nucamicha tamutu, taicha ema Cristo éma tétumechanuhi.

¹⁴ Tájinasera táichavahini eta ímicatasiranuhi tayehe eta ímiámarreruhi, evarairahi ímerecanu eta émunasiranuhi, ítátiranuhi eta numaitujisiravahi nutanuchavahini.

¹⁵⁻¹⁶ Eti nuchamuriana, nucunachahe eta némechirahehi eta ímicatasiranuhi eta nupaisirahi eta nucametarairuirahi te apanana avasareana. Tayanapane epanumavahinéní epanava éhica ema Viáquenu, camurianahi eta ímiámaresinanuhi eta enaquirvana te náviharipa te Tesalónica. Énerichuware, te núchucapa te provincia Macedonia, éti íapechavahi ímiámareca eta enaquirvana. Jéhevare nájina apamurianainahini nacutihelihini eta ímicatasiranuhi.

¹⁷ Váhisera étainahini jácani nuvarairahini iápechavahini ímiámareca eta nuyehe eta enaquiruvana. Nuvarahahi núminecapaequenehahe: Eta ímicataraivahi te juca apaquehe, puiti te anuma ánaqui táurujisiavahi eta enaquiruvana te mamirahu ema Viya.

¹⁸ Nuti ichapemuripa eta nujacpirahi eta enaquiruvana, eta mámaque-nepahi ema Epafrodito. ¡Tétavicavahi eta ecajiraivahi! Eta ímiámarreruana, tacutirinehi eta inciensoinahini, eta táijiyevahi te mamirahu ema Viya. Tivapinava ema Viáquenu eta majacpirahi. Tacutihivare eta nanaquisira eta námavahuana te Templo.

¹⁹ Máimahahéine ema Viya. Éma, máitsivachayare tamutu eta enaquiruvanahi. Tíjaracaheyare te jácani ecamunuiravana. Émaríhi téchayarehi ema Viáquenu Jesucristo. Éma, tétavicavahi eta tamutuirá marataha.

²⁰ ¡Máíhecuaráquireyare eta vicunachiraya ema Tata Vicaiyaquenehi, tistarahi eta vijirauchira éma! Amén.

Eta táíhecuaráqui eta macartane ema Pablo

²¹ Eta iúrujasiracacahi mayehe ema Viáquenu Jesucristo, nuvaraha échajisinanuini namutu ena machanerani ema Viya, vichamurianahi eta véhisirahi ema Viáquenu Jesucristo. Téchajicaheanahi éti ena nucompañeruana, ena nucachanequeneanahi ani te juca.

²² Téchajicaheanahivare namutu ena vichamuriana machanerana ema Viya, ena ticvasanahi ani te juca. Nararihivare ena tíávihanahi te mayehe palacio ema Emperador, énarichuvare vichamuriana. Téchajicaheanahivare éna apana.

²³ Nuyaseuchaeparaca emutu éti me Viáquenu Jesucristo táetavicavahini eta iúricarevaya máicha.

Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te avasare Colosas, ticajare COLOSENSES

¹⁻² Nuti Pablo, mayehenuhi apóstole ema Jesucristo, taicha manerejiru-nuichuhi ema Tata Vicaiyaquene, navarairahi nímitucaya eta náechajiriruva. Puiti nucajurehe eta juca carta eyehe eti nuchamuriana ecavasanahi tayehe eta avasare Colosas, taicha éti machaneraheripa ema Viya, tíurihi eta éhisirahi ema Jesucristo. Téchajicahe ema vichamuri Timoteo.

Nuvaraha macatajicahehini ichape ema Tata Vicaiyaquene, máijaracahini eta táurivaina eta epanereruana.

EMA PABLO MASAMAIRICA ETA NÁEHISIRAHÍ EMA JESÚS ENA TICAVASANAHÍ TE AVASARE COLOSAS

³⁻⁸ Puiti titecapauchahaviripa ema vémunaruquene Epafras, ema vichamurihi eta vicametarairuirahi. Éma, ichape eta macunachacarevahi. Tíurihi eta máitachirahi tamutu eta macavanarairahi ema Cristo, máimitusirahehi yátupi eta máimiturapiana ema Viáquenu. Éma Epafras tíametacahavihi eta ícharacavahi, eta éhisiraipa ema Jesucristo, étapa eta émunasiracacairahi emutu éti, émunasirahivare ena iúmurivanahi te apana avasareana, machaneranahivare ema Viya, taicha ecuchapavainapa eta esiapiraya tayehe eta mávasa anuma. Viúrisamurevahi eta visamairisirahi eyehe, vihasulupayachaparacahi ema Viya Macaiyaquene ema Viáquenu Jesucristo. Tamutu sácheana te viyujarasirana, viyaseuchahehi me Viya. Ichape eta viúrisamurevahi eta táurivahi esama eta macametarairuirahi ema Epafras eta yátupiquene máechajiriruva ema Viya, etupiruvahi esupa eta ímitucasivahi, te esamainapa eta máemunasirahéhi éti apanava ema Viya. Étarichuhi eta juca vímiturapihi nayehe ena apamuriana achaneana ticavasanahi te apanana avasareana. Natiarhipahi ena tisuapanapahi eta vímiturapiana.

EMA PABLO MAYASEUCHAVACA TE MAYUJARASIRANA ENA MACHAMURIANA

⁹ Eta tacahe, te visamairiricahepa, viyaseuchaheparaca me Viya tamutu te viyujarasirana. Viyaseuchahehi máijaracahéni eta ítusraina, ímatiraina yatupina eta mapanereruhi ema Viya. Máijaracahéivaréni eta échema-raivainahini, eacutiarayare eta máechajiriruvana, máichavenénahini ema Espíritu Santo.

¹⁰ Vítí viyaseacahi ema Viya tacuijahini etapiravaina te mamirahu taicha eti machanerahehi éma, ítauchahini tamutu eta ecaurisamurechirayare éma. Táurihini eta ecaemataneasirahi, támutuhini ítaparaha eta táuriqueneana. Íápajucavapáipahivaréni eta ímatirayare éma.

¹¹ Énerichuvare viyaseacahi ema Viya máijaracahéni eta ichapequene máitupajijiásirava apaesa ecamichahini tamutu eta ecatajivairana, ácayehéni paciencia muraca, iúrisamurereacavachuchaini.

¹² Éhasulupayachahini ema Tata Vicaiyaquene eta máichuirahéni éti apanava, mavarairahi tíjaracahivare vimutu eta tajarahiquene vícuchianahi viti machaneranahi éma.

Éma Viya mavaraha ticuchucuhaviyare

¹³ Éma Viya ticatiuchahaviripa mayehe éma Váinaraji ticaratacavinihi. Téquecaviripasera véhicayarehi éma Machicha Jesucristo máemunaruquenehi. Vaipa véhicaimahi eta nayeherepiana ena timapicumareana. Émapa téchahavihi puiti. Viávacuhaipa eta mavanairipiana.

¹⁴ Taicha éma Viáquenu Jesucristo tépenahi te crusu eta macaepahairaya eta vipeaturana, viúchucuhapahi máicha.

Éma Jesucristo, éma tinacuchahi tamutu. Émarichuvare téchahi puiti.

¹⁵ Yátupi máimahasíhi éma Tata Vicaiyaquene. Émasera éma Jesucristo tévavicavahi eta macavasirahi éma Maiya, émapa tímimaticahavihi eta máurivahi éma Maiya. Éma, ichapequenepanahi Aquenuca. Éma, téchahi tamutu.

¹⁶ Éma, mavanahihi me Maiya eta máepiyasirahi tamutu eta vímahaqueneanahi puiti: te anuma, émapa te juca apaquehe, émapa tamutu eta vimaratahaqueneanapa vímaha. Ticavacureanahivare máicha ena ángeleana. Nararihi ena majupahaqueneanahi te machacaya, émapa ena túparairucanahi, émapa ena apamuriana tijacapanahi eta vanairipi nayehe ena majupahanahi, émapa ena apamuriana ángeleana masuntarunanahi. Máepiyacahi tamutu, máitachiraripa tamutu eta mapanereruanahi.

¹⁷ Éma Cristo manasiqueneripa acane te tamirahuichaha eta táepanirávayarehi tamutu. Puíticha éma téchahi tamutu.

¹⁸ Énerichuvare éma téchahavihi vimutu viti véhicanahi éma, taicha machichaquenehviripa. Éma, vínapuaraquihi viti véhicanahi, taicha éma tinacuchahi eta juca arairuhi véhiruhi. Énerichuhivare maratatahi ticaechepucava te máecari, éne tacaheyare eta macaechepusirahaviyare víti apanavare. Puíticha, éma téjacahi tayehe eta mávacurehi aquenucairahi. Ichapequeneya eta vipacuchira vimutu.

¹⁹ Taicha éma Viya máíjaracapa éma Machicha macutiyarehi eta masantuvahi, émapa eta máurivahi, émapa eta máitupajijiasiravahi.

²⁰ Éta mapanereruhi éma Viya eta mavanésirahi éma Machicha te juca apaquehe, tépenayare te crusu taicha máetupiricayarehi tamutu eta juca apaquehe pecatupaire, émapa tamutu eta anuma. Macaepahayarehiva eta majarareruquenehi éma Satanás émapa éma Adán. Tichavayarehi tiuri tamutu.

Éta máepenirahi éma Jesucristo, mavacharecahi eta mámirahaviyare mayehe éma Maiya

²¹ Étiripa eti, cape juca íásinequenehi ecatianacainihi éma Viya. Vahi táurihini eta epanereruana, taicha eta íchirahi eta tamauriqueneanahi. Íávamirahuinihi epauchahini éma Viya. Epicainihi éma. Émasera mavarahahi macamitiasinaheyare eta ecatianasirainihi.

²² Éta tacahehi eta máimitesirahi éma Jesucristo te juca apaquehe. Tépenahi te crusu táichavenehi eta macaepahairayare eta etapiravanainihi, masantochiraheyareva, apaesa tacuijapa ecuavamirahu te jena sácheyare eta mámirahayare te mamirahu éma Viya.

²³ Tacahe, nuvaraha étumechavayarechucha, ímianava táuri eta éhisirahi. Vahi ecúyacujíquenehava eta ecuchapirahi eta iúchucuiraya. Vahi ecuemepurureca eta esuapiraipahi eta máechajiriruva éma Viya. Tévavicavahi

tasuapacarevahi nayehe namutu ena achaneana te juca apaquehe, nájina tanerejiruina. Nútiripa nuti Pablo vanairucaquenenuhi, étarichuhivare tac-
ahehi eta nucametarairuirahi.

Ena Pablo matuparahaichuhi máechapajiricayare ena máumurivana

²⁴ Puiti nútí, vahi nucatiequenehavahini eta nucatajivairahi táichavenehi eta nucatuparahairahi nucametarairu eyehe eti apavasanana. Ena Viáquenu Jesucristo, ichape eta macatajivairahi te crusu víchavenehi víti. Tatiarihichahasera eta macatajivairayarehi. Eta juca nucatajivairahi, tácutihini eta macatajivairahi éma. Nucatajivanumapaipahi íchavenehi eti machichanaveana, eti vichamurianahi.

²⁵ Taicha tituparacanuhi ema Viya eta néchapajiricaheyarehi emutu éti. Nuvanecasivahi mayehe eta nímitusiraheyare tamutu eta máechajiriruvana.

²⁶ Nímimatichaheyare tamutu eta juca mapaneruanahi ema Viya, tayumurevainihi eta táitaresirahi acane, énaripa ena viáchucanaveanaini vahi támutihini náimatihini. Púitiserá ema Viya tímimaticahaviripa viti machaneranahi tamutu eta júcana.

²⁷ Tétavicavahi táamicarevahi maicha ema Viya eta máimimatichirahavihi eta juca tayumurevainihi ímitucasivahi puiti eti apavasananahi. Eta juca tayumurevainihi, émahí ema Jesucristo títecapauchaheripahi tiávahácheripa. Puiti, ejacacarépahí me Viya. Ecunevainapa maicha ema Jesucristo eta esiapiraya te mávasa anuma.

²⁸ Eta tacahe, émaquenehi ema Cristo véchajisihahi víti te vicametarairu. Étaripa te viconsejareca, te vímiturecapahi nayehe namutu nácani achaneana vicaimunaqueneanapahi, émarichuhi véchejisihahi, apaesa nácaicutiaraini tamutu eta mapaneruanahi ema Viya, náechemarahivacahini táicha. Vi-
varaha ítamuturucaripahini te táitecapapa eta sache vímeresiraheyare te mamirahu ema Cristo.

²⁹ Eta tacahe, nupamicavahi nútí eta nucaemataneasirahi ema Viáquenu. Émaquenehi tétumechanuhi eta nuratahairahi tamutu eta nímitusirahehi emutu eti nuchamurianahi.

2

Ena Pablo tímereuchava eta máemunasiravacahi ena machamuriana

¹ Nútí ichapemurihi eta néñamiravahi eyehe eti numaimatiqueneanarichaha, énapa ena apamuriana vichamurianahivare ticavasanahi te Laodicea.

² Nuvarahahi ámutuhini étumechavahini te esamureana. Evapinavahini te iúrujisiravana taicha eta émunasiracacahi. Nuvaraha yátupina ímati ema Cristo, émahí araenumahi vanairucahi me Viya. Nuvarahahivare ímatiequenehayare eta mapanereruana ema Viya apaesa ichapenahini eta ecasiñairavainahini eta mayehe.

³ Nájina mácuti ema Cristo, ema tíjaracahavihi tamutu eta vítupajijasiravanahi, véchemarahivacahi máicha.

⁴ Eta tacahe, nutuparacahecha: Vahi ecuisapava nahapapicahe ena tiyururahiana.

⁵ Tayanapane viyerehicacahi, vahi vímahacacahini, núrísamurehisera ticutirínehí étainahini návihahini eta ara eyehe, néchirahi eta tamajinairahi íchiravainahini, yátupihí esuapa eta éhisirahi ema Cristo.

Vímiyanava tauri eta véhisirahi ema Jesucristo

⁶ Tásiha puiti, tauri eta iávahásiraina ema Viáquenu Jesucristo. Ímiyanava eta ítauchira eta íjarasiravahi éhica éma.

⁷ Etupihayare muraca mayehe ema Cristo, apaesa tápajucavapaipa eta ítupajjiasiravaina, ímatirainapáipaicha éma. Émuracachavayare eta éhisirahi éma, yátupina esuapa taicha tacahehi eta ímitucasivanahi. Vahi ecucaina-ji-ruva eta ehasulupayachiraya ema Viya.

⁸ Échapavayaresera, taicha nararihi ena navarahayare tiyurucaheana, navarairaya éhica eta napanereruana. Vahi ecuisapava námejecapavachaha éna. Machu náimitucahe eta nayeherepiana, náehiruhi ena náinapureanaini ticayeherepianahi tásihaquenechucha te napanereruana éna. Eta júcana, tájina tavehapica apaesainahini eta máimiturapiana ema Cristo. Vahi ecusuapa ena nani.

⁹ Ema Viáquenu Jesucristo, jéhevare éma, yátupiquenehi santo. Taicha ticuticacana-ahi ema Tata Vicaiyaquene eta nasantuvanahi éna. Ticuticacana-hivare eta náurivahi, étapa eta náitupajjiasiravahi.

¹⁰ Éti apanavare, puiti eta iávahásiraripa ema Cristo, tisantuchahevaca-ripahi éma. Tájinapa ácamunuhini puiti eta iúchucuirapa. Taicha ema Viáquenu, téchavacahi ena ángeleana. Éma, túmepanahi nayehe ena éreanana.

¹¹ Ema Cristo, timarcachaheripa eta iáchanavana puiti eta iávahásiraipa éma. Ticamitiscacheripahi eta tajamurachaqueneanainihini eta iáquehe tavarahaqueneanainihini icha eta tauriqueneanahi. Jéhevarequene, eta emarçahi éti, ecachuricahi eta nacamarçairahi ena israelítana náechatisirahi eta náquehe.

¹²⁻¹³ Éti, cape juca iásinequenehi, vahi ímatihini ema Cristo. Vuíchaha ecama-rcahini mayehe. Tímicutijiricavahi tápenaquenénahini eta iáchanavana taicha eta epecaturanahi. Tímicutijiricavahi épenaquenénahini, eacera-sihini tacutihi eta macacarasirahi ema Cristo te máecari. Puítisera, eta eca-siñairaripa ema Jesucristo, ema Viya macaitaresinaheripa eta iáchanavana. Puiti ticutiripa échepurénaripahini éti, tacutiripahi eta máechepusirahi ema Cristo, maicha ema Maiya. Eta ecaicachasiraripa eta mayehé ema Cristo, táicutiarahi eta juca macaechepusiraripa eta iáchanavana.

¹⁴ Taicha ema Viya, eta máimairahi eta macatajivairahi ema Machicha máepenirahi te crusu, tiperdonachahaviripa eta vipecaturana. Énerichuvare macaepaharipa eta vitapiravana tímicuñachaviyarehini. Puiti matapirava-rehaviripa eta máimairahavihini éma.

¹⁵ Eta máepenirahi ema Jesús tayehe eta crusu, máitahacavacaripa ema Váinaraji énapa ena machanerana éreanana. Tájinarinehi natumevainahini eta mayehe. Puiti táquijicavacahi éna, te vípiaraca te máijare ema Jesús. Vaipa tipauchahavi animahi.

Ema Pablo mavanecavaca vahi nacusuapa ena tiyurarahiana

¹⁶ Puiti nutuparacahe: Vahi ecusuapavaca ena navarahahi éhica eta nayeherepiana, apanapanenejiqueneana, nácani vahi tísapaheanaimahi enica eta apamuriana tinicacareana. Váhivare ecusuapavaca te ticamesajiri-caheanahipuca epicaucha eta napiestarana. Étaripa eta ecaematanerana te aracheruana caje, navarahaya epicaucha. Étaripa eta sache sávarumuhua-na, navarahayareva epicaucha.

17 Tamutu eta júcana, vaipa tásuapacare taicha náchucarapianachucha éna. Étasera eta juca máechajiriruvanahi ema Cristo, jéhevare eta yátupique-
neanahi. Tisuapacareanahi.

18 Eta tacahe, vahi ecusuapa ena nácani navaraha típcararecaheana, te náichahepuca: “Vahi tiuri eta juca éhiruhi”. Váhivare ecusuapavaca, te ticame-
sajiricaheanahipuca éstacava, etapa eta ejirauchirainaji ecasiñairainaji ena
ángeleana. Éna náimijachahi tacarichu eta ejacapacareya me Viya taicha eta
juca. Ena nani, ticasíñavavaicanahi taicha tímijachavanaripahi máechaji-
cavacahiji ema Viya. Vaipa navaraha nacainajiru eta navayucasivanahi.
Tamutu eta juca tímereuchavacahi éna, máehicarahanahi ema Cristo.

19 Vítisera vimutu viti apanapanenejiquenehavianahi véhicanahi ema Je-
sucristo. Eta viúrujasiraipahi éma, vaipa apaimamajihavinahini máicha.
Tímicutijiricavaipahi mácani achane máitucahi eta macajurusirahi ena
machichanaveana. Náurujiacahi namutu nácani machinanaveana, machine-
nana, mámarinaveanapuca. Émanarichuhisera ema téchahi. Ene vicahehi
viti véhicanahi ema Cristo. Macarichu ema téchahavihi. Vímicatajiricacahi
vicatiujiricacahivare vimutu maicha ema Viya.

20-22 Puiti, eta éhisiraipa ema Cristo tímicajacheripa eta éhisirainihi eta
nayaherepiana ena acháneana tamauriqueneana. Tacahe, vaipa ecusuapa
ena ticamesajiricaheanahi te navanecahepuca: “Éhichavi eta viyehere-
piana tayehe eta vinisiraya, apaesa eجانucare eta me Viya”. Machu
navayuacahe ena nani, taicha tamutu eta juca nayeherepianahi, tájina vahi
étaparacaina tayehe eta viyapiraina te anuma. Eta juca nayeherepianahi,
tásihaqueneanachucha te nachuti ena náchucanaveanaini.

23 Eta juca nayeherepiana cútirinehi yátupiquenénahini tásihaquenénahini
eta me Viya. Tásihasera vahi táimanaca. Ichape tayerehi eta máechajiriruvana.
Ena nani, tímijachavanahi nacurisamurechahi ema Viya. Tépiyacavana-
ripahi mánsuanahi eta náichirahi eta muraca penitencia. Téstacavanapa
nájararecaripa eta naeche tayehe eta tacatiquene. Tamapurujihisera eta
náichirahi, náviraichuhi náichahi eta tajamuraraivahi eta náqueheana.

3

*Tihapasamurerecahaviyare eta vivarairayare véhica eta máurivahi ema
Cristo*

1-2 Púitiserá arairupa eta ítaresira maicha ema Cristo. Étainapa tihapasamu-
rerecaheyare eta máurivahi éma etapa eta ítecapauchira éma tayehe eta anuma
máejasihahi te mavauere ema Maiya. Vaipa étaimahi tihapasamurerecaheyare
eta eyeherepianainihi tamauriqueneanaini.

3 Taicha íjararuvaipa eta ínajisirayare eta júcana. Puiti ticaitarecaheripa
éma táichavenehi eta iávahásiraipa ema Jesucristo. Iúricahi puiti. Vuíchahasera
ímahahini tamutu eta táetaviuchiraya eta iúricacarevaya.

4 Téhesera te machava ema Viáquenu Jesucristo, máitsivachainapa eta
iáqueheanayare, tajarahiqueneanayare. Tásiha, ecachanenapaipa éma.
Tétavicavaya eta viúricacarevaya vimutu máicha.

Vínajicayare eta viyeherepini eta viásinequene

⁵ Tásiha puiti, ínjacainapa eta eyeherepianaini tamauriqueneanahi. Nacuijapa nacuveha esu apana esena. Vaipa ecupanerecha eta panerericana tamauriqueneana. Vaipa ecujamuracha icha eta tamauriqueneanahi. Vaipa tihapapiricahemahi eta ecaimahaquenéraina, taicha ena titanucanahi eta juca, nacutihi nácani ticasiñarajiana.

⁶ Ena masuapajirairahana, náichahi tamutu eta juca tamauriqueneana. Éta pa tímicuñacayarehi éna, taicha táimiyusemacaichucha ema Viya.

⁷ Éti apanavare étainichuhivare iávacuhainihi cape juca iásinequenehi.

⁸ Puítisera ínjaca tamutu eta júcana: esemarajivana, ecatianaraivana, evainarajivana, iúmeharaivana, éta pa eta táíñemahiqueneana eta échajiriruvana.

⁹ Vahi ecuépíyaequenehacáca. Ímereuchava yátupina eta ínjásirahi tamutu eta eyeherepianaini cape juca ítaresirainihi.

¹⁰ Puíticha, amairiharipahi arairupa eta juca ítaresirahi, machichaheripa ema Viya. Tajurucapaipaini eta ecutirayare éma eta masantuvahi éta pa eta máurivahi éma.

¹¹ Tayanapane apavasananjihavihi viti véhicanahi ema Viáquenu, émasera tihetamurichahaviripa viti israelítana, étipa eti apavasanana, éna pa ena máicachasianana. Te mamirahu ema Cristo, vaipa apavasananjihavinahini, étanarinepa eta vímahi maicha éma. Tayanapane tájina emarcainahini te iáqueheana. Váhisera ticachuriacaheanaimahi ena ticamarcanahi. Tayanapanavare ecaquenuhipuca. Váhivaresera vicachuriacahemahi viti libreanahi. Ema Cristo tiávahácahavihi vimutu.

Vicaravahuinapa tíuriyare eta vítaresira

¹² Ema Viya tétavicavahi eta máemunasirahehi. Eta tacahe, tinerejicahehi eti machaneranyarehi éma, ecutipai pa éma, eta masantuvahi. Eta tacahe, puiti étijiváinapa ecaravahuyare eta táurivayare eta ítaresirayare. Étaviuchayare eta e japanuraivaya, émunarahiyareva. Ímerecaya eta emansuvayare. Ecamicha tamutu.

¹³ Te tatiarihinapuca eta nájecapiravaina ena echamuriana eta eyehe, vahi ecucaticha, ácayehvare paciencia. Eperdonachacayare, ecutiya re ema Cristo eta maperdonachirahehi éti.

¹⁴ Tamutu eta juca numetaruheanahi, ítauchayare. Énerichuvare tiápajucavayare eta émunaraivayare. Taicha te vémunajiricacahi, tétavicavayarehi eta viúricarevaya eta viúrujíásiracacahi.

¹⁵ Vahi ecuemepurureca eta iúrivahi maicha ema Cristo. Ísapavavare mayehe ema Cristo macanaracahe tamutu eta epanereruana. Taicha tacahéhi eta máichuirahéhi, mavarahahi étanayaréichuhi eta epanereruana eta iúrujíasiracacahi. Ehasulupayachahivaréni tamutu sácheana.

¹⁶ Étaviuchahini eta iúnasiráina te esamureana eta máéchajiriruvana ema Cristo. Étumechacacahini eta ímitusiracacaya eta échemaráivayare. Evapinavahini te esamureana eta ejiraira te iúrujíasiravana. Ejirayare eta majirihahuana ema Viya, eta ehasulupayachirayarehi éma.

¹⁷ Tamutu jácani ecaematanerana, échajiririsiravana, ímereuchava eta machaneraheirahi ema Viáquenu Jesucristo, iámirapaipa eta máijare. Te tamutu eta jácani íchararacavana, ehasulupayachayarehi ema Tata Vicaiyaquene.

Vímerecyare eta viúri va nayehe ena vichamuriana

18 Étiripa eti esenana ecaimaqueneanaripahi, epicauchayarehi ena ímanaveana. Esuapajirahiyare eta nayehe, taicha etuparahahi eta éhisirahi ema Viáquenu.

19 Éti apanavare eti náimanaveanahi, émunacayare ena eyenana. Vahi ecuímipananajica éna.

20 Éti apanava eti amaperuana, esuapayare ena ticachichaheana, esamarasinavaya te jácani náechajisiraheana. Te ítaucha eta juca, ecurisamurechayare ema Viya.

21 Énerichuva eti náiyana, vahi ecuímiyusémaraca ena echichanaveana apaesa vahi nacui puñacava eta eyehe.

22 Étiripa eti ecaquenurecanahi, esuapajirahiyare nayehe ena íaquenuanahi. Ítauchayare eta navanairipianahi. Tátupiruva te esamureana eta ecaematanerana. Vahi tácarichuimahi ítaurahiyare te natiaríhi te echacaya ena íaquenuanahi. Te nájinahipuca, tacutiyarerichu eta ecaematanerayare. Taicha ema Viya tímararacahehi. Éma epicauchayarehi.

23 Evapinavayare icha eta evanecasivanahi nayehe ena íaquenuana, táimicutijiricavahi émainahini ecaemataneaca ema Viáquenu.

24 Taicha eti mamusurahehivare ema Cristo, ema tíapajucavahi íaquenupanahi. Écharichuhi éti eta tatiaríhírahí eta ícuchihi íjaracasiyarehi eta mayehe.

25 Énasea ena téjecapavanapuca, máimararacahi ema Viya eta náejecapiravanahi. Étáinapa tímicuñacayarehi. Nájina mamunanequeneanaimahi.

4

1 Éti apanavare eti náquenuanahi ena músuana, tíuríyareva eta ecavanairipiraya, vahi ecuímipananajicavaca. Ítauchayare íjaraca eta nacamunuqueneanahi. Échavayare éti apanavare eta máimararasirahehi ema Viya, émahí íaquenuquenehi.

Eta téqueneha matuparasirahavihi ema Pablo viti véhicanahi ema Viáquenu

2 Puiti emutu éti, étumechavachucha eta eyujarasirahi eta me Viya. Vahi ecuyacujihini. Énerichuvare ehasulupayachaparacayare tamutu me Viya.

3 Énerichuvare ímicatacavahi eyujarauchahavi, apaesa vítujicavapaini víuchucuha, vímíyanavapaini vímímatichahini ena achaneana eta juca tayumururevainíhi mayehe ema Cristo. Étavenehi puiti présunuhi táicha.

4 Nécatíacahecha ímicatacanu eyujarauchanu apaesa nítujicava nucame-taríru, taicha nutuparahaichuhi me Viya.

5-6 Táuri eta ítaresiraina nayehe ena máehicarahanarichaha ema Jesús. Tátupiruva tauri eta échajirisiravana, tapícauchacarehi. Táurivare eta ejicapiraina te natiaríhinapuca nácani tíyaserecaheanayare. Ecamapura-vachaha puiti juca sácheana eta ímitusiravacahi.

Eta táichecuaraqui eta máechajiriruva ema Pablo

7 Máimahaherinesera ema vémunaruquenehi vichamuri Tíquico. Éma, tímetacahéyare tamutu eta nícharacavahi núti taicha éma nucachanehi eta te juca návihahi. Tétavícaavahi eta máímicatasiranuhi eta vícaemataneasirahi me Viáquenu.

⁸ Eta tacahe, névatacahi máiteca eta ara eyehe. Éma timetacaheyare eta víchararacavahi. Énerichuvare tétumechaheyare éti apanava.

⁹ Énerichuhivare névatacahi ema Onésimo némunarquenehivare. Éma, tiásihahi eta ara eyehe. Puiti émarichuhi vichamurihi eta te juca. Tétavicavahi eta máitauravahi eta macaemataneasirahi ema Viáquenu. Ena nani apinana, éna títametacaheanayare eta víchararacavahi víti te juca viávihahi.

¹⁰ Téchajicahe ema Aristarco, ema nucutiquenahi eta nucaeratairahi. Téchajicahevare ema Marcos, ema macheji ema Bernabé. Éti écharipa eta máitesirayare eta ara eyehe ema Marcos. Te máitecapauchahepa, tíuriyare eta ejacapirayare éma.

¹¹ Énerichuvare téchajicahe ema Jesús Justo. Nacarichuhi ena nani mapanana nujaneananahi israelítana tímicatanuanahi. Nacachuricahi ena apamuriana nujaneanana vichamurianahi. Ichape eta náimicatasiranuhi eta vicametarairuirahi eta máéchajiriruvana ema Viya. Ichape eta nacurisamurechiranuhi éna.

¹² Téchajicahevare ema Epafras, ema eyehe pastor. Ema maca, yátupi-quenehi mavanara ema Jesucristo. Tétavicavahi eta máecharairisirahehi éti te mayujarasirana, mavarairahi ímiyanavahini étumechava yátupinahini ítauchahini eta mavarahaqueneana ema Viya.

¹³ Ichapemurihi eta nímararasirahi núti ema Epafras eta máecharairisiráhehi éti, énapa ena ticavasanahi te avasareana Laodicea étapa Hierápolis.

¹⁴ Énerichuhivare téchajicahe ema médico Lucas, ema vémunaruquenehivare. Téchajicahevare ema Demas.

¹⁵⁻¹⁶ Tacahe, te támutupa eta échajicuirayare eta juca nucartane, ímiamarecaya nayehe ena apamuriana vichamurianahi ticavasanahi te avasare Laodicea. Nuvarahavare échajisinanuini éna. Échajisinanuvare ema Nínfas, énapa namutu ena tíurujicavarahianahi te mapena. Nímiamarécahivareséa eta nucartane nayeheyare namutu éna. Te táitecapauchahe, échajicuhayarevare éti apanava.

¹⁷ Piti apanavare piti Arquipo, nutuparacaviyare: Pítauchayare tamutu eta juca pématanerepianahi, taicha eta pituparahahi me Viáquenu.

¹⁸ Nuti Pablo nútiquenepa nájucha eta juca táichecuarahuihi eta nucartane tayehe eta némechajirisirahehi. Nutuparacahe vahi ecuemitisicanu te eyujasirana. Eyaseasinanu eta núchucuirávanéna.

Nuyaseuchaheparaca me Viáquenu Jesucristo, táetaviuchahini eta iúricarevaya máicha.

Tamutupa eta juca néchajiriruvahi e yehe.

Eta macartane ema Apóstole Pablo nayehe ena machamuriana ticavasanahi te avasare Tesalónica, ticajare

1 TESALONISENSES

¹ Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas*, émapa ema Timoteo. Vímiámarecahi eta juca vicartane taicha eta íavahásiraipa ema Tata Vicaiyaquene, táichavene eta éhisiraipa ema Viáquenu Jesucristo. Nuvaraha macatajicahehini ema Tata Vicaiyaquene, émapa ema Viáquenu Jesucristo; náijaracahehini eta táurivaina eta epane-reruana.

Em a Pablo tíurisamure eta máechirahi náimiyániravahi náehisirahi ema Cristo

² Viti vihasulupayachaparaca ema Viya eyehe emutu eti. Tamutu sácheana, te viyujarasirana, viyaseuchahe me Viya.

³ Taicha tamutu sácheana véchariricaheparaca eta ímeresirahi eta esuapirahi éhisirahi ema Viáquenu Jesucristo, éta pa eta epamisiravahi ecaemata-neacahi yátupi táichavene eta émunasirahi éma, éta pa eta ecamichirahi tamutu táichavene eta ecuchapiravahi eta machaviraya. Ema Tata Vicaiyaquene máimaha tamutu eta íchararacavana.

⁴ Nuparapenaveana, éti, máemunaruanaripa ema Viya. Véchahi eta manerejisirahehi éma.

⁵ Taicha te vímitucahepa eta máechajiriruva ema Viya tayehe eta víuchucuiraya, éti etupiruvahi ejacapa eta vimetarairuana taicha ímatihí yátupiquenérahí mayehe ema Viya. Ema Espíritu Santo tinacasamurechahehi eta táurivahi esama eta vímitusirahehi. Ímatihavihí eta mavanesirahavihí ema Viya. Ímahahí vire eta víurivahi eyehe.

⁶ Jéhesare puiti, étijivapa eta épaniravahi éhícahavi eta víurivahi víti, vícutiyare eta máuriva ema Viáquenu. Ecátajivanúmahi íchape taicha eta ejacapirahi eta vimetarapiana. Íúrisamurehí séra maicha ema Espíritu Santo.

⁷ Tacahe, ena apamuriana vichamuriana ticavasanahi te tinapaica eta Macedonia éta pa te Acaya, eta náimairahi eta yátupirahi eta esuapirahi, étaríchuhí náehícahí éna.

⁸ Éti ímisamáhi eta máechajiriruva ema Viya namutu ena achaneana ticavasanahi te Macedonia éta pa te Acaya. Téchacarehí vire te tamutu avasareana te jácáni vítecapihapahí eta juca yátupirahí esuapa ema Viya. Vaipa tácame-sahíni vimetataracavacahíni éna eta esuapajiraívahí éti.

⁹ Timetacahavianapahí vire eta etupiruvairahí ejacapa eta vimetarapiana, éta pa eta ínajísiraipa eta esíñarajíanainí, équesiravarípa eta ecaíjuhérapa yátupi ema Viya. Puítíca tépanavarípa eta ecaemataneasirahí éma. Éma, yátupiquenehí Viya. Yátupiquenehí vire eta masamaraíva.

¹⁰ Éneríchuvare timetacahaviana eta ecuchapirahí eta machaviraya ema Machíca ema Viya másíhairaya te anuma, ema maca Jesús émaríchu ema macaechepucasiquenehí te máecari maicha ema Maíya. Émara tícatiuchahí vire tayehe eta ecuñaraqú náicuchíhi ena masuapajiraírahana.

* **1:1** Ema Silas, eta májarequene Silvano te náechajiriruva ena romanoana.

2

Eta máematanerepihi ema Pablo nayehe ena ticavasanahi te Tesalónica

1-2 Écharichuhi eti nuparapenaveana, tamutu eta náichirahavihi ena achaneana, tímicuñacahavianahi ánaqui te avasare Filipos. Váhiserá vácatsimavahini te vítecapauchahépa ani, vímijanavaríchucha vicametarairu taicha tétumechahávirichucha ema Viya eta vímitusirahehi eta máechajiriruva, camurianahineni ena ticatianacahavianapahi. Váhiserá támapurujihíni eta véjirairahehi. Éti etupiruvahi ejacapa eta vimetarairuanahi.

3 Taicha vahi véjecapavahini eta vímitusirahehi. Váhivare étainahini vipanerechapahini eta tájiparacana tamauriqueneana, váhivare vivayuararquina eta véchajisirapahi.

4 Vítí manerejiruhavihi ema Viya taicha máechahi eta vítauchirayahéhi eta vituparacasivayahéhi mayehe. Eta tacahe, tituparacahavihi muraca víámayare eta máechajiriruva nayehe ena achaneana eta náuchucuiraina. Éta paichuhi eta juca véchajirivanapahi. Vahi étaina vivaraha táememunacahávihini nayehe ena achaneana. Vítauchahi eta mavarahaqueneana ema Viya eta vicurísamurechihahi éma, taicha éma, máimararacahí eta visamureana.

5 Écharichuhi éti eta vicayemaqueneanapahi, vahi vémetserajiricavapahini eyehe. Váhivare étaina vétseraruinapahini vivereacahehíni eta eplatane. Vítipiruvapahi eta vicayemaquenehi te mamirahu ema Viya.

6 Vahi vápanerechahini náetserajicahavíhíni ena achaneana, étiripa, viratahahíni vímerea eta vituparahaquenehi mayehe ema Víáquenu Jesucristo. Váhiserá vávarahahíni vímerecava vácutihíni mácani achane ticamusura.

7 Véchapajirícahehíséra tacutihí eta suéchapajirísira suémunasira súcani esena ena suchichanaveana.

8 Ichape eta vémunasirahehi. Vímitucahehi eta máechajiriruva ema Viya eta íuchucuiraya. Víjaracavahi ichape te visamureana, vivarairahi esupa éti apanava, taicha vémunacahehi.

9 Nuparapenaveana, te vinasiqueneripa eta eyehe, eta vicametarairuirahi eta máechajiriruva ema Viya, ímararacahavirichuhi éti eta vicaematanerahi muraca eta vítátijirísiravahi. Tamutuhi sácheana, yátiana vicaematanehi, taicha vahi vávarahahíni vétsepanáracahéhíni eta vínicaquenerépi.

10 Éti enecapaequenehahi tamutu eta vícharacavahi. Tímararacahávíhivare ema Viya. Vitupiruvahi yátupi eta víurivahi eta eyehe eti vichamurianahi. Tájina naviyahíni nayunaca ena apamuriana achaneana.

11 Énerichuvare échahi eta vétumechirahehi, émanapachuhi viconsejacha vicutihí mácani achane tíuri eta maconsejachira ema machicha.

12 Vécatíacahehi ichape eta íurvaina éti, ímerecaya eta macáchichairaherípa ema Viya, taicha íchuarecasivaípa mayehe eta ecachaneraya éma tayehe eta mávasa te anuma, te táviahíni eta majaraíva.

13 Eta tacahe, vihalupayachaparaca ema Viya eta táurivahi esama eta máechajiriruva vimetarapianahi. Éti, etupiruvahi ejacapa eta vimetasi-rahehi taicha eta esamirahi yátupiquenehi, tásihaquenehi ema Viya. Ímativanehi vahi vipanereruinachucháini víti, émainapucaini mácani apana achane. Eta juca eta tíurichahehi eti esupapanahi.

14 Énerichuvare tiúrihi eta ecamichirahi eta ecatajivairahi nacatianasirahehi ena ejaneanana, ecutihi ena apamuriana vichamuriana ticavasanahi te Judea. Nuparapenaveana, ene nacahehi eta nacatajivairahi naicha ena najaneananarichu israelítana, táichavene eta náehisirahi ema Viáquenu Jesucristo.

15 Ena nani nujaneanana nacapacahi ema Viáquenu Jesucristo nacutihi ena náchucanaveánaini eta nacapasiravacahi apaicape ena profetanaini. Tipanjirichavianavare víti. Ena nani náimiyusemacahi ema Viya. Váhivare nâvaraha nasamahini ena apamuriana achaneana eta máechajiriruva ema Viya.

16 Taicha te vivarahainipa vímitucavaca ena apavasanana apaesa náchucuhahini éna apanava, nacatichavare ena nujaneanana eta vímitucavaca éna. Tíchejimiráuchavianapa. Eta tivichahi, tivayuchavapaichucha eta natapiravana. Ema Viya vaipa macamichahini eta náejecapirávana. Puítisera táitecapáuchainapa eta náicuñaya máicha.

Ena Pablo mavaraha tiápechava máejiravaca ena machamuriana

17 Nuparapenaveana, tayanapane viyerehicacahi puiti juca cájeana, vahi vímahacacahini, tanasihisera vicaimairuhehi te viúquihana. Vivarahaine víjahúchavahini vítecapauchaha vímahahehini.

18 Nútiripa nuti Pablo, ichapemurihineni nuvaraha níteca eta ara eyehe, énapa ena apinana nucompañeroana. Émasera ema Satanás tíchejimiráurucaháwichuchapúca jácani.

19-20 Véñamavahi víti eta eyehe taicha vivarahahi tánasihíni eta iúriya eta machimaparahaeta eta machaviraya ema Viáquenu Jesucristo. Tásiha, víti vicuchapavainapa eta vijacapirayare eta vícuchihi mayehe éma. Viúrisamurénapa víti te jena sache, íchavenehi éti.

3

1-2 Eta tayerevaipahi eta vimaimanasirahehi, tétavicavahi eta véñamiravahi eta eyehe. Vaipa viúrisamurehini. Vivarahaipaicha vecha tájahapuca eta ícharacavahi. Tásiha, vípanerechapa vévataca ema vichamuri Timoteo, máiteca máimahapanáhe. Vinasipa víti vicarichu te Atena. Taicha ema maca Timoteo, émarichuhi mavanara ema Viya, émarichuvare vicutiquenehi eta vicaematanerahi tayehe eta máechajiriruva ema Viáquenu Jesucristo. Nuvanecahi tímecatapanáheyare témuracacháheyare eta esuapajiraivaina,

3 apaesa nacuija nacuchavacuejehava tayehe eta ecatajivairana naicha ena ticatianarahiana. Écharichuhi éti eta vicatajivairaya táichavene eta véhisirahi ema Jesucristo.

4 Váhiserá táramicare eta juca, taicha vimetacahévanehi te vinasiquene-richaha eta eyehe, eta vicatajivairayarehi. Jéhesaréinehi títauchavahi puítiripa, ímaharipahi éti.

5 Eta tacahe, tétavicavahi eta néñamiravahi núti eta eyehe. Vaipa núrisamurehini íchavenehi éti. Tacahe, nuvanecapa ema Timoteo máimahapanáhe te enasirichuhipuca eta éhisirahi ema Jesús. Taicha nímitecauyayahehi máquipaicahehini ema Satanás, támapurujihini eta vicaematanearáipa ema Viya.

6 Puítisera eta machaviraipa ema Timoteo, másihairahi eta ara eyehe, timetacahavipa tájinairahi íchiravainahini eta éhisirahi ema Viáquenu Jesucristo, étapa eta émunasiracacahi. Timetacahavivare eta écharairisiráhívihi

émunasirahavihi víti, evarairahi íjahúchavahini ímahahavi. Viciticacahi eta vivarairahi vímahahe víti.

⁷⁻⁸ Eta tacahe, nuparapenaveana, véchararaháinehi eta visamairirisirahehi eta táurivahi eta éhisirahi ema Viáquenu. Tacamitiacarine eta véñamiravahi. Étumechahavirinehi eta vicatajivairana. Tichavarinehi eta viúrisamureva.

⁹ ¡Ichape eta vihasulupayachirahi ema Viya táichavenehi eta iúrivahi! ¡Tájinarine tácutihini eta viúrisamurevahi mayehe ema Viya, ichavenehi éti!

¹⁰ Tamutu sácheana, yátiana, viyujaracahi mayehe ema Viya, viyaseacahi vítujsirávainahíni viápechava vímahahe. Vímitucahehíni eta apamuriana titucacareana tayehe eta juca véhisirahi ema Jesús. Támutuhini ítuca.

¹¹ Eta tacahe, viyaseacahi ema Tata Vicaiyaquene émapa ema Viáquenu Jesucristo náijaracahavíhíni eta vítujsiráváina víteca véjirapanáhe.

¹² Énerichuvare macajurucahini ichape ema Viya eta émunaravaina nayehe ena echamuriana, énapa ena apamuriana achaneana, tácutihini eta vémunasirahehi víti.

¹³ Máijaracahéni táurivaina eta esamureana tacuija etapiravaina, máepachinachahíni eta iáchanevana apaesa ecurisamurecha ema Tata Vicaiyaquene te jena sácheyare machaviraya ema Viáquenu Jesucristo, máshairaya te anuma, mámirayarepahi ena apamuriana manerejiruanahi.

4

Mavaraha ema Viya táuri eta vítaresiraina

¹ Tiuri puiti, nuparapenaveana, vítuparacahecha muraca te máijare ema Viáquenu Jesucristo. Táuri eta ítaresiraina puiti juca epaisirayare. Te tauri eta ítaresiraina, ecurisamuréchayare ema Viya. Puiti íápajupanaváinapáipa eta iúrivaya.

² Ítucaripahi eta juca ímitucasivanahi viyehe. Étarichuhi vivanecasivanahi mayehe ema Viáquenu Jesucristo.

³ Taicha eta juca mavarahaquenehi ema Viya, tiápajucavayare eta iávahásirahi éma. Vaipa ecuquicha eta pecatuana. Nacuijapa nacuveha súcáni apana esena. Ésuripa esu esena, vahi sucuveha ema apana achane. Énaripa ena echichanaveana, tacuija eta natuhusivaina.

⁴ Nacuchapa eta náitauchiraváina yátupina te mamirahu ema Viya. Emutu éti, yátupina eta émunasiraina ena eyenanaveana. Tauri eta ítaresiraina te epenana.

⁵ Vahi ecucutipa ena ajairana esenamareana. (Éna náichahi eta juca taicha eta namaimatiráhi ema Viya.)

⁶ Nacuija nacuveha esu mayena ema mácáni echamuri. Taicha ema Viya, yátupi eta máicuñasirayare nácáni ena tíchanahi eta juca. Étarichuhi eta vímiturapianahi eyehe cape juca te vítecinapa eta ara eyehe.

⁷ Taicha víti máichuhaqueneánaripa ema Viya, mavaraha tíurínayare eta vítaresiraya, vaipa víchaimahi eta juca tamauriqueneana.

⁸ Tacahe, ema mácáni tépuruhi eta juca vímiturapianahi, máepuruhivare ema Viya; taicha mavanairipianahi eta juca, vimetacasivahi víti mayehe ema Espíritu Santo, eta mávahásirahavihi.

⁹ Puiti numetacahe núti: Tájinapa vaipa néñamava eta eyehe eta émunasiracacahi, taicha ema Viya tíjaracaheripa eta émunasiracacahi.

¹⁰ Vaipa néñamavahini taicha nusamairiricaheipa eta émunaraivahi nayehe ena echamuriana títecapauchaheanahi tíasihanahi tayehe eta táunavanahi eta iávasa Macedonia. Nuparapenaveana, puiti vituparacahecha iápajucavayare éti eta émunaraivaya.

¹¹ Énerichuva víápechava vituparacahe tauri eta ítaresiraina. Échapajirica eta émataneana. Ecaemataneacava yátupina, eviyihayare eta ecamunuqueneana tísihaqueneánayare te evahuana,

¹² apaesa tacuija ecucamunu te epenana. Te ítaucha eta juca, tipicauchaheanayare ena apamuriana achaneana.

Vahi téñamavacareana ena vichamurianaini náepenaqueneana taicha tíápechavanayare títarecanayare

¹³ Nuparapenaveana, énerichuvare vivaraha vimetacahe eta náichararacavayare ena vichamuriana náepenaqueneanaripa. Vahi ecucatisamureva nayehe. Ena apamuriana achaneana ticatisamurevanapa te náecarapana ena náepenaqueneana, taicha vahi nácasíñavahini me Viya, nacunevahini eta nápechiravaya téchepucana te náecari. Vahi ecucahe éti.

¹⁴ Víti visuapahi eta máechepusirahi ema Jesús te táequenepa eta máepenirahi. Tásiha, visuapahivare eta macaechepusirahaviya ema Viya te vépenapa, vicáchanénapa ema Jesús viti véhicanahi éma.

¹⁵ Eta tacahe, vimetacahe eta juca vímitucasívanahi mayehe ema Viya. Te machavapa ema Viáquenu Jesús, te vuíchahapuca vicuepenahi víti, vahi vicainapucavaimahi nayehe ena náepenaqueneana.

¹⁶ Taicha émarichu ema Viáquenu tíucupaicaya tichavayare, tíasihaya te anuma. Tipiaracaya muraca tíchuarecaya. Ema Arcángele énerichuvare típiaracayareva. Ticaemayareva eta machuja ema Viya. Tacahe, téchepucanainapa tínapucanaya ena náepenaqueneana ena tisuapajirahianahi mayehe ema Cristo.

¹⁷ Tacahe, viti vítareruaaichaha viyanainapa. Vimutu vicáchanénapa ena náepenaqueneánaini. Víacpajicáinapa ema Viáquenu te anuquehe te távihahi eta úcaji. Tásiha, máichecuaraquireyare eta vicachaneraya ema Viáquenu.

¹⁸ Eta tacahe, emetajiricayare nayehe ena echamuriana tamutu eta juca vímiturapianahi, apaesa nacurisamurechavaya éna apanava.

5

Tíaramicareyarechucha eta machaviraya ema Viáquenu

¹⁻² Nuparapenaveana, vahi ecuemitisicava. Ecunevaicha yátupina, taicha téchacareipa eta táramicarevaya eta máitesirayare ema Viáquenu. Tacutiyaie mácani tíámereca te yati, nájina tinecapaina. Ene tacaheyare eta máitesirayare ema Viáquenu. Váhisera vécha tájamuhuyarepuca.

³ Énaripa ena achaneana vuíchaha náemeteacaimahi eta tánehiraripa eta máitecapiraya. “Víuririchucha puiti. Tájina víchiravaimahi” nacaheyare éna. Vahi tinecapauchavanaimahi eta táitecapauchiraya eta náicuñayare tacutiyaie esu súcani esena ticajari, tíjahúchavapa ticati eta sujuhe eta súnasiraya. Ene nacaheyare éna. Tájina najunaiyaimahi.

⁴ Étisera, nuparapenaveana, écharipa eta juca. Vaipa iáramecaimahi te jena sache máitecapiraya ema Viáquenu, taicha tamutu sácheana ecuchapahi eta máitecapiraya.

⁵ Taicha víti viáviyhahi te majaraivahi ema Viya, víti vipaicahi te sáchemuhu. Vahi táifnehavina eta yati, taicha vínjajicaipa eta tamapicuquene.

⁶ Eta tacahe, tavaraha vicuneuchava tamutu sácheana, vijaneasiravainahini muraca. Váhini vicucutihini ena tivayuchavanahi tímaccarácavana, tájina náechaquenena éna. Vítisera vijaneacavaya tamutu sácheana, yátiana. Tájina víchiraváimahi.

⁷ Ena achaneana, tímaccarácavanahi te yátiana, ena apamuriana ticávaháracavánahi te yátiana. Vahi najaneacavahini éna.

⁸ Vítisera tamutu sácheana vicunevayare. Tiúriyarehi eta vipaisira, tájina víchiravaimahi. Yátupina eta véhisira ema Jesús. Vímiyanavahini eta vémunasiracacaina. Vácasiñavahini eta macuchucuirahaviya éma. Tájina vahi vicuyacuquequenehava eta vicuchapiraya eta jena sache.

⁹ Taicha ema Viya manerejiruhavihi eta macuchucuirahaviya máichavenehi ema Viáquenu Jesucristo. Vaipa vicaicuñimahi.

¹⁰ Ema Jesucristo tépenahi te crusu vítivenehi, mavarairahi vítarecayare vicachaneyare éma. Te máitecapa éma, macaehepucainapa ena náepenaqueneana vichamurianaini. Tásiha, viti vítareruanaichaha tihetamurichavinapa, taicha mavarahahi vicachaneyare éma.

¹¹ Eta tacahe, étumechacaca, ecaticacavare. Núti nucasiñavahi eta eyehe eta íchirapaipa puiti eta juca.

Ena Pablo tímijanava eta maconsejachiravaca ena machamuriana

¹² Nuparapenaveana, énerichuvare vituparacahe eta epicauchiraina ena víyarahana pastoreana taicha ena ticonsejachaheanahi, tímitucaheanahi eta juca éhisirahi ema Viya.

¹³ Échapajiricavacaya éna. Émunasinávaicha, taicha éna tiúrihi eta náimicatasirahehi. Tacuija ecuichiravaina éti eta nayehe.

¹⁴ Énerichuvare vituparacahe, nuparapenaveana, epamicayare muraca nacaematane ena plújuana, vahi náesachahi ticaemataneana. Énerichuvare étumechavaca ena tiyacujiririhana. Ena nani títanájiricavanahi, muracaina eta ímitusiraina. Ecayeheyaresera paciencia nayehe namutu.

¹⁵ Échapavayare. Tijuricati natiarihína navaraha titupiacacheana, vahi ecujicapa. Váhivare ecuitsicava. Ímrecayaresera eta iúrivaya nayehe ena echamuriana, énapa namutu ena apamuriana achaneana.

¹⁶ Iúrisamurerecaya tamutu sácheana.

¹⁷ Vahi ecucainajiruva eta eyujasarirana mayehe ema Viya.

¹⁸ Tamutu jácani íchararacavanahi, ehasulupayacha ema Viya, taicha eta mavarahahi ema Viya ecaheyare eti éhicanahi ema Viáquenu Jesucristo.

¹⁹ Váhivare ecuemepurureca eta mavarahaqueneanahi maicha ema Espíritu Santo eta eyehe.

²⁰ Te esama nácani téchajisihanahi ema Viya, vahi ecuepuru.

²¹ Vahi ecumunanasicava. Epanerechinavayare te tájahapuca jácani esamaqueneanahi, ímahaqueneanahi. Éhicaya eta táuriqueneana.

²² Téhesera vahi tiúrihi, vahi ecuisapava, taicha eta tamauriqueneanahi.

²³ Tiuri puiti, máijarachéni ema Viya táurivaina eta epanereruana. Yátupinahini tacuijahini ecuichiravaina eta iávahásirahi éma. Majaneasinahehine eta íchanevana, eta iáqueheana. Tacuija eta etapiravainahini te machavapa ema Viáquenu Jesucristo.

²⁴ Taicha éti máichuhaqueneanahi éma. Yátupi eta macasiñacarevahi. Máitauchayareva tamutu eta juca.

Eta téqueneha matuparaha ema Pablo

²⁵ Nuparapenaveana, ímicatacahavi eyujarauchahavi me Viya.

²⁶ Échajisinahavi namutu ena vichamuriana.

²⁷ Nutuparacahe te máijare ema Viáquenu échajicuha eta juca vicartane te namuri ena vichamuriana apaesa námutu nasama.

²⁸ Nuyaseachaheparaca me Viáquenu Jesucristo táetaviuchahíni eta iúricacarevaya máicha.

Eta macartane ema Apóstole Pablo nayehe ena machamuriana ticavasanahi te avasare Tesalónica, ticaijare 2 TESALONICENSES

¹ Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas*, émapa ema Timoteo. Vímiamarecahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo.

² Nuvaraha macatajicahehini ema Tata Vicaiyaquene, émapa ema Viáquenu Jesucristo; nájaracahehini eta táurivaina eta epanereruana.

Ema Viya máicuñacayare ena ticapecaturarahiana te táitecapapa eta machaviraya ema Cristo

³ Nuparapenaveana, tatuparaca vihasulupayachaparaca ema Viya, taicha visamairiricahi eta tápajusiravapaipaicha eta esuapirahi ema Viya. Tajurusirapaipahi eta émunasiracacairahi. Eta tacahe, vihasulupayachaparacahi ema Viya.

⁴ Tájinarine tácuti eta vicajamurairahahi nayehe ena vichamuriana te viúrujisíravana te jácani vítecapihapahi. Vimetacavacapahi eta táimiyani-rávahi eta éhisirahi, ecamichirahivare tamutu eta nacatianasirahahi ena achaneana étapa eta ecatajivairana, táichavene eta éhisirahi ema Viya.

⁵ Tímararacahehisera ema Viya eta ecamichirahi eta ecatajivairahi. Máimerecahi éma eta máuriva, máitauchirahi tamutu. Éma tijacapaheyare eta esiapirayare tayehe eta mávasa.

⁶ Máimaháinepaséra ema Viya eta máicuñasiravacayare ena ticitianacahenahi éti, taicha macarichu éma ticituparahahi juésyarehi téchayarehi.

⁷ Étisera, ticanaracaheyare ema Viya eta ecatajivairana, viciticacainapa eta vinarasirayare te mamirahu ema Viya. Vinaracainapa vimutu, te máitecapapa ema Viáquenu Jesús, mápechiravaya títeca, másiháiraya te anuma. Te jena sáchezare, mámayarepahi ena mayeheana ángeleana, tíñehianai- napáipa máicha. Tacutinapaipa eta ichapequene yucu eta máucupaisirayare.

⁸ Eta tímitecayare éma, máicuñacayare ena váhiquene návarahahini náimati ema Viya, váhivare návarahahini nasuapa eta máechajiriruva.

⁹ Ena nani máehicarahanahi ema Viáquenu Jesucristo, ticaquijianainapa eta te infierno. Váhivare nacamichahini náimararaca eta mamira taicha táetaviuchahi eta máíñehivahi. Tájina náuchucuiraimahi.

¹⁰ Te jena sáchezare te máitecapapa ema Viáquenu, viáramimícainapa ichape eta mayehe vimutu viti manerejiruanahi. Tétaficavaya eta vicunachirainapa éma. (Éti apanava etiarihyarehi, taicha esuapahi eta vímiturapianahi.)

¹¹ Eta tacahe, tamutu sácheana te viyujarasirana, viyaseuchahehi me Viya eta ímianiravaina eta iúruva, taicha éti íchuarecasivahi eta mayehe. Énerichuare viyaseuchahe me Viya eta májjarasirahéna eta ítupajijíásiraváina

* 1:1 Ema Silas, eta májjararquene Silvano te náechajiriruva ena romanoana.

tayehe eta juca ématanerepihi táichavenénahi eta esuapajiraivahi. Eta juca, ichape tacurisamurecha ema Viya.

¹² Tásiha, ena apamuriana achaneana nacunachayare ema Viáquenu Jesucristo táichavenehi eta náimairahi eta íchirahi éti eta táuriqueneana. Énerichuware, éti ecunachacarénapa me Viya, taicha tétavicavahi eta máemunasi-rahehi, émapa ema Viáquenu Jesucristo.

2

Emá Achane Váinarajiquene

¹⁻⁴ Puítiripa, nuparapenevane, naririhí ena tépiyaequenehanaripa ema Jesús, náimijacharipa matiaririhí, tichavaripa puití. Vituparacahecha vahí ecusuapa nácani tépiyahirahianapahi. Tayanapane nácahepuca: “Eta juca vimetacasivahi me Espíritu Santo”. Nácahepuca: “Emá Pablo túmitucahavihi eta juca”. Te náepiyaquenehahavipuca náimechahepuca eta carta, náimijachayarehi tásihaquene víyehe, váhiquenesera ecusuapavane. Váhi tacuimipanererecahe eta juca. Váhivare ecuarameca. Taicha te máitecapa yátupina ema Jesús, ticurujicahávinumayare víti manerejiruanahi.

Nuvaraha numetacahe eta apana. Te tánehipaicha eta máitesiraya ema Jesús, ena achaneana vaipa napicauchaimahi ema Viya. Náepuruinapa eta máechajiriruva. Tásiha, túmrecaváinapa ema Achane Váinarajiquene. Emá maca achane, macatichainapa masama eta máijare ema Viya. Étaripa eta nasiñarajiana ena achaneana, váipavare máuricaimahi. Macavanairipinapa ena achaneana te tamutu avasareana náepuyumirauchayare éma. “Nuti Víanu. Núti ecasiñayare” macahénapa. Masapihainapa, ticaejacavainapa tayehe eta Templo. Téhesera támutupa, yátupiquenenapa eta máicuñayare muraca.

⁵ Échavarichuhi éti eta nímitusiraheparacahi cape juca te návihaichahahi eyehe. Numetacahehi eta táichararacavayarehi.

⁶⁻⁷ Puití ena achaneana, nararihipa tivainarajichavanapaipahi. Vuíchahase máisapahini ema Viya navayuchavahini. Mararihi ema mavaneruhi tíchejimiráuchavacaríchaha. Eta tacahe, vuíchaha máuchujicahíni máimerecavahíni ema Achane Váinarajiquene. (Éti ímaticuhi ema tíchejimiráurucahi.) Tacahe, ema Viya máisapainapa térajicava ema tíchejimiráurucahi.

⁸⁻¹⁰ Tásiha, mapaenumavainapa túmrecavayare ema Achane Váinarajiquene. Tuparairucayare mayehe ema Satanás. Éma, tijaracayarehi eta máitupajijiásiravayarehi. Tamutuyare máimereca eta tíaramicareana tacutiare yátupiquenenahíni mayehénahíni ema Viya. Emá maca, máetaviuchainapa eta mavayuraiva nayehe ena achaneana. Éna, tísapavanainapaipa náehica eta táífehiqueneana mavayuraquianapahi. Váhiserá máyerémahi. Tiúcupaicavanénapa ema Viáquenu Jesús. Tiáramicarenapa eta majaraivayarepahi. Te máchajurapa, máquipaicainapa macapacainavarepa ema Achane Váinarajiquenéní. Tacahe, ena nani achaneana máiturevanahi témitiequenehanainapa. Ticaicuñanainapa taicha vahí návarahahini náehica eta yátupiqueneana tíuriana echájrirucavana. Te nasuapahini, tíuchucuhannahini tayehe eta ecuñaraqui.

¹¹ Taicha eta namasuapirahi ema Viya, máisapayarehi ena nani achaneana nasuapa eta mavayuraquiana ema Achane Váinarajiquene.

¹² Tacahe, namutuyare ticaicuñanayare éna, taicha vahi návarahahini nasuapa eta yátupiqueneana vímiturapiana. Navapinaichucha eta náichiraya eta tamauriqueneana.

Tiúchucuhanayare ena téhicanahi ema Viya taicha manerejiruanahi

¹³⁻¹⁴ Étiserá, nuparapenaveana, máemunaruanahi ema Viya. Víti tatu-paraca vihásulupayachaparácayare ema Viya íchavenehi éti, taicha manereji-ruhehi ema Viya te tépanavainapa. Táitusiava, te esamapa eta vimetarairuhi, etupiruvapa ejaçapahi; taicha esamapa eta máichuirahahi éma. Éma ticuchucuhayare taicha ímiyanavahi esuapa eta yátupiqueneana máimiturapiana ema Cristo. Émapa ema Espíritu Santo máimiyanava eta mávahasirahehi, máijaracahe eta esantuvainapaipaicha puiti juca ecáijuheyare. Tásiha, ítujicavainapa esiaapa tayehe eta mávihahi ema Viáquenu Jesucristo, ímahainapa eta majaraiva.

¹⁵ Tiuri puiti, nuparapenaveana, ímiyanava eta éhisiraina ema Jesucristo. Vahi ecuemitisica eta vímiturapianahi, te vimuturichaha eta eyehe, étaapa eta juca véchajiriruvanaahi te carta, vémevataruanahi eyehe.

¹⁶ Nuparapenaveana, tétavícavahi eta máemunásirahavihi ema Viáquenu Jesucristo, émapa ema Tata Vicaiyaquene. Tayanapane vahi víuríhíni, énasera navarahahi ticurísamurechahavianaya. Tásiha, vícunevainapa eta víúricarevaya, máícheçuaquirénapa náicha.

¹⁷ Puiti nuvaraha esamavaini éti eta nacurísamurechirahe te esamureana. Náetumeçavaréni eta ímiyaniravaya ícha eta táuriqueneana, táurihivaréni eta éçhajirisiravana.

3

Ema Pablo mayaseacavaca eta nayujarauhiraña me Viya

¹ Títecapa, vivaraha vituparacahe puiti, eti nuparapenaveana: Eyaseuchahavi te eyujarasirana mayehe ema Viya. Tasuápacareváiñahíni muraca nayehe ena achaneana eta vimetarairuana máechajiriruvana ema Viya, tácutihini eta esuapirávanehi éti. Táítecapauchavanehíni ena ticavasanahi te tayerehiqueneana te juca apaquehe.

² Énerichuvare, eyaseuchahavi macátiuchirahávínahíni ema Viya nayehe ena achaneana váinarajiqueneána titupiarahiana. Taicha camuriana ena masuapajirairahanahi me Viya.

³ Váhisera táéñamavacarehíni eta máurivahi ema Viya eta veyehe, yátupíhi eta máitauçirahi tamutu. Tétumeçahayare éma eta ímiyanavairaya. Tijanea-caheyareva mayehe ema Váinaraji.

⁴ Víti vícasiñavahi eyehe eta esuapirahaviya tamutu eta vitupararuheanahi taicha éti éhicahi ema Viáquenu, táicha esuaparipa eta táinapureanahi vitupararuheanahi cape juca.

⁵ Máimicatacahehíni ema Viya eta ímatiraina eta máemunásirahehi. Máijaracahevaréni eta ecayeheraya paciencia, ácutihini ema Cristo.

Tatuparaca vicaemataneayare

⁶ Nuparapenaveana, te natirihinapuca ena echamurianahi plújuana, váhipuca náesachahi ticaemataneana, te váhipuca návarahahini náetumeçavahíni, nasuapahini eta vímiturapianahi, vivanecahe éti te máijare ema Viáquenu Jesucristo: Vahi ecuemeñahava nayehe.

⁷ Écharichuhi éti eta etuparahahi ítusiraina ítátijirícava, éhisirayarehi eta viyeherepianahi víti te viávihaichaha eta ara eyehe. Vahi plújuhávímahi.

⁸ Váhivare vinicairihihini te epenana. Víti vicaematanehi muraca eta vítátijirísiravahi. Tamutu sácheana, yátiana, vicaematanehi, taicha vahi vávarahahini vétsepanáracahehini eta vinicaquenerepi.

⁹ Taturacahinéni viyaseacahehini eta énisirahavínahíni, vivarahahisera vímechaheyarehi eta vicaematanaivaana, apaesa étainarichuhíni éhica éti.

¹⁰ Étaripa te vinasiqueneichaha eta eyehe, vivanecahehi: Vahi ecuenica mácani vahi mavarahahi ticaematane.

¹¹ Puítiripasera visamairiricahi eta natiaririrahi ena echamuriana tinerejicavanahi plújuana. Vahi náesachahini ticaemataneana, tinicairihianahi. Tímiapitavairicavanapaipahi te pétiana.

¹² Étihi íchanahi eta juca, vivanecahe te májare ema Viáquenu Jesucristo: Yátupina táuri eta ecáematanéina, eviyayare eta ecamunuqueneana.

¹³ Éti apamuriana nuparapenaveana, vahi ecuinajica eta táurivahi eta ecaematánerana.

¹⁴ Te natiarihinapuca nácani vahi nacusuapa eta vivanairipianahi te juca carta, ecauneyare éna. Tásiha, emetacapa éna echamuriana vaipa nacucachane éna, apaesa nátsiriháichu ena nani eta namasuapajiraivahi.

¹⁵ Váhiserá ecucatichavaca, econsejachavacachucha taicha echamurianahi éna.

Éma Pablo mayujarauchahi ena machamuriana

¹⁶ Tiuri puiti, nuyaseacahi ema Viáquenu ema tiúrichahavirahi, máimiyanavahíni májaracahéni eta iúrivaya te epanereruana, tijuricati tájahapuca ícharacava te sácheana, taicha mavarahahi eta iúrivaya. Ámutuhíni mávahácahehíni ema Viya.

¹⁷ Nuti Pablo, nútijacaruvapa nájucha eta juca táichecuaraqúihí eta nucartane, apaesa ímati eta táimahíhi eta nuyehe letra nuvahurupajíhi.

¹⁸ Nuyaseuchaheparacahi emutu éti me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi eyehe.

Eta macartane ema Apóstole Pablo mayehe ema machamuri Timoteo, ticajare

1 TIMOTEO

¹ Nuti Pablo mayehenu apóstole ema Jesucristo. Nuvanecasivahi mayehe ema Viya Macatiurahiquenehi viyehe, émapa ema Viáquenu Jesucristo, ema vicuenehehi eta mápechiravayare tichava.

² Nímiamareca eta juca nucartane piyehe piti nuparape Timoteo. Némunacavihi tímicitijiricavahi nuchichavinahíni táichavénehi eta péhisiranuhi eta nusuapajiravahi mayehe ema Cristo. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Nájaracavini eta táurivaina eta pipanereruana.

Éma Pablo mametaca ema Timoteo eta macunerayare ena tihapapirahiana

³ Pécharipahi eta juca numetaruvihi, te nuyanayarepa tayehe te tinapaica eta Macedonia, eta nutuparasiravihi pinasiyaréhi tayehe eta avasare Efeso. Vuíchaha pijunijicaimahi taicha pímatirípahi píti ena nani navarahahi tihapapicana eta vímiturapiana. Vahi picuisapavaca.

⁴ Pécatiacaicha ena vichamurianahi, vahi nacusuapa eta echájjirucavana náepiyapiruanahi ena achaneana, taicha eta juca tacutirichucha eta náchucarapiana. Ena nani achaneana, súnsurupiana eta náechajiriruvana te náechajisihi ena víachucanaveanaini. Eta juca náechajiriruvanahi, ticauyayacarehi táemejepavachavaca ena vichamuriana, machu nachavacuejchava táicha. Étavanerecáinahipucáini náimicatacáhávihipucáini eta vítauchirínahini eta véhisirahi ema Viya.

⁵ Nutuparacavihi taicha nuvarahahi náimerecaya ena vichamuriana yátupina eta námunasiracacaina táuchurenavare te nasamureana, tapachinavareni eta napanereruana. Tacuija nacúquichiraváinahíni eta nasamiravahi te mamirahu ema Viya. Tauri eta náehisiraina ema Viáquenu. Yátupina nasuapa.

⁶ Taicha nararihi ena téjcapavanapaipa, nasuaparichucha eta tájjiparacana súnsurupiana. Eta juca táiminajicavacapaipa tayehe eta vímiturapiana.

⁷ Tásiha, tépiyacavanapa náimatihí tamutu eta Sagrada Escritura. Navarahavare tímiturecana, váhisera nácaicutiarahíni eta tacayemaqueneana eta táechajisihaqueneanahi. Ena nacahehi: “Víti véchahi tamutu”, tájjanéni náechihahíni.

⁸ Tájjina táichava eta tatiirihirahi eta mavanairipianahi ema víyarahaini Moisés. Véchahi eta táuriva eta mavanairipiana, taicha éta, táimitucavacahi ena achaneana eta vahi nacuejcapava.

⁹ Taicha véchahi eta tacaemataneasirahi eta vanairipiana eta táimitupiruchiravacaya ena ticapecaturarahiana. Nácani achaneana tiúriana, vahi énáina tatuparaca eta vanairipianahi. Tatuparacahisera ena nácani mapicaurirahana masuapajirarahana; énapa nácani váinarajipaneréruana ticapecaturarahiana; énapa nácani mapicaucharahana ema Viya, ena ticaticahana eta máechajiriruvána; énapa nácani téhana ena náiyana, ena náenana; énapa nácani ticapahiana;

¹⁰ Énapa ena túhusiana énapa nácani ticaecahiana ena nayenana, navehapa esu apana esena; énapa nácani tivehana ena nacutiqueneanahi ajaira; énapa nácani tiámerecana achane, amaperupuca, esenapuca; énapa ena tépiyahirahiana; énapa ena tépiyaequenerahiána. Énerichuvare eta vanairipi tatuparaca ena ticatichana eta táuriqueneana vímiturapiana.

¹¹ Taicha núti nutuparacasivahi me Viya eta nímituresiraya eta táurinaqueneanahi máechajiriruvana, eta tímicaijuhechahaviya tayehe eta táurinaquene mávasa ema Viya. Tétavicavahi eta macunachacarevahi éma.

Éma Pablo mahasulupayacha ema Jesucristo taicha eta máichuirahi

¹² Núti nuhasulupayacha ema Viáquenu Jesucristo, taicha eta máichuiranuhi mavanaranuyarehi. Tétumechanuhi yátupi taicha máimahahi eta nítauchirayarehi eta nutuparacasivayarehi mayehe.

¹³ Éma, tituparacanuhi eta juca, ichapemurihinéni eta néjecapiravahi mayehe, tíñemahihi eta néchajiriruvanahi mayehe. Nupanajiricavacahi ena náinapureanahi téhicanahi éma. Tijapanunuhisera éma, vuíchahahinéni nusuapahíni néhichahini éma. Taicha vahí néchahini émahinéni puca nucatianacahi, eta níchirahi ena machanerana éma.

¹⁴ Tásihasesa tétavicavahi eta máemunasiranuhi ema Viáquenu Jesucristo. Ichaperinehi eta máijarasiranuhi eta nusuapirahi yátupi éma, étapa eta máijarasiranuhi eta némunaraivahi.

¹⁵ Nuvaraha námutuhini ena achaneana nasuapa eta véhiruhi taicha yátupihí eta juca vímiturapiana: Éma Viáquenu Jesucristo tímitecachi te juca apaquehe macuchucuhavacayarehi ena ticapecaturarahiana.

Nútiripahi nuváyuchapanaváinihi eta nucapecaturaraiváinihi.

¹⁶ Émasera ema Viáquenu Jesucristo tijapanunuhi, táitusiava tíchuhanuhi núti. Taicha mavarahahi máimerecayare ichape eta mayehe paciencia eta nuyehé, nuvayurevaquenénihi eta nucapecaturaráivainihi. Eta tacahe, nucaicutiarapa eta majacapirayareva namutu ena tisuapanayare, máichecuaraquirénapa eta náitaresiraya máicha.

¹⁷ Eta tacahe, macarichu vicunachayare vijirauchayare tamutu sácheana ema Viya, taicha macarichuhi éma tamutu máituruequeneha. Éma, máimahasiquenehi, máepenacacahivare. Jéhevarequene éma, viyehéhi Rey acanequene te tépanavainapa, étapa puiti juca vicaijuheyare. Amén.

Éma Pablo matuparacahi ema Timoteo

¹⁸ Nuchicha Timoteo, nutuparacavicha muraca eta piratahairaina picanara eta tamauriqueneana. Tiúriyare eta péhisiraya ema Viya. Tájina píchiravaimahi te mamirahu ema Viya. Péchavahi eta náechajisiavirahi eta piúrvahi ena vichamuriana mametaruanahi ema Espíritu Santo. Vahí picuemepurureca.

¹⁹ Taicha nararihi ena ticainajiruvanapaipa, náechahinéni eta táíñehivahi eta náichaqueneanahi, váhisera návarahahíni nácaínajiruvahini eta tamauriqueneanahi. Tíñajicavanarichucha eta náehisirainihi ema Viya.

²⁰ Émaripa ema Himeneo émapa ema Alejandro, tacahehi eta náinajisiravahi eta náehisirainihi ema Viya. Puítisera, ena nani níjararupa ema Satanás, taicha nuvaraha nachava, náinajicayare eta nacaecahirahi ema Viya.

2

¹ Tativayaresera nutuparacahe, vahi tacuechuquiha eta eyujarasiraina. Eyaseuchava. Tamutu ehasulupayachayare ema Viya. Eyaseuchayareva namutu ena achaneana.

² Énerichuvare eyaseuchayare ena aquenicana énapa ena apamuriana tuparairucana, apaesa táuri eta náechapajirisiraina eta avasareana, váhini vicuimahaini eta táíñehiqueneana. Víti vímijanavahini viúrihini te mami-
rahu ema Viya, vicapichuhini nayehe ena achaneana.

³ Taicha ema Viya Macatiurahiquene máuricahi eta víchirahi víti eta júcana.

⁴ Taicha mavarahahi éma máimimatichayare namutu ena achaneana eta yátupiqueneana máechajiriruvana apaesa náuchucuha éna apanava.

⁵ Taicha májina apanainahini ticatiuchavacaina éna, macarichu ema Tata Vicaiyaquene. Émapa ema Machicha ema achane Cristo Jesús, macarichuhi ema téchajirahi viyehe viti achaneana te mamirahu ema Tata Vicaiyaquene. Nájina apanaina téchajíurahínahi viyehe.

⁶ Ema Viáquenu Jesucristo tíjaracavahi tépena taicha eta macuchucuirahaviya vimutu viti achaneana. Puítisera mavaraha máimimatichayare namutu eta juca arairuhi vímiturapiana.

⁷ Eta tacahehi, manerejrunuichuhi mayehenuhi apóstole, nucametarairuyare tamutu avasareana, nímitucayarehi ena apavasanana eta nasuapiraina éna eta yátupiqueneana máechajiriruvana ema Viya. Nutupiruvahi núti eta juca néchajisirahi, vahi népiyahiraivainahi.

Em a Pablo máimitucavaca eta náicharacavaya te náurujisiravana

⁸ Tiuri, nutuparacahevare pímitucavacavare ena vichamuriana eta juca apana: Tauri eta náurujisiravaina te nayujarasirana. Ena ajairana, vahi nacueñamavahini me Viya eta máिताchirayare eta nayasearuhi. Tátupiruvahini te nasamureana. Vahi nacúsemamajuhehíni eta nayujarasirayarehi nacajapavaquichavapuca.

⁹ Énaripa ena esenana, táurihini eta nacamuirihairana. Vahi nacúyeheheácaicha eta nacamuirihaira. Náetupiricavahiséraini. Váhivare nacuvayuchaini eta nacatatasirana. Váhivare nacuvayuchaini nacuyeheheacavahini eta oro, eta perla, eta tasivachaqueneana múiriareana.

¹⁰ Étaripa náurinavahi yátupiquenehi, eta náimeresiravaina eta yátupina náehisirahi ema Viya, náichirainavare eta táuriqueneanapa.

¹¹ Énerichuvare, tíuriyare eta nasamararasira eta náimitucasivana. Vahi nacúacapaemarahi nácani tímitucanahi.

¹² Énerichuvare ena esenana, vahi tatuparaca náimitucahíni ena víyarahana te viúriujisiravana, taicha vahi tatuparacahíni náimiturecahíni éna. Nasamararacayarechucha eta náimitucasivana.

¹³ Taicha te máepiyacainapa ema Viya ena viáchucanaveánaini, tínapuca máepiyacahi ema Adan, téquenehapa esu Eva.

¹⁴ Váhivare émainahini ema Adan máinapucahini máquipaicavahini. Ésuhi esu esena, tísapavahi mavayuaca ema Satanás. Eta suísapiravahi, tíaquipaicanapa tayehe eta pecatu.

¹⁵ Tásiha, ticatajivainapa eta suínasirana. Puíticha tanasihi nayehe ena esenana. Tiúchucuhanayaresera, te náimijanava náehica ema Jesús, étape eta náemunasiraina ena vichamuriana. Tacuijavare natapiravaina te mamirahu ema Viya, táurihini eta napanereruana.

3

Tiúrianayarehi eta náitaresira nácani tatupararuanayare eta avacurecacare pastorecare

¹ Étaripa eta juca evacureca pastorecare, puiti nutupiruva numetacahe. Te natiarihinapuca nácani ajairana návaraha ticavacureana eta pastorecare, tájina táichiravaina, taicha eta juca evacureca pastorecare, éta tiúriana evacureca ticaijuhecare.

² Tacamunuhisera mácani ticavacureya eta pastorecare, tájina matapiravainaya eta máitaresirahi, tacuija nacuyunaca ena achaneana. Mácani ésunarichuhi esu mayena. Mácani ticapicahuhi. Mácani tijaneacavahi eta máitaresira, máitucahi tipanerereca. Mácani achanesamure tijacaparahi nayehe nácani tichimarachanaya. Mácani máituca tímitureca.

³ Mácani vahi tavayuaruina eta téracare. Váhivare macueharahi. Vahi macujamurarahi. Váhivare macutupiarahi. Váhivare tacuvayuaca eta plata. Tatuparacayare mácani tijapanurahi.

⁴ Ticaiyacareyare te mapena. Máitucayare eta macajurusirayare ena machichanaveana, tisuapajirahianayare tipicaurahianayare máicha.

⁵ Vahi tisiapaimahi mácani achane vahi máitucahi ticavanairipi te mapena. Taicha nararihi ena vahi náituca ticavanairipiana. Tavetijipapuca eta juca evacureca, vaipa náitucaimahi eta náechajirisiraina najaneasirayarehi ena vichamuriana.

⁶ Vahi tisiapaimahi eta pastorecare mácani mapaemunavahi máehica ema Viáquenu, machu macasiñavavaica eta masiapirahi eta matuparahahi. Eta tacahe eta máquipaisiravahi ema Váinaraji.

⁷ Énerichuvare tacamunuhi mácani pastoreyare ticapicahu nayehe ena apamuriana achaneana, apaesa vahi nacuechajica eta mayehe. Machu máituruca ema Váinaraji.

Tiúrianayarehi eta náitaresira nácani tatupararuanayare eta avacurecacare ticaijare diácono

⁸ Énerichuvare, nácani ticavacureya eta diáconocare, tacamunuhi ticapichuanayare eta náitaresirahi. Vahi apiemanaimahi eta náechajirisiravana. Váhivare ticavaharasianaimahi. Váhivare tijamurarahanaimahi.

⁹ Tacamunuhivare náimatiyare yátupi eta tisuapacareanahi mayehe ema Jesús, náitachiraripa tamutu, tájinapa náichiravaimahi te mamirahu ema Vía.

¹⁰ Nacasamairunumaya te yátupihupuca tiuri, tájinapuca náichiravaimahi. Téhesera tiúrianahi, énarata tuparairucanayarehi eta evacureca diáconocare.

¹¹ Énerichuvare, ena esenana, tacamunuhi ticapichuana. Vahi nacuechajihí. Súcani tijaneacavahi eta suítaresira. Tájina náichiravaimahi, títaurahiánayare.

¹² Ema tuparairucayare, tacamunuhi mácani ésunarichuvare esu mayena. Máitucayare eta máimitusirayare ena machichanaveana. Ticaiyacareyare te mapena.

¹³ Táicha te náitachahi tamutu eta natuparahana ena tuparairucana, ticunachacareanahi tipícauchacareánahivare. Tásiha, énerichuvare tétumésamúrechaváinapa eta nacametarairuirahi eta máimiturapiana ema Jesucristo.

Jéhevare eta juca téhicacare

14-15 Puiti nucunevaipa eta nítecapiravaneya eta ara piyehe, téhesera vuíchahapuca nucuitujicava níteca. Nucajurevihisera eta juca carta, apaesa pítuca eta táurivaina eta pítaresiraya, taicha machichavihi píti ema Viya. Viti manerejiruanahi ema yátupiquenehi Viya. Viúnacahi vímiturecahi yátupi eta máechajiriruvana.

16 Taicha eta juca véhiruhi vimutu, tétavicavahi eta táuriva: Vimutuhi visuapahi eta máucupaisirahi te juca apaquehe ema Jesucristo, macaqueherahi eta juca viáquehehi viti achaneana.

Émaripa ema Espíritu Santo macametarapihivare eta yátupirahi Machicha ema Viya.

Náimahahivare ena ángeleana eta máechepusirahi te máecari.

Te tamutupa, tichavapa éma te mávasa anuma.

Tásiha, viti mavanarana véchajisihahi tamutu avasareana eta macuchucui-rahaviyare vimutu viti achaneana.

Ichapemuriana ena ticasíñavanahi mayehe, téhicanahi éma.

4

Natiarihiyare ena tñajicavanaya eta náehisira ema Jesús

1 Eta mametarapi ema Espíritu Santo, puiti juca vicaijuheyare, natiarihinapa ena tímútserahávanayarepahi tñajicavana eta náehisirahi ema Jesús. Nasuapainapaipa ena tiyururahiana. Náehicainapa eta náimiturapiana ena éreanana.

2 Nasapihainapa tisamacareanayare ena apiapiemana tépiyahirahiana. Ena nani, máimatiacavarahánahi eta náepiyahiraivana taicha náitunaipahi eta nacahirana.

3 Ena nani achaneana nayurucainapaipa ena vichamuriana. Ánipa nacaheyare: “Vahi táurica vitanucahini esu esena viyenainahini. Jucarihivare eta tinicacare, énerichuvare vahi táurica vinicahini” nacaheyare. Tamutusera eta juca tinicacareana máepiyaruana ema Viya vinicayarehi viti vímatiequenehanahi eta máechajiriruvana. Vihasulupayachayarehi te vinicayare eta máijjararuhavianahi ema Viya.

4-5 Taicha tamutuhi tiuri eta máepiyaruana ema Viya. Vahi táuricahini vépuruhíni. Vijacapayarehi tamutu, vihasulupayachayarehi te vinicaya; taicha vjaracasihí mayehe ema Viya, timetacahavihi eta táurivahi. Tacaursamurechahi ema Viya eta viyujarasirana. Puíticha tanasihí viyehe víti. Te vinica, vihasulupayachayarehi ema Viya.

Ema yátupiquene mavanara ema Jesucristo

6 Te pímitucavaca eta juca ena vichamuriana, pímerercahi eta yátupirahi mavanaravi ema Jesucristo. Eta juca táurinaquenehi echájirirucava, étarichuhi eta vímiturapianahi eta piyehe, éta tétumechaviyare eta pímiyaniravahi pisuapa eta juca véhiruhi.

7 Váhisera picusuapavaca ena nani tichanahi eta juca echájirirucavana tauriqueneana. Súnurupianachucha éta. Pímiyanavasera picaravahu eta piúrtaresiráina mayehe ema Viya.

8-10 Tacuti eta náimicaravahuchirava ena ticavijarurahiana eta pelota, navaraha náetumecha eta náqueheana. Tacamunuhisera nápepejiricava te sácheana. Píti, vahi tacuechuquiha eta picaravahuirahi. Te yátupihí vicaravahu viúrtaresiraya mayehe ema Viya, tétavicavaya eta viúrivaya eta visamiravaya puiti juca vicahehi, énerichuvare véchapajiricavainapa eta

vicaijuheraya eta mávasa ema Viya, vicachaneraya éma. Eta tacahe, vétumechavachucha apaesa viúrítaresira eta mayehe. Vímiyanavachucha vímitucavaca ena achaneana apaesa náurítaresira éna apanava mayehe ema Viya. Taicha yátupiquene eta échájirirucava ani tacahe:

Ema vicasiñaquenehi, éma yátupiquenehi Viya.

Éma, téchahavi vimutu viti achaneana.

Vivetiji viti véhicanaripa éma,

tétavicavahi eta macatiuchirahavipahi.

¹¹ Ena pímitureanaya, pituparacavacaicha muraca eta júcana.

¹² Picuneuchava yátupina apaesa vahi nacuepuruvi eta pímituresirahi, taicha eta piámaperuváichaha. Pímerecayare eta piúrivera apaesa étaina náehicavi ena vichamuriana. Tauri eta péchajisiráina. Tauri eta pítaresiraina, tájina pitapiravaimahi. Pémunarahi nayehe ena vichamuriana, énapa ena apamuriana achaneana. Yátupina eta péhisirahi, étapa eta picasiñavairahi mayehe ema Viáquenu.

¹³ Te vuíchahapuca nucuitecapa, pímiyanava eta pímitusirayare ena vichamuriana. Pímiyanavavare eta pétumechiravacaina. Péchajicuinyare eta Sagrada Escritura apaesa nasama namutu.

¹⁴ Pémechavayare eta nametarapianahi ena víyarahana mametaruanahi ema Espíritu Santo eta picavacureraya. Péchavare eta nanasirahi éna eta navahuana te piápusi. Puiti, vahi picuemepurureca eta péchemaravahi maicha ema Viya.

¹⁵ Pipanerecha yátupina eta juca pimetasivanahi. Pímereca eta táurivahi eta péhisirahi, apaesa náimaha namutu eta piúrivánapaicha.

¹⁶ Péchapavaicha yátupina eta pímituresirahi eta juca véhiruhi. Pítijiva pipamicava pítauchayare tamutu. Te pítaucha eta juca, picuchucuhavayare píti, énapa ena pímitureanahi.

5

Vímerecayare eta viúriverayare nayehe ena vichamuriana

¹ Te natiarihinapuca náejecapava ena víyarahana ichavicapananahi piyehe, vahi picucajachavaca éna. Piconsejachavacaséra tauri, tácuti te péchajica ema ticachichavi. Énerichuvare ena amaperuquijiana ajairana, tauri eta piconsejachiravacáina tácuti eta péchajisira ena pichuquiqueneana.

² Énerichuvare ena vénarahana ichavicapananahi piyehe, te náejecapavapuca, piconsejachavaca tauri tácuti eta péchajisira esu ticachichavi. Énapa ena amaperuana esenana, piconsejachavaca tauri tácuti eta péchajisira ena pichuquiqueneana. Tátupiruva eta péchajirisiravacaina éna.

³ Pímícatavacaya ena tépenaimanahi, nácani tájinahi naviyavahini, yátupihí eta nacamunuiravana.

⁴ Téheserapuca natiaríhíhi ena suchichanaveana esu tépenaimahi, suámariapuca, énapa títátianayarehi. Ticaravahuanainapa eta náitátijirisiravaya. Títsirijicavánainapa eta nacajurusiravacahi ena náenana, nátseanapuca. Eta juca, máurica ema Viya. Taicha tatuparacahi ena echichanaveana eta náitsirijisiraváina eta nacajurusira ena ticachichana.

⁵ Pímícatavayaresera súcani tépenaimahi sucarichuhipuca, nájina suchichainahi, nájinavare suviyavahi. Sucuchapainapa eta tásihaqueneya

mayehe ema Viya, taicha sujáraruvaipa yátupi eta mayehe. Tiyujaracainapa tamutu sácheana, tamutu yátiana.

⁶ Ésusera súcani suícutichiravahi suicha eta suvarahaqueneanahi, ésu tímicutijiricavaipa suáquijiruvahi eta mayehe ema Viya.

⁷ Pímitucavacayare ena tépenaimanahi, apaesa táuri eta nacaemataneasiraina ema Viya, tacuija natapiravaina.

⁸ Taicha ena vichamuriana, tatuparacavacahi náeñamavayarehi tayehe eta náitátira ena náenana, ena nátseana. Nácani vahi nacuquicha eta juca, tímicutijiricavaipa vahi náitauchahini eta náehisirahi ema Viya. Tiápajucavapanapa éma eta nayehe ena masuápajirairahánahi.

⁹ Nacarichu pinacayare te nalista ena tépenaimana ena ticayehenaripa sesenta año eta nahañora. Súcani émanarichuhi ema suímaini eta suítaresirahi.

¹⁰ Ésupa súcani tímaticarehi eta táurivanahi eta suématanerepiana. Súcani tíurihi eta sucajurisirahi ena suchichanaveana. Súcani tijacaparahi te supena nayehe nácani tichimarachanapahi. Súcani tiuri eta suéchapajirísira ena vichamuriana. Súcani téchapajirahi nayehe nácani ticatajivanahi ticajumanahi, ticatiruhanahi. Súcani tamutuhi suítaparaha suicha eta táuriqueneana.

¹¹ Énasera ena tépenaimanahi amaperuanarichaha, vahi picunaca te lista. Tijuricati tíaquipaicavana taicha tavayuacavacarichaha eta tájiparacana, natanucarichaha ena ajaira, navarahaichaha tíapechavanayarehi ticaimana. Tijuricati ticainajiruana eta náehisirahi ema Cristo.

¹² Tacamitisicavacapáipa, énapa tuminajicanapahi eta náehisirahi ema Cristo.

¹³ Énerichuvare ticauyayacarehi nayehe ena amaperuanarichaha, te pinaca eta te nalista, tijuricati tépiyacavanapa plújuana. Náemataneapa típaipiricana te pétiana, námapaipa eta cuéntoana. Tímisiáparacavánapáipa. Nacaemataneaca náechajisihapáipa jácani náimahaqueneanapahi te pétiana. Vahi tácatuparaha náichahíni eta juca.

¹⁴ Eta tacahe, ena tépenaimanahi amaperuanarichaha, nuvaraha nápechava nacaimavare, nacachicha, nacaenacarehi te peti, apaesa tacuija nacucayema ena ticunerahiana.

¹⁵ Taicha nararihi ena tépenaimanahi tínajicavanapaipa eta náehisirahi ema Jesús, náehicapa ema Satanás.

¹⁶ Te sutiarihhipuca tépenaimahi esu vichamurihi, te natiarihivarepuca ena sujaneanahi vichamurianahivare, ena títátianayarehi ena sujaneanarichu; apaesa vahi sucuapitavairicahi nayehe ena máimaruanaahi itátijiríruanahi, táichavenehisera jácani tamajinairahi naviyahini éna.

Tatuparacavacahi ena vichamuriana náimicatacayare ena pastoreana eta náitátiravahi

¹⁷ Ena pastoreana, te tíurihipuca eta náechapajirisiravaca ena vichamuriana, ichapeyare eta náemunacacarevayarehi. Tatuparacavacahi ena vichamuriana náimicatacayare tayehe eta nanicaquenerepi ena pastoreana, taicha éna, eta náematanerepihi tímiturecanahi ticametairuanahi.

¹⁸ Taicha ani tacahehi eta Sagrada Escritura: “Vahi picuitisumucha eta pivuyera te ticaemataneahi taicha técuahapahi”. Ánivare tacahe: “Ema achane ticaematanehi, tatuparacahi ticavachayarehi mayehe ema macaematanearuhi”.

¹⁹ Vahi picusuapavane te tatiarihinapuca eta máepiyaequenena mácani náiyacarahi ena vichamuriana. Téhesera natiarihinapuca ena apinana, mapananapuca tinecapaequenehanahi eta máejecapiravahi, jéhesare tisua-
pacare éta.

²⁰ Téhesera yátupiquenehipuca eta máejecapiravahi, picajachayare muraca te namirahu ena machamurianahi náiyacarana, apaesa nátsiriha napica ena apamuriana, vaipa nacuquicha eta juca.

²¹ Nutuparacavicha muraca, pítauchayare yátupina eta juca numetara-
pianahi piyehe. Vahi picunerejicavaca, nácuticaca eta píjarasiraina eta piyehe justicia. Vahi pépacuchaimahi eta máichavaquenevahi mácani téjeca-
pavahi, taicha máimararacahi ema Tata Vicaiyaquene, émapa ema Viáquenu
Jesucristo, énapa ena mayeheana ángeleana manerejiruanahi.

²² Te matiarihinapuca mácani navaraha nacasiapa pastor, picasamairu-
numaya te tíurhipuca éma. Vahi picuíjahúcha picunacavane éma. Tijuricati
tatiarihinapahi eta máejecapiravahi. Machu pítina tamuriaca taicha eta
pímisiapiraina éma. Pijaneacavaicha tayehe eta juca.

²³ (Puiti néchavahi eta picajumamajipa eta pítaresirahi te piami. Tásiha,
nuconsejachavi: Pímisiriquicha apaesainarichu eta vino eta péresarama une,
pípurujinahi.)

²⁴ Tacamunuhisera eta picasamairunumaya nácani tisiapanayare eta pa-
storecare, taicha nararihi ena máchasihi eta napecaturana. Vahi táimatica-
revane, tapaenumavaya picasamairunuma éna. Nararihisera ena ticaeche-
ravane eta napecaturana. Tímaticareanavane.

²⁵ Ene tacahehi, nararihi ena tímaticareanavanehi eta náichirahi eta
táuriqueneanahi. Nararihivare ena tacamunuhi eta picasamairunuma,
apaesa ticaechevanehi eta táuriqueneana náichaqueneanahi.

6

¹ Ena vichamuriana músuanahipuca, tatuparacavacahi napicauchayare
ichape ena náquenuanahi. Vahi tíjicapairihianaimahi apaesa vahi nacuyu-
naca ena achaneana eta májare ema Viya, váhivare nacucaecahi eta vímitu-
rapiana.

² Étaripa te nacaquenuhipuca mácani vichamurihi, tiápajucavayare eta
napicauchirayare. Vahi tímipanavanáimahi eta nachamurirahi éma. Náimere-
cayare yátupi eta táurivaya eta náemataneana, taicha ema nacaemataneyeruhi,
nachamurihi máemunaruvare ema Viya.

Ticurisamurechahavihi eta véhisira ema Jesús

Piti nuchicha Timoteo, pímitucayare tamutu eta juca nayehe ena
vichamuriana. Pémechavacayare eta vímiturapiana.

³ Natiarihinapuca ena nácani navaraha tímiturecana eta apana doctrina.
Nahapapicainapa eta vímiturapiana, tájinasera vahi tavehapiçaimahi eta juca
yátupiqueneanahi tásihaqueneanahi mayehe ema Viáquenu Jesucristo.

⁴ Ena nani, ticasíñavaváicanahi, tájinhineni náitucaquenénahíni. Ena
nani, náurica téchajicana. Navayurevanapahi nácapaemachapahi tayehe eta
tacayemaqueneana eta véchajiriruvana te vímiturecahi. Ticapinarurahiana
éna, tíumeharahiana, tíchanarahiana, típicacarácavanapa.

⁵ Tamutu sácheana ticitanaraherecana taicha máuripanererurahána ena,
máimatirahanahi eta yátupiqueneana. Navaraha nacavacharapiyare eta
nayehe religión. Píti vahi picupauchavaca ena nani.

⁶ Jéhesareva, tétavicava eta viúricacareva máicha ema Viya, eta véhisirahi éma. Tavetiji te vicurisamurechava tayehe eta vicayehequeneanahi máijararuhanahi éma.

⁷ Taicha te viúchucapa suyehe esu ticachichahavi, tájina viámaphini vímahaquenenahíni. Ene tacaheyare eta vítavirayare, tájinavare viámaimahi eta vímahaqueneanahi.

⁸ Eta tacahe, te tatiarihipuca eta vinícaquenéna te vipenana, vicamuirihapuca, tarataripa visuapayarehi.

⁹ Énaserá nácani tipanerechanahi tirricuchavana, apanapanepa eta najamurachaqueneana. Tacananesiricapa eta naplatanechiavaya. Énajivapa tímicuñacavana taicha eta najamuraraivana súnsurupianahi. Eta juca ticauyayacarehi étaina táimicuñaca eta náchanevana.

¹⁰ Táitsivahisera ena achaneana, náetaviuchahi eta tavayuasirahi náichapa tamutu eta tájiparacana, táichavenehi eta najamurachira eta plata. Namapurujipaipa ena vichamurianaini. Natiarihinapaipa timutserahavanapaipa eta tayurusiraina eta najamuraraivana. Tásapihapapuca táiminajicapahi eta náehisirainihi ema Jesús. Énajivapa titanucavanahi eta naviurevahi, timutserahavanapaipa eta nacatajivairanahi eta náitaresiranahi.

Yátupina eta véhisiraina ema Jesucristo

¹¹ Pítisera vahi picupanerecha eta juca mamavarahaqueneana ema Viya. Pérajicava tayehe, taicha mavanaraviripa éma. Tátupiruvahi eta pisamure mayehe éma. Táimiyana eta juca táurivahi eta pítaresira. Tauri eta péhisiraina. Pémunaca yátupina. Picamichayare tamutu. Yátupina eta pimansuvaina te pisamure.

¹² Pétumechavachucha eta picaemataneasirahi ema Viáquenu. Muracaina eta picasiñavaira mayehe. Vahi picuyacujiequeneháva eta picuchapirahi eta pítaresiraya máichecuaraquireyare, taicha máichuhaquenevirichuhi ema Viya. Vahi picuemepurureca eta péchajirivanahi te namuri ena vichamuriana, te píjaracavainapa eta péhisirayare ema Viya.

¹³ Puiti, tímarracavihi ema Viya eta nutuparasiraviya. Éma, ticaitarecahi tamutu eta vímahaqueneanahi eta te juca apaquehe. Tímararacavivare ema Viáquenu Jesucristo. Pécharichuhivare eta matupiruvairahi eta máimereuchiravahi éma te mamirahu ema Poncio Pilato.

¹⁴ Pítauchayare píti tamutu eta juca nuvanairipianahi taicha tásihaqueneanahi me Viáquenu. Vahi pihapapicaimahi, apaesa tacuija táimicajachavi mayehe. Tauri eta machimapiravina ema Viáquenu Jesucristo te máitecapa te táitachavapa te jena sáheyare máicutiarahi ema Tata Vicaiyaquene.

¹⁵ Ichapenapa vicunachainapa ema Tata Vicaiyaquene taicha macarichuhi éma yátupiquenehi tamutu marataha. Émahi Réyquenehi, Viáquenuquenehi. Tivanecahi namutu ena réyeana énapa ena aquenucana.

¹⁶ Macarichu éma, yátupiquenehi máepenacaca. Máetaviuchahi eta maváyuháuquiráivahi. Nájina tiratahaina ticachacayaina eta majaraiva tayehe eta mávihahi. Éma, nájina tímahaina, taicha máimahasiquenehi éma. Éma, vipicauchaquenehi vivapinaquenehi ichape. Máitavacacainapa eta vicunachirayare éma. Jéhehare éma, tamutu marataha. Amén.

¹⁷ Énerichuvare ena vichamurianahi ticaimahaqueneanahi rícuani, pímitucavacayare eta vahi nacucajamura. Váhivare nacucasíhava eta

nacaimahaquenerahi, taicha tijuricati títava eta náimahaqueneanahi, témitiequenehapa tamutu. Nácasiñavaserá mayehe ema Viya, jéhevarequene ema ticasíñacare. Éma tíjaracahavihi tamutu eta vicamunuqueneana, viúrisamurerecáhi máicha.

¹⁸ Tacahe, ena vichamuriana rícuanahi, pímitucavacaichavare eta náurivainaicha. Náimicatarahi ichape tayehe eta ematanecana. Nájapanuráhi nacajirahi nayehe ena ticamunuvanapahi. Tátupiruva te nasamure eta náíjarasiraina ena ticamunuvanahi.

¹⁹ Te yátupina náitaucha eta juca, tatiarihi eta sáchezare najacapiraya eta apanayare náimahaqueneanayare te anuma. Éna, ticaijaranainapa eta nápechiravaya títarecana, taicha éna yátupíhi eta náimicataráivahi eta náitare-sirahi te apaquehe. Máíhecuaráquirénapa eta náuricacarevaya.

Eta téqueneha matuparaha ema Timoteo

²⁰ Tiuri puiti, Timoteo, péperajica yátupina eta juca vímitucasivahi mayehe ema Jesucristo taicha tacapicahuquenehi ichape. Vahi picujicapavaca ena nácani téchajisihana eta tájiparacana, técaticavánachucha. Váhivare picujicapa ena nácani navaraha ticanaraemachaviana. Ena nani tímijachavanahi náimatihíji eta táuriqueneana, tásihaserá ichape nayerehi eta náehisirainahíni ema Viya.

²¹ Nararihipaipa ena vichamurianaini tínajicavanapa eta náehisirahi ema Jesús, taicha nasuapahi ena nani tépiyahirahiana.

Nuyaseuchaviparaca me Viáquenu Jesucristo táetaviuchahini eta piúricacarevaya máicha.

Tamutupa eta néchajiriruvahi piyehe.

Eta macartane ema Apóstole Pablo mayehe ema machamuri Timoteo, ticajare 2 TIMOTEO

¹ Nuti Pablo mayehenu apóstole ema Jesucristo. Ema Viya tivanecanuhi eta nucemetarairuyare eta máechajiriruva, taicha macaechajiriruvahi eta máijarasirahaviya víti eta vítaresiraya táichavenehi eta mávahásirahavihi ema Machicha Jesucristo. Máichecuaraquirénapa eta vítaresira máicha.

² Puiti nápechavavare nucajurevi eta juca apana nucartane piyehe piti nuchicha Timoteo némunarquene. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Nájaracavini eta táurivaina eta pipanereruana.

Ema Pablo máetumechahi ema Timoteo

³ Núti nécharaicavihi te sácheana yátiana te nuyujarasirana, nuyaseuchavihi me Viya. Nuhasulupayachahi éma eta piúrivahi máicha. Éma nucasiñahi núti, tacutíhi eta nacasiñairahi ena víachucanaveanaini. Tájina níchiravainahi eta nusamiravahi te mamirahu.

⁴ Tétavacavahi eta nuvarairahi nápechavahini nímahavi. Vahi némitisicavahini eta píyairahi te nujunijicavinapa. Nuvarahahi píjahúchavahini píteca-puchanuhíni, núrismurepáini eta nímairavinahíni.

⁵ Taicha némechavahi yátupíhi eta pímiyaniravahi pisuapa ema Viáquenu. Picápayarácavacáinehi eta susuapirahi yátupi esu piátse Loida ésupa esu pena Eunice. Ichaperinehi pémechanuhi eta nayehe éna. Eta tacahe puiti, vahi néñamavahini eta piyehe.

⁶ Puiti nutuparacavicha muraca vahi picucaemaha eta péchemaravahi maicha ema Viya. Pímiyanavachucha. Vahi tacumapuruji eta nunasirahi eta nuvahuana te piápusi.

⁷ Taicha ema Viya vahi mavaraha vipícarácavahini. Éma tíjaracahavihi eta vitumesamurevana eta vicatuparahairahi. Éma tímitucahavihi eta vémunaravaya. Tíjaracahavivare eta vicaratasiravayare yátupi eta vítaresira.

⁸ Eta tacahe, vahi picutsiríha eta picametarairuyaya eta máechajiriruvana ema Viáquenu. Váhivare picutsiríha eta táemeratasiránuhi eta nucemetarairuiranahi núti apana. Yátupina picamicha eta picatajivairaya. Taicha ema Viya, éma tíjaracaviya eta pitumevaya eta pímiyaniravaya picametairui.

⁹ Ema Viya tíamavahi eta máemunasirahavihi acane te tépanavainapa tamutu. Tijapanuhavihi máichavenehi ema Machicha Jesucristo. Eta tacahehi te mapanerchainapa eta máichuirahavivare vimutu víti véhicanayare ema Machicha, mavarairahi ticuchucuhahaviyare, váhinéni víámavahini víúrihíni eta vítaresirahi. Puítisera ema Viya mavaraha mapecaturarehaviya te mamirahu.

¹⁰ Puíticha, eta majapanuirahavihi ema Viya, máevatasinahavihi ema Machicha Jesucristo ticatiuchahaviyarehi. Éma, máechepurehi te máecari. Puiti manaquicahi eta máechajiriruvahi eta macaitaresirahaviya víti apana. Te jena sáchezare máitsivachainapa eta viáquehe, máepenacacahávinapa.

¹¹ Ema Viya tíuparacaruhi nucemetarairuyare eta juca. Éma tinacaruhi apóstolenuhi, nímitucayarehi ena apavasanana.

¹² Eta tímicaviuchanuhi eta juca, puíticha nucatajivahi ichape, taicha eta nítauchirahi eta nutuparacasivahi. Váhisera nutsiríha eta néhisirahi, taicha nímatíhi núti eta yátupirahi eta macasiñacarévahi ema nucasiñaquenehi. Néchahivare eta majacapirahi tamutu eta nématanerepiana. Nucunevainapa eta jena sáchezare eta máijarasiranuyare eta nícuchihi mayehe.

¹³ Píti apana, eta péhicayare eta juca yátupiqueneana nímiturapianahi piyehé, tájina vahi pihapapicaimahi. Yátupina pisuapa, yátupina eta pémunaraivaina taicha tiávahácaviripa ema Jesucristo.

¹⁴ Piúnacaicha yátupina eta juca máechajiriruvana ema Viáquenu. Te natiarihipuca návaraha nahapapica eta vímiturapiana, vahi picuisapava. Máimaha-vinesera ema Espíritu Santo, ema tiávahácaviríhi. Éma tímicatavivare.

¹⁵ Títecapa, pécharichuhi píti eta namáimicatasiránuhi ena náiyarahanahi ena vichamuriana ticavasanahi te Asia. Émavanénahíni máitecaghini ema Figelo, émainahipucaini ema Hermógenes.

¹⁶⁻¹⁸ Macarichu títecapauchanuhi ema Onesíforo. Te títecapa éma te Roma, matupiruhi titanucanu, tétupiacanupa te juca cárcel nucaerataiyahi. Éma, tájina mapicaimahi ena ticatianacanuana. Ticajínuhi eta nucamunuqueneanahi. Pímaharichuhi píti apana eta máimicatasirahavíhi te viávíhaichaha te Efeso. Eta tacahe, nuyaseacahi ema Viya macatajicaghini máimicacaghini éma, énapa ena machichanaveana. Majapanuhini te jena sáchezare vítecapauchiraya ema Viya.

2

Yátupina eta véhisiraya ema Jesucristo

¹ Pítisera némunaruquene nuchicha Timoteo, nuvaraha yátupina máetumechavini ema Viáquenu Jesucristo.

² Píti pímatirichuhi tamutu eta nímiturapiana, taicha pisamahi eta nímitusiravacáhi ena vichamuriana te avasareana. Puiti pitanucaya ena apamuriana vichamuriana nácani pímitureana títaurahianahi. Pituparacaya éna tauri eta náimitusiraina ena apamuriana vichamurianayareva, tácutirichu eta nímitusiravíhi núti.

³ Nutuparacavi: Picamichayare píti tamutu eta picatajivairana. Yátupina eta masuntaruravina ema Jesucristo.

⁴ Picutiyaare eta máuriva ema suntaru, tacarichu máechapajiricahi eta mavanairipiana ema mayehe comandante. Vahi máemitísicaimahi eta mavanahiana, tahapapicahipucáini jácani tájiparacana. Ene picahayare píti eta pítauchirayare eta mavanairipiana ema Viáquenu.

⁵ Eta juca tacutihi ena ticavijarurahiana eta pelota. Te vahi náitauchahi tamutu eta tavanairipianahi, vahi tivérearecanáimahi.

⁶ Píti pipamicavaya muraca eta pítauchiraya eta pituparahana. Picutiya eta mapamisirava mácani isanítireru eta macaematanera te máesane, mavarairahi tíuchucuhayare eta máematane.

⁷ Pipanerecha yátupina eta juca numetaruvianahi. Németeaca tímicatavivare ema Viáquenu eta picacutiarairayare tamutu.

⁸ Vahi picuemitísica eta juca nímiturapianahi mayehe ema Jesús, eta émairahi yátupiquene Cristo, mámariequeneníhi ema rey David. Éma, máepenaquenéníhi. Macaechepuchahisera ema Viya.

⁹ Eta tímícvíuchanuhi eta juca, puíticha nucatajivahi ichape taicha eta nucametarairuirahi. Étara témeratacanuhi puiti, ticutirinehi nucaviurevahini. Váhisera vicainajiruvaimahi eta vicametarairuiraya eta máechajiriruva ema Viya, cápachi etiarihipa éti. Étinapa nítisivaheyare.

¹⁰ Nucamichahisera tamutu eta náichiranuhi, nuvarairahi nasuapahini nácani máichuhaqueneánayarepahi ema Viáquenu Jesucristo, apaesa náuchucuhahini éna apanava, náitujicavahíni nasiapa tayehe eta táuricacarequene mávasa. Máichecuaraquirequene eta vicachaneraya éma.

¹¹⁻¹³ Jéhesare, yátupiquenehi eta juca véhiruhi vimutu:

Te vépenaca mayehavíhi ema Viaquenu,

éma ticaitarecavayare vicachanenapa

éma tayehe eta mávasa.

Te vicamicha eta vicatajivairanahi

máichavenénahi éma, vítujicavayare vicajupahayare

éma eta macavacureraya.

Téhesera vicaerajicavahi eta véhisirahi éma,

éma apanavare ticaerajicavayareva te mamirahu.

Te vínajicavahipuca eta véhisirahi éma,

émasera vahi máinajicavahíni.

Manasirichucha ticuchapavahi te

viápechavayarepuca vichavayare mayehe.

Taicha éma, vahi apánapanéna eta mapaneruana.

¹⁴ Nutuparacavi: Pémechavaca ena pímitureana tamutu eta júcana. Pécatiacaicha muraca te máijare ema Viáquenu. Vahi nacuevataemajirícaca te jácani náechajirisiravána. Taicha tájina tájjaracaimahi, machu étaina tahapapica eta napaneruanahi ena vichamuriana eta nasámararásirainahi.

Yátupiyare eta náurivaya ena mavanarana ema Viya

¹⁵ Píti, yátupina tauri picha eta picaematanerahi ema Viya, picurisamurechirayare éma. Tájinasarépa piávamirahumahi taicha tamutuhi tíuri eta pémataneana. Tatupiruvayarehi eta pímituresirahi eta yátupiqueneanahi máechajiriruva ema Viya.

¹⁶ Téhesera natarihinapuca ena téchajisihanahi eta tájiparacana técativacana, vahi picujicapajirícavaca éna. Pérajicava nayehe, taicha ena nani navetijiyarepáichucha eta náichira eta tamauriqueneana.

¹⁷ Tíñehiqueneanahi eta náechajirisiravana taicha eta tavayuarasiravahi, ticauyacarehi nahapapica ena vichamuriana. Ene tacahehi eta náejecapiravanahi ema Himeneo, émapa ema Fileto.

¹⁸ Péchapavayare nayehe ena nani apinana, taicha nacaerajiruvaipahi tayehe eta yátupiqueneana vímiturapiana. Taicha ena nani tépiyaequenehanahi eta táetavisiravaripahiji eta náechepusiraipahiji ena náepenequeneana. Jéhesare, natarihipahi ena náemejecapavaruanapáipahi.

¹⁹ Vitiarihichahasera viti vímíyanavahi véhicahi ema Viya. Taicha muraca eta vicasiñavairahi eta majaneasirahavíhi, taicha éma tímatihavíhi eta machanerairahavíhi. Yátupivare visuapa eta juca máechajiriruva, ani macahe: “Náinajicayarehi eta tamauriqueneana namutu ena tíámanahi eta máijare ema Nuchicha Jesucristo” macahepa.

20-21 Eta tacahe, víti, ichape eta vijaneasiravayare tayehe eta tamauri-queneana. Yátupiyarehi eta vicamunucarevaina mayehe ema Viya, vítauchirayarehi eta vicaemataneasira éma. Jéhesare, ichapenapa eta vimunavayarehi mayehe. Véperajicavayarehiséra mayehe tacutiyare eta náeperajisira ena rícoana eta nayereruvana táuriqueneanahi nayeheana jarra oro, nacurujana plata. Vahi náimipananajicáimahi. Vahi náimicutichaimahi eta apamuriana nayereruvana yucucuisiana: eta raveta, eta yuvaraqui, étapa eta nacasuelana mátejisiana.

22 Eta tacahe, vahi picuehica eta natuhusivana ena amaperuquijiana. Tamutuhi najamuracha éna, nacaravahuhi jácani tamauriqueneanahi. Pítisera pímiyanava eta táurivahi eta pítaresirahi. Táuri eta picasiñairahi ema Viáquenu. Yátupinavare eta pémunaraivaina. Pétupiricayareva eta náichavaqueneva ena achaneana. Énaina pitanuca pácachanevaca nácani pichamuriarichu tiúripanereruanahi, taicha éna nacasamurehi ema Viáquenu tamutu sácheana.

23 Énerichuvare vahi picujicapajiricavaca nácani navarahahi tiyaserecaviana eta súnsurupiana. Taicha pímatipahi ena nani eta nacahirana, étachucha natanuca eta semanereana.

24 Viti mavanarana ema Viáquenu, vahi viúriha vímisiaparacavahíni tayehe eta semanereana. Táitsivasea vétaviuchayarehi eta viúriya eta nayehe namutu. Vicayeheyareva paciencia eta nayehe namutu ena achaneana. Vimiturahiyareva eta táuriqueneana.

25 Énaripa ena viánaranahi, tiúriyare eta véchajirisirayare. Vicuchapayare eta táetupirisiravaina eta napanereruana, máijarahahini ema Viya nasuapiraina eta máechajiriruvana,

26 apaesa nacuchucuhavahini eta náchanevana eta tacaeratairahi maicha ema Váinaraji. Taicha eta máiturusiravacahi éma, mavarahahi náitauchaya eta mavarahaqueneanahi éma.

3

Ena achaneana téváinarajichavanáinapáipa

1 Eta apana eta juca nuvaraha péchayare. Puiti juca vicaijuheyare tavetijinapaipa eta táejeravayare nasamira ena achaneana eta náehisiraina ema Jesús.

2 Taicha tivayuchavainapa eta náichirayare eta najamuraraivana. Tavayuacainapa eta plata. Ticasiñavanainapa, navayuchayare eta náechajirisiravana. Tipanarahiana. Énerichuvare, masuápajiráirahánainapa nayehe ena ticachichana. Tájinainapa eta náitsirijirápinaya. Váipavare napicauchaimahi ema Viya, nasapihayarechucha nacaehiyare éma.

3 Nájinapa náemunaruimahi. Nájinavarepa najapanuquenémahi. Téchajihianainapa. Vaipa téchajicacareanáimahi. Titupiarahianainapa. Nacati-chainapa eta táuriqueneana.

4 Cáetemarahiana. Mapicauruirahanainapa. Ticasiñavaváicanainapa. Náuricainapa náicha eta piesta, tasapihainapa napauchayare, vaipa émaimahi napauchaimahi ema Viya.

5 Nararihipuca ena tímijachavanainapa yátupinahini nácaijuhe ema Viya. Váhisera náunacaimahi eta máechajiriruvana, váhivare tísapavanaimahi máemetupirucha ema Espiritu Santo eta napanereruana.

Puítiripa nararihipa ena achaneana, étapa návacuha eta juca. Pérajicava eta nayehe ena nani. Vahi picuimisiapava nayehe.

⁶ Taicha nararihi ena achaneana tiyururahiana tépiyacavanapaipa tipaipi-cana te pétiána, nayurucavacapaipa nácani esenana máecharaireana. Ena nani esenana tisipecaturanahi, tavayuaruanahi eta tájiparacana.

⁷ Nametaínipa ticaravahuanahi, tájinasera vahi nacaicutiaraimahi eta yátupiqueneana.

⁸ Puíticha ena nani tiyururashianahi, éna ticaecahiana eta vímiturapiana yátupiqueneana taicha máuripanerérurahiána éna. Tacutihi acane ena iápemareana ema Janes émapa ema Jambres tiácapaemachanahi ema víyarahaini Moiséini. Tímaticareanahisera eta namaimatirahi eta yátupiqueneana.

⁹ Váhisera camurianaimahi ena náiturevanaya, taicha ena achaneana náimatiacavanarehi eta náepiyahiraivana súnsurupianahi éta, tacutiya-rehi eta náimatiasiravacahi acane ena achaneana ena nani apina iápemareana tiácapaemachanainihi ema Moiséini.

Eta téqueneha matuparacasivahi ema Timoteo mayehe ema Pablo

¹⁰ Pítisera péhichahi yátupi eta nímiturapiana. Picutinuhi eta núrivahi nayehe namutu achaneana, étaripa eta nupamisiravahi eta néhisirahi ema Jesús, nucasíñavahi yátupi mayehe. Picutinuhivare eta nucayeherahi paciencia, étaripa eta némunaraivahi, étaripa eta nucamichirahi tamutu.

¹¹ Péchahivare eta náichiranuhi ena achaneana, eta nucatajivairahi náicha. Ichapemurihi eta napanajirisiranuhi eta te avasareana Antioquía Ichipichu, te Iconio, étapa te Listra. Émasera ema Viya ticatichuanuhi tayehe eta juca náichiranuanahi.

¹² Énesera tacaheyarehi eta juca. Tímiyanavanayare tipanajirichavianayarehi vimutu víti vivarahana véhica yátupi ema Jesucristo.

¹³ Énerichuvare, ena achaneana váinarajiqueneana tiápajucavainapa eta navainarajivanaya. Énerichuvare ena ticaetemarashiana, tiápajucavainapa eta nacaetemaivaya. Énajicacainapa ticaetemacacanayare.

¹⁴ Pítisera pímiyanavahi eta péhisirahi eta juca pímitucasivanahi. Yátupihí pímerechahi eta písuapirahi. Píti pímatihavirichuhi viti vímitucavianahi, nútiripa.

¹⁵ Piámavahi te amuyavichaha pímatihí eta Sagrada Escritura. Éta, tímitucavihí tayehe eta víuchucuiraya te apana vítaresira, táichavenehi eta visuapirahi yátupi ema Jesucristo.

¹⁶ Taicha tamutu eta Sagrada Escritura tásihaqueneanahi mayehe ema Viya. Jéhevarequene eta víviyihayare eta ticaravahucareana, eta vímitu-sihaya véchajisihayare ena achaneana eta viconsejachihayareva, vímitupiru-chihavacaya tayehe eta táurivayare eta náitaresirana.

¹⁷ Tacahe, ena vichamuriana mávaháruana ema Viya téchemarahiana-yarehi, yátupi náitucayarehi tamutu eta náichiraya eta táuriqueneana.

4

¹ Puiti nutuparacaviyare muraca te máijare ema Viya, émapa ema Viáquenu Jesucristo. Taicha éma, títecavaneyare eta macavacureiraya te juca apaquehe. Viti vítareruaichaha énapa ena náepenaqueneanaripa

vicayaserehinapa te mamirahu tájahhipuca eta vicaemataneasiranahi éma.

² Eta tacahe, pímiyanavachucha picametarairu eta máechajiriruva ema Viya te jácani pítujiisravana. Vahi picúyacujiéquenehava. Pécatiacavacaicha muraca ena téjcapavanahi eta náeneuchirávaina. Piconsejachavaca. Pétimechavaca ena tíuripanereruanahi. Pácayehesera paciencia eta pímitusiravacaya namutu.

³ Taicha tatiarihiyare eta sáchezare ena achaneana vaipa nasuapaimahi eta vímiturapiana táuriqueneana, étainapa náichayare eta navarahaqueneanarichu. Natanucainapa ena nácani tímitucanayare tayehe eta tájiparacana, narichuinapa tisamacareanayare nayehe.

⁴ Tasapihainapa náepuruyare eta yátupiqueneana, nacaepaquecuinapa. Étasea eta náepiyapiruana ena achaneana, tasapihayare eta tisuapacareyarehi nayehe.

⁵ Pítisera pinasiyareichu tájina píchiravaimahi. Picamichayare tamutu eta picatajivairana. Pímiyanavachucha picametarairu eta máechajiriruva ema Viya. Pítauchayare eta pítparacasivahi.

⁶ Puítisera, núti tiánehipa eta nítaviraya te apaquehe. Nucutiripa eta yúcupi te títavayarepa témahayarepa, éneripa nucahehi núti.

⁷ Váhiquene néñamavacare. Nítavavarerupa eta nucanarairahi eta tamauriqueneana. Vahi nuvtiaequenehahini. Nítauchahi eta nutuparacasivahi mayehe ema Viáquenu. Núnacahi muraca eta nusupirahi ema Jesús.

⁸ Puiti núti étanecha nucuchapahi eta jena sáchezare eta máijarasiranuyare eta níjaracasiya me Viáquenu, taicha eta néhisirahi yátupi. Taicha éma, máítauchayarehi eta máijarasiránuyare eta nícuchihi mayehe. Váhivareséa nácarichuimahi núti nucaijaracasiyare. Énerichuva máijaracayareva namutu nácani ticuchapanahi eta machaviraya.

Éma Pablo máimichuha ema Timoteo

⁹ Pítátijirícavaicha eta pítesirávaneyare ani nuyehe.

¹⁰ Puiti tijunijicanuripa ema Demos, taicha tétavicavahi majamurachirahi eta mavaraha ticaimahaquenezare te juca apaquehe. Tiyana macaijuhehi tayehe eta Tesalónica. Émasera ema Crescente, névatachahi te departamento Galacia. Énerichuvare ema Tito, névatachivare te departamento Dalmacia.

¹¹ Macarinehi nucachanehi ema Lucas. Pivenumapahi ema Marcos, máiteca ema apanavare. Tétavicavahi eta nucamunuirahi éma.

¹² Éma Tíquico, nuvanecahi máiteca ara piyehe te avasare Efeso. Émainachaha pítsivaina.

¹³ Te píteca, pétavajicayarepahi te Troas, pivenuminanuya eta nuyehe capa nunaquiruhi mayehe ema Carpo, étapa eta nuyeheana libro, étapa eta apamuri ajumerucana.

¹⁴ Numetacavivare eta máejecapiravahi ema Alejandro eta nuyehe; tétavicavahi eta macatichiranuhi ema maca herrero. Máimahainesera ema Viáquenu. Éma títsirijiequenehayare eta máichiranuhi.

¹⁵ Eta tacahe, picuneuchavaicha eta mayehe, taicha tétavicavahi eta macatichirahi eta vicametarairuirahi.

¹⁶ Étaripa, te tínapucainapa nucatiuchavahi te mamirahu ena tuparairucana juéseana, nájina náimicatcanuhini. Namutuhi tijunijicanuanahi.

Tiuri, tacuijaseraini macuícharacáini ema Viya, maperdonachavacaini ena tijunijicanuanahi.

¹⁷ Émasera ema Viáquenu tijaneacanuhi, tímicatacanuhi. Vahi máisapanuhini nanacanuhini te tapena eta sárareana tinicarahiana. Nítujicavahi núchuca nuyana tayehe eta apanaqueneana avasareana, nucametarairuhi nayehe ena apavasaqueneana.

¹⁸ Ene tacaheyare eta máimiyániravayare ticatiuchanu ema Viáquenu tayehe eta táinehiqueneana. Tiámanuyarehi tayehe eta mávasa anuma. Máichecuaraquireyarehi eta vijirauchiraya éma. Amén.

Eta táichecuaraqui eta máechajiriruva ema Pablo

¹⁹ Péchajisinanuvaca ema Aquila ésupa esu mayena Priscila, énapa ena machichanaveana ema Onesíforo.

²⁰ Émasera ema Erasto, nunaquicahi te Corinto. Émapa ema Trófimo nunaquicahivare te Mileto taicha ticajumahi éma.

²¹ Pítecavanecha te tamirahuinarichaha eta muracana técatícava. Téchajicaviana ena vichamuriana ema Eubulo, ema Pudente, ema Lino, esu Claudia, énapa ena apamuriana vichamuriana.

²² Núti nuyaseuchaviparaca me Viáquenu Jesucristo majaneacavihini tamutu sácheana, táetaviuchavaréni eta iúricacarevaya emutu éti máicha.

Tamutupa eta néchajiriruvahi piyehe.

Eta macartane ema Apóstole Pablo mayehe ema machamuri TITO

¹⁻⁴ Nuti Pablo, nucajurevi piti nuparape Tito. Némunacavihi tímicutijiricavahi nuchichavinahini táichavenehi eta péhisiranuhi eta nusuapajiraivahi mayehe ema Cristo. Nuvaraha macatajicavini ichape, májapanuvini ema Tata Vicaiyaquene, émapa ema Viáquenu Jesucristo, émaripahi ema Macatiurahiquene viyehe. Náijaracavini eta táurivaina eta pipanereruana.

Acane, eta táepaniravahi eta juca apaquehe, ema Viya macametarapihi eta májjarasirahaviya eta vítaresiraya máichecuaraquireyare. Ene tacaheyare, taicha ema Viya tájina máepiyahiraivaina. Puiti, titecapauchahaviripa eta sache máicutiarahi ema Viya, eta májjarasirahaviripa viti apóstoleana eta máechajiriruvana, étaripa vémechaquenehi puiti ena achaneana. Tacahe, núti mavanaranuhi ema Viya. Manerejirunuhi ema Jesucristo, ema Macatiurahiquenehi viyehe. Tituparacanuhi nátauchayare núti eta námiryare eta máechajiriruva. Tivanecanuhi eta nímitusiraya ena apamuriana manerejiruana ema Viya eta nasuapajiraivanayare, mavarairahi náimatiequeneha tamutu eta tímítucacareana yátupiqueneana apaesa tauri eta náitaresiraina. Tacahe, nacunevaina eta jena sáchehare te májjarachavipa eta vítaresiraya máichecuaraquirénapa.

Eta macatuparahaira ema Tito

⁵ Péchavarichuhi te nunaquicavinapa eta te tíurupuhi te mar ticaijare Creta. Nutuparacavihi pítauchayare tamutu eta numaitaureanahi. Eta nutupararuvihí pinerejicaya ena pinacaqueneanayare eta návacureanaya ena pastoreanaya téchapajiricanayare nácani nájamuripachu tisuapajirahiana.

⁶ Nayehepachuina pastor, tacamunusera mácani achane maoporavare eta máitaresira. Mácani, ésunarichuhi esu mayena. Tisuapajirahianahivare ena machichanaveana. Tacuija natapiravaina. Tisamarahiana éna.

⁷ Taicha tacamunu matapiravarena nácani pitupararuanayare; taicha éna, tuparairucanayarevare mayehe ema Viya. Mácani, tímítucacarehi. Mácani, vahí tisemarárihi. Váhivare tavayuaruina eta tércare. Váhivare macueharahi. Váhivare tijamurarahi.

⁸ Mácanisera achanesamure tijacaparahi nácani tichimarachana. Máurica macachane ena tíuripaneréruana. Mácani, máituca tipanerereca. Mácani, títaurahi tamutu nayehe ena achaneana. Mácani, macaijuhe ema Viya, títaurahihivare mayehe. Mácani, táuriquene eta macaratasirava.

⁹ Énerichuvare tacamunu ema mácani tisuápajiráhiquene tayehe eta vímiturapiana tisuapacareana, apaesa éma táurivare eta máimituresiraina. Taicha tacamunu eta májjarasirayare eta natumevaina ena tisuapajirahianahi. Tacamunuhivare eta macajimuyasiravacaina ena nácani ticatianacanárichaha eta máimiturapiana. Májjaracainavare eta nasuapajiraivaina.

¹⁰ Taicha nararihi camuriana ena titupirahiana. Náetaviucha eta náechajiricavarasivana, tivayuarahiana éna. Nararihi ena nujaneanana tíapajucavana eta natupiraivana.

¹¹ Picamatinacayare ena nani. Vahi picuisapa eta náimitureca eta tamauri-queneana, machu náemejecapavacha ena vichamurianahi. Taicha vahi táuricacarehini eta náimiturapiana. Ena nani náichahi eta juca taicha navaraha-hahi navereacavaca eta naplataneana.

¹² Matiarihinihi ema nayehenihi profeta najaneanaichu ena cretenseana. Macahehi eta máechajiriruvahi nayehe: “Ena nujaneanana cretenseana, tépiyahirahiana éna. Tíñehi eta náichaquene nacuti eta sárare tíñehi. Cánisiuquiana. Plújuanavare éna” macahepa éma.

¹³ Yátupi tacahehi eta náitaresirahi puiti ena cretenseana. Eta tac-ahe, pituparacaicha muraca ena vichamuriana cretenseana, apaesa vaipa nacuaquipaicava tayehe eta tájiparácana. Tauri eta náehisira eta véhiruhi.

¹⁴ Vaipa nacusuapa eta náimiturapiana navayuarapiana ena nujaneanana israelítana. Machu nacusuapa eta náimiturapiana ena nácani navaraha tihapapiricavaca ena vichamuriana eta náehisira eta yátupiqueneana tímitu-cacareana.

¹⁵ Ena tipachinanahi te napanereruana téhepa nasamureana, énara ena nani nacaijuhe eta táuriqueneana taicha náurica eta nasamararasira tamutu eta táuriqueneanahi. Énasa ena masupajirairahana váinarajipanereruana, éna vahi táurihini nasamira eta tíuriana echajirirucava yátupiqueneana. Taicha tachipejiquenehi tamutu eta napanereruana, muracasamureanapa táicha. Tájina nasamahini eta tamaurivahi eta náichirahi.

¹⁶ Éna nacahehi: “Véhica ema Viya”. Tímaticareanahisera eta namáehi-sirahi ema Viya, taicha náicharichucha eta tamauriqueneana tíñemahiana. Émasera ema Viya macaticha tamutu eta juca náichaqueneana táíñemahi-queneana. Ena nani, masupajirairahanahi eta mayehe. Tájinasa vahi náituruéquenehaimahi ena nani náichahini eta táuriqueneana.

2

Eta yátupiquene vímiturapiana

¹⁻² Pítisera pímiturecaya tamutu eta táuriqueneana. Ena víyarahana ichanaru-ana, pímitucayareva eta najaneasiravaina eta náitaresira, náitaurahivaina, náitusiraina típanererecana, nasuápajiráhiquenéna tayehe eta mavanai-ripiana ema Jesucristo. Náemunarahi nayehe ena achaneana. Yátupina eta nacamichiraina tamutu.

³ Énerichuvare ena vénarahana ichanaruana, pímitucayareva éna tauri eta náitaresiraina taicha éna, tuparairucanahivare mayehe ema Viya. Vaipa téchajihianaimahi. Váhivare tacuvayuaca eta tércare. Náimiturahisera eta táuriqueneana.

⁴ Náimitucayareva ena amaperuana esenana apaesa náituca eta námuna-siraina ena náimanaveana énapa ena nachichanaveana.

⁵ Náitusirayareva típanererecana. Napicaucha ena náimanaveana. Nasupajirahivare nayehe. Napicauchacare nacaenacare te napenana, náitusiraina náechapajirica eta nayereruvana. Náurivaina éna, apaesa tacuija náechajisiacareváiina tayehe eta náehisirahi eta máechajiriruva ema Viya.

⁶ Énerichuvare piconsejachayare ena amaperuana ajairana, yátupina eta náitusiraina típanererecana.

⁷ Tamutu eta juca, pinaquipairuyare píti eta piúrivaina, apaesa étaina náehica ena vichamuriana eta piúrivahi píti. Étanarichu eta pímiturapiya,

vahi pihapapicaimahi eta pimitucasivahi. Váhivare picuitsivacha. Tapicau-chacare eta pimituresiraya.

⁸Táuri eta pímivehapisirayare eta jácani péchajirisiravanaya, apaesa tacuija nacuviyava eta nacaecahiravina ena piánaranahi, titsirihavianayarechucha táicha.

⁹Ponsejachayare ena músuana eta nasuapajiraivaina nayehe ena náquenuana. Náitaucha támutu jácani navarahaqueneana ena náquenuana. Vahi nacujicapairihi tayehe eta vanairipiana.

¹⁰Váhivare nacuavijaca eta nacayehequeneana ena náquenuana. Yátupina eta nacasiñacarevaina tayehe tamutu eta natupararahanahi. Náimereca yátupina eta náurivaina apaesa tajamurachacare eta véhiruhi, étarichuhi eta vímuturapiana mayehe ena Macatiurahiquenehi Viya.

¹¹Ema Viya, acaneripa eta majapanuirahavihi vimutu viti achaneana. Eta tacahe, máimitesinahavihi puiti ema Machicha eta macuchucuirahaviya. Eta juca tímicaecherachahi víti eta majapanuirahavihi ema Viya.

¹²Puiti ema Viya mavaraha eta táuri eta vítaresiraina te juca apaquehe. Mavaraha yátupina eta vítusiraina vipanerereca, étapa eta víturaivaina tamutu nayehe ena achaneana, étapa eta víturaivaina mayehe ema Viya. Vaipa víchaimahi eta tájiparacana tamauriqueneanahi. Váipavare víchaimahi eta tajamurachaqueneana eta viáquehe.

¹³Tásiha, vicunevainapa eta machavirayare ema Viáquenu Jesucristo ema Macatiurahiquenehi viyehe. Eta máitesiraya mámayarepahi eta tapachi-naquene majaraiva. Tétavicava eta víurisamurevainapa te jena sácheyare.

¹⁴Éma, máepeninahavihi, mavarairahi macaichepaicaya tamutu eta víchirahi eta tamauriqueneanahi. Máepachinachayare tamutu eta tamaepe-rajivana eta víchaneavana. Taicha mavarahahi machaneraquenehaviyare. Tacahe, puiti vivapinavayarehi vicha eta táuri queneana.

¹⁵Tiuri, pimitucayare eta júcana nutupararuvianahi, tamutu piconseja-chavacayareva ena achaneana. Tijuricati natiarihi navaraha téjecapavana, picortachavaneyare. Pétimechava eta pimitusirahi taicha eta pitupara-casivahi. Piúriyare eta pítaresira apaesa námutu napicauchavi, váhivare nacuepuru eta pituparahahi.

3

Eta vítaresira víti véhicana ema Cristo

¹Pémechayareva ena vichamuriana eta nasuapiraina ema ichapequenehi aquenuca, tásiha, énapa ena tuparairucana. Énerichu pémechavare ena vichamuriana énairena nápacucava eta návanacare tayehe jácani ematanecanaya.

²Vahi nacuechajica nayehe nácani achaneana. Váhivare nacumehareca. Váhivare nacutupiarahi. Mánuanáinaserá, najapanurahi nayehe ena achaneana.

³Víti, acane eta masuápajiráirahahavirichaha, vimáimatiéquenehahivare. Víchahi tamutu eta tájiparacana tavarahaqueneana eta viáquehe. Tétavicavahi eta viváinarajívainihi eta vítaresirahi. Vicapinarurahini. Vímicatichavainihi nayehe ena achaneana. Vicatianarahinivare nayehe éna.

⁴⁻⁵Puítsira, vaipa vácahehini, taicha máitsivacharipa eta vítaresira ema Macatiurahiquenehi Viya. Émasera, tétavicava eta máuriva eta viyehe. Témunacahaviripa. Váhinéni víchahini eta táuriqueneana, tijapanuhavisera éma. Masi-pacaipa eta visamureana, máquijicaipa eta tamauriqueneanahi eta viyehe.

Énerichuvare tjaracahavipa ema Espiritu Santo. Ema Espiritu Santo máitsivachinahávipaipahi eta vítaresira, tímitucahavipa eta viúrivayare eta viyeherepiyare.

⁶ Tétavicavahi eta viúricacarevanahi maicha ema Espiritu Santo máijjararuihema Jesucristo Macatiurahiquenehi eta viyehe.

⁷ Majacpahaviripa ema Viya, tísihaquenehi eta máemunasirahavihi ichape. Énerichuvare timetacahavihi eta máijjarasirahaviyare eta vítaresiraya máichecuaraqirénapa. Tásiha, vivapinavahi víti eta vicuneiravahi eta jena sácheyare.

⁸ Yátupiquenehi tasuapacareva eta juca vímitucasivahi. Eta juca néchajisihaqueneanahi puiti, nuvaraha pímitucayare tamutu sácheana apaesa náimiyana naicha eta táuriqueneana ena vicutiqueneana tisupajirahiana me Viya. Tétavicavahi táuriva eta vímiturapiana. Tájina táichiravaina, taicha eta juca tjaracarahi eta náurivaya nayehe namutu ena achaneana.

⁹ Puiticha nararihi ena tisupanarichaha eta nahapapiruanahi nayeherépiana ena viáchucanaveánaini. Te návarahapuca náevataemachavi, vahi picujicapajiricavaca, taicha súnsurupianachucha eta nayasereruvianaya. Váhivare picuimicasiapava nayehe nácani tiyunacana eta mayeherepiana ema Moiséini. Te navarahapuca nácani ticajachaviana, vahi picujicapa. Pihapapicayaresera eta tajuricatira eta nasemanevanahi. Técaticavachucha éta.

¹⁰ Te matiarhipuca ema mácani mavaraha mahapapica eta napanereruana ena vichamuriana, pímicuhayare picórtachávaneya eta mapanereruhi. Te apihequenénapa eta pímicuha, te máviraichu vahi macusuapavi, pévatacayare mayana máuchuca.

¹¹ Taicha tímaticarepahi ema achane eta mamaimitucacarevaya. Étavénériahi eta mapecaturana táimicuñacaya.

Eta téqueneha matuparacasivahi ema Tito mayehe ema Pablo

¹² Tiúri, névatacayare pítsivayare ema Artemas eta ara piyehe, téhesera émapuca névataca ema Tíquico. Te máitecapauchavipa ara piyehe, pítecávaneyare ani nuyehe te juca avasare Nicópolis, taicha nunasiyarechaha ani.

Nuvaraha táetavicavanúmachaha eta muracana técatícava, nupaenumavainapa nuyanaya.

¹³ Énerichuva títecapauchaviya ema vichamuri abogado Zenas, émapa ema vichamurivare Apolos. Pimicatacavacayare éna eta nayanirayare. Péchapajiricayare éna, te náechuriapuca eta napaisiraya.

¹⁴ Pímitucayare ena vichamuriana eta achanesamurevacaina, máejeraréna eta nacajiravaina nayehe ena achaneana. Yátupina náitaucha eta nacamunucarevanahi.

¹⁵ Téchajicaviana namutu ena natiariqueneanahi nuyehe. Tásiha, péchajisinanuya namutu ena némunacasáreana vicutiqueneana eta visuapajiravivanahi mayehe ema Viya.

Nuyaseuchaheparaca emutu éti me viáquenu Jesucristo, táetaviuchahini eta iúricacarevaya máicha.

Tamutupa eta néchajiririvanahi piyehe.

Eta macartane ema Apóstole Pablo mayehe ema machamuri FILEMÓN

¹ Nuti Pablo tapresuchaquenenuhi eta néhisirahi ema Jesucristo, puiti nuchachane ema Timoteo eta vicajureravihi eta carta piti Filemón, vichamurivahi vémunaruviqunehi tayehe eta vématanerepianahi.

² Vémechajisihavare namutu ena vichamurianahi tíurujicavarahianahi te pipena. Péchajisinhavivare esu vichamuri Apia, émapa ema Arquipo, vicompañeroquenehi muraca tayehe eta vématanerepianahi.

³ Nuvaraha macatajicahehinehi ichape ema Tata Vicaiyaquene, émapa ema Viáquenu Jesucristo. Náijaracahehinehi táurivaina eta epanereruana.

Eta máurivahi ema Filemón

⁴ Néchaviparaca te nuyujarasirana, nuhasulupayachahi ema Viya.

⁵ Taicha nusamairiricahi eta pímiyanirávahi pémunaca ema Viáquenu Jesús, péhicahi yátupi. Pémunacahivare namutu ena machanerana ema Viya.

⁶ Nuyaseuchavacahi me Viya nayehe namutu ena téhicaavianapaipahi táichavenehi eta náimairahi eta pisuapirahi yátupi. Nuvaraha nácaicutiaraqueneánaini muraca tamutu eta táuriqueneana máijararuhavianahi ema Cristo Jesús.

⁷ Ichaperinehi eta núrissamurevahi picha piti nuparape. Tijarahinehi picha te nusamure eta nusamairirisirahí eta pímiyaniravahi pémunacavaca yátupi ena vichamuriana, étapa eta picurisamurechiravacahi ichape éna.

Ema Pablo máechejiucha ema Onésimo mayehe ema Filemón

⁸⁻¹⁰ Tiuri puiti, nuvaraha néchajjiucha ema Onésimo. Picatajicanu piperdo-nachinanu éma. Núti yátupiquenenuhi mayehenuhi apóstole ema Cristo. Tituparacanu hinéni nuvanecavihiní. Étasera eta vémunasiracacahi, nuyaseacavi nuti paure ichavica, nucaerataquenehi puiti máichavenehi ema Cristo. Puiti éma, nuchichahi némunaruquenehi te juca cárcel taicha éma téhica-haviripa eta visuapirahi ema Jesús.

¹¹ Ema maca Onésimo, cape juca másinequenehi, vahi máitaurahini eta picamusurairahi. Tijunahivare. Púitiserá éma, ichaperinehi eta máitátiranuhi. Eta máitátiranuhi núti tacutiyare eta máitátiraviyareva píti apana.

¹² Puiti névatacayare éma eta ara piyehe. Picatajicanu pijacapanuyare táimicutijiricava nútinayarehi nítecapauchavi piyehe.

¹³ Nuvarahahinenehi mánasihini eta ani nuyehe. Émainahini pítsivainahini eta pivarairahi píteca pítátinuya eta návihairahi te juca cárcel táichavenehi eta nucametarairuirahi eta máechajiriruvana ema Viya.

¹⁴ Nuvarahahinenehi níminasicha éma, nucuchapahisera tájahapuca picayemayare píti. Váhisera nuvaraha nupamicavi eta juca picatajisiránuya, nucuchapayare eta pijacapanuyare. Nuvaraha étachucha tásihaquene-yarehi eta táurivaina eta pipanereru.

¹⁵ Táitaurevaquene tijunijicavihi ánipi ema Onésimo. Émarichuserapuca jácani ema Viya tásihahi máisapahi ema macaheyarehi ema Onésimo. Puitiserá tétupiricavapa éma. Márajapainapa tichavayare eta ara piyehe, apajarahinapa eta máitátirivaya.

¹⁶ Váipa tácutimahi cape juca másinequenehi. Puiti pímahainapa eta máurivayare macamunucarevayare eta piyehe, taicha váchupa puiti vichamuripahi éma te mavahuana ema Viáquenu. Núti, ichape eta némunasirahi ema maca. Énénapa picaheyare píti apanava, tiápajucavainapaipa eta pémunasiraya ema maca.

¹⁷ Te yátupina pémunacanu eta nuchamurivírahi, pijacapinanuyare éma táimicutijiricava nútinayarehi pijacapa.

¹⁸ Te tatiarihinapuca eta máejecapiravahi piyehe, ticantevehipuca, nútinarine picobracha.

¹⁹ Nuvachachaviyare núti. Nuti Pablo, nútiquenehi nájuchahi eta nufirmachirahi puiti eta nuvachachiraviyare. Nuvarahahinéni némechavi píti apana eta pintevehi nuyehe eta nucatiuchiravihi.

²⁰ Tiuri, nuparape, picatajicanuchaha eta juca nuyasearuvíhi táichavenehi eta nucachamurivírahi mayehe ema Viáquenu. Picurisamuréchanuya.

²¹ Németeaca vahi táéñamavacare eta juca pisuapiranuyare. Eta tacahe, nucajurevíhi puiti. Taicha néchahivare eta vahi tácarichuimahi pítauchaya eta juca nuyasearuvianahi. Tatiarihiyare jácani apanayare píjararuvanayare píti tásihaqueneyare te pisamure.

²² Énerichuvare nuvaraha pétipirisanuya eta nítecapihaya. Étanecha nucuchapahi eta tasamacarevaina eta eyujaracasana mé Viya eta nítujiisiravaina nítecapauchahe.

Eta táichecuaraqui eta máechajiriruva ema Pablo

²³ Téchajicavi ema Epafras, ema nucompañerohi te juca cárcel, tapresuchaquenehivare ema apana eta véhisirahi ema Jesucristo.

²⁴ Énerichuvare téchajicaheana ena apamuriana viccompañeroanahi tayehe eta vématanerepianahi: ema Marcos, ema Aristarco, ema Demas, émapa ema Lucas.

²⁵ Nuyaseuchaparaca ema Viáquenu Jesucristo táetaviuchahíni eta iúricarevaya máicha.
Tamu tupa.

Eta apanavare carta nayehe ena israelítana téhicanahi ema Jesús, ticajare HEBREOS

Emá Jesús títametacahavi eta máechajiruvana emá Tata Vicaiyaquene

¹ Acane eta náitaresirahi ena viáchucanaveanaini, natiarihihi ena camuri-queneana santo profetana mavanaranahi emá Viya. Éna, náitametacahi ena achaneana eta máechajiruvana mapanereruanahi. Ichapemurivare eta náimeresirahi eta máitupajijiasiravanahi emá Viya. Apanapanenéjivare eta náimituresira eta máechajiruvana.

²⁻³ Puítisera viti vítareruanahi puiti juca añoana, emá Viya mavanecahi emá Machicha eta viyehe, títametacahaviya eta táequenereruana mapanereruana. Emá maca Jesucristo, Víyahivare éma, taicha machichahi emá Viya. Acane émahí tépiyacahi eta apaquehe, eta anuma, étpa eta vímahaqueneanahi puítí, máitauahirahi tamutu eta mapanereruana emá Maiya. Émarichuvare ticatuparahahi me Maiya eta émairahi téchahi tamutu. Puíticha émahí téchahi tamutu, máetaviuchahi eta máitupajijiasiravahi. Emá Cristo ticayehehi eta majaraivahi májararuchi emá Maiya. Eta máucupaisirahi eta viyehe, tímimatichahavipa eta máurivahi emá Maiya. Tásiha, te tamutupa eta macaepahairahi eta vipecaturana vimutu viti achaneana, tichavapa te anuma. Ánaqui emá Maiya macaejacapa te mayehe trono te mavaure.

Emá Cristo, éma ticapicahupanahi nayehe ena ángeleana

⁴ Tacahe, emá Cristo, éma ticapicahupanahi nayehe namutu ena ángeleana, taicha emá Maiya májaracahi eta ichapequene mávacurehi ticapicahuhi.

⁵ Taicha eta máechajiruvahi emá Viya mayehe emá Cristo, ani macahehi: “Píti yátupiquenévihi nuchicha. Puiti nucaejacavihi te piávacure” macahepa. Tacahe, ená ángeleana, tájina vahi máichahini: “Píti nuchichavi”. Váhivare máichahini: “Núti picaiyaquenehi”. Emá Viya máechajisihahi emá Cristo, ani macahehi: “Emá maca, emá yátupiquenehi nuchicha, taicha nútiquenenuhivare máiyanu” macahepa.

⁶ Tacahe, te macucupaicapa emá macarichuquene Machicha te juca apaquehe, macavanairipipa eta natsiusirayare nacunachirayare namutu ena ángeleana.

⁷ Énaserá ena ángeleana, táechajisihahi eta Sagrada Escritura, ani tacahehi: “Ena ángeleana vanairucanachucha éna. Nacutihí eta técativaca eta najuricativa te ticavanahiana. Nacutihivare eta yucu eta nasipasirayare jácani tamaeperajiqueneana” tacahepa eta Sagrada Escritura.

⁸ Ániserá tacahehi eta táechajisihairahi emá Cristo: “Píti yátupiquenevihi Viya. Máitavacacayahí eta aquenucavirayare. Tétavivaca eta tatupiruvairayarehi eta pivanairipi.

⁹ Píjaracayahí eta táurivayare eta náitaresira ena achaneana tíuriana tisuapavianaya. Énerichu píjaracayahí eta náicuñayahí ena achaneana váinarajiana masupajirairahanahi eta piyehe. Eta tacahe, emá Tata Vicaiyaquene, emá Ticachichavihi, tíjaracavihi tamutu eta picapicahuirayare

nayehe ena pichamuriana téhicavianahi. Tétavicavahi eta náurisamureva pícha”.

¹⁰ Ánivare tacahehi: “Píti yátupiquenévihi Viáquenu. Píti pítucahi eta táimahiya eta táepaniravahi eta apaquehe étapa eta anuma, pépiyuanahi te pivahuana.

¹¹⁻¹² Tayanapane títavayarehi tamutu eta juca vímahaqueneanahi, ichasi-paipahi tacutipaipa eta táichasivapaipa eta vimuiriha. Pítisera pinasiyarehi. Te pímahapa táuricapa eta pítsivachiraya tamutu, máejerareyarehi pícha. Picañapupujicainapa tamutu. Taicha píti, máitavacacaviyarehi eta pítare-sirahi” tacahepa.

¹³ Jararihi eta apana máechajiriruvahi ema Viya, ani macahehi mayehe ema Cristo: “Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa. Énasea ena ángeleana, tájina vahi máichahini: “Péjaca ani te nuvaure”.

¹⁴ Taicha ena ángeleana, mavanaranahi ema Viya. Éna, espírituanahi. Vahi énajivainahini nacapicahuhini. Eta natuparahahi éna, tijaneacahavianaya víti macuchucureanayare ema Jesús.

2

Tacamunuhi eta vipamisirava tayehe eta véhisirahi ema Jesús

¹ Eta tacahe, tituparacahe yátupina eta ecaravahuiraya eta ímitucasiqneanahi, machu émitisica, machu étaina taviuchahe vahi iúchucuhahini.

² Eta acane, ena ángeleana, éna títimucanahi ema víyahaini Moisés eta vanairipiana. Tétavicavahi eta tasuapacarevahi. Ticaicuñavaneanahi ena téjecapavanahi, timasuapanahi eta nasamaquenehi.

³ Puiti numetacahe: Tisuapacarepanahi eta véhiruhi. Tájina vahi ticaiticahémahi eta ícuñayare te váhipuca ecucamapuravahi eta iúchucuirayare. Taicha émarichuhi ema Viáquenu títapucahi máichuhavacahi ena achaneana eta náuchucuirayare. Tacahe, ena tisamanahi éma, tíchuhahavianapa víti.

⁴ Énerichuvare, ema Viya máimerecapahi eta tíamicareana, máicutiaranahi eta émarahi vanairuca, mavarairahi tisuapacareyarehi eta nametapiana. Énerichuvare puiti ema Espíritu Santo, éma tíjaracahavihi eta vítucaquenepachuyare apaesa vítauchayarehi eta vématanerepipachuhi víjarahi máicha.

Ema Jesucristo, achanehi eta máimahi eta máitesirahi te vitaracu

⁵ Ema Viya, váhivare énainahini matuparacavacahini ena ángeleana eta énaarayare téchanaya eta arairuyare avasare eta vicuchapaquenehi, étaripa eta véchajisihaquenyarehi.

⁶ Eta Sagrada Escritura, ani tacahehi eta táechajiriruva: “Píti Tata Viáquenu, tétavicavahi eta pijapanuirahavihi víti achaneanasami. Víti, váhinéni táunahini eta vítaresirahi. Váhivare véñamacarehini. Pítisera péñamavahi eta víyehe, váhivare pémitisicahavihini víti pépiyuanahi.

⁷ Te pépiyacapa ema viáchucaini Adán, vahi mácutinasivacahini ena ángeleana. Éna, nacachuricahi éma eta náitupajijiasiravana. Váhiserá tánasimahi eta nacachuriasirahi. Taicha pijapanuhavihi víti mámariequenehana ema Adán. Píjaracahavihi eta viávacurehi tajarahiquenehivare, tétavicavahivare eta vicapicahuirahi. Aquenucahavihi pícha. Véchahi tamutu eta pépiyuanahi.

⁸ Visuapacarehi viti tamutu eta pituparasirahavihi” tacahepa eta Sagrada Escritura.

Tacahe, téchajisihahavihi eta Sagrada Escritura eta véchirahi tamutu eta máepiyaruanahi ema Viya, tájina ticaejeraimahi, maicha ema Viya. Vuíchahasea vímahahini vicayamuricahini tamutu táichavenénahini eta visuapacarevahi.

⁹ Mararihisera ema Jesús. Tiúcupaícahi ánipihi te juca apaquehe, nacachuracaripa ena ángeleana eta náitupajjiasiravana. Eta máemunasirahavihi vimutu viti achaneana, ema Viya máimicaparichahavare te crusu vítivenehi. Téhesera te táequenepa, macaejacapa ema Jesús tayehe eta tajarahiquene mávacurehi tacapichahuene, táitsivahi eta macatajivairahi eta máepenirahi.

¹⁰ Ema Viya émarichuhi téchahi tamutu. Ema, tétavicavahi eta máechema-raivahi eta manerejisirahi ema Machicha eta macuchucuirahaviyarehi, tiámahaviyarehi eta te mávasa, viti machichanayarehi. Émaripa ema Jesús, eta macamichirahi tamutu eta mátajivana, títauchavahi tamutu eta matuparahahi.

¹¹ Eta máepachinachiraripa eta víachanevana, visiapamurihaipa ena machichanaveanahi ema Viya, vicutiripa ema Jesús eta machichairahi ema Maiya. Eta tacahe, ema Jesucristo, ichape eta máurisamurevahi eta viyehe eta majacapirahavihi maparapehaviyare.

¹² Eta te Sagrada Escritura, ani tacahehi eta máechajiriruvahi ema Cristo: “Nuvapinava eta néchajisihairaviyare, Tata, nayehe ena nuparapenevana. Nuvaraha nujirauchaviyareva, nacachanenuhivare éna”.

¹³ Ánivare tacahehi: “Tétavicava eta nucasíñavairahi mayehe ema Tata Nucaiyaquene”. Eta apana, ánivare tacahehi: “Ani návihahi núti, énapa ena pichichanaveanahi, ena pinerejiruanahi píjararunuanahi piti Tata” macahepa.

¹⁴ Viti achaneana, étanarichuhi eta vicaechera étapa eta vítine. Ene macahehi ema Jesucristo, macaechehi, macaitinehivare étarichuhi tacutihi eta vítine víti. Eta tacahe, eta máepeninahavihi, macapaquechihayarehi ema Váinaraji, émarichuhi muracaquenénihí eta máitupajjiasiravahi eta macaparesirahi.

¹⁵ Viti achaneana, ichapequenénihí eta vipisirahi eta vépenirayarehi, taicha vipicahi eta vícuñayare. Eta vipisirahi tahapapiricahi eta vítaresira. Émasera ema Jesucristo macaepaharipa eta vícuñayarehini, vaipa tápicacarehini eta viyehe.

¹⁶ Éma, eta máitesirahi, vahi étainahini táimitecahíni eta máimicatasiravacayarehi ena ángeleana. Yátupihisera viti achaneana, víti máimicataruanayarehi, taicha eta vicasíñavairahi eta mayehe, vicutirahi ema víyarahaini Abraham eta macasíñavairahi me Viya.

¹⁷ Eta tacahe, eta máucupaisirahi ema Víáquenu, tatuparacahi macaqueheyarehi eta víáquehe eta máitaresirahi, ticutihaviyarehi viti maparapenevana te tamutu eta vítaresirahi, yátupiyarehi eta máetaviuchiraya eta majapanuirahaviya, máetaviuchayareva eta macasíñacarevaya eta viyehe. Taicha macarichuhi ema tíyaseuchahaviparacahi te mamirahu ema Viya Macaiyaquene, macaepaháinahaviyarehi eta viviurevanahi táichavenehi eta vípecaturana viti achaneana.

¹⁸ Ema Jesús, ichape eta macatajivairahi, macaitsamarajiquenehi ema Váinaraji. Macamichahisera tamutu, vahi máisapavahini. Tásiha puiti, éma marataha tímicatachaviyare viti eta vicamichirayare eta viátajivana táichavenehi eta macaitsamarajirahavihi ema Váinaraji.

3

Ema Cristo tiápajucavahi eta macunachacarevapanahi mayehe ema víyahaini Moisés

¹ Nuvaraha numetacaheya eta apana, eti nuparapenaveana máepachiaruanahi ema Viya, máichuhaqueneanahivare eta esiapiraya eta mávasa. Nuvaraha epanerecha apaesa ácaicutiara eta táetaviuchirahi eta máitupajijiasiravahi ema Jesús. Éma, yátupihi mavaneruhi ema Viya eta máimitusirahaviyarehi eta juca véhiruhi. Macarichuhi ema tiyaseuchahaviparacahi te mamirahu ema Viya.

²⁻⁶ Ema Jesús, tétavicavahi eta máitauchirahi tamutu eta mavanahiana matuparacasivanahi me Viya. Énerichuvare ema víyahaini Moisés, títaurahivare eta mavanahi eta maconsejaraivahi, máimitusirahivare ena achaneana tamutu eta mavanairipiana ema Viya. Énerichuvare máechajisihahi tatiarihiyare eta apana mapanereruana ema Viya vuíchahasera máimerecachini ema Viya. Émasera ema Jesucristo, ema tiápajucavapanahi eta macunachacareva, macachuricahi ema víyahaini Moisés. Ticunachacarepanahi taicha machichahi ema Viya, ticatuparahahivare téchahavihi vimutu viti machanerana ema Viya. Émasera ema Moisés vanairucaichucha. Ema Moisés máichuhavacahi ena achaneana. Émasera ema Jesucristo, émahitépachinachahi eta viáchanevana viti machanerana, tihetamurichahavivare. Viti yátupihi machanerahavihi, te vímianava eta juca véhisirahi éma, vicasíñavavare eta mayehe, víurisamurevare eta vicuchapirahi eta viúchucuiraya te jena sáchehare.

Ema Viya tícuchahavihi eta vinarasihayare viti machanerana

⁷ Eta tacahe, nuvaraha ejaneacava. Ema Espíritu Santo, ani macahehi eta máechajiriruvahi tayehe eta Sagrada Escritura: “Puiti jena sache, esamayare esuapayare éti eta numetarapiana nútí.

⁸ Tacuija eta tamuracavaina eta esamureana. Vahi ecucuti ena achaneana mámaqueneanahi ema Moisés te mávapahi apaquehe. Ichape eta namasuapajiravahi eta nuyehe, náetaviuchirahi eta nacaitsamarajiranuhi nútí.

⁹ Tétavicavahisera eta nucamichiravacahi eta namasuapajiraivahi. Cuarenta áñoripahinéni eta nímechiravacahi eta tiáramicareana níchaqueneanahi, váhisera nasuapanuhini.

¹⁰ Eta tacahe, te táequenepa, nusemapa nayehe ena nani achaneana. Taicha éna, táetaviuchahi eta táejecapiravahi eta nasamureana. Vahi návarahahini náimatihini eta táurinaquene achene, nuvarahaquenehi nímechavaca.

¹¹ Nútí nétupiricaripahi eta náicuchihí nanarasihayarehini eta nuyehe. Tétavicavahisera eta náimiyusemasiranuhi. Tásiha, nucahepa nútí: Ena nánítátaji váhiquene nasiapaimahi tinaracanaimahí eta nuyehe” macahepa ema Espíritu Santo.

¹² Eta tacahe, nuparapenaveana, nuvaraha ejaneacavayare yátupina. Machu éhica eta napanereru ena masuapajirairahana, machu emutse-rahava íminajicava eta éhisirahi ema yátupiquenehi Viya Vicaiyaquene.

¹³ Étumechacacayaresera nayehe ena apamuriana echamuriana támutuhi sácheana puiti juca vicaijuheyare, apaesa nacuija navayuaca ena tivayua-rahiana tayehe eta pecatu, machu étaina táemuracacha eta esamureana.

¹⁴ Taicha viti machamuriahavianahi ema Cristo. Vijacapainasarepa eta vícuchihi mayehe éma, te vímijanavahi eta vicasíñairava mayehe, vétumechiravahivare eta véhisirahi.

¹⁵ Eta tacahe, nápechavavare némechahe eta máechajiriruva ema Espíritu Santo: “Puiti jena sache, esamayare esuapayare éti eta numetarapiana núti. Tacuija eta tamuracavaina eta esamureana. Vahi ecucuti ena achaneana mámaqueneanahi ema Moisés te mávapahi apaquehe. Ichape eta namasua-pajiraivahi eta nuyehe, náetaviuchirahi eta nacaitsamarajiranuhi núti” macahepa.

¹⁶ Puiti nuvaraha epanerechaya eta juca. Némechaheya ema víyarahaini Moisés eta macuchusiravacahi ena viáchucanaveanaini tayehe eta avasare Egipto. Tétavicavayaréni eta náuricacareva. Tamapurujisera eta nasamirahi eta mahu ema Viya, májjarasirahi eta mavanairipiana. Náimiyusemacapaipa éma eta namasuapirahi.

¹⁷ Tamapurujivare eta cuarenta áñohe eta macamichiravacahi ema Viya. Taicha tavayuacahi eta napecaturana éna, étapa tiviuchahi eta náepenarasi-rahahi te mávapahi apaquehe.

¹⁸ Eta namavairavacahi nasuapahini, éma manacapa eta mayehe juramento eta namaitujisravayare tisiapana nanaracahini eta mayehe.

¹⁹ ¡Ácaicutiara éti! Táichavenehi eta namasuapajiraivahi, puiti vímahaipahi eta namaitujisravahi tisiapana tayehe eta mávasa ema Viya.

4

¹ Tacahe puiti, vicasíñavayare me Viya apaesa vítujicava vinaraca mayehe. Ticamunucarehisera eta ejaneasiravayare muraca machu émpururecava éti, tijuricati vahi ecuitujicava esiapa.

² Taicha viti vicametacasihivare eta víuchucuirayare tacutihi eta nacame-tacasirahi éna. Tamapurujihisera eta nacametacasirahi eta náuchucuiraya-rehíni, váhiquenesera nasuapahini.

³ Yátupisera jararihi eta vinarasihayarehi, taicha ánipa macahe ema Viya: “Núti nétupiricaripahi eta náicuchihi nanarasihayarehini eta nuyehe. Tétavica-vahisera eta náimiyusemasiranuhi. Tásiha, nucahepa núti: Ena nánitátaji váhiquene nasiapaimahi tinaracanaimahi eta nuyehe” macahepa ema Viya. Vítisera viti visuapajirahiana, vítujicavayare visiapa tayehe eta juca vinarasi-hayare eta mayehe ema Viya.

Émarichuhi ema Viya máetupiricaripahi eta vinarasihaya, taicha tinara-capa éma, te táequenepa eta máítauchirahi macaemataneasirahi tamutu eta juca apaquehe.

⁴ Taicha eta Sagrada Escritura, ánipa tacahe: “Saisi sache eta macaema-tanerahí ema Viya. Téhesera te siétequenepa sache, tinaracapa éma, taicha máítaucharipahi tamutu” tacahepa.

⁵ Tásiha, nápechavavare némechahe eta juca máechajiriruvana ema Viya: “Váhiquene nasiapaimahi tinaracanaimahi eta nuyehe” macahepa.

⁶ Tacahe puiti, mávacuichahahi eta nanarasihayarehini ena tñapucanahi tisamanahi eta náuchucuirayare, táichavenehi eta namasuapajiraivahi. Étainapasera viávihayare viti véquenereruana visuapajirahanayare.

⁷ Ánaquiaparipahi eta táetavisiravahi eta áñoanahi te táequenepa eta namasuapirahi ena nani, máichapa ema Viya eta te Salmo, ánipa macahe: “Puiti jena sache, esamayare esuapayare éti eta numetarapi nútí. Tacuija eta tamuracavaina eta esamureana”. Eta macaheirahi eta juca, ema Viya máimicutiarachahi eta apana sache ticamapuravacarehi eta visiapirayare eta te vinarasihayare eta mayehe.

⁸ Yátupihí ema víyarahaini Josué macaitecapavacahi ena nani achaneana tayehe eta apaquehe natuparahahi. Váhisera étainahini eta nanarasihayare mavarahaquenehi ema Viya. Eta tacahe, eta máechajisihapa eta apana sácheyare visiapiraya viti.

⁹ Tacahe, jararihichaha eta juca tacapichahuquenehi vinarasihayare, táicuchihi eta viáchaneva viyehe viti machaneranahi ema Viya.

¹⁰ Eta visiapirayare vinaracaya eta mayehe ema Viya, yátupi máitavacacayare eta vinarasiraya, vaipa vicaematanémahi. Vicutiyaare ema Viya eta manarasirahi tayehe eta máemataneanahi.

¹¹ Eta tacahe, tavarahahi vétumechavayarehi tayehe eta visuapiraina éma, apaesa vítujicava visiapa tayehe eta vinarasihaya. Machu vémpureca eta vícuchihi, machu vácuti ena masuapajirairahanahi.

¹² Taicha eta máechajiriruva ema Viya, tétavicavahi eta táitupajijiasiravahi máicha, tamutuhi tarataha. Tacachuricahi eta tacasiriva eta espada. Tacapayacayarehi te amahe tayehe eta viáchanevana viti achaneana. Tímechahavi eta taurivahi eta visamureana. Tasiapavare eta vipanereruana. Tímitucahavare eta vétupirisieca eta vítaresirana.

¹³ Ema Viya máimarahacahi tamutu. Tájina vahi viratahaimahi viyumuruca eta víchaqueneanahi. Tamutuyarehi tíuchujica te mamirahu éma vépuyumiraureyarehi te máichulahavipa eta vimetauresiravayare mayehe.

Ema Jesús macarichu éma tiyaseurahi eta viyehe

¹⁴ Ema Jesús, yátupiquenehi Machicha ema Viya. Macarichuhivare ema tiyaseurahi eta viyehe taicha mávaháruhi puiti ema Maiya mávihahi te machacaya. Eta tacahe, vicaratacavayarehi muraca tayehe eta véhiruhi.

¹⁵ Éma, yátupihí tiyaseurahiquenehi eta viyehe, taicha tímatihavi eta vimatumevahi. Tijapanuhavisera, taicha éma énerichuvare ticatajivahi tamutuhi macaitsamaraji ema Váinaraji, tacuti eta macaitsamarajirahavihi viti. Váhisera macapecaturahini ema Jesús.

¹⁶ Eta tacahe, vicasiñavayarehi te viyujarasirana, vémeñahairavahi me Viya témunarahiquene. Taicha tétavicavahi eta majapanuraiva táichavenehi eta máemunasirahavihi. Éma, yátupihí eta máimicatasirahavi tayehe tamutu eta vicamunuiravana.

5

¹ Nuvaraha epanerechaya nayehe ena nácani catuparahanayare tiyujaracarahiana viyehe viti israelítana. Éna, nerejianahi te nataracu ena achaneana. Natuparacasiachuhi éna ticaitecapanayarehi me Viya eta námavahuana ena achaneana, etapa eta nanaquiruvana táichavenehi eta napecaturana, nayaseuchirayarehi ena achaneana mayehe ema Viya.

² Éna, tijapanurahianayarehi nayehe ena máiturereana énapa ena téjcapavana, taicha énarichuvare ticatajivanahi tayehe eta naeche máteji.

³ Étaripa eta nacatajivairana, ticamunuvanahi éna apana ticamavahuanahi mayehe ema Viya táichavenehi eta napecaturana.

⁴ Tacahe, mácani ticatuparahayare tiyaseurahiyarehi, vahi émajiriruvaimahi máichuhacasivarichuhi. Émahi ema Viya tíjaracahi eta matuparahahi mapicahuyarehi, tacutihi eta májjarasirahi ema víyarahaini Aarón eta matuparahahi macapicahuirahivare.

⁵ Ene macahehi ema Cristo. Vahi émajiriruvainahini eta macatuparahairahi tiyaseurahiyarehi eta viyehe. Émarichuhi ema Viya tíjaracahi eta matuparahahi mapicahuyarehi, taicha ani macahehi ema Viya: “Píti yátupiquenévihi nuchicha. Puiti nucaejacavihi te piávacure” macahepa.

⁶ Eta apana máechajiriruva, ánivare tacahe: “Nunerejicavihi píti piyaseurahiyare. Nutuparacavihi péchajirahiyare nayehe ena achaneana. Máitavacacayare eta juca pituparaha, picutiyare ema nuvanaraini Melquisedec” macahepa ema Viya.

⁷ Tacahe, ema Cristo, te matiarichichaha ani te juca apaquehe, tiyaseuchavahi te mayujarasirana eta me Maiya. Muraca eta máumitirahi, máiyahairahivare. Tiyaseuchavahi vahi máemitisicahini ema Maiya eta macaechepusirayarehi te máecari te táequenepa eta máepenirahi te crusu. Jéhesare, tisamcarehi te mayujarasirana, táichavenehi eta mavarairahi máitauca tamutu eta mapanereruana ema Maiya.

⁸ Taicha ema Cristo, machichahi yátupiquene ema Viya. Váhisera máeñmahahini. Váhivare majunijicahini eta macatajivairanahi. Macamichahi tamutu, macaravahirahi eta masupajiravahi.

⁹ Eta tamutuirapa eta máepenirahi, téchepucavarepa, tásiha maratahapa eta macuchucuhairahivare vimuti viti visuapanahi éma. Máitavacacayarehi eta vitaresiraya máicha.

¹⁰ Eta tacahe, ema Viya manacahi eta mávacure téchajirahi eta viyehe macutihi ema víyarahaini Melquisedec.

Ecunevahi machu ánasi ácuti ena amuyana

¹¹ Ichapemuriyare eta táechajisihaquenehi eta juca numetaruhehi. Ticajerahisera nítametacahehinehi taicha tétavicavahi eta tamuracavahi eta echutiana.

¹² Ánaquiaparipahinéni eta ecaravahirahi, iúrihaipahini puiti máestrohevacainaipahini. Ecamunuichahisera natiarihiyarehi nácani tiápecheaneanaya títametacaheanayarehi jácani vahi tácajerahini eta vímitucasivanahi me Viya. Puiti éti épíyacavaripahi máiturerehe. Ecutiripa ena amuyana, tacamunuhi vésichayarehi eta leche eta ticaitarecayarehi, taicha vuíchaha táitucachini tanicahini eta tinicacareana.

¹³ Taicha ena amuyana tíájicanachaha, vuíchaha técharecana, vuíchahavare napanerequenehaimahi eta táurivayare eta náitaresira. Ene ecahehi éti, apaesarichuhi ecaratacavahi eta éhisira eta táuriqueneana.

¹⁴ Énasera ena yátupihí eta nacaravahirahi, ena nacutihi ena ichanaruanahi. Téchavanaripa náitucaripa tinerejiuchavana eta táuriqueneana, náepurupa eta tamauriqueneana.

6

¹ Núti, nuvaraha ímianavayare eta ecajurusiraya eta échemaraivahi tayehe eta juca véhiruhi. Ichanaruhénahini tayehe, vaipa ecucutihini ena amuyana. Éhicapaini yátupi eta máimiturapi ema Cristo. Vaipa ecuápechavahini épanaequenereca eta táinapureanahi íárvahuanahi. Éti, vaipa ecamunuhini víápechahehini vímitucahehini eta éneuchiravayarehi eta epecaturana tímicapacaheyaréni, váhivare víápechavahini vímitucahe eta ecamunuirahi yátupina eta ecasiñavairayarehi me Viya.

² Éti ímatipa eta táicharacavahi te ecaicachasinapa, étapa eta táicharacavahi te nanacapa eta navahu te echuti. Ímativarepa tamutu eta vímiturapiana tayehe eta náechepusirayare ena náepenaqueneana, étapa eta ecuñaraqui máitavacayare.

³ Tásiha puiti, nímitucaheyare eta apamuri, te máíjaracanurichahapucaini ema Viya eta nítipajiasiravaya, étapa eta ecaravahiraya.

Ecunevahi, machu ínjicava eta véhiruhi

⁴⁻⁶ Páureanasamisera ena tínajicavanapuca eta véhiruhi, tichavanayarepuca. Taicha nácani natupíruvahi najacapa ema Jesús, tásiha énévanehi najirica te nasamure eta majacapiravacapa ema Viya, machichanaipa; mávahácaripa ema Espíritu Santo; tacurismurechavacavarepa eta máechajiriruva ema Viya; náimatiequenehavarepa eta náuricacarevaya tayehe eta arairuyare avasare, téhesera te nácani náinajicapuca eta náehisirahi, vaipa táitujicacareimahi tíápechavana náeneuchavahini. Taicha eta náinajisiravapa, náepuruipahi ema Machicha ema Viya. Tímicutijiricavaripa nacaecahihini éma te namirahu ena achaneana, nápechavahini náetataca te crusu éma.

⁷ Nímicutichayare. Eta macamirisirahi ema Viya eta tiquiva, táerapaisiravanehi tamutu eta apaquehe. Jararihi eta apaquehe, tíurinasarepa eta tasucucureruvana, maicha ema Viya.

⁸ Jararihivare eta apana apaquehe, tájina tasucucureruvaina. Itapepai-rechucha, ijarevare. Ema Viya máíjaracayarehi eta táicuñayare, tíjuinapa te yucu táicuchihi.

Vahi vínjicavaimahi taicha tatiarihi eta vicuchapaquenehi

⁹ Puiti, muracacaha apaesa eta numetasirahehi, nútisera nucasíñavahi eta eyehe eta vahi ínjicavaimahi, eti némunaruanahi nuparapenevanahi. Nucasíñavahi eta máíjarasiraheya ema Viya eta íuricacarevayare te macuchuhavipa.

¹⁰ Ema Viya tétavicavahi eta máitauravahi, váiparinehi máemitisicaimahi eta ecaemataneasiranahi. Étapa tímereuchahehi eta émunasiravacahi ímicatasiravacahivare ena echamurianahi tayehe eta juca véhiruhi. Máimahahi eta ímianavairahi ecaemataneaca.

¹¹ Nuvarahavare ímianavahini eta evapinavairavaca ámutu éti eta ecaemataneasirahi, yátupina ecasiñava mayehe ema Víáquenu, ecuchapaya eta machaviraya.

¹² Váhivare nuvaraha plújuhéna. Ímianavahi éhica ácuti ena echamurianaini yátupiquenehi eta nacasiñavairahi me Víáquenu, nacamichahi tamutu. Jéhesare, ecuticacasarepa éna eta ejacapiraya eta ícuchihi mayehe ema Viya.

13-14 Émechava eta acane eta máechajiriruvana ema Viya eta májjarasiravahi eta máuricacarevayare ema Abraham. Ánipa máicha: “Yátupiyare eta níjarasiraviyare eta piúricacarevayare, tásiha, níjaracaviyareva eta náichapemurivaya ena piámariéqueanea. Nútijiva nupamicava eta nítauchirayare eta juca néchajiriruvana níjararuviyare” máichapa. Ani tacahehi eta máechajiriruvana, taicha nájina apanainahini tipamicaimahi éma. Tásiha, émajiva tipamicavayare.

15 Ema víyahaini Abraham, ichapemurihi eta macasiñavairahi me Viya, eta macuchapirahi eta májjararuvanahi ema Viya. Tásiha, tétavicavahi eta máuricacarevahi. Máimahahivare ema machicha Isaac énapa ena mámarinaveana.

16 Tacutihi mácani achane, te maicha eta juramento, majurachahi te mami- rahu ema Viya, mavaraha ema Viya mapamicayarehi eta máitauchiraina. Te mácani achane majurachapuca, tájina táeñamavacarehini eta máitauchi- rayare.

17-18 Ene macahehi ema Viya, tíjaracavahi eta mapamisiravayarehi máitaucha eta májjarasirahaviyare eta viúricacarevayare. Tipamicavayare, taicha mavaraha vahi véñamavaimahi. Tímaticarehi eta máurivahi ema Viya. Tájina táeñamavacaréna eta vicasiñavairaya muraca eta mayehe, taicha éma vahi máitsivachaimahi eta mapanereruana, váiparinehivare tépiyahira- himahi. Tájina véñamavaimahi eta vicuchapirahi eta májjarasirahaviyare eta vícuchihi.

19 Eta juca vicuchapaquenehi, étara tétumechahavihi muraca te viáchanevana. Tétavicavayarehi eta vicasíñavaira eta vipauchirayare ema Viya, taicha mararihiyare ema tímisiapahaviyare te mávihahi ema Maiya.

20 Taicha ema Jesús, ema tínapumirauchayarepahi eta máetupirisirayare eta viyanirayarehi, taicha macarichuhi éma ticatuparahahi eta mayaseuchi- rahaviyare, macutihi ema víyahaini Melquisedec.

7

Ema Jesús, ema tiyaseurahi eta viyehe, macutihi ema víyahaini Melquisedec

1 Ema maca Melquisedec, émahí maparajuruhi ema Abraham. Taicha acane, te jena año, ema viáchucaini Abraham énapa ena masuntarurana téhacacanapa nacanarapa ena réyeana, navarairahi nacuchucuha ena námereruana, émaripa ema máneva Lot, énapa ena machichanaveana. Máitaha- cacavacahisera. Matiarihivare ema apana rey, táquenuhi eta avasare Salem. Émahí ema Melquisedec. Éma, mavanarahivare ema Viya, tiyujaracarahi éma. Tacahe, te tichavapa te mapena ema Abraham, mácapapa ema Melquisedec, mavarahapa mayujarauchaya ema Abraham.

2 Tacahe, ema viáchucaini Abraham títsirijicavapa. Májjaracapa ema Melquisedec eta diésmuri tayehe eta maganareranahi nayehe ena mánarana. Étahi eta mámahuvahi me Viya. Ema Melquisedec, aquenucahi éma tayehe eta avasare ticaijare Salem. Eta májjarare, te véchajiriruva ticaijare: “Ema Rey máuriquenehi, tájina táichava tamutu te mávasa”.

3 Ema maca Melquisedec, eta majurusirahi, vahi táimaticarehini nájahi- hipuca ena ticachichanahi, nájinavare majaneanaina. Váhivare táechacare eta máuchusira étapa eta máepenirahi. Énerichuvare, nájina ema máitsivainahini ema Melquisedec. Eta matuparahahi, ene macahehi puiti ema Machicha

ema Viya, nájina máitsivainahini. Máichecuaracquirehi eta mávacure tiyaseurahi.

⁴ Nuvaraha epanerequeneha. Ema maca Melquisedec ticapicahupanahi maicha ema Viya. Eta tacahe, ema viáchucaini Abraham máijaracahi eta diésmuri eta maganareruhi nayehe ena réyeana máitajaruanahi.

⁵ Acane, matiarihihí ema mámariequenéni ema Abraham, ticaijare Leví. Te táequenepe, matiarihihí ema mámariequenéni ema Leví, ticaijare Aarón, maparapehi ema Moisés. Tásiha, ema Moisés manacapa eta vanairipi, tatuparacahi namutu ena mámariequeneana ema Aarón, tiyujaracarahianayare éna. Tavanecahi ticobrarecanayare eta diésmuri eta navachayare ena najaneananarichuhi, mámariequeneánaini ema Abraham. Nájina tacaitirui-nahini.

⁶ Émasera ema Melquisedec, vahi mámarinahini ema Leví. Majacapahisera eta diésmuri mayehe ema Abraham, te tamutupa eta mayujarauchirahi éma. Tayanapane tímijachavahipuca ticunachacarepanahi ema Abraham táichavenehi eta máijararuanahi ema Viya eta mayehe ema Abraham.

⁷ Eta tacahe, vimutu vecha víti, mácani tiyujaracahahi ema apana, éma ticunachacarepanahi mayehe mácani mayujaracahiquenehi.

⁸ Tacahe, ena apamuriana tiyujaracarahiana tépenapaipahi, tásihasera namutu ticaitsivanapahi. Émasera ema Melquisedec vahi macaitsivahini. Puiti eta Sagrada Escritura táechajisihahi éma, máichecuaracquire eta máitare-sirahi.

⁹⁻¹⁰ Émaripa ema Leví énapa namutu ena tiyujaracarahiana mámariequeneanáinihi, natuparahaichuhi náicuchihí eta náuchusirayare mámariequeneanayare ema Abraham. Tásiha, tímicutijiricavahi éna apanava navachachahi eta diésmuri ema Melquisedec te jena sache eta mavachachirahi ema Abraham. Énarichuyarehini najacapaya eta diésmuri.

¹¹ Ena tiyujaracarahiana mámariequeneanáinihi ema víyahaini Aarón, éna tímítucanahi ena achaneana eta vanairipiana májureenahi ema víyahaini Moisés. Váhisera naratahaimahi napamicavaca ena achaneana náitaucha tamutu. Taicha te náitauchapucaini, váipapucaini tacucamunuini ema apana tiyujaracarahi macutiyarehi ema Melquisedec, vaipa mámariequeneánahini ema víyahaini Aarón.

¹² Émasera ema Viya máechajisihahi ema apana tiyujaracarahiyare matupararuyarehi. Émapa tímechahiviyare eta máitsivachirayare eta viyanihayare mayehe.

¹³⁻¹⁴ Jararihi puiti eta apana. Taicha ema Viáquenu Jesús, vahi mámariequeneánahini ema Aarón. Éma, máchucaini ema Judá. Te nataracu namutu ena majaneanaini, nájina émanainahini mayujaracarahihini. Ema Moisés vahi máechajisihahini matiarihiyare ema tiyujaracarahiyare, mámariequenehi ema Judá. Émasera ema Jesús táechajisihaquenehi eta Sagrada Escritura eta émairayare tiyujaracarahiyare.

¹⁵ Tacahe, vímatiequenehahi yátupi eta máitsivachirapa ema Viya eta viyanihayare eta mayehe, taicha ema arairuyare tiyujaracarahi, tacamunuhi eta macutirayarehi ema Melquisedec.

¹⁶⁻¹⁷ Taicha tacahehi eta máechajiriruvahi ema Viya, ani macahehi: “Nunerejicavihi píti, piyaseurahiyare. Nutuparacavihi péchajirahiyare nayehe ena achaneana. Máitavacacayare eta juca pituparaha, picutiyare ema nuvaraini Melquisedec” macahepa. Tásiha, vímatiequenehahi puiti

ema ticatuparahahi ema Jesús táichavenehi eta máitaresirayare máitavacacahi. Vahi étaparacainahini eta nájahhipuca ema máchucaini.

18-19 Tacahe, tépahapa eta vanairipiana náehiruinihi ena náinapureana tiyujaracarahiana, étaripa eta vanairipiana manaquiruanahi ema Moisés. Taicha tájina táratahaini tacuchucuhahavihini táichavenehi eta vimáitachirahini víti. Vahi tacaitecapahavihini me Viya. Puítiserá ema arairuhi, tétavicavapa eta macasiñacarévhahi éma. Émapa tacaitecapahavihi mayehe ema Viya.

20-22 Ena náinapureana tiyujaracarahiana, tájina eta júramentoinahini eta nacatuparahairahi. Émasera ema Jesús, ticapichupanahi eta mávacurehi taicha tíjaracavahi ema Viya eta juramento, te matuparacapa ema Machicha. Taicha eta Sagrada Escritura táechajisihahi, ani tacahe: “Ema Viya, váhiquene máitsivachaimahi eta máechajiriruvana. Majurachapa, ánipa macahe: Nunerejavíhi píti, piyaseurahiyare. Nutuparacavíhi péchajurahiyare nayehe ena achaneana. Máitavacacayare eta juca pituparaha, picutiyaare ema nuvanara Melquisedec” macahepa. Jéhesare ema Jesús, tétavicavahi eta macasiñacarévhahi eta máitachiraya tamutu eta máijararuvanahi ema Viya. Tiúripanahi eta arairu viyanihayare me Viya.

23 Tiuri, eta tayerevahi eta áñoanahi, camurianahi ena tiyujaracarahiana mámariequeneánaini ema Aarón, taicha ticaitsivanapahi, arairuanapahi éna. Étaserá tíchahi ena tépenanapaichucha, vahi náimiyannahini náitarechahini.

24 Émasera ema maca Jesús, máepenacacahi éma. Nájina nasiapahini máitsivainahini tayehe eta mávacurehi.

25 Tásiha puiti, macarichu éma maratahahi ticatiuchahavihi viti vicasiñanahi éma. Éma, tacaitecapahavíhvare me Viya. Máitavacacayarehi eta máechajiuichirahavihi taicha váiparinehi tépenaequenehahavimahi.

26 Tacahehi puiti eta macatuparahairahi ema Jesús téchajiuichahaviyare. Tétavicavahi eta vicamunuirahi éma, taicha yátupiquenehi santo, matapiravarehi éma. Tájinavare máimatiyahini macapeaturahini. Váhiquene mácutihini ena pecatumareana eta napanereruana. Puíticha éma mávihahi tayehe eta anuquehe anuma te machácaya ema Viya.

27 Éma, váhvare mácutihini ena apamuriana tiyujaracarahiana. Éna, nacamunuichaha tamutuyarehi sácheana nacapaca eta sárare náijuchaque-neyarehi, tásiha nativayarepa tiyaseuchavana tayehe eta napecaturaichu. Te tamutupa, tapanumavapa nayaseucha tayehe eta napecaturana ena achaneana. Émasera ema Jesús, étaheichuhi eta mavachachirahi eta vipecaturana vimutu, tíjaracavainapa eta máepenirahi te crusu.

28 Ena nani ajairana ticatuparahana tiyujaracarahianayarehi taicha eta vanairipiana, étaserá vahi nánasihini te juca apaquehe, náepenaequenehapaichucha eta náematanerepianaini. Émasera ema Jesucristo tiyaseurahiquenehi yátupíhi. Eta macatuparahairahi tacachuricahi eta nacatuparahairahi ena nani. Máitavacahivare eta máechajiuichirahívihi. Taicha ema Viya máichahi eta juramento eta matuparasirahi ema Machicha.

8

Ema Jesús ema vituparahahi téchajiuichahavihi viti véhicahi eta arairu viyanihayarehi

¹ Tiuri puiti, nuvaraha yátupi ácaicutiara eta juca: Ticunachacarepanahi ema téchajirahi eta viyehe víti. Taicha matiarahi te anuma, téjacahi éma te mayehe trono te mavaure ema Viya.

² Ánaqui, eta mátauchihahi eta mávacure tayehe eta yátupiquenehi Santuario tiávihahi te anuma, máepiyaruihema Viya. Vahi tácutihini eta náepiyaruihema achaneana.

³ Namutu ena tiyujaracarahiana, tatuparacahi náimerecayare eta námavahuana étapa eta nanaquiruvana. Éne macahehi ema Jesucristo, tatuparacahi máimerecaya eta námavahuyarehi, tiúripanahisera éta.

⁴ Ena náinapureana tiyujaracarahiana, nacarichuhi ena ticatuparahanahi náimerecayarehi eta námavahuana tacamunuqueneanahi eta nayujarasirahi eta te Templo te jena Jerusalén. Émasera ema Jesucristo, tájina vahi mácamunuimahi ticamavahu tayehe eta Templo. Taicha éma, anuma eta mayujarasirarehi.

⁵ Énaserá ena tiyujaracarahiana te juca apaquehe, eta náemamacasareana te nayujarasirana, étachucha eta tavasíhi eta tiávihanahi te anuma. Véchahi eta tavasichucha, taicha ema Viya máemechahi ema viyahaini Moisés eta yátupiquene Santuário tiávihahi te anuma. Ánipa maicha: “Pépiyacayare eta Santuário tavasiyare picha eta tiávihahi te anuma nímeruvihi te piávihaipe te cerro” macahepa.

⁶ Émasera ema Jesús, tiúripanahi eta máematanerepi taicha te anuma eta máechajuchirahavihi. Éma, téchajirahi tayehe eta arairu matratune ema Viya. Eta arairu matratune, tiúripanahi eta táinapurehi, taicha tétavicavahi eta viúricarevayarehi taicha máijaracahi eta máechajiruva ema Viya.

⁷ Jéhesare, eta táinapuru matratune, vahi náitauchaimahi ena achaneana. Taicha te náitauchahipucaini, vahi tácamunuhini máijaracahini eta apana arairu.

⁸ Émasera ema Viya, eta máimairahi vahi náitauchahini, tiápechavavarepa eta máechajiruvahi, ánipa macahe: “Tatiarihiyare eta sáchevayare tépanavayare arairu eta nutratune nayehe ena achaneana israelítana.

⁹ Vaipa tácutimahi eta natratunehi nayehe ena náchucanaveanaini te jena sache te nuvecuhainapa te nuvahu, núcuchucavacapa tayehe eta avasare Egipto. Váhisera náitauchahini eta nutratunehi eta nuyehe. Eta tacahe, nujuni-jíacavacapa.

¹⁰ Eta nutratuneyare nayehe ena nani israelítana te jena sáchevare, nunacachutichayare te nachutiana eta nuvanairipiana. Najiricainapa te nasamureana. Jéhevarénapa núti nacaiyaqueneyare. Tásiha, éna, jéhevarénapa nuchichanavequeneanainapa.

¹¹ Vaipa nácomesaimahi ticaimitucasiana nayehe ena nachamuriana, énaripa ena naparapenaveana eta náimatiranuyare. Núti yátupiquenenuhi náquenunuhi. Namutuina títatinuanayare: ena amaperuana, ena ichanaruana, énapa ena ichavícana.

¹² Énerichuvare nuperdonachavacainapa núti eta napecurana navainarajivana. Vaipa nécharairicaimahi eta natapiravanaini” macahepa ema Viya.

¹³ Tacahe, ema Viya, te máechajisiha eta arairu matratune, tépaharipahi eta táinapurénihí. Éta táemitiaruripahi. Vaipa tasuapacarehini.

Eta santuário tiáviuhaini te Jerusalén, tavasíhi eta táimahi eta Santuário tiáviuhahi te anuma

¹ Tacahe, eta táinapuiruhi matratune ema Viya nayehe ena nani náinapureana tiyujaracarahiana, tatiarihíhi eta nayeherepichuhi te tiyujaracana me Viya. Jéhesare, te jena Jerusalén eta távihahi eta santuario nayujarasirare.

² Ani tacahehi eta táimahi te náepiyacainapa: Eta tnapuca cuarto ticaijarehi “Lugar Santo”. Tacapicahuquenehi éta. Éta távihahi eta candelero étapa eta mesa távirare eta pan sagrado.

³ Eta apana cuarto, ticaijarehi “Lugar Santísimo”. Éta tétavicavapanapa eta tacapicahuira. Tatiarihíhi eta ichapequene cortina.

⁴ Te tachacaya eta ichapequene cortina, tatiarihivare eta mesa náijuchirare eta incienso, amairiha oro. Te tajuhe, tatiaríhi eta cajune, amairihavare oro, tacaunaiyahi eta márimeana ajureca eta diez mandamiento, étapa eta cajeta amairihavare oro tacaunaiyahi eta maná, étapa eta matsucurupa ema Aarón eta tímarutsicaipahi.

⁵ Te táinahu eta cajune, natiarihíhi ena apinana ángeleana, ticaijare “querubín”. Eta juca querubín táimahi eta majaraivahi ema Viya. Tásiha, eta napavana táepacuhicahi eta cajune, eta náepusaisirarehi eta iti tavachasarehi eta napecaturana namutu ena achaneana. Jararihivare eta apamuriana tayereruvanainíhi eta santuario, váhisera nuvaraha nájuchahini te juca puiti.

⁶ Eta tacahehi eta táimahi eta náemamacasareana eta te santuario. Tacahe, tamutu sácheana ena tiyujaracarahiana tisiapaparacanahe tayehe eta tnapuca cuarto eta náitauchihaparacahi eta náematanerepiana.

⁷ Étasera eta te apajuhe, táetaviuchahi eta tacapicahuvahi. Macarichuhi tisiapa ema náquenumuri ena tiyujaracarahiana. Étaherichuvare tisiapa te étana año, mámayarepahi eta táitine eta sárareana. Éta tivachachayarehi eta mapecatura ema tisiapahi, étapa eta napecaturana ena achaneana.

⁸ Émasera ema Espíritu Santo mavaraha vímatiequenehaya eta juca. Eta cortina, éta tiávimirauchahi eta Lugar Santísimo, vahi táisapahini tisiapana ena achaneana. Puítisera vísapacarehi víti eta vítecapauchaya ema Viya.

⁹ Tamutu eta juca tacamunuhi vímatiequenehayare. Eta jena náichasareanahi ena nani tiyujaracarahiana eta nacamavahuirahi, vahi tacanarasinávachahini eta napanereruana ena téneuchavanahi, apaesa tiúriyarepahini eta náítaresirana.

¹⁰ Vahi étaparacainahini tayehe eta náchaneva, taicha eta námavahusana éna, tinicacareanachucha téracarechucha, étapa eta nacasipavahuira te tisiapana tayehe eta Templo. Eta júcana nayeherepianahi, vahi tímiyanavaimahi. Taicha te tépenapa ema Cristo te crusu, máitsivachahi ema Viya eta vítecapauchirayarehi éma.

Tiúripanahi eta yátupiquenehi Santuário tiáviuhahi te anuma

¹¹ Puítisera, tímercavapa ema Cristo. Jéhevare éma, yátupiquenehi tiyujaracarahi eta viyehe. Tétavicavahi eta táuriva eta víáchanevana máicha. Eta Santuario te anuma távihahi eta mayujarasirare, vahi tayahena te juca apaquehe tamauriquenehi. Te jena, tamutu tíuríhi, tipachinahivare. Tétavicavahi eta tacunachacareva. Tacachuricahi eta santuario nayujarasirare ena apamuriana tiyujaracarahiana, náepiyaruchucha ena vicitiqueneana achaneana.

¹² Ema Cristo, jéhevare éma máviahahi tayehe eta yátupiquene Lugar Santísimo te anuma. Vaipa mávavahuhini eta táitine eta sárareana chiqueru, chívana-hipucaini. Eta mávavahuhi éma, étaquenepa eta máitine. Étaherichuhi máicha éma. Vimutuhisera viti macuchucureanahi. Tásiha, máitavacacaipa eta vítare-siraya.

¹³ Ena nani tiyujaracarahiana náepusapaicarichaha te náinahu ena nachipejiqueneanahi. Eta náepusapairuhi, eta táitineana eta toro étapuca eta chívachicha, étapa eta tsimapama tayehe eta esena chiqueru náijureasa. Eta júcana, tépachinachinavacahi eta náqueheana, apaesa táisapacarepa nasiapa tayehe eta Templo.

¹⁴ Étasera eta máitine ema Cristo ema matapiravarequenehi, tétavicavahi eta táitupajijasiravahi. Tacachuricahi eta náepusapairuhi ena nani tiyujaracarahiana. Taicha taratahahi tacaepaha tamutu eta vipecaturana, viperdonachacarepa táicha. Tímicutijiricavahi tisipacahavihi tamutu eta vipanereruanaini tamaeperajiquenehi, étaripa eta tímicapacahaviyarehini. Puitisera eta vítaresiraya, émainapa vícaemataneacainapa ema yátupiquenehi Viya. Ema Espíritu Santo máetumechahi muraca ema Jesús eta máijarasiravahi tímicapacava te crusu, taicha mavarahahi eta mávavahuyarehi me Viya.

Emá Jesucristo, éma yátupiquenehi abogado eta veyehe

¹⁵ Puíticha ema Cristo, éma yátupiquenehi veyehe abogado, téchajiuruca-havihi tayehe eta táequenereruhi matratunehi ema Viya. Eta máepenirahi ema Cristo, mavachacharipahi tamutu eta vipecaturanaini viti máichuha-queneanahi éma: viti, énapa ena náinapureanaini tijacapanahi eta táinapu-rénihi matratune ema Viya. Tásiha, yátupihí eta macuchucuirahaviya, máijarachavi eta vítaresiraya máitavacayarehi.

¹⁶ Nuvaraha nímicutichinahe: Mácani achane te manaquicahi eta testa-mento, májúchapa eta mavarairahi májaracasichavacayarehi ena machichanaveana te máepenapapuca. Eta tasuapacarevayarehi, eta ley tacamesae-quenehayarehi tacayasasereru te yátupipuca tépenaripa ema achane. Te yátupihí tépenaripahi, eta testamento tisuapacarehi.

¹⁷ Vuíchahasera tasuapacarehini eta testamento, te vuíchahahi tépena ema maca tépiyacahi.

¹⁸ Tacutiquenehi, eta táepaniravahi eta táinapuiruhi matratune ema Viya, tacamunupa tépena eta sárareana, apaesa navehaya eta táitine.

¹⁹ Ema víyahaini Moisés macametarapipa tamutu eta vanairipiana nayehe namutu ena achaneana. Tacahe, mavehapa eta titsi lana máitiapu-sichapa eta yucuqui, máepusapaisihayarehi eta ítiama, táitineana eta chiqueruana, chívana. Tativa máepusasa eta libro tiámahi eta vanairipiana. Máepusasacavare ena achaneana náurujuvanahi.

²⁰ Tacahe, mametacavacapa éma: “Eta juca ítiama népusaruhehi, eta táicutiara eta íjarasiravahi ítauchayare tamutu eta matratune ema Viya eta eyehe éti” máichavacapa ema Moisés.

²¹ Énerichuvare ema víyahaini Moisés máepusasacavare eta ítiama te tapaja eta santuário étapa tamutu eta náemamacasareana te nayujarasirana.

²² Taicha tacahehi eta vanairipi: Ticaepusasahayarehi te iti tamutu-yaréni eta náemamacasareanahi eta nayujarasirayarehi, náepachiasihayarehi. Taicha te vahi tacuepusaicavahini eta iti, váhivare tacuepahahini eta pecatuana.

Eta máitine ema Cristo tacaepaha eta pecatuana

²³ Tacahe, eta juca náemamacasareanahi ena nani, tacamunuhi náepusacayarehi eta nayujarasirayarehi apaesa tapachinavacahini. Eta santuário te Jerusalén náepiyaruhi ena achaneana étapa eta náemamacasareanahi, náicutipaqueneanahi eta tiávihanahi te anuma. Étasesa eta Santuário tiávihahi te anuma, tacamunuhi eta apana iti tasivachaquene, tacachuricayarehi eta iti náepusasaruhi tayehe eta santuário tiávihahi te juca apaquehe.

²⁴ Ema Jesucristo, tájina máimatiyahini mayujaracahini eta te jena santuário te juca apaquehe. Étaquenehisera masiapa eta mayujarasirayare eta te Santuário tiávihahi te anuma. Puíticha matupihmirauchahi ema Viya eta mayaseuchirahavihi víti.

²⁵⁻²⁶ Ema maca tiyujaracarahi te juca apaquehe, áñopahi eta masiapiरा tayehe eta téqueneha cuarto Santísimo. Ticamavahupahi eta táitine eta sárare, vahi máitinenarichuhíni éma. Émasera ema Cristo, étaherichuhi eta máepusaisirahi eta máitine. Vahi mápepejiricavahini te áñoana. Te mápepejiricavahini, énerichuhivaréni tiápepejicavahini eta máepenirahi puiti juca táepaniravahi eta apaquehe. Ema Viya mapanerequenehapa eta táichararacavayarehi tamutu. Te máimahapa tiuri, mavanecapa ema Machicha te juca apaquehe. Tímitecahi eta macaepahairayarehi eta pecatu, máijarasiravaripa eta máepenirayarehi. Étaherichuhi máicha.

²⁷ Víti achaneana, eta víchararacavahi eta vítaresirahi, étaherichuhi eta vépeniraya vimutu. Te táequeneпа, járajapainapa eta viyaseserehiyare.

²⁸ Énerichuvare, eta máítaresirahi ema Cristo, étaherichuhi eta máepenirahi te crusu eta macaepahairayare eta vipecaturana viyehе viti camuriqueneana achaneana. Yátupisera tiápechavaya tímerecava. Váipasera étaimahi tímiteca mavachachaya eta pecatuana. Eta tímitecayare éma, tépanahaviyarepa viti véhicanahi vicuchapanahi éma eta macuchucuirahaviyarehi.

10

Eta máitine máepusairuhi ema Cristo, tacarichuhi tarataha tépachiacahaviyare

¹ Eta mavanairipiana ema Moisés, étachucha táicutiarahi eta arairuyarehi viyanihayare me Viya, eta tiúrichahaviyarehi. Ticutihí eta tacuna eta yucuqui. Vahi tánasihini máitavacacainahini eta mavanairipiana, taicha vahi táurichahini ena achaneana nácani tivarahanahi ticaijuheana ema Viya, taicha váhivare nasamavahini eta náuchucuirahi, tayanapane nápepejiricavahini te áñoana eta nacapasirahi eta sárareana.

² Te yátupinahini táurichavacahini eta náichirahi eta nayeherepi, vahi nacuapepejiricavahini nacamavahuhini ena tiyujaracarahiana, énerichuvare ena achaneana tisamavanaripahini eta náuchucuirahi.

³ Taicha tacamunuhi nápechava te áñoana eta nacapasirahi eta sárareana, taicha tiápechavana ticapecaturanahi. Étaripa eta táepeniranahi eta sárareana táemecharairicavaca eta nacapecurairaripa.

⁴ Taicha eta táitineana eta toro, étapa eta chivu, yátupiquenehi váhiquene táratahaimahi tacaepaha eta pecatuana.

⁵ Étasesa te tiúcupaicayareipahi te juca apaquehe ema Cristo, ánipa macahe mayehе ema Maiya: “Píti Tata, vahi pácamunu eta nucamavahuhini nunaquicavahipucaini eta piyehе, táitinehi eta sárareana. Píti pijaracanuhi eta juca

náquehehi. Váhiserá táemepururecavaimahi eta píjarasiranuhi. Eta náquehe tisuapaviyare jácáni pivanesiranuya.

⁶ Váipavare pácamunu eta nacamavahuirena ena achaneana eta sárareana, náijuchahini te pimirahu, táimicapachahini eta tacaepahairayarehi eta pecatuaana.

⁷ Núti, tímitecanuhi puiti nítauchayare tamutu eta pivarahaqueneanayare eta nuyehe, piti Tata. Nusuapaviyare te tamutu eta pituparasiranuhi tacajuquenehi eta te Sagrada Escritura” macahepa.

⁸ Tiuri puiti, nuvaraha ecaicutiarayare eta vaipa mácamunuhini ema Viya, váipavare máurica nácamavahuhini eta sárare náijuchahipucaini ena achaneana, navarairahi táepahayare eta napecaturana, tayanapane nayehepichucha eta náitauchirahi eta vanairipiana.

⁹ Énerichuvare, nuvaraha epanerechavare eta juca máechajiriruva ema Cristo: “Tímitecanuhi puiti nítauchayare tamutu eta pivarahaqueneanayare, piti Tata”. Eta tacahe, vímatiequenehahi vaipa tácamunuhini eta táinapure nayujarasirahi ena achaneana. Taicha ema Viya máitsivachahi eta apana, arairupa, taicha ema Cristo macarichuhi máitauchahi eta mavarahaqueneana ema Maiya.

¹⁰ Jéhevare, ema Viya tépachiacahaviripa máichavenehi ema Cristo, eta masuapirahi máitauchirahi eta mavarahaqueneana ema Maiya, máijararecahi eta náquehe eta máepeninahavihi. Étaherichuhi máicha, vahi mápepejiricavahini.

¹¹ Namutu ena nani tiyujaracarahiana vahi nanaracahini. Tamutuhi sácheana ticamesavana nanacahi eta námavahuana. Vahi táechuquihahini eta náichirahi eta juca. Tájinasera váhiquene tacaepahahini eta pecatuaana.

¹² Émasera ema Jesucristo étaherichuhi eta máichirahi. Váhiquene mápepejiricavahini. Tacahe, téjacaripahi te mavaure ema Viya.

¹³ Énerichuvare puiti eta máejasiraipahi, macuchapavacaripa eta macaepuyusiraya ema Viya te mamirahu ena ticitianacanahi éma.

¹⁴ Taicha eta máepenirahi, eta mámvahuhi me Viya eta náquehe. Tétavicavainehi eta tajacapacarevahi me Viya eta máepachiasihahaviyarehi viti máichuhaqueneanahi. Váhiquene tacamunuhini mápepejiricavahini.

¹⁵ Ema Espíritu Santo, étarichuhivare tacutihí eta máechajiriruvahi, tímame-tacahavihi.

¹⁶ Ani macahehi: “Eta nutratuneyare arairu nayehe ena nani te jena sácheyare, níjaracavayare nunacasamurechayare te nasamureana eta nuvanairipiana. Najiricainapa te napanereruana”.

¹⁷ Ánivare macahe: “Yátupina eta nucaepahairayare eta napecaturana. Vaipa néchaimahi eta natapiravanaini étapa eta navainarajivanaini” macahepa.

¹⁸ Tacahe, nuvaraha ecaicutiara eta juca: Te yátupihí táepahairahi eta pecatuaana eta mámvahuhi, vaipa tácomesahini tápepejiricavahini nacamavahuhini ena apamuriana.

Vicasíñavayare eta vicaijuheiraya ema Viya

¹⁹ Tacahe, nuparapenaveana, vácasiñava yátupi eta vítecapauchirayare ema Viya tayehe eta mávihahi Santísimo, táichavenehi eta máepachiasirahavihi te máitine ema Jesucristo.

²⁰ Véhicayare eta juca arairu achene mavejiaruhi, yátupi eta tacaijuhériahi me Viya. Tájinapa táchejimirauchahavihini taicha mavejiacahi tamutu ema Cristo, eta máepenirahi te crusu.

²¹ Tacahe éma, yátupiquene tiyujaracarahi eta viyehe taicha émaquenehi téchahi namutu ena machichanaveana ema Viya.

²² Eta tacahe, tatupiruvayarehi eta visamureana eta vicaijuhériaya ema Viya. Vácasiñavaini eta mayehe, vahi véñamavaimahi taicha éma masipacaripahi eta visamureana apaesa tacuija vitapiravaina tayehe eta vipecaturana. Tájinapa eta táchipejicahavihini eta vipecaturana, tímicitijiricavahi vicavahini eta te tapachinaquene une.

²³ Eta tacahe, vímijanava vétumechava eta véhisirahi. Vahi viyacujimahi. Yátupina eta vicuchapira eta vícuchihi taicha ema Viya máitachayare tamutu eta májararuvahi eta viyehe.

²⁴ Puiti vétumechavayare vímicatajiricacayare eta tápajusiravaina eta vémunaraivanaya. Vímitucacayareva eta víchirayare eta táuriqueneana.

²⁵ Váhivare viyacujimahi eta viúrujisiravana. Vahi ecucutihini ena vichamuriana, tinerejicavanahi mayanarahanahi te viúrujicava. Vétumejiricacayaresera, tavetijipa puiti eta vímairapa eta tánehirapa eta masacheraya ema Viáquenu eta machavirayare.

²⁶ Taicha te ímijanavaichuchapuca icha eta pecatuana, tayanapanehi ímatiripahi puiti eta yátupiqueneana, eti émpururecaripahi ema Cristo eta ímicapasirahi táchavenehi eta epecaturana. Páurehesami, taicha nájina apanainahini ecasiñahini.

²⁷ Ena nani náempururecaripahi ema Cristo, tétavicavahi eta tamuracavaya eta náicuñayare. Tisiapanayare eta táíñehiquene yucu tájiturequene. Eta juca eta náicuchihi návihayare ena ticatianacanahi ema Viya.

²⁸ Tacutuhi acane eta macaícuñaira mácani téjecapavahi tayehe eta mavanairipiana ema Moisés. Te natiarihíhipuca apinanahi, mapananahipuca ena testigoanahi, tímahanahi eta máejecapiravahi, tatuparacahí nacapacavaneyarehi ena tuparairucana. Vahi tijapanucaremahi éma.

²⁹ Tásiha, tétavicava muraca eta náicuñayare ena témepururecanahi ema Machicha ema Viya, ¿masi? Taicha náempururecahivare eta máitine máepusairuhi, nacaecahivare ema Espíritu Santo, námépururecahivare eta máemunasiravacahi ema Viya. Váhivare návarahahi náimati eta máitine máepusairuhi, étara vivachahi eta majacapirahaviyarehi ema Viya.

³⁰ Vimutuhi vecha eta máechajiriruvahi ema Viáquenu, ani macahehi: “Núti tituparacanu nícuñasiravacayare. Nútichucha némecharecavacayare éna”. Tásiha, ánvare macahehi: “Ticayaserehianayare ena achaneana te numirahu”.

³¹ ¡Tipicacarequenehi eta náicuñayare ena témepururecanahi te mamirahu ema Viya, tamutuquene máimaha!

³² Németeacasera ímijanavayare éti tauri eta éhisirahi. Écharichuhi eta ítaresirahi cape juca, te épanavainapa eta ejacapirahi eta juca tajarahiquene máechajiriruva ema Viya. Ichapemurihi eta ecatajivairahi naicha ena ticatianacaheanahi. Ecamichahisera éti.

³³ Etiarihíhi éti ecametacasihi ecaehanahi te namirahu ena achaneana. Etiarihíhivare éti ímicatacanahi tayehe eta náichavaquenevanahi ena ticaehanahi.

³⁴ Ejanuhivare nácani ticaeratanahi te cárcel. Tacutiqene ecurisamurechavachucha eta naverejisiraheanahi eta ímahaqueneana, taicha échahi éti tatiarihíhi eta ímahaqueneanayarehi te anuma. Tétavicavahi tíuripanahi tayehe, máitavacacahi éta.

³⁵ Tásiha puiti, vahi ecuyacujihini. Étumechavasera eta ímitusirahi eta máechajirirua ema Viya. Éta tíurichaheyare, ejacapayare eta mavachachiheyare ichapequeneya.

³⁶ Ecayehechahavare paciencia. Ímijanavavare ítaucha eta mavarahaquenehi ema Viya, tásiha yátupina ejacapainapa eta ícuchi eta mayehe.

³⁷ Taicha eta Sagrada Escritura, ani tacahehi: “Vaipa máyeremahi márjapainapa ema Cristo ema vicuchapaquenehi”.

³⁸ “Nácani natupiruvahi eta nasamureana, ticasíñanuanayarehi eta náitaresirahi. Énaserá nácani tichavacuejehavanahi, nucaerajicavacayare táicha” tacahepa.

³⁹ Vítiserá vahi vácutimahi ena tichavacuejehavanahi, énajivaya túmitaequenehavanayare. Vítiserá víti vímijanavanahi eta vicasiñavaira me Viya, vicuchuhayarehi eta víáchanevana táicha.

11

Tétavicavaya eta viúricacareva te vicasiñavahi mayehe ema Viya eta vítaresira

¹ Te yátupi visuapa eta máechajirirua ema Viya, vicasiñayare éma, vicasiñavavare eta mayehe eta máitachirayare tamutu eta májjararuvanahi, tayanapanave vuíchaha vímahaimahi.

² Ena víáchucanaveanaini, tétavicavahi eta nasupajiraivahi. Macunachavacahi ema Viya taicha eta nasupajiraivahi.

³ Tacutiqene, te visuapa eta máechajirirua ema Viya, vímatiequeneha eta máepiyasirahi acane eta juca apaquehe, tájinarichahasera eta táimahacarehini. Visuapahi tamutuhi máítaucha eta mapanereruhi, máetupirisirahi tamutu eta vímahaqueneanahi puiti.

⁴ Émaripa ema víyahaini Abel, eta masupajiraivahi mayehe ema Viya, tétavicavahi eta tajacapacarevahi eta mámavahuhí mayehe ema Viya, tacachuricahi eta mámavahuhí ema maparape Caín. Tásiha, ema Viya macametarapihi eta majacapacarevahi ema Abel. Puíticha, májinaripahinéni, ánaquiparipahi eta máepenirahi, tanasihisera eta tacunachacareva eta masupajiraivahi.

⁵ Étapa eta masupajiraivahivare ema víyahaini Enoc, vahi máepenamahini te juca apaquehe eta mayaniraya te anuma. Tamutuhi eta máquehe mámahi tayehe eta apana vítaresira, eta mámirahi ema Viya. Eta Sagrada Escritura táechajisihahi eta macurisamurechirahi ema Viya. Táitusiava, mámapa éma.

⁶ Tásihasera víti, te tájinahi eta visuapajiraivainahini me Viya, váiparinehi vicurisamurechaimahi éma. Eta vicaijuheiraya éma, tativayarehi tacamunu yátupina eta vicasiñavaira mayehe, eta majacapirahaviya, viúricacareyare máicha.

⁷ Émaripa ema víyahaini Noé, ticasíñavahi me Viya. Tásiha, tijacapacarepa. Taicha masupahi eta mavanecasivahi máepiyasirayarehi eta ichapequene pacure, eta macuchucuiyavayarehi éma, énapa ena machichanaveana tayehe eta ichapequene une. Tájinaichahanéni ecutiararenahini

eta taquivairayarehi. Máichuhavacavarepa ena apamuriana achaneana nasiapavare. Ticaicũñanapasera, taicha eta namasuapirahi.

⁸ Émapa ema víarahaini Abraham, masuapahivare eta máichuirahi ema Viya, máijarasirayare eta apana apaquehe mávasayarehi. Tacahe, ema Abraham tiúchucapa te mávasaini, váhinéni máimatihini távihapuca eta macaijuheharehi. Ticasiñavahisera me Viya eta mámirahi.

⁹ Eta máitecapirahi, tímiyanava eta macasiñavairahi me Viya. Manasipa macavasahi eta apaquehe máijararuhi ema Viya, tayanapane vuíchaha mayehenahi eta apaquehe. Tájinavare mapenainahini. Cárpachucha eta mapenahi. (Ema machicha Isaac, ene macahehi eta máitaresirahi, émapa ema mámari Jacob. Taicha éna, énerichuvare natuparacahi eta juca apaquehe návasayarehi.)

¹⁰ Émasera ema Abraham, vahi máeñamavahini. Yátupihí eta macasiñavairahi, ticuchapavaichucha eta máijarasirayare ema Viya eta mávasayare máepahacacayarehi eta tásihaqueneyarehi te mavahuana ema Viya, máetupiriruhi tamutu.

¹¹ Ésuripa, esu Sara ticasíñavahivare mayehe ema Viya, máitachayarehi eta máijarasirava eta sucachichairaya, ichavicachicharipahinéni. Macheruhivare ésu. Máijaracahisera ema Viya eta suchicha taicha eta susuapirahi eta máitachirayare ema Viya tamutu eta máijararuvanahi eta suyehe.

¹² Tacahe, ema Abraham ichavicachicharipahivare, mapaenumavapa ticachicha. Tásiha, tiúchucanapa ena camuriqueneana mámariequeneana. ¡Tétavicavahi eta nasimutuvahi! ¡Vaipa natupachacarehini!

¹³⁻¹⁴ Tacahe, namutu ena nani néchajisihaqueneana, tímiyanavana eta nasuapirahi ema Viya tamutu eta náitaresiranahi. Tétavicavahi eta nacasiñavairahi eta máitachiraya eta máijararuvanahi. Te navapureana, náimahapa eta návasaqueneyarehi. Tásiha, vahi náetupiricavahini eta nanasirayare te juca apaquehe. Navarahaipahi náitecapauchavaneyarehi eta arairu avasare natanujiriruhi.

¹⁵ Éta tímicaecherachahi vahi nacatiequenehahini eta apaquehe návínénihi, taicha vahi náechajisihahini nachavahini.

¹⁶ Natanucahisera eta arairu apaquehe tíuripanahi, eta táviahahi te anuma. Eta tacahe, tétavicavahi eta máurisamurevahi ema Viya eta nayehe, táichavenehi eta nacasiñavairahi eta mayehe éma. Taicha máicuchavacahi eta arairu návasayarehi, émairahi nacaiyaquenehi éma.

¹⁷ Apanavare eta máimerechirahi ema Abraham eta masuapajiravahi, te ticavanahipa eta macapasirayarehi ema machicha Isaac, máijuchirayarehi eta macamavahiraya me Viya. Vahi macatiequenehahini ema émanaracavahi machicha. Taicha yátupihí eta masuapirahi ema Viya eta máechajiriruva, ani macahehi:

¹⁸ “Ema pichicha Isaac, níjaracayare ena camuriqueneana mámariequeneanayare”.

¹⁹ Taicha ema Abraham máimatihí eta tamutuirahí máituruequeneha ema Viya. Maratahahi macaechepuca ema Isaac te táequenepe eta máepenirahi. Téhesera te macapacayarepání ema machicha, ema Viya téchajicapa. Vaipa máisapahini eta macapasirayarehi, taicha máimahapa yátupihí eta masuapajirairavahi ema Abraham. Tásiha, tímicutijiricavahini máechepurénahini ema amaperu Isaac.

20 Émapa ema Isaac, yátupihivare eta macasiñavairahi me Viya eta máitachirayare eta máechajiriruvana. Te ichavicapa, mabendiciónchapa ema machicha Jacob émapa ema maparape Esaú, mavarairahi najacapayare eta táurinaqueneana máijararuanaya ema Viya.

21 Émaripa ema Jacob, yátupihivare eta macasiñavairahi me Viya. Te tiánehipa eta máepenirayarehi, énerichuvare mabendiciónchapa ena apinana machichanaveana ema José, mavarairahi najacapayarehi eta náicuchiana. Te títapiricapa tamutu, téneuchavapa me Viya, ticayupaicaripa eta te mayupairiqui.

22 Émapa ema José, te tiánehipa eta máepenirayarehi, macaechajiriruvapa eta náuchusirayare ena israelítana tayehe eta apaquehe Egipto, nayanirayare te apaquehe náicuchihi. Eta macasiñavairahi mayehe ema Viya, macavanairipipa eta náunasirayarehi eta máperana éma, tásiha, námayarehi te náuchucapa.

23 Énerichu eta nasuapajiraivahi ena ticachichanahi ema Moisés, ticasíñavanahi mayehe ema Viya. Vahi napicahini eta mavanairipiana ema rey eta nacapapajisirayarehi ena amuyana ajairana. Eta náimairahi eta máurinavahi ema amuya, nayumurucapa éma. Mapana caje eta nayumurujisirahi.

24 Tásiha, náitucahi eta sucajurusirahi esu esena rícoquenehi, taicha ésu, machichahi ema rey.

Tacahe, ema Moisés, te ichanarupa énerichuvare tisupajirahihini. Vahi macatiequenehahini eta majunijiasirayarehi esu ticajurucahi.

25 Váhivare mapicaracahini eta macatajivairayarehi eta macachanerayare ena majaneana machaneranahi ema Viya. Vahi tavayuacahini jácani tájiparacana pecatuanahi te apaquehe.

26 Ticasíñavaipahi éma eta tatiarhirayare eta máimahaqueneanayare táitsivanayare eta macatajivairaya táichavenehi eta macatiuchirahi ena machamuriana, tacutihi eta macatiuchirahavihi víti ema Cristo. Tájinahinéni mácamunuhini eta táimahaquenehi tayehe eta avasare Egipto.

27 Táichavenehivare eta masuapajiraivahi ema Moisés, vahi mapicacahini eta masemirayare ema rey tayehe eta Egipto ema macuchucuiravaca, mámvavacahi ena machamuriana israelítana. Tétumehavarichucha taicha ticasíñavahi eta majaneasiravacaya ema Viya, tayanapane máimahasi ema Viya.

28 Eta masuapajiraivahi ema Moisés, máitachapa eta mavanairipi ema Viya. Mavanecavaca ena machamuriana nacapacayare eta uvesachicha, nátsiquiriacaya eta iti te tapaja eta napenana, apaesa vahi macuesirujicavaca ema ángele ema tiámayarehi eta náepenira ena náechavimuri te jácani peti.

29 Énaripa ena machumariana ema Moisés, eta nasuapajiraivahi, naratahahi nánueca eta ichape Mar Titsi. Témunahiricavahi tiájiji te túpiricuha eta nayanihayarepahi. Tásiha, ena masuntarurana ema rey te Egipto, navarahavarepa tiánuecana. Tichavapasera eta une. Téricanapa namutu.

30 Táichavenehivare eta nasuapajiraivahi ena israelítana, tiáquipaicavapa naicha eta tayuchamarana eta avasare Jericó, te jena siétequenepe sache eta návicruarasirahi eta avasare.

31 Ésuripa esu Rahab túhusini, eta susuapajiraivahi, vahi suépenahini te tépenaracanapa ena masuapajirairahanahi. Taicha ésu sucatiuchapa ena vanairucana me Josué.

³² Nuvarahahineni numetacahe tamutu eta nasuapajiraivanahi ena apamuriana: ema víyarahaini Gedeón, ema víyarahaini Barac, ema víyarahaini Sansón, ema víyarahaini Jefté, ema víyarahaini David, ema víyarahaini Samuel, énapa ena víyarahaini profetanaini. Nararihivare ena apamuriana, tétavica-vahivare eta nacasiñavairahi mayehe ema Viya. Váhisera nunaca támutu te juca eta nájareana.

³³ Eta nasuapajiraivahi éna, nararihihi ena tíhacananapahi ena nánarana te avasareana. Nararihihi ena apamuriana aquenucanahi, tatupiruhi eta nagobernachirahi eta návasana. Ema Viya, eta majaneasiravaca ena apamuriana, máeratajacachavacahi eta tajacana eta táíñehiqueneana sárareana.

³⁴ Ena apamuriana, macaemahainehivare eta táijurequene yucu te jórnú. Ena apamuriana, macuchucuhavacahi te navaraha náechatinucavacayarehi ena nánarana. Nararihivare ena matumerahanahi, máetumechavacahisera eta nacaemataneasirahi éma. Ena apamuriana, tétavicavapa eta náitupajijiasiravapahi tayehe eta guerra, náitahavacapaipa eta ichapequeneana ejército ena nánaranahi.

³⁵ Natiarihivare ena esenana, eta nasuapajiraivahi, mápechava máimichava ema Viya títarecana ena najaneananaini náepenaqueneanahi. Natiarihivare ena apamuriana náemépenahi eta nacatajivairasamihi. Nacamichahisera tamutu taicha eta nasuapajiraivahi, namavarairahi náinajiacahini ema Viya, navarairahivare náimahayarehi eta táuricacarequene eta náitaresirayare te náechepucapa.

³⁶ Natiarihivare ena apamuriana, ichapemurihi eta nacaecahirasamihi, ticaestanahivare, táimitiacavacahivare te cadena tayehe eta cárcel te nacaerataiyapahi.

³⁷ Ena apamuriana, natupisiruanapahi te márijahiana eta nacapasirapahi ena achaneana. Ena achaneana, eta návarairahi náiminajicayarehi eta náehisirahi ema Viya, nayuchatihecavare. Ena apamuriana náechatinucavacapahi te espada. Napanajiricavaca ena apamuriana, náimijunavacavarepa te napanana. Tiyananapa témestajiricavanapaipa. Tépacuchavanapa te taparumachichana eta sárareana eta náechuriasirapa eta nacamuirahaquene. Tájinapa naviyavapahini taicha eta napaurevavacapaipa.

³⁸ Ena nani páureanasamí, ichape eta napicauchacarevainihi. Vaipa náuriahini eta najunanairisirahi te mávaphiana apaquehe eta tataracuana eta máriana, nacapenajuechapahi eta enurujuheana.

³⁹ Jéhesare, namutu ena nani néchajisihaqueneanahi, ticatajivanahi eta náitaresirahi. Majacapavacaipahi ema Viya táichavenehi eta nasuapajiraivanahi. Vuíchahasera náijahúchavahini nacaijaracasihini eta náicuchianahi me Viya.

⁴⁰ Taicha mavarahahi éma tihetamurichahaviyarepa viti véquenehanahi visuapanahi ema Jesús énapa namutu éna. Vicuticacayarepa eta viúricacarevayare vimutu.

12

Vicutiyare ema Jesús eta macamichirahi tamutu

1 Puíticha viti apanavare vicamichayare tamutu eta vicatajivairana, vácutivaca eta nacamichira ena nani náinapureanahi téhicanahi ema Viya. Taicha puiti éna tímararacahavianahi viti tájahapuca táicharacavahi eta vipaisirahi viti. Eta tacahe, tituparacahavi vínajicayarehi eta táitiasirahavihi

eta tájiparacana, tíamaparaurahiana tayehe eta pecatuana. Tacahe, vicami-chayare tamutu, táurivaya eta vicaemataneasirahi ema Viya, apaesa vijacapa eta vícuchihi.

² Vicutiyaeva ema Viáquenu Jesús. Éma, tímitucahavihi eta véhiruhi, éma tínapuisinahivihivare eta masuapajiraivahi. Tayanapane ichape eta matsirihahi te máimahapa eta macatajivairayare eta macaetatairayare te crusu, vahi machavacuejehavahini. Tétumechavahisera taicha máechahi éma tatiarihihi eta táitsivayarehi. Tétavicavahi eta máurisamureva eta máejasirahi te mayehe trono te mavaure ema Maiya.

³ Puíticha éta, epanerequenehayare éhicayareva eta macamichirahi ema Jesús tamutu eta macatajivairahi naicha ena ticatianacanahi. Ene ecahe-yare éti, vahi ecuyacujihini, étumechavayaresera eta éhisirahi éma.

⁴ Táitaurevaquene éti, tájinaichaha ímahahini ecatajivahini táimicapacahehi-pucaini eta ínajiasiraipa eta tájiparacana te juca apaquehe pecatupaire.

⁵ Vahi ecuemitisica eta máemunasirahehi ema Viya te jácani máemechaesiraheana táichavenehi eta machichaheirahi. Taicha ani tacahehi eta Sagrada Escritura: “Piti nuchicha, vahi picueñamava jácani máemechaesiraviana ema Viya, mavarairahi máetupiricayare eta pipanereruana. Váhivare picuina-jicava tayehe eta maconsejachiraviana.

⁶ Taicha éma, máemecharecayarehi nácani máemunaruanahi machichana-veanahi” tacahepa.

⁷ Tacahe, ecamichayare éti jácani máemechaesiraheyare ema Viya táichavenehi eta máemunasirahehi eti machichanaveana. Tácuti mácani achane, te matiaríhi ema machicha, tímerecavahi eta tacaiyairahi eta mapena eta máemechaesirahi ema machicha, mavarairahi máetupiricayare eta mapanereruana.

⁸ Yátupíhi eta máemechaesirahavi ema Viya vimutu viti machichanaveana. Téhesera te tacuíja ímaha eta máemechaesiraheana éma, máímerecaripa éma vahi yátupinahini machicháhénahíni.

⁹ Tacutihi eta vijurusirahi víti te amuyahavirichaha. Témecharecavahi ena ticachichahaviana, visuapavacapa táicha. Tásiha, tavetijipa eta visuapi-rayarehi ema Tata Vicaiyaquenehi apaesa éma tíjaracahaviyarehi eta táurivaya-rehi eta vítaresiraya.

¹⁰ Ena ticachichahaviana, ánipirichu eta náimitusirahavíhi jácani eta navarairahi éna viúriyarehi nayehe ena achaneana. Émasera ema Viya, tíúripanahi eta vímitucasivahi mayehe. Éta tíápajucava tíúrichahaviyare. Téchinchahaviyarehivare éta. Mavarahahi vicutiya-rehi eta masantuvahi éma.

¹¹ Jéhevare, te tatiarihipuca eta vicaemecharahirana, vahi viúrisamurémahi táicha. Ticatihi visama. Téhesera te vétupiricava táicha, tétavicavayarehi eta viúricarevaya te visamureana taicha tatupiruhi eta vítaresira.

Tétavicava tavarahacareva te visama eta máechajiriruva ema Viya

¹² Tacahe, nuparapenaveana, nutuparacahe étumechacaca nácani nayacu-jihipuca. Ímicatacaca eta etupihaira muraca eta éhisirahi.

¹³ Énerichuvare eta ecaijuheira eta me Viya, etanucayare tatupiruina eta ecaijuheira eta me Viya, etanucayare etupiruina eta eyanirayare. Vahi ecuepiñuñuica, machu náevejuca ena matumerahana ena téhicheanahi te équene. Táuri eta íamiracacaina, apaesa nacaravahuyare náetupirica eta napanereruana, náetumechavavare énajiva.

14 Tacuijavare ecuichiravainahi nayehe namutu ena achaneana. Yátupina eta epachinavaina te esamureana étapa eta iúriya eta ítasesirana. Taicha te vahi tíurihi eta ítasesirana, vahi eratahaimahi itecapaucha ema Viáquenu.

15 Ejaneacavaicha yátupina, machu etiarhipuca eyacujihí, tásiha émepurureca eta máimicatasirahe ema Viya. Tacuija eta ecuimipananajicava eta esemirana. Machu tapareacavaca ena echamuriana eta evainarajivana, tacuti jácani sucureca máurirahana, tapareacayare eta apana sucureca táurinaquenehi, táimicapacapa.

16 Nacuijavare te etaracu nacuveha esu apana esena. Nacuija nacuepuru jácani tipicauchacareanahi. Vahi ecucuti ema achane ticaijare Esaú. Eta mavarairahi tíjahúchava tinica, máijararecapa eta máicuchinihi mayeheníhi, taicha éma, máechavihi ema maparape.

17 Écharichuhi éti, te táequenepa, te mavarahainipa majacapa eta mayehe bendición ema maiya, vaipa majacapacarehini, mametainipa tíyahahi. Vahi maratahaini ticajimuyacahini ema maiya.

18 Éti, tájina étaparacaina eta napisirahi ichapequenehi ena achaneana israelítana, acane te náitecapauchapa eta cerro Sinaí. Eta jara cerro, tatiarihihi eta yucu timuruhi te tápusi. Énerichuvare te távihahi eta timapicuquenehi, távihahivare eta táíñehiquene emarere.

19 Muracaquene eta machuja ema ángele. Muracavare eta mahu ema Viya eta máechajisiravacahí éna. Ichapequenehi eta napisirahi ena tisamanahi. Eta tacahe, tiyaseserecanapa vaipa macuechajicavacahini.

20 Eta napicacarasiravahi, navaraha tichavacuejchavana. Ichapequenehi eta tipicahucareva eta cerro, taicha tatiarihihi eta muraca vanairipi, ani tacahehi: “Ecapaca nácani achane, jácanivare sárare tíápanapuca te juca cerro. Ecapacavaneyarehi te márijahi, te váhipuca ticayubarayarehi te lanza” tacahepa.

21 Tacahe, tétavicavahi eta táíñehiva, émaripa ema Moisés ani macahehi: “Nuyayacarenecha eta nupisirahi” macahepa. Nuparapenaveana, numetacahe: Tájina étaparacaina eyehe tamutu eta juca tipicacareanahi.

22 Étisera tachichaheanapa puiti eta mávasa ema Viya Vicaiyaquene, ticaijare Arairu Jerusalén*, eta távihahi eta cerro Sión te anuma, te náurujisihavahi ena camuriqueneana ángeleana eta najjrauchirahi ema Viya.

23 Éti esiapapa eta nasimutuva ena ecutiqueneanahi machichanaveanahi ema Viya. Ecajucunavare eta nalista. Natiarihipa ánaqui eta náchanevana ena machichanaveana nápenaqueneana. Natupiruhi eta náitaresirahi. Tipachinavaqueneanaripahi puiti, sántohivare. Matiarihivare ema Viya, yátupiquenehi Juese viyehe vimutu víti.

24 Matiarihivare ema Jesús ema tiyaseurahiquene eta viyehe. Émahi ema tiámahi eta arairu matratune ema Viya. Émaripa máepusaicapa eta máítine tasipahacahaviyarehi, apaesa vijacapacareyarehi me Maiya. Eta máítine ticunachacarepanahi tayehe eta máítine ema víyarahaini Abel.

25 Eta tacahe, échapavaicha éti. Vahi ecuepuru eta máichuarapianahi ema Jesucristo. Machu ácuti ena tépuruanahi eta mavanairipiana ema Viya, máimiturapianahi ema Moisés. Étapa tímicuñacavacahí éna. Vivetijinapapuca víti

* **12:22** Te pivaraha pecha eta apana tayehe eta Arairu Jerusalén, pitanuca te libro Apocalipsis 21.2-27 étapa 22.1-5.

eta vícuñayare, te vicaepaquecupuca eta máichuarapiana puiti ema Viáquenu, taicha éma tiásihahi te machacaya ema Viya te anuma.

²⁶ Taicha eta acane, eta mahu ema Viya, tétavicava eta tamuracava. Tiyaya-carehi taicha eta apaquehe. Puítisera, ani macahehi éma: “Étaherineyare tiyayacare nicha eta apaquehe. Váhisera tácarichuimahi. Éneyareichuvare te anuma” macahepa.

²⁷ Eta juca máechajiriruvahi, tímaticareipahi eta táitavirayare tamutu jácani tiyamuricanahi máepiyaruanahi ema Viya te juca apaquehe. Tacarichu tanasiyare jácani máitavacacaqueneana taicha mayamurianahi.

²⁸ Étaripa eta mávasa ema Viya, mavarahaquenehi máimiávihahavihi, máitavacacaquenehi éta. Eta tacahe, vihasulupayachaparaca éma. Vétaviu-chainavare eta vipicauchiraya éma. Tásiha, vicurisamurechaina éma eta vivapinava ichape eta vijirauchirahi éma.

²⁹ Taicha ema Viáquenu macutihi eta yucu, maratahahi máitaequeneha mámainuca.

13

Vicurisamurechayare ema Viya

¹ Tiuri, nuparapenaveana, vahi ecucainajiruva eta émunajirisiracacahi, táichavenehi eta echamuricacairahi te mavahuana ema Viya.

² Vahi ecuemitisicava eta táurirayare eta ejacapiraya ena echimarana te epenana. Taicha tajuricati ángelianainapahi nácani tipaipiuchaheanahi, éta vahi ecuimatihí.

³ Énerichuva échayareva nayehe ena ticaeratana. Ejamanuvaca éna, táimicujiricavahini étinahini ecaeratahini ecachanevacahini. Énerichuvare ejapanuyare nácani námejapanuráruana taicha éna étarichuhi eta náqueheana tacutihi eta iáqueheana éti.

⁴ Ámutu epicauchacaca éti ecaimaqueneanaripa: eti esenana, étipa eti ajairana. Taicha máimaha tiuri ema Viya eta evehacacairahi. Tacuijasera eta échipeacava eta evehacacairahi ena apanana. Ema Viya máicuñacayarehi nácani tivehacacanahi vahi nacuchapahini náitauchavahini, énapa ena ticayepacacana.

⁵ Váhivare tacuvayuacahe eta plata. Taratarichu tacurisamurechahe jácani íturevahi ecayehequenehi. Ema Viya ani macahehi eta máechajiriruvahi: “Vahi nujunijicavimahi, váhivare némitisicavimahi” macahepa.

⁶ Tacahe, vicasiñavayare mayehe ema Viya te viyaseaca. Ani vicaheyare te visamure: “Ema Viáquenu ema tímicitacanuhi. Vahi nupicaímahi jácani náichiranuhi nácani achaneana” vicaheyare.

⁷ Échavayare ena tímítucaheanapaini tímisamaheanahini eta máechajiriruva ema Viya. Natupiruhi eta náitaresiraini. Éti, epamicava ecutiyaere éna eta nacasiñavairahi me Viya.

⁸ Ema Viáquenu Jesucristo, vahi máitsivacha eta máurivahi eta viyehe. Manasihi puíticha, étapa eta aparahiyare.

⁹ Eta tacahe, vahi ecuisapava ecuehica eta jácani apanapenejiqueneana náimiturapiana. Tiúripana étumechayare eta esamureana, táichavenehi yátupiquene eta máemunasirahavihi ema Viya. Étapasera eta nayeherepiana tayehe eta tinicacareana, vahi étaparacaina taicha tájinachucha támicatavacahini ena ticayeherepianahi.

10-11 Eta nayeherepinihí ena tiyujaracarahiana tayehe eta santuario te Jerusalén, natuparahahi eta nanicasarehi eta námavahuana ena achaneana. Étahi eta navachachahi eta nacaemataneasirahi. Étasera eta sárareana námavahuanahi, navarahahi tacaepahayarehi eta napecaturana, éta, tituparacavaca vahi nacunicahini. Étachucha eta táitine mámahi ema náquenu ena tiyujaracarahiana tayehe eta téqueneha cuarto Lugar Santísimo. Étasera eta táqueheana, nájuchaqueneyarehi te tachachacu eta avasare. Vítisera, mararihi ema apana tiyujaracarahi eta viyehe, apanapavare eta mayujarauhichirahavi. Vahi énaparacaimahi ena náinapureana tiyujaracarahiana.

12 Ema Cristo, ticatajivahi eta máepenirahi te tachachacu eta avasare, mavarairahi máepachiacahaviyarehi viti achaneana tayehe eta máitinerichu éma.

13 Tacahe puiti, vínajicavayarehi eta nayeherepiana ena vijaneanana. Vahi étaparacaina viyehe. Yátupina véhicayare ema Jesús. Tayanapane vicatajivayarepuca, vicutiyaresera éma eta macatajivairahi.

14 Taicha te juca apaquehe, tájina vahi táyeremahi eta avasareana étapa eta tayeherépiana. Vítisera tachichahavipa eta avasareyare arairuyare. Apanainapa eta viyeherepiana víchaqueneanayare. Tétavicava eta vijamura-chirahi viyápávane.

15 Tásiha puiti, eta véhisirahi ema Jesús, tavaraha eta vijirauchiraparacayarehi ema Viya tamutu sácheana, yátiana. Te jácani tájahapuca víchararacava, váhasulupayachavare éma. Eta juca eta víamavahuhi eta mayehe. Éma vicavapajayarehi.

16 Énerichuvare, vahi ecuemitisica eta íchirahi eta táuriqueneana. Ecajiyareva ena echamuriana eta ecayehequeneana. Eta tímicutijiricavaipa eta íamavahuhi me Viya. Éta ecurisamurechirahi éma.

17 Esuapayareva nácani tímítucaheanahi, evapinavayare nayehe eta esuapajiraivahi. Taicha éna, tijaneacaheanahi eta íáchanevanahi éti. Náechahi éna eta ticayaserehianayarehi te mamirahu ema Viya. Ecurisamurechavaca éna eta esuapajiraivahi, tavapinacarénapa eta nacaemataneasirahena éti. Vahi ecuimipanerechavaca eta eyacujiva, emasuapajiraivapuca.

18 Eyaseuchanuyare núti te eyujarasirana. Nucasiñavaipahinéni núti táurivaipahi eta nupanereru. Tájinapa níchiravainahini. Nuvaraha níchayare eta táuriqueneana nayehe namutu ena achaneana.

19 Nuvarahasera eta eyaseuchinanu me Viya, máisapanuhini éma níjahúchavahini nuchavahini eta eyehe.

Ema Apóstole mayaseuchavacahi ena machamuriana me Viya

20 Ema Viya, tétavicavahi eta macanarasirahavihi eta vipanereruana. Éma tétavicavahivare eta máitupajijiasirava taicha macaechepucahi ema Víaquenu Jesucristo te máecari, apaesa émayarehi yátupiquenehi Pastoryare, tijanearahi viyehe viti machichanaveana. Tisipahacahavipa eta te máitine apaesa máitavacacayarehi eta vicachanerayare éma.

21 Núti nuyaseuchahe me Viya, máimicatacahehini ítauchayare tamutu eta mavarahaqueneana, íchirahi eta táuriqueneana apaesa ecurisamurechahini éma te tamutu eta ítaesira eta éhisirahi ema Machicha Jesucristo. ¡Máitavacacayare eta vicunachira ema Cristo! Amén.

Eta táichecuaraqui eta natuparacasivahi

²² Nuparapenaveana, nuvaraha nuyaseacahe ácaýehéni paciencia tayehe eta juca nuconsejarapihi eta eyehe. Ánipichichahi nájurehi tayehe eta juca nucartane. Jararihisera camuríqueneana eta apana nuvarahahi numetaruheyarehini.

²³ Numetacahevare ema viparape Timoteo tíuchucuharipa te cárcel. Te máitecapavanepuca éma, nucachaneyarepahi te níteca eta ara eyehe. Nuvarahahi nímahapanáhe.

²⁴ Néchajicahe emutu eti ejanearahiana ena vichamuriana. Échajisina-nuvaca namutu ena vichamuriana vicutiqueneanahi tisuapajirahianahi te jácani návihahi éna. Ani te juca, nucachanevaca ena vichamuriana náiteruana te Italia. Téchajicaheanavare éna.

²⁵ Nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha. Amén.

Tamutupa eta juca néchajiriruvahi eyehe.

**Eta macartane ema Santiago nayehe ena
majaneanana machamurianahivare,
náejanerepairuanahi te avasareana, ticajjare
SANTIAGO**

1 Nuti Santiago, mavanaranuhi ema Viya, mavanaranuhivare ema Viáquenu Jesucristo. Nuvaraha nucaitecapa eta juca néchajiriruva eyehe emutu eti nujaneanana israelítana éjanerepairuanahi te tamutu avasareana.

Eyaseacayare eta ítupajjiasiravaina

2-4 Nuparapenaveana, nuvaraha nuconsejachahe: Te tatiarihinapuca eta ecatajivairana puiti juca ítasesirahi, vahi ecucaínajiruva. Evapinavachucha, ácasíñava mayehe ema Viya. Taicha te yátupina ecasíñava mayehe, vahi tiáquipaicahémahi ema Váinaraji. Énerichuva ácamicha yátupina jácani apana táitecapaureheanaya. Ácuti nácani achaneana náitucahi ticaratacavana. Mavarahahi ema Viya tátupiruvahini eta ítasesirana. Eta tacahe, te tatiarhipuca eta ecatajivairana, ecaurismurechavachucha. Evapinavaya, taicha iúripunayare eta iúchucuirayare.

5 Tacahe, te tatiarihinapuca eta téchacare, te váhipuca íturuequenehahini, eyaseacayare ema Viya eta ítupajjiasiravaina. Éma, tíjaracaheyare, taicha tájina mayavana éma. Váhivare ticajachahavimahi eta viyaseasirana jácani vicamunuqueneana.

6 Yátupinahisera ácasíñava me Viya eta eyaseasiranayare eta ítupajjiasiravaya. Vahi ecueñamava mayehe. Taicha te éñamavapuca, tímicutijirica-vaipahi ecutihí eta táepacuruha eta une téquequerecavahi.

7-8 Taicha nararíhi ena téquequerecavanachucha eta napanereruana. Vahi étanainarichuhini jácani navarahaqueneyare náicha. Nácani tacahehi eta napanereru, éna tájina májaracaimahi ema Viya.

9 Émaripa mácani vichamuri, te páurehipuca eta máitasesirahi, tivapinavayaresera taicha eta máimicatasiraipa ema Viya taicha eta máemunasirahi.

10 Émaripa mácani vichamuri rícoquenehi eta máitasesirahi, énerichuvare tivapinavayareva, tayanapane títahapuca eta máimahaqueneanahi. Taicha eta vímahaqueneanahi te juca apaquehe, vahi táeñamacarehini, taicha títavayarehi tamutu.

11 Ánipirichu eta táurinajiva eta flureana; taicha te járajapapa eta muracana sache, tacajiyujicapa. Tamutu títava eta táurinajivainíhi. Témiricaipavare eta taflurena. Ene macahe mácani rico, vahi tánasimahi eta máimahaqueneana, tayanapane vahi macuvaraha táitava, máitucahipuca eta macaematanera.

12 Tétavicava eta náurivayare nácani vichamuriana ticamichanahi tamutu eta nátajivanahi. Járajapayare eta sácheanayare eta najacapiraya eta táitsivayarehi maicha ema Viya, májaracainapa eta táurivayare eta náitasesirayare, taicha ticunachacareanahi. Tacahehi eta mapanereruhi ema Viya nayehe ena témunacanahi éma.

Máisapa ema Viya eta jácani víchavaquenevanaya, mavarairahi tétupiricahaviyare

13 Téhevare tatiarihinapuca eta éjecipiravaya jácani tamauriqueneanahi, vahi émaimahi émeteaca ema Viya. Taicha vahi tásihaquenéna me Viya eta juca tájiparacana. Nájinavare mapamirui mahi náichahini eta júcana.

14-15 Nácanisera náquipairuvana tayehe eta tamauriqueneana, táuchurepa te napanereru tamauriqueneana, tásiha navaraha náichayarehi eta pecatuna. Vaipa nanecapavahini eta náichiraipa. Téhesera te táequenénapa, étapa tivichayarehi. Tínehicha eta táimicapasiravacaina.

16 Némunaruqueneana nuparapenaveana, machu éjecipava tayehe eta juca numetaruheanahi.

17 Ema Viya, étanarichuhi eta mapanereru. Vahi apanapanenejinahi eta máuriva vyehe. Éma, tjaracahavihi viti achaneana eta majaraiva, étapa tamichuhi eta viáchanevana. Taicha tamutu eta juca táuriqueneanahi vijacapaquenehi puiti, tásihaqueneanahi me Viya. Vahi apaesasajirunaichuhini eta táurivahi. Jéhevare eta yátupiqueneanahi.

18 Taicha acane tacahehi eta mapanereruana, mavarairahi vijacapayarehi eta yátupiqueneanahi máechajiruvana apaesa machichahaviyarehi. Eta máitsivachirahi eta viáchanevana, ticaecheherahi máitsivachayarehi tamutu eta apamuriana máepiyaruana te juca apaquehe.

Vímerecavaya yátupi eta visuapirayare eta máechajiriruva ema Viya

19 Eta tacahe, eti némunaruqueneana nuparapenaveana, nutuparacachecha yátupina tauri eta esamiraina eta máechajiriruvana ema Viya. Vahi ecuijajahúchava esema. Epanerechinava eta échajisiraya.

20 Taicha nácani tiseमारairihiana, vahi étainahini náichahini eta mavarahaqueneana ema Viya.

21 Puiti te juca vítaresirahi, jararihi eta tavarairahi vipanerechaya tayehe eta tájiparacana, tamaeperajisira eta viáchanevana. Tétavicavavare eta tapamisirahavihi vicha eta tamauriqueneana. Puítisera nutuparacache: Ínjajicapa tamutu eta júcana. Ecasamureyareva eta máechajiriruva ema Viya eta ímitucasivanahi. Yátupina esupa. Jéhevare, éta ticuchucuhayare eta iáchanevana.

22 Ítauchayare eta tametarapianahi eta máechajiriruvana ema Viya. Vahi tacuejicapava eta epanereruana, machu ímijachapuca taratarichuhi eta esamarasirahi.

23 Vahi ecucuti nácani nasamarararuchucha, tásiha vahi náitauchahini eta tavanairipihi, tímicutijiricavaipa nácani tímacunachavanahi te espejo.

24 Tásihasera, vahi nasipacahini eta náimahaquenehi nachipeuquivahi. Tásiha, tiyananavanepa, náemitisicavanepa.

25 Étisera ecutiyare ena natupiruvanahi eta nasamirahi táuriva eta yátupiqueneana vímiturapiana tásihaqueneanahi me Viáquenu. Vahi ecuemitisica. Tásiha, ítuçayare enerejica eta táuriqueneana, esuapayareva eta ímitucasiqueneanahi. Tásiha, tétavicavaya eta iúrivaya táicha.

26 Nararihipuca nácani tímijachavanahi religiósoana. Téhesera vahi náitucahini ticaratajacadhavana, ena nani téjicapavanahi eta napanereruana. Tájinachucha vahi émainahini nasupahini ema Viya.

27 Vítisera, eta vítauchirahi eta yátupiquene téhicacare, te vivaraha tájina véchajisicacarevaina te mamirahu ema Tata Vicaiyaquene, tatuparacahi

vijapanuyare vítátíyare ena amaperuana váchachichana énapa ena náepenai-maqueneana tayehe eta nacamunuiravanahi. Tituparacahavihivare vahi víchaimahi eta pecatuana te juca apaquehe.

2

Nácuticaca ejacapa ena achaneana

¹ Nuparapeneveana, éti éhicanahi ema máitupajijihaguenehi Viáquenu Jesucristo, vahi táuricahini enerejicavaca ena echamuriana ejacapaqueneanaya.

² Étaripa te natiarihinapuca nácani nasiapauchahe te iúrujisirarevana íchirana eta culto, vahi macarichuimahi tiuri eta ejacapiraya mácani tíurinahapahi eta macamuirihairahi, ticasurutijapahipuca eta oro. Énerichuvare ejacapayare mácani paure, tévichijihapahípuca.

³⁻⁴ Taicha téjcapavahi eta epanereruana, te macarichuhi mácani tíurina-muirihapahi, échapajiricahi eta ecaejasirahi, mácanisera paure, te váipapuca ecuechajiricahi, váipapucaini ecuijaracahi eta máejasiha, tasapiha evane-cainapapuca téjahapaica. Éti, vaipa étupicavaimahi eta juca enerejisirava-caichucha nácani ejacapaqueneanaya.

⁵ Némunarqueneana nuparapeneveana, esamanuchaha. Ena páureanahi te juca apaquehe, majacapavacahi ema Viya, táichavenehi eta nacasiñairahi ema Machicha. Éna, tiápajupanavanahi eta náurivaya taicha ena ticaicuchianahi eta mávasa ema Viya taicha machaneranahi. Nacachaneyarehi ena apamuriana témunacanhahi éma.

⁶ Étisera evarahapa ímitsirihavaca ena páureana, nasapihapa échapajiricahi ena rícoana. Ticutiripa vahi ímativacahini eta náemeratasiraheripa, te apaesachichapa éjcapava.

⁷ Ticutiripavare vahi ímativacahini eta nacaecahirahi ema Cristo, nacaecahihivare eta iámirahi eta máijare tacapicahuquenehi.

⁸ Puítisera éti, yátupiyare ítaucha eta ticunachacarepanaquenehi manairipi ema Viya tayehe eta Sagrada Escritura. Ani tacahehi: “Pémunacayare ema piparaepiya tácuti eta pémunasiravahi píti”.

⁹ Téhesera enerejicaichucha nácani émunaruanahi, ecapeaturaichucha eta emasuapirahi eta mavanairipi ema Viya, éta tiviuchaheya.

¹⁰ Taicha te natiarihipuca nácani náitaucha tamutuyaréni eta vanairipiana, téhesera apaesarichu eta néjcapiravahi, étapa tiviuchahi eta náicuñayare, tímcutitijiricavahi vahi náitauchahini.

¹¹ Taicha ema Viya, ani tacahehi eta mavanairipihi: “Vahi picuveha esu apana esena. Váhivare picuapareca”. Píti, te váhipuca pivehahini esu apana esena, picaparecahiserapuca, piáviraichuhi picaviurevahi.

¹² Iúrihainehi ejacaparalihini nayehe namutu, táurihini eta échajirisiravana. Vahi ecuemitisica eta tatiarhiraya eta sache ecayaserehiraya tayehe eta juca vanairipiana. Étara tétupiricahavihi.

¹³ Taicha nácani majapanurairahanahi nayehe nácani apamuriana, tájinavare najapanucarevaimahi te nacayaserehipa. Nácanisera tijapanurahianahi, ichape eta najacapacarevanaya me Viya te jena sácheyare.

Vímerecaya eta visuapajiravaya étapa eta vicaemataneasiraya ema Viya

14 Nuparapenaveana, nuvaraha nímínecapaequenehaheyare. Te natiarihinapapuca nácani nacahehi: “Núti nusuapa ema Viáquenu”, tásiha vahi náichahini eta táuriqueneana, vahi tisuapacare eta náechajiriruvahi. Németeaca vahi yátupinahini nasuapahini ema Viáquenu.

15 Nuvaraha nímícutichinaheyare eta juca. Te mararihipuca mácani vichamuri ticamunuvahi eta mamuiriharapiyare, manicaquenerepipuca te sácheana.

16 Tásiha, mácani echamurihi tépiyacavahipuca tijapanurahihi. Máichahipuca: “Páurevisami piti, te picasarechahipuca, pépacuchava. Te péchupuca, pinica”. Tásihasera, te vahi máijarahini eta macamunuquenehi, tamapurujichucha eta máichirahi.

17 Ene vicahe viti véhicana ema Viáquenu. Te vahi víchahini eta táuriqueneana, tamapurujichucha eta véhisirahi, vaipa tásuapacarehini.

18 Tiuri puiti, németeaca etiarhiyarepuca eti épuruyare eta juca numetarueanahi. Áninapapuca ecaheyare: “Tarataripa eta vicasíñavairahi me Viya. Vaipa étaparacaina víchahini jácani apamuriana táuriqueneana” ecáhénapapuca. Nútisera numetacahe: Vahi tisuapacaremahi eta ecasíñavairahiji, te vahi íchahini eta táuriqueneana. Taicha eta íchirahi eta táuriqueneana, étapa tímereuchaheya eta yátupirahi eta ecasíñavairahi mayehe ema Viya.

19 Éti ímijachaipapuca tarataripahi ticuchuchuhaheyare eta esuapirahi eta matiarahirahi émanarichu ema Viya. Táitaurevaquene esuapahi eta matiarahirahi ema Viya. Apanasica ena éreanana nasuapahivare eta matiarahirahi ema Viya. Tayanapane eta nasuapirahi, váhiquene tíuchuchuanaimahi éna. Énaripa, tiyayacareanahi éna te nasama eta máijare ema Viya.

20 ¿Vuñchahacaru ácaicutiarahini? Tiuri puiti, nímínecapaequenehaheyare, taicha nuvaraha ácaicutiara: Tacamunuhi íchayare eta táuriqueneana tacachaneyarehi eta ecasíñavairahi. Tamapurujicha eta ecasíñavairahi te vahi ecuquichahini eta táuriqueneana.

21 Nuvaraha némechahe mayehe ema viáchucaini Abraham. Eta acane, émaripa macaitsamarajíhi ema Viya, te yátuphipuca eta masuapajiraiva. Mavanecahi máechatinucayarehi ema machicha Isaac. Tacahe, ema Abraham, máechatinucayarepaini ema machicha, máimeresirayarehi eta masuapajiraivahi yátupi. Eta tacahe, ema Abraham, tétaavicavahi eta majacpacarevahi mayehe ema Viya.

22 Étara ícutiaraya eta juca masuapajiraivahi yátupi ema Abraham. Vahi máéñamahini ema machicha eta mavarairahi máímerecayare yátupihí eta masuapirahi.

23 Taicha eta táechajiriruvahi eta Sagrada Escritura, ani tacahehi: “Ema Abraham masuapahí ema Viya. Tásiha, tétaavicaváinehi eta majacpacarevahi ema Abraham. Éma, máemunacasarehi ema Viya”.

24 Ácaicutiara yátupina eta juca. Viti achaneana vijacapacare me Viya táichavene eta vímeresira eta visuapirahi. Vahi tarataha eta vicaheira: “Núti nusuapa ema Viya”.

25 Nímínecapaequenehahe eta acane tacahevare eta súchucuirahi esu esena túhsiquenénihí ticajaru Rahab. Ésu, ticatiuchavacahí ena vanairucanahi mayehe ema víyaraha Josué, suímícatavacahivare eta náitujisiravayarehi tijunana nayehe ena ticaratacanayarehini. Eta máimairahi ema Viya eta juca suñchirahi, íchaperinehivare eta majacpirahi ésu.

²⁶ Eta juca tacutihi eta viáquehe te tajunijica eta viáchaneva, enevanerinehi tésamiricava eta viáquehe, tépenavaneyarehi. Ene tacahehi eta visuapajiraiva. Títavavare te vaipa vímeracahi eta viürivahi, víchirahi eta táuriqueneana.

3

Eta vijaca, tamutu tajarareca

¹⁻² Nuparapenaveana, yátupi vimutu véjecapava tayehe eta véchajisirana. Nájina émanaina vahi macuejecapavaini eta máechajísira. Te matiarihinaini mácani achane vahi macuejecapavaini, ichapehini eta macunachacarevainahini, taicha éma, yátupihí eta máitupajjiasiravahi, máitucahivare ticaratava eta máquehe. Eta tacahe, nuvaraha nuconsejachahe: Tacamunu najaneacava muraca nácani náimereca eta navarairahi máestroanayarehi tayehe eta máimiturapiana ema Viáquenu. Échavayare eta vicayaseserehirayarehi muraca me Viya viti máestroanahi.

³ Nuvaraha nímicutichinahe. Eta juca tímicutijiricavahi te vicaopera eta cavayu: vinacapa eta freno, vichurujacachapa, viámapa te jácani vivarahaquene viámiha.

⁴ Tacutiquene eta ichape lancha, táevatajicaneni muraca eta técativava, étapa eta tajunapira muraca eta une, taratahayarehisera táimitupirucha eta tayehe leme váhineni ichapenahini, ema piloto máimitupiruchayarehi te jácani mavarahaquene máimhayarepahi.

⁵⁻⁶ Ene tacahehi eta juca vijaca. Ánichicharichunéni tayehe eta viáquehe. Tasapilahisera táechajisihahi eta ichapequeneana. Tacutiquene eta yucu. Ánichicharichunéni eta táepanirava táijucha, taratahahisera táijucha eta ichapequene vámahí. Nácani achaneana te vahi náitucahini ticaratajacachavana, amairijipa tamutu eta náitaresira. Tíñehicarehi najarareca ena nácani camuriana achaneana taicha eta náechajirivanahi. Ena nani téchajisihanahi eta tamauriqueneana, éna mávaháruanahi ema Váinaraji, téchahi eta infierno.

⁷ Ena achaneana narataha namansucha eta cáyureana étapa eta quichareana étapa eta táíñehiqueneana sárareana tiávihana te apaquehe étapa te une.

⁸ Étasera eta jacare, nájina ticaratacaina, táechajisihayarehi eta tamauriqueneana. Tacutihi eta jumare te nájina tiratahaimahi típuchaina, tiámahivare eta tacapasiravacayare ena achaneana.

⁹⁻¹⁰ Eta jacare, étarichuvare táuchusiha eta náechajiriruvana ena ticunachanayarehi ema Tata Vicaiyaquene. Ticunachacarehi eta juca. Váhisera ticunachacaremahi te tiúchuchi eta jacare eta náumehaira ena nacutiqueneana achaneana naparaepiyanaí me Viya. Nuparapenaveana, tatuparacahi vahi ecaecahihini ena ecutiqueneana tiámanahi eta macaquehera ema Viya.

¹¹ Tacutiquene eta une, te tipachinahi eta tajututurusirahi te apaquehe, vahi tíjahúchavaimahi títsiriecava, táuchucapucaini tisucareamahini, ticheveamapucahini.

¹² Tacutiquene vahi tiúchucaimahi eta aceite tayehe eta tahi eta yana. Étaripa eta narasa, vahi tiúchucaimahi eta tahi siñávehinapahini. Ene tacahehi eta une, vahi tajututurucahini te apaquehe eta tipachina une tacachanepahipucaini eta ticheveama. Nuconsejachahe: Ecunachachucha. Vahi ecumehareca.

Te yátupihí eta véchemaravahi, tatuparacahi víchayarehi eta táuriqueneana

¹³ Te natiarihinapuca te etaracu nácani náechemahahi tamutu, tatuparacahi náichayare eta táuriqueneana, yátupinavare eta namansuvayare. Éta pa tímicae-cherachayarehi eta náitusirahi.

¹⁴ Te etiarihipuca eti ímijachavahi échemahahi tamutu, tásiha ecapinaru-recarichuchasera te esamureana, evarahapa íapajupanavayarehi nayehe ena apamuriana eta ítupajijiasiravaya, vahi yátupinahini eta ítupajijiasiravainahini.

¹⁵ Eta juca échemaraivavacahi, vahi étainahini tásihaquenénahini me Viya. Tayehecucha te juca apaquehe tásihaquenechucha eta ne achaneana, máevaequeneruhi ema Váinaraji.

¹⁶ Taicha ena ticapinarujiricacanahi téhajiricacanapa. Vahi tácuticacahini eta napanereruana. Náicharichucha eta tájiparacana.

¹⁷ Nararihisera ena yátupiquenehi eta náechemaraiva, tásihaquenehi me Viya eta náitupajijiasiravanahi. Náimeracahi tativa tatupiruvahi eta napaneruhi. Táurivahivare eta náitaresira. Ticatiurahianahivare nayehe ena apamuriana. Tisamarahianavare. Tijapanurahianavare. Eta náichirahi eta táuriqueneana, ticajirahianahi. Nájina nanerejiruina. Tatupiruvahi eta náechajirisiravana.

¹⁸ Nácani ticatiurahianahi, náetupiricahi eta náitaresira ena apamuriana. Jéhesare, tájinasarepa náichiravainahi. Nanaquipaicahi eta táuriqueneana.

4

Emá Viya mavaraha vínajica eta tájiparacana

¹ Puítiripa, ¿tájaha tacayema eta éhajiricácachi? Éti ecuticacahi ena apamuriana eta ejamurairavanahi. Éta, timaurichahehi eta tájiparacana, étiji-vaichucha íchavahi.

² Éti ejamurachahi ecaimahaquene. Étasera emaitusiravahi, evarahapa ecapaca ena ticaimahaqueneanahi. Éti ecapinarurecachi. Éta emaitusiravahi, téhacacapa eta échajirisiravana; tásiha, éhacacauchapa. Nuconsejache-yare: Eyaseaca ema Viya eta ecamunuqueneanahi.

³ Éti eyaseacahinéni éma, váhisera máijaracahehini, taicha vahi táetupicavahini eta eyasesearapiana, étachucha eta tajamurachaqueneanahi eta íáquehe.

⁴ ¡Étavicavapa eta emaetupisiravahi eti achaneana! ¡Éjecapavahi ichape mayehe ema Viya! Evarahapa éhica eta nayeherepianahi ena achaneana masuapajirairahanahi. Tihapapicahepa eta tájiparacana te juca apaquehe. Masapihapa epuruyarehi ema Viya, ecatianacapa éma.

⁵ Éti ímijachaipapuca táepiyevahi eta táechajiriruvahi eta Sagrada Escritura. Aní tacahehi: “Eta mávahásirahavihi ema Espíritu Santo, téñamahaviripa vahi vihapasamurechaimahi tayehe eta tamauriqueneana”.

⁶ Étaripa eta máemunasirahavihi ema Viya, tétumechahavihi, mamavarairahi víchahini eta tamauriqueneanahi. Taicha ánivare tacahe eta Sagrada Escritura: “Emá Viya macatianacavaca ena tisiñavairicana. Máemunacavachisera máimicatavacahivare ena mánsuana”.

⁷ Eta tacahe, esuapa yátupina ema Viya. Ecanaraya ema Váinaraji, te mavaraha mavayuacahe. Jéhesare, tjunijicahénapa éma.

⁸ Puiti, yátupina eta epauchirahi ema Viya. Tásiha, ema apanavare tipauchaheyare. Ínajicapa puiti eta íchira eta tamauriqueneana. Émitisicainapa eta ejamurachira eta tájiparacana te esamureana. Taicha éhicasareipa ema Viya. Vaipa ecupanerecha eta nayeheropianana ena achaneana masuapajirairahana te juca apaquehe.

⁹ Puiti, éneuchava me Viya. Íyauchava táichavenehi eta éjecapiravanahi. Vaipa ecuecarairicava, vaipa ecurisamure eta íchira eta tamauriqueneana. Ácatismurevasera táichavenehi eta tamutu eta tamauriqueneana íchaqueneanahi.

¹⁰ Ecajapanuravayare eta éneuchiravayare te mamirahu ema Viáquenu. Tásiha, tétavicavayare eta ejacapacarevainapa mayehe ema Viya.

Vahi picucaecahi ema pichamuri

¹¹ Nuparapenaveana, vahi ecuechajica mayehe mácani echamurihi. Taicha mácani téchajicahi mayehe mácani machamuri, macaecahipuca, mavaraha máicuñaca mácani machamuri. Émaripa máepururipahi eta mavanairipi ema Viya. Nuvaraha numetacahe: Te épuruhi éti eta mavanairipi ema Viya, eta tímicaecherachahehi eta emasuapirahi éma.

¹² Ema Viya, émahí ticavanairipihi. Macarichu éma tatuparacahi téchayarehi te tíurhipuca eta náichaqueneana ena achaneana. Téchayarehivare eta máicuñasiravacahi ena téjecapavanahi. Vahi étina tatuparacahini ícuñacahini ena echamuriana.

Vahi vítina vecha eta vítaresira

¹³ Esamanuchaha. Vahi táuricahini ácahehini: “Puiti juca sácheana, achichupuca, nuyanaya te apana avasare. Níjararecaya eta nucayehequeneana. Tíámainucava nuchava te apana año. Ichapeyare eta nuganarenyare”.

¹⁴ Éti, vahi échahini tájahapuca eta íchavaquenévaya achichu. Taicha vahi evachareruina eta ítaresira. Tacutichucha eta iyaru. Ánipirichu eta tacaecheraira. Tásiha, témitiacaripavare.

¹⁵ Íurihainehi ácahehini: “Ema Viya téchahavihi eta vítaresira. Te mavaraha éma, vítauchayarehi eta juca vipanereruhi” ácahehini.

¹⁶ Étisera, tétavicavapa eta ecasíñavavaisirahi eta échajisirana. Ticutirinehi étinahini échinavahini eta ítaresirana. Vahi táurihini eta ecasíñavavaisirahi.

¹⁷ Némechahe eta juca yátupiquenehi: Mácani máimatihí eta macatuparahairahi máichaya eta táuriqueneana, tásiha te vahi máítauchahini máichahini, ticapecaturaipahi te mamirahu ema Viya.

5

Eta náichavaquenévaya ena rícoana

¹ Tiuri puiti, nuvaraha numetacahe eta náichararacavaya ena rícoqueneana. Éna, ichape eta nacatajivairayare. Náurihai pa náiyahasamureripahini taicha eta nacatajivairaya.

² Taicha títavainapa eta náimahaqueneana. Étaripa eta nacamuirihairana eta táurinaqueneana, tanicamecainapa eta cachusiri.

³ Tájinapa táichaquenemahi eta naplataneana étapa eta nayehe oro. Ichape eta nacatajivairaya, taicha eta náeñamirahi, tájina náimicatarapínahini. Étainapa tímicuñacavacayare te jena yucu te táitecapapa eta jena sácheyare.

4 Nararihi ena nani rícoqueneana, ichape eta navayuasiravacahi eta navachachirahi ena ticaemataneacanahi eta nayehe. Tatiarihiyaresera eta sáchezare táitecapauchayare eta náicuñayare, taicha ema Viya máimarakacahi tamutu, masamahivare eta nayaseserepianahi ena páureanasami músuana.

5 Ena rícoana puiti te juca apaquehe, tétavicavahi eta náuritarahirahi. Tamutuhi nanica eta táurinisiqueneana, tísatuheherecanahi. Tésinanacavanahi nacuti eta cuchi te náesinacha. Éna, tñjahúchavayare eta náepenirayare, nacutiayare eta táijahúchirava nacapaca eta cuchi náesinaruhi.

6 Tacutiquene náimicaviurehi náimicapacavare ena matapiravareanahi, náimipanapa eta namaitusirahi tiácapauchavana nacatiuchavahini.

Vicamichayare tamutu, taicha táetumechahavi eta vicuchapirahi eta machavirayare ema Viáquenu

7 Étiserá, nuparapeanaveana, ecamichayare tamutu, táichavenehi eta ecuchapirahi eta machavirayare ema Viáquenu. Ecutiyare mácani achane ticaematanerahi. Macamichahi tamutu eta macatajivairana. Tiámainucava te tiúchucuhapa eta máeváru, mapaenumavapa majacapa eta macuchapaquenehi máevaraqú.

8 Ene ecaheyare éti, yátupina ecamicha tamutu, váhivare ecuinajicava eta juca éhiruhi. Ecuchapavachucha, taicha tiánehipa eta máitesirayare ema Viáquenu.

9 Nuparapenaveana, vahi ecuquicha eta tájiparacana nayehe ena echamuriana. Váhivare ecuemeteteaca éna, apaesa tacuija eta táimicatsiriacahe te ecayaseserehipa te mamirahu ema Viya. Écharichuhi éti eta tánehirapa eta máchujisirayare ema Juez, ecayaseserehinapa.

10 Nuparapenavechichana, nuvaraha ácutini ena profetanaini eta nacamichirahi tamutu eta nacatajivairahi, táichavenehi eta nacametairuirahi te máijare ema Viáquenu.

11 Némechahe: Ichape eta nacunachacarevahi eta veyehe nácani ticamichanahi eta nátajivanahi. Écharichuhi eta macamichirahi ema víyarahaini Job. Échahivare eta táuriquenehi máijaracasíhi me Viáquenu. Taicha tétavicavahi eta majapanuraivahi ema Viáquenu.

12 Tacutiquene nutuparacahecha éti nuparapenaveana: Te ecayaseserehipuca, vahi ecuquicha eta juramento te máijare ema Viya, ema tépiyacahi eta anuma étape eta juca apaquehe. Váhiquene ecuquicha eta juramento. Átupiruvachucha te ítauchayarepuca, “Nítauchayare” ácahepa. Téhesera váhipuca, étupiruvayare “Vahi nítauchaimahi” ácahepa. Apaesa tacuija taviuchahe mayehe ema Viya.

Tatuparaca eyujarauhacacayare

13 Te etiarihinapuca éti ecatajivahi, tatuparacahi éneuchavayare me Viya. Te etiarihinapuca eti iúrisamureanahi, tatuparacahi ejira eta alabanza.

14 Téhevale etiarihinapuca eti ecajumanahi, ímichuhayare ena víyacarana vichamuriana apaesa nayajisicahe eta aceite, te máijare ema Viáquenu. Tásiha, tiyujarauhacahanayare.

15 Jéhesare, tisamacareyarehi eta nayaseasirana, táichavenehi eta nacasiñairava me Viya. Tásiha, ema Viáquenu macanaracayarehi eti ecajumaquenehi. Te étapuca tiviuchahehi eta epecaturana, macaepahayareva ema Viya eta epecaturana.

¹⁶ Eta tacahe, te tatiarihipuca eta éjecipiravanahi mayehe ema echamuri, eyaseacayare maperdonachahe. Tásiha, eyaseuchacacayare te eyujaraca eta enarasiraina. Taicha tétavicavahi eta tasamacarevahi eta nayujaracasa ena matapiravareana.

¹⁷ Émaripa ema vicutiquenéni achane víyarahaini profetaini Elías, te tiyujaracapa éma, tiyaseserecapa vahi tacuquiva. Tisamacarehi éma. Vaipa taquivahini. Mápana año, saisi caje eta tamajinairahi tiquiva.

¹⁸ Tásiha, tiápechavavarepa tiyujaracahi. Tiyaseserecapa táemiricahini eta tiquiva. Tiquivavarepa. Tacahe, tiúrinainehi eta evaraquiana te apaquehe.

¹⁹⁻²⁰ Nuparapenavechichana, te natiarihinapuca nácani vichamuriana téjecipavanahi tayehe eta yátupiqueneana, eti ecatuparaha iúrichavacayarehi éna, econsejachavacayare apaesa nachava éna, náinajicahini eta náéjecipiravana. Tétavicavahi eta táurivahi eta íturusiraina eta nachavira, taicha táemesiava eta ecuchucuiravacayare tayehe eta náicunayarehini, taicha eta táemesiavahi eta táepahairapa eta camuriquenehi eta napecaturana. Tamu tupa.

Eta macartane ema Apóstole Pedro, ticajare 1 PEDRO

¹ Núti Pedro, mayehenu apóstole ema Viáquenu Jesucristo. Nucajurehe eta juca nu cartane eti nuchamuriana éjanerepairuanahi ecaquijiqueneanahi tayehe eta apana avasareana: eti iávihanahi te provincia Ponto, eti iávihanahi te Galacia, eti iávihanahi te Capadocia, eti iávihanahi te Asia, étipa eti iávihanahi te Bitinia.

² Emutu eti, yátupiquenehi eta manerejisirahehi ema Tata Vicaiyaquene taicha tacahehi eta mapanereruhi acane eta táepaniravahi. Émaripa ema Espíritu Santo, tiávahácaheripa máepachiasirahehi eta epecaturana eta te máitine ema Jesucristo, máitsivachinahehivare eta itaresirana, máimicatasirahehivare eta esupajiravahi me Viya. Puiti, nuvaraha tajurucaini eta ecaicutiaraira eta máemunasirahehi ema Viya; tájinavare tahapapiricahini eta táurivahi eta épanereruana.

Vijacapyare eta vícuchihi te anuma te tauri eta vítaresiraina

³⁻⁴ Tétavicavahi eta vicunachirahi ema Viya, Macaiyaquene ema Viáquenu Jesucristo. Tétavicavahi eta majapanuirahavihi, vijacapacarehi mayehe eta macachichairahaviripa. Tásiha, viratahahi vicamichahi tamutu eta viátajivana te juca vítaresirana taicha vicuchapahi eta sáchezare visiapaya eta mávasa ema Viya. Máitavacacayare eta vítaresirayare, táichavenehi eta máechepusirahi ema Machicha Jesucristo te máecari. Ánaqui, tájinapa ticapacahemahi, váipavare íchaimahi eta tamauriqueneana. Máitavacacayare eta iúrisamurereasiravanayare.

⁵ Puítisera, tétavicavahi eta máitupajijiasiravahi ema Viya eta majaneasirahehi, táichavenehi eta ecasiñavairahi mayehe. Taicha mavaraha ticuchucuhayehare te jena sache táepaniravayare eta viúritaresiraya.

⁶ Puiti, apanapaneyarechaha eta ecatajivairayarechaha. Nucasiñavahisera eyehe éti, vahi ecainajiruvaimahi. Eta ecasiñavairahi me Viya, evapinavaichucha eta camichirahi tamutu, taicha ímatihí vaipa táunaimahi eta ecatajivairaya.

⁷ Ema Viya máisapahi eta juca ecatajivairana, mavairahi ímerechavayare eta yátupiquenehi eta ecasiñavairahi eta mayehe. Ecutiyare eta oro te nacaitamaraji te yucu te yátupihpuca étaquenehi. Étisera étaviviriacahi eta tatumeva eta oro, taicha eta oro útavayarehi, témitiacayarehi. Te vahi ecainajiruva eta ecasiñavairahi mayehe ema Viáquenu, tétavicavayare eta ecunachacarevayarehi mayehe éma eta machimapiraheyare te machava.

⁸⁻⁹ Éti, víuchaha ímatihini eta mamira ema Viáquenu. Émunacahisera éma. Ichapehivare eta ecasiñavairahi eta mayehe. Tásiha, ichapeyarehiva eta iúrisamurevaya, tájina eviyaimahi ácyemahini eta ecunachiraya éma, te jena sache iúchucuhainapa eta itaresiraya máichecuaraquirenapa. Étasera eta táitsivahi eta ecasiñavairahi mayehe ema Viáquenu.

¹⁰⁻¹¹ Eta juca víuchucuirayare, acaneripahi eta tacaecherairahi. Énaripa ena víyaranaini profetanaini nájuequeneharipa tayehe eta Sagrada Escritura eta máitesirayarehi ema ticuchucuhahaviyarehi. Émaripa ema Espíritu Santo máitametacavacahi éna eta macatajivairayarehi éma Cristo étapa eta

machavirayare tayehe eta táurinaquenehi mávasa. Énasera ena profetana vahi náimatimahi tamutu. Navarahahi náimatiyare ¿nájahapuca ema máiteruyarehi? ¿Tájahapuca eta máijareya? ¿Tájamuhuyarepuca eta máimeresiravaya?

12 Émasera ema Espíritu Santo (ema másihaquenehi te anuma), mametacavacapa vahi náimahaimahi ema Cristo, taicha camuriyarehi eta áñoana eta máitecapiraya. Vítipasera puiti viti vítareruaichaaha, vítipa vímatihí éma. Te vicametaráripa mayehe ema Jesucristo, ema Espíritu Santo títametacahehi te esamureana. ¡Tétavicavayare eta viúricacarevayare víti, te viúchucuhapa! Énaripa ena ángeleana, ichape navarahahi náimatihini tájahapuca táichararacavayare eta viúricacarevayare.

Emá Viya, eta máichuirahavihi, mavarahahi tépachinachahaviyare eta vítaresirayare

13 Eta tacahe, ecaratacava tayehe eta epanereruana, táurivainavare eta ítaresiraya. Ecasíñavayare eta eñacapirayare eta ícuchihi me Viya, máijararuehyare te machavapa ema Víáquenu Jesucristo.

14 Ímerezavayareva eta machichairahahi, esuapajirahiyare. Vaipa ecuquicha eta íchaqueneanaini eyeherepianaini cape juca te vuíchaha ímatihini ema Viya.

15 Puítisera, sánturuhahénapa eta ítaresirayare. Taicha ema tíchuhahehi, tétavicavahi eta masantuvahi.

16 Taicha ema Viya, ani macahehi eta máechajiruvahi tayehe eta Sagrada Escritura: “Nuvaraha sántuhéna eta ítaresiraina, taicha núti, yátupiquenehi eta nusantuva”.

17 Te eyujarasirana éti, ani ecahehi: “Tata Vicaiyaquene” ecahehi mayehe ema Viya. Ímatiyare yátupi éma eta nájinairahi manerejiruina, tacutiquene eta máemecharesirahi ena téjecapavana, máitsivachavacahivare nácani tíchanahi eta táuriqueneana. Tacahe, yátupina eta epicauchiraina éma tamutu sácheana puiti juca ítaresiraichaha te juca apaquehe.

18 Ema Víáquenu Jesucristo ticuchucuhaheripa tayehe eta taurivainihi eta ítaresirana, íamapiricaichaha eta nayeherepianaini ena íachucana-veánaini. Écharichuhi éti eta mavacharesirahehi ema Cristo eta iúchucuirahi, váhisera te plátainahini, óroinahipucaini.

19 Étasera eta máítine máepusairuhi éma eta mavacharesirahehi, étivenehi ímijararecáhi éma, cútiripa te cáijararecasi eta uvesa matapiravarequenehi.

20 Acane te tépanavainapa eta apaquehe ema Víáquenu Jesucristo ticatuparahaipa tacaheyarehi eta máepeniraya. Váhisera táitachavavanehini. Tapaenumavapa puiti, títauchavahi eta étavenepa eta iúchucuirayarehi éti.

21 Énerichu táichavenehi eta éhisirahi ema Cristo, ímatipa puiti ema Viya, ema ticaechepucáhi ema Machicha te máecari. Puíticha téjacaripa éma tayehe eta mávacure te anuma. Eta tacahe, tétavicavainehi eta ecasíñavairahi mayehe éma, ecuchapavaipa eta mayehe.

22 Puiti típachinaripa eta íachanevana táichavenehi eta esuapirahi eta yátupiquene máimiturapiana ema Jesucristo, máimitusiraheripa ema Espíritu Santo. Eta tacahe, ímerezavainapa puiti yátupina eta émunasiracacáhi nayehe ena echamuriana. Evapinavavare eta te esamureana eta émunasiracacairahi.

23 Cape juca, eta ítaresirahi, tájina vahi íturuequenehahini eta iúchucuiraya. Puítipasera machichaheripahi ema Viya. Ísivachaipahi eta ítaresirainihi eta

esuapirahi eta máechajiriruva ema Viya. Éta ticaitarecaheyarehi; jéhevare eta máitavacacahi.

²⁴ Eta Sagrada Escritura, ani tacahehi eta táechajiriruva, májurehi ema víyarahaini profeta Isaías: “Eta vítaresirahi viti achaneanasami te juca apaquehe, vicutihí eta táímarusira eta muji. Tijurucapa, tásiha tiájijipa. Eta vitumevainihí étapa eta vítupajijiasiravainihí, títavayare tacutihí eta flore: tépnehapa, tíjiyupa, témiricapa. Étasera eta máechajiriruva ema Viya, jéhevare eta máitavacacahi” tacahepa.

²⁵ Eta juca máechajiriruva ema Viya, étaquenehi eta emetacasilanahi apaesa táuripa eta éhisirahi.

2

¹ Eta tacahe, támutupa ínjajica eta evanararajivanainihí, tamutu eta ecaete-maraivainihí, eta apiptomairahénihí, eta ecapinaruraivainihí, étapa eta échajivanainihí.

²⁻³ Puiti, eta ímatiraripahi yátupi eta máurivahi ema Viya, tijurucainapa puiti eta esuapirayare eta máechajiriruvana. Ecutinapa eta najurusira ena amuyana. Ánipichichapachu técuhana, tiájicanaripavare te nacheneana ena náenana. Ene ecahehi éti, yátupina eta evarairaya ecaravahu eta máechajiriruva ema Viya, apaesa tiápajucavaya eta ímatiequenehairaina eta mapaneruana.

Éma Cristo macutihí eta mari máepenacacahi

⁴ Yátupina eta ecasiñavaira me Viáquenu, taicha tétavicavahi eta macasiñacarevahi, macuti eta mari máepenacacahi. Éma, náepuruquenehi ena achaneana. Manerejiruhisera ema Viya taicha tétavicavahi eta macunachacarevahi mayehe.

⁵ Éneripa ecahehi éti, ecutiripa eta márijahiana máepenacacahi. Tacahe puiti, táuripa eta ecachaneracacainapa. Macarichu ema Viya ema ecaematanecaya. Tivayucaheya eta esuapajiraivaya eta máijarasiraheyarehi eta ématanepachuyare. Énerichuvare ecaturarahaipa sántuhénapa. Ecutiyare ena tiyujaracarahiana eta te Templo. Écatuparahaipavare eyaseurahiya nayehe ena echamuriana. Étapa eta ecamavahuiru me Viya, étaripa eta esuapajiraivahi, eta ehasulupayachirahi ema Viya, étapa eta ecunachirahi éma. Tamutu eta juca, ecurisamurechayare éma, taicha émarichuhi ema Jesucristo ticaitecapinaheyarehi me Viya.

⁶ Eta Sagrada Escritura, ani tacahe eta máechajiriruvahi ema Viya: “Núti névatacahi ema Nuchicha Cristo eta eyehe. Taicha nunerejiruhi éma eta macurujisirayarehi ena nuchanerana návaháruanaya. Tétavicavahi eta macunachacarevahi eta nuyehe. Nácani ticasiñavanahi eta mayehe ema nuvaneryare, vahi máinjaciavacaimahi” macahepa ema Viya.

⁷ Éti, tétavicavahi eta macunachacarevahi ema Cristo eta eyehe, taicha yátupihí eta ecasiñairahi éma. Énasera nácani masuapajirairahanahi mayehe, náepuruhi éma, nacuti ena tépiyarecarahiana eta Templo, eta náepuruirahi eta mari ticunacharepanayare eta te peti.

⁸ Nácani masuapajirairahanahi eta máechajiriruvana ema Viya, tacutique-neyarehi náepuruhi ema mavaneruhi ema Viya. Nacutihí mácani achane máquipairuhi táichavenehi eta macayuteturahi. Tisemahi, mavaraha térajicavayare eta tímicyutetuchahi.

Ena machanerana ema Viya

⁹ Étiserá manerejiruheripa ema Viya, machichaheripa. Tachichaheripavare eta mávasa. Sántuhepa máicha. Tituparacaheripavare éma eyaseuchinavacayare ena achaneana eta mayehe. Majupahahehivare ema Rey. Puiti émapa macarichuhi téchahéhi taicha mavecuhagueneheripahi tayehe eta tímapicu, tímisiapaheripa tayehe eta táuricacarequene majaraiva éma, apaesa emetajiricaya eta táuricacarequeneana máematanerepi ema Viya.

¹⁰ Cape juca ítaresirahi éti, vuíchaha ímatihini ema Viya. Eyerehichaha éma, vuíchaha échahini eta majapanuirahéhi éma. Puítiserá evapinavahi eta ímatirahi yátupi eta majapanuirahéhi, taicha machaneraheripa.

Yátupina eta ecaemataneasirayare ema Viya eta ítaresiraya

¹¹ Némunaréqueneana nuparapenaveana, puiti éti, tímicutijiricavaichaha estranjerohehi taicha iáviharichaha te juca apaquehe. Váipasera áyeremahi eta eyanirayare eta íavasayare te anuma. Eta tacahe, nuconsejachahe: Vaipa táuricahini íchahini eta tajamurachagueneana eta íaqueheana. Taicha tétavicavahi eta tavarairahi tácamítiequeneha eta íachanevana.

¹² Iúrihisera eta ecachanerarichaha ena achaneana te juca apaquehe máimatirahanahi ema Viya. Tayanapanerine ticatianacaheana, téchejicanahi eta eyehe ecutihi ena máuritaesirana náicha. Ímrecayaresera eta íúrivahi apaesa éna nacunachayare ema Viya, navarahainapa náehica ema Cristo taicha náimahahi eta táúrivahi eta ítaresiranahi.

¹³⁻¹⁴ Táichavenenahi eta éhisirahi ema Viáquenu, ímrecayareva eta esuapajiraiva mayehe ema Emperador Presidente, énapa ena prefectoana, énapa namutu ena apamuriana tupairucana tanacaqueneanahi eta ley. Éna, ticatuparahanahi náicuñacavacayare ena achaneana váinarajiqueneana, téjecapanahi. Énaserá ena achaneana tíúriana títaurahianahi, ticaemunacasianayarehi.

¹⁵ Taicha ema Viya, éta mavarahahi íchayare eta táuriqueneana apaesa ecamatinacaya ena máecharaireana nácani téchajicanahi eta eyehe.

¹⁶ Yátupihí vaipa tapamiruhénahi éti eta esuapirahi eta mavanairipianaini ema Moisés eta iúchucuirayare. Váhisera ecuyunaca eta vahi tapamisirahehahini, táetseraruina icha eta tauriqueneana. Esapihasera ímrecavayare yátupihí eta mavanaraherahi ema Viya.

¹⁷ Epicaurahiyare nayehe namutu ena achaneana. Émunajiricayare nayehe ena vichamuriana. Ímrecapa eta epicauchirahi ema Viya. Epicauchayarehivare ema Emperador Presidente.

Vácuti ema Jesucristo eta macamichirahi eta mátajivana

¹⁸ Éti, te ecaematanerecapuca, esuapajirahiyare, epicauchayareva nácani íaquenuanahi. Vahi nacucarichu esuapa nácani tíúriana achaneana. Tácuticaca eta epicauchiraina nácani váinarajianahi.

¹⁹ Te ecatajiva náicha, tájinapa eta eviurevanainahini, tétavicavahi eta ecunachacarevaya me Viya te ecamichahi tamutu, taicha evarahahi ítaucha eta mavarahaquenehi ema Viya.

²⁰ Téhesera náicuñacahepuca táichavenénahi eta íchirahi eta tauriqueneana, tájina ecunachacarevaimahi eta ecamichirahi, taicha tatupiruvahi eta ecaicuñairayare. Téhesera táimicuñacahepuca eta íchirahi eta táuriqueneana, ecamichirahi eta náichirahéhi, tétavicava eta ecunachacarevaya te mampirahu ema Viya.

²¹ Taicha ema Viya, eta máichuirahēhi, mavarahahi ecutiya-rehi ema Cristo eta macamichirahi tamutu eta mátajivana íchavenēhi éti, mavarairahi ecaravahu eta máurivahi, ecutiya-rehi éma eta macayehera paciencia.

²² Éma, tájinahineni maviurevainahini, mapecaturainahipucaini. Nájinavare macaetemaquenénahini.

²³ Te nacaetemajiricapa, éma, vahi mácapaemachavacahíni, macatitimahipucaini eta náemecatajivachirahi. Máechajichahisera ema Maiya, máimahainēhi éma. Taicha yátupihí eta máicuñasiravacaya ena témecatajivachanahi.

²⁴ Yátupihí ema Cristo ticaicuñahi víchavenēhi víti eta vícuñayarēni vícuchiníhi táichavenēhi eta vípecaturana. Tétavicavahi eta mátajivana te máquehe eta náemetasirahi eta te crusu. Macamichahisera tamutu, mavarahahi vaipa tacuvayuacahavi eta pecatu, tatupiruvayarehi eta vítaresiraina. Eta majarana, éta ticanaracaheyare.

²⁵ Eta ítaresirainíhi acane éti, ecuti eta uvesa táemitiaru. Puítisera iávahá-caripa ema Cristo, émapa tijaneacahehi, ticatiuchahehivare eta íáchanevana.

3

Tiúriyare eta náitaesirayare ena nacaimaqueneana

¹ Tacutiquene eti esenana ecaimaqueneana, epicauchayareva ena ímanaveana, apaesa mácani vahi masupahini eta máechajiriruvana ema Víaquenu, ecájimuyasamurechavaca táichavenénahi eta iúrvahi nayehe.

² Vaipa tácomesaimahi échajirica taicha náimahayare eta esuapajiraivahi nayehe, epicauchirahivare.

³⁻⁴ Ímerezayareva eta iúri va yátupiquenehi, tásihaquenehi te esamureana, tímicutijiricavahi eta iúrina eta emira. Tayanapanepuca ichanaruheripa, iúrinachavaya te esamureana. Evayuchahini eta étupisirava eta ésamirisirava. Eta juca, tétavicavahi eta ecunachacarehi mayehe ema Viya. Vahi étaparacaina eta evayuyujisirahipuca eta ecamurirhaira éta pa eta ecatata-sirana, váhivare étaina eta ecayehera oro.

⁵ Taicha acane ena vénarohana esenana náinapureanahi téhicanahi ema Viya, tacahehi eta náurinachiravahi eta náitaesirana, taicha yátupihí eta nacasiñavairahi mayehe ema Viya. Tásiha, tétavicavahi eta nasuapajiraivahi nayehe ena náimanaveana.

⁶ Ecutiya-re esu vénaraha Sara. Suímerecahi eta susuapajiraiva mayehe ema suima Abraham, taicha ani sucahehi mayehe: “Náquenu eñi”. Tásiha éti, vahi ecupica eta esuapirahi ena ímanaveana. Ímereca yátupina eta iúrvahi nayehe.

⁷ Éti pa ajairana ecayenaqueneana, eJapanuyare ena eyenana. Ejaneacavare, échahi éna eta vahi túmenahini. Yátupinahisera eta émunasirahi éna, taicha ecuticacayare eta ejacapirayare eta ícuchihí eta ítaesiraya mayehe ema Viya te jena sácheyare. Te iuri nayehe, esamacareya te eyujaraca.

Tiúriyare eta ecamichirahi eta iátajivana táichavenénahi eta íchirahi eta táuriqueneana

⁸ Ámutu éti, ácuticacahi eta epanereruana. EJapanucaca, émunacacavare nayehe namutu ena echamuriana. Ecajirahi. Mánsubénahi.

⁹ Tijuricati natupiacahepuca, náumehahe, váhisera ecujicapa. Eyaseacachucha ema Viya eta náuricacarevaina. Taicha mavaraha ema Viya

vijapanurahiyarehi víti, vicutiyare éma eta majapanuraivahi. Tatiarihiyare táitsivayare viyehe máicha.

10 Taicha ani tacahehi eta Salmo: “Mácani mavarahahi tíuritaesira te apaquehe, támutuyare sácheana tíuriya, vahi téchajjicaimahi tivayuare-caimahi. Váhivare ticaetemarecaimahi tépiyahirahimahi.

11 Váhivare máichaimahi eta tamauriqueneana. Máichahisera eta táuriqueneana. Macamitiacahi eta semanereana.

12 Ema Viya majaneaca ena náuriqueneana; tisamacareanahi eta nayujara-sirana. Énasera ena tíchanahi eta tamauriqueneana, macatianaruanahi éma” tacahepa eta Salmo.

13 Nájina tíjaracavaimahi titupiacacheana te náimahahi icha eta táuriqueneana.

14 Tijuricati natarihipuca ena ticatianacaheanahi táichavenehi eta táurivahi eta ítasesirahi, tásiha, tétavicavaya eta iúricacareva. Váhivare ecupica eta jácani náichirahepuca, váhivare iávamirahuimahi nayehe.

15 Íjaracavasea yátupi eta éhisira ema Viáquenu. Te nayaserecahepuca eta tacayema eta éhisirahi éma Jesucristo, tíurihi eta ejicapiravacaya tayehe eta ecuchapaquene. Mánsuhéna éti, epicaurahivare.

16 Tátupiruva tamutu eta íchaqueneana, táurivare eta náimairahena namutu ena achaneana, apaesa ecamatinaca nácani téchajisiaracaheanahi eta táurivahi eta éhisirahi ema Jesucristo, nátsirihapaini eta náechajjisira.

17 Te máisapahipuca ema Viya eta náemecatajivachirahe táichavenehi eta iúrivahi, tacunachacareyare mayehe eta ecamichira. Tájinasera ecunachacarevaimahi te ecaviurevahi.

18 Yátupi ema Cristo, étaherichuhi vímicapacahi táichavenehi eta vipecaturana. Éma, tétavicava eta máuriva, matapiravarehivare. Tíjaracavahisera ticatajivaya víchavenehi víti váinarajiqueneana, mavarairahi tíamahavi me Viya. Tépenahi eta máquehe, étasera eta máchaneva tímiyanavaichucha titareca.

19-20 Tíyanavarepa máejirapanavacahi eta náchanevana ena náepenaque-neanaini nacaerataqueneanahi te infierno. Ticametarairupa nayehe ena nani náepenaqueeneana antivuanaini, machamurianaini ema víyarahaini Noé. Ichapehinenihi eta macamichiravacahi ema Viya eta macuchapiravacahi eta nasuapirainahini, vahi náéñamavahini eta náimairahi ema Noé máepiyasirahi eta ichape pacure. Tacahe, te témiricapa eta ichapequene tiquiva, macarichuhi ema Noé ésupa esu mayena, énapa ena machichanaveana énapa ena nayanana, óchoanaichuhi ena tíuchucuhanahi tayehe eta ichapequene une.

21 Tiuri puiti, eta une ticaeririjicavacahi ena masuapajirairahana, nímicutichahehi eta vícachasi. Eta vícaicachasirahi te víjaracavapa véhica ema Jesucristo, vahi étaparacaina táepachiacahavimahini eta viáquehe. Étasera eta vícaicachasirahi, étapa tímereuchahavi eta maperdonachirahaviripa ema Viya tamutu eta vipecaturana. Máepachinachinahaviripavare eta viáchanevana, tájinapa taviuchahavihini, eta visamiravahi te mamirahu. Yátupina eta víuchucuirayare táichavenehi eta máechepusirahi te máecari ema Viáquenu Jesucristo.

22 Puiti éma, tíyanaripahi te anuma; téjacaripa te mavaure ema Maiya. Tétavicavahi eta masuapacarevahi nayehe namutu ena mayeheana ángeleana. Énapa ena váinarajiana, nasuapahivare.

4

Eti éhicanahi ema Viáquenu, tituparacahe ecaratavayarehi apaesa vaipa íchaimahi eta tamauriqueneana

¹ Ema Cristo, ichapemurihi eta macatajivairahi eta máepenirahi te crusu. Macamichahisera éma tamutu. Éti apanavare, ecutiyare éma. Vahi iávamirahuimahi eta ecatajivairaya. Nímicutichaheyare eta mácani achane tépenapa, máinajicaripa eta pecatu.

² Eta tacahe éti, táichavenehi eta iúrujasirahi ema Jesucristo, tímicitijiricavaipa épenaipahini, ínajicaripavare eta pecatu. Puiti eta tápechiravaripa táitarecahini eta íchanevana, tatuparacahi ecaemataneacayare ema Viya. Vaipa tivayuacahémahi eta tajamuraraiva eta iáquehe.

³ Tamapurujipa eta táetavisiravaripa eta áñoana eta íchirahi eta tamauriqueneana, taicha emaimatirahi ema Viya. Tamutuhi icha eta tájiparacana, tivayuacahéhi eta tajamuraraiva eta iáquehe. Evayuchavahi eta esenamaréranahi étapa eta ecavaharasiva. Ecasamurehi eta íchira eta piesta. Íchahi eta tájiparacana tamauriqueneana eta ejaneasirahi eta esiñarajiana achanemirana.

⁴ Puitisera éti, vaipa ecasiriquiremurihini ena émunacasareana. Vaipa íchaimahi eta táíñemahiquene eta náitaresirahi. Ichapemurinehi eta náejiasirahéhi. Tásiha, téchajicanapa eta eyehe.

⁵ Járjapainapasera eta sáchezare nacayaseserehirayare te mamirahu ema Viáquenu, taicha éma yátupiquenehi eta macatuparahairahi eta vicayaseserehiraya víti, vítarerunaíchaha énapa ena náepenaqueneana.

⁶ Eta tacahe, ema Jesucristo ticametarairuhi nayehe ena náepenaqueneana, mavarairahi macuchucuhayare eta náchanevana apaesa nápechavahini náitareca te mamirahu ema Viya, tayanapane eta náeche máteji táitavapapuca tayehe eta tacaecarasiyahi.

Yátupina eta émunajirisiracacaya, ítátijíricacayareva

⁷ Esamanuchaha, tiánehipa eta táitavirayare tamutu eta juca. Eta tacahe, ecaratavaya eta epanereruana apaesa táurivaina eta eyujarasiranaya.

⁸ Tiápajucavayahisera ichape eta émunajirisiracacayare éti. Te yátupihí eta émunajirisiracacahi, máejerareya eta eperdonachiracacaya eta jácani éjecapiravana.

⁹ Evapinavaya eta ejacapiracacaya, te epaipichacaca te epenana.

¹⁰ Ema Viya tjaracahevacaripa eta ítucaquenepachuhi. Tacahe, yátupina ítauchaya eta ecaemataneasiracacahi te mamirahu.

¹¹ Eti máimitureana ema Viya eta échajisira, ecuneuchava échajica yátupi eta máechajiriruvana éma. Eti ímicatarahiana ítátivaca ena echamuriana, vahi éñamaimahi eta etumeva májjararuhehi ema Viya. Étavenehi éhisirahi ema Viáquenu Jesucristo, tamutu tauri eta jácani íchaqueneana apaesa nacunacha ema Viáquenu namutu ena tímahaheana. Éma, ¡tétavicavahi eta macunachacarevahi! ¡Tétavicavahivare eta máitupajijiasiravahi eta máechirahavíhi tiuri! ¡Máitavacahivare eta véhisiraya éma! Amén.

Vahi ecuavamirahu eta ecatajivairaya táichavene eta éhisirahi ema Jesucristo

¹² Némunarqueneana nuparapenaveana, vahi ecuarami eta muracairaya eta iátajivanayare, tímicitijiricavayarehi táramicarehini eta eyehe.

¹³ Evapinavachucha taicha ecapayayaracahi eta macatajivairahi ema Cristo apaesa evapinava te jena sáchezare eta enecapirayare éma eta máucupaisiraya mámirayarepahi eta majaraíva.

¹⁴ Te náumehahepuca máichavenénahi ema Cristo, tétavicavayare eta iúrica-carevaya éti. Taicha tiávahácaheyare ema Espíritu Santo, másihaquenehi te majaraíva ema Vicaiyaquene. Tayanapane náepurupuca éma, étisera ecunachahi éma.

¹⁵ Te etiarhipuca eti ecatajivahi náicha, tacuijaserá étaimahi tiviucahémahi jácani ecapahivainahini, iámeraivainahipucáini, váhivare étaimahi tiviucahémahi jácani ímisiapirasiravainahipucáini tayehe eta náichaqueneana nácani apanana achaneana.

¹⁶ Étisera, te ecatajivapuca táichavenénahi eta éhisirahi ema Cristo, vahi ecutsiríha. Evapinavachucha, ehasulupayachavare ema Viya tayehe eta ecajajerahi eta májare ema Cristo.

¹⁷ Puiti juca sácheana viávacurehi, táitecapaurehviripa ichape eta vicatajivairayare, mavarairahi ema Viya vímerekavava eta viúri va víti machichanaveana. Énaserá ena masupajirairahanahi eta náichuirahi ema Viya, páureanasami taicha tiápajucava eta nacatajivairaya, ichape eta náicuñaya.

¹⁸ Ichape eta vicatajivairahi te juca apaquehe viti macuchucureanayarehi ema Viya. ¡Páureanasamisera ena achaneana masupajirairahana, váinarajiqueneanahivare! ¡Ichapepanayare eta nacatajivairaya!

¹⁹ Puiti viti véhicanahi ema Cristo, ichape eta vicatajivairahi. Váhisera vicainajiruvaimahi. Vimiyonavayarehi vicha eta táuriqueneana. Vácasiñava mayehe ema Vicaiyaquene eta majaneasirahavivare, taicha éma, tétavicavahi eta máitauravahi.

5

Ema Pedro maconsejachavaca ena machamuriana

¹ Tiuri puiti, nuparapenaveana, nuvaraha nuconsejachahe emutu eti pastoreana ejaneacanahi ena vichamuriana. Nútiripa pastornuhi. Énerichuvare testigonuhi eta nímarasirahi eta macatajivairahi máepenirahi eta te crusu ema Cristo. Esuapanuyare puiti eta nuconsejarapi taicha vicuticacayare tayehe eta vicatuparahairaya viávihayare te majaraíva ema Cristo te táitecapa eta machaviraya.

² Tauri eta ejaneasiravacaina namutu ena vichamuriana, taicha éna tímicutijiricavahi uvesanainahini mayehe ema Viya. Ítauchayare eta etuparacativahi. Ema Viya mavarahahi evapinavahini eta ejaneasiravacahi. Vahi ecuyacujiequenehavaca. Váhivare ecupanerecha ecavacha. Evapinavayaresera eta ecaemataneasiravacaya.

³ Váhivare ímipananájicavacáimahi taicha vahi ecavanaravacahini. Ímerekayarehisera eta iúrivaya nayehe, apaesa éna náehica eta iúri vanahi.

⁴ Apaesa te machavapa ema yátupiquene Pastor eta viyehé, tétavicavaya eta macunachiraheya. Tíjaracahenapa éma eta evachayare ícuchihi. Máitavacainapa eta ecachaneraya éma te mávihahi eta te majaraíva.

⁵ Eti apanava eti amaperuana, nuconsejachahe: Esuapayare eta navanesiraheana ena víyahana. Emutuyare esuapacaca. Mánshéhahi. Taicha ema Viya vahi majapanuimahi ena ticasíñavavairicana. Tétavicavasera eta majapanuiravacaya ena mánspanereruanahi.

⁶ Te ímereca eta emansuvavacahi tayehe eta ecasiñavairahi eta me Viya, éma, te máimahapa tiuri, ticatiuchahenapa te tamutu eta íchararacavaqueneana. Tásiha, tétavicavayare eta iúrisamurevaya.

⁷ Te tatiarihipuca eta éñamiravana, emetaca tamutu ema Viya. Éma, ticana-racaheyare taicha tétavicavahi eta máeñamiravahi eta eyehe.

⁸ Ecuneuchava yátupina. Ejaneacavahivare, taicha ema viánarahi Váinaraji, macuti eta táíñehiquene sárare tatanujiriricahi eta tanicayarehi. Ene maca-hehi éma, matanucahi ena máquipairuanayare.

⁹ Eta tacahe, túmehéna ecanarairayare éma, machu máquipaicahe. Ácasiñava muraca eta mayehe ema Viáquenu. Écharichuhi vahi ácarichuhini eta ecata-jivairahi. Túmehénahi eta ecamichiraina, ecutiyare eta nacamichirahi ena vichamuriana ticavasanahi te tamutu avasareana.

¹⁰ Ema Viya, tíchuhahavihi, mavarahahi visiapayare tayehe eta mávasa táichavenehi eta véhisirahi ema Jesucristo. Ánipirinesera eta ecatajivairaya puiti juca sácheana. Émasera ema Viya, tétavicavahi eta majapanuraivahi. Éma, tímararacahehi eta ecamichirahi; tásiha éma, tíjaracahenapa eta evayu-chiravainapaicha eta etumevaya. Tájina ticayayacahemahi máicha.

¹¹ Éma, ¡máitavacacahi eta macunachacarevahi! ¡Macachuricahi eta máitupajijiásirava, máitavacacahivare éta! Amén.

Eta táichecuaraqui eta macartane ema Pedro

¹² Ímati emutu ema vichamuri Silvano. Éma, tétavicavahi eta máitauravahi te tamutu. Puiti, émahi ema tiáminanurihi eta juca nucartane. Núti, ánipi-chichahi nájurehi eta eyehe. Esamanusera eta nuconsejachirahehi. Eta numetasirahehi tamutu eta juca, nuvaraha nétumechahe eta véhiruhi, taicha yátupihi eta vicaijuheirahi me Viya táicha.

¹³ Énaripa ena vichamuriana ticavasanahi te juca avasare Babilonia, téchajicaheana. Énerichuhivare éna, manerejiruanahi ema Viya ecutihi eti eta manerejisirahehi. Téchajicahehivare ema nuchicha Marcos.

¹⁴ Núti, eta néchajirisirahehi éti nuchamuriana, nuvaraha nétserarecahe emutu, táicutiarahi eta tavayuchirahi eta némunasirahehi emutu éti.

Puiti nuyaseuchahehi me Viya, májjaracahehini tanaraca tamutu eta epanereruana emutu éti machaneranahi ema Viáquenu Jesucristo.

Tamutupa eta juca néchajiriruvahi eyehe.

Eta macartane ema Apóstole Pedro, ticaijare 2 PEDRO

¹ Nuti Simón Pedro, mavanaranuhi ema Jesucristo. Manerejirunuhivare mayehenuhi apóstole. Nucajurehe eta juca nucartane eti nuchamuriana taicha tétavicavahi eta evapinairavahi eta juca véhiruhi. Puiti éti apanava ejaçapacarehivare me Viya, ecaicuchiripavare eta iúchucuiraya maicha ema Viáquenu Jesucristo.

² Puiti, nuvaraha tajuruçaini eta ecaicutiaraira eta máemunasirahehi ema Viya, tásihaquenehi eta ímatiequenehairapaipahi eta mapanereruana éma, émapa ema Viáquenu Jesucristo. Tájinavare tahapapiricahini eta táurivahi eta epanereruana.

Eta náurivana ena téhicanahi ema Jesucristo

³ Táichavenehi eta vímatirahi ema Viya, tétavicavahi eta máitupajijiasiravahi eta macaemataneasirahavihi eta vítaresirana, mavarairahi vétaviuchahini eta viúrivahi, vicutiyarehi éma eta masantuvahi. Étahi eta mapanereruhi eta máichuirahavihi. Tásiha, visuapavanepa taicha vímahapa eta majaraivahi, vímahavarepa tétavicavahi eta máurivahi taicha camuriquenehi eta táuriqueneana máichaqueneanahi.

⁴ Tíjaracavaripavare éma táetaviuchayare eta viúricacarevanayare maicha te jena sáçeyare, tijamurachacareanahi tamutu. Muracahi eta vicasiñavairahi eta máitachirayare tamutu eta júcana, taicha tétavicavahi eta máurivahi étapa eta majaraivahi. Táichavenehi eta ecasiñavairahi mayehe, tinacasamurechahehi eta ecasamurerayarehi étachucha eta táuriqueneana, ecutiyahe éma eta macasamurerahi eta táuriqueneana. Vaipa tivayuacahemahi eta tajamurachaqueneanahi eta iáqueheana, taicha tétavicavahi eta tamaeperajichirahahi eta cape juca eta ítaresirana.

⁵ Eta tacahe, etuparahahi puiti, ímiyanavahini eta éhisirahi éma, epamicavavarehini iúriya nayehe namutu ena achaneana.

⁶ Epamicavavaréni ecaravahu apaesa ímatiequeneha eta mapanereruana ema Viya, ecaravahuvarehini ecaratavaha, étumechavavarehini eta ecamichira eta jáçani iátajivana. Epamicavahivareni ácuti ema Viya eta masantuvahi.

⁷ Epamicavahivareni iápajucaya eta émunaraivahi nayehe ena eçamuriana, eçajirayare. Epamicavahivareni eta émunaraivahi nayehe ena apamuriana achaneana, tayanapane vahi náehicahavihini.

⁸ Eta tacaheyahe eta ítaresirana éti, ítamuturusirahi tamutu eta júcana iúriivanahi, ecutipaipahi ema Viáquenu Jesucristo eta máurivahi éma. Énerichuvare te muracahi ijaracava ecaravahupaipahi eta júcana, tiápajucavaipaipahi eta ímatiequenehairahi eta máimiturapiana, tiápajucavapaipahivare eta etumeva tayehe eta ecaemataneasirahi éma.

⁹ Náçanisera vahi návarahahini nacaravahu, tímicutijiricavahi ena púçuquiana énainapa ticatajivanayare. Taicha náemitisicaipahi eta máepachinachiravacahi ema Viya tayehe eta tánapurénihi napecaturana náichaquenénihi cape eta náitaesirahi.

¹⁰ Étiserá, eti nuparapenaveana, nuvaraha échavahini eta máichuiráhehi ema Viya, manerejisiráhehi. Epamicavahini eta ímeresiráhi yátupi eta machicháherahi. Eta ímiyanirávahi eta ecaravahúira eta juca néchajisíhaqueneanahi, jéhesare, tájinapa tímiáquipaichémahi.

¹¹ Tásiha, tétavicavaya eta iúricacarevaya eta machimapiráheya ema Viáquenu Jesucristo te macuchucuhahepa eta te juca apaquehe, mámiraheya eta te mávacureya. Máitavacacaya eta macachanerahaviya vimutu.

¹² Tacahe núti, nupamicavahi puiti eta némechiráheya eta júcana, tayanapané nímatíhehi eta ímatirarípahi, muracarípavare eta éhisiráhi eta yátupiqueneana ímitucasivanahi.

¹³ Németeaca nétupicavahi eta juca nuconsejachiráhehi puiti juca nítaresi-raichaha te juca apaquehe.

¹⁴ Taicha vaipa náyeremahicha eta nítaviraya. Ema Viáquenu Jesucristo tímimetacanuhi eta nunarasiravanenapa te machacaya.

¹⁵ Nuvarahahisera vahi ecuemitísica eta juca numetaruheanahi, tayanapanéinepuca népenaípa. Eta tacahe, nupamicavahi eta nímiájurecahe emutu, taicha nuvarahahi échayarehi tamutu sácheana.

Viti vímahahi eta majaraivahi ema Jesucristo

¹⁶ Viti vitupiruva eta vímitúsiráhehi tayehe eta táicharacavayare eta machaviraya ema Viáquenu Jesucristo, máimeresiráya eta máitupajjiasirava íchape. Vahi vépiyahiráhimahi, váhivare víveháquenéna te vichuti. Vímatípa yátupi, taicha vímahahi te víuquíhana eta majaraivahi eta aquenucairahi.

¹⁷⁻¹⁸ Taicha viti vítiarihihi te machacaya ema Viáquenu Jesús, víchanehi éma tayehe eta cerro santo, te vinecapaequenehapa eta macaijáreiráhi éma eta Aquenucairaya. Visamahivare eta máhu ema Tata Vícaíyaquene eta macunachiráhi ema Machicha. Ánípa macáhehi: “Ema maca éma yátupiquenehi Nuchicha némunaruquenehi. Tétavicavahi eta núrísamurevahi máicha” macáhepa.

¹⁹ Viti vítametacáhi eta nacayemaqueneanahi ena víyarahánaini profetana tayehe eta Sagrada Escritura, eta náechajisíhairáhi eta aquenucaírayarehi ema Viáquenu. Eta náimiturápiana tacutihi eta tajaraiya eta lámpara eta tamicauchiráhavihi apaesa táuriyare eta vítaresirana te juca apaquehe taurivahi. Tacahe, étumechava tayehe eta ecuchapiravaya eta sácheyare te márajapainapa ema yátupiquene eta majaraiva, tétavicavayarepa eta mamicauchiráheya tamutu eta esamureana. Tacahe, tituparacáhehi esuapayare eta juca esamaqueneanahi vímitucasivanahi.

²⁰⁻²¹ Nuvarahasera yátupina ímatiequeneha eta juca: Vahi táurica víveha te vichuti eta vímíjachiráhi eta tacayemaqueneanahi eta Sagrada Escritura. Vícatuparaháhi vícaravahuyarehi eta yátupiquenehi. Ena víyarahánaini profetana, váhivare naveháquenénaíni te nachutiana eta nájuequenehairáhi eta máechajíruruvana ema Viya. Ema Espíritu Santo, éma tímitucavacáhi eta nájuequenehairaya éna tayehe eta Sagrada Escritura vímaháquenehi puiti.

2

Natiarihiyare ena tépiyahiráhianaya tímíjachavanayare pastoreana

¹ Tiuri, acane natiarihivaresera ena tépiyahiráhiana tímíjachavanahi profetana te namuri ena náchucanaveanaini israelítana. Ene tacaheyare puiti,

natiarihiyareva ena tépiyahirahianaya, tépiyacavanaya pastoreana eyehe. Éna típichasicaheanayare. Témejecapavachaheanaya, apanaya eta náimiturapiana. Vahi émaimahi náechajisiha ema Viáquenu ema náimicaparuhivare. Énajivahi tíchavanahi natanucahi eta náicuñayare, táijahúchiravayarehi eta náemitiequenehairayare.

² Camurianayare ena náemejecapavaruanayare, náehicainapa eta nayeherepi, táetaviuchirahi eta natuhusivahi. Náichavenehi éna, téchajicanainapa ena apamuriana achaneana, nacaecahinapa eta juca véhiruhi táurinaquenehi achene.

³ Ena nani, tímítucaheanaya eta náimiturapiana náepiyahiraivanahi, taicha navarahahi tíducavana tivereacaheanainapa éti, taicha tétavicavahi eta najamurarasirahi eta plata. Tájinasera náipuinayare, vahi táevejuacaimahi eta náicuñayare. Taicha acanevacaipa eta tacaecherairahi eta náicuñayare.

⁴ Nacutiyare ena ángeleana téjecapavanahi. Tájina vahi maperdonachavacaimahi ema Viya. Máquijicavacapa tayehe eta táíñehiquene infierno távihahi eta timapicuquene. Ticaitihanahi puiti te cadena. Te táitecapapa eta juicio, tiápajucavanainapa eta náicuñayare éna.

⁵ Nuvaraha némechahe nayehe ena machamurianaini ema víyahaini Noé eta acane, váhivare májapanuvacahini ema Viya táichavenehi eta namasuapajiravahi. Macamiricapa eta ichape tiquiva náicuñahi. Téricanahi namutu ena nani achaneana, taicha náepuruhi eta máichuiravacahi ema Noé, táurivayarehini eta náitaresirana. Nacarichuhi tíuchucuhinahi ema Noé, esu mayena, énapa ena sáisiqueneana machichanaveana.

⁶ Nuvaraha némechahevere nayehe ena ticvasanainihi te avasare Sodoma, étapa te Gomorra, váhivare majapanuvacahini ema Viya. Macamiricahi eta yucu, náicuñahi éna. Táijahúchavacapa tacamitiequenehavaca namutu. Títavanapa, amairihanecha tsimapa eta náitavirahi. Ema Viya máimerecahi eta juca, nayehe ena najurureanapa te juca apaquehe puiti, mavarairahi mámechavaca ena achaneana váinarajipanereruanahi te napicayarepuca.

⁷⁻⁸ Téhesera te nataracu, matiarihi ema víyahaini ticaijare Lot. Éma, tamutuhi sácheana ticatisamurevahi taicha máimairavacahi ena achaneana náichirahi eta tauriqueneana, masamirahivare eta náechajisihairahi eta titsirihacareanahi. Téñamavahivare éma eta máimairavacahi ena achaneana, natuhusivavacahi eta náitaresiranahi. Tacahe, machucuhahi ema Viya, taicha éma Lot, tétavicavahi eta máurivahi, tisuapajirahihi mayehe ema Viya.

⁹ Eta tacahe, ema Viya tétavicavahi eta macatiuchirahavi puiti, ticuchucuhavi viti véhicanahi éma, tayehe eta viátacajivana. Énerichuvare yátupihí matsecaripa eta náicuñayare nácani achaneana masuapajirairahanahi.

¹⁰ Ema Viya, yátupihí máicuñacavacayarehi namutu ena tivayuchanahi eta náechipejisirahi eta náqueheana taicha tétavicavahi eta tavayuasiravacahi eta natuhusivana, énapa ena tépuruanahi ema Viáquenu eta émairahi téchavacahi. Ena nani, máeyajanahi. Mapicaurairahana, nájina návamirahuquenéna eta náumeharaiva. Nasapiha nacaecahivare ena ángeleana tiámana eta ma-jaravahi ema Viya.

¹¹ Apanasica ena ángeleana tiávianahi te mamirahu ema Viáquenu, vahi nájaracavahini nacajacharecahini ena váinarajiana, tétavicavahinéni eta natumeva.

12 Énasera ena nani tépiyacavanahi pastoreana, nacaecahihisera eta téhicacareana namaitururequeneruanahi. Éna, nacutihi eta táitaresira eta sárare, tájina nacaicutiaraquenéna. Najurupairuchucha te apaquehe. Éna, táuriavasahi eta justicia, máejehahi náerataca táimicapacavaneyare. Tépenanayarehi nacuti eta táepenira eta sárare.

13 Éna, náimicatájavachahi nácani apamuriana achaneana. Páureanasamisera éna, tiápajucavanayare eta nacatájivairayare.

Ena nani, tétupicavanahi eta náimairavahi, tiúrisamurereácavanahi eta nacavahairahi tamutu sácheana. Táitaurevaquenehi tétavicavahi eta natsirihacarevayarehi eta namaetupicushivanahi, eta nacasiriquirahehi te jácani énisiracacana ena echamuriana. Ticamapuravanahi ticurisamurechavana, navairahi náituruca jácani najamurachaqueneana.

14 Namutuchucha najamuracha nácani esenana. Tájina náipuina eta náesenamarévana. Náechemaha eta náiturusiraya súcani esena máejerarehi. Náimitucavare ena ajairana tájina náituruéqueneha, nacutiyare éna eta náesenamarevanahi. Tájina tívichuquihaimahi eta nacapecaturairahi. Ecuñaraqüisera eta náícuchihi éna.

15 Témunasiricavanahi éna, taicha namaimatirahi eta achene nacaijuheya eta táuriquenehi. Nacutipahi eta mayeherepini ema maca achane Balaám, machichaini ema Beor. Éma, tétavicavahi eta majamurachirahi eta plata, mavachayare eta máichirayare eta tamauriqueneana.

16 Ema Viya máimahahi eta tamaurivahi eta mapanereruhi ema Balaam. Eta tacahe, eta burro macaperaquenehi ema Balaam téchajicapa, taca-jachahi ema Balaam. Éma, macacutiarahi eta táechajiriruvana eta mapera. Enevanepa témitiacahi eta mapanereruhi tamauriquenénihi.

17 Ena nánitátaji achaneana nacutihi eta tiájicu eque. Nacutivare eta úcaji támaririruhi eta tétaticava. Éna, jararihipa eta náicuchi náicunayare tayehe eta táetaviure eta tamapicuva.

18 Ena téchajisiavanapa ticunachavanapa eta náichaqueneana napecaturanahi náiturureanahi. Náiminajicapaipa nácani náiturevanapahi eta táurivainiripahi eta náehisirahi eta táuriqueneana, tichavanapaipa tayehe eta tamaeperajivanahi eta náitaresira.

19 Éna, ánipa tacahe eta náechajiriruvahi: “Víti, nájina vísapaimahi tipamicahavi. Tacutirichuhi te vicha eta tamauriqueneana étapuca eta táuriqueneana. Vítijiva véchinavahi eta vítaresiraya” nacahehi. Éna, tímijachavanahi líbreana. Énasera tiápajucavanahi ticaeratanahi taicha eta tavayuchiravahi eta napecaturana étapa eta namaeperajivana. Nácani tavayuaruanahi eta napecaturana, vaipa énainahini náechinavahini.

20 Tacutiquene nácani tínajicavanahi eta náehisirahi ema Viáquenu Jesucristo, tichavanapa tayehe eta tamaeperajivahi eta náitaresirana te juca apaquehe, éna, tiápajupananavana eta nacaicuñairayare, taicha eta naviurevahi.

21 Tiúripaichuhipucaini vahi nacuimatihini eta táurinaquene véhiruhi, váchupa náimatiripahi eta tiúrina achene, tásiha tínajicavanarichahavare tayehe eta táurinaquene vanairipi najacapaquenénihi.

22 Jucarihi eta náechajiriruva náchucarapi, ani tacahehi: “Te tiáhica eta tamucu, táimichavayarehi tanica eta táhiruha. Étapa eta cuchi, tamapuruji

vícachahini éta, taicha técarajicavayarehi te tiúraji”. Ene nacahehi ena tñajicavanahi tayehe eta véhiruhi, tíchavanapa tayehe eta tamaeperajiqueneanahi.

3

Vaipa táyeremahi eta machavirayare ema Viáquenu Jesucristo

¹ Némuraruqueneana nuparapenaveana, apihepa puiti nímiamaréca eta juca nucartane. Eta táechajiriruvahi eta apinaquene nucartane, nuvarahahi nuconsejachahe, apaesa tacuija tahapapícahe eta éhisirahi ema Viáquenu.

² Nuvarahavare yátupina eta esuapiraina eta Sagrada Escritura nájureanahi eta acane ena víyarananini santo profetana, étapa eta máimiturapiána ema Viáquenu Macatiurahiquene. Étarichuhivare vímiturapihi puiti eta eyehe viti apóstoleana.

³ Tínapucayare nuvaraha némechaheyare eta juca. Te jena sache tánehipa eta táitavirayare, tímerecavainapa ena achaneana ticaecahirahiana tayehe eta juca yátupiqueneana vicuchapaqueneanahi víti. Eta náitaresirahi éna, apanachucha eta tihapapiricavacahí eta náichirahi eta tamauriqueneana najamurachaqueneanahi.

⁴ Áninapa nacaheyarecacha: “Táicharacava eta juca ecuchapaquenehi. Vuíchahacaru machavahini ema Cristo, ímijachaquenehi tichavavaneyarehi. Vaipa tasuapacare eta machaviraya. Taicha puiti tacutirichuhi eta náitaresirainihi ena víachucanaveánaini. Tanasirichuhi eta táepaniravahi acane eta apaquehe. Vahi táitsivachavahini” nacahepa.

⁵⁻⁶ Ena nani, vahi návarahahini napanerequeneha eta táitsivachiravahi maicha ema Viya. Jéhesare éma, eta acane, máechajiriruchucha eta máepiyasirahi tamutu eta anuma étapa eta apaquehe. Máechajiriruchuchavare eta táimeresiravahi máicha, eta tiájipahi tétupiecahi te une. Énerichuvare, te táequenepa, únehi eta náicuñahi máicha, macamirisirahi eta ichapequene tiquiva. Téricanahi namutu ena masuapajirairahanahi.

⁷ Numetacahe puiti: Ema Viya tiápechavayare máicuñacayare eta juca apaquehe. Yúcuyarehisera eta tacamítiequenehayare tamutu eta anuma étapa eta juca apaquehe. Taicha éma, manacaripahi eta máechajiriruva, máicutichahi eta tayerevaya étapa eta távapahianahi. Jéhesare, te jena sáchehare, títaicavacayare namutu ena achaneana masuapajirairahanahi váinarajianahi.

⁸ Váhivare ecuemitísica, nuparapenaveana, eta matuparaquihí ema Viya, vahi tácuti eta vituparesira viti achaneana. Éma, étana sache matuparacahi, vítisami míl añoripa eta vitupachirahi tayerevaipa.

⁹ Éma, manacahi eta juca tayerevahí, mavarairahi macuchapayare ena achaneana eta náeneuchiravayare mayehe. Vahi tácahequenénahini eta juca táitaresirahi maicha eta apaquehe. Ichapemuri eta macayeherahi paciencia eta vijehe, mamavarairahi vámutuhichaini vémitiequenehíni. Nararihiserá ena achaneana téjcapavanahi te napanereruana. Eta náimairahi eta mayerevahí ema Viya eta máicuñasiravacayarehi, náimijachahi vaipa maratahaimahi máicuñaca eta juca apaquehe.

¹⁰ Esamanuchaha. Te táitecapapa eta sáchezare táitavirayare tamutu maicha ema Viya, vahi vinecapauchavaimahi, taicha tacutiyare eta mayumurusirava eta máitesira mácani tiámerahi. Eta anuma, étapa tamutu eta távapahianahi, tamutuyare témitiaca. Ticaemayare muraca, tacutiyare eta tacaemaira eta ichapequene yucu te ichape curiche. Étapa eta tiávihanahi te apaquehe, tamutuyarehi útava, énapa ena távapahianahi. Tamutuyare táijuchayare eta yucu.

¹¹⁻¹² Tásiha éti, écharipahi eta juca táitavirayarehi eta anuma étapa eta apaquehe, táijuirayare tamutu te yucu. Puítipa tacamunuiipahi ámutuhini ésenicahini ema Viya, étaviuchahini eta iúrivahi eta itaresirahi. Puiti, yátupi ávarahahini táitecapavanehini eta jena sáchezare. Eyaseaca ema Viya táitecapavane.

¹³ Taicha viti machaneranahi ema Viya, vicuchapainapa eta arairuyare anuma étapa eta arairuyare apaquehe, vícuchihi mayehe ema Viya. Tájinainapa eta pecatuana, vaipa tihapapicahavimahi. Tétavicavayarehi eta táuriva.

¹⁴ Eta tacahe, némunaruqueneana nuparapenaveana, puiti eta ecuchapirayare eta juca tacaitsivairaya tamutu, étumechavayarechucha eta ecasiñairahi ema Viáquenu Jesucristo, apaesa tauri eta machimapiraheyare, tacuija etapiravainahi.

¹⁵ Échava yátupina eta macayeherahi paciencia eta viyehe ema Viáquenu taicha mavarahahi ticuchucuhahaviya. Étarichuhívare tacahehi eta máimiturapihi ema apana viparape vémunaruquenehi Pablo, táichavenehi eta máitupajijiasiravahi máijjararui ema Viya.

¹⁶ Tamutu eta macartaneana máimiamareranahi eta eyehe, étarichuhi táechajisihahi eta júcana. Jararihisera ticajerahi eta ecaicutiarairainahini. Nararihisera ena ticaravahuana apaesachicha, vuíchahavare túmevacaimahi eta náehisirahi. Náequepicasamichucha eta táimiturapi eta macartane. Nahapapicavare eta táimiturapihi eta apana Escritura. Táimicuñacavacayaresera eta nahapapisirahi.

¹⁷ Eta tacahe, némunaruqueneana nuparapenaveana, vahi tacumapuruji eta ímatiequenehairahi eta juca, machu nahapapicahe eta epanereruana ena tivayuarahianatataji. Máchuvare náiminajicahe eta éhisirahi ema Viáquenu.

¹⁸ Puiti, nuvaraha tajurucaparichuchaini eta ímatiraina ema Viáquenu Jesucristo. Tajurucaparichuchavaréni eta evapinairavahi eta máemunasirahehi ema Ticatiuchahavihi. ¡Tétavicavahini eta vijirauchira, vicunachahini éma, te vinarasirana, te véjamisirana! ¡Te visiapainapa eta mávasa, vímiyanavayare! ¡Amén!

Eta macartane ema Apóstole Juan, ticaijare 1 JUAN

Eta viúrujasira ema Jesucristo

¹ Nuti Juan nímiama-reca eta juca nájure eta eyehe. Nuvaraha numetacahe éti, eta véchaquenehi mayehe ema Jesucristo, ema tíjaracahavi eta echájirirucava ticaitarecarahi. Éma, matiarihíhi acane te tépanavapa tamutu. Tacahe, tiúcupaicahi, tímerecavahi eta viyehe. Visamapa eta máechajiriruva. Camuri eta sácheana eta vímararasirahi éma te viúquiha. Vémamahaca te vivahu.

²⁻³ Éma, matiarihíhi acane, manasiqueneripahi mayehe ema Maiya. Tiúcupaicapasera eta viyehe. Víti vímatipa eta achánequenérahí éma. Tásiha, puiti vimetacahe eta juca vímahaquenehi étapa eta visamaquenehi. Vimetac-ahe taicha vivaraha iúrujicavahíni eta viyehe. Taicha víti viúrujicavahi mayehe ema Tata Vicaiyaquene émapa ema Machicha Jesucristo. Tásiha, éti apana iúrujicavahíni nayehe.

⁴ Tásiha, nucajurehe eta juca taicha nuvaraha yátupina eta iúrisamu-revaina.

Eta majaraivahi ema Viya

⁵ Vimetacahe eta máimitusirahavi ema Jesucristo. Eta juca eta macaye-maquenehi: “Jararihi eta tíjarahi mayehe ema Tata Vicaiyaquene. Tájina timapicuina mayehe, taicha mavayure eta máuriva”.

⁶ Tiúri, te vinasirichupuca víti te timapicu, tásiha te vicahehipuca: “Viúrujicava mayehe ema Viya”, tásiha víti vépiyahirahiripa. Vahi viúrujicavahíni mayehe, váhivare visuapahíni eta mavanairipiana.

⁷ Téhesera yátupina eta visuapira eta mavanairipiana, vinasirichuhi eta te majaraivahi ema Viya, tacutihi eta manasirarichuhi éma eta te majaraivahi. Tásiha, eta vinasirarichuhi eta te majaraivahi, viúritarecayarehi eta viúrujusiracaca nayehe ena vichamuriana. Énerichuvare máepachinachayare tamutu eta vicapecaturairana, taicha te tépenapa ema Jesucristo Machicha ema Viya, máepusaicahi eta máítine eta máepachinachirahavi-yarehi.

⁸ Te vicahehipuca: “Tájina eta nupecaturaina”, tacahe, vahi vátupiemahíni eta vipanereruhi. Vítijiva vivayuaracavahi víti.

⁹ Téhesera vitupiruvahi eta vimetauresiravahi eta vicapecaturairana mayehe ema Viya, jarahiripa eta maperdonachirahavihi. Taicha tíjaracavahi éma eta maperdonachirahaviyare, vahi táefiamavacarehíni. Énerichuvare májahaya tépachinachahaviyare tamutu eta tamauriqueneana viyehe.

¹⁰ Téhesera vicahehipuca: “Tájina nupecaturaina”, vépiyaequenehahi ema Viya. Vímicutijiricapa ema máepiyahirahíni. Vahi tátupiruvahíni eta vijachapirainahíni eta máechajiriruva.

2

Ema Jesucristo, ema ticatajirahi

¹ Nuchichanaveana, nucajurehehi eta júcana taicha nuvaraha vahi eucapaturaini. Téhesera íchapuca eta pecatu, mararihi ema ticatajirahi viyehe

te mamirahu ema Tata Vicaiyaquene. Ticaijare Jesucristo ema ticatajicahavirahi. Éma, matapiravare; tétavicava eta máuriva.

² Éma, tímicapacavahi táichavenehi eta macaepahairayarehi eta vipecaturana apaesa viúri mayehe ema Viya. Váhisera tácarichu eta vipecaturana víti. Táimicapacahi éma eta macaepahairayarehi eta napecaturana namutu ena achaneana te juca apaquehe.

³ Tiúri puiti, vicasiñavahi eta vímatirahi ema Viya, taicha visuapahi eta mavanairipiana.

⁴ Te nararihipuca ena nácani achaneana nacahehi: “Núti nímati ema Viya”, téhesera vahi nasuapahini eta mavanairipiana, tacahe náepiyevahi éna. Vahi tásuapacarehini eta náechajiriruva.

⁵ Étasesa eta visuapirahi víti eta mavanairipiana tímechahavihi eta viávahásirahi ema Viya. Yátupihí eta vémunasirahi ema Viya.

⁶ Víti vicahehi: “Viávaháca ema Viya”, tásiha, tacamunuhi eta táurihini eta vítaresirainahini tácutihini eta táurivahi eta máitaresirahi ema Jesucristo.

Eta mavanairipi ema Viya eta vémunasiracacaina

⁷ Nuparapenaveana, nuvaraha némechahe te juca carta eta macavanairipirahavi ema Jesucristo eta vémunasiracacaya. Te tépanavainapa eta ecaijuhherahi ema Jesucristo, vímitucaheripa eta juca mavanairipi. Taicha tamutu eta juca vímiturapiana táuchurehi tayehe eta juca mavanairipi ema Jesucristo.

⁸ Puitirichu nuvaraha tápajucava eta ecaicutiariraya eta máemunasirahavihi éma. Manasirichuhi éma te majaraiva ema Maiya. Tásiha éti, te esupa eta juca mavanairipi, te émunacaca, epauchainapaipa eta majaraiva ema Viya. Térájacavainapa eyehe eta timapicu.

⁹ Te nararihipuca ena nácani achaneana nacahehi: “Núti návihahi eta te majaraiva ema Viya”, téhesera nacaticahipuca ena nachamuriana, návirichuhi te timapicu. Vahi napauchaimahi eta majaraiva ema Viya.

¹⁰ Nácanisera náemunacahi ena nachamuriana, nanasirichuhi te majaraiva ema Viya. Tásiha, tíurihi eta napaisirahi, apaesa vahi náejecapavahini.

¹¹ Énasera ena nácani nacaticahi ena nachamuriana, nanasirichuhi éna te timapicu. Vahi náechahíni eta napaisirayare eta náitaresira, taicha eta timapicu vahi táisapahíni náimairiricahíni.

¹²⁻¹⁴ Eti nuchichanaveana, nucajurehe taicha néchahi eta maperdonachiraheripahi ema Viya eta epecaturana émavenehi ema Jesucristo, táichavenehivare eta ímatirapa ema Tata Vicaiyaquene.

Eti ávinaveana, nucajurehe taicha éti ímatihí ema Jesucristo, ema matiarihiquenehi acane te tépanavapa tamutu.

Eti átinaveana, énerichuvare nímiajurecahehi taicha tanasirichu iúnacahi te esamureana eta máechajiriruva ema Viya. Tásiha éta, tétumechahehi eta ecapaquechiraipahi ema Váinaraji.

¹⁵ Emutu eti, vahi ecujamuracha eta tamauriqueneana te juca apaquehe. Váhivare ecujamuracha eta tatiarihiqueneana tayehe eta juca apaquehe. Te nararihipuca ena najamuracha eta tamauriqueneana te juca apaquehe, vaipa émainahini náemunaca ema Tata Vicaiyaquene.

¹⁶ Taicha tamutu eta napanereruana ena achaneana te juca apaquehe, tájina táurivaina. Napanerechahi naicha eta tamauriqueneana. Najamurachaipa eta apayehe. Navarahaipa nacayehe náimijachaipapuca tíurihi

eta náimairahi. Te ticaimahaqueneanapa, tisiñavanapa táicha. Eta juca napanereruana, vahi máijjaruinahini ema Tata Vicaiyaquene.

¹⁷ Numetacahe puiti: Títavainapaipa tamutu eta apaquehe. Énerichuvare títavainapaipa tamutu eta najamuraqueneana ena achaneana. Vítisera, te visuapa eta mavarahaquene ema Viya, máichecuarquirénapa eta vítaresira.

Ena ticatianacana ema Cristo

¹⁸ Nuchichanaveana, puiti tiánehinapa eta táichecuraya, títavainapa tamutu. Vimetacaheripa eta máitesirayare ema maca achane ticaijare Ánticristo, ema ticatianacayare ema Viáquenu. Puítiripa nararihipa ena ticatianacanahi ema Cristo, navarahaipa máitecavane ema Ánticristo. Tásiha, véchainapa eta tiánehinapa eta táichecuraya tamutu.

¹⁹ Ena ticatianacana ema Cristo náuchurehi eta viyehe. Váhiserá viúmurivainahini éna. Taicha te viúmurivainahini, nanasirichuhini eta viyehe. Náerajiruvai pahisera eta viyehe. Tásiha, vímatipa eta vahi viúmurivainahini.

²⁰ Ema Viáquenu Jesucristo tjaraca heripa éti ema Espíritu Santo. Tásiha, emuturipahi ímati eta yátupiqueneana.

²¹ Nucajurehehi táichavenehi eta ímatirahi. Nuvaraha ácaicutiaraquené nahini eta yátupiqueneana. Te esuapa eta yátupiqueneana, vahi ácutimahi ena tépiyahirahiana.

²² Numetacahe eta juca taicha nararihipa puiti ena tépiyahirahiana, ena nácani nacahehi: “Ema Jesús váhira émaina Cristo Machicha ema Viya” nacahehi. Ena nácani achaneana, ticatianacanahi ema Cristo. Tacuti eta nácahehini: “Váhira émaina yátupiquene Tata Vicaiyaquene, váhivare émaina Maiya ema Jesús” nacahepáini.

²³ Numetacahe eta apana: Nájina tiávahácanaimahi ema Tata Vicaiyaquene ena vahi nasuapahini ema Jesús eta machichairahi ema Tata Vicaiyaquene. Viávaháchahisera víti ema Tata Vicaiyaquene vimutu viti visuapanahi ema Jesucristo eta machichairahi ema Viya.

Eta viávahásirahi ema Jesucristo

²⁴ Tásiha, ecapanereryaré chucha éti eta máechajiriruva, tamutu eta esamaqueneanaripahi eta te tépanavainapa eta ecasiñairahi ema Jesucristo. Eta ecapanereruira eta júcana, iávahácayare ema Tata Vicaiyaquene émapa ema Machicha.

²⁵ Taicha tjaracavahi ema Jesucristo tjaracahaviya eta vítaresira máichecuarquirénapa.

²⁶ Puiti nararihi ena navarahayare tivayuaracaheana. Tásiha, nucajurehe apaesa ecuneuchava éti nayehe ena témejecapavarahiána.

²⁷ Éti, mávaháruheripa ema Espíritu Santo mavaneruhi ema Jesucristo. Tásiha, nájina apanaina ácamunuhini máimitucahehini, taicha tímítucahehi tamutu ema Espíritu Santo. Éma, yátupiquenehi eta máechajiriruva. Éma, vahi tépiyahirahi. Timetacahehi éma: “Ánasirichu iávaháchi ema Jesucristo”.

²⁸ Puítisera, nuchichanaveana, ímiyanava eta iávahásiraina éti ema Jesucristo apaesa túmesamurehéina éti, vahi ecutsirihá mayehe eta te machava.

²⁹ Éti échahi eta máetaviuchira eta máurivahi ema Jesucristo. Tásiha, ímatiyare ena apamuriana machichanaveana ema Viya, táichavene eta náichirahi eta táuriqueneana.

3

Viti machichanaveana ema Viya

¹ Nuchichanaveana, tétavicava táramicareva eta máemunasirahavi ema Tata Vicaiyaquene. Yátupihí tímijarechahavihi “machichanaveana”. Puítiripa yátupiquenehi machichahaviripahi. Énasea ena apamuriana achaneana vuíchaha nácaicutiarahíni eta macachichairahavihi ema Viya, taicha vuíchaha náimatihíni eta máemunaraivahi éma.

² Némunacasareana, vécharipa eta macachichairahavipa ema Viya. Vuíchahasea tímechahavi éma eta viúrivayare. Vécharipavare eta vicitirayare ema Jesucristo eta te machava. Taicha vímahayare eta máimahiquene éma.

³ Tásiha, vimutu víti vicuneyayare eta vicitiraya ema Jesucristo, puiti vácuticaca viúrihíni tácutihíni eta máurivahi éma.

⁴ Nuvaraha némechahe: Namutu ena tisipecaturana, nacaticha eta mavanairipiana ema Viya, étara eta juca napecaturahi.

⁵ Ema Jesucristo, tájina matapiravaina éma. Vímatiripasera eta tímitecahi éma te juca apaquehe eta macaepahairayare eta vipecaturana.

⁶ Víti, te viávahácahi ema Jesucristo, tituparacahavi vaipa vicuimisiapava tayehe eta pecatuana. Énasea ena ticapecaturarahiana vahi náimatihíni ema Cristo.

⁷ Nuchichanaveana, vahi ecuisapava navayuacahe. Víti, te vímisiapavahi tayehe eta táuriqueneana, vímerecaya eta viúriava. Vicutinapa ema Jesucristo eta máetaviuchirahi eta máuriva.

⁸ Te náimisiapava ena apamuriana tayehe eta tamauriqueneana, éta tímereuchavacahi eta machichairavacahi ema Váinaraji. Taicha ema Váinaraji, ema tinacuchahi táquenuhi eta pecatu. Numetacahe eta apana: Ema Machicha ema Viya tímitecahi eta macaepahairayare eta majarareruanahi ema Váinaraji.

⁹ Víti machichahaviripa ema Viya. Váipa vímisiapavaimahi tayehe eta vicepecaturairana taicha vicitinapa éma eta tamajinairahi matapiravaina. Éma, tájina mapecaturaina. Eta macachichairahavihi ema Viya, vahi vicepecaturaimahi.

¹⁰ Nácani vahi tíchanahi eta táuriqueneana, váhivare náemunacahíni ena nachamuriana, náimerecahi eta vahi machichavacainahini ema Viya. Tímerecavanahivare eta machichairavacahi ema Váinaraji. Vítisera, eta víchirahi eta táuriqueneana, étapa eta vémunasiracacahi, vímerecavahi eta macachichairahavihi ema Viya.

Eta vémunasiracaca

¹¹ Te tépanavainapa eta ecasiñairahi ema Viya, vimetacahehi eta mavarairahi eta vémunasiracacayare.

¹² Tásiha, vahi ecucuti éti ema Caín, mávaháruhi ema Váinaraji. Ema maca Caín macapacahi ema maparapéni Abel, táichavenehi eta máetaviuchirahi eta mavainarajivahi. Ema maca Abel, táimicapacahi eta masuapajiraivahi, máichirahi eta táuriqueneana.

¹³ Nuparapenaveana, énerichuvare puiti nararihiya ena achaneana ticatichaeanayare éti apana. Váhiserá ecuarami eta juca.

¹⁴ Nuparapenaveana, véchahi víti eta viápechiravaya vítareca te táequenéraya eta vépeniraya. Vicaijuhenapa eta vítaresiraya máichecuaraquireya. Véchahi eta juca, táichavenehi eta vémunasirahi ena

vichamuriana. Énasera ena vahi náemunacahini ena nachamuriana, nanasirichu. Vahi tiúchuchuanaimahi tayehe eta náepenira.

¹⁵ Namutu ena ticatichanahi ena vichamuriana, nacuthi ena ticapahiana. Eta náicharacavayare ena ticapahiana, véchahi eta namauchucuirayare.

¹⁶ Ema Jesucristo tímechahavihi eta máemunasirahavihi, taicha t́jaracavahi tépena vítivenehi. Tásiha víti, te jácani táicharacava, tituparacahavi víjaracavayare vépena énavene ena vichamuriana, vímechiraya eta vémunasiracacahi.

¹⁷ Te mararihi ema mácani achane ticaimahaquenehi, te vahi achánesa-murénahi mayehe ema machamuri eta macajjuherahi, ema maca váhivare máemunacahini ema Viya.

¹⁸ Nuchichanaveana, vémunacacachucha vicajicaca eta vicaye-hequeneana. Vahi vicúyacujiriríha. Váhivare vicuepiyahirahi eta vémunasiracacairahi. Vahi tacucarichu eta véchajiriruva.

Vicasíñavaya te mamirahu ema Viya

¹⁹⁻²⁰ Tásiha, eta te vémunacaca, véchahi eta yátupirahi machichahavi ema Viya. Téheserapuca tipicacararacavahi eta visamure, vicaesamiricayare eta visamure, taicha ema Viya tímahahavihi eta vicasíñairahi eta majapanuirahavihi. Taicha majapanurahiquenehi éma. Téchahi tamutu.

²¹ Tiúripana, némunacasareana, te tájina eta tapicacararasiravaina eta visamure. Tásiha, vahi vipicaimahi eta víyasearapianaya mayehe ema Viya.

²² Vicasíñavainapa eta máijarasirahaviyare tamutu eta víyasearuanahi, taicha visuapahi eta mavanairipiana, vicurisamurechahi ema Viya.

²³ Eta juca mavanairipianahi: “Ecasíña ema Nuchicha Jesucristo, énerichuvare émunacaca”. Tacahehi eta mavanairipi veyehe.

²⁴ Te visuapa eta mavanairipiana, viávahácahi éma, énerichuvare éma tiávahácahaviya. Véchahi eta matiarahirahi ema Viya eta veyehe, máicha ema Espíritu Santo mavaneruhi éma.

4

Ena mávaháruana ema Espíritu Santo énapa ena mávaháruana ema Váinaraji

¹ Némunacasareana, ecuneuchava nayehe ena tépiyacavana ticametarairuana. Taicha puiti nararihi éna. Vahi mavaneruanaina ema Viya, váhivare mávaháruanaina ema Espíritu Santo. Tásiha, te náitecapauchepuca ena návahárahá t́mitucaheana, éti eyaseresinavaya te yátupipuca vanairucana me Viya. Esamayare te étarichupuca eta vímiturapianahi víti.

² Eta juca eta ímatiarayare ena mávaháruana ema Espíritu Santo te nacahehipuca: “Ema Jesucristo yátupiquenehi achane eta máchusirahi”.

³ Énasera ena apamuriana, te náñauchahipuca eta yátupirahi achane ema Jesucristo, vahi mavaneruanaina ema Viya. Éna, ticatianacanahi ema Cristo. Vimetacaheripa eta náitesirayare ena ticatianacana ema Cristo. Tiuri, puítirichu nararihipa ani veyehe.

⁴ Nuchichanaveana, éti machichahe ema Viya. Néchahi núti eta emaisapiravahi tivayuacaheana taicha mávaháruhehi ema Espíritu Santo. Éma, túmepanahi mayehe ema Váinaraji, náehiruhi ena nani tivayuarahiana.

⁵ Ena nani, tahapapiricavacahi eta tájiparacana tayeheana eta apaquehe tamauriqueneana. Tásiha, ena achaneana máehicarahanahi ema Viáquenu náuricaipa náitecapauchavaca.

⁶ Vítisera machichahavihi ema Viya. Tisamararachaviana ena tímâtiana ema Viya. Énasera ena apamuriana máimatirahana ema Viya, vahi tíurimahi eta nasamirahavi. Tásiha, tímaticareanaya ena mávaháruana ema Espíritu Santo. Énerichuvare tímaticareanaya ena mávaháruana ema Váinaraji.

Témunarahiquene ema Viya

⁷ Némunacasareana, tacamunu eta vémunacaca vámutu. Taicha ema Viya tímítucahavihi eta vémunasiracacaya. Vimutu viti vémunacacana, etapa tímereuchahavihi eta macachichairahavihi ema Viya, yátupihî eta vímatirahi éma.

⁸ Énasera ena nani vahi témunacacana, vahi náimatihini ema Viya. Taicha ema Viya, yátupiquenehi eta máemunaraiva.

⁹ Éma, tímechahaviripa eta máemunasirahavihi, eta mavanésirahi ema macarichuquene Machicha. Mavanecahi títeca te juca apaquehe, tíjaracahavire eta vítaresirayare máichecuaraquirénapa.

¹⁰ ¡Tétavicava eta máemunasirahavihi! Vítisera vahi vitívainahîni vémunaca ema Viya. Mativahi ema témunacahavihi. Eta máemunasirahavi ema Viya, máíjararecahi ema Machicha. Mavanecahi tépenayare te crusu étavene eta macaepahairayare eta vipecaturana.

¹¹ Némunacasareana, máetaviucha eta máemunasirahavi ema Viya; tásiha, vítipa tacamunu eta vémunasiracacáina.

¹² Nuvaraha ácaicutiara eta juca: Nájina tímahaina ema Tata Vicaiyaquene. Téhesera víti, te vémunacacapura, tiávahácahaviya éma. Tásiha, vicutihî ema Viya eta máemunaraivahi éma.

¹³ Puiti, viti viávahácahi ema Viya, énerichuvare tiávahácahavihi éma. Véchahi eta mávahásirahavihi ema Viya, máichavenehi ema Espíritu Santo mavaneruhi eta víyehé.

¹⁴ Tásiha, viti vicachaneanaripa ema Jesús, vimetacavacapahi namutu ena vímanaruanapahi eta máucupaisiraipa te anuma, taicha vivaraha náimatiyare namutu eta mavanésirahi ema Viya máiteca ema Machicha ticatiuchahaviyare vimutu viti achaneana te juca apaquehe.

¹⁵ Tacahe, te nararihipuca ena nacahehi: “Ema Jesús machichara ema Viya”; tásiha, tímaticareanahi éna, mávaháruanahi ema Viya, etapa eta návahásirahi éma.

¹⁶ Víti véchahi eta yátupirahi máemunasirahavihi ema Viya. Eta tacahe, vicasiñavahi eta mayehé. Témunarahiquene éma. Tásiha, víti apana, te vémunarahipuca, viávahácaya ema Viya; éma apana, tiávahácahaviya.

¹⁷ Vétaviuchaya eta vémunasiraya ena vichamuriana taicha eta viávahásirahi ema Viya. Tásiha, vahi vípicaimahi eta jena sáchezare te viyanapa te mamirahu ema Viya. Vahi vípicaimahi taicha machichahavihi ema Viya, vicutihî ema Jesús eta macachichairahi ema Maiya, tayanapanepuca vítarecarichaha te juca apaquehe.

¹⁸ Ena apamuriana achaneana tipicacaracavanahi taicha téchavanahi eta nacacuñairaya. Vítisera vahi vípicaimahi taicha vicasiñavahi eta máemunasirahavihi ema Viya. Te yátupihipuca vicasiñahi, macaesamiricaya eta visamure eta vipisira. Tásiha, nácani tipicanahi, napicahi taicha vahi nácasiñavahini eta máemunasiravacahi ema Viya.

¹⁹ Víti vémunacahi ema Viya taicha ema mativahi témunacahavi.

²⁰ Te nararihipuca ena nacahehi: “Viti vémunaca ema Viya”; téhese-rapuca nacatichaichucha ena nachamuriana, éna tépiyahirahianahi. Taicha náimahanénipuca ena nachamuriana, váhisera náemunacahini, ene tacahehi eta namaemunasirahi ema Viya máimahasiqunehi.

²¹ Eta juca eta mavanairipihí viyehe ema Viya: “Émunacanu nuti yátupiquenehi Viya; émunacavare ena echamuriana”.

5

Virataha vínajica eta tamauriqueneana

¹⁻² Yátupihí eta macachichairahavipa ema Viya vimutu viti visuapanahi ema Jesús eta émairahi ema Cristo. Tásiha, vémunacarine ema ticachichahavihi. Tásiha, te vémunaca ema Viya, téhepa visuapa eta mavanairipiana, tituparacahavi tacutiyareichu eta vémunasiraya namutu ena vichamuriana, taicha machichanaveanahivare éna, viparapenaveanahi te mavahuana ema Viya.

³ Étavene eta vémunasirahi ema Viya, visuapaya eta mavanairipiana. Taicha vahi táyacujicarehini eta visuapiraya eta mavanairipiana.

⁴ Tásiha, viti machichanaveana ema Viya viratahaya vínajica eta tamauriqueneana eta vítaresiraya. Taicha tímecatadahaviripa ema Jesús táichavenehi eta vicasiñairahi eta mayehe.

⁵ Vítí visuapahi eta yátupirahi Machicha ema Viya ema Jesús. Tásiha, viti véhicanahi éma, vicarichuhi vítí virataha vínajica eta tamauriqueneanahi eta vítaresira.

Ema Jesucristo, Manerejiruhi ema Maiya

⁶⁻⁸ Te títecapa ema Jesucristo, tímerecavapa te juca apaquehe, une eta macaicachasiyahi. Énerichuvare eta máitine máepusairuhi eta máepenirahi te crusu. Tásiha, te vímatiequeneha eta macaicachasirahi te une, etapa eta máepusaisirahi eta máitine, témechahaviripa eta manerejiruichuhi ema Maiya. Eta une etapa eta máitine témechahavipa ema Jesús eta émairaquenehi Cristo. Ema Espíritu Santo, émapa títámetacahaví. Taicha ema Espíritu Santo yátupihí eta mametarapiana. Eta une, eta máitine, émapa ema Espíritu Santo, eta juca mapanaquene témechahaviripa. Ticuticacahí eta tacayemaqueneana.

⁹ Tacutihí eta masuapacareva ema mácani achane tiuri. Tiápajucavasera tasuapacarevapana eta mametarapiana ema Viya mayehe ema Machicha. Ánipa macahe: “Émara nuchicha, némunaruquene ema maca”.

¹⁰ Tásiha, te vicasiña ema Machicha ema Viya, visuapava vicasiñava te visamure eta yátupirahi eta mametasirahi ema Viya. Ena apamuriana vahi nasuapahini ema Viya, náimicutichapa máepiyahirahihini ema Viya, taicha vahi nasuapahini eta mametarapianahi mayehe ema Machicha.

¹¹ Étarichuvare eta juca eta mametasirahi ema Viya, eta máijarasirahaviripa eta vítaresirayare máichecuarquirénapa. Ema Machicha ema Viya, éma téchahi eta vítaresira.

¹² Ena ticasiñanayare éma, títarecanayare. Énasera nácani vahi ticasiñanahi ema Machicha ema Viya, vahi títarecanaimahi.

Eta vítaresirayare máichecuarquireyare

¹³ Tiuri, némunacasareana, nuvaraha échayare eta ítasesirayare máichecua-raquirénapa, taicha ecasiñahi ema Machicha ema Viya. Eta tacahehi eta nucajureirahehi.

¹⁴ Tásiha, tájina táeñamavacarehini eta viyasearuanahi ema Viya, taicha véchahi víti eta masamirahavihi, taicha eta viyasearapiana tásihaque-neanahi eta vímatiequenehairahi eta mavarahaquenehi ema Viya.

¹⁵ Tásiha, véchahi eta máijarasirahaviya tamutu eta viyasearuana, taicha véchahi eta tasamacarevahi eta viyasearapianahi eta mayehe.

¹⁶⁻¹⁷ Tamutu eta tamauriqueneana náichahi ena achaneana, ema Viya máimijarechahi “pecatuana”. Jararihi eta pecatuana tíñehipana mayuchaticavaneya ema Viya eta vítaresira táicha. Jararihivare eta apana pecatuana váhirichu tíñehicha. Te mararihipuca ema mácani vichamuri ticapecaturarahi, eta váhirichu tíñehicha eta máepeniraina; te ímahapuca eta macapecaturairahi, éti eyaseuchaya éma, mayehe ema Viya. Tásiha, ema Viya máijaracayare eta máítaresirayarechaha ema ticapecaturarahi. Téhesera mararihipuca ema mácani ticapecaturarahi eta tíñehipana mayuchaticavaneya ema Viya eta máítaresira, vahi nuvanecahe eta eyaseuchahini ema maca achane ticapecaturarahi.

¹⁸ Vecha eta vahi vímisiapavaimahi tayehe eta vicapecaturairana viti machichanaveanahi ema Viya. Taicha ema Machicha ema Viya tijaneacahavihi vimutu víti. Vahi máratahaimahi ticaetemahavi ema Váinaraji.

¹⁹ Taicha véchahi eta macachichairahavihi ema Viya. Váhisera vámutu. Nararihihi ena apamuriana achaneana machaneranahi ema Váinaraji.

²⁰ Vítisera véchahi eta máitesirahi eta te juca apaquehe ema Machicha ema Viya. Éma tímitupanhavihi. Émavenihi témesenichavihi mayehe ema Maiya ema yátupiquenehi Viya. Máichavene ema Machicha Jesucristo, viávahácaripa víti ema yátupiquenehi Viya. Émara ema macarichuquenehi yátupiquenehi Viya. Éma, tíjaracahaviya eta vítaresiraya máichecuaquirénapa.

²¹ Nuchichanaveana, vahi ecucasiñaraji; vahi ecucuti ena achaneana ticasañarajiana eta achanemirana.

Tamutupa eta juca néchajiriruvanahi eyehe.

Eta macartane ema Apóstole Juan, ticaijare 2 JUAN

Eta vémunaraivaya

¹ Nuti Juan, víyarahánupa, nucajurevi eta juca nucartane piti ati. Néchajicavi piti manerejiruhi ema Viya. Énerichuvare némechajirisihavaca ena pichichanaveana. Eti némunaruhequenehi núti, tacuti eta náemunasi-ravaca namutu ena apamuriana títucana tisuapana eta yátupiquene máechajiriruva ema Viya.

² Viti vémunacahe taicha vicuticacahi eta visuapira eta yátupiquene máechajiriruva ema Viya. Máichecuarquirénapa eta visuapiraya.

³ Nuvaraha macatajicahehini ichape ema Tata Vicaiyaquene, émapa ema Jesucristo, Machicha ema Viya. Nájapanuhehini, náijaracahehini eta táurivaina eta epanereruana, taicha yátupiquenehi eta náemunasirahehi.

⁴ Núrisamureinehi eta néchirahi eta nanerejisiravahi ena pichichanaveana, tíurihi eta náehisirahi eta yátupiqueneanahi, tímiyanavanavare eta nasuapirahi eta mavanairipiana eta viyehe ema Tata Vicaiyaquene, taicha ene vicaheyarehi.

⁵⁻⁶ Tiuri puiti, ati, nucajurevi, taicha nuvaraha némechavi eta juca mavanairipi ema Viya, étarichu eta vémunasiracacayare vimutu. Te vémunaca ema Viya, visuapaya tamutu eta mavanairipiana eta viyehe. Te tépanavainapa eta vicasíñairahi ema Viya, tivanecahaviripahi eta vémunasiracacayare. Tásiha puiti, eta ecaheyare eta émunasiracacairayare eta ítaresi-rayare.

Ena tivayuarahiana

⁷ Nuvaraha némechavi eta juca, taicha nararihi te juca apaquehe te viávihihi ena navarahahi ticaetemaheanaya. Ena nani, vahi návarahahini náimicaecheráchahini eta máuchusirahi yátupiquenerahi achane ema Jesucristo. Ena nani, tivayuarahianahi, ticatianacanahivare ema Cristo. Vahi návarahahini véhica éma.

⁸ Tásiha, ecaunevayare tayehe eta navayuarapiana. Échapavachucha éti, machu nacamitísicahe tayehe eta ícuchihi ématanevachahi. Nuvaraha ejacayare tamutu.

⁹ Viti visuapahi eta máimiturapiana ema Cristo, viti viávahácahi ema Tata Vicaiyaquene émapa ema Machicha. Váhisera návahácaimahi ema Viya nácani vahi návarahahini nasuapa eta máimiturapiana ema Cristo. Tasapihapa, náimitucahi eta nayehéchiravarichu eta napanereruana.

¹⁰ Tacahe, te náitecapauchahepuca te iúrujisíavahi ena nácani, téhesera vahi nacuechajisiha eta máimiturapiana ema Cristo, tasiha, vahi ecujachapa te epenana. Váhivare ecuichuha: “Yare, ani, ítecapauchanu” vahi ecuquicha éna.

¹¹ Taicha te íchapuca eta juca, ticutinapapuca eta étirichuhi nachamuriana ena tivayuarahiana. Váhira ecuimisiapava nayehe, máchura étaina etapiravaina eta juca náichirahi éna eta tamauriqueneana.

Eta táichecuarquí eta macartane ema Juan

¹² Tiuri, júcaríhi apamuri eta numetaruheanaya. Vuíchahasera numeta-cahemahi puiti te juca carta. Taicha nucunevahi eta nítesiraya eyehe apaesa véchajiricavainapa eta vímanajirisiracacayare. Tásiha, viúrisamurénapa vimutu.

¹³ Téchajicaviana ena suchichanaveana esu péchavi, ésurichuvare manere-jiruhi ema Viya.

Tamutupa eta juca néchajiruvahi eyehe.

Eta macartane ema Apóstole Juan mayehe ema Gayo, ticajare 3 JUAN

Ema Juan macunacha ema Gayo

¹ Nuti Juan, víyarahánupa, nucajurevi piti némunaruquenehi Gayo. Núti yátupihí eta némunasirávihí.

² Némunaruquene, nuyaseuchavíhi me Viya táurivaina eta pémataneana. Énerichuvare nuyaseuchavivare táurivaina eta pítaresira, tácutini eta táurivaipa eta piáchaneva.

³ Tétavicavahí eta núrísamurevahí, te títecapanapa ena vichamuriana, taicha timetacahuanapa eta pisuapirahí, péhisirahí eta yátupiqueneana echájirirucávana mayehe ema Cristo.

⁴ Tájinarínehi tácuti eta núrísamurevahí taicha eta nusamairirisiraparacahí eta éhisirahí eti nuchichanaveana eta yátupiquene echájirirucava mayehe ema Cristo.

⁵ Némunaruquene, tájina táichavahí eta pijacapirahí péchapajirisirahí ena vichamuriana, váhinéni pímatiquenevacáinahíni éna.

⁶ Te títecapanapa aní te víurujisiavahí, timetacahavianainapa. Tájina táichava eta piúríva, pímicatasiravacahí eta nayanira ena vichamuriana. Eta picaheyare pímiyanavainí eta piúríva nayehe, taicha eta juca víchirahí tacurísamurechayare ema Viya.

⁷ Taicha éna, táimipaicahí eta nacametarairuirahí eta tiuri echájirirucava mayehe ema Jesucristo. Eta napaisirahí, tájina nayaseserecapahíni éna nayehe ena achaneana masuápajiráirahanaríchaha.

⁸ Tásiha, tavarahaichu eta véchapajirícavaca ena nani, apaesa eta vímicata-sihaya éna eta nacametarairuiraya eta yátupiquene tiuri echájirirucava.

Eta mamarivahí ema Diótrefes

⁹ Nucajureripa ena pichamuriana te piávihahí. Mararihisera ema Diótrefes. Éma máurica ticainapupuiricava te namirahu ena achaneana. Éma, vahí masuapa eta vituparahana.

¹⁰ Tásiha, te nutiaríhinapa eta ara eyehe, núti nítametahehare tamutu eta máichaqueneana. Éma, téchajicahí eta víyehe. Cátichacarehí eta máechajiriruvana, váhisera másupacarehíni. Váhivare tácarichu eta juca máichahí. Éma, vahí majacapaimahí ena vichamuriana tipaicanahí. Te natiaríhi ena navaraha najacapa, ema maca macavanairipí nacuija nacujacapa. Énerichuvare mavaraña macaerajica te emurí ena tivarahana najacapa.

¹¹ Némunaruquene, vahí picicutipa ena tíchanahí eta tamauriqueneana. Picutiyaresera ena tíchanahí eta táuriqueneana. Taicha viti víchana eta táuriqueneana, viti machichanaveana ema Viya. Énasesa ena tíchanahí eta tamauriqueneana, éna, vahí náimatihíni ema Viya.

Ema Juan macunacha ema Demetrio

¹² Nutuparacavi pijacapyare ema Demetrio. Namutu nacunacha éma, taicha yátupiquenehi táuriva eta mayherepi. Núti apanavare énerichuvare

nucunacha eta máuriva. Píti pímatinuhi, eta tatupiruvahi tamutu eta néchajiriruvana.

Eta táichecuaraqui eta macartane ema Juan

¹³ Tiuri, jucarihi apamuri eta numetaruvianayare. Vuíchahasera numeta-cavimahi puiti te juca carta.

¹⁴ Nútijapainapasera eta ara piyehe apaesa nímahavi. Tásiha, véchajirica-vainapa eta vímanasirácacayare.

¹⁵ Puiti, nuvaraha májaracavini ema Viya eta piúrivaina tayehe tamutu eta pipanereruana. Téchajicaviana ena piájiriareana. Tásiha, péchajisinanu émanapachuina ena nájiriareana núti.

Tamutupa eta juca néchajiriruvahi piyehe.

Eta macartane ema San Judas, ticaijare JUDAS

¹ Nuti Judas néchajicahevaca emutu eti nuparapenaveana nuchamurianihi. Núti mavanerunuhi ema Viáquenu Jesucristo. Éti ímatihí ema nuparape Santiago. Núti nucajurehevaca eta juca nucartane taicha eti apanavare machanerahepa ema Tata Vicaiyaquene, taicha esuapahi eta máichuarapihi. Tétavicavahi eta majaneasirahehi táichavene eta iúrujasirahi ema Machicha Jesucristo.

² Puiti, nuvaraha tajurucaini eta evapinairavavacahi eta máemunasirahehi ema Viya, étapa eta majapanuirahéhi; tájinavare tahapapiricahini eta táuriva eta epanereruana.

Yátupiyare eta náicuñayare ena tivarahanahi námejecapavacha ena vichamuriana

³⁻⁴ Tétavicavahi eta nuvarairahi nucajurehe emutu éti, nétumechaheyare eta éhisiraina ema Viáquenu Jesús. Puítisera nusamairiricapa eta náimisipiravahi eta eyehe ena nácani tépiyahirahiana tímijachavanahi vichamurianihi. Tásiha, nuvaraha ecuneuchavaya nayehe. Étumechacaca, vahi ecusuapavaca ena nánitátajiana, machu námejecapavachahe. Táimiyana tauri eta éhisiraina eta véhiruhi. Taicha ena víyarahana apóstoleana túmitucahianahi eta máimiturapiana ema Viáquenu Jesucristo. Tásiha, vahi táuricahini vihapapiricahini. Énasa ena nani tépiyahirahiana, tétavicavahi eta namapicauravahi eta me Viya. Éna tímijachavanapa eta vahi máicuñacavacáimahi eta náichira tamutu eta tájiparácana taicha tétavicavahi eta máemunasiravaca. Tavetijipa tíñemahipanapa jararihiva eta náimiturapi, ánipa nacahe: “Vahi típicachacare ema Jesús, váhivare táuricahini vácahehi émara Viáquenu. Te échajisihapuca éma, tatupiruvachucha ‘Jesús’ íchayare, taicha vahi émaina téchahavi víti” tacahehi eta navarahaquene éna. Máimahainepasera ema Viya eta náicuñayare éna, taicha acanevacaipa eta mametarapi ema Viya: “Muracaqueneya eta náicuñayare namutu ena ticacahinuanahi eta némunasiravacahi”.

⁵ Németeaca éti écharipa eta náichararacavahi ena viáchucanaveanaini israelítana eta náuchusirapa te avasare Egipto. Nuvarahasera némechahe émahí ema Viáquenu ticuchucuhavacahi namutu éna. Téhesera te táequenepa, tétavicavahi eta namasupajiravahi ena namutuyaréni. Tásiha, máitapaimuríhapa ena masupajirairahanahi.

⁶ Énerichuvare némechahe eta náichararacavahi ena ángeleana masupajirairahanahi. Ena nani aquenucarahanaini te anuma, sántuanainihi. Tímisiapavanapasera tayehe eta tamauriqueneanahi. Tásiha, ema Viya macavanairipipa eta náiyaracua ena ángeleanaini téjecapavanahi eta te tímapicu infierno, nacaeratayahí. Puíticha váhiquene túturucavanaimahi tíuchucana. Te jena sáchezare mayaseseresihaya ema Viya, muracayare eta náicuñayare namutu éna.

⁷ Échahivare eta náichararacavahi ena achaneana ticavasanahi te apinaquene avasare Sodoma étapa eta Gomorra, étapa eta avasarechichana

te tachacayanahi. Éna, tétavicavahi eta tavayuchiravacahi eta náesenamarevana. Navetijipa ena tivehacacana ajairacacana. Tacutiya eta táijahúchiravahi eta máemecharesiravacahi ema Viya ena ángeleanaini, macamiricahi eta yucu, táijuchavacapa namutu ena nani achaneana váinarajiqueneana. Eta juca tavaraha yátupina vicaicutiarahi tayehe eta nacaicuñairavacayare eta te yucu infierno namutu ena tichanahi eta tamauriqueneanahi. Máitavacacainapa eta nacatajivairaya.

⁸ Táitusiava, vahi náechavahini ena nani tímisiapavanahi eyehe. Navayucharichucha eta náechipejisirahi eta náquehe taicha tétavicavahi eta tavayuasiravacahi eta natuhusivana. Ena nani tépuruanahi ema Viáquenu eta émairahi téchavacahi. Nacaecahivare ena ángeleana tiámana eta majaraivahi ema Viya.

⁹ Vahi táurihini eta juca. Nuvaraha némechahe eta jena sache máepenirahi ema víyahaini Moisés, ema Váinaraji mavaraha mámayarehini eta máquehe. Ema Váinaraji macanarapa ema Arcángle Miguel, mavaraha máimiyusemaca. Váhisera masemahini ema Miguel. Váhivare macajacharecahini. Ánipa máicha: “Páurevisami píti. Pímahaya eta pícharacavayare maicha ema Náquenu” máichapa.

¹⁰ Énaserá ena nánitátajiana achaneana, vahi napicaurahihini. Tíjaracavana nacaecahi jácani tájahánapuca váhinéni náimatiequeneha. Éna nacutihi eta sárareana. Tinicanahi, téranahi, esenamareanahi. Nájina tatsirihaque-nénahi. Étapa tímicuñacavacaya.

¹¹ ¡Páureanasami ena nani! Muracayare eta náicuñayare te yucu, taicha nacutihi ema Caín eta mamasuapajiraivahi me Viya. Nacutivare ema Balaam ema témejecapavacachavacahi ena achaneana eta mavarairahi eta plata. Nacutivare ema Coré ema tépuruhi ema mavaneruhi ema Viya. Étapa tivichahi eta macapasirahi ema Viya.

¹² Tétavicavahi eta natsirihacarevahi eta náimisiapiravahi eyehe te iúrujisiravana eta énisirana ena echamuriana. Taicha éna, tájina napicauchaque-nénahíni eta náurisamureravahi te nanisirana, náerirana. Éna, navarahahi epicauchavacayare éti, navarairahi ticaetemajiricaheana. Ena nánitátajiana nacutihi eta úcájiana te ichape sácherehi. Ticutimahi tiquivayarehi. Técaticavachuchasera eta támapahi. Tájina taquivahini. Nacutivare eta yucuquiana máhiriquireana te ticahipaipa eta apamuriana yucuquiana tachamuriana. Tamapuruji eta vicuchapirahi eta náichirahi eta táuriqueneana taicha nacutivare eta yucuquiana tájiqueruana vinereruana, tépurihapa. Váipaquene tímarucaimahi.

¹³ Éna, nacutivare eta táepacuruha eta une te tétaticavapa muraca eta ichape une, camurihi eta tarisasama. Tétavicavahi eta tatsirihacarevahi eta náichaquenehi eta tamauriqueneana. Nacutivare eta jarariquiana tiyejerecavana. Jararihisera eta nacaicuñaiyayare eta ichapequene tímápicu. Máitavacayare eta nanasirayare.

¹⁴⁻¹⁶ Ena nánitátajiana, tétavicavahi eta nacaecahirahi tamutu. Étachucha natanucahi eta najamurarairana. Ticasíñavavaicana eta náechajirisiravana. Nacunachahi ena ticaimahaqueneanahi, navarairahi nacaetemajiricavaca éna. Ticaicuñayaresera, taicha ema víyahaini profeta Enoc acané máimaha te mavapure eta náicuñayare éna. Ánipa macahe: “Nímahahi te nuvapure eta máitecapirayare ema Viáquenu te juca apaquehe. Mámayarepahi namutu ena

mayeheana ángeleana. Tétavicavahi eta nasimutuvahi. Nacurujicavacayare namutu ena ticapecaturarahiana. Náimerecayareva tamutu eta naviurevana ena achaneana váinarajiqueneana, taicha tétavicavahi eta náichirahi eta tamauriqueneana. Navetijnapa ena ticaecahirahiana me Viya, ichapepainenapa eta naviureva” macahepa. Tétavicavahi eta masuapacarevahi ena víyarahaini Enoc, taicha mámariequeneri ena Adán, sántoquenehivare éma.

Éma Judas matuparacavaca ena machamuriana

17 Nugarahavare némechahe, eti nuchamuriana némunarqueneana, eta nametarapi ena víyarahana apóstoleana mayeheanahi ena Viáquenu Jesucristo.

18 Ánipa nacahe: “Vahi táyerémahi eta náuchujisirayare ena ticaecahirahiana tayehe eta táuriqueneana máimiturapiana ena Viáquenu. Váhivare návaraháini náinajica eta tamariqueneana” nacahepa.

19 Puiti numetacahe: Natiarhipa puiti ena ticaecahirahiana. Tímaticareana éna, taicha navaraha náiputsicavaca ena vichamuriana. Étachucha natanucahi eta najamuraraivana. Éna, vahi návaraháini émainahíni máechavachahini ena Espíritu Santo.

20 Étisera némunarqueneana, étumechacacaya eta éhisirahi ena Viáquenu, taicha tétavicavahi eta tasantuvahi eta véhiruhi. Ísapavayareva tímitucahe ena Espíritu Santo eta eyujarauchirana.

21 Tauri eta ítaesira, vahi ecumitiscavahini eta táetaviuchiravahi eta máemunasirahehi ena Viya. Váhivare ecuyacujihini eta ecuchapirahi eta jena sácheyare táepaniravaya eta vítaesira. Máitavacacayare eta vítaesiraya taicha eta majapanuirahavihi ena Viáquenu Jesucristo.

22 Étumechayare ena echamuriana nácani tipanerechanaripa náehica ena tivayuarahiana.

23 Ena apamuriana, ena téhicanaripa eta náepiyahiraivana, epamicayare éna apaesa tachava eta náehisiraina yátupina ena Viáquenu. Ecuchucuhavacayare eta náejecapiravana, tacuti te vicuchucuhahi eta viyereruvana te tíjahúchavapuca tíju eta vipena. EJapanuyare nácani muracaripahi eta náejecapiravanahi. Ecuneuchavasera, machu napareacahe eta náejecapiravana, taicha tétavicavahi eta tamariva. Epicayare éta.

Tétavicava eta vicunachirahi ena Viya

24-25 Éma Viya, tétavicava eta máitupajjiasiravahi. Macarichuhi éma marataha ticatiuchahavi tayehe eta vícuchinihi vícuñayahini, taicha mavanecahi máepeninahaviya ena Machicha, ena Viáquenu Jesucristo. Puiticha tétavicavahivare eta majaneasirahehi éti apaesa vahi ecuaquipaicavahini tayehe eta pecatu. Taicha mavarahahi máepachinachayare eta iáchanevana, tacuijahivaréni eviurevaina eta mámiraheyare te mamirahu te jena sácheyare. Tétavicavainapa eta íúrisamurevaya te ímahapa eta majaraivaquenehi. Acane nacunachanahi ena ángeleana. Énerichuvare víti, tétavicavayareva eta vicunachiraya éma vimutu víti, taicha tétavicavahi eta máramicarevahi taicha ichapequenehi eta máitupajjiasirava. Vépuyumiraucha eta víjarasirava visuapayare. Máitavacacayare eta vitsiusirayare éma. Amén.

Eta mametacasivanahi ema Apóstole Juan te mavapure, ticaijare APOCALIPSIS

¹ Ema Tata Vicaiyaquene mavarahahi tímimaticahaviyare eta táijahúchiravaya táichararacavayare eta apaquehe, apaesa vecha viti mavanaranahi. Ema máimechahi eta juca, ema machicha Jesucristo. Tásiha, ema Jesús manecapa ema ángele timetacanuyarehi nuti Juan mavanarahi. Eta tacahe, nájuchahi puiti eta juca apaesa écha éti apanavare eta táichararacavayare.

² Tacuti eta yátupihí eta nucametarairuirahi nútí eta máechajiriruvana ema Viya, étarichuhi eta máimiturapiana ema Jesucristo, puiti nutupiruva numetacahe eta juca numetacasivanahi eta máimerunuanahi ema ángele.

³ Tétavicava eta náuricacarevaya ena téchajicuhanaya eta juca máechajiriruvanahi ema Viya, eta máimimatirunuhi. Énerichuvare tétavicava eta náuricacarevaya namutu ena tisamanaya tisuapanaya eta juca. Taicha tiánehinapa eta táitavirayare tamutu.

Ema Juan macajure ena siétemuriqueneana machamuriana

⁴ Nuti Juan nucajurehe eti siétemuriana nuchamurianahi ejanereruanahi tayehe eta tinapaica te Asia. Nuvaraha macatajicahéhini ichape ema Tata Vicaiyaquene, émapa ema Jesucristo. Táurihivaréni eta epanereruana. Ema Tata Vicaiyaquene matiarhiquenehi te tépanavainapa, puiti manasirichuhi eta viyehé, émarichuva manasiquenyare te táitavapa tamutu. Te tamirahu eta máejasihahi trono, natiarhi ena siétequeneana mayeheana arcángeleana. Navarahahivare eta iúricacarevainaini.

⁵ Ema Viáquenu Jesucristo, ema yátupiquenehi tiámaparauchahavihi eta juca vímitucasivanahi. Énerichuhivare ema máinapuiruhi téchepuca te máecari, apanapa eta máquehe. Éma, yátupiquenehi Rey. Namutuhi macachuricacavaya ena réyeaná te juca apaquehe. Éma, yátupihí eta máemunasiarahavihi, masipasinahavihi eta viáchanevana tayehe eta vipecaturana te máítine máepusairuhi.

⁶ Énerichuvare, tinacahavihi te namuri ena manerejiruanahi tuparairucahaviyarehi eta mayehe, mavarairahi viyujaracaráhiyare mayehe ema Viya. ¡Támutuhini sácheana vicunacha eta máitupajijiasiravahi! ¡Viáramiparahini eta aquenucairahi! ¡Amén!

⁷ Ímaha, márjapainapa ema Cristo. Támayarepahi eta úcaji. Namutuyare nanecapa ena achaneana te juca apaquehe. Náimahainapa, tásiha, tipicanainapa. Tíyahacavanainapa eta náimairayare, énaripa ena námariéqueneana ena tijarachanahi, taicha téchavanahi éna eta náejecapiravahi ena náchucanaveanaini. ¡Ene tacaheyare! ¡Máítecapavanepaini!

⁸ “Nútira nunacuchahi eta táepaniravahi eta apaquehe. Nútirichuvare nécha eta táimianiravaya tiuri. Néchayareva eta táitavirayare tamutu” macahéhi ema Viya, tétavicava eta máitupajijiasirava, máituruequenehahi tamutu. Éma, matiarhiquenehi te tépanavainapa, puiti manasirichuhi eta viyehé, émarichuva manasiyare te táitavapa tamutu.

Eta máimeresirava ema Jesucristo mayehe ema Juan

⁹ Nuti Juan, nútirichu echamurinuhi. Nútirichuvare ecutiquenenuhi tayehe eta vicatajivairahi, vicamichahisera tamutu taicha tétumechahavihi ema Jesús. Taicha vicunevaipahi eta visiapiyare te mávasa, aquenucahaviya.

Núti, tiáquijicanuanahi tayehe eta tiúrupuhi ticaijare Patmos te etupiereca mar, táchavenehi eta nucametarairuirahi eta máechajiriruva ema Viya, néchajisihairahivare eta máijare ema Jesucristo.

¹⁰ Te jena sáchequenehi lumincuquenehi, ema Espíritu Santo tímimahanuhi eta mavaraqueneana tímechanu ema Jesucristo. Tacahehi eta táepaniravahi eta máimimahaqueneenuhi. Tativapa nusamahi eta mahu ema émana te nuquecu. Muraca eta máechajisiranuhi. Tirurehucha eta nusamirahi.

¹¹ Ánipa macahehi:

—Piájuchaya tamutu eta juca pímaqueneanaya. Pímiamarecapa eta piájure nayehe ena siétemuriqueneana pichamuriana: ena tiávihanahi te Efeso, ena tiávihanahi te Esmirna, ena tiávihanahi te Pérgamo, ena tiávihanahi te Tiatira, ena tiávihanahi te Sardis, ena tiávihanahi te Filadelfia, énapa ena tiávihanahi te Laodicea* —macahepa.

¹² Tacahe, néviurucavapa. Nuvarahapa nímahayarehi ema téchajicanuhi. Tásiha, nímahapa eta siete candelero tiúquiána, amairiha oro.

¹³ Te enumuhumuri eta siétequene candelero, matiaríhi ema achane viwasimahi. Tiúmaji eta mamuiríha. Títecapa te máivapeana. Ichapeme eta máitijuhe, títecapa te matupa. Amairihavare oro. Eta máitijuhehi tácutiarahi eta aquenucairahi éma.

¹⁴ Eta machutimaca amairíha tijapu, tirapepejicaquenehi. Eta máuquiána, tétavicavahi eta tavayuhauquiravahi.

¹⁵ Eta máivapeana tijanunupevachava, tacuti eta bronce eta tajanunusira. Eta mahu, tétavicavahi eta tamuracavahi eta marurehuchirahi.

¹⁶ Te mavahu vaure, macaratacahi eta siete jarairiquiana. Te majaca tiúchucahi tavasimahiyaréni eta espada. Táetaviuchahi eta tacasiriva, tínunapehivare. Eta mamira, tétavicavahi eta táeramemesirahi tacuti eta sache.

¹⁷ Nupicarínehi eta nímairahi. Náquipaicavapa te máivapeana. Tiánehi népenaini eta nupisirahi. Émasera manacapa eta mavahu vaure te nápusi. Máichanupa:

—Vahi picupicanu. Nútichucha nuti nunacuchahi eta táepaniravahi. Nútirichuvare néchahi eta táitavirayare tamutu.

¹⁸ Núti yátupiquenénu nucaitarecarahi, taicha nuchavahi nítareca te táequenepe eta nacapasiranuhi. Puiti máichecuaraquirénapa eta nítaresira. Nútirichuvare necha ena tépenana. Nucaehepucayare eta náqueheana ena nápenaqueneana nácani níchuhaqueneanayare.

¹⁹ Piti Juan, piájuchayare eta juca pímaqueneanahi puiti, étape eta písamaqueneanahi nutupararuvianahi nayehe ena pichamuriana, étape eta táichararacavayare nímechaquenevíyare.

²⁰ Numetacaviya eta tacayemaquenehi eta siétequene jarairiqui nucaratuhi te vaure, étape eta siétequeneana candeleroana óroquiána. Éta juca siete jarairiqui, énara ena ticametarairurahiana nayehe ena siétemuriqueneana pichamuriana. Eta siete candeleroana, énara ena siétemuriqueneana nuchanarana.

* **1:11** Tamutu eta jucana avasareana tiávihanahi te provincia Asia. Puíticha eta juca provincia ticaijare Turquía.

2

Eta mametarapi ema Jesús nayehe ena machaneranahi ticavasanahi te Efeso

¹“Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Efeso: Núti íaquenunuhi taicha núti nucaratachahi eta siétequene jarairiquiana te nuvahu vaure. Núti návihahi te tamuri eta siétequiqueneana candeleroana óroquiana, táicutiarahi eta néchirahahi emutu éti.

² Núti nímati tamutu eta íchaqueneanahi, étaripa eta tamuracavahi eta ecaemataneasiranuhi, ecamichirahi tamutu. Váhivare iúricahini ecasiri-quihini ena achaneana váinarajiana. Váhivare ejacapahini ena tépiyacavanapahi apóstoleana, ímatiacavanehi éti ena tépiyahirahianapahi.

³ Nímatihe eta ecamichirahi tamutu eta íátajivanahi táichavenehi eta ecaemataneasiranuhi núti. Vahi eyacujihini.

⁴ Jucarihiserá eta juca eviurevahi nuyehe. Puiti ecamitiacaripa eta émunaravána. Vaipa tácutihini eta émunaraivanahi te épanavainapa.

⁵ Puiti nuvaraha étupiricayare eta juca, tachava eta émunaraivahi. Éneuchavaya tatívaina apaesa íchavare eta táuriqueneana tacuti eta acane. Te vahi ecuetupiricava, nútijacuruvayare níteca, nítshivachayare eta candelero ícutiarahi eyehe.

⁶ Éti, ecunachacarehi eta ecatichirahi eta tamaetupisiravahi eta nayehe-repiana ena apamuriana téhicanahi ema Nicolás. Ene nucahehi núti, nucaticahivare eta nayeherepiana.

⁷“Ema Espíritu Santo tímítucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nucasiapaheyare núti tayehe eta paraíso ícunahani me Tata. Nénicahayareva eta tahi eta yucuquí tiana eta táuricacarevayare eta ítaresira.

Eta mametarapi ema Jesús nayehe ena machaneranahi ticavasanahi te Esmirna

⁸“Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Esmirna: Núti nunacuchahi eta tépaniravahi. Nútirichuvare néchahi eta táitavirayare tamutu. Nuti nacaparuhi, nuchavahisera nítareca.

⁹ Núti nímati tamutu eta íchaqueneanahi, eta ecatajivairahi, étapa eta epaureravanahi. Tétavacavahisera eta iúricacarevahi, tímícutijiricavaipahi rícohénahíni. Nímativare vahi esemahini taicha eta épiyaequeneanahi nayehe ena tímijachavanahi machanerana ema Viya. Mávaháruanahi ema Váinaraji, machaneranahivare.

¹⁰ Vahi ecupica eta ecatajivairaya. Numetacahe: Ema Váinaraji tímisia-paheya te cárcel eta máitsamaresiraheya te tímínajicaheyarepuca. Ecamichachuchasera, taicha diésquenerichu sache eta ecatajivairayare. Nutuparacahecha: Ejicapaicayare tayanapanepuca nacapacahe. Núti níjaracaheyare eta táitsivayare. Tiúriyare eta ítaresiraya.

¹¹“Ema Espíritu Santo tímítucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nucuchucuhahayare. Vahi ecatajivaimahi tayehe eta nacatajivairayare te yucu ena masuapajirairahanahi.

Eta mametarapi ema Jesús nayehe ena machaneranahi ticavasanahi te Pérgamo

12 “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Pérgamo: Núti nítuca némechare-cavaca nácani téjcapavana taicha nucayehe eta espada, táetaviurequenehi eta tacasiriva.

13 Núti nímati tamutu eta íchaqueneanahi. Nímativare eta éñamiravahi taicha namutuyaréni ena echácayapenána téhicanahi eta máimiturapi ema Váinaraji Satanás. Váhisera ínajicavahini, étumechavaichucha eta éhisiranuhi núti. Étaripa te ímahapa eta nacapasirahi ema nuchaneraini Antipas, yátupi-quenehi eta masuapiranuhi éma. Ena machaneranahi ema Váinaraji nacacahi éma te jena íávihahi éti.

14 Jucarihisera eta juca eviurevahi nuyehe. Taicha ísapavaichucha natiar-ihihi ena nanerejiruvana ena echamuriana vahi návarahahini náinajica nan-ica eta tinicacare nayujaraurehi te tamirahu eta nasiñarajiana. Tacutiquene esenamareanahi éna. Eta acane, ema máratátaji Balaam tímitucahi ema Balac eta máimiaquipaisiravacahi ena israelítana tayehe eta juca tamaurique-neanahi.

15 Énerichuvare nararihi ánaqui te emuri ena apamuriana váhivare navaraha náemitisica eta máimiturapiana ema Nicolás. Tétavicavahi eta nucatichirahi núti eta máimiturapiana ema Nicolás taicha tétavicavahi eta tamaetupisiravahi.

16 Eta tacahe, éneuchavayare eti éjcapavanahi. Te vahi ecueneuchava, nútijapayare némecharepanaheyare tayehe eta tacasiriquene espada táuchurequenehi te nujaca.

17 “Ema Espíritu Santo tímitucaheyare eta juca numetarapiana eti nuchane-ranahi. Etupíruvayarehi esuapa. Emutu eti ecamichanahi, ímíyanavahivare eta éhisiranuhi, nénicaheyare eta ícuchihi me Viya eta ticajare maná, tayumu-rurevaquenerichaha. Énerichuvare níjaracahevacyare eta tijapu mari. Eta te mari tatiarihiyare eta ajureca arapiru. Nájinasera tímatiequenehaimahi. Macarichu ema ticayeheyare, éma tímatiyare eta máijare arapiru.

Eta mametarapi ema Jesús nayehe ena machaneranahi ticavasanahi te Tiatira

18 “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Tiatira: Núti Machichanuhi ema Tata Vicaiyaquene. Núti nímatihí tamutu, taicha tijarahivaca eta núquihana, tétavicavahi eta tavayuhauquiravahi. Eta nívapeana tijanunucavacava tacuti eta bronce eta tajanunusirahi.

19 Núti nímati eta íchaqueneana. Nímativare eta émunasiranuhi, eta esuapi-ranuhi yátupi, eta échapajirisirahi ena achaneana, étapa eta ecamichirahi. Nímativare muracapanaipahi eta ecaemataneasiranuhi. Tíápajucavaipahi puiti tayehe te épanavainapa.

20 Jucarihisera eta juca eviurevahi nuyehe. Ísapahi tisiapamurihahe esu esénatátaji. Ésu, vahi táetupicavahini eta suyeherepiana, sucutihí esu Jesabé-lnitataji eta acane. Tímijachavahí mavanara ema Tata, suémejecapavacha-nisera ena nuchanerana. Suímitucavacahí naicha eta piesta, tásiha nani-cavare eta tinicacareana nayujaraureanahi te tamirahu eta nasiñarajiana. Suímitucavacavare eta natuhusivayare.

²¹ Núti íchapemurihi eta nucuchapirahi ésu, eta suéneuchavahini, apaesa suínajicahini eta sutuhusiva. Váhiquenesera suvaraha suínajica eta suye-herépi.

²² Puiti níjaracayare eta suícuñayare. Ticajumayare apaesa suíveca te sucamane. Ichape eta sucatajivairaya. Énerichuvare ena suítrevanahi, nícuñacavacayareva muraca, te vahi nacuínajica eta suíchaqueneasanahi ésu.

²³ Énerichuvare ena suchichanaveana níjaracayare eta najumayare, nímicapasiravacayare. Tásiha, échainapa eti nuchaneranahi eta nímatirahi tamutu eta epanereruana, eta te esamureana éti. Nímahainepasera núti eta nícharacavacayare ena téjecapavanahi, étapa tiámayare eta náichaqueneana.

²⁴⁻²⁵ Tájina apanainahini eta eviurevahi nuyehe. Núrisamurehi eyehe eti matapiravareanahi, eti vahi éhichahini eta suímiturapiana esu esénatátaji. Váhivare ávarahahini íjaracava éhica eta suhiapemarevanahi, susíñavavairisirahi eta máimitusirahi ema Satanás. Tásiha puiti, nutuparacahe eti nuchan-erana íávihanahi eta te avasare Tiatira: Ecaratacava muraca tayehe eta juca éhiruhi. Ecutinuyare eta nuchaviraya.

²⁶ “Emutu eti ecamichanahi, ímiyanavahivare eta éhisiranuhi, váhivare ínajicahini eta ecaemataneasiranuhi, núti níjaracahénapa eta tuparairucaira-hénapa tayehe eta avasareana.

²⁷ Ecutinuyare núti eta máíjarasiranuhi ema Tata Ticachichanu eta tamuracavahi aquenucairanuhi. Ene ecaheyare éti. Muracayare eta aquenucairaheyare. Ecaratacayare eta etsucurupayare fiérroqui. Esuapacareyare muraca.

²⁸ Tétavicavayare eta ejaraivayare nicha núti, taicha nujupahaheyarehi éti.

²⁹ Ema Espíritu Santo timitucaheyare eta juca numetarapiana. Emutu eti nuchaneranahi, etupiruvayarehi esupa.

3

Eta mametarapi ema Jesús nayehe ena machaneranahi ticavasanahi te Sardis

¹ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Sardis: Núti néchavacahi ena síetequeneana arcángelleana, étapa eti ecametarairurahiana taicha núti távami-rauehi eta síetequeneana jarairiquiana. Núti nímati tamutu eta íchaqueneana. Ena achaneana tímijachanahi tíúrihi eta ecaemataneasiranuhi. Nútisera nímararacahi eta esamureana. Nímatihe tiánehi eta ínajisirainapa eta éhisiranuhi.

² Ecaunchavayare apaesa vahi ecuemitiaica eta éhisiranuhi. Taicha nímararacahi núti vahi tátupiruvahini te esamureana eta ecaemataneasirahi ema Tata.

³ Puítisera, éneuchavayare apaesa tacuijapa ecuichiravaina. Échavayare éti tamutu eta ímitucasivanahi. Yátupina eta éhisiraya. Te vahi ecuetupiricava eta epanereruana, nútijapayare tíjahúchavayare eta nítecapirayare némecharepanaheya.

⁴ Váhinéni ámutuhini éjecapavahini éti ecavasanahi te Sardis. Natiarihini ena matapiravareanahi, váhivare náechipejicavahini. Ena nani, níjaracavacainapa eta namuirihayare tijapu. Ticachanenuanayareva taicha tatuparacahi eta návihairayare eta nuyehe.

5 “Emutu eti ecamichanahi, ímiyanavahivare eta éhisiranuhi, nįjaracahyare ecamuirihayare eta tijapu. Váhivare nucaepahaimahi eta įjareana tayehe eta libro tiama eta nalista ena náitareruanayare. Nímimaticahyareva eta me Tata, énapa ena ángeleana.

6 Ema Espíritu Santo tímitucahyare eta juca numetarapiana. Emutu eti nuchaneranahi, etupiruvayare esuapa.

Eta mametarapi ema Jesús nayehe ena machaneranahi ticavasanahi te Filadelfia

7 “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Filadelfia: Núti yátupiquenénuhi Viya, yátupiquenehivare eta nusantuva. Nucarichu núti néchahi eta tapajacura eta arairuyare avasare Jerusalén, tacuti eta máechapajirisirahi ema náchucaini rey David eta táinapuiruinihi Jerusalén.

8 Núti nímati eta íchaqueneanahi eta ecaemataneasiranuhi. Nímahahivare eta vahi camurihénahini. Nímatihivare eta ecatajivairahi, váhisera ecainajiruvahini eta éhisiranuhi. Ímiyanavahivare esuapahi eta nímiturapiana. Tásiha, puiti nįjaracahyare eta apana ématanerépiya. Nájina nįsapaimahi tihapapírícaheánimahi eta ítauchiraya éta.

9 Núti nítahacavacayare ena israelítana tépiyacavanahi machanerana ema Tata, machaneranahisera ema Váinaraji. Nucaepuyucavacayare te emirahu, apaesa náimati eta némunasirahéhi.

10 “Éti, ítauchahi eta nuvanairipi eta ecamichiraya tamutu. Eta tacahe, nujaneacaheya núti apaesa vahi tacuimivehahe te táitecapapa eta nucaetemajirisiravacayare namutu ena achaneana távapahianahi te juca apaquehe.

11 ¡Tiánehipa eta nuchaviraya! Étumechavaya eta éhisirahi, machu émpureca ejacapirayare eta ícuchianayare.

12 “Emutu eti ecamichanahi, ímiyanavahivare eta éhisiranuhi; nítisirijicavayare eyehe. Máichecuaquireyare eta ecachaneraya ema Tata te mávasa. Íamayare eta máįjare, étapa eta nįjare arairu. Íamayarevare eta táįjare eta arairu Jerusalén, taicha tachichahevacya.

13 Ema Espíritu Santo tímitucahyare eta juca numetarapiana. Emutu eti nuchaneranahi, etupiruvayarehi esuapa.

Eta mametarapi ema Jesús nayehe ena machaneranahi ticavasanahi te Laodicea

14 “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Laodicea: Núti náichasa ‘Ema títaurahi’. Námapahi eta yátupiqueneana táuriqueneana echajirirucava. Núti tájinaquénéhi néjequiha. Núti nítauchahi tamutu eta mapanereruanahi ema Tata, te népiyaca eta anuma étapa eta apaquehe.

15-16 Eta juca numetarapi eyehe éti: Nímati eta íchaqueneanahi. Éti apésasajírúichucha eta éhisiranuhi. Éti, vuíchaha ímereuchavahini eta ecatianasiranu; váhisera yátupinahini tatupiruvahini eta éhisiranuhi. Tacamuñinehi átupiruvahini, yátupinahini ímrecava eta éhisiranuhi. Machu étaina taviuchaeta eta nucaerajisiráhena nuyehe.

17 Taicha éti ímjachavahi rícohe, tájina íchiravainahini, tájinavare ácamunuhini. Vahi esamauchavahini ichapemurihi eta éjapanuravahi. Váhinini rícohenahini. Etihinéni ecáįjare páureana, púchuquiana, mamuiriareana.

¹⁸ Nuvaraha nuconsejachahe: Te evarahapa yátupina eta erricovayare, íteca eta nuyehé. Jéhevare núti núrichaheyare, ecutiyare ena ticayeheana eta yátupiquene oro. Jéhevare núti nijaracaheyare eta emuirihayare tijapu apaesa vahi ecutsiriha te numirahu. Nétsarachaheyareva eta ipuruji apaesa ímairirica.

¹⁹ Núti nétupiricaya eta napanereruana namutu ena némunaruaana te nájecapava. Te vahi nacusuapanu, némecharecayarehi. Tásiha éti, tituparacahehi étupiricavane eta epanereruana, étumechavavare tayehe eta éhisira. Éneuchavavare apaesa tacuija ecuichiravaina.

²⁰ Núti nujapanurahi. Nuvaraha tachava eta vicachaneracacahi. Vaipa ecuévuisiha eta nuyehé. Íchuhuvare. Viápechava vivapinava eta véchajiriravaparacayare*.

²¹ “Emutu eti ecamichanahi, ímiyanavahivare eta éhisiranuhi, núti nucaejacahevacyare tayehe eta néjasihayare, tacutiyare eta néjasirahi te mavaure ema Tata, taicha eta nétumechiravahi nucamichirahi tamutu.

²² Ema Espíritu Santo tímítucaheyare eta juca numetarapiana. Emutu eti nuchaneranahi, etupiruvayare esuapa” tacahehi tamutu eta máechajiriruvana ema Viáquenu eta eyehe.

4

Emá Juan máimaha eta natsiuresira te anuma

¹ Te táequenepa eta juca, nímahavarepa eta téjiacahi eta anuma. Nusamavarepa eta mahu ema émarichuhi ema tínapucahi téchajicanuhi. Tirurehucha eta mahu. Tíchuhunupa, ániya macahe:

—Yare, piápána. Nuvaraha nímechaviyare eta táicharacavayare puiti juca vicaijuheyare —macahepa.

² Tacahe, eta nusamirahi eta íchuarapi, ema Espíritu Santo tjáracanupa eta nucaicutiararayare tamutu eta nímahaqueneanayarehi. Tijahúchavapa nímaha ema Viya, téjacahi te trono te anuma.

³ Tiáramicarehi eta máimahi. Tétavicavahi eta máurinavahi. Eta máimahi tacuti eta tajanunusira eta márijahi jaspe éta pa eta cornalína. Te tachachacuana távihahi eta trono, tétavicava eta tajaravahi tacutiyaréni eta táimahi eta ahe eta táurinava. Véresera eta táimahi.

⁴ Távihahi eta ichape trono, tatiarivare te tachachacu eta véinticuatro trono. Natiarivare ena véinticuatroanavare téjacanahi tayehe, víyarahana tuparairucana. Tijapu amairiha eta namuirihana. Namutu ticayeheana corona te nachutiana, amairiha oro.

⁵ Tásiha, nímahahi eta térameca tásihaquenehi tayehe eta trono. Nusamavare tirurehuchanahi. Tacaemapa. Tásiha, tatiarivare te tamirahu eta trono eta siete tijarahivaca tacutiyaréni tanene eta yucu. Énahi ena siétequeneana arcángeleana mayeheana ema Viya.

⁶ Tijararacavare te tamirahu eta trono tacutipa eta tajarahivahi eta ichapequene une.

* **3:20** Te juca, ema Viáquenu tímítujiricava eta máehahamesira te jácáni tapajacura, mavarairahi masiapa, manica macachane ena ticavasanahi te tajuhe. Étasera eta máechajisihagueneana, vahi étaínahini eta tapajacura eta vipena. Te juca, ema Viáquenu máechajisihahi eta majapanuirahaví éta pa eta mavaraira vichavaya vipaucha éma, tachavahini vivapinava mayehe, víuriyareva te machacaya.

Natarihivare ena cuátroqueneana tijanearecanahi te machacaya ema Viya. Éna, ecutiarareana eta máitupajijiasirava. Tacutimahi ticaquihavacahi te namirahu téhepa nachepa. Amairiha eta náuquihana.

⁷ Eta tnapuca tavasimahiyaréni eta sárare táifehiquene*. Eta apana tavasimahiyaréni eta torillo. Eta apana tacutimahiyaréni achanemira. Eta apana tacutimahiyaréni eta ichape mátihi tiárarairicahi.

⁸⁻⁹ Tacahe, ena nani cuátroqueneana ecutiarareana tiávihanahi tayehe eta trono, sáisivaca eta napavana. Ticaquihavacavare amairiha eta napavana. Ena nani, vahi táechuquihahini eta nacunachirahi ema Viya, ema acanevacaquene eta máitaresirahi. Tijiranahi tamutu sácheana, yátiana. Ánipa nacahe: “Tétavicavahi eta pisantuva, piti Tata.

Tétavicavahivare eta pítupajijiasiravahi, píturuequeneha tamutu.

Piti pitiarihiquenehi te tépanavainapa eta apaquehe.

Puiti pinasirichuvare eta víyehe.

Pítirichuvare pinasiyare te táitavapa tamutu.

Puiti vihasulupayachavihi eta pichanerahavihi”

nacahepa ena ángeleana.

¹⁰ Énavarepa ena véinticuatroqueneana víarahana tuparairucana tépuyucanahi te mamirahu ema Viya, mávihahi te mayehe trono. Nacamavahupa eta nayeheana corona. Titiurecanavare. Ánipa nacahe:

¹¹ “¡Tata Víyaquene, piti Viáquenuvihil!

¡Tétavicavahi eta piúrivahil!

Picarichuhi piti vicasiñaquenévi.

Ichapequenehi eta vicunachiravihi.

Tamutuhi pirataha píti.

Taicha píti pépiyacahi acane tamutu eta juca

vímahaqueneanahi puiti.

Pítirichuvare péchahi puiti tamutu eta

pépiyuanahi”.

5

Ema Cordero macarataca eta ajureca tiama eta siete sello

¹ Tacahe, te mavahu vaure ema máejaruhi tayehe eta trono, nímahapa macaratacachi eta ichapeme ajureca ticayuruquihí, ticanaracacachi eta letra te tajuhe etapa te táquecume. Ticaipistahi tayehe eta siete sello, táipistaruvanahi.

² Nímahapa ema ángele tipiaracachi muraca. Tétavicava eta tamuracava eta mahu. Ánipa macahehi:

—¡Puiti táuricapa máimerecava mácani tatupararuhi tivepistacayare eta tayeheana sello eta juca ajureca, maverurusirayare! ¡Tatuparacapa máiteca puiti! —macahepa.

³ Nájinasera nájaracavahini navejapanahini eta ajureca: énaripa ena tiávihanahi te anuma, énavanerecainahipucaini ena tiávihanahi te apaquehe, énaripa ena tiávihanahi te amahe apaquehe. Nájinavare tipatsicavaina náimarracahini eta ajureca.

* ^{4:7} Te jena avasare Asia (puiticha ticajiare Turquía), tatarihihi eta tífehiquenehi sárare náimijarechahi “león”. Te táiyahapa, eta tahu tacuti eta ichapequene toro, etapapuca eta ichi ajaira.

⁴ Níyahahacavapa núti eta nímairahi namajinairahi náijaracavahini naveru-ruacahini eta ajureca, náechajicuhahipucaini, étavanerecainahipucaini náimmaracahini.

⁵ Tacahe, téchajicanupa ema émana víyaraha tuparairucahi. Máichanupa:

—Vahi picuiyaha. Taicha matiarahi ema Cristo, ema yátupiquenehi manerejiruhi ema Viya ema téchaya tamutu eta juca apaquehe. Éma, tíjaracavahi eta máepenirahi víchavenehi víti. Tichavaripahisera títareca. Tásiha, macarichu ema tatuparacahi maveruruacayare eta ajureca, mavepistahayareva eta síétequene tayeheanahi selló táipistaruvanahi —máichanupa ema víyaraha.

⁶ Tacahe, nímahavarepa ema Jesús, ticaijehivare Cordero. Titupihahi éma te tamirahu eta trono, nachayacahi ena cuátroqueneana ecutiarareana énapa ena víyarahana tuparairucana. Nímahahi eta majara, taicha táimicapacahi éma eta macaepahairahi eta vipecaturana viti achaneana. Siete eta majihuana. Eta juca táicutiarahi eta aquenucairahi. Síétevere eta máuquihana. Eta juca táicutiarahi eta tamutuirahi máimatiqueneha, taicha navanahíhi ena síéteana arcángelleana mayehe ema Viya, eta náimmarasiraya tamutu eta apaquehe.

⁷ Ema maca Cordero tiyanapa, majacapahi eta ajureca te mavahu vaure mayehe ema máejaruhi te trono.

⁸ Te macaratacapa eta ajureca, ena nani cuátroquene ecutiarareana, énerichuvare ena véinticuatroqueneana víyarahana tuparairucana tépuyucanapa te mamirahu ema Cordero. Ena nani véinticuatroqueneana, namutuyehéhi te navahuana eta guitarra étapa eta escudilla, amairihasesa oro. Tíama eta incienso, táicutiarahi eta táurivahi eta nayujarasiranahi ena machaneranahi ema Viya.

⁹ Tijiranahi eta juca jirasare arapiru. Ánipa nacahe:

“Picarichu píti tituparacavihi eta picaratasirayare eta ajureca, pivepistasi-rayare eta tayeheana selló.

Tituparacavihi taicha píjaracavahi píti tímicapacavihi eta pivacharesirahaviyarehi tayehe eta pítime vimutu víti apaimamajiquenehavihi te juca apaquehe.

Taicha pivarahahi machanerahaviyarehi ema Tata Vicaiyaquene.

¹⁰ Píjaracahavíhivare víyujaracarahiyare mayehe ema Viya.

Píti píjaracahavihi eta aquenucairahaviya tayehe eta avasareana” nacahepa.

¹¹ Tásiha, nusamavarepa eta nahu ena camuriqueneana ángeleana nachayacahi eta trono, eta návihahi ena cuátroqueneana ecutiarareana, énapa ena tuparairucana. Tétavicava eta nasimutuvahi éna.

¹² Énerichuvare tijirana muraca. Ánipa nacahe:

“Píti Cordero, píti nacaparuhi, picarichu tatuparacahi pijacapayare puiti eta piávacure mayehe ema Viya.

Tétavicava eta píuricacarevahi táicha.

Tétavicava eta pímatiequenehairahi tamutu.

Tétavicava eta píturevahi.

Tétavicava eta pípicachacarevahi.

Tétavicava eta pípunachacarevahi.

Tijarahi visama te víjirauchavi” nacahepa.

¹³ Nusamavare eta tahu tamutu eta máepiyaruanahi ema Viya, eta tíávihanahi te anuma, étapa eta tíávihanahi te apaquehe, énerichuvare eta

tiávihanahi te amahe eta apaquehe, étapa eta tiávihanahi te une. Ánipa tacahehi:

“Tétavicava eta pítupajijiasiravahi, piti Vicaiyaquene, pítipa piti Cordero.

Éti, tétavicava eta epicauchacarevahi.

Éti, tétavicava eta ecunachacarevahi.

Tijarahi visama eta vijirauchirahe.

Máitavacacayare eta vitsiusiraheyare” nacahepa.

¹⁴ Énapa ena cuátroqueneana ecutiarareana najicapapaipa:

—Amén, ene vicaheparacayare —nacahepa.

Tásiha, ena véinticuatroqueneana víyarahana tépuyumurihanapa, natsiucapa ena apinana.

6

Eta táepistasira eta sélloana

¹ Tacahe, nímahapa ema Cordero te mavepistacapa eta tnapuca sello. Tásiha, nusamapa ema émana ecutiararehi. Eta mahu tacutichucha tirurehucha.

Ánipa macahe:

—Yare, piúchuca —macahepa.

² Tacahe, nímahapa eta cavayu tijapu. Ema ticaperahi, tatiarihi eta mataquiriqui. Tásihapa, ticaijaracasipa eta corona éma. Eta juca táicutiarahi eta máquipairisiraparacaya ena mánarana, taicha guerrerohi éma.

³ Nímahavarepa ema Cordero mavepistacavarepa eta tápinane sello. Nusamavarepa ema apana ecutiararehi:

—Yare, piúchuca —macahevare.

⁴ Tacahe, tiúchujicapa eta apana cavayu. Titsi eta táimahi. Ema ticaperahi mámahi eta ichapequenehi espada. Ticavanahipa eta manacasamurechirayare ena achaneana eta náehacacairayare. Téhepucainapa eta guerra. Ticapajiricacanainapa ena achaneana camuriqueneana.

⁵ Nímahavarepa ema Cordero mavepistacavarepa eta tamapanane sello. Nusamavarepa ema apana ecutiararehi, máichapa:

—Yare, piúchuca —macahevare.

Nímahapa eta cavayu tiquisa. Ema ticaperahi macaratacahi eta balanza te mavahu.

⁶ Nusamavarepa eta mahu ema apana te namuri ena cuátroqueneana ecutiarareana. Ani macahehi eta máechajiruvahi:

—Ticatajivanayare ena ticaematanerahiana. Vaipa tisivachaimahi eta mavacha mácani achane. Diez páneana eta mavachayare te étana sache. Étaripa eta arusu* mapanarine kilo eta navachayare te étana sache. Étasera eta aceite comer, vahi téjiacavaimahi, étaripa eta tachi eta uva —macahepa.

⁷ Te mavepistacavarepa ema Cordero eta tacuatrone sello, nusamapa ema apana cuátroquene ecutiararehi, máichapa:

—Yare, piúchuca —macahepavare.

⁸ Nímahapa eta apana cavayu tiyacaca. Ema ticaperahi, éma ticaijarehi “Ticaparerecaya ena achaneana”. Matiarihivare ema téhicapahi, ema táquenu eta náchanevana ena náepenaqueneana. Tacahe, eta cuarta parte eta nasimutuva ena achaneana tépenanaya naicha ena apinana. Taicha ticapajiricacanainapa ena achaneana tayehe eta guerra. Ena apamuriana

* 6:6 Ema ecutiarare máechajisihahi eta taqui ticaijare cebada. Eta juca tacuti eta arusu.

téchanainapa. Apanapanenapa eta najumanayare. Énerichuvare tani-cainapa eta sárareana táñehiqueneana.

⁹ Te mavepistacavarepa ema Cordero eta tacincone sello, nímahapa eta mesa tiámahi eta mayucuneasa ema Viya. Te tápecu, nímahavarepa eta náchanevana ena nápenaqueneana táimicaparuanahi eta náehisirahi ema Viya. Vahi náinajicahini eta náehisirahi te náimahapa eta nacatajivairayare. Váhivare timatinanaimahi eta nametasirahi eta máechajiriruva ema Viya.

¹⁰ Puiti éna, tipiaracanahi. Ani nacahe eta napiarasirahi:

—Tátachicha, sántoquenevihi píti. Yátupiquenevihi eta picasiñacareva. Píti pirataha tamutu. ¡Puiti vivaraha pítauchayare eta pitsirijiequenehairayare ena ticapacahavianahi te apaquehe! ¡Vivarahapa nacáemecharahipaini! —nacahepa.

¹¹ Tásiha, ticaijaracasianapa eta namuirihanayarehi eta tijapu. Ticame-tacasianapa nanarahasiranumayare apaesainahi. Tiámainucavayarehi te tiyuriticavapa eta natupayare ena nachamuriana nacaparuanayarecha-havare ena téhicanahi ema Cristo.

¹² Te mavepistacavarepa ema Cordero eta tasaisine sello, nímahapa eta tamuracavahi tayamurisirahi eta apaquehe. Eta sache témahavarepa, tétavica-vahi eta taquisava. Énerichuva eta caje amairihapa ítime.

¹³ Eta jarairiquiana tíavihanahi te anuma, témiririjicapa te juca apaquehe, tacuti eta tahi eta mitu te muracaicha técativava.

¹⁴ Eta anuma témitiacavarepa tacutipa te téchuquimeca eta ajumeruca. Tásiha, eta ichapequeneana cerro tiyamuricavacapa tiyjecavavacapa. Étaripa eta tíurupuhiana te mar énerichuvare tiyjecavavacapa.

¹⁵ Tacahe, tijunanapa ena réyeana te avasareana, énapa ena presiden-teana, énapa ena comandanteana, énapa ena aquenucarahana, énapa ena ricoqueneana, énaripa ena músuana, énapa ena líbreana. Ticayumurúquianapa te tajuhe eta ichapequeneana máriana cerro.

¹⁶ Ánipa nacahe:

—Vicavi eta ichapequeneana mari, apaesa vahi macuimahahavi ema Viya, apaesa viúchucuha tayehe eta táñehiquene máicuñaraqui ema Cordero.

¹⁷ Táitecapaurehavipa puiti eta ichapequene juicio. ¡Páurehavisami! ¡Nájina tacaemachaquenemahi! —nacahepa.

7

Ena dócemuriqueneana israelítana nacamarcaqueneanayare

¹ Tacahe, nímahapa ena cuátroqueneana ángeleana. Titupihanahi te táinahu eta juca apaquehe, náichejimiraurusirahi tamutu eta técativana. Éna, náichejicahi eta técativava apaesa tacuija eta técativava te apaquehe étaripa te une, étavanerecainahipucaini tacaecherahini te yucuquiana. Ticatuparaha-nasera éna nacamiriuchayarehi eta táicuñayare te apaquehe éta pa te une mar.

² Énerichuvare nímahavarepa ema apana ángele tíasihahi te táuchusinehi eta sache. Macaratacahi eta mamarca ema yátupiquene Viya Vicaiyaquene. Ema maca ángele máechajicavacapa muraca ena cuátroqueneana ángeleana.

³ Tacahe, ema ángele máichavacapa:

—Vuíchaha ecucamerica eta táicuñayare eta apaquehe eta une te mar éta pa eta yucuquiana. Tapainumavaya te vimarcachavacapa te nanahuana ena mavanarana ema Viya —máichavacapa.

⁴ Tásiha, te tamutupa eta nacamarcairavacahi, nusamapa eta natupa ena nacamarcaqueneanaripa. 144,000 eta nasimutuva. Násihaqueneanahi nayehe ena dócemuriqueneana israelítana.

⁵ Doce mil ena ticamarcanahi machichanavéqueneana ema Judá. Doce mílvare ena ticamarcanahi machichanavéqueneana ema Rubén. Doce mílvare ena ticamarcanahi machichanavéqueneana ema Gad.

⁶ Doce mílvare ena ticamarcanahi machichanavéqueneana ema Aser. Doce mílvare ena ticamarcanahi machichanavéqueneana ema Neftalí. Doce mílvare ena ticamarcanahi machichanavéqueneana ema Manasés.

⁷ Doce mílvare ena ticamarcanahi machichanavéqueneana ema Simeón. Doce mílvare ena ticamarcanahi machichanavéqueneana ema Leví. Doce mílvare ena ticamarcanahi machichanavéqueneana ema Isacar.

⁸ Doce mílvare ena ticamarcanahi machichanavéqueneana ema Zabulón. Doce mílvare ena ticamarcanahi machichanavéqueneana ema José. Doce mílvare ena ticamarcanahi machichanavéqueneana ema Benjamín.

Camurianavare ena apavasajuecuana tijapumuirihavacahi

⁹ Tacahe, nímahavarepa ena camuriqueneana achaneana tiásihana te tamutu avasareana, apaechajiriruvaqueneana. Vaipa titupachacareana eta nasimutuvahi. Titupihanahi éna te tamirahu eta trono, mávihahi ema Cordero. Tijapumuirihavaca eta namuirihana. Tásiha eta náurisamurevahi nacaratacahi te navahuana eta cáchipaca.

¹⁰ Namutu tipiaracanahi, ánipa nacahe:

—Vihapulupayachavi, piti Tata Vicaiyaquene, pítipa piti Cordero, taicha éti ecuchucuhahavihi —nacahepa.

¹¹ Tacahe, namutu ena ángeleana titupihanahi te tachacayahi eta trono, nachayacahivare ena cuátroqueneana ecutiarareanahi, énapa ena víyarahana tuparairucana. Tásiha, tépuyucanapa te tamirahu eta trono. Tétipaimurihanapa. Natsiucapa ema Viya.

¹² Ánipa nacahe:

“¡Eta vicaheyare!

Máitavacacayare eta vitsiusiraviyare.

Taicha tétavicavapa eta picunachacarevahi.

Tétavicavavare eta pímatiequenehairahi tamutu, étapa eta pipicauchacarevahi, étapa eta pitumeva.

Picarichu piti péchahavihi.

Ichape eta vihasulupayachiravihi.

Tijarahi te visamure te vijirauchavi. Amén”.

¹³ Tacahe, ema émana víyaraha máichanupa:

—Te pivaraha pímati, níminatichaviyare ena nani ticamuirihanahi eta tijapu, távihavarepuca násiha —máichanupa.

¹⁴ Tacahe, níchapa núti:

—Picatajicanu, pimetacanu, tata.

Tásiha, máichanupa:

—Ena nani éna ena nacatajivaqueneanahi ichape taicha eta náehisirahi ema Jesús, tíuchucuhanaripasera. Ticasipaipa puiti eta náchanevana tayehe eta máitine ema Cordero. Puiti ticamuirihanapa tijapu, taicutiarahi eta tájinairaripa naviurevainahini.

¹⁵ Eta tacahe, titupihanahi puiti te tamirahu eta trono máviahahi ema Viya. Najirauchahi, natsiuchahi éma tamutu sácheana yátiana te mayehi templo. Éma majaneacavacahi.

¹⁶ Ena nani tájinapa nácamunuimahi, vaipa técuhana, váipavare timauneana. Váipavare ticatajivanaimahi taicha eta táijureva eta sache.

¹⁷ Taicha ema Cordero, ema tiáviahahi te tamirahu eta trono, tétavicava eta majapanuraivahi, majaneacavacayarehi. Máesichayareva eta tiúriama une ticaitarerahi. Énerichuvare ema Viya macamitiasinayare eta náiyaira — máichanupa ema víyara.

8

Éma Cordero mavepistacapa eta téqueneha sello

¹ Tacahe, mavepistacapa ema Cordero eta téqueneha sello tayehe eta ajureca. Tamuturine timatina. Média-horapuca eta tamatinaira.

² Tásiha, nímahapa ena siéteana ángeleana, titupihanahi te mamirahu ema Viya. Ticaijaracasianapa eta siete chujareana nachujanayarehi.

³ Tásiha, títicapavarepa ema émana ángele. Mámapahi eta censario, amairiha oro. Tatiarihi te mamirahu ema Viya eta mesa tiámahi eta mayucuneasa. Amairihavare oro. Ema ángele titupihapa te tamirahu eta mesa. Náijaracapa eta incienso tisimuri. Tacahe, macaratacapa eta censario te tápusi. Macapusiácapa ema Viya, tacachanepaipa eta nayujarasirana namutu ena machanerana ema Viya.

⁴ Tásiha, eta taquijarera éapa eta mayujarasirana tiápanapa mayehe ema Viya, tásihaquenehi te mavahuana ema ángele.

⁵ Tásiha, ema ángele mavehavarepa eta apamuri emaniqui eta te mayucuneasa. Máinicachapa eta censario. Tásiha, máepuraicapa te apaquehe. Tíjuhúchavapa térameca, ticaema, tirurecapa. Tiyayacarepa eta apaquehe.

Eta nacachujairayare ena siétequeneana ángeleana

⁶ Tacahe, nímahavarepa ena siétequeneana ángeleana titsecavanaripa eta nacachujairayare.

⁷ Te ticachujapa ema tinapuca ángele, témiricapa te apaquehe eta uvrequi éapa eta tiquiva ítiama. Témiricavare eta yucu. Táijuchapa eta tercera parte te apaquehe. Támairiacapa eta yucuquiana, eta muiji, éapa eta sucurecana.

⁸ Te ticachujapa ema apana ángele, témiricavarepa eta ichape mari. Timurupahi eta táemirisira tayehe eta mar. Eta une, ítiama taicha. Tercera partehivare eta ítiama.

⁹ Támairiacapa tacapapajicavaca eta sárareana tiávihana te une. Éapa eta pacureana tachimararuanahi, técharicavanapa. Téririjcanapa tamutu.

¹⁰⁻¹¹ Te ticachujapa ema apana ángele, témiricapa eta ichape jarairiqui. Tétiraraicaparine eta táemirisirahi. Tajararecapa eta une tayehe eta tercera parte eta cajacureana éapa eta cáquiureana. Venenoamapa taicha eta jarairiqui. Ichapemurianavare ena achaneana tépenaracananahi taicha eta náerirahi eta une tisucareama. Eta tacahe, ena tacaitiruanahi tímijarechanahi eta ecuñaraqui: Eta Súcareama Venenoama.

¹² Te ticachujapa ema apana ángele, tiúchujicapa eta tépacuchahi eta sache, eta caje éapa eta jarairiquiana. Óchorine hora eta táetaviuchirahi eta tamapicuva. Tacahe, óchovare hora eta tacaecherairahi eta sache. Ocho hóravare eta tacaecherairahi eta caje éapa eta jarairiquiana.

13 Tacahe, nésenicapa te anuquehe. Nímahavarepa ema émana ángele tiárraica. Nusamapa tipiaracapaahi muraca, ánipa macahe:

—Páureanasami ena tiávihanahi te apaquehe. Tétavicavaya eta nacatajivairayare, puiti te tátauchavapa eta nacachujairaya ena mapanaqueneana ángeleana, téquenehanaya ticachujana —macahepa.

9

1 Te ticachujapa ema apana ángele, nímahapa ema ángeléni mvasihi eta jarairiqui. Máquipairuvahi te apaquehe. Máisapa ema Viya eta mavejiasirayare eta pozo táupenaquene ticaijare Abismo.

2 Tacahe, mavejiacapa eta táupenaquenehi pozo. Tiúchucapa eta ichape quijare tacutipa eta taquijarera te tiju eta evitarahi. Eta sache, timapicupa taicha eta quijare.

3 Témunahircavapa tiúchuca eta tavisiqueneana eta tsacarana, tayehe eta quijare. Amairipahipa tamutu eta apaquehe. Tajarachapahi eta tayucairavahi tacutipa eta tayucaraiva eta sáserahi.

4 Ticatuparacasipa vahi tacunica eta tamuijira eta apaquehe étapa eta tapacajiana eta sucurecana étapa eta yucuquiana. Eta tatuparahahi eta tayucavacayarehi namutu ena achaneana. Nacarichu tacaitica ena ticamancanahi te nanahuana tayehe eta mamarca ema Viya.

5 Cíncoyarehi caje eta tayereva eta tayucarareresirayarehi. Váhisera tépenánimahi ena achaneana tayucaqueneanayarehi. Tétavicavasera tacativayarehi nasama. Eta tayucaraqui tacutiyarehi eta sáserahi eta tacativayarehi nasama.

6 Te jena sácheanayare ena achaneana navarahayare ticapacavana. Váhisera tépenánimahi, tayanapane navarahayare tépenana.

7 Eta juca tavisiqueneana tsacarana, nímicutíchapa eta cavayuana te titsecavanahi tayehe eta guerra. Tásiha, te tachtu tacutimahiyaréni ticayehe corona oro. Eta tamira achanemirayaréni.

8 Tiuji eta tachutimaca, tacutiyaréni eta suchutimaca esu esena. Tíñehivaca eta táheana.

9 Eta tapparuma tacutiyaréni eta fierro muracaquenehi. Vahi táechucaimahi eta isavipe. Eta tárairahi, ¡tétavicavahi eta tamuracavahi!

10 Ticaijiquivaca tacutiyaréni eta sáserahi. Eta juca tiyucarahi, cinco cájeyarehi eta tacaitemajirisiravacayare ena achaneana.

11 Mararihivare ema táquenu ema téchahi éta, ema ángeléni tivejiacahi eta táupenaquene pozo. Ema maca ángeléni, eta máijare te náechajiriruva ena hebreoana “Apolión”. Te véchajiriruvana víti, ticaijare “Tijararerahi”.

12 Tátauchavapa eta tnapuca ecuñaraqui nímahaquenehi. Jucarichahavaresera apinachaha eta ecuñaraquiyare.

13 Te ticachujapa ema apana ángele, nusamapa eta mahu ema apana te tápusi eta cuátroquene esquina tayehe eta mesa oro eta tiámahi eta mayucuneasa ema Viya, tiávihamahi te mamirahu éma.

14 Ticavanairipapa ema ángele ema ticachujahi, ánipa macahe:

—Picaíticapa ena cuátroqueneana ángeleanaini váinarajiana, tiávihanahi te tachacaya eta cajacure Eufrates —macahepa.

15 Taicha acane ema Viya manerejicaripa eta juca hora eta macaitisirainapa ena cuátroqueneana ángeleanaini, máispainapa eta nacapasirayarehi camuriqueneana achaneana, ena mapamuriqueneana eta náichapemuriva. Tacahe, téjapucanapa éna.

¹⁶ Tacahe, tiúchujicanapa ena suntaruana ticaperana. Nusamapa eta natupa. Dosciento millone eta náichapemuríva.

¹⁷ Tacahe, eta nímairahi ena ticaperana, tatiarihi eta náicutiara te natupana. Eta táimahiana titsi, azul, tiyacaca. Táíñehiquenehi eta tachuti eta naperana. Tiúchucapaipa eta yucu, eta quijare te tajaca. Azufrepuha eta táepuha.

¹⁸ Camurianahi ena achaneana, ena tacaparuanapahi eta juca manapaquene ecuñaraqui eta tacuchusirapahi te fajaca: eta yucu, eta quijare, étapa eta azufrepuha.

¹⁹ Énerichuvare tatiarihi eta táijiqui ticutipainehi eta quichare. Tétavica-vahi eta táíñehivapahi eta tacaparaqui táuchurepahi te tajaca étapa te táijiqui.

²⁰⁻²¹ Énaserá ena apamuriana achaneana tacaitiruanahi eta ecuñaraqui, váhiquene navarahaimahi náinajica eta náichira eta tauriqueneana. Váhiquene téneuchavanáimahi. Váhivare náinajicahini eta nacapahivana, eta nahiapemarevana, étapa eta náesenamarevana, étapa eta námeraivana. Váhivare náinajicaimahi eta najirauchira ena éreanana, eta natsiusirahi eta nasiñarajiana náepiyaruanahi oro, plata, bronce, márijahi, yucuquí. Tamutu eta juca mayamuricacahivare, váhivare tapaicahini, váhivare tasamarahihini, váhivare táimairiricahini.

10

Ema ángele macaratacahi eta ajurecachicha

¹ Tacahe, nímahapa ema apanavare ángele tiúcupaicahi te anuma. Tétavicava eta máíñehiva. Tamuichapahi eta úcaji. Te mápusi, tatiarihipa eta ahe. Eta mamira, tétavicava eta tajararasirahi tacuti eta táimahi eta sache. Eta mapaiqueana tijarahivaca ticutipahi timuruquiápe.

² Téjiacahi eta ajurecachicha eta macaratasirahi te mavahu. Tásiha, eta mapaique vaure mácatayaecahi eta une te mar. Eta étaquiápe sapa tacatayacahi te tiájipahi.

³ Tásiha, tipiaracapa muraca, tacuti eta tahu eta tíñehiquenehi sárare. Te titapiricapa, nusama eta nahu ena apamuriana tacutiyaréni eta tirurehuchahi. Siétequenehi eta najicapirahi.

⁴ Te timatinapa, nuvarahapa nájuequenehayarehini. Nusamapasera ema téchajicanuhi te anuma. Máichanupa:

—Vahi picuajucha eta juca pisamaquenehi. Piáñauchayare eta juca. Váhivare picumetajirica —máichanupa.

⁵ Tásiha, ema maca ángele nímahaquenehi eta mácatayasirahi eta une étapa eta tiájipahi, masuvechapa te anuma eta mavahu vaure.

⁶ Ánipa macahe:

—Tivanecanuhi ema Viya, ema acanevacaquenehi eta máítaresira, ema yátupiquenehi tépiyacahi eta anuma, eta apaquehe, eta mar, étapa tamutu eta tiávihaqueneanahi tayehe. Éma, tivanecanuhi numetaca eta juca máechajiriruvahi: “Tájinapa vaipa tiyeremahi eta táitaviraya”.

⁷ Ánaquiáparipahi eta nacametacasivahi ena profetana eta mapaneruana ema Viya. Puítiserá te macachujapa ema téqueneha ángele, útavainapa tamutu eta mapaneruanahi —tacahepa eta mametarapihi ema ángele.

⁸ Tacahe, nusamavarepa eta mahu ema téchajicanuhi tásihaquenehi te anuma. Tivanecanuvarepa nupaucha ema ángele titupihahi tayehe eta une étapa te tiájipahi. Ánipa macahe:

—Piyana piyaseaca eta ajureca macarataruhi ema ángele —macahepa.

⁹ Tacahe, nuyanapa mayehe ema ángele. Nuyaseacapa eta ajureca. Tásiha, éma máichanupa:

—Júcahi eta ajureca. Piveha, pinica. Títiveyare eta pisamira te pijaca tacutiyaire eta mápama. Étasera te piami, tisucareyare pisama —macahepa.

¹⁰ Tacahe, nuvehapa eta ajurecachicha te mavahu ema ángele. Nunicapa. Jéhesaréinehi títivéinehi eta nusamira te nujaca tacutirinehi eta mápama. Téhesera nujiricapa, tisucarepa nusama te nami.

¹¹ Tásiha, nucametacativarepa:

—Píti piápechavaya picametarapiya eta náichararacavayare namutu ena aquenucana te juca apaquehe, énapa ena achaneana ticavasanahi te tamutu avasareana.

11

Éma Viya mavanecainapa ena apinana mavanaranayarehi profetanaya

¹ Tacahe, te nuvapure, tajaracanuanapa eta ecutiriquí. Tásiha, máichanupa ema Viya:

—Piyanyare tayehe eta Templo te Jerusalén. Pícutichaya tamutu eta peti étapa eta canchón. Pícutichavare eta náijuchirarehi eta sárareana námavahuqueneana. Tásiha, pitupachayareva áyananahipuca ena achaneana téneucharahianahi eta te canchón.

² Váhiserá picucuticha te aneca tamirahuhi eta Templo. Taicha ena apajuecuruhana, nísapaqueneanapa eta návihairaya éna. Nísapainavarepa eta náitahasiraya eta tayereruvanaini eta avasare tacapicahuquenehi Jerusalén. Ichape eta namapachichijisirayare. Cuarenta y dos caje eta náichirayare.

³ Nútiserá nuvanecavacainapa ena apinana nuvaneruana profetana. Éna, tiquisamuirihanayarepahi eta namuirihana. Eta juca táicutiarayarehi eta náichuarésirayare náeneuchava ena achaneana. Mil doscientos sesenta sache eta nayerevayare —macahepa.

⁴⁻⁵ Tásiha, nímahapa te anuma te mamirahu ema Viya eta apina yucuqui olivo étapa eta apina candeleroana te mamirahu ema Viya, ema téchahi tamutu eta juca apaquehe. Eta juca táicutiara eta majaneasiravaca ena apinana mavanarana, taicha manerejiruanahi éna, nacametarairuyare eta náeneuchiravayare ena achaneana. Te natiarihinapuca nácani tivarahanayare titupiacana, éna ticatiuchavanayare. Tiúchucayare eta yucu te najaca. Táijuchayare muraca, tacapacayareva ena nánaranayarehi.

⁶ Énerichuvare ena nani, naratahayarevare náichejica eta tiquiva te jena sácheana nacametarairuyare. Étaripa eta une, náepiyacayare ítiamayare náicha. Nacuchucayareva eta táíñepahiyare nayehe ena achaneana, apanapanejijarehi náicha, te jácani navarahaqueneayare éna.

⁷ Téhesera te táitauchavapa eta nacametarairuyare, macanaravacainapa ema Tíñehi Achane Váinarajiquene ticaijare Útsutsure. Émaripa ema majupaha ema Satanás. Tásiha, masapihainapa ticaparecayare macapacavacainapa ena apinana mavanarana ema Viya.

8-9 Tásiha, ema Tíñehi Achane Útsutsure vahi máisapaimahi náecara eta náqueheana. Tanasiyarehi te aneca. Tacahe, náimahayare namutu ena achaneana te juca apaquehe. Mapana sache y medio eta nacaheyare te calle eta te avasare. Eta juca avasare, étarichuhi eta macaetatainehi ema Viáquenu. Eta juca avasare, tétavicavahi eta tamauriva tacuti eta avasare Sodoma, étape eta Egipto.

10 Ena achaneana, natiarihiyare te tamutu avasareana ena tiúrisamu-reanaya eta náimairaya ena tépenanahi. Ticapiestaranainapa. Tíjaracasichacacanainapa eta námavahuana. Taicha títavanaripa ena nani profetanaini, énaripa ena tihapapiricanahi eta náichira eta tamauriqueneana.

11 Tásihasera, te táequenénapa eta mapanaquene sache y medio, macaeche-pucavacainapa ema Viya. Tichavanainapa títarecanayare. Namutu ena achaneana náimahaya. Ichape eta napisirayare.

12 Tacahe, ena nani apinana profetana nasamainapa eta mahu ema tichuhavacahi te anuma. Muraca eta mahu eta máichuiravacahi:

—Yare, íteca, íápana —máichapa.

Tacahe, járajapapa eta úcaji táepanavacapa éna, támapa te anuma. Ena ticanaranahi náimaracaripa eta nayanirahi.

13 Enevanepa tiyayacarepa eta apaquehe. Muraca eta tayamurisirahi. Camuri eta pétiana tiáquipaicavavacahi. Siete mil eta náichapemuriva ena náepenaqueneanahi. Ena achaneana táemachanahi, tétavicavainehi eta napisirahi. Náimatinumainehi ema Viya. Napiaracapa, nacunachapa eta máitupajijiasiravahi ema Viya tiávihahi te anuma.

14 Títauchavapa eta juca apinaquene ecuñaraqui. ¡Váhisera tayerequene-haimahi eta mapanaquene ecuñaraqui!

Ticachujapa ema téqueneha ángele

15 Tacahe, ticachujapa ema téqueneha ángele. Tásiha, ticaemapa muraca te anuma. Ánipa tacahehi eta nahu eta nusamirahi:

—Títauchavapa puiti eta émairayarepa ema Viya técha, ticavanairipiyare namutu ena achaneana te juca apaquehe. Macaejacapa ema Machicha Cristo, máijaracainapa eta mávacureyare. Acanevacainapa eta émairayare techa tamutu —tacahepa eta nahu.

16 Tacahe, tépuyucanapa ena véinticuatroqueneana víyarahana, ena téjacanahi tayehe eta trono te mamirahu ema Viya. Titsiucapairicanapa, nacunachapa ema Viya.

17 Tijiranapa, ánipa nacahe:
“Vihasulupayachavi, Tata.

Tétavicavahi eta pítipajijiasiravahi, píturuequeneha tamutu.

Píti pitirihiquenehi te tépanavainapa eta apaquehe.

Pinasirichuhivare puiti eta viyehé.

Puiti péjacapa tayehe eta piávacure ichapequene, pítirayarepa pecha tamutu.

18 Tétavicavahi eta nasemanevahi ena achaneana eta piyehé.

Muracapanainapasera eta pícuñasiravaca éna.

Puiti ticayaserehianainapa te pimirahu ena náepenaqueneana.

Jéhesare, picamitiequenehainapa namutu ena ticamitiequenerahianaini te juca apaquehe.

Puiti pítsirijicavainapa eta nacaemataneasiravihi ena pivanarana ticameta-rairurahiana eta péchajiriruva.

Puiti píjaracainapa eta náicuchihi ena yátupiqueneanahi

pichichanaveanahi tiámanahi eta píjare:

nácani ichavicana, araitanana, énapa ena amaperuana” nacahepa.

¹⁹ Tacahe, téjiacapa eta tapajacura eta Templo tiávihahi te anuma, mapena ema Viya. Ticaeherapa eta sagrario tacaunaiyahi eta echajirucavana matratuneanahi ema Viya nayehe ena israelítana. Tásiha, enevanepa téramecahi, ticaemapa, tirurecapa. Témiricapa eta uverequi tímítutupahi. Tiyamuricavarepa eta apaquehe.

12

Máimahavare ema Juan esu esena tínacayarehi étapa eta táíñehiquene sárare ticajare Serpiente

¹ Nímahavarepa eta apana ecutiarare te anuma. Tiáramicarehi éta. Sutiarihi esu esena. Eta sumuiraha tacutiyaréni eta tajaraiwa eta sache. Te tápecu eta suívapeana tacutiyaréni eta caje. Eta te suyehe corona te suchuti, jararihi tacutiyaréni eta dócequeneana jarairíqui.

² Esu suca esena ticajarihi. Tipiararecahi eta suínasirayarehi. Ichape eta sucatajivairahi.

³ Tásiha, témunahiricavarepa tiúchujica eta táíñehiquene sárare. Ichapequenehivare. Ticajare Serpiente. Máchaneva ema Satanás. Titsi eta táimahi. Siete eta tachuti. Diez eta tajihuana. Ticayehehi eta corona eta te tachutiana.

⁴ Eta te táijiqui, táestacapa eta mapamuriana eta táichapemuriva eta jarairiquiana, tacamiricapa te juca apaquehe. Tásiha, titupihapa eta sárare te sumirahu esu esena esu tínacayarehi. Titsecavaipa eta tanisirayarehi eta suchicha.

⁵ Tacahe, ajaira eta suchichahi esu esena. Námavanepasera mayehe ema Viya, te mávihahi te trono. Ema suchicha, aqenucayarehi tayehe tamutu eta avasareana. Macaratacayare eta matsucurupa fiérroqui. Váhiqueneyarehi tijapanucareanaimahi nácani náichahi eta tamauriqueneana. Muracayarehi eta náicuñanayare ena téjecapavana.

⁶ Tásiha, esu esena tijunavanepa te mávapahi apaquehe eta suávihayarehi maicha ema Viya. Natiarihiyarehisera ena ténicanayarehi ésu. Mil doscientos sesenta sácheana eta náitátirayarehi esu esena.

⁷ Tacahe, tiúchujicapa ema Arcángele Miguel énapa ena ángeleana machamuriana. Téhacacanapa nacanarapa eta Serpiente. Énerichuvare natiarihivare ena tayeheanahi ángeleanaini váinarajianahi.

⁸ Apaquererupasera eta ichapequenehi Serpiente, énapa ena tachamuriana. Tásiha, vaipa máisapa ema Viya nanasihini te anuma.

⁹ Tacahe, ticaquijianapa te juca apaquehe namutu ena ángeleanaini, émapa ema náquenumurihi Serpiente, ema ticaetemahi acane esu Eva. Émarichuhi ema Váinaraji ticajarehivare Satanás. Puiticha ticaetemajiricavacahi ena achaneana te juca apaquehe.

¹⁰ Nusamavarepa te anuma eta mahu muraca, ánipa macahe:

—Títauchavapa puiti eta náuchucuirapa ena téhicanahi ema Cristo. Máimererupa ema Viya eta tamutuirahi marataha. Máijaracapa ema machicha Cristo eta émairapa techa tamutu. Taicha ticaquijipa ema Satanás, ema timetauchaparacainihi me Viya eta náichavaquenévanahi ena vichamuriana, tamutu sácheana, yátiana.

¹¹ Ena vichamuriana naratahaipa ticatiuchavana mayehe ema Satanás. Vaipa macapaquechavacaimahi éna, taicha yátupi ticasíñavanahi tayehe eta

máepenírahi ema Cordero. Énerichuvare náimimaticahahi ena apamuriana achaneana eta máechajiriruvana ema Viya. Éna, vahi napicacavavacahini tayehe eta náítaresira. Tíjaracavanahi te náepenírayarehi, vahi návarahahini náinajica eta náehisirahi ema Cordero.

¹² Tétavicavaya eta iúrisamurevaya puiti, emutu eti iávihanahi tayehe eta juca anuma. Páureanasamisera ena ticavasanahi te apaquehe étapa eta tiávihanahi te une te mar, taicha ema Váinaraji máucupauchavacaipa. Tétavicava eta masemanevapahi taicha máéchahi eta ánipirinehi macaheyare –macahepa ema maca.

¹³ Tacahe, eta Serpiente, eta táimairahi eta tacaquijirahi te anuma, táucupaisiraipa te juca apaquehe, tacamesapa táehicarairica esu esena suínaruhi.

¹⁴ Ésusera ticaijaracasipa eta apina ichapequeneana supavanayarehi tacuti eta tapava eta ichape mátihi. Sumaitasiavayarehi tiara tayehe eta mávapahi apaquehe suávihayarehi. Ánaqui natiarihiyareva ena téchapajiricanayarehi. Mapana año y medio eta náenisirayarehi. Eta Serpiente vahi táitecapauchaimahi ésu.

¹⁵ Tásiha, eta Serpiente táhicapa eta une te tajaca, tavarairahi tíjahúchava tatiarihi eta cjacure apaesa suéricahini esu esena.

¹⁶ Étasera eta apaquehe tacatiuchapa esu esena. Téjiacapa eta apaquehe, táerapaicavanepa eta une táhiruamahi eta Serpiente.

¹⁷⁻¹⁸ Tacahe, eta táimairavahi eta Serpiente vahi táratahahini, tavetijipaicha eta tasemirahi suyehes esu esena. Tíyanapa nayehes ena suchamuriana, énapa apavequeneanahi. Tavarahapa tacapacayarehi ena sucutiqueneanahi tisuapanahi ema Viya, téhicanahivare eta máimiturapianahi ema Jesucristo.

13

Máimahavare ema Juan eta útsutsure étapa eta sárare tíñehiquene

¹⁻² Te táequenepa eta juca, te nuvapure, nutupihahi tayehe eta playa eta mar. Nímahapa eta útsutsure tíucupaicapahi tásihahi te une. Siete eta tachuti. Dies eta tajihuana. Te tápusi eta tajihuana tatiarihi eta tayehe corona. Eta juca sárare tavasimahiyaréni eta ichini. Táíñehiquenehi eta tajaca. Eta táivapeana tacutiyaréni eta táivape eta aticure. Tásiha, te tachutiana tatiarihi eta ajureca tímijachavahi Víyainahíni. Macunahisera ema achane majupaha ema Satanás. Eta tacahe, eta Serpiente táijaracapa eta máitupajijiasiravayarehi ema Útsutsure eta macaetemaraivayarehi maratahairayarehi tamutu. Aquenucayare te tamutu avasareana maicha eta Serpiente.

³ Te étana machuti ema Útsutsure, tatiarihi eta majara eta ticapacahi. Tásihasera, tichavahi títareca, tinaracavarepa. Tacahe, eta náimairahi ena achaneana te tamutu avasareana, ichaperinehi eta nárami. Tásiha, náehicapa nasuapapa ema Útsutsure.

⁴ Natsiucavarepa eta Serpiente, taicha eta náimairahi eta táijarasirahi eta máitupajijiasiravahivare ema Útsutsure. Tásiha, nacahepa mayehes:

—Tétavicavahi eta máitupajijiasiravahi ema maca. Nájinavare tiratahaimahi nacanara náquipaica éma —nacahepa.

⁵⁻⁷ Tacahe, ema Viya máisapahi ema Útsutsure téjacahi te mávacure, ichape aquenuca, ticavanairipipa tayehe tamutu avasareana te juca apaquehe. Ema Viya vahi máicuñacavanehini eta masiñavavaisirahi, tímijachavahi Víyainahini. Tíñemahipivaca eta máéchajisira, macaecahirahi ema Viya étapa

eta mapena. Macaecahivare ena tiávihanahi te anuma. Énerichuvare mapanajiricavaca ena machanerana ema Viya. Máimicaratacavacapa, mavarairahi máimicapacavacaya. Cuarenta y dos caje eta macamichirahi ema Viya eta máimiyusemasirahi ema Útsutsure.

⁸ Eta acane te tépanavainapa eta apaquehe, tatiarihi eta libro tiama eta nalista ena titarecanaya te apana vítaresira. Macarataruhi ema nacaparuhi Cordero. Natiarisherana ena apamuriana tájinahi eta nalista tayehe eta libro. Ena nani ena titsiucanahi ema Útsutsure.

⁹ Te evarahapuca ecaicutiara eta juca, tavaraha epanerechaya ichape.

¹⁰ Mácani témeratacayare ema apana, énerichuvare éma te tacaicutiaravapa ticaeratayareva éma apanavare. Mácani ticaparecahi, nacapacayareva éma. Eta tacahe, nácani machanerana ema Viya, tatuparaca nacamichayare tamutu, náimereca yátupina eta náehisirahi ema Viya.

¹¹ Tásiha, nímahavarepa eta apana sárare, táifehiquenevare. Tiúchujica te amahe apaquehe. Eta juca sárare, macunahi ema achane ticaijare Falso Profeta*. Eta juca, tatiarihihi eta apina eta tajihuana, tacuti eta tajihu eta uvesa. Étaserá eta táechajisira tacutiahu eta tahu eta Serpiente Satanás.

¹²⁻¹⁴ Énerichuvare ema Falso Profeta majupahahi ema Útsutsure. Muraca eta tasuapacareva eta mavanairipiana ema Útsutsure maicha ema Falso Profeta. Éma, maratahahi tímereca eta tiáramicareana. Maratahahivare macamirica eta yucu tiásihaya te anuma. Náimahahi namutu ena achaneana te juca apaquehe. Ichape eta náramirahi. Étavenehi eta juca táimeresirahi eta tiáramicareana, étainapa tivayuacaya ena achaneana, tisuapacarenapa titsiucacarenavarepa ema Útsutsure. Taicha náimahahi eta manarasirahi eta majara te tumare; tiápechava titarecahi. Tacahe, ema maca Falso Profeta macavanairipipa náepiyacaya eta máimahi ema Útsutsure, nasiñarajiya.

¹⁵ Ema Viya macamichahi tamutu eta máichaqueneanahi ema Falso Profeta. Vahi máicuñacavánehini eta máchanechirahi eta náepiyarui máimahi ema Útsutsure. Téchajicayare máicha. Eta juca nasiñaraji títupajijiacavainapa tivanereca, ánipa tacahe:

—Namutu tatuparacahi natsiucanu núti. Nácani vahi návarahahini titsiucanuhini, ecapacavacayarehi —tacahepa.

¹⁶⁻¹⁷ Tacahe, ema Falso Profeta macavanairipinapa nacamarca te navahu te vaure, te nanahupuca ena achaneana: ena amaperuana, énapa ena ichanaruana, énapa ena ichavicana. Tayanapane rícoanahipuca, páureanahipuca, líbreanahipuca, mósoanahipuca. Námayarehi eta máijare ema Útsutsure étapa eta mayehe número. Énerichuvare macavanairipipa vahi nacuisapa nacujachapa eta navacharapiana ena mamarcareana. Ticatajivanainapa eta náiturusirayare eta nacamunuqueneana taicha vahi nacamarcahini.

¹⁸ Tacamunui yátupina vipáneréquenehayare maicha ema Viya, apaesa vácaicutiara eta tacayemaquenehi tayumurevahi eta tuparaqui máijare ema Útsutsure eta 666. Éta, tacunahi eta máijare ema maca achane.

14

Eta najirasa ena 144,000 ena téhicanahi ema Cordero

* **13:11** Te pivarahapuca pecha eta apana, pitanuca eta capítulo 16.13.

1-3 Tacahe, nímahavarepa eta plaza ticaijarehi “Sántoquenehi Sión”, te mamirahu ema Viya, máejasirahi eta te trono, te návihahi ena cuátroana ecutiarareana énapa ena véinticuatroqueneana víyarahana tuparairucana. Nímahavarepa ema Cordero. Te machacaya natiarihihi ena 144,000queneana téhicanahi éma. Éna, ticamarcavacahi te nanahuana eta máijare ema Cordero émapa ema Maiya. Nusamavarepa eta muraca ticaemahi te anuma tacutiyaéni eta muraca tirureca. Tásiha, títsivachavavarepa. Nusamapa ticapununeanahi eta camuriqueneana guitarrana. Tacahe, éna 144,000queneana tijiranahi te mamirahu ema Viya. Arapiruhi eta najirasahi. Nájina apanaina títucaína eta najirasahi. Nacarichu títucañahi ena 144,000queneana. Ena nani náuchucureanahi te namuri ena ticavasanahi eta juca apaquehe.

4 Matapiravareanahi éna te mamirahu ema Cordero. Tájinavare váhiquene náechipejicavahíni, navirainahini esu esena túhusi. Náehicahi ema Cordero te jácani mapaisirana. Ena nani, ena náinapureanahi masantuchaqueneanahi ema Viya émapa ema Cordero.

5 Tájina náimatiyahini eta náepiyahirahihini. Tájinaquene natapiravainahini te mamirahu ema Viya.

Eta nametarapi ena mapanana ángeleana

6-7 Nímahavarepa ema émana ángele tíarariricahi. Ticametarapihi eta téqueneha mametarapi eta máichuairesirahi eta náeneuchiravaina ena achaneana tiávianahi te tamutu avasareana, apaechajiriruvaqueneana. Máitavacacainapa eta náitaresiraya nácani ena tísupanahi. Muraca eta máichuairesirahi, ánipa macahe:

—Éneuchava eta epecaturana. Epicauchayare ema Viya, taicha éma tépiyacahi eta anuma, eta apaquehe, eta mar, éapa eta cáquiureana. Émaina ejiraucha, ecunachaya. Émaina etsiuca. Taicha járajapainapa puiti eta máicuñasiraya ena achaneana máeneuchavarahana —macahepa.

8 Tacahe, tíuchujicavarepa ema apana ángele. Émapavavare téchajica. Tiáramicare eta macayemaquene. Ánipa macahe:

—Tájinapa táipuina tacamitiaruinapa eta ichapequenehi avasare Babilonia, taicha tétavicavahi eta tamutuirahi taicha eta tamauriqueneana. Tavayuacahi tamutu eta apana avasareana táichiraya eta tamauriqueneana, tacutihi súcani esena suétaviurequenehi eta sutuhusivahi, namutupahi suvayuaca —máichapa.

9 Te títapiricapa, émapavavarepa téchajica ema émana ángele, ema namápananehi. Muracavare eta máechajisirahi. Ánivare macahe:

—Tájinavarepa táipuina eta náicuñanayare ena tijirauchanahi ema Útsutsure éapa eta máimahi náepiyaruihí nasiñarajíhi, énaripa ena tiámanahi eta mamarca te nanahuana éapa te navahuana.

10 Muraca eta nacatajivairaya taicha ichape eta náimiyusemasirahi ema Viya. Ticaepujuquichacasianainapa eta te muracaquene yucu, táetiraráisina eta tamuruirá. Muracaquenehi eta nasamira. Táitusiava, natsirihainapa eta máimarasarira ema Cordero, énapa ena ángeleana.

11 Máichecuaraquireyare eta nacaicuñairayare. Tájina ticaemahaimahi eta yucu. Támutu sácheana, yátiana nacaheyare te yucu ena tijirauchanahi títsiucanahi ema Útsutsure, tiámanahivare eta mamarca, tacuna eta máijarehi ema nasiñaraji.

¹² Eta tacahe, ena machaneranahi ema Viya, ena tisuapanahi eta mavanai-ripiana, túmesamureanayare eta náehisiraya ema Jesús, puiti nacamichayarehi tamutu —máichapa ema ángele.

¹³ Tacahe, nusamavarepa ema téchajicanuhi te anuma. Ánipa macahe:

—Piájuchayare eta juca numetaruvianayare: ¡Tétavicava eta náuricacarevaya ena táimicaparuanayare puiti juca vicaijuheyare eta náehisirahi ema Viáquenu! —máichanupa.

Énerichuvare ema Espíritu Santo máichanupa:

—Jéhevare, najacapainapa eta náicuchihi taicha eta nacaemataneasirahi ema Viáquenu. Tájínapa nácamunuimahi, tinaracanainapa —macahepa.

Eta nacurujisiraya ena ángeleana ena achaneana

¹⁴⁻¹⁶ Te nésenicapa, nímahapa eta tijapu úcaji. Matiarihíhi ema támaque-nepahi. Téjacahi éma te úcaji. Achanehi eta máimahi. Te machuti tatiaríhihi eta mayehe corona oro. Németeaca titsecavaipa eta macurujisirayare eta trigo. Tásiha, tiúchucapa ema émana ángele te tajuhe eta Templo. Mapiaracapa muraca ema téjacahi tayehe eta úcaji. Máichapa:

—Puiti piyana. Picurujica namutu ena achaneana manerejiruanahi ema Viya, taicha tiyuriticavapa eta natuparaha. Piputuvahu* —máichapa.

Tacahe, ema téjacahi te úcaji, títahúchavapa macurujicapa ena náequeneruanahi manerejiruanahi ema Viya. Macuchucavacapa eta te juca apaquehe.

¹⁷ Tásiha, tiúchucavarepa ema apana ángele te tajuhe eta Templo te anuma. Németeaca matsecaripavare eta macurujisirayare, étapa eta uva†.

¹⁸ Énerichuvare tiúchujicavarepa ema apana ángele eta te mesa tiámahi eta mayucuneasa ema Viya. Éma, téchahi eta yucu. Tacahe, mapiaracapa muraca ema matsecaripa eta macurujisirayare. Máichapa:

—Puiti piyana. Piputuvahu picurujica ena apamuriana achaneana te juca apaquehe. Tícuñacacareanapa ichape, taicha tétavicavahi eta náichirahi eta tamauriqueneana. Vaipa ticuchapacarehini eta náeneuchiravaina‡ —máichapa ema ángele.

¹⁹ Tacahe, tiyanapa ema ángele. Macurujimurihapa ena achaneana tíchanahi eta tamauriqueneana. Tíñehiquenehi eta náepenirahi taicha títecapapa eta táíñehiquene ecuñaraqú tiásihahi me Viya taicha eta náimiyusemasirahi éma. Tacajapapahacavacahi éna.

²⁰ Te tachachacu eta viávasa eta tacajapapahesihahi. Tiúchucapa eta náitine, tacuti eta cajacure. Étana metro eta táupenava. Tresciento kilómetro eta táunavayare.

15

Ena siétequeneana ángeleana najacapapa eta siétequene ecuñaraqiana

¹ Tacahe, te nésenicapa te anuma, nímahavarepa eta apana ecutiarare. Tétavicavapa eta táramicarevahi. Natiaríhivare ena siétequeneana ángeleana.

* **14:14-16** Te pivarahapuca pecha eta apana, pitanuca Mateo 13.24-39, étapa te 24.30,31. † **14:17** Te juca, ema Juan máechajisihahi eta nacurujisirahi eta uva, tahi eta épire. Te jena avasare, eta nayeherepi ena achaneana, nácatayajica eta uva te raveta, navairahi nacuchuca eta tachi. ‡ **14:18** Ema ángele máimicutijiricahi eta tíñehiquene ecuñaraqú ticapacayare ena camuriqueneana achaneana étapa eta sárareana. Vuichahasera étaina eta táequeneha ecuñaraqú.

Ticaturacasianapa éna eta nacamirisirayarehi eta siétequene ecuñaraquiana te apaquehe. Te táitavapa eta juca ecuñaraquiana, útavainavarepa eta masemanevahi ema Viya.

² Nímaha tativa eta ticutiyaréni táimahi eta une te ichapequene cáquiure. Tétavicavasera eta tajanunusira tacutihi eta espejo. Tásiha, tacutiyaréni eta yucu eta táimahi. Natiarihivare ena máisapavaranahi najirauchahini natsiucahipucaini ema Útsusure étapa eta máimahi náepiyaruihi, váhivare náisapavahini nacamarcahini eta mamarca. Te tachacaya eta une titupihanahi. Nacaratacahi eta nayeheana guitarrana máijaruana ema Viya.

³ Tijiranahi eta jirasare majirasaini ema víyarahaini Moisés, mavanaraini ema Viya. Najirauchahi ema Cordero. Ani tacahehi eta jirasare:

“Píti ichapequenevahi aquenuca,

Tétavicava eta pítupajjiasirava.

Tamutuquenehi píturuequeneha.

Tétavicavapa eta táramicarevahi eta pépiyuanahi.

Tiúricarehivare eta pinaquipairuanahi.

Vahi apanapanenejinahini eta péchajiriruvana.

Yátupihí eta piúruva.

Píti aquenucavihi, péchaya tamutu avasareana.

⁴ Namutuhi tipicaviana, piti Tata.

Namutuvare ticunachaviana taicha piti yátupiquenévihi eta pisantuva, nájina nácutivihini.

Títecanayare nácani achaneana te tamutu avasareana.

Titsiucavianayare taicha náimahahi tatupiruvahi tamutu eta píchaqueneanahi”.

⁵⁻⁶ Tásiha, nímahavarepa te anuma téjiacahi tamutu eta Templo. Nímahapa tiúchucanahi ena siétequeneana ángeleana te téqueneha cuarto te tajuhe, énaquenehi ena ticaturarahanahi eta siétequene ecuñaraquiana táequeneruyare tiúchujica. Eta namuirihana, amairiha eta lino tijapu tiraapeacavaca. Eta náitijuheana ichapemevaca, títecapavaca te natupana.

⁷ Tásiha, nímahapa ema émana ecutiarareana nacuatronehi. Máijaracavaca étasivaca eta escudilla oro ena siétequeneana ángeleana. Te tajuhe eta escudilla támapahi eta táñehiquene ecuñaraqui tácutiarahi eta masemaneva ema Viya. Éma, acanevacaquenehi eta máitaresira. Máimahapa tamutu eta tauriqueneanahi náichaqueneanahi ena achaneana.

⁸ Tacahe, nímahapa tíjahúchavapa eta tajurusirahi eta majaraivahi ema Viya, ema acanevaca eta máitaresirahi. Tétavicavahi eta mapicauchacarevahi taicha eta matumeva, maratahairahi tamutu. Tásiha, nájina tiratahaina tisiapana te Templo, váhivare tímahacarehini eta tapajacura táichavenehi eta tavayuchiravahi eta majaraivahi. Tiámainucava te táitachavapa eta siétequene ecuñaraqui táequeneruyarehi námaquenepahi ena siétequeneana ángeleana.

16

Títauchavapa eta ecuñaraquiana nacamiruihi ena siétequeneana ángeleana

¹ Nusamapa muraca eta mahu ema Viya tásihaquenehi eta téqueneha cuarto náuchusinehi ena siétequeneana ángeleana. Ticavanahianapa éna. Ánipa tacahe eta navanahi:

—Eyanapa ecamirica te apaquehe eta juca siétequene ecuñaraqui táíñehiqueneana tiávihanahi te escudilla taicha eta nusemanevahi —máichapa ema Viya.

² Tacahe, tiyanapa ema títapuca ángele. Máepusaicapa te apaquehe eta ecuñaraqui tiávihani te escudilla macarataruhi. Tacahe, ena achaneana tiámanahi eta mamarca ema Útsutsure, táichavenehi eta natsiusirahi eta máimahi nasiñarajíhi, témunahiricavapa táuchuacavaca éna eta caracha ticajachacarepa tijechevare, tacutiyaarani eta espuntiu.

³ Ema apana ángele máepusaicavarepa eta macarataruhi tayehe eta mar. Tacahe, eta une títahúchavapa ítiama, tijecheamapa. Tépenaracanapa tamutu eta sárarechichana ticavasanahi te mar.

⁴ Ema apana ángele máepusaicavarepa eta macarataruhi tayehe eta cajacureana, te cáquiureana, étapa te tatarapiana. Énerichuvare ítiavarepa.

⁵ Nusamavarepa ema máepusaicahi eta juca ecuñaraqui tayehe eta cajacureana. Macahepa éma:

—Tétavicavapa eta piúriua, pítí Tata Vicaiyaquene, eta pícuñasiravacaipa puiti ena ticaviurevanahi. Yátupiquenevihi eta pisantuva. Pítí pitirihi-quenehi te tépanavainapa, puítiripa pinasirichuhi eta viyehe.

⁶ Tícutichavanainapa puiti eta navarahaquenehi térana eta íti ena tépusaicani ena náitine ena pichanerana táimicaparua ena náehisiravihi pítí, étapa eta nacametarairuirahi eta péchajiriruva. Puiti píjaracaipa eta náerirayare eta ítiama taicha naviurevanahi éna.

⁷ Nusamavarepa eta mahu ema apana tayehe eta mesa tiámahi eta mayucuneasa ema Viya. Ánipa macahe:

—¡Tata Vicaiyaquene, tétavicavapa eta vicunachiravi! Pítí, tétavicava eta pítupajijiasirava, píturequeneha tamutu. Pitupiruvahi eta pícuñasiravacahi ena ticaviurevanahi. Vahi pémetavicháini —máichapa.

⁸ Ema apana ángele máepusaicavarepa eta macarataruhi tayehe eta sache. Tacahe, eta sache tépanavainapa eta tavayuchiravayare títjure, táijuchirapa eta apaquehe énapa ena achaneana.

⁹ Jéhesaréinehi, táetaviuchapa eta táijurevahi. Táijuchavacapa ena achaneana. Váhiquenesera náeneuchavahini, váhivare návarahahini náesenicahini ema Viya. Navayuchaichucha eta nusemanevahi. Nacajachapa ema Viya, ema ticavanairipipa eta ecuñaraqüana.

¹⁰ Ema apana ángele máepusaicavarepa eta macarataruhi te táinahu eta mávasa capital ema Útsutsure, eta máejasihahi. Tacahe, ticutipa timapicupa te návihahi ena majupahana. Vaipa náimatiequenehahini tájahapuca eta náicharacavaya namutu ena machanerana. Ticapitiquiahechavanapa ena achaneana taicha eta tacativa nasama.

¹¹ Tacahe, tiseamasamureanapa nacajachapa ema Viya taicha eta tacativahi nasama eta najarana nacarachana. Váhiquenesera téneuchavanáimahi mayehe ema Viya. Váhivare náinajicaimahi eta náichira eta tamauri-queneana.

¹² Ema apana ángele máepusaicavarepa eta macarataruhi tayehe eta ichapequene cajacure ticaijare Eufates. Tacahe, eta cajacure tiájcupa, apaesa máejerare eta nánucuiraya ena aquenucana tiásihanahi te tinapaica eta táuchusine sache, énapa ena suntaruana.

¹³ Tásiha, nímahavacapa ena mapanaqueneana ticaetemarahanahi: ema Serpiente, ema Útsutsure, émapa ema Falso Profeta. Tiájajacanahi éna.

Te najaca, tiúchucahi eta tavásiyaréni eta varutete. Éreananahi eta júcana, náchanevanahi ena mapanaqueneana.

¹⁴ Éna, títipajijiacavanahi tíchanahi eta tíaramicareana tavayuarauianahi nayehe ena aquenucana te tamutu avasareana. Navaraha nacurujicavacayare, énapa ena nayeheana ejército nasuntaruana apaesa namutu ticananaya ema Viya. Tíjahúchavasea muraca eta máquipapaisiravacainapa éma, taicha tétavicava eta máitupajijasirava, máituruequeneha tamutu.

¹⁵ (Nuti, tíjahúchavaya eta nítecapauchiraheyare éti. Váhisera tánecapacaremahi eta nítesira. Eta tacahe, tétavicava eta iúricacarevaya te ecunevahi, machu ímacariana eta nuchimapiiraheyare, etsiriacarépa.)

¹⁶ Tacahe, ena mapanaqueneana éreanana nacurujicapa ena aquenucana énapa ena nasuntarurana tayehe eta vámahí ticaijare Armagedón te náechajiriruva ena israelítana.

¹⁷ Ema téqueneha ángele nasietenehi máepusaicapa eta mayehe escudilla te anuquehe. Tásiha, nusamapa muraca eta mahu ema Viya tiásihahi te trono tayehe eta Templo. Ánipa macahe:

—¡Títauchavapa puiti tamutu! —macahepa.

¹⁸ Tacahe, tiúchucapa eta térameca. Ticaemapa. Tirurecapa. Tiyamuricapa eta apaquehe, muraca eta tayamurisira. Tájina tácuti eta tamuracava nasamasarehini eta acane eta táepaniravahi eta apaquehe.

¹⁹ Te tamutu eta avasareana te juca apaquehe, tiáquipaicavanapa eta pétiana. Tavetijipa eta ichapequene avasare Babilonia. Tiáquipaicavapa tamutu eta pétiana. Mapana eta táejepahi eta apaquehe te tajuhe eta avasare. Taicha ema Viya máechavapa eta naviurevanahi ena tachichanaveana. Máimerecapa éma eta masemanevahi. ¡Tétavicavahi eta tamuracava eta táicuña!

²⁰ Énerichuvare, tamutu eta tiúrupuhiana téricapa. Eta céroana témitieque-nevarepa.

²¹ Témiricavarepa eta ichapequene uverequiana. Tájínavare tácuti eta táichapeva. Cuatro arroba eta tajitacarevavaca. Tásiha, ena achaneana tisemanaichucha, nacajachaichucha ema Viya, taicha tétavicava eta tamuracava eta ecuñaraqui, eta táemirisirahi eta ichape uverequi.

17

Esu esena túhusi téjacahi te tamaiquehe eta apanavare sárare tíñehi

¹ Tásiha, tipauchanupa ema émana ángele nasietenehi ena ticaratacanahi eta escudillana. Máichanupa:

—Yare, nímechaviyare eta suícuñayare esu esena túhusi, tavayurevahi eta supecaturana. Ésu, tacunahi eta ichapequene avasare te tachausi eta mar.

² Ena aquenucana te juca apaquehe namutuhi suíturucavaca sucachanevaca éna. Suíchuhavare ena suvarahaqueneanahi suíturucavaca tayehe tamutu eta tájiparacana tamauriqueneana —máichanupa.

³ Tacahe, ema Espíritu Santo tímimahanuhi eta mavarahaqueneana tímechanuya ema ángele. Ema ángele tiámanupa tayehe eta mávapahi apaquehe. Ánaqui nímahapa esu esena téjacahi te táinahu eta táíñehiquene sárare, máchanevahi ema Útsutsure. Titsi eta táimahi. Te táquehe, amairiha eta

ajureca táimijarechavahi, tímijachavahi Váyainahini. Siete eta tachutiana. Diez eta tajihuana*.

⁴ Esu suca esena, eta táimahi eta sumuiruha mularume étapa eta titsi. Tétavichavahi táurinavavacahi eta suyereruvana, amairiha oro étapa eta táurinaqueneana márjahichichana, étapa eta tíurinana perla. Tásiha, te suvahu sucaratacahi eta ichape suéresi oro. Tiámahi eta tájiparacana pecatuana táifemahiqueneana suíchaqueneanahi eta suítaresirahi sutuhusivahi.

⁵ Te suchuti, tatiarihihi eta ajureca eta suíjaruhi, tayumurevachuchasera eta tacayemaquenehi: “Eta ichapequene avasare Babilonia, tacachichapa ena túhusiana. Táquenuyare eta tájiparacana táifemahiqueneana”.

⁶ Nucacutiarapasera eta suícharacavahi esu esena ticavahahi ésu. Táecavahachahi taicha eta suérirahi eta náitineamaini ena machanerana ema Viya, ena suímcaparuanahi taicha eta náechajisihairahi ema Jesús. Eta nímairahi eta juca, ichaperinehi eta náramesirahi.

⁷ Tacahe, máichanupa ema ángele:

—¿Tájaha tacayema piárameca? Numetacaviyare puiti eta tacayemaquene eta juca pímahaquenehi suyehe esu suca esena, étapa eta sárare superahi, eta siétequenehi tachuti, eta diésquenehi tajihuana.

⁸ Eta juca sárare pímahaquenehi, tanasiqueneripahineni acane, tájinaipahisera puiti. Tiúchujicayarevaresera tásihaya tayehe eta táupenaquene pusu. Ichape eta náramesirayare eta náimairayare ena achaneana, namutu ena tájinahi eta nalistainahini acane te tépanavainapa eta apaquehe, tayehe eta libro tiama eta nalistana ena náitareruanayare. Tatupíruvayaresera eta sárare tépenayare títaequenénapa.

⁹ “Pisamanuchaha. Puiti numetacaviyare eta tacayemaquenehi eta pímahaquenehi, te pivarahapuca picaicutiaraya. Esu esena tacunahi eta ichapequene avasare. Eta juca siétequene tachuti eta sárare tacunahi eta siétequene cerro távihahi eta avasare.

¹⁰ Tacutiquene eta juca siétequene tachuti eta sárare náicutiaranahi ena siétequeneana aquenucana. Cíncoanapasera ena nájinaripa puiti. Matiarihisera ema émana aquenucaichaha puiti. Ema apana vuíchaha títecapahi. Téhesera te máitecapapa ema téquenehayare, vaipa tíyeremahi.

¹¹ Étarichuvare eta sárare táitareruinahi acane, tájinaripahisera puiti. Éta, macunahi ema nahóchone ena siétequeneana aquenucana. Te máuchujicapa, majacapa eta návacureana ena siétequeneana aquenucana. Tíjáhúchavasera eta máitaviraya.

¹² “Eta pímahaquenehi diésquene tajihuana nacunahi ena apamuriana diésqueneana aquenucanayare. Vuíchahasera ticatuparacasiana. Najacapayaresera eta natuparahanaya ena aquenucanaya eta te návasana. Ánipirichusera nacaheyare eta nacachanerayare eta sárare.

¹³ Ena nani diésqueneana aquenucana tínunana eta napanereru. Náimicacaya eta sárare eta aquenucairanahi te návasana.

¹⁴ Tacahe, ena nani nacanarainapa ema Cordero. Váhisera náratahaimahi. Máitahacavacayarehi ema Cordero. Taicha éma, yátupiquenehi Rey, Aquenucahivare. Mavanecahi ena réyeana énapa ena aquenucana. Natiarihiyareva ena macachanequeneanayare éma. Nacanerejiquenehi eta máichuirahi ema Viya. Tásiha, yátupihí eta náehisirahi éma.”

* 17:3 Te pivarahapuca pecha eta apana, pitanuca eta capítulo 13.1-8.

15-18 Tásiha, máichanuvarepa ema ángele:

—Esu esena túhusi pímahaquenehi, tacunahi eta ichapequene avasare. Sucaetemaqueneanahi suítahacavacahi ena aquenucana te tamutu avasareana. Eta jena mar pímahaquenehi te tachaui eta suéjasihahi esu túhusiquenehi, tacunahi eta náichapemuriva ena achaneana te tamutu avasareana. Eta diésquenehi tajihuana eta sárare pímahaquenehi tacunahi ena diésqueneana aquenucana. Éna, nacatichayare esu túhusi. Téhesera te táequenepa eta juca, náitaracainapa ésu eta sucayehequeneanaini. Náepachiacainapa. Náquipaicayare tamutu eta supenana. Tásiha, eta náemachayare náijuchainapa te yucu. Eta nacuticacairaya, navaraha náimicatata ema Útsutsure, étapa eta nacamitiequenehaya esu túhusi, vahi tásihahini eta napanereruana éna. Émarichuhi ema Viya tíjaracavacahi eta napanereruanyarehi, náichirayare eta mavarahaquenehi éma —macahepa ema ángele.

18

Eta táquipaisiravahi eta avasare Babilonia

¹ Nímahavarepa ema apana ángele tiúcupaicapahi másihahi te anuma. Muraca eta matuparahahi. Mamicachaparinehi eta apaquehe eta majaravapahi.

² Téchajicapa muraca, ánipa macahe:

—Tájinapa táipuina táquipairuvainapa eta ichapequene avasare Babilonia. Nájinapa nánasihini nacapenahini ánaqui. Énanecha ticapenanahi ena váinarajiana, étapa eta cáyureana tacajachacarequeneana.

³ Muracaqueneya eta táicuña taicha namutu ena achaneana te avasareana, tétavicavahi eta tavayuasiravacahi eta túhusicare, étanecha nacasamurehi. Énaripa ena aquenucana, énerichuhivare nacahehi éna táemesiavahi. Énerichuvare, ena tíjararecarahiana eta téracare, tétavicavaipahi eta náurisirahi tarricochavacaipahi eta tímitahacavacayare ena apamuriana —macahepa.

⁴ Nusamavarepa te anuma eta mahu ema apana ángele. Ánipa máichanu:

—Eti machaneranahi ema Viya, vahi ecuehica eta napecaturana ena achaneana te juca avasare. Iúchucavanesea, machu tavehahe eta táínehiquene táicuñayare taicha eta napecaturana.

⁵ Taicha tétavicavapa eta táuruquechiravahi eta napecaturana. ¡Ániquehepal ¡Ema Viya máimararacahi tamutu eta tamaeperajivanahi!

⁶ ¡Puiti eti nuchamuriana ángeleana, ícuñacayare! ¡Íjaracayare muraca eta táitsivayare taicha tavayuaca náichahi eta tamauriqueneana ena tachichanaveana eta juca avasare! Cape juca náimicatativachavacahi ena páureana. Puiti, ichapepanayareva eta íjarasiraya eta nátajivaya.

⁷ ¡Émecharecayare muraca! Ichapena eta nacatajivaira taicha tétavicava eta náijarasiravahi eta nacaetemaraivahi eta napanereruhi: “Tájina níchiravainahini eta návihahi. Núti néchahi. Tájina nácamunuimahi. Vahi nucatajivahini” tacahehi eta napanereruanahi.

⁸ Eta juca napanereruhi naviurevana eta tájahúchirainapa eta náicuñayare. Técuhanainapa ena tachichanaveanahi eta juca avasare. Ticatisamurevanainapa. Tíjuyare eta napenana, táimijuchavacainapa

éna. Tépenaracanainapa namutu. Máijahúchahi máicuñacavaca ema Viya, máemereuchirahi eta tamutuirahi marataha —máichanupa ema ángele.

⁹ Natiarihivare ena aquenucana te avasareana, ena tavayuaruanahi eta túhusicare, táimiaquijiararuana eta tavayuasiravacahi. Éna, te náimahapa tipusisicapa eta yucu, tíyahanainapa ticatiequenehavanainapa.

¹⁰ Nayererequinainapa eta náimararasirayare táichavenénahi eta napisi-rayare eta yucu táicuñayare eta avasare. Tásiha, nacahepa:

—Páurevisami, piti ichapequene avasare Babilonia. Tíchechupa puiti eta táijahúchiravapa eta pícuña —nacahepa.

¹¹ Énaripa ena comerciánteana tjararecarahiana eta tájiparacana te avasareana, tíyahanayareva ticatisamurevanaya eta náimairayarehi eta táitavirapa eta avasare. Taicha nájinainapa tiviyechaimahi eta námaqueneasana:

¹² oro, plata, táurinaqueneana márijahichichana, perla, yeréucava táurinaqueneana, seda, apaimamajiqueneana mularumeana, títsimeana; énerichuvare eta náepiyaruana tijapu iápe ticaijare marfil, yucuqui táurinaquene, bronce, fierro, étapa eta mari ticaijare mármol.

¹³ Étaripa eta canela, eta apana tájijyequeneana táhiana yucuqui nasucureana, eta tátuyucuqui inciensosare, tjiyeyequeneana brillantina, perfumeana. Étaripa eta téracareana, eta acéiteana, eta harina te trigo. Étaripa eta sárareana ticavanaracarevaca, eta vuiye, cavayu, burro, énerichuvare eta tinicareana uvesa, vaca. Étaripa eta carro. Énaripa ena achaneana ticamusuracareana náijararervanayarehi.

¹⁴ Tíápechavavarepa téchajica ema ángele, ánipa maicha eta avasare:

—¡Jhesare pítitátaji! Títavapa puiti eta picayheraini eta táurinisiqueneana tinicacareana, tétavicavainehi eta tavayuasiravihi. Énerichuvare títavavarepa eta picayehevaini eta tímahacareana táurinaqueneana pipincanillavainihi —máichapa.

¹⁵ Énerichuvare ena nani tjararecarahianaini eta juca tájiparacana ichape-muriqueneana tarricuchaqueneanahi eta avasare, nayererequinariipa eta náimararasirahi eta tacaicuñairayarehi eta avasare. Ticatisamurevanaripahi. Tíyahanaripahi.

¹⁶ Tásiha, nacahepa:

—Páurevisami piti ichapequene avasare. Tétavicavainihi eta piúrinavainihi. Picutinahi esu esena eta táurinava eta sumuiriha lino, mularume, titsi eta tayehejaca eta sumuiriha. Eta piyereruva amairiha oro, táurinaqueneana márijahiana, perla.

¹⁷ ¡Puiti, tétavicavapa eta táijahúchiravaipa témitiaca tamutu eta pímahaqueneanainisamihí! —nacahepa.

Énerichuvare, namutu ena comandanteana táquenuanahi eta lancha, énapa ena pasajeroana, énapa ena marinteroana, énapa ena ticaemataneanahi tayehe eta lánchana te mar, nanasipa namutu te tiyerehi.

¹⁸⁻¹⁹ Eta náimairahi eta taquijarera eta yucu tájjuirahi eta avasare, tipiararecanapa eta nacatiequenehairahi. Tíyahanapa. Nanacahivare eta máteji te nachutí. Tásiha, nacahepa:

—¡Páurevichapucaini! ¡Tamapurují eta juca ichapequenení avasare! ¡Tájina apanaina avasarena tácutihini eta juca ichapequenení avasare! ¡Títavapa tamutu eta tarricovainehi virrichochiravainihi vimutu viti tímisiapanahi eta

táimahaqueneana viyereruasanahi te lánchana tayehe eta juca mar! ¡Puiti tétavicavapa eta táijahúchiravahi eta táemitiequenerahi tamutu! —nacahepa.

²⁰ Tiápechava téchajicapa ema ángele, ánipa macahe:

—¡Iúrisamurecarepa puiti eyehe eti iávihanahi te anuma, étipa eti apóstoleana, étipa eti profetana, emutu eti machaneranahi ema Viya! Taicha máitsirijiequeneharipa puiti ema Viya tamutu eta táemecatajivasirahehi —macahepa.

²¹ Tacahe, tiúchujicapa ema émana ángele, máetaviure eta mamuracava. Manaracuhapa eta ichapequene mari ticheyaramé. Máquijicapa te une. Tásiha, macahepa:

—Tacaheya eta tamuracavaya eta náquipaisiraya eta ichapequene avasare Babilonia. Tájinapa tímiepecháimahi náimahahini.

²²⁻²³ Tamutu timatina eta te távinenihí. Tájinapa tímiepecháimahi tacasamahuhini eta irimaraquiana te cálleana eta nacapununeraini eta guitarana, sivivire, nacajane, étapa eta nachujana. Nájinavarepa ena ticachujarahianaini. Váipavare ticasamahuimahi eta piéstana ena araimarahiana. Nájinainavarepa ena ticaemataneanaini eta tinicacareana. Títavainapa tamutu eta ematanecanaini. Étaripa eta tamicahuana, tamutupa témitiequenehana. Tamapurujipa eta náiturequenehainihí ichape ena comerciánteana, náijarareca eta tasimutuqueneana. Tamapurujivarepa eta tavayuasiravaca eta apamuriana avasareana téhicanahi éta, taicha puiti nájina ticatajicaimahi eta ichapeni avasare.

²⁴ Eta júcatataji avasare, ticaviurevahi eta nacapasiravacahi namutu ena machaneranaini ema Viya te juca apaquehe, énaripa ena profetanaini —macahepa.

19

¹ Te táequenepa eta juca, nusamavarepa eta nahu ena camuriqueneana achaneana tayehe eta anuma. Muraca eta najiraira. Ánipa nacahe:

“¡Aleluyapa puiti!

¡Tétavicavahi eta vicunachiravihí piti Tata!

Eta picatiuchirahavihí, pímerecahieta nacapasiravacahi nam eta pítupajijiasiravahi.

² Taicha títauchavapa eta náicuñahi ena ticaviurevana, vahi pémetaviacavacahini eta náemecharahiana ena túhusiqueneana tachichanaveanainihí eta avasare.

Ichape eta navayuareresirainihí ena achaneana te apanana avasareana eta túhusicare.

Puiti pítipa pítsirijiequenehahi eta nacapasirahavihí viti machaneranaini”.

³ Tiápechavanavarepa tijirana:

“¡Aleluyapa puiti, taicha acanevacainapa eta tacaicuñairahi eta juca avasare-tataji!” nacahepa.

⁴ Tásiha, ena véinticuatroqueneana víyarahana tuparairucana énapa ena cuátroqueneana ecutiarareana tépuyumurihanapa te mamirahu ema Viya, ema téjacahi te trono. Natsiucapa eta nacunachirahi. Ánipa nacahe:

—¡Amén! ¡Aleluya!

⁵ Tásiha, nusamavarepa eta mahu ema téchajicahi tayehe eta trono. Macahepa:

—Puiti etsiucayarepa ema Viya, emutu eti machanerana, étipa eti amape-ruana epicaurahiana mayehe —máichapa.

Eta táurinaquene mapiestara ema Cordero

⁶Nusamavarepa eta nahu ena camuriqueneana achaneana. Tijajacana. Tétavicavahi eta tamuracavahi eta najirairahi. Ánipa nacahehi: “¡Aleluyapa puiti!

Taicha téjacaipa te mávacre ema Viáquenu, tinacuchavapa eta émairapa técha tamutu éma.

Taicha tétavicava eta máitupajijiasirava, tamutuquenehi máituruequeneha.

⁷¡Vámutu vicunacha éma!

¡Tétavicava eta viúrisamurevapa puiti!

Taicha títauchavapa puiti eta macurujisirahavipa ema Cordero, tímicutijiricavahi te araimamuhu.

⁸Viti véhicanahi ema Cordero, tétavicavahi eta vipachinavaipahi máicha, tacutihi súcani araimayare ticaetupirihpa, sucamuirihahivare eta táurinaquene múiriare lino, tijapu tirapepemeca” nacahepa.

(Eta juca lino, tácutiarahi eta táurivahi eta víchaqueneana viti véhicanahi ema Viya.)

⁹Tacahe, máichanupa ema ángele:

—Piájuchayare eta juca: Tétavicavapa eta náuricacareva nácani nacaichuha-siqueneanahi tayehe eta táurinaquene mapiestara ema Cordero.

Tásiha, máichanuvarepa:

—Eta juca nímechaquenéviana, yátupiqueneanahi máechajiriruvanahi ema Viya —máichapa.

¹⁰Tacahe, népuyucapa te máivapechacaya ema ángele. Nuvarahapa nutsiucaayahini. Émasera máichanupa:

—Péchepecachucha. Vahi picutsiucanu. Taicha nútirichuhi picutiquirenuhi mavanaranuhi ema Viya, énapa ena pichamurianahi títauchanahi eta mavanairipiana ema Jesús. Ema Viya, éma tatuparacavihi pitsiucazare. Taicha étirichuhi vicutiquireneana eta vicametarairuira eta máechajiriruva ema Jesús —máichanupa.

Ema Jesús, macaperahi eta tijapu cavayu

¹¹⁻¹³Tacahe, nímahavarepa eta anuma téjiaçahi. Tiúchucapa eta cavayu tijapu. Eta máijare “Tímimatirahi me Viya”* ema ticaperapahi éta. Éma, yátupiquene títaurahi; taicha éma, tatupiruva eta mahaquenucavahi. Éma, macatiuchavacahi ena náuriqueneanahi. Énasea ena tíchanahi eta tamauriqueneana, muraca eta máicuñasiravacahi. Étapa eta macanarairavacahi ena mánarana, vahi macapavacaimahi ena tájina navirevaina. Énasea ena nacaviurevanahi, máítaequenehavacayare. Eta tacahe, eta mamuiriha ticaepapamehi te iti. Eta máuquihana timuruhevaca tacutiyaereni eta yucu. Te machuti ticayehéhi eta camuriquene coronana. Tatiarihivare eta ajureca tíamahi eta apana máijare. Macarichusera ema téchahi eta tacayemaquenehi eta ajureca.

¹⁴Náehicapahi ena mayeheana ejército, tísihanahi te anuma. Namutu ticaperavaca eta cavayu tijapu. Eta namuirihana, amairiha eta táurinaquene lino tijapu.

¹⁵Te majaca ema tínapucapahi, tiúchucapa tavasimahiyaréni eta tacasiriquene espada eta macapasihayare ena mánarana. Macaratacahi eta mat-sucurupa fiérroqui eta macurujisiravacaya. Mácatayayajicavacayare ena

* **19:11-13** Te pivarahapuca pecha eta apana, pitanuca eta Juan 1.1-8.

mánarana tacutiyare eta nácatayayajisirahi eta uva eta nacuchusirahi eta tachi táitivequenehi. Éta tímereuchayarehi eta tamuracavayare eta náicuñaya, taicha tétavicavahi eta náimiyusemasirahi ema Viya ema máitupajijihaquenehi, máituruequenehavare tamutu.

¹⁶ Tatiarihivare eta ajureca te tacheyarapi eta mayehe capote tépacuchahi eta mapaheana. Eta táechajiriruva eta ajureca, ani tacahehi: “Éma yátupiquenehi Rey, Aquenucahivare. Mavanecahi ena réyeana énapa ena aquenucana”.

¹⁷ Nímahavarepa ema ángele titupihahi te tamirahu eta sache. Mapiaracavacapa eta cáyureana tiárarairicaráhiana te anuquehe. Ánipa macahe:

—¡Yare, emutu eti cáyureana, iúrujicava! Enicayare eta táurinisiquene tinicacare máeniruhezare ema Viya.

¹⁸ Enicayare eta náecheanaini ena aquenucanaini comandanteanaini, ena ajairanaini tímijachavana túmeana, énapa ena nayeheanaini ejército nasuntaruranainipahi, étapa eta táeche eta cavayu naperanaini. ¡Vénicaheyare namutu éna! —macahepa.

¹⁹⁻²⁰ Tacahe, nímahavarepa ema Útsutsure, énapa ena apamuriana majupahana aquenucana te avasareana, énapa ena nayeheana ejércitoana. Matiarihivarehi ema Falso Profeta, ema tímerecaparacainihi eta tiáramicareana, mavayuarauianahi nayehe ena achaneana eta náisapiravayarehi ticamarcana, natsiusirayarehiva eta máimahi ema Útsutsure. Tacahe, namutu ena náurujiruvanahi ticanaranahi ema ticaperahi eta cavayu tijapu énapa ena téhicanahi mayeheanapahi ejército. Tacahe, ena ángeleana nacaratapapa ema Útsutsure, émapa ema Falso Profeta. Tásiha, ena apinana náitareruichaha náepujuquichapa tayehe eta táijurequene yucu táetirarasina eta tamuruirá. Éta nacaicuñaiyahi.

²¹ Tásiha, ema ticaperahi eta cavayu tijapu, máijahúchapa macapapajicavaca ena suntarunana mánaranahi. Eta macaparaquí eta tacasiriquene espada táuchurehi te majaca. Tásiha, járajapapa eta camuriquene cáyureana, tanicapa eta náecheanaini. Tisatuhevacapa.

20

Eta táichavaquenevaya eta mil año

¹ Nímahavarepa ema émana ángele másihapahi eta te anuma. Mámapahi eta ichapepi cadena, étapa eta llave, tacaerataiyayare eta táupenaquene pusu.

² Tacahe, ema ángele macaratacapa eta táíñehiquene Serpiente, eta ticaetemarerechahi acane, émarichuhi ema Váinaraji Satanás. Tacahe, ticaitihapa ema Satanás tayehe eta ichapepi cadena. Mil añozare eta macaitiharayare.

³ Tacahe, ema ángele máiyaracuhapa éma eta te mávacu pusu táupenaquenehi. Manacapa eta llave, máerataequenehapa. Manacavarepa eta ajureca, ánipa tacahe: “Machu évejiaca eta juca tapaja”. Tayerevayare eta mil año, vahi ticaetemarecaimahi nayehe ena achaneana. Te táequenepasera eta mil año, tiúchujicainavarepa eta ticaetemarecainavarepa, ánipinesera.

⁴⁻⁵ Tacahe, nímahapa ena achaneana náechepureanahi nacaparuanainihi. Éna, táimicaparuanahi eta náehisirahi ema Jesús, étaripa eta nacametarairuirahi eta máechajiriruva ema Viya. Ena nani, vahi náepuyumirauchahini

ema Útsutsure, váhivare natsiucahini eta máimahi nasiñarajihí ena apamuriana achaneana, váhivare návarahahini nacamarcahíni eta te nanahu étapa te navahu. Ena nani, ena náinapurehí téchepecana te tamirahuichaha eta mil año. Nímahapa eta náejasiraipa te trono, catuparahanapa éna, juéseanaripa. Mil año eta nacatuparahairayare. Énaserá ena apamuriana náepenaqueneanapa masuapajirairahanainihí, vuíchaha téchepecanaimahi. Tiámainucava te táequenénapa eta mil año, napaenumavainapa téchepecanayare.

⁶ ¡Tiúricareanayare ena nani tiápechavanayare títarecana puiti juca! Masantuchainapa ema Viya. Vaipa tiápechavanaimahi tépenana. Vaipa ticaicuñanaimahi eta te táijurequene yucu. Tiyujaracarahianaya mayehe ema Viya, étapa me Cristo. Aquenucarahanayare, taicha ena Cristo máijaracainapa eta natuparahanayare. Mil año eta nacatuparahairayare.

⁷ Tásiha, te táequenénapa eta mil año, tiúchucainavarepa ema Satanás tayehe eta macaerataiyahi.

⁸ Tépanavainavarepa ticaetemarerecayare nayehe ena achaneana te tamutu avasareana. Étaripa eta apinaquene avasare ticajare Gog étapa eta Magog, macaetemaresihayare. Mayurucavacainapa eta nacatianasiraya ema Viya. Tásiha, ticurujicacanainapa ena nayeheana ejércitoana. Tétavicavainapa eta nasimutuvayare. Vaipa titupachacareana eta nasimutuvahi.

⁹ Tacahe, tiyananapa. Ichapecuequeanapaine eta nayanine, taicha eta nasimutuvahi. Nacapayacayarehí eta nachayasirayare eta avasare máemunaruinihi ema Viya, návihahí ena machanerana. Émasera ema Viya, enevanepa máitaequenehavacahí. Tiúcupaicapa eta yucu tiásiha te anuma, táijuchavacapa namutu. Nájina tacaemachaquenéna.

¹⁰ Tásiha, ema Satanás ema tivayuarecainihí, nacaratacapa náepujuquichapa tayehe eta táijurequene yucu, táetiraraisina eta tamuruira. Étaripa eta mávihahí ema Útsutsure, émapa ema Falso Profeta. Tájina nanarasiraimahi. Tamutu sácheana, yátiana eta nacatajivairaya, máichecuaraquireya.

Étapa tiámahaviyare eta víchaqueneanahí vicaevatainapa tayehe eta víavihayare

¹¹ Nímahavarepa eta ichapequene trono tijapu. Téjacahí ema Viya tayehe. Tétavicaavahí eta máramicarevahí. Eta nímararasirahí éma, némitiacapa. Vaipa necha távihapuca návihahí téhepuca anuma, téhepuca apaquehe.

¹²⁻¹³ Nímahavarepa namutu ena náepenaqueneanainí: ena amaperuana, énapa ena ichanaruana, énapa ena ichavicana. Taicha tichavanahí eta náchanevana namutu, téchepupujicanahí éna tayehe jácaní náepenineanainipahí. Namutu titupihanahí te mamirahu ema Viya téjacahí te trono. Tásiha, tatiarihí eta libro tiamo eta nalistana ena náitareruanaya. Tatiarihivare eta apamuriana libro tacajuiyahí eta náichavaquenevanahí ena achaneana. Ena ángeleana náechajicuhapahí. Nácaní náichahí eta tamauriqueneana, étapa tivíuchahí eta nacayaserehirayarehí, nacaicuñairayare. Te tivayuchapuca eta napecaturana, muraca eta náicuñayare.

¹⁴⁻¹⁵ Eta nacaicuñaiyahí eta táijurequene yucu, táetiraraisina eta tamuruira. Namutu ena tájinahí eta náijarénahíní tayehe eta libro tiamo eta nalista ena náitareruanayare, náepujuquichapa tayehe eta táijurequene yucu, tamutu eta náqueheana étapa eta náchanevana. Máitavacacainapa eta nacatajivairayare. Máitujianainapa tayehe.

21

Ticasipainapa eta anuma étapa eta apaquehe

¹ Nímahavarepa eta tacasipairaripahi, tamuturipahi arairu eta anuma étapa eta apaquehe. Tájina eta ichapequene une mar.

² Tásiha, nímahavarepa núti tiúcupaica eta tiúrina avasare. Ticajarehi Arairu Jerusalén. Tétavicavahi eta tasantuva, taicha tásihapahi te anuma te mávihahi ema Viya. Tiúrinapahi eta tacaetupirihirahi, tacutihi te ticaetupirihisu araimayare.

³ Nusamavarepa muraca eta mahu ema ángele, tiásihahi te anuma. Ánipa macahe:

—Puiti, ema Viya macucupaicapa eta mapena te juca apaquehe. Ánina macavasaya. Tiávahácahénapa eti achaneana. Yátupiquenénapa Ecaiyaqueneya éma.

⁴ Tacahe, ema Viya macamitiasinaheyare eta íyairana. Váipavare épenaimahi. Váipavare ecatisamurevaimahi. Tájina ticaiyacahémahi. Váipavare ecatajivaimahi taicha tájina tivichahémahi —macahepa ema ángele.

⁵ Tacahe, nusamavarepa eta mahu ema Viya ánipa macahe:

—Puiti tépanavapa arairu, tamutupa ticaitsiva nicha núti —macahepa.

Tásiha, máichanuvarepa ema ángele:

—Piájuchayare puiti eta juca, taicha yátupiqueneya eta táicharacavaya. Tamutuyare títauchava. Jéhevare eta tisuapacareana —máichanupa.

⁶ Ánivarepa macahe ema Viya:

—Títauchavapa puiti tamutu eta nupanereruana. Nútura néchahi tamutu eta táepaniravahi eta apaquehe. Nútirichuvare néchahi eta táimiyániravahi tiuri. Puiti núti nítauchapa tamutu. Eti emaunehi, núti níjaracaheyare eta máitavacaca une ticaitarecarahi. Tájina vahi evacharecaimahi.

⁷ Tacutiquene, eti ecamichanahi, ímianavahi eta éhisiranuhi, níjaracaheyare tamutu eta júcana ícuchianayarehi. Núti ecaiyaqueneya, taicha nuchichaheyare éti. Núti néchaheya éti.

⁸ Ticaicuñanayaresera namutu ena tipiturijiana, ena masuapajirairahana, ena máeperajiana, ena ticapahiana, ena túhusiana, ena íápemareana, ena ticasinrajiana eta achanemirana, énapa ena tépiyahirahiana. Ticaquijianayare namutu éna tayehe eta náicuchi táijurequene yucu máitavacaca eta tamuruira, táetiraraisina eta tamuruira. Váhiquene tiúchucanaimahi tayehe —macahepa.

Eta arairu avasare Jerusalén

⁹ Tacahe, tipauchanupa ema émana ángele nasietenehi ena ticaratacanahi eta siétequene escudilla tiámapahi eta siétequene ecuñaraqüiana táíñehiqueneana. Tásiha, máichanupa:

—Yare. Nímechaviyare eta avasare, návihahi ena machanerana ema Cordero. Tímicutijiricavahi esu araima sucaetupirihiquenehi eta suítauchiravayare —máichanupa.

¹⁰ Tásiha, ema Espíritu Santo tímimahanuhi eta mavarahaquene tímechanuya ema ángele. Ema ángele tiámanupa eta te tápusi eta ichapequene cerro anuquehequene. Tímechanupa eta táucupaisirahi eta avasare Arairu Jerusalén. Tétavicavahi eta tasantuva taicha tásihahi te anuma te mamirahu ema Viya.

11 Eta juca avasare, tétavicavahi eta tajaraivapahi taicha tiámahi eta mareaivahi ema Viya. Eta táimahi eta tajaraivahi tacutiyareni eta tajanunusira eta márijahi tijararacahi.

12 Te tachachacuana eta avasare, tatiarihi eta tacuti yúchama tímítutuche. Anuquehe eta táichapeva. Tatiarihi eta dócequene tapajacurana, távihahi eta ajureca náijare ena dócequeneanaini náchucanaini ena israelítana. Natiarivare ena ángeleana tayehe eta tapajacurana.

13 Tatiarihi mapana tapajacura te tinapaica eta táuchusine eta sache. Mapanavare tapajacura te tinapaica eta cajaha. Mapanavare tapajacura te tinapaica eta vana. Tásiha, eta mapanaquenevare te tinapaica eta tasiapine eta sache.

14 Te apaquehe eta yúchama, tatiarihi eta doce márimeana táejahameruanahi eta yúchama. Táimahi eta dócequene náijareana ena apóstoleana mayeaneanahi ema Cordero.

15 Ema ángele ema téchajicanuhi macaratacachi eta máicutiriqui úruqui, máicutichihayare eta tapajacurana étapa eta yúchamana.

16 Eta avasare falaru eta táimahi. Eta táunava ticuticacachi eta tajuhe. Dos mil doscientos kilómetro eta táichapeva eta avasare. Ticuticacachi eta táunava, eta tánuqueva, étapa eta tajuhe.

17 Máicutichavare eta yúchama. Sesenta y cuatro metro eta tánuqueva.

18 Eta yúchama amairiha mari jaspe timájumeana. Eta avasare amairiha eta yátupiquene oro. Tijanunucachi tacuti eta cristale eta tajarahivahi.

19 Eta márimeana tachunusipévanahi eta yúchama, tatiarihahi eta táurinaqueneana mari. Eta tinapuca tacayehehi eta mari ticaijare jaspe. Eta apana tacayehehi eta ticaijare zafiro. Eta apana tacayehehi eta ticaijare ágata. Eta apana tacayehehi eta ticaijare esmeralda.

20 Eta apana tacayehehi eta ticaijare ónice. Eta apana tacayehehi eta ticaijare cornalina. Eta apana tacayehehi eta ticaijare crisólito. Eta apana tacayehehi eta ticaijare berilo. Eta apana tacayehehi eta ticaijare topacio. Eta apana tacayehehi eta ticaijare crisoprasa. Eta apana tacayehehi eta ticaijare jacinto. Eta téqueneha tacayehehi eta ticaijare amatista.

21 Eta dócequene tapajana tacayehehi eta doce perla. Teyehepachuhi eta tapaja eta étana perla. Eta tinapuca calle, tacayehe eta yátupiquene oro, tijanunucachi tacuti eta cristale eta tajarahivahi.

22 Te jena avasare, tájina nímahahini eta Templo nayujarasirarenahini. Tájina tácamunuhini eta nayujarasirareyare taicha matiarihahi ema Viya máitupajijihaguene máituruequenehavare tamutu, émapa ema Cordero. Návháruhi namutu.

23 Tacutiquene, vahi tácamunuhini eta sache étaripa eta caje eta tamicauchirainahini eta avasare. Taicha tamicauhahi eta majaraiva ema Viya, émapa ema Cordero.

24-26 Tájina táimatiyaimahi ticaerata eta tapajana, taicha tájina timapicuina tayehe, tájinavare yátina. Tásiha, namutu ena achaneana te apanana avasareana macuchucureanahi ema Viya, ichape eta napicauchirayare eta Arairu Jerusalén, ichapevare eta nacunachirayare. Tisuapajirahianayarehi tayehe eta vanairipiana tásihaqueneanahi eta juca mávasa ema Viya. Énerichuvare ena aquenucana te avasareana, ichape eta námavahuanayare me Viya te jena avasare mávihahi éma.

27 Tájina náimatiyaimahi tisiapana ena nachipejiqueneana énaripa ena tícharahiana eta tamaeperajivaqueneana énaripa ena ticaetemarahiana.

Nacarichu tatuparaca tisiapanayare ena tatiarihi eta náijareana tayehe eta libro macarataru ema Cordero, tiama eta nalista ena náitareruanayare.

22

¹ Tásiha, ema ángele tímechanuvarepa eta tapachinaquene cajacure. Tétavivacavi eta tacaitarecaravahi eta tahunera. Tacutiyaeni eta cristale eta tajararaesira. Eta táuchusihahi eta mayehe trono ema Viya, émapa ema Cordero.

² Tacahe, tatiarihahi eta yucuquiana, ticaitarecarahi eta tahi. Eta távihahi te enumuhuiyapahi eta títapuca calle, te tachaupahivare eta cajacure. Tásiha, dócehe ticahi te étana año. Cájepachu eta tacahira. Ipurujivare eta tapacaji, tacanaraca ena achaneana te avasareana.

³ Tájina pa tímiapachaimahi tiviuachaimahi ena achaneana ticavasana tayehe eta juca avasare, máejasihahi ema Viya, émapa ema Cordero. Vimutu viti mavanaranahi, máitavacayarehi eta vijirauchirayarehi, vitsiuserayare.

⁴ Vímararacayare eta mamira tamutu sácheana. Vicamaracayare eta máijare te vinahu.

⁵ Aquenucahaviyare. Máichecuaraquireya eta vicatuparahairayare. Ánaqui tájinapa yátina, tájinainapa eta timapicu. Vaipa vicamunuimahi eta tajarai va eta sache. Váhivare vicamunuimahi eta vimícahu. Taicha tamicauchayare eta majaraivahi ema Viya.

Tiánehipa eta máitesirayare ema Jesucristo

⁶ Máichanuvarepa ema ángele:

—Eta juca nímeruvihí, yátupiquene ya eta táicharacavaya. Tamutuyare títauchava. Jéhevare eta tisuapacareana. Taicha émarichuhi ema Viya tivane-canuhi eta nímitusiravi píti. Acane ema Viáquenu máimitucavacahi ena profetana eta mapanereruana. Puiti mavaraha nímechaheyare eti mavaner-anahi eta táequenereruhana mapanereruana, tayehe eta táijahúchirainapa eta táichavaquenevaya.

⁷ Énerichuvare ema Viáquenu máichahehi: “Níjahúchavanénapa nútijapa”.

¡Tétavicava eta náuricacarevaya ena tisuapanahi, napanerequenehairahi eta nímechaviqueneanahi, étaripa eta piájurequeneanahi te juca libro! — macahepa ema ángele.

⁸ Tétavicava eta náramirahi nútí eta nímairahi tamutu eta júcana, nusamirahi nuti Juan. Tásiha, te tamutupa, népuyucapa te máivapeana ema ángele ema tímechanuhi eta juca. Nuvarahapa nutsuicayarehini.

⁹ Émasera máichanupa:

—Péhepucachucha. Vahi picutsiucanu. Taicha nútirichuhi picutiquenenuhi mavanaranuhi ema Viya, énapa ena pichamurianahi ena ticameta-rairuana eta máechajiriruvana ema Viya, énaripa ena tisuapanahi tamutu eta tacajuqueneanahi te juca libro. Éma tatuparacahi pitsuicayare ema Viya — máichanupa.

¹⁰ Énerichuvare máichanuvarepa:

—Vahi picuañaucha. Pimetajirica eta juca pimetacasivanahi eta máechajiriruva ema Viya piájuchaqueneana eta te juca libro, taicha tiánehipa eta táitachiravayare tamutu eta táicharacavayarehi.

11 Én asera, nácani váinarajianahi, vahi picucamesavaca. Náimiyana-vachaha naicha eta navainarajiva. Nácani tíchanahi eta tauriqueneana, náimiyana-vachaha naicha eta tauriqueneanahi. Nácansera tíchanahi eta táuriqueneana, tatuparacahi náimiyana-vachucha naicha eta táuriqueneana. Nácani matapiravareanahi te mamirahu ema Viya, náimiyana-vavare náuri eta mayehe — máichanupa.

12 Ánivare macahe ema Viáquenu:

—Nútijapavanénapa. Námayarepahi eta nájaracasianayrajiva. Nácani tíchanahi eta tauriqueneana, náre ena ticaemataneacuananahi eta náitaresirahi te juca apaquehe. Énerichuvare námayarepahivare eta nayeheanayare ena masuapajirairahana.

13 Nútira néchahi tamutu te tépanavainapa eta apaquehe. Nútirichuvare néchahi eta táimiyániravahi tiuri. Puiti núti nítauchayare tamutu — macahepa.

14 Tétavicava eta náuricacarevayare nácani tépachinachana eta náchanavana, tacuti te ticasipajihana eta namuirihana. Éna tatuparacahi nanicayarehi eta tahi eta yucucuí ticaitarecarahi. Tatuparacahivare nasiapayare eta Arairu Jerusalén.

15 Én asera ena masuapajirairahanahi vahi títujicavanaimahi tisiapana. Nanasiyare te aneca, énapa ena iápemareana, ena túhusiana, ena ticapahiana, ena ticasañarajiana eta achanemirana, énerichuvare ena tíuricanahi tépiyahirahiana ticaetemarrahiana.

16 Macahevare ema Viáquenu:

—Nuti Jesús, nuvanecahi ema nuyehe ángele máimicaecherachayarehi tamutu eta juca numetarapiana puiti eyehe eti nuchanerana te avasareana. Núti, yátupinuhi Reyhi ecuchapaquenehi, mavanerunuhivare ema Tata. Tétavicavahi eta nujaraivahi taicha eta aquenucairanuhi ichape — macahepa.

17 Ema Espíritu Santo énapa ena téhicanahi ema Cordero, tíchuarecana éna:

—Yare, epauchahavi — náichapa.

Énapa nácani tisananaya eta juca ichuárapi, énerichuvare éna náichuarecavare:

—Yare, epauchahavi — náichapa.

Énapa nácani timauneanayare, náiteca apaesa náera eta une ticaitarerahi. Tájina vahi navacharecaimahi.

18 Emutu eti esamayare eta juca mametarapiana ema Viya tacajuque-neanahi te juca libro, nuvaraha numetacahe núti: Nácani navayuyupicayare eta táechajisihaqueneanahi eta juca libro, énerichuvare ema Viya mavayuchinayare eta nacatajivairayare tayehe eta juca ecuñaraquianayare táechajisihaqueneanahi.

19 Énerichuvare ecaunehava eta iáñauchira eta táechajisihaqueneanahi te juca libro, machu máñauchahe ema Viya eta esiapira eta juca mávasa sántoquenehi, machu vahi macuenicahé eta tahi eta yucucuíana ticaitarecarahiana, étaripa nímahaqueneanahi nájurequeneana te juca libro.

20 Émarichu ema Viáquenu títametacahi tamutu eta júcana. Énerichuvare máichahehi:

—Yátupi nútijapavaneyare — macahehi.

¡Jéheyavapuca, Tata Jesús! ¡Pítecavanepaini! Amén.

²¹ Ani táichecuiya eta juca nájurehi. Nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha.